


Niospa meka fena
Jesucristoñoa



New Testament in Yaminahua (PE:yaa:Yaminahua)

Niospa meka fena Jesucristo^{noa} New Testament in Yaminahua (PE:yaa:Yaminahua)

copyright © 2008 Wycliffe Bible Translators, Inc.

Language: Yaminahua

Translation by: Wycliffe Bible Translators, Inc.

Yaminahua [yaa], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yaminahua

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 18 Apr 2025 from source files dated 29 Jan 2022
6c7b7ce2-9d87-5405-91e6-71ce1387adcc

Contents

MATEO	1
MARCOS	50
LUCAS	78
JUAN	127
LOS HECHOS	161
ROMANOS	203
1 CORINTIOS	225
2 CORINTIOS	249
GÁLATAS	263
EFESIOS	271
FILIPENSES	279
COLOSENSES	284
1 TESALONICENSES	289
2 TESALONICENSES	293
1 TIMOTEO	296
2 TIMOTEO	302
TITO	306
FILEMÓN	309
HEBREOS	311
SANTIAGO	328
1 PEDRO	334
2 PEDRO	340
1 JUAN	344
2 JUAN	350
3 JUAN	351
JUDAS	352
APOCALIPSIS	354

Mateo Jesúsnoa Yoikĩ Keneni

Jesucristo áfe xinifáfe anefo

(Lc. 3.23-38)

¹ Ë mato yoinõ a taeyoi ipaonifo Jesucristo áfe xinifo. Jesucristo áfe xini David. Nã David áfe xini Abraham. Nãfo Jesucristo áfe xinifo taeyoi iyopaonifo.

² Nã Abraham áfe fake Isaaca ini. Isaaca áfe fake Jacobo ini. Jacobo fake Judá ini. Áfe extofori ini.

³ Judapa fake Fares fe Zara ini. Áto afa Tamar ini. Fares áfe fake Esrom ini. Esrom áfe fake Aram ini.

⁴ Aram áfe fake Aminadab ini. Aminadab áfe fake Naasón ini. Naasón áfe fake Salmón ini.

⁵ Salmón fake Booz ini. Booz áfe afa Rahab ini. Booz áfe fake Obed ini. Obed áfe afa Rut ini. Obed áfe fake Isaí ini.

⁶ Isaí áfe fake xanifo David ini. Xanifo David áfe fake Salomón ini. Salomón áfe áfa fene fetsaya iyopaoni, Urías.

⁷ Salomón áfe fake Roboam ini. Roboam áfe fake Abías ini. Abías áfe fake Asa ini.

⁸ Asa áfe fake Josafat ini. Josafat áfe fake Joram ini. Joram áfe fake Ozías ini.

⁹ Ozías áfe fake Acaz ini. Acaz áfe fake Ezequías ini.

¹⁰ Ezequías áfe fake Manasés ini. Manasés áfe fake Amón ini. Amón áfe fake Josías ini.

¹¹ Josías áfe fake Jeconías ini; áfe extofori ini. Mã Jeconías rama xanifo ikaino, Babilonia anoax xanifáfe áfe sorarofõ nĩchini israelifo ato ifitanõfo anã ato yonomaxikakĩ. Mã sorarofáfe ato iftanaifono israelifo Babilonia ano fonifo. Jeconíasri yonifo. Jeconías áfe extofori kainifo.

¹² Nãskata Babilonia anoax fake fetsafori kainifo. Jeconías áfe fake Salatiel ini. Salatiel áfe fake Zorobabel ini.

¹³ Zorobabel áfe fake Abiud ini. Abiud áfe fake Eliaquim ini. Eliaquim áfe fake Azor ini.

¹⁴ Azor áfe fake Sadoc ini. Sadoc áfe fake Aquim ini. Aquim áfe fake Eliud ini.

¹⁵ Eliud áfe fake Eleazar ini. Eleazar áfe fake Matán ini. Matán áfe fake Jacobo ini.

¹⁶ Jacobo áfe fake José ini. Nã José áfe áfi ini, María. Nã María fake ini, Jesús. Jesús áfe ane fetsa Cristo ini.

¹⁷ Abraham áfe fenafo ichapa ini, nã David kainitĩa catorce inifo Abraham áfe fenafo. Askatari nã David áfe fenafo ichapa ini. Nãskano David áfe kaifo yora fetsafáfe Babilonia ano ato iyonifo ato yonomaxikakĩ. Babilonia ano ikanax David áfe fenafo catorce inifo. Askatari David áfe fenafo Babilonia anoax anã fenifo áto mai ano. Mã fenixakakĩ David áfe fena fetsafori kainifo catorce inifo. Askatari Cristo kaini.

María Jesucristo kãini

(Lc. 2.1-7)

¹⁸ Ë mato yoinõ ea nikakapo afeskax Jesucristo kãinimakĩ. José fe María yoinãyonifo fianãxikakĩ. Fianãyofafomano Niospa Yõshi Sharapa María fake nanemani.

¹⁹ José Nios Ifofasharakõiax sharakõini. Nãskaxõ José María yõapainima yorafáfe ferotaifi. Fomãxopaoni. Nãskaxõ tsoa yoixoma José María enepaini.

²⁰ Nãskano José áfe namapa õini Niospa áfe ájirinĩ yoiãito. Yoikĩ iskafani: “José, rateyamafe María fe fianãxiki. Na fake nanea Niospa Yõshi Sharaõxõ akaki.

²¹ María fake feronãfake fii kiki. Mĩ anekĩ Jesús faxikã. Nãato ato ifipakenakakĩ. Nãskaxõ áfe yorafo áto chaka soaxoxii kiki ato nimapakexakĩ,” ixõ ájirinĩ José yoini.

²²⁻²³ Chanĩmakõi nãskakõi nã Nios yomisto yoini keskarakõi. Iskafakĩ kírika keneyoni Niospa shinãmanaino:

Këro xotofake feronãfake fe imisma fake onixii. Fake feronãfake fixõ anekĩ Emanuel faxii,

ixõ yoini. (Akka nõko mekapa Emanuel fakĩ, “Nios nofe ika,” ixõ nõ yomis.)

²⁴ Mã ájirinĩ yoiãno José moinãkafani. Nã ájirinĩ yoiã keskafakĩ, José María fini. Mã fixõ áfe pexe ano yoini.

²⁵ Mã áfe fianãx áfe chotanãnima áfe fake kãiyonõ. Mã fake kãiano anekĩ Jesús fani.

2

Feronãfakefo fishi tãpikõimisfo a xini oaikirinoax mai fetsa anoax Jesús õipai fenifo

¹ Herodes xanifo ikano Jesús kãini Belén pexe rasi anoax, Judea mai anoax. Nãskano a xini oaikirinoax mai fetsa anoax feronãfakefo fishi tãpikõimisfo fenifo Jerusalén ano.

² Nokotoshikaxō yōkanifo: “¿Fanīmē a rama kāia judeofāfe āto xanīfo ikai? Mā nō ōia āfe fishi oaito. Nāskakē nō oa Jerusalén ano xanīfo ōiyoi. Nō akiki inimai nō oa, ‘Mī nōko xanīfokōi, ixō yoipaikī,” fanifo.

³ Askafaifono fetsafāfe yoiaito nikakī Herodes shināchakakōini xanīfo iki kiki ixō. Askatari keyokōi Jerusalén anoafāferi shināchakakōinifo.

⁴⁻⁵ Akka Herodes judeo inima. Nāskaxō ato kenamani a ato Nios kīfixomis āfe xanīfofo fenōfo ato yōkaxiki. Askatari a Moisés yoikī kirika keneni keskara ato tāpimamisfo ato kenamani ato yōkaxiki. “¿Fanīax Cristo kāixiimē?” ato faito kemanifo iskafakakī: “Belén anoax iki, Judea mai anoax,” fanifo. “Niospa meka yoimisto nānori kirika keneyoni a inōpokoai yoikī Niospa shināmanaino. Iskafakī keneni:

⁶ Belén, Judá mai anoax pishtakōi. Akka pexe rasi fetsafo efapakōifo. Askafiax Belén sharafinakōia ixii māmāi israelifo āto xanīfo finakōia kāixiaino Belén anoax. Nāskakē āfe inakōifo israelifo āto xanīfokōi ixii,

ixō kirikakī keneni Niospa meka yoimisto Niospa shināmanaino,” fanifo.

⁷ Nāskakē Herodes a fishi tāpimisfo ato yōkani onexō tsōa nikayamanō: “¿Afetīa fishi mā ōitamē?” ato fani.

⁸ Nāskaxō ato nīchini Belén ano. Herodes tāpipaikī, “Belén ano fotakāfe a fake tāpixikakī. Mā fichixō ea yoifexikakī ēri akiki inimaikanō,” ato fani āa ato pārakī.

⁹ Ato askafaino fonifo. Fokakī fishi rekē kaino chīfafainifo. Nāskax fishi nēteni nā fake yome ano.

¹⁰ Nā fishi anā ōikanax inimakōinifo.

¹¹ Nāskakanax pexe mēra ikifaikaxō fake yome fichinifo afa María yafi. Mā fichikaxō ratokonō mai chachipakefofānifo, a fakeki inimakakī. Nāskakaxō āto kafo fēpekaxō afama mīshiti sharakōifo Jesús inānifo. Oro minikāta, pirofomāri mininifo a nō koofatiro pirofomā nakas sharakōi. Askatari pirofomā fetsari āfe ane mīra inānifo.

¹² Nāskakē namakē Niospa ato yoiano anā Herodes ano fonifoma. Fai fētsa fonifo āto mai ari.

María feta José Jesús ichokinifo Egipto mai ari

¹³ Askata a fishi tāpimisfo mā foaifono, José namakē, Niospa āfe ājirinī yoini: “Moinākafafe. Mī āfi feta mī fake yome ichokitāfe Egipto mai ari. Nāri ikiyoxiki nā ē mato yoiaino mā anā onō. Herodes na fake yome fenai kiki retepaikī,” Niospa ājirinī José fani namakē.

¹⁴ Nāskata moinākafata, nā fakishi fonifo María fe José āto fake Jesús iyoi fokani Egipto ano.

¹⁵ Egipto ano José fe María ipaonifo mā Herodes naano fexixakakī. Nāskakē Egipto ano iyopaonifo. Niospa meka yoimisto nānorikōi kirika keneyoni Niospa shināmanaino iskafakī: “Ēfe fake ē kena Egipto ano,” ixō Niospa meka yoimisto kirika keneni.

Fakefo retenōfo Herodes ato manamani

¹⁶ Fishi tāpimisfo Herodes fomākani. Fai fētsa foafono nikai, Herodes ōitifishkikōini. Fishi tāpimisfāfe taeyoi Herodes yoionifo ato yōkaito iskafakakī: “Afetīama nō nā fishi ōikī taefati, mā xini rafe aka,” fanifo. Nāskakē Herodes sorarofa ato manamani fake feronāfake xini rafe akafo, yome mīshitifoya ato retenōfo, Belén anoafō retekāta, a Belén pasotai ikafori ato retenōfo.

¹⁷⁻¹⁸ Nāskara taeyoi Jeremías Niospa shināmanaino kirika keneyoni a inōpokoai yoikī. Iskafakī keneni:

Ramā anoxō nikanifo fāsikōi oiaifono. Raquel oiaito nikanifo āfe fake manoi, mā āfe fake nano. Oiyayamafe fafiaifono nishpanima, ixō Jeremías keneni.

Nā Jeremías yoini keskara mā askakōia.

¹⁹ Mā Herodes naano Niospa ājirinī afianā José yoini namakē iskafakī:

²⁰ “Moinākafafe. Mī āfi feta mī fake iyotaxiki Israel mai ano. A fake yomefo retepaimisfo mā naafokī,” fani.

²¹ Nāskafaino moinākfani José. Āfe āfiri mōini āfe fake yafi. Nāskakanax Israel ano anā fonifo.

²² Mā fōkakī nikanifo ato yoiaifono Herodes fake Arquelao mā xanīfokē Judea anoax. Nikai José rateni Judea ano kapai. Nāskaito anā ājirinī José yoini namakē iskafakī: “Galilea mai ano katāfe,” fani. Nāskafaino fonifo Galilea ano āfe āfi fe Jesús iyokani.

²³ Nāskax nokonifo Nazarete pexe rasi ano. Nāno inifo. Nānori taeyoikōi Niospa meka yoimisfāfe yoionifo, “Cristo Nazarete ano imis,” fakakī, a inōpokoai yoikakī. Nāskakōini.

3

Juan Maotista tsōa istomaxō ato yoini
(Mr. 1.1-8; Lc. 3.1-9, 15-17; Jn. 1.19-28)

¹ Jesús Nazarete ano ikano Juan ato maotisafapani tsōa istoma ixō Judea mai anoxō. Nānoxō Niospa meka ato yoipaoni.

² Nānoxō ato yoipaoni iskafakī: “Yorafāfe, anā Nios shinākāfe. Māto chaka xatekōikāfe, a mā chakafamis shināmakikāfe. Niospa meka nikakōikāfe. Mā chaima nōko Ifo Nios oi kiki nōko xanīfo finakōia ixii kiki,” ixō Juan ato yoipaoni fāsikōi.

³ Isaías kirika kenekī yoiyoni a inōpokoai yoikī Niospa shināmanaino. Iskafakī yoini: Tsōa istoma anoxō yorafo yoixii akiki feaifono. Iskafakī ato yoixii: “Mā nōko Ifo oi kiki. Nāskakē itipinīsharakāfe. Āfe fai sharafaxokāfe. Māto chaka xatekāfe,” ixō ato yoiaito nikaxikani,

ixō Isaías kirika keneyoni Juanoa yoikī.

⁴ Akka Juan āfe rapati kamīcho fichi kishi faxō safepaoni. Āfe sītorari fichi koiro safepaoni. Nāskaxō tseo pipaoni, fonari apaoni.

⁵ Nāskano Jerusalén anoafo yafi Judea anoafo fenifo Juan nikai fekani. A faka Jordán chaima ikafori fenifo.

⁶ Mā fēkaxō Juan yoinifo a afara chakafamisfo. Nāskaxō āto chaka xatepaiyaifono Juan ato maotisafapani faka Jordán anoxō.

⁷ Nāskaifono fariseofo xanīfo metsamafo feaifono, saduceofo xanīfo metsamafori fenifo Juan ano. Ichapakōi fenifo, “Nokori Juan nashimanōra,” ikanax. Juan ato ōikī ato iskafani: “¿Afesikai mā ea ano oimē? ¿Ē mato maotisafapanō mā oimē? ¿Tsōa mato yoiamē? Mā shināiraka nō chiiifā mēra katirora ixō nāskax mā maotisapaimē, nō chiiifā mēra kayamanōra ikax. Maa, mā kai afaa tāpiama, askax mā maotisatiroma. Mā Nios Ifofaima. Mā oa shano keskara māto ōiti chakakōi. Nāskaxō mā Satanás ifofaa. Nāskakē kaxpa ē mato maotisafatiroma māmāi Satanás fisti shināito. Āa fētsa mato pāratiro nō maotisanō nō chiiifā mēra kaimakai Nios nikayamafix ixō mato pārano mā chiiifā mēra katiro fetsa afaa tāpiamato mato pārano. Askara Niospa mato ifitiroma mākaikōi shināito, ēroko mato maotisafaano.

⁸ Māto chaka xatekāfe, Nios shinākāfe. Mā Nios shināito ē mato maotisafapakai.

⁹ Ē mato anā yoinō nikakapo. Mā shināitiro: ‘Nā Abraham nōko xini ipaoni, ōiti sharayaxō Nios shināpaoni.’ Akka mā shinākī: ‘Nōmāi Abraham fenaxō nō shara shināi,’ ixō mā shinākī mā shināsharaima. Askara shināyamakāfe. Akka māto ōitinī mā chaka shināfi mā chanī. Nikasharakōikāfe, ē mato yoinō. Na tokiri Niospa onifaxō nīchikē mā ōitiro Abraham āfe fena inō. Nāskakanax Abraham fakefo itirofo na tokiri ōikī Nios shinākanax. Akka mā kai anori shināima mā mā chanī: ‘Abraham shināpaoni keskara nō shināira,’ ikax. Askara shināyamafi Satanás fisti ifofafai.

¹⁰ Akka fana fimiyaimito ifāfe reratiro. Āfe tapori tsekaxō koofatiro anā niyamanō. Nāskarifikā mā Nios nikakaspaito a omiskōipakenakafo mēra Niospa mato potaxii mā chaka xateaxma mā isharayamaito.

¹¹ Nāskakē ē mato maotisafai māto chaka mā xatepaiyaito Nios Ifofapaikī. Akka nā ea keskarama mā chaima oi kiki, nā sharafinakōia. Āato afama mīshiti fatiro, ē atiroma keskara. Akka ē afaama. Mā Nios chanīmara faino aato āfe Yōshi Shara mato mēra naneyoi. Akka tsōa Nios chanīmara fayamaito, Niospa mato omiskōimaxii.

¹² Akka yōra āfe tarepa aros fanaxō mā pachiano topitiro. Nāskaxō katotiro a sharafo fixō a chakafo potaxō koofatiro. Nāskarifikā a chipo oaito a chanīmara faafo yafi a nikakaspamisfo ato paxkanāfaiyoi. Nāskaxō a chanīmara faifo a ika ano ato iyoxii afe isharapakexanōfo. Akka nā nikakaspamisfo chiiifā mēra ato potano anoax omiskōipakenakafo. Chiiifā mēranoax omiskōi xatenakafoma,” ixō Juan ato yoini.

Juan Jesús maotisafani faka Jordán anoxō
(Mr. 1.9-11; Lc. 3.21-22)

¹³ Askata Galilea anoax Jesús kani faka Jordán ari Juan maotisafanō.

¹⁴ Akiki nokoaino Juan Jesús iskafani: “Jesús, ¿afeskakī ē mia maotisafatiromē? Akka mīroko ea atironō,” fani.

¹⁵ Askafaino Jesús kemani iskafakī: “Epa Niospa noko yoia keskara keyokōi nō nikakōitiro. Nāskakē ea mīa maotisafatiro,” fani.

Jesús askafaino, Juan Jesús maotisafani.

¹⁶ Nāskata Jesús faka mēranoax fininākafānaino nai fepekemetani. Ariax Niospa Yōshi Shara akiki fotoni, oa rifi keskara Jesús ōiaino.

¹⁷ Askaino nai mēraxō Āpa yoiaito nikani iskafaito: “Mī ēfe Fakekōi ē mia noikōi. Ē mikiki inimasharakōi,” ikaito nikanifo.

4

Satanás chakata Jesús afara chakafamapaini

(Mr. 1.12-13; Lc. 4.1-13)

¹ Nāskaino Niospa Yōshi Sharapa Jesús iyoni tsōa istoma anoxō Satanás afara chakafamapainō.

² Mā cuarenta nia oxax Jesús fonāikōini afaa pishta piyamax.

³ Nāno Satanás akiki nokoni. Mā akiki nokoxō ifofamapaini. Askatari chakafamapaini. Iskafakī yoini: “Mī Niospa Fakemāki na tokirifo pāa fapo,” fani.

⁴ Askafaito Jesús kemani: “Maa, na mī ea yoiai keskara ē akima. A nō piat fisti nō shināima nipaikī. Akka Epa Niospa āfe meka fisti shara nō shinātiro. Nāskara Niospa meka yoimisto keni,” Jesús fani.

⁵ Jesús askafaino Satanás iyoni Jerusalén ano a Nios kīfiti pexefā māmākīa.

⁶ Nānoxō yoini iskafakī: “Mī Niospa Fakekōiaxroko mī niriāx ichopakekafanikai. Mī ichopakekafanax mī afeskaimakai. Nā Niospa meka kirikaki keneaki iskai: ‘Niospa āfe ājirifo yoixii mia kexenōfo.’ Askatari kirika keneano iskaki: ‘Mī āto mifiki pakeaito mia achixikani kiki mī tokiriki pakenōma,’ kirika kenea iskaki,” Satanás Jesús fani.

⁷ Askafaito anā Jesús kemani: “Akka na kirika keneano yoinifo iskafakī Niospa meka: ‘Nōa nō meka fetsafaxō nō yoitiroma: “Ē afara afeskarafaito, ea Niospa kexei,” ixō nō shinātiro. Akka, “Niospa ea amapaiyai keskara nā fisti ē atiroki Niospa ea kexenō,” ixō shinākāfe; ikaki na kirika keneano,” Jesús fani.

⁸ Askata Satanás Jesús iyoni māchifā mānānē. Arixō ōimani nā maifo tii sharafinakōia.

⁹ “Ōipo. Mī ea ratokonō mai chachixō, ‘Mī ēfe ifoki,’ mī ea faito na maitio keyokōi ē mia inātiro mī āfe ifo inō,” fani.

¹⁰ Askafaito Jesús kemani: “Satanás. Emakinoax katāfe. Ē mia ifofaimakai. Na kirika kenea ano Niospa meka yoimisto iskafani: ‘Nā nōko Ifo Nios fisti nō ratokonō mai chachixō nō yoitirokī, nā fistimāi nōko Ifokē,’” fani.

¹¹ Askafaino Satanás Jesús makinoax kaino Niospa āfe ājirifo akiki fotonifo pimaxikakī.

Galilea anoxō Jesús ato yoikī taefani

(Mr. 1.14-15; Lc. 4.14-15)

¹² Akka mā Juan sorarofāfe karaxa mēra ikimana nikata Jesús Galilea mai ano anā oni.

¹³ Nazarete anoax Capernaúm ano nokoni ano ixiki. Nā Galilea ĩa kesemē Capernaúm ini. Nānori yora fetsafari osia ini. Zabulonōfo fe Neftalifo ano ikafo ini.

¹⁴⁻¹⁶ Isaías kirika kenekī yoini keskakōi Jesús nāno ipaoni. Isaías kirika kenekī iskafani:

Zabulonōfo fe Neftalifo āto mai ano ikafo ĩa Galilea ano. Faka Jordán okiri chai poketa nāno judeofoma fakish mēra ika keskara, Niospa meka nikakatsaxakakima. Fakish mēra ika keskara ifiakaxō, oa koshi penai keskara ōixikani. Fakish mēra ipafikeranaxakakī atoki penarisatani,

ixō Isaías a inōpokoai yoikī Jesúsnoa keni. Nāskarifiāi omiskōipakenakafo mēra ikeranafo. Askafikeranafono atoki Jesús nokoaitīa nā Ifofafo tii ato nimapakenaka.

¹⁷ Anoxō Jesús ato yoikī taefakī iskafani: “Mā chaima nōko Ifo Nios xanīfo finakōia oi kiki. Nāskakē shināmitsayanā mātō chaka xatekāfe. Afaa chakafatamaroko Niospa meka nikakōikāfe,” ixō Jesús ato yoini.

Jesús cuatro feronāfake kenani tarafanāfānē foe fimisfono āfe inakōi inōfo

(Mr. 1.16-20; Lc. 5.1-11)

¹⁸ Ato yoita Jesús Galilea ĩa kesemē kani. Kakī fichini Simón yafi onefetsa Andrés. Simón āfe ane fetsa Pedro ipaoni. Nā rafeta tarafanāfānē fimisfo inifo, āto tarafanāfā faka naki poteaifāfe.

¹⁹ “Efe fokāfe. Māfi tarafanāfānē fimiskī. Mā foe ichapa rasi tarafanāfānē fiai keskari fakī iskaratīari mā ekeki yora ichapa efexii ē āto Ifo inō,” ixō Jesús ato yoini.

²⁰ Ato askafaino tarafanāfā fafaikani afe fonifo.

²¹ Askata ori chaimashta kaxō Zebedeo fake raferi fichini, Santiago yafi Juan. Nā rafeta āto apa feta kanōa nakixō tarafanāfā itipinī fanifo, kishifakākī. Nā raferi, “Efe fokāfe,” Jesús ato fani.

²² Ato askafaino āto apa kanōa ano nīchifainifo Jesús fe fokakī.

Jesús yora ichapafō tāpimani

(Lc. 6.17-19)

²³ Mā askafaxō afe foafono nā Galilea anoafō kafāsakī Niospa meka ato yoini. Judeofāfe ichanāti pexe mēraxō Jesús ato Niospa meka shara yoisharakī iskafani: “Itipinīsharakāfe. Nios nonoax māto xanīfo ipai kiki,” ixō ato yoiofōfāsafani. Askatari a isinī ikaifo fetsa fetsatapafo ato sharafāpani.

²⁴ Askafaano nikakaxō Siria mai anoafō isinī ikaifo akiki efenifo ato sharafapanō. Isinī ikaifo fetsa fetsatapafo akiki efenifo. A yōshi chaka āto mēra naneafori ato sharafani. A nīsoaifori efeta, a finimismafori efeta, a chatofori efenifo. Ato keyokōi sharafapani.

²⁵ Askafaito yorafā rasichi chīfafainifo. Atiri Galilea anoax fonifo, atiri Decápolis anoax fonifo, atiri Jerusalén anoax fonifo, atiri Judea anoax fonifo, atiri faka Jordán okirinoax fekāta Jesús chīfafainifo.

5

Machi mǎnǎnēxō Jesús ato yoini

(Lc. 6.20-23)

¹⁻² Yorafā rasi akiki feaifono ōi Jesús ato paxafāini kaax, machi pochini tsaoni. Tsaono āfe meka tāpipaimisfo akiki fenifo. Āfe meka nikai fekani. Akiki feafono ato yoiki iskafani:

³ “Fētsa āto shinā mēraxō shināki iskafax: ‘Ēakai ē isharatiroma. Ē Nios yopakōi, ikaito Niospa inimamaxii māmāi Nios Ifo sharafaino āfe fakekōi inō.

⁴ “Fetsa shināmitsakōifiaino chipo Niospa noiki inimamaxii.

⁵ “Fetsa kakapaimisma imisno Niospa inimamasharaxii. ‘Keyokōi maito atonā ixii,’ ixō Niospa yoiyoni keskara atonāri ixii.

⁶ “Fētsa Niospa meka noikōiki Niospa ato imapaiyi keskara shara ipaikōikani, nā keskarafo Niospa ato inimamaxii.

⁷ “Fētsa fetsafori noiki ato sharafaito Niospa tāpia. Nāskakē ari Niospa noiki axosharapak- enaka inimamakī.

⁸ “Fētsa Nios shināsharakī, āfe ōiti mēra afaa chaka shinātama Nios fisti shināki chipo Nios ōixii. Nāskax inimakōixii.

⁹ “Akka noikaspa faatanāifono fētsafāfe ato raenā faano, nāfo Niospa ato yoiki iskafaxii: ‘Mā ēfe fakefo,’ ixō ato yoiaino inimakōixikani.

¹⁰ “Fētsa Nios Ifofasharapaiyaino, fetsafāfe ato omiskōimafiaifono, Epa Niospa kexe- sharakōiano nāskakē inimakōixii.

¹¹⁻¹² “Mā ea Ifofakē fetsafāfe mato ichakani, mato omiskōimayanā askatari matoōnoa meka chaka yoikani meka fetsa fetsatapafo. Nā mato chakafaifo keskafakīri māto xinifāfe nā Niospa meka ato yoixomisfori ato chakafapaonifo. Nāskakē inimasharakāfe eōxō matori chakafakani kiki. Mā askaito Niospa afara sharafo mato mexexona nai mēranoa mātōnā inō,” ixō Jesús afe imisfo ato yoini.

“Mā tashi keskarata askatari mā pena keskara,” ixō a Ifofafo Jesús ato yoini

(Mr. 9.50; Lc. 14.34-35)

¹³ Anā Jesús ato yoini iskafakī: “Māfi nono mai anoax tashi keskaraki. Nāskakē shinākāfe. Tashi sharakē nō meetiro. Akka tashi sharayamakekai nō shara meetiroma. Nāskarakai tsoa pishta fichipaima. Mā paispakē anā nō pitiroma. Nāskakē nō potatiro. Nāskarifiāi mā tashi keskara. Mā nono mai ano isharaino yorafāfe mato ōikani inimatirofo. Askafixō mā Nios anā Ifofasharayamaito matoōxō tsōakai tāpitirofoma Niospa meka shara. Mā tashi paispa keskarakē mato potatirofo. Iskafakī yoitirofo: ‘Mā chakafoki nonoax fotakāfe. Mākai afaama,’ ixō yoitirofo.

¹⁴ “Nāskatari mā oa luz peeikai keskarakī. Akka pexe rasi māchi keya mǎnǎnēnoax onetiroma. Chai ixō penakōi nō ōitiro. Nāskarifiāi matoōxō yorafāfe xafakīa eōnoa nikatirofo. ¹⁵ Nāskafakīri tsōakai fakishaino ōipaifiki luz fepotiroma. Tapo kamaki luz ōtaxō kēsho fepotiroma. Askatamaroko tapo kamaki fomākīa nō ōtaxō tsāotiro a pexe mēra ikafāfe ōisharanōfo.

¹⁶ Nāskarifiāi isharakāfe. Mā askaito mato ōikakī tāpitirofo mā eōnoax xafakīa isharakē. Askata māto Epa Nios nai mēra ikano aōnoa yoiki iskafaxikani: ‘¡Aichol! Na yorāfo Niosnoax isharakōimisfo. Āto Nios sharakōi,’ ixō yoixikani,” Jesús ato fani yoiki.

Jesús ato yoini a Niospa shināmanaino Moisés keneniōnoa nikasharakōinōfo

¹⁷ Anā Jesús ato yoini: “Mā shināiraka iskafakī: ‘A Moisés Niospa shināmanaino keneni, askatari a Niospa meka yoimis fetsafāferi kirika kenenifo afo Jesús noko nikamakaspai,’ ixō mā shināiraka. Anori shināyamakāfe. Ēkai Moisés feta a Niospa meka yoimis fetsafāfe kenenifo keskara ē potayoi onima. Askatamaroko nā kenenifo keskara ē ato tāpimaxii ē fotoni nai mēranoax.

¹⁸ Akka ē mato xafakīa yoi. Ea nikasharakāfe. Nai fe mai keyoyoamano a Moisés yoini keskara tsōa fetsafatiroma. Askatari afaa nō potatiroma. Akka mā keyokōi mitokomeano, mai fe nai keyoxii. Mā afama mīshtifo keyoano nō anā Moisés mekari nō yopaxima.

¹⁹ Akka fētsa Moisés meka nikasharayamaxō fetsafori ato meka chaka tāpimanaino nikakaspamisfo a Moisés keneni keskara. Nā feronāfake Epa Nios ika ariax anā afaa itiro. Nāskafekē fētsa Niospa meka nikasharataifakī fetsafori Niospa meka xafakīa yoiāx Epa Nios ika anoax afe xanīfo itiroki.

²⁰ Askano nā fariseofo fe a Moisés yoi kī kirika keneni keskara ato tāpimamisfo, 'Nōfi sharakōi,' ifiamisxakakī Niospa yoini keskara keyokōi nikafo. Akka a Moisés yoi kī keneni keskara nikakōikanaxma tosa Epa Nios ika ari nokotirofoma," ixō Jesūs ato yoini.

*"Ōitifishkiyamakāfe," ixō Jesūs ato yoini
(Lc. 12.57-59)*

²¹ Anā Jesūs ato yoini iskafakī: "Mā mā nikamiskī a Moisés nōko xinifo ato yoipaoni keskara. Iskafakī ato yoini: 'Tsoa reteyamakāfe. Mā fetsa retetekē xanīfofo ano mato iyotirofo matori kopikiri retematirofo,' ixō nōko xinifāfe yoinifo.

²² Mēstekōi anori yoifinikē ē mato meka fetsari mēstekōi yoinō. Ea nikasharakāfe. Fētsa fetsa īchaito mī xanīfofo ari iyotiro a omiskōimanō. Askatari fētsa fetsa chakafai iskafakī: 'Mī afaa tāpiama. Mī tatimakōi,' faito Niospa a omiskōipakenakafo mēra chiifā mēra potatiro anoax omiskōipakexanō.

²³⁻²⁴ "Nāskakē mā Nios kīfīti pexefā mēraxō mā kifipaikī mā iskafaki shināino: 'Ooa, ē fetsa chakafaa ē raefama,' ixō shinākī, anā Nios kīfixoma nā mā Nios ināpaifafāina fetsa ano koshi fotakāfe. Akiki nokoxō yoisharafe anā mikiki raenō. Nāskaxō anā mā Epa Nios kīfīti.

²⁵ "Mā fetsa nimiano matoki oxō mato iskafatiro: 'Mī ea nimia. ¿Afetia mī ea kopifaimē? Mī ea kopifayamaito ē mia xanīfo ano iyoikai,' mato faito, xanīfo ano kayoxoma koshi raefakāfe. Akka mā askafayamaino xanīfo ano mato iyotiro. Mā mato iyoano xanīfāfe policia yoitiro iskafakī: 'Na feronāfake fetsa nimiakī kopifaamakī, karaxa mēra ikimafe,' fatiro.

²⁶ E mato paraima. Fētsa mato karaxa mēra ikimanano mā fena tseketiroma. Akka nā mā nimia kopifatīa mā tseketiro," ixō Jesūs ato yoini.

"Māto āfikōima chotapaiyamakāfe," Jesūs ato fani

²⁷ Anā Jesūs ato yoini: "Mā mā nikamis a nōko xini Moisés yoini keskara. Iskafakī ato yoini: 'Māto āfima chotayamakāfe. Askatari kēromāri māto fenema chotamayamakāfe,' ixō ato yoini.

²⁸ Nāskara chanīma. Nāskakē ēri mato yoi, fētsa āfe āfima ōikī āfe shinā mēraxō shināi: 'E nā kēro chotapai,' ixō shinākī āfe shinā mēraxō chotai.

²⁹ "Akka māto fēro ōikī mā chakafatiro. Nāskakē afara chaka ōiyamakāfe afara chakafaxikakima, nā nōko fero tsexaxō nō ōitiro ma keskafakī. Mā māto chaka xateyamax omiskōipakenakafo mēra mā katiro. Akka mā māto chaka xateax mā Nios ika ari kaax mā afe ipaxatiro. Askara shara.

³⁰ Nāskarifikakī māto mēke kayakai aōxori mato afara chakafamakē, mextemekāfe. Mā askafax shara mā itiroki. Nāskarifikakī māto chaka xatekāfe nā mā mextemea keskaraxō. Akka mā māto chaka xateyamax, nā omiskōipakenakafo mēra mā katiro. Akka mā māto chaka xateax, Nios ari mā kaax afe mā ipaxatiro. Askara shara," ixō Jesūs ato yoini.

*Feronāfake āfe āfi fe enēnātirofoōnoa Jesūs ato yoini
(Mt. 19.9; Mr. 10.11-12; Lc. 16.18)*

³¹ Anā Jesūs ato yoini: "Nāskatari Moisés nōko xinifo yoini iskafakī: 'Fētsa āfe āfi potaxikī a potayoxoma iskafatiro kirika kenexō: "E anā mia fipaima. E mia eneikai," ixō kenexotiro,' ixō Moisés ato yoini.

³² Akka anori Moisés yoifinikē anā meka fetsari ē mato yoinō. Tsōa āfe āfi chotayamafiano, feronāfake āfe āfi eneano nā kēro feronāfake fetsa fe chotanāi chakanai. Askatari feronāfake fētsa nā kēro fiax chakanai āfe āfikōima chotai," ixō Jesūs ato yoini.

"A mā yoyomis keskara akāfe," ixō Jesūs ato yoini

³³ Askata anā Jesūs ato yoini: "Mā mā nikamis a Moisés nōko xinifo yoini keskara. Ato iskafakī yoipaoni: 'A mā Nios yoyomis keskara axosharakāfe. A mā yoyomis keskara Epa Niospa mā nikakī akka mā ayamano nā chakakōi itiro,' ixō Moisés nōko xinifo yoini.

³⁴ Akka nānori ato yoifinikē, ēri mato yoisharanō. Nikakapo. Mā fetsafo yoyomis keskara axosharakāfe. Iskafakī yoiyamakāfe: 'A ē mato yoioa keskara ē axii. E mato yoioa keskara ē ayamaino Epa Niospa ea omiskōimatiro,' ixō yoiyamakāfe. Askatari, 'A ē mato yoia keskara ē akēma keyokōi nai mēraxō ea omiskōimatiro,' ixō yoiyamakāfe. Akka nai mēranoax Epa Nios xanīfo finakōia iki. Nāskakē anori nō yoitiro ma.

³⁵ Askatari, 'A ē mato yoiyoa keskara ē ayamaino nono mai anoafāfe ea omiskōimatiro,' ixō anori yoiyamakāfe. Keyokōi mai ano Epa Niosnā. Askatari, 'A ē mato yoiyoa keskara ē ayamaino a Jerusalén anoafāfe ea omiskōimatirofo,' ixō anori yoiyamakāfe. Nā Jerusalén nōko xanīfo finakōi Niosnā.

³⁶ Askatari, 'A ē mato yoiyoa keskara ē ayamaino ēfe māpo ea omiskōimatiro,' ixō yoiyamakāfe. Akka nōa nōko māpo shināxō nōko foo nō fetsafatiroma oxo inō, askatari fiso inō. Epa Nios fistichi askafatiro.

³⁷ Akka fetsafo parayamakāfe. 'Ē mia axōikai,' ixō axokāfe. Askatari, 'Ē mia axōima,' ixō axoyamakāfe. 'A ē yoiyoa keskara ē ayamaino afaa ranā ea omiskōimatiro,' ixō anori yoiyamakāfe. Mā askara yoiikī mā chakafai," ato fani.

*"Tsoa kopi Yamakāfe," Jesús ato fani
(Lc. 6.29-30)*

³⁸ Anā Jesús ato yoini iskafakī: "Mā mā nikamiski a nōko xinifo Moisés yoini. Iskafakī ato yoini: 'Fētsa mato fero tsēkaito, kopikiri mā fero tsēkatiro. Askatari mato piti tēkeaito, pitiri mā tēketiro,' ixō Moisés yoini.

³⁹ Akka nōko xinifo anori yoifinifono, ē mato meka fetsa yoinō. Ea nikakapo ē mato yoinō. Fētsa mato chakafayanā mato tapasaito, 'Takai fetsari ea afe,' fakāfe mato tāpinōfo mā ato kopi Yamaito.

⁴⁰ Fētsa mia xanīfo ano iyoxō mia rapati fiapaiyaito, ināfe fotanō. Mī chōpari ināfe.

⁴¹ Xanīfo iyamakōi soraronō, 'Ea pisha chaima foxōikafe,' mato fafiaito, mā chai foxotiro.

⁴² Akka fētsa mato afaarafo yōkaito inākāfe. 'Ea ināyope,' mato faito ināfe fishkoyamakāfe," ixō Jesús ato fani.

*"Mato noikaspafaifono māroko ato noikāfe," Jesús ato fani
(Lc. 6.27-28, 32-36)*

⁴³ Anā Jesús ato yoini iskafakī: "Askatari mā mā nikamis a nōko xinifo yoipaonifo keskara. Iskafakī ato yoipaonifo: 'Māto kaifo noikāfe. Akka a mato noikaspaifo ato kopikiri noikaspakāfe,' ixō nōko xinifo yoipaonifo.

⁴⁴ Anori yoifinifono, akka ē mato yoi a mato noikaspaifo ato kopikima ato noikāfe. Askatari ato axosharakāfe. Askatari a mato omiskōimamisfo Epa Nios ato kifixokāfe.

⁴⁵ Mā askafai Niospa fake mā iki. Akka Niospa xini onifani yora chakafoya, yora sharafo ato chaxanō. Askatari oiri imani nā yora sharafoya a yora chakafori ato onifaxoni. Nāskakē māri a mato chakafaifoya a mato sharafaifo keyokōi ato noikāfe. Nāskax mā Niospa fake ikikai.

⁴⁶ Akka a mato noiaifos mā ato noia fetsafo noiyamata askarakai sharama. Akka yora chakafo a ato paraxō kori ichapa ato fiamisfori aska famis. Mā askaino Nios matoki inimaima.

⁴⁷ Mato fe yorafos mā noia askarakai afaama. Akka a Nios Ifofaafomari nāskarifiakani aa ranāri noinākani.

⁴⁸ Nāskakē Epa Nios nai mēraxō yorafo noiai keskafakī māri yorafo keyokōi noikāfe. A Epa Niospa shināsharamis keskafakī māri askafakāfe," ixō Jesús ato yoini.

6

"Afaamaisfori ato noikī afara ato ināsharakāfe," Jesús ato fani

¹ Anā Jesús ato yoini iskafakī: "Mā fetsafo sharafaino, 'Nā feronāfake sharakōi ea fanōfora,' ixō anori shināyamakāfe yorafāfe ferotai. Mā askaino yorafāfe, 'Sharara,' mato fafiaifono, akka Epa Nioskai matoki inimatiroma. Nāskaxō mato afaa inātiroma.

² Nā āa keparanāmisfo keskara iyamakāfe. Afāfe nōko kaifāfe ichanāti pexe mēraxō afaamaisfo afara ato ināmisfo, 'Sharara noko fanōfora,' ikaxō. Askatari fofāsakakī afaamaisfo ato afara ināfofāsafamisfo, 'Noko yoisharanōfora,' ikaxō. Akka askafiaifono Niospa ato afaa ināxima.

³ A afara yopaifo mā afara ināki tsoa yoiyamakāfe tsōa tāpiyamanō.

⁴ Akka tsōa oiyamaino a afaamaisfo mā ato ināino Epa Nios matoki inimani. Nāskaxō mato afara axosharatiro," ixō Jesús ato yoini.

*"Epa Nios kifīkī iskafakāfe," ixō Jesús ato fani
(Lc. 11.2-4)*

⁵ Anā Jesús ato yoini iskafakī: "Mā Epa Nios kifīaitā a chanīmisfāfe kifīmisfo keskara iyamakāfe. Akka afāfe nōko kaifāfe ichanāti pexe mēraxō yorafāfe ferotai Epa Nios kifīmisfo: 'Noko oinōfora,' ikaxō. Epa Nios shinātamaroko ato oimapaikani. Yorafāfe ato oiaifono askamisfo. Akka Epa Nios atoki inimaima. Nāskakē ato afara shara ināxiima.

⁶ Akka mări ato keskara iyamakāfe. Mā Nios kīfikī tsōa mato ōiyamaino nānoxō Epa Nios kīfikāfe. Māto pexe kene mēra ikixō tsōa mato ōiyamaino nānoxō Epa Nios kīfikāfe. Akka yorafāfe mato ōiyamafaiino Epa Nios fistichi mato nikatiro. Nāskakē matoki inimai. Nāskaxō afara shara mato ināxii.

⁷ “Akka a Nios chanīmara faafāfema kīfimisfo keskayamakāfe. Nāfāfe mēxotaima nā meka fisti yoiri famisfo. ‘Nō na meka fisti yoirifaito noko Epa Niospa nikai,’ ixō shināmisfo. Askafiaifonokai Niospa a keskara meka nikapaima.

⁸ Akka mări ato keskara iyamakāfe. Mā Epa Niospa tāpiakī mā afara yopaito, mā yōkayoamano.

⁹ Akka mā kīfikī iskafatiro:

Epa Niosi, mī fisti sharafinakōia. Mī nai mēra ika. Nō mia noikōi.

¹⁰ Nai mēra mefe ikafo mī ato yoiaito mia nikakōimisfo. Akka nono mai anoxori nā mī noko amapaiyai keskara nō atiro. Na nono mai ano ikafāfe keyokōichi mia Ifofanōfo.

¹¹ Nā pena tii a nō piyai noko ināfafāife nō afaa yopayamanō.

¹² Nō afara chakafaito nōko chaka noko soaxōfe nā noko chakafaifāfe nō ato raefai keskafakī.

¹³ Nokoki Satanás chaka omayamafe, askakimaroko nomakinoa pōtafe nō nikayamanō, ixō kīfikī iskafakāfe.

¹⁴ “Akka fetsafāfe mato chakafaifono mā ato raefai keskafakī Epa Nios nai mēranoato mā fetsafo raefai keskafakī matori chaka soaxotiro.

¹⁵ Akka mā fetsafo raefayamaito Epa Niospari mato chaka soaxotiroma,” ixō Jesús ato yoini.

Foni tenemisfoōna Jesús ato yoini

¹⁶ Anā Jesús ato yoini iskafakī: “Ē mato yoiyonō. Mā foni tenei oa shināmitsai keskara māto femānā iyamakāfe a āa keparanāmisfo ikaifo keskai. Afāfe foni tenekani āto femānā shināmitsai keskara ikani yorafāfe ato ōikani. Askatari foaromekanima yorafāfe ato ōinōfo. Nāskakē Epa Niosnoa shinākanima. Askaifono Epa Nios atoki inimaima. Nāskakē ato afaa ināima. Akka mări foni tenei ato keskara iyamakāfe.

¹⁷⁻¹⁸ Akka mā foni tenei mā Nios shināyanā mā fechokometiro. Askatari fōxti mā foaromesharatiro. Nāskakē Epa Nios fistichi tāpitiro yorafāfe tāpiafomano. Mā askaito yorafāfe tāpitirofoma mā foni teneaito. Akka Epa Nios fistichi tāpitiro. Nāskakē Epa Nios matoki inimitiro. Askatari mato afara shara ināxii,” ixō Jesús ato yoini.

*“Epa Nios ika anoxō afara sharakōifo mato mekexona,” ixō Jesús ato yoini
(Lc. 12.33-34)*

¹⁹ Anā Jesús ato yoini iskafakī: “Nono mai anoxō afama mīshti ichapa mekeyamakāfe. Mato nakaxa pīaino mā fenotiroki. Askatari chakanai fetsetiro. Askatari yometsofo māto pexe mēra ikixō māto afama mīshtifo keyokōi mato fīano mā fenotiro.

²⁰ Akka afama mīshti noitama Nios noikāfe. Nā mato yoini keskara akāfe. Mā akiki nokoaito nā mato afara sharakōi mekexona mato ināxii. Akka ono nai mēraxō afama mīshti mato mekexona, a nakaxa mato pīatiroma. Askatari chakanaima. Askatari anā māto pexe mēra ikiax tsoa yometsotiroma.

²¹ Akka māto afama mīshtifo noikī mā shināfafāini. Nā māto afama mīshtifo mā shināfafāinai keskafakī Niosri shināfafāikāfe, a noikī yonoxosharakāfe,” ixō Jesús ato yoini.

“Nōko ōiti sharakē nō shināsharakōitiro. Akka nōko ōiti chakakē nō shināsharatiroma,” ixō Jesús ato yoini

(Lc. 11.34-36)

²² Anā Jesús ato yoini iskafakī: “Anā ē mato meka fetsari yoinō mā tāpikōinō. Akka nōko fero rafeta nā rāparinī chai chaxai keskarakē, nōko yora shara itiro. Nāskarīfiai nōko fero sharano nō xafakīa ōisharatiro. Nāskatari nō isharakōitiro.

²³ Akka nōko fero chakakē nō ōisharatiroma. Fakishkōi itiro. Nāskarīfiakī nōko ōiti mēraxō nō chaka shinākī nō afara chakafamis nō itiro. Akka ōisharakāfe. Mā Epa Nios shināi xafakīa ifaxō āfe meka kachikiri faxō mā anā xafakīa shinātiroma. Fakish keskara mā itiro,” ixō Jesús ato yoini.

*“Nōko afama mīshti noisharatama nō Nios noisharakōitiro,” Jesús ato fani
(Lc. 16.13)*

²⁴ Anā Jesús ato yoini iskafakī: “Tsōa āfe ifo rafe yonosharaxotiroma. Fetsa noikaspata, fetsa noisharatiro, nā yoiyai keskarakōi axotiro, akka a fetsa amapaiyai keskara axotiroma noikaspati. Nāskarīfiakī mā kori fisti shinākī mā Nios shinātiroma. Nāskatari Epa Nios fisti shinākī mā kori noitiro,” ixō Jesús ato yoini.

*“Epa Niospa afe fakefo kexesharamis,” ixō Jesús ato yoini
(Lc. 12.22-31)*

²⁵ Anā Jesús ato yoini iskafakī: “Anā ē mato yoisharanō. Ea nikasharakāfe. Shināchakayamakāfe. Nō afaa piyamata, afaari nō ayaima iyamakāfe. Askatari afaari nō safeima ixō shināchakayamakāfe. Akka a nō piatokai noko imasharatiroma. Askatari a nō safeatori nōko yora noko imasharaxotiroma.

²⁶ Akka shinākapo. Peyafāfe afaa fanamisfoma. Afaari topimisfoma. Askaxori afaa mekemisfoma. Nāskakē Epa Niospa ato pimamis. Akka nā peyafō afaayamafoiakē Epa Nios nai mēra ikato ato pimamis. Akka Niospa mato noikī nā peyafō finōmainīfofā mato kexesharakōimis.

²⁷ Nāskakē, ¿afeskakī mā shināchakaimē? A nō shināchakaitokai pena fisti noko anā nimatiroma. Nāskakē afaa shināchakayamakāfe.

²⁸ “Askatari iskakī shināyamakāfe: ‘Ooa. ¿Fanā ē rapati fitiromē safexiki?’ ixō anori shināyamakāfe. Akka shinākapo afeskax charofo foaikamakī. Nā charofāfe yonokanima. Askatari xapo toro atirofoma rapati faxikakī.

²⁹ Nāskafīax charofo sharamishti foaikani. Nāskarari xanīfo Salomōn rapati sharafinākōia safefixō nā charofo finōama.

³⁰ Akka Niospa nafefo sharashtafo onifani. Sharafiano nō sepakī xateano natiro. Nāskaxō nō koofatiro. Akka Niospa nafefo finōmainīfofā mato noikī mato rapati safematiro mato kexesharaxō. Akka mā shināchakakī mā Nios chanīmara fasharaima.

³¹ Nāskakē shināchakayamakāfe. Shinākī iskafayamakāfe: ‘Ooa. Ē fonāiki a ē piāi keyoano, a ē ayairi keyoano koriyaxomari ē afaa safeima,’ ixō anori shināchakayamakāfe.

³² Akka nā Nios Ifofaifāfema iskara shināmisfo. A piāi fisti shinākata, a safepaiyai fori shināmisfo. Akka Epa Niospa mā mato tāpia afarafo mā yopaito.

³³ Nāskakē Nios mātō xanīfoōnoa shinākāfe. A Niospa mato amapaiyai keskara nāskara fisti shinākōikāfe. Mā askafaito afara fetsa mā yopaito Epa Niospa mato ināxii.

³⁴ Nāskakē shināchakayamakāfe. Yoi iskayamakāfe: ‘Ooa. Ē tāpiama penama afara chaka afeskara afiaino. Ē nā keskara tenetiroma,’ ixō shināyamakāfe. Shinākī iskafakāfe: ‘Epa Niospa na penata ea kexesharamis keskafakī penamari ea kexesharai,’ ixō nānori shinākāfe,” ixō Jesús ato yoini.

7

*“Fetsafo mekafakī chakafayamakāfe,” ixō Jesús ato yoini
(Lc. 6.37-38, 41-42)*

¹ Anā Jesús ato yoini iskafakī: “Mēxotaima fetsafo mekafayamakāfe iskafakī yoikī: ‘Naato afara chakafakī Niospa omiskōimapainō, fakī. Akka mā ato askafayamaino Niospari mato mekafatiroma iskafakī yoikī: ‘Na yorafo chakafo,’ mato fatiroma.

² Akka māri nāato akai keskafakī afara mā chakafaito, matori Niospa omiskōimaxii. Akka mā fetsafo afara ināsharakēma Niospa matori afaa ichapa ināxima, mā ato afara ināsharakōikēma.

³ ¿Afeskakī ifi pasta pishta fetsa feronaki ikano mā òimē, māroko ifi pasta efapa feostamefixō?

⁴ Akka, ¿mā shināimamē a mā ifi pasta efapa feostamea? Akka, ¿afeskakī mā fetsa iskafaimē?: ‘Yamā, ē mia fixonō a mī ifi pasta pishta fero naki ika,’ fakī, mākōi mā kakamepaimis. Mākai afaa tāpiama.

⁵ Nāskax mā chanīkōi mā ato parapaimis. Akka ē mato yoinō ea nikakapo. Akka mātō fero mēranoa a ifi pastafā mā feostamea tsekayokāfe. Nāskaxō ōisharakī, a fetsafo ifi pasta pishta feronaki ika mā tsekaxotiroma. Nāskarīfakī mātō chaka xateyamaxō mā fetsafo chaka xatematiroma. Akka mātō chaka xatexō fetsafo mā chaka xatematiro.

⁶ “Ē meka fetsari mato yoinō mā tāpinō. Paxta pōfe nō nami shara ināpaifiaino noko keyotiro mifiki. Askatari kochi nō afara shara ināino peama peamakī chakana fatiro. Nāskari fakī yorafāfe Niospa meka shara nikakaspakī chakafatirofo, Epa Nios chakafakī mekafakakī. Askaifono Epa Niospa meka shara anā ato yoipaiyamakāfe,” ixō Jesús ato yoini.

*“Nō Epa Nios afara yōkaito noko inātiro,” ixō Jesús ato yoini
(Lc. 6.31; 11.9-13)*

⁷⁻⁸ Anā Jesús ato yoini iskafakī: “Nāskakē ē mato yoi, afara fichipaikī Epa Nios yōkakāfe mato ināi kiki. Fena fena kakīma manakāfe nā Epa Niospa mato ināitīa. Nāskakē Epa Nios kifīfāikāfe mā kifīaito mato ināi kiki. Akka nā yōkai Epa Niospa afara shara ināxii. Nāskarīfiakī fētsa afara shara fenaito Epa Niospa fichimatiro. Nāskarīfiakī fētsa Epa Nios kifīaito ināsharakōixii.

⁹ “Akka mato fake mato yoa yōkaito, ħmā tokiri inātiromē? Maa. Mākai mato fake mā askafatiroma.

¹⁰ Askatari, ħmāto fāke mato foe yōkaito mā rono inātiromē? Maa. Mākai mato fake mā askafatiroma.

¹¹ Akka mā chakafixō mato fakefo kexesharaxō afara sharafo mā ato inātiro. Nāskarifikā Epa Nios nai mēranoato mā afara yōkaito mato kexesharakatsaxakī afara sharafo mato ināsharaxii nō nai mēraxō mato mekexona.

¹² “Nā mā fichipaiyai keskafakī fetsafāfe mato axosharaifono, nāskarifikā māri fetsafo axosharakāfe. Moisés feta a Niospa meka yoimisfāfe nānori yoinifo kirika kenekakī,” ixō Jesús ato yoini.

Fepoti pishtaōnoa Jesús ato yoini
(Lc. 13.24)

¹³ Anā Jesús ato yoini iskafakī: “Meka fetsa ē mato yoinō. Nikakapo. Fepoti rafe iskarakī: Fepoti fetsa pishtaki nā fepoti pishta ikikāfe. Akka nā fepoti fetsa efapa. Nā fepoti efapato fai efapa kaa. Nāskakē nā fai efapato yora ichapa fomisfo a omiskōipakenakafo mēra.

¹⁴ Akka fepoti pishta ano fai kaa, pishta fekax. Nā fai Nios ano nokoa nā fai atsō pishtakōi. Nāskakē ichapama aō fomisfo,” ixō Jesús ato yoini.

Ifi āfe fimioxō nō tāpitiro afe keskaramākī
(Lc. 6.43-44)

¹⁵ Anā Jesús ato yoini iskafakī: “Ōisharakāfe, a chanīaifāfe mato paratirofokī: ‘Nō Niospa meka yoimis,’ ixō mato paratirofo. Afāfe Niospa meka yoimisfomaki. Akka afofi ovejafo keskarafo fikanax akka āto shinā mēra poomā pōfefe keskarakōifo. Nāskakē ato fishtayamakāfe.

¹⁶ Akka mā tāpitiro afaa afeskafakanimākai. Akka ifi āfe fimioxō nō tāpitiro afe keskaramākī. Xopa foaikī moxaya foaitiroma. Askatari kachafi moxaya foaitiroma. Nāskaxō nō tāpitiro moxayafo oikī xopakairokokē. Nāskarifikā nō tāpitiro kachafimāi moxayakē.

¹⁷ Akka ifi shara fimi sharaya itiro. Akka ifi chaka fimi chakaya itiro.

¹⁸ Nāskakē Ifi shara fimi chakaya itiroma. Ifi chakari fimi sharaya itiroma.

¹⁹ Akka ififo fimi sharaya iyamaito ifāfe reraxō koofatiro.

²⁰ Nāskakē a ato tāpimamisfoōnoa mā ato tāpitiro sharafo iyamakani chakafo itirofo,” ixō Jesús ato yoini.

“Akka keyokōi fotirofoma Epa Nios ika ano. Fisti rasi fotirofo,” ixō Jesús ato yoini
(Lc. 13.25-27)

²¹ Anā Jesús ato yoini iskafakī: “Akka yora ichapato yoimis iskafakakī: ‘Jesús, mī ēfe Ifokōi,’ famisfo. Nāskafikaxō atirito ea Ifofamisfoma. Nāskakē ēfe Epa Nios ika ari nokotirofoma. Ēfe Epa nai mēra ikato nā ato amapaiyai keskara akatsaxakakī nāfo ēfe Epa ari nokotirofo afe ipaxakakī.

²² Akka mā mai keyoaino nā onifanifo tii keyokōi Niospa ichanāfaxii. Nā nikakaspaamisfo tii omiskōipakenakafo mēra ato potaxii. Nāskakē yora ichapafāfe ea yoikani iskafakakī: ‘Ifo, shināpo. Nō mī aneōxō nō yorafo yoimis. Mī aneōxori nō a niafaka chakafo yorafo mēra nanea nō ato makinoa potamis. Mī aneōxori nō afama mishti famis yorafāfe atiroma keskafakī. Noko shināfe, Ifo,’ ixō ea yoixikani.

²³ Askaifono ē ato xafakīa yoixii iskafakī: ‘Mākai efe yorama. Māfi ato pāramiski. Afara chaka fisti mī famiski. Emakinoax fotakāfe,’ ē ato faxii,” ixō Jesús ato yoini.

Pexe rafeōnoa Jesús ato yoini
(Mr. 1.22; Lc. 6.47-49)

²⁴ Anā Jesús ato yoini iskafakī: “Akka nā ea nikaito nā ē yoiai keskara akī, nā yōra pexe fakī tāpixō mai chai pōkixō mai teikī pexe kishi nīchitiro keskafakī.

²⁵ Akka oi ikaino, pexe nāmā faka faitiro. Askatari nēfefakī pexe afeskafatiroma. Nāskakē pexe paketiroma mā mai teikōikimāi pexe kishi niano.

²⁶ Akka nā ē yoiaito ea nikafikī a ē yoiai keskara nikaima, askara yora nā yora tatimato pexe fakī mashi ano pexe fatiro keskarakōi.

²⁷ Akka oi ikaino faka faitiro. Askatari nēfefakī pexe potatiro. Nāskax pexe chakanatiro. Nāskarifiakī fētsa ēfe meka nikafikī ea nikaima afofi fenoi fetsekani. Nāskakē omiskōipakenakafo,” ixō Jesús ato yoini.

²⁸⁻²⁹ Nāskata mā Jesús mekai xateano yorafāfe nikakaxō, “ĵkee! Nikakapo. Nato tāpikī finakōia, a Moisés yoikī kirika keneni keskara ato tāpimamisfo keskarama, meka sharakōi nato yoi,” fanifo.

8

*Jesús yora rashkishiai sharafani**(Mr. 1.40-45; Lc. 5.12-16)*

¹ Askata Jesús ato yoikī xateta māchi keya ariax tisirimepakeaito yorafāfe chīfafainifo afe fōkakī.

² Jesús kaino feronāfake isinī iki rashkishi fetseax Jesúski oni. Akiki oxō ratokonō mai chachipakefōfā yoini iskafakī: “Ifo, ea sharafapaikī mī ea sharafatiro,” fani.

³ Askafaino Jesús āfe mēkemā ramāyanā yoini iskafakī: “Ē mia sharafanō. Iskaratīa mī sharaikai,” faino, a rashkishi fetseai koshikōi sharatani.

⁴ Mā sharano Jesús nīchini iskafakī yoiyanā: “Mī tsoa yoiki. Akka nā ato Nios kīfixomis ispatāfe. Nāskaxō ovejanā fake foxō ināfe mia retexonō Moisés yoini keskafakī. Nāskaxō keyokōichi tāpinōfo a mī isinī imis mā mī sharano,” ixō Jesús yoini.

*Jesús sharafani romanō xanīfāfe āfe ina yonaito**(Lc. 7.1-10)*

⁵ Askafāfāini Capernaúm ano kani. Nāno akiki soraro xanīfo nokoni a yonoxomis sharafamapai.

⁶ Nokoxō yoini: “Ifo, a ea yonoxomis isinī iki. Ēfe pexe ano rakax omiskōiferokima,” fani.

⁷ Askafaino, “Ē kanōkī sharafaxikī,” fani.

⁸ “Ifo, ekai afama. Akka mī tsoa keskarama. Mī finakōiakī ēfe pexe ano kayamafe. Mī mekapa a ea yonoxomis ea sharafaxōfe nonoxō.

⁹ Akka eari ēfe xanīfāfe yonomamis. Ēri sorarofō yonomatiro. ‘Katāfe,’ ē faino karisatiro. Askatari, ‘Ekeki ofe,’ ē faino ekeki orisatiro. Nāskakē a ea yonoxomis afara ea axōfe ē faino ea axotiro. Akka mī afama mīshati fatiroki. Mī mekapa a ea yonoxomis ea sharafaxōfe,” ixō yoini.

¹⁰ Askafaito nikakī a afe foafo Jesús ato yoini: “Kee, nikakapo. Na feronāfake is-raeliyamafixō ea chanīmara fakī finakōi fetsafo keskarama. Akka Israel anoafāfe ea iskafamisfoma chanīmara fakakī.

¹¹ Ē mato xafakīa yoinō. Na maitio ano ikafo Nios chanīmara fakanax nōko xinifo Abrahamnō Isaacanō Jacobonō ichanāxikani Nios yorafo ixikakī.

¹² Akka atiri nōko kaifo nā israelifo Niospa afe yorafo ato imapaiaino chanīmara fakanima. Nāskakanax Nios ika ano nokotirofoma. Niospa ato fakishifā mēra potaxii. Anoax eaiyanā fasi omiskōixikani,” ixō Jesús ato yoini.

¹³ Nāskata Jesús yoini soraro xanīfo: “Mī pexe ano katāfe. Mī ea chanīmara faino a mia yonoxomis mā sharaki,” fani.

*Jesús Pedro rayos sharafani**(Mr. 1.29-31; Lc. 4.38-39)*

¹⁴ Askata Jesús Pedro pexe ano kani. Nāno Pedro āfe rayos yōxafo yonai oxati kamaki raka ini.

¹⁵ Jesús ōikī āfe mēkemā ramāni. Ramāino āfe yona matsirisatani. Mā Jesús sharafaano anā yonanima. Mā sharaxō fininākakāta Jesús pimani.

*A isinī ikaifo Jesús ato sharafani**(Mr. 1.32-34; Lc. 4.40-41)*

¹⁶ Nāskano mā xini kaino a isinī ikaifo Jesúski efenifo ato Jesús sharafapanō. Atiri a niafaka chakafo ato mēra nanea Jesús āfe mekapa ato makinoa pōtapakeni. Keyokōi Jesús ato sharafapani.

¹⁷ Nānori Niospa meka yoinimisto Isaías a inōpokoai yoikī kirika kenekī iskafani: “Nō isinī imisno Cristo mā noko sharafaa. Askatari nā noko pāefaifo nomakinoa mā noko potaxona,” ixō Isaías kirika kenenī keskara Jesús ani.

*A afe fopaimisfoōna Jesús ato yoini**(Lc. 9.57-62)*

¹⁸ Askata Jesús ōini yorafā rasi akiki feaifāfe. Askaifono aōxō tāpimisfo yoini iskafakī: “Okiri nō iamāfā pokefainō fokāfe,” ato fani.

¹⁹ Akka Jesús kayoamano a Moisés yoikī kirika kenenī keskara ato tāpimamis akiki oxō yoikī iskafani: “Maestro, ēri mefe kapai nā mī kai ari ēri mefe kafāsaxiki,” faito,

²⁰ Jesús kemani: “Akka maxoteneroa kiniya, peyafari naayafo akka ekai pexe yama,” fani.

²¹ Askatari a afe kafāsamis fētsa iskafakī yoini: “Maestro, ea nīchiyofe ēfe epa naito ē maifayotanō. Chipō mia Ifofaxiki,” faito, Jesús kemani:

²² “Iskaratīa ea Ifofafe. Akka nā ea Ifofaafāfema yora nakē maifatirofo,” ixō Jesús yoini.

Jesús nefe yafi ìamāfā poo iki meseniaito nishpa fani

(Mr. 4.35-41; Lc. 8.22-25)

²³ Nāskata Jesús kanōanāfānē naneinīkafāni aōxō tāpimisfori afe naneinīfofānifo.

²⁴ Ìamāfā pokefainaifono atoki nēfefā nokoni. Jesús kanōanāfā xaki mēra rakax oxano nefeyanō ìamāfā poo ini. Kanōanāfā faka fospikōini.

²⁵ Askaino aōxō tāpimisfāfe mōinifo iskafayanā: “¡Ifo, mā nō āsaikai! ¡Nō āsayamanō moife!” fanifo.

²⁶ Askafaifono, Jesús ato yoini: “¿Afeskai mā rateimē? Mā ea chanīmara fasharama. Nāskakē mā ratei,” ato fani. Ato askafata, fininākafāta fāsikōi, “¡Nēfe, nishpafe!” fata, “¡Jamā, nishpafe!” fani. Askafaino anā ìamāfā feroinima.

²⁷ Askafaito ōikani yoinānifo: “¡Kee! ¿Na feronāfake afe keskaramē na nefe feta ìamāfānē ato yoiaito nikaifo?” ikanax yoinānifo.

Feronāfake rafeta Gadara mai anoxō niafaka chakafo nanea- fono Jesús ato makinoa potani

(Mr. 5.1-20; Lc. 8.26-39)

²⁸ Askata Jesús okiri ìamāfā aōxō tāpimisfo feta pokefainax Gadara mai ano nokonifo. Nāno feronāfake rafe niafaka yōshi chaka nanekanax Jesúski nokonifo kinīfā mēranoax. Nā rafe mesekōi ipaonifo. Nāskakē yorafāfe a ikafo ano tsōa ato finōtiriroma ipaoni atoki mesekakī. Nā maiyafō ano nā rafe ipaonifo.

²⁹ Nāskakē Jesús fichikanax fāsikōi fuisiyanā yoinifo: “Mīfi Niospa Fakeki. Akka, ¿mī noko afeskafaiyoamē? ¿Mī noko omiskōimaniyoamē?” Jesús fanifo.

³⁰ Askafaifono chaimaxō kōchifā rasichi pinifo.

³¹ Nāskakē niafaka chakafāfe Jesús iskafanifo: “Mī nā feronāfake rafe makinoa mī noko potaimākai kochifo mēra noko nīchife,” faifono,

³² “Fotakāfe,” Jesús ato fani. Nāskax niafakafo feronāfake rafe makinoax tsekekanax kochifo mēra ikinifo. Nāskakē kochi rasi ichoax ìamāfā mēra keyopakeni. Nāskax āsai fetseti.

³³ Askaito ōikani a kochifo kexemisfo ichonifo. Mā pexefo tii ano nokokaxō ato yoinifo: “Nā feronāfake rafe nā niafaka naneafō rafe mā Jesús ato makinoa niafaka pōta. Askatari nōko kochifo mēra ikimanano keyokōi nāfoya nōko kochifo ìamāfā mēra keyopakeax āsai fetsea,” ato fanifo.

³⁴ Ato yoiaifono nikakanax keyokōi nā pexefo tii anoax Jesúski fenifo. Akiki nokokaxō yoinifo: “Na nōko mai anoax katāfe,” fanifo.

9

Jesús yora finimisma sharafani

(Mr. 2.1-12; Lc. 5.17-26)

¹ Askata Jesús kanōanāfā mēra nanekaini. Ìamāfā okiri pokefaini kaax āfe mai ano nokoni.

² Nāno ikano a feronāfake finimisma yorafāfe akiki efenifo āfe ratatini ratakaxō Jesús sharafanō ikaxō. Jesús ōini shināifāfe iskakakī na finimisma Jesús sharafai kiki ikaxō. Nāskakē a finimisma Jesús iskafani: “Efe yorashta, inimafe. Iskaratīa mē mia chaka soaxonaki,” fani.

³ Askafaino a Moisés yoikī kirika keneni keskara ato tāpimamisfāfe atirito nikakaxō āto shinā mēraxō shinānifo iskafakakī: “Natokai ato chaka soaxotiriroma. Nios fistichi ato chaka soaxotirokī. Akka nato noko feparapai, ‘Ē Niosra’ noko fapai,” ixō āto shinā mēraxō shinānifo.

⁴ Askaifono Jesús tāpixō a shināifo keskara ato yoini: “¿Afeskakī māto shinā mēraxō mā chaka shināimē?”

⁵⁻⁶ Ēfi Cristokī ē yorafo ato chaka soaxotiro. Akka, ¿ē afaa fatiromē? Mē mia chaka soaxona ē fatiromaka. Askatari ē mia sharafaa ē fatiromaka,” ato fani. “Akka ē mato tāpimanō ē Niosxō mato chaka soaxotiro nono mai anoxō.” Nāskata Jesús a feronāfake finimisma yoini: “Fininākafata mī rakati fifaini mī pexe ano katāfe,” Jesús fani.

⁷ Jesús askafaino a finimisma fininākafāta āfe pexe ano kani.

⁸ Askaito ōikani yorafo ratei fetsetinifo. “¡Kee, ōikapo! Nios tsoa keskarama. Fāsi sharakōi. Nō ōimisma keskara mā noko rama ōimana. Niospa Yōshi Sharaōxō na feronāfake finimisma Jesús āfe mekapa mā sharafaa. Askatari āfe chakari mā soaxona,” ikanax yoinānifo.

Jesús Mateo ifni aōxō tāpimis inō

(Mr. 2.13-17; Lc. 5.27-32)

⁹ Jesús nānoax kakī feronāfake fisti fichini, āfe ane Mateo,* āfe xanifo kori fixōi tsaokē. Nāskaito Jesús yoini: “Efe kofe ē mia tāpimanō,” faino Mateo fininākafā Jesús fe kani.

* 9:9 Mateo ane rafeya ipaoni. Āfe ane fetseta Levi.

¹⁰ Nāskafaito Mateo Jesús iyoni āfe pexe anoxō pikikakī. Askatari a yora chakafori afe inifo a xanifo kori fixomisfo. Nāfāfe āa chanīxō kori finōmainifōfā fimisfo inifo. Askatari a yora fetsafo chakafamisfori fekanax akairi mīsa ano Jesús fe tsaonifo a feta pixikakī. Jesúsxō tāpimisfori nāno ato fe tsaonifo ato feta pixikakī.

¹¹ Askaito oikakī fariseofāfe Jesúsxō tāpimisfo yōkanifo: “¿Afeskakī mātō maestro nā ato kori fixomisfo feta piimē, a yora fetsa chakafo fetari pii?” fanifo.

¹²⁻¹³ Askafaifāfe nikakī Jesús ato yoini: “A sharafāfe notoro fenakanima. Akka nā isinī ikaifāfe notoro fenakani. Nāskafakīri yorafāfe yoimisfo iskakakī: ‘Ēkai afaa chakafamisma. Nāskakē ē afaa yopaima ēfe chaka ea soaxonō,’ imisfo. Nāskakē ē ato chaka soaxotiroma. Akka fetsafāfe yoikī iskafaifono: ‘Ē afara chakafamis. Nāskakē a ē imis keskara ē anā ipaima,’ ikaifono ē ato chaka soaxotiro. Akka nā nō sharakōi ikaifōnoax ē onima. Akka ē oni a yora chakafo āto chaka ato soaxoxiki. Akka ē mato yoipai mā tāpinō a Niospa ato shināmanaino iskafakī kenenifo: ‘Mā yoināfo retexō ea ināxiki mā koamis mātō chaka soapaikī, askara ē fichipaima. Akka ē fichipai fetsafo mā ato noikī mā ato sharafaxōaito,’ ixō kenenifo.

“Akka ē onima a yora sharafoōnoax. Askatamaroko a yora chakafoōnoax ē oni ato chaka soaxoxiki,” ixō Jesús ato yoini.

*Nā foni tenemisfofāfe Jesús yōkanifo
(Mr. 2.18-22; Lc. 5.33-39)*

¹⁴ Juan āfe inafō fēkaxō Jesús yoinifo iskafakakī: “Fariseofāfe foni tenekī feyafamisfo Nios shinākakī. Nōri askafamis foni tenekī Nios shinākī. Akka, ¿afeskakī mīoxō tāpimisfāfe foni tenekanimamē?” fanifo.

¹⁵ Askafaifāfe Jesús ato kemani: “Feronāfake āfiyaino, yorafo ano fisti ichanākaxō afara fetsa fetsatapafo afeta pitirofo inimayanā, aicho fakakī akiki inimakakī. Nā kēromā āfe fene ano ato fe ikano tsōa foni tenetirofoma inimakakī. Akka mā fene rēteafono afe yorafāfe shinākakī foni tenetiro,” ixō Jesús ato yoini.

¹⁶ “Tsōa sama fenaya sama xini kishi fatiroma. Nō askafaino sama fena samama chakanatiro. Nāskatari sama fena fe sama xini isharatiroma. Nāskakēri nā ē mato yoiāi keskara mā nikakōixō a mā ipaoni keskara anā mā itiroma māmāi ea nikakōiax. A mā ipaoni keskara shināmakita nāskax mātō yora fena keskara shara itiro.

¹⁷ Nāskarifikakī tsōa māmā fata koiro pisha xini mēra nanetiroma nā māmānō faraxakaino toxamāiyānō. Nāskakē nā māmā fata fe koiro pisha chakanatirofo. Akka nā mātō xinifāfe mato yoimisfo keskara fe nā ē mato yoiāi keskara ōsinātiroma. Nā ē mato yoiāi keskara Niospa meka sharakōi. Akka a mātō xinifāfe mato yoimisfo anori shināx mā isharatiroma. Niospa mekaya meka chaka ōsinātiroma. Nāskakē mā nikapaifi mā shināsharatiroma. Nāskarifikakī tsōa māmā fata koiro pisha xini mēra nanetiroma nā māmānō faraxakaino toxamāiyānō. Nāskakē nā māmā fata fe koiro pisha chakanatirofo. Akka nā mātō xinifāfe mato yoimisfo keskara fe nā ē mato yoiāi keskara ōsinātiroma. Nā ē mato yoiāi keskara Niospa meka sharakōi. Akka a mātō xinifāfe mato yoimisfo anori shināx mā isharatiroma. Niospa mekaya meka chaka ōsinātiroma. Nāskakē mā nikapaifi mā shināsharatiroma,” ixō Jesús ato yoini.

*Jairo fake xotofake mā nakē Jesús otofani. Askatari kēromāri Jesús rapati mēeax sharani
(Mr. 5.21-43; Lc. 8.40-56)*

¹⁸ Nānori Jesús ato yoiaino judeofāfe xanīfo nokoni. Jesúski nokoxō xanīfāfe a nāmā ratokonō mai chachipakefōfā yoini: “Ēfe fake xotofake rama naa. Akka mī kaxō mī mēkemā mī ramāino anā ototiro,” xanīfāfe Jesús fani.

¹⁹ Askafaino Jesús finināfata aōxō tāpimisfo fe kani xanīfo aho.

²⁰ Askatari nānori kēro imi nesemisma ini, doce xinia amis imi nesekima. Nā kēromā Jesús kaito oxo kaxō a kachikirixori āfe tari kexa ramākani.

²¹ “Ē āfe tari mēeax ē sharatirora,” ixō āfe shinā mēraxō shināni.

²² Akka Jesús ifakekafāta nā kēro fichini. Fichita yoini: “Yōkashita, rateyamafe. Mī ea chanīmara faax mā mī sharaki,” Jesús faino nā kēro imi neserisatani.

²³ Askata mā Jesús nokoax xanīfāfe pexe mēra ikikaini. Anoxō Jesús ōia yorafāfe āto xāiti manenifo, yora fetsafo oiakani sheesaifono.

²⁴ Askafono Jesús ato iskafani: “Nonoax fōtakāfe. Na fakekai naamaki. Oxaki,” ato faito Jesús ōsanifo.

²⁵ Ato kāimata xotofake mētsoinifōfānaino koshikōi fininākafani.

²⁶ Nāskata Jesús nā xotofake naa otoakē nikakanax pexefo tii chanifōfāsanifo.

Fēxo rafe Jesús sharafani

²⁷ Nāskata Jesús xanīfāfe pexe anoax kaino fēxo rafetari chīfafainifo iskafayanā fāsikōi: “Mī nōko xini David fenaki, noko noife,” fanifo.

²⁸ Askafaifono Jesús pexe fetsa mēra ikikaini. Nāno afe ikiafono Jesús ato yōkani: “¿Mā chanīmara faimē a ē mato sharafatiro?” ato faito, “Ēje, Ifo, nō mia chanīmara fai,” fanifo.

²⁹ Nāskata ato fero ramākayanā ato yoini: “Ea chanīmara faaxfi mā sharaikai,” ato fani.

³⁰ Ato askafaino oīsharanifo. Nāskakē Jesús ato yoisharani: “Ea nikakapo. A ē mato sharafaa toa yoiyamakāfe,” ato fani.

³¹ Akka ato anori yoifekē nā Jesús sharafaa nā ano ikafo ato yoifofāsafainifo nā rafeta.

Feronāfake mekamisma Jesús sharafani

³² Nā fēxo rafe imisfo pexe mēranoax tsekefainifo fetsafāfe feronāfake mekamisma Jesúski efenifo Jesús sharafanō. Niafaka chaka a mēra naneano mekamisma ini.

³³ Jesús mā feronāfake makinoa niafaka chaka potano nā feronāfake mekamisma mekani. Nāskakē nā ano ikafo rateyanā yoinānifo: “¡Kee, oīkapo! Na nōko mai Israel anoxō Jesús akai keskara tsōa oīmisma,” ikanax yoinānifo.

³⁴ Askafaifono fariseofāfe yoinifo: “Nato nīafaka xanīfoōxō niafaka potai,” ikanax yoinānifo chakafakī mekafakani.

Jesús yorafo shinākōini

³⁵ Nāskakē Jesús pexefo tii judefofo ikafo ano kafāsani. Judeofāfe ichanāti pexe mēraxō Jesús Niospa meka shara ato yoisharani iskafakī: “Isharakāfe. Nios mato xanīfokōi ipai kiki,” ixō ato yoifofāsafani. Nāskaxō a isinī ikaifo fetsa fetsatapafō ato sharafani.

³⁶ Yorafā rasi akiki feaifono oīki Jesús ato shinākōini fekaxteifāfe oīki, nā ovejafō ifomaiskanax tsōa ato kexeyamano fofāsatirofo keskara ato oīki.

³⁷ Nāskaxō a aōxō tāpimisfo ato yoini iskafakī: “Yora ichapafāfe ea nikayamafiaifono ichapatoma ea yonoxokani eōnoa ato yoikakī. Nāskakē mā Epa Nios kīfikāfe a yonoxomisfo katonō eōnoa ato yoinōfo.

³⁸ Akka Epa Nios kīfikāfe yorafo nīchinō ēfe meka ato yoitanōfo ea Ifofanōfo,” ixō Jesús ato yoini.

10

Jesús aōxō tāpimisfo doce feronāfake ifni

(Mr. 3.13-19; Lc. 6.12-16)

¹ Askata Jesús aōxō tāpimisfo kenani: “Ekeki fekāfe,” ato faino, akiki foaifono ato yoini aōxō yorafo sharafanōfo, a niafaka chakafō yorafo mēra nanea ato makinoa potanōfo, a isinī ikaifo fetsa fetsatapafō aōxō sharafanōfo.

² Nā feronāfake docefāfe āto anefo iskarakī: fetsa Simón. Nā Simón āfe ane fetsa Pedro. Āfe exto Andrés. Fetsafori āto ane Santiago, āfe exto Juan, nā rafe Zebedeo fake ini.

³ Felipe, Bartolomé, Tomás, Mateo, nā Mateo Roma anoxō xanīfo kori fixomis ini. Askatari Santiago fetsa, Alfeopa fake, Tadeori ini.

⁴ Simón fetsa nāato āfe kaifo feta romanōfo potapaini anā israelifo yonomayamanōfo. Askatari Judas Iscarioteri ifni, nāato Jesús chakafakī ato achimani Jesús retenōfo. Nā tii Jesús ifni aōxō tāpimiskōi inōfo.

Jesús aōxō tāpimisfo nīchini Nios Xanīfoōnoa ato yoitanōfo

(Mr. 6.7-13; Lc. 9.1-6)

⁵ Nāskata Jesús aōxō tāpimisfo nīchini ato iskafakī yoianā: “Nā nōko kaifomafāfe āto mai ano foyamakani. Askatari nā samāritanōfo ikafo anoriri foyamakani.

⁶ Akka nā nōko kaifo israelifo ato mēra fotakāfe. Nāfo oveja fenoafo keskarafokī.

⁷ Fokaxō ato yoiki iskafatakāfe: ‘Mā chaima nōko Ifo Nios oi kiki nōko xanīfo finakōia ixii,’ ixō ato yoitakāfe.

⁸ A isinī ikaifo ēfe sharaōxō ato sharafatakāfe. Askatari naafono ato otofatakāfe. A rashkishii fetseaifori ato sharafatakāfe. A niafaka chakafōri āto mēra naneafo ato makinoa pōtatakāfe. Akka ēfe shara kaxpa ē mato minia afaa ē mato yōkama. Nāskari fakī, ato kaxpa sharafatakāfe.

⁹⁻¹⁰ “Akka mā kakī afaa mā fokiki. Māto kori foyamata, māto rapati fetsa foyamata, māto sapato fetsa foyamata, māto forosa foyamata, māto mēsteti foyamata fakāki, eōxō ēfe meka mā ato tāpimani kaikai. Nāskakē mā afara yopaito mato nātirofo mā pinō a mato nikamisfāfe.

¹¹ “Mā pexe rasi ano nokoxō nā feronāfake Nios Ifofasharakōia fenakāfe. A keskara fichixō āfe pexe ano iyoxō Niospa meka ato yoisharaxikaki nā mā kaitā.

¹² Nā pexe mēra ikixō ato yoiki iskafakāfe: ‘Aicho. Nō mato oīyoa,’ ato fakāfe.

¹³ Akka mato ifisharaino, mā tāpitiro nā pexe ifāfe afe yorafo ikisharamis. Nā mā yoiāi keskafakī Epa Niospa axosharai tanaima shara inō. Akka a mato ifisharayamaifo, afāfe afe yorafo ikisharamisfoma. Nāskakē nā mā yoiāi keskafakī Epa Niospa ato axosharaima.

¹⁴ Akka pexe fetsa mēraxō mato ifikaspafono, a pexe mēranoax mā tseketiro. Askatari pexe rasi mēraxori mato askafaifono, mā anoax katiro. Mā anoax tsekekaikī māto taekinoa mā mapo taa taa atiro ato ōimākī. Mā askafaino tāpitirofo Nios atoki inimayamaino.

¹⁵ Ē mato paraima yoi. Nā pexe rasi Sodoma anoāfo feta Gomorra anoāfāfe afara chakakōi fapaonifo. Nāskakē Niospa nā ato omiskōimanaitīa ato omiskōimaxii. Akka nā mato nikakaspaifo nāfo ato omiskōimaki finakōixii," ixō Jesūs ato yoini.

"Mato omiskōimakani kiki," ixō Jesūs ato yoini

¹⁶ Anā Jesūs ato yoini iskafakī: "Ōikapo. Ē mato nīchikai nā yora chakafo mēra. Akka nā yora chakafāfe nā poomānē ovejāfo pipaitiro keskafakani kiki mato. Mato askafaifono nā poomā onāyakōi keskara ikāfe eōxō tāpisharakāfe. Nā rīfi afaa chaka shināmisma keskafakī māri askara shinākāfe.

¹⁷ Ōisharakaki. Nā yora chakafāfe mato achikaxō āto xanīfofo ano mato iyotirofoki. Nāskakaxō āto ichanāti pexe mēraxō mato koshatirofoki.

¹⁸ Nāskakaxō xanīfofo ano mato iyotirofo eōxō. Akka anoaxō na meka shara eōnoa mā ato yoixii. Askatari judeofomari māto kaifomāfori na meka shara eōnoa mā ato yoixii.

¹⁹ Akka mato achikaxō xanīfofo ano mato ināifono shināchakayamakāfe afesakaxō mā ato yoisharaimākai. Xanīfofo ano mato iyofaifono Epa Niospa mato shināmanaino mā ato yoisharaxii.

²⁰ Akka mā ato yoi mā mekaima Epa Niospa Yōshi Shara mekai mā ato yoiaino.

²¹ "Nāskatari yorafāfe āto extofo ato achimaxikani, yora fetsafāfe ato retenōfo. Askatari ato apāfāferi āto fakefo ato achimakani fetsafāfe ato retenōfo. Fakefāferi āto apa yafi āto afakī ōitifishkikakī ato achimakani fetsafāfe ato retenōfo.

²² Mā ea chanīmara fakē nāskakē eōxō mato yorafāfe noikaspakani. Akka mato noikaspafiaifono mā eōnoax omiskōifiki mā ēfe meka nikasharakōiaito ē mato kexesharakōixii Epa Nios fe mā isharapakexanō.

²³ Akka pexe rasi anoaxō mato omiskōimanaifono, pexe rasi fetsa ano ichotakāfe. Akka ē mato yoisharanō. Ea nikasharakāfe. Mā israelifāfe pexe rasi anoaxō keyokōi mā ato yoioamano, ē orisaxii.

²⁴ "Akka a aōxō tāpimisfāfe a ato tāpimamis finōtirofoma. Askatari a yonoxomisfāfe āfe patoro finōtirofoma.

²⁵ Akka a aōxō tāpimisfo a ato tāpimamis keskara ikani. Askatari a yonoxomisfo āto patoro keskara itirofo. Nāskax māri ea keskara ixii. Nāskakē nā ea chakafamisfo keskafakī matori chakafakakī finakōixikani. Nāfāfe ea noikaspakakī ea yoimisfo iskafakakī: 'Mī niafaka yōshi chakafāfe xanīfo. Mī Beelzebū,' ixō ea yoimisfo. Ē māto Ifofekē ea askafamisfo. Akka matori askafakakī finakōixikani," ixō Jesūs ato yoini.

Akka Nios fistiki nō mesetiro

(Lc. 12.2-7)

²⁶ Anā Jesūs ato yoini iskafakī: "Akka mato omiskōimafiaifono, atoki rateyamakāfe. Akka nā afara one yoifimisfona Niospa ato xafakīa kāimaxoxii, afarari fomāpaimisfona, nāfori Niospa ato xafakīa kāimaxoxii.

²⁷ Akka nā ē mato yoimis yorafāfe ato ferotaifi xafakīa ato yoisharakāfe.

²⁸ Akka mato retepaifiaifono rateyamakāfe. Afāfe mato retetitirofono, akka māto fero mēsho afeska fatirofoma. Atoki ratetamaroko, Nios fistiki mesekāfe. Nāato noko retexō nōko fero mēsho nā omiskōipakenakafo mēra potatiro.

²⁹ "Nāskakē a yora chakafo retemitsamisfoki atoki rateyamakāfe. Epa Niospa mato kexesharai kiki. Shinākapo. Peya mīshti afaayamafekē Epa Niospa afo shināki. Ato namapaiyamaino tsōakai nā peya mīshtifo retetiroma.

³⁰ Akka ē mato yoi, Epa Niospa māto foo fisti rasi mato tāpikakōia.

³¹ Nāskakē rateyamakāfe. Nā peya mīshtifo kexesharamis keskafakī, matori Epa Niospa kexesharakī finakōiakī," ixō Jesūs ato yoini.

"Akka atiri yorafāfe, 'Jesūs ēfe Ifora' ea famisfo yorafāfe ferotaifi. Akka atirifāferi, 'Jesūs ēfe Ifomara' ea famisfo," ixō Jesūs ato yoini

(Lc. 12.8-9)

³² Anā Jesūs ato yoini iskafakī: "Yora fetsafāfe ferotaifi, 'Jesūs ēfe Ifora' ea faifāfe ēri ēfe Epa Nios nai mēra ika anoaxō, 'Nāfo efe yoraki' ē ato faxii.

³³ Akka nā yora fetsafāfe ferotaifi, 'Jesūs ēfe Ifomara' ea faifāfe ēri, 'Nāfo efe yorafomara' ē ato faxii ēfe Epa Nios arixō," ixō Jesūs ato yoini.

“Akka atirifāfe ea chanīmara faifono, atirifāferi ea chanīmara fakaniima,” ixō Jesús ato yoini (Lc. 12.51-53; 14.26-27)

³⁴ Anā Jesús ato yoini iskafakī: “¿Mā shināimē maitio anoax keyokōi yorafo eōnoax inimanōfo ē oni? Maa. Anorima. Akka nā ē mato yoiyai keskara tsōa anoris shinākanima. Akka nā ea chanīmara faifāfe shara shināifono akka nā ea chanīmara faafāfema afara fetsa chakafo shinākani.

³⁵ Akka āfe apa ea chanīmara faino āfe fāke ea chanīmara fakaspakī āfe apakī ōitifishkitiro. Askatari āfe āfari ea chanīmara faino āfe fake xotofāke ea chanīmara fakaspakī āfe afakī ōitifishkitiro. Askatari āfe fāfafa yōxafāfe ea chanīmara faino, āfe fāfafa naetāfa ea chanīmara fakaspakī, āfe fāfafa yōxafokī ōitifishkitiro. Akka ē nai mēranoax matoki oyamanikē askaker-anafoma.

³⁶ Eōxō nānorifos shinākanima. Akka fetsafāfe ea chanīmara faifono eōxō ato fe yorakōifo noikaspatirofo.

³⁷ “Fētsa āfe apa yafi āfe afa noikī finakōixō akka ea noikī finayamax, ea Ifofamis itiroma. Askatari fētsari āfe fake feronāfake yafi āfe fake xotofake noikōixō, akka ea noikī finayamax ea Ifofamis itiroma.

³⁸ Akka fētsa yoitiro iskafakī: ‘Ea omiskōimafiaifono ēfe Ifo ē potatiroma,’ ixō yoitiro. Akka fētsari yoikī iskafatiro: ‘Ea omiskōimanaifono ē Jesús Ifofaima,’ ea askafax efe nīpaxatiroma.

³⁹ Akka fētsa iskafakī shināi: ‘Ē Jesús Ifofaito ea omiskōimakanira,’ ixō shinākī, ēfe meka kachikiri faax, nā keskara yora naax omiskōipakenaka. Akka fetsa eōnoax omiskōifikī ea potaxma nā keskara yora naax efe isharpakenaka,” ixō Jesús ato yoini.

Akka fetsafāfe ato sharafaxōaino, Niospa afara shara ināxii (Mr. 9.41)

⁴⁰ Anā Jesús ato yoini iskafakī: “Akka fetsafāfe mato nikakōikakī eari nikakōikani. Askatari fetsafāfe ea nikakōikakī ēfe Epa Niosri nikakōikani nāatomāi ea nono mai ano ea nīchinino.

⁴¹ Akka fētsa shinākī iskafatiro: ‘Nāatofi Niospa meka yoimiski. Nāskakē ē āfe meka nikasharai,’ ixō yoitiro. Akka nā Niospa meka yoimis afara shara ināi keskafakī ari Niospa ināsharaxii. Nāskakē fētsari shinākī iskafatiro: ‘Nā feronāfake sharakī Niospa meka nikasharamiski. Nāskakē āfe meka ē nikakōi,’ ixō shināino, nā Niospa meka yoimis afara shara ināi keskafakī ari afara shara ināsharaxii.

⁴² Fētsa ea chanīmara faxō ea Ifofakī, aato shināi iskatiro: ‘Ē Jesús Ifofamis. Nāskakē afara shara ē axōi,’ ixō shinākī afara shara axotiro. Nāskakē ē yoinō, ea nikakapo. Faka pishta mā fetsa ayamakē Niospa matori afara shara ināsharaxii,” ixō Jesús ato yoini.

11

Juan aōxō tāpimisfo Jesúski nīchini (Lc. 7.18-35)

¹ Askata Jesús aōxō tāpimisfo doce ato tāpimaxō ato nīchini yorafo Niospa meka shara ato tāpimatanōfo. Jesús mā ato yoikī keyoax ari kani, fetsafo tāpimanikai a pexe rasi chaimashta ikafo ano.

²⁻³ Askatari Juan Maotista karaxa mēra ixō nikani Jesús Apa Niosxō yorafo sharafaito. Nāskakē tāpisharapaini. Nāskaxō karaxa mēraxō aōxō tāpimisfo nīchini Jesús ano. Mā ato nīchia fōkaxō yōkanifo: “¿Mīmē Cristo nā Epa Niospa nokoki nīchiai, askayamai fetsa nokoki oiraka nā nō manai?” ixō yōkatanōfo Juan ato nīchini.

⁴⁻⁵ Mā Jesús ano nokokaxō yōkanifo. Askafaifono Jesús ato kemani: “Fokaxō Juan yoitakāfe a mā ōiyanā a mā nikafori. Yoitakāfe, mā fēxofāfe sharakaxō ōisharakani kiki, askatari nā chatofori mā sharakanax niafokī, a rashkishiaifori mā sharafokī, a pastofāferi mā nikasharakani kiki, a namisfori mā otoafokī, a afaamaisfāferi Niospa meka shara nikani kiki afesaxō Epa Niospa noko ifitiromakī.”

⁶ Nāskaxō ato yoini: “Akka a ea chanīmara fasharakōia afara fetsa shinātama ekeki inimakōitiro,” Jesús ato fani, Juan ina rafe.

Jesús ato yoini Juanoa

⁷ Nā a Juan ato nīchia rafe mā foaifono Jesús yorafo yoikī taefani Juanoa. “¿Afeskakī tsōa istoma anoa Juan ōifokani fonifomē? Juankai nā nēfe tafa pei taka taka akai keskarama. Nāskarifiakī mā mā tāpia Juankai ōiti ranāyama.

⁸ Akka, ¿tsoa ōikai mā kamismē? Ōitsai, feronāfake rapati sharakōi safekē ōikai mā kamisraka. Akka mā mā tāpia a rapati sharakōi safemisfo xanīfofōfāfe āto pexe anoxō rapati sharakōi safetirofo.

⁹ Akka, ¿tsoa ōikai mā kamismē? Nā Niospa meka yoimis ōikai mā kamisraka. Akka chanīma, nā Juan Niospa meka yoimis finakōia, fetsafo keskarama.

¹⁰ Akka nã Juanoa yoikĩ Isaiás kirika keneni iskafakĩ:

Mĩ nai ariax mai ano oyoamano, nã ěfe meka yoimis ě nĩchi taefakĩ mũnoa ato yoiano itipinĩ sharakaxõ mia nikakõinõfo,

ixõ keneni.

¹¹ Akka ě mato yoi ě mato paraima. Tsõakai Juan finõama. Juan yoimis keskara meka shara noko tsõa yoimisma. Juanki Nios inimakõimis. Akka fetsafãferi afaayamafikaxõ ea Ifofaifono Nios atoki inimakõirikai. Nãskakẽ Juan Maotista finakõifiano fetsafãfe finõkõiafo Niospa ato õimis.

¹² “Nã Juan ato matotisa fapanitĩa Niospa meka nikanixakakĩ, iskaratĩari yorafo Nios ika ano ikipaikõikani. Iskakĩ shinãmisfo; ‘Nios xanĩfo ariax ěri ěfe yora ipai afe nĩpaxakĩ. Afaa pishtakai ea nĕtefatiroma ě ěfe yora inõ;’ ixõ shinãmisfo.

¹³ Akka Juan oniyamano taeyoi nã Niospa meka yoimisfo feta Moisésri keneni iskafakĩ: ‘Nã noko ifimis nõko Xanĩfo finasharakõĩ oxii,’ ixõ kenenifo. Akka nã Niospa meka yoimisfãfe kenenifo keskara nãnorikõĩ Juan ato yoini.

¹⁴ Niospa meka yoimisto keneni iskafakĩ: ‘Ě matoki Elías nĩchixii,’ ixõ Niospa yoini. Akka mã ěfe meka chanĩmara fapaikĩ mã tãpitiro nã Juan Elías keskarari.

¹⁵ Mã ea nikatirokĩ ea nikakãfe. Ěfe meka mãto shinã mĕra nanekãfe,” ato fani.

¹⁶ Nãskaxõ anã ato yoini: “Iskaratĩa na niyoafo afe keskarafomãki ě mato yoinõ mã tãpinõ. Nã fakefo ãto kaxeti anoax kaxekakĩ ãto yamafo kenatirofo tai tai iyanã. Akka mã ãto yamafo nokokanax a ato yamafãfe fichipaiyaifo keskai tsoa kaxesharayamaino ato yoitirofo iskafakakĩ:

¹⁷ ‘Nõ nõko xãiti maneaino akka mã mairamisma. Askatari shinãmitsayanã nõ fanãikaino mã oiamisma,’ ixõ ato yoitirofo. Akka mãri nãskari ai mã tsoaki inimamisma.

¹⁸⁻¹⁹ Nãskafakĩri Juan yafi ea mã mekafai. Juankai pikĩ finapaimisma nã õiai pishta pimis, askatari fimi ene pae pishta ayamisma. Nãskakẽ aõnoa mã yoia iskafakĩ: ‘Nã Juan niáfaka yõshi chakaya,’ mã famis. Akka ě yorakõĩ ě Niospa Fakekõĩ piyanã ě ayasharamis. Akka mã ea iskafakĩ yoimis: ‘Jesús ichapakõĩ piimis, askatari pae ayamis,’ mã ea famis. ‘Nãskax yora chakafa fe rafemis, a romanõ xanĩfo kori fixomisfo feri rafemis,’ mã ea famis. Akka ě shara imis ea Niospa ea shinãmanaino. Juanri shara imis Niospa shinãmanaino. Yorafãfe noko õikĩ tãpitirofo,” ixõ Jesús ato yoini.

PeXe rasi anoXõ Jesús nikakaspanifo

(Lc. 10.13-15)

²⁰⁻²¹ Askata anori ato yoita Jesús nã peXe rasi anoafo ato yõani iskafakĩ: “Ooa, Corazin anoafãfe Betsaida anoafo fe, mã omiskõĩ finakõixii. Akka Tiro anoXõ Sidón anoXori nã ě mato õimana keskara, ě ato õimanano ãto chaka xatekaxõ Epa Nios Ifofakeranafo. ‘Ooa, nõ afara chakafamiskĩ iskaratĩa nõ anã Nios Ifofai,’ iyanã rãfikaxõ ãto rapati chapo safekaxõ chii mãpo raish akeranafo fetsafãfe ato õinõfo.

²² Akka Niospa Tiro anoafo yafi Sidón anoafori ato omiskõimafiakĩ ato omiskõimasharaima, akka matoroko omiskõimakĩ finakõixii.

²³ Akka, ¿nõ Capernaúm anoax nõ nai mĕra kai Epa Nios ari ixõ mã shinãimĕ? Maa. Nã omiskõipakenakafo mĕra ě mato potaxii. Akka yõra atiroma keskara afara shara ě mato ispafiano mãto chaka mãkai xateama. Akka nã ě mato õimana keskara Sodoma anoafo ě ato õimamiskẽ ãto chaka xatekeranafo. Nãskakẽ keyokeranafoma. Askatari ãto pexefã rasi keyokeranamã.

²⁴ Ě mato yoinõ. Afetĩara Epa Niospa nã chanĩmara faafoma ato omiskõimani. Nã Sodoma ano ipaonifo omiskõixikani. Akka mãfi omiskõĩ finakõixii,” ixõ Jesús ato yoini.

“Ekeki fekãfe ě mato shinãmasharanõ,” ixõ Jesús ato yoini

(Lc. 10.21-22)

²⁵ Ato askafata Jesús Apa kĩfini iskafakĩ: “Epa, ě mia aicho fai. Keyokõĩ nai mĕranoafoya nono mai anoafo mã ãto Ifo. Mĩ sharafinakõĩ. Akka atrifãfe kirika kene tãpifikaxõ mia Ifofakaxoma. Iskafakĩ shinãmisfo: ‘Tsoa fetsakai noko keskaramã. Nõ tãpikõia,’ ixõ shinãmisfo. Akka nãfo mã meka mã ato tãpimanima. Akka nã kirika kene tãpikaxoma, mã Ifofaifono nãfo mã meka shara mã ato tãpimani,

²⁶ nã mã fichipaiyai keskafakĩ,” ixõ Jesús yoini.

²⁷ Askata anã Jesús ato yoini iskafakĩ: “Epa Niospa a tãpia keskara eari keyokõĩ tãpimani, ěmãĩ ěfe Fakekẽ. Akka tsõakai ea tãpiama, ěfe Epa fistichi ea tãpikõia. Nãskarifikĩ tsõa ěfe Epa tãpiama, akka eres fisti ě tãpikõia. Akka nã fetsafori ě ato tãpimanaino nãfãferi Epa Nios tãpitirofo.

²⁸ Akka mã shinãchakakõikĩ ea kĩfikãfe. Nãskaxõ mã ea chanĩmara fasharayanã mã ea nikasharaito a mato fekaxtefai ě mato potaxotiro anã mã shinãchakayamanõ.

²⁹ Akka ea shinākōikī eōxō mā tāpisharakōitiro. Ē mato noikī fenāmāshta ē mato yononamis tenemasharayanā. Nāskaxō mā anā shināchakatiroma.

³⁰ Akka a ē mato amapaiyai keskara anā fekaxma. Nāskakē anā māto ōiti fekaxtetiroma,” Jesús ato fani.

12

Nā judeofāfe pena tenetiſia Jesúsxō tāpimisfāfe aros keskara metesfenifo

(Mr. 2.23-28; Lc. 6.1-5)

¹ Askata judeofāfe āto pena tenetiſia Jesús aōxō tāpimisfo fe tarepa kani. Aōxō tāpimisfāfe fonāikakī aros keskara metesakxō pii fonifo.

² Fariseofāfe ōikakī Jesús yoinifo: “Ōipo, Jesús. Iskaratīa nōko pena teneti. Akka Moisés noko yoini na pena tenetiſia tsōa pishta yonotiroma. Akka mī inafāfe yonokani na aros keskara metesakakī,” ixō yoinifo.

³ Ato askafaifono Jesús ato kemani: “Akka, ʒa nōko xini Davidōnoa kirika kenenifo keskara mā ōimismē David afaa afesa fanimē āfe inafō feta fonāikōikī?”

⁴ Nāskaxō Nios kīfiti pexefā mēra ikikaixō a mēranoa pāa ato pikīni fonāikōikī ano afaayamano. Akka nā pāa nā judeofo ato Nios kīfixomisfonā ini. Nāskakē fetsafāfe nā pāa tsōa pitiroma ini. Nānori Niospa Moisés yoifinino akka fonāikōikī David pini a afe rafeafo feta.

⁵ Akka, ʒa Moisés keneni keskarari mā tāpiamamē? Iskafakī yoini: ‘Nios kīfiti pexefā mēra a ato Nios kīfixomisfāfe yonotiromo nā pena tenetiſia. Nāskakē afaa chakafakanima,’ ixō Moisés keneni.

⁶ Nios kīfiti pexefā sharaſiano akka ē na pexefā finōkōia.

⁷⁻⁸ Epa Niospa shināmanaino Niospa meka yoimisto Oseas kirika keneni iskafakī: ‘Mā yoināfo inafō retexō ea ināxikī, mā koofamis ea shinākī nā shara. Askafiano fetsafo noikī, mā ato sharaſaxōaito ē ōimis nā sharaſinakōia,’ ixō kirika keneni Niospa shināmanaino. Niospa noko yoimis keskara mā tāpisharaxō, mā ato yoikī chakafakeranama. Nāskakē ē mato yoi iskafakī, ēfe Epa Niospa ea nāmā nīchini xanīfofinakōi ē inō. Nāskakē ē yoitiro afaa nō atiomakī pena tenetiſia. Ē mato yoi na ēfe inafāfe akaifo keskara shara,” ixō ato yoini.

Feronāfake mēke yōshiya Jesús sharaſani

(Mr. 3.1-6; Lc. 6.6-11)

⁹ Nāskata Jesús nānoax kaax judeofāfe āto ichanāti pexe mēra ikitoshini.

¹⁰ Nāno feronāfake āfe mēke yōshia ini. Nāskakē fariseofāfe Jesús yōkanifo afara chakafaito yōaxikakī. Iskafakī yōkanifo: “Maestro, pena tenetiſia, ʒnō yora sharaſatiromē?” ixō yōkanifo.

¹¹ Askafaifono Jesús ato kemani iskafakī: “Mā ovejayaxō māto oveja kini mēra pakeano, ʒmā pena tenetiſia mā ifrisafatiromamē?” ato fani.

¹² “Akka yorafo sharaſinakōiafo, oveja keskarafoma. Nāskakē yorafo nō shinākī pena tenetiſia nō ato sharaſatiromo. Nāskaxō nō afaa chakafaima. Na pena tenetiſia yorafo nō sharaſakī Epa Niospa ōia shara,” ixō Jesús ato yoini.

¹³ Nāskata a feronāfake mēke yōshiya Jesús yoini iskafakī: “Mēshafe,” faino, nā feronāfake mēke yōshiya mēshatanaino āfe mēke sharatani. Nā takai fetsa keskara shara ini.

¹⁴ Nāskata fariseofo mā tsekekanax yoinānifo: “ʒAfsaxō nō Jesús ato achimatiromē retenōfo?” ikanax yoinānifo.

Epa Niospa shināmanaino Isaías keneni Jesúsnoa a inōpokoai yoikī

¹⁵ Jesús nānoax kani mā tāpiax retepaiyaifono. Nāskakē anoax kaino yorafā rasichi chīfafainifo. Akka a isinī ikaifo Jesús ato sharaſapani.

¹⁶ Akka ato sharaſaxō ato yoini: “Ē Niospa Fakekī tsoa yoiyamakāfe,” ato fani.

¹⁷ Nāskarakōi Isaías kirika keneni Niospa shināmanaino Jesúsnoa.

¹⁸ Iskafakī keneni:

Ōikapo. Nakia ea yonoxomis ē katonī. Ē aō noikōi. Ē akiki inimakōi. Ēfe Yōshi Shara ē afe rafemamis. Nā maifotio ano ikafāfe āfe meka nikasharaifono ē āto chaka soaxotiro efe yora inōfo.

¹⁹ Nakai yora fetsafo fe feratenāxima. Meka mitsisipato ato yoima.

²⁰ Akka tafa kerexma ē xatexima. Askatarī chīi ketesharayamaito ē nokafaxima. Askatamaroko ē ketefaxii. Nāskarīfakī yorafāfe ēfe meka nikapaifīkakī nikasharayamaino ē ato potaima. Ato potatamaroko ē ato axosharai ea Ifo sharaſanōfo.

²¹ Nāskakē keyokōi maitio ano ikafāfe yoixikani iskafakakī: “Nā fistichi noko ifitiro nō aōnoax Epa Nios fe nīpaxanō,” ixō yoixikani.

Nāskara Isaías yoikī kirīkakī keneni. Nāskarakōi nō ōi Isaías keneni.

Yora fetsafāfe, “Jesús nīafakāxō ato sharaſaira,” fanifo

(Mr. 3.20-30; Lc. 11.14-23; 12.10)

²² Askata Jesúski feronáfake fêxo efenifo. Askatari mekamisma ini. A mēra niafaka chaka naneano Jesús sharafanō akiki efenifo. Nāskakē Jesús a fêxo ōimasharani, askatari mekamasharani anā mekanō.

²³ Askafaito ōikani yoinānifo: “¡Keel! Ōikapo. Jesús afama mīshti shara fatiro. Akka, ¿namē David áfe fena nā Epa Niospa katoni, námē na nō manai?” ikax yoinānifo.

²⁴ Askafaiáfē nikakaxō fariseofáfe yoinifo: “Maa. Natokai Epa Niosxō niafaka chaka potatiro. Akka nā niafaka chakafáfe áto xanifo nā Beelzebúxō ato makinoa niafaka chaka potai,” ikax yoinānifo.

²⁵ Askafaifono Jesús tāpini a shināifo keskara. Nāskaxō ato yoini: “Yorafo pakxanākanax āa ranā retenāi keyotirofo. Askatari pexe rasi anoax āa ranā retenāi keyotirofo. Nāskax isharatirofoma āa ranā retenāitirofo.

²⁶ Nāskarifikāi Satanás áfe niafaka chakafo potaxō anā afaa afeska fatiroma.

²⁷ Akka mā ea iskafai: ‘Nato niafaka xanifoōxō niafaka chakafo ato makinoa potai,’ mā ea fai. Akka ea yoikapo, ¿tsōāōxō mātō inafáfe niafaka chakafo potafomakī? Akka, ‘Niosxō nōko inafáfe niafaka chakafo potafo,’ ixō mā ea yoitiro. Nāskakē mā tāpitiro ēri Niosxō niafaka chakafo potaino.

²⁸ Akka ē niafaka chakafo Niospa Yōshi Sharaōxō ato makinoa potaino mā tāpitiro a Niospa matoki nīchiai mā nokoano. Nāskakē yorafáfe ea lfo sharafaxii.

²⁹ “Ē anā mato yoinō, nikasharakáfe. Akka, ¿afeskaxō yorafáfe feronáfake mitsisipakōi áfe pexe kene mērañoa áfe rapatiro fiatirofomē? Akka rapati fiakōi achixō metexkere akaxō áfe rapati fiatirofo. Askafakaxō fīaifonokai ato afeska fatiroma.

³⁰ “Akka fetsa efe rafepaikima ea nikakaspitiro. Akka fētsa ēfe meka nikakaspai ea noikaspai. Nāskakē fetsafāferi ea Ifofaifono fichikaspakani. Askakimaroko emakinoa ato pakxanāfapai Epa Nios Ifofayamanōfo.

³¹ “Nāskakē ē mato yoi. Fētsa afara fetsafo chakafakē Niospa áfe chaka soaxotiro. Askatari fētsa afara chaka yoiaino Niospa áfe chaka soaxotiro. Akka ēfe Yōshi Shara chakafakī mekafaito, Niospa áfe chaka soaxonakama. Áto chaka neepakenaka.

³² Askatari fētsa Niospa Fake yorakōi chakafaino Epa Niospa áfe chaka soaxotiro. Akka fētsa Epa Niospa Yōshi Shara mekafakī chakafaino, Epa Niospa áfe chaka soaxonakama. Áto chaka neepakenaka. Nā naitiari áfe chaka aō neepakenaka,” ixō Jesús ato yoini.

*Ifi áfe fimioxō nō tāpitiro afe keskaramākī
(Lc. 6.43-45)*

³³ Anā Jesús ato yoini iskafakī: “Akka shinākapo. Ifi shara áfe fimi sharakōi itiro. Akka ifi chaka áfe fimiri chaka itiro. Ififo áfe fimioxō nō tāpitiro afe keskaramākī.

³⁴ Akka māfi keyokōi chakakōi, nā rono pae keskarakōi mā. Nāskaxō meka shara mā yoitiroma māmāi chakakōixō. Nā mātō shināmā mā shināi keskafakī chakai mā mekamis.

³⁵ Nāskarifikāi yora sharapa meka shara yoitiro, áfe ōiti mēraxomāi shara shinākī. Akka yora chakapari meka chaka yoitiro, áfe ōiti mēraxomāi chaka shinākī. Nāskaxō nā áfe ōiti mēraxō shināi keskara yoitiro.

³⁶ Akka ē mato yoinō. Fatora penata keyokōi Niospa ato ichanāfai tāpikōixō ato yoixiki fatofáfe chanīmara faafomākī, akka fatofāferi nikakaspakanimakī. Nāskatari nā shinātama chaka yoimisfori Niospa ato shināmaxii kiki.

³⁷ Akka mā mātō mekaoxō mā Nios ispatiro mā isharamākī, askayamai mā isharamamākī. Nāskax isharax mā áfe nīpanaka. Askatari mā meka chaka yoimisno nā omiskōipakenakafo mēra mato potaxii. Mātō mekapa mato omiskōimaxii,” ixō Jesús ato yoini.

*Yora chakafáfe, “Tsōa atiroma keskara noko ispafe nō mia chanīmara fanō,” ixō yōkanifo
(Mr. 8.12; Lc. 11.29-32)*

³⁸ Askata fariseofo feta a Moisés yoikī kirika keneni keskara ato tāpimamisfáfe Jesús iskafanifo: “Maestro, nō ōipai tsōa atiroma keskara mū faito,” ixō yoinifo.

³⁹ Askafaifono Jesús ato kemani: “Māfi afara chaka shināyanā mā Nios kachikiri famis. Nāskakē, ‘A tsōa atiroma keskara noko ispafe,’ mā ea fai. Akka nā Jonás ini keskara nā fisti mā ōixii.

⁴⁰ Akka nā Jonás ini keskai ēri askai. Jonás fafinōa xaki mēra tres nia ini. Nāskarifiāi ēri mai mēra maiax tres nia ixii.

⁴¹ Akka fatora penata nā Niospa yorafo keyokōi ichanāfaiťia ato yoixii fatofáfe chanīmara faafomakī, akka fatofāferi nikakaspakanimākai. Nāskakē nā Nīnive anoafáfe mato yoixikani iskafakakī: ‘Jonáspa noko Niospa meka yoiāito nikaxō nōko chaka xatexō nō Niospa meka chanīmara fani. Akka mā Niospa Fake nikafikī mātō chaka mā xatemisma,’ ixō mato yoixikani. Akka ē Jonás finōfekēkai mā ea nikapaimisma.

⁴² Askatari okirinoax nā nafa kēro āto xanīfo ipaoni nōko xanīfo Salomón ōipai chai inoaxkōi oni. Afara sharafo tāpikōia nikaferani oni. 'Afara shara ea tāpimanō; ikax akiki oni. Akka ē nā Salomón ē finōfekē, māakai ea nikapaima. Akka keyokōi mā mai keyoano Niospa noko yoixii fatofomākī sharafo fatoforimākī nikayospafo. Askatari nā kēromā mato yoixii iskafakī: 'Māfi chakakōifokī. ¿Afeskakī mā Niospa Fake nikakaspamismē? Māto xanīfo Salomón tāpikōia keskafakī nāato keyokōi tāpikōifiano. Akka ē Salomón nikaikai chaikōi ē kani. Akka māakai nā Jesús mato fe ifiakē mā nikakaspamis nāato tāpikōifekē,' ixō mato yoixii," ixō Jesús ato yoini.

Anā niafaka chaka yoraki nanetiro
(Lc. 11.24-26)

⁴³⁻⁴⁴ Anā Jesús ato yoini iskafakī: "Ē mato yoinō meka fetsafaxō. Niafaka chaka feronāfaka makinoax tsekeax kafāsatiro tsōa istoma ano fenafafōfōfāitiro ano tsoaxō tenepaikī. Akka tsoa fichixoma niafaka chakata anā shinātiro: 'A ē anoax tsekeita ano ē anā kapai,' itiro. Mā nokoxō ōia nā feronāfaka nā pexe xaka mātsomea keskara shara ini.

⁴⁵ Nāskakē nā niafaka afe niafaka siete efetiro nā chaka finakōiafo, nāfo nā feronāfaka mēra iki fetesenō. Nāskakē nā feronāfaka chaka finakōi itiro a iypaoni keskarama," ixō Jesús ato yoini.

Jesús ōifekani āfe afanō āfe extonō fenifo
(Mr. 3.31-35; Lc. 8.19-21)

⁴⁶ Jesús yorafo yoiaino āfe afanō āfe extonō akiki fenifo afe mekapaikani, pexe emāiti nikaxō mananifo.

⁴⁷ Fētsa yoini: "Mī efanō mī extonō emāiti niafo mefe mekapaikani," fani.

⁴⁸ Askafaino kemakī: "¿Fatomē ēfe efa keskarafo ēfe exto keskarafori?" ato fani.

⁴⁹ Nāskata a aōxō tāpimisfo yoini mētoxō: "Nafō ēfe efafo keskarafo, ēfe exto keskarafori ē ato ōi.

⁵⁰ Akka nā ēfe Epa nai mēra ikato ato amapaiyai keskara akaifo nāfofi ēfe extofo ēfe chikofori ēfe efafori," ixō Jesús ato yoini.

13

Jesús ato yoini meka fetsafaxō fimi exe saamisnoa
(Mr. 4.1-9; Lc. 8.4-8)

¹ Askata na pena fisti Jesús pexe mēranoax tsekekaini kaax, iamāfā kesemē tsaoni.

² Nāno tsoaano yorafā rasi akiki fenifo, āfe meka nikai fekani. Akka Jesús kanōanāfā xaki mēra tsoaxō ato yoiaino nikanifo, iamāfā kesemēxō.

³ Askata meka fetsafaxō afama mīshti Jesús ato yoini iskafakī: "Feronāfaka fistichi fimi exe saafoni āfe nōxati mēra kēchoxō fokī.

⁴ Fimi exe saafokaino ranāri fai nēxpakīa pakeaino a kachikirixori peyafāfe pini.

⁵ Nāskata fimi exe ranāri makexfokī pakei fetseni mai shara anoma. Nāskakē samamakōi fimi exe foaipaini.

⁶ Akka mā foaipaiyaito xinī namani, yosipanā, āfe tapokairoko mai mēra kasharakē. Foaikax, samama nani xinī tsasifaano.

⁷ Ranāri fimi exefo moxafo mēra pakei fetseni. Moxafo mēranoax moxafoya foaipaiyaito moxafāfe namani.

⁸ Akka fimi exe ranāri mai shara ano pakeni. Nāskax foaisharax fimi ichapayakōi ini. Fetsa cien fimiya ini, fetsari sesenta fimiya ini, fetsari treinta fimiya ini.

⁹ Mā pachoyakī ea nikasharakōikāfe," ato fani.

Meka fetsafaxō yorafo yoixō a aōxō tāpimisfo xafakīakōi ato yoini
(Mr. 4.10-12; Lc. 8.9-10)

¹⁰ Nāskata Jesúski a aōxō tāpimisfo fēkaxō yōkanifo: "¿Afeskakī meka fetsafaxō mī yorafo yoimē? Meka xafakīa mī ato yoimisma," ixō yōkanifo.

¹¹ Askafaifāfe Jesús ato kemani: "Akka afesaxō Epa Niospa afe yorafo ikināmakī ē mato fisti tāpimanō.

¹² Akka nā Niospa meka nikasharakōiaifo āfe Yōshi Shara āto mēra naneano nāato ato tāpimasharakōixii kiki. Nāskaxō mā tāpikī finasharakōi. Akka nā nikasharayamaifāfe tāpisharakanamax nāfo fenokōixikani.

¹³ Nāskakē meka fetsafaxō ē ato yoi. Akka ōifikakī tāpikanima. Askatari nikafikakī nikasharakanima.

¹⁴ Nānori a Niospa meka yoimisto Isaías kīrika keneni a inōpokoai yoikī. Iskafakī yoini:

Nikataifafafikakī nikakanima. Ōifikakī tāpikanima.

¹⁵ Nā yorafo āto mapo kerexkōifo. Askatari āto pacho fēstokōifo. Askatari āto fero fepoa keskarafō. Nāskaxō ēfe meka chanīmara fakanima. Nāskakē ē āto chaka soaxotiroma, ixō Niospa yoini keskara Isaías kirika kenenī.

¹⁶ “Akka mā kai ato keskarama. Ē mato yoia keskara mā nikasharamis. Ē mato tāpimanai keskara mā tāpisharakōia.

¹⁷ Shinākapo. Mā ōimis keskara a Niospa meka ato yoimisfo feta a Nios Ifofamis fetsafāferi ōipaifkākī ōipaonifoma. A ē mato yoimis keskara nikasharapaifkākī nikapaonifoma,” ixō Jesús ato yoini.

*Jesús meka fetsafaxō fimi exe saamisnoa ato yoini ato tāpimasharakōixiki
(Mr. 4.13-20; Lc. 8.11-15)*

¹⁸ Anā Jesús ato yoini iskafakī: “Nā ē mato meka fetsafaxō yoiai nā fimi exe saamisfoōnoa ē mato yoikai. Nikasharakāfe tāpixikakī.

¹⁹ Atiri fimi exe fai kesemē pakeaino peyafāfe pinifo. Nāskafakīri fētsa Nios Xanīfoōnoa nikafikī Niospa meka nikasharayamaito, nā Satanās chakata Niospa meka fīatiro.

²⁰⁻²¹ Akka atiri fimi exe makex mēra pakeax, foaipaiifaito xinī namani, āfe tapo mai mēra ikikēma. Nāskafakīri fētsa taefakī Niospa meka nikai inimayotiro. Akka afara chaka nokoaino anā inimatiro, anā Nios Ifofayamaino Niospa meka anā āfe shinā mēra nanetiroma.

²² Akka atiri fimi exe moxafo mēranoax foaikax yosinima. Nāskari fakī fētsa Niospa meka nikasharamax, nāskaxō afara fetsa shinākī, āfe shinā mēraxō shināchakakōitiro. Nāskaxō kori ichapakōi noikī, ‘Ē kori ichapayax ē inimatiro,’ ixō shinākī Niospa meka anā shināima. Nāskakē Niospa meka nikafikī afara fetsafo shināino, afaa Niospa axotiroma.

²³ Akka atiri fimi exe mai shara anoax foaikax mā yosiāx fimi ichapaya ini, āfe fimi cien ini, fetsari āfe fimi sesenta ini, fetsari āfe fimi treinta ini. Nāskafakīri fētsa Niospa meka nikakōikī Niospa meka nanexō nikasharakōitiro. Akka fētsa Niospa meka nikakōisharakī nā fimi exe cien keskara itiro, fētsari nikasharakōi nā fimi exe sesenta keskara itiro, fētsari nikakōisharakī nā fimi exe treinta keskara itiro,” ixō Jesús ato yoini.

Meka fetsafaxō afara fetsa ato tāpimaxiki anā Jesús ato yoini

²⁴ Anā Jesús meka fetsafaxō afara fetsa ato tāpimaxii ato yoini iskafakī: “Ē mato yoinō nā Nios xanīfokōi ika anoax afe keskara ixikanimākai. Ifokōi faafo afe keskaramākī ē mato anā yoinō. Nā yorafāfe Nios Ifokōi faafāfe fimi exe shara fana keskarafo.

²⁵ Akka tare ifo āfe inafō fe oxano, a ato noikaspamis fakishi kaxō a fana shara ano fana chakafanafaini kani.

²⁶ Akka nā fana shara foaikī pei sharayakōi foaini. Askatari fana chakari foaini.

²⁷ Nāskata a tare ifoki āfe inafō fokaxō yoinifo: ‘Ifo, fana shara mī tarepa mī fanafiano, akka, ¿fanīax na fana chaka foaikamē?’ ixō yōkanifo.

²⁸ “Askafaifono nā tare ifāfe ato yoini: ‘Nā noko noikaspamisfāfe fanafo rakikīa,’ ato faito āfe inafāfe yoinifo: ‘¿Na fana chaka nō tsekatiromē?’ fanifo.

²⁹ Akka a tare ifāfe ato yoini iskafakī: ‘Maa, fana chaka tsekapaikī fana sharari mā tsekatiro.

³⁰ Nāskanōki. Nā fana sharafoya yosiyonō nā fana shara āfe fimi topiaifotīa, ē mato yoixinō iskafakī: “Na fana chakafo xatekāfe. Xatexō mextexō koaxikakī. Nāskata nā fana sharafos ēfe tapas mēra ea faxoxikakī,” ixō a tare ifāfe ato yoitiro keskafakī, nāskarīfakī Epa Niospa mato paxkanāfaxīi ea Ifofaafō ē ato ifixīi. Akka ea Ifofayamafo chiifā mēra ē ato nīchixīi,” Jesús ato fani.

*Mostaza exeōnoa yoikī meka fetsafaxō Jesús ato tāpimani
(Mr. 4.30-32; Lc. 13.18-19)*

³¹⁻³² Askata anā Jesús meka fetsafaxō ato yoini iskafakī: “Afe keskaramākī Nios xanīfāfe noko īkinā ē mato yoinō. Nā fimi exe mostaza yōra āfe tarepa fanatiro. Akka nā mostaza exe pishtakōi. Akka mā yosiāx efapakōi itiro fana fetsafo keskarama. Nāskakē peyafāfe āfe teshpafō ano naa faxō too fatiro. Nāskari fakī taefakī pishta mā Epa Nios Ifofayotiro. Nāskaxō fisti rasichi mā Ifofayotiro. Akka chipo ichapakōichi atirofo Nios Ifofakakī,” ixō ato yoini.

*Meka fetsafaxō pāa faraxika keskaraōnoa Jesús ato yoini
(Lc. 13.20-21)*

³³ Askata anā Jesús meka fetsafaxō ato yoini iskafakī: “Afe keskaramākī Nios xanīfāfe noko īkinā ē mato yoinō. Nā kēromā pāa fakī levaduraya arinā osixō kamosakano faraxitiro keskara. Nāskarīfiakī nō ōitiro. Yorafāfe Niospa meka āto shinā mēra naneano nō ōiyamafaiino āto ōiti fetsafakanax Nios keskara shara itirofo,” ixō Jesús ato yoini.

Afama mīshatikiri yoikī meka fetsafaxō Jesús ato yoipaoni

(Mr. 4.33-34)

³⁴ Askatari Jesús nā yorafā rasi yoini meka fetsafaxō afara fetsa ato tāpimaxii. Akka meka fetsafaxō Jesús mēxotaima ato yoipaoni.

³⁵ Akka nā Niospa meka yoimisto a inōpokoai yoikī kirika kenekī keskakōifakī Jesús nāskakōi fani. Iskafakī keneni Jesúsnoa yoikī:

Ē ato meka fetsafaxō yoixii. Niospa keyokōi onifanitīa nāskatari a nikamisfoma ē ato tāpimaxii, ixō Jesúsnoa yoikī keneni.

Jesús nā fana chakafoōnoa ato tāpimani

³⁶ Askata yorafā rasi makinoax Jesús pexe mēra ikikaini. Mā pexe mēra kaano, aōxō tāpimisfāfe anā yōkanifo ato yoisharanō. “Ifo, meka fetsafaxō mī noko yoia nā fana chakaōnoa nō tāpiama. Anā noko xafakia yoife nō tāpisharanō,” ixō yoinifo.

³⁷ Askafaifono Jesús ato kemani: “A fana shara fanamisfo keskara ēkīa,” ato fani.

³⁸ “Akka a tare ē yoiai mā tāpitiro nā maitio ē yoi. Akka nā fimi exe shara ē yoiai nā Nios Ifofamisfo ē yoi. Akka nā fana chakafo ē yoiai nā Satanás ifofamisfo ē yoi.

³⁹ Akka nā noko noikaspamisto fimi chakafana ē yoiai, a Satanás ē yoi. Akka nā fimi exe topiaifo ē yoiaito mā nikai, mā mai keyoaino ē yoi. Akka a fimi exe topimisfo ē yoiaito mā nikai, nā Niospa āfe ājirifo ē yoi.

⁴⁰ Nā fana chakafo xatekaxō chīi koatirofo keskai, nāskarifiakī nā omiskōiaia nokoaitīa omiskōixikani mā mai keyoaino.

⁴¹⁻⁴² Nāskarifikā ēfe ājirifo ē nīchixii a afara ato chakafamamisfoya a afara chaka tāpimisfōri ato chīi xoisai mēra ato potanōfo anoax oiayanā omiskōipakexanōfo.

⁴³ Akka nā Niospa meka nikasharakōiaifo, Epa Nios ika anoax nā xinī chaxai keskara shara ixikani. Mā pachoyakī ēfe meka nikasharakī mātō shinā mēra nanekāfe,” ato fani.

Afara sharakōi oneaōnoa yoikī meka fetsafaxō Jesús ato tāpimani

⁴⁴ Anā Jesús ato yoini iskafakī: “Ē mato yoinō nā Nios xanīfokōi ika anoax afe keskara ixikanimākai. Feronāfāke tare ano yonokī orokī afara sharafinakōia fichixō nā fichia ano anā oneni. Nāskaxō āfe afama mīshiti keyokōi ato minixō mā kori fixō nā mai fini nā afara sharakōi āfenā inō. Nāskarifiakī mā Nios Ifokōifapaikī mā fichikōipaitiro,” ixō Jesús ato yoini.

Maxek oxo fakkai fakkaisai keskaraōnoa āfe ane perlaōnoa, meka fetsafaxō Jesús ato tāpimani

⁴⁵⁻⁴⁶ Anā Jesús ato yoini iskafakī: “Ē mato yoinō nā Nios xanīfokōi ika anoax afe keskara ixikanimākai. Nā rini faka mēra potexō foe fetsa fetsatapafo fitirofo keskara ixikani. Mā fichixō āfe afama mīshiti keyokōi ato minixō kori fixō nā perla sharakōi fini. Nāskarifiakī nō Epa Nios Ifofasharapaikī nōko afama mīshitifo nō shināmakitiro Epa Niosmāi sharafinakōikē,” ixō Jesús ato yoini.

Anā meka fetsafaxō rinīōnoa Jesús ato tāpimani

⁴⁷ Anā Jesús ato yoini iskafakī: “Ē mato yoinō nā Nios xanīfokōi ika anoax afe keskara ixikanimākai. Nā rini faka mēra potexō foe fetsa fetsatapafo fitirofo keskara ixikani.

⁴⁸ Akka nā rini mā foe fospikōiano, nā rinipa fimisfāfe faka ketokonō rini ninifotirofo. Faka ketokonō tsoaxō fofo katotirofo. Nā sharafo fēta mēra nanekaxō nā chakafo potatirofo.

⁴⁹ Nāskarifiakī nōko mai keyoaino. Nāskatari Niospa āfe ājirifāfe noko paxkanā faxii nā chakafoya nā sharafo.

⁵⁰ Akka nā chakafo nā chīi xoisai mēra ato potaxii. Nānoax oiayanā omiskōipakenakafo,” ato fani.

Afara fena sharakōi yafi afara shara xiniōnoa Jesús ato yoini

⁵¹ Nāskaxō Jesús ato yōkani: “ĪNā ē mato yoiai keskara mā mā nikaimē?” ato faito, “Ēje, a mī noko yoiai nō nikai,” faifono anā Jesús ato yoini:

⁵² “Akka pexe ifāfe pexe xaki mēra āfe afara shara onekatsaxakī nā fena yafi nā xini ato ispatiro. Nāskarifiakī a Moisés yoikī kirika keneni keskara ato tāpimamisfāfe mā Nios Ifokōi faifono, Nios xanīfoōnoa ato yoitirofo. Akka meka xiniōxō meka fena sharari mā tāpitiro,” ato fani.

Jesús Nazarete anoxō nikakaspanifo

(Mr. 6.1-6; Lc. 4.16-30)

⁵³ Askata Jesús mā meka fetsafaxō ato yoikī keyoax nānoax kani.

⁵⁴ Mā kaax āfe mai anakōi nokoni. A judeofāfe āto ichanāti pexe mēraxō ato yoikī taefani ano. Nānoxō yorafāfe iskafanifo: “iKee, nikakapo! ¿Fanixō iskara tāpixō yoiimē askatari nā tsōa atiroma keskara fai? ¿Fanixō iskara tāpiamē?” fanifo.

⁵⁵ “Nā mīsa famisto fakeki. Āfe afa María. Āfe extofo mā nō ōimis. Santiago ikaino, José ikaino, Simón ikaino, Judas ikaino, nāfo āfe extofo,” fanifo.

⁵⁶ “Āfe poifori nofe imisfo. Nōfi Jesús tāpia. Nākai afama. Akka, ¿afeskaxō afama mīshti fatiromē?” ikax yoinānifo.

⁵⁷ Nāskakē nikakaspanifo. Akka Jesús ato yoini iskafakī: “Keyokōi nā maitio anoxō Niospa meka yoiimis nikatirofo. Akka nā āfe maikōi anoxō nikapaitirofoma. Nāskakē mā ea nikakaspamis,” ixō ato yoini.

⁵⁸ Nāskakē anoxō afama mīshti ato ōimānima tsōakairoko nikaito.

14

Juan Maotista nani

(Mr. 6.14-29; Lc. 9.7-9)

¹⁻² Nāskatari Galilea ano nā xanīfo Herodes ini. A Jesús afama mīshti faito nikaxō āfe inafō yoini iskafakī: “Akka nā Juan Maotista ē ato textemayamea mā anā otoa. Mā otoxō tsōa atiroma keskara afama mīshtifo fai,” ixō shināni.

³⁻⁴ Akka Herodes Juan reteyoamano Juan yōani iskafakī: “Xanīfo Herodes, mī exto Felipe mī āfe āfi Herodías mī fīa. Askara chakakōi,” nāskafani. Nāskakē Herodes akiki ōitifishkini. Nāskaxō āfe sorarofa achimani karaxa mēra ikimaxii.

⁵ Akka Herodes Juan retepaiifi yorafoki meseni yorafāfemāi chanīmara faifono Juanmāi Niospa meka ato yoiimiskē. Nāskakē Herodes shināni iskafakī: “Ē Juan retekē eari yorafāfe retetirofo,” ixō shināni.

⁶⁻⁷ Akka Herodes āfe cumpleaño ikaino, yorafo ato ichanāfani. Ichanāfono nā Herodías fake xomaya ares mairani yorafāfe ferotaifi ato inimamai. Nāskakē Herodes yoikī iskafani nā xomaya yorafāfe ferotaifi, “Mī afara fichipaiyai keskara ea yōkafē ē mia inānō,” ixō yoini.

⁸ Nāskakē nā kēro xomayato āfe afa ano kaxō yōkani iskafakī: “¿Ē afaa Herodes yōkatiromē?” faito āfa yoini iskafakī: “Juan Maotista āfe mapo textexō ea sapaki rataxō ea fexōfē fafe,” fani.

⁹ Askafaito nikai xanīfo Herodes shināmitsani. Shināmitsayanā āfe shinā mēraxō shināni iskafakī: “iŌoa! Ē Juan ato textemapaima. Akka yorafāfe nikaifono mē na kēro xomaya yoiā. Nāskakē ē Juan ato textemapaiyamafikī ē ato textemāni,” ixō shināni.

¹⁰ Nāskaxō xanīfāfe āfe sorarofō yoini: “Juan textexō āfe mapo ea fixotakāfe,” ixō yoini.

¹¹ Ato askafaino fōkaxō sorarofāfe Juan textekaxō āfe mapo sapaki ratakaxō fenifo. Fēkaxō nā kēro xomaya inānifo. Nāatori āfe afa ināni.

¹² Nāskakē Juan inafō fēkaxō āfe yora fōkaxō maifanifo. Mā askafakaxō Jesúski nokokaxō yoinifo.

Jesús cinco mil feronāfakefo ato pimani

(Mr. 6.30-44; Lc. 9.10-17; Jn. 6.1-14)

¹³ Askata Herodes sorarofō Juan textemana nikai Jesús ares fisti kani kanōanāfānē tsōa istoma ano. Mā Jesús ato makinoax kaa nikakani pexe rasi anoax yorafā rasi fāi fonifo.

¹⁴ Mā kanōanāfā makinoax fotoxō akiki yorafā rasi foaito fichini. Ato ōikī ato shinākōini. Nāskaxō a isinī ikaifo ato sharafapani.

¹⁵ Mā yātapakeaino aōxō tāpimisfo akiki nokokaxō yoinifo: “Mā yātapakei kiki nono afaamakī yorafo nīchife a piaifo fitanōfo pexe rasi anoaxo,” ixō yoinifo.

¹⁶ Askafaifono Jesús ato kemani: “Maa. Fokanima kiki. Māroko ato pimakāfe,” ato faito,

¹⁷ kemanifo: “Nō nono cinco pāaya, askatari foe rafes,” fanifo.

¹⁸ Askafaifono Jesús ato yoini: “Ea fixotakāfe,” ato fani.

¹⁹ Nāskaxō yorafā rasi yoini fasi ano tsaonōfo. Askata foe rafe yafi cinco pāa tsoanaxō nai foisinīfōfā Apa Nios Kīfīni iskafakī: “Aicho, Epa, mīōxō ē ato pimai. Mī sharakōi,” fata, pāa kaxketa foe rafeya osixō aōxō tāpimisfo ināni a yorafo ato ināketsanōfo.

²⁰ Nāskax pikanax māyakōimifo. Akka nā chetefaafo doce fēta fospinī.

²¹ Nā piaifo cinco mil feronāfakefos ini. Kērofāferi fakefo feta pinifo.

Jesús iamāfā femākīa kani

(Mr. 6.45-52; Jn. 6.16-21)

²² Mā cinco mil yorafo pimata Jesús aōxō tāpimisfo yoini iskafakī: “Kanōanāfānē nanekāfe, okiri iamāfā pokefaitaxikākī,” ixō ato yoini. Jesús kayoxoma yorafo nīchiaino aōxō tāpimisfo fonifo.

²³ Mā yorafo nīchita, māchi keya ari arese kani arixō Apa Nios kīfikai. Mā fakishaino, ares fisti ano ini.

²⁴ Akka a aōxō tāpimisfo kanōanāfānē mā chai foafono, nēfefaino ĩamāfā poikī ato kati-mafani.

²⁵ Akka mā penaino Jesūs ĩa femākīa atoki kaito tsōa tāpinima.

²⁶ Nāskata tāpikanamax aōxō tāpimisfo Jesūs ĩamāfā femākīa kaito fichikanax tai tai iyanā ratekōinifo, niarafakara ikanax.

²⁷ Askaifono Jesūs ato yoini: “Rateyamakāfe, ēki,” ato fani.

²⁸ Ato askafaino Pedro kemani: “Ifo, mīmākī eari kenafe ēri ĩamāfā femākīa kanō mia ari,” Pedro fani.

²⁹ “Ofe,” Jesūs fani. Nāskakē Pedro kanōanāfā makinoax fotopakekafā ĩamāfā femākīa Jesūs ari kani.

³⁰ Kapaifi nefeaito ōi nefe kerexkōi mei mesekōini. Nāskakē ĩamāfā mēra ikipakekafakī fāsikōi kenani: “ĵifo, ea ifife!” fani.

³¹ Askaito Jesūs koshikōi āfe mēke achixō yoini: “Mīkai ea chanīmara fasharama. Ĵafeskakī mā chanīmara faimamē?” ixō Jesūs yoini.

³² Askata nā rafe kanōanāfā mēra naneinīfofanaifono nefe nishpatani.

³³ Nāskakē nā kanōanāfā mēra naneafāfe Jesūs nāmā ratokonō mai chachipakefōfā yoinifo: “Chanīma, mīfi Niospa Fakeki,” ixō yoinifo.

Jesūs Genesaret anoafō a isinī ikaifo ato sharafani
(Mr. 6.53-56)

³⁴ Akka ĩamāfā pokefaikani Genesaret mai ano nokonifo.

³⁵ Nāskata nā ano ikafāfe yorafāfe Jesūs tāpirisafanifo. Nāskakē nā chai ikaiforo ato yoinifo akairi tāpinōfo. Nāskakē a isinī ikaifo Jesūsiki efenifo.

³⁶ Nāskakē Jesūs yōkanifo: “Ĵnō mia tari kexa maikiri pishta ramākatioromē nō sharaxiki?” fanifo. Nāskakē Jesūs tari ramākanax sharai fetsenifo.

15

Jesūs ato yoini afeskai yorafo chakafomakī
(Mr. 7.1-23)

¹ Askata fariseofo fe a Moisés yoikī kirika keneni keskara ato tāpimamisfo Jerusalén anoax Jesūsiki fēkaxō yōkanifo:

² “Ĵafeskai na mīōxō tāpimisfo a nōko xinifo ipaonifo keskakanimamē? Akka a nōko xinifāfe yoinifo keskara tāpifikaxō pixikakī mechokomekeranafo,” ixō yoiaifāfe Jesūs ato kemani:

³ “Akka, Ĵafeskakī māri mato xinifo ipaonifo keskara mā tanapaimē? Nāskaxō a Niospa yoini keskara mā nikatama nā mato xinifāfe yoimisfo keskara mā nikamis.

⁴ Akka Epa Niospa yoikī iskafani: ‘Māto epa yafi māto efa nikasharakāfe. Akka a āto apa yafi āto afa chakafaifo ato retemakāfe,’ ixō Niospa yoini.

⁵⁻⁶ Nānori Niospa yoifinikē māfi ato mēstekōi nofe yorafo mā ato tāpimamismaki. Akka mā ato yoimis iskafakī: ‘Māto epa yafi mato efa mā yoikī iskafatiro: “Epa, na kori ē mia inākerana. Nāskafixō mē kori keyoa ē Nios ināki. Nāskakē ē mia anā afaa inātiroma,” ixō mā ato yoitiro. Nāskaxō mato epafo mā shināmākīa keskara mā itiro,’ ixō mā ato yoimis parakī. Askafixō mā ato tāpimasharamisma. A kirikakī yoikī Niospa meka kenenifo anori mā yoimisma. Nā mato xinifo ipaonifo keskara fisti mā tanamis. A Niospa yoini keskara mā akima.

⁷ Māfi keparanāmiski. Matoōnoa yoikī Niospa meka yoimisto Isaiās kirika keneni chanīmakōi iskafakī:

⁸ Nā yorafāfe eōnoa yoisharafikakī āto shinā mēraxō ea shinākōiafoma.

⁹ Āa kaxpa ichanākanax fanāimisfo ea kīfiyanā. A ato tāpimanaifo yorafāfe shinā keskarafo. Akka askarakai Niospa shināma, ixō Isaiās keneni, Niospa shināmanaino.”

¹⁰ Nāskata Jesūs yorafo kenaxō ato yoini iskafakī: “Ea nikasharakōikāfe tāpisharakōixikakī ē mato yoinō.

¹¹ Na mā piaito choshta keskara mato imatiroma. Askatamaroko yorafāfe āto shinā mēraxō chaka shinākani, askatari chakai mekaifono choshta keskara Niospa ato ōi,” Jesūs ato fani.

¹² Askata aōxō tāpimisfo fōkaxō Jesūs yōkanifo: “Ifo, Ĵmī tāpimamē fariseofo ōitifishkikani nā mī yoiaito nikakani?” ikaxō yoinifo.

¹³ Askafaifono Jesūs ato kemani meka fetsafaxō: “Tare ifāfe afara chakafo fanatiroma. Askatamaroko a chaka foaikaino tsekaxō potatiro. Nāskarifikakī ēfe Epa nā nai mēra ikato afarafo fanayamaxō, āfe tapo tsekaxō potaxii anā afaa inōma.

¹⁴ Akka fariseofo nikayamakāfe. Nā fēxo keskarafoki. Akka fēxo afe fēxo iyopai xato mēra paketiro. Nāskarifiakī nā fariseofāfe Niospa meka tāpikaxoma fetsafo tāpimatirofoma. Nāskakē ato fe Nios ari nokotirofoma,” ixō Jesús ato yoini.

¹⁵ Ato askafaito Pedro Jesús yoini: “A na mī yoia keskara meka fetsafaxō noko yoisharafe nō tāpisharanō,” fani.

¹⁶ Askafaito Jesús kemani: “¿Afeskakī māri mā nikasharaimamē?”

¹⁷ Akka nō afara piano nōko ato mēranoax payokomeano nō aya safatiro. Nāatokai mato chakana fatiroma.

¹⁸ Akka a māto shināmā shināxō mā afara chaka yoiaino nāato mato chakana fatiro.

¹⁹ Akka yorafāfe afara chakafakakī āto shinā mēraxō chaka shinātirofo, ato retetirofo, askatari āto āfima chotatirofo, askatari kēro shinā kaxefatirofo, askatari yometstirofo, askatari chanītirofo, askatari ato īchatirofo.

²⁰ Akka mechokomexoma mā piaino Epa Niospa choshta keskara mato ōima. Akka yorafāfe āa shināxō afara chakafatirofo. Nāskakē Epa Niospa ato ōi choshta keskara,” ixō Jesús ato yoini.

*Xotofake judeoyamafixō Jesús chanīmara fakōini
(Mr. 7.24-30)*

²¹ Askata Jesús aōxō tāpimisfo fe kani nā pexe rasi Tiro fe Sidón chaimashta ano.

²² Askata kēro fisti Canaán mai ano ikatsaxakī judeo kaifoma Jesús ano kani. Kaxō fāsikōi yoikī kenani iskafakī: “Ifo, mī David fenaki, ea shināfe. Ēfe fake xotofakeshta niafaka chakata omiskōimamiski,” ixō yoini.

²³ Askafaito nikafikī Jesús kermanima. Nāskakē āfe inafāfe fōkaxō yoinifo: “Ifo, na kēro yoife katanō. Nocho okī noko fekaxtefafei kiki. Fāsikōi fiisiki kiki,” fanifo.

²⁴ Askafaifono Jesús ato yoini: “Ēfe Epa Niospa ea nīchini judeofos ano, nāfo oveja fenoa keskarafō. Akka yora fetsafo ano ea nīchinima,” ato askafani.

²⁵ Akka nā kēro Jesús nāmā ratokonō mai chachipakefōfayanā iskafakī yoini: “Ifo, ēfe fake ea sharafaxope,” fani.

²⁶ Askafaino Jesús kemani meka fetsafaxō: “A fakefāfe piāi fiāxō nō paxta inā, askarakai sharama,” fani.

²⁷ Jesús askafaito nā kēromā kemani: “Ēje, Ifo. Akka paxtafāfe pitirofo a ifāfe piāi āfe potofō mīsa nāmā keyo pakeaito,” fani.

²⁸ Askafaito Jesús yoini nā kēro: “Mī ea chanīmara fakōini fetsafo keskarama. Akka nā mī ea yoiai keskara ē mia axonō,” ixō Jesús nā kēro yoini. Askafaino āfe fake xotofake shararisatani.

Jesús yora ichapa sharafani

²⁹ Askata Jesús anoax aōxō tāpimisfo fe kaaxīa Galilea kesemē nokoni. Nāskata machi keya māpefainax tsaoni.

³⁰ Nāno yorafā rasi akiki fenifo. Nā isinī imisfo akiki efenifo Jesús ato sharafanō. Fetsa chāto ini, fetsari fēxo ini, fetsari mifi yōshia ini, fetsari mekamisma ini. Nāskakē fetsa fetsatapafo a isinī ikaifo Jesús keyokōi ato sharafani.

³¹ Ato sharafaino ōikani yorafo yoinānifo: “¡Kee! Ōikapo. Iskarakai nō ōimisma. Nā mekamisfoma mā mekakani. A mifi yōshiafori mā sharafo. Nā chatofori mā nisharakani. Nā fēxofāferi mā ōisharakani. Jesús afama mīshti fatiro. Akka nōfi israelifokī nōko Nios fāsi sharakōi,” ikanax yoinānifo.

*Jesús cuatro mil feronāfakefo pimani
(Mr. 8.1-10)*

³² Askata Jesús aōxō tāpimisfo kenaxō yoini: “Ē na yorafo shinākōi, nono tres nia mā efe ikafono, nonoxori afaa pikanima. A piaifo mā keyoa. Akka afaa pimaxoma āto pexe ano ē ato nīchiano fonāikani afaa pikanaxma fai nēxpakīa paketirofo,” ixō Jesús ato yoini.

³³ Akka ato askafaino aōxō tāpimisfāfe kermanifo: “Akka, ¿afeskaxō a nō piāi nō fichitromē na yorafo ato pimaxikī nono tsoa ikama?” fanifo.

³⁴ Askafaifono Jesús ato yōkani: “¿Afe tii mā pāayamē?” ato faito, “Siete pāa pishta, foe ichapamashtari,” fanifo.

³⁵ Nāskata nā yorafo nāmā tsaonōfo Jesús aōxō tāpimisfo ato yoini.

³⁶ Nāskata Jesús siete pāa yafi foeri tsoanaxō Apa Nios kifini: “Aicho Epa, mīōxō ē ato pimaikai. Mī fāsi sharafinakōiaki,” fata, pāa kaxketa, foeri tekenāfaxō aōxō tāpimisfo ato ināni nā yorafā rasi ato miniketsanōfo.

³⁷ Nāskakē keyokōichi pikanax māyakōinifo. A pikī chetefaafo siete fēta fospikōia ini.

³⁸ Akka nā pāa piafo cuatro mil feronāfakefos inifo. Kērofāferi fakefoyaxori ato feta pinifo.

³⁹ Nāskata Jesús yorafo yoini fōtanōfo āto pexe ano. Nāskata Jesús kanōanāfā mēra naneinākfani aōxō tāpimisfo fe. Mā naneinākfāta aōxō tāpimisfo fe mai fetsa ano kani, Magdala ano.

16

Fariseofo feta saduceofāfe, “Tsōa atiroma keskara noko ispafe nō mia chanīmara fanō,” ixō Jesús yōkanifo

(Mr. 8.11-13; Lc. 12.54-56)

¹ Askata Magdala mai ano Jesús nokoano fariseo fe saduceofo Jesús ðifokani fonifo afara chakafamapaikani. Nāskakaxō yoinifo: “Mī Niospa Fakemākī tsōa atiroma keskara noko ispafe nō mia chanīmara fanō,” fanifo. Nāskakaxō Jesús afara chakafamapaikani.

² Askafaifono Jesús ato kemani: “Mā yātapakeaino xini iki sharapakekōikai, ‘Penama oi ikima, mā famis.

³ Akka mā penaino nai choshtakōi ðikī, ‘Oi iki kiki,’ mā famis. Akka nai choshtakēma ðikī, ‘Oi ikima,’ mā famis. Nai foiskī mā tāpitiro oi feyamai feima rakikīa mā fatiro. Askafixokai nā Niospa mato yoiai keskara mā chanīmara faima. Nāskakē mā ea tsōa atiroma keskara fafe, nō ðinō mā ea famis. Akka, çafeskakī mā tāpīamamē Epa Niospa noko ikīfiano?” ato askafani yoikī.

⁴ “Na yora chakafāfe ea chanīmara faafāfema ðipaikani ē Niosxō afara shara ē ato ispanō. Akka ē ato ðimanimā. Akka Jonás fafinōfānē xeaitano fafinōfānē xaki mēra tres nia ini. Nāskakē Niospa Jonás kāmiani fafinōfānē xāki mēranoax tsekeinō. Nāskakē a tsōa atiroma keskara ē mato ispaima,” ato fata ato makinoax Jesús kani.

“Fariseofo feta saduceofāfe anorima yoimisfoki ato nikayamakāfe,” Jesús ato fani
(Mr. 8.14-21)

⁵ Nāskano Jesúsxō tāpimisfāfe okiri ĩamāfā pokefaini fōkakī a pii foaifo shināmakifainifo. Nāskakaxō shinānifo: “Kee, çnō afaa piikaimē? A nō piikai mā nō shināmakikerani,” ikanax yoinānifo.

⁶ Nāskakē Jesús ato yoini iskafakī: “Nā fariseofo feta saduceofāfe āto pāa faraxati keskara fiyamakāfe,” ixō ato yoini.

⁷ Ato askafaito nikakani aōxō tāpimisfo yoinānifo: “çAfeskakī Jesús noko yoimē fariseofo feta saduceofāfe āto pāa faraxati fiyamakāfe noko fai? Akka nō pāa feama. Nāskakē pāanoa noko yoiraka,” ikax yoinānifo.

⁸ Akka mā tāpixō Jesús ato yoini: “çAfeskai nō pāayamara mā ikimē? Akka mā ea chanīmara fasharama,” ato fani.

⁹ “Mākai ea tāpisharama. Akka, çmā shināimamē cinco pāa kaxkexō cinco mil feronāfakefo ē ato pimati? Akka, çafe tii fēta pāa fospia ikitamē?” ato fani.

¹⁰ “Askatari, çmā shināimamē nā siete pāa kaxkexō cuatro mil feronāfakefo ē ato pimati? Akka, çafe tii fēta texefafo mā fitamē?”

¹¹ Akka, çmā tāpīamamē pāanoa ē mato yoima? Nā fariseofoya saduceofoñoa ē mato yoi,” Jesús ato fani.

¹² Nāskakē tāpinifo Jesús ato yoiaito. Akka nā pāa faraxitiñoa Jesús ato yoinima. Nā fariseofāfe saduceofo feta ato anorima tāpīmapaiyaito Jesús ato yoini.

“Mī Cristo mia Niospa ifini nokoki nīchixii mī nōko xanīfo finakōia inō,” ixō Pedro Jesús yoini
(Mr. 8.27-30; Lc. 9.18-21)

¹³ Askata Jesús aōxō tāpimisfo fe mai fetsa ari nokoni, Cesarea Filipino mai ano. Nānoxō aōxō tāpimisfo yōkani iskafakī: “Yorafāfe, çafaa ea fakanimē ē tsoamē?” ato fani.

¹⁴ Ato askafaito kemanifo iskafakakī: “Fetsafāfe, ‘Juan Maotistara’ mia fakani. Fetsafāferi, ‘Eliasar’ mia fakani. Fetsafāferi mia iskafakani: ‘Nā Niospa meka ato yoimis nā Jeremiaskā, askayamai nā Niospa meka ato yoimis fetsa rakikīa,’ mia fakani,” fanifo aōxō tāpimisfāfe.

¹⁵ “Akka, çmā, ea tsoara faimē?” ato faito, Pedro kemani iskafakī:

¹⁶ “Mīfi Cristoki, nā Nios nīpanakato Fakekōi,” fani.

¹⁷ Askafaito Jesús kemani iskafakī: “Simón, mīfi Jonáspa fakeki. Niospa mia noixō mia sharafaxōa. Akka ē Niospa Fakekē tsōa mia tāpīmanama. Ēfe Epa Niospa nā nai mēra ikato āa mia tāpīmana.

¹⁸ Ē mia anā yoinō. Mīfi Pedroki,” ixō Jesús yoini. Akka israeli mekapa Pedro Tokirinīfā nō fatiro. Tsōa tokiri efapa pītsi itīroma. Nāskaxō Jesús anā yoikī iskafani: “Mī ea yoia: ‘Mī Cristo, nā Nios nīpanakato Fakekōi,’ mī ea faa. Nā mī yoia keskaraōxō fetsafāfe arifi chanīmara faxikani. Nāskaifāfe efe yorafo ē ato imaxii. Nāskax ichanāxikani ea fanākani ekeki inimakani. Yōshi chakafāfe Nios noikaspakakī ato namapayanā ato xatemapaiifaifono

tsoa xatetiroma. Nā e Ifofafo xatenakafoma ea fanākani. Tokiri efapanāfā pītsikiki tsōa tararatiroma keskara ixikani.

¹⁹ Akka fētsa chamisi fepoti fēpetiro yorafo pexe mēra ikimaxikī. Nāskarifiakī ē mia yoi mī yorafo eōnoa mī ato tāpimaxii ea Ifofanōfo. Akka mī ato yoiatio nikakōikanax efe yora itirofo Epa Nios fe ipaxakakī. Nāskai mī chamis keskara itiro. Nā mī ōiai fato sharakōimākī mī ato yoiitiro: 'Nā sharakōi mā atiro,' ixō mī ato yoiitiro. Nā sharakōi mī ōiai, Epa Niospari sharakōi ōi. Askatari mī ōikai fato chakamakī, mī ato yoiitiro: 'Na chaka mā atiroma.' Nāskara mī yoiaino, Epa Niospari nā chaka ōitiro."

²⁰ Nāskata Jesús aōxō tāpimisfo yoini: "Tsoa yoiyamakāfe ēfi Cristokī," ato fani.

"Chipo ea retexikani," Jesús ato fani

(Mr. 8.31-9.1; Lc. 9.22-27)

²¹ Akka anā meka fetsafaxō Jesús ato yoinima. Xafakīakōi a aōxō tāpimisfo ato yoini achiyoafomano: "Ē Jerusalén ano kai. Nānoxō a ato Nios kīfixomisfāfe āto xanīfofo feta a Moisés yoiikī kirika keneni keskara ato tāpimamisfāferi, askatari nōko kaifāfe āto xanīfofofāferi ea omiskōimaxikani. Ea ato retemafafono, tres nia oxata ē anā otoxii," ixō ato yoini.

²² Askafaino Pedro Jesús ori iyoxō yoini iskafakī: "Ifo, askayamafe. Miakai retexanima kiki," fani.

²³ Pedro askafaino Jesús texkeakekafāni. Nāskaxō iskafakī yoini: "Satanás, emakinoax katāfe. Mī ea xītipaikai a Niospa ea amapaiyai ē anōma. A Niospa shināi anori mī shināima. Akka nā yorafāfe shināi keskara mī shināi," fani.

²⁴ Askafata Jesús aōxō tāpimisfo yoini: "Fatora fetsa ēfe inakōi ipaikī āakōi apaiyai keskara anā atiroma. Nā ē yoiat keskara nikakōitiro. Nāskakē iskatiro: 'Ēfe Ifoxō ea retefiaifono ēkai ēfe Ifo ē potapakenakama,' ixō shinātiro.

²⁵ Akka fētsa āa shinātiro iskakī: 'Ē Nios Ifofaito ea retetirofo. Nāskakē ē Nios Ifofaima,' ixō shinātiro mesekī. Askara yora naax ēfe Epa ano katiroma. Akka nā ea Ifofaa, eōxō reteafono ē ifixii efe ipaxanō eamāi Ifofamiskē.

²⁶ Akka fatora fetsa nono mai anoax kori ichapaya ikatsaxakī mā naax aya katiroma. Ea Ifofayamax koriya ifiyakatsaxakī Epa Nios ano katiroma. Nāskakē afama mishtifoya iyopaofinixakī nā omiskōipakenakafa mēra mā kaax anā aya itiro. Nāskakē āfe afaraforikai Nios inātiro ma fe ipaxakī.

²⁷ Akka ēfi Niospa Fakekī yorakōiri. Nāskakē sharafinākōia chaxapakefōfāxii ēfe ājirifo fe nai mēranoax mai ano okī. Mē oax ē āto xanīfo finakōia ē ixii. Nāskakē nā afara shara famisfo ē ato ināsharakōixii ē atoki inimakōikī. Akka nā afara chakafamisfo afara shara ē ato ināsharakōima. Ē ato omiskōimaxii.

²⁸ Ē mato yoi ē xanīfo finakōia ixii. Akka mā atirito ea Ifofaxō nayoxoma mā ōiyotiro," ixō Jesús ato yoini.

17

Jesús āfe femānā fetsa keskara ini, fafekōini. Āfe rapatiri oxokōi ini

(Mr. 9.2-13; Lc. 9.28-36)

¹ Askata seis nia mā finōano Jesús aōxō tāpimisfo tres iyoni. Pedro iyota, Santiago iyota, Santiago āfe exto Juanri iyoni. Ranāri ato nīchifaini. Nāskaxō māchi keya māmākia ato iyoini.

² Nānoax āto ferotaifi Jesús fetsa keskara itani. Āfe femānā fafekōini xini keskara. Āfe rapatiri oxokōi itani oa luzpa chaxa keskara.

³ Nāskakē nānoa Moisés yafi Elías ōinifo Jesús fe mekaifāfe.

⁴ Askaito Pedro Jesús yoini: "Ifo, sharakōi ano nō oa. Akka, ūmī fichipaimē ē tres tapas fanō? Mia fetsafaxota, Moisés fetsafaxota, Elías fetsafaxota, ē fanō," ixō Pedro yoini.

⁵ Akka Pedro askafaino kōinī ato keyokōi maipakefōfāni. Nā kōi mēranoax Nios mekaito nikanifo iskaito: "Nafi ēfe Fakeki ē fichisharapaikōi. Ē akiki inimakōi. A nikakōikāfe," ikaito nikanifo.

⁶ Nikakani Jesúsxō tāpimisfo ratekōiyanā feopakefōfānifo.

⁷ Askafono Jesús ato ano kaxō ato ramāyanā ato yoini: "Finikāfe. Ratekakima," ato fani.

⁸ Nāskakē foisnifōfākakī ano a tsoa ōinifoma, Jesús fisti nikē ōinifo.

⁹ Nāskata machi keya ariax anā tisirimepakenifo mā fekani. Tisirimepakekī Jesús ato yoiufeni: "A mā ōia keskara mā tsoa yoiiki. Ē naax mē anā otoano mā ato yoiitiroki," ixō Jesús ato yoini.

¹⁰ Nāskakē a aōxō tāpimisfāfe Jesús yōkanifo iskafakakī: "A Moisés yoiikī kirika keneni keskara ato tāpimamisfāferi iskafakī yoinifo: 'Cristo oyoamano Elías rekē oi taexii kiki,' ixō yoinisfo. Akka, ūfeskakī iskara yoiimē?" fanifo.

¹¹ Askafaiifāfe Jesús ato kemani: “Chanīma, Elías rekē oi taei nāato keyokōi itipinīsharafaiyoi āto chaka xatenōfo.

¹² Akka ē mato yoinō mā Elías ifana mākai tāpiama. Nāskakē nā apaiyai keskafakakī chakafanifo. Nāskarifikāi ea omiskōimakani,” ixō Jesús ato yoini.

¹³ Nāskakē aōxō tāpimisfāfe tāpinifo Juan Maotistaōnoa Jesús ato yoiatio.

Jesús feronāfake naetapa niafaka chaka pōtaxoni

(Mr. 9.14-29; Lc. 9.37-43)

¹⁴ Askata Jesús a aōxō tāpimisfo fe mā māchifā ariax fotoano yorafā rasi akiki fenifo. Akka feronāfake fistichi ratokonō mai chachipakefōfā Jesús yoini:

¹⁵ “Ifo, ēfe fake shināfe. Ēfe fake nīsoi omiskōimiski. Nāskakē chii naki pakeyanā faka mēra pakemiski.

¹⁶ Akka mī inafō ano ēfe fake ē efefekē mī inafāfe ēfe fake ea sharafaxomisfoma,” fani.

¹⁷ Askafaito Jesús kemani: “Ooa. Mākai ea tāpisharama. Mā afara shināmis. Akka afetiākai ē matoki onima. ¿Afetiākai mā ea tāpimē? Niri nā fake efekāfe,” Jesús ato fani.

¹⁸ Nāskakē Jesús nā feronāfake naetapa makinoa niafaka chaka potani. Nāskax sharakōi itani nā feronāfake naetapa.

¹⁹ Nāskaxō aōxō tāpimisfāfe Jesús yōkanifo: “Akka, ¿afeskakīri nō niafaka yōshi chaka potatiromamē?” ixō yōkanifo.

²⁰ Askafafono Jesús ato yoini: “Akka mā ea nikaima. Ē mato yoinō, ea nikakapo. Akka mā ea pishta nikaxō mā na machi, ‘Nonoax tsekekainax mai fetsa ari katāfe,’ mā faino na machi tsekekaitiro. Ea nikakōixō nā mā apaiyai keskara mā atiro.

²¹ Akka na keskara niafaka chaka mā foni tenekī Nios shinākī mā Epa Nios kīfiyanā mā potatiro,” ixō Jesús ato yoini.

Anā Jesús ato yoini: “Chipo ea retexikani,” ixō

(Mr. 9.30-32; Lc. 9.43-45)

²²⁻²³ Askata aōxō tāpimisfo fe Galilea ano ichanāxō ato yoini: “Ea achikaxō āto xanīfofo ano ea iyoxikani, afāfe ea retenōfo. Akka ea retefiafono tres nia oxata ē anā otoxii,” ixō Jesús ato yoini. Ato askafaito nikakani aōxō tāpimisfo shināmitsakōinifo.

Nā Nios kīfiti pexefā ano yonomisfāfe ato kori yōkanifo

²⁴ Askata Jesús aōxō tāpimisfo fe Capernaúm ano nokoaino a Nios kīfiti pexefā anoxō ato kori fiamisfāfe Pedro ōifokaxō yōkanifo: “¿Mī Ifāfe kopifaimamē na Nios kīfiti pexefā nā ato kori fixomisfāfe?” Pedro fanifo.

²⁵ “Ēje, kopifai,” Pedro ato fani.

Askata Pedro pexe mēra ikikainaito Jesús yoini iskafakī: “Simón, ¿afe keskara mī shināimē? ¿Xanifāfe nā maitio anoa āfe kaifo kori fīaimē, askayamakī yora fetsafo ato fīairaka?” ixō Jesús Pedro yōkani.

²⁶ Askafaito Pedro kemani: “Yora fetsafo fīatiro,” fani. “Ēje, chanīma,” Jesús ini. “Akka āfe kaifāfe kopifatiroma.

²⁷ Akka nokoki ōitifishkiyamanōfo ĩa ano kaxō mīshkimātāfe. Nā mī fafī mīshkimāna āfe axfa mēranao mī kori exe fichikai. Nāskakē nā Nios kīfiti pexefā kori fixomisfo nō ato kopifaikai,” ixō Jesús Pedro yoini.

18

“Akka, ¿tsoakaimē sharafinakōia?” inifo

(Mr. 9.33-37; Lc. 9.46-48)

¹ Akka nāskatari aōxō tāpimisfo fōkaxō Jesús yōkanifo: “Akka, nō mia Ifofamiski, ¿fatomē finakōia?” ixō yōkanifo.

² Askata Jesús fake yome kenaxō ato nēxpakīa nīchini.

³ Nāskaxō ato yoini: “Ē mato pāraima. Iskara mā shinātiroma: ‘Ē keyokōi finōfakī,’ mā itiroma. Akka fake yome kakapaitiroma. Akka mā shinā fetsafaax na fake yome keskara mā itiro. Mā askayamaxō mā Nios Ifofatiroma.

⁴ Akka Nios Ifo sharakōi faax nā Nios nikakōiaifo fake yome keskarafo, askatari, ‘Nō tsoama,’ ixō shināifo nāskarafo sharafinakōiafo.

⁵ Akka fatora fētsa ēfe anēxō na fake yome noikī nāatori ea noisharakōi,” ixō Jesús ato yoini.

Noko fētsa afara chakafamaino āfenā mesekōi itiro

(Mr. 9.42-48; Lc. 17.1-2)

⁶ Jesús anā yoini iskafakī: “Akka nā ea rama Ifofai fetsafāfe ato afara chakafamaino òikī, nā keskarafō ato achixō tokirinifāya tenextifaxō fakafā noa mēra potatirofo āsanōfo fetsafo anā ato afaa chakafamayamanōfo. Nā keskara shara ikerana,” ato fani.

⁷ Askafata Jesús aōxō tāpimisfo yoini iskafakī: “Mēxotaima ea chanīmara faafāfema yorafo chakafamapaimisfo. Akka fētsa fetsafo chakafamax omiskōi finakōixikani.

⁸⁻⁹ “Akka mātō mēkemā mato afara chakafamatiro, askayamākī mātō tāe mato afara chakafamatiro, askayamākī mātō fēro mato chakafamatiro. Nāskaino mātō chaka xatekōitakāfe anā chakafayamaxii. Oa mātō mēke xateta pota keskara itaxikakī, oa mātō tae xateta pota keskara itaxikakī, oa mātō fero fetoshimea keskarakōi itaxikakī afaa mā chakafayamanō. Nāskax, mā askayamaino nā omiskōipakenakafo mēra mā ipanakaki ari chiifā nokanakama mēra. Nāskatari mātō tae fisti xatea keskara mā sharafinakōia mā ishara-pakekōitiro. Nāskax, mā askayamaino nā omiskōipakenakafo mēra mā ipanakaki ari chiifā nokanakama mēra. Nāskatari mātō fēro chakafaino, mā fetoshimeax mā ishara-pakenakaki. Mā askayamax fero rafeyax nā omiskōipakenakafo mēra mā kaxii nā chiifā nokanakama mēra,” ato askafani.

Oveja fenoaōnoa Jesús meka fetsafaxō ato yoini

(Lc. 15.3-7)

¹⁰ Anā Jesús ato yoini iskafakī: “Nā rama ea Ifofoaōnoa fakefo keskara shinākī iskafayamakāfe: ‘Na rama Jesús Ifofoafokai afaafoma,’ ixō yoyimakāfe. Ē mato mēstekōi yoinō. Epa Niospa āfe ājirifāfe nā rama ea Ifofoafo ato kexesharafafāimis. Nā ājirifo Epa Nios fe imisfo. Nāskakē āfe fakefo kexesharamis.

¹¹ Akka nā yorafo fenoafo ē āto chaka soaxoniyoī ē oni ishara-pakexanōfo.

¹² “Akka, ¿afaa mā shināimē? Feronāfake fetsa cien ovejaya itiro. Nāskakē fisti a makinoax fenoano nā noventa y nueve anā kāimatiroma nā fenoa fenakī.

¹³ Ē mato chanīma yoinō. Mā oveja fisti fichiāx inimaifinakōitiro. Akka nā fenoamafoki inimatama nā fenoitaki mā fichiāx inimaifinakōitiro.

¹⁴ Nāskarīfai Epa Nios nā nai mēranoato nā rama Ifofoafo keyokōi ato noisharai ato òikī. Askatari tsoa pishta fenopaima āfe fakefo,” ato fani.

Jesús chanīmara faa fētsa mia chakafaito mī raefatiro

(Lc. 17.3)

¹⁵ Anā Jesús ato yoini iskafakī: “Akka meka fetsa ē mato yoinō. Ea chanīmara famis fētsa mia chakafakē mī yoitiro iskafakī: ‘Yamā, mī ea chakafaa,’ ixō mī yoitiro. Mī askafaito mia nikaxō, ‘Ēje. Ea mīa chakafa. Ea anā raefafe,’ ixō mia yoiāito mī afe rae faatanāitiro.

¹⁶ Nā mī askafafaito mia nikakaspaito feronāfake fisti kenafe, askayamākī rafe kenafe nā rafetari nikanōfo mia chanīmara faimākai.

¹⁷ Nāskatari atori nikayamaito nā ea Ifofoafo ichanāfo anoxō ato yoife mia tāpinōfo. Nā ichanāfo anoxō mī yoiāito mia nikayamaito mī iskafakī yoitiro: ‘Na feronāfake Epa Nios Ifofafax nā Nios Ifofoafoma keskara ika. Nāskatari nā ato pāraxō ato kori fiamisfo keskarakōi,’ ixō mī yoitiro.

¹⁸ “Ē mato chanīma yoi. Nā mī òiai fato sharakōimākī mā ato yoitiro: ‘Nā sharakōi. Nāskara nō atiro,’ ixō ato yoitiro. Nāskara mā sharakōi òi Epa Niospari shara òi. Askata mā òikai fato chakamakī, mā ato yoitiro: ‘Na chaka. Nāskara nō atiro,’ ixō ato yoitiro. Nāskara mā òikai chakamakī, ‘Na chaka nō atiro,’ ixō mā yoiāino, Epa Niospari nā chaka òitiro.

¹⁹ “Askatari fetsari ē mato yoinō, ea nikakōikapo. Fatora mā rafeta nono mai anoxō mā shināsharaxō, mā Epa Nios afara yōkaiyanā mā kifiaito ēfe Epa nai mēranoato mato afara ināsharaxii.

²⁰ Akka rafe iyamakani tres yora ea shinākani eōnoax ichanākaxikani ēri ato fe ichanāxii,” ixō Jesús ato yoini.

²¹ Askata Pedro akiki kaxō Jesús yōkani: “¿Ifo, oato ea noikaspakī ea chakafamis, afe tii fakī ē yoitromē ē raefaxiki? ¿Siete fakī ē yoitromē?” faito,

²² Jesús kemani: “Maa. Siete fakī mī yoitiro. Mēxotaima mī yoitiro,” fani.

Jesús anā meka fetsafaxō ato yoini feronāfake fētsa a afeta yonomis raefapainima

²³ Anā Jesús ato yoini: “Nō Epa Nios Ifofaxō nō fetsafo raefatiro, Epa Niospa mato raefamis keskafakī. Nā ē mato yoiāi keskara nikakapo mā tāpinō mā rae faatanāino. A xanīfāfe ato yonomamis kenani ato yoixii afe tii mā nimiamakī.

²⁴ Xanīfāfe taefakī afe rafea kenani ichapakōi nimiano.

²⁵ Akka a nimia koriya inima afaa kopifatiroma ini. Nāskakē xanīfāfe iskafani: ‘Mī koriyama mī kori nokotiro ma mī ea kopifapanā. Akka ē mia xanīfo fetsa ināi mī āfe ina

inō ea kori inānō. Mia ināta mī āfi ināta mī fakefo ināta mī afama mīstifo keyokōi ea ināi mī ea aō kopifanō, ixō xanīfāfe yoini.

²⁶ Nāskakē āfe inapa ratokonō mai chachipakefōfā yoini: 'Ifo, ea manayofe. A ē mia nimia ē mia chipo kopifaikai,' ixō yoini.

²⁷ "Askafaito nikakī xanīfāfe shinākōini. Nāskaxō yoini: 'Rateyamafe. A mī ea nimia ē anā shināima. Mī ea nimia ē keyokōi sofai mī anā ea niminōma. Kasharatāfe,' ixō yoini.

²⁸⁻²⁹ Nāskakē xanīfāfe pexe mēranoax kakī, āfe yama fichini, nāato ichapama pishta nimia ini. Nāskakē fichixō testopa achixō temo temosayanā yoini: 'Mī ea nimia ea kopifarīsafāfe,' fani. Mā eneano ratokonō mai chachipafōfā yoini, 'Ea manayofe ē mia inānō,' fani.

³⁰ Askafaito nikakaspakī karaxa mēra ikimani a mēraxō kopifanō.

³¹ Nāskakē ranāri shināmītsakōikakī a ōiaifo āto xanīfo yoifokani fonifo.

³² Nāskakē xanīfāfe kenaxō mā oano yoini: 'Mī chaka finakōia. Akka ē mia askafatima mī ea nimifiano, "A ē mia nimia ē mia kopifanō ea manayofe," mī ea faito,

³³ akka mīri mī yama mī shinākerana nā ē mia noikī shināti keskafakī,' ixō xanīfāfe yoini.

³⁴ Nāskax ōitifishki finakōikī xanīfāfe nā āfe ina karaxa mēra ikimani anoax omiskōi finakōinō nā nimia kopifayanā.

³⁵ "Ēfe Epa nai ari ikato matori askafaxii fetsafo mā raefayamaito mato omiskōimaki," ixō Jesús ato yoini.

19

Feronāfake āfe āfi fe enēnātirofoōnoa Jesús ato yoini

(Mr. 10.1-12; Lc. 16.18)

¹ Mā ato yoikī keyota Jesús aōxō tāpimisifo fe Galilea anoax kakī faka Jordán pokefainax Judea mai ano nokoni.

² Nāskakē yorafā rasichi chīfāfāinifo. Nārixō nā isinī ikaifo ato sharafapani.

³ Nāskakē fariseofo akiki fēkaxō chakafakī mekamapainifo. Nāskaxō yōkanifo iskafakī: "Nōko xinīfāfe Niospa meka yoikī kenenifo keskafakī, ¿feronāfāke āfe āfi enepaikī enetiromē afeskaraito?" ixō yōkanifo.

⁴ Askafaifono Jesús ato kemani: "¿A Moisés kirika keneni mā ōimismamē? Iskafakī keneni: 'Niospa keyokōi onifani. Feronāfake yafi kēro onifakī taefani.

⁵⁻⁶ Mā askafaxō iskafakī yoini: "Feronāfake mā āfiyax āfe apa yafi āfe afa makinoax paxkatiro āfi fe fianāxiki. Nāskakē āfe āfi fe yora fisti keskara itirofo," ixō Niospa yoinino Moisés keneni. Nāskakē anā yora rafema, yora fisti keskara ikani āfe āfi fe. Nāskakē feronāfāke āfe āfi enetiroma Niospamāi ato fianāmano," ixō Jesús ato yoini.

⁷ Ato askafaino yōkanifo: "Akka, ¿afeskakī Moisés yoinimē iskafakī? 'Feronāfāke āfe āfi eneyoxoma kirika kenexō yoitiro iskafakī: "Ē anā mia fipaima. Ē mia enei," ixō yoitiro Moisés fani," fariseofāfe Jesús fanifo.

⁸ Askafaifono Jesús ato yoini: "Akka māri māto xinifo keskara mā Niospa meka nikakaspamis. Akka Moisés yoini nō kēro enetiro. Akka Niospa taefakī anori shinānima.

⁹ Ē mato yoinō. Akka fētsa āfe āfi enetiroma fetsa fe chotanāyamafiano. Akka fētsa āfe āfi enexō kēro fetsa fia askara sharama, chakafai. Askatari a kēro fenē enea fētsa fia askarari sharama, chakafai," ixō Jesús ato yoini.

¹⁰ Askara nikakakī Jesús a aōxō tāpimisfāfe yoinifo: "Akka nā mī noko yoiai keskara nikakanax, fianāfoma askara shara itirofo," ikaxō yoinifo.

¹¹ Askafaifono Jesús ato kemani: "Na ē yoiai keskara atirifāfe nikasharatirofoma. Akka nā Niospa ato shināmanai tiitos shinākanax nāfo shara itirofo fianākanamax.

¹² Akka yōshikōi kāiax mā yosiāx āfiyatiroma. Akka fetsafori ato oxkofixotirofo āfiyanōfoma. Akka fetsafāferi Epa Nios fisti nikakōipaikakī, nā fisti nikakōitirofo. Nāskakē afo āfiyapakenakafoma," ixō Jesús ato yoini.

Jesús fakefo chishtoxō ato māmāyanā Epa Nios kīfixopakeni

(Mr. 10.13-16; Lc. 18.15-17)

¹³ Ato askafaino yorafāfe āto fakefo Jesúski efenifo ato māmāpakeyanā ato Nios kīfixonō. Akka a Jesúsxō tāpimisfāfe ato iskafainifo: "Māto fakefo efexō nōko Ifo fekaxtefayamakāfe," ato fanifo.

¹⁴ Ato askafaifono Jesús ato yoini: "Ato enekāfe nā fakefo ekeki fenōfo. Ato nētefayamakāfe. Ēfe Epa Nios xanīfo ika ari na fakefo keskarakōifoki," ixō ato yoini.

¹⁵ Nāskaxō fakefo māmāpaketa Jesús nānoax kani.

Feronāfake naetapa kori ichapayax Jesús fe mekani

(Mr. 10.17-31; Lc. 18.18-30)

¹⁶ Feronāfāke naetapa fistichi Jesús òikaxō yōkani: “Maestro, mī sharaki, ea yoife afaa shara ē afeska fatiromakī Nios xanifo fe ipaxaki,” ixō yōkaito,

¹⁷ Jesús kemani: “¿Afeskakī sharara mī ea faimē? Akka Nios fisti sharafinakōia. Nios xanifo fe mī ipaxapaikī a Moisés yoini keskara mī nikasharakōitiro,” faito,

¹⁸ “¿Fatomē ē nikanō?” faito, Jesús yoini iskafakī: “Nā Moisés yoini keskarakōi mī nikakōitiro. Iskafakī yoini: ‘Ato reteyamakāfe. Askatari mātō āfima chotayamakāfe. Askatari atoki yometsoyamakāfe. Askatari chanī yoyiyamakāfe. Askatari kaxpa ato parayamakāfe.

¹⁹ Askatari mātō epa yafi mātō efa nikasharakōikāfe, ato sharafakāfe. Askatari a mā chaima nikari noisharakōikāfe a mā mā noimeai keskafakī,” ixō Jesús yoini.

²⁰ Askafaito a kori ichapayato kemakī iskafani: “Nā mīa yoiyai keskara mē nikakōimis. Akka, ¿afaa fetsari ē nikamamē?” faito,

²¹ Jesús kemani: “Mī isharakōipaikī, mī afama mīshitifo ato minitāfe. Kori fixō nā afamaisfo ato ināketsatāfe. Nāskakē nai mēranoax afama mīshitifofo mī ixikai. Mā mī kori ato ināketsata anā oxō ea Ifofasharafe,” ixō Jesús yoini.

²² Askafaito nikai nā feronāfāke shināchakakōi tooxinima kori ichapayamāiyaxō ato inākaspa. Nāskax Jesús makinoax kani.

²³ Nāskaxō Jesús aōxō tāpimisfo yoini: “Ē mato pāraima, fekaxkōi yora kori ichapayato Epa Nios Ifofapaia.

²⁴ Akka anā ē mato yoinō meka fetsafaxō. Camello akoja kini mēra ikipaifi ikitiroma, fekaxkōi, efapamāiax. Nāskarari yora kori ichapayato Nios Ifofapai, fekaxkōi āfe afama mīshitifofo potakaspakī,” ixō Jesús ato yoini.

²⁵ Ato askafaito nikakakī a aōxō tāpimisfāfe tāpipainifo. “¡Keel! ¿Afeskax nō Nios fe ipaxatiromē?” ikanax yoinānifo.

²⁶ Askaiifāfe òikī Jesús ato yoini: “Yorafokai āa ifimetirofoma. Nios fistichi yorafo ifitiro. Niospa afama mīshitifo fatiro, yorafāfe atiroma keskara,” ixō ato yoini.

²⁷ Ato askafaito nikakī Pedro yoini: “Ifo, nō mefe okī nōko afama mīshitifo nō òiferani nō mefe oni. Akka, ¿afaa nō fiimē?” fani.

²⁸ Askafaito Jesús ato kemani: “Ē mato pāraima. Keyokōi ē ato ikināno sharafinakōia ea òixikani, ēfe Epa Nios keskara sharakōi ē ikaito. Akka māmāi ea Ifofasharakatsaxakī nai mēranoax mā efe xanifofo ixii. Mā nōko kaifo israelifāfe āto xanīfori mā ixii. Nā doce nofe yorafo israeliffo mā ato ikipakenakakī.

²⁹ Akka yora fētsa eōxō ēfe meka sharaōnoa ato yoikakī āfe pexe òifaini, askatari āfe onefetsafori òifaini, āfe poiifori òifaini, āfe aparī òifaini, āfe afari òifaini, āfe āfiri òifaini, āfe fakefori òifaini, āfe tarerī òifaini, akka nāato afama mīshitifo fixii. Nāskatari mā naax Nios fe ipanaka.

³⁰ Akka iskaratīa yora ichapafāfe ato finōpaikani, nō finakōiara ikaxō, akka chipo fenotirofo. Akka a ato finōpaiyamaifo iskaratīa Niospa ato finakōia imaino Nios fe ipanakafo,” ixō ato yoini.

20

A yonomisfokiri yoikī meka fetsafaxō Jesús ato yoini

¹ Anā Jesús ato yoini: “Afe keskaramākī Epa Niospa keyokōi ato ikinā mā Ifosharafaino, ē anā meka fetsafaxō ē mato yoinō. Ea nikasharakāfe. Nā tare ifo mā fakishparikōi kani yorafo fenaikai āfe tare ano yonoxonōfo.

² Ato fichixō ato yoini iskafakī: “Ē mato pena fisti yonomapai. Akka nā ē ato kopifamis tii mā pena fisti yonoano ē mato kopifai, ¿nāskara sharamē?” ato faito, ‘Ēje, shara,’ fanifo. Nāskaxō āfe tare ari ato nīchini.

³ Askata rama xini keyaino tare ifo anā kakī òia plaza anoxō ranārīto manaifono yonopaikakī tsōa ato yonomayamaino.

⁴ Askaifono tare ifāfe ato yoini: ‘¿Māri ēfe tare ano yonopaimē nā ē ato kopifamis keskafakī ē mato kopifanō?’ ato faito nikakata atiri fonifo yonoi fokani.

⁵ Askata tare ifo anā xini keya kaxō òia ranārīto mananifo yonopaikakī. Nāskakē afori nīchini āfe tare ano. Askata mā xini kaino anā kaxō òia ranārītori manaifono. Nāfori nīchini yonotanōfo.

⁶ Askatari yātapishtakōi plaza ano anā kaxō òia nānoa ranārī ato fichitoshini yonopaiyāifāfe. Nāskaxō ato yōkani: ‘¿Afaa nonoxō mā afeskafaimē yonokima?’ ato faito kemanifo,

⁷ ‘Tsōa noko yonomayamaino nō iki,’ fanifo. Askafaifono ato yoini: ‘Māri ēfe tare ano yonotakāfe,’ ato fani.

⁸“Nāskata mā fakishano nā tare ifāfe afe xanīfo yoini iskafakī: ‘Ea yonoxonaifo ato kenafe ato kopifanō. Nā rama ikiafo ato kopifakī taefafe. Askata nā iki taeafō chipo ato kopifaxikī,’ fani.

⁹ Akka yātapishtakōi ikikaxō yonoafo nāfo ato kopifani nā pena fisti yonoafo kopifamis keskafakī.

¹⁰ Akka nā yonoi iki taeafāfe shinānifo: ‘Nō kori ichapa fira,’ ikaxō, askafikaxō nā fetsafāfe fiaitiri finifo.

¹¹ Nāskakē mā ato kopifaino, nā tare ifo mekafakakī yōachēpenifo.

¹² Iskafakī yoinifo: ‘Akka nā rama fēkaxō yonoafo mā ato kopifaa nā nō noko kopifaa keskafakī. Akka nō xini pae meeyanā nō yonoa nāskayanā nā pena tii,’ fanifo.

¹³ Akka nā tare ifāfe fisti kemani: ‘Efe yorashta, ē mia chakafakī mekafaama. Akka mē mia kopifaa nā mī pena fisti yonoa. Nā pena fisti ē ato kopifamis tii ē mato kopifai ē mato faaki. Nā sharaki mā ea faaki,’ fani.

¹⁴ ‘Akka ē mia kopifanō, nakīa mī kori. Katāfe mī pexe ano. Akka nā rama ikikaxō yonoafo nā ē mia ināi keskafakī atori ē ināi.

¹⁵ Nā ē ināpaiyai keska fakī ē ato inātiro, ēfe korimāiyakē. Akka, ‘afeskai mī ekeki oitifishkikimē ē fetsafo ināsharaino?’ ixō yoini.

¹⁶ Nāskarīfakī Epa Niospa nā taefakī chanīmara faafo ato ināi keskafakī nā rama chanīmara faifo nāfori ato ināsharaxii. Akka Epa Niospa yora ichapa kena a ika ano fonōfo. Nāskakē Epa Niospa ato kenafaiato tsōa nikayamaito nā Ifofaafos ato ifixii,” ixō Jesūs ato yoini.

Anā Jesūs ato yoini: “Mā chaima ea retekanira,” ixō

(Mr. 10.32-34; Lc. 18.31-34)

¹⁷ Askata Jesūs Jerusalén ari fāi kakī a aōxō tāpimisfo kenaxō ato yoini iskafakī:

¹⁸ “Ea nikakāfe. Mā mā ōikai iskaratia Jerusalén ano nō māpei kaikai. Nānoxō ea achikaxō ea ato inākani, a Nios ato kīfixomisfāfe āto xanīfofo, askatari a Moisés yoikī kirika keneni keskara ato tāpimamisfo anori ea iyoxikani. Nānoxō, ‘Mā mī naikai,’ ixō ea yoixikani kiki.

¹⁹ Nāskakaxō yora fetsafo nōko kaifoma ea inākani ea kamaketsayanā ea koshaketsakani. Nāskakaxō ifi cruz ikaki ea mastakani. Akka ea askafafono tres nia oxata ē anā otoxii Epa Niospa ea otoaano,” ixō ato yoini.

Āfa āfe fake rafe Jesūs yoixonī

(Mr. 10.35-45)

²⁰ Zebedeo fake rafe Juan fe Santiago ini. Nā rafe āto afa fe Jesūs ano fonifo. Mā Jesūski nokoaxō nā kēromā ratokonō mai chachipakefōfāni Jesūs afara shara yōkapaikī.

²¹ Askafaito Jesūs yōkani: “‘Āfaa mī fichipaimē ē mia axonō?’ faito, nā kēromā yoini: “Ifo, nā mī xanīfo finakōia ikaitīa ēfe fake raferi mefe xanīfo inōfo ato xanīfo imafe. Nā xanīfāfe tsaoti ano mī tsaono ēfe fake rafe takairafe mefe ketaxamei tsaonōfo,” fani.

²² Askafaito Jesūs nā kēromā fake rafe yoini: “Mā tāpiama a mā ea yōkai keskara. ‘Ā ē omiskōixiai keskara māri omiskōitirōmē?’ Jesūs ato faito kemanifo: “‘Ēje, nōri tenetiro,” fanifo.

²³ Askafaiāfe Jesūs ato yoini: “Chanīma, māri mā omiskōixii. Akka ēkai tsoa yoitiroma, ‘Efe ketaxamei tsaofe efe rafexii’ ixō. Akka ēfe Epa Nios fistichi yoitiro. Nā Niospa ato katoafos nāfo afe ketaxamei tsaotirofo efe rafexikakī,” ixō ato yoini.

²⁴ Nāskakē a aōxō tāpimis rafeta askafakī yōkaifāfe a aōxō tāpimisfo fetsafāferi nikakakī, “‘Āfeskai oa iskai rafe mekakanimē?’ ikaxō a rafe meepainifo.

²⁵ Askaifono Jesūs ato kenaxō ato yoini: “Mā mā tāpia yora fetsafāfe āto xanīfofo afe keskarafo māki. Nā xanīfāfe mītisipakōixō ato yonamamis. A xanīfo fe rafeafāferi ato yoisimisfo iskafakakī: ‘Nōri māto xanīfo. Nō mato yoiaito mā noko afara axorisafatiro,’ ixō fāsikōi ato yoisimisfo.

²⁶ Akka mā ranā askayamakāfe. Askatamaroko fatora fetsa mā xanīfo ipai ato yonoxomis keskara mā itiro.

²⁷ Askatari fatora fetsari xanīfo ipaikī iskafakī shinātiro: ‘Ēkai afaama. Nāskakē ē fetsafo axosharapai. Nā apaiyaifo keskara ē ato axosharai,’ ixō shinātiro.

²⁸ Akka ēri anori shināima, ēfe Epa Nios ariax ē nāmā ftoni feronāfakēkōi ixiki, ē Niospa Fakefēkē ea afara axonōfo ē onima. Askatamaroko fetsafo ē ato afara sharafaxoxikī ē oni. Ē atoōnoax naxiki ē oni Satanás chaka āto ifo inōma,” ixō Jesūs ato yoini.

Jesūs yora fēxo rafekōi sharafani

(Mr. 10.46-52; Lc. 18.35-43)

²⁹ Askata Jericó anoax Jesūs aōxō tāpimisfo fe kaino yorafā rasichi chīfafainifo.

³⁰ Akka fai kesemē fēxokōi rafe tsaonifo. Nānoxō Jesūs fāi kaito nikakaxō nā rafeta kenanifo iskafakakī: “Ifo, David fenapa, noko shināfe,” fāsikōi fanifo.

³¹ Askafaifono nā yorafā rasichi ato iskafanifo: “Nōko Ifo fekaxtefayamakāfe,” ato faifono, akka nā fēxokōi rafe fāsikōi kenanifo: “Ifo, David fenapa, jnoko shināfe!” fanifo.

³² Askafaifono Jesús nēteakekafani. Ato kenaxō ato yōkani nā fēxokōi rafe: “¿Afaa mā fichipaimē ē mato axonō?” ixō ato yōkani.

³³ Ato askafaito kemanifo: “Ifo, nō fēro ōisharapaikōi,” fanifo.

³⁴ Jesús ato shinākī āto fero mēeni. Āto fero mēeaino nā fēxokōi rafeta āto fēro ōirisafatanifo. Nāskakaxō Jesús chīfafainifo.

21

Jesús nokoni Jerusalén ano

(Mr. 11.1-11; Lc. 19.28-40; Jn. 12.12-19)

¹ Nāskata mā Jerusalén chaima fokanax pexe rasi Betfagé ano nokonifo machi Olivos ano. Nānoxō Jesús a aōxō tāpimis rafe nīchini,

² ato iskafayanā: “Mēstekōi fotakāfe oa ono pexe rasi ano. Nānoa burro nexekē mā fichi kaikai āfe fake fe nexekē. Nāskakē tēpexō ea efexotakāfe.

³ Anoxō yora fētsa mato yōkaito: ‘¿Afsakāi mā burro tēpeyoamē?’ mato faito, yoikī iskafakāfe: ‘Nōko Ifāfe fichipaiyaito nō ifixoniyoa. Akka samama nō mia nīchixoniyokai,’ fakāki,” a aōxō tāpimis rafe fani.

⁴ Nā Niospa meka yoimisto kirikaki kenekī yoini keskakōini Jesús.

⁵ Iskafakī keneni:

Pexe rasi Sión anoafō ato yoikāfe iskafakī: “Ōikapo. Māto xanīfokōi mā matoki oi kiki. Xanīfofiāx afama keskara oi kiki. Burro fake kamaki tsoa na feronāfakekai kakapaimisma,”

ixō Niospa meka yoimisto kirika keneni.

⁶ Nā Jesúsxō tāpimisfāfe mā fōkaxō nā ato yoia keskara fanifo.

⁷ Nāskata burro fake yafi āfe afa iyonifo. Nāskaxō burro kate kamaki āto sama fanifo. Nāskakē Jesús a kamaki tsoainākafāni.

⁸ Yora ichapakōi inifo. Nāfāfe āto rapatifo kakafa fonifo fai nēxpakīa. Ranāritori epe pei xatekaxō kakafanifo.

⁹ Akka nā rekē foaifo fe a acho foaifo fāsikōi mekafonifo. Tai tai fokani. “¡Aicho! jNōko xanīfo David āfe fena nokoki oi kiki! jSharafinakōia nokoki oi kiki Niospa nīchiano nai mēraxō! jNōko Ifo Nios sharafinakōia!” ikanax tai taifonifo.

¹⁰ Nāskata Jesús Jerusalén ano kaito ōikani yorafa ratei fetsenifo ōiakefaikani. “¿Tsoamē na?” ikanax āa ranā yōināi fetsenifo.

¹¹ Askaiifāfe nā Jesús fe foafāfe ato kemanifo: “Nafi Jesúski Niospa meka ato yoimis. Nazarete anoa Galilea mai ano imis,” ixō ato yoinifo.

Jesús a Nios kīfiti pexefā mēraxō a ato ināifo ato potani

(Mr. 11.15-19; Lc. 19.45-48; Jn. 2.13-22)

¹² Mā fotoax Nios kīfiti pexefā mēra Jesús ikitoshini. Ikikaixō ōia a mēraxō yorafāfe āto afama mīstifō ato miniketsakani inifo kori fikani. Askafaifāfe ōikī Jesús ato pōtaketsani a ato afama mīstifō miniaifo, a ato fiaifori potani. A kori fianōnāifo anoari āto mīsa pōtakī ato nāpakaketsani. Askatari a ato rifi miniaifori āto tsaotifori ato pōtaketsani.

¹³ Askafata ato yoini iskafakī: “Niospa shināmanaino Isaiás Niospa meka keneni iskafakī: ‘Mā ēfe pexefā mēraxō mā ea kīfitiro,’ ixō keneni. Akka nā yometsofāfe pexe keskara mā famis,” ixō Jesús ato yoini.

¹⁴ Ato askafaino a Nios kīfiti pexefā ano fēxofo, chatofō Jesúski fenifo. Nāskakē anoxō Jesús ato sharafani.

¹⁵ Jesús askarāfo ato sharafaino ōikani. Akka nā Nios ato kīfixomisfāfe āto xanīfofo feta a Moisés yoikī kirika keneni keskara ato tāpimamisfāfe ōinifo afama mīstifō Jesús akaito. Askatari fakefo Nios kīfiti pexefā mēranoaxri tai tai ikaifāfe nikanifo iskaifāfe, “¡Aicho! jNā Jesús David āfe fena sharafinakōia!” ikaifāfe nikakani ōitifishkinifo.

¹⁶ Nāskakakī Jesús yoinifo iskafakakī: “¿Oaiskai mī nikaimē yoiaifo keskara faifāfe?” Jesús ato kemani: “Ēje, mē nikai,” ato fani. “Akka a kirika keneano, ¿mā ōimismamē? Iskafakī kenenifo, Niospa ato shināmanaino:

Fake yomefāfe mia fanākani, mī ato fanāimaino, ixō kenenifo,” Jesús ato fani.

¹⁷ Askafakī ato yoita ato makinoax kani pexe rasi ano Betania ano. Nāno oxafistishini.

“Fana higuera, mī anā fimiyanakama,” Jesús fani

(Mr. 11.12-14, 20-26)

¹⁸ Mā penano Jerusalén ano anā okī Jesús meea fonāikōini.

¹⁹ Mā anā kakī Jesús òini a fana higuera fai kesemē nikē. Nāskakē akiki kaxō āfe fimi fenani pipaiki. Akka fimiya inima, āfe pei fisti ini. Nāskakē yoiki iskafani: “Anā mī fimiyanakamaki,” faino koshikōi nā higuera xanarisatani.

²⁰ Askaito òikakī aōxō tāpimisfāfe yōkanifo: “Kee, ŷafeskai na ifi xanarisatanimē?” ikaxō,

²¹ yōkaifono Jesús ato kemani: “Ē mato pāraima mā ea nikakōixō māri atiro na ē ifi higuera xanafaa keskafakī. Nāskarifikā na machiri mā yoitiro iskafakī: ‘Nonoax tsekekainax fakafā mēra paketāfe,’ mā faino fakafā mēra paketiro.

²² Mā Epa Nios chanīmara fakōixō mā afara kifiaito mato inātiro,” ixō ato Jesús yoini.

*“ŷTsōa mia nīchinimē mī xanīfo inō?” ixō Jesús yōkanifo anoxō achipaikakī
(Mr. 11.27-33; Lc. 20.1-8)*

²³ Ato askafata Nios kifiti pexefā mēra ikikaini. Nā Nios kifiti pexefā mēraxō ato tāpimanaino, nā ato Nios kifixomisfāfe āto xanīfofo fe judeo anifofo fonifo. Akiki fōkaxō yōkanifo iskafakakī: “ŷTsōa mia nīchinimē? ŷTsōa mia yoiamē mī iskafanō?” ixō yōkanifo.

²⁴⁻²⁵ Askafaifono Jesús ato kemani: “Ēri mato yōkanō. Ea yoikapo ē nikanō. ŷTsōa Juan nīchinimē ato maotisafakī ato faka mēra ikimapakenō? Niospa nīchiamakī yorafāfe nīchiniforaka. Akka mā ea kemaito, ēri mato yoikai tsōaōxō ē iskafaimākai.”

Ato askafaino, āa ranā mēenāpai fetsayanā. Shinānifo iskakakī: “Niospa Juan nīchini nō faito noko yoiki iskafatiro: ‘ŷAkka afeskakī mā Juan nikamismamē?’ noko fatiroki,” ikanax yoinānifo.

²⁶ “Akka nō iskafatiroma: ‘Yorafāfe Juan nīchinifo,’ nō fatiroma. Nō yorafoki mesei keyokōichi shinākani Niospa shināmanaino Juan ato yoipaoni,” ikanax xanīfofo yoinānifo.

²⁷ Nāskakaxō Jesús yoinifo iskafakakī: “Nō tāpiama,” faifono Jesúsri ato kemani iskafakī: “Ēri mato yoima tsōa ea nīchinimākī ē iskafanō,” Jesús ato fani.

Meka fetsafaxō feronāfake rafeōnoa Jesús ato yoini

²⁸ Jesús ato yoini: “Meka fetsafaxō ē mato yoinō. Feronāfake fisti fake naetapa rafeya ini. Nāskaxō āfe fake iyoa yoini: ‘Ēfe tare ano kaxō ea yonoxotāfe,’ fani.

²⁹ Askafaito āfe fāke kemani: ‘Ē kapaima,’ fani. Askaflix mā shināx kani.

³⁰ “Askata āfe fake chipokori yoini iskafakī: ‘Miri kaxō ēfe tare ano ea yonoxotāfe,’ fani. Askafaito nāato kemani iskafakī: ‘Ia, epa. Ē yonotanōki,’ faflix kanima.

³¹ Akka, ŷfatoto a āfe āpa fichipaiyai keskafakī axonimē?” ato faito, “Iyoato axoni,” fanifo. Nāskaxō Jesús ato yoini: “Ē mato pāraima. Nā xanīfo kori fixomisfo fe, nā kēro chotaferomafo āto chaka xatekanax mā Epa Nios Ifofakōikani. Akka mā afaa afeskafaxoma mā Epa Nios Ifoafaama.

³² Akka Juan ato maotisafamis oni ato tāpimaxiki afeskax mā itiomākai, Niospa fichipai keskara. Akka mākai Juan nikamisma. Akka nā xanīfo kori fixomisfo feta nā kēro chotaferomafāfe nikakōinifo. Akka māto chaka mā xateama mā afara fetsafo shināmis,” ixō Jesús ato yoini.

*Meka fetsafaxō Jesús ato yoini a ato yonoxomis chakafoōnoa
(Mr. 12.1-12; Lc. 20.9-19)*

³³ Anā Jesús ato yoini iskafakī: “Ea nikakapo ē mato meka fetsafaxō yoinō. Tare ifāfe āfe tare ano uva fanani. Fanaxō akiki keneakeni. Nāskaxō mai pōkini a mēraxō uva tsinixiki. Askatari pexe keya fani anoxō kexexiki tsōa mēeyamanō. Mā askafakī fetsaxō ato ināni nā uva tare kexenōfo. Nāskata mai fetsa ari kani.

³⁴ Akka nā fimimistīa mā āfe fanafo pachiaino, a yonoxomisfo nīchini a kexexonafo ato yōkaxō nā āfenā tiiri fixotanōfo.

³⁵ Akka nā tare kexxonafāfe a xanīfo yonoxomis achikaxō fisti seteketsanifo. Askatari fetsari retenifo. Askatari fetsari tokirinī tsakaketsanifo.

³⁶ Nāskakē tare ifāfe anā āfe inafō ichapakōi nīchini. Mā foafono nā tare kexemisfāfe ato askari fanifo.

³⁷ “Mā ato askafapaxō āfe fakekōi nīchini aōnoa shināchakatama, ‘Ēfe fake nikatirofokī,’ ixō.

³⁸ Akka mā āfe fake kaito fichikanax nā tare kexemisfo aa ranā yoinānifo: ‘Nato āfe apa naano na fanafo fixii kiki. A nari retekape na āfe fanafo nōkonā inō,’ inifo.

³⁹ Nāskakata achinifo. Mā achikaxō tare pasotai iyokaxō retenifo.

⁴⁰ Akka, ŷmā tare ifo oxō a tare kexemisfo ato afeskafatiromē?” ixō Jesús ato yōkani.

⁴¹ Ato askafaito kemani: “Ato retetiro ato noitama yora chakafokē. Nāskaxō tare ifāfe yora fetsafo āfe tare inātiro, nāfāfe inānōfo nā āfenā tiiri mā āfe fana fimifo pachiano,” ixō yoinifo.

⁴² Nāskata Jesús ato yoini meka fetsafaxō: “ŷNa kirika kenea anoa mā anemismamē? Iskafakī kenenifo:

Tokiri pexe fapaikakī nā pexe famisfāfe na tokiri chakara ixō potafiafono, fetsafāfe fichikaxō na tokiri sharakōi ikaxō akiki pexe fatirofo. Nāskarifiakī xanīfofāfe, 'Nakai afama,' ikaxō Niospa Fake ōikaspamisfo. Askafafiafono Niospa āfe Fake katonī nōko Ifo inō. Nāskakē nō akiki inimakōi,

ixō kirika ano kenenifo," Jesús ato fani.

⁴³ "Nāskakē ē mato yoi, taeyoi Nios fe rafexō āfe meka mā ato yoiyomis. Askafixō mā ea nikakaspai. Nāskakē Epa Niospa fetsafo yoi āfe meka ato tāpimanōfo afeska faxō Nios Ifo sharakōifatiromakī.

⁴⁴ Akka tokiriki fetsa pakeki aō xao teketiro. Akka tokiri yoraki pakekī yamakōi fatatiro. Nāskarifiakī ē Niospa Fakekōixō a ea nikakaspafono ē ato omiskōimaxii," ixō Jesús ato yoini.

⁴⁵ Akka nā Nios ato kīfixomisfo āto xanīfofo feta fariseofāfe nikanifo Jesús meka fetsafaxō ato yoiaito. Nāskakaxō tāpinifo Jesús atōōnoa yoiaito.

⁴⁶ Nāskakaxō achipainifo. Akka achipafikani mesenifo yorafāfemāi chanīmara faifono Jesús Niospa meka ato yoimiskē. Nāskakē achinifoma achipafikakī.

22

Meka fetsafaxō Jesús ato yoini a feronāfake āfiyaino inimayanā piaifoōnoa yoikī (Lc. 14.15-24)

¹ Anā Jesús meka fetsafaxō ato yoini iskafakī:

² "A Epa Nios xanīfo ika ano iskaraki ē mato yoinō. Nikakāfe. Nā xanīfāfe āfe fake āfi fiaino fista axoxiki.

³ Akka xanīfāfe a yonoxomisfo nīchini ato yoitanōfo fenōfo. Akka mā fōkaxō ato yoiaino fekaspanifo.

⁴ Nāskaxō anā a yonoxomis fetsafo nīchini ato iskafayanā: 'Ato yoikī iskafatakāfe: "Mā xanīfāfe āfe fāke āfiyaino mā itipinīsharakōi faa pixiki. Āfe fakka efapa mā ato retemana. Askatari fakka fake xoakōiari ato retemana. Mā keyokōi itipinīsharafakī, kookāfe pixikakī,"' ato fani.

⁵ Akka ato askafaifono ato fe fekaspanifo. Fetsa āfe tare ari kani. Fetsari kani āfe afama mīshiti minikai.

⁶ Atrifāfe nā xanīfāfe inafō ato achikaxō ato seteketsayanā ato retenifo.

⁷ Nāskakē xanīfo ōitifishkifinakōini. Nāskaxō āfe sorarōfo nīchini a retemitsamisfo ato reteyanā āto pexefori ato kōaki mītokakōitanōfo.

⁸ Nāskaxō xanīfāfe a yonoxomis fetsafo yoini ato iskafakī: 'Mē itipinīshara faa ēfe fāke āfiyaino pixiki. Akka nā chakāfo ē ato kenamanāfo fekaspaikōiafokī.

⁹ Akka māri fotakāfe nā pexe rasi ano. Nāria ato fichixō nā mā ōiaifo ato yoikāfe fenōfo pii fenōfo, ēfe fāke āfiyaino," ixō ato yoini.

¹⁰ Nāskakē a yonoxomisfo fai fētsa fonifo. Mā fōkaxō yora ichapafo fichikaxō ato efenifo. Yora sharafo efeta yora chakafori efenifo. Nāskakē xanīfāfe āfe fāke āfiyaino yorafo pexe fospikōinifo.

¹¹ "Nāskakē xanīfo pexe mēra ikikaini yorafo feaito itipinīsharafaxō ato rapati sharakōi ato ināketsani safenōfo āfe fāke fista akaino. Xanīfo ikikaini ato ōikai mā sharakōi safeketsafomakī. Akka fistichi rapati shara safea inima, chapokōi safea fichini.

¹² Akka a rapati shara safeama fichixō yoini: '¿Afeskakī mī rapati sharakōi safeax mī oamamē ēfe fāke āfiyafaino?' Askafaino nā feronāfake tooxinima.

¹³ Nāskaxō xanīfāfe a yonoxomisfo yoini: 'Na feronāfake otexkere ata metexkeraxō fakishifā mēra potakāfe, anoax omiskōipakexanō eaianā," ixō ato yoini.

¹⁴ Nāskarifiāi Epa Niospa yora ichapa kenai a ika ano fenōfo nā āfe Fake Ifoiaifo tii afe ipanakafo," ixō Jesús ato yoini.

"¿Xanīfo nō kori inātiromē noko yōkaito?" ixō Jesús yōkanifo (Mr. 12.13-17; Lc. 20.20-26)

¹⁵ Nāskata mā Jesús ato yoiaito nikakata mā fokanax fariseofo yoinānifo: "¿Afeskaxō nō Jesús afara chaka yoimatiromē? Afara chaka noko yoiaito nō yōaxiki," ikanax yoinānifo.

¹⁶ Nāskafakata āto inafō nīchinifo, Herodes āfe inafoya iskafakī yoitanōfo: "Maestro, mā nō tāpia mī chanīmakōi yoimis. Nā Epa Niospa noko shināmapaiyai keskarakōi mī noko yoimis yorafāfe mīōnoa afara chaka yoifiaifono. Afara mī yoipai mī ranomisma. Keyokōi nāskarafos mī ato yoimis.

¹⁷ Nāskakē noko tāpimasharafe. Akka chanīmamakī noko yoife na romanō xanīfo nō kopifatiromakī askayamakī nō kopifatiroma rakikā," fanifo. Jesús chakafamapaikakī askafanifo.

¹⁸ Askafaiifāfe ōikī Jesús tāpini feparapaiyāifāfe. Ato yoini: "Feparamisfāfe, ¿afara chaka mā ea yoimapaiamē eōnoa afara chaka yoipaikī?"

¹⁹ Akka māto kori exe ea ispakāfe a aō mā xanīfo kopifamis,” ato fani. Ato askafaito kori exe fisti fōxonifo.

²⁰ Nāskaxō Jesús ato yōkani: “¿Tsōa femānā na keskaramē? ¿Tsōa aneri na kori exe ano keneamē?” ixō ato yōkaito,

²¹ kemanifo iskafakāki: “Nōko xanīfo César keskara,” fanifo. Nāskakē Jesús ato yoini: “Akka na kori exe Césarnākē César inākāfe, akka Niosnākē Niosri inākāfe,” ixō Jesús ato yoini.

²² Ato askafaito nikakani, ratekōiyānā. “Kee. Āfe mekakai tsōa finōtiroma,” ikanax a makinoax fonifo ōifaikani.

*“¿Yora naax anā otoax afeskatiroamē?” ixō Jesús yōkanifo
(Mr. 12.18-27; Lc. 20.27-40)*

²³ Nāskatari afia pena fisti saduceofo fenifo Jesús ōifekani. Nā saduceofāfe yoimisfo iskafakāki: “Yora naaxkai anā afeskax ototiroma,” ixō shināmisfo. Nāskakaxō Jesús yōkai fekeni fenifo iskafakāki:

²⁴ “Maestro, Moisés yoini iskafakī: ‘Feronāfake naano āfe āfi feta fake akamax, one fētsa nā kēro fitiro, āfe āfi inō. Mā fixō afeta fake atiro āfe ōchi fake inō,’ ixō Moisés noko yoikī keneni.

²⁵ Akka nō mia yoikī taefanō. Noko nikafe chipo noko yoixiki. Akka nā nane tii siete inifo, feronāfake. Āto ochi iyoa āfiyā taeni. Mā āfiyax afeta fake akamax nani. Mā āfe ochi naano chipokoto fini.

²⁶ Nāskarīfai nā chipokori nani afeta fake akamax. Nāskatari chipoko fētsari fini, nāri nani afeta fake akamax. Nāskakanax akikinoax nai keyonifo afeta fake akanamax.

²⁷ Nāskata mā nai keyoafono nā kērori chipo nani.

²⁸ Akka, ¿a yorafo mā otokaxō nai mēraxō, fatoto nā kēro fixiimē, nā fistimāi fīpakaxō?” ixō yōkanifo.

²⁹ Askafaifono Jesús ato kemani: “Mākai afaa tāpiama. Nā kirika ano Niospa meka yoikī kenenifokai mā tāpiama. Nāskaxori Niospa akai keskara āfe sharaōxō ari mā tāpiama. Na mā ea fanīrira yoiāi,” ato fani.

³⁰ “Akka yorafo nakanax anā otokanax anā āfiyatirofoma. Kērofori anā feneyatirofoma. Nāskakanax ājirifo keskara itirofo nai mēranoax.

³¹ Akka, ¿a yorafo naax otoxiaifo Niospa yoini keskara, a kirika keneano mā ōimismamē?

³² Iskafakī Niospa yoini: ‘Ēfi mī xinifāfe āto Nioskōiki, Abraham ikaino Isaaca ikaino Jacobo ikaino,’ ixō Niospa yoini. Akka yorafo mā nafiafono naafoma keskara Epa Niospa ato ōimis. Niospa yoini iskafakī: ‘Ēkia āto Nioskōi,’ ixō Niospa yoini.” Nāskara Jesús keyokōi ato yoini.

³³ Saduceofāfe nikanifo Jesús ato askafaito, “¡Airā! ¡Nikakapo! Jesús sharakōi yoi,” ikanax yoinānifo.

*“Akka, ¿fato meka sharafinakōiamē, nā Niospa shināmanaino Moisés ato yoiniraka?” ikaxō fariseofāfe Jesús yōkanifo
(Mr. 12.28-34)*

³⁴ Nāskakē saduceofo Jesús ato meka xatemanaito nikakaxō fariseofo ichanākanax Jesús ano fenifo.

³⁵ Akka feronāfake fisti a Moisés yoikī kirika keneni keskara ato tāpimamis ini. Nāato Jesús fanīrira kemamapaikī yōkani,

³⁶ “Maestro, ¿fato meka sharafinakōiamē, nā Niospa shināmanaino Moisés keneniraka sharafinakōia?” faito,

³⁷⁻³⁸ Jesús yoini iskafakī: “Moisés yoikī taefani iskafakī: ‘Nōko Ifo Nios noikōikāfe nōko ōitifoaxō, nōko māpori shināsharakōita, nōko yōshi sharafoyaxori.’ Nā mekafi sharafinakōiakī nā Moisés yoini keskara.

³⁹ Nāskatari nā ē mato taefakī yoia keskarakōiri nāno fetsari, a mia chaima nikari noisharafe a mā mī noimeai keskafakī ixō Moisés keneni.

⁴⁰ Moisés noko yoini keskai afeskax nō shara itiroamāki. Askatari a Niospa meka yoimisfāfe yoinifo keskai afeskaxri nō askatiroamakī. Akka nō askasharapai nā meka rafe nikakōisharax nō askasharakōitiro,” ixō Jesús ato yoini.

*“Akka, ¿tsōa fenamē Cristo?” ixō Jesús ato yōkani
(Mr. 12.35-37; Lc. 20.41-44)*

⁴¹ Fariseofo afe ichanāyoafono,

⁴² Jesús ato yōkani: “Akka, ¿nā Niospa katoa nā Cristoōnoa, afaa mā shināimē? ¿Tsōa fenamē?” ato faito kemanifo: “David āfe fenakīa,” fanifo.

⁴³ Nāskata Jesús ato yoini: “David Niospa Yōshi Sharapa shināmanaino nōko Ifo Cristoōnoa kirikaki keneni iskafakī Cristo oyoamano. Ē mato yoinō mā shinākōinō:

⁴⁴ Epa Niospa ěfe Ifo yoini iskafakĭ: ‘Mĭ efe xanĭfokōi ĩpanakaki. Akka nā mia noikaspaifo mĭ ato finōkōinō ě ato mĭnāmā nĭchikai,’
ixō Epa Niospa yoinino David kirika keneni.

⁴⁵ “Akka, ŷafeskai Cristo David āfe fena itiomē, nā David Cristo ěfe Ifora fafiapaonino?”
Jesús ato fani.

⁴⁶ Ato askafaino nikakakĭ tsōakai pishta kemanima. Nāskakē akiki ranokakĭ anā tsōa afaa pishta yōkanima.

23

*Jesús ato yōani fariseofoya a Moisés yoini keskara ato tāpimamisfo
(Mr. 12.38-40; Lc. 11.37-54; 20.45-47)*

¹ Mā askafata Jesús yorafo yoini aōxō tāpimisfoya:

² “A Moisés yoikĭ kirika keneni keskara ato tāpimamisfo feta fariseofāfe a Moisés yoini keskara mato tāpimakani.

³ Akka ato nikakāfe. Nā mato yoiaino keskara akāfe. Akka nāfāfe nā yoiaino keskara akanima. Nāskakē nā yoiaino keskara akātama afara fetsafo amisfo. Nāskakē māri ato keskara iyamakāfe.

⁴ Āto patoronō ato yoitiro iskafakĭ: ‘Na efekōi pefexō fōtakāfe,’ ato fafiaxō ěri foyoikanō ato fatiroma. Nāskarifiakĭ a Moisés keneni ato tāpimamisfo feta fariseofāfe mato afara fekaxkōi yoimisfo afeskax Epa Nios fe mā itiomākĭ Epa Nios matoki inimanō ikaxō. Nāskafikaxō mato afara axosharamisfoma.

⁵ Afama mĭshti sharafo apaikani yorafāfe noko ōinōfora ikaxō kakapaiyanā. Niospa meka kirikaki kenekata koiro kafo pishta fakāta a mēra Niospa meka nanekaxō āto fishpi ano nētamisfo. Askatari āto pōya anori nētamisfo. Askatari tari kepanātia chainipa safemisfo sharakōira noko fanōfo ikaxō.

⁶ Askatari sharakōi anoxō pipaimisfo, askatari tsaoti sharakōi anori tsaopaimisfo ichanāti pexe anoax, keyokōichi noko ōinōfora ikanax.

⁷ Nāskakata nā yora ichapa rasi ano fopaikani noko finōkakĭ noko yoisharakakĭ, ‘Maestro noko fanōfora,’ ikanax.

⁸ “Akka mā, ‘Maestro, noko fakāfe,’ ato fayamakāfe. Akka keyokōi mā yora fisti keskara. Tsoa fetsakai finama. Akka mātō Maestro fisti finakōiaki.

⁹ Nāskakē ĩskarafia nono mai anoxō tsoa Ēpa fayamakāfe. Akka nōko Epa Nioskōi nai mēra ikaki. Nā fisti Epa nō fatiroki.

¹⁰ Askatari tsoa ifofayamakāfe. Akka nā Epa Niospa katoni fisti na Cristo fisti mā Ifofatiro.

¹¹ Nā fatora fetsa xanĭfo ĩpai nā ato yonoxomis keskara itiro. Nāskaxō ato afara axosharatiro.

¹² Akka fatora fĕtsa ato finōpaiyaito a keskara Niospa ato nāmā nĭchitiro anā afaa inōma. Akka a shināi iskai: ‘Ēkai afama, ě fetsafo finōpaima, ě ato keskarama,’ ixō shināito Niospa fetsafo finōmainĭfōfā sharakōi nĭchitiro,” ixō Jesús ato yoini.

¹³ Nāskata Jesús a Moisés yoikĭ kirika keneni keskara ato tāpimamisfoya fariseofo yoini iskafakĭ: “Moisés meka ato tāpimamisfāfe, māri fariseofāfe ea nikasharakāfe. Māfi ato pārapaimiski. Mākai a mā yoiaino keskara mā ato yoimisma. Mā ato xĭtimis Epa Nios Ifofayamanōfo. Māri mā Nios Ifofamisma. Nā Nios Ifofapaiyaino mā ato xĭtimis. ¡Ooa! Epa Niospa mato fāsi omiskōimaxii.

¹⁴ “¡Ooa! Mā omiskōikai, Moisés meka ato tāpimamisfāfe fariseofo fe. Mā ato yoimiski iskafakĭ: ‘Nō mato afara shara faxōira,’ ixō mā ato pāramis. Akka kēro ifomafa mā pāraxō mā pexe fĭamis. Nāskaxō mā Nios kĭfikĭ mā chaikōi kĭfimis yorafāfe sharakōi shinānōfora ixō. Nāskakē Epa Niospa mato fāsi omiskōimaxii.

¹⁵ “¡Ooa, a Moisés yoikĭ kirika keneni keskara ato tāpimamisfāfe, mā omiskōixii fariseofo fe! Akka mā judeofoma ari kafāsamis ato yoikai noko keskara inōfora ikax, nō mato Niospa meka tāpimanōra ixō. Askafixō mā ato yoisharamisma. Nāskakē mato nikakanax mato keskarari ikani kiki. Mā chakakōifo nāfori chakafinakōia ikani kiki. Nāskakē mā nakanax Epa Nios ari foxikanima. Mato fe nā omiskōipakenakafo mēra foxikani.

¹⁶ “¡Ooa! Niospa mato omiskōimaxii, mā ato mĕstekōi yoimiskēma. Mā tāpimafixō mā ato paramiski ato tāpimapaikĭ. Mā fĕxo keskarakĭ fĕxo afe fĕxo iyoikai nā rafe fenotirofo. Nāskarifiakĭ Niospa meka anoriyamafiano mā ato paramiski iskafakĭ mā ato yoikĭ: ‘Ē mato paraima. Nāskakē ě mato yoi, nā ě mato yoiyoa keskara ě ayamaito Nios kĭfĭti pexefānē ea omiskōimatiro,’ mā imis. ‘Akka nā Nios kĭfĭti pexefā aneōxō mā yoiyoa keskafakĭ mā ato axoyamaxō shināchakayamakāfe. Askafixō nā Nios kĭfĭti pexefā mēranao oro aneōxō mā ato yoiyoa keskafakĭ ato axokāfe,’ ixō mā ato yoimis.

¹⁷ Mā tatimakōifo, askatari mā fēxo keskarakōifo. Akka, ¿fato sharafinakōiamē? Nā Nios kīfīti pexefā mēranoa oro raka sharafinakōia, askayamai Nios kīfīti pexefā raka sharafinakōia. Akka oro ares rakax shara itiro. Akka Nios kīfīti pexefā mēramāi rakax shara itiro.

¹⁸ “Nāskarifiakī, ‘Nā ē mato yoiyoa keskara ē ayamaito nā a kamakixō yoinā koati mīsamāfānē ea omiskōimatiro,’ ixō yoisifo. Akka mā fariseofāfe, anorima mā ato yoikī iskafamis: ‘Nā mīsamāfā aneōxō mā ato yoiyomis keskafakī mā ato axoyamafixō shināchakayamakāfe. Askatari nā mīsamāfā kamakixō yoinā koaki nā yoinā aneōxō mā ato yoiyomis keskara akāfe,’ ixō mā ato yoisimis.

¹⁹ “Akka mā fēxo keskarakōi. Akka, ¿fato sharafinakōiamē? Nā afarafo mā Nios ināi raka sharafinakōia, askayamai a kamakixō yoinā koati mīsamāfā raka sharafinakōia. Akka nā yoinā ina ares shara itiro. Askafīax nā shara, māmāi mā Nios ināno mīsamāfā anoxō koakī. Nāskakē nā yoinā inapa nā koati mīsamāfā finōama.

²⁰ Akka nā koati mīsamāfā aneōxō afara yoiāito nā koati mīsafā fīstīōnoa aneima. Akka nā mīsamāfā kamaki rakaōnoari yoi.

²¹ Akka nā Nios kīfīti pexefā aneōxō afara yoikī Nios kīfīti pexefā fīstīōnoa yoima. Akka Niosri a mēra ikano mā yoi.

²² Akka nā nai aneōxori mā afara yoikī, nai fīstīōnoa mā yoima. Nā Nios Xanīfo nai mēra ika anoāfori mā yoi.

²³ “¡Ooa, a Moisés yoikī kirika kēneni keskara ato tāpimamisfāfe fariseofo feta! Ea nikakapo. Māfi ato parapaimiski. Māto afama mīstīfo mā Nios ināpaifīkī a Niospa afara fetsa yoia keskara mā shināmīma. Mā māto fana mīstīfo nā korātorofo fana fetsa mīstīfori mā Nios ināmī. Akka fetsafo mā ato yonomaxō afara fichipaifāifāfe mā ato noikīma mā ato afaa ināmīma. Epa Niospa yoini keskafakī mā ato noima. Akka a mā yoiāi keskara tsōa māto meka chanīmara fatiroma. Nāskaxō māto fana mīstīfo mā Nios ināfīkī a Niospa yoia keskara mā shināima.

²⁴ Akka mā nā fēxo afe fēxo iyotiro. Nāskarifiakī māri mēstekōi shināsharaima yorafo Niospa meka tāpimapaifīkī. Nāskaxō afara sharakōifo mā ato tāpimasharamīma. Akka afara sharama mā ato tāpimamis. Akka nāpe pishta māto kecho mēra naneano, mā fixō mā potamiski. Akka nā camello efapakōi mā potakaspakī mā ayamis.

²⁵ “¡Ooa, a Moisés yoikī kirika kēneni keskara ato tāpimamisfāfe fariseofo feta! Mā ato parapaimiski. Akka māto kecho yafi māto sapa femākīa fīstī chokasharafīkī, oke mērakai mā chokasharamīma, nachoshtax pisikōi itiro. Nāskarifiakī mā yorafo ōimapai nāfo sharafora noko fanōfora ixō. Akka māto shinā mēraxō mā shara shināyamafīkī, oa choshta pisi keskaraxō. Nāskaxō afarafo mā ato fīamis fetsafo ratexō. Askatari mareskōi mā shinākī, ichapakōi fichipaikī mā icha icha famis. Nāskakē Epa Niospa mato omiskōimakōixii.

²⁶ Fariseofāfe, mākai mēstekōi shināsharamīma. Akka iskaratīa māto shinā mēraxō shināsharakāfe, isharakōixikakī. Anā afaa chaka shinākakīma. Nāskaxō mā yorafo ikisharakōitiroki.

²⁷ “¡Ooa, a Moisés yoikī kirika kēneni keskara ato tāpimamisfāfe, fariseofo feta! Māfi ato parapaimiski. Māfi nā mafa kīni keskarakī. Akka mafa kīni femākīa oxo sharakōi nō ōifīaino oke mēra sharama. A namisfāfe āto xaofō fospikōia pīsia fetsa fetsatapafō.

²⁸ Nāskarari shara keskara yorafāfe mato ōikani. Akka māto shinā mēraxō mā shara shināima. Afara chakakōifo mā shināmī, ato mā parakōimis.

²⁹ “¡Ooa, a Moisés yoikī kirika kēneni keskara ato tāpimamisfāfe, fariseofo feta! Mā ato parapaimis. Nāskakē Niospa mato omiskōimakī finakōixii. Nā māto xinīfo a Niospa meka yoisifo fetsafāfe ato retenīfo maiafo ano mā tokiri famis a māto xinīfo namisfo ato shināxikī. Nāskaxori a maiafo mānāo charofori mā famis yorafāfe ōikakī na mēra sharakōira fanōfora ixō.

³⁰ Nāskaxō mā yoisimis iskafakī: ‘Nōko xinīfāfe a Niospa meka ato yoisifo retenīfo keskafakī nōri niyoxō nō ato retēkeranima,’ ixō mā yoisimis.

³¹ Akka nā mā yoiāi keskara chanīma. Māto xinīfāfe ato chakafakī ato retenīfo. Māri ato keskarakōifo.

³² Nā Niospa matoki nīchiari mā retexii. Akka nā mā apaiyai keskafakī ayotakāfe.

³³ “Mā afara chakafa fafafāini. Nāskakē mā rono keskarafō. Mā chakafa fafafāini. Mā rono paekapato fake keskarakōifo. Nāskakē mā omiskōipakenakafō mēra mā kaxii. Akka afeskak mā faki ichotiro. Askatari tsōakai mato nētefatiro.

³⁴ Nāskakē a Niospa meka yoisimis ē matoki nīchikai. Askatari a Niospa meka tāpisharakōixō shināsharakōimisno ē nīchikai. Nāskatari a Moisés yoikī kirika kēneni keskara ato tāpimamisfori ē matoki nīchixii. Nāskakē atiri mā ato retexii. Askatari fetsafori ifi cruz ikakī mā ato mastaxii nanōfo. Askatari fetsafori māto ichanāti pexe mēraxō mā ato

koshaxii. Nāskakī mā ato omiskōimakōixii. Nāskaxori fetsafori mā ato chīfafofāsa faxii ato omiskōimayanā.

³⁵ Nāskakē Epa Niospa matori omiskōimaxii nā māto xinifāfe nā yora sharafo retenifono. Akka taefakī nā Abel sharafiano āfe ōchi reteni. Askatari fetsafori sharafafono ato retenifo. Chipori mā xini ichapa finōano nā Zacarías, Berequías fake, māto xinifāfe retenifo. Nā Zacarías feronāfake sharafiano Nios kīfiti pexefā chaimashtaxō koati mīsamāfā nakirafexō retenifo. Nāskakē Niospa atoōxō mato omiskōimaki finakōixii.

³⁶ Akka chanīma ē mato yoinō. Na yorafo iskaratīa niyoafo Niospa ato omiskōimaki finakōixii,” ixō Jesús ato yoini.

*Jesús Jerusalén anoafo ato shināi oiani
(Lc. 13.34-35)*

³⁷ Anā Jesús ato yoini iskafakī: “¡Ooa, Jerusalén ano ikafāfe! Māfi a Niospa meka yoimisfo mā ato retemiski. Askatari aōnoa āfe meka shara yoitanōfo Niospa mato ano nichiafori mā ato tokorinī tsakakī retemis. Oa takaranā āfe fakefo āfe pei nāmā onetiro keskafakī ē mato kexepaifaifo mā ea nikakaspamis. Māfi ekeki omismakī ē mato ikipanā.

³⁸ Akka ōikapo, iskaratīa anā tsōa mato kexeima nā mā imis ano.

³⁹ Ē mato yoinō, iskaratīakai mā ea anā ōima. Nā ē oaitīa mā ea ōixii. Nā ē nai mēranoax ē oaitīa mā yoikī iskafaxii: ‘Nafi Niospa nokoki nīchia. Fāsi sharafinakōia Epa Niospa na shara fapanaka,’ ixō mā eōnoa yoixii,” ixō Jesús ato yoini.

24

*Jesús ato yoini: “Na Nios kīfiti pexefā pāōixii,” ixō
(Mr. 13.1-2; Lc. 21.5-6)*

¹ Nāskata Jesús Nios kīfiti pexefā mēranoax tsekekainaino, aōxō tāpimisfo akiki fēkaxō yoinifo iskafakakī: “Ifo, ōipo. Nōko Nios kīfiti pexefā sharakōi,” fanifo.

² Askafaifono Jesús ato yoini: “Na mā ōiai, akka ē mato pāraima anākai tokirifo pet-sanāmēxima, keyokōi pāōixii. Na tokirifori maoui fetsexii,” ato fani.

*Afaa afeskaximākai mā chaima nōko mai keyoaino Jesús ato yoini
(Mr. 13.3-23; Lc. 21.7-24; 17.22-24)*

³ Askata fonifo māchifā Olivos ano. Nāno Jesús tsaoni. Nāskakē aōxō tāpimisfo akiki fonifo yōkaxikakī iskafakakī: “Nō tāpipai mī noko yoinō afetīa iximē a mī yoiai keskai. Afeskaxō nō tāpitiromē a mī anā ōixiai mā mai keyoaino noko yoife,” fanifo.

⁴ Askafaifono Jesús ato kemani: “Kexemesharakani mā ato nikaino mato afara chakafamatirofoki.

⁵ Yora ichapa fēkaxō, ‘Ē Cristora,’ ixō mato paraxikani.

⁶ Nāskaxori mā nikaxii yorafo retenāifāfe chai inoax. Nāskatari nonoaxri askaxikani retenānikani. Askara ōi, rateyamakāfe. Nā ē mato yoimis keskakōi kiki. Nāskafīax nōko mai fena keyoxima kiki, chipo ixii.

⁷ Akka yorafo mai fetsa anoax mēnēpaiyaifono yora fetsafori mai fetsa anoax retenānikani. Askatari fonāiki finakōixikani afaa pikanima. Nāskatari nā mai fetsa anoax mai naya naya ixii. Askatari pae finakōia fetsa fetsatapafō nokoxii kiki.

⁸ Akka taei nā omiskōiaifo, askai fetsexii.

⁹ “Nāskata mato achikaxō fetsafo mato inānikani mato omiskōimanōfo. Nāskaxō mato retenōfo. Nāskaxō keyokōi nā mai tio anoaxō eōxō mato noikasaxikani.

¹⁰ Nāskatari yora ichapafāfekai ea anā chanīmara fakanima. Nāskakanax āa ranā noikaspā faatanānikani. Nāskakaxō yora fetsa yōsixikani ato achinōfo.

¹¹ Nāskatari yora ichapafō āa chanīnikani iskakani: ‘Ea Niospa shināmani kiki ē Niospa meka mato yoinō,’ iki āa chanīnikani. Nāskaxō yora ichapafō ato pāraxikani.

¹² Nāskaxō ato chakakōi faxikani. Ato noimisfo keskafakī atirififāfe anā ato noisharaxikanima.

¹³ Akka nā ea shināmakixoma ea shinākōiai nāfi ēfe Epa Nios fe ipaxatiroki.

¹⁴ Nāskakē na meka shara Jesúsnoa nikaxakani Jesús noko nāxonikē Epa Nios xanīfo anoax nō afe ipaxanō. Na maifo tii ano ato yoiaifono, chipo nōko mai keyoxii.

¹⁵ “Nā Niospa meka yoimisto Daniel a inōpokoai yoikī kenenī iskafakī: ‘Nios kīfiti pexefā mēra afara chakakōi faxikani,’ ixō kirika kenenī. Nāskakē na kirika kenea anexō tāpikāfe.

¹⁶ Nā chakafinakōia ōikanax, nā Judea anoafo machi keya ano ichorisatakāfe.

¹⁷ Askatari āfe pexe māmākīa tsoaxō ato fichiāx koshikōi fotopakekafā āfe afaa fiamax ichotiro.

¹⁸ Askatari a āfe tare ano yonoaito anā oxō āfe rapati ftiroma.

¹⁹ Askatari a kēro fake naneafu fe a fake yome pishta chocho amaifo omiskōixikani māmāi yorafu omiskōifinakōiaifono.

²⁰ Akka Epa Nios kīfikāfe iskafakī: ‘Epa Niosi, noko omiskōimayamafe nōko pena tenetitūa askayamai yōtaino matsi meexikakīma,’ ixō yoikāfe.

²¹ Askatari a omiskōiaifo nokoxii, taeyoi askakatsaxakīma. Nā Niospa yora onifakī taefanitia tsōa askara ōiyomisma. Askatari anā tsoa chipo omiskōinakama.

²² Akka a omiskōiaifo nōko Ifāfe xateyamano, tsoa nikeranama nai keyokeranifo. Akka afe yorafu ato noikī omiskōinōfoma xateni atomāi katonixakī.

²³ “Akka fētsa mato yoikī iskafaino: ‘Ōikapo, nakīa Cristo,’ mato fayana, ‘Oa onokīa, ōikapo,’ mato faito nikayamakāfe.

²⁴ Akka nā chanīmiso fekani, ē Cristora ixikani, nāfo nō Niosxō nō mato yoirā ikani. Nāskakaxō tsōa atiroma keskara fakani Satanás yōshixō mato parapaikakī. Nā Niospa ato katoafori nāfo ato parapaikani.

²⁵ Mē mato yoikai iyoamano shināsharakāfe.

²⁶ Nāskakē mato parapaikani: ‘Cristo mā tsōa istoma ano oa,’ ikaxō. Nāskakē ari foyamakāfe. Askatari mato iskafakani: ‘Ōikapo, na Cristo na pexe mēra,’ mato faifāfe ato nikayamakāfe.

²⁷ Akka nā kana peikī fafetanaito nō ōitiro keskara, nāskarifiāi ē oxii xafakīakōi ē ōixikani ē oaito.

²⁸ Akka nā naafu ano ishpifō ichanāitiro. Nāskari fakī keyokōichi ea tāpīxikani ē oaito,” ato fani.

“Niospa Fake fotoaino afe keskara iximākai,” ixō Jesús ato yoini

(Mr. 13.24-37; Lc. 17.26-30, 34-36; 21.25-33)

²⁹ Anā Jesús ato yoini iskafakī: “Akka nā penatari, nā omiskōiaifo mā keyoano, xini fakishkōi ixii, ōxeri anā chaxaxima. Fishifori nai mēranoax pakei fetsexii, askatari nā nai mēranoafu naya naya iki fetsexii.

³⁰ Nāskatari ōixikani nai mēranoax afara afeskaraito mā tāpinō ē fotoaitia. Nāskatari keyokōi nā maitio anoax ratei fetseyanā oiaixikani. Nāskatari ea ōixikani ē nai mēranoax nai kōinī fotoiyaoaito. Ē sharafinakōia ēfe sharaōnoax ē fotoaito ea ōixikani.

³¹ Nāskatari ēfe ājirifori ē yoixii āto maneti fāsikōi manekakī chāi chāisafanōfo a nikakanax efe yorafu a ē ato katoa ichanānōfo. Chai inoax fisti rasi efe yorafu fexikani nāno fistiax ichanāixikakī.

³² “Akka shinākapo ē mato yoinō. Mā yōkkafaino mā tāpitiro āfe pei sirikiaito. Nāskakē āfe peifo keyopakeaito ōikī mā tāpitiro māmāi chaima xiniaito.

³³ Nāskarifiakī afarafo afeskaraito ōikī mā tāpitiro mē chaima oaino askai fetsexii.

³⁴ Ē mato pāraima ē mato yoikōi, na ē mato yoiai keskara nono mai anoxō yorafāfe nayokaxoma ōiyokani.

³⁵ Akka nai fe mai keyoi. Akka ēfe meka fisti keyonakama, nā ē mato yoiai keskakōi.

³⁶ “Afetīara nai mēranoax ē oxii tsōakai tāpiama. Nā ājirifāfe nai mēra ifiakaxō tāpiafoma. Ērikai tāpiama. Ēfe Epa Nios fistichi tāpia.

³⁷ Akka nā Noé niyoano ini keskai, nāskarifiāxii ē anā oaino.

³⁸ Nāskata fakafānē ato maiyoamano, Noé kanōanāfā mēra ikini, yorafu pikāta, ayakāta fīanākāta ikaifono.

³⁹ Akka tsōa shināyamaino mā faka faipafaxō keyokōi ato āsakī mitokōini. Nāskarifiāxii ē oaino ea shinātama afara chakafaifono.

⁴⁰ Nāskatari feronāfake rafeta āto tare ano yonokani. Fetsa ea ari kai yamarisatatiro. Akka fetsa nētetiroti nā omiskōipakenakafo mēra kaxiki.

⁴¹ Nāskarifiāi kēro rafeta xiki renekani. Fetsa ea ari kai yamarisatanaino akka fetsa nētetiroti nā omiskōipakenakafo mēra kaxiki.

⁴² “Nāskakē itipinīsharakāfe oa mā moinākafanai keskakāfe. Akka mā tāpiamaki afetīara ē anā oxikai.

⁴³ Nāskakē māri nā keskara tāpisharakāfe. Akka pexe ifāfe mā tāpīxō afetīa yometso nokoimākai ixō āfe pexe itipinīshara fatiro mā moixō, a mēra ikiax yometsoyamano.

⁴⁴ Nāskarifiāi māri itipinīsharakāfe. Akka oimara ixō mā ea manayamaino ē matoki nokorisatani,” ixō Jesús ato yoini.

Ina shara yafi ina chakaōnoa Jesús yoini

(Lc. 12.41-48)

⁴⁵ Anā Jesús ato yoini iskafakī: “Ē mato yoinō afe keskaramākī a yonoxomis shara mā tāpinō. Xanifāfe mai fetsa ari kakī, a yonoxomis āfe pexe ano nīchifaini nānoxō a yonoxomis fetsafo a piaifo pena tii ato ināfafainō.

⁴⁶ Mā mai fetsa ari katani oxō ōitoshini a yonoxomisto mā yonoxosharakōiano. Nāskakē akiki inimakōini a yonoxomisri inimakōini māmāi yonoxosharakōiax.

⁴⁷ Ē mato paraima. Nāskaxō āfe xanīfāfe mā xanīfo imaxō āfe afama mīstiffo kexexonō inātiro.

⁴⁸ Akka nā yonoxomis chakapa shinātiro: 'Ēfe xanīfo fena oimara,' ixō.

⁴⁹ Nāskaxō a yonoxomis fetsafari ato seteketsani. Askatari nā pāemisfo fe rafexō ato feta piyanā askatari ato feta ayayanā.

⁵⁰ Iskaratīa ēfe xanīfo oimara ixō manasharayamaino nā penata āfe xanīfo nokorisatani.

⁵¹ Mā oxō nā yonoxomis omiskōimaxii. Nā yora keparanāmisfo fomisfo mēra potaxii. Nāskakē anoax oiayanā omiskōipakenaka," ixō Jesús ato yoini.

25

Meka fetsafaxō Jesús ato yoini diez xotofake xomayaōnoa

¹ Anā Jesús ato yoini iskafakī: "Ē mato yoinō meka fetsafaxō mā tāpinō ē anā oxii a Nios Ifofaafōnoax afe keskara ixikanimākai. Akka nā diez xotofake xomayafāfe āto rāpari fīfakani fonifo. Feronāfāke rama āfiyaino afe fista mēra foxikakī manai fokani fonifo.

² Akka nā cinco xomayafāfe shināsharanifoma, itipinīnifoma. Akka nā cincōfāferi shināsharanifo.

³ Akka nā shināsharaifāfema āto rāpari foyiakakī āto kirosī fonifoma anā fospifaxikakima.

⁴ Akka nā shināsharakōiaifāfe āto manishomoki kirosī fonifo. Askatari āto rāpari fonifo.

⁵ Akka feronāfāke fena nokoyamaino, mā fakishaino, oxakatsa ikani. Nā kēro xomayafō oxanifo.

⁶ Nāskakē yame nakekafanaino nikanifo kenaifāfe iskaifono: 'jMā nā feronāfake oi kiki! jMoinīfofākāfe, ifixikaki!' ato faifono.

⁷ Nāskakē nā kēro xomayafō moinīfofākata itipinī fakī fetsanifo āto rāparifo ōtaketsakakī.

⁸ Nāskata nā cinco xotofake shināsharaifāfema nā cinco xotofake shināsharaifo āto kirosī pishta yōkanifo: 'Noko kirosī pishta inākāfe. Nōko rāpari otasharaima kiki,' ato fanifo.

⁹ "Ato askafaifono nā xotofake shināsharaifāfe ato kemanifo ato iskafakakī: 'Maa. Nō mato inātiro, nōri afaa otatiroma. Akka mā kaxō fitiro a kirosī miniaifo anoā fitakāfe mātonā faxikakī,' ato fanifo.

¹⁰ Akka nā cinco xotofakefāfe kirosī fiifofāfono nā manaifo feronāfake nokoni. Nāskakē nā cinco xotofakefo shara shināmisfo nā feronāfake mā nokoaino afe pexe mēra ikinifo afeta fista ayanā pixikāki. Nāskakaxō pexe fepoti feponifo.

¹¹ Nāskano nā xotofakefo kirosī fitakani anā fenifo. Mā fēkaxō iskafakī yoitoshinifo: 'Xanīfo, noko fepoti fēpexōfe nō ikikanō,' faifāfe,

¹² ato kemani: 'Maa. Ēkai mato ōimisma, ē mato ikimatiroma,' ato fani.

¹³ "Nāskarifiakī māri isharakōiaxō ea manasharakōikāfe. Afetiāra ē anā matoki oxikai tsōa tāpiamaki," Jesús ato fani.

Meka fetsafaxō koriōnoa Jesús ato yoini (Lc. 19.11-27)

¹⁴ Anā Jesús ato yoini iskafakī: "Ē anā mato yoinō Nios xanīfo iskaraki. Feronāfake mā mai fetsa ari kakī a yonoxomis kenaxō yoini āfe kori kexexonō.

¹⁵ Akka a yonoxomis fetsa ināni cinco mil. A yonoxomis fetsari ināni dos mil, fetsari ināni mil. Akka nā kori kexekī tāpia ichapa ināni. Akka a kori kexekī tāpisharafomari ichapa ato inānima. Nāskax kani mai fetsa ari.

¹⁶ Akka āfe ina fetsa nā cinco mil fiato nā kōri afama mīшти fini. Nāskaxō anā cinco mil fini āfe afama mīштиōxō.

¹⁷ Nāskafakīri nā dos mil kori fiato nāatori nāskarifani afianā dos mil kori fikī.

¹⁸ Akka nā mil kori fiato nāato kori oneni āfe xanīfo mekexokī. Mai kini mēra maifani.

¹⁹ "Akka mā samarakax anā oni āto xanīfo. Mā oxō a yonoxomisfo nā tres ato yōkani afe tii kori fixofafomākī.

²⁰ Nāskakē nā cinco mil kori fini akiki oi taeni. Nāskaxō āfe xanīfo kori ināni iskafakī yoiyanā: 'Xanīfo, mī ea cinco mil kori ināti. Akka ē finōmainīfōfā anā cinco mil faxō ē fia. Ōipo. Nakīa mī kori,' fani.

²¹ "Askafaifo āfe xanīfāfe yoini: 'Aicho, mī ea yonoxomis sharakōi. Nā pishta ē mia ināoxō mī yonosharakōia. Nāskakē ēfe afama mīstiffo ichapakōi ē mia anā ināni mī ea kexexonō. Nāskakē nā ē inimai keskariai mīri inimafe,' ixō yoini.

²² "Nāskatari a yonoxomis fetsari chipo oni, nā dos mil kori fini. Oxō yoini iskafakī: 'Xanīfo, mī ea dos mil kori ināni. Akka ē finōmainīfōfā anā dos mil faxō ē fia. Nakīa mī kori,' fani.

²³ Nāatori askafaito āfe xanīfāfe yoini: ‘Aicho, mī ea yonoxomis sharakōi. Nā ē mia ināoxō mī yonosharakōia. Nāskakē ēfe afama mīstifo ē mia anā kexemani. Nāskax mīri nā ē inimai keskariai mīri inimafe,’ fani.

²⁴ “Nāskata a yonoxomis fetsari oni nā mil kori fini. Mā oxō āfe xanīfo yoini: ‘Xanīfo, ē tāpia mī feronāfake mitsisipakōi. A mī fanama anoa mī fimis. Askatari a mī saakama anoafori mī fimis.

²⁵ Nāskakē ē mesekī ē mia kori maifaxōa. Nakāia mī kori,’ faito āfe xanīfāfe kemani:

²⁶ ‘Mī ea yonoxomis chakakōi. Askatari mī xanikōi. Akka, ōmī shināmē a ē fanama anoafori fita, a ē saakama anoafori ē fimis?’

²⁷ Nāskakē nānori mī shinākī mī kori banco ano ea fāxōama anā oxō ē kori ichapa fikerana mā ēfe kori ichapano ē anā fikerana,’ fani.

²⁸ Nāskaxō nā anoafori ato yoini: ‘Nā feronāfake nā mil kori fīakāfe fetsa ināxikakī nā kori diez milya,’ ato fani.

²⁹ Akka nā afara ichapaya ichapayakōi itiro. Nāskaxori āfe afara ranāri anā meketiro. Akka nā afaa ichapayama āfe afara fiatiro anā afaa ichapaya iyamanō.

³⁰ Nāskata a yonoxomis chaka mā potaxō fakishifā mēra nīchini nā fakishi mēranoax oiayanā omiskōipakexanō,” ixō Jesūs ato yoini.

Mā mai keyoaino nā omiskōipakenakafoōnoa Jesūs ato yoini

³¹ Anā Jesūs ato yoini iskafakī: “Ē mato anā yoinō, ea nikakapo. Ē nai mēranoax oni. Ē Niosfiāx feronāfakekōi ē oni. Ē anā nai mēranoax fotoyoi, ē xanīfokōi oxii ēfe ājirifo fe keyokōi ē oxii, ea kemataima mapoi fetsexikani. Askatari efe xanīfāfe tsaoti ano tsaoxikani. Keyokōi sharafinakōia ōixikani.

³² Nāskatari yorafo keyokōi nā maitio anoafori ēfe ferotaifi ichanāxikani. Nāskakē ē ato paxkanā faxii nā oveja kexemisto āfe ovejafoya āfe cabrafo paxkanā fatiro keskafakī.

³³ Nā āfe inafō kexemisto āfe inafō paxkanā fakī āfe ovejafos āfe pōya kayakai aōri nīchixii. Askatari āfe cabrafori āfe pōya mishkiori nīchixii. Nāskarifiakī ē yorafo keyokōi ē paxkanā faxii. Nā ea Ifofaafos ēfe pōya kayakai aōri ē ato nīchixii, akka a ea Ifofaafomafori ēfe pōya mishkiori ē ato nīchixii.

³⁴ Nāskaxō mē xanīfoxō ē ato yoixii nā ēfe pōya kayakai aōrianoafō ekeki fekāfe, ēfe Epa Niospa mato inimamamiski. Nāskakē ēfe Epa Xanīfo anoa mā afara fikai nā mai onifaitia mato yoiyoni keskara.

³⁵ Akka ē fonāikaito mā ea pimamis; ē nōamāikaitori mā ea ayamamis; ē pexemaisax kafāsaitori, ‘Nono ēfe pexe ano ofe nono oxaxiki,’ mā ea famis.

³⁶ Askatari ē rapatimaiskē mā ea ināmis; ē isinī ikaitori mā ea kexesharamis; ē karaxa mēra ikikēri kaxō mā ea ōimis.

³⁷ “Ē ato askafaito ea yōkaxikani iskafakākī: ‘Ifo, ōafetia nō mia ōimismē mī fonāikaito, akka mī fonāikaito nō mia pimamis? Askatari, ōafetia nō mia ōimismē mī nōamāikaito, akka mī nōimāikaito nō mia ayamamis?’

³⁸ Askatari, ōafetia nō mia ōimismē pexemaisax mī kafasaito, akka nō mia pexe ināmis ano mī oxanō, askatari mī rapatimaiskē akka nō mia rapati ināmis?’

³⁹ Askatari, ōafetia mī isinī ikaito nō mia ōimismē? Askatari, ōafetia karaxa mēranoa nō mia ōikamismē?’ ixō ea yōkaxikani.

⁴⁰ “Ea askafaifono ē ato kemaxii: ‘Ē mato paraima, nā fetsafo omiskōiaino mā tanaima isharaxō eōxō mā axomis.’

⁴¹ “Askatari nā ēfe pōya mishkiorinoa ē ato yoikī iskafaxii: ‘Na ēfe pōya mishkiorinoa emakinoax fotakāfe mā chakakōikī. Chii xoisai mēra fotakāfe anoax omiskōixikaki. Nā ē chii xoisai itipinī fani mēranoax Satanās chaka fe āfe yōshi chakafori anoax afe omiskōinakafo.

⁴² Akka ē fonāikaito mā ea pimamisma. Askatari ē nōamāikaito mā ea ayamamisma.

⁴³ Askatari ē pexemaisax kafāsaito, “Nono nōko pexe mēra ife,” mā ea famisma. Askatari mā ea rapati ināmisma. Askatari karaxa mēranoa mā ea ōikamisma. Askatari ē isinī ikaito mā ea ōikamisma,’ ixō ē ato yoixii.

⁴⁴ “Ato askafaito yorafetsafāfe yōkaxikani iskafakākī: ‘Ifo, ōafetia nō mia ōimismē mī fonāikaito, askatari a mī nōiamāikaito, askatari mī pexemaiskē, askatari mī rapatimaiskē, askatari a mī isinī ikaito, askatari a mī karaxa mēra ikikē nō mia tanamisma nō mia ōikaspamis?’

⁴⁵ “Ea askafaifono ē Xanīfokōixō ē ato kemaxii iskafakākī: ‘Ē mato paraima. Nā omiskōiaino mā ato tanamisma nafokai afaafoma ixō askatari eari mā tanamisma,’ ixō ē ato yoixii.

⁴⁶ Nāskakē nāfo nā omiskōipakenakafo mēra foxikani. Akka nā ea Ifofaafō efe nīpanakafo,” ixō Jesūs ato yoini.

26

“¿Afeskaxō nō Jesús retetiromē?” ixō shinānifo

(Mr. 14.1-2; Lc. 22.1-2; Jn. 11.45-53)

¹ Nāskata mā ato yoikī keyota Jesús aōxō tāpimisfo yoini:

² “Mā mā tāpiakī oxa rafeta Pascua fista ikiki. Nāskatari Pascua fistaṭia ea achikani fetsafāfe ea mastanōfo,” ixō Jesús ato yoini.

³ Nāskakē a Niospa meka yويمis xanīfofo fe a judeo anifofo ichanānifo Caifás pexe anoax. Nā Caifás ato Nios kīfixomisfāfe āto xanīfo ini.

⁴ Nāno ichanākanax yoinānifo: “¿Afeskaxō nō Jesús achitiromē paraxō retexiki?” ikanax yoinānifo.

⁵ Nāskakanax yoinānifo: “Fistaṭiakai nō achitiroma yorafā rasi mekai fetsekani nokoki ōitifishkitirofo,” ikanax yoinānifo.

Kēromā Jesús shināki āfe mapoki pirofomā nachini

(Mr. 14.3-9; Jn. 12.1-8)

⁶ Nāskata Jesús Betania ano ini Simón pexe ano. Nā Simón “Rashkishiai” fapaonifo.

⁷ Jesús nānoxō piaino kēro fisti akiki kani pirofomā manishomo sharakōikī foikai nā manishomo āfe ane alabastro. Akka nā pirofomā kopikōi ini. Jesús mīsa ano tsoaxō piaino, nā kēromā āfe mapoki pirofomā nachini.

⁸ Askafaito ōikani Jesúsxō tāpimisfo ōitifishkiyanā iskanifo: “¿Afeskakī nā pirofomā shara mī nachimē?”

⁹ Mī ato minixō mī kori ichapa fixō a afaamaisfo mī ato inākerana,” fanifo.

¹⁰ Askafaifāfe nikakī Jesús ato yoini: “¿Afeskakī na kēro mā fekaxtefaimē? Na ea iskafai sharaki,” ato fani.

¹¹ “Akka nā afaamaisfori mato fe ipanakafa. Akka eakai mēxotaima mā ea anā ōima.

¹² Akka na kēromā ea iskafakī ēfe yoraki pirofomā nachia ea itipinīsharafakī ea iskafa ea maifasharaxinōfo.

¹³ Ē mato pāraima, fanīxōra na meka shara eōnoa yoikakī nā mai tio anoxō na kēromā ea iskafaōnoa yoixikani. Askatari na kēroōnoa shināpakenakafa, shināmakiyamaxikakī,” ixō Jesús ato yoini.

Judaspa aōxō tāpifīkatsaxakī Jesús ato achimani

(Mr. 14.10-11; Lc. 22.3-6)

¹⁴ Nānori Jesús ato yoiaino a aōxō tāpimis fetsa, āfe ane Judas Iscariote, nā kani nā ato Nios kīfixomis xanīfofo ano.

¹⁵ Mā kaxō ato yoini: “¿Afe tii mā ea kori inātiromē ē mato Jesús achimanō?” ato faito yoinifo: “Treinta nō mia inātiro,” fanifo.

¹⁶ Nāskaxō Judaspa shināki taefani: “¿Afeskaxomāi ē Jesús ato achimanō?” ixō shināni.

Mā chaima reteaifono Jesús aōxō tāpimisfo feta yātapake pini

(Mr. 14.12-25; Lc. 22.7-23; Jn. 13.21-30; 1 Co. 11.23-26)

¹⁷ Akka nā Pascua fistaṭia pāa faraxatimais pipaonifo. Nāskata mā fista pakeano aōxō tāpimisfo akiki fokaxō yōkanifo: “¿Fanī mī fichipaimē ano kaxō nō itipinī fanō, anoxō Pascuatia yātapake pixikī?” fanifo.

¹⁸ Askafaifono Jesús ato kemani iskafakī: “Oa pexe rasi ano fotakāfe. Nānoa feronāfake fetsa fichixō yoitakāfe iskafakī: ‘Nōko Ifāfe noko yoia nō mia yoionō iskafakī: Mē chaima naikai. Nōko fistaṭia mī pexe anoxō eōxō tāpimisfo feta ē pii kaikai,’ ixō yoitakāfe,” ato faano,

¹⁹ nāskafakī yoinifo nā āto Ifāfe ato yoia keskafakī. Nānoxō itipinī fanifo Pascua fistaṭia pixikakī.

²⁰ Jesús mā fakishaino pexe ano nokoax mīsa ano tsaoni a aōxō tāpimiskōifo fe.

²¹ Nānoxō piyanā ato yoini: “Ē mato pāraima, fatora mā fētsa ea mā ato achimafainaka,” ato fani.

²² Ato askafaito nikai shināmītsakōinifo. Nāskaxō yōkaketsanifo: “¿Ēraka, Ifo?” fakī fetsanifo.

²³ Askafaifono Jesús ato kemani: “Nā efeta sapakinoa pāa momoxō piaito nāato ea ato achimaxii.

²⁴ Ē Niospa Fakekōifīax ē yorakōi. Nā eōnoa yoikī kirika kenenifo keskakōi fakī ē asharakōitiro. Akka nā feronāfake ea ato achimafīax akairi omiskōikōixii. Akka nā feronāfake shara ikerana fakeyamanixakī,” ixō Jesús ato yoini.

²⁵ Nāskakē Judaspa nā ato achimanaito yōkani: “Maestro, ¿ēraka?” faito, “Ēje, nā mī yoiai keskarakī,” Jesús fani.

²⁶ Nāskakaxō piaifono Jesús pāa tsomainīfofā Apa Nios kīfīni. Mā Apa kīfita pāa kaxketet-saxō aōxō tāpimisfo ināni ato iskafayanā: “Na ēfe nami keskara pikāfe,” ato fani.

²⁷ Ato askafata kechokinoa fimi ene tso-mainĩfofãxõ Apa Nios kĩfini. Nãskaxõ aõxõ tãpimisfo ato ayamani ato iskafayanã: “Na fimi ene ayakãfe,” ato fani.

²⁸ Nãskaxõ ato yoini: “Nafi ãfe imi keskaraki. Akka nã ã mato yoiyoni keskai mē nai. Nãskakaxõ ãfe imi õikaxõ tãpitirofo Epa Niospa yoiyoni keskafakĩ yora ichapafo ã ato chaka soaxonõ.

²⁹ Akka anã ã mato yoinõ ã anã mato feta fena na fimi ene ayaima. Mã mã nai mēra kano ã mato feta anã fimi ene ayaxii ãfe Epa xanĩfo anoxõ,” ixõ Jesús ato yoini.

*“Ë Jesús õimisma,” Pedro ixiaino Jesús ato yoini
(Mr. 14.26-31; Lc. 22.31-34; Jn. 13.36-38)*

³⁰ Nãskakata mã fanãiki xatekata machi Olivos ano fonifo.

³¹ Nãnoxõ Jesús ato yoini: “A na fakishi keyokõĩ mã ea shinãmaki fetsei. Nãnori kirika kenenifo iskafakakĩ: ‘Áfe ifo reteaifono, áfe ovejafo ichoi fetsetirofo,’ ixõ kirika kenenifo,” ato fani.

³² “Akka ea retefiafono ã otox ã Galilea ano rekẽ kai mã kayoamano,” ato faino,

³³ Pedro kemani: “Keyokõĩ shinãmakifiaifono, akka ãkai mia shinãmakima,” fani.

³⁴ Askafaito nikakĩ Jesús yoini: “Ë mia pãraima na fakishi takara fene keofamano, ‘Ë Jesús õimismara, mã ea fai tres fakĩ,” fani.

³⁵ Askafaito nikakĩ anã Pedro kemani: “Maa. Mia retefiaifono ã mefe nai. Ë õimismara ã mia faima,” fani. Pedro askafaito nikakakĩ keyokõichi aõxõ tãpimisfãfe askafakĩ fetsanifo.

*Getsemani anoxõ Jesús Apa Nios kĩfini
(Mr. 14.32-42; Lc. 22.39-46)*

³⁶ Nãskata Jesús kani aõxõ tãpimisfo fe Getsemani ano. Nãnoxõ ato yoini: “Nono tsaokãfe onĩ chaimashta kaxõ ã Epa Nios kĩfityotanõ,” ato fani.

³⁷ Akka Pedro iyonĩ, Zebedeo fake rafe yafi. Nãskaxõ áfe yora meeni shinãmitsakõiyana fekaxteaito.

³⁸ Anoxõ ato yoini: “Ëfe yõshi shinãmitsai napaiyaito ã meikai. Nono nẽtekãfe oxakakima mãri efeta õisharaxikakĩ,” ato fani.

³⁹ Ato askafata Jesús ares fisti ori chaimashta kani. Nãnoax maikiri fepepakekafata áfe fishpi mai tiisani. Nãskaxõ Apa kĩfini iskafakĩ: “Epa, na ã omiskõiai ekeki nokoyamafe. Akka nã ã apaiyai keskafakima. Nã mã ea amapaiyai keskafafe,” fani.

⁴⁰ Nãskata anã anoris oni aõxõ tãpimisfo ano. Oxõ ato õia oxafõ inifo. Nãskaxõ Pedro yoini: “¿Mã efeta pishta oxa tenetiromamẽ?” ato fani.

⁴¹ Nãskafata anã yoini: “Moikaxõ Epa Nios kĩfikãfe Satanás chakata mato chakafamapaiyai keskara axikakima. Chanĩma, nã Epa Niospa mato amapaiyai keskara mãto shinã mēraxõ mã apaifikĩ mã atiroma. Akka mãto yora pachikõikĩ,” ato fani.

⁴² Ato askafata anã kani Apa Nios kĩfikai iskafakĩ: “Epa, ea mã omiskõimayamakĩ ea mã omiskõimatiroma. Akka nã mã ea amapaiyai keskafafe,” fani.

⁴³ Nãskata anã oxõ ato fichitoshini aõxõ tãpimisfo oxafono, oxa paemei fetsoafono.

⁴⁴ Nãnoa ato õifaini kaxõ anã Apa Nios kĩfini, afia yoitana keskafakĩ.

⁴⁵ Nãskata Jesús anã oni aõxõ tãpimisfo ano. Mã oxõ ato yoini: “¿Aimã oxamẽ tenekõiyana? Akka iskaratĩ a ea ato achimaniyoai mã chaima oi kiki. Yora chakafãfe ea achifenõfo ato efei kiki.

⁴⁶ Fininĩfofãkãfe nõ kanõ. Mã chaima oi kiki a ea ato achimaniyoai,” Jesús ato fani.

*Jesús achinifo
(Mr. 14.43-50; Lc. 22.47-53; Jn. 18.2-11)*

⁴⁷ Jesús ato yoiaino Judas nokoni, nã Judaspa Jesúsxõ tãpifikatsaxakĩ, yorafã rasifo fe oni. Nã yorafa kenofoya ifi xatefoya fenifo, a ato Nios kĩfixomisfãfe áto xanĩfofo feta judeofãfe áto xanĩfofãfe ato nĩchiafono.

⁴⁸ Judaspa nã ato efeaito ato yoiyoni iskafakĩ: “A ã kokoki tsoo akaito õikĩ achirisafaxikakĩ,” ato fani.

⁴⁹ Mã Jesús ano nokoxõ Judaspa iskafakĩ yoini: “Maestro, ¿mĩmẽ?” fatishoni. Nãskaxõ kokotoshini.

⁵⁰ Askafaito õikĩ Jesús kemani: “Efe yora, nã mã apaiyai keska farisafafe,” fani.

Askafaito õikakĩ nã Judas fe foafãfe Jesús achinifo.

⁵¹ Akka Jesús achiaifãfe õikĩ a aõxõ tãpimis fẽtsa áfe keno chainipa tsekainĩfofã a ato Nios kĩfixomisfãfe áto xanĩfãfe ina paxteni.

⁵² Askaito õikĩ Jesús yoini: “Mĩ keno fafe. Akka nõ kenopa retenãino kenopari noko retetirofo.

⁵³ ¿Mĩ tãpiamamẽ Epa Nios ã yoiaito iskaratĩ áfe ájirifo ichapakõĩ ea nĩchixotiro ea kexei fenõfo?” fani.

⁵⁴ “Ē iskaratīa ājiri kenano ea kexeaifono ē naima. Akka nā Niospa meka yoikī kirika kenekī yoinifo eskai ē naikai,” Jesús ato fani.

⁵⁵ Askafifono ōikī Jesús yorafo yōkani: “¿Afeskai kenofoya ifixatefoya mā oamē ea achiyoi oa ē yometso keskarakē? Pena tii ē mato fe itiani Nios kīfīti pexefā mēraxō ē mato tāpimani, akka māka ea achipaimisma.

⁵⁶ Akka nā eōnoa yoikī kenenifo keskakā mā ea achi,” ixō Jesús ato yoini.
Ato askafaino aōxō tāpimisfo Jesús ōifaikani. Ichoi fetseenifo a makinoax.

Xanīfo finakōiafo ano Jesús iyonifo

(Mr. 14.53-65; Lc. 22.54-55, 63-71; Jn. 18.12-14, 19-24)

⁵⁷ Mā Jesús achikaxō a ato Nios kīfixomisfāfe āto xanīfo Caifās āfe pexe ano iyonifo. A xanīfofo fe a Moisés yoikī kirika keneni keskara ato tāpimamisfo fe a judeo anifofo fe nā tsaofa ano Jesús iyonifo.

⁵⁸ Pedro chai ixō ōini faki Jesús iyoi fokanimākai. Nāskaxō ato chīfāfoni. Nāskata nā ato Nios kīfixomisfāfe āto xanīfāfe pexe emāiti ano Pedro nokoni. Mā nokoax nāno tsaoni nā pexefā kexemisfo fe anoxō Jesús afeska fakanimākai ōixiki.

⁵⁹ Nā Nios kīfixomis xanīfofo feta a ato fe rafeafāfe Jesús noikaspakakī, “¿Afaa nō fatiromē Jesús afaa chakakōi faamakī nō retexiki?” ixō shinānifo.

⁶⁰ Akka Jesús afaa chakafayamafiano, yora ichapafāfe āa chakafakakī mekafanifo parakī. Akka aōnoa afaa chaka nikanifoma. Nāskakē feronāfake raferi mekafai fekanı fenifo.

⁶¹ Nā rafeta yoinifo: “Mā nō nikaita Jesús iskaito: ‘Ē na Nios kīfīti pexefā ē pāo fatiro. Nāskata tres nia oxata ē anā pexefā fatiro,’ ikaito nō nikaita,” fanifo nā rafeta āa parakakī.

⁶² Askafifono a ato Nios kīfixomis xanīfo fininīkafāta Jesús yōkani: “¿Mī kemamitsaimamē afamē na mīōnoa meka chaka yoiāifo?” ixō yoini.

⁶³ Akka Jesús tooxinima. Nā Nios ato kīfixomis xanīfāfe yoini iskafakī: “Nā Nios nīpanakato mia ōi kiki mī yoikai chanīmakōi, noko yoife mīmākī Cristo Niospa Fake,” fani.

⁶⁴ Askafaito nikakī Jesús kemani: “Nā mī ea yoiāi keskarakīa, ēkīa Niospa Fake. Ē mato yoinō. Akka mā ea ōixii ēfe Epa ketaxamei āfe pōya kayakai aōri ē tsāokē xanīfo finakōia ēfe Epa fe. Askatari mā ea ōixii nai kōi mēranoax ē anā fotofaito,” Jesús ato fani.

⁶⁵ Ato askafaito nikakakī a Nios ato kīfixomisfāfe āto xanīfāfe āfe rapati faxteni yorafāfe tāpinōfo Jesús yoiāito nikakaspakī. Askafata yoini: “Na feronāfake āfe meka chakakōi Nios chakafakī mekafai. Mā nōakōi nō nikakī noko anā tsōa yoitromaki nō tāpinō,” ato fani.

⁶⁶ “¿Afe keskara mā shināimē?” ato faito keyokōichi kemanifo: “¡Nānōkil!” fanifo.

⁶⁷ Mā fenexkaxō āfe femānāki kemo mechoketsayanā koshaketsanifo. Atiritō fepasketanifo.

⁶⁸ Iskafakī yoiyanā: “Mīkai Cristomākī, noko yoife tsōa mia koshaketsamakī,” fanifo.

“Ē Jesús ōimisma,” Pedro ini

(Mr. 14.66-72; Lc. 22.56-62; Jn. 18.15-18, 25-27)

⁶⁹ Pedro nāno ato fe pexefā emāiti tsaofano, nāno kēro xomaya a xanīfo yonoxomis akiki kaxō yoini: “Mīri Jesús fe kafāsamis Galilea anoax,” faito,

⁷⁰ Pedro kemani, yorafāfe ōiaifono iskafakī: “Ēkai Jesús ōimisma. Ēkai afaa tāpiama tsoaraōnoa mī yoi,” fani.

⁷¹ Nāskafata pexe fepoti ano kani. Nānoa kēro xomaya fētsari fichixō fetsafo yoini: “A nari Jesús fe Nazarete anoax kafāsamis,” fani.

⁷² Askafaino anā Pedro kemani: “Maa, nā mī yoiāi keskara Niospa tāpia ē na feronāfake ōimisma,” fani.

⁷³ Nāskafaino nā anoafāfe Pedro ano fōkaxō yoinifo: “Chanīma, mīri Jesús fe rafemis mā nō mia nikai mī mekaito, nā keskara,” fanifo.

⁷⁴ Nāskafifono Pedro ato yoikī taefani iskafakī: “Ē mato paraima, Niospa ea ōi ē chanīkē Niospa ea omiskōimatro. Niospa tāpia ē mato yoikōi nā feronāfake ē ōimisma,” ixō ato yoini.
Pedro askaino takara keoinākafani.

⁷⁵ Nāskaino Pedro shināni nā Jesús yoita keskara. “Takara keoyoamano mī ato yoikī tres faxii: ‘Ē Jesús ōimismara, mī ixii,’ ixō Jesús yoita keskara Pedro shinātani. Nāskata Caifās pexefā mēranoax kāikainax oiaī finakōini.

27

Pilato ano Jesús iyonifo

(Mr. 15.1; Lc. 23.1-2; Jn. 18.28-32)

¹ Nāskata mā penaino keyokōi a ato Nios kīfixomis xanīfofo fe judeo anifofo yoinānifo: “¿Afeskaxō nō Jesús retetiromē?” ikanax yoinānifo.

² Nāskakaxō metexkere akaxō Jesús iyonifo Pilato ano. Nā Pilato āto xanīfo yora fetsa Roma anoa ini.

Judas nani

³ Judaspa Jesús ato achimaxō reteaifāfe òikī shināmitsayanā ato treinta kori exe ināni, a ato Nios kīfixomis xanīfofoya judeo anifofo.

⁴ Ato iskafayanā: “Ē chakafaa, Jesús afaa chakafayamafiamiskē. Paraxō ē ato achimana retenōfo,” ato faito kemanifo: “Nōkai aōnoa afaa shināchakaima. Mīa mī shināchakakōi,” fanifo.

⁵ Askafaifāfe nikai nā Nios kīfiti pexefā mēraxō ato nāmā kori exe saafaini kaax āari tenexemeax Judas nani.

⁶ A ato Nios kīfixomis xanīfofofāfe anā kori finifo iskayanā: “Na kori exe imi foano mā chakanaki. Nāskakē a kori fati mēra nō nanetiromaki,” ikax yoinānifo.

⁷ Nāskakanax yoinānifo: “A na kōri nō mai finō ano yora fetsafo maifaxiki. Nā neo kesho fakakī neo fimisfo anoa nā mai nō finō,” ikanax yoinānifo.

⁸ Nāskakē nā mai anekī fetsafanifo. “Imi Mai,” fanifo. Akka iskaratīari, “Imi Mai,” famisfo.

⁹ Nāskakē nā Niospa meka yoimisto Jeremias a inōpokoai yoikī kirika kenei keskakōini. Iskafakī yoikī kenei:

Kori exe treinta fixikani nā israelifāfe yoinifo keskakakī.

¹⁰ Nāskakē nā kōri kesho faxii mai fimisfo anoa nā mai finifo nā Niospa ea yoiyoni keskakakī, ixō Jeremias kenei.

Pilato xanīfāfe Jesús yōkani

(Mr. 15.2-5; Lc. 23.3-5; Jn. 18.33-38)

¹¹ Jesús iyonifo Pilato xanīfo ano. Mā iyoafono nānoxō yōkani iskafakī: “¿Mīmē judeofāfe xanīfo?” faito Jesús kemani: “Ēje, nā mī ea yoiai keskarakīa,” fani.

¹² Akka nā ato Nios kīfixomis xanīfofo feta judeo anifofofāfe, “Mī chakakōi famis,” pārakī fanifo. Askafaifono Jesús ato kemanima.

¹³ Nāskakē Pilato yōkani: “¿Mī nikaimamē mia chakafakī mekafaifāfe?” fani.

¹⁴ Askafaito nikakī, Jesúska pishta kemanima. Nāskakē xanīfo Pilato, “Kee, ¿afeskai ea kemaimamē?” ixō shināni.

Pilato ato yoini Jesús retenōfo

(Mr. 15.6-20; Lc. 23.13-25; Jn. 18.38-19.16)

¹⁵ Akka Pascua fistatīa xanīfo Pilato yora fisti karaxa mēranoa kāimapaoni. Nā yorafāfe kāimapaiyaifo ato kāimaxopaoni.

¹⁶ Akka nā karaxa mēra ika feronāfāke chakakōi ini, āfe ane Barrabás ini.

¹⁷ Nāskakē yorafo ichanāfono Pilato ato yōkani: “¿Fato mā fichipaimē ē mato kāimaxonō? ¿Barrabás iyamai Jesús nā Cristo nā Niospa nīchini ē kāimatiromē?” ato fani.

¹⁸ Akka mā Pilato tāpia ini judeo xanīfāfe shināchakaito nō anā xanīfo itiromara ixō, a ano Jesús iyoaifono.

¹⁹ Nā xanīfāfe tsaoti kamaki tsaoxō Pilato shināno, āfe āfinī āfe ina nīchini Pilato yoitanō: “Mī āfinī ea yoia ē mia yoinō iskafakī: ‘Na feronāfāke afaa chakafamismakī afeska fayamafe. Ēfe namapa aōxō chakakōi ē namakī, mia faa,’ āfe inapa fani.

²⁰ Akka nā ato Nios kīfixomisfāfe āto xanīfofo feta judeo anifofofāfe āfe yorafo ato yoinifo iskafakakī: “Jesús kāiyamanō. Akka Barrabás kāinō. Jesús ato retemanō Pilato yoikāfe,” ato fanifo.

²¹ Askafaifāfe xanīfo Pilato anā ato yōkani: “Fato mā fichipaimē ē mato kāimaxonō ea yoikāfe,” ato faito, “Barrabás kāimafe,” fanifo.

²² Anā Pilato ato yōkani: “Akka, ¿ē Jesús nā Cristo famisfo ē afeska faimē?” ato faito, keyokōichi kemanifo: “¡Ifi cruz ikaki mastamafe!” fanifo.

²³ Askafaifāfe nikakī Pilato ato yoini: “Akka, ¿naato afaa chakafamē?” ato fani.

Ato askafaito nikakakī fāsikōi yoinifo: “¡Mastafe!” fanifo.

²⁴ Akka Pilato oia tsōa nikakanima inifo. Yorafā rasi fāsikōi mekanifo. Nāskakē āfe ina faka fixotanō nīchini. Askata mechokomeni yorafāfe ferotaifi òinōfo ato iskafakī yoianā: “Ēkai afaamaki na feronāfāke ē retepanā. Mā mā apaikai akāfe. Eōnoax naima kiki. Matoōnoax nai kiki,” ato fani.

²⁵ Ato askafaito yorafāfe kemanifo: “Akka nō akikai retakī nō tenetiroma nokoōnoax nai. Nōko fakefoōnoaxri nai,” fanifo.

²⁶ Nāskakē Pilato Barrabás ato kāimaxoni. Nāskata mā Jesús ato koshamata ifi cruz ikaki mastatanōfo ato yoini.

²⁷ Askata sorarofāfe Jesús iyonifo xanīfāfe pexefā ano. Nānoax sorarofa ichanākanax Jesús kemataima niakenifo.

²⁸ Nāskakaxō āfe rapati pēkakaxō, rapati ōshi nana safemanifo, xanīfāfe tari keskara.

²⁹ Nāskatari moxa chainipafo maiti fākaxō maimanifo. Āfe mēke kaiyakai aōri ifi chati tsomamanifo. Nāskakaxō āfe ferotaifi ratokonō mai chachipakefōfā āto xanīfo feyakanakōi keskarakaxō kaxemetsamakōi fanifo, iskafakī: “Mī sharakōi. Mīfi judeofāfe āto xanīfo,” fanifo kaxefakakī.

³⁰ Nāskakata akiki kemo mechokata, afia ifi xate tsoma fīakaxō aō mapoki koshanifo.

³¹ Mā kaxemetsama fakaxō, tari ōshi fīakata, Jesús āfe rapatikōi safemakaxō iyonifo mā mastai fokakī.

Jesús ifi cruz ikaki mastanifo

(Mr. 15.21-32; Lc. 23.26-43; Jn. 19.17-27)

³² Anoax fōkakī, feronāfāke fisti fichinifo āfe ane Simón. Nā Simón Cirene anoa ini. Nāskaxō yoinifo: “Na Jesús ifi cruz ika foxōi afe,” fanifo.

³³ Nāskakata nokonifo machi āfe ane Gólgota ano. (Nā āfe ane fetsa Mapo Xao fanifo.)

³⁴ Nānoxō fimi ene moka osia Jesús ayamapainifo. Akka Jesús mā meexō ayakaspani.

³⁵ Nāskata mā Jesús mastakaxō āfe rapati fīanifo. Sorarofāfe makex tokoronō tsakaket-sakaxō nāskakaxō sakka sakka anifo kanānōnākakī. Nā kanāto Jesús tari fōani. Nāskaxō Jesús rapati fetsa fīanifo.

³⁶ Mā Jesús mastakanax nāno tsaonifo anoxō kexexikakī.

³⁷ Nāskaxō āfe mapo mánāori tafaraki kenexō mastanifo. Mā retexō kenekī iskafanifo: “Jesúsfi judeofāfe xanīfoki,” ikaxō kenenifo.

³⁸ Jesús yafi yometso rafe mastanifo, fetsa āfe pōya kayakai aōri ata, fetsari āfe pōya mishkiori anifo.

³⁹ Nā ano finōfāifāfe Ichayanā āto mapo rafe rafeanifo.

⁴⁰ Iskafakī yoinifo: “Mī yoimis ē Nios kīfiti pexefā pāofaxō ē tres nia oxata ē anā axii pexefā fakī mī imiski, akka mī ifimetiromākī mā ifimefe. Mī Niospa Fakemākī na ifi cruz ikakinoax fotopakekafāfe,” fanifo.

⁴¹ Nāskariakani akiki kaxemetsamanifo a ato Nios kīfixomisfāfe āto xanīfofo fe a Moisés yoikī kirika kenenī keskara ato tāpimamisfo a judeofāfe āto xanīfofori āa ranā yoinānākani iskanifo:

⁴² “Naato fetsafo ififtiroxakī, akka āakai ifimeima. A nafi israelifāfe ato xanīfokī, akka ifi cruz ikakinoax fotoano nō chanīmara fai.

⁴³ A naato Nios shināmis. Mēxotaima noko yoimis: ‘Epa Nios ēfe Epakōira,’ noko famis. Akka chanīmamakī Niospa noikī ifimākai nō ōinō,” ixō mekafakī chakafanifo.

⁴⁴ Nāskaxō nā yometso rafeya mastafono fētsa chakafakī mekafakī Ichani.

Jesús nani

(Mr. 15.33-41; Lc. 23.44-49; Jn. 19.28-30)

⁴⁵ Nāskata xini keya nā mai tio fakishifākōi itani. Nāskax mā xini kaino anā penani.

⁴⁶ Nāskata mā penano Jesús fāsikōi āfe mekapa kenai iskanī: “Elí, Elí, ¿lema sabactani?” Nōko mekapa iskafakī yoini: “Ēfe Nios, Ēfe Nios, ¿afeskakī mā ea potamē?” fani.

⁴⁷ Nāskaito nā ano niafāfe nikakakī iskafanifo: “Nikakapo, nā ato Niospa meka yoipaoni Elías kenai kiki,” fanifo.

⁴⁸ Nāskaito nikafaini fetsa ichoni xapo keskara fiikai. Nā xapo keskara fimi ene kachaki momoxō tafa xate kaxkexō akiki aō nētaxō ayamapaini.

⁴⁹ Askafaito ranārīto yoinifo: “Enefe. Elías nai mēranoax fotoxō ifimākai nō ōinō,” fanifo.

⁵⁰ Anā Jesús fāsikōi ea ini. Nāskax nani.

⁵¹ Mā Jesús natanaino, sama nami Nios kīfiti pexefā mēranoax naki rafekōi fax-tepakekafāni fomākīanoax. Nāskatari mai naya naya ini. Tokirinīfāfori kaxkei fetseni.

⁵² Nāskakē a maiafo anoax kini fepekemetani. Akka a Nios Ifofafo nakatsaxakakī otoinīfōfānifo.

⁵³ Nāskakata maiafo anoax fonifo. Mā Jesús otoitano, Jerusalén ano fonifo. Nānoxō yora ichapafāfe ōinifo.

⁵⁴ Nāskata soraro xanīfāfe a afeta Jesús kexeafō feta ōinifo mai naya naya ikaito afarafori afeskara ikaito. Nāskakē ratekōiyānā yoinānifo iskanā: “Chanīma, na feronāfake Niospa Fake ika,” fanifo.

⁵⁵ Kērofāferi chaimashta nikaxō ōinifo. Kēro ichapafāferi Jesús fe fopaonifo Galilea anoax ato afara axosharamisno.

⁵⁶ Nā tiixō Jesús ōinifo. María Magdalena ikaino María fetsari ikaino, nā María Jacobo feta Josē āto afa ini. Askatari kēro fetsari ini Zebedeo āfe āfi. Āfe fake rafe Santiago fe Juan ini. Keyokōichi Jesús ōinifo chaimashta nikaxō.

Jesús makex kini mēra maifanifo

(Mr. 15.42-47; Lc. 23.50-56; Jn. 19.38-42)

⁵⁷ Akka mā fakishaino feronāfake kori ichapaya fisti kani āfe ane Josē. Nā Josē Arimatea mai ano ini. Nāatori Jesús Ifofamis ini.

⁵⁸ Nā Josē xanīfo Pilato ano kaxō Jesús āfe yora yōkani maifai axiki. Nāskakē Pilato ato yoini Jesús āfe yora inānōfo.

⁵⁹ Nāskata Josē mā Jesús yora fixō, sama oxosharakōipa rakoni.

⁶⁰ Nāskaxō makex kini a tsoa maiyomisma mēra ratani. Nā makex kini fakī Josē ayoni. Nāskata nā Jesús maifaa ano makex kini tokirinīfanē fepofaini kani.

⁶¹ Akka María Magdalena fe María fetsa nāno nētekanax a Jesús maia ano tsaokaxō ōinifo.

Sorarofāfe Jesús maia ano kexenifo

⁶² Mā askaitano, judeofo āfe pena tenetitūa a ato Nios kīfixomisfāfe āto xanīfofo fe fariseofo fonifo Pilato ōifokani.

⁶³ Mā fōkaxō yoinifo iskafakakī: “Xanīfo, mā nō shināi na feronāfake chanīmisto nayoxoma yoikī iskafamis: ‘Ē naax tres nia oxata ē otōxii,’ ixō yoimis.

⁶⁴ Nāskakē mī sorarofō nichife a maia ano kexeyonōfo tres nia aōxō tāpimisfo fakishi fēkaxō āfe yora fīyamanōfo. Fiakaxō yorafo yoitirofo iskafakī: ‘Mā Jesús otoaki,’ ato fatirofoki. Akka ē otōxira ikax a chanīmiskī. Nāskakē mā otōara ikaxō ato parakī finakōitirofoki,” fanifo.

⁶⁵ Askafaiyono Pilato ato yoini: “Nakīa sorarofō. Ato iyotakāfe. Fokaxō mafa kini kexesharakāfe nā mā apaiyai keskafakī,” ato fani.

⁶⁶ Nāskakanax fonifo. Mā fōkaxō itipinī fanifo nā mafa kini. Nāskata nā aō fepoa tokirinīfā sichopa marakka fanifo. Nāskakaxō ano sorarofō nīchitakani fenifo anoxō kexesharanōfo.

28

Jesús otoni

(Mr. 16.1-8; Lc. 24.1-12; Jn. 20.1-10)

¹ Judeofāfe āto pena teneti safaro mā finōano, nāskata nomīkonō fakishparikōi fonifo a Jesús maia ano. María Magdalenanō María fetsanō fonifo a Jesús maia ano ōifokani.

² Nāskata samamakōi fāsikōi mai naya naya ini, nōko Ifo Niospa āfe ājiri nai mēraxō fotomanaino. Mā fotota a Jesús maia ano kaxō, a aō fēpoita tokirinīfā fepeta a kamaki tsaoni.

³ Nā nōko Ifo Niospa āfe ājiri fafekōimi, nā kana peekai keskara. Āfe rapati oxofinakōi ini.

⁴ Askaito ōikani sorarofō choayanā ratekōinifo. Nāskakanax oa naa keskara nāmā pakepofānifo.

⁵ Akka nā nōko Ifo Niospa āfe ājirinī nā kēro rafe yoini: “Rateyamakāfe. Mē tāpiakī mā Jesús fenaiyoaki a mastaitafo,” ato fani.

⁶ “Nonomaki, mā otoaki a mato yoimis keskai. Ōifekapo, a rātaitafo ano.

⁷ Koshikōi fōkaxō aōxō tāpimisfo yoirisafatakāfe iskafakī: ‘Mā otoaki. Galilea ano kai kiki mā kayoamano. Nānoa mā ōikaikai ato yoitakāfe. Mē mato yoikai shināmakiyamakāfe,’ ato fani.

⁸ Ato askafaito nikafaikani nā kēro rafe koshikōi fonifo nā Jesús maita anoax. Ratefīyanā āto shinā mēra inimakōinifo aōxō tāpimisfo chanifaifokani ichonifo.

⁹ Ichoaifono Jesús atoki nokorisatani nā kēro rafeki. Nāskaxō, “Mē oi,” ato fani. Ato askafaino nā kēro rafe Jesūsiki fōkaxō akiki inimakakī ratokonō mai chachipakefōfā āfe fitax ano achinifo. “Mī sharakōi,” fanifo.

¹⁰ Nāskaxō ato yoini: “Rateyamakāfe. Fokaxō ēfe extofo ē yoimis keska fakī ea ato yoixotakāfe Galilea ano fotanōfo. Nānoa ea fichifokani kiki,” ixō ato yoini.

Sorarofāfe ato yoinifo

¹¹ Mā nā kēro rafe foaifono, nā Jesús maia ano kexekanax soraro ranāri fonifo pexe rasi ano. Mā fōkaxō a ato Nios kīfixomis āto xanīfofo yoinifo nā ōiafo keskara.

¹² Nā xanīfo ano fonifo. Nā anifofo fe mekai fokani, ato fe yoināsharaxikaki. Nāskakaxō sorarofō kori ichapakōi inānifo.

¹³ Ato iskafanifo: “Ato iskafakakī yoitakāfe: ‘Nō fakishchāi oxano Jesús āfe inafō fēkaxō āfe yora yometsoanafo,’ ato fatafakāfe.

¹⁴ Mā ato askafaito xanīfāfe nikaxō mato afara faito, nō yoisharanō mato afeska fanōfoma,” ato fanifo.

¹⁵ Nāskakaxō sorarofāfe mā kori fikaxō, mā fōkaxō nā ato yoiāfo keskafakī ato yoinifo. Nāskakē nā maitio anoxō nikaketsanifo. Iskaratiāri a keskara chanīmara famisfo judeofāfe.

*Jesús aōxō tāpimisfo yoini aōxō keyokōi yoifofāsafatanōfo
(Mr. 16.14-18; Lc. 24.36-49; Jn. 20.19-23)*

¹⁶ Nāskakanax Jesús aōxō tāpimisfo once fonifo Galilea ano, nā Jesús ato yoiyomis keskai fonifo māchifā ari.

¹⁷ Nāskakata Jesús ōikakī, “Aicho, mī nōko Ifo Jesús nō mia noikōi,” fanifo. Akka Jesús otoano ranārīto chanīmara fanifoma.

¹⁸ Nāskaifono Jesús atoki kaxō ato yoini: “Ēfe Epa Niospa ea yoiā nai mēranoafoya nono mai anoafori ē ato yoinō.

¹⁹ Akka nā maitio ano yorafoki fotakāfe ato yoixikakī ea Ifofasharanōfo. Nāskaxō ēfe Epa aneōxō ato maotisafapatakāfe. Ēfe aneōxori ato askafatakāfe, āfe Yōshi Sharaōxori ato askafatakāfe.

²⁰ Nāskaxō ato yoisharakāfe nikasharakōinōfo nā ē mato yoiā keskara. Akka ē mato fe mēxotaima ipanakakī,” Jesús ato fani.

Marcos Jesúsnoa Yoikĩ Keneni

Juan Maotista tsõa istomaxõ ato yoini
(Mt. 3.1-12; Lc. 3.1-9, 15-17; Jn. 1.19-28)

¹ Ë mato meka shara yoinõ Jesucristoõnoa. Nã Jesucristo Niospa Fakekõi.
² Afetiama nã Isaiás Niospa shinãmanaino Jesucristoõnoa yoikĩ kirika keneni iskafakĩ:
Mĩ nai mēranoax nãmã fotoyoamano nã ěfe meka yoimis ě atoki rekē nĩchixii mĩõnoa ato yoinõ, itipinĩsharanõfo chũpo mia nikasharaxikani kiki,
ixõ Epa Niospa ěfe Fakeõnoa yoinino Isaiás keneni.

³ Askatari anã keneni iskafakĩ:
Tsõa istoma anoxõ yorafo yoixii akiki feaifono iskafakĩ ato yoixii nã ěfe meka yoimisto ato yoixii iskafakĩ: “Itipinĩsharakãfe. Mã chaima nõko Ifo oi kiki. Mãto chaka xatekãfe ishaxikãki,” ixõ ato yoixii,
ixõ Juanoa yoikĩ Isaiás kirika keneni.

⁴ Nãnorikõi Juan ato yoini tsõa istomaxõ yorafo ato maotisafayanã. Ato iskafakĩ yoiyanã: “Anã Nios shinãkãfe mato chaka xateyanã ě mato maotisafanõ Epa Niospa mato chaka mato soaxonõ,” ixõ Juan ato yoini.

⁵ Nãskakē keyokõi Judea anoax feaifono, Jerusalén anoaxri fenifo, ato yoiaito nikai fekani. Nãnoxõ a afara chakafamisfo yoiaifono, Juan ato maotisafapani faka Jordán anoxõ.

⁶ Akka Juan ěfe rapati kamĩcho fichi kishi faxõ safepaoni. Āfe sitorari fichi koiro safepaoni. Nãskaxõ tseo pipaoni, fonari apaoni.

⁷ Nãskaxõ Juan ato mēxotaima yoipaoni: “Nã ea keskarama mã chaima oi kiki, nã sharafinãkõia. Aato afama mĩshti fatiro, ě atiroma keskara. Akka ě afaama,” ixõ ato yoipaoni Jesúsnoa yoikĩ.

⁸ “Akka ě mato fãka mēra ikimapakea maotisafakĩ. Akka nã rama oaito ěfe Yõshi Shara mato mēra naneyoi,” ixõ Juan ato yoini.

Juan Jesús maotisafani faka Jordán anoxõ
(Mt. 3.13-17; Lc. 3.21-22)

⁹ Nãskano Jesús kani Nazarete anoax, Galilea mai ano. Nãnoxõ faka Jordán anoxõ Juan ato maotisafani.

¹⁰ Nãskafaino Jesús fakanakinoax fininãkafã õia nai fepekemeaito õini. Akiki Niospa Yõshi Shara fotoiyoi oa rifi keskara oni.

¹¹ Nãskaino nai mēranoax mekaito nikani iskafakĩ yoiaito: “Mĩ ěfe Fakekõi, ě mia noikõi. Ë mikiki inimasharakõi,” ixõ yoiaito nikani.

Satanás chakata Jesús afara chakafamapaini
(Mt. 4.1-11; Lc. 4.1-13)

¹² Nãskata Niospa Yõshi Sharapa Jesús iyoni tsõa istoma ano.

¹³ Nãri cuarenta nia ini, yoinãfo mēra. Nãrixõ Satanás afara chakafamapaiyaito ěfe ãjirifãfe kexenifo.

Galilea anoxõ Jesús ato yoikĩ taefani
(Mt. 4.12-17; Lc. 4.14-15)

¹⁴ Akka mã Juan karaxa mēra ikimaitafono Jesús kani Galilea ano Niospa meka shara yorafo yoikai.

¹⁵ Ato yoikĩ iskafani: “Nõko Ifo Nios mã chaima matoki oi kiki, xanĩfofinakõi a ixii. Mãto chaka xatekãfe anã Nios nikakõisharaxikakĩ. Āfe meka sharari nikakõikãfe chanĩmara fayanã.”

Jesús cuatro feronãfake keneni tarafanãfãfã foe fimisfono ěfe inakõi inõfo
(Mt. 4.18-22; Lc. 5.1-11)

¹⁶ Ato askafakĩ yoita Jesús Galilea ĩa kesemē kani. Kakĩ fichini Simón yafi onefetsa Andrés. Nã rafeta tarafanã fimisfo inifo, ato tarafanãfã faka naki poteaifãfe.

¹⁷ Jesús ato yoini iskafakĩ: “Efe fokãfe. Mãfi tarafanãfãfã fimiskĩ. Mã foe ichapa rasi tarafanãfãfã fia keskari fakĩ iskaratiari mã ekeki yora ichapa efexii ě ato Ifo inõ,” ixõ Jesús ato yoini.

¹⁸ Ato askafaino tarafanãfã fafaikani afe fonifo.

¹⁹ Anã orishta fãi katapaikĩ Jesús õia Santiago onefetsa Juan fe nia ini. Nã rafeta ato apa feta kanõa nakixõ tarafanãfã itipinĩ fanifo, kishifakãki.

²⁰ Nā raferi Jesús ato kenaino nā rafeta āto apa Zebedeo yafi āfe inafoya ato nīchifainifo. Āto kanōari ōifainifo Jesús fe fokākī.

*Nā feronāfake niafaka nanea ini
(Lc. 4.31-37)*

²¹ Jesús aōxō tāpimisfo fe kaax Capernaúm ano nokoni. Pena tenetitīa nā ichanāti pexe mēra Jesús ikikaixō ato yoikī taefani.

²² Ato yoiaito nikakī yorafā rasichi Jesús ōiketsanifo. “¡Kee! Nikakapo. Nato tāpikī finakōia, a Moisés yoikī kirika kenenī keskara ato tāpimamisfo keskarama, meka sharakōi nato yoi,” fanifo.

²³ Judeofāfe ichanāti pexe mēraxō yora mēra niafaka yōshi chaka nanexō Jesús fāsikōi mekafani.

²⁴ Askafakī yoini: “¿Afeskakī mī noko fekaxtefaiyoamē, Jesús Nazarete anoato? ¿Mī noko a omiskōipakenakafo mēra mī noko potaiyoamē? Ē mia ōimisnō, mī sharakōinō Niospa mia nīchiano,” fani.

²⁵ Jesús niafaka yōshi chaka iskafakī yoini: “Askayamafe. Na feronāfake makinoax tsekekaitāfe,” faino,

²⁶ niafaka yōshi chakata feronāfake choamata, fāsikōi mekainākfata a makinoax tsekekaini.

²⁷ Askaito ōikani, yora rasi ratei fetseyanā āa ranā yoināi fetsenifo iskakani: “¿Tsoamē na? Na tāpisharakōixō ato yoiai nā xanīfāfe tāpisharakōixō ato yoiai keskara. Nā niafaka yōshi chakafāferi nikakani ato yoiaito,” ikanax yoinānifo.

²⁸ Nāskakē keyokōichi nikaketsanifo Galilea mai anoxō nā Jesús aka keskara.

*Jesús Simón Pedro rayos sharafani
(Mt. 8.14-15; Lc. 4.38-39)*

²⁹ Nā ichanāti pexe mēranoax Jesús tsekekaini. Santiagonō, Juannō fonifo, Simón feta Andrés āfe pexe ano.

³⁰ Akka nāno Simón āfe rayos yōxafo yonai raka ini. Nāno rakano Jesús yoinifo.

³¹ Jesús akiki kaxō āfe mīfi fininīfofanaino a yonai koshikōi sharatani. Mā sharaxō pīchani ato pimaxii.

*A isinī ikaifo Jesús ato sharafani
(Mt. 8.16-17; Lc. 4.40-41)*

³² Mā xini kaino a isinī ikaifoya a niafaka chaka naneafo Jesúski efenifo.

³³ Nāskakē nānoafo keyokōi yorafo ichanānifo nā pexe fepoti anoax.

³⁴ Jesús ato sharafani yora ichapa pae fetsa fetsatapafāfe ikaifono. Niafaka chakafori ato mēra naneano ato makinoa pōtani. Akka Jesús niafakafo mekamanima māmāi tāpiafāfe Jesúsmaī Niospa Fakekē.

*Jesús ichanāti pexe mēraxō Apa Niospa mekasharaōnoa ato yoini
(Lc. 4.42-44)*

³⁵ Mā chaima penaino, Jesús fininākfāfe pexe rasi mēranoax tsekekaini tsōa istomaxō Apa Nios kīfikai.

³⁶ Mā Jesús ato makinoax penaino kaano Simón āfe rafeafo fe kani Jesús fenaikai.

³⁷ Mā fichikaxō yoinifo iskafakakī: “Keyokōichi mia fenakani,” fanifo.

³⁸ Askafaiāfe nikakī Jesús ato kemani iskafakī: “Nō chaima fetsa ano kanō fokāfe, anoxori nō ato Niospa meka tāpimanō. Nāskakē ē oa,” ato fani.

³⁹ Nāskakē Jesús kafāsapaoni nā Galilea pexefo tii ano Niospa meka shara ato yoifofāsafai ichanāti pexe mēraxō. Fanīma mīshtixō niafaka yōshi chakafo ato makinoa ato potafofāsafai.

*Jesús yora rashkishiai sharafani
(Mt. 8.1-4; Lc. 5.12-16)*

⁴⁰ Feronāfake fetsa isinī iki rashkishi fetseax Jesúski oni. Akiki oxō ratokonō mai chachipakefofā yoini iskafakī: “Ea mīa sharafapaikī, ea mīa sharafatiro,” fani.

⁴¹ Askafaito nikakī Jesús shinākōini, omiskōiaito. Nāskaxō āfe mēkemā ramāyanā yoini iskafakī: “Ē mia sharafanō. Iskaratīa mī sharaikai,” faino,

⁴² a rashkishi fetseai koshikōi sharatani. Nāskax sharakōi ini.

⁴³⁻⁴⁴ Mā sharano Jesús nīchini iskafakī yoianā: “Mī tsoa yoiki. Akka nā ato Nios kīfixomis ispatāfe. Nāskaxō ovejanā fake foxō ināfe mia retexonō Moisés yoini keskafakī. Nāskaxō keyokōichi tāpinōfo a mī isinī imis mā mī sharano,” ixō Jesús yoini.

⁴⁵ Jesús askafakī yoifiano, akka nā feronāfake mā kaxō ato yoifofāsafani. “Ōikapo, mā Jesús ea sharafaa,” ixō ato yoifofāsafani. Nāskakē Jesús anā pexe rasi ano ikixō ato yoitiroma ini. Xafakīa nini, tsōa istoma ano. Nāskafaiino pexe rasi anoafō akiki fenifo ōifekani.

2

*Jesús yora finimisma sharafani**(Mt. 9.1-8; Lc. 5.17-26)*

¹ Mā samaraka pishtata Capernaúm ano anā oni Jesús. Mā nokoano, “Mā Jesús anā oa áfe pexe ano,” fanifo.

² Nāskakata Jesús fe anā ichanānifo pexe mēraxō. Jesús nikakani. Pexe ano fospikōikanax áfe emāiti ninifo áfe fepoti ano ikitiroxakākima. Nānoxō Jesús ato tāpimani Niospa meka.

³ Mā ato tāpimanaino feronāfaka cuatro nokotoshinifo. Yora finimisma áfe xefapa efenifo.

⁴ Mā xītiafono ikitirofoma, Jesús ano nā yora finimisma efepaiyaifono ikitirofoma ini. A pexe sapa mánāoxori paitinī māpekaxō fotomanifo áfe xefapa rataxaxō. Risfi rafeta nexati fākaxō a mánāoxori kini fakaxō, nā finimisma fotomanifo, áfe xefapa.

⁵ Jesús ato òikī tāpikōia ini. “Naato nōko yama noko sharafaxotiroki,” faifono Jesús tāpini. Nāskafaifono a finimisma Jesús yoini iskafakī: “Efe yorashta, mī chaka mē mia soaxona,” Jesús fani.

⁶ A Moisés yoiķī kirika keneni keskara ato tāpimamisfāfe ranārīto ano tsoaxō nikakī shinānifo.

⁷ Nānoxō shinānifo: “¿Afeskai Jesús mekaimē isakai? Tsōa noko chaka soaxotiroma. Nios fisticchi noko axotiro. ¿Jesús āa shināimē Nios?” ixō shinānifo.

⁸ Askafaifāfe Jesús ato tāpini āto shinā mēraxō shināifāfe. Jesús ato yoini: “¿Afeskai mā iskara shināimē?” ato fani.

⁹⁻¹⁰ “Akka ea Niospa shināmani. Nāskakē ē mato òimanō Niosxō na feronāfaka ē sharafatiro. Tsōa iskara atiroma, Niospa shināmanai fisticchi atiro. Nāskakē ē na feronāfaka sharafa mā tāpinō Niosxō ēri áfe chaka soaxotiro,” ixō ato yoini. Nāskafata anā yoini feronāfaka finimisma,

¹¹ “Fininākafāfe. Mī xefa fifaini, mī pexe ano katāfe,” fani.

¹² Askafaino fininākafani. Fininākafaxō áfe xefa fifaini, áfe pexe ano kaito keyokōichi òinifo. Nāskakaxō, “¡Aicho, Nios sharakōi! Na keskara nō òimisma, sharakōi,” fanifo.

*Jesús Leví ifini aōxō tāpimis inō**(Mt. 9.9-13; Lc. 5.27-32)*

¹³ Nāskax Jesús anā kani ĩa efapa ano. Anoxō yora ichapa rasichi òinifo. Nānoax Jesúsķi ichanānifo. Nānoxō ato tāpimani.

¹⁴ Nānoax kakī Jesús finōfāikī Levī* òini, a yonoai áfe tsaoti mīsa ano tsoaxō, ato keyokōi kori fīaito. Nā Levī āto kori fīamis ini áfe xanīfo minixiki Roma anoa. Levī Alfeo fake ini. Jesús òixō yoini: “Leví, efe kafe ē mia tāpimanō,” fani. Askafaino Levī afe kani.

¹⁵ Nāskax Jesús aōxō tāpimisfo fe kani Levī ato kenano a anoxō pii fokani. Ato kori fīamisfo fe yora chakafori a Moisés keneni nikamisfomafāferi Jesús feta pinifo. Yora ichapa Jesús fe foafofāinifo. Nāskakē yora ichapakōichi Levī pexe mēraxō pinifo.

¹⁶ Nāskakē a Moisés yoiķī kirika keneni keskara ato tāpimamisfo nāfori fariseofo inifo. Afāfe Jesús òinifo yora chakafo feta piaito. Nāskaxō a Jesúsxō tāpimisfo yōkanifo: “¿Afeskakī māto maestro na ato kori fīxomisfo feta piimē? Yora chakafo fetari pii,” ato faifono,

¹⁷ Jesús nikaxō ato yoini: “A sharafāfe notoro fenakanima, a isinī ikaifāfemari notoro fenakanima. Akka nā isinī ikaifāfe notoro fenakani. Nāskakēri ē ato yora sharafos kenatapa ikerani ē oama. Nā yora chakafo ē ato tāpimaniyoi ē oanō,” ato fani.

*Nā foni tenemisfofāfe Jesús yōkanifo**(Mt. 9.14-17; Lc. 5.33-39)*

¹⁸ Juan Maotista áfe inafāfe āto feyafati ipaoni fisti rasi pikakī pipaonifoma foni tenemisfo ipaonifo Nios shara shinākakī. Nā fariseofo nāskarari ipaoni āto feyafati. Nāskakē yora fetsafāfe Jesús yōkanifo tāpipaikaikī, “Jesús, ¿afeskakī mī inafāfe mēxotaima piimē? Juan áfe inafāfe foni tenekaninō Nios shināsharakakī. Askatari fariseofāferi foni tenekaninō. Akka, ¿afeskai mīōxō tāpimisfo askaramamē?” fanifo.

¹⁹ Askafaifāfe anā Jesús ato yoini: “Feronāfaka āfiyaino, yorafo ano fisti ichanākaxō afara fetsa fetsatapafo afeta pitirofo inimayanā, aicho fakakī akiki inimakakī. Akka feronāfāfe āfi fikī foni tenetiroma. Askafixō inimakī pitiro.

²⁰ Akka mā fene rēteafono áfe yorafāfe shinākakī foni tenetiromo,” Jesús ato fani. (“Nāskakē ē nono ikano inimakī eōxō tāpimisfāfe efeta pimisfo. Akka mē naano ea shinākakī tsōa pitiroma eō noikakī,” ato fani.)

²¹ Askata anā fetsa ato yoini: “Tsōa sama fenaya sama xini kishi fatiroma. Nō askafaino sama fena samama chakanatiro. Nāskatari sama fenafe sama xini isharatiroma. Nāskakēri

* 2:14 Levī ane rafeya ipaoni. Áfe ane fetsa Mateo.

nā ē mato yoiāi keskara mā nikakōixō a mā ipaoni keskara anā mā itiroma māmāi ea nikakōiax. A mā ipaoni keskara shināmakita nāskax mato yora fena keskara shara itiro.

²² Nāskarifikāi tsōa māmā fata koiro pisha xini mēra nanetiroma nā māmānō faraxakaino toxamāiyanō. Nāskakē nā māmā fata fe koiro pisha chakanatirofo. Akka nā mato xinifāfe mato yoimisfo keskara fe nā ē mato yoiāi keskara osinātiroma. Nā ē mato yoiāi keskara Niospa meka sharakōi. Akka a mato xinifāfe mato yoimisfo anori shināx mā isharatiroma. Niospa mekaya meka chaka osinātiroma. Nāskakē mā nikapaifi mā shināsharatiroma. Nāskarifikāi tsōa māmā fata koiro pisha xini mēra nanetiroma nā māmānō faraxakaino toxamāiyanō. Nāskakē nā māmā fata fe koiro pisha chakanatirofo. Akka nā mato xinifāfe mato yoimisfo keskara fe nā ē mato yoiāi keskara osinātiroma. Nā ē mato yoiāi keskara Niospa meka sharakōi. Akka a mato xinifāfe mato yoimisfo anori shināx mā isharatiroma. Niospa mekaya meka chaka osinātiroma. Nāskakē mā nikapaifi mā shināsharatiroma.”

Nā judeofāfe pena tenetiā Jesúsxō tāpimisfāfe aros keskara metesfenifo
(Mt. 12.1-8; Lc. 6.1-5)

²³ Jesús aōxō tāpimisfo fe kani a judeofāfe tenetiā. Tarepa kakī āfe inafāfe aros keskara metesfaxō fikaxō pinifo.

²⁴ Nāskafāifāfe fariseofāfe ōikakī ato iskafanifo: “Ōipo. ¿Afeskakī mī inafāfe na aros keskara metesfekanimē na pena tenetiā tsōa yonotiroma ixō Moisés noko yoifinino?” fariseofāfe fanifo.

²⁵ Ato askafafono Jesús ato kemani: “Akka, ¿a nōko xini Davidōnoa kirika kenenifo keskara mā ōimismamē? ¿David afaa afeska fanimē āfe inafō feta fonāikōikī?”

²⁶ Nāskakē David Nios kīfiti pexefā mēra ikikaini. Akka nā Nios kīfiti pexefā anoax Abiatar nā ato Nios kīfixomisfāfe āto xanifo ini. Akka nā Nios kīfiti pexefā mēraano David pāa pini a pāa tsōa pishta pifiatiromano. Akka nā ato Nios kīfixomisfāfe arese a pāa pimisfo ini. Nāskafekē nā pāa David pini a afe foafori ato pikini.

²⁷ “A Niospa taefakī feronāfake onifani. Askata teneni. Nā feronāfake Niospa tenemani, pena tenetiā yonoyamanō.

²⁸ Nāskakē Niosxō ē yoitiro na pena tenetiā ēmāi xanīfokōixō afeskaimākai ē yoitiro. Nāskakē ē mato yoi ēfe inafāfe afaa chakafakanima aros keskara meteskakī pena tenetiā fonāiki finakōikaxō,” ato Jesús fani.

3

Feronāfake mēke yōshiya Jesús sharafani
(Mt. 12.9-14; Lc. 6.6-11)

¹ Jesús anā ikikaini judeofāfe āto ichanāti pexe mēra. Nāno feronāfake mēke yōshiya ini.

² Aas ōinifo, judeofāferi. “Jesús sharafaimākai nō ōinō na pena tenetiā,” fanifo yōaxikakī.

³ Askata Jesús yoini nā feronāfake mēke yōshiya: “Fininākfata ano nife nakirafe,” fani.

⁴ Askata yorafo yōkani: “¿Afaa nō afeska fatiromē pena tenetiā? ¿Shara nō atiromē? ¿Chaka nō atiroraka? ¿Nō iftiromē? ¿Nō retetiroraka?” ixō ato yōkani.

Ato askafaito tsōa kemanima.

⁵ Ato feratexō Jesús ato ōini, yora fetsafoōnoax shināyamaifāfe. Askatari Jesús shināmitsani. Shināmitsaxō yoikī iskafani feronāfake: “Mēshafe,” fani. Askata nikax mēshatani. Mēshatanaino sharatani.

⁶ Askaito ōikani fariseofo ōitifishkinifo. Tsekefainifo ichanāti pexe anoax. Taefakakī shinānifo: “¿Afeskakaxō na Jesús nō retetiomē?” fanifo. Herodes āfe inafō feta shinānifo.

Yora ichapa ini iamāfā ano

⁷ Askata Jesús anā kani aōxō tāpimisfo fe iamāfā kesemē ano. Nāskakē Galilea anoafō yora ichapa rasi fonifo. Jesús chīfafainifo.

⁸ Mā yorafāfe nikakanax fonifo, nā Jesús ato sharafaino nikafaikani fonifo Jesús ari. Judea anoafori, Tiro yafi Sidón anoafori fonifo. Jesús ano nokonifo.

⁹ “Kayakōi yorafo fei kiki,” ato fani aōxō tāpimisfo Jesús. “Ea shoi aki fetirofoki, ea kanōa fekokāfe ē nanenō,” ato fani.

¹⁰ Jesús ichapa yora rasi sharafaino, nāskakē na yora isinī ikani akiki fenifo Jesús shināfāikani ramāpaikani ato sharafanō.

¹¹ Nāskaino a niafaka chakafoyafāfe Jesús ōinifo. Nāskakē Jesús fichikanax feopakefofānifo Jesús nāmā. “Jesús mī Niospa Fakekōiki,” niafaka naneafāfe fāsikōi fanifo.

¹² Askata Jesús ato yoini: “Tsoa yoiyamakāfe ē Niospa Fakeki,” ato fani.

Jesús aōxō tāpimisfo doce feronāfake ifini
(Mt. 10.1-4; Lc. 6.12-16)

¹³ Nāskata Jesús māchi keya māpeni. Ari kakī aōxō tāpimisfo ichapa ato kenani ato yoixiki arixō tāpinōfo. Askata Jesús ano fonifo aōxō tāpimisfo.

¹⁴⁻¹⁵ Feronāfake doce faxō ato ifini, afe rafeafono ato nīchixiki aōnoa āfe meka shara ato yoitanōfo, nāfāfe yorafo makinoa niáfaka yōshi chakafo ato potaxotanōfo. Nāskata nāfo ato aneni, “Ēfe meka yoimisfo” ato fakī.

¹⁶ Nā tii ato ifipakeni fisti rasi. Taefakī Simón ifini. Āfe ane fetsafaxoni, Pedro kenaxiki. Simón ikaino,

¹⁷ Jacobo yafi āfe onefetsa Juan kenani, āto apa Zebedeo ini. Jesús ato ane fetsa kenani Boanerges fakī. Nō askafatiro, “Yora finakōia oa nai tiri ikai keskara” fakī.

¹⁸ Askatari Andrés kenani, Felipe ikaino, Bartoloméri ikaino, Mateori ikaino, Tomásri ikaino, Jacobo fetsari ikaino, Alfeo fake. Askatari Tadeori ikaino, Simón fetsari ikaino. Na Simón nāskara ipaoni nā yora xanīfo chakafapaikī, potapaikī fetsafo feta. Mā ato makinoax ota Jesús fe rafeni.

¹⁹ Askatari Judas Iscarioteri ifini. Nā Judás Iscariote Jesús fe iyopaoni. Nāskaxō chipo chakafakī ato achimani Jesús retenōfo. Nā tii Jesús ifini aōxō tāpimiskōi inōfo.

*Yora fetsafāfe, “Jesús niáfakaōxō ato sharafaira,” fanifo
(Mt. 12.22-32; Lc. 11.14-23; 12.10)*

Nāskata māchifā ariax fotota, āfe inafō fe ikikaini pexe mēra.

²⁰ Anā yora rasi ichanāfatishoni. Askaito ōikī, yora ichapa ōikīkakī, pitirofoma inifo.

²¹ Jesús afe yorafāfe tāpinifo mā pexe mēra kaano fōkaxō Jesús anoax ifipainifo. Yoiaifāfe nikakakī ifipainifo fōkaxō Jesús anā shināsharaima faifāfe.

²² Askatari a Moisés yoikī kirika kenenī keskara ato tāpimamisfo Jerusalén anoax Jesús ano feafono ato yoini: “Na Jesús nā niáfaka chakafāfe āto xanīfoōxō nā Beelzebū āfe shara miniano aōxō āto niáfaka pōtai,” fanifo.

²³ Jesús nikakī ato kemani meka fetsafaxō: “¿Afeskax Satanás āa potametiromē? Āa itiroma.

²⁴ Nāskakēri yorafo paxkanākanax āa ranā retenāi keyotirofo. Askatari pexe rasi anoax āa ranā retenāi keyotirofo. Nāskax isharatirofoma āa ranā retenātirofoma.

²⁵ Fetsari nā nofe yorafo mīshti paxkanātirofoma. Paxkanāx keyotirofo.

²⁶ Nāskakēri Satanás āfe inafō fe paxkanātiroma. Paxkanāx keyotiro anā xanīfo itiroma.

²⁷ “Askatari feronāfake mītsisipakōi taefakī metexkere akaxoma toa āfe pexe mēra ikitiroma āfe afama mīshti fīaxikakī. Nāskarifiakī nō yora nexaxō āfe afara nō fīatiro keskafakī, nāskarifiakī ē Satanás nexaxō Niospa Yōshi Sharaōxō ē Satanás āfe ina pōtatiro.

²⁸⁻²⁹ “Chanīma ē mato yoikōi, keyokōi chaka Niospa soaxotiro. Askatari keyokōi meka chakari Niospa soaxotiro. Askafixō fētsa yoixō, ‘Jesús Niospa Yōshi Sharaōxō askara ato sharafatiroma, Satanás āfe yōshioxō ato sharafai,’ askafaito Niospa ato āfe chaka soaxotiroma, āto neepakexanō,” ato fani Jesús.

³⁰ Anori yorafāfe yoini: “Jesús yōshi chakaya,” fanifo. Nāskakē Jesús ato yoini Epa Niospa Yōshi Sharaōxō ato sharafai.

*Jesús ōifekani āfe afanō āfe extonō fenifo
(Mt. 12.46-50; Lc. 8.19-21)*

³¹ Jesús āfe afanō onefetsanō nokonifo a Jesús ano. Mā nokokanax pexe mēra ikinifoma. Xafakīa ninifo pexe emāiti. Nānoxō yora fetsa nīchinifo Jesús yoitanōfo.

³² A Jesús foaketifaya kekanax tsaoafāfe yoinifo: “Jesús, mā mī efanō mī extonō nokoafō. Mīa yōkakamekani,” fanifo.

³³ Askafāifāfe ato Jesús kemani: “Ēfe efanō, ēfe poinō, ē ato fistis shināima. Yora fetsafori ē ato shināi efe yora keskarafo. ¿Tsoamē ēfe efa, ēfe extofori? ¿Mā tāpipaimē tsoamāki ēfe efa, ēfe extofori? Ē mato yoinō,” ato fani.

³⁴ Askafaxō Jesús ōini a tsaoafo. Nāskaxō ato yoini: “Nā ea Ifoiafo, ea nikaifo efe yorafo. Nakīa ēfe extofo, ēfe efafo,” nāskafani.

³⁵ “Nā Niospa fichipaiyai mā akaino Niospa mato fichipaiyai keskarifikakī nā ēfe extofo, ēfe chikofo, ēfe efa keskara,” ato fani Jesús.

4

*Jesús ato yoini meka fetsafaxō fimi exe saamisnoa
(Mt. 13.1-9; Lc. 8.4-8)*

¹ Nāskata anā Jesús ato tāpimani ĩa kesemēxō. Nāskakē yora ichapa ichanānifo Jesús ano. Nāskaifono Jesús kanōa ĩa ketokonō rakano aō naneinīkafanax tsaoni. Akka yorafo ĩa ketokonō tsaonifo.

² Nāskaxō Jesús ato tāpimani afama mīshti meka fetsafaxō. Ato yoikī iskafani:

³“Ea nikakāfe ē mato yoinō,” Jesús ato fani. “Feronāfake fistichi fimi exe saafoni āfe nōxati mēra kēchōxō fokī.

⁴Fimi exe saafokaino ranāri fai nēxpakīa pakeaino a kachikirixori peyafāfe pini.

⁵Nāskata fimi exe ranāri makexfoki pakei fetseni mai shara anoma. Nāskakē samamakōi fimi exe foaipaini.

⁶Akka mā foaipaiyaito xinī namani, yosipanā, āfe tapokairoko mai mēra kasharakē. Foaikax, samama nani xinī tsasifaano.

⁷Akka ranāri fimi exe moxafo mēra pakeni. Nāskakē moxafo foaikī namani. Nāskakē fimi exe foaikax fimiyamax nani.

⁸Akka fimi exe ranāri mai shara ano pakeni. Nāskax foaisharax fimi ichapayakōi ini. Fetsa treinta fimiya ini. Fetsa sesenta fimiya ini. Fetsari cien fimiya ini.”

⁹Nāskaxō Jesús ato yoini: “Mā pachoyakī ea nikasharakōikāfe,” ato fani.

Meka fetsafaxō yorafo yoixō a aōxō tāpimisfo xafakīakōi ato yoini
(Mt. 13.10-17; Lc. 8.9-10)

¹⁰Mā yora ichapa rasi foaifono Jesús ares nēteni, akka nā foafāfema a aōxō tāpimisfo docefo fe nēteafāfe yōkanifo. “¿Afaa mī noko yoipaiamē meka fetsafaxō?” faifono,

¹¹⁻¹²Jesús ato kemani, “Epa Niospa a ika anoxō afe yorafo ato ikināi afe keskaramākī ē mato xafakīa yoinō. Akka fetsafo meka fetsafaxō ē ato yoiaki. Akka ōifikakī tāpikanima nikafikakīri nikasharakanima. Nios Ifofakaspakani. Nāskakē Niospari ato chaka soaxotiroma.”

Jesús meka fetsafaxō fimi exe saamisnoa ato yoini ato tāpimasharakōixiki
(Mt. 13.18-23; Lc. 8.11-15)

¹³Nāskata ato yoini: “¿Nā ē ato meka fetsafaxō yoi ai mā tāpimamē? Akka, ¿afeskakī fētsa nikatiromē?

¹⁴Nā fimi exe fanamis, nā Niospa meka yoisimis keskara.

¹⁵Akka ranāri yora fetsafo fimi exe fai nēxpakīa pakea keskarafo Niospa meka nikafikani. Akka Niospa meka mā nikafiaifono Satanás ato xītitiro peyafāfe fimi exe pitiro keskafakī.

¹⁶Fetsafo nā fimi exe tokirifo mēra pakeax foaipaiyai keskarafo. Niospa meka nikai akiki inimakōikī nikayotiro.

¹⁷Akka nā fimi exe foaikax āfe tapo mai mēra ikikēma xinī namatiro keskafakī. Nāskarifikī fētsa taefakī Niospa meka nikai inimayotiro. Akka afara chaka nokoaino anā inimatitroma anā Nios Ifofatiroma, Niospa meka anā āfe shinā mēra nanekema.

¹⁸⁻¹⁹Akka atiri fimi exe moxafo mēranoax foaikax yosititroma keskarafo. Nāskariatirofo Niospa meka shara nikasharakanaxma. Akka fētsa afarafo shinākī āfe shinā mēraxō shināchakakōitiro. Nāskaxō kori ichapakōi noikī, ‘É kori ichapayax ē inimakōitiro,’ ixō shinākī Niospa meka anā shināima. Nāskakē Niospa meka nikafikī afara fetsafo shināino afaa Niospa axotiroma.

²⁰Akka atiri fimi exe mai shara anoax foaikax fimi ichaya ini. Āfe fimi treinta ini, fetsari afe fimi sesenta ini, fetsari āfe fimi cien ini. Nāskafakīri fētsa Niospa meka nikakōikī nikasharakōitiro. Akka fētsa Niospa meka nikakōisharakī nā fimi exe treinta keskara itiro, fetsari nikasharakōikī nā fimi exe cien keskara itiro,” ixō Jesús ato yoini.

Meka fetsafaxō rāpariki Jesús aōxō tāpimisfo yoini
(Lc. 8.16-18)

²¹Nāskatari ato yoini. “Akka tsōa rāpari otaxō kafo mēra nanetiroma, askatari a ika nāmā tsāotiroma chaikairoko chaxanō. Akka nō rāpari fomākīa tsōafoano chai chaxatiro. Nāskakē ōisharakōitirofo.

²²Nāskarifikī nō afaa pishta onetiroma, nō onefiano keyokōichi tāpitirofo. Nāskarifikī a fomāyomisfo Niospa xafakīa faxii.

²³Mā pachoyakī ea nikasharakōikāfe,” ixō Jesús ato yoini.

²⁴Nāskaxō anā ato yoini. “Nikakapo, ē mato yoinō. Akka a ea nikakī finasharakōiai, Niospa tāpimasharakōi.

²⁵Akka nā tāpia nā Epa Niospa tāpimakī finasharakōi. Akka fetsa ē tāpisharakōia ifiaxō nikamiskēma, askara yora nā tāpia pishta Niospa anā fīatiro,” ixō Jesús ato yoini.

Jesús meka fetsafaxō yoini, fimi exe yositiroōnoa

²⁶⁻²⁹Nāskata Jesús anā ato yoini. “Epa Nios xanīfāfe noko ikināi iskaraki. Nā feronāfake fimi exe mai shara ano fana keskarakī. Mā fanax oxatiro fakishi, akka penata yonotiro. Nāskakē ifāfe ōiyamaino ares fimi exe yositiro. Nāskakē mai mēranoax fimi exe āfe tapo foaikax yositiro. Mā yosiax efapa itiro, nāskata chipo fimitiro. Nāskata mā fana fimi pachiano, ifāfe topitiro māmāi pachiano,” ixō Jesús ato yoini.

Mostaza exeōnoa yoikī meka fetsafaxō Jesús ato tāpimani

(Mt. 13.31-32; Lc. 13.18-19)

³⁰ Askata anā Jesús ato yoini iskafakī: “Afe keskaramāki Nios xanifāfe noko ikinā ē mato yoinō.

³¹ Nā mostaza exe yōra āfe tarepa fanatiro. Akka nā fimi exe pishtakōi fetsafo keskerama. ³² Akka nā fimi exe fanax, mā yosiāx efpakōi itiro fana fetsafo keskarama. Nāskakē mā teshpapafai fetseano peyafāfe āfe teshpafo ano naa fatiro. Nāskarifiakī taefakī ichapatoma Nios Ifofayotirofo. Akka chipo ichapafāfe Ifofakōitirofo,” ixō Jesús ato yoini.

Afama mīshikiri yoikī meka fetsafaxō Jesús ato yoipaoni

(Mt. 13.34-35)

³³ Nāskatari meka fetsafaxō Jesús ato tāpimani Niospa meka shara keyokōi tāpikanimākai.

³⁴ Akka meka fetsafaxō Jesús mēxotaima ato yoipaoni. Akka nā aōxō tāpimisfo xafakīakōi ato yoipaoni.

Jesús nefe yafi iamāfā poo iki meseniaito nishpa fani

(Mt. 8.23-27; Lc. 8.22-25)

³⁵ Mā yātapakeaino nā pena fisti Jesús aōxō tāpimisfo yoini: “Nō okiri iamāfā pokefainikanō, fokāfe,” ato fani.

³⁶ Nāskata nāno yorafo nīchifainifo, Jesús iyoifokakī. Nāskakanax kanoānāfā mēra nane-fainifo. Mā foaifono kanōanāfā fetsari fokākī yorafāfe ato chīfainifo.

³⁷ Iamāfā pokefainiaifono nāno atoki nēfefākōi nokoni. Atoki nēfefākōiaino iamāfā pooiyānā kanōanāfā faka fospikōini.

³⁸ Akka Jesús oxano kanōanāfā chipo kamaki rakax, āfe tēkesati kamaki tēkesameax. Oxakē aōxō tāpimisfāfe mōinifo iskafayanā: “¿Ifo, mī noko shināimamē mā nō āsaikai?” faifono,

³⁹ Jesús fininikāfata, “Nēfe, nishpafe,” fata, “Iamā nishpafe,” fani.

Nāskafaino nefe nishpani anā feroinima ia fe nefe.

⁴⁰ Nāskata chipo Jesús aōxō tāpimisfo yoini. “¿Afeskai mā rateimē? ¿Mā ea chanīmara fasharamamē?” ato fani.

⁴¹ Ato askafaino, akka aōxō tāpimisfo ratekōiyānā āa ranā yoinānifo iskakani: “¡Kee! ¿Na feronāfake afe keskaramē na nefe feta iamāfānē ato yoiāito nikaifo?” ikanax yoinānifo.

5

Gadara anoxō Jesús feronāfake makinoā niafaka rasi potani

(Mt. 8.28-34; Lc. 8.26-39)

¹ Nāskata okiri iamāfā pokefaikanax nokonifo, Gadara mai ano.

² Nāskata Jesús kanōanāfā makinoax ftopakekafanaino, nā feronāfake niafaka yōshi chaka nanea nāno akiki oni. Nā feronāfake nā maiafo kinifā mēranoax oni.

³ Mai kinifā mēra ipaoni. Tsōa nexatiroma ipaoni kaninānā nexafiaifono.

⁴ Akka mēxotaima kaninānā otxekere ata metexkere ata fafiaifono, kaninā tesa tesa aki fetsapaoni. Tsōakai afeska fatiroma ipaoni.

⁵ Nāskata penata kafāsata fakishchāiri kafāsapaoni, māchifā ariri māpepaoni maiafo anori kinifā mēra kapaoni. Nāskata fiisiyanā tokirinī āa tsakamepaoni.

⁶ Akka chai ixō Jesús fichiāx, akiki farekekeranax aō ferotaifi ratokonō mai chachipakefofāni.

⁷⁻⁸ Fāsikōi yoini fiisiyanā. “¡Ea afeska fayamafe, Jesús! Mī Nios Sharapa Fakekī, ē mia yoi Niospa mia ōi kiki ea omiskōimayamafe,” fani. Nāskai mekani, akka Jesús māi iskafakī yoiano: “Niafaka yōshi chakata, na feronāfake makinoax tsekekaitāfe,” māmāi faano.

⁹ Askafaito Jesús yōkani: “¿Mī afe anemē?” faito, nāato kemani: “Efe ane Legión nōmāi ichapax,” fani.

¹⁰ Nāskaxō nā niafaka Jesús yoini iskafakī: “Mai fetsa ari noko nīchiyamape,” fani.

¹¹ Akka nā chaima māchifā mēnānēxō kochifāfe pinifo.

¹² Nāskakē niafaka yōshi chakafāfe iskafanifo: “Kochifo mēra noko nīchife, kochifo mēra nō ikinō,” faifono,

¹³ kochifo mēra Jesús ato nīchini. Nāskakē niafaka yōshi chakafo feronāfake makinoax tsekekainax kochifo mēra iki fetseni. Nā niafaka chakafo dos mil ini. Nā niafakafo kochifo mēra ikiano kochifo ichoax māfāfā ariax iamāfā mēra keyopakeax āsai fetsenifo.

¹⁴ Askaito ōikani nā kochifo kexeāfo ichoi fetsenifo. Mā fokaxō a pexe rasi anoāfo ato yoinifo, a pexe rasi pasotai ikāfori ato yoinifo nā ōiafo keskara. Ato askafakī yoiāifono nikakani yōrafā rasi fenifo kochifo āsaito ōipaikani.

¹⁵ Mā nokokaxō ōiafo nā feronāfake tsaōa ini rapati shara safeax, mā shināsharai a makinoax mā niafaka yōshi chaka tsekeano. Nāskaito ōikani yōrafā rasi ratei fetsenifo.

¹⁶ Nā Jesús niafakafa kochifo mērañoa potaito òikaxò ãto kaifo yoifokani fonifo.

¹⁷ Nāskakē yorafāfe yoinifo iskafakakī: “Jesús, nonoax katāfe, nō mia òipaimakai,” fanifo.

¹⁸ Mā Jesús kanōanāfā mēra naneinākfafanaino, nā feronāfake niafakaya ikato, “Èri mefe kapai,” fani.

¹⁹ Nāskafaino, “Maa, mī efe katiroma. Mī pexe ano katāfe. Mī kaifofo fe kaxò mefe yorafo ato yoitāfe a nōko Ifāfe mia sharafa, mīo noikī mia sharafakī,” ixò Jesús yoini.

²⁰ Askafaito nikafaini nā feronāfake kani. Kaxò nā pexe rasi anoafo ato yoini, nā Decápolis anoafo nā Jesús sharafaa keskara. “Aira, nikakapo, ¿afeskax sharamē?” iki fetsenifo.

Jairo fake xotofake mā nakē Jesús otofani. Askatari kēromāri Jesús rapati mēeax sharani (Mt. 9.18-26; Lc. 8.40-56)

²¹ Askafata Jesús mā kanōanāfānē ãamāfā pokeferani oano yōrafā rasi ano ichanānifo. Akka Jesús ãamāfā ketokonò nēteni.

²² Akka nāno nā ichanāti pexe anoax xanīfo fisti akiki oni, āfe ane Jairo. Jesús fichiax a nāmā feopakekafani.

²³ Nāskaxò yoini iskafakī: “Mā ēfe fake xotofake nai kiki. Mī mēkemā ea rāmāxoniyofe, sharax ninò,” ixò yoiaino,

²⁴ Jesús afe kani, yōrafā rasiri afe fonifo. Afe fokakī shoiakī fetsanifo.

²⁵ Nā yōrafā rasi mēra kēro fisti ato fe kani, doce xinia aka ini isinī iki, imi nesemisma ini.

²⁶ Omiskòitiani sharapai notorofò mēra katiani, mā kori potakī mitotiani ini. Tsòa pishta sharafatiroma ini, askatamaroko isinī iki finakòini.

²⁷⁻²⁸ Nā kēromā Jesúsnoa yoiaifāfe nikani. Nāskakē yōrafā rasi foaifono ato acho kaxò āfe tari kexa ramākani. “È āfe tari kexa ramākax ē sharatiroraka,” ixò āfe òiti mēraxò shināni.

²⁹ Nāskaxò āfe tari kexa ramākaxò meea āfe imi koshikòi nesetani. Nāskaxò āfe yora meea mā sharakòia meeni.

³⁰ Jesús mā tāpixò āfe sharañoax nā kēro mā sharano, yōrafā rasi mēra fesoakekafā ato yòkani: “¿Tsòa ea tari ramākamē?” ato faito,

³¹ a aòxò tāpimisfāfe yoinifo iskafakakī: “¿Mī meimamē yorafāfe mia shoiakifetsakaxò mia pitsikinaifāfe? ¿Afeskakī mī noko yòkaimē tsòa ea ramāmē?” ixò fanifo.

³² Askafaitono Jesús aa kemataima òiakeni, tāpixiki tsòa ramāmākī.

³³ Nāskaino nā kēromā ratei choayanā a sharafaa mā tāpixò, akiki kaxò ratokonò mai chachipakefōfā yoini: “È mia tari kexa ramākax mē shara,” ixò yoita a isinī itianiri yoini.

³⁴ Nāskafaito Jesús yoini: “Yòxashta, mā mī shara ea chanīmara faax. Nāskakē tanaima katāfe a mī isinī imis mā mī sharakī,” fani.

³⁵ Jesús mekai xateamano nā xanīfo Jairo pexe anoax fetsafo akiki fēkaxò yoifekani fenifo. Iskafakī yoinifo: “Mā mī fake naaki anā nōko Ifo fekaxtefayamafe,” faifono,

³⁶ akka Jesús ato nikakima, iskafakī nā xanīfo Jairo yoini: “Ratekima, ea chanīmara fafe,” ixò yoini.

³⁷ Nāskaxò Jesús, “Tsoa nofe kaima kiki,” ato fani. Pedro iyota, Santiago iyota, āfe exto Juan iyota ato fani.

³⁸ Nāskata mā Jairo pexe ano nokokaxò òiafo yorafo oiakani fiisinifo nā fake xotofake manokani mā naano.

³⁹ Nāskata pexe mēra ikikaixò ato yoini iskafakī: “¿Afeskai mā oiari fiisikimē? Na fakekai nakeroko oxanò,” ato fani.

⁴⁰ Ato askafaito yorafāfe Jesús òsaketsanifo. Askafaitono pexe xaki mērañoa keyokòi Jesús ato kaimani. Nāskaxò apa yafi afa iyoni, a afe foafori afe fonifo. Nāskakanax nā fake xotofake raka ano ikifainifo.

⁴¹ Nāskata Jesús mēkemā mētsoinīfōfā yoini: “Xotofakeshta, ē mia yoikai fininīkafāfe,” faino,

⁴² koshikòi fininīkafāni, nā xotofake doce xinia aka ini. Mā fininākfānax kani. Nāskaito òikani yorafo ratei fetsenifo. “¡Kee, òikapo! ¿Afeskaxò otofamē?” fanifo.

⁴³ Nāskaxò Jesús ato yoini: “Mā tsoa yoiki na fake xotofake nakē ē otofakī,” ato fani. Nāskaxò, “Pimakāfe na fake xotofake,” ato fani.

6

Jesús Nazarete anoxò nikakaspanifo

(Mt. 13.53-58; Lc. 4.16-30)

¹ Nāskata Jesús nānoax kani āfe maikòi ano. A aòxò tāpimisfōri afe fonifo.

² Nāskata pena tenetiā ichanāti pexe mēraxò ato yoikī taefani. Anoxò Jesús ato yoiaito nikakani yorafo āa ranā yoinākani iskanifo: “Aira nikakapo, ¿Fanixò iskara tāpikī finakòiamē? Tāpikī finakòixò afama mīshtifo fai tsòa atiroma keskafai,” ikanax āa ranā yoinānifo.

³ “¿Akka namamē a mīsa famis? María fake Santiagonō Josénō Judasnō Simónnō āto ochi. ¿Akka mā ōimamē afe chikofori nono nofe ikafo? Nāskakē nō nikapaiyatoroko,” fanifo.

⁴ Askafaifono Jesús ato yoini iskafakī: “Na mai tio anoxō a Niospa meka yoimis nikakōitirofo aōnoa yoisharakōiyana. Akka āfe maikōi anoxō nikatirofoma, āfe kaifofa feta afe yorakōifāfe.”

⁵ Nāskakē arixō afama mīshti fapaifikī anima. Akka a isinī ikaifo fisti rasi ato ramāino sharai fetsenifo.

⁶ Nāskata Jesús shināni: “¿Afeskakī ea chanīmara fakanimamē?” ixō tsōa nikayamaino. Nāskakē pexe rasi chaima ano Jesús kafāsani ato tāpimafōfāsafai.

Jesús aōxō tāpimisfo nīchini Nios Xanīfōōnoa ato yoitanōfo

(Mt. 10.5-15; Lc. 9.1-6)

⁷ Nāskata aōxō tāpimisfo doce kenani. Ato kenaino akiki feafono rafe rasi faxō ato nīchini: “Eōxō niafaka yōshi chakafo ato makinoa pōtatakāfe,” ixō ato yoini.

⁸ Nāskaxō anā ato yoini: “Fāi kakī, mā afaa fokiki, akka māto mēsteti fisti mā fotiro. Māto pishari mā fokiki a mā piari mā fokiki māto koriri mā fokiki.

⁹ Nāskax fotakāfe māto sapato fistiya, māto rapati fetsari mā fokiki.”

¹⁰ Nāskaxō ato yoini: “Mā pexe fetsa mēra ikiax nāno nētekāfe, nā mā anoax kaitīa.

¹¹ Akka fatora pexe rasi anoxō mato ifikaspayanā mato nikakaspaifono anoax tsekekāfe māto taekinoa mapo taa taa ayanā. Mā askafaino tāpinōfo Nios atoki inimayamaino. Ē mato parakima yoi. Nā pexe rasi Sodoma anoafō feta Gomorra anoafāfe afara chakakōi fapaonifo. Nāskakē Niospa nā ato omiskōimanaitīa ato omiskōimaxii. Akka nā mato nikakaspaifo nāfo ato omiskōimaki finakōixii,” ixō Jesús ato yoini.

¹² Nāskakē Jesúsxō tāpimisfo anoax fonifo yorafa yoifokani. “Māto chaka xatekaxō Nios Ifofakāfe,” ato fayana.

¹³ Ato makinoa ichapa niafaka chakafo potanifo. A isinī ikaifoya ato sharafayanā xiniyaxō ato māmāyanā.

Juan Maotista nani

(Mt. 14.1-12; Lc. 9.7-9)

¹⁴ Xanīfo Herodes nikani Jesúsnoa yoiaifono aōnoa fanīma mīshtixō yoifofāsafaifono. Nāskakē Herodes shinākī iskafani: “Mā Juan Maotista otoita, nāskakē āfe sharaōxō ato sharafai,” ixō shināni.

¹⁵ Akka fetsafāfe yoikī iskafanifo: “Nā ato Niospa meka yoimis Eliāskīa,” faifono, fet-safāferi yoikī iskafanifo: “Nato Niospa meka ato yoimis, nā afeŕiama Niospa meka ato yoipaonifo keskafakī,” ixō yoiaifono.

¹⁶ Nāskafakī yoiaifāfe nikai Herodes iskani: “Nākīa Juan, mē ato textemafaiatano mā anā otoa,” ixō shināni.

¹⁷ Herodes Juan reteyoamano yoikī iskafani: “Mī exto āfi fīayamafe,” faito nikakī, Herodes akiki ōitifishkiki āfe sorarofō yoini achikaxō metexkere akaxō karaxa mēra ikimanōfo. Akka nā Herodias Felipe āfe āfi inī, nā Felipe Herodes āfe exto inī. Akka nā Herodes Herodias fe fīanāni.

¹⁸ Akka Juan Herodes yoini: “Na mī exto āfi mī fiatiroma,” ixō yoiaino,

¹⁹ nāskakē Herodias Juan noikaspakōikī retepaini. Akka retepaifikī retetiroma inī.

²⁰ Akka Herodes Juanki rateni māmāi tāpiax Juanmāi feronāfāke sharakōikē Nios Ifofasharakōia. Nāskakē kexesharakōini. Nāskakē āfe āfinī noikaspafaiato nikafikī, “¿Ē afeskaimē?” ixō shināni, Herodes Juan nikakōini.

²¹ Akka Herodias mā ato Juan retematiro inī, Herodes āfe cumpleaños ikaino. Nāskakē Herodes fista akī afe xanīfofoya soraro xanīfofoya Galilea ano xanīfofori ato ichanāfani.

²² Nāskafaito Herodias fake xomaya fista ikaino ikikainax ares yorafāfe ōinōfo mairani. Mairaito ōikī Herodes inimani, a afeta piaifori inimanifo askafanifo. Nāskakē nā xanīfāfe nā fake xomaya iskafani: “Ea yōkafe a mī fichipaiyai, ē mia mininō,” fani.

²³ “Mā na yorafāfe ōikani ē mia pāraima a mī fichipaiyai keskara ea yōkafe ē mia mininō,” ixō yoini.

²⁴ Askafaino nā xomaya kāikaixō afa yoini iskafakī: “¿Ē afaa xanīfo yōkatitromē?” faito āfa kemakī iskafani: “Juan textexō ea āfe mapo ināfe fafe,” fani.

²⁵ Nāskata nā xomaya anā ikikaixō xanīfo yoini iskafakī: “Iskaratīa sapaki rātaxō Juan Maotista textexō ea āfe mapo ināfe,” fani.

²⁶ Askafaito nikai xanīfo shināmītsakōini, Juan shināni. “Akka na yorafāfe nikaifono mē na kēro xomaya yoi. Nāskakē ē ato Juan textemapaiyamafikī ē ato textemani,” ixō shināni.

²⁷ Nāskakē āfe soraro nīchini, Juan textexō āfe mapo fixotanō.

²⁸ Nāskakē soraro karaxa mēra kaxō, Juan textexō āfe mapo sapaki feni. Nāskaxō nā kēro xomaya ināno, nāatori āfe afa ināni.

²⁹ Nāskakē Juan āfe inafāfe nikanifo mā texteafo. Nāskakē āfe yora fonifo maifaxikakī.

Jesús cinco mil feronāfakefo ato pimani

(Mt. 14.13-21; Lc. 9.10-17; Jn. 6.1-14)

³⁰ Mā askano a aōnoa yoimisiāfe afe ichanākaxō yoinifo a atanaifo keskara ato tāpimayanā.
³¹ Askafaifāfe nikakī Jesús ato yoini: “Niri fekāfe tsōa istoma ano nores kaxō nō teneyonō,” ato fani. Yorafo mēxotaima atoki feaifono, nāskakē pitirofoma inifo.

³² Nāskakē Jesús aōxō tāpimisfo fe kanōanāfānē tsōa istoma ano kani.

³³ Akka mā fōkaxō yorafāfe Jesús kaito ōikakī tāpinifo. Nāskakē nā pexe rasi anoafō nā aōxō tāpimisfo fe kai ari ichonifo. Jesús aōxō tāpimisfo fe nokoamatai nokoi taenifo.

³⁴ Mā nokoax Jesús kanōanāfā makinoax fotopakekafā ōia yōrafā rasi ōini. Ato fichixō ato shinākōini, nā o avejafo ifomais keskara ato ōiki. Nāskaxō afama mīstiffo ato yoisharakōini.

³⁵⁻³⁶ Nāskakē mā yātapakeaino aōxō tāpimisfo akiki fōkaxō yoinifo: “Mā yātapakei kiki nono tsoa ikamakī. Na yorafo nīchife pexe rasi ari yafi a pexe pasotai ikafo ari fokaxō a piaifo fitanōfo,” faifono, akka Jesús ato kemani:

³⁷ “Askakakīma māroko ato pimakāfe,” ato faito, kemanifo iskafakakī: “¿Mī shināimē na yorafo pimaxiki kaxō a piaifo dos cientos kori exenē pāa nō ato fixotanō?” faifono,

³⁸ Jesús ato yoini: “¿Afe tii mā pāayamē? Fokaxō ōiyotakāpo,” ato faito, mā fokaxō ōitakakī yoinifo iskafakakī: “Nāno cinco pāa yafi foe rafes,” fanifo.

³⁹ Nāskakē ato yoini: “Ichānāfaxō na yorafo yoikāfe fasi ano tsaonōfo,” ato fani.

⁴⁰ Ato yoikī askafaifono keyokōi tsaoi fetsenifo, fetsa ano cien ini, fetsa ano cincuenta ini.

⁴¹ Nāskata Jesús cinco pāa yafi foe rafe tsoainīfōfā, nai foisnīfōfā Apa Nios aicho fani. Nāskata mā pāa kaxkeketsaxō aōxō tāpimisfo ināni, yorafori ato inānōfo. Askatari foe raferi keyokōi ato inānifo pinōfo.

⁴² Nāskakē mā keyokōichi pikanax māyakōinifo.

⁴³ Nāskakē a chetefaafo pāa yafi foe doce fēta fospikōiya ini.

⁴⁴ A cinco pāa piaifo cinco mil feronāfakefos inifo.

Jesús ĩamāfā femākīa kani

(Mt. 14.22-27; Jn. 6.16-21)

⁴⁵ Mā yorafo pimata Jesús aōxō tāpimisfo yoini iskafakī: “Kanōanāfānē nanekāfe okiri ĩamāfā pokefaitaxikākī Betsaida ano rekē nokotaxikakī. Ē fenakaimakai, ē na yorafo nīchiyonō,” ixō ato yoini.

⁴⁶ Mā yorafo nīchita māchi keya ari arese kani arixō Apa Nios kīfikai.

⁴⁷ Mā fakishaino ĩamāfā nakirafe kanōanāfā ini. Akka Jesús kani, ares fisti nēteni.

⁴⁸ Jesús ōini aōxō tāpimisfāfe tōfeifāfe nēfefanē ato katima faino ĩamāfā pooiki mesenikōiaino, mā penaino. Nāskakē Jesús atoki kani ĩamāfā femākīa. Akka ĩamāfā femākīa kakī oa ato finōfainai keskara ini.

⁴⁹⁻⁵⁰ ĩamāfā femākīa kaito ōikakī niarafakara ixō shinākani. Tai tai inifo. Nāskakē keyokōichi ōikani rateaifono. Akka Jesús ato yoini iskafakī: “¿Afeskai mā rateimē? Ēki rateyamakāfe,” ato fani.

⁵¹ Nāskata kanōanāfā mēra naneinākafā, nēfefā nishpafani. Nēfefā nishpafaito ōikakī a aōxō tāpimisfāfe, “¡Kee! ¿Afeskaxō nēfefā nishpafaimē?” fanifo.

⁵² Akka Jesúsnoa tāpiyonifoma, Jesús afama mīsthi fatiroxakī cinco pāa cinco mil feronāfakefo ato pimafitano. Niospa Fake fiano āto ōiti mēraxō tsōa shinānima, tāpiyonifoma.

Jesús Genesaret anoafō a isinī ikaifo ato sharafani

(Mt. 14.34-36)

⁵³ Jesús aōxō tāpimisfo feta ĩamāfā pokefainax Genesaret mai ano nokoni. Nāno ĩamāfā ketokonō kanōanāfā nexanifo.

⁵⁴ Nā kanōanāfā mēranoax fotopakefōfānaifono, yorafāfe tāpinifo.

⁵⁵ Mā tāpikanax pexe rasi pasotai ichoi fetsenifo. Nāskakaxō a isinī ikaifo, rātati kamakī rātakaxō ato efenifo Jesús ano.

⁵⁶ Nā Jesús kai ari fanīma mīstixō, a isinī ikaifo fai nēxpakīa ato rātanifo. Nāfāfe, “Noko ramāmafe nō mia tari kexa ramākanō,” fanifo. Nā ramāifo tii sharai fetsenifo.

7

Jesús ato yoini afeskai yorafo chakafomakī

(Mt. 15.1-20)

¹ Nāskata fariseofo fe a Moisés yoikī kirika kenenī keskara ato tāpimamisfo Jerusalén anoax Jesús ano fenifo.

²⁻³ Nāfāfe òimifo Jesúsxō tāpimisfāfe mechokomexoma piaifāfe, a āto xinifāfe yoinifo keskayamaifono. Nāskakē ato mekafanifo. Akka fariseofāfe keyokōi judeofo āto xinifāfe yoipaoni keskapaonifo. Piamax taeyoi mechomepaonifo chipo pixakakī.

⁴ Akka a afarafō ato miniaifo anoax fekanax, a ato xinifāfe yoinifo keskai mechokomekaxoma pitirofoma. Āto xinifāfe afarafō feyafapaonifo keskai nāfori askapainifo. Āto kechofoya, āto jarafoya āto ochamefetifoya, āto rakoti chokapaonifo āto xinifāfe apanifo keskara.

⁵ Nāskakē fariseofo feta a Moisés yoikī kirika keneni keskara ato tāpimamisfāfe Jesús yōkanifo: “¿Afeskakī na mīōxō tāpimisfāfe a nōko xinifāfe yoinifo keskara nikakanimamē na mechokomexoma piaifofaifāfe?”

⁶⁻⁷ Jesús ato kemani iskafakī: “Nā Niospa meka yoimisto Isaías matoōnoa yoini iskafakī: Na yorafāfe afaa tāpiafoma ato feparapaimisfo. Na yorafāfe eōnoa yoisharafikakī, akka āto òiti mēraxō ea shināsharafoma. Āakōi ichanākanax fanāikani ea kīfiyanā. A yorafō tāpimanaifo keskarakai ēfe mekama. Āakōi shinākaxō ato yoikani, ixō Isaías Niospa meka keneni.

⁸ Nāskakē a Niospa yoini keskara mā shinākima, a mātō xinifāfe yoini keskara mā shināmis.

⁹ “Nā nō shināpaiyai keskara fisti mā shināpai. Nāskakē a Niospa mato yoini keskara mā anā nikapaima.

¹⁰ Akka Moisés yoini iskafakī: ‘Mātō epa yafi mātō efa nikasharakāfe. Akka a āto apa yafi āto afa chakafaifo ato retekāfe,’ ixō yoini.

¹¹⁻¹² Anori kenekī yoifinino, akka mā yoikī iskafamis: ‘Feronāfāke āfe apa yafi āfe afa yoikī iskafatiro: ‘Ē mato afaa inātiroma, nā ēfenāfo mē Nios inākī ixō yoitirofo,’ mā famis. Nāskata a Niospa yoini anori mā ato yoimisma mātō epa yafi mātō efa kexeshakāfe ifiano. Akka mā ato yoimis iskafakī: ‘Anā mātō epa yafi mātō efa mā afaa inātiroma,’ ixō mā ato yoimis. Na shara.

¹³ Nāskakē a Niospa yoini anori yoitama, a mātō xinifāfe yoipaonifo anori fisti mā ato yoimis. Nāskaxō afara fetsafo mā famis, Niospa mekakōi mā yoimisma,” ixō Jesús ato yoini.

¹⁴ Nāskaxō Jesús yorafō kenaxō ato yoini iskafakī: “Keyokōichi ea nikasharakōikāfe tāpisharakōixikakī ē mato yoinō.

¹⁵ Nā nō piatokai noko chakana fatiroma, akka nōko shinā mēraxō nō afara chakafo shināito noko chakanafatiro.

¹⁶ Mā pachoyakī nikasharakāfe,” ato fani.

¹⁷ Nāskata Jesús yorafō nīchifaini pexe mēra ikini, nānoxō a aōxō tāpimisfāfe yōkanifo: “A mī yorafō yoia keskara nokori yoife nō tāpinō,” faifono, ato yoikī iskafani:

¹⁸ “¿Afeskakī māri mā nikasharaimamē? ¿Mā tāpiamamē afara nō piato nōko xaki mēraxō noko chakafatiroma?”

¹⁹ Akka a nō piāi nōko òiti mēra kaima, nōko āto mēra kai, mā nōko āto mēranoax payokomeano chipo nō aya safatiro.”

“Akka a nō piāi chakama, keyokōi shara,” ixō ato yoini.

²⁰ Nāskaxō anā ato yoini: “Akka mātō shināmā shināxō mā afarafō chakafatiro.

²¹⁻²² Nāskakē āto shinā mēraxō shinākakī, yorafāfe afara chakafo shināmisfo. Feronāfāfēfe āto āfima chotafono, kērofāferi āto fenema chotamamisfo. Nāskata yometsokata, ato retemisfo. Askatari kēro fetsafo kaxefakāta, fetsafo chakafakī, mekakafakāta; afara fetsafo chakafakāta, ato pārakāta, a afara apaiyaifo fisti akāta, a fetsafāfe fiāiti fipaikāta, āa chanikāta, āa kakapaikāta, askatari shināsharamisfoma.

²³ Nā afara chakafo āto shinā mēraxō shināifo keskafakī nāto ato chakafaxii,” ixō ato yoini.

*Xotofake judeoyamafixō Jesús chanīmara fakōini
(Mt. 15.21-28)*

²⁴ Nāskata nānoax pexe rasi Tiro ano Jesús kani. Mā kaax pexe fetsa mēra ikini, ano ikikē tsōa tāpimanō. Akka nāno ikiāx onetiroma ini.

²⁵ Nānoa koshikōi tāpinifo, nāskakē nā fake xotofake niafaka naneato āfe afa Jesús ano kaxō a nāmā ratokonō mai chachipakefōfāni.

²⁶ Nā kēro xoko fetsa Sirofenicia mai ano ini. Nāskakē Jesús ano kani. Kaxō yoikai iskafakī: “Ēfe fake xotofake makinoā niafaka yōshi chaka potaxōfe,” fani.

²⁷ Askafafiāito nikakī Jesús yoini iskafakī: “Āa fakefāfe pikī taefayonōfo. Enefe, a fakefāfe piāi fiāxō nō paxta inā, askarakai sharamakī,” faifo,

²⁸ nā kēromā kemani iskafakī: “Ēje Ifo, a mī ea yoiai keskara mē nikai. Akka paxtafāfe pitirofo a fakefāfe piāi āfe potofō mīsa nāmā keyo pakeaito,” faifo,

²⁹ Jesús yoini iskafakī: “Chanīma, mī ea kemasharakōia. Nāskakē mā mī katiro, mī fake xotofake makinoax mā niafaka yōshi chaka mā tsekeaki,” fani.

³⁰ Nā kēro mā āfe pexe ano nokoxō ōia āfe fake xotofake raka ini, a makinoax mā niafaka tsekeano.

Jesús feronāfake pāstokōi ita mekamisma sharafani

³¹ Jesús Tiro mai anoax tsekeainiakī, Sidón yafi pexe rasi Decápolis finōfaini kaax, Galilea iamāfā kesemē nokoni.

³² Nāno yorafāfe feronāfake mekamisma ita pāstokōi iyonifo. Mā iyokaxō yoinifo iskafakakī: “Mī mīfi māmāfe nikamismaki pāstokī,” faifono,

³³ Jesús a fisti ori iyoni, yorafo makinoax. Nāskaxō āfe mīfi āfe pacho kini mēra meeini. Askafatari āfe mīfiki kemo mechota āfe ana ramākani.

³⁴ Nāskafata nai foisnīfofā xakaita yoini iskafakī: “Efata,” fakī. (Akka nōko mekapa nō yoisim iskafakī: “Papeita nikasharafe,” fakī.)

³⁵ Nāskafaino, nā pāsto āfe pācho nikasharakōini. Āfe anari sharakōitani, nāskax meka sharakōini.

³⁶ Nāskafata, “Mā tosa yoiki,” Jesús ato fafiaino, askatamaroko ato yoiki finakōifofāsa fanifo.

³⁷ Nāskakē, “¡Kee, ōikapol! ¿Afesaxō iskara sharafaimē?” ikata iskafakī yoinifo: “A pastofa ato sharafaino mā nikakani, a mekamisfomari mā ato sharafaino mā mekakani,” ikanax yoinānifo.

8

Jesús cuatro mil feronāfakefo pimanī

(Mt. 15.32-39)

¹ Nāskata pena fetsa yorafā rasi anā Jesúski fenifo āfe meka nikai fekani. Nāskata a piaifori ano afaa inīma. Nāskaifono Jesús aōxō tāpimisfo kenaxō yoini iskafakī:

² “Ē na yorafo shinākōi, nono tres nia mā efe ikafono, nonoxori afaa pikanima. A piaifo mā keyoa.

³ Akka afaa pimaxoma āto pexe ano ē ato nīchiano, fonāikani afaa pikanaxma fai nēxpakīa paketirofo. Atiri chai inoax feafoki,” ato faino,

⁴ a aōxō tāpimisfāfe kemanifo: “Akka, ¿afesaxō nō ato pimatirōmē? ¿Faniā nō afaa fitirōmē, nonokai tosa ikama?” faifono,

⁵ anā Jesús ato yōkani: “Akka, ¿afe tii mā pāayamē?” ato faito, “Siete pākāia,” fanifo.

⁶ Nāskakē Jesús, “Yōrafā rasi nāmā tsaokāfe,” ato fata, siete pāa tsomainīfofā. Apa Nios aicho fata, pāa kaxke pakexō aōxō tāpimisfo ināni. Nāfāferi nā yorafo inānifo pinōfo.

⁷ Nāskata foe ichapama ranāri ini. Nāskakē atoōxō Jesús Apa Nios aicho fata, aōxō tāpimisfo foe ināni a yorafori ato inānōfo.

⁸ Nāskakē keyokōichi pikanax māyakōinifo. A pikī chetefafo siete fēta fospikōia ini.

⁹ A piaifo yorafo ichapakōi inifo, cuatro mil inifo. Nāskaxō Jesús ato nīchini fotanōfo.

¹⁰ Nāskata Jesús a aōxō tāpimisfo fe kanōanāfā mēra naneinākanax Dalmanuta mai ano kani.

Fariseofāfe, “Jesús, tsōa atiroma keskara noko ispafe nō mia chanīmara fanō,” ixō yōkanifo
(Mt. 16.1-4; Lc. 12.54-56)

¹¹ Nāno fariseofo akiki fenifo afe yoināi fekani, feparaxō yōkapaikani. Iskafakī yoinifo: “Tsōa atiroma keskafakī afama mīshtifo fakī noko ispafe nō mia chanīmara fanō mī Nios ariax oamāki,” faifono,

¹² Jesús fāsi xakainākfā ato yoini iskafakī: “¿Afesakī na yorafāfe tsōa atiroma keskafakī noko ispafe ea fakanimē? Ē mato pāraima a Nios fistichi atiro keskara ē mato ispaima,” ixō ato yoini.

¹³ Ato askafata mā ato makinoax kai kanōanāfā mēra naneinākfā okiri iamāfā pokefaini kani.

“Fariseofo feta saduceofāfe anorima yoisimfoki ato nikayamakāfe,” Jesús ato fani
(Mt. 16.5-12)

¹⁴ Akka mā fōkakī, a pifofaifo shināmaki fainifo. Akka nā kanōanāfā mēra pāa fisti ini.

¹⁵ Askaifono Jesús ato yoini: “Ōisharakāfe. Fariseofāfe Herodes feta pāa faraxakafō piyamakāfe,” ato fani.

¹⁶ Ato askafaino, a aōxō tāpimisfo āa ranā yoinānifo iskakani: “¿Afesakī noko iskafaimē? Nōkai pāa yama,” ikanax yoinānifo.

¹⁷ Nāskaifono mā tāpixō Jesús ato yoini iskafakī: “¿Afeskai nō pāayamara mā ikimē, māto ōiti mēraxō mā shināsharaimamē?”

18-19 Feroyafiāxō mā ōi sharaima, pachoyafiāxori mā nikasharaima. ¿Akka mā shināimamē? A cinco pāa cinco mil yorafo ē ato pimaita akka, ¿a chetefaafo afe tii fēta fospia mā fiitamē?” ato faito kemanifo: “Doce fēta ikita,” fanifo.

20 “Askatari a siete pāa cuatro mil yorafo ē ato pimaita, akka, ¿afe tii fēta fospia mā fiitamē?” ato faito, “Siete ikita,” fanifo. “Askatari, ¿nā siete pāa ē kaxkeketsaxō ē ato minita cuatro mil feronāfake, afe tii fēta texefazo mā fiitamē?” ato fani. “Sietekia,” fanifo.

21 Askafaifono ato yoini iskafakī: “¿Ai mā tāpiamamē?” ato fani.

Jesús yora fēxo Betsaida anoxō sharafani

22 Nāskata mā Betsaida ano nokoafono, yora fēxo Jesús ano iyonifo. Mā iyokaxō iskafakī yoinifo: “Jesús, na feronāfake ramāfe,” faifono,

23 Jesús āfe mēkemā nā fēxo mētsoinifōfā pexe rasi pasoatai iyonī. Nārixō āfe kemō āfe fero mechanafayanā āfe mēkemā ramāni iskafakī yōkayanā: “¿Mā mī afara ōitromē?” faito,

24 nā fēxo mā ōisharaki iskafakī yoini: “Ē ōi na feronāfakefo oa ififo kafanai keskara,” faito,

25 Jesús anā āfe mēkemā fero ramākani. Nāskafaano nā fēxo mā sharaxō ōisharakōini. Nāskaxō keyokōi xafakīakōi ōisharakōini.

26 Nāskakē Jesús āfe pexe ano nīchini iskafakī yoiyanā: “Mī anā pexe rasi ano kakiki, mī pexekōi ano katāfe, mī tsoa yoikī,” fani.

“Mī Cristo mia Niospa ifini nokoki nīchixii mī nōko xanīfo finakōia inō,” ixō Pedro Jesús yoini (Mt. 16.13-20; Lc. 9.18-21)

27 Nāskafata Jesús a aōxō tāpimisfo fe pexe rasi Cesarea Filipino pasoato fonifo. Fāi kakī Jesús ato yōkani: “¿Ea afaa yorafāfe faimē?” ato faito,

28 aōxō tāpimisfāfe kemanifo iskafakakī: “Fetsafāfe Juan Maotistara, mia fakani. Fetsafāferi Elíasra mia fakani. Fetsafāferi nā ato Niospa meka yoipaoni fetsa rakikīa mia fakani,” ixō yoinifo.

29 “Akka, ¿mā ea tsoara faimē?” ato faito, Pedro kemani iskafakī: “Mī Cristo mia Niospa ifini nokoki nīchixii mī nōko xanīfo finakōia inō,” faito,

30 Jesús yoini iskafakī: “Eōnoa tsoa yoyimakāfe,” fani.

“Chipo ea retexikani,” Jesús ato fani (Mt. 16.21-28; Lc. 9.22-27)

31 Nāskata Jesús ato yoikī taefani iskafakī: “Ē chipo omiskōi finakōixii. Askatari ea ōikaspakakī ea potaxikani, judeofāfe āto xanīfofo feta a Nios ato kīfixomis xanīfofāfe a Moisés yoikī kirika kenenī keskara ato tāpimamisfāfe. Askatari ea retexikani, akka ea retefiafono tres nia oxata ē anā otōxii,” ato fani.

32 Nāskakē xafakīakōi ato yoini. Ato yoikī askafaito ori iyoxō Pedro yoini iskafakī: “Ifo, askayamafe mia retekanima kiki,” faito,

33 anā Jesús fesoakekafā aōxō tāpimisfo ōiyanā iskafakī Pedro yoini: “Emakinoax katāfe, Satanās. A Epa Niospa shināi keskara mī tāpiamaki. Akka nā yorafāfe shināifo keskara mī shināikai,” fani.

34 Nāskata Jesús aōxō tāpimisfoya yorafo kenaxō ato yoini iskafakī: “Fatora fetsa ēfe inakōi ipaikī āakōi apaiyai keskara anā atiroma. Nā ē yoi ai keskara nikakōitiro. Ēfe Ifoxō ea retefiaifono ēkai ēfe Ifo ē potapakenakama,” ixō shinātiro.

35 Akka fetsa āa shinātiro iskakī: ‘Ē Nios Ifofaito ea retetirofo. Nāskakē ē Nios Ifofaima,’ ixō shinātiro mesekī. Askara yora naax ēfe Epa ano katiroma. Akka nā ea Ifofaa, ēfe meka yoiatio askayamākī eōxō reteafono ē ifixii efe ipaxanō eamāi Ifofamiskē.

36 Akka fatora fetsa afara ichapayakōi ikatsaxakī, anā āfenā itiroma. Mā naax omiskōipakenaka.

37 Akka, ¿nīpaxakī yorafāfe afe tii kopifatirofomē? Maa, afaa kopifatirofoma.

38 Akka fatora fetsa eō rāfikī, ēfe meka sharari yoikaspai yora chakafāfe ferotaifi ēri aō rāfikī yoikī iskafaxii: ‘Ē na yora ōimisma,’ ē faxii ēfe Ēpa sharafoya fotoxō, ēfe ājiri sharafori efe fotopakefōfāxikani,” ixō ato yoini.

9

1 Askatari anā Jesús ato yoini iskafakī: “Ē mato pāraima, fatora fētsa nono efe iyoxō nayoxoma ēfe Epa xanīfo finakōia ōiyoxikani āfe sharaōnoax oaito,” ixō ato yoini.

Jesús āfe femānā fetsa keskara ini, fafekōini. Āfe rapatiri oxokōi ini (Mt. 17.1-13; Lc. 9.28-36)

2 Nāskata mā seis nia finōta, Jesús māchi keyakōi ari māpekī āfe ina tiis ato iyonī. Pedro iyota, Santiago iyota, Juan iyota ato fani. Nāriax āto ferotaifi Jesús fetsa keskara ini.

3 Āfe rapati fafekōini oxo finakōia ini, mā patsasharafikakī tsoa askafatiroma ini.

⁴ Nānoa Elías yafi Moisés ōinifo Jesús fe mekaifono.

⁵ Nāskaifono Pedro Jesús yoini iskafakī: “Ifo, sharakōi ano nō oa. Nono nō tres tapas fanō, fetsa mia axota, fetsa Moisés axota, fetsa Elías axota, nō fanō,” fani.

⁶ Akka aōxō tāpimisfo ratekōinifo. Nāskakē Pedro tāpinima a yoiyai keskara, shināyamaino yoini.

⁷ Nāskaifono kōinī ato maipakefōfāni. Nā kōi mēranoax mekai iskaito nikanifo: “Nafi ēfe Fakekōiki ē aō noikōi. Nāskakē nikasharakōikāfe,” ikaito nikanifo.

⁸ Askaito nikafikakī, a kemataima ōiafo ano ato fe tsoa inima, Jesús fisti ares ato fe ini.

⁹ Nāskata mā māchi keya ariax fotoxō, “A mā ōia keskara mā tsoa yoiki. Ē naax mē anā otoano mā ato yoitiro,” ixō ato yoini.

¹⁰ Nāskakē tsoa yoitama. Ares fisti āto ōiti mēraxō shinānifo mā tāpifikaxō. Naax ē anā otoxira nokofaito nō tāpiama ikanax yoinānifo.

¹¹ Nāskaxō Jesús yōkanifo, iskafakakī: “¿Afeskakī a Moisés yoikī kirika keneni keskara ato tāpimamisfāfe iskafakī yويمisfomē Elías rekē oi taexii?” ixō yويمisfo faifono,

¹² ato kemakī iskafani: “Chanīma, Elías rekē fotoi taexii, nāato ato yoisharaxii itipinīsharanōfo. Akka, ¿afeskakī kirika ano kenenifomē, a ē omiskōixiai yorafāfe ea chakafakakī ea potaifono?”

¹³ Akka ē mato yoinō mā Elías ifana. Nāskakē nā apaiyai keskafakakī chakafanifo. Nānori aōnoa yoikī kirika kenenifo,” ixō ato yoini.

*Jesús feronāfake naetapa niafaka chaka pōtaxoni
(Mt. 17.14-21; Lc. 9.37-43)*

¹⁴ Nāskata mā Jesús fe fōtakakī a Jesúsxō tāpimis fetsafo ano nokokaxō ōitoshinifo yōrafā rasifo fe a Moisés yoikī kirika keneni keskara ato tāpimamisfo fe ato fe feratenāifāfe.

¹⁵ Nāskaifono Jesús oaito fichikanax akiki keyokōi farekefaikaxō, “Kee, mā Jesús oi kiki,” ikaxō yoisharanifo.

¹⁶ Askaifono Jesús ato yōkani iskafakī: “¿Afeskai mā ato fe feratenāimē?” ato faino, fētsa kemani iskafakī:

¹⁷ “Maestro, ēfe fake ē mikiki efea, niafaka chaka a mēra nanexō mekamamismano.

¹⁸ Nā kapaiyai arixō, niafaka chakata achiano paketiani. Āfe axfapa fākokeyopaketiani, askatari āfe piti yeyexamis, askatari charishi fetsemis. Mē mī inafō yoia a makinōa niafaka yōshi chaka pōtanōfo. Akka mī inafāfe atirofoma,” faino,

¹⁹ Jesús kemani: “Mākai ea chanīmara faima. Mā afara shināmis. Akka afetiakai ē nono mato fe itianimo. ¿Afetiakai mā ea nikaimē? Niri nā fake efekāfe,” faino,

²⁰ nāskakē Jesús ano nā fake iyonifo. Akka nā niafaka mā Jesús tāpixō, nā feronāfake anā choamanaino anā nāmā pakeni. Nāskakē tarame tarame iyanā āfe axfapa fākokeyopakeni.

²¹ Nāskaxō Jesús apa yōkani iskafakī: “¿Afetīa fichinimē?” iskaifaito, apa yoini iskafakī: “Afetīa fichinima. Yomeax fichini.

²² Mēxotaima na niafaka chakata iskafaino, chiinaki paketa fakanaki pakemis, retepaikī iskafaino. Nāskakē mī sharafatiromakī sharafafe, noko shinākī ēfe fake ea sharafaxōfe,” faino,

²³ Jesús yoini: “¿Afeskakī ēfe fake mīa ea sharafaxotiromamē mī ea faimē? Ea chanīmara faifono ē ato afama mīshti faxotiro,” fani.

²⁴ Nāskakē nā fake āpa fāsikōi mekani iskafakī yoini: “Ē mīa chanīmara fai, ea axōfe ē mia chanīmara fakī finakōinō,” ixō yoiaino,

²⁵ yōrafā rasi ichanāfono Jesús ōini, Jesús feronāfake makinōa niafaka potaito ōipaikani. Nāskakē Jesús niafaka iskafakī yoini: “Niafaka yōshi chakata, na fake mī mekamatama, mī nikamamismaki, ē mia yoikai na fake makinōax tsekekaitāfe, nāskax mī anā a mēra ikiki,” faino,

²⁶ niafaka yōshi chaka fāsikōi fiisini. Nāskakī nā fake anā choamani. Nāskata mā fake makinōax tsekekaikī oa naa keskara fafāini. Nāskakē iskafakī yoinifo: “Mā naa raka,” faifono,

²⁷ akka Jesús āfe mēkemā mētsota fininīfofanaino nā feronāfake niinākafāni.

²⁸ Nāskafata Jesús pexe mēra ikikainano, anoxō a aōxō tāpimisfāfe a fisti yōkanifo: “Akka, ¿afeskakīri nō niafaka yōshi chaka potatiromamē?” ixō yōkaifono,

²⁹ Jesús ato kemani: “Na keskara niafaka mā potakī Epa Nios kīfita foni teneyanā Nios shinākī mā potatiro. Akka mā askayamaxō mā potatiroma,” ato fani.

*Anā Jesús ato yoini: “Chipo ea retexikani,” ixō
(Mt. 17.22-23; Lc. 9.43-45)*

³⁰⁻³¹ Nāskata Jesús nānoax a aōxō tāpimisfo fe kakī Galilea finōfaini. Akka Jesús ato tāpimakasani, “Ea tāpiyamanōfora,” ixō. A aōxō tāpimisfoosmāi ato tāpimakī iskafakī ato yoini:

“Ea achikaxō āto xanīfofo ano ea iyoxikani, afāfe ea retenōfo. Akka ea retefiafono tres nia oxata ē anā otoxii,” ato faito,

³² tsōa tāpinima a ato yoiyai keskara. Yōkapai akiki ranonifo.

*“Akka, ʔtsoakaimē sharafīnakōia?” inifo
(Mt. 18.1-5; Lc. 9.46-48)*

³³ Nāskata pexe rasi Capernaúm ano nokonifo. Nā pexe anoxō Jesús ato yōkani: “ʔAfeskai fai anoax mā feratenāmē?” ato faino,

³⁴ tsoa tooxinima, akka fai nēxpakīanoax feratenāi iskakanax: “ʔTsoakai sharafīnakōiamē?” ikanax.

³⁵ Nāskakē Jesús tsoaxō a aōxō tāpimisfo doce kenaxō ato yoini: “Fatora fētsa ato finōpai nā yorafāfe āto ina keskara itiro, nāskakē keyokōi ato axosharakōitiro,” ixō ato yoini.

³⁶ Nāskata ato nēxpakīa fake yome nīchita, chishtoinīfofā ato yoini:

³⁷ “Akka fatora fētsa ēfe aneōxō na fake yome noikī nāatori ea noisharakōi. Nā ea noisharaito ea fisti noima, nā ea nīchiniri noisharai,” ixō Jesús ato yoini.

*Fētsa noko noikaspatama noko sharafai
(Mt. 10.42; Lc. 9.49-50)*

³⁸ Ato askafaito Juan yoini: “Maestro, mā nō ōia oa feronāfake fistichi mī aneōxō niafaka chaka potaito. Nāskakē mī nofe rafemismaki, askafayamafe mī yorafo makinoa niafaka potatitromaki nō faa,” faito,

³⁹ Jesús kemani iskafakī: “Askafayamakāfe. Akka nā ēfe aneōxō afama mīshtifo faxō chipo ea chakafakī mekafatiroma.

⁴⁰ A noko chakafakī mekafaima, nofe rafesharai.

⁴¹ Akka fētsa mato shinākī, nato Cristo Ifofaki ixō mato faka ayamanaito, askara Niospa afara ināsharaito. Chanīmākōi ē mato yoi,” ixō ato yoini.

*Noko fētsa afara chakafamaino āfenā mesekōi itiro
(Mt. 18.6-9; Lc. 17.1-2)*

⁴² Anā Jesús ato yoini iskafakī: “Na fakefāfe ea chanīmara faifono, fatorafāfe ato afara chakafamaifono, tokirinīfaya tenextifaxō fakafā nōafā mēra mā ato potatiro ato anā afaa chakafamanōfoma.

⁴³⁻⁴⁴ Akka māto mēkemā mato afara chakafamaino mextemekāfe. Akka mā mā mextemeax Epa Nios ari mā katiro afe nīpaxakī. Akka mifi rafeyaxō mā afara chakafaax chiifā xoisai mēranoax mā omiskōipakenaka, a chiifā nōkanakama anoax. Anoax xenafo nayamaino, chiiri nōkanakama anoax.

⁴⁵⁻⁴⁶ Askatari mī tāe mia afara chakafamaino oxtemeffe. Akka mā mī oxtemeax Epa Nios ari mī katiro afe īpaxakī. Akka mī oxtemeamax tae rafeyax chiifā mēranoax mī omiskōipakenaka, anoax xenafo nayamaino, chiiri nōkanakama anoax.

⁴⁷ Askatari mī fēro mia afara chakafamakē tsekafe. Nāskax mī fero fistiax Epa Nios xanīfo ano mī katiroki. Akka mī fero rafeyax chiifā mēranoax mī omiskōipakenaka.

⁴⁸ Anoax xenafo nayamaino chiiri nōkanakama anoax.

⁴⁹ “Nāskakē chiifā mēranoax keyokōi omiskōipakenakafo.

⁵⁰ Akka tashi shara. Akka mā nami tashiya ayamaxō, afeska faxō mā anā sharafatiromē, mā anā sharafatiroma, chakanatiro. Nāskakē oa tashi keskara ikāfe isharakōiax. Fetsafo ato yoisharaxikakī anā afaa chakafanōfoma.”

10

*Feronāfake āfe āfi fe enenātirofōnoa Jesús ato yoini
(Mt. 19.1-12; Lc. 16.18)*

¹ Nāskata Jesús Capernaúm anoax tsekekainax Judea mai ano kani. Nā Jordán faka ketokonō, nānoxō anā yorafo ichanāfaxō anā ato yoini, ato yoisim keskafakī.

² Ato yoikī askafaino fariseofo Jesús ano fenifo. Akikī fēkaxō chakafakī mekamapaikani. Nāskaxō yōkanifo iskafakī: “Nōko xinifāfe Niospa meka yoikī kenenifo keskafakī, ʔferonāfāke āfe āfi enepaikī enetiromē?” ixō yōkaifono,

³ Jesús ato kemani: “Moisés mato kirika kenexokī, ʔfanīri mato yoinimē?” ato faito, iskafakī yoinifo:

⁴ “Moisés kenekī iskafani: ‘Fētsa āfe āfi enepaikī taefakī kirika kenexotiro iskafakī: “Ē mia anā fiima, mī anā ēfe āfi ikima,” ixō mā yoitiro noko fani,” ixō yoiāifono,

⁵ Jesús ato kemani iskafakī: “Moisés iskafakī mato yoini: ‘Mākaī afaa tāpiama māto ōiti kerexkōi,’ ixō mato yoini.

⁶ Akka taekōifakī, Niospa feronāfake yafi kēro onifani.

7-8 Nāskakē feronāfake mā āfiyax āfe apa yafi āfe afa makinoax paxkatiro āfi fe fianāxiki. Nāskakē āfe āfi fe yora fisti keskara itirofo. Nāskakē anā yora rafema, yora fisti keskara ikani āfe āfi fe.

⁹ Nāskakē feronāfāke āfe āfi enetiroma Niospamāi ato fianāmano,” ixō ato yoita,

¹⁰ mā pexe mēra ikiano, anā a aōxō tāpimisfāfe yōkanifo: “A mī yorafo rama yoiai keskara nokori yoife,” faifono,

¹¹ Jesús ato yoini iskafakī: “Akka fētsa āfe āfi enexō kēro fetsa fixō afe ikī a fikī taefani chakafai.

¹² Askatari feronāfake āfe āfi enexō fetsa fixō fetsa fe ikī āfe āfi chakafai,” ixō Jesús ato yoini.

*Jesús fakefo chishtoḵō ato māmāyanā ato Epa Nios kifixopakeni
(Mt. 19.13-15; Lc. 18.15-17)*

¹³ Askatari yorafāfe āto fakefo Jesúski efenifo ato māmāpakeyanā ato Epa Nios kifixonō. Akka a Jesúsxō tāpimisfāfe ato iskafanifo: “Māto fakefo efexō nōko Ifo fekaxtefayamakāfe,” ato faifono,

¹⁴ nikakī Jesús ato iskafani: “Ato enekāfe na fakefo ekeki fenōfo, ato nētefayamakāfe. Ēfe Epa Nios xanīfo ika ari na fakefo keskarakōifoki,” ixō ato yoini.

¹⁵ “Ē mato pāraima, mā Epa Nios xanīfo nikayamax na fakefāfe ea nikaifo keskafakī, Epa Nios xanīfo ika ari mā katiroma,” ixō ato yoita,

¹⁶ fakefo chishtoinīfōfā ato māmāpakeyanā: “Epa Niospa, na fakefo sharafafe,” fani.

*Feronāfake naetapa kori ichapayax Jesús fe mekani
(Mt. 19.16-30; Lc. 18.18-30)*

¹⁷ Mā askafata mā Jesús kaino feronāfake fetsa ichoax akiki nokoni. Mā akiki nokoxō ratokonō mā chachipakefōfā yōkani iskafakī: “Maestro mī sharaki, ea yoife ē afaa afeskatiromakī Nios xanīfo fe ipaxakī,” ixō yōkaito,

¹⁸ Jesús kemani: “¿Afeskakī sharara mī ea faimē? Akka Nios fisti shara.

¹⁹ Niospa shināmanaino a Moisés yoini keskara mā mī tāpia. Iskafakī yoini: ‘Ato reteyama-kāfe, askatari māto āfima chotayamakāfe, askatari kēromāri māto fenema chotamaya-makāfe, askatari atoki yometsoyamakāfe, askatari chani yoiyamakāfe, askatari mā kaxpa ato pārayamakāfe, askatari māto epa yafi māto efa nikasharakōikāfe,’ ixō Jesús yoini.

²⁰ Askafaito nā feronāfake kemani iskafakī: “Maestro, nā mīa yoiai keskara mē nikamis yomexō,” faito,

²¹ nikakī Jesús ōiyanā aō noiyānā iskafakī kemani: “Nāno afara fisti mī tāpiama. Kaxō mī afarafo minixō kori fixō nā afaamaisfo ato ināketsatāfe. Nāskakē nai mēranoax afama mīshifoya mī ixikai. Mā mī kori ato ināketsata anā oxō ea Ifofasharafe,” ixō yoini.

²² Askafaito nikai nā feronāfake shināchakakōi tooxinima kori ichapayamāiyaxō ato inākaspa. Nāskax Jesús makinoax kani.

²³ Nāskaito Jesús aa kemataima ōiakexō, aōxō tāpimisfo yoini iskafakī: “A yora afama mīshiti ichapaya Nios xanīfo ano katiroma, feka pishta,” ixō ato yoiaito,

²⁴ nikakakī āfe inafāfe: “Kee, āfe meka nō tāpitiroma,” ixō tāpipainifo. Askaifono anā Jesús ato yoini iskafakī: “Ēfe fakefāfe, feka pishta afama mīshifoya ikatsaxakī mā Nios Ifofapaia.

²⁵ Māraki camello akoja kini mēra ikipaifi ikitiro, feka xkōi efapamāiax. Nāskarari yora afama mīshiti ichapayato Nios Ifofapai, feka xkōi āfe afama mīshitifomāi potakaspakī,” ixō Jesús ato yoini.

²⁶ Ato askafaito nikakakī a aōxō tāpimisfāfe tāpipainifo. “¡Kee! ¿Afeskax nō Nios fe ipaxatiromē?” ikanax yoinānifo.

²⁷ Askafāfe ōikī Jesús ato yoini: “Yorafokai āa ifimetirofoma. Nios fistichi yorafo ifitiro. Niospa afama mīshitifo fatiro, yorafāfe atiroma keskara,” ixō ato yoini.

²⁸ Ato askafaito nikakī Pedro yoini: “Ifo, nō mefe okī nōko afama mīshitifo nō ōiferani nō mefe oni,” faito,

²⁹ Jesús kemani iskafakī: “Ē mato paraima, fētsa eōxō ēfe meka sharaōnoa ato yoikakī āfe pexe ōifaini, āfe onefetsafori ōifaini, āfe poifori ōifaini, āfe apari ōifaini, āfe afari ōifaini, āfe fakefori ōifaini, āfe tareri ōifaini,

³⁰ nāto niyoxō afama mīshitifo fitiro, Niospa ināino, pexefoya ita, onefetsafoya ita, poifoya ita, afafoya ita, fakefoya ita, tarefoya ita itiro. Nāfo Niospa ināsharafaino omiskōixii. Nāskafiax chipo Epa Nios fe ipanaka.

³¹ Akka iskaratīa yora ichapafāfe ato finōpaikani, nō finakōiara ikaxō, akka chipo fenotirofo. Akka a ato finōpaiyamaifo iskaratīa Niospa ato finakōia imaino Nios fe ipanakafa,” ixō ato yoini.

*Anā Jesús ato yoini: “Mā chaima ea retekanira,” ixō
(Mt. 20.17-19; Lc. 18.31-34)*

³² Askafakī ato yoita Jerusalén ari kani. Jesús rekē kaino aōxō tāpimisfo acho fonifo. “Kee, ¿afeskai nōko Ifo Jerusalén ano kaimē?” ikanax ratekōinifo. Nāskaifono a aōxō tāpimisfo tii ato kenaxō Jesús ato yoini iskafakī: “Iskaratīa afaa afeskaimākai ē mato yoinō.

³³ Mā mā ōikai, iskaratīa Jerusalén ano nō māpei kaikai. Nānoxō ea achikaxō a ato Nios kifixomis xanīfoso yafi a Moisés yoikī kirika kenenī keskara ato tāpimamisfo ea ato inākani kiki. Anoxō ea iskafakani: ‘Na Jesús ato chakafamiskī retékāfe,’ ixō ea yoikāta, yora fetsafo ano ea iyokani afāfe ea retenōfo.

³⁴ Nāfāfe ea kaxemetsama fayanā, ekeki kemo mechoketsayanā ea koshaketsakata ea retekani. Akka ea askafafiafono tres nia oxata ē otoxii,” ixō ato yoini.

*Santiago feta Juan Jesús yōkanifo afe xanīfo ipaikakī
(Mt. 20.20-28)*

³⁵ Santiago fe Juan, Zebedeo fake rafe ini. Nā rafeta Jesús ano fōkaxō iskafakī yoinifo: “Maestro, na nō mia yoiāi keskafakī noko axōfe, nō mia yōkaikai,” faifono,

³⁶ ato yōkani: “¿Ē mato afaa afeska faxotiromē?” ato faito,

³⁷ anā yoinifo iskafakakī: “Mī xanīfokōikī nokori xanīfo imafe, nō mefe xanīfo inō. Takai fetsa ē tsaofaino, takai fetsari ēfe ochi tsaonō,” faifono,

³⁸ Jesús ato yoini iskafakī: “Na mā ea yōkai keskara mā tāpiama. ¿Na ē omiskōiai keskai māri mā omiskōitiromē?” ato faino,

³⁹ kemanifo iskafakakī: “Ēje, nōri nō tenetiro,” faifono, Jesús ato yoini iskafakī: “Chanīma, nā ē teneai keskafakīri, mā tenetiro omiskōifinakōifiki.

⁴⁰ Akka efe ketaxamei tsaopai tsoa efe ketaxamei tsaotiroma. Ēfe Epa Nios fistichi tāpia. Nā Epa Niospa katoafo ano efe tsaotirofo,” ixō ato kemani.

⁴¹ Askafaiāfe nikakani a aōxō tāpimisfo diez atoki ōitifishkinifo, Santiago yafi Juan mepaikani.

⁴² Askaifono akka Jesús ato kenaxō ato yoini iskafakī: “Mā mā tāpia, yora fetsafo xanīfokaxō fāsikōi mekayanā ato yonomamisfo. A xanīfo fe rafeafāferi ato yomimisfo iskafakakī: ‘Nōri mātō xanīfo. Nō mato yoiaito mā noko afara axorisafatiro,’ ixō fāsikōi ato yomimisfo.

⁴³⁻⁴⁴ Akka mā ranā askayamakāfe. Askatamaroko fatora fetsa mā xanīfo ipai, ato yonoxomis keskara mā itiro.

⁴⁵ Akka ēri anori shināima, ēfe Epa Nios ariax ē nāmā fotoni feronāfakēōi ixiki, ē Niospa Fakefekē ea afara axonōfo ē onima. Askatamaroko fetsafo ē ato afara sharafaxoxiki ē oni. Ē atoōnoax naxiki ē oni. Satanás chaka āto ifo inōma ē oni,” ixō Jesús ato yoini.

*Jesús Bartimeo fēxokē sharafani
(Mt. 20.29-34; Lc. 18.35-43)*

⁴⁶ Nāskata Jericó pexe rasi ano nokonifo. Nānoax mā Jesús tsekekainaino, aōxō tāpimisfo fe yōrafā rasi afe fonifo. Fokakī yora fēxo fai ketokonō tsoa o fichinifo, āfe ane Bartimeo, Timeo fake ini. Nāno fai ketokonō tsaoxō ato kori yōkatiani ini.

⁴⁷ Nāno fai ketokonō tsaoxō nā fēxo nikani Jesús Nazarete anoa kafani faifāfe. Nāskafaiāfe nikai nā fēxo fāsikōi fiisini, iskafakī yoini: “Jesús mīfi David fenaki, ea shināfe!” fani.

⁴⁸ Askafaito, “Nōko Ifo fekaxtefayamafe,” fanifo. Askafaiāfono fāsikōi fiisini, iskani: “David fenapa, ea shināfe!” faito nikai.

⁴⁹ Nāskakē Jesús nēteakekafā ato yoini iskafakī: “Ea kenaxokāfe,” ato faino, kenanifo iskafakī yoianā: “Inimayanā fininākakāfe, Jesús mia kenakī,” ixō yoiaifono,

⁵⁰ nikakī āfe tari rashkita potata koshikōi niinākakā ichotiri ichotiri ita Jesús ano oni.

⁵¹ Mā akikī oano Jesús yōkani: “¿Ē mia afeska fanō ea mīa yōkamē?” faito, nā fēxo kemani: “Maestro, ēfe fero ē sharafapai,” faino,

⁵² Jesús yoini iskafakī: “Mā mī katiro, ea chanīmara faax, mā mī sharaki,” fani. Naskafaino nā fēxo ōisharakōitani. Mā sharaxō Jesús fāi kaino chīfafaini.

11

*Jesús nokoni Jerusalén ano
(Mt. 21.1-11; Lc. 19.28-40; Jn. 12.12-19)*

¹ Nāskata Jesús fe fokakī Jerusalén chaima fonifo. Nāno pexe rasi Betfagé fe Betania chaima ini, machi Olivos ano. Nānoxō Jesús a aōxō tāpimis rafe nīchini.

² Ato iskafakī yoianā: “Mēstekōi fotakāfe oa ono pexe rasi ano. Nāno mā nokoxō mā fichi kaikai burro fake nexekē tsoa aō nimisma. Tēpexō ea efexotakāfe.

³ Anoxõ mato yõkaifono iskafakaki: ‘¿Afeskakĩ mã burro tẽpeimẽ?’ mato faifono, iskafakĩ ato yoikãfe: ‘Nõko Ifãfe fichipaiyaito nõ ifixoniyoa, samama mato nõchixonĩ kiki,’ ixõ ato yoikãfe,” Jesús a aõxõ tãpimis rafe fani.

⁴ Askata mã fõkaxõ fichitoshinifo burro pexe fepoti ano nexekẽ emãiti fainaki fichixõ tẽpexõ efenifo.

⁵ Nã ano ikafãfe ato iskafanifo: “¿Afaa mã afeskafaimẽ? ¿Afeskakĩ mã burro tẽpeimẽ?” ato faifono,

⁶ nã Jesús ato yoia keskafakĩ ato kemanifo: “Ia. Iyoxotakãfe,” ato fanifo.

⁷ Nãskata Jesús ano burro efekãta, ãfe kate kamaki ãto rapati kakafanifo. Nãskafafono a kamaki Jesús tsaoinãkafãni.

⁸ Akka mã Jesús kaino yorãfãfe ãto rapatifoya epe peifo xatekaxõ kakafaxõ fonifo akiki inimakakĩ.

⁹ Akka nã rekẽ foaifãfe a acho foaifo fãsikõĩ tai taifonifo. Iskafa fonifo: “¡Aicho, nã sharafinãkõia nokoki oi kiki, nõko Ifo Niospa nokoki nõchiano!”

¹⁰ Nõko xini David xanifo ipaoni keskai, mĩri nõko xanifo ixiki oa. ¡Aicho! ¡Nios sharakõii!” ixõ yoinifo.

¹¹ Nãskata Jesús mã Jerusalén ano nokoax, Nios kĩfiti pexefã mãra ikixõ, a mãranoafo õifofãsafani. Nãskata nãnoax tsekekaini kaax a aõxõ tãpimisfo docefo fe Betania ano kani, mã yãtapakeaino.

*“Fana higuera, mã anã fiminakama,” Jesús fani
(Mt. 21.18-19)*

¹² Pena fetsa mã Betania anoax okĩ Jesús mea fonãikõĩ fani.

¹³ Nãskakẽ chai ixõ fana higo nikẽ õini, peifoya ini. Kaxõ õini fimiyamakĩ, akka kaxõ õia fimiya inima ãfe peifos ini. Nã fimiyamaifã õini.

¹⁴ Nãskakẽ Jesús fana higo yoikĩ iskafani: “Anã tsõa mã fimi pinakama,” faito, ãfe inafãfe nikanifo.

*Jesús a Nios kĩfiti pexefã mãraxõ a ato inãifo ato potani
(Mt. 21.12-17; Lc. 19.45-48; Jn. 2.13-22)*

¹⁵⁻¹⁶ Nãskata anã Jerusalén ano nokonifo. Nãnoax Jesús anã Nios kĩfiti pexefã mãra ikitoshini. Ikitoshixõ õia a mãraxõ afarafo ato miniaifono xafakã ato kãimani, a ato fiaifori askafani xafakãia kãimakĩ. A ato kori inãifo anoari mãsafo ato põtaketsani, askatari a ato rifi miniaifo anoari ãto tsaotifori ato põtaketsani. “Nã Nios kĩfiti pexefã mãraxõ tsõa afaa ato inãtiroma;” ixõ fãsi mekainãkafã ato yoini.

¹⁷ Ato tãpimakĩ iskafakĩ ato yoini: “Niospa meka yoikĩ iskafakĩ kirikaki kenenifo: ‘Na ãfe pexefã anoxõ keyokõichi nã maitio ano ikafãfe ea kĩfitirofo;’ ixõ kenefinifono, akka nã yometsofãfe pexe keskara mã famis,” ixõ ato yoini.

¹⁸ Ato askafaito, a ato Nios kifixomis xanifofo feta, a Moisés yoikĩ kirika kenenĩ keskara ato tãpimamisãfe nikanifo. Nãskakẽ afeskaxoma Jesús retepainifo, retepaifikani mesenifo, yorãfãfemãĩ nikakõiaifono a yoiai keskara, “Aira, na keskara meka nõ nikamisma, ãfe meka sharakõi;” ikaxõ.

¹⁹ Akka mã fakishaino Jesús a aõxõ tãpimisfo fe Jerusalén anoax anã kani.

*Fana higuera xanani
(Mt. 21.20-22)*

²⁰ Askano anã pena fetsa finõfãikakĩ õinifo, nã fana higuera mã xanano ãfe tapofoya.

²¹ Nãskakẽ Pedro shinãkĩ Jesús yoini iskafakĩ: “Maestro, õipo na higuera mã kamafofãita mã xana,” faito,

²² Jesús kemakĩ iskafakĩ: “Nios nikakõikãfe,” ato fani.

²³ “Akka ã mato pãraima. Mãto õiti mãraxõ mã Nios nikakõixõ na mãchifã mã yoikĩ iskafatiro: ‘Nonoax tsekekainax fakafã mãra paketãfe;’ mã faino fakafã mãra paketiro. Nã mã yoiai keskai nãskakõitiro.

²⁴ Nãskakẽ ã mato yoi, afara mã fichipaikĩ mã Epa Nios chanĩmara faxõ mã kĩaifaito mato inãtiro, mãtonã inõ.

²⁵ Akka mã Epa Nios kĩfikĩ, fetsaki mã õitifishki iyoxõ ãkisi raefayokãfe, Epa Nios nai mãranoato mãto chaka mato soaxonõ.

²⁶ Akka mã fetsafo raefayamaito, matori Epa Niospa nai mãraxõ mãto chakafo mato soaxotiroma,” Jesús ato fani.

*“¿Tsõa mã nĩchinimẽ mã xanifo inõ?” ixõ Jesús yõkanifo anoxõ achipaikakĩ
(Mt. 21.23-27; Lc. 20.1-8)*

²⁷ Nāskata Jerusalén ano anā fenifo. Nānoax Nios kīfiti pexefā mēra Jesús kafāsaino, nāno akiki fenifo. A ato Nios kīfixomisfāfe āto xanīfofo fe, a Moisés yoikī kirika kenei keskara ato tāpimamisfo, judeofāfe āto xanīfofori fenifo.

²⁸ Anoxō yōkanifo iskafakakī: “¿Tsōaōxō mī iskafaimē, tsōa mia yoiamē mī iskafanō?” ixō yōkaifono,

²⁹⁻³⁰ Jesús ato kemani iskafakī: “Ēri mato yōkanō ea yoikapo ē nikanō. Ea mā yoiaito ē mato yoikai tsōaōxō ē iskafaimākai. Akka, ¿tsōa Juan nīchinimē ato maotisafakī ato faka mēra ikimapakenō? Niospa nīchiamakī yorafāfe nīchiniforaka ea yoikapo,”

³¹ ato faino āa ranā mēenāpaiyanā iskanifo: “Nō kemakī iskafaino: ‘Niospa nīchini,’ nō faino noko yoikī iskafai: ‘Akka, ¿afeskakī mā Juan nikamismamē?’

³² Akka nō iskafakī yoitiroma: ‘Yorafāfe Juan nīchinifo,’ ixō nō yoitiroma, yorafoki nō mesei nokoki ōitifishki itirofo.” Akka yorafāfe keyokōichi tāpiafo Niospa shināmanaino Juan ato yoipaoni.

³³ Nāskakē yoikī iskafaino: “Nō tāpiana tsōara Juan nīchini,” faifono, Jesúsri ato yoikī iskafani: “Ēri mato yoitiroma tsōaōxō ē iskafaimākai,” ixō ato yoini.

12

*Meka fetsafaxō Jesús ato yoini a ato yonoxomis chakafōnoa
(Mt. 21.33-46; Lc. 20.9-19)*

¹ Anā Jesús ato yoini meka fetsafaxō iskafakī: “Feronāfake fētsa āfe tare ano uva fanani. Fanaxō akiki keneakeni. Akiki keneakexō mai pōkini a mēraxō uva tsinīxiki. Askatari pexe keya fani anoxō kexexiki tsōa mēeyamanō. Mā askafakī fetsaxō a ano yonofaifo ato ināyoni. Nāskafata mai fetsa ari kayoni.

² Nā fimimistīa mā āfe fana pachianino, āfe ifāfe a yonoxomis nīchini, a kexexonafo ato yōkaxō āfe fana fimifo fixotanō nā āfenā tiiri.

³ Akka āfe kaifo fichikaxō nā fana kexeafāfe achikaxō seteketsakaxō, afaa ināxaxoma afaamaiskōi nīchinifo.

⁴ Nāskata nā tare ifāfe anā a yonoxomis fetsa nīchini. Akka nāri Ichaketsayanā tokirinī mapoki tsakakī imi tofeketsafono oni.

⁵ Nāskano afianā fetsari nīchiano nāa retenifo. Mā reteafono ranāfaxō ato nīchini, nāfori ato seteketsayanā, ranāri ato retenifo.

⁶ “Mā ato askafafono, nāno āfe fake fisti ini, nā aō noikōiai. Nāskakē chipokōi fakī āfe fake nīchini: ‘Ēfe fake nikatirofokī,’ ixō.

⁷ Akka mā āfe fake nīchia kaito fichikanax nā tare kexemisfo yoinānifo iskakani: ‘Nato āfe apa naano na fanafo fixii kiki, a nari nō retenō na tare nōkonā inō,’ ” ikanax yoinānifo.

⁸ Nāskakē achikaxō mā retakaxō tare pasotai potanifo.

⁹ Nāskakē Jesús ato yōkani: “Akka, ¿a tare ifāfe ato afeska fatiromē? Kaxō a tare kexemisfo ato retēkī mitoxō fetsafo āfe tare inātiro afāfe kexxonōfo,” ixō Jesús ato yoini.

¹⁰⁻¹¹ “Akka, ¿a kirika kenekī iskafaino mā anemismamē?”

Tokiri pexe fapaikakī nā pexe famisfāfe na tokiri chakara ixō potafono, fetsafāfe fichixō na tokiri sharakōi ikaxō akiki pexe fatirofo. Nāskarifiakī xanīfofofāfe, ‘Nakai afama,’ ikaxō Niospa Fake ōikaspamisfo. Askafafiaifono Niospa āfe Fake katonī nōko Ifo inō. Nāskakē nō akiki inimakōi, ixō kirika ano kenenifo,” Jesús ato fani.

¹² Nāskakē Jesús achikaxō karaxa mēra ikimapainifo, mā tāpikaxō meka fetsafaxō atoōnoa yoiaito. Akka achipaifkani yorafoki mesekani a makinoax fonifo.

*“¿Xanīfo nō kori inātiro mē noko yōkaito?” ixō Jesús yōkanifo
(Mt. 22.15-22; Lc. 20.20-26)*

¹³ Nāskakē chipo fariseofāfe Herodes feta afe yorafo Jesús ano nīchinifo, fanīrira Jesús ato yoiaito afāfe yōanōfo āto xanīfofo yoikakī.

¹⁴ Nāskakē mā akiki fēkaxō nāfāfe yōkanifo iskafakakī: “Maestro, mā nō tāpia a mī yoiai anori chanīmakōi mī yoisim. Epa Niospa noko shināmapaiyai anorikōi mēstekōi mī noko yoisim. Afara yoipai mī ranomispa, afarikai mī fomāmisma, na yorafāfe yoiaifo anori mī nikatama, a shināifo anori mī shināmisma. Askatamaroko Epa Niospa meka shara mēstekōi mī yoisim. Akka chanīmakōi noko yoife na romanō xanīfo nō kopifatiromakī askayamakī nō kopifatiroma rakikīa,” ixō yōkaifono,

¹⁵ Jesús tāpini feparapaiyāifāfe, nāskaxō ato yoini iskafakī: “¿Afeskakī mā ea feparapaimē?” ato fata, “Ea kori exe fisti fēxokāfe, ē ōinō,” ato faino,

¹⁶ kori exe fisti fēxofafono, nā kori exe ōiyanā Jesús ato yōkani: “¿Tsōa femānā na keskaramē? ¿Tsōa aneri na kori exe ano keneamē?” ato faino, kemanifo iskafakakī: “Nōko xanīfo César keskara,” faifono,

¹⁷ Jesús ato yoini iskafakī: “Akka na kori exe Césarnākē César inākāfe, akka Niosnākē Niosri inākāfe,” ato faino, “¡Keel! ¡Nikakapo! Āfe meka finakōia tsōakai finōtiroma,” ikanax rateyanā yoinānifo.

*“Yora naax anā otoax, ¿afeskatiromē?” ixō Jesús yōkanifo
(Mt. 22.23-33; Lc. 20.27-40)*

¹⁸ Nāskakē saduceofo Jesús ōifokani fonifo. Nā saduceofāfe yoimisfo iskafakakī: “Yora naaxkai anā afeskax ototiroma,” ixō yoimisfo. Nāskakē mā fokaxō yōkanifo iskafakakī:

¹⁹ “Maestro, Moisés noko kirika kenexoni iskafakī yoiki: ‘Feronāfake fetsa āfiyax natiro afeta fake akamax, akka nā kēro ifomafa onefētsa fitiro, afeta fake axiki nā fake nā onefetsa naitanā inō.’

²⁰ Akka nā nane tii siete feronāfake inifo. Āto ochi iyoa āfiyai taeni, mā āfiyax afeta fake akamax nani.

²¹ Nāskata nāa chipoko fētsa nā kēro ifomafa fini. Nāskarīfiai nāari nani afeta fake akamax. Afianā chipoko fētsari fini, nāari nani afeta fake akamax.

²² Nāskakē nā siete feronāfakefāfe nā kēro fīpakanax, afeta fake akanamax nai keyonifo. Chipokōitani nā kērori nani.

²³ “Nāskakē mā otokaxō, ¿fatoto nā kēro fiximē, nā fistimāi fīpakaxō?” ixō yōkaifono,

²⁴ Jesús ato kemani: “Māakai afaa tāpiama. Na Niospa meka yoikī kenenifokairoko mā ōikatsaxakī. Niospa āfe sharaōnoari mā ōimisma.

²⁵ Yorafo nakanax mā anā otokanax, anā āfiyatirofoma, anāri āto āfi feta fake atirofoma. Askatamaroko nā ājiri nai mēranoafo keskara itirofo.

²⁶⁻²⁷ Akka, ¿a yorafo nakanax anā otokiaifoōnoa yoikī Moisés kirika kenekī yoiniōnoa mā anemismamē? Niospa fana koofai mēraxō Moisés yoini iskafakī: ‘Ēfi mī xinifāfe āto Nioskōi, Abraham ikaino, Isaaca ikaino, Jacobo ikaino,’ ixō Niospa yoini. Akka Niospa naafoma keskara ato ōi, aōnoax keyokōi niafono. Akka māakai afaa tāpiama mā mā chanīmis,’ ixō Jesús ato yoini.

*“Akka, ¿fato meka sharafinakōiamē, nā Niospa shināmanaino Moisés ato yoiniraka?” ikaxō fariseofāfe Jesús yōkanifo
(Mt. 22.34-40)*

²⁸ A Moisés yoikī kirika keneni keskara ato tāpimamis Jesús ano nokoni, Jesús anoax ato fe yoināino māmāi tāpixō Jesúsmāi ato kemasharakōiaino. Nāskaxō akairi yōkani: “Akka, ¿fato meka sharafinakōiamē, nā Niospa shināmanaino Moisés keneniraka sharafinakōia?” ixō yōkaito,

²⁹ Jesús kemani iskafakī: “Niospa yoini iskafakī: ‘A sharafinakōia ē mia yoinō nikapo. Nā israelifo nikasharafe, nōko Ifo Nios fisti nōko Ifokī anā ano fetsamaki.

³⁰ Nōko Ifo Nios noisharakōikāfe nōko ōitifoyaxō, nōko yōshi sharafoyaxori noikāfe. Nōko mapo mēraxori shināsharakāfe, nōko kerex sharafoyaxō,’ ixō nā meka shara Moisés keneni.

³¹ Nā ē mato taefakī yoia keskari nāno fetsari. ‘Nā mato chaima nikari noisharakōikāfe a mā mā noimesharakōiai keskafakāfe.’ Na meka rafe sharafinakōia Niospa yoini,” ixō Jesús ato yoini.

³² Naskafaito a Moisés yoikī kirika keneni keskara ato tāpimamisto yoini iskafakī: “Mī yoikōi. Maestro, chanīmakōi mī yoimis. Nāno Nios fisti, anā ano a keskara fetsama.

³³ Askatari iskafakī mī yoia, mātō ōitifoyaxō Nios noikōikāfe, mātō shinā sharafoyaxori askafakāfe, mātō yōshi sharafoyaxori askafakāfe, mātō kerexfofaxori askafakāfe, a mato chaima nikafori noisharakōikāfe, a mā mā noimeai keskafakī askatari a afarafo nō Nios inā, nāfo nō finōinīfofana sharakōikī. A nō afara koakī nō Nios ināfori nāfori nō finōinīfofana nōko ōitifoyaxō nō Nios noikōikī,” ixō mī yoia fani.

³⁴ Askafakī yoisharaito nikakī Jesús yoini iskafakī: “Epa Niospa afe yorafo imasharai keskara mīri mī tāpiax mī afe nīpanaka,” ixō yoiaito, nikakakī tsoa anā tooxinima. Askata anā tsōa yōkanima.

*“Akka, ¿tsōa fenamē Cristo?” ixō Jesús ato yōkani
(Mt. 22.41-46; Lc. 20.41-44)*

³⁵ Jesús Nios kīfiti pexefā mēraxō ato tāpimayanā ato yōkani iskafakī: “Akka, ¿afeskakī a Moisés yoikī kirika keneni keskara ato tāpimamisfāfe na Cristo David āfe fenara fakanimē?

³⁶ Akka Niospa Yōshi Sharapa shināmanaino nā David yoini iskafakī:

Epa Niospa ēfe Ifo yoini iskafakī: ‘Mī efe xanīfokōi īpanakaki. Akka nā mia noikaspaifo mī ato finōkōinō ē ato mī nāmā nīchikai.’

ixō Niospa yoinino David keneni.

³⁷ “Akka, ¿afeskai Cristo David āfe fena itiomē, nā David Cristo ēfe Ifora fafiapaonino?”

Nāskakē yōrafā rasi inimanifo Jesús ato yoiaito nikakani.

Jesús ato yōani a Moisés yoikī kirika keneni keskara ato tāpimamisfāfe anorima ato yoiaifono

(Mt. 23.1-36; Lc. 11.37-54; 20.45-47)

³⁸ Nāskano Jesús ato yoianā iska fakāki ato yoini: “Ōisharakakī a Moisés yoikī kirika keneni keskara ato tāpimamisfo tari chainipa safekanax fofāsamisfoki, askatari nafāfe tāpikōiara noko fanōfora ipaikani. Yora ichapafo ano fofāsapaimisfo noko yoisharakōinōra ikanax, nāfo kakapaimisfo.

³⁹ Nāfāfe ichanāti pe xe mēraxō tsaoti sharakōi fenamisfo noko ōinōfora ikaxō. A piaifo anoaxri ano tsaopaikakī sharakōi ano tsaopaimisfo.

⁴⁰ Nāskarafāfe kēro ifomafafo ato pe xe fiamisfo, nō mato Nios kīfioxonira ikaxō chaikōi Nios kīfimisfo atoki kaxemetsamapaiyanā. Nāfo omiskōi finakōixikani Epa Niospa ato omiskōimanaino,” ixō Jesús ato yoini.

Kēro ifomafa afaamais fixō Epa Nios ināsharakōini

(Lc. 21.1-4)

⁴¹ Nāskata Jesús tsaoxō ōini yorafāfe a kori naneti mēra kori naneafāfe Nios kīfiti pexefā mēraxō. Akka nā afama mishti ichapayafāfe kori naneti mēra kori ichapa nanenifo.

⁴² Nāskafafono nāno kēro ifomafa nokoni. Nā kēro ifomafa afaamais fixō āfe kori exe rafe nā kori naneti mēra āfe kori nanekī mitofaito Jesús ōini.

⁴³⁻⁴⁴ Nāskafaito ōikī Jesús aōxō tāpimisfo kenaxō iska fakāki ato yoini: “Chanīma ē mato yoikōi, nā kēro ifomafa afaamaisfixō fetsafo finōmainifofā āfe kori exe rafe nā kori naneti mēra nanea. Akka nā kori ichapayafāfe nā kori naneti mēra mā āto kori nanefikakī tsōa keyo naneama. Akka nā kēro ifomafa afaamaisfixō nā kori naneti mēra āfe kori nanekī mitokōia. Nāskakē a pi ai anā afanā fitiroma,” ixō Jesús ato yoini.

13

Jesús ato yoini na Nios kīfiti pexefā pāōixii ixō

(Mt. 24.1-2; Lc. 21.5-6)

¹ Mā Jesús a Nios kīfiti pexefā mēranoax tsekeano, a aōxō tāpimis fētsa yoini iska fakāki: “Maestro, ōipo, nōko Nios kīfiti pexefo tokirifo petsanāmeakea sharashtakōifo,” ixō yoiaito,
² Jesús kemani iska fakāki: “¿Mā mī ōimē na Nios kīfiti pexefo? Akka, ¿na tokirifo anā petsanamexima chipo ma oi fetsexii anākai na tokirifo petsanāmexima?” ixō Jesús ato yoini.

Afaa afeskaximākai mā chaima nōko mai keyoaino Jesús ato yoini

(Mt. 24.3-28; Lc. 17.22-24; 21.7-24)

³ Nāskakata machi Olivos ano fonifo, anoaxō ōiafo Nios kīfiti pexefā chaima ini. Nāno Jesús tsaono, Pedro ikaino, Santiago ikaino, Juan ikaino, Andrés ikaino one yōkanifo tsōa ato nikayamanō iska fakakāki:

⁴ “Nō tāpipaikai noko yoife. Na mī yoia i keskai afetīa iximākai, afeskaxō nō tāpitiromakī. Askayoamano afaa nō ōitiromakī noko tāpimafe,” faifono,

⁵⁻⁶ Jesús ato kemani iska fakāki: “Kexemesharakani mā ato nikaino mato afara chakafamatirofokī. Yora ichapafo fe kani kiki, ēfe aneōnoa mato yoikī iska fakani kiki. ‘Ē Cristoki,’ ikaxō yora ichapafo ato pārapaikani kiki.

⁷ “Akka yorafo retenāifāfe nikai rateyamakāfe. Nā ē yoia i keskai nāskakōixii. Akka fena nōko mai keyoima, chipo ixii.

⁸ Akka yorafo mai fetsa anoax mēnāpaiyaifono, yora fetsafori mai fetsa anoax retenāixikani. Nāskaifono mai fetsa anoax mai naya naya ixii. Askatari fonāiki finakōixikani afaa pikanima. Askatari mekai finakōixikani. Nāskai omiskōi taexikani.

⁹ “Akka māroko kexemesharakāfe. Mato achikaxō xanīfofo mato inākani kiki, nāskakaxō mato koshakani kiki ichanāti pe xe mēraxō. Xanīfofōfāfe ferotaifi mato iyoxikani. Eōxō mato askafaifono, mā ato yoisharakōixikani.

¹⁰ Akka a omiskōiaifo nokoyoamano efe īpaxanōfo ēfe meka sharaōnoa ato yoikāfe, nā mai tio anoafō.

¹¹ Akka mato achikaxō mato iyoxikani, xanīfofo mato ināxikakī. Shināchakayamakāfe nō ato afaa faikaimē iyamakāfe. Mā afaa shināpaimakai, nā Niospa mato shināmapaiyai anori mā ato yoikai. Akka mā mekaimakai Niospa Yōshi Shara mekai kiki.

¹² A yorafāfe āto extofo yora fetsafo ato achimaxikani ato retenōfo. Ato apafāferi āto fakefo yora fetsafo ato achimaxikani. Nāskarifiakī āto fakefāfe āto apakōifo ato chakafakī mekafaxikani, yora fetsafāfe ato retenōfo.

¹³ Akka eōxō keyokōichi mato noikaspaixikani. Akka mato noikaspaifafono mā eōnoax omiskōifiki mā ēfe meka nikasharakōiaito ē mato kexesharakōixii Epa Nios fe mā ishara-pakexanō.

¹⁴ “Nā Niospa meka yoimisto Daniel a inōpokoai yoikī kirika keneni Nios kīfiti pexefā mēra afara chakakōi faxikani kiki ixō yoikī. (Nāskakē na kirika kenea anexō tāpikāfe.) Nā chakafinakōia ōikanax, nā Judea anoafō machi keya ano ichorisatakāfe.

¹⁵ Askatari āfe pexe māmākīa tsoaxō ato fichiax koshikōi fotopakekafā āfe afaa fiamax ichtiro.

¹⁶ Askatari a āfe tare ano yonoaito anā oxō āfe rapati fitiroma.

¹⁷ Askatari a kēro fake naneafō fe a fake yome pishta chocho amaifo omiskōixikani māmāi yorafo omiskōifinakōiaifono.

¹⁸ Askatamaroko mā Epa Nios kīfikāfe mato kexesharanō ichoxō yōtaino matsi mexikakīma.

¹⁹ Askatari a omiskōiaifo nokoxii, taeyoi askakatsaxakīma. Nā Niospa yora onifakī taefaniīa tsōa askara ōiyomisma. Askatari anā tsoa chipo omiskōinakama.

²⁰ Akka a omiskōiaifo nōko Ifāfe xateyamanō, tsoa nikeranama nai keyokeranifo. Akka āfe yorafo ato noikī omiskōinōfoma xateni atomāi katonixakī.

²¹ “Akka fētsa mato yoikī iskafaino: ‘Ōikapō nakīa Cristo,’ mato fayanā: ‘Oa onokīa, ōikapō,’ mato faito nikayamakāfe.

²² Akka nā chanīmīso fekanī, ē Cristora ixikani, nāfo nō Niosxō nō mato yoirā ikani. Nāskakaxō tsōa atiroma keskara fakani Satanās yōshixō mato pārāpaikakī. Nā Niospa ato katoafori nāfo ato pārāpaikani.

²³ Akka ōisharakāfe afetiāma keyokōi mē mato yoiyomiski,” Jesūs ato fani.

*Niospa Fake fotoaino afe keskara iximākai ixō Jesūs ato yoini
(Mt. 24.29-35, 42-44; Lc. 21.25-36)*

²⁴⁻²⁵ Anā Jesūs ato yoini iskafakī: “Akka nā penatari, nā omiskōiaifo mā keyoano, xini fakishkōi ixii, oxeri anā chaxaxima. Fishifori nai mēranoax pakei fetsexii, askatari nā nai mēranoafō naya naya iki fetsexii.

²⁶ Askatari ea ōixikani nai mēranoax nai kōifoya ē fotoaito sharafinakōia ēfe sharafoya ē fotoxii.

²⁷ Nāskatari ēfe ājirifo ē nīchixii a ē ato katoafo ato ichanāfatanōfo, a chai ikafo ekeki efenōfo.

²⁸ “Akka shinākāpo ē mato yoinō. Mā yōkkafaiino mā tāpitiro āfe pei sirikiāito. Nāskakē āfe peifo keyopaito ōikī mā tāpitiro māmāi chaima xiniaito.

²⁹ Nāskarifiakī afarafo afeskaraito ōikī mā tāpitiro mē chaima oaino askai fetsexii.

³⁰ Ē mato pārāima ē mato yoikōi, na ē mato yoiāi keskara nono mai anoxō yorafāfe nayokaxōma ōiyokani.

³¹ Akka nai fe mai keyoi. Akka ēfe meka fisti keyonakama, nā ē mato yoiāi keskakōi.

³² “Afetīara nai mēranoax ē oxii tsōakai tāpiama. Nā ājirifāfe nai mēra ifiakaxō tāpiafoma. Ēriki tāpiama. Ēfe Epa Nios fistichi tāpia.

³³ “Nāskakē mā itipinīsharayanā kexemesharakāfe Epa Nios kīfiyanā. Mā tāpiamakī afetiāra ē oxikai.

³⁴ Akka feronāfake fētsa fakira chaikakī, akka kayoxoma a yonoxomisfo yoini āfe pexe kexexonōfo. Nāskaxō ato yono ināketsani yononōfo, akka fētsa āfe pexe fepoti anoxō kexesharayanā mananō yoini.

³⁵⁻³⁶ Nāskarifiāi māri kexemesharakāfe, mā tāpiamakī fatora penata ē matoki nokorisanikani. Xini kaino nokoyamata, yamenakefanaino iyamata, takaranā akaino iyamata, fakishparikōi ē matoki nokotiroki. Iskaratīa oimara ea faax mā oxakē ē mato fichitoshitiroki, nāskakē itipinīsharaxō ea yonoxosharakāfe isharakōixō.

³⁷ Nā ē mato yoiāi keskafakī, keyokōi ē yorafo yoi itipinīsharakāfe ixō ē ato yoi,” Jesūs ato fani.

14

*“Āfesaxō nō Jesūs retetiromē?” ixō shinānifo
(Mt. 26.1-5; Lc. 22.1-2; Jn. 11.45-53)*

¹ Mā chaima oxa rafeta āto fista Pascua ikaino, nā fistatīa pāa faraxatimais pipaonifo, nā Niospa ājirinī Ejipto anoxō āto fake iyoafō rētenima shinākakī. Nāskaifono a ato Nios kīfixomisfāfe āto xanīfofo feta a Moisés yoikī kirika keneni keskara ato tāpimamisfāfe, afesaxoma Jesūs pārāpainifo pārakaxō retexikakī.

² Akka achixō retēpaifikani, iskanifo: “Fistatīakai nō achitiroma yorafā rasi mekai fetsekani nokoki ōitifishkitirofo,” ikanax yoinānifo Jesūs retēpaifikani.

*Kēromā Jesūs shinākī āfe mapoki pirofomā nachini
(Mt. 26.6-13; Jn. 12.1-8)*

³ Akka Jesús Betania ano ini, Simón pexe ano. Nā Simón “Rashkishiai” fapaonifo. Nāato pexe ano Jesús mīsa kamaki tsaono, nāno akiki kēro fisti oni manishomo “alabastro” foikai. Na manishomo mēra xinia pirofomā osia nanea nakas sharakōi ini, āfe ane “nardo.” Nā pirofomā kopipaekōi ini, na manishomo āfe fepoti fepepō maneakefōfā Jesús āfe mapoki nachini, nā kēromā.

⁴ Askafaito ōikani nā anoafo ōititishkianā āa ranā yoinānifo iskakani: “¿Afeskakī na kēromā na pirofomā sharakōi chakanafaimē?”

⁵ Ato minixō, aōxō kori ichapa fixō a afaamaisfo ato inākerana,” ikaxō nā kēro feratenifo.

⁶ Askafaifāfe ōikī Jesús ato yoini iskafakī: “Enekāfe. ¿Afeskafakī na kēro mā fekaxtefaimē? Na ea iskafai sharakī,” ato fani.

⁷ “Akka nā afaamaisfori mato fe ipanakafo, fatora penata mā ato sharafaxopaikī mā ato sharafaxotiro. Akka eakai mēxotaima mā ea anā ōima.

⁸ Akka na kēromā ea iskafakī ea sharafa. Ē nayoamano taefakī ēfe yoraki pirofomā nachia.

⁹ Ē mato pāraima, fanīxōra na meka shara eōnoa yoikakī nā mai tio anoxō na kēromā ea iskafaōnoa yoixikani. Askatari na kēroōnoa shināpakenakafo, shināmakiyamaxikakī,” ixō Jesús ato yoini.

Judaspa aōxō tāpifikatsaxakī Jesús ato achimani
(Mt. 26.14-16; Lc. 22.3-6)

¹⁰ Nāskafakī Jesús ato yoiaino nā afe rafemis fetsa nā docefo ano, nā Judas Iscariote a ato Nios kīfixomis xanīfofo fe mekaikai kani. Mā kaxō ato yoini iskafakī: “¿Afe tii mā ea kopifatiromē ē mato Jesús achixonō?” ato faito,

¹¹ nikakani inimakōiyanā yoikī iskafanifo: “Nō mia kori ichapa ināikai,” faifono, nāskakē Judaspa shināni: “Afeskaxomāi ē Jesús ato achimanō,” ixō shināni.

Mā chaima reteafono Jesús aōxō tāpimisfo feta yātapake pinī
(Mt. 26.17-29; Lc. 22.7-23; Jn. 13.21-30; 1 Co. 11.23-26)

¹² Akka nā fistatīa pāa faraxatimais pipaonifo. Afia penatari Pascua fistatīa ovejanā fake retexō pinifo. Nāskano aōxō tāpimisfāfe Jesús yōkanifo. “¿Fani mī fichipaimē ano kaxō nō itipinī fanō, anoxō Pascuatīa yātapake pixiki?” ixō yōkaifono,

¹³ nāskakē Jesús aōxō tāpimis rafe nīchini, iskafakī ato yoiyanā: “Pexe rasi ano fotakāfe. Nānoa feronāfake fisti mā fichikaikai keshoki faka tetsaomexō foikaino, nā feronāfake fe fōtakāfe.

¹⁴ Akka nā feronāfake ikiai ano afe ikixō, nānoa pexe ifo yōkakāfe iskafakī: ‘Nōko Maestro noko yoikī iskafaa: “Nā pexe ifo yōkakāfe, ¿Fato kene mēraxō Pascua fistatīa eōxō tāpimisfo feta yātapake ē pitiromākī?” ixō yōkakāfe.’

¹⁵ Mā askafakī yōkaito pexe kene efapa fomākīanoa mato ispai kiki mā itipinīkōia. Nāno noko itipinīsharafaxokāfe,” Jesús aōxō tāpimisfo rafe fani.

¹⁶ Ato askafaino aōxō tāpimis rafe fonifo. Mā fokanax pexe rasi ano nokonifo. Mā nokokaxō nā Jesús ato yoiā keskarakōi fichitoshinifo. Nānoxō itipinī fanifo Pascua fistatīa pixikakī.

¹⁷ Mā fakishaino Jesús aōxō tāpimis docefo fe nokonifo.

¹⁸ Mā fokaxō mīsa ano tsoaxō piaifono Jesús ato yoini. “Ē mato pāraima fatora na mā efeta piai fētsa mā ea ato achimafainaka,” ato faino,

¹⁹ nikakani shināmītsakōiyanā maikiri fepepakefōfānifo. Nāskakanax āa ranā yoinānifo iskakani: “¿Tsoamē, ēraka?” Fetsari iskani: “Ōitsai, ēraka,” iki fetsenifo.

²⁰ Askaifono Jesús ato kemani: “Nā mā docefo anoafāfe, nā mā efeta sapaki piai fētsa mā ea yōaikai ea achinōfo.

²¹ Nā Niospa meka yoiki, eōnoa yoikī kenenifo keskai ē askakōi. Akka na feronāfāke ea ato achimafai akairi omiskōikōixii. Akka na feronāfāke shara ikerana fakeyamanixakī,” ixō Jesús ato yoini.

²² Piaifono Jesús pāa tsoainīfōfā. Apa Nios kīfiki aicho fata, mā kaxkepaxēto ato ināni, iskafakī ato yoiyanā: “Na ēfe nami keskaraki pikāfe,” ato fani.

²³ Nāskata mā Apa Nios aicho faxō, kecho tsoainīfōfā ato ināni. Nāskakē mā ato ināno keyokōichi ayanifo.

²⁴ Nāskaxō ato yoikī iskafani: “Nafi ēfe imi keskaraki. Mē naino ēfe imi foxii. Keyokōi yorāfāfe afara chakafamisfono ē atoōnoax naikai. Ē askaino Niospa ato potapakenakama. Ē ato naxōi āto chaka ato soaxoxiki.

²⁵ Ē mato pāraima. Ē mato yoikōi ē anā mato feta na fimi ene ayaima. Mē nai mēra kai. Nā ēfe Epa Nios xanīfokōi ika anoxō ē anā mato feta na fimi ene shara ayaxii,” ixō ato yoini.

“Ē Jesús ōimisma,” Pedro ixaino Jesús ato yoini

(Mt. 26.30-35; Lc. 22.31-34; Jn. 13.36-38)

²⁶ Nāskata mā fanāiki xatekata machi Olivos ano fonifo.

²⁷ Nāskata Jesús ato yoini iskafakī: “A na fakishi keyokōi mā ea shināmakī fetsei. Akka kirika ano kenekī iskafakī yoinifo: ‘Āfe ifo reteaifono, āfe ovejafo ichoi fetsetirofo,’ ixō kirika ano kenenifo,” ato fani.

²⁸ “Akka ea retefaifono mē otox Galilea ano ē nokoi taexii mā nokoamano,” ixō ato yoini.

²⁹ Ato askafaito nikakī Pedro kemani. “Akka keyokōi shināmakifaifono ēkai mia shināmakima,” ixō yoiato,

³⁰ nikakī akka Jesús yoini iskafakī: “Ē mia pāraima na fakish fistichi takara keoi rafeyamano, ‘Ē Jesús ōimismara,’ mī ato fai tres fakī.”

³¹ Askafaito nikakī anā Pedro kemani. “Maa. Mia retefaifono ē mefe nai. Ē ōimismara ē mia faima,” fani.

Pedro askafaito nikakakī keyokōichi askafakī fetsanifo.

Getsemanī anoxō Jesús Apa Nios kīfīni

(Mt. 26.36-46; Lc. 22.39-46)

³² Nāskakata nā ifi mapoa āfe ane Getsemanī ano nokonifo. Nānoxō Jesús aōxō tāpimisfo yoini iskafakī: “Nono tsaokāfe. Ē Epa Nios kīfīyotanō,” ato fani.

³³ Akka Pedro iyota, Santiago* iyota, Juan iyota ato fani. Nāskaxō āfe yora meeni shināmitsakōiyanā fekaxtekōiatio,

³⁴ nāskakī ato yoini: “Ēfe yōshi shināmitsakōi napaiyaito ē meikai. Nono nētekāfe, akka mā oxaki,” ato fani.

³⁵ Nāato askafata ori chaimashta Jesús ares kani. Nānoxō ratokonō mai chachipakefōfā Apa Nios kīfīkī iskafani: “Epa, ea mia kexetiromakī ea kexefe ea reteaifono ē omiskōinōma.

³⁶ Epa, mī keyokōi tāpiakī. Ea mā ifipaikī ea mā ifitiro ē omiskōinōma. Akka nā ē apaiyai keskafakīma nā mī ea amapaiyai keskafafe,” Apa fani.

³⁷ Nāskata mā aōxō tāpimisfo ano oxō ōia oxafo ato fichitoshini. Nāskaxō Pedro yoini: “Simón, ĵmā mī oxamē? ĵAfeskakī mī pishta oxa tenetiromamē?”

³⁸ Moikaxō Epa Nios kīfīkāfe Satanás chakata mato chakafamapaiyai keskara axikakima. Chanīma, nā Epa Niospa mato amapaiyai keskara mato shinā mēraxō mā apaifīkī mā atiroma. Akka mato yora pachikōikī,” ixō Jesús Pedro yoini.

³⁹ Ato askafata anā kani Apa Nios kīfīkai a yoitana keskafakī.

⁴⁰ Nāskata anā oxō ato fichitoshini aōxō tāpimisfo oxafono, oxa paemei fetsoafono, a Jesús ato yoiatī keskara tāpikaxoma tsōa kemanima.

⁴¹ Nāato askafata anā ato makinoax kani orishtaxō Apa Nios kīfīkai. Mā Apa Nios kīfitani oxō ato yoitoshini iskafakī: “ĵAi mā oxamē tenekōiyanā? Moikāfe. Akka iskaratīa a ea ato achimaniyoai mā chaima oi kiki. Yora chakafāfe ea achifenōfo ato efe ikiki.

⁴² Fininīfōfākāfe nō kanō. Mā chaima oi kiki a ea ato achimaniyoai,” Jesús ato fani.

Jesús achinifo

(Mt. 26.47-56; Lc. 22.47-53; Jn. 18.2-11)

⁴³ Jesús ato yoiaino Judas nokoni, nā Judaspa Jesúsxō tāpifikatsaxakī, yorafā risafo fe oni. Nā yorafa kenofoya ifi xatefoya fenifo, a ato Nios kīfīxomisfāfe āto xanīfofo feta a Moisés yoiakī kirika kenenī keskara ato tāpimamisfāfe, a xanīfo fetsafāferi ato nīchiafono.

⁴⁴ Judaspa nā ato efeaito iskafakī ato yoiyoni: “A ē kokoki tsoo akaito ōikī koshi achirisafaxikākī metexkere axō iyotaxikākī,” ixō ato yoini.

⁴⁵ Nāskata Judas mā Jesús ano nokoxō iskafakī yoini: “ĵMaestro, mīmē?” ixō kokotoshini.

⁴⁶ Nāskafaito ōikakī nā Judas fe foafāfe Jesús achinifo.

⁴⁷ Akka Jesús achiaifāfe ōikī a aōxō tāpimis fētsa āfe keno chainipa tsekainīfōfā, a ato Nios kīfīxomisfāfe āto xanīfāfe ina paxteni.

⁴⁸ Nāskakē Jesús yorafa yoini iskafakī: “ĵAfeskai kenofoya ifi xatefoya mā oamē ea achiyoi oa ē yometso keskarakē?”

⁴⁹ Pena tii ē mato fe itiani Nios kīfīti pexefā mēraxō ē mato tāpimani, akka mākai ea achipaimisma. Akka nā eōnoa yoiakī kenenīfo keskafakī mā ea achi,” ixō Jesús ato yoini.

⁵⁰ Ato askafaino aōxō tāpimisfo Jesús ōifaikani. Ichoi fetsenifo a makinoax.

⁵¹ Akka naetapa fistichi sabanānā rakoxō Jesús chīfafainaito ōikakī achinifo.

⁵² Akka achiaifono āfe sabanā potafaini chitoria ichoni.

Xanīfo finakōiafo ano Jesús iyonifo

(Mt. 26.57-68; Lc. 22.54-55, 63-71; Jn. 18.12-14, 19-24)

* **14:33** Santiago āfe ane fetsa Jacobo ini.

⁵³ Nāskakē Jesús achikaxō iyonifo a ato Nios kīfixomisfāfe āto xanīfāfe pexe ano. Nāskakē keyokōi anofistiax ichanānifo a ato Nios kīfixomisfāfe āto xanīfofo fe a judeofāfe āto xanīfofo a Moisés yoikī kirika keneni keskara ato tāpimamisfori ato fe inifo.

⁵⁴ Akka Pedro acho kakī chai ixō ōifoni. Nāskata a ato Nios kīfixomisfāfe āto xanīfāfe pexe emāiti nokoni. Nānoax a Nios kīfīti pexefā kexemisfo fe chii ketefaxo fe fe yooni.

⁵⁵ A ato Nios kīfixomis xanīfofōfāfe a āto xanīfofinakōiafo fe isakai yoinānifo: “Afeskaxomāi nō pārānō na Jesús afara chakafara ixō retexiki. Akka afaakai chakafa nō nikaima,” inifo.

⁵⁶ Nāskaifono yora ichapafāfe, “Na Jesús afara chakafaito nō ōia,” ixō pāraketsanifo. Askafafiakakī anoris yoiketsanifoma. Āa chanī fetsenifo.

⁵⁷ Askafaiyono ranāri fininīfōfākāta āa mekafakakī chakafakī fetsanifo iskafakakī:

⁵⁸ “Nō nikaino na feronāfake iskaita: ‘Na Nios kīfīti pexefā yorafāfe akafo ē pāofaxii. Nāskata tres nia oxata ē anā fetsafaxii, anā yorafāfe efeta akanima, eres fisti ē aki,’ ixō yoiaito nō nikaita.”

⁵⁹ Askafakī yoifīkakī tsōa anoris yoinifoma, āa chanī fetsenifo.

⁶⁰ Nāskafaifono a ato Nios kīfixomisfāfe āto xanīfāfe ato nēxpakīa niinākafā iskafakī Jesús yōkani: “¿Mī kemamitsaimamē afamē na mīōnoa meka chaka yoiaino?” ixō yoini.

⁶¹ Askafaino akka Jesús tooxinima, pištakai kemanima. Afianā a ato Nios kīfixomisfāfe āto xanīfāfe iskafakī yōkani: “¿Mīmē Cristo? ¿Nā Nios nipanakato āfe Fakemē, mī?”

⁶² Askafaito nikakī Jesús kemani: “Ēje, ēkīa Niospa Fake. Akka mā ea ōixii ēfe Epa ketaxamei āfe pōya kayakai aōri ē tsāokē xanīfo finakōia ēfe Epa fe. Askatarī mā ea ōixii nai kōi mēranoax ē anā fotofaito,” Jesús ato fani.

⁶³ Askafaito nikakī a Nios ato kīfixomisfāfe āto xanīfāfe āfe rapati faxteni fetsafāfe tāpinōfo nā xanīfo ōitīfishkikaito. Nāskaxō ato yoini iskafakī: “Mā nōakōi nō nikakī noko anā tsōa yoitūromaki nō tāpinō.

⁶⁴ Mā mā nikakī na feronāfake āfe mekapa Nios chakafakī mekafaito. Akka, ¿nō afeskafaimē?” ato faito keyokōichi, “Nanōki,” fanifo.

⁶⁵ Nāskakata mā fenexkaxō āfe femānāki kemo mechoketsayanā koshaketsanifo iskafakī yoiyanā: “Tsōa mia koshamakī tāpiyo noko yoixiki,” faifono, a Nios kīfīti pexefā kexemisfāferi fepasketsanifo.

“Ē Jesús ōimisma,” Pedro ini

(Mt. 26.69-75; Lc. 22.56-62; Jn. 18.15-18, 25-29)

⁶⁶⁻⁶⁷ Pedro pexefā emāiti ato fe tsoano, nāno akiki a xanīfo yonoxomis xomaya nokoni. Nāno ato fe chii ketefaax tsooax yooaito ōiki, iskafakī yoini: “Mīri Nazarete anoax Jesús fe kafāsamis,” faino,

⁶⁸ akka Pedro iskafakī kemani: “Ēkai Jesús ōimisma. Ēkai afaa tāpiama tsoaraōnoa mī yoi,” fata, pexefā kāiti ano Pedro nasteinīfōfānaino, takara keonākafāni.

⁶⁹ Afianā nā xanīfo yonoxomis xomayato Pedro ōiki, nānoafo iskafakī ato yoini: “A na feronāfake Jesús fe rafemis ōikapo, a nā Jesús Nazarete anoax fe kafāsamis,” fani.

⁷⁰ Akka Pedro anā iskanī: “Maa, ēkai Jesús fe rafemisma,” ini. Nāskaino nā anoafāfe anā Pedro yōakakī iskafanifo: “Chanīma, mīri Jesús fe rafemis. Mīri Galilea anoakī mī mekai nā Jesús mekai keskarakī,” faifono,

⁷¹ akka Pedro ato yoikī iskafani: “Ē mato pāraima, ē chanīaito ea Niospa omiskōimatiro. Niospa tāpia chanīmakōi ē mato yoi. Ēkai na Jesús ōimisma tsoaraōnoa mā yoi,” Pedro ato fani.

⁷² Pedro nāskaino anā takara keoinākafāni. Nāskaino Pedro shinātani nā Jesús iskafakī yoita keskara: “Taeyoi takara keofi rafeamano, ‘Ē Jesús ōimismara,’ mī ea faxii tres fakī,” ixō yoitano, nā shinātani Pedro shināmitsai oiakōini.

15

Pilato ano Jesús iyonifo

(Mt. 27.1-2, 11-14; Lc. 23.1-5; Jn. 18.28-38)

¹ Mā penaino a ato Nios kīfixomisfāfe āto xanīfofo ichanānifo, a judeofāfe āto xanīfofo fe, a Moisés yoikī kirika keneni keskara ato tāpimamisfori ato fe inifo. Nā xanīfo fetsafori a ato rafeafori ato fe inifo. Nāskakaxō Jesús metexkere akaxō iyokaxō Pilato inānifo.

² Mā iyoxō ināfono Pilato yōkani iskafakī: “¿Mīmē judeofāfe xanīfo?” askafaito, Jesús kemani: “Ēje, nā mī ea yoiakī keskarakīa,” Jesús fani.

³ Nāskaino nā ato Nios kīfixomisfāfe āto xanīfofōfāfe āa pārakakī yōaketsanifo.

⁴ Nāskafaifono anā Pilato yōkaxō iskafakī yoini: “¿Mī ato kemaimamē mīōnoa afara chakafo yoifaifono?”

⁵ Askafaito nikakī Jesús tooxanima. Nāskakē Pilato shināni iskafakī: “Kee, ¿afeskakī ea kemaimamē?” ixō shināni.

Pilato ato yoini Jesús retenōfo
(Mt. 27.15-31; Lc. 23.13-25; Jn. 18.38-19.16)

⁶ Akka Pascua fistatīa Pilato karaxa mēranoa nā xinia tii fisti rasi ato kāimapaoni māmāi askafakī feyafakatsaxakī. Nā yorafāfe kāimapaiyaifo ato kāimaxopaoni.

⁷ Akka nā karaxa mēra feronāfake āfe ane Barrabás ika ini. Nāato fetsafo feta yora retemis ini nā āto xanīfo ato pōtapaikī.

⁸ Akka yorafo fenīfo. Mā fēkaxō Pilato yōkanifo māmāi askafakī feyafakatsaxakakī.

⁹ Askafaifono Pilato ato kemani: “¿Mā fichipaimē judeofāfe āto xanīfo ē kāimanō?” ato fani.

¹⁰ Akka Pilato tāpini a ato Nios kīfixomisfāfe āto xanīfofōfāfe Jesús chakafakī mekafaifono anā yorafāfe noko nikakanimara ikaxō, nāskakaxomāi akiki efekaxō ināfono.

¹¹ Akka a ato Nios kīfixomis āto xanīfofōfāfe fāsikōi yorafo mekamanifo: “¡Noko Barrabás kāimaxōfe!” ikaxō Pilato yoinifo.

¹² Askafaifono Pilato ato yōkani: “Akka, ¿na judeofāfe āto xanīfora mā fai ē afeska fatiromē?” ato faito,

¹³ kemakakī fāsikōi iskafanifo: “¡Mastafe!” fanifo keyokōichi.

¹⁴ Askafaifono Pilato ato yoini iskafakī: “Akka, ¿na feronāfake afaa chakafamē?” ato faino, anā fāsikōi mekainīfofāni: “¡Mastafe!” fanifo.

¹⁵ Nāskafaifono yorafāfe sharakōi fanōfo Pilato ato Barrabás kāimaxoni. Nāskata mā Jesús ato koshamata, ato nīchixonī ifi cruz ikaki mastatanōfo.

¹⁶ Nāskakē sorarofāfe xanīfāfe pexe emāiti Jesús iyonifo, nānoax sorarofō ichanānifo.

¹⁷ Nāskakaxō āfe rapati pēkakaxō, rapati ōshi nana safemanifo, moxa maiti fakaxori maimanifo.

¹⁸ Nāskakaxō fāsikōi mekafanifo iskafakakī: “¡Aicho, mīfi judeofāfe āto xanīfo!” ikaxō kaxemetsama fanifo.

¹⁹ Nāskatari tafa xatenē mapoki koshaketsayanā akiki kemo mechoketsanifo. Nāskakata akiki ratokonō mai chachipakefōfā kaxemetsama fanifo.

²⁰ Nāskai mā akiki kaxemetsamakaxō a rapati ōshi nana safemanafo fiakaxō āfenākōi safemanifo. Nāskakaxō iyonifo mā ifi cruz ikaki mastafokakī.

Jesús ifi cruz ikaki mastanifo
(Mt. 27.32-44; Lc. 23.26-43; Jn. 19.17-27)

²¹ Mā Jesús iyoifokakī feronāfake Cirene anoa fichinifo, āfe ane Simón. Alejandro feta Rufo āto apa ini. Pexe rasi pasotai inoax oaito, fichikaxō yoinifo iskafakakī: “Na Jesús āfe cruz foxōikafe,” fanifo.

²² Nāskaxō Jesús iyonifo āfe ane Gólgota ano. Āfe ane fetsa Mapo Xao fanifo.

²³ Nānoaxō fimi ene osia mokakōi Jesús ayamapainifo. Akka Jesús ayakaspani.

²⁴ Nāskafakaxō mastanifo. Mā mastakanax sorarofō makex tokoroya kaxenifo. Nā potakī kanāto āfe rapati fiāni. Nāskafakaxō keyofianifo.

²⁵ Rama xini keyaino Jesús mastanifo.

²⁶ Mā mastakaxō a mǎnǎo tafarakī kenenifo iskafakakī: “Judeofāfe āto Xanīfokōi,” ikaxō a mǎnǎo kenenifo.

²⁷ Nāskakaxō Jesús yafi yometso raferi mastanifo, fetsa āfe pōya kayakai aōri ata, fetsari āfe pōya mishkiori anifo.

²⁸ Afetiama aōnoa yoikī keneyonifo iskafakī yoinifo: “Nā yora chakakōifo keskarakōi ixō aōnoa yoixikani,” ikaxō kenenifo. Chanīmakōi. Nāskakōi fanifo aōnoa yoikakī.

²⁹ Nā ano finōfāifāfe Ichayanā āto mapo rafe rafe ayanā iskafanifo: “Iskafakī mī yoisim: ‘Nā anoaxō Nios kīfīti pexefā ē pǎo axii. Nāskaxō tres nia oxata ē anā axii,’ ixō mī yoisim.

³⁰ Mī ifimetiromakī mā ifimefe na ifi cruz ikakinoax fopakekafāfe,” faifono,

³¹ nāskarīfakī a ato Nios kīfixomisfāfe āto xanīfofo feta a Moisés yoikī kirika kenenī keskara ato tāpimamisfāfe askafanifo akiki kaxemetsamapaikakī. Nāskax āa ranā yoinākani iskanifo: “Nato fetsafo ifīfīkatsaxakī, akka aakai ifimeima.

³² A na Cristo israelifāfe āto xanīfo, iskaratīa nō ōipanā afeskai ifi cruz ikakinoax fopakekafanimamē, nāskaito nō chanīmara faikai,” ikaxō, nā ayafi mastafori īchaketsanifo.

Jesús nani
(Mt. 27.45-56; Lc. 23.44-49; Jn. 19.28-30)

³³ Nāskata xini keya nā mai tio fakishīfākōitani. Nāskax mā xini kaino anā penani.

³⁴ Nāno xini rakano fāsikōi Jesús kenani iskai: “Eloi, Eloi, ¿lema sabactani?” fani. Nōko mekapa iskafakī yoini: “Ēfe Nios, ēfe Nios, ¿afeskakī mī ea potaimē?” fani.

³⁵ Nāskaito nā ano niafāfe nikakakī iskafanifo: “Nikakapo, nā ato Niospa meka yoipaoni Elías kenai kiki,” fanifo.

³⁶ Nāskaito nikafaini nānoa fetsa ichoni xapo keskara fiikai. Nā xapo keskara fimi ene kachaki momoxō tafa xate kaxexō akiki nētaxō ayamapaini, iskafakī ato yoiyanā: “Enekāfe nō ōinō Elías oi kiki fotomaniyoi,” ixō ato yoini.

³⁷ Nāskakē Jesús fāsikōi eaita nani.

³⁸ Nāskakē sama nami Nios kīfiti pexefā mēranoax naki rafekōi faxtepakakafāni fomākianoax.

³⁹ Nāskaito ōikī nā soraro xanīfāfe Jesús eaita naito ōikī chaimashta nīxō iskafakī yoini: “Chanīma, na feronāfake Niospa Fake ika.”

⁴⁰ Askatari kērofāferi chai nikaxō ōinifo. Nāno ato fe Marīa Magdalenari ini, Marīa fetsari ini, Jacobo feta José āto afa ini. Saloméri ato fe ini.

⁴¹ Nā kērofāfe Jesús chīfamisfo inifo, pimaxikakī Jesús Galilea ano ikano. Nānori kēro fetsafo inifo, Jerusalén anoax afe foitaxakakī.

Jesús makex kini mēra maifanifo

(Mt. 27.57-61; Lc. 23.50-56; Jn. 19.38-42)

⁴² Penama safaro ikaino judeofāfe itipinīfapaonifo, nā safaromāi āto teneti penakē, nā yātapake

⁴³ José oni, nā Joséri judeofāfe āto xanīfo. Nāato Nios xanīfo manapaoni, nā José finakōixō Pilato ano ikikaixō Jesús āfe yora yōkani.

⁴⁴ Askafakī yōkaito nikai Pilato rateni, “¿Mā Jesús naamē?” ikax. Nāskaxō soraro xanīfo kenani yōkaxiki mā Jesús naamakī.

⁴⁵ Nāskafaito soraro xanīfāfe yoini: “Mā naakīa,” faito, Pilato Jesús āfe yora José ināni.

⁴⁶ Nāskakē José sama sharakōi fixō nā samapa Jesús āfe yora rakoni. Nāskaxō a makex kini fanifo mēra rātani. Nāskaxō makexefanē nā kini feponi.

⁴⁷ Akka Marīa Magdalena feta Marīa José āfe afa nā maifafo anoax ōinifo.

16

Jesús otoni

(Mt. 28.1-10; Lc. 24.1-12; Jn. 20.1-10)

¹ Mā pena teneti finōano Marīa Magdalena ikaino, Marīa fetsa Jacobo āfe afa ikaino, Salomé ikaino, nā tiito pirofomā fonifo, Jesús āfe yora raish akī foxikaki.

² Fakishparikōi fonifo mā pena teneti finōano nāskanax a Jesús maia ano nokonifo, mā xini keyaino.

³ Mā nokokanax āa ranā yoinākani iskanifo: “¿Tsōa na kini anoax tokiri noko fēpexotiromē?” ikanax yoinānifo.

⁴ Akka ōiafo a kini aō fepoitafo a tokirinīfā, mā fepekemea ini, anā fepoa inima.

⁵ Nāskakē nā kini mēra ikifaikakī ōiafo. Nā kini mēra naetapa tsaao ini, nā nōko pōya kayakai aōri. Rapati chainipa oxokōi safeax, nāskaito ōikani ratekōinifo.

⁶ Nāskaifono nāato ato yoini iskafakī:

“Rateyamakāfe, Jesús Nazarete anoax mā fenaikai nā ifi cruz ikaki mastaitafo mā otoaki anā nonomaki. Ōikapo a rātaitafo ano.

⁷ Fokaxō aōxō tāpimisfo yoitakāfe, Pedrori yoikakī mā nokoamano nā Galilea ano nokoi taei kai kiki. Nā mato yoifafaina keskara nārixō mā ōikaikai,” ixō ato yoiaino,

⁸ nāskakē nā kērofo fonifo nā kini anoax ato yoiaino nikaifaikani. Ratei choayanā ato yoinifoma, mesemāiakaki.

Jesús Marīa Magdalenaki nokoni

(Jn. 20.11-18)

⁹ Mā pena nomīkonō fakishpari Jesús otoiatakī, Marīa Magdalenaki nokoi taeni, nā Marīa makino siete niafaka yōshi chakafo Jesús pōtani.

¹⁰ Nāato kaxō a afe rafemisfo ato yoikai kani a ōia keskara. Kaxō ato ōia shināmitsakani oiaifāfe ato ōini.

¹¹ “Mā nōko Ifo Jesús otoakī mē ōiaki,” ixō ato yoiaino, tsōa chanīmara fanima.

Jesús aōxō tāpimis rafeki nokoni

(Lc. 24.13-35)

¹² Mā askata fetsa keskarax Jesús aōxō tāpimis rafeki nokoni fāi foaifono.

¹³ Nā rafetari a afe rafemisfo yoifokani fonifo. “Mā nō Jesús ōiaki,” ato faifono, tsōa ato nikanima.

Jesús aōxō tāpimisfo yoini aōxō keyokōi yoifofāsafatanōfo

(Mt. 28.16-20; Lc. 24.36-49; Jn. 20.19-23)

¹⁴ Nāskata chipo Jesús aōxō tāpimis oncefoki nokoni, mīsa ano tsaōxō piaifono. Mā atoki nokoxō iskakakī ato yoini: “¿Afeskakī mā ato chanīmara famamē mē otofiano nā ea ōiafāfe mato yoiaifono?”

¹⁵ Nāskaxō ato yoikī iskafani: “Nā mai tio ano fokaxō na meka shara eōnoa keyokōi ato yoitakāfe mē otoakī āto chaka ato soaxoxiki efe ĩpaxanōfo.

¹⁶ Akka na meka shara chanīmara fakanax, faka mēra iki maotissimeax ēfe Epa Nios fe nīpanakafo. Akka na meka shara eōnoa chanīmara fayamakanax, nāfo omiskōipakenakafo.

¹⁷ Akka nā ea chanīmara faifāfe, ēfe aneōxō ato makinoa niafaka yōshi chakafo potatirofo. Nāskakanax meka fena sharapa mekatirofo.

¹⁸ Nāskakaxō rono tsomatirofo nāskakaxori rao paekōi ayakanax afeskatirofoma. A isinī ikaifori ato ramāifono sharatirofo,” ixō Jesús ato yoini.

Jesús nai mēra kani

(Lc. 24.50-53)

¹⁹ Nāskakakī ato yoita, nōko Ifo Jesús ronoinākakāni nai mēra kai. Mā nai mēra kaax Apa Nios ketaxamei tsaoni afe xanīfokōi ixiki.

²⁰ Mā Jesús nai mēra kaano aōxō tāpimisfo fonifo. Nā mai tio anoafo aōnoa meka shara yoifokani afe nīpaxanōfo. Nōko Ifāfe ato axōfaino aōxō aōnoa meka shara yoikōinifo, tsōa atiroma keskakakī aōxō afama mīshtifori fanifo. Nā tii.

Lucaspa Jesúsnoa Yoikĩ Keneni

Lucaspa kirika keneni Jesús nõko mai ano ipaonino

¹⁻⁴ Teófilo, ẽ mia kirika kenexõ manamani, mĩ tãpinõ. Mã mĩ tãpia Jesús nõko mai ano ipaoni. Nõko mai ano ikano yorafãfe õipaonifo. Akka nã fakenitĩa õiaifono yosini. Nããferi õikaxõ yora fetsafo yoipaonifo akairi Jesúsnoa tãpinõfo. Ato yoiaifãfe nikakakĩ akairi kirika kenepaonifo afeskai nofe Jesús ikimamẽ ikaxõ. Nãskarifiakĩ ẽ mia kirika kenexoni, nã Jesús tãpiafo yõkaxõ. Efe yorashta Teófilo, nãskakẽ ẽ mia kirika kenexõ manamani, nã mia Jesúsnoa yoiaifono nikakĩ mĩ chanĩmara fanõ.

Åjirinĩ yoini, Juan Maotista kãiyomano

⁵ Jesús fakeamano Zacarías iyopaoni Judea mai ano ãfe kaifo fe. Ari ikano Herodes ãto xanĩfo finakõia ipaoni. Nã Zacarías ãfe xini ane ipaoni Aarõn. Nã Aarõn ãfe fena Zacarías ipaoni. Akka ãfe ãfi Elizabetri Aarõn fena ipaoni, ãto xinimã Aarõnkẽ. Nã Aarõn ãfe fenafãfe ato Nios Kĩfixopaonifo ãto kaifofo. Zacaríasri ato Kĩfixopaoni Aarõn ãfe fenamã axõ. Nã Zacarías ãfe kaifo feta yonopaoni, Nios kĩfiti pexefã mẽraxõ Abíasfo feta.

⁶ Zacarías ãfe ãfi feta Niospa meka nikasharakõipaonifo, nã Niospa meka yoikĩ kenenifo keskafakĩ. Akka nã Niospa yoiai keskafakĩ nikasharakõiaifono Niospa ato õini, shara shinãĩ ikafono.

⁷ Akka Elisabet fake fimisma ipaoni. Nãskaxõ mã yõxaxõ fake fipaonima fene feta. Nãskax fene anifoaino nãri askani yõxaxõ.

⁸ Nãskakẽ ãto xanĩfãfe ato yoini, Abías yorafo: “Nã Nios kĩfiti pexefã mẽra yonomisfo mã tsekefaini fokani kiki. Mãri ikiferakãfe,” ato fani. Ato askafaino a mẽra ikifaikaxõ yononifo. Zacaríasri a mẽra ato fe ikikaixõ ato feta yononi.

⁹ Nios kĩfiti pexefã mẽra ikifaikanax yoinãnifo iskakani: “¿Iskaratĩa tsõa na pirofomã shara koofaimẽ nõ õinõ?” inifo. Askafono ãfe xanĩfãfe Zacarías yoini: “Mĩ koofafe na nakas Niospa xeteax inimanõ,” fani. Akka nãskara feyafapaonifo, pirofomã nakas shara koofapaonifo.

¹⁰ Zacarías pirofomã shara koofaino yorafãfe emãiti nikaxõ Nios kĩfinifo.

¹¹ Yorafãfe emãitixõ Nios kĩaifono, Zacarías pexefã xãki mẽraxõ pirofomã koofaino åjiri nĩtani, pexe xaki mẽra pirofomã koofai kesemẽ ãfe põya kayakai aõri.

¹² Nãskakẽ åjiri nikẽ fichiãx Zacarías mesta itani.

¹³ Rateaino Niospa ãfe åjirinĩ yoini: “Zacarías, rateyamafe. Mã Niospa mia nikakĩ mĩ kĩaifaito mã mĩ ãfinĩ fake feronãfake fii kiki. Mĩ fake kãiano anekĩ Juan mĩ faxikai.

¹⁴ Mã mĩ fakeyax mĩ inimaxikai. Yorafõri akiki inimakõixikani.

¹⁵ Niosri akiki inimasharakõixii. Fãsi finakõia Niospa õixii, Niospa Yõshi Sharapa shinãmanaino. Nãskakẽ afaa pae pishta ayaxima.

¹⁶ Nãskaxõ mã yosixõ Niospa meka ato yoixii ãfe kaifo israelifo ãfe fenafo, Niospa meka ato yoiaino ãto chaka xatenõfo. Ato chaka xatekaxõ Nios fisti nikakõinõfo.

¹⁷ Nõko Ifo oyoamano taeyõ Niospa Juan nĩchixii ãfe meka ato yoinõ. Akka Juan ãfe shara nã Elíasnã ipaoni keskara ixii Niospa Yõshi Sharapa shinãmanaino. Afe yorafo ato tãpimaxii. Nãskaino ãto apafo fe ãto fakefo anã noinãxikani. Askatari nã Niospa meka nikakaspamisfãfe akairi ãto chaka xatekaxõ Nios Ifofaxikani shinãsharaxikakĩ. Nãskakẽ Juanoax ãfe kaifo itipinĩsharaxikani Niospa Fake atoki nokoaitĩa ifisharaxikakĩ,” ixõ åjirinĩ yoini.

¹⁸ Askafaito nikakĩ yoini: “¿Afskai ẽ fakeyatiromẽ? Ëkai anã fake atiroma ẽ anifokõi. Ëfe ãfiri nãskarari yõxaxõkõi. Afeskaxõ afeta nõ anã fake fitiroma,” fani.

¹⁹ Askafaito nikakĩ åjirinĩ kemani: “Ëkĩa Gabriel, ẽ Nios fe ika. Ea nĩchiano ẽ oa. Nikapo, ãfe meka shara ẽ mia yoinõ. Mã mĩ ãfinĩ fake feronãfake fii kiki.

²⁰ Akka, nã ẽ mia yoiaito mĩ ea nikakaspax mĩ anã mekaima. Mã mĩ fake kãiano mĩ mekaxii. Nãskax mĩ mekamais iyoi. Akka Niospa ea fake fimatiroma emã anifokẽ mĩ ifiaito Niospa mia fake fimatiro. Nã ẽ mia yoiai keskafakĩ Niospa mia askafaxii. Nã Niospa mia apaiyaitĩa mia askafaxõi kiki,” åjirinĩ fani.

²¹ Åjiri fe Zacarías pexe xaki mẽranoax yoinãino yorafo pexe emãiti nikanax yoinãnifo, Zacarías fena kãiyamaino pexe xaki mẽranoa. “¿Afskai Zacarías samarakaimẽ pexe mẽranoax? Afetũakai ikiyama,” faifono

²² Zacarías kainãkafani Nios kĩfiti pexefã xakĩ mẽranoax anã mekanima yõkapaifiaifono. “¿Afaa pexefã mẽranoa õiax mĩ iskaimẽ?” fanifo. Askafafono ato yoipaifi mekanima. Mekapaikĩ ãfe mĩfis ato yoini a õia.

²³ Nāskai anā mekaima Zacarias āfe xanēnē kani mā yonokī keyoax.

²⁴ Nāskata mā Zacarias āfe pexe ano nokoano āfe āfinī chipo fake naneni. Mā fake naneax faki kafāsapaonima nā āfe xanēnē fisti ipaoni cinco oxe ani āfe xanenēxō.

²⁵ Nāskaxō mā postoxō yoini: “Aicho, mā Niospa ea sharafakī ē fake finō ē yōxafofiakē. Niospa ea fake fima. Aicho, iskaratīa ē anā yorafoki rāfinakamaki mē fakeyaki,” Elizabet ini.

Ājiri fotopakekafāni, Marīa yoiyoi

²⁶ Elisabet mā fake nanekī seis oxe akano Galilea mai ano Niospa anā nīchini āfe ājiri Gabriel, Nazarete pexe rasi ano.

²⁷ Nāskakē Niospa āfe ājiri Marīa ano fotopakekafāni yoiyoi. Fotopakekafaxō yoini. Nā Marīa fenemais ini. Feronāfake fetsa fe oxamisma. Marīa fenemais ikano José apa yōkani, Marīa fixiki. Nā José āfe xini David ipaoni. Nā David āto xanifo finakōia ipaoni. Akka José Marīa fiyoamano ājiri fotopakekafāni, Marīa ano.

²⁸ Fotopakekafaxō Marīa yoini: “Mē oi mia yoiyoi, Nios mikiki inimai mefe ika,” fani.

²⁹ Askafaino Marīa shināpaini: “¿Afaa ea yoipaimē, na ea iskafai?” ixō shināpaini.

³⁰ Shināpaiyaito anā ājirinī yoini: “Rateyamafe. Mia Niospa noisharai kiki mia sharakōi ōi kiki, mikiki inimasharai kiki.

³¹ Mā mī fake feronāfake fikai. Mā mī fake kāixō anekī Jesús mī faxikai.

³² Mī fake xanifo finakōia Niospa imaxii. Āfe xini David keskara ixii. Nios nā nai mēra ikato āfe Fakekōi faxii.

³³ Nāskakē mī Fake xanifo finakōia ixii. Mī kaifāfe xanifo ipanaka. Anā xanifo xate-nakama,” fani.

³⁴ Askafaito Marīa kemani: “¿Afeskakī ē fake fitiromē ē feneyaxoma, ea tsōa tanamismano?” Marīa ini.

³⁵ Askafaito ājirinī kemani: “Niospa āfe Yōshi Shara mikiki oxō mia fake nanemaxii. Nāskax nā fake kāiax Niospa Fakera faxikani. Akka na fake kāiax sharafinakōia fisti ixii.

³⁶ Nā mī yaya Elisabet ‘Fake fitiromara’ fafiamisfono mā fake nanea seis oxe aka yōxafofiaxō.

³⁷ Nāskakē nā apaiyai keskara fakī Niospa afama mīshti fatiro. Miari fake fimatiro mī fenemaisfikē,” ājirinī fani.

³⁸ Ājirinī askafaino, “Nāskafinō, ē fake finō, ē fake nios nikamiskī. Nā ea amapaiyai keskafanō ē Nios itixomafamiski,” nāskafani.

Marīa askafaino ājiri anā nai mēra kani.

Marīa kani Elisabet ōikai

³⁹ Nāskata nā pena fisti mā Niospa ājiri kaano Marīa itipinī fata koshi kani āfe yaya ōikai Judea mai ari. Judea mai ari māchifāfo mēra kaax pexe rasi ano nokoni.

⁴⁰ Mā nokoax Zacarias āfe pexe mēra ikitoshini. Mā nokoxō Marīa āfe yaya yoitoshini. “Yaya, ē oi mia ōiyoi,” fatishoni.

⁴¹ Āfe rare askafatishonaito Elizabet nikani. Āfe rare askafaito nikakī Elisabet xakī mēraxō āfe fake tokko tokko ani.

⁴² Nāskata Niospa Yōshi Sharapa shināmanaino Elisabet onāni mā Marīa fake naneano. Nāskakē fāsi yoini iskafakī: “Marīa, Niospa mia inimamasharakōi. Fato xotofake fetsakai iskafaima mia fisti inimamakōi. Mī fake feronāfake chipo kāiano Apa Niospa akiki inimakōikī kexesharakōixii.

⁴³ Nōko Ifokōi mī fake ixii. Akka, ŷmī ea ano oamē, nōko Ifāfe afaflax ēkai afaakeroko ēakōi ē ikanō?

⁴⁴ Akka mī ea yoiaito nikakī ēfe xakī mēraxō ēfe fake ea tokko tokko aka, mikiki inimakī.

⁴⁵ Niospa meka nikakōikī, ‘Nē askanōki,’ ixō mī yoita. Nāskakē Niospa meka nikai mī inimasharakōi,” ixō Elisabet yoini.

⁴⁶ Nāskafaito Marīa kemani:

Ēfe ōiti mēraxō ē shinākī iskafai, nōko Ifo tsoa keskaramākī. Nōko Ifo Nios fāsi sharakōi.

⁴⁷ Akiki ē inimakōiaino ea anā potanakama, ē afe ipanaka, ea kexepakenaka, ea ifixii ē afe ipaxanō.

⁴⁸ Ē nā yonoxomis, ē afaa tāpiamafekē nā Niospa ea noikōi. Nāskakē yorafāfe yoipakenakafo: “Nā Marīa Niospa inimamakōia,” ixō yoipakenakafo.

⁴⁹ Nios fāsi sharafinakōia. Afaa pishta fayamatiroa. Afama mīshti fatiro, ea sharakōi faxōa. Niosfi sharakōiki. Afaa chakafamisma Niosfi nāskarakōi.

⁵⁰ Nāskara yorafāfe yoitirofo: “Ē Nios nikasharapaikōiaino, ē nikakaspaitori ea chakafatiro. Nāskax ē akiki mesetiro. Akiki mesekī ē Nios nikasharakōi,” ixō yoiaito nā keskara yorāfo Niospa ato noikī ato shināpakenaka.

⁵¹ Akka Nios nikakaspakī āto ōiti fekaxtefakani, “Tsōa afaa tāpikeroko ē akai keskafakī,” ixō āto ōiti fekaxtefatirofo. Nāskaifono Niospa ato fenomatiro. Nāskara ato ōimatiro afaa tāpiamafāfe. Akka Niospa āfe shināmā afama mīshti famiski. Afaa pishta Niospa fayamatiroma. Nāfi mitsisipakōikī tsoa keskarama. Nāato afara mīshti fatiro.

⁵² Nāato xanīfofo potano anā tsoa xanīfo itiro. Akka nā afaayamafo Niospa ato sharakōi imatiro.

⁵³ Akka fetsafāfe Nios shināifono Niospa ato kexesharatiro. Āfe shināmā āto ōiti mēra ato shināmatiro inimanōfo. Akka fētsa shinākī iskafai: “Ē iskaratīa shara ē afara fetsa anā shināima Niospa afara fetsa ea anā shināmanima ē anā Nios fe rafepaima,” ixō shināito askara yora Niospa anā tanaima. Afaa pishta tāpikanamax yorafo askatirofo.

⁵⁴ Niospa noko kexesharapakenaka nōko kaifo israelifāfemāi yonoxomisfono. Noko shināmakinakama mēxotaima noko noipakenaka nā yoini keskafakī.

⁵⁵ Niospa nōko xini Abraham yoiikī iskafani: “Mī kaifo efe yorafo ipanakafo. Askatari mī fenafo ē ato kexesharapakenaka,” ixō Niospa nōko xini Abram yoini, ixō María fani.

⁵⁶ Nāskax María Elizabet ano ipaoni tres oxe ani anoxō. Tres oxe ata anā María āfe xanēnē oni.

Juan Maotista kāini

⁵⁷ Mā María āfe xanēnē oano Elisabet fake feronāfake kāini.

⁵⁸ Mā fake kāiano āfe kaifāfe a chaima nikafāfe tāpinifo. “Mā Elisabet fake kāia nōko Ifo Niospa mā Elisabet aō noikī fake fimismo mā fake fima,” nāskafanifo. Askafakanax akiki inimanifo.

⁵⁹ Mā fake kāitaxakī ocho nia oxano Zacarías pexe ano yorafo fonifo. Fake ōikai fokani āfe foshki repa xateyanā nāskaramāi feyafakatsaxakakī. Fokaxō yoinifo: “Āfe apa anekiriri nō anenō Zacarías fakī,” fanifo.

⁶⁰ Nāskafafono āfa ato yoini: “Maa, ē aō aneima, Zacarías ē faima. Afeskakīkai apa anekiri ē anetiroma. Ēa ē anei Juan fakī,” ato fani.

⁶¹ Ato askafaito yoinifo: “ĶTsōa anekiri mī aneimē? Anokai āfe xinifo Juanma. Āfe apa nō yōkanōki,” fanifo.

⁶² Akka nā fāke apa mekamais ita pastori ini. Nāskakaxō apa yōkanifo. Mēkemā ato yoini: “ĶAfe ane mī fake mī faimē?” fanifo.

⁶³ Askafafono ato yoini mēkemā: “Ea kirika inākhāfe, ē mato kenexonō,” ato askafani. Kirika ināfono kirikaki kenekī: “Ē āfe ane Juan fai,” ixō kirikaki keneni. Mā kirikaki keneano ōikaxō yoinifo: “Ōikapo. Mā anea Juan fakī. Āfe ane Juan ixii,” fanifo, apa feta āfe āfa aneaito shināpainifo.

⁶⁴ Nāskata āfe fake ane keneta Zacarías mekani. Anā mekamais inima, mā mekaya ini. Mā mekayaxō ato yoini: “Nios sharakōi,” ato fani.

⁶⁵ Mā Zacarías mekaito ōikani ratenifo. Mā ratekanax fokani yoināi fetsetenifo. Nāskakanax mā fokani Judea mai ari fokani yoināifono: “Mā Zacarías āfe fake aneax mā mekai. Mā āfe āfiniri fake fikatsaxakima, mā fake fia,” ikanax yoināi fetsetenifo.

⁶⁶ Yoināi fetsekaxō shinānifo: “Nā fake afeskaimākai nō ōinō shināya iki kiki, Niospamāi shināmasharaino,” ikaxō shinānifo.

Zacarías fanāini

⁶⁷ Niospa Yōshi Sharapa shināmanaino Juan āfe apa Zacarías yoini:

⁶⁸⁻⁶⁹ Ēfe kaifo israelifāfe nōko Niosfi sharakōikī, nāfi nōko Ifokōikī. Nōko chaka noko soaxoxii. Nōko xini David āfe fena finakōia ixii. Nā David nōko xinifāfe āto xanīfo ipaoni. Nā āfe fena Niospa nīchia noko ifipakexanō afe nō ipaxanō. Nāskakē noko shināmakinakama.

⁷⁰ Nāskakaxō ato yoipaonifo, nā ato Nios yoixomisfāfe Judea mai anofo.

⁷¹ Niospa ato shināmanaino yoipaonifo noko kexesharano afanā noko afeskafanōma noko ōikaspaifono ixō yoinifo.

⁷² Nā noko yoiaifāfe nō ato nikapaoni keskafakī noko Niospa kexesharapakenaka noko noikī. Nā noko yoipaonifo keskai Nios noko shināmakimisma.

⁷³ Nāskaxō nōko xini Abraham Niospa yoini iskafakī: “Mī kaifo efe yorafo ipanakafo. Nāskakē mī fena ē ato nīchixonī āto xanīfo finakōia inō. Nāskaxō keyokōi ato ifixii āfe ipaxanōfo.

⁷⁴ Nāato nā mato ōikaspaifo ato paxkaxii anā mato afeskafanōfoma,” ixō Niospa yoini. Noko askafaino nō āfe inafax nō anā mesetiroma nokomāi nōko Ifāfe İkkē.

⁷⁵ Nō āfe ina kayakōikē nōko ōiti noko shara faxoxii aa noiax nō isharakōipakexanō, ixō Zacarías ato yoini.

⁷⁶ Nāskata Zacarías āfe fake yome pishta yoini:

Anifoshta, nōko Nios finakōia nō mǎnāo nīkōina. Akka mī yosixō Niosnoa mī ato yoixoxii. Taefakī mī ato yoixonano chipo nā nōko Ifo finakōia oxii. Nāskakē itipinīkāfe mā nōko Ifo oi kiki mī ato faxii.

⁷⁷ Nāskakē mī ato tāpimaxii mā nōko Ifo oaino afe yorafo ato chaka soaxoniyoii.

⁷⁸ Akka Niospa noko shināino āfe Fake finakōia nai mēranoax nokoki oi nōko ōiti noko sharafaxoxiki. Oa fakishpari xini koshi kafanai keskafakī nōko ōiti xafakīa sharakōi noko faxoxiki,

⁷⁹ anā fakish keskara nōko ōiti inōma. Nāskax nai nō mesetiroma noko shināmasharaino, ixō Zacarías ato yoini.

⁸⁰ Nāskax Zacarías āfe fake yosini Niospa āfe shināmā shināmasharaino. Nāskax ares tsōa istoma ano ipaoni, nā Niospa meka israelifo ato yoikī taefaitīa.

2

María Jesucristo kāini

(Mt. 1.18-25)

¹ Nā Jesús kāiyaitīa romanō āfe xanīfāfe César Augusto āfe yorafo nīchini nā maitio anoafō ato tanākaxō āto anefo kenenōfo afe tii yorafomakī.

² Taefakīkōi kirika kenenifo āto anefo keyokōi. Akka Siria mai anoafāfe āto xanīfāfe ane Cirenio ipaoni.

³ Nāskakē keyokōi fonifo āto mai anoxō āto ane kenei fokani.

⁴ Nāskaifono María feri José kani Belén ari, Nazarete ano ikanax. Nā Nazarete pexe rasi Galilea mai anoa ini. Nānoax José fe María fonifo, José āfe xini Davidmāi Belén anoax kāinino. Nā Belén Judea mai anoa ini.

⁵ Nāskakē María fe José fonifo āto ane kenei fokani. María fe José mā yoināfo ini fianāxikakī. Fianāyokanamax María fe José kani. Nā María tsoa pishta tanamisma ini, akka Niospa Yōshi Sharapa fake nanemani.

⁶ Mā María Belén ano nokoano fāke pāe fani mā kāiki.

⁷ Mā fake kāiax fakeyai taeni. Āfe fake feronāfake ini. Akka āto fakka inafāfe piāi mēra fonifo. Anoax María fake kāini. Mā fake kāixō sama faxte pishta rakoni. Askata āfe fake rātani a fakkafāfe piāi kamaki.

Ājirifo oveja kexemisfoki nokoni

⁸ Nā María fakishi fake kāiano oveja kexemisfāfe fasifo mēraxō āto ovejafo kexeshinifo pexe rasi pasotaixō.

⁹ Āto ovejafo kexeshinaifono Nios ariax āfe ājiri atoki fotokī chaxapakefōfāni. Niospa nīchiano chaxapakefōfāni. Mā Niospa ājiri nīchiaikī inifo chaxatanaifo fichikanax ratakōinifo.

¹⁰ Nāskaifono ājirinī ato yoini: “Rateyamakāfe. Ē mato meka shara yoiyoaki nikax mā inimai finakōinō. Askatari yorafāferi nikakanax akairi keyokōi inimakōinōfo.

¹¹ Iskaratīa fotoxō ē mato yoiyoa. Nā fakishi mā mǎto Ifo Cristo mā kāia mǎto Ifokōi mato ifixiki mā afe ipaxanō. Nā mǎto xini David kāini anoaxri kāia mǎto Ifokōi.

¹² Ē mato yoinō nikakapo afeskaxō mā tāpitiromakī nā fake āfe afa rapatinī raxoxō rāta fakkafāfe piāi ano fichixō mā tāpitiro nā mǎto Ifo finakōia,” ixō ājirinī ato yoini.

¹³ Ato yoikī xatetanaino atiri Niospa āfe ājiri ichapakōifo atoki fotopakefōfāni. Fotopakefōfākata inimakōi Nioski fanāimifo. Inimakata iskafakī yoinifo:

¹⁴ Nios sharakōi nai mēra ika. Nā ato fichipaiyai tii nono mai anoax ikafo ato shināmasharai inimanōfo, ixō yoinifo.

¹⁵ Mā yoikanax anā nai mēra fonifo. Mā nai mēra ājirifo foafono, “Nō ōinō,” inifo, “Chanīmamakī nō ōinō, fokapo Belén ano na nōko Ifo Niospa āfe ājirifo nīchiano noko yoiafo keskara nō ōinō fokapo,” ixō yoinifo.

¹⁶ Nāskata nā oveja kexemisfo fonifo. Mā fokakī ichokaxō fichitoshinifo María yafi José. Nāno āto fake yome rātafono fakkafāfe piāi mēra fasi mēra rakakē ōinifo.

¹⁷ Nā fake yome ōiafo tiito ato yoifōfāsafanifo.

¹⁸ Nā oveja kexemisfāfe ato yoiaifāfe nikakakī, “Airā, ſafeskakī iskara shara noko yoikanimē?” inifo.

¹⁹ Nāskakē María nā nika keskafakī āfe ōitinī fāsi shināfafāini.

²⁰ Nāskakata nā oveja kexemisfo ato yotakanī anā ato ovejafo ano fenifo. “Aicho, Nios sharakōikī nā noko yoia keskafakī mā nō ōitanikai,” ikanax āa ranā yoinānifo.

Nios kīfiti pexefā mēraxō apa feta āfa āto fake Jesús Nios ispanifo

²¹ Mā ocho nia oxano Jesús foshki repa xatenifo. Nāskafakaxō anenifo Jesús fakakī, nā ājirinī yoiyoni keskakakī María fake naneyoamano.

²² Moisés israelifo yoini iskakakī: “Kēro fake kāiax fena faki kafāsatiroma. Askatari Nios kīfiti pexefā mēra fena ikitiroma cuarenta nia oxa finōaxma,” ixō ato yoini. Akka mā cuarenta nia oxa finōano José fe María fonifo. Jerusalén ano iyoifokani āto fake Nios kīfiti pexefā mēraxō Apa Nios ispaxikakī.

²³ Nānori Niospa shināmanaino Moisés kirikaki keneni iskakakī: “Fake kāi taexō feronāfakekē mā Nios ispatiro āfenā inō,” ixō ato yoipaonino, José feta María āto fake Jesús yonifo Jerusalén ano.

²⁴ Nāskakē José fe María mā fokaxō a Moisés yoini keskakakī a Nios ato kīfixomis rifi rafe iyamai nopoxpoiki rafe inānifo retexō Nios kīfixonō nānorimāi Moisés yoipaonino.

²⁵ Nā Jerusalén anoa feronāfake Nios Ifokōi faa ini, āfe ane Simeón. Nāato Nios Ifo sharakōi faxō kīfitaifaaponi. Niospa Yōshi Sharapa Simeón ikināno, nāato Cristo manapaoni, āfe kaifo israelifo ifinō Niospa Yōshi Sharamāi afe ikano.

²⁶ Niospa Yōshi Shara a mēra naneano a mēraxō tāpimani iskakakī: “Mī fena naima na Niospa nīchiai nōko Ifo Cristo mī ōiyoi mā mī ōiax mī naxii,” ixō tāpimani, Niospa Yōshi Sharapa Simeón.

²⁷ Nāskata Niospa Yōshi Sharapa shināmanaino Nios kīfiti pexefā mēra ikikaini. Nānori José fe María āto fakeya ikifainifo, Moisés yoini keskakakī āto fake ispaxakakī. Mā ikiafono,

²⁸ Simeón atoki oxō inimayanā Jesús yome pishtakē chishtoinifōfāni, mā tāpixō. Nāskafaxō Nios yoisharani iskakakī:

²⁹⁻³¹ Ifo, ea mā yoyimis keskakakī mē ōi. Aicho, mē akiki inimakōiax mē naikai ēfe Ifo ōiax. Nāatofi noko ifixii kiki nō afe īpaxanō. Keyokōichi nō Ifofanō mī nokoki nīchia.

³² Nāskata mī nōko kaifo yamafiano mia shinākatsaxakakīma mī fākeoxō mia tāpikōikani. Akka nō israelifo mefe yorafo nō tāpikōixii, nā fakeōnoa Niospa nokoya rafemanano. Aōxō nā noko yoyimis keskakakī noko axoxii, Simeón fani.

³³ Ato askafaito nikakī María feta José āto ōitinī shinānifo: “Airā, nōkai nafo meka nikamisma,” ixō shinānifo.

³⁴ Akka Simeón Niospa Yōshi Sharapa shināmanaino ato yoisharani. Nāskaxō āfe afa yoini: “Nā mī fake chanīmara fakanax nōko kaifofo israelifo inimatirofo. Aōnoax isharapakexakakī. Akka nōko kaifo fetsafori afe rafeyamakanax omiskōipakenakafo. Nāskakē yora ichapafāfe chanīmara fakani. Akka fetsafāferi chanīmara fakaxō mā shinākani.

³⁵ Akka a āto ōitinī shinānifo keskakakī onetirofoma. Akka fētsa āa shinākā a shināi keskara onetiroma. A shināyamaifori onetirofoma. Xafakīakōi ato ōitiro. Nāskakē mī fake aa noikaspakaxō chakafaxikani. Askafaiāfe ōi aōnoax mī omiskōixii shināi. Nā kenopa mī ōiti xatea keskara mī meexii omiskōikī,” Simeón fani.

³⁶ Nānori kēro fistiri ini, āfe ane Anā. Nāatori Niosnoa yoini, a inōpokoai yoikī. Akka nā Anāmā apa Fanuel ini. Āfe kaifo Aser nafafo ini. Akka nā Anā yōxafokōi ini. Xomayakōi feneyayoni, siete xinia afeta akax fene nani. Nāskakē anā Anā feneya ipaonima.

³⁷ Ares ikax yōxafokōi ini ochenta y cuatro xinia ani feneyaxoma. Nāskakē Anāmā mēxotaima Nios kīfipaoni, pena fisti foni teneyanā. Nios kīfiti pexefā mēranoax Anā askapaoni.

³⁸ Nāskata María fe José Simeón fe yoināifono Anāri atoki oni. Oxō nānoa Jesús fichini. Fichita akiki inimani. Inimayanā Epa Nios iskakani: “Aicho Epa Niosi, iskaratīa mī Fake mī nokoki nīchiai nofe rafemis īpaxanō,” ixō yoini. Mā ōixō Anāmā Jerusalén anoafo ato yoini a na manamisfoki israelifo ato ifinō. “Mē nōko Ifo ōiaki mā nokoki nokoaki,” Anāmā ato fani.

Nazarete ano anā fenifo

³⁹ Nāskata María feta José Jesús Nios ispatakani, nā Niospa yoipaoni keskai anā āto mai ano fenifo, Nazarete pexe rasi ano.

⁴⁰ Nānoax Jesús mitsisipakōi yosini María fake. Afama mīshti tāpiakōi ini. Niospa aō noikī shināmasharani.

Jesús Nios kīfiti pexefā mēra ikini yomeax

⁴¹ Nāskax nā xinia tii Jesús āfe afa fe apa Jerusalén ano fopaonifo. Pascua fista aki fokani.

⁴² Jesús mā doce xinia akano apa feta āfa iyonifo, amisfo keskakakī fista akifokakī.

⁴³ Mā fista keyoano María fe José fenifo, āto pexe shināferakani. Akka Jesús nēteaito apa feta āfa tāpinifoma, māmāi ato fe kaira ikaxō tsōa tāpinima.

⁴⁴ Mā ato fe kaira ikanax tāpimāx fāi fonifo. Fāi fokāta shinānifo akka nōko fake akka inifo. Nāskata apa feta āfa fenani. Fenayanā afe yorafoya a afe rafemisfo yōkani: “¿Mā nōko fake ōimamē?” ato fani.

⁴⁵ “Maa, nō mī fake ōima. Niri oama,” fanifo. Ato askafaifono āfe apa fe āfe afa anā anori nētefaikani anā fonifo. Afianā fōtanifo Jerusalén ari. Mā nokokaxō fenafōfāsafanifo.

⁴⁶ Nāskata mā tres nia oxakata fichinifo nā judeofāfe Nios kīfiti pexefā mēranoa nā ato tāpimamisfo fe tsoaxō nikaino. Ato nikayanā ato yōkapakeni a ato tāpimamisfo.

⁴⁷ Ato askafaino nikakakī, “Nikakapo, ¿na fāke yomefixō afeskakī mekakī tāpisharakōiamē? Ato kemasharakōi,” fanifo.

⁴⁸ Ato askafaino afa feta āpa fichinifo. “Nono tsaofekē nō fenai nōko fake,” fanifo. Nāskata āfa kenatoshini: “Kōkaishta, ¿afeskai mī nēteamē? Mā mī noko ratekōia epa yafi. Afeskara ikara nō mia faa. Nāskakē nō mia fenafei nono ato fe tsoaxō mī yoifaiino,” fanifo.

⁴⁹ Askafaifono ato kemani apa yafi afa: “¿Afeskakī mā ea fenaimē? ¿Ea mā tāpimamē nā ēfe Epa Niospa pexe mēra ē ikikē nā ēfe Epa ea yoiai keskara ē faito?” ixō Jesús ato yoini.

⁵⁰ Ato askafaito apa feta āfa tāpinima.

⁵¹ Nāskata apa feta āfa iyonifo Nazarete pexe ari ato xanēnē. Nāskata mā nokoxō María shināni āfe fakeōnoa. Nāskaxō Jesús apa feta āfa yoiaito ato nikakōisharapaani ato shinākōikī.

⁵² Nāskata Jesús yokōkōini, āfe ōiti sharakōia. Mā āfe māpo afama mīshiti shinākōi inī. Nāskax yosini. Nāskaito ōikani yorafo akiki inimakōinifo. Niosri akiki inimakōi inī.

3

Juan Maotista tsōa istomaxō ato yoini

(Mt. 3.1-12; Mr. 1.1-8; Jn. 1.19-28)

¹⁻³ Akka mā yosixō Zacarías fāke ato Nios yoipaoni tsōa istoma anoxō. Tsōa istoma ano yora ichapa akiki fonifo nikaxikakī, nāskakē Zacarías fāke ato Nios yoiaino. Nānori Tiberio xanifo finakōia ipaoni, Roma anoax. Nāskakē aa ranā ikanax āto pexefo anoax xanifo ikaxō ato ikīpaonifo. Pexe fisti rasi anoax xanifo iki fetsepaonifo. Judeofāfe āto xanifo ini pexe fetsa anoax āfe ane Poncio Pilato. Askata pexe fetsa anoaxri āto xanifo fetsa Galilea anoax Herodes ato xanifo ini. Akka Feliperi xanifo xō pexe rasi anoax rafe kexepaoni. Itoria ano kexeta Traconite ano kexeta fapaoni. Akka nā Felipe āfe exto ipaoni Herodes. Nāskatari pexe fetsa anori xanifo fetsa ipaoni āfe ane Lisaniás Abilinia anoax. Akka āto xanifo finakōia ipaoni Tiberio. Nāato keyokōi kexepaoni. Mā xanifokī catorce xinia akano Zacarías fake Juan tsōa istoma ano ixō Niospa meka yoipaoni. Askatari judeofo yoipaoni āto mai ano ixō, yorafāferi ato Nios kīfixopaonifo. Akka Anás fe Caifás āto xanifo ipaonifo. Nāskakē nā Zacarías āfe fake Juan Judea mai ano ipaoni. Akka mā yosiax tsōa istoma ikē Niospa yoini aōxō ato yoinō iskakakī: “Māto chaka xatekāfe, a mā afara chaka shināni keskara anā shināyamakāfe. Niospa mato yoiai keskara nikakōikāfe. Mā nikakōiaito Niospa mato chaka soaxotiro. Mā askaito ē mato maotisafatiro, faka mēra ikimapakekī māto chaka mā xatenō ato ispaxiki ixō ato yoitāfe,” ixō Niospa nīchiano Juan ato yoifofāsafani faka Jordán arixō.

⁴ Afia Isaiás ato yoipaoni keskakakī Juan yoifofāsafani. Nānorikōi Isaiás kirika keneni a Juan mekanōpokofai yoikī:

Tsōa istoma ixō yorafo yoixii akiki feaifono. Iskakakī ato yoixii: “Mā nōko Ifo oi kiki. Nāskakē itipinīsharakāfe, āfe fai sharafaxokāfe. Māto chaka xatekāfe.

⁵ Nā xexa naxpe chakafo ano mai forosharakōi fanōfo. A machifo anori sapa sharakōi fanōfo. Nāskatari āfe fai mēstesharakōi faxonōfo. A xexa naxpefo ano mai forosharafaxonōfo sapa sharakōi inō nōko Ifofai.

⁶ Mā nōko Ifo Niospa nīchiano oxō a shināifo ato ifiyoi afe ipaxanōfo. Nāskakē keyokōichi ōixikani,”

ixō yoinōpokoi kiki nā yōra, ixō Isaiás kirika keneyoni, Juannoa yoikī.

⁷ Nāskakē nā Isaiás ato yoipaoni keskakakī Juan ato yoipaoni, mā chaima Jesús oaino. Ato Juan yoikī iskakafapaoni, a nikakani akiki yora ichapa feafono: “Noko Juan maotisafanō faka mēra ikimakī nō chiifā mēra kayamanō,” ikanax akiki feafono Juan ato yoini iskakakī: “¿Afesakai mā ea ano oimē? ¿Ē mato maotisafapanō mā oimē? ¿Tsōa mato yoiamē? Mā shināiraka nō chiifā mēra katirora ixō nāskax mā maotisapaimē, nō chiifā mēra kayamanōra ikax. Maa, māakai afaa tāpiana, askax mā maotisatiroma. Mā Nios Ifofaima. Mā oa shano keskara māto ōiti chakakōi. Nāskaxō mā Satanás ifofaa. Nāskakē kaxpa ē mato maotisafatiroma māmāi Satanás fisti shināito. Āa fētsa mato pāratiro nō maotisanō nō chiifā mēra kaimakai Nios nikayamafiāx ixō mato pārano mā chiifā mēra katiro fētsa afaa tāpimato mato pārano. Askara Niospa mato ifitiroma mākaikoro shināito, ēroko mato maotisafaano.

⁸ Māto chaka xatekāfe, Nios shinākāfe. Mā Nios shināito ē mato maotisafapanō. Ē mato anā yoinō nikakapo. Mā shināitiro: ‘Nā Abraham nōko xini ipaoni, ōiti sharayaxō Nios shināpaoni.’ Akka mā shinākī: ‘Nōmāi Abraham fenaxō nō shara shināi,’ ixō mā shinākī mā shināsharaima. Askara shināyamakāfe. Akka māto ōitinī mā chaka shināfi mā chanī.

Nikasharakōikāfe, ē mato yoinō. Na tokiri Niospa onifaxō nīchikē mā ōitiro Abraham āfe fena inō. Nāskakanax Abraham fakefo itirofo na tokiri ōiki Nios shinākanax. Akka mā kai anori shināima mā mā chanī, ‘Abraham shināpaoni keskara nō shināira’ ikax. Askara shināyamafi Satanás fisti ifofafiai.

⁹ Akka fana fimiyamaito ifāfe reratiro. Āfe tapori tsekaxō kooatiro anā niyamanō. Nāskari fakī mā Nios nikakaspaito a omiskōipakenakafo mēra Niospa mato potaxii mā chaka xateaxma mā isharayamaito,” ixō Juan ato yoini.

¹⁰ Ato Juan askafaito nikakakī kemanifo: “¿Chanīmamē? ¿Na mā yoiai keskara tāpiaxma nō afeskatiro mē? ¿Afesaxō a keskara shara nō shinātiromē?” faifāfe anā ato yoini:

¹¹ “A yora omiskōiāito afaamais oxō mato rapati yōkatoshīaito mā inātiro mā rapati rafeyaxō. Askatari yora fonāiki oaito mā pimatiro,” ato Juan faito nikanifo.

¹² Xanīfo kori fixomisfāferi Juan yōkanifo: “Maestro, ¿nō afeskatiro mē, mā noko maotisafanō?” fanifo.

¹³ Askafaifono ato yoini: “Māto xanīfāfe a tii mato yoiyamafiano finōmainīfōfā mā kori fitiroma,” ato fani.

¹⁴ Nāskatari sorarofāferi yōkanifo: “Akka, ¿nō afeskatiro mē?” ixō yōkanifo. Askafaifono ato yoini: “Ato kori fīapiakī shināyamakāfe. Askaxori ato ferateni mītsisipayamakāfe. Ato askafayamakāfe. Māto xanīfōri pārayamakāfe. Nā xanīfāfe mato inā tiya inimakāfe,” ixō ato yoini.

¹⁵ Nāskata yorafāfe ōinifo Juan mekaito. “¿A naamē Cristo?” ixō āto ōiti mēraxō shinānifo.

¹⁶ A shināifo keskara mā tāpixō Juan ato yoini: “Ēkai Cristoma. Nāskakē ē mato maotisafapai. Akka nā chipo oaito āfe Yōshi Shara mato mēra naneyoi. Nā sharafinākōia, ea keskarama. Aato afama mishti fatiro, ē atiroma keskara. Akka ē afaama,” ixō Juan ato yoini. Mā chaima Jesús oaito yoikī ato askafani.

¹⁷ Nāskaxō ato yoipakeni: “Mā Nios shināito mato ifixii. Akka a shināyamaifo ato ifixiima. Afāfekairoko ifofaifono nāfo chiifā mēra ato potano anoax omiskōipakenakafo” ato fani.

¹⁸ Nāskatari meka shara ato yoini, āto ōiti mēra ato nanemapaikōini āto chaka xatenōfo. “Mā nōko Ifo Jesucristo chaima oi kiki, shināsharakōikāfe,” ixō ato yoitaifapaoni.

¹⁹⁻²⁰ Askatari xanīfo Herodes yoini: “¿Afeskakī mī exto āfi fīaitamē? Askatari mī ato chakafafōfāsafai,” fani Juan. Askafaito nikakī Herodes akiki ōitifishkixō achixō karaxa mēra ikimani.

*Juan Jesús maotisafani faka Jordán anoxō
(Mt. 3.13-17; Mr. 1.9-11)*

²¹ Akka Herodes karaxa mēra nīchiyoamano Juan ato maotisafapani. Jesúsri mā yosiaito nāri maotisafani. Mā maotisafaano fininākafāta Apa Nios Kīfīni.

²² Apa Kīfīaino nai mēranoax oa rīfī keskara āfe Yōshi Shara fotopakekafāni akiki. Fotopakekafanaino nai mēranoax mekaito nikani iskaito: “Mī ēfe Fakekōi ē mia noikōi. Ē mikiki inimasharakōi,” ixō Apa Jesús yoiaito nikani.

*Jesucristo āfe xinīfāfe anefo
(Mt. 1.1-17)*

²³ Jesucristo mā treinta xinia axō taefakī ato yoini Apa Niospa meka. Yorafāfe José fakera fāfiaifono Niospa Fake ini. Nāskafīax nāato chata ipaoni Elī.

²⁴ Elī apa Matat ini. Matat apa Levī ini. Levī apa Melqui ini. Melqui apa Jana ini. Jana apa José ini.

²⁵ José apa Matatías ini. Matatías apa Amós ini. Amós apa Nahúm ini. Nahúm apa Esli ini. Esli apa Nagai ini.

²⁶ Nagai apa Maat ini. Maat apa Matatías ini. Matatías apa Semei ini. Semei apa Josec ini. Josec apa Judá ini.

²⁷ Judá apa Joanán ini. Joanán apa Resa ini. Resa apa Zorobabel ini. Zorobabel apa Salatiel ini. Salatiel apa Neri ini.

²⁸ Neri apa Melqui ini. Melqui apa Adí ini. Adí apa Cosam ini. Cosam apa Elmadam ini. Elmadam apa Er ini.

²⁹ Er apa Josué ini. Josué apa Eliezer ini. Eliezer apa Jorim ini. Jorim apa Matat ini.

³⁰ Matat apa Levī ini. Levī apa Simeón ini. Simeón apa Judá ini. Judá apa José ini. José apa Jonam ini. Jonam apa Eliaquim ini.

³¹ Eliaquim apa Melea ini. Melea apa Mena ini. Mena apa Matata ini. Matata apa Natán ini.

³² Natán apa David ini. David apa Isaí ini. Isaí apa Obed ini. Obed apa Booz ini. Booz apa Sala ini. Sala apa Naasón ini.

³³ Naasón apa Aminadab ini. Aminadab apa Admín ini. Admín apa Arni ini. Arni apa Esrom ini. Esrom apa Fares ini. Fares apa Judá ini.

³⁴ Judá apa Jacobo ini. Jacobo apa Isaaca ini. Isaaca apa Abraham ini. Abraham apa Taré ini. Taré apa Nacor ini.

³⁵ Nacor apa Serug ini. Serug apa Ragau ini. Ragau apa Peleg ini. Peleg apa Heber ini. Heber apa Sala ini.

³⁶ Sala apa Cainán ini. Cainán apa Arfaxad ini. Arfaxad apa Sem ini. Sem apa Noé ini. Noé apa Lamec ini.

³⁷ Lamec apa Matusalén ini. Matusalén apa Enoc ini. Enoc apa Jared ini. Jared apa Mahalaleel ini. Mahalaleel apa Cainán ini.

³⁸ Cainán apa Enós ini. Enós apa Set ini. Set apa Adán ini. Nāskanifo āto xinifo. Akka āto fenafo mā kaiafo. Adán āfe apa Nios ini, nāatomāi onifakē.

4

Satanás chakata Jesús afara chakafamapaini

(Mt. 4.1-11; Mr. 1.12-13)

¹ Mā Juan Jesús maotisaano Niospa Yōshi Sharapa iyoaino faka Jordán anoax kani. Tsōa istoma ano kani, Niospa Yōshi Sharapa iyoaino māmāi Niospa Yōshi Shara āfe ōiti mēra naneano.

² Nāskata Jesús ares kafāsani, tsōa istoma ano cuarenta nia oxax afaa pishta piaxma. Nāskakē Satanás akiki kani. Mā akiki nokoxō ifofamapaini. Nāskaxō afara chakafamapaini. Nāskata mā cuarenta nia oxax Jesús fonāikōini, afaa pishta piaxma.

³ Nāskaito ōiki Satanás yoini iskafakī: “Mī Niospa Fakemākī na tokiri pāa fapo,” fani.

⁴ Nāskafaito Jesús kemani: “Maa, na mī ea yoiyai keskara ē akima. A nō piyai fisti nō shināima nipaikī. Akka Epa Niospa āfe meka shararoko nō shinātiro. Nāskara Niospa meka yويمisto keni,” Jesús fani.

⁵ Nāskata Jesús fe Satanás yamaris iakekēfofānifo. Māchifā mǎnǎnē fokani. Nārixō Satanás Jesús nā maitio ispani.

⁶⁻⁷ Nāskaxō Satanás yoini: “Ōipo, ea mīa ifofaxō mī ea yonoxonaito na mī ōiaifo keyokōi sharashtakōifo ē mia inātiro. Nāskakē keyokōichi āto ifo mī itiro. Nafo ēfenākōifo. Ōipo, na maitio ē ato ināpaiki ē ato inātiro atonā inō,” Satanás fani.

⁸ Nāskafaito Jesús kemani: “Maa, ē mia ifofaima. Nios fisti nōko Ifokōi. Nāskakē nō ratokonō mai chachixō nō yoitiro aato noko shināmanō. Nāskaxō nō yoitiro iskafakī: ‘Mīfi nōko Ifoki nō mia shināi,’ ixō nō yoitiro. Nāskarafi kirika ano keneakī,” Jesús fani.

⁹ Jesús askafaito Satanás anā Jesús iyoni a Nios kīfiti pexefā māmākīaxō yoyixiki iskafakī: “Mī Niospa Fakekōiaxroko mī niriāx ichopakekafanikai.

¹⁰ Mī ichopakekafānax mī afeskaimakai. Nā Niospa meka kirikaki keneaki iskai: ‘Niospa āfe ājirifo yoyixii mia kexenōfo.’

¹¹ Askatari kirika keneano iskaki: ‘Mī āto mīfiki pakeaito mia achixikani kiki mī tokiriki pakenōma,’ kirika kenea iskakī,” Satanás Jesús fani.

¹² Satanás askafaito afianā Jesús kemani: “Nōa nō meka fetsafaxō nō yoitiro, ‘Ē afara afeskarafaito, ea Niospa kexei,’ ixō nō shinātiroma. Akka, ‘Niospa ea amapaiyai keskara nā fisti ē atiroki Niospa ea kexenō,’ ixō shinākāfe, ikaki na kirika keneano,” Jesús fani.

¹³ Jesús askafaito nikai Satanás kani, Jesús afeskafatiroma mei. Anā oxō Satanás Jesús afara chaka shināmaniyoxiki ikaini kani. Jesús afara chakafamapaiikī chakafamanima. Akka Jesús finakōia ini Satanás mǎnǎo nia.

Galilea anoxō Jesús ato yoiikī taefani

(Mt. 4.12-17; Mr. 1.14-15)

¹⁴ Nāskata Jesús Galilea ano anā kani, Niospa Yōshi Sharapa shināmanaino. Mā nokokē Galilea anoxō yorafāfe nikanifo mā Jesús nokoa ikaxō.

¹⁵ Nāskata mā nokoxō judeofāfe ichanāti pexe mēraxō ato yoini. Nāskaito ōikani, akiki inimasharakōinifo. “Na feronāfake āfe meka sharakōi,” fanifo.

Jesús Nazarete anoxō nikakaspanifo

(Mt. 13.53-58; Mr. 6.1-6)

¹⁶ Nāskata nā yosini ano kani Nazarete ano. Nāskax safaronō judeofāfe ichanāti pexe mēra ikini māmāi askai feyakatsaxakī. Ikikainax tsaoni. Nāskata niinākfā kirika fita aneni.

¹⁷ Nāskata afia Niospa shināmanaino Isaías kirika keni inānifo anenō. Nā kirika fepexō aneni iskafakī:

¹⁸ Niospa Yōshi Shara emēra naneano ea nīchini ē ato yoinō āfe meka shara a faamaisfo, “Niospa mato noiisharai,” ixō, “A Satanás chaka ifofafo a chaka potakāfe, mato mēra

nanepaiyaito anā a chaka nikayamakāfe isharakōixikakī, ixō ē ato yoinō; askatari nā fēxofori ē ato fero sharafaxonō aō ōisharanōfo: nāskatari nā omiskōikakī afaa shināifoma nāfori ē ato shināmasharanō;

¹⁹ askatari ē ato yoisharanō afetiā Epa Niospa afe yorafo ifimākai, ixō Jesús aneni.

²⁰ Niospa meka mā yoikī xatexō kirika fēpoxō feronāfake fetsa ināni, tsaopakekafāxō ato yoixiki.

Ato askafaito aas ōiketsanifo.

²¹ Nāskata ato yoini: “Ē fakeyoamano Isaías eōnoa yoipaoni keskafakī iskaratiā mē mato kirika anexona,” ato Jesús fani.

²² Ato askafaito nikakakī: “¡Aira! Nikakapo, āfe meka sharakōi. Josē fakefixō ¿afeskakī iskara yoimē?” fanifo.

²³ Askafaifono Jesús ato yoini: “Mā ea iskafairaka: ‘Mī ato Capernaúm anoa sharafaito nō nikamiskī mā anoi sharamefe. Nāskakēri nā mī yoiāi keskafakī nonoafori ato sharafafe mia ōixō nō mia chanīmara fanō; ixō mā ea yoipairaka,’ Jesús ato fani.

²⁴ Anā Jesús ato yoini: “Chanīma ē mato yoikōi. Āto pexekōi anoxō noko iskafatirofo mā nō na ōimis koshikai afaa tāpiama na Niospa meka yoipaiyai aa chanī noko fatirofo.

²⁵ Chanīma ē mato yoikōi. Kirika kenekī nō anetiro iskafakī. Elías nōko mai ano ipaoni. Israel mai ano ari ikano akiki oi inima. Arixō tres xinia ata seis oxe ani, oi manakī. Nāskakē israeli yorafo fonāiki finakōinifo, afaa pikanima. Ari kēro ifomafa fenemais ichapa inifo omiskōikani.

²⁶ Nāskafixō Epa Niospa nōko xini Elías ato ano nīchinima. Askatamaroko Sarepta pexe rasi Sidón mai ano nīchini kēro ifomafa fisti nīchini pimanō. Niospa nīchiaino chai kani.

²⁷ Askatari yora fetsafo israelifāfe mai anoax ichapakōifo rashkishikani inifo. Akka Elías Niospa meka yoimisto aa rashkishiāifo ato sharafapaonima. Askatamaroko nā Siria mai anoā fistikōi sharafani. Āfe ane Naamán. Nā Naamán Siria mai anoā ini, israeli inima,” Jesús ato yoini.

²⁸ Jesús ato askafaito nikakani yorafo ichanāti pexe anoax akiki ōitifishkinifo. Akiki ōitifishkikakī achinifo.

²⁹ Achikaxō iyonifo Nazarete pasotai mafa keyakōi ano Jesús iyopainifo arixō potapaikakī.

³⁰ Potapaifaifono Jesús ato rāiferani. Nāskax ato makinoax kani.

*Nānori feronāfake niafaka chaka nanea ini
(Mr. 1.21-28)*

³¹ Jesús Capernaúm ano kani, Galilea mai ano. Nānoxō pena tenetiā Apa Niospa meka ato yoini.

³² Ato yoiāito nikai iskanifo: “¡Kee! Nikakapo. Nato tāpikī finakōia, meka sharakōi nato yoi,” ikanax aa ranā yoinānifo.

³³ Judeofāfe ichanāti pexe mēraxō yora mēra niafaka yōshi chaka nanexō Jesús fāsikōi mekafani.

³⁴ Iskafakī yoini: “¿Afeskakī mī noko fekaxtefaiyoamē, Jesús Nazarete anoato? ¿Mī noko a omiskōipakenakafo mēra mī noko potaiyoamē? Ē mia ōimisnō, mī sharakōinō Niospa mia nīchiano,” fani.

³⁵ Nīafaka askafaino Jesús yoini: “Mekayamafe. Na feronāfake makinoax tsekekaitāfe,” ixō mitsisipakōikai Jesús niafaka nīchini.

Jesús askafaino nīafaka yora fia kekēfofā potafaini yorafāfe ferotaiifi nāskax tsekekaiikī afeskafanima.

³⁶ Askafaito ōikakī yorafāfe iskafanifo: “Chanīma, Jesús afama mīshti fatiro. Iskarakai nō tsōa ōimisma. ¿Afeskaxō iskafaimē, na feronāfake makinoā niafaka potai? Meka finayakōikē nīafaka nikafainikai,” yorafāfe fanifo.

³⁷ Askafaito ōikaxō yorafāfe pexe tii anoāfo yoifofāfofāinifo Jesús yora makinoā niafaka potaito ōikaxō.

*Jesús Pedro rayos sharafani
(Mt. 8.14-15; Mr. 1.29-31)*

³⁸ Askakaini Jesús judeofāfe ichanāti pexe anoax tsekekainax Simón pexe mēra ikini. Nānox Simón rayos yōxafo yonai finakōini. Nāskaito ōikakī Jesús yoixonifo: “Na yonai sharafafe,” fanifo.

³⁹ Askafaifono nā kēro yōxafo yonai mánāo kāta Jesús kātīpakekafāta yoini iskafakī: “Mī yona nishpafe,” faino samamakōi āfe yona nishpatani. Nāskata mā yonai nishpata, fininikafāta itipinīshara fani ato pimaxiki.

A isinī ikaifo Jesús ato sharafani

(Mt. 8.16-17; Mr. 1.32-34)

⁴⁰ Akka mā xini kaino nā isinī ikaifo fetsa fetsatapapo Jesús ano efenifo. Nāskakē Jesús āfe mēkemā ato māmāpakeaino sharai fetsenifo.

⁴¹ Ranāri nā isinī ikaifo mēranoax niafaka chakafano tsekeni. Fāsikōi mekayanā iskafanifo: “Mīfi Niospa Fakekī,” fanifo. Niafakafāfe askafafonono kerexkai Jesús ato pōtapakeni. Nāskaxō ato mekatima fani māmāi tāpiafāfe nāmāi Cristokē.

Jesús ichanāti pexe mēraxō Apa Niospa mekasharaōnoa ato yoini

(Mr. 1.35-39)

⁴² Mā penaino Jesús tsekekaini, pexefā rasi anoax tsōa istoma ano kai. Nāskaino yorafāfe fenanifo. Nāskakanax akiki nokokaxō nētefapainifo ato makinoax kayamanō.

⁴³ Askafafonono Jesús ato yoini: “Akka, ē Niospa meka shara ato yoifofāfōfāni pexe fetsafo ano afe keskaramākī Epa Nios xanīfāfe noko ikinā. Nāskakē Epa Niospa ea nīchini, ē ato yoinō.”

⁴⁴ Nāskakē kafāsakī Jesús Niospa meka ato yoifofāsafani, ichanāti pexe mēraxō Judea mai anoxō.

5

Jesús foe rasi tarafanāfā mēra ato fospi faxoni, tsōa atiroma keskafakī

(Mt. 4.18-22; Mr. 1.16-20)

¹ Pena fetsa Jesúsxō foe rasi finifo iamāfā ketokonōxō Genesaret anoxō. Askafaito ōikani yora rasi akiki fenifo. Niospa meka niakai fekani.

² Jesús nānoa kanōanāfā rafe rakakē fichini, nā kanōanāfā mēranoax mā fotokaxō ifofāfe ato tarafanāfā chokaifono.

³ Nāskakē nā kanōanāfā fetsa mēra Jesús naneinākakani, nā Simonā mēra. Nāskaxō yoini: “Eaya fenāmāshta kanōanāfā pitsikife,” fani. Nāskata kanōanāfā mēra tsaoxō yorafo yoikī taefani.

⁴ Mā ato yoikī xatexō Simón yoini: “Nā ia noa ano kanōanāfā fotakāfe. Anoxō mātō tarafanāfā potaxō foe fixikakī,” fani.

⁵ Askafaito Simón kemani: “Maestro, fakishchāi nō yonoshina tarafanāfānē fipaikī. Akka nō fiama. Akka mī noko yoikai ē tarafanāfā potenō,” fani.

⁶ Mā āto tarafanāfā potekaxō foe ichapakōi finifo. Oa tarafanāfā faxteai keskara meenifo.

⁷ Nāskakaxō nā ato fe rafeafo ato kenanifo, kanōanāfā fetsaōnoa, ato feta fii fenōfo. Nāskakaxō nā kanōanāfā rafe foe rasi fospikōi faafono nā kanōanāfā rafe faka fospikōiax foefoya ikikerani.

⁸ Nāskara ōikī Simón Pedro Jesús nāmā ratokonō mai chachipakefōfā yoini: “Ifo, emakinonox katāfe, ē feronāfake chakakī,” fani.

⁹ Simón askaito ōi a āfe rafeafori ratekōinifo Jesús foe ichapa tarafanāfā mēra ato nanexonano.

¹⁰ Akka nā Simón fe rafeafo inifo, Santiago fe Juan āto apa Zebedeo ini. Nāskakē Jesús Simón yoini: “Rateyamafe. Iskaratīa yorafo ēfe Yōshi Sharaōxō mī ekeki efeikai,” fani.

¹¹ Nāskakata āto kanōanāfā fōkata iamāfā kesemē nexakata mā Jesús fe fōkakī āto afama mīshti ōifainifo.

Jesús yora rashkishiai sharafani

(Mt. 8.1-4; Mr. 1.40-45)

¹² Pena fisti pexe rasi ano Jesús ikano nāno feronāfake isinī iki rashkishi fetseax akiki oni. Mā akiki oxō ratokonō mai chachipakefōfā yoini: “Ifo, ea sharafapaikī mī ea sharafatiro,” faito,

¹³ Jesús āfe mēkemā ramāyanā yoini iskafakī: “Ē mia sharafanō. Iskaratīa mī sharaikai,” faino a rashkishi fetseai koshikōi sharatani.

¹⁴ Mā sharano Jesús nīchini iskafakī yoivanā: “Mī toa yoiki. Akka nā ato Nios kīfixomis ispatāfe. Nāskaxō ovejanā fake foxō ināfe mia retexonō Moisés yoini keskafakī. Nāskaxō keyokōichi tāpinōfo a mī isinī imis mā mī sharano,” ixō Jesús yoini.

¹⁵ Jesús askafaito aōnoa mēxotaima nikakī finakōinifo. Nāskakanax yora kaya akiki fenifo nikakani, a isinī ikaifori ato sharafapanō.

¹⁶ Nāskax Jesús ato makinoax kani, a tsōa istoma anoxō Apa Nios kīfikai.

Jesús yora finimisma sharafani

(Mt. 9.1-8; Mr. 2.1-12)

¹⁷ Pena fetsa Jesús ato yoiaino nāno fariseofo tsaaofo inifo. A Moisés yoikī kirika keneni keskara ato tāpimamisfori inifo. PeXe rasi Galilea anoax fekāta Judea anoax fekāta Jerusalén anoax fekāta inifo. NānoXō Niospa āfe shara Jesús ato ōimani, a isinī ikaifo ato sharafapakī.

¹⁸ Nāskakata feronāfakefo nokonifo. Feronāfake finimisma ratatinī rataxō iyoifokani. Nāskakata peXe mēra ikimapainifo, Jesús ano iyopaikakī.

¹⁹ Akka afeskaxma ikitiroma inifo, yorāfo ichapakōimāiyakē ikipanāfāfe. Nāskakanax peXe fomākīa inanifo. Nārixō nā finimisma ratatinī rataxō fotomapakefofānifo, yorāfāfe ferotaifi Jesús nia nāmā.

²⁰ Jesús ōini shināifāfe iskakakī na finimisma Jesús sharafai kiki ikaxō. Nāskakē a finimisma Jesús yoini: “Efe yorashta, mē mia chaka soaxona,” fani.

²¹ Nāskafaito ōikakī, a Moisés yoikī kirika keneni keskara ato tāpimamisfo feta fariseofāfe shinānifo iskakakī: “Akka, ūna tsoamē na chanīai Nios chakafakī mekafayanā? Akka Nios fistichi ato chaka soaxotiro,” fanifo.

²² Akka Jesús tāpini askafaifono. Nāskaxō ato yōkani: “ŪAfeskakī iskara mā shināimē?”

²³ Akka, ūē afaa fatiromē? Mē mia chaka soaxona ē fatiroraka, askayamakī mē mia sharafaa ē fatiroraka,” ixō ato yoini.

²⁴ “Akka ē mato tāpimanō Niosxō ē ato chaka soaxotiroki nono mai anoXō,” ato fani. Nāskaxō a finimisma yoini: “Ē mia yoi, fininīkafāta mī rakati fifaini mī peXe ano katāfe,” fani.

²⁵ Nāskafaino a finimisma fininākfani yorāfāfe ferotaifi. Nāskaxō a kamaki rakamis āfe rakati fifaini āfe peXe ano kani. Epa Nioski inimayanā. “Aicho, Epa Nios sharafinākōia,” faafoni.

²⁶ Finikainaito ōikani ratei fetsenifo. Nāskakanax, “ŪAicho, Epa Nios sharafinākōia!” inifo. Ratekōiyānā iskakakī yoinifo: “Akka mā nō ōi afama mīshti shara fai,” fanifo.

Jesús Levī ifini aōxō tāpimis inō

(Mt. 9.9-13; Mr. 2.13-17)

²⁷ Mā askafata Jesús tsekeikakī ōini, a āfe xanīfo Roma anoa kori fixomis. Nā āfe xanīfo kori fixomisto āfe ane Levī* ini. Akka nā ato kori fixomis ano tsaao ini. Nāskakē Jesús yoini: “Efe kafe,” fani.

²⁸ Nāskafaino Levī fininākfāta āfe afama mīshtifo ōifaini Jesús fe kani.

²⁹ Nāskata chipo Levī āfe peXe anoXō fista efapa ani Jesús noisharakōiyānā. Yora ichapa rasiri afe inifo. Nā xanīfo Roma anoa kori fixomisfo. Yora fetsafori afe inifo. Nāno ato fe mīsa ano tsaonifo.

³⁰ Akka nā fariseofo feta a Moisés yoikī kirika keneni keskara ato tāpimamisfāfe Jesúsxō tāpimisfo mekakakī taefanifo. Ato iskakafano: “ŪAfeskakī ato feta pita ato feta ayata mā faimē? Na ato kori fixomisfo feta na yora chakafo fetari mā pii,” ato faifono,

³¹ Jesús ato kemani: “A sharafāfe notoro fenakanima, a isinī ikaifāfemari notoro fenakanima. Akka nā isinī ikaifāfe notoro fenakani.

³² Akka a yora sharafoōnoax ē onima. Nā afara chakafakanax shināmitsaifoōnoax ē oni, ato chaka soaxoxiki Epa Nios Ifofanōfo,” ato fani.

Nā foni tenemisfofāfe Jesús yōkanifo

(Mt. 9.14-17; Mr. 2.18-22)

³³ Iskakakī Jesús yoinifo: “Akka Juan inafāfe, fariseofāferi foni tenekōiyānā Epa Nios kīfikī chai yoimisfo. Akka mī inafāfe mēxotaima piyanā ayakani,” faifono,

³⁴ Jesús ato kemani: “Akka yorāfo matoki feafono mā ato foni tenematiroma, feronāfake āfiyai. Nā feronāfake mato fe ikano inimakōikī mā ato feta pitiro.

³⁵ Akka nā feronāfake ato makinoa iyoafono āfe yorāfāfe shinākakī foni tenetirofo. Nāskarifiakī eōxō tāpimisfāfe inimakakī pitirofo. Akka mē ato makinoax kaano ea shinākakī tsōa pitirofo,” ixō Jesús ato yoini.

³⁶ Nāskafata afianā Jesús ato yoini iskakakī, mēka fetsafaxō: “Tsōa sama fenaya sama xini kishi fatiroma. Nō askafaino sama fena samama chakanatiro. Nāskatarī sama fena fe sama xini isharatiroma. Nāskakēri nā ē mato yoiāi keskara mā nikakōixō a mā ipaoni keskai anā mā itirofo māmāi ea nikakōiax. A mā ipaoni keskara shināmakita nāskax mātō yora fena keskara shara itiro.

³⁷ Nāskarifiakī tsōa māmā fata koiro pisha xini mēra nanetirofo nā māmānō farax akaino toxamāiyānō. Nāskakē nā māmā fata fe koiro pisha chakanatirofo. Akka nā mātō xinifāfe mato yoimisfo keskara fe nā ē mato yoiāi keskara osinātiroma. Nā ē mato yoiāi keskara Niospa mēka sharakōi. Akka a mātō xinifāfe mato yoimisfo anori shināx mā isharatiroma. Niospa mekaya mēka chaka osinātiroma. Nāskakē mā nikapafikī mā shināsharatiroma.

* 5:27 Levī ane rafeya ipaoni. Āfe ane fetsa Mateo.

³⁸ Nāskarifikāi tsōa māmā fata koiro pisha xini mēra nanetiroma nā māmānō farax akaino toxamāyanō. Nāskakē nā māmā fata fe koiro pisha chakanatirofo. Akka nā mātō xinifāfe mato yoimisfo keskara fe nā ē mato yoiai keskara osinātiroma. Nā ē mato yoiai keskara Niospa meka sharakōi. Akka a mātō xinifāfe mato yoimisfo anori shināx mā isharatiroma. Niospa mekaya meka chaka osinātiroma. Nāskakē mā nikapaifikī mā shināsharatiroma.

³⁹ Akka māmā pae ayatiakaxō anā tsōa fata ayapatiroma. Nāskariai iskatirofo: “Nā ē ipaoni keskara afianā ē askapai, ēfe xinifāfe ea yoimisfo keskara shara nā fisti ē shināi. Akka meka fetsa chaka ē nikapaima. Askatari meka fena chaka ē shināima,” ixō shināmisfo fariseofāfe,” Jesús fani.

6

Nā judeofāfe pena tenetiā Jesúsxō tāpimisfāfe aros keskara metesfenifo
(Mt. 12.1-8; Mr. 2.23-28)

¹ Nā pena tenetiā Jesús aōxō tāpimisfo fe tarepa kani. Kākī aōxō tāpimisfāfe aros keskara meteskaxō fonāikakī piifonifo.

² Nāskakē fariseofāfe ato yōkanifo: “¿Afeskakī mā na aros keskara metesfeimē na pena tenetiā tsōa yonotiroma ixō Moisés noko yoifinino?” fariseofāfe ato fanifo.

³ Ato askafaifono Jesús ato kemani, “Akka, ¿a nōko xini Davidōnoa kirika kenenifo keskara mā ōimismē David afaa afeska fanimē āfe inafō feta fonāikōi?”

⁴ Nāskax a Nios kīfiti pexefā mēra ikikaini. A mēra ikikaixō pāa fichixō pini, nā pāa Nios ināmisfo. Nāskaxō āfe inafari ināni akairi pinōfo, akka nā Nios ato kīfixomisfāfe ares nā pāa pīfiamisfono. Akka fonāikī finakōikī David nā pāa pini āfe inafō feta.

⁵ Akka ēfe Epa Niospa ea katonī. Nāskakē eres fisti ē yoitiro a nō atiro keskara na pena tenetiā,” ixō Jesús ato yoini.

Feronāfake mēke yōshiya Jesús sharafani
(Mt. 12.9-14; Mr. 3.1-6)

⁶ Pena fetsa pena tenetiā Jesús ikikaini judeofāfe ichanāti pexe mēra anoxō ato yoixiki. Anoxō ato yoiaino, nāno ato fe feronāfake āfe pōya kayakai aōri āfe mēke yōshiya ini.

⁷ A Moisés yoikī kirika kenenī keskara ato tāpimamisfo feta fariseofāfe ōinifo, na pena tenetiā na mēke yōshiya Jesús sharafaimākai ikaxō, afara chakafaira ixō yōapaikakī.

⁸ Akka Jesús mā tāpia ini a shināifo keskara. Nāskaxō a feronāfake mēke yōshiya yoini: “Fininākfāta ato nēxpakīa nife,” faino, nā mēke yōshiya fininākfāta niini.

⁹ Nāskaxō Jesús ato yoini: “Ēri mato yōkanō. Akka, ¿pena tenetiā afaa nō afeskafatiromē, shara fayamakī nō chakafatiromē? Askatari ato ifiyamata, nō ato retetiroraka,” ato fani.

¹⁰ Nāskaxō keyokōi ato ōiakeni, a kemataima tsaofa. Nāskata a feronāfake mēke yōshiya yoini: “Mēshafe,” faino nā mēke yōshiya meshatani. Nāskax mēke sharakōia ini.

¹¹ Akka nā fariseofo fe a Moisés kenenī tāpimisfo akiki ōitifishkinifo. Nāskax āa ranā yoinānifo: “¿Nō Jesús afeskafatiromē?” ikanax.

Jesús aōxō tāpimisfo doce feronāfake ifni
(Mt. 10.1-4; Mr. 3.13-19)

¹² Pena fetsa Jesús kani māchi keya ano Apa Nios kīfikai. Arixō fakishchāi Apa Nios kīfishini.

¹³ Mā penano a aōxō tāpimisfo ato kenani. Nānoxō doce faxō ato katonī, aōnoa ato yoimisfo inōfo.

¹⁴ Nā feronāfake docefāfe āto anefo fetsa Simón ini, āfe ane fetsa Jesús faxoni Pedro fakī; fetsari Andrés ini, nā Simón exto; fetsari Santiago ini; fetsari Juan ini; fetsari Felipe ini; fetsari Bartolomé ini;

¹⁵ fetsari Mateo ini; fetsari Tomás ini; fetsari Santiago ini, nā Alfeo fake; fetsari Simón ini. Nāato āfe kaifo feta romanōfo potapaipaoni, anā israelifo yonomanōfoma.

¹⁶ Fetsari Judas ini, nā Santiago fake; fetsari Judas Iscariote ini, nāato Jesús ato achimani. Nā tii Jesús ifni doce faxō aōxō tāpimisfo inōfo.

Jesús yora ichapafō tāpimani
(Mt. 4.23-25)

¹⁷ Jesús māchi keya ariax fotonī, aōxō tāpimisfo fe a mai sapa shara ano. Nānoax aōxō tāpimisfo mā ichanāfo inifo. Yora fetsafori ato fe inifo. Judea mai anoax, Jerusalén anoaxri feafo ini fākfā kesemēnoaxri. Tiro anoax fekāta Sidón anoaxri fenifo. Āfe meka nikaxikakī Jesúski fenifo, aa isinī ikaifori ato sharafapanō.

¹⁸ A niafaka chakata ato fekaxtefaifo ato makinoa Jesús potano sharai fetsenifo.

¹⁹ Nāskakē yorafāfe Jesús ramāpaikani, āfe sharaōxomāi Jesús ato sharafapaino.

*Nā inimaifo yafi a inimaifoma Jesús ato yoini
(Mt. 5.1-12)*

²⁰ Jesús aōxō tāpimisfo ōikī yoini iskafakī: “Afaamaisfiāx mā inimakōitiro. Nios Ifofaax afe mā ipaxatiro nōko xanīfokōimāiyakē. Nāskakē mā inimatiro.

²¹ “Nā yorafāfe fonāikī pipaiyai fo keskafakī māri mā Nios Ifofasharakōipaiyai to māto ōiti mēra āfe meka shara nanetiro, mā inimasharakōinō. Iskaratīari omiskōi mā oiafiāx chipo mā inimai fitsakōitiro Nios fe ipaxakī,” ixō Jesús ato yoini.

²² Anā Jesús ato yoini: “Inimakōikāfe yorafāfe mato noikaspaifono mato potayanā. Askatari mato īchaifono, askatari mato ōikaspaifono askatari mato anekī chakafaifono. nāskakē inimakāfe eōxō mato askafakani kiki.

²³ Nāskakē mato askafaifono inimai finasharakōikāfe. Nāskaxō a nai mēraxō Niospa afara sharafo mato mekexona mā fixikai. Akka nā mato chakafaifo keskafakī āto xinifāferi nā Nios ato yoixomisfo chakafapaonifo ato omiskōimayanā,” ixō Jesús ato yoini.

²⁴ Akka nā kori ichapayāfo Jesús ato yoini iskafakī: “Ooa. Iskaratīa mā kori ichapayax mā inimakōi. Akka chipo naax mā omiskōipakenaka, Nios Ifofamax kori fisti shinānkatsaxakī.

²⁵ “Ooa. Iskaratīa afara ichapayax mā inimakōiyoi; akka chipo mā fonāixii. Askatari iskaratīa mā fitsakōiyoi; akka chipo shināmitsai mā oiaxii.

²⁶ “Yorāfo sharakōira mato faifono, mā inimakōimis. Māto xinifori nāskapaonifo, nō Niospa meka tāpikōikē noko yoisharakōikanira ikanax āa chanīfikani,” Jesús ato fani.

*“Mato noikaspaifaifono māroko ato noikāfe,” Jesús ato fani
(Mt. 5.38-48; 7.12)*

²⁷ Nāskata anā Jesús ato yoini: “Akka mā ea nikaito ē mato yoi. A mato noikaspaifo ato kopikima ato noikāfe. Askatari ato axosharakāfe.

²⁸ Mato chakafaifāferi ato yoisharakāfe. Askatari a mato omiskōimamisfo Epa Nios ato kīfixokāfe.

²⁹ Akka fētsa mato tapasaito, ‘Takai fetsari ea afe,’ fakāfe. Askatari fētsa mato tari fīaino āa fotanō inānkāfe, rapatiri mato fīaito inānkāfe āa fotanō.

³⁰ Akka fētsa mato afara yōkaito inānkāfe. Askatari fētsa mato afara fīaito ferateyamakāfe.

³¹ Nā mā fīchīpaiyai keskafakī fetsafāfe mato axosharaifono, nāskarifiakī māri fetsafori axosharakāfe.

³² “Akka mā ato noikī nā mato noiaifos mā ato noia, askarakai sharama. Yora chakāfori nāskariakani; nā ato noiaifos ato noikani. Mā askainokai, ‘Mā afarafo shara faa,’ ixō Niospa mato yoima.

³³ Askatari mā ato afara axoshara nā mato afara axosharaifos, askarakai sharama. Nāskariakani yora chakāfori. ‘Mā afara sharafo shara faa,’ ixō Niospa mato yoima.

³⁴ Akka mā ato kori ināxō mā ato shinākōimis nokomāi kopifakōikanira ixō; akka na yora fetsafāfe ea afaa kopifatirofoma. Nāskakē ē ato afaa ināpaima ixō mā shinākī mā afaa ināma, askara sharama. Nāskarifiakani yora chakāfo kori inānōnāmisfo nokomāi kopifasharakōikanira ikanax.

³⁵ Akka ē mato yoinō, nikakapo. A mato noikaspaifāfe māroko ato noikāfe, ato shara fakāfe. Afara ato ināxō ea kopifāfe iyamakāfe. Mā askai Epa Nios ari mā nokoaito matoki inimayanā afara sharafo mato ināxii. Nāskax mā Nios Sharapa fake mā iki. Nāfi tsoa keskaramāki sharafinakōiaki. Epa Nios sharakōi tsōa fayamafiaino ato noikōi. Nā yora chakāfori ato noi.

³⁶ Nāskakē māri ato noikōikāfe, nā Epa Niospa ato noikōiai keskafakī,” ixō Jesús ato yoini.

*“Fetsafo mekafakī chakafayamakāfe,” ixō Jesús ato yoini
(Mt. 7.1-5)*

³⁷ Anā Jesús ato yoini iskafakī: “Mēxotaima fetsafo mekafayamakāfe iskafakī yoiki: ‘Nato afara chakafakī Niospa omiskōimapainō,’ fakī. Akka mā ato askafayamaino Niospari mato mekafatiroma iskafakī yoiki: ‘Na yorāfo chakāfo,’ mato fatiroma. Akka yorāfo fe rafesharaxō ato raefakāfe. Mā askaino Epa Niospa matori raeshara faxii mā yorāfo fe rafesharano.

³⁸ Fetsafo afara ināsharakōikāfe. Mā fetsafo afara ināsharakōikē, matori Niospa afara ichapa sharakōifo ināxii. Akka mā fetsafo afara ināsharakēmā Niospa matori afaa ichapa ināxima, mā ato afara ināsharakōikēmā,” Jesús ato fani.

³⁹ Jesús meka fetsafaxō ato yoini iskafakī: “Akka yora fēxo afe fēxo iyopaiikī iyotiroma, mai xato mēra paketiro. Nāskari fakī fētsa Niospa meka tāpīxoma mato yoitiro. Askara yorāfo yoyamakāfe, mato anorima yoitirofoki.

⁴⁰ Akka a aōxō tāpimisfāfe a ato tāpimamis finōtirofoma. Akka mā tāpisharakōikanax āto maestro keskara itirofo.

⁴¹ “¿Afeskakī ifi pasta pishta fetsa feronaki ikano mā òimē, māroko ifi pasta efapa feostamefixō?

⁴² Akka, ¿mā shināimamē a mā ifi pasta efapa feostamea? Akka afeskakī mā fetsa iskafaimē: ‘Yamā, ē mia fixonō a mī ifi pasta pishta fero naki ika,’ fakī, mākōi mā kakamepaimis. Mākai afaa tāpiama. Akka a mā ifi pastafā feostamea mā tsekayokāfe. Nāskaxō mā mā òisharakī a fetsa feronaki ika mā fixosharatiro. Nāskari fakī mā chaka xateyamaxō mā fetsafo chaka xatematiroma. Akka māto chaka xatexō fetsafo mā chaka xatematiro,” ixō Jesús ato yoini.

Ifi āfe fimioxō nō tāpitiro afe keskaramākī
(Mt. 7.17-20; 12.34-35)

⁴³ Anā Jesús ato yoini iskafakī: “Ifi shara fimi chakaya itiro. Ifi chakari fimi sharaya itiro.

⁴⁴ Akka ififo āfe fimioxō nō tāpitiro afe keskaramākī. Moxaya òikī nō tāpitiro. Na keoimara nō fatiro. Nāskari fakī nō tāpitiro moxaya òikī, nari uvamara nō fatiro.

⁴⁵ Nāskari fakī yora sharapa meka shara yoitiro, āfe òiti mēraxomāi shara shinākī. Akka yora chakapari meka chaka yoitiro, āfe òiti mēraxomāi chaka shinākī. Nāskaxō nā āfe òiti mēraxō shināi keskara yoitiro.”

Pexe rafeōnoa Jesús ato yoini
(Mt. 7.24-27)

⁴⁶ Nāskaxō anā Jesús ato yoini: “Akka, ¿afeskakī mā ea Ifofafiakī, a ē mato yoiai keskara mā akimamē?

⁴⁷ É mato yoinō afe keskarafomākī nā ea nikaifo, nāfāfe nā ē ato yoiai keskara amisfo.

⁴⁸ Nā yōra pexe fai keskara, pexe fakī mai chai pōkixō mai teiki nokoxō pexe kishi nīchiano. Mā faka faikī faka poikōikī pexe afeskafatiroma pexemāi kerexkōikē. Nāskarifiakī yōra ea Ifofasharakōixō afara afeskara afiatio shināchakatiroma.

⁴⁹ Akka nā ē yoiaito ea nikaito nā ē yoiai keskara akima, nā yora tatimato pexe fai keskara. Pexe fakī tāpixoma pexe kishi nīchisharamano, a nāmā faka faikī potatiro. Nāskax mā pexe pāoikax chakanakōitiro. Nāskarifiakī fētsa ēfe meka nikafikī ea nikasharaima. Nāskakē omiskōipakenakafo,” ixō Jesús ato yoini.

7

Jesús sharafani romanō xanīfāfe āfe ina yonaito
(Mt. 8.5-13)

¹ Mā Jesús yorafo yoikī xateax Capernaúm ano kani.

² Nāno soraro xanīfo romanō ini. Nāato a yonoxomis fichisharapaikōimis yonainfinakōi nakerani.

³ Nānoxō nā soraro xanīfāfe nikani Jesúsnoa yoaifono. Nāskaxō judeo anifofo nīchini Jesús yoixotanōfo a yonoxomis sharafaxoyonō.

⁴⁻⁵ Ato askafaino mā fokaxō Jesús yoinifo iskafakakī: “Oa soraro xanīfāfe nofe yora yamafixō noko axosharamis ikaxō chikishta,” fanifo. “Noko keyokōi noikōimis nāato ichanāti pexe noko faxoni. Nāskakē āfe ina mī sharafaxotiro,” judeofāfe Jesús fanifo.

⁶ Askafaifono Jesús ato fe kani. Akka Jesús mā pexe chaima faikaino, nā soraro xanīfāfe afe rafeafo nīchini yoitanōfo iskafakī: “Ifo, ē mia fekaxtefaima. Ēkai afaama. Akka mī tsoa keskarama. Mī finakōiakī ēfe pexe ano kayamafe.

⁷ Akka ēkairoko afaax nāskakē ē mikikī kaama. Akka mī mekapa a ea yonoxomis ea sharafaxōfe nonoxō.

⁸ Akka eari ēfe xanīfāfe yonomamis. Ēri sorafono yonomatiro. ‘Katāfe,’ ē faino karisatiro. Askatari, ‘Ekeki ofe,’ ē faino ekeki orisatiro. Nāskakē a ea yonoxomisri afara ea axōfe ē faino ea axotiro. Akka mī afama mīshti fatirokī. Mī mekapa a ea yonoxomis ea sharafaxōfe,” ixō yoini.

⁹ Askafaito nikakī a afe foafo Jesús ato yoini: “Kee, nikakapo. Na feronāfake israeli yamafixō ea chanīmara fakī finakōi, fetsafo keskarama. Akka Israel anoafāfe ea iskafamifsona chanīmara fakakī,” ato fani.

¹⁰ Ato Jesús askafaino a sororo xanīfo fe rafeafo mā āto pexe ano fokaxō òiafo a yonaito òifaino mā shara fichitoshinifo.

Jesús otofani kēro ifomāfa fake

¹¹ Mā askafata Jesús kani pexe rasi āfe ane Nain ano. Āfe inafō fe kaino yora ichapafori afe fonifo.

¹² Mā pexe rasi chaima fāi kakī òini a naa iyoifofaifono maifafokakī. Kēro ifomafa nā āfe fake fistū ini. Nā kēro ifomafa fe yora ichapafō afe fonifo.

¹³ Nā kēro ifomafa oiaito ōikī, Jesús shinākōikī yoini iskafakī: “Oiyamafe,” fata,
¹⁴ Jesús kaxō a kamakī rataxō iyoī foaifo ramāni. Akka nā iyoī foaifo nāno nētenifo. Nāskata nā naita Jesús yoini: “Naetapa, ē mia yoi, fininīkafāfe,” faino,
¹⁵ fininīkafāni. Nāskakē a naita fininīkafā tsaota mekāni. Nāskaxō Jesús afa yoini: “Nakīa, mī fake,” fani.
¹⁶ Nā naita Jesús otoa ōikani. Yorafo ratei fetsenifo. Nāskakaxō Nios yoisharakōinifo iskafakakī: “Epa Niosfi finakōiakī āfe meka yoimis nokoki nokoa,” fanifo. Nāskatari yoikī iskafanifo: “Epa Nios nokoki nokokōia, afe yorafo kexesharaxiki,” fanifo.
¹⁷ Nāskakē Judea anoxō keyokōi nikaketsanifo, aa kematai ixori nikaketsanifo a naita Jesús ototafakē.

*Juan aōxō tāpimisfo Jesúski nīchini
 (Mt. 11.2-19)*

¹⁸ Juan karaxa mēraxō nikani Jesús ato sharafaito Apa Niosxō. Nāskaxō āfe ina rafe kenani.

¹⁹ Nāskaxō ato nīchini Jesús ano fotanōfo mā ato nīchia fokaxō yoinōfo iskafakī: “¿Mīmē Cristo nā Epa Niospa nokoki nīchiai, askayamai fetsa nokoki oiraka nā nō manai?” ixō yoitanōfo Juan ato nīchini.

²⁰ Mā Juan ato nīchia fokaxō Jesús yoinifo: “Juan Maotista noko nīchia nō oa mia yōkaiyoī, mīmakī a Niospa nokoki nīchia, askayamakī fetsa nō manairaka,” fanifo.

²¹ Jesús anoxō yora ichapa sharafapani, a isinī ikanaifo sharafata, a omiskōifinakōiafo sharafata, a niafaka chaka ato mēra nanea ato makinoa potata, a fēxoxo ato fero sharafaxōaito ōinifo.

²² Nāfo askafata Jesús ato kemani iskafakī: “Fokaxō Juan yoitakāfe a mā ōiyanā a mā nikafori. Yoitakāfe, mā fēxofāfe sharakaxō ōisharakani kiki, askatari nā chatofori mā sharakanax niafoki, a rashkisiaifori mā sharafokī, a pastofāferi mā nikasharakani kiki, a namisfori mā otafokī, a afaamaisfāferi Niospa meka shara nikakani kiki afesaxō Epa Niospa noko ifitiromakī.

²³ Akka a ea chanīmara fasharakōia afara fetsa shinātama ekeki inimakōitiro,” Jesús ato fani, Juan ina rafe.

²⁴ Nā Juan ato nīchia rafe mā foaifono Jesús yorafo yoikī taefani Juanoa, iskafakī ato yoikī: “¿Afesakakī tsōa istoma anoa Juan ōifokani fonifomē? Juankai nā nēfe tafa pei takka takka akai keskarama. Nāskarifiakī mā mā tāpia Juankai ōiti ranāyama.

²⁵ Akka, ¿tsoa ōikai mā kamismē? Ōitsai, feronāfake rapati sharakōi safekē ōikai mā kamisraka. Akka mā mā tāpia a rapati sharakōi safemisfo xanīfodefāfe āto pexe anoxō rapati sharakōi safetirofo.

²⁶ Akka, ¿tsoa ōikai mā kamismē? Nā Niospa meka yoimis ōikai mā kamisraka. Akka chanīma, nā Juan Niospa ina finakōia fetsafo keskarama.

²⁷ Akka nā Juanoa yoikī Isaías kīrika kenenī iskafakī:

Mī nai ariax mai ano fotoyoamano nā ēfe meka yoimis ē nīchiki taefai mīōnoa ato yoiaino itipinīsharakaxō mia nikakōinōfo, ixō kenenī.

²⁸ Akka ē mato yoi, ē mato pāraima. Tsōakai Juan finōama. Juan yoimis keskara meka shara noko tsōa yoimisma. Juanki Nios inimakōimis. Akka fetsafāferi afayamafīkaxō ea Ifofaifono Nios atoiki inimakōi. Nāskakē Juan finōkōiafo Niospa ato ōimis.”

²⁹ Keyokōichi Juan nikanifo, a xanīfo Roma anoa kori fīxomisfāferi nikanifo. Nāskakē Juan ato maotisafapani māmāi tāpikōiafāfe Nioskairoko chanīmiskē.

³⁰ Akka nā fariseofo fe a Moisés yoikī kīrika kenenī keskara ato tāpimamisfo afo maotisakaspanifo Juan yorafo maotisafapaino. Nā Niospa ato yoipaiyai keskara nikakaspanifo.

³¹ Nāskaxō anā ato yoini: “Iskaratia na niyoafo afe keskarafoimāki ē mato yoinō mā tāpinō.

³² Nā fakefo āto kaxeti anoax kaxekakī āto yamafo kenatirofo tai tai iyanā. Akka mā āto yamafo nokokanax a ato yamafāfe fichipaiyai fo keskai tsoa kaxesharayamaino ato yoitirofo iskafakakī: ‘Nō nōko xaiti maneaino akka mā mairamisma. Askatari shināmītsayanā nō fanāikaino mā oiamisma,’ ixō ato yoitirofo. Akka māri nāskariai mā tsoaki inimamisma.

³³ Akka Juan Maotista oni. Atokai pikī finapaimisma, askatari afaa pae ayamisma. Akka mā yoimis iskafakī: ‘Juan niafaka yōshi chakaya,’ mā famis.

³⁴ Akka ē Niospa Fakekōi oni. Piyānā ē ayamis. Akka ea mā iskafakī yoimis: ‘Jesús ichapakōi piimis, askatari pae ayamis,’ mā ea famis. ‘Nāskax yora chakafo fe rafemis, a romanō xanīfo kori fīxomisfo feri rafemis,’ mā ea famis.

³⁵ Akka ē shara imis Niospa ea shināmanaino. Juanri shara imis Niospa shināmanaino. Yorafāfe noko ōikī tāpitirofo,” ixō Jesús ato yoini.

Jesús Simón pexe ano kani. Nā Simón fariseo ini

³⁶ Fariseo fistichi pikixiki Jesús iyoni. Afe Jesús kani áfe pexe ano nāno mīsa ano tsaoxō piaino.

³⁷ Nānoa nā kēro chotaferomato nikani nāno ato fe ixō. Nā fariseo pexe anoxō Jesús pii ano, nāno nā kēro nokoni, manishomo oxokōiki pirofomā foikai.

³⁸ Mā nokoax oiayanā Jesús áfe tae resotai nitishota tsaopakekafāni. Tsaoux oiaino Jesús áfe tae pichiki áfe fēotoshini. Nāskaxō áfe fōo otekere ayanā áfe tae tsōokakata akiki pirofomā nachini.

³⁹ Nā fariseo a Jesús iyoato na kēro askaito ōikī áfe ōiti mēraxō shināni: “Na feronāfake Niospa meka yoikatsaxakitsi tāpi kiki na kēro afe keskaramakī na áfe tae ramākai, nā kēro chakakōi,” ixō áfe ōiti mēraxō shināni.

⁴⁰ Nāskara áfe ōiti mēraxō shināito Jesús yoini nā fariseo: “Simón, afara fetsa ē mia yoipai,” faito nā Simón fariseo kemani: “Ea yoife, Ifo,” fani.

⁴¹ Askafaito nikakī Jesús yoini feronāfake rafeōnoa meka fetsafaxō: “Nā feronāfake rafeta a ato kori minimis niminifo. Fētsa nimini quinientos nā kori ane denarios. Fētsari nimini cincuenta.

⁴² Afesxaxoma kopifatiroma inifo. Akka nā ato kori minimisto ea kopifakāfe ato fanima. Ato shara fani nā rafe. Akka ea yoife fatoto noikī finasharakōimākai,” faito,

⁴³ Simón kemani: “Ētsa, nā ichapa nimiato noikī finakōi rakikīa,” faito, Jesús yoini: “Ēje, mī yoisharakōiaki.”

⁴⁴ Nāskaxō nā kēro ōiyanā Jesús Simón yoini: “¿Mā mī na kēro ōimē? Akka ē mī pexe mēra ikikē mī ea faka ināma, ē aō ochokomepanā. Akka na kēromā oiayanā éfe taeki áfe fēo tosiyanā ea ōchoa. Nāskaxō áfe fōo ea otekere aka.

⁴⁵ Akka mā nō feyai askafimisno, mī ea tamoki tsoo akama. Akka na kēromā ikitoshixō éfe tae pemākīa tsoo akī xateama.

⁴⁶ Akka mā nō feyai askafimisno mīkai xinī éfe mapoki mīa matekere akama. Akka na kēromā éfe taeki pirofomā nachia.

⁴⁷ Akka ē mia yoi, na kēro chaka finakōikē mē áfe chaka soaxona, ea noikōiatio. Akka fētsari afaa chakafai finamano mē áfe chaka pishta soaxofiano ea noisharaima,” ixō Jesús yoini.

⁴⁸ Nāskaxō a kēro yoini: “Mē mia chaka soaxona,” fani.

⁴⁹ A ato feta piaifori nāno ato fe inifo. Nāskax aa ranā yoinānifo. “¿Tsoamē na ato chaka soaxonai?” ikanax yoinānifo.

⁵⁰ Nāskaxō afianā Jesús nā kēro yoini iskafakī: “Ea mīa chanīmara faito ē mia chaka soaxonaki, kasharatāfe,” ixō Jesús yoini.

8

Kērofāfe afara Jesús axosharapaonifo

¹ Mā askafata pexe rasi mēra Jesús kafāsapaoni. Afe keskaramakī Apa Nios xanīfoōnoa ato yoifofāsafai. Nā doce feronāfake aōxō tāpimisfo afe fofāsapaonifo.

² Kēro ranāri Jesús fe fofāsapaonifo, māmāi ato sharafaano ato makinoa niafaka yōshi chaka potakī, a isinī ikaifori ato sharafani. Nānori ato fe ini áfe ane María Magdalena. Nā María Magdalena makinoa Jesús siete niafaka potani.

³ Nāskata Juanāri ato fe ipaoni, Cuzapa áfi. Nā Cuzapa Herodes yonoxopaoni. Susanāri ato fe ipaoni. Nāskatari nā kēro fetsafāferi Jesús yafi aōxō tāpimisfo ato kori ināpaonifo.

Jesús ato yoini meka fetsafaxō fimi exe saamisnoa

(Mt. 13.1-9; Mr. 4.1-9)

⁴ Pexe rasi anoax yora rasi fenifo, Jesús ōifekani. Nāskakē yora kaya ichanāfono meka fetsafaxō Jesús ato yoipakeni iskafakī:

⁵ Feronāfake fistichi fimi exe saafoni áfe nōxati mēra kēchoxō fokī. Áfe tarepa áfe fimi exe saakaino ranāri fai nēxpakīa pakeaito peamanifo, ranāri peyafāfe xēani.

⁶ Akka mā foaipaiyaito xinī namani, yosipanā, áfe tapo airoko mai mēra kasharakē. Foaikax samama nanī xinī tsasifaano.

⁷ Ranāri fimi exefo moxafo mēra pakei fetseni. Moxafo mēranoax moxafoya foaipaiyaito moxafāfe namani.

⁸ Akka fimi exe ranāri mai shara ano pakeni. Nāskax foaisharax fimi ichapayakōi ini fetsa cien ini,” ixō Jesús ato yoini. Nāskaxō anā fāsi ato yoini: “Mā pachoyakī ea nikasharakōikāfe,” ato fani.

Meka fetsafaxō yorafo yoixō a aōxō tāpimisfo xafakākōi ato yoini

(Mt. 13.10-17; Mr. 4.10-12)

⁹ A aõxõ täpimisfäfe Jesús yõkanifo: “Noko yoisharafe, nõ mia nikasharamakī afaa mī yoiamāki meka fetsafaxõ,” faifäfe

¹⁰ ato yoini: “È mato yoinõ Epa Nios xanifäfe afeskaxõ afe yorafo ikināmāki, è mato täpimasharai afe keskaramāki. Akka fetsafo meka fetsafaxõ è ato yoi. Nā è ato yoiai õisharafikakī õisharafoma. Nikafikakīri nikasharafoma,” ixõ Jesús ato yoini.

Jesús meka fetsafaxõ fimi exe saamisnoa ato yoini ato täpimasharakõixiki
(Mt. 13.18-23; Mr. 4.13-20)

¹¹ Anā Jesús ato yoini iskafakī: “Na meka fetsafaxõ è mato yoiai iskarakī nikakapo. Na fimi exeõnoa è mato yoiai, fimi exeõnoa è mato yoima. Niospa mekaõnoa è mato yoi.

¹² Akka na fai nēxpakīa fimi exe pakea peamatirofo keskafakī, nāskarifiakī Niospa meka nikapaiyafono Satanās chakata ato nikatima fatiro afe iyamapakexanõfo.

¹³ Akka nā fimi exe makex mēra pakeax foaitiro keskariakī, nāskarifiakī fētsa Niospa meka nikapaisharakõiyotiro. Akka nā fana tapo foaisharama keskaraxõ nikafikī nikasharaima. Nāskaxõ afara afeskaraino samamashta kachikiri fatiro.

¹⁴ Akka nā moxafa mēra fimi exe pakea keskarafori a ea nikaifo. Akka ea nikafikani, nā moxafäfe fanafo namai keskarafo, äto shinā mēraxõ afara sharafo shinākakī. Nāskakakī a Niospa ato amapaiyai keskara shinākanima. Nā fimi exemais keskarafo.

¹⁵ Akka nā fimi exe mai shara ano pakea keskara. Nāskarifiakī yora õiti sharay-ato itipinīsharaxõ ea nikasharai, Niospa meka chanīmara fakõini, nā fimi exe ichapaya keskarakõixõ. Nāskasharakõikaxõ fetsafo Niospa meka nikamasharakõikani fetsafäfe chanīmara fanõfo,” ixõ Jesús ato yoini.

Meka fetsafaxõ räpariki Jesús aõxõ täpimisfo yoini
(Mr. 4.21-25)

¹⁶ Anā Jesús ato yoini iskafakī: “Akka räpari õtaxõ tsõa kēsho fepotiroma, askatari a ika nāmāri tsõa tsäotiroma. Askakimaroko fomākīa tsäotirofo, chai chaxasharakõikē fetsafäfe ikikaxõ õisharakõinõfo.

¹⁷ Nāskarifiakī a afara oneyomis chipo xafakīakõi õixikani. Nāskatari a afara fomāyomisfo Niospa xafakīakõi ato faxoxii keyokõichi õinõfo.

¹⁸ Nāskakē nikakõisharakäfe. Akka a ea nikakī finasharakõiai Niospa täpimasharakõi. Akka fetsa è täpisharakõia ifaxõ nikamiskēma, askara yora nā täpia pishta Niospa anā fiatiro,” ixõ Jesús ato yoini.

Jesús õifekani äfe afanõ äfe extonõ fenifo
(Mt. 12.46-50; Mr. 3.31-35)

¹⁹ Jesús yorafo yoiaino äfe afanõ äfe extonõ akiki fenifo afe mekapaikani. Akka akiki fotirofoma inifo, yora ichapa fospikõimāiyafono.

²⁰ Nānoa fētsa Jesús yoini: “Mī efanõ mī extonõ emäiti niafo mia õipaikani.”

²¹ Askafaino Jesús kemani: “Akka nā èfe Epa Niospa meka nikakõiaifo nāfofi èfe efafo ita èfe extofokl,” ixõ ato yoini.

Jesús nefe yafi iamāfā poo iki meseniaito nishpa fani
(Mt. 8.23-27; Mr. 4.35-41)

²² Pena fetsa Jesús kanõanāfānē naneinīkafā aõxõ täpimisfo yoini: “Nõ okiri iamāfā pokefainõ fokäfe,” ato faino afe fonifo.

²³ Mā iamāfā pokefainoifono kanõanāfā xaki mēra rakax Jesús oxani. Nāno atoki nēfefakõiyana iamāfā poo ini. Nāskaino kanõanāfā faka fospikõini mesekõini ini mā kanõanāfā ikikerani.

²⁴ Nāskakē aõxõ täpimisfäfe Jesús mõinifo iskafayanā: “Ifo, mā nõ natarameikai, moife,” faifono, Jesús fininākafā nefe yafi iamāfā poo ikaito äfe mekapa nishpa fani. Nāskax anā iamāfā poo inima, sharakõi itani.

²⁵ Askafaifono aõxõ täpimisfo yoini: “¿Afeskai mā rateimē? ¿Mā ea chanīmara faimamē?” ato faino, akka aõxõ täpimisfo rateyanā äa ranā yoinānifo iskakani: “¿Keel! ¿Na feronāfake afe keskaramē na nefe feta iamāfānē ato yoiaito nikaifo?” ikanax yoinānifo.

Gadara anoxõ Jesús feronāfake makinoa niafaka rasi potani
(Mt. 8.28-34; Mr. 5.1-20)

²⁶ Nāskata Gadara mai ano nokonifo, nā iamāfā Galilea okiri.

²⁷ Mā nokoax Jesús kanõanāfā makinoax fotopakekafananino, pexe rasi makinoax feronāfake niafaka yõshi chaka nanea akiki oni. Rapati safekatsaxakima. Pexe mērari ikatsaxakīma. Akka nā maiafo mafa kini mēra ano ika ini.

²⁸ Nāskakē Jesús fichita a nāmā ratokonõ mai chachipakefõfä fäsikõi fiisiyanā yoini: “¿Ea afeska fayamafe, Jesús! Mī Nios Sharapa Fakeki è mia yoi mī ea omiskõimayamafe,” fani.

²⁹ Nāskafakī yoini māmāi Jesús a makinoa niafaka yōshi chaka potaino, mēxotaimamāi a mēra niafaka yōshi chaka nanemisno. Nāskaito yorafāfe kaninānā metexkere ata otekkere axō kexefiafono, nāfo tesaketsafaini ichopaoni. Nāskakē niafaka yōshi chakata nā feronāfāfe tsōa istoma ano iyopaoni.

³⁰ Nāskaito Jesús yōkani: “¿Mī afe anemē?” faito, nāato kemani: “Ēfe ane Legiōn,” fani, a mēramāi niafaka yōshi chaka ichapa nanekē.

³¹ Nāskaxō niafaka yōshi chakafāfe Jesús yoinifo: “A omiskōipakenakafo kinīfā mēra noko potayamape,” fanifo.

³² Akka nāno māchi keya anoxō kochifāfe pinifo. Nāskakē niafaka yōshi chakafāfe Jesús yoikakī iskanifano: “Noko kochifo mēra nīchife,” faifono Jesús kochifo mēra ato nīchini.

³³ Nāskakē niafaka yōshi chakafo feronāfāfe makinoax tsekefaini kochifo mēra iki fetseni. Kochifāfe pifiai īamāfā mēra keyopakei fetseax āsai fetseni, keyokōi.

³⁴ Askaito ōikani a kochifo kexeafo ichoi fetsenifo, a pexe rasi ano ato chanifai fokani. Askatari a pexe rasi pasotai ikafori ato chanifanifo.

³⁵ Askaito nikakani yōrafā rasi fenifo kochifā rasi āsaito ōifekani. Nokokaxō ōiafo Jesús nāmā a feronāfāfe niafaka yōshi chaka nanea tsoa ini, mā a makinoa Jesús niafaka yōshi chakafo pōtano. Rapati safeta mā shināsharakōia ini. Nāskakē yorafo ratei fetsenifo.

³⁶ Nā feronāfāfe makinoa Jesús niafaka yōshi chaka potaito, ōiafāfe ato yoinifo afeskax sharamākī a feronāfāfe niafaka yōshi chaka nanea.

³⁷ Keyokōi yorafāfe nā Gerasa anoafāfe nikakaxō ratekōiyanā. “Nonoax katāfe,” faifono, Jesús kanōanāfā mēra naneinākfananax kani.

³⁸ Nā feronāfāfe a makinoax niafaka yōshi chakafo tsekeato, “Ēri mefe kapai,” faito, akka Jesús, “Mī efe katiroma. Nono mī nētetiro.

³⁹ Akka mī pexe ano kaxō a mia Niospa axōa keskara yorafo yoifotāfe,” fani.

Nāskafaino nā feronāfāfe kaxō nā pexe rasi anoafō ato yoifofāsafani nā Jesús axōa keskara.

Jairo fake xotofake mā nakē Jesús otofani. Askatari kēromāri Jesús rapati mēeax sharani (Mt. 9.18-26; Mr. 5.21-43)

⁴⁰ Nāskafafarani Jesús anā oni īamāfā pokeferani. Jesús nokoaito fichikaxō akiki ini-makōiyanā yorafāfe ifinifo keyokōichimāi manakakī.

⁴¹ Akka nāno feronāfāfe āfe ane Jairo akiki nokoni. Nā Jairo Niospa meka yoimis xanīfo ipaoni nā judeofāfe ichanāti pexe sināgoga anoax. Nā Jairo Jesús nāmā ratokonō mai chachipakefōfā fāsikōi yoini āfe pexe ano kanō,

⁴² āfe fake xotofake napaiyaino. Akka nā Jairo fake xotofake fisti ini, doce xinia aka. Nā xotofake mā nakerakōini. Jesús Jairo fe kakī meeā yorafāfe shoiakī fetsafo meeni afe fokakī.

⁴³ Nānori kēro ato fe kani. Na kēro imi nesekima, doce xinia amis. Notoro kopifakī āfe kori keyotiani. Tsoa pīshta sharafatiroma ini.

⁴⁴ Nā kēromā aa kachikiri kaxō āfe tari kexa Jesús ramākani. Tari kexa ramākaino koshikōi āfe imi nesetani.

⁴⁵ Nāskakē Jesús ato yōkani: “¿Tsōa ea ramāmē?” ato faito, keyokōichi yoinifo: “Nō mia ramāma,” fanifo. Ato askafaito Pedro yoini: “Ifo, yorafāfe mia shoiaki fetsakaxō mia pitsikinafo,” faito,

⁴⁶ afianā Jesús ato yoini: “Fatora mā fētsa ea ramā. Akka mē tāpia fatora fetsa ēfe sharaōnoax mā shara,” ixō ato yoiaino,

⁴⁷ nikai nā kēro ratekōini. “¿Mā ea fēpiaromē?” ikax ratekōiyanā Jesús ano kaxō ratokonō mai chachipakefōfā yoini yorafāfe ferotaifi nāatomāi āfe tari kexa ramākaxō. “Ē mia tari kexa ramākata mē shara,” ixō yoini.

⁴⁸ Askafaito Jesús yoini: “Yōxashta, mā mī shara mīmāi ea chanīmara faax. Nāskakē tanaima kasharatāfe,” fani.

⁴⁹ Jesús nā kēro yoiaino, yora fistichi oxō Jairo yoini: “Mā mī fake xotofake naaki. Anā nōko Ifo fekaxtefayamafe,” faito,

⁵⁰ nikakī Jesús yoini: “Ratekima. Ea chanīmara fāfe mī fake naamakī otoi kiki,” fani.

⁵¹ Mā pexe ano nokoxō, tsoa Jesús ikikinima. Akka Pedro kaino Santiago kaino Juan kaino inifo nā fāke apa fe fokani, nā fāke afari ato fe kani.

⁵² Pexe mēra ikifaikaxō ōiafo keyokōi oiakani fiisinifo shinākani nā fake xotofake mā naano. Akka Jesús ato yoini: “Oiyamakāfe. Na fake xotofake naamakī oxaki,” ato faino,

⁵³ keyokōichi ōsaketsanifo, tāpifikaxō nā fake xotofake mā nafiano.

⁵⁴ Nāskaxō Jesús mēkemā mētsoinifōfā fāsikōi yoini: “Xotofakeshta, fininākfāfe,” faino,

⁵⁵ mā otoax nā xotofake koshikōi fininākfani. Nāskaxō ato yoini nā xotofake pimanōfo.

⁵⁶ Nāskakē apa fe afa ratekōinifo. “¡Kee! ¿Afeskaxō otoamē?” ikanax inimakōiyanā. Nāskaifono ato yoini: “Tsoa yoiyamakāfe nā mātō fake xotofake nakē mē otoaki,” ixō ato yoini.

9

Jesús aõxõ tâpimisfo nîchini Nios Xaniñoõnoa ato yoitanõfo
(Mt. 10.5-15; Mr. 6.7-13)

¹ Jesús aõxõ tâpimisfo doce ichanãfani. Nãskaxõ ato yoini iskafakî: “Èfe sharaõxõ ato makînoa niafaka fetsa fetsatapafo põtatakãfe, a isinî ikaifo ato sharafayanã.

² Askatari Nios xaniñoõnoa ato yoitakãfe, a isinî ikaifori ato sharafayanã.

³ Afaa mã fokiki, mãto mêtetiri mã fokiki, mãto pishari mã fokiki, a mã piikairi mã fokiki, koriri mã fokiki, rapati fetsari mã fokiki.

⁴ Akka nã mã òiai pexe fetsa anoxõ mato ifiaifono, nãno iyokani, nã mã anoax kaitiã.

⁵ Akka fatora pexe rasi anoxõ mato ifikaspafono, anoax tsekekaikî mãto taekino a mã mapo taa taa atiro ato òimaxiki. Mã askafaino tâpitirofo Nios atoki inimayamaino,” ixõ Jesús ato yoini.

⁶ Nãskata Jesúsxõ tâpimisfo fonifo, pexe fetsafo mēra ato yoifokani. Fokaxõ ato yoisharakõinifo. Nios nikasharakõikãfe ato fayanã a isinî ikaifo ato sharafanifo.

Juan Maotista nani
(Mt. 14.1-12; Mr. 6.14-29)

⁷ Xaniño Herodes nikani Jesúsnoa yoiaifono afama mîshti akaito. ¿Tsoamē a feronãfake? ixõ shinãni. Akka yoinifo: “Mã Juan afianã mã otoa,” fanifo.

⁸ Fetsafãferi yoinifo: “Nã ato Niospa meka yoipaonikîã Elias,” fanifo. Fetsafãferi yoinifo: “Nã nõko xinifo ato Niospa meka yoipaonikîã afianã mã otoa,” ixõ yoinifo.

⁹ Askafaifono Herodes ato yoini: “Maa, akai Juanma. Mē Juan ato textemayamea. Akka na nõ nikai tsoamē na aõnoa yoiaifo afama mîshti faito,” ixõ Herodes Jesús õipaikõini.

Jesús cinco mil feronãfakefo ato pimani
(Mt. 14.13-21; Mr. 6.30-44; Jn. 6.1-14)

¹⁰ Nã Jesúsnoa yomimisfãfe mã fêkaxõ yoitoshinifo a atanaifo keskara. Askafaifãfe nikakî ato tiis iyoni, pexe rasi ãfe ane Betsaida chaima tsõa istoma ano.

¹¹ Akka mã yorãfãfe tâpikanax Jesús kaino, nãskakē chifafainifo. Akiki foafono Jesús ato ifini. Apa Nios xaniñoõnoa ato yoianã a isinî ikaifori ato sharafapani.

¹² Mã yãtapaekaino, aõxõ tâpimisfo doce akiki fêkaxõ yoinifo: “Yorafo nîchife fokaxõ tenetanõfo a piaifo fenayanã fonãikani kiki, pexe rasi ano fokãta a chaima ikafo anori fotanõfo. Akka nono afaamaki,” faifono,

¹³ Jesús ato yoini: “Ato pimakãfe,” ato faito kemanifo: “Nõko pãa cinco pishta foe raferi,” fanifo. “Akka, ¿mî shinãimē na yorafo pimaxiki a piaifo nõ ato fixotanõ?” ixõ yoinifo.

¹⁴ Akka nãno cinco mil feronãfakefo inifo. Akka Jesús aõxõ tâpimisfo yoini: “Cincuenta faxõ ato tsãoketsakãfe,” ato fani.

¹⁵ Ato askafaifono keyokõi tsoai fetsenifo.

¹⁶ Askata Jesús cinco pãa tsomainifofãni foe rafeya. Nãskaxõ nai foisnifofã Apa Nios kîfini iskafakî: “Aicho Epa, mîoxõ ã ato pimai. Mî sharakõi,” fata, pãa kaxketa foe rafeya osixõ aõxõ tâpimisfo inãni a yorafo ato inãketsanõfo.

¹⁷ Nãskakē yorãfãfe pikanax mãyakõinifo. Akka nã chete faafo doce fêta fospini.

“Mî Cristo mia Niospa ifini nokoki nîchixii mî nõko xaniño finakõia inõ,” ixõ Pedro Jesús yoini
(Mt. 16.13-19; Mr. 8.27-29)

¹⁸ Pena fetsa Jesús Apa Nios arese kîfini. Akka aõxõ tâpimisfo afe inifo. Nãskaxõ ato yõkani: “¿Yorafo afaa ikanimē ã tsoamãki?” ixõ ãto yõkani.

¹⁹ Ato askafaito kemanifo iskafakakî: “Fetsafãfe Juan Maotistara, mia fakani. Fetsafãferi Eliãsa mia fakani. Fetsafãferi mia iskafakani: ‘Nã nõko xinifo ato Niospa meka yoipaonikîã mã otoa,’ mia fakani,” aõxõ tâpimisfãfe fanifo.

²⁰ “Akka mã, ¿ea tsoara faimē?” ixõ ato yõkani. Ato askafaito Pedro kemani iskafakî: “Mî Cristo nõ Niospa mia nîchini mî nõko Xaniño finakõia inõ,” fani.

“Chipo ea retexikani,” Jesús ato fani
(Mt. 16.20-28; Mr. 8.30-9.1)

²¹ Nãskata Jesús aõxõ tâpimisfo yoini: “Tsoa yoiyamakãfe ãfi Cristoki,” ato fani.

²² Nãskata aõxõ tâpimisfo yoini iskafakî: “È chipo omiskõifinakõixii. Askatari ea õikaspakakî ea potaxikani, judeofãfe xaniñofo feta a Nios ato kîfixomis ãto xaniñofofãfe a Moisés yoikî kirika kenenî keskara ato tâpimamisfãferi. Askatari ea retexikani. Ea retefiafono, tres nia oxata ã anã otõxii,” ato fani.

²³ Nãskata keyokõi ato yoini iskafakî: “Fatora fetsa ãfe inakõi ipaikî ãakõi apaiyai keskara anã atiro. Nã ã yoiai keskara nikakõitiro. Pena tii iskatiro, ea Ifofapai: ‘Èfe Ifoxõ ea retefiaifono ãkai ãfe Ifo ã potanakama,’ ixõ shinãtiro.

²⁴ Akka fētsa āa shinātiro iskakī: ‘Ē Nios Ifofaito ea retetirofo. Nāskakē ē Nios Ifofaima,’ ixō shinātiro mesekī. Askara yora naax ēfe Epa ano katiroma. Akka nā ea Ifofaa, eōxō reteafono ē ifixii efe ipaxanō eamāi Ifofamiskē.

²⁵ Askatari fatora fetsa nōko mai anoax afara ichapayakōi ikatsaxakī mā naax aya katiroma. Ea Ifofayamax koriya ifiakatsaxakī Epa Nios ano katiroma. Akka afama mīshftiyoa iyopaofinixakī nā omiskōipakenakafo mēra kaax anā aya itiroma. Āfe afarafori Nios inātiroma afe ipaxakī.

²⁶ Akka fatora fetsa eō rāfikī ēfe meka sharari yoikaspaite, ēri aō rāfikōixii ē yoikī isfafaxii: ‘Ē na yora ōmismā,’ ē faxii. Ēfe sharafoya mē oax ēfe Epa sharafoyari ē oxii, ēfe ājiri sharafori efe ftopakefōfāxikani.

²⁷ Ē mato pāraima, fatora mā fetsa nayoxoma nono efe iyoxō ēfe Epa xanīfo finakōia mā ōiyoxii,” ixō Jesūs ato yoini.

Jesūs āfe femānā fetsa keskara ini, fafekōini. Āfe rapatiri oxokōi ini

(Mt. 17.1-8; Mr. 9.2-8)

²⁸ Askata ocho nia mā finōano ato yoikī keyota, Jesūs māchi keya māpefaini arixō Apa Nios kīfikai. Āfe ina tres iyoni. Santiago iyota Juan iyota Pedro iyota ato fani.

²⁹ Apa Nios kīfiaino, āfe femānā fetsa keskara itani. Āfe rapati oxokōi ini fafekōiyanā.

³⁰ Akka nāno feronāfake rafe akiki nokokanax afe mekanifo. Mā nafianixakī Moisés fe Elías inifo.

³¹ Nā rafeta chaxapakefōfānifo. Mā fotokanax Jesūs fe ketaxamei nikaxō yoinifo nā Jerusalén anoax Jesūs omiskōixiai reteafono.

³² Nāskata Pedronō Santiagonō Juannō oxapaifikakī oxatenekōinifo. Jesūs fafekōiaino ōinifo nā feronāfake raferi ōinifo Jesūs fe niafāfe.

³³ Mā Moisés fe Elías Jesūs makinoax foaifono, Pedro yoini: “Ifo, sharakōi ano nō oa. Nono nō tapas fanō, tres fakī. Mia fetsafaxota Moisés fetsafaxota Elías fetsafaxota nō fanō,” fani. Akka Pedro tāpinima a yoiai keskara shināfenokōini.

³⁴ Pedro mekai askaino ato kōinī maipakefōfāni. Ato kōinī maipakefōfānaito ōikani ratekōinifo.

³⁵ Nā kōi mēranoax mekai iskaito nikanifo: “Nafi ēfe Fakekōikī ē aō noikōi. Nāskakē nikasharakōikāfe,” ixō yoiaito nikanifo.

³⁶ Mā mekai askai nishpatanaino, Jesūs ares nikē ōinifo. Akka tsoa yoitama ares fisti āto ōiti mēraxō shinānifo. Nāskaxō tsoa yoinifoma nā ōiafo keskara.

Jesūs feronāfake naetapa niafaka chaka pōtaxoni

(Mt. 17.14-21; Mr. 9.14-29)

³⁷ Pena fetsa māchi keya ariax mā Jesūs aōxō tāpimisfo fe fotoano, yōrafā rasi akiki fenifo ōipaikani.

³⁸ Nānoxō yōrafā rasi mēraxō yora fistichi fāsikōi Jesūs yoini: “Ifo, ēfe fake ea ōixonioyope. Nā fisti ēfe fakeki.

³⁹ Niafaka chaka a mēra nanexō, fāsikōi fiisimamiski, mesta mesta imayanā āfe axfapari fākox potamamiski. Chakakōi famis a makinoax tsekeaspayanā.

⁴⁰ Akka mī inafō mē yoia ēfe fake makinoa niafaka yōshi chaka potakāfe ē ato fafiaino akka tsōa atiroma,” fani.

⁴¹ Askafaino Jesūs kemani: “jōoa! Mā kai ea tāpisharama. Mā afara shināmis. Akka afetiakai ē matoki onima. Āfetiakai mā ea tāpimē?” Jesūs ato fani. Nāskaxō yoini: “Niri mī fake ea efexōfe,” Jesūs apa fani.

⁴² Nāskata āpa Jesūs ano efeaino, nā fake niafaka fia kekēfōfā anā nāmā potani, anā ea ea imapaikī. Akka Jesūs fāsi mekaināka fā iska fani: “Niafaka mī chaka chakakōikī, nā feronāfake makinoax tsekekaitāfe,” fani. Nāskax nā feronāfake sharakōi itani. Nāskaxō apa ināni. “Nakīa mī fake,” fani.

⁴³ Askafaito ōikani āa ranā yoinānifo: “Airā, Niospa afama mīshfti atiro,” ikanax āa ranā yoinānifo.

Anā Jesūs ato yoini: “Chipo ea retexikani,” ixō

(Mt. 17.22-23; Mr. 9.30-32)

Jesūs nā feronāfake sharafaito ōikaxō shināifono, Jesūs aōxō tāpimisfo yoini,

⁴⁴ “Ē mato yoiaito nikakōisharakāfe, shināmakikākīma. Fetsafāfe ea ato achimaxikani kiki,” ixō ato yoini.

⁴⁵ Akka tsōa tāpinima a ato yoiai keskara Niospamāi ato shinā mēraxō ato shinātima faino. Nāskai ranonifo Jesūs yōkapaikani ato xafakīa yoipanā.

“Akka, ¿tsoakaimē sharafinakōia?” inifo

(Mt. 18.1-5; Mr. 9.33-37)

⁴⁶ Nāskata chipo aōxō tāpimisfo āa ranā feratenānifo, “Akka, ¿fato nō fetsa sharafinakōimē?” ikanax.

⁴⁷ Nāskaxō a aōxō tāpimisfāfe shināifo keskara mā Jesús tāpixō fake yome ifixō chish-toinīfofāni.

⁴⁸ Nāskata aōxō tāpimisfo yoini: “Akka fatora fētsa ēfe aneōxō na fake yome noikī nāatori ea noišarakōi. Nā ea noišaraito ea fisti noima, nā ea nīchiniri noišarai. Akka fatora mā fetsa āto ina keskaxō mā yorafo shara faa, nāfi sharafinakōiakī,” ixō Jesús ato yoini.

Fētsa noko noikaspatama noko sharafai

(Mr. 9.38-40)

⁴⁹ Ato askafaito Juan yoini: “Ifo, mā nō ōia oa feronāfake fistichi mī aneōxō niafaka chaka potaito. Nāskakē, ‘Askafayamafe,’ nō faa. ‘Mī nofe rafemismaki mī niafaka chaka yorafo makinoa potatiroma,’ ixō nō yoia,” fani.

⁵⁰ Askafaito Jesús kemani: “Askafayamakāfe, noko chakafatama, noko sharafai askara sharakī,” fani.

Jesús Santiago yaŋi Juan mekatima fani

⁵¹ Mā chaima Jesús Apa Nios ari nai mēra kaino tsōakai nētefatiroma ini māmāi tāpikē a Jerusalén anoax noko nāxoxiai Apa Niospa yoiyoni keskai.

⁵² Nāskaxō fetsafo rekē nīchini, mā fokaxō pexe rasi Samāria anoxō itipinīsharafaxonōfo a nokoikai anoxō.

⁵³ Akka samāritanōfāfe ato ifikaspanifo, māmāi tāpikaxō Jerusalén anoamāi foaifono.

⁵⁴ Ato askafaifāfe a aōxō tāpimisfo rafeta Santiago feta Juan ōinifo. Nāskaxō yoinifo: “Ifo, mī noko yoife nō atoōxō Epa Nios kīfinō na pexe rasi anoafō nai mēranoax chiī pakeki ato kooakī mitonō,” ixō yoinifo.

⁵⁵ Akka Jesús anā ato yoini: “Anori shināyamakāfe. Mā shināi keskara ē shināimakai,” ixō ato yoini.

⁵⁶ Askafata pexe rasi fetsa ari fonifo.

A afe fopaimisfoōna Jesús ato yoini

(Mt. 8.19-22)

⁵⁷ Fāi foaifono feronāfake fistichi Jesús yoini iskafakī: “Ifo, ēri mefe kapai nā mī kai ari ēri mefe kafāsaxiki,” faito,

⁵⁸ Jesús kemani iskafakī: “Maxoteneroa kiniya, peyafari naayafo. Akka ēkai pezeyama,” fani.

⁵⁹ Nāskaxō Jesús anā feronāfake fetsa yoini: “Efe kafe,” faito, akka nāato kemani iskafakī: “Ifo, ea manayofe ēfe epa naito ē maifayotanō,” faito,

⁶⁰ Jesús kemani: “Askakima ea Ifofafe. Akka nā ea Ifofaafāfema yora nakē maifatirofo. Akka mī efe koofe ēfe Epa Nios xanīfoōna ato yoifofāsafaxiki,” fani.

⁶¹ Akka anā fētsari yoini iskafakī: “Ifo, ē mefe kapai, akka ea manayofe ēfe pexe ano kaxō ē ato yoisharayotanō,” faito,

⁶² Jesús kemani iskafakī: “Akka fētsa ea yonosharaxofiakī a apaoni keskara anā aki, askara yorakai itipinīsharama. Nāskakē ēfe Epa Nios xanīfo ano katiroma,” ixō Jesús yoini.

10

Jesús setenta y dos yorafo nīchini pexe rasi ano fotanōfo

¹ Nāskata Jesús anā setenta y dos yorafo katonī. Nāskaxō rafe rasi faxō ato nīchini nā pexe rasifo mēra fanīma mīshti fotanōfo chipo akairi atoki kaxiki.

² Nāskaxō ato yoini iskafakī: “Yora ichapafāfe ea nikayamafiaifono ichapatoma ea yonoxokani eōnao ato yoikakī. Nāskakē mā Epa Nios kīfikāfe a yonoxomisfo katonō eōnao ato yoinōfo.

³ Akka mā fotakāfe, ē mato nīchikai yora chakafo mēra nāfāfe mato chakafapaikani. Oa chaxo poomānā pipaitiro keskafakī, matori askafapaikani eōnaox mā isharafiakē yora chakafāfe mato chakafapaikani.

⁴ Ato mēra kakī mato forosa foyamakāfe, mato koriri foyamakāfe, mato saporiti foyamakāfe. Fokākī yorafo finōfāikakī nēteax ato fe mekakakīma.

⁵ Pexe fetsa mēra ikixō taefakī ato yoisharakāfe iskafakī: ‘Niospa mato sharafanō mā isharakōinō,’ ixō ato yoikāfe.

⁶ Akka nā pexe mēra ika fetsa isharakōikē nā Niospa shara fakōini. Akka a mā ato yoiai keskara nikakaspaifono Niospa ato inimaima. Nāskakē fenokani. Akka mā ato yoiai keskarakōinoax mā afaa fenoima. Epa Niospa mato sharafakōini.

⁷ Nāskata pexe rasi mēra nokoax pexe fetsa mēra oxayamakāfe. Nā mā nokoax anoxō mato pimayanā mato ayamanaifono pikāfe. Akka Niosxō yonomisfo nā afara yopaifo ato inātirofo. Nāskakē pexe fetsafo mēra iki foa foayamakāfe.

⁸ Mā nokoaito pexe rasi anoxō mato ifivanā mato pimaifono pikāfe.

⁹ Nānoxō a isinī ikaifo eōxō ato sharafakāfe, iskafakī yoiyanā: ‘Epa Nios xanīfo finakōi afe yorafa ikixikī mā chaimashta oi,’ ixō ato yoikāfe.

¹⁰ Akka pexe rasi ano mā mā nokoano anoxō mato ifikaspaifono, anoax tsekekāikī ato iskafakāfe:

¹¹ Nā mātō pexe rasi anoax nōko tae ano mapo neano, nō taa taa akano anā nōko neima. Nāskarifiakī mā noko nikakaspaino mātō chaka nōko neima, mātō nei. Akka shināsharakāfe Nios xanīfo mātō Ifo ipai mā chaimashta matoki oi kiki,’ ixō ato yoikāfe.

¹² Akka ē mato yoi, nā omiskōiai nokoaitia, na pexe rasi anoax ato omiskōimaniyoi nā Sodoma anoaxo ani keskafakī finōmainīfofā ato omiskōimakī finakōiyoi,’ ixō Jesūs ato yoini.

Pexe rasi anoxō Jesūs nikakaspaino

(Mt. 11.20-24)

¹³ Anā Jesūs ato yoini iskafakī: “jOoa! Corazin anoafāfe Betsaida anoaxo fe mā omiskōifinakōixii. Akka Tiro anoxō Sidōn anoxori nā ē mato ōimana keskara, ē ato ōimanano āto chaka xatekaxō Epa Nios Ifofakeranafo. ‘jOoa! Nō afara chakafamiskī iskaratīa nō anā Nios Ifofai,’ iyanā rāfikaxō āto rapati chapo safekaxō chii māpo raish akeranafo fetsafāfe ato ōinōfo.

¹⁴ Akka Niospa Tiro anoaxo yafi Sidōn anoaxo ato omiskōimafiakī ato omiskōimasharaima, akka matoroko omiskōimakī finakōixii.

¹⁵ Akka, ζnō Capernaum anoax nō nai mēra kai Epa Nios ari ixō mā shināimē? Maa. Nā omiskōipakenakafo mēra ē mato potaxii,” ixō Jesūs ato yoini.

¹⁶ Nāskata Jesūs anā aōxō tāpimisfo yoini: “Nā mato nikaifāfe, eari nikasharakani. Akka nā mato nikakaspaiifāfe, eari nikakaspakani. Nā ea nikakaspaiifāfe nā ea nīchiniri ēfe Epari nikakaspakani,” ixō Jesūs ato yoini.

Anā fenifo setenta y dos feronāfakefo Jesūs ato nīchitano

¹⁷ Nā setenta y dos feronāfakefo anā fenifo, inimakōiyānā. Mā fēkaxō iskafakī yoinifo: “Ifo, niafaka chakafāfe noko nika mī aneōxō yorafa makinoā nō potaino,” faifono,

¹⁸ Jesūs ato kemani: “Ēje, mē ōia Satanās nai mēranoax pakeaito oa kana piishikai keskara.

¹⁹ Ē mato ēfe shara inā, ēfe sharaōnoax mā kaito rono feta nīfo mato chachiyamanō. Nāskaxō nā noko noikaspamis Satanās chaka mā finōkōinō, mato afeskafanōma.

²⁰ Akka inimayamakāfe niafaka yōshi chaka potax. Akka mā nai mēraxō Epa Niospa mātō anefo āfe kirikakī keneaki, nā sharafinakōia,” ixō Jesūs ato yoini.

“Ekeki fekāfe ē mato shināmasharanō,” ixō Jesūs ato yoini

(Mt. 11.25-27)

²¹ Ato askafata, Jesūs Apa Yōshi Sharaōnoax inimakōikī yoini iskafakī: “Epa Niosi, keyokōi nai mēranoafoya nono mai anoaxo mī āto Ifo. Mī sharafinakōia. Akka atirifāfe kirika kene tāpifikaxō mia Ifo fakaxoma. Iskafakī shināmisfo: ‘Tsoa fetsakai noko keskarama, nō tāpikōia,’ ixō shināmisfo. Akka nāfo mī meka mī ato tāpimanima. Akka nā kirika kene tāpikaxoma mia Ifofaifono nāfo mī meka shara mī ato tāpimani, nā mī fichipaiyai keskafakī. Nāskakē ē mia aicho fai,” ixō yoini.

²² “Ēfe Epa Niospa a tāpia keskara eari keyokōi tāpimani ēmāi āfe Fakekē. Akka tsōakai ea tāpiama, ēfe Epa fistichi ea tāpikōia. Nāskarifiakī tsōa ēfe Epa tāpiama, akka eres fisti ē tāpia. Akka nā fetsafori ē ato tāpimanaino nāfāferi Epa Nios tāpitirofo,” ixō Jesūs ato yoini.

²³ Anā aōxō tāpimisfoki oxō ato fisti yoini: “Nā mā ōiai keskara ōikanax fetsafori inimakōikani.

²⁴ Akka ē mato yoi, Niospa meka yoimisfo feta xanīfofōfāfe nā ē mato yoiai keskara ōipaifakakī ōipaonifoma. Nā mā nikai keskari nikapaifakakī nikapaonifoma.”

Meka fetsafaxō samāritanō sharaōnoa Jesūs ato yoini

²⁵ Feronāfake fisti a Moisés yoikī kirika kenenī keskara ato tāpimamis Jesūs fe mekaikai kani. Jesūs ea kemaimākai ixō yōkaikai: “Ifo, ζē afeskatiromē Nios fe ipaxakī?” ixō yōkaito,

²⁶ Jesūs kemani: “Akka, ζa Moisés kenenī ano anexō mī ōimismamē afaa ikamākī?” faito,

²⁷ a Moisés kenenī tāpiato kemani iskafakī: “Nōko Ifo Nios noikōikāfe nōko ōitifoayō nōko yōshi sharafoyaxori nōko kerex sharafoyaxō nōko māpori shināsharakōikāfe, askatari a mia chaima nikari noisharafe a mā mī noimeai keskafakī ixō Moisés kenenī,” faito,

²⁸ Jesūs kemani: “Mī ea kemasharakōia, mī askafai mī Nios fe ipaxatiro,” ixō Jesūs yoini.

²⁹ Akka nā Moisés kenenī ato tāpimamisto shināni, mī isharakōimisra ea Jesūs fanōra ixō. Nāskaxō Jesūs yōkani: “Akka, ζtsoamē ea chaima nika?” faito,

³⁰ Jesús yoini: “È mia yoinō mī tāpinō. Feronāfake fisti Jerusalén anoax Jericó ari fāi kaito, yometsofāfe achikaxō rapati fīanifo. Nāskakē seteketsakata nasharakēma fai kesemē rātafainifo.

³¹ Nāskano nā ato Nios kīfixomisri nā fai fistichi kani. Akka kakī ōia fai kesemē rakakē ōifiki tanafainima.

³² Nāskano feronāfake fetsa levita arifi okī ōia rakakē ōini, nāatori kakī finōfaini.

³³ Akka feronāfake fisti Samāria anoax nā fai fistichi akairi chipo kakī, mā fichixō aō noikōikī shinākōini.

³⁴ Nāskata akiki kaxō, a āfe tsefefe ano xini yafi uva ene osixō aō tereaki fetsani. Nāskaxō taxta fakī fetsaxō, āfe kamayo kamaki tsaoinfōfā iyonī, pexe mēraxō kexeshiyoni.

³⁵ Nāskata pena fetsa nā feronāfake samāritanō āfe kori exe rafe tsekaxō nā pexe ifo kopifani iskafakī yoianā: ‘Na feronāfake ea kexexōfe. Mī kexesharakē ē mia anā kopifaiy-oxikai,’ ixō yoini.

³⁶ Akka na feronāfake tresnoa ē mia yoipai. Akka, ŷfato aō noikōinimē na feronāfake omiskōiai, a noko chaima nika nō noitiro keskafakī?” ixō yoikaito,

³⁷ a Moisés kenenī tāpiato kemani iskafakī: “Nā noikōiaito akiki kaxō sharafani,” ixō yoiaito, Jesús iskafani: “Mīri ato noikī askafafe,” fani.

Marta feta María pexe ano Jesús kani

³⁸ Nāskata Jesús fāi kai pexe rasi mēra nokoni, nāno kēro āfe ane Marta ika ini nāato āfe pexe ano ifini.

³⁹ Akka nā Marta āfe chiko fistiya ini, āfe ane María. Nā María Jesús nāmā tsaoni a Jesús yoiai keskara nikakōixikī.

⁴⁰ Akka Martakai nikanima. Pīchani Jesús pimapaikī. Nāskakē Jesúski kaxō yoini: “Ifo, ŷea mīa shināimamē eres fisti ē pīchai ēfe chikokai efeta akima? Ea yoixōfe efeta anō,” faito,

⁴¹ akka Jesús kemani: “Marta, mī fekaxtei afarafo shināi.

⁴² Akka nā sharafinakōia María nikakōisharai. Nāskakē ēfe meka shara nikaito tsōa xītitiroma,” ixō Jesús yoini.

11

*“Epa Nios kīfikī iskafakāfe,” ixō Jesús ato yoini
(Mt. 6.9-15; 7.7-11)*

¹ Pena fetsa Jesús Apa Nios kīfini. Mā kīfikī xateano aōxō tāpimis fistichi yōkani: “Ifo, afeskaxō Epa Nios nō kīfitiromakī noko tāpimafe, Juan aōxō tāpimisfo tāpimani keskafakī,” faito,

² Jesús yoini: “Akka mā kīfikī iskafatiro:

Epa Niosi, mī fisti sharafinakōia. Keyokōichi mia Ifofanōfo mī āto xanīfo finakōia inō ato ikisharakōipakexakī.

³ Nā pena tii a nō piyai noko ināfafāife nō afaa yopayamanō.

⁴ A noko chakafaifo nō ato raefa keskafakī noko chakari noko soaxōfe. Satanás noko afara chakafamapaifaito nokoki kematimafafe, ixō kīfikāfe,” Jesús ato fani.

⁵ Nāskafata anā Jesús ato yoini: “Ōitsai, fatora mā fetsa mā yamayano, mato yama yamenakē kafanaino mato pexe ano kaxō mato yoikī iskafaino: ‘Yamā, tres faxō ea yoa ināpe.

⁶ Mā ēfe yama rama noi kiki chai inoax ēfe pexe ano, ē afaayamaki afaa ē pimatitromakī,’ ixō mato yōkaito,

⁷ kemakī mato pexe mēraxō mā iskafatiroma: ‘Ea fekaxtefayamafe. Èfe pexe fepoti fetaoxikakī ēfe fakefo fe ē oxaki. Finixō ē mia afaa inātiroma,’ ixō mā yoitiroma.

⁸ È mato yoi, fininākafā afara āfe yama inākaspaikī inātiro fekaxtefaito nā fichipaiyai tii.

⁹ “Nāskakē ē mato yoi, afara fichipaikī Epa Nios yōkakāfe mato ināi kiki. Pena fenakākīma manakāfe nā Epa Niospa mato ināitīa. Nāskakē Epa Nios kīfifāikāfe mā kīfifaito mato ināi kiki.

¹⁰ Akka nā yōkai Epa Niospa afara shara ināxii. Nāskarifiakī fētsa afara shara fenaito Epa Niospa fichimatiro. Nāskarifiakī fētsa Epa Nios kīfifaito ināsharakōixii.

¹¹ “Akka, ŷfatora fētsa mā āto epaxō mato fakefo mā rono ato inātiromē mato foe yōkaito? Maa. Mākai mato fake mā askafatiroma.

¹² Māto fake mato takaranā too yōkaito, ŷnifo mā inātiromē? Maa. Mākai mato fake mā askafatiroma.

¹³ Akka, mā chakafixō mato fakefo kexesharaxō afara sharafo mā ato inātiro. Nāskarifiakī Epa Nios nai mēra ikato āfe Yōshi Shara mato ināsharakōixii mā yōkaito,” Jesús ato fani.

*Yora fetsafāfe, “Jesús niafakaōxō ato sharafaira,” fanifo
(Mt. 12.22-30; Mr. 3.20-27)*

¹⁴ Nāskata Jesús niafaka yōshi chaka potani feronāfake makinoa mekamamismano. Mā a makinoax niafaka tsekeano, nā mekamisma mekainīkafani. Mā mekaito ōikani, “jKeel Ōikapo, mā mekai,” yorafo iki fetsetenifo.

¹⁵ Akka atirifāfe yoinifo iskafakakī: “Na Jesús nā niafaka chakafāfe āto xanīfoōxō nā Beelzebúxō* ato makinoa niafaka yōshi chakafo potai,” ikanax yoinānifo.

¹⁶ Fetsafāferi chakafamapai kakī yoinifo iskafakakī: “Nios feta nai mēraxō afara fetsafo noko ōimafe,” faifono,

¹⁷ akka Jesús tāpini a shināifo keskara. Nāskaxō ato yoini: “Keyokōi mai tio anoax āa ranā retenākani keyotirofo. Nāskarifiāi pexe fisti mēra ikanax āa ranā noikaspā faatanākani paxkanātirofo anā ano fistikai tsoa itiroma.

¹⁸ Nāskarifiakī Satanās āfe yōshi chakafo potaxō anā afaa afeskafatiroma. Akka āfe yono keyoano anā āfe yōshi chaka afe itiroma. Nā ē mato yoi, akka mā yoikī iskafai: ‘Satanās yōshi chakaōxō niafaka potai,’ mā ea fai.

¹⁹ Akka askafiano, akka, ḡtsōa āfe shara mātō ināno niafaka chakafo potamismōmē? Nāskakē atoōxō mā tāpitiro akka mā eōnoa shināsharamisma. Akka Niosxō mātō inafāfe niafaka potamismo.

²⁰ Akka ē niafaka yōshi chakafo potatiro Niospa Yōshi Sharaōxō ato makinoa. Nāskakē mā tāpitiro a Niospa atoki nīchiai mā nokoano. Nāskakē yorafāfe ea Ifofasharakōixikani.

²¹ “Akka feronāfake mitsisipakōichi marayaxō āfe pexe kexekōiano tsōa āfe afaa fiatiroma.

²² Akka fetsa nā mitsisipa finakōia oxō achixō metexkere axō āfe afarafo fiatokai anā afeskafatiroma. Nāskax paxkanāi fetsetirofo.

²³ “Akka fetsa efe rafekaspakī ea chakafai. Nāskakē nāfāfe fetsafo ea Ifofamakaspakani ato paxkanā fakani Epa Nios Ifofayamanōfo,” ixō Jesús ato yoini.

Anā niafaka chaka yoraki nanetiro

(Mt. 12.43-45)

²⁴ Anā Jesús ato yoini iskafakī: “Ē mato yoinō mā tāpinō. Niafaka chaka feronāfake makinoax tsekeax tsōa istoma ano kafāsatiro anoxō tenepai. Akka anoxō tsoa fichiamax niafaka chakata anā shinātiro iskakī: ‘A ē anoax tsekeita ano anā kapa,’ ixō shinātiro.

²⁵ Mā kaxō ōia nā feronāfake nā pexe xakī mēra mātosomea keskara sharakōi ōitiro itipinīsharakōia.

²⁶ Nāskakē nā niafaka afe niafaka siete efetiro nā chakafinakōiafo, nāfo nā feronāfake mēra iki fetsetenō. Nāskakē nā feronāfake chakafinakōia itiro a iyopaoni keskarama.”

Niospa meka nikakani inimasharakōitirofo

²⁷ Nāskata Jesús anori ato yoiaino kēro fistichi yorafā rasi mēraxō fāsikōi yoini iskafakī: “Mī efa mikiki inimakōi mia fake fixō mī yome pishtakē mia chocho amayanāmāi mia pexkoax,” ixō fāsikōi yoiaino,

²⁸ Jesús kemani: “Akka nā Niospa meka nikasharakōiai nāfi inimai finasharakōi kiki,” ato fani.

*Yora chakafāfe Jesús yōkanifo: “Tsōa atiroma keskara noko ispafe nō mia chanīmara fanō,”
ixō yōkanifo*

(Mt. 12.38-42; Mr. 8.12)

²⁹ Yorafā rasi Jesúsiki fafono anā ato yoini iskafakī: “Na keyokōi yorafo chakakōifo. Tsōa atiroma keskafakī ē afara afeskarafanō ōipaikani ea Niospa nīchiamākī tāpixikakī. Akka a keskara ōipaifikakī ōikanima. Nā Jonās ini keskara fisti ōixikani.

³⁰ Akka Epa Niospa Jonās Nīnive pexe rasi ano nīchini āfe meka shara ato tāpimatanō Epa Nios Ifofanōfo mā āto chaka xatekaxō. Nāskarifiakī Epa Niospa ea nīchia na yorafā rasi āfe meka shara ē ato tāpimanō.

³¹ ḡMā shināimamē nā kēro xanīfo chai inoax kani Salomōn tāpisharakōiano nikaikai? Akka mā kai ea nikamisma ē Salomōn finōkōifiano nono efe ifiaxō. Akka nā Niospa yorafo keyokōi ichanāfaitīa ato yoipakexii fatofo afe ipanakafomākī, fatofori a omiskōipakenakafo mēra fokanimākai. Nāskaifono nā kēro xanīfo Salomōn nikaikai chai inoax kanito mato yoikī iskafaxii: ‘Mā chakakōifo mā Jesús nikakaspamis,’ ixō mato yoixii.

³² ḡMā shināimamē nā Nīnive anoafāfe Jonās Niospa meka ato yoiaino anā Nios nikakōinifo? Akka mā kai ea nikamisma ē Jonās finōkōifiano nono efe ifiaxō. Akka nā Niospa yorafo keyokōi ichanāfaitīa ato yoipakexii fatofo afe ipanakafomākī, fatofori a omiskōipakenakafo mēra fokanimākai. Nāskaifono nā Nīnive ano ipaonifāfe mā āto chaka xatekaxō mato yoikī iskafaxikani: ‘Mā chakakōifo mā Jesús nikakaspamis,’ ixō mato yoixikani,” Jesús ato fani.

* 11:15 Satanās āfe ane fetsa Beelzebú.

“Nōko òiti sharakē nō shināsharakòitiro. Akka nōko òiti chakakē nō shināsharatiroma,” ixō Jesús ato yoini

(Mt. 5.15; 6.22-23)

³³ Anā Jesús ato yoini iskafakī: “Akka tsōa rāpari otaxō tsōa istoma tsōotiro. Askatari tsōa kesho fepotiro. Askatamaroko fomākia tsōotirofo chai chaxasharakòikē a mēra ikiaifāfe òinōfo.

³⁴ Akka mātō afama mīshtifo noikī mā shināfafāini. Akka nōko fero rafeta nā rāparinī chai chaxai keskarakē, nōko yora shara itiro. Nāskarifiāi nōko fero sharano nō xafakīa òisharatiroma. Nāskatari nō isharakòitiro. Akka nōko fero chakakē nō òisharatiroma, fakishkōi itiro.

³⁵ Akka òisharakāfe mā Epa Nios shināi xafakīa ifiaxō āfe meka kachikiri faxō mā anā shināsharatiromaki, fakish keskara mā itiro.

³⁶ Akka mā xafakīa isharakòiano, mātō òiti mēra oa fakish keskara itiro. Mā xafakīa shināsharakòitiro rāpari otaxō mato xafakīa chaxa keskara shara mā itiro,” Jesús ato fani.

Jesús ato yōani fariseofoya a Moisés yoini keskara ato tāpimamisfo

(Mt. 23.1-36; Mr. 12.38-40; Lc. 20.45-47)

³⁷ Mā Jesús ato yoikī xateano fariseo fistichi yoini āfe pexe ano pikixikī. Nāskakē Jesús āfe pexe mēra ikikainax mīsa ano tsaoni.

³⁸ Akka nā fariseo shināni Jesús mechokomeyamaito āto xinifāfe yoipaonifo keskai. Akka taeyoi mechokomepaonifo, chipo pixikakī.

³⁹ Akka nōko Ifāfe Jesús mā tāpixō yoini askara shināito: “Mā fariseofo mechokome-sharafixō, akka mātō shinā mēraxō afara sharafo mā shināima. Yora fetsafo mā noima, afara fetsa fetsatapafo noikī mātō shinā mēraxō afara chakafo mato mēra fospikōia.

⁴⁰ Akka mā anorima shināmis. ¿Mā tāpimamē tsōa nōko yora femākīa onifata, nōko òiti mērari onifanimē?

⁴¹ Nāskaxō a yora afaamaisfo afara ato inākāfe. Mā askafakī yorafo mā òimatiro mātō òitinī mā Nios shinākī. Nāskax mā isharakòitiro, Nios matoki inimanō. Nāskaxō a Niospa mato amapaiyi keskara mā atiro.

⁴² “¡Ooa, fariseofāfe! Mātō afarafo atiri mā Nios ināmis. Mātō fanafori atiri mā ināmis. Askafixō mā fetsafo mā ato shināmisma, askatari mā ato sharafamisma. Askatari mā Nios noikōiama. Akka nā mātō fanafō mā Nios ināmis keskafakī fetsafori noikōikāfe Niosri noikōiyanā.

⁴³ “¡Ooa, fariseofāfe! Ichanāti pexe anoax tsaoti sharakōi ano mā tsaopaimis noko òisharanōfora ikax. Askatari yorafāfe noko finōkakī noko yoikōisharanōfora ikax.

⁴⁴ “¡Ooa! Māfi nā yora naa keskarafokī. Nā yora maia ano kaxō nō pisi xetetiroma keskarafō mā oke mēra pisifiano. Nāskarifiakī mātō òiti chakafiano mato òikakī sharara mato famisfo,” ixō fariseofo Jesús yoini.

⁴⁵ Jesús ato askafaito, a Moisés yoikī kirika keneni keskara ato tāpimamisto kemani iskafakī: “Maestro, anori mī yoikī nokori mī Ichayanā yoi,” faito,

⁴⁶ akka Jesús yoini: “¡Ooa a Moisés yoikī kirika keneni keskara ato tāpimamisfāfe! Akka mātō kaifofo yoikī mā iskafamis: ‘Moisés keneni keskara nikakōikāfe,’ ixō mā ato yoifikī akka māri nikasharakòimisma. Askatamaroko a Moisés yoini keskara finomainifofā mā ato yoisfo mato nikakanax askanōfo. Nā mā ato yoiāi keskara apaifikakī tsōa atiro. Akka māri mā ato afaa axomisma.

⁴⁷ “¡Ooa! Māfi nā Niospa mēka yoisfo maiafo anoxō mā afarafo onifamiskī ato shināxikī. Akka nāfo mātō xinifāfe retepaonifo.

⁴⁸ Akka mā mā nikakī tāpikōia a mātō xinifāfe apaonifo keskara. Akka mātō xinifāfe ato retepaonifo. Akka a maiafo anoxō mā afarafo onifamis yorafāfe òinōfo. Nāskarafo mā ato òimani nā mātō xinifāfe apaonifo keskara, māri ato fe ixō mā ato feta askafakerana.

⁴⁹ “Nāskakē Niospa atoōnoa tāpixō iskafakī yoini: ‘A āfe mēka yoisfo yafi eōxō yonomisfo fetsa ē ato nīchixii. Akka ranāri ato retyanā ranāri ato omiskōimakani.’

⁵⁰⁻⁵¹ Nāskakē na yorafo iskaratīa niyoafo Niospa ato omiskōimaxii atoōxō. Nā Niospa mai onifaki taefanitiā Abel sharafiano āfe òchi reteni. Nāskatari xinia fetsa finōmata a Niospa mēka yoisfofo ato retepaonifo. Nāskata chipokōi fakakī Zacariasri reteni. Nā Nios kīfiti pexefā chaimashtaxō koati mīsamāfā nakirafexō reteni. Akka ē mato yoi na yorafo iskaratīa niyoafo Niospa ato omiskōimaxii atoōxō.

⁵² “¡Ooa a Moisés yoikī kirika keneni keskara ato tāpimamisfāfe! Niospa mēka shara oa onea keskara mā faa yorafāfe tāpinōfoma. Mākai Niospa mēka tāpisharama. Nāskaxō fetsafāfe nikapaifaifono mā ato nikatimafai. Nāskakē Niospa mato omiskōimakī finakōixii,” ixō Jesús ato yoini.

⁵³ Ato Jesús askafakī yoiaino, a Moisés yoikī kirika keneni keskara ato tāpimamisfo fe fariseofo akiki òitifishkiki finakōinifo. Nāskaxō fekaxtefayanā afara ichapakōi yōkanifo,

⁵⁴ afara ato yoiatio nikakaxō yōaxikakī. Nāskakaxō yōkanifo xanīfofo yoipaikakī.

12

*Jesús ato yoikī iskafani: “Ato feparapaimis iyamakāfe,” ixō ato yoini
(Mt. 10.26-27)*

¹ Nāskakē yorafā rasi akiki fekanax ichanānifo. Shoiki fetsenifo yora ichapakōi māiyakanax. Nāskakē Jesús aōxō tāpimisfo yoikī taefani, ato iskafakī: “Ōisharakāfe fariseofāfe nafo sharafora noko fanōfora ikaxō mato anorima yoimapaikani kiki sharafoyamakaxō. Nāfo feparapaimisfokī. Nāskakē māri ato keskara iyamakāfe.

² “Akka nā afara one yoifimisfono Niospa ato xafakīa kāmamaxōii, afarari fomāpaimisfono nāfori Niospa ato xafakīa kāmamaxōii.

³ “Nāskakē a yora fetsafo fomāfai ares shināmisfo, nāfori Niospa xafakīa faxii. Nā pexe kene mēraxō pexe fepoti tserexō afara one yoimisfori, nāfori Niospa pexe kachiori ato xafakīa kāmamaxōii keyokōichi tāpinōfo,” ixō Jesús ato yoini.

*Akka Nios fistiki nō mesetiro
(Mt. 10.26-31)*

⁴ Anā Jesús ato yoini iskafakī: “Efe yorafāfe, ē mato yoi. Mato retepaifiaifono rateyamakāfe. Akka māto yora nafaiino māto fero mēsho naima kiki.

⁵ Akka ē mato yoi, tsoaki mā mesetiroma, atoki mesetamaroko Nios fistiki mesekāfe. Nāto noko retexō nōko fero mēsho nā omiskōipakenakafo mēra potatiroki. Nāskakē akiki mesekāfe.

⁶ “Akka ē mato yoi mā tāpinō. Na cinco peya mīstiffo minixō mā kori ichapa fiima. Āfe exe rafes mā fii. Askatamaroko Niospa keyokōi peya mīstiffo noi. Atokai shināmakinakama. Peya mīstiffo afaamafiakē Niospa ato noi. Keyokōi Niospa ato shināpakenaka.

⁷ Akka ē mato yoi, Epa Niospa māto foo fisti rasi mato tāpikakōia. Nāskakē rateyamakāfe. Nā peya mīstiffo kexesharamis keskafakī matori Epa Niospa kexesharakī finakōiakī,” ixō Jesús ato yoini.

Akka atiri yorafāfe, “Jesús ēfe Ifora,” ea famisfo yorafāfe ferotaifi. Akka atirifāferi, “Jesús ēfe Ifomara,” ea famisfo

(Mt. 10.32-33; 12.32; 10.19-20)

⁸ Anā Jesús ato yoini iskafakī: “Akka ē mato yoi yorafāfe ferotaifi, ‘Jesús ēfe Ifora,’ ea faifono, ēri, ‘Nafo efe yorafo,’ ē ato faxii Epa Niospa āfe ājirifāfe ferotaifi.

⁹ Akka nā yorafāfe ferotaifi, ‘Jesús ēfe Ifomara,’ ea faifono, ēri Niospa āfe ājirifāfe ferotaifi, ‘Nafo efe yorafomara,’ ē ato faxii.

¹⁰ “Akka Niospa Fake chakafakī mekafaifono Niospa ato chaka soaxotiro. Akka Epa Niospa āfe Yōshi Shara chakafakī mekafaifono Epa Niospa ato chaka soaxonakama.

¹¹ “Nāskata ichanāti pexefo ano mato iyoaifono, askayamakī xanīfofo ano mato iyoaifono, shināchakayamakāfe afesaxō mā ato kemaimākai afaa mā ato faimākai. Epa Niospa mato shināmasharai kiki.

¹² Akka a mato chakafakī mekafaifono Epa Niospa Yōshi Sharapa mato shināmasharaino mā ato kemasharai,” ixō Jesús ato yoini.

Yora afama mīшти ichapayax mesekōixii

¹³ Nānoa fētsa Jesús yoini: “Ifō, ēfe ochi ea yoixōfe āfe afama mīstiffo ea paxkaxonō,” faito,

¹⁴ Jesús kemani: “Efe yorashta, tsōakai ea nūchima ē ato yoinō āto afama mīшти paxkanānōfo,” ixō yoita.

¹⁵ Nāskaxō anā yoini: “Mā kexemesharakāfe afarafo ato fichipayamakāfe, ayafixō finōmafāi fipayamakāfe. Nā nō yopaifo shināyamakāfe, afama mīштиōnoakai nō isharatiro-maki. Nōko afama mīstifāfekai nōko ōiti noko inimamaxotiro-maki,” ixō Jesús ato yoini.

¹⁶ Nāskaxō anā meka fetsafaxō ato yoini: “Feronāfake fetsa afama mīшти ichapaya ini. Āfe tare ano yonosharaxō afama mīшти fanano ichapakōi ini.

¹⁷ Nāskakē nā feronāfake afama mīшти ichapayato iskafakī shināni: ‘Ķēfe yonofo ē afeskafaimē? Fanīkai ēfe yonofo ē fatiroma,’ ixō shināni.

¹⁸ Nāskaxō anā shināni: ‘Ķe, mē shinā ē afeskafaimākai. Nā ē ano afama mīstiffo famis ēfe pexe nasaxō anā efapafai, nāno ēfe fana fimifo mekexiki ēfe afama mīstiffoya.

¹⁹ Nāskaxō ēfe shināmā ē shināi iskafakī: “Nē afama mīшти mekekōia nā xiniai tii rakakōikai pixiki, ayayanā inimasharakōiyana.”

²⁰ “Nāskaito Niospa iskafakī yoini: ‘Mīkai afaa tāpiama. A na fakishi mī nai, akka, Ķna mī mekefo tsoanā ikimē?’ fani.

²¹ Nāskariatiro a yora afama mīшти ichapaya ikatsaxakī Nios shinātama. Akka Niospa ōiaino anā afaya itiroma,” ato fani Jesús.

*“Epa Niospa áfe fakefo kexesharamis,” ixõ Jesús ato yoini
(Mt. 6.25-34)*

²² Nâskata chipo Jesús aõxõ tâpimisfo yoini iskafakî: “Ë anã mato yoisharanõ. Ea nikasharakãfe. Shinãchakayamakãfe.

²³ Akka a nõ piatokai noko imasharatiroma. Askatari a nõ safeatori nõko yora noko imasharaxotiroma.

²⁴ Shinãkapo. Nã peyafãfekai afaa fanamisfoma, afarikai topimisfoma. Askatari afari mekemisfoma. Nãskafekê Epa Niospa ato pimamis. Akka Niospa nã peyafõ finõmainifõã matoroko kexesharakõimis.

²⁵ Nãskakê, çafeskakî mã shinãchakaimê? A nõ shinãchakaitokai pena fisti noko anã nimatiroma.

²⁶ Akka afaa shinãyamakãfe. A nõ shinãitokai noko nimatiroma. Nãskakê afaa shinãyamakãfe.

²⁷ “Akka shinãkapo afeskax charofo foaikamakî. Na charofãfe yonokanima. Askatari xapo toro atirofoma rapati faxikakî. Nãskakê ê mato yoi, na charofo sharafiano xanifõ Salomón rapati sharafinakõ safefixõ na charofo finõama.

²⁸ Akka Niospa nafefo shara mîshti onifasharafiano nõ sepakî xateano natiro. Nãskaxõ nõ koofatiro. Akka charofo finõmainifõã Niospa mato noikî mato rapati shara safematiro, mato kexesharaxõ. Akka mã shinãchakakî mã Nios chanîmara fasharaima.

²⁹ Nãskakê shinãkî iskafayamakãfe: ‘Ooa, ê afaa piimêti a ê piã keyoano, askatari ê afaa ayaima,’ ixõ shinãyamakãfe.

³⁰ Akka nã Nios Ifofaifãfema iskara shinãmisfo. A piã fisti shinãkata, a safepaiyaifori shinãmisfo. Akka Epa Niospa mã mato tâpia afarafo mã yopaito.

³¹ Nãskakê mãroko Nios xanifõõnoa shinãfafãikãfe. Mã askaito afara shara Niospa mato inãxii kiki,” ixõ Jesús ato yoini.

*“Epa Nios ika anoxõ afara sharakõifo mato mekexona,” ixõ Jesús ato yoini
(Mt. 6.19-21)*

³² Anã Jesús ato yoini iskafakî: “Efe yorafãfe, rateyamakãfe, Epa Niospa mato kexesharãkiki. Akka Epa Niospa áfe afama mîshti mato inãsharai inimakõikai mato inãsharai.

³³ Mãto afama mîshtifo minixõ kori fiyokãfe. A yora afaamaisfo ato inãxikakî. Mã askaino Niospa nã ika anoxõ mato afama mîshti mekexona. Nãfokai keyonakama, tsoarikai yometsoitiroma. Askatari nakaxari mato pãtiro, Epa Niospamã mato mekexonano.

³⁴ Akka mãto afama mîshti shinãkî mã fisti mã shinãi. Akka mã Nios fisti shinãkî mã fistiri mã shinãkõitiro mãmãi noikõikî. Nãskax mã afe isharapakexatiro,” ixõ Jesús ato yoini.

Îkisi itipinîsharakãfe

³⁵ Anã Jesús ato yoini iskafakî: “Nãskakê itipinîsharakãfe mãto rapati safesharakõita mãto rãpariri õtasharakõikãfe.

³⁶ Nã áfe ifo yonoxomisto áfe ifo manatiro keskakãfe pexe fetsa ari kaax, áfiyatani oaino. Mã nokoaito áfe fepoti koshi fepexoxiki, mã nokoxõ fepoti ramãtoshiaino.

³⁷ Nãskaifono ãto ifo atoki inimasharakõitiro, manasharakõiaifono. Akka ê mato yoikõ ãto ifãfe mîsa ano ato tsãotiro atoki inimayanã. Nãskaxõ ato pimatiro atoki inimasharakõiyã.

³⁸ Nãskakê inimasharakõitirofo ãto ifomãi manasharakõikanax, yamenake kafanaino nokoaino, askayamai penanaki kafanaino nokoainori akiki inimasharakõitirofo.

³⁹ Nãskakê mãri nã keskara tâpisharakãfe. Akka pexe ifãfe mã tâpixõ afetã yometso nokoimãkai ixõ áfe pexe itipinîshara fatiro, a mēra ikiãx yometsoyamanõ.

⁴⁰ Nãskarifiã mãri itipinîsharakãfe. Akka oimara ixõ mã ea manayamaino ê matoki nokorisatani,” ixõ Jesús ato yoini.

*Ina shara yafî ina chakaõnoa Jesús yoini
(Mt. 24.45-51)*

⁴¹ Nãskaito Pedro yõkani: “Ifo, çnoko fisti meka fetsafaxõ mî yoiamê, askayamakî keyokõ mî noko yoiamê?” ixõ Pedro yoikaito,

⁴² Jesús kemani: “Mã tâpinõ ê mato yoi afe keskaramãkî ina shara áfe xanifãfe áfe afama mîshti kexemafaini mai fetsa ari kakî nã áfe pexe anoafõ ato kexesharaxonõ ato pimasharayanã, nã áfe xanifõ fena oyamaino.

⁴³ Mã mai fetsa ari katani oxõ õitoshini a yonoxomisto mã yonoxosharakõiano. Nãskakê akiki inimakõini a yonoxomisri inimakõini mãmãi yonoxosharakõiax.

⁴⁴ Ê mato pãraima. Nãskaxõ áfe xanifãfe mã xanifõ imaxõ áfe afama mîshti kexexonõ inãtiro.

⁴⁵ Akka nã áfe xanĩfo yonoxomisto, ‘Èfe xanĩfo fena oimara,’ ixõ shinãkĩ, a yonoxomis fetsafo sêteketساني, këröfoya. Nã päemisfo fe rafexõ ato feta piyanã, askatari ato feta ayayanã, askatari ato fe päeyanã.

⁴⁶ Iskaratĩa èfe xanĩfo oimara ixõ manayamaino, nã pena fistichi áfe xanĩfo nokoflaino mã nokoxõ a yonoxomis omiskõimatiro, nã yora chakafo fomisfo mēra potakĩ.

⁴⁷ “Akka a yonoxomisto mã tãpia áfe ifáfe fichipaiyai keskara, nãskakē mã tãpifiax itipinĩsharama, nãskakēri nikasharaima, nãskakē áfe ifáfe omiskõimayanã koshaketsatiro.

⁴⁸ Akka a yonoxomis fētsa áfe ifáfe yoiya keskara tãpixoma afara chakafakē áfe ifáfe omiskõimafiakĩ, omiskõimasharanima. Nãskarifiakĩ Niospa fetsa ichapa tãpimaxõ ichapari yõkaxii. Iskafakĩ a ē mia yoiya keskafakĩ, ¿fetsafo mã mĩ ato tãpimasharamē? ixõ yõkaxii. Akka fetsafo tãpimasharamano Niospa omiskõimakĩ tãpimaxii,” ixõ Jesús ato yoini.

“Akka atirifáfe ea chanĩmara faifono, atirifáferi ea chanĩmara fakanima,” ixõ Jesús ato yoini (Mt. 10.34-36)

⁴⁹ Anã Jesús ato yoini iskafakĩ: “È keyokõi maifo tii anoã ãto chaka xatemaniyoi ē oa. Atirifáfe ea chanĩmara faifono, fetsafáferi ea chanĩmara fakanima. Nã chanĩmara faamafo Niospa ato omiskõimaxii. Èfe Epa Niospa ea mai ano yonomanai keskara iskaratĩa keyokõi shara ikerana.

⁵⁰ Akka matoõnoax naxii ē oni. Akka ē nayoamax ē omiskõixii. Nãskakē ē omiskõifinakõita ē naxii.

⁵¹ Akka, ¿mã shinãimē ē oni nono mai anoax eõnoax inimanõfo? Maa. Askarakaima. Akka ē mato yoi nã ea chanĩmara faafáfe shara shinãifono, akka a ea chanĩmara faafáfema shara shinãkanima, afara chaka shinãkani.

⁵² Akka iskaratĩa nã pexe fisti mēra cinco yorafo ikaxõ anorisfo shinãkanima, paxkanãtirofo. Trespatõ nã rafe noikaspaifono, nã rafetari nã tres noikaspatirofo.

⁵³ Apa áfe fake noikaspaino áfe fakefáferi áfe apa noikaspatiro. Áfe áfari áfe fake xotofake noikaspaino áfe fake xotofákeri áfe afa noikaspatiro. Askatari áfe fáfa yõxafáfe áfe fáfa naetafa noikaspaino áfe fáfa naetafari áfe fáfa yõxafo noikaspatiro.”

Nai foiskĩ nõ tãpitiro

(Mt. 16.1-4; Mr. 8.11-13)

⁵⁴ Nãskata Jesús yorafo yoini iskafakĩ: “Nai foiskĩ nai kõi õikĩ nai choshtakē oi feira mã faino oi itiro.

⁵⁵ Akka nã xini oaima anorinoax nēfefã oaino, mã xiniaira mã fatiro. Chanĩma, nãskatiro.

⁵⁶ Akka mãkai afaa tãpiama, mãkõi mã kakamepaimis a mã yoiyai keskara mã yoifikĩ mã chanĩmara famisma. Mã nai foiskĩ mã yoimis oi feira mã famis. Askara tãpifixõ mãkai a Niospa mato yoiyai keskara mã chanĩmara fapaima. Iskaratĩa afara afeskarafaiatokai mã tãpiama,” ixõ Jesús ato yoini.

Fētsa mia chakafaito raefarisafafe

(Mt. 5.25-26)

⁵⁷ Anã Jesús ato yoini iskafakĩ: “Akka, ¿afeskakĩ mã shara shinãimamē a sharafinakõia?

⁵⁸ Akka fētsa mato yoikĩ iskafaino: ‘Mĩ ea chakafaa. È xanĩfo yoikai,’ ixõ mato yoiaino, xanĩfo ari kayoamano koshi raefakáfe. Akka mã askafayamaino nã xanĩfáfe áfe sorarõfo yoitiro nã sorarõfáfe mato karaxa mēra ikimanõfo.

⁵⁹ È mato paraima. Fētsa mato karaxa mēra ikimanano mã fena tsetetiroma. Akka nã mã nimia kopifatĩa mã tsetetiro,” ixõ Jesús ato yoini.

13

Nõko chaka xatexõ nõ Jesús noko amapaiyai keskara fisti nõ atiro

¹ Nãskaino yorafo Jesúski fokaxõ yoinifo iskafakĩ: “¿Mã mĩ tãpiamē na Pilato yorafo ato retemanita Galilea anoãfo yoinã retexaxõ Nios kĩfiti pexefã mēraxõ Epa Nios inãifono ãto imifo yoinãnã imifoya osita?” ixõ yoinifo.

² Askafaiáfefe Jesús ato yoini iskafakĩ: “¿Mã shinãimē na Galilea anoã na feronáfakēfo naitafo? ¿Yora chakakõifo keskarakanax ãto kaifo keskarakanaxma chakafinakõiax naitafo ixõ mã shinãimē?

³ Maa. Askarama. Akka mãri mãto chaka xateyamaxõ mã Nios Ifofayamax nã ikaifo keskai mãri mã narisatiro mato reteaifono.

⁴ ¿Akka mã shinãimē nã feronáfakē dieciochonoa atoki pexe keya áfe ane Silóé atoki pakeano nanifo? ¿Mã shinãiraka: ‘Nãfo chakafinakõia nanifo Jerusalén anoãfo keskaraxma,’ ixõ mã shinãimē?

⁵ Maa. Askarama. Chanĩma ē mato yoi. Akka mãto chaka mã xateyamaxõ mã Nios Ifofayamax, mãri mã omiskõipakenaka.”

Meka fetsafaxō higuera fimimaisnoa Jesús ato yoini

⁶ Jesús meka fetsafaxō ato yoini iskafakī: “Feronāfake fistichi āfe tarepa higuera fana ini. Nāskax ōikai kani mā fimiyamāki, kaxō ōini fimimais ini.

⁷ Nāskakē yoini a tare kexemis. ‘Ōipo mā tres xinia afiax na fana higuera fimiyama. Ē āfe fimi fichipaiifiaino fimiyama. Ichakanō rerafe, ano fimi fetsa nō fananō,’ fani.

⁸ “Akka ifāfe askafaino a tare kexexomisto kemani: ‘Ifo, na xinia fisti manayofe. Ē a nāmā orosharata ē mai tatsispo sharayonō.

⁹ Ōitsai, ē askafaano fimisharatirokī. Akka fimiyamaito mī ea reramanō,’ ixō a tare kexemisto yoini.”

Jesús pena tenetitīa kēro petoko sharafani

¹⁰ Nāskano pena tenetitīa ichanāti pexe mēra kaxō Jesús ato yoini.

¹¹ Nānori kēro ini isinī itiani dieciocho xinia amis, niafaka chakata isinī imamis nā kēro sharamisma ini petoko itiani.

¹² Nānoa Jesús ōikī kenaxō yoini iskafakī: “Yōxafoshta, mā mī shara isinī itiyaniakī,” fani.

¹³ Nāskaxō āfe mēkemā ramāino, koshikōi nā kēro sharakōitani. Nāskaxō, “Epa Nios fāsi sharakōi,” nā kēromā fani.

¹⁴ Nāskakē Jesús pena tenetitīa kēro sharafaino, nā ichanāti pexe anoa xanīfo ōitifiškikī yorafo yoini iskafakī: “Seis nia nō yonotiuro, akka na pena tenetitīa tsōa yonotiroma. Nāskakē seis nia otafe sharaxiki, akka na pena tenetitīa tsōa mato sharafatiroma,” xanīfāfe ato fani.

¹⁵ Askafaito nōko Ifo Jesús kemani iskafakī: “Mā kai afaa tāpiama, mākōi mā kakapaimis, akka pena tenetitīari mā yonomis māto yoinā inafa mā tēpemis ato faka ayamanikakī.

¹⁶ Akka na kēro Abraham āfe fena Satanās chakata finitima famis isinī imayanā dieciocho xinia amamis. Ā Akka afeskakī na pena tenetitīa na kēro ē sharafatiromamē?” ixō Jesús ato yoini.

¹⁷ Nikakani a Jesús noikaspamisfo rāfiipainifo. Akka yorafo inimakōinifo nā kēro Jesús sharafaito ōikani.

Mostaza exeōnoa yoikī meka fetsafaxō Jesús ato tāpimani
(Mt. 13.31-32; Mr. 4.30-32)

¹⁸ Nāskata Jesús anā ato yoini iskafakī: “Afe keskaramakī Nios xanīfāfe noko ikinā ē mato yoinō. Nikakapo iskarakī:

¹⁹ Oa mostaza exe feronāfāke āfe tarepa fana keskarakī. Mā foaikax efapakōiax ifi tio itiro. Mā efepakōiano peyafāfe āfe pōyamā naa fatirofo. Nāskarifiakī mā taefakī fisti rasichi mā Epa Nios Ifofayotiro. Akka chipo ichapakōichi mā Epa Nios Ifofatiro,” ixō Jesús ato yoini.

Meka fetsafaxō pāa faraxika keskaraōnoa Jesús ato yoini
(Mt. 13.33)

²⁰ Afianā Jesús ato yoini: “Afe keskaramakī Nios xanīfāfe noko ikinā ē mato yoinō.

²¹ Nā kēromā pāa fakī levaduraya harina osixō kamosakano faraxitiro keskara. Nāskarifiakī nō ōitiro. Yorafāfe Niospa meka āto shinā mēra naneafono nō ōiamafiaino āto ōiti fetsafakanax Nios keskara shara iturofo,” ixō Jesús ato yoini.

Fepoti pishtaōnoa Jesús ato yoini
(Mt. 7.13-14, 21-23)

²² Jerusalén ano fāi kakī, Jesús pexe rasi anoafo ato yoini a pexe rasi pasotai ikafo anoafori ato yoifoni.

²³ Ato askafaito fistichi yōkani: “Ifo, ėfisti rasi Niospa ato ifimē?” faito Jesús kemani,

²⁴ “Pexe fepoti atsokē ikipaifikani tsoa ikitiro. Akka ē mato yoi yora ichapakōi ikipaifikani ikitirofo. Nāskarifiāi ēfe Epa ika ano ikipaifikani ikitirofoma. Nāskakē āfe meka tāpisharakāfe a mēra ikisharaxikakī. Akka yora ichapato ēfe Epa nikafikatsaxakakī, tsōa Ifofamax a ika ano ikipaifikani tsoa ikitiro. Mā

²⁵ Nāskakē pexe ifo fininākafe āfe pexe fepoti fepotiro. Nāskakē mā pexe emāiti nīxō mā kenakī iskafatiro: ‘Ifo, noko fepoti fepexōfe,’ mā faino mato kemakī iskafatiro: ‘Ēkai mato ōimisma mā kai efe yorama tiiri fakiranoax mā oa,’ ixō mato yoitiro.

²⁶ “Nāskakē mā yoikī taefakī iskafaxii: ‘Nō mefeta pita nō mefeta ayamis, askatari mī noko yoiaito nō nikamis,’ mā faxii.

²⁷ “Mā askafaino mato kemakī iskafaxii: ‘Mē mato yoi ē mato ōimisma fakiranoax mā oa. Emakinoax fotakāfe mā yora chakafo mato faxii.’

²⁸ Mato askafaino anoax mā oiajanā mā omiskōi fetsexii, Abrahamnō Isaacanō Jacobonō a Niospa meka yoimisfonō ato ōi Nios xanīfo ika ano ato ōi. Nāskakē ato makino a Niospa mato potaxii.

²⁹ Akka yorafo nā mai ano keyokōi ikanax fetsa fetsatapafo fexikani Nios xanīfo anoxō afe tsaoxō pixikakī.

³⁰ Nāskakē fetsafo iskaratīa Nios nikafikani afe rafeafoma, akka a chipo nikaifo Ifofakanax afo afe rafetirofo. Akka fetsafāfe nikakī taefafianixakakī Ifofakanamax a rama nikaifo keskarakanax afe ipaxatirofoma,” ixō Jesús ato yoini.

Jesús Jerusalén anoafo ato shināi oiaini
(Mt. 23.37-39)

³¹ Nāskata fariseofo Jesús ano fēkaxō yoinifo iskafakakī: “Nonoax katāfe Herodes mia retepai kiki,” faifono,

³² Jesús ato kemani: “Fokaxō ea Herodes yoixotakāfe aato ato pāramiski. Ē fena nonoax kaimakai. Iskaratīa na yorafo sharafayanā penamari ē ato makinoa niáfaka chakafo ē ato pōtaikai. A isinī ikaifori ē ato sharafapaikai. Mā ato askafakī keyota nā ē kapaiyai ari ē kaikai.

³³ Akka iskaratīa ē yonoyoi, pena fetsari ē yonoi, akka a Niospa meka ato yoisimis Jerusalén makinoax na sharama.

³⁴ “jOoa Jerusalén ano ikafāfe! Māfi a Niospa meka yoisimisfo mā ato retemiski. Askatari aōnoa āfe meka shara yoitanōfo Niospa mato ano nīchiafōri mā ato tokorinī tsakakī retemis. Oa takaranā āfe fakefo āfe pei nāmā onetiro keskakakī ē mato kexepaifaifo mā ea nikakas-pamis. Māfi ekeki omismakī ē mato ikipanā.

³⁵ Akka ōikapo, iskaratīa mato anā tsōa kexeima na mā imis ano. Ē mato yoi anā mā ea ōima. Akka nā ē anā oiaitia mā ea ōixii. Mā yoikī iskafaxii: ‘Nafi Niospa nokoki nīchia fāsi sharafinakōia Epa Niospa na shara fapanaka,’ ixō mā eōnoa yoixii,” ixō Jesús ato yoini.

14

Jesús a isinī imis sharafani pōya rafe faraxita kishi rafēri faraxikē

¹ Nāskakē pena tenetitīa Jesús kani nā fariseo xanīfāfe āfe pexe anoxō pikai. Akka nānoxō fariseo fetsafāfe ōinifo Jesús afaa afeska faimākai nō ōinō ikaxō.

² Nāskano nānori āfe ferotaifi feronāfake fisti isinī imis ini pōya rafeki faraxika ita kishi rafeki faraxika ini.

³ Nāskakē Jesús ato yōkani, a Moisés yoikī kirika keneni keskara ato tāpimamisfoya fariseofo: “¿Na pena tenetitīa a isinī ikaifo nō ato sharafatiromē, askayamakī nō ato sharafatiromaraka?” ixō ato yōkaito,

⁴ akka tsōa tooxanima. Nāskakē Jesús a isinī ikai mētsoinīfōfā sharafani. Nāskaxō yoini: “Mā mī sharaki, katāfe,” fani.

⁵ Nāskaxō fariseofo Jesús ato yoini iskafaki: “Akka, ¿fatora mā fētsa, māto fake iyamāi māto yoinā ina kini mēra pakeano mā koshi ifirisa fatiromamē pena tenetitīa?” ato faino,

⁶ tsōa kemanima.

Feronāfake āfiyaino fista ayanā pitirofoōnoa Jesús ato yoini

⁷ Nāskata Jesús ōini mā fēkaxō tsaoti sharakōi fikanax mīsa ano tsaofaifāfe. Nāskafāfe ōiki Jesús meka fetsafaxō ato yoini iskafaki:

⁸ “Akka fētsa fista ayanā kēro fīkī mato kenano, tsaoti sharakōi ano tsaoyamakāfe. Akka mato keskarama nā feronāfake sharafinakōia pexe ifāfe kenano oax nā tsaoti sharakōi ano tsaotiroki.

⁹ Akka pexe ifāfe fetsa fe oxō mia yoikī iskafatiro: ‘Na feronāfake tsaoti ināfe,’ mia faino mī rāfikōiyānā kaax chikayakōi mī tsaotiro.

¹⁰ Akka askatamaroko mia fētsa kenamana kaax ori chikayakōi mī tsaoyotiro. Akka nā mia kenamanato mā oxō mia yoinō iskafakī: ‘Efe yorashta, na tsaoti sharakōi ano tsaoyofe,’ mia faino, nāskakē mī inimasharakōitiro yorafāfe ferotaifi a mefe mīsa ano tsaofafāfe mia ōiaifono.

¹¹ Akka fatora fētsa ato finōpaiyaito a keskara Niospa ato nāmā nīchitiro anā afaa inōma. Akka a shināi iskai: ‘Ēkai afama, ē fetsafo finōpaima, ē ato keskarama,’ ixō shināito Niospa fetsafo finōmainīfōfā sharakōi nīchitiro,” ixō Jesús ato yoini.

¹² Ato askafata a ato pimairi Jesús yoini iskafakī: “Mī ato pimakī mī yamafoos ato pikīyamafe, mī extofoosri ato pikīyamafe, mī kaifooosri ato pikīyamafe, a mia chaima nikafori kori ichapayafōri ato pikīyamafe. Akka afāferi kopikiri mia pikītirofo, nāskakē mā pimanāsharakōitiro.

¹³ Askatamaroko mī fista ayanā a yora afaamaisfoya a nipaikī ranāifo chātofoya a fēxofori ato pikīfe.

¹⁴ Nāskakē mī ato askafaax mī inimakōitiro. Akka afāfe mia kopifatirofoma, akka mī ato askafaito Niospa mia inimamasharaxii naax mī anā otokē,” ixō Jesús yoini.

Meka fetsafaxō Jesús ato yoini feronāfāke mā a piāi mā itipinīsharakōi faxō ato pimapaiyaiōnoa yoikī

(Mt. 22.1-10)

¹⁵ Ato askafaito nikakī fētsa a mīsa ano tsaoto Jesús yoini iskafakī: “Ifo, inimasharayanā Epa Nios xanīfāfe keyokōi yorafo īkināi anoax ato fe ikanax fāsi inimasharakōitirofo,” ixō yoiāito,

¹⁶ Jesús yoini iskafakī: “Feronāfāke fistichi a piāi sharakōi faxō yora ichapa kenamani afeta pii fenōfo.

¹⁷ A piāi mā itipinīshara faxō a yonoxomis nīchini ato yoitanō iskafakī: ‘Kookāfe pixikakī. Mā ēfe xanīfāfe itipinīshara fakī,’ ixō ato yoitanō.

¹⁸ “Ato askafaino, akka keyokōichi yoinifo iskafakakī: ‘Nō kayotiroma,’ ixō yoinifo. Akka a yoikī taefato yoini iskafakī: ‘Ē rama mai fiaki ē ōiyotanō. Ē mia yoikai ē mefe kayotiromakī,’ ixō yoini.

¹⁹ Fētsari yoikī iskafani: ‘Ē rama diez faxō fakka fiaki yonomaxii ē ōiyonō sharamakī. Nāskakē ē mefe kayoi kaimakai,’ ixō yoini.

²⁰ Fētsari yoikī iskafani: ‘Ē rama kēro fia. Ē mefe katiroma,’ ixō yoini.

²¹ “Nāskakē a yonoxomisto oxō nā yoiāfo keskafakī āfe ifo yoini, a yonoxomisto yoiāito nikai ōitifishkikōini. Nāskakē afianā a yonoxomis yoikī iskafani: ‘Nā mī kapaiyai ari kaxō pexe rasi pasotaino ato ifitāfe a afaamaisfoya, a nipaikī ranāifo ifita fēxofori ifita chatofori ifita ato fatāfe,’ ixō nīchini.

²² “Mā āfe ifāfe nīchia katani. Okī yoitoshini, iskafakī yoini: ‘Ifo, nā mīa yoiā keskafakī mē ato yoitani. Akka mā fekani, mā fefiakanax mī pexe fospikanima,’ faito,

²³ afianā āfe ifāfe yoini iskafakī: ‘Na fāi kaxō ato yoirisafafe a chaima ikafoya, nāskaxō ato yoikī iskafafe: “Ēfe ifāfe pexe mēra ikikāfe afeta pixikakī,” ato fafe ēfe pexe fospikōinōfo.

²⁴ Akka ē mato yoi nā yorafo taefakī ē ato pimapaiyōa ēfe pexe anoxō efeta pinōfo akka afāfe anā efeta pinakafoma,’ ixō pexe ifāfe yoitiro,” ixō Jesús ato yoini.

Jesús Ifofai omiskōifikani isharakōitirofo

(Mt. 10.37-38)

²⁵ Yora ichapafāfe Jesús chīfaifono atokiri fesoakekafā ato yoini:

²⁶ “Fētsa ea Ifofapai kī ea noikī finakōitiro. Āfe apanō āfe afanō āfe āfinō āfe fakefonō āfe extonō āfe chikonō ato noifkī earoko nolki finakōiama, askatari āa anoi noimei ea noisharakōitama nāskakē a keskara eōxō tāpimis itiroma.

²⁷ Akka ē cruznoax mato nāxoxii. Nāskakē ea tsōa yoikī iskafaima: ‘Iskaratīa ē Jesús Ifofai. Nāskakē ē nai omiskōifikī ē shināchakaima,’ ixō tsōa anori yoiāxma, nāskakē ēfe ina itirofoma.

²⁸ “Akka fatora fētsa mā pexe fapai kī īkisi mā shināyotiromamē afe tii xepa peimāki ōixiki aō pexe fakī mitoxiki.

²⁹ Akka mā pexe fapai kī mā xepa pei ichapama fixō mā mitotiroma. Nāskakē nā ōiaifāfe mato kaxemetsama fatirofo.

³⁰ “Mato iskafakī yoianā: ‘Kee, ōikapo, na feronāfāke pexe fafiakī akka pexe fakī mitoama.’

³¹ Nāskarifiakī xanīfo fētsa afe xanīfo fetsa fe retenāpaikī shinātiro a diez mīl soraroyato a veinte mīl soraroya retetiromakī.

³² Nāskakē afe retenātiroma meekī, xanīfo fetsa oyoamano meka fomatiro iskafakī yoikī: ‘Nō retenāimakai, nō raenānō,’ ixō yoitiro.

³³ Nāskarifiāi fatora mā fetsa māto afarāfo mā potayamax ēfe ina mā itiroma,” ixō Jesús ato yoini.

Akka tashi sharakēma nō ptiroma

(Mt. 5.13; Mr. 9.50)

³⁴ Anā Jesús ato yoini iskafakī: “Akka shinākāpo. Tashi sharakē nō tsopeitiro. Akka tashi sharayamakē nō tsopeitiroma, paispa chakakē.

³⁵ Askarakai tsōa fichipaima. Potatirofo. Nāskariakakī ea Ifofayamakakī ea tsōa Ifofasharakanima chakakōi ea fakani. Akka mā pachoyakī ea nikasharakāfe,” ixō Jesús ato yoini.

15

Oveja fenoaōnoa Jesús meka fetsafaxō ato yoini

(Mt. 18.10-14)

¹ Nāskakē nā xanīfo Roma kori fixomisfo fe yora chakafo Jesúski fenifo āfe meka nikai fekani.

² Nāskaifono fariseofo feta a Moisés yoikī kirika keneni keskara ato tāpimamisfāfe Jesús mekafakakī iskafakī yoinifo: “Ōikapo nato yora chakafo ifimis, askatari ato feta pimis,” ixō yoinifo.

³ Askafaifono Jesús ato yoini meka fetsafaxō mā tāpixō iskafakī:

⁴ “Fatora mā fetsa cien oveja inayano fisti ato makinoax fenoano, nā noventa y nueve mā anā fasifo mēra nīchitiro. Nāskaxō nā oveja fenoa fisti mā fenatiro shināmītsakōīyanā. Nā mā fichiaitīa fetsafo kāmīxiki.

⁵ Mā fichiax āfe oveja fenoaki akiki inimakī tepapiinīfōfā tepokomexō iyotiro.

⁶ Nāskax mā āfe pexe ano nokoxō āfe yamafoya a chaima nikafo yoitiro iskafakī: ‘A ēfe oveja fenoa. Mē fichiakī efe inimakāfe,’ ixō ato yoitiro.

⁷ Nāskakē ē mato yoi, nāskarīfīai inimakōīkani nā nai mēra ikafo fētsa āfe chaka xatekōīano Jesús Ifofakī. Akka nā noventa y nueve yorafokiri nai mēranoax atokiri inimakani, afomāi isharakōīpaonifono nono mai ano ikanax. Akka nā feronāfake chakafīnakōī iyopaonixakī āfe chaka xatekōīano akiki imaimīfīnakōīkani nai mēranoax,” ixō Jesús ato yoini.

Meka fetsafaxō Jesús ato yoini kēromā āfe kori exe fenoa fīaxō

⁸ Anā Jesús ato yoini iskafakī: “Nāskarīfīai kēro kori exe diezyaano fisti pakeano āfe pexe mēra rāpari otaxō fenakī ōisharata mātsokī fichitiro.

⁹ Nāskata mā fichixō, āfe yamafoya a chaima ikafoya ato ichanāfatiro. Nāskaxō ato yoikī iskafatiro: ‘¡Aicho! A ēfe kori exe fenoa mē fichiakī efe inimakāfe,’ ixō ato yoitiro.

¹⁰ Nāskarīfīakī ē mato yoi. Nāskarīfīakani Epa Niospa āfe ājirifo inimakani fētsa āfe chaka xateax a anā ipaoni keskara iyamaito ōikani,” ixō Jesús ato yoini.

Meka fetsafaxō Jesús ato yoini apa āfe fake raefatiroōnoa yoikī

¹¹ Jesús afianā ato yoini iskafakī: “Feronāfake fisti fake rafeya ini.

¹² Akka nā chipokoto apa yoikī iskafani: ‘Epa, mā mī chaima nakī a mīa ināxiai īkisi ea ināfe,’ fani. Nāskakē āpa āfe afama mīshiti ato paxkaketsaxoni.

¹³ “Nāskano pena fetsa āfe fake chipokoto āfe afama mīshiti ato ināketsani kori fixiki. Mā kori fīax chaikōī kani mai fetsa ari. Nārixō āfe kori potakī mitoni mēxotaima pāekī kēro chota feromafo fe ikī.

¹⁴ Akka mā āfe kori potakī keyoano, nā mai anoaxri fonāikōīnifo. Nāskakē nā mai anoax nā feronāfakēri chipo omiskōīni afaamaisax.

¹⁵ Nāskakē kaxō nā mai anoax feronāfake fetsa yono yōkani yonoxopai, iskafakī yoini: ‘Ē mia yonoxopai,’ ixō yōkaito āfe tarepa nīchini āfe kochifo pimaxonō.

¹⁶ Nāskata fonāikōīfīkī a kochīfāfe piāi maropei xaka pisharapaikōīni tsōakairoko afaa pimaino.

¹⁷ “Nāskakī iskafakī shināni: ‘Ēfe epa yonoxomisfāfe ēfe ēpa pexe anoxō pikī fī-nasharakōīyanā texefamisfo. Akka ē nonoax fonāiki finakōī mē nairokomē,’ ixō shināta,

¹⁸ ‘Mia iskaratīa afianā ēfe ēpa pexe ari kapa. Mē kaxō iskafakī ēfe epa yoi kaikai,’ “Epa, ē Nios chakafata miari ē chakafamis.

¹⁹ Nāskakē iskaratīa ēfe fakera mīa ea fatiroma. Mia yonoxomisfo keskara mī ea fatiro,” ‘ ixō shināta,

²⁰ āfe āpa pexe ari fāi kani. Nāskakē chai inoax oaito āfe āpa fichini shināmāi fakī. Nāskax akiki koshī farekekāi akiki nokota chishtoinīfōfā kokoketsani.

²¹ “Nāskafaito āfe fāke āfe apa yoikī iskafani: ‘Epa, ē Nios chakafata miari ē chakafamis. Nāskakē ēfe fakera mīa fatiroma,’ ixō apa yoini.

²² “Apa askafaino akka āfe āpa a yonoxomis yoini ato iskafakī: ‘Koshikōī rapati fe-nasharakōī fīxokāfe ēfe fake ea safemaxokāfe, askatari anīcho sharari safemakāfe, askatari sandalia sharari safemakāfe,’ ato fata,

²³ ‘Fākka fake xoakōīari ifitakāfe retexikakī nō pinō fista ayanā.

²⁴ Akka na ēfe fake mā nani keskara ikatsaxakī mā anā ekeki nokoaki. Mā fenofinino mā nō anā fichiakī,’ ixō akiki inimakī fista axoni.

²⁵ “Akka āfe fake iyoato āfe tare ano yonofai okī nikaferani pexe chaima nokoīyokī mōsika maneyanā mairāifono.

²⁶ Nāskakē a yonoxomis fetsa kenaxō yōkani āfe āpa pexe anoxō afaa afeskafakanimākai.

²⁷ Askafaito a yonoxomisto yoini: ‘Mā mī exto nokoā. Nāskakē āpa fakka fake xoa sharakōīa ato retemana afeskaxma mī exto sharakōī nokoano,’ ixō yoini.

²⁸ “Akka āfe ochi iyoa akiki ōitīfīshkiki finakōīni. Nāskakē pexe mēra ikinima. Nāskaino āfe apa āfe pexe mēranoax kāināfani āfe fake yoiyoi mā āfe fake chipoko nokoano, ‘Mā mī exto nokoaki. Nōko pexe mēra ikikofe,’ fani.

²⁹ Āpa askafaino apa kemani iskafakī: 'Shināpo epa, ē mia yonoxomis keskaraxō, ¿afe tii xinia ē mia yonoxomismē? Ea mīa yoiaitokai ē mia nikakaspamisma, akka eakai cabranā fakeshta mīa ināmisma retexō piyanā ēfe yamafo feta ē fista apanā.

³⁰ Akka mī fake mā nokoa nā mī kori ināni kēro chotaferomafoki potakī keyotani. Nāskafikē mī fākka fake xoashara retexona,' faito,

³¹ Āpa kemani: 'Anifoshta, mīkai ea potamisma, mī efe itiani. Akka na ēfenāfo mūnā, keyokōi iki kiki.

³² Akka iskaratīa nō fista aki mī extoki inimayanā. Akka mī exto naa keskara ikatsaxakī, mā anā ekeki nokoa afeskaxma, mā afetiama fenofinino anā oaito nō fichia,' ixō āpa āfe fake iyoa yoini," ixō Jesús ato yoini.

16

Meka fetsafaxō Jesús ato yoini, xanīfokōichi afe xanīfo yōaniōnoa yoikī

¹ Jesús afianā aōxō tāpimisfo yoikī iskafani: "Feronāfake fetsa afama mīshti ichapayato feronāfake fetsa afe xanīfo inō yoini. Nāskaxō nikani āfe afama mīshti āfe inapa kexesharaxokēma.

² Nāskakē āfe xanīfāfe kenaxō yoikī iskafani: '¿Afamē a mīōnoa ea mīa yoiāi? Akka a mī yonofaiōnoa ea yoife. Akka iskaratīa mī anā efe xanīfo ikima,' ixō yoini.

³ "Askafaito nikakī āfe inapa shinākōini: '¿Ē afeskaimē? Iskaratīa ēfe xanīfāfe ea anā yonomanima, mā ea potai. Ēkai afeskaxō anā yonotiroma kerexkai ē tarepanā. Nāskatari ē anā afaa yōkapaima ē rāfitiro.

⁴ ¿Choo! Mē shināi. Nā ēfe ifo nimiyāfo ē ato xekaxopakefofāni anā ichapa niminōfoma. Ē ato askafaino āto pexe anoxō ea ifinōfo ēfe ifāfe ea potano,' ixō shināni.

⁵ "Nāskaxō fisti rasi ato kenapakeni afe tii āfe ifo nimiafomāki ato yoixiki. Nā akiki kai taea yōkakī taefani: '¿Afe tii mī ēfe xanīfo nimiamē?' ixō yōikaito,

⁶ kemani iskafakī: 'Ē nimia xini ene cien galon,' faito, a xanīfo fētsa yoini iskafakī: 'Nā mī nimia potaxō nono tsaoxō fetsa arisafafe cincuenta faxō kenefe,' fani.

⁷ "Nāskaxō fetsari yōkani: 'Akka mīri, ¿afe tii nimiamē?' faito, atori yoini iskafakī: 'Cien saco de trigo ē nimia,' faito, ari yoini iskafakī: 'A mī nimia potaxō fetsa arisafafe ochenta faxō kenefe,' fani.

⁸ "Nāskakē a āfe ina chakapa āa shināxō akai keskara āfe xanīfāfe tāpikōini. Nāskakē yoini iskafakī: 'Mī tāpikōia, nāskakē fetsafāfe mia sharara fakani,' ixō yoini. Nāskarifiakī a Nios Ifofaafāfema tāpikī finakōiafo ato pārakīki, āa shināxaxō. Akka a Nios Ifofaafō askarafoma, ato pāratirofoma. Chanīma fisti yoitirofo.

⁹ "Ē mato yoinō, mā afama mīshti ichapayaxō a afaamaisfo ato inākāfe, mā ato askafakē mato yoisharanōfo. Nāskakē mā mā naxō mā anā kori yopatiroma mā Nios ari nokoaito nā mā kori ināmisfāfe mato yoikī iskafatirofo: 'Aicho, mī noko shara famis. Iskaratīa nono Nios ano mī nofe ipanaka,' ixō mato yoitirofo.

¹⁰ "Akka nā isharakōixō afara ichapama kexesharakōimis nō tāpitiro afara ichapa kexesharakōitirokē. Akka nā isharaxoma afara ichapama kexesharamisma nāri nō tāpitiro afara ichapa kexesharakōitirokēma.

¹¹ Akka nono mai anoxō āto afarafo kexesharayamaifono, Niospa ato afara sharakōifo ināpaifiki anā ato afaa inātiroma.

¹² Nāskarifiakī Niospa mato afara shara ināpaifiki mato inātiroma.

¹³ "Nāskarifiakī tsōa āfe ifo rafe yonoxosharatiroma. Akka fetsa noikaspata fetsa noisharatiro, nā yoiāi keskarakōi axotiro, akka a fētsa amapaiyai keskara axotiroma noikaspatiro. Nāskarifiakī mā kori fisti shinākī mā Nios shinātiroma. Nāskatari Epa Nios fisti shinākī mā kori noitiroma," ixō Jesús ato yoini.

¹⁴ Akka nā fariseofāfe kori noikōimimisfono Jesús atoōnoa yoiāito nikakani akiki kaxemet-samanifo.

¹⁵ Askafaifono Jesús ato yoini: "Māfi nō sharafora imiski yorafāfe ferotaifi, akka mā askafaiato Epa Niospa mato tāpikōia. Akka yorāfo mā pāratiro nafo sharafoki mā ato fatiro, mā ato askafaino Niospa mā mato tāpīxō mato iskafai: 'Nafō chakakōifo,' ixō mato yoi," Jesús ato fani.

A Moisés yoini keskara sharaftano Nios xanīfāferoko ato finōkōimifofana

¹⁶ Anā Jesús ato yoini iskafakī: "Moisés Niosxō yoini keskafakī, a Niospa meka yoimisfāferi yoinīfo keskara Juan mato yoini. Nāskakē meka shara Nios xanīfōōnoa Juan ato yoini iskafakī: 'Māto chaka xatekāfe anā a mā ipaoni keskara iyamakāfe Nios xanīfo ari ikixakakī.'

17 “Akka chanīma, maife nai koshikōi keyotiro. Akka a Moisés yoini keskakōi, Niospa meka shara keyonakama,” ixō Jesús atō yoini.

Feronāfake āfe āfi fe enēnātirofoōnoa Jesús atō yoini
(Mt. 19.1-12; Mr. 10.1-12)

18 Anā Jesús atō yoini iskafakī: “Akka fētsa āfe āfi enexō, fetsa fia sharama. Chakafai. Askara sharama. Askatari mā fenē enea feronāfake fētsa fiari sharama. Nāatori chakafai āfe āfimakōi fe ikī,” ixō Jesús atō yoini.

Feronāfake fetsa afama mīshti ichapaya ikaino akka Lázaro afaamais ini

19 Nāskata afianā Jesús atō yoini iskafakī: “Feronāfake fetsa afama mīshti ichapaya ini, rapati sharakōi safea. Nāskaxō pena tii fista apaoni pisharakōiyanā inimakōikī.

20-21 Nānori feronāfake afaamais ini āfe ane Lázaro, yorafoki koyoi fetseax tsaoni a yora afama mīshti ichapayato āfe pexe fepoti ketokonō. Nā feronāfake afaamaisyato shināni iskafakī: ‘Na feronāfake afama mīshti ichapayato a piāi ea ināpainōra,’ ixō shināni. Nāskaino paxtafo akiki kaxō āfe koyoyo tāxoketsani.

22 “Nāskax Lázaro nani. Mā nakē ājirifāfe āfe fero mēsho iyonifo Abraham fe ikikanō Nios xanīfo ano. Nāskatari a yora afama mīshti ichapayari nani. Nāri nakē maifanifo.

23 Nāskakē a yora afama mīshti ichapaya omiskōikōini chiifā mēranoax a yorafo naax fomisfo anoax. Nānoxō foisnīfofā chai inoa Abraham yafi Lázaro fichini.

24 Nāskakē fāsikōi Abraham kenani iskafakī: ‘jEpa Abraham, ea shināfe! Ea Lázaro nīchixōfe āfe mifi rechoko fāka mechanafaxō ea ana mechana faxoyonō. Nonoax ē omiskōi finakōikai na chiifā mēranoax,’ ixō yoiāito,

25 akka Abraham kemakī iskafani: ‘Ēfe fāke, ħmī shināimamē nayoamax mī isharakōiyopaoni inimakōiyanā? Akka Lázaro isharakōipaonima. Omiskōipaoni. Nāskakē iskaratīa nonoax isharakōia inimasharakōiyanā, akka mī omiskōikōi.

26 Nāskakē afeskax mia ari tsoa katiroma, mīrikai afeskax noko ano otiroma. Na mafa kinifā mesekōi afeskaxō nō finōtiroma. Māri afeskaxō arixori finōtiroma,’ ixō yoiāito,

27 nā afama mīshti ichapayato anā yoini iskafakī: ‘Ē mia yoi epa Abraham mī Lázaro nīchinō ēfe ēpa pexe ano

28 a ēfe exto cinco ikafo ano, anoxō Niospa meka atō yoinō nikakōinōfo akairi nono feyamanōfo nonoax omiskōi fetirofoki,’ ixō yoini.

29 “Askafaito Abraham yoini iskafakī: ‘Afāfe fi mā kirika kene ōiafoki a Moisés feta a Niospa meka yoisifāfe kenenifo. Nā ōikaxō tāpisharakōinōfo,’ ixō yoiāito,

30 a afama mīshti ichapayato anā kemani iskafakī: ‘Mē tāpia, Epa Abraham, akka a yora naax otoato atoki oxō atō yoiāito nikakōitirofo,’ ixō yoiāito,

31 anā Abraham yoini iskafakī: ‘Akka a Moisés feta Niospa meka yoisifāfe yoinifo keskara nikakaspakakī. Nāskarifiakī tsōa nikatiroma a yora otoato atō yoiāito,’ ixō Abraham yoinino,” Jesús atō fani.

17

Noko fētsa afara chakafamaino āfenā mesekōi itiro
(Mt. 18.6-7, 21-22; Mr. 9.42)

1 Jesús aōxō tāpimisfo yoini iskafakī: “Mēxotaima a ea Ifofaafāfema yorafo afara chakafamapaimisfo. Akka fētsa fetsafo afara chakafamax omiskōifinakōixii.

2 Akka atō askafamayoamano, tokiriya tenexti faxō fakafā nōafā mēra potatirofo a ea rama Ifofaifo atō afaa chakafamayamanō. Nāskara shara,” atō fani.

3 “Kexemesharakāfe. Fētsa mia chakafaito yoisharafe anā mia chakafanōma. Mī yoiāito nikakī iskafakī shinānō: ‘Chanīmarokomē ea yoisharakōi ē anā askanōma,’ ixō shināito raefaxō yoisharafe.

4 Akka anā mia chakafakī mekafaxō, ea raefafe ixō mēxotaima mia yoiri faito akiki ōitifishkikīma mī yoisharaxō mī raefatiro,” ixō Jesús yoini.

Nō chanīmara faito Niospa noko afama mīshti faxotiro

5 Nāskata a aōnoa yoisifāfe Jesús yoinifo iskafakakī: “Ifo, nō mia chanīmara fai finōmainīfofā noko yoisharafe nō mia chanīmara fakōinō,” ixō yoiāifono,

6 Jesús atō kemani: “Akka mā ea nikakōixō na ifi efapa mā yoikī iskafakerana: ‘Mī tapofoya tsekekainax fakafā mēra pakeax anā foaife,’ mā faino anā foaitiro.”

Āfe xanīfāfe yoiāi keskafakī a yonoxomisto axosharakōitiro

7 Nāskaxō anā atō Jesús yoini iskafakī: “Na meka fetsari ē mato yoinō nikakakī. Fatora fetsa mā inayaxō mātō inapa mātō tare ano yonoxotani oaino askayamakī fakkafo kexetani oaino akka, ħmā iskafakī yoitromē: ‘Pexe mēra ikikerafe tsaxō pixakī,’ mā fatiromē?

⁸ Maa, mā askafatiroma. Askafatamaroko mā yoitiro iskafakī: 'Ea pīchaxōfe ē pinō, mā nafakē ea yoixii ē pikī taefanō, mī chipo axiki,' ixō mato ina mā yoitiro.

⁹ Nāskatari āfe inapa nā āfe xanīfāfe yoia keskafakī mā axosharakōiano iskafakī yoima: 'Aicho, ea mā axosharakōia,' ixō yoima.

¹⁰ Nāskarifiakī māri a Niospa mato yoia keskarakōi fakī iskafakī yoikāfe: 'Nōkai afama, nōa shināxō nō afaa akīma. Nōko Ifāfe noko yoia keskafakī nō aki,' ixō yoikāfe," Jesús ato fani.

Jesús diez feronāfaka sharafani rashkishi fetseaito

¹¹ Jerusalén ano fāi kakī Jesús Samāria yafi Galilea xatsokama rafe finōfaini.

¹² Nāskax Jesús pexe rasi pasotai nokoni. Nāno mā nokoano chai ixō diez feronāfake nā rashkishi fetseiaifāfe oikakī kenanifo fāsikōi.

¹³ Akka iskafakī fāsikōi yoinifo: "Jesús, Maestro, noko shināfe," faifono,

¹⁴ Jesús ato oikī ato yoini iskafakī: "A ato Nios kīfixomiso ano fotakāfe, a mā shara ato ispagiki," ato faino, mā fokani koshikōi a isinī ikaifo sharai fetseifono.

¹⁵ Akka fistichi āfe yora sharakōi meekī anā akiki oxō fāsikōi yoikī iskafani: "¡Aicho, fāsi Nios sharakōi! Mā ea sharakōi faki," ixō yoini.

¹⁶ Nāskafata Jesús ferotaiifi ratokonō mai chachipakefōfā maikiri fepopakekafā. "¡Aicho Jesús, mī ea sharafaa! ¡Mī fāsi sharakōi!" ixō yoini. Akka nā feronāfake Samāria anoa ini.

¹⁷ Askafaito Jesús yoini: "¿Akka diez feronāfake ikafomamē a ē ato sharafa isinī ikaifono? ¿Akka fakimē ranāri a nueve feronāfake?"

¹⁸ ¿Akka na feronāfake fisti efe yora yamafixō ekeki oxō Nios aicho faiyoamē?" ixō Jesús yoini.

¹⁹ Nāskaxō nā feronāfake yoini iskafakī: "Fininīkafāfe kātaxiki. Mī ea chanīmara fakōinax mā mī sharaki," ixō Jesús yoini.

Nios xanīfāfe keyokōi yorafo ikināino afe keskara iximē

²⁰ Nāskano fariseofāfe Jesús yōkanifo iskafakakī: "¿Afetia nono mai anoax yorafāfe ato xanīfo iximē Nios?" ixō yōkaifono, Jesús ato kemani: "Nios xanīfāfe ato ikināino nō oitiroma.

²¹ Tsōakai yoima iskafakī: 'Nakīa, oikapo,' askatari, 'Oa onokīa, oikapo,' mato faima. Akka Nios xanīfo mato mēra ixō mā mato shināmani nō oiyamafiano," ixō ato yoini.

²² Nāskaxō āfe ināfo yoini iskafakī: "É samama mato makinoax kai. Mē mato makinoax kaano anā mā ea oīma. Ea oīpaifiki mā ea shinākōixii iskayanā, 'Nōko Ifo nofe imis keskara nō oīpakōi,' ixō mā ea yoifiki a keskara mā anā oīma.

²³ Akka mato fetsafāfe pārakī iskafakani: 'Nakīa Cristo,' mato fata, 'Oa onokīa,' mato faifāfe, akka ato nikayamakāfe āa mato pārakani kiki.

²⁴ Akka ē nai mēranoax oi oa kana peiki fafetanaito nō oitiro keskara, nāskarifiāi ē oaito mā ea oixii ē chaxaferanaito.

²⁵ Akka ē taei omiskōifinayoxii yorafāfe ea oikaspafono nā ea oikaspafotā.

²⁶ Akka nā Noé niyoano ini keskai nāskarifiāxii ē anā oaino.

²⁷ Akka yorafo pikāta ayakāta fianākāta ikaifono, mā Noé kanōanāfā mēra ikiano faka faipafāino, keyoi āsai mitokomenifo. Nāskarifiāxii ē oaino ea shinātama afara chaka shināifono.

²⁸ "Nāskarifiāni nā feronāfake Lot niyoano, yorafo pikāta, ayakāta, afarafo fikāta, afarafo ato minikāta āto tarepa afarafo fanakāta pexe fakāta ikaifono,

²⁹ akka Lot mā Sodoma anoax tsekeano, oa oi ikai keskara nai mēranoax atoki chiifā pakeaino keyokōi koofi mitokomenifo.

³⁰ "Nāskarifiāxii ē oaino, ea shinākātama nā ipaiyai keskara shināifono.

³¹ Nāskarifiakī ē oaino fetsa āfe pexe fomākīa tsaoxō anā āfe afara fipai āfe pexe mēra ikitiroma āfe afara fixiki. Askatamaroko ichotiro. Nāskarifiāi a āfe tarepa yonofai anā āfe pexe ano katiroma āfe afara fixiki.

³² Akka nā Lot āfe āfiōnoa shinākāfe. Nā kēromā āfe afarafo shināi ifiakēkafā oīpai narisatani keskai māri askatiroki. Askayamakāfe.

³³ Akka fētsa shinākī iskafai: 'É Jesús Ifofaito ea omiskōimakaniraiti,' ixō shinākī ēfe meka kachikiri fai. Nā keskara yora naax omiskōipakenaka. Akka aa eōnoax omiskōiai naax efe isharakōipakenaka.

³⁴ "Akka ē mato yoi, yora rafe nā fakishi mishkitiro fistichi oxakanax ē oaino fetsa efe kaino fetsa nētetiro.

³⁵ Nāskarifiāi kēro rafeta xiki renekani. Fetsa ea ari kai yamarisatanaino akka fetsa nētetiro nā omiskōipakenakafo mēra kaxiki.

³⁶ Nāskatari feronāfake rafeta āto tare ano yonokani, fetsa ea ari kai yamarisatanaino, fetsa nētetiro nā omiskōipakenakafo mēra kaxiki," ixō ato yoiaino,

³⁷ yōkanifo iskafakakī: “Ifo, ¿faki fokanimē?” ixō yōkaifono ato kemani iskafakī: “Mā tāpitiro a afara naa ano ishpifo fotofaifāfe. Nāskarifaxii ē fotofaino a ea lfofamisfo ekeki ferisaxakani,” ixō Jesús ato yoini.

18

Meka fetsafaxō kēro ifomafaōnoa yafi xanīfo Jesús ato yoini

¹ Jesús anā ato yoini meka fetsafaxō ato tāpimaxiki, Epa Nios mēxotaima kīfikani xo-kenāyamanōfo.

² Ato yoikī iskafani: “Nā pexefā rasi anoxō xanīfāfe Nios shinātama yorafari noimisma.

³ Nā pexefā rasi anori kēro ifomafa ika ini. Nāskakē nā kēro ifomafa mēxotaima a xanīfoki kapaoni yoikī iskafaikai: ‘A ea noikaspamisto ea chakafai kiki ea yoixōfe ea anā chakafayamanō,’ ixō yoifaifo,

⁴ nā xanīfāfe nikakaspayanā tooxanima. Nā kēro ifomafa fekaxtefafiaino akka nāskaxō xanīfāfe shināni iskakī: ‘Ē Nios shināima, yorafari ē noima.

⁵ Akka na kēro ifomāfa ea fekaxtefai kiki, ē yoisharaxonō anā a chakafaito fekaxtefayamanō, mē yoixonano anā ea fekaxtefaima kiki,’ ixō xanīfāfe yoini.”

⁶ Iskafakī Jesús ato yoini: “A xanīfo chakapa yoini keskara nikasharakāfe. Chakafixō nā kēro ifomafa fekaxtefai axosharani.

⁷ Akka Nioskai nā xanīfo chaka keskarama. Akka, ¿Niospari āfe yorafō ato afara axosharatiromamē? Noko nikaikai fekaxtetiroma penachāi yafi fakishchāi kīfiaifono ato nikakaspatiroma. ¿Askayamakī, ‘Ea manayokāfe,’ ixō ato yoitiromē?

⁸ Maa. Akka ē mato yoi mā manamiskē koshi mato afara shara faxoxii. Akka a mato chakafamisfo ē ato omiskōimaxii. Akka, ¿ēfe Epa ariax anā ē nāmā fotoaitīa ea chanīmara faifāfe ē ōitoshiximē?” ixō Jesús ato yoini.

Meka fetsafaxō fariseofoya a ato kori fīamisfo Jesús ato yoini

⁹ Jesús meka fetsafaxō ato yoini ato tāpimaxiki. “Ēfi sharakī, ēkai afaa chakafamisma yora fetsafokai ea keskarama,” ixō shināmisofoōnoa Jesús ato yoini iskafakī:

¹⁰ “Feronāfake rafe fonifo Nios kīfiti pexefā mēra anoxō Nios kīfi fokani. Fetsa fariseo ini. Fetsari āfe xanīfo kori fīxomis ini.

¹¹ Nā fariseo arese nīxō kīfikī iskafani: ‘Epa Niosi, ē fetsafo keskarama. Akka fetsafo yometsomisfo, chakakōifo, askatari ato āfima chotamisfo. Akka ēkai nā āfe xanīfo kori fīxomis keskarama. Nāskakē ē mia aicho fai.

¹² Na semānā tiifi ē foni tenekī rafefa fafāfāini mia shinākī. Akka nā ē fiairi ē mia paxkaxō fafāini,’ ixō fariseo Epa Nios kīfīni.

¹³ Akka a āfe xanīfo kori fīxomis ori chai nini. Nāri chai nīxokai nai foispainima. Askatamaroko shināmitsayanā Epa Nios yoini iskafakī: ‘¡Ooal Epa Niospa, ē mia chakafamiski. Eō noikī ea sharafafe ē chakakī,’ fani.

¹⁴ Ē mato yoi nā āfe xanīfo kori fīxomis āfe pexe ano oni mā Niospa āfe chaka soaxonano. Akka nā fariseo āfe chaka soaxonima. Nāskarifaxi fetsa āa anoi yoimesharai: ‘Ē sharara,’ imiskē chipo Niospa afaa imatiroma. Akka fētsa shinākī iskafai: ‘Ēfi afarafo chakafamiski,’ ixō shināito nā keskara yora Niospa chaka soaxotiro afe ipaxano,” ixō Jesús ato yoini.

Jesús fakefo chishtoxō ato māmāyanā ato Epa Nios kīfixopakeni

(Mt. 19.13-15; Mr. 10.13-16)

¹⁵⁻¹⁶ Nāskatari yorafāfe ato fake mīshti Jesúski efenifo ato māmāpakeyanā ato Epa Nios kīfixonō. Akka nā Jesúsxō tāpimisfāfe ato iskafanifo: “Māto fakefo efexō nōko lfo fekaxtefayamakāfe,” ato fanifo. Ato askafaifono Jesús ato yoini: “Ato enekāfe na fakefo ekeki fenōfo. Ato nētefayamakāfe. Ēfe Epa Nios xanīfo ika ari na fakefo keskarakōifoki,” ixō ato yoini.

¹⁷ “Ē mato pāraima, mā Epa Nios xanīfo nikayamax na fakefāfe ea nikaifo keskafakī, Epa Nios ika ari mā katiroma,” ixō Jesús ato yoini.

Feronāfake naetapa kori ichapayax Jesús fe mekani

(Mt. 19.16-30; Mr. 10.17-31)

¹⁸ Xanīfo fetsa Jesús ano oxō yōkani iskafakī: “Maestro, mī sharakī, ea yoife ē afaa afeska fatiromāki Nios xanīfo fe ipaxaki,” ixō yōkaito,

¹⁹ Jesús kemani: “¿Afeskakī sharara mī ea faimē? Akka Nios fisti shara.

²⁰ A Niospa yoini keskara mā mī tāpia. Iskafakī yoini: ‘Mī āfima chotayamafe; askatari yora reteyamafe; askatari yometsoyamafe; askatari chanīyamafe mā kaxpa ato pārayamakāfe. Nāskaxō māto epa yafi māto efa nikasharakāfe,’ ixō yoiaito,

²¹ nā feronāfake yoini iskafakī: “Nā mia yoiaifo keskara mē nikamis naetapaxō,” faito,

²² askafakī yoiaito nikakī Jesús kemani iskafakī: “Nāno afara fetsa fisti mī tāpiama. Akka mī afarafo minixō kori fixō nā afaamaisfo ato minife. Nāskax nai mēranoax mī afama mīshifoyfa ixikai. Nāskafata efe koofe,” ixō yoiaino,

²³ akka nā feronāfake Jesús askafaito nikai, shināchakakōi tooxinima, afama mīshti ichapayax.

²⁴ Shināmitsaito òikī Jesús ato yoini: “A yora afama mīshti ichapaya Nios xanīfo ano katiroma, fekax pishta.

²⁵ Māraki camello akoja kini mēra ikipaifi ikitiro fekaxkōi efapamāiax. Nāskarari yora afama mīshti ichapayato Nios Ifofapai fekaxkōi āfe afama mīshifomāi potakaspakī,” ixō Jesús ato yoini.

²⁶ Ato askafaito nikakakī a aōxō tāpimisfāfe tāpipainifo. “¡Kee! ¿Afeskax nō Nios fe ipaxatiromē?” ikanax yoinānifo.

²⁷ Jesús ato kemani: “Akka yorafokai āa ifimetiroma, Nios fistichi yorafa ifitiro. Niospa afama mīshti fatiro. Tsōakai afama mīshti fatiroma, Nios fistichi atiro,” ato faito,

²⁸ Pedro yoini: “Ifo, nō mefe okī nōko afama mīshtifo nō òiferani nō mefe oni,” faito,

²⁹ Jesús kemani iskafakī: “È mato yoikōi, fētsa Nios xanīfoōxō ato yoikakī āfe pexe òifaita āfe apa yafi āfe afa òifaita āfe onefetsafo òifaita āfe āfi òifaita āfe fakefo òifaita ixō,

³⁰ nāato afama mīshtifo fixii. Nāskatari mā naax Nios fe ipanaka,” ixō Jesús ato yoini.

Anā Jesús ato yoini: “Mā chaima ea retekanira,” ixō

(Mt. 20.17-19; Mr. 10.32-34)

³¹ Jesús aōxō tāpimis tiis doce kenani. Nāskaxō ato yoini iskafakī: “Iskaratīa mā nō Jerusalén ano kaikai. Nānoax nā Niospa meka yoimimisfāfe eōnoa yoikī kenenifo keskakōi kaikai ē.

³² Nānoxō yora fetsafo ea ato achimakani kiki. Nāfāfe ea kaxemetsama fayana ē ichakani kiki ekeki kemo mechoketsayanā.

³³ Ea koshaketsakata ea retekani. Akka ea askafafiaifono tres nia oxata ē otōxii,” ixō ato yoini.

³⁴ Ato askafakī yoiaitokai tsōa tāpinima. Mā nikafikakī tsōa tāpisharanima, Niospa Yōshi Sharapa ato shināmoyoamano.

Jesús yora fisti fēxokōikē Jericó anoxō sharafani

(Mt. 20.29-34; Mr. 10.46-52)

³⁵ Mā chaima Jesús Jericó ano nokoi kakī, yora fēxo fai ketokonō tsaokē fichini, anoxō ato kori yōkaito.

³⁶ Nānoxō nā fēxo fai ketokonō tsaoxō nikakī yorafā rasi fōfānaifāfe ato yōkani: “¿Afaa afeskafakanimē?” ato faito,

³⁷ yoinifo: “Jesús Nazarete anoa kafani,” fanifo.

³⁸ Askafaiifono nikai fāsikōi kenani iskai: “Jesús mīfi David fenakī, ea shināfe,” fani.

³⁹ Askafaito nā rekē foaifāfe iskafanifo: “Nōko Ifo fekaxtefayamafe,” fafiaifono, akka nā fāsikōi kenai iskani: “¡David fenapa, eō noife!” faito nikai,

⁴⁰ Jesús nēteakekafā ato yoini iskafakī: “Ea ifixotakāfe oaikai kenariai,” ato faito ifixotani-ifo. Mā oano Jesús yōkani iskafakī:

⁴¹ “¿È mia afeskafatiromē?” faito, nā fēxo kemani iskafaki: “Ifo, ē òisharapai afeskaxō ē òisharatiroma,” faito,

⁴² Jesús yoini iskafaki: “Ea mīa chanīmara faax mā mī shara. Nāskaxō mā mī òishari,” fani.

⁴³ Nāskafaino nā fēxo òisharakōitani. Nāskax Jesús fe kakī, “Aicho mā ea Niospa sharafakī, Nios fāsi sharakōikī,” ikax afe kaino yorafāfe òikakī akairi, “Nios fāsi sharakōi,” ikanax akiki inimakōinifo.

19

Jesús fe Zaqueo

¹⁻² Nāskano Jesús Jericó pexe rasi ano finōfaini. Akka nāno feronāfake afama mīshti ichapaya ika ini, āfe ane Zaqueo. A ato kori fixomisfāfe āfe xanīfo ini. Nāatori āfe xanīfo kori fixomis ini.

³ Nāato Jesús òipaifiki òinima, yora ichapafāfemāi nakifafono Zaqueo māi mīsto pishtamāi axō.

⁴ Nāskakē fāi rekē ichoni Jesús kaito òixiki. Nāskata ifīya inani nā Jesús kafanai anori.

⁵ Jesús anori finōfāikī fomākīa naiskī fichixō yoini iskafaki: “Zaqueo, fotopakekafāfe. Iskaratīa mī pexe ano ē nēteyoikaikai,” faino,

⁶ koshikōi Zaqueo fotopakekafāni. Nāskakē akiki inimasharakōiyanā āfe pexe ari iyonī.

⁷ Nāskaito òikakī yora rasichi iskafakī yoinifo: “¡Kee, òikapo! ¿Afeskai na yora chakapa pexe ano Jesús iki kaimē?” fanifo.

⁸ Askafafiaifono Zaqueo fininākaŋa Jesús yoini iskakafā: “Ifo, ōipo. Nā afaamaisfo na ēfenāfo ē ato paxkaxonikai. Nā ē atoki yometsomisfo cuatro veces faxō ē ato ināi,” ixō yoini.

⁹ Askafaito Jesús yoini iskakafā: “Iskaratīa mē mia chaka soaxona mī Niospa fake iki mī afe ipanaka,” ixō yoini. Nāskaxō nānoafo ato yoini: “Na feronāfake Abraham āfe fena. Abraham Nios nikakōipaoni keskakafā natori Nios nikakōi.

¹⁰ Akka ē oni ēfe Epa Nios anoax a fenoafo ato fenayanā ato ifiyoi,” ixō ato yoini.

Meka fetsafaxō koriōnoa Jesús ato yoini
(Mt. 25.14-30)

¹¹ Nā yorafāfe nikanifo Jesús ato yoiāito māmāi Jerusalén chaima faifokakī, “Mā Nios xanīfo chaima nokoira,” ixō shināifono. Nāskara shināifono mā tāpīxō Jesús meka fetsafaxō ato yoini.

¹² Iskakafā ato yoini: “Nāno feronāfake fetsa xanīfo keskara ini. Nā feronāfake chai kani mai fetsa ari, nāriax mā xanīfo ikax opai.

¹³ Akka kayoxoma a yonoxomisfo diez kenani. Nāskaxō ato kori ichapa ināketsayanā ato yoini iskakafā: ‘Na kōri afara ichapa mā fikāfe nā ē oaitia,’ ixō ato yoini.

¹⁴ Akka yorafāfe āfe mai anoxō noikaspanifo. Nāskaxō acho yora rafe nīchinifo iskakafā ato yoitānofo: ‘Na feronāfake nō fichipaima nōko xanīfo inō,’ ixō ato yoitānofo.

¹⁵ “Akka askafafiaifono mā xanīfo itani anā anoris oni āfe mai ano. Mā nokoxō a yonoxomisfo kenamani nā ato kori ināfaini tui, tāpīxiki afe tui kori fiafomākī.

¹⁶ Nāskano fetsa akiki oitaexō yoikī iskakafā: ‘Ifo, a ea māa kori ināfainitima finōmainīfofā kori exe diez faxō mē mia fixōa,’ fani.

¹⁷ Askafaino āfe xanīfāfe kemani: ‘Aicho, mīfi ea yonoxō sharamiski. Ē mia afaa ichapa ināyamafiano finōmainīfofā mia fixosharakōia. Nāskakē pexe rasi diez anoā ē mia xanīfo imai,’ ixō yoini.

¹⁸ Nāskatari āfe ina fetsari akiki oxō yoikī iskakafā: ‘Ifo, a ea māa kori ināfainitima finōmainīfofā kori exe cinco faxō mē mia fixōa,’ fani.

¹⁹ Nāskafaino nāri kemakī iskakafā: ‘Miri cinco pexe rasi anoā xanīfo ikikai,’ fani.

²⁰ Akka a yonoxomis fetsari akiki oxō iskakafā yoini: ‘Ifo, nakīa mī kori ē mia mekexona samapa rakoxō.

²¹ Ē mikiki mesekī, mīmāi feronāfake mitsisipakōikē, mīnāyamafekē mī fimis, askatari a mī fanama anoāfori mī fimis. Nāskakē ē mikiki mesekī ē mia kori mekexona, nakīa mī kori,’ ixō yoini.

²² “Askafaito nikakī āfe xanīfāfe yoini iskakafā: ‘Mī ea yonoxosharamisma, mī chakakōi, askatari mī xanikōi. Mī mekaōxō ē mia omiskōimani. Mī ea iskakakē, na feronāfake mitsisipakōi āfenāyamafekē fimis, askatari a fanama anoāfori fimis mī ea fakē.

²³ Akka, ŋafeskakī banco ano mī ea kori faxōfamamē mā ēfe kori ichapano ea ināxikima, mē anā ēfe pexe ano ē oano?’

²⁴ Nāskata nā anoāfo ato yoini iskakafā: ‘Na feronāfake kori fiakāfe nā diez faxō finōmainīfofā ea kori fixōa ināxikakī,’ ato faito,

²⁵ kemakī iskakafā: ‘Ifo, akka nāatoroko mā diez faxō finōmainīfofā fia,’ faifono,

²⁶ anā xanīfāfe ato kemani: ‘Akka ē mato yoi nā afara ichapaya nō afara ichapa inātiro. Akka a afaa ichapayama, āfe afara nō fiatiro anā afaa ichapaya inōma.

²⁷ Askatari a ea noikaspakakī a ea xanīfo fakaspafo, fitakāfe ato retekikakī ēfe ferotaiŋi,’ ixō xanīfāfe ato yoini,” Jesús ato fani.

Jesús nokoni Jerusalén ano

(Mt. 21.1-11; Mr. 11.1-11; Jn. 12.12-19)

²⁸ Nāskara ato yoita Jesús kani Jerusalén ano a aōxō tāpimisfo fe.

²⁹ Mā chaima Betfagē fe Betania ano nokoxō machi Olivos anoxō a aōxō tāpimis rafe nīchini.

³⁰ Ato iskakafā yoiyanā: “Mēstekōi fōtakāfe oa ono pexe rasi ano. Mā nokoxō nānoa burro fake nexekē mā fichi kaikai tsoa aō nimisma. Tēpexō ea efexotakāfe.

³¹ Anoxō mato yōkaifono iskakafā: ‘ŋafeskakī mā burro tēpeimē?’ mato faifono ato yoikī iskakafāfe: ‘Nōko Ifāfe fichipaiyaito nō ifixoniyoa,’ ato fakakī,” Jesús ato fani.

³² Ato nīchia fōkaxō ōiafo nā Jesús ato yoia keskarakōi fichtoshinifo.

³³ Mā burro tēpeaifono, nā burro ifofāfe ato yōkanifo: “ŋafeskakī mā noko burro tēpekaimē?’ ato faifono,

³⁴ ato kemanifo iskakafakī: “Nōko Ifāfe fichipaiyaito nō ifixoniyoa,” ato fanifo.

³⁵ Nāskaxō burro kateki āto rapati kakafakaxō efenifo Jesús ano. Nāskaxō a kamaki Jesús tsoainīfofānifo.

³⁶ Nāskakē Jesús tanaima kani. Akka yorafāfe āto rapatifo fai nēxpakīa kakafafonifo.

³⁷ Mā chaima machi Olivos tisiri mekani keyokōi a aōxō tāpimisfāfe fāsikōi yoinifo iskafakakī inimayanā: “¡Aicho, Nios fāsi sharakōi! ¡Niosxō afama mīshti mī akaito nō oia!” fanifo.

³⁸ Iskafakī yoinifo akiki inimakakī: “¡Aicho, nōko xanīfo nokoki oakī! ¡Niospa nai mēraxō shara famafafāini! ¡Niospa yoini Jesús nōko xanīfo inō, aōnoax yorafo Nios fe nīpaxanōfo! ¡Aicho, Nios fāsi finakōia!” ixō fāsikōi yoinifo.

³⁹ Nāskafaifono fariseofāfe yorafā rasi mēraxō yoinifo iskafakakī: “Maestro, mī inafō yoife iskanōfoma,” faifono,

⁴⁰ akka Jesús ato kemani: “Ē mato yoi nafāfe ea yoisharayamaifono, na tokirifāfe fāsikōi eōnoa meka shara yoikeranafo,” ixō Jesús ato yoini.

⁴¹ Mā chaima Jerusalén ano nokoax nā pexe rasi anoafō ato ōi, atoōnoax Jesús oiani.

⁴² Iskafakī ato yoiyanā: “Ea chanīmara faax mā isharapakenakaki. Akka mākai tāpiama iskaratīa Niospa Fake mā noko. Eakai mā xanīfo fapaima ē mato imasharapaifaito, mā ea nikakaspai. Iskaratīa ē mato afeskafatiroma. Mā mā fenoa.

⁴³ Fatora penata mato noikaspakani nā mato noikaspaiāfe. Nāskaxō mato chetekaxō mato mēra ikiferakaxō mato retēkī mitokani.

⁴⁴ Māto pexefori pāoiki fetsexii, mī kaifofoya mato retēkī mitoxikani tsoa pishta ichoxima, mā ea nikakaspamis Niospa ea matoki nīchifiano,” ixō Jesús ato yoini.

Jesús a Nios kīfiti pexefā mēraxō a ato ināifo ato potani

(Mt. 21.12-17; Mr. 11.15-19; Jn. 2.13-22)

⁴⁵ Nāskata Nios kīfiti pexefā mēra Jesús ikikaixō ōia a mēraxō afarafo ato miniaifāfe ōikī ato kāimani.

⁴⁶ Naskafata ato yoini iskafakī: “Niospa meka yōra kenekī iskafani: ‘Mā ēfe kīfiti pexefā mēraxō mā ea kīfitori,’ ixō yoifinino, akka nā yometsofāfe pexe keskara mā famis,” ixō Jesús ato yoini.

⁴⁷ Nāskata Nios kīfiti pexefā mēraxō pena tii Jesús ato yoini. Ato yoifiano a ato Nios kīfixomisfāfe āto xanīfofo feta a Moisés yoikī kirika keneni keskara ato tāpimamisfāfe judeofāfe āto xanīfofofāferi afeskaxoma Jesús retēpaikakī shinānifo.

⁴⁸ Akka afeskaxō retetiroma inifo, yorafāfemāi nikasharapaikōiaifono a Jesús ato yoiāi keskara.

20

“¿Tsōa mia nīchinimē mī xanīfo inō?” ixō Jesús yōkanifo anoxō achipaikakī

(Mt. 21.23-27; Mr. 11.27-33)

¹ Pena fetsa Nios kīfiti pexefā mēra Jesús ikikaini anoxō yorafo tāpimani afeskax Nios fe īpaxatirofomākī. Anoxō ato yoiaino a ato Nios kīfixomisfāfe āto xanīfofo fe, a Moisés yoikī kirika keneni keskara ato tāpimamisfo, judeofāfe āto xanīfofori fenifo.

² Iskafakī yōkanifo: “¿Tsōaōxō mī iskafaimē? ¿Tsōa mia yoiāmē mī iskafanō?” ixō yōkanifo.

³ Askafaifono Jesús ato kemani: “Ēri mato yōkanō ea yoikapo.

⁴ ¿Tsōa Juan nīchiamē ato maotisafakī ato faka mēra ikimapakenō? Niospa nīchiyamakī yorafāfe nīchiniforaka.”

⁵ Ato askafaino āa ranā mēenāpai fetseyanā shinānifo iskakakī: “Nō kemakī iskafaino: ‘Niospa nīchini,’ nō faino noko yoikī iskafai: ‘Akka, ¿afeskakī mā Juan nikamismamē?’

⁶ Akka nō iskafakī yoitiroma: ‘Yorafāfe Juan nīchinifo,’ nō fatiroma yorafāfemāi tokirinī tsakakakī noko retenōfo. Akka keyokōichi shinākani Niospa ato shināmanaino, Juanmāi Niospa shināmanaino ato yoiaino,” ikanax yoinānifo.

⁷ Nāskaxō kēmanifo: “Nō tāpiama tsōara Juan nīchini ato maotisafakī ato faka mēra ikimapakenō,” faifono,

⁸ akka Jesúsri ato kemani iskafakī: “Ēri mato yoima tsōaōxō ē iskafaimākai,” ixō ato yoini.

Meka fetsafaxō Jesús ato yoini a ato yonoxomis chakafoōnoa

(Mt. 21.33-44; Mr. 12.1-11)

⁹ Nāskata taefakī Jesús yorafo yoini. Meka fetsafaxō ato yoikī iskafani: “Feronāfake fētsa āfe tare ano uva fanaxō fētsafāfe kexexonō ato ināfaini chai kayoni.

¹⁰ Nā āfe fana fimimistīa ifāfe a yonoxomis nīchini a kexexonafō ato yōkaxō āfe fana fimifo fixotanō nā āfenā tiiri. Akka nā fana kexeafāfe seteketsakaxō afaamais nīchinifo.

¹¹ Nāskata tare ifāfe anā a yonoxomis fetsa nīchini. Akka nāri īchaketsayanā seteketsakaxō afaamais nīchinifo.

¹² Nāskaxō afianā fetsari nīchini. Akka mā kaano nāri imi tofeketsakaxō tarepaxō potanifo.

¹³ “Nāskata tare ifāfe shināni: ‘¿Ē afeskafaimē? Ēfe fakekōi a ē aō noiai mia nīchupa, ōitsai ēfe fake nikakōitirofoki,’ ixō nīchini.

¹⁴ Akka mā āfe fake nīchia kaito fichikanax nā tare kexemisfo yoinānifo iskakani: ‘Nato āfe apa naano na fanafo fixii kiki. A nari nō retenō na tare nōkonā inō,’ ikax yoinānifo.

¹⁵ Nāskakata achikaxō tare pasotai iyokaxō retenifo. Akka, ¿afaa mā shināimē ato afeska faimē a tare ifāfe? Ē mato yoinō.

¹⁶ Kaxō a tare kexemisfo ato reteskō mitoxō, fetsafo āfe tare ināxii afāfe kexexonōfo,” Jesús ato fani.

Ato askafaito nikakani iskanifo: “Askayamapainōra,” inifo.

¹⁷ Akka askaifāfe ōikī Jesús ato yoini: “Akka, ¿afeskakī Niospa meka iskafakī kenenifomē?”

Tokiri pexe fapaikakī nā pexe famisfāfe na tokiri chakara ixō potafiafono, fetsafāfe fichikaxō na tokiri sharakōi ikaxō akiki pexe fatirofo, ixō kirikaki kenenifo.

¹⁸ Akka tokiriki fetsa pakekī aō xao teketiro. Akka tokiri yoraki pakekī renekōitiatiro.”

¹⁹ Nā ato Nios kīfixomisfāfe āto xanīfofo feta a Moisés yoikī kirika keneni keskara ato tāpimamisfāfe Jesús achipainifo karaxa mēra ikimapaikakī. Atoōnoa meka fetsafaxō yoiaito nikakakī akiki ōitifishkikaki. Akka achipaifakakī tsōa achinima yorafoki mesekakī.

*“¿Xanīfo nō kori inātiromē noko yōkaito?” ixō Jesús yōkanifo
(Mt. 22.15-22; Mr. 12.13-17)*

²⁰ Nāskakaxō a ato feparamisfo nīchinifo Jesús fe yoinātanōfo fanīrira Jesús ato yoiaito nikakakī āto xanīfofo yoixikakī Jesús achinōfo.

²¹ Nāskakē nāfāfe yōkanifo: “Maestro, mā nō tāpia a mī yoiai anori chanīmakōi mī yoimis. Nā mī ato yoiai anoriri, nokori yorafāfe yoimisfo. Chanīmakōi mī yoimis nā Niospa fichipaiyai kesarakōi. Afara yoipaikai mī ranomisma, mēstekōi mī ato yoimis.

²² Akka chanīmakōi noko yoife na romanō xanīfo nō kopifatiromākī askayamakī nō kopifatiroma rakikā,” ixō yoinifo.

²³ Akka Jesús tāpini feparapaiyāifāfe. Nāskaxō mā tāpixō ato yoini,

²⁴ “Ea kori exe fisti ispakāfe ē ōinō,” ato faito ispaifono ato yoini iskafakī: “¿Tsōa femānā na keskaramē? ¿Tsōa aneri na kori exe ano keneamē?” ixō ato yōkaito kemanifo iskafakakī: “Nōko xanīfo César keskara,” faifono,

²⁵ Jesús ato yoini: “Akka na kori exe Cēsarnākē César inākāfe, akka Niosnākē Niosri inākāfe.”

²⁶ Ato askafaito nikakani, rateyanā yoinānifo: “Kee, na yoiai kesarakai tsōa finōtiroma. Tāpikī finakōia,” ikanax āa ranā yoinānifo. Nāskakē yorafāfe ōiaifono Jesús fanīrira mekamapaifiaifono fanīrira mekatiroma ini. “Kee, finakōia,” ikanax anā tsoa tooxinima.

*“Yora naax anā otoax ¿afeskatirofomē?” ixō Jesús yōkanifo
(Mt. 22.23-33; Mr. 12.18-27)*

²⁷ Nāskata saduceofo Jesús ōifokani fonifo. Nā saduceofāfe yoimisfo iskakakī: “Yora naaxkai anā afeskax ototiroma,” ixō yoimisfo. Akka nāfāfe Jesúski fōkaxō yōkanifo

²⁸ iskafakakī: “Maestro, noko Moisés kirika kexononi iskafakī yoikī: ‘Feronāfaka fetsa āfiyax afeta fake akamax naano one fētsa nā kēro ifomafa fitiro āfe āfi inō. Mā fixō afeta fake atiro āfe ōchi fake inō,’ ixō Moisés keneni.

²⁹ Akka nō mia yoinō, nā naneti siete feronāfaka inifo. Āto ochi iyoa āfiyai taeni. Mā āfiyax afeta fake akamax nani.

³⁰ Mā āfe ochi naano chipokoto fini.

³¹ Nāskata nā chipoko fētsari nā kēro fini. Nāskarīfai nāari nani afeta fake akamax. Nāskakanax akikinoax nai keyonifo nā siete feronāfaka afeta fake akamax.

³² Nāskata mā nā keyoafono nā kērori chipo nani.

³³ Akka, ¿fatoto mā otokaxō na kēro fixikanimē, nā fistimāi fīpakaxō?” ixō yōkaifono,

³⁴ Jesús ato kemani: “Yorāfo nono mai ano niyokanax feronāfakēfo fe kērofo fianāyokani.

³⁵ Akka fatorafāfe Niospa meka chanīmara faafono Niospa ato imasharatiro afe īpaxanōfo. Akka nāfo mā otokanax feronāfakēfo fe xotofakēfo anā fianātirofoma Nios ika ari nokokanax.

³⁶ Nāskakē anā tsoa natiroma. Ājirifo keskara ixikani Niospa fakekōifori ixikani mā otokanax.

³⁷ Akka Moisés nikani oa fana kooai xoisai keskara mēranoax mekaito, yoikī iskafaito: ‘Mā nafianixakakī mā anā otoafō, ēfi Abraham ikaino Isaaca ikaino, Jacobo ikaino, ē āto Nioskōiki. Iskaratūa efe niafo,’ ixō yoiaito Moisés nikani. Nāskakē nō tāpitiro naax nō anā ototiro.

³⁸ Akka Epa Niospa naafoma keskara ato ōi Epa Niosnoax keyokōi niafo,” ixō Jesús ato yoini.

³⁹ Nā Moisés yoikī kirika keneni keskara ato tāpimamisfāfe ranārīto iskafakī yoinifo: “Maestro, mī ato yoisharakōi,” fanifo.

⁴⁰ Nāskakē anā tsoa yōkapainima, atomāi kemasharakōiāito akiki rāfikakī.

*“Akka, ¿tsōa fenamē Cristo?” ixō Jesús ato yōkani
(Mt. 22.41-46; Mr. 12.35-37)*

⁴¹ Nāskata Jesús ato yōkani: “Akka, ¿afeskakī Cristo David āfe fenara mā faimē?

⁴² Nā David Niospa Yōshi Sharapa shināmanaino fanāiti kirika keneni iskafaki: Epa Niospa ēfe Ifo yoini iskafakī: ‘Mī efe xanīfokōi īpanakaki.

⁴³ Akka nā mia noikaspaifo mī ato finōkōinō ē ato mī nāmā nīchikai,

ixō yoini.

⁴⁴ Akka, ¿afeskai Cristo David āfe fena itiomē, nā David Cristo ēfe Ifora fafiapaonino?” ixō Jesús ato yoini.

Jesús ato yōani a Moisés yoikī kirika keneni keskara ato tāpimamisfāfe anorima ato yoiāifono

(Mt. 23.1-36; Mr. 12.38-40; Lc. 11.37-54)

⁴⁵ Keyokōichi yorāfāfe nikaifono Jesús aōxō tāpimisfo yoini,

⁴⁶ “Ōisharakakī. A Moisés yoikī kirika keneni keskara ato tāpimamisfāfe mato pārāpaikani kiki. Akka nāfo rapati chainipa safekanax fōfāsapaimisfo. ‘Noko yoisharakōinōfora,’ ikanax tsaoti sharakōi fenamisfo īchanāti peXe anoxō, a piaifo anori sharakōi ano tsaopaimisfo, ‘Noko ōisharanōfora,’ ikanax.

⁴⁷ Nāskakaxō kēro ifomafa peXe fīamisfo. Nāskatari Epa Nios chaikōi kīfimisfo, ‘Noko nikanōfora,’ ikaxō. Akka nāfo chanīmisfono Epa Niospa ato omiskōimaki finakōixii,” ixō Jesús ato yoini.

21

*Kēro ifomafa afaamaisfixō Epa Nios ināsharakōini
(Mr. 12.41-44)*

¹ Jesús ōini a kori ichapayafāfe kori naneti mēra kori naneiafāfe Nios kīfiti pexefā mēraxō.

² Nāskatari ōini a kēro ifomafa afaamaisfixō āfe kori exe rafe kori naneti mēra āfe kori nanekī mitofaito.

³ Nāskata ato yoikī iskafani: “Chanīma ē mato yoikōi, na kēro ifomāfa afaamaisfixō ato finōmainīfōfā inākōia.

⁴ Akka na kori ichapayafāfe mā Nios ināfikakī tsōa keyo ināma, texe faafo. Akka na kēromā omiskōifiki āfe kori rafe potakī mitokōia. Anā afanā a piāi fītiroma,” ixō Jesús ato yoini.

*Jesús ato yoini na Nios kīfiti pexefā pāoixii ixō
(Mt. 24.1-2; Mr. 13.1-2)*

⁵ Nāskata a afe rafea fetsafāfe Nios kīfiti pexefāōnoa yoinifo iskafakakī: “Nōko Nios kīfiti pexefā sharafīnakōia. Tokiri petsanāmeax nā kori ichapayafāfe afara sharafōfikaxō nētakeafo,” ikaxō yoiāifono, Jesús ato yoini:

⁶ “Akka na mā ōiai anāikai tokiri petsanāmexima, keyokōi pāoixii. Na tokirifori maoi fetsexii,” ixō Jesús ato yoini.

*Afaa afeskaximākai mā chaimā nōko mai keyoaino Jesús ato yoini
(Mt. 24.3-28; Mr. 13.3-23)*

⁷ Nāskakē yōkanifo iskafakī: “Maestro, ¿na mī yoiāi keskai afetīa iximē? ¿afeskaxō nō tāpitiromē na ixiāi keskara?” ixō yōkanifo.

⁸ Askāfaifono Jesús ato kemani: “Kexemesharakani mā ato nikaino mato afara chakafamatirofoki. ‘Ēfi Cristokī. Mē oa mato xanīfo ixiki,’ ixō mato pārāpaikani kiki. Nāskakaxō afāfe yoikani kiki a ē yoisim keskara. Akka yoiāifāfe ato nikayamakāfe.

⁹ Akka yorafo retenāifāfe nikai rateyamakāfe. Askatari a fetsafāfe āto xanīfori potapayāifāfe nikairi rateyamakāfe. Nā ē mato yoisim keskakōiyoxii kiki. Nāskafīax nōko mai fena keyoxima, chipo ixii.

¹⁰ “Akka yorafo mai fetsa anoax mēenāpaiyāifono, yora fetsāfori mai fetsa anoax retenāixikani.

¹¹ Nāskāfaifono nā mai fetsa anoāfo mai naya naya ixii. Askatari fonāiki finakōixikani, afaa pikanima. Askatari pae finakōia ixii nā mai fetsa anofo. Askatari nā nai mēranoāfori a ōimismafo ōixikani. Ratekōixikani.

¹² “Akka askayoamano, mato achikaxō fāsi mato omiskōimaxikani. Mato achikaxō judeofāfe āto ichanāti peXe mēra mato iyokani xanīfōfōfāfe mato yōkanōfo. Nāskakaxō mato karaxa mēra ikimakani xanīfōfōfāfe. Eōxō mato askafakani.

¹³ Mato askafaifono mā eōnoa ato yoitiro.

¹⁴ Akka kayoxoma shināchakayamakāfe. Ē mato shināmanikai mā ato yoisharanō. Afaa nō ato faimē iyamakāfe.

¹⁵ Akka ē mato ato kemamasharaikai fanīrira mato mekafaifono mā ato kemasharanō. Nāskakē nā mato noikaspaifāfe mato kemakanima, fanīrira mā noko yoi tsōa mato faima.

¹⁶ Akka mato epafāfe mato efafo feta mato ato achimaxikani. Māto ochifāfe, māto kaifofofāfe mato fe rafemisfāferi mato askafaxikani. Akka ranāri mato retexikani.

¹⁷ Akka eōxō yorafāfe keyokōichi mato noikaspaxikani.

¹⁸ Akka mato noikaspafiaifono Epa Niospa mato kexesharai mato retefiaifonokai mātō fero mēsho fenonakama.

¹⁹ Akka afara afeskara ifiaino ea shināmakiyamakāfe. Nāskax mā efe isharapakenakaki.

²⁰ “Jerusalén anoafo sorarofāfe ato cheteafono mā ōikī mā tāpitiro mā chaima ato reteafono, āto pexefori pāo iki keyoi.

²¹ Nāskakē a Judea ano ikafo māchi keya ari ichotanōfo. A Jerusalén ano ikafori nā pexefā rasi mēranoax tsekenōfo. A Jerusalén pasotai ikafori anā Jerusalén ano feyamanōfo.

²² Nā Niospa meka yoikī kenenifo keskakōi fakī Jerusalén anoafo Niospa ato omiskōimani.

²³ Askatari a kēro fake naneafō fe a fake yome pishta chocho amaifo omiskōixikani māmāi yorāfo omiskōifinakōiaifono. Nāskakē nā Judea mai anoafo omiskōifinakōixikani, Niospa ato omiskōimanaino.

²⁴ Ranāri ato kenopa retekani. Akka ranāri ato achikaxō karaxa mēra ato ikimakani mai fetsafo ano. Ato askafaifono nā judeofoma Jerusalén ano iyokani. Akka nā Niospa ato omapaiyaiāta judeofo Jerusalén ano anā fexikani,” ixō Jesús ato yoini.

Niospa Fake fotoaino afe keskara iximākai ixō Jesús ato yoini

(Mt. 24.29-35, 42-44; Mr. 13.24-37)

²⁵ Anā Jesús ato yoini iskafakī: “Nāskakē xini fe oxe fishifori a nō ōimis keskara anā iki fetseima. Fetsa keskara iki fetsei. Askaito ōikani nono mai anoafo ratekōixikani. Fākfāri poo iki meseniaito nikakani. Ratekōixikani nōkai iskara afaa ōimisma ikanax.

²⁶ Nāskaito ōikani yorāfo ratekani shinā feyotaxikani. Afarafo afeskaraito ōikani a ōiyomisfoma keskara ōikani.

²⁷ Nāskatari ea ōixikani ē nai mēranoax nai kōinī ē fotoiyōaito. Shara finakōia ē fotoaito ea ōixikani.

²⁸ Nāskakē nā ē mato yoiai keskai taei afarafo afeskaraino, inimayanā ea manasharakāfe, ea chanīmara fayanā. Mē chaima okī ē mato ifirisa fatanō,” ixō ato yoini Jesús.

²⁹ Nāskaxō anā meka fetsafaxō ato yoini iskafakī: “Akka shinākāpo yōkka fiyafi ifi fetsaōnoa.

³⁰ Afe pei siri ikaito ōikī mā tāpitiro māmāi chaima xiniāito.

³¹ Nāskarifiakī mā tāpitiro nā ē mato yoyimis keskara afarafo afeskaraito ōikī mā chaima Nios Xanīfo oi kiki xanīfo ikiyoi nono nāmānoax.

³² “Akka ē mato pāraima. Na afarafo ē mato yoiai keskaito na yorafāfe nayokaxoma ōiyokani.

³³ Akka nai fe mai keyoi. Akka ēfe meka fisti keyonakama na ē mato yoiai keskakōi.

³⁴⁻³⁵ “Nāskakē kexemesharakāfe mātō ōitinī afaa chaka shinākākima. A mā pāepaiyai fisti shināyamakāfe. Afaa fetsafori shināyamakāfe. Anori shinākī a ikaifo keskakī mā ea chanīmara fatiromaki. Akka afo itipinīsharafomano ē nokorisataxi. Māraki poomānā tanasharaxma tarapa faafo mēra ikiyamatiro. Māri nāskatiro ea shināxma. Nāskata afarafo afeskara iki fetseaino nā mai tio anoax omiskōi fetsexikani.

³⁶ Nāskakē itipinīsharakāfe, Epa Nios mēxotaima kififafāikāfe afara afeskaraino omiskōixikakima. Nāskax mā ekeki chipo nokoaino ē matoki inimaxikai,” ixō Jesús ato yoini.

³⁷ Nāskata Jesús pena tii Nios kifiti pexefā mēraxō ato yoini. Akka fakish tii machi āfe ane Olivos ano oxatai apaoni.

³⁸ Nāskakē yorafā rasi pena tii akiki fepaonifo Nios kifiti pexefā ano. Anoxō ato yoiaito nikai fekani.

22

“¿Afeskaxō nō Jesús retetiromē?” ixō shinānifo

(Mt. 26.1-5, 14-16; Mr. 14.1-2, 10-11; Jn. 11.45-53)

¹ Mā chaima fista ikaino a Niospa ājirinī Egipto anoxō āto fake iyoafo retenima shinākakī pāa faraxatimais pipaonifo, Pascua fistaāia.

² Afia penata a ato Nios kifixomisfāfe āto xanīfofo feta a Moisés yoikī kirika kenenī keskara ato tāpimamisfāfe afeskaxoma Jesús pāraxō retepaikani yorafoki ratenifo.

³ Nāskaifono Judas mēra Satanás ikini. Nā Judasri Jesús āfe ina ini. Āfe ane fetsa Iscariote ini.

⁴ Nā Judas kani a ato Nios kīfixomis xanīfofo yafi a anoxō Nios kīfiti pexefā kexemisfo xanīfofo yoikai. Anoxō ato yoini iskafakī: “¿Afeskaō ē mato Jesús achimatiromē?” ixō ato yōkani.

⁵ Akiki inimayanā yoikī iskafanifo: “Aicho, nō mia kori ināi mī noko ato Jesús achimax-onō,” ixō Judas yoiaifono,

⁶ “Ia. Ē mato achixonō,” ixō ato yoini. Nāskaxō Judaspa shināni afetīa ē ato Jesús achixotiromē ini. Yorafā rasichimāi naki faafono afeskaō achitiroma ini.

Mā chaima reteaifono Jesús aōxō tāpimisfo feta yātapake pini

(Mt. 26.17-29; Mr. 14.12-25; Jn. 13.21-30; 1 Co. 11.23-26)

⁷ Akka nā fista Pascuatīa pāa faraxatimais pinifo. Afia penatari oveja fake retexō Nios ināpaonifo āto xinifāfe anifo keskafakī. Akka mā fista pakeano,

⁸ Jesús Pedro yafi Juan nīchini ato yoikī iskafayanā: “Fokaxō itipinīsharafatakāfe fistatīa nō pinō,” ato faito,

⁹ kemanifo: “¿Fanīxō nō itipinīsharafaikaimē?” faifono,

¹⁰ Jesús ato kemani: “Mā mā pexefā rasi ano nokoxō feronāfake fisti mā fichi kaikai keshoki faka tetsaomexō foikaino. Nā chīfafaitakāfe fato pexe mēra ikikaimākai ōixikakī.

¹¹ Nānoxō nā pexe ifo yoikī iskafaxikakī: ‘Nōko Ifāfe noko yoikī iskafakī: “Fato pexe kene mēraxō eōxō tāpimisfo feta fistatīa ē pitiriomāki ixō yōkatakāfe nōko Ifāfe noko faa,” mā faito,

¹² nāato mato ispai kiki pexe keya kene efapaya itipinīsharakōia. Nāno itipinīsharafakāfe anoxō nō pinō,” Jesús ato fani.

¹³ Nāskata mā fokaxō fichinifo nā Jesús ato yoia keskarakōi. Nāskaxō itipinī fanifo Pascua fistatīa pixikakī.

¹⁴ Mā itipinīshara faafono, Jesús a aōxō tāpimisfo fe kaax, mīsa ano tsaoni.

¹⁵ Nāskaxō tsaofono Jesús ato yoini: “Ē mato feta pipaitiani na fista Pascuatīa ē nayox-oma.

¹⁶ Akka ē mato yoikōi ēkai anā mato feta Pascua fistatīa pifainakama. Akka nā mā Epa Nios xanīfo ano nokoaitīa ē mato feta pixii inimayanā.”

¹⁷ Nāskata kecho tsomainīfōfā Apa Nios kīfikī, “Aicho,” fata, ato yoikī iskafani: “Na mato tiito ayakāfe.

¹⁸ Ē mato yoikōi ē anā mato feta na fimi ene ayaima. Akka nā ēfe Epa Nios fe ē xanīfo ixō keyokōi ē yorafo ikixō na fimi exe ē anā ato feta ayaxii,” ixō ato yoini.

¹⁹ Nāskaxō anā pāa tsomainīfōfā, Apa Nios kīfikī aicho fata, ato pāa kaxkexopakeyanā ato yoikī iskafani: “Nafi efe nami keskarakī. Matoōnoax ē nai. Nāskakē nā mā plaitīa ea shināfafāikāfe,” ixō ato yoini.

²⁰ Nāskarifiakī kecho tsomainīfōfā nā pixō ato yoini iskafakī: “Na ayatiōxō ē mato afara fenashara yoi iskafakī: Ēfe imi foaino ē matoōnoax nai mā ēfe Epa Nios fe ĩpaxanō.”

²¹ “Akka nā efe mīsa ano tsaofa fetsa ea ato achimani.

²² Akka nā eōnoa yoikī kirika kenenifo keskarakōi ē naikai. Akka nā ea ato achimanai akairi omiskōi finakōi,” ixō Jesús ato yoini.

²³ Ato askafaito nikakani āa ranā yoināi fetsenifo: “¿Fatotokai nō achimanimē?” ikanax āa ranā yoinānifo.

Akka, ¿tsoa sharafinakōiamē?

²⁴ Nāskakē aōxō tāpimisfo feratenānifo fatokai sharafinakōiamē ikanax.

²⁵ Nāskaifono Jesús ato yoini iskafakī: “Nā yora fetsafo xanīfokaxō ato ferateyanā ato yonomamisfo. Ato askafafiakakī nōko xanīfo noko afara shara faxō fafāini ixō nokoōnoa yoikāfe, ato famisfo.

²⁶ “Akka māri askayamakāfe. Askatamaroko nā sharafinakōia mātō exto chipoko keskara ikāfe. Nā chipokofāfe āto iyoafo ato yonoxosharatirofo keskara ikāfe. Akka xanīfo ipaikakī fetsafo sharafakāfe ato axosharaxikakī.

²⁷ Akka, ¿fatokaimē sharafinakōia, nā mīsa ano tsoaxō pimisraka, askayamai nā ato pimamisraka? Akka nā mīsa ano tsoaxō piāi nā sharafinakōia. Akka ē mato fe ixō ē mato yonoxomis keskara ē imis.

²⁸ “Akka mā efe itiani mā ea potamisma, na afara chakafāfe ea chakafafiaino.

²⁹ Nāskakē ēri mato xanīfo imaxii, ēfe Epa Niospa eari xanīfo imaino.

³⁰ Akka mā efeta pita efeta ayata mā faxii ēfe mīsa ano tsoaxō. Nāskakē mā mā xanīfoxō nā doce nōko kaifo israelifāfe mā ato ikixii,” ixō Jesús a afe rafeafo yoini.

*“Ē Jesús ōimisma, Pedro ixiaiino,” Jesús ato yoini
(Mt. 26.31-35; Mr. 14.27-31; Jn. 13.36-38)*

³¹ Nāskata nōko Ifāfe Simón yoini iskafakī: “Simón, ðipo Satanás Nios yōkaxō mato afara chakafamapai, mā ea potanō.

³² Akka ē mia Epa Nios kīfixoni mī ea nikakī xateyamanō. Akka mā mī paxkafixō mī ea anā Ifofakōixō a mefeta ea Ifofaafō ato yoisharafe ea Ifosharafanōfo,” ixō yoiaito,

³³ Simón kemani: “Ifō, ē mia potanakama. Mīa karaxa mēra ikimanaifono ēri mefe kai. Mīa reteaifonori ēri mefe nai,” faito,

³⁴ Jesús kemani: “Pedro, ē mia yoi iskaratīa takara fene keoyoamano mī ato yoi iskai: “Ē Jesús ðimisma,” ixō mī ato yoi kī tres fai,” Jesús fani.

“Mē samamashta omiskōikai,” Jesús ato fani

³⁵ Nāskafata Jesús anā ato yoini iskafakī: “Ē mato nīchiyamea pishamais koriri mā foyameama, sapatori mā fotima. Akka ē mato nīchia kaxō ĵmā afaa yopatimē?” ato faito kemakakī iskafanifo: “Maa. Nōkai afaa yopatima,” fanifo.

³⁶ Nāskata ato yoini iskafakī: “Akka iskaratīa nā pishayato āfe pisha foikanō, āfe koriyaſi. Akka nā keno yamato āfe rapati minixō kori fixō, nā kōri keno fetsa finō.

³⁷ Akka ē mato yoi nā eōnoa yoi kī kirika kenenifo keskai mē askakōi. Ē askarayamafiano ea pārakani yora chakafāfe, ‘Nato ato chakafamis,’ ea fakani. Nāskakē nā eōnoa yoi kī kirika kenenifo keskara nē askakōi,” ixō ato yoiaito,

³⁸ a aōxō tāpimisfāfe yoinifo: “Ifō, nono keno rafe,” faifono, ato kemani: “Nā rafe inōkī anā nō yopaimakai. Nāskanō,” ixō ato yoini Jesús.

Getsemanī anoxō Jesús Apa Nios kīfīni

(Mt. 26.36-46; Mr. 14.32-42)

³⁹ Nāskata Jesús kani nā kamis keskai machi Olivos ano. Aōxō tāpimisfori afe fonifo.

⁴⁰ A kamis ano mā nokoxō ato yoini: “Epa Nios kīfikāfe Satanás mato afara chakafamapai keskara axikakīma,” ixō ato yoini.

⁴¹ Ato askafata ato makinoax orishta kaxō Apa kīfīni ratokonō mai chachipakefōfā.

⁴² Apa kīfikī iskafani: “Epa, ea ifipaikī ea ifife ē omiskōinōma. Akka nā ē apaiyai keskafakīma, nā mī ea amapaiyai keskafafe,” Apa faino,

⁴³ āfe ājiri nai mēranoax akikī nokorisatani mitsisipakōi imaxiki.

⁴⁴ Shināmitsai finakōiyana, Jesús Apa kīfīni nā omiskōiai shināyana. Nāskaino āfe nīskaya āfe imi mai ano tosinī.

⁴⁵ Mā Apa kīfita fininākfāta, aōxō tāpimisfo ari kani. Kaxō ðia oxafo inifo shināmitsai finakōikani āto Ifo omiskōiaino.

⁴⁶ Nāskaxō ato yoini: “Ĵafeskai mā oxaimē? Fininīfōfākāfe Epa kīfixikakī Satanás chakata mato afaa chakafamayamanō,” ato fani.

Jesús achinifo

(Mt. 26.47-56; Mr. 14.43-50; Jn. 18.2-11)

⁴⁷ Jesús ato yoiaino yorafā rasi nokotoshinifo. Nā āfe ane Judas, nāri Jesúsxō tāpimis iyopaoni, nā Judas rekē oaino aho yorafā rasi fenifo. Nā Judas Jesús ari kani kokoikai.

⁴⁸ Askafaito Jesús yoini iskafakī: “ĴJudas, ea mīa kokoxō mī ea ato achimanimē?” fani.

⁴⁹ Askafaito ðikakī a aōxō tāpimisfāfe Jesús yōkanifo: “ĴIfō, nō ato kenopa rerapaketiromē?” ixō yōkanifo.

⁵⁰ Nāskata fētsa nā ato Nios kīfixomisto āfe xanīfāfe ina āfe pacho kayakai aōri paxteni.

⁵¹ Askafaito ðikī Jesús yoini iskafakī: “Enefe. Nāskanō,” fata aſianā koshikōi xanīfāfe āfe ina āfe pacho ramākaxō pacho tichixotani.

⁵² Nāskaxō ato yoini a Nios kīfixomis xanīfofo yaſi a Nios kīfiti pexefā kexemis xanīfofo, nā anifo tiiri mā ifi feafono ato yōkani: “ĴAfeskai kenofoya ifixatefoya mā oamē ea achiyoi oa ē yometso keskarakē?”

⁵³ Pena tii ē mato fe itiani Nios kīfiti pexefā mēraxō ē mato tāpimani, akka mākai ea achipaimisma. Akka na fakishi mā ekeki oa Satanás māto ifono,” Jesús ato fani.

“Ē Jesús ðimisma,” Pedro ini

(Mt. 26.57-58, 69-75; Mr. 14.53-54, 66-72; Jn. 18.12-18, 25-27)

⁵⁴ Jesús achixō iyonifo a ato Nios kīfixomis xanīfāfe pexe ano. Akka Pedro aho chipo kani.

⁵⁵ Akka pexe emāiti chii ketefaax tsoax yoaifono Pedrori nāno ato fe tsoax yooni.

⁵⁶ Nāno ato fe tsoax yooaino xanīfo yonoxomis xomayato fichixō yoini iskafakī: “A nari Jesús fe imiski,” faito,

⁵⁷ Akka Pedro iskani: “Ēkai Jesús ðimisma. Mī ea pārai,” faito,

⁵⁸ fētsari tāpixō yoini iskafakī: “Mīfi na Jesús fe imiski,” faito, Pedro kemani: “Maa. Ēkai Jesús fe imisma,” fani.

⁵⁹ Mā askafaafu samaraka pishtano, fetsari anā iskaḡani: “Chanīma, a nafi Jesús fe imiski. A na feronāfake Galilea ano,” faito,

⁶⁰ Pedro yoini iskaḡakā: “A mī yoiaioñoa ē tāpiana tsoarañoa mī yoi ē tāpiana,” Pedro faino takara keoināḡañi.

⁶¹ Pedro askaito Jesús texkeakeḡafā festani. Festanaino Pedro shinātani nā āfe Ifāfe yoia keskara. “A takara keoyoamano, ‘Ē Jesús ōimismara, ixō mī ato yoi tres fakī,” Jesús faa nā Pedro shinātani.

⁶² Nāskakē nānoax tsekekaini kaax Pedro shināmitsai oiai finakōini.

Jesús kaxemetsama fanifo

(Mt. 26.67-68; Mr. 14.65)

⁶³ Nāskakē nā kexeafāfe Jesús kaxemetsama fanifo koshaketsayanā.

⁶⁴ Nāskata feopokaxō yōkanifo: “Noko yoife tsōa mia koshamakī.”

⁶⁵ Nāskakata Ichaketsanifo afara fetsa yōkaketsayanā.

Xanīfo tiito Jesús yōkanifo

(Mt. 26.59-66; Mr. 14.55-64; Jn. 18.19-24)

⁶⁶ Mā penano a judeofāfe āto xanīfofo ichanānifo. Nā ato Nios kīfixomisfāfe āto xanīfofonō, a Moisés yoikī kirika keneni keskara ato tāpimamisfori ato fe ichanānifo. Nāskakaxō Jesús yonifo xanīfo finakōia ano. Nārixō yōkanifo iskaḡakakī:

⁶⁷ “Noko yoife mīmākī Cristo.”

Askafaifono ato Jesús kemani: “Ēje, ē mato faitokai mā ea chanīmara faima.

⁶⁸ Ēri mato yōkaito mā ea kemaima.

⁶⁹ Akka iskaratīa ēfe Epa Nios ketaxamei ē tsaosarakōi. Nāmāi fasi finakōikē afama mīshti atiro,” ixō ato yoiaito,

⁷⁰ keyokōichi yōkanifo: “Akka, ġmīmē Niospa Fake?” ixō yōkaifono Jesús ato kemani: “Nā mā yoiai keskarakīa ē,” ato fani.

⁷¹ Ato askafaifo nikakakī anā yoinifo iskaḡakākī: “ġNikakapol! Nōkai anā añoa meka fetsa nō nikapaima. Mā nōakōi nō nika noko yoiaito,” ikanax yoinānifo.

23

Pilato ano Jesús yonifo

(Mt. 27.1-2, 11-14; Mr. 15.1-5; Jn. 18.28-38)

¹ Nāskakata keyokōi fininīfoḡakāta Jesús yonifo Pilato xanīfo finakōia ano.

² Nāskakata judeofāfe Jesús chakafakakī yōanifo iskaḡakakī: “Na feronāfake nōko kaifofu ato chakafamai iskaḡakī yoikī: ‘Na romanō xanīfoḡōichi mato kori yōkaito ināyamakāfe,’ ato faa. Nāskatari, ‘Ēkīa Cristo, ea Niospa nīchia ē mātō xanīfo inō. Ē Niospa Fake,’ noko faa,” ixō Pilato yoinifo.

³ Askafaifono Pilato yōkani: “ġMīmē judeofāfe xanīfo?” ixō yōkaito Jesús kemani: “Ēje, nā mī ea yoiai keskarakīa,” fani.

⁴ Nāskafaino Pilato nā ato Nios kīfixomis xanīfofo yafi nā ano niafo yoini iskaḡakī: “Na feronāfakeai afaa chakafaa ē ōima,” ato fani.

⁵ Ato askafaifo fāsikōi mekainīfoḡā yoinifo iskaḡakakī: “Na feronāfake ato tāpimayanā pexefo tii ano ato chakafakī mekaḡafafāsafai. Galilea anoxō ato taefamati, iskaratīa nono Judea anoxori ato askafamai,” ixō yoinifo.

Jesús Herodes ano yonifo

⁶ Askafaifāfe nikakī Pilato ato yoini: “ġChanīmamē na feronāfake Galilea anoamē?” ato faino,

⁷ “Ēje, nānoa,” fanifo. Nāskaxō xanīfo Herodes ano nīchini, nā Herodesmāi Galilea anoax xanīfoḡē. Nāskafaifono Herodes Jerusalén ano oni.

⁸ Jesús ōi Herodes inimakōini, mēxotaimamāi ōipaikatsaxakī, añoa yoiaifāfe nikakatsaxakī afama mīshti faito ōipaikī.

⁹ Nāskaxō afama mīshtifo yōkaketsani. Akka Jesúskaḡi pishta kemanima.

¹⁰ Nāskano nānori inifo, a ato Nios kīfixomisfāfe āto xanīfofo fe a Moisés yoikī kirika keneni keskara ato tāpimamisfo, nāfāfe Jesús mekaḡakī chakafanifo.

¹¹ Nāskakē Herodes āfe sorarofu feta chakakōifayanā kaxemetsama fanifo. Nāskakaxō rapati nana safemanifo nā rapati xanīfonā. Nāskaxō Herodes anā Pilato ano Jesús nīchini.

¹² Nāskatari Pilato fe Herodes rafe fatanānifo. Akka taeyoi chakafatanāyopaonifo.

Pilato ato yoini Jesús retenōfo

(Mt. 27.15-26; Mr. 15.6-15; Jn. 18.39-19.16)

¹³ Nāskaxō Pilato ato ichanāfani a ato Nios kīfixomis xanīfofo yafi xanīfo fetsafo, askatari a ano ikafori ato ichanāfani.

¹⁴ Nāskaxō ato yoini iskafakī: “Mā ekeki na feronāfake efea iskafakī yoiyanā: ‘Nato yorafo chakafakī mekafa,’ ixō. Akka māto ferotaifi mē yōka. Natokai afaa chakafa ē ōima, askatarikai ato chakafakī mekafaama a mā yoiyai keskafakī.

¹⁵ Akka Herodesri aōnoa afaa chaka nikama. Nāskaxō nokoki anā nīchia. Mā mā ōi natokai afaa chakafaama napanā.

¹⁶ Akka ē omiskōimakī tāpimani, chipo anā nīchixiki katanō,” ixō ato yoini.

¹⁷ Akka Pascua fistatīa Pilato ato inimamapaoni yora fisti karaxa mēranao tsekakī.

¹⁸ Akka keyokōi fāsikōi mekainīfōfanifo. “iNa chaka retefe, Barrabás noko kāmioxikil!” fanifo.

¹⁹ Nā Barrabás karaxa mēra ikimanifo pexefā rasi anoxō romanōfāfe āto xanīfo nō potanō fāsikōi mekainīfōfākāfe ato faito. Askatari ato retekē karaxa mēra ikimanifo.

²⁰ Akka Pilato Jesús nīchipaikī, afianā yorafo yoini.

²¹ Ato askafaito nikakakī yorafāfe fāsikōi mekafainīfōfanifo: “iA chaka mastafe!” fanifo.

²² Askafafono afianā Pilato ato yoini: “Akka, ūafaa chakafamē? Natokai afaa chakafa ē ōima. Afeskaikai natiroma. Akka ē omiskōimakī finata ē nīchi katanō,” ato faito.

²³ akka afo mēxotaima mekarianifo. “iMastafe!” faria fanifo. Askafaria faifono, “Māa akāfe,” ato fani.

²⁴ Ato iskafakī, yoiyanā, “Nā mā apaiyai keskafakāfe” ato fata,

²⁵ nāskaxō nā Barrabás karaxa mēranao kāmiani, “Noko kāmioxōfe,” faifono. Nā Barrabás karaxa mēra ipaoni xanīfofo potapaita ato retekatsaxakī. Nāskaxō Jesús ato ināni nā apaiyai keskafanōfo.

Jesús ifi cruz ikaki mastanifo

(Mt. 27.32-44; Mr. 15.21-32; Jn. 19.17-27)

²⁶ Mā Jesús mastaihofakī iyokakī, feronāfake fisti fichikaxō yoinifo cruz foxōikanō. Nā feronāfake Cirene ano ini, āfe ane Simón. Oriax oaito fichikaxō cruz iyamanafono Jesús acho cruzya kani.

²⁷ Nāskakē yorafā rasi kērofo fe oiakani, fiisi fonifo. Acho fokani, shināmitsakani āto Ifo shinākani.

²⁸ Nāskaifono Jesús ato ōikī ato yoini iskafakī: “Kērofo Jerusalén anoafōfāfe, eōnoax ōiayamakāfe, eōnoax ōiakimaroko māa ranā oia faatanākāfe, māto fakefoōnoaxri oiakāfe.

²⁹ Akka chipo a mā omiskōiai nokoxii, nāskakē mā yoikī iskafaxii: ‘Inimakāfe a fake fimisfoma, mā nofe omiskōikeranaki,’ ixō mā yoixii.

³⁰ Nāskakē yorafāfe machi yoikī taefakī iskafaxikani: ‘Nokoki māchifā mafakerafe noko fepoxiki nō narianō omiskōixikima,’ ixō yoixikani.

³¹ Ē afaa chakafayamafiamiskē ea iskafakani. Akka nā afara chakafakī xateyamaifo omiskōimakī finakōikani,” ixō Jesús ato yoini.

³² Nāskata yora chaka raferi iyonifo Jesúsya mastaihofakī.

³³ Nāskata a mastaifo ano nokonifo āfe ane Mapo Xao ano. Nānoxō Jesús mastanifo. Yora chaka rafeya fetsa takaijetsa ata, fetsari takaijetsa anifo.

³⁴ Nāskaxō mā mastafono Jesús Apa kīfīni: “Epa, ato raefafe na ea iskafaifo tsōa tāpiamakī,” Apa fani.

Nāskano soraroforo ato kaxetiya kaxenifo mā kanākanax Jesús rapati paxkanāxikakī.

³⁵ Nānoxō yorafāfe ōinifo. Nā xanīfofōfāfe kaxemetsamafaifono iskafayanā: “Nō ōinō nato yorafo ifimiski, iskaratīa āari ifimeimākai. Niospa Fakeaxroko āa ifimei kiki a Niospa katonino,” fanifo.

³⁶ Sorarofori Jesúski kaxemetsamanifo. Nāskaxō akiki fokaxō fimi ene kacha ayama-painifo.

³⁷ Iskafakī yoiyanā: “Mī judeofāfe āto xanīfomākī mīari ifimefe,” fanifo.

³⁸ Nāskaxō āfe mapo mānāori tafara kenekī iskafanifo: “Nafi judeofāfe āto Xanīfoki,” fanifo.

³⁹ Nāskano nā aya mastafō fētsa Jesús chakafakī mekafani iskafakī: “Mī Cristomākī māa ifimeta nokori ifife,” faito.

⁴⁰ akka fētsa yoikī iskafani: “Askafayamafe. ūMī Nioski meseimamē a mā afara chakafaax omiskōiai?” fani.

⁴¹ “Akka nō omiskōikōi chanīmakōi nōmāi afara chakafakatsaxakī. Akka na feronāfakekai afaa chakafama na omiskōiai,” fani.

⁴² Nāskaxō nāato Jesús yoini iskafakī: “Ifo, xanīfo finakōixō ea shināfe,” faito.

⁴³ Jesús kemani: “Ē mia pāraima iskaratīakōi mī efe kai nā sharafinakōia ari mī efe inimakōipakenaka,” fani.

*Jesús nani**(Mt. 27.45-56; Mr. 15.33-41; Jn. 19.28-30)*

⁴⁴ Nāskata xini keya nā mai tio fakishifākōitani. Nāskax mā xini kaino anā penatani.

⁴⁵ Nāskakē xini peinima. Nāskaino sama nami Nios kīfiti pexefā mēranoax nakirafekōi faxtepokekafāni.

⁴⁶ Nāskaino Jesús fāsikōi Apa kenani: “Epa, ea ifife ē mia ano kanō,” fata, nāskax nani.

⁴⁷ Nāskaito soraro xanīfāfe ōikī, Epa Nios aicho fayanā iskafakī yoini: “Chanīma, na feronāfake afaa chakafamisma,” ixō yoini.

⁴⁸ Nā ano niafāfe ōinifo Jesús naito. Nānoax fokani, oiai finakōi fonifo Jesús shinākani.

⁴⁹ Akka nā Jesús ōimisfāfe ano nētekaxō chai nikaxō ōinifo. Kērofāferi ōinifo, Galilea anoax afe foitaxakakī.

*Jesús makex kini mēra maifanifo**(Mt. 27.57-61; Mr. 15.42-47; Jn. 19.38-42)*

⁵⁰⁻⁵¹ Nāno feronāfake sharakōi fisti ini. Nāato Nios Ifofasharapaikōini. Āfe ane José, Arimatea anoa ini judeofāfe āto xanīfo. Nā José Nios xanīfokōi manapaoni. Nāatokai xanīfo fetsafāfe shināifo keskara shināpaonima.

⁵² Nā José Pilato ano kaxō Jesús yora yōkani maifai axiki.

⁵³ Mā yōkatani oxō cruz anoa fotomaxō sabanā fena sharakōipa rakoxō iyoxō mafa kini mēra rātani, a tsoa maiyomisma mēra.

⁵⁴ Nā penata itipinīshara fanifo, mā chaima safaro faino,

⁵⁵ kērofo Jesús fe Galilea anoax foitaxakakī. Nāfāfe José chīfāfanifo afeskaxō kini mēra Jesús rātaimākai ōifokakī.

⁵⁶ Mā āto pexe ano fēkaxō, pirofomā yafi a aō tereati itipinīsharafanifo. Akka kērofāfe judeofāfe pena tenetiā teneyonifo nā Moisés yoini keskafakī.

24*Jesús otoni**(Mt. 28.1-10; Mr. 16.1-8; Jn. 20.1-10)*

¹ Akka nā pena teneti safaro mā finōfaano nomīkonō fakishparikōi fonifo a Jesús maia ano. Pirofomā foifokani mā itipinīshara fakaxō.

² Mā nokokaxō ōiafo a kini a aō fepoitafo tokirinīfā mā fepekemea ini.

³ Akka ikifaikakī ōiafo āto Ifo Jesús āfe yora ano inima.

⁴ Nāskai ratekōiyanā afeskamē ikaxō shināpaiyāifono, feronāfake rafe ato ketaxamei nītani, āto rapati fafekōiyanā.

⁵ Nāskaifono kērofo ratekōiyanā maikiri fepepakefōfanifo. Nāskaifono nā ājiri rafeta ato yoini: “Āfeskakī nā yora nia mā fenaimē na yora nakē maifamiso mēranoa?”

⁶ Anākai nonoma, mā otokaina. Akka shinākapo a Galilea ano iyoxō mato yoimis keskara.

⁷ “Ā yora chakafāfe ea achikaxō ea mastafono tres nia oxata ē anā otoxira,” mato faito mā nikamismamē?” ixō ājiri rafeta ato yoini.

⁸ Ato askafaino a Jesús ato yoimis anori shinānifo.

⁹ Nāskakata nā Jesús maita anoax anā fekakī, nā once aōxō tāpimisfoya nā fetsafori ato yoitoshinifo nā ōitanaifo keskara.

¹⁰ Akka nā Jesúsnoa ato yoimiski chanifōfāifo tii, María Magdalena ikaino Juana ikaino Santiago āfe afa María ikaino kēro fetsafori inifo.

¹¹ Akka a aōxō tāpimisfāfe, “Āa chanīkanira,” ato fanifo. Ato nikakaspanifo.

¹² Ato askafaifono nikai Pedro fareke kaini, a Jesús maita ano ōikai. Kaxō ōia kini mēra a aō rakoita sabanā fisti mania ini. Nāskax anā Pedro pexe ano oni, “Kee, āfeskaitamē?” ikax.

*Jesús Emaús ano fāi kani**(Mr. 16.12-13)*

¹³ Āfia pena fistichi Jesús fe rafemisfo rafe pexe rasi āfe ane Emaús ano fonifo. Jerusalén fe Emaús once kilometro ini.

¹⁴ Fokakī yoifonifo a Jesús reteitafo.

¹⁵ Yoināfōfāifono Jesús atoki nokoax ato fe fāi kani.

¹⁶ Akka mā ōifikakī tsōa tāpinima, Niospa ato onātimafaino.

¹⁷ Askafōfāifono Jesús ato kemani: “ĀTsoaōnoa mā yoifokaimē fāi kakī?” ato faino tsoa tooxinima nāno nētenifo shināmitsakōiyanā.

¹⁸ Nāskaito nā āfe ane Cleofás kemani: “ĀMeres fisti mī Jerusalén ano ixō, mī tāpitamamē na rama iskaita?” faito,

¹⁹ Jesús kemani: “ĀAfaa afeskaitamē?” ato faito yoinifo: “Jesús Nazarete anoa nō yoi, nāatofi Niospa meka yoimiskī. Nāskakē yorafo akiki inimakōimisfo, Niosri akiki inimakōimis.

Niospa áfe sharaõxõ noko yoimis Niosxõ afama m̄shti noko faxomis. Áfe mekapa yorafo sharafata afara sharafo noko axomis.

²⁰ Nãskafaiato a ato Nios k̄ifixomis xan̄ifofo feta nõko xan̄ifofofãfe achikaxõ ato inãitafato retexaxõ mastanõfo.

²¹ Akka nã nõko kaifo israelifo romanõfo anoa ifimis ipainõra nõ famis nõko xan̄ifo ixiki romanõfãfe anã noko afeskafanõfoma. Akka mã tres nia finõa a naita.

²² Akka nã k̄erofo nofe ikafãfe noko yoikak̄i noko ratekõiafo. Fakishparikõi a maia ano õifokaxõ õiafo áfe yora ano ikama.

²³ Ano áfe yorak̄ema õitakani pexe ano anã feafo. Nãskaxõ yoiafo a áfe ajiri rafeta atoki nokoxõ ato yoiafo keskara iskafak̄i: ‘Jesús naama, iskarat̄ia nia,’ ato faafono.

²⁴ Nãskak̄e nofe yora rafe chipo a maia ano fokaxõ õiafo nã k̄erofãfe yoiafo keskarakõi ika. Akka Jesús áfe yora ano ikama.”

²⁵ Nãskafafono Jesús ato yoini iskafak̄i: “Kee, mãkai afaa tãpiama, mã tatimakõi. Akka a Niospa meka yoimisfãfe yoinifo keskarak̄i mã chan̄imara faima.

²⁶ Akka kenenifo iskafak̄i: ‘A Niospa n̄chia Cristo omiskõikõifiax, chipo Apa Nios fe xan̄ifokõi ixii,’ ixõ aõnoa kenenifo,” Jesús ato askafani.

²⁷ Nãskaxõ ato yoik̄i taefani a aõnoa yoik̄i kenenifo, a Moisés aõnoa yoik̄i keneni yoita, a Niospa meka yoimisfãfe aõnoa yoik̄i kenenifori; nãfo ato fe kak̄i ato yoifoni.

²⁸ Mã chaima pexe rasi ano nokokak̄i nã rafeta shin̄anifo: “Noko fin̄õfainikaira,” ikaxõ.

²⁹ Akka nã rafeta n̄tefanifo iskafak̄i yoivanã: “Kayamafe. Nono nofe n̄tefe mã yãtapakei kiki. Mã fakishaki,” faifono Jesús nãno ato fe n̄teni.

³⁰ Nãskata mã m̄isa ano tsaofono pixakak̄i Jesús pãa tsomainifõfã, Apa Nios k̄ifik̄i. “Aicho,” fata, nãskaxõ pãa kaxkepaxõ ato inãni pinõfo.

³¹ Ato askafaito nãskak̄e koshikõi Jesús tãpinifo. Akka mã tãpiafono ato makinoax yamarisatani. Nãskak̄e anã tsõa õinima.

³² Nãskak̄e ãa rafe yoinãnifo: “No fe fãi ok̄i a Niospa mekaõnoa yoik̄i kenenifo keskara noko yoifeaito nõ mea nõko õiti fepeisharakõia. Áfe meka sharakõi,” ikanax yoinãnifo.

³³ Nãskakanax Jerusalén ano anã fenifo. Mã f̄ekaxõ ato fichitoshinifo, nã Jesúsxõ tãpimisfo once a ato fe rafeafo fe ichanãkaxõ,

³⁴ iskafak̄i yoiaifono: “Chan̄ima, mã nõko Ifo otoa, mã Simón õimana,” ixõ yoinifo.

³⁵ Nãskaifono nã rafetari ato yoinifo nã Jesús ato fe fãi kaito õitanaifo: “Mã nõ õia noko pãa torexopakeaito,” ixõ ato yoinifo.

Jesús aõxõ tãpimisfoki nokoni

(Mt. 28.16-20; Mr. 16.14-18; Jn. 20.19-23)

³⁶ Nã ato yoiaifono, Jesús ato nakirafekõi nirisatani. Nãskaxõ ato yoisharakõini iskafak̄i: “Inimakõikãfe,” ato fani.

³⁷ Ato askafaino ratekõinifo, “Niafaka chaka nokoki nokoara,” ikanax.

³⁸ Askaifono Jesús ato yoini: “¿Afeskai mã rateim̄e? ¿Afeskak̄i mãto õiti m̄eraxõ mã chan̄imara fatiromam̄e?”

³⁹ Õikapo ãfe m̄eke yafi ãfe tae. Ëk̄ia. Ea ramãkapo. Akka õikapo na rãfo tsefefe. Akka niafakakai namiyata xaoyama, nã mã ea õiai keskara,” ixõ ato yoini.

⁴⁰ Ato askafak̄i yoivanã, áfe m̄eke toa yafi áfe tae toa ato ispani.

⁴¹ Ato askafak̄i yoiano ãto õiti m̄eraxõ shin̄anifo: “Jesús mara,” ikaxõ. Nãskaxõ chan̄imara fakeratama akiki inimakõinifo. Nãskaifono Jesús ato yõkani: “¿Nono mã afaayamam̄e pipanã?” ato faito,

⁴² foe xoia pishta inãnifo.

⁴³ Mã fixõ ãto ferotaifi pini.

⁴⁴ Nãskaxõ afianã ato yoini: “M̄efi mato yoiyomisk̄i mato fe iyoxõ eõnoa yoik̄i Moisésnõ nã a Niospa meka yoimisfonõ, eõnoa fan̄aiti kenenifo keskai n̄e askakõi,” ixõ Jesús ato yoini.

⁴⁵ Nãskak̄e áfe shin̄amã a kenenifo keskara ato shin̄amanaino tãpikõinifo.

⁴⁶ Ato yoik̄i iskafani: “Eõnoa yoik̄i kenek̄i iskafanifo: ‘Cristo a Niospa n̄chia mã nafiax tres nia oxata anã otoxii,’ ixõ eõnoa yoik̄i kenenifo.

⁴⁷ Akka ãfe aneõxõ ato yoikãfe. Jerusalén anoxõ ato yoik̄i taefakãfe. Nãskaxori nã maniafo tii anoafori ato yoifofãsafakãfe ãto chaka xatekaxõ anã Nios nikasharakõinõfo, nãskaifono ãto chaka ãto soaxonikai.

⁴⁸ Akka nã ãto yoiaito, mã õiai a mã nikaifori fetsafo yoipakexakãfe.

⁴⁹ Akka ãfe Yõshi Shara ã matoki n̄ichi ãfe Epa yoiyoni keskafak̄i. Akka mã nono Jerusalén ano n̄teyokãfe, ãfe shara matoki n̄chionõ nai m̄eraxõ nã ãto yoiaito keskafak̄i mã fetsafo eõnoa mã ato yoinõ,” ixõ Jesús ato yoini.

Jesús nai m̄era kani

(Mr. 16.19-20)

⁵⁰ Nāskaxō Jesús ato iyoni Jerusalén anoxō Betania pasotai. Nānoxō Jesús mēshainākafā Apa Nios yoini iskafakī: “Epa Niospa, eōxō tāpimisfo ato kexesharapakexafe.”

⁵¹ Nāskafakī yoiyanā ato makinoax Jesús Apa Nios ari kani.

⁵² Akka a aōxō tāpimisfāfe iskafakī yoinifo: “Jesús, mī nōko Ifo sharakōi, nō mīo noikōi,” ixō yoikanax chipo Jerusalén ano fonifo inimakōiyanā.

⁵³ Nāskakē mēxotaima Nios kīfiti pexefā mēraxō Nios yoisharapaonifo. Nā tii.

Juan Jesúsnoa Yoikĩ Keneni

Jesucristoõnoa Juan keneni

¹ (Èkĩa Juan. Iskaratĩa Jesucristoõnoa ã mato yoi mã tãpinõ. Cristo ãfe ane ipaoni, Meka. Nãato Niosnoa noko tãpimani.)

Afaa oniataima na Meka aneya iyopaoni. Apa Nios fe iyopaoni. Nãrifi Nioskĩ.

² Taefenakõĩ Nios fe iyopaonixakĩ, iskaratĩari afe ika. Afaa oniamatai nã Meka aneya Apa Nios fe iyopaoni.

³ Aõxõ Epa Niospa keyokõĩ onifani. Akka Jesúsmaisxõ afaa onifanima. Nãskaxõ Jesús feta Niospa afama mĩshti onifani.

⁴ Aõnoax keyokõĩ niafo. Niospa yorafo tii shinãmapaiyai keskafakĩ Jesúsxõ ato shinãmatiro ãto õiti xafakĩakõĩ inõfo.

⁵ ãfe õiti xafakĩakõĩfiyax yora chakafo mẽra Jesucristo ipaoni. Yora chakafãfe ãto õiti fakish keskara, shara shinãkanima. Askafiano yora chakafãfe Jesucristo xĩtitirofoma yorafo shara shinãmanaino ãto õiti anã fakish keskara inõfoma.

Niospa Juan Maotista nĩchini ato yoinõ

⁶⁻⁷ Epa Niospa Juan nĩchini Jesucristoõnoa yorafo yoinõ iskafakĩ: “ãfe õiti xafakĩakõĩ. Epa Niospa mato shinãmapaiyai keskara aõxõ mato shinãmatiro,” ixõ Juan ato yoini Jesús chanĩmara fanõfo.

⁸ Juankai Cristoma, Niospa nĩchini Jesucristoõnoa ato yoinõ.

⁹ Cristo fistichi yorafo shinãmatiro ãto õiti xafakĩakõĩ inõfo. “Mã oi,” ixõ Juan ato yoini.

¹⁰ Oaito yorafãfe tãpinifoma. Niospa Jesúsxõ ato onifafiano tsõa tãpinima Jesús.

¹¹ Nã mai onifani ano nokoni. Nãno nokofiaito ãfe yorafãfe, nãfãfe ifikaspanifo.

¹² Askafafiaifono a ifipaiyaiãfe Jesús ato yoini iskafakĩ: “Mã ea noikĩ chanĩmara faa. Nãskakẽ ãfe Epa Niospa fakefo mã itiro ea chanĩmara faax,” ixõ Jesús ato yoini.

¹³ Niospa fakefo yorafãfe fakefo keskarama. Yorafãfe fakefo yora keskara, yõramãĩ ato fake faano. Akka Nios fistichi ato fake fatiro. Yõrakai Niospa fakefo fake fatiroma. Nã Jesús chanĩmara faafo tii Epa Niospa ãto shinã ato fetsafaxotiro ãfe fakefo inõfo.

¹⁴ Nãskakẽ na Meka aneya Apa Nios ika anoax mai ano oni yorakõĩ ixikĩ. Nonoax nofe iyopaoni. Apa Nios keskara sharakõĩ mã nõ õipaoni. Nãato yorafo noikõimis. ãfe meka chanĩmakõĩ. Nã fisti Epa Niospa Fakekõĩ. Apa Nios imis keskara nãskakõĩriai sharakõĩ imiski.

Juan Maotista Jesucristoõnoa ato yoini

¹⁵ Jesúsnoa Juan ato yoini iskafakĩ: “Ea nikakãfe, õikapo. Nãõnoa ã mato yoimis. Iskafakĩ ã mato yoimis: ‘Mã oi. Ë taeyoi ofiano ea finõkõia ã fakeamano amãĩ Apa Nios fe iyopaonixakĩ;’” ixõ Juan ato yoini.

¹⁶ Jesús keyokõĩ noko shara famiski. Noko noikõixõ noko sharafa fafãfãini. Akka keyokõichi nõko õiti inimasharakõiaito nõ meemis.

¹⁷ Epa Niospa noko amapaiyai keskara Moisés yoini. Nãskakẽ Niospa noko yoini keskara Moisés noko tãpimani. Nãskakẽ Niospa noko õimapai noko noikõĩ afi chanĩmakĩ. Nãskaxõ Jesucristo nokoki nĩchini. Jesucristo noko keyokõĩ noimis. Nãskaxõ noko õimatiro Nios chanĩmakõĩ. Askatari Epa Niospa noko noi.

¹⁸ Tsõakai Epa Nios õimisma. Askafiax ãfe Fakekõĩ nã afe rafemis, arifi Nioskõĩ. Apa Niosnoa noko yoimis. Aõxõ nõ tãpitiro afe keskaramãki Epa Nios.

Juan Maotista judeofãfe ãto xanĩfofo yoini

(Mt. 3.11-12; Mr. 1.7-8; Lc. 3.15-17)

¹⁹ Nã judeofãfe ãto xanĩfofãfe Jerusalén anoxõ nã ato Nios kĩfixomisfo nĩchinifo, Juan ano. Akka nã Levifori ato nĩchinifo Juan yõkatanõfo: “¿Mĩ tsoamẽ?” fatanõfo.

²⁰ Askafaifono Juan ato kemani: “Èkai Cristoma. A nõ manai nõko xanĩfo ãkai aama,” ato faito,

²¹ “¿Akka mã Cristoma, mã tsoamẽ? ¿Mĩmẽ Elías?” faifãfe, “Èkai Elíasma,” ato faito, “¿Akka mã Elíasmaax mã tsoamẽ? ¿Mĩmẽ nã nõ manamis Niospa meka yoimis, nã nokoki oai?” faifãfe, “Maa, ãma,” ato fani.

²² Ato askafaino anã yõkanifo: “¿Akka mã tsoamẽ? Noko yoife a noko nĩchiafo nõ ato yoitanõ. Mĩ tsoamãki noko tãpimafe,” fanifo.

²³ Askafaifono Isaiás kirika keneni keskara nãnorikõĩ Juan ato yoini iskafakĩ: “Niospa mato yoipaiyai keskara ã mato yoinõ. Tsõa istoma anoxõ ã fãsikõĩ mekaikai: ‘Nõko Ifo nokoki oxii. Ìkisi itipinĩsharakãfe. Mã ipaoni keskara afianã iyamakãfe. Keyokõichi mãto chaka potakãfe, mẽstekõishara ishaxaxikakĩ;’” ixõ Juan ato yoini.

²⁴⁻²⁵ Nikakata judeofāfe nā fariseofo a Juanki nīchinifo yōkatanōfo iskafakāi: “Mī Cristomamāki, mī Elīasmamāki nā nō manamis Niospa meka yomis mīmaraka, akka, ¿afeskakī mī yorafo faka mēra ikimapakeimē maotisafakī?” ixō yōkakāfe ato fanifo.

²⁶ Juan ato kemani: “Ēfi ato maotisafapaikai. Ē ato askafafiaino nono fetsa nokoki nokoi. Mākai tāpiama.

²⁷ Ē iskaratīa mato Niospa meka yoifafāini. Askafiano aato chipo mato yoixii. Fāsi ea finōkōia. Ē afaa tāpiama ē sharakeroko ē āfe zapato risfi nexaxopanā,” ixō Juan ato yoini.

²⁸ Nā pexe rasi Betania faka Jordán okirishtaxō Juan ato faka mēra ikimapakekī maotisafani. Nānoax ato fe yoināni.

Niospa āfe oveja fake keskara, Jesús

²⁹ Askata pena fetsa Juanki Jesús kani. Jesús fichixō Juan yorafo yoini iskafakī: “Ōikapo. Nā Niospa āfe oveja tetomashta keskara oa. Nato keyokōi yorafo chaka soaxonō Epa Niospa nīchia nokoōnoax naxō nōko chaka noko soaxonō.

³⁰ Ē mato ađnoa yomis. Ē mato yoia iskafakī: ‘Chipo oi ea keskarama finakōia, nāmāi ē fakeamano iyopaonixakī. Nakīa mā oa.

³¹ Ērifi Cristo tāpixonoma yorafo maotisafapai a nōko kaifo judeofāfe tāpinōfora,” ixō Juan ato yoini Cristođnoa yoikī.

³² Ato yoixō anā Jesúsnoa Juan ato yoini: “Niospa Yōshi Shara nai mēranoax rifi keskara Jesúski fotopakekafanaito ē ōia.

³³ Ēri ōiyamano Epa Niospa ea yoiti iskafakī: ‘Fatofāfe ea chanīmara faimākai mī faka mēra ato ikimapaketiro maotisafakī. Akka mikiki fetsa nokoano ēfe Yōshi Shara nā feronāfakeki fotopakekafāxii. Afe nītaxii. Nā mī ōikī mī tāpixii nāato ēfe Yōshi Shara matoya rafemaxii āfe shinā shara māto shinā mēra nanenō, ixō ea yoia. Epa Niospa ea anori yoiyamakē Jesús nā Niospa Fake ēri tāpikeranama.

³⁴ Askafixō mē ōia. Askaxō ē mato chanīmakōi yoi nafi Niospa Fakeki,” ixō Juan ato yoini.

Jesúsxō tāpikī taefanifo

³⁵ Pena fetsa nāno Juan ađxō tāpimisfo rafe ini.

³⁶ Afe niafono Jesús ato finōfaini. Ato finōfainaito Juan ato yoini: “Ōikapo. Oa Niospa ina oveja fake keskara,” ixō Juan ato yoini.

³⁷ Juan ato yoiāito nikakata Jesús chīfafāinifo.

³⁸ Jesús ifiakekafā ato ōikī ato yōkani: “¿Tsoa mā fenaīmē?” ato faito, “Maestro, ¿fanī mī ikamē?” faifāfe,

³⁹ “Ono ōifokāfe, ē mato ispanō,” ixō ato iyoni. Askata afe fokakī ōiafo nā ika ano afe nokoni. Mā nokoafono mā xini kai ini. Nāno afe yātapakenifo.

⁴⁰ Nā rafe Juan ato yoia keskara nikakata Jesús chīfafāinifo. Fetsa āfe ane Andrés. Nā Andrés Simón Pedro āfe exto ini.

⁴¹ Jesús ika ano nokokata Andrés āfe ochi Simón fenaikai kani. Akiki nokoxō yoini: “A Niospa nokoki nīchia Mesias mā nō fichia. Nā Cristora nō famis. Ōiyotāfe,” fani.

⁴² Askata Andrés Simón Jesúski nokokini. Akiki nokoaino Jesús Simón yoini: “Mī Simón, Jonásfa fake. Iskaratīa ē mia ane fetsafaxonō. Nō mia Cefas fanō,” fani. (Cefas nāfa mekapa yomis Pedro fakī.)

Jesús Felipe yafi Natanael kenani afe fonōfo

⁴³ “Ē Galilea ano kaira,” ixō Jesús shināni. Kapaikī Felipe fichixō yoini: “Efe kafe, eōxō tāpisharakōixikī,” fani. Askafaino afe kani.

⁴⁴ Felipenō Andrésno Pedronō pexe rasi āfe ane Betsaida ano imisfo.

⁴⁵ Askata Felipe Natanael fichixō yoini: “Moisés Niospa yoini keskara kenekī iskafani: ‘Ē māto xanīfokōi Cristo matoki nīchixira,’ ixō Niospa yoini anori Moisés keneni. Nānorikōi Niospa meka yomisfāfe keneni. Nākaī mā nō fichia. Jesús José fake Nazarete ano ika. Nāđnoa Moisés feta Niospa meka yomis fetsafāfe keneni,” faito,

⁴⁶ “¿Afaa shara Nazarete anoax oimē?” ixō yōkaito, “Ofe, ōixikī,” Felipe fani.

⁴⁷ Natanael akiki nokoaino Jesús ōixō ađnoa yoini: “Nafi israelifāfe fakeki. Nato afaa chaka yomisma. Chanīmakōi fisti shināfafāimiskī. Tsoakai pāramisma,” ixō Jesús ađnoa yoini.

⁴⁸ Askafaito nikakī Natanael kemani: “¿Afeskaxō mī ea ōiyamafikatsaxakī mī ea tāpiamē?” faito, “Mia Felipe fichiyoamano ē mia ōikī taefaita ifi higuera nāmānoa ē mia ōita,” Jesús fani. (Akka Jesús Natanael chai ixō tāpini ōiyamafikī.)

⁴⁹ Askafaito, “Maestro, mīfi Niospa fakeki. Askatari mīfi israelifāfe āto xanīfokī,” faito,

⁵⁰ Jesús kemani: “ ‘Mī ifi higuera nāmā tsoa ē mia ōia,’ ixō ē mia yoia, ¿nā nikaxō mī ea chanīmara faamē? Afara shara fetsa finakōia mī ōixii.

⁵¹ Chanĩmakõĩ ã mia yoi. Ēfi yõra fakefiãx ã Niospa Fakekõĩ. Nai fepekemeano mĩ Niospa ãjirifo õixii. Epa Nios ika anoãx ãfe ãjiri ekeki fotota, mãpeĩnifõfã fotota, mãpeĩnifõfã ikaito mĩ õixii, ixõ Jesũs fani.

2

Jesũs ãfe mekapa fakakõifekẽ fimi ene onifani

¹⁻² Tres nia oxakata Canã pexe rasi anoãx Galilea mai anoãx feronãfãke kero fiaino yorafo ano fisti ichanãnifo. Jesũs ikaino afa ikaino Jesũsxõ tãpimisfori nãfo ato kenamanafono fenifo.

³ Fimi ene mã netsoafono, ãfa Jesũs yoini iskafakĩ: “Nafokai fimi eneyama,” fani.

⁴ ãfa askafaito Jesũs kemani: “Efa, çafeskakĩ mĩ ea yõkaimẽ afara fetsa afeskarafanõra ixõ? Iskaratĩã ã afara fetsa fena ayoima. Tsõa atiroma keskara ã fena akimakai,” fani.

⁵ Askafaito Jesũs ãfe ãfa a yonoxomisfo ato yoikĩ iskafani: “Nã Jesũs mato yoiai keskara faxokãfe,” ato fani.

⁶ Nãno tokiri kesho seis efapafo chaimashta tsaoa ini. Treinta galon a mẽra ikitiro ini. Nãskata nã kesho mẽra faka fikaxõ, judeofãfe ãto chokati mẽraxõ chokaketsanifo. Nãskakĩ judeofãfe chokasharaifãfe Niospa ato õi nãfo sharara ato fanõ, ãto xinifo ipaonifo keskara.

⁷ Nãskata Jesũs a yonoxomisfo yoini: “Nã keshofo mẽra faka fospifakãfe,” ato faito, faka fospikõĩ fanifo keshofo mẽra.

⁸ Askata Jesũs ato yoini: “A ichanãifono ato kexemis na faka ayamatakãfe,” ato faino, nãskata a ato kexemis faka foxonifo.

⁹ A ato kexemisto ayaxõ mea faka inima fimi enekõĩ ini. Nãskakẽ tãpinima Jesũs faka fetsafaano. (Akka nã yonoxomisfãfe õinifo Jesũs faka fetsafaito. Nãskakẽ tãpinifo.) Nãskakẽ tãpixoma a ato kexemisto a Jesũs faka fetsafaa a rama kero fiãni foxoni.

¹⁰ Nãskaxõ yoini: “Fistatĩã nã fimi ene sharakõĩ taefakĩ nõ ato ayamamis. Akka nã fimi ene sharakõĩ mã mitoxõ, nã fimi ene sharama chipo nõ ato ayamamis. Akka iskaratĩã fimi ene sharakapakõĩ mĩ ato ayamani,” fani.

¹¹ Jesũs nã pexe rasi Canã anoãx tsõa atiroma keskara taefaito õinifo Jesũsmãĩ finakõixõ tsõa afama mãshti atiroma keskara atiro. Nãskakẽ õikaxõ aõxõ tãpimisfãfe chanĩmara fanifo.

¹² Askata Jesũs afanõ ãfe extofonõ aõxõ tãpimisfonõ nã pexe rasi ãfe ane Capernaũm ano fonifo. Nãno oxa ranãyonifo.

Jesũs a Nios kĩfiti pexefã mẽraxõ a ato inãifo ato potani

(Mt. 21.12-13; Mr. 11.15-18; Lc. 19.45-46)

¹³ Mã judeofãfe ãto fista Pascua mã chaĩma ikaino Jesũs nã pexe rasi Jerusalen ano kani.

¹⁴ Nãnoãx Nios kĩfiti pexefã mẽraxõ fakkafo, ovejafo, ririfo afo ato minikaxõ kori finifo. Nãnori a kori kãmiafamisfori tsaoafono Jesũs ato fichini.

¹⁵ Jesũs ato fichita risfi koshati fata ato koshapaita a ato inafõ ato põtaketsani. Ovejafo potakĩ, fakkafo potakĩ fani. Askata yorafori potani. Mĩsa kamakĩ ãto kori mãchiafo saakĩ fetsani. Mĩsari kekxfakaya kekẽfofã potani.

¹⁶ Nã ririfãfe ãto ifofo ato yoini: “Na mãto inafõya ãfe Epa Niospa pexe mẽranoãx fotakãfe. çafeskakĩ ãfe Ēpa pexe mẽraxõ mã afarafo ato miniketsaimẽ kori fixikĩ? Afianã ãfe Ēpa pexe mẽranoãx afarafo inãnõnãyamakãfe kori fixikĩ. Na ãfe Epa ãfe pexe mẽranoãxkai mã afarafo minimitsaima,” ixõ Jesũs ato yoini.

¹⁷ Ato askafaito nikakata aõxõ tãpimisfãfe shinãnifo iskakakĩ: “Chanĩma, Niospa meka nãnorikõĩ Jesũsnoa kenenifo iskafakakĩ: ‘Epa Niosi, ã mĩ pexe kexesharapai a mẽraxõ mia fisti shinãnõfo. Afara fetsa a mẽraxõ anõfoma. Afara fetsakai mĩ pexe mẽranoã ã õipaima,’ ixõ kenenifo Jesũsnoa yoikĩ.”

¹⁸ Jesũs askafaito judeofãfe ãto xanĩfofofãfe yõkanifo: “çafeskakĩ Nios kĩfiti pexefã mẽraxõ mĩ ato potaimẽ? Niospa mia yoiaito afara tsõa atiroma keskara noko õimafe nõ mã chanĩmara fanõ,” ixõ yõkaifãfe

¹⁹ Jesũs ato yoini: “Mã na pexe pãoikano afianã tres nia oxata ã anã pexe faxii,” ixõ Jesũs ato yoini.

²⁰ Ato askafaino, “Kee. Nõko xinifãfe cuarenta y seis xinia anifo Nios kĩfiti pexefã fakakĩ. Akka, çmĩ koshikõĩ tres nia pexe faimẽ?” fanifo.

²¹ Askafafiakakĩ tsõa tãpinifoma Jesũs Niospa pexeõnoa yoinima. Aafi anofi yoimeni.

²² Askata Jesũs nafiax oxa rafeta tres nia ita otoano aõxõ tãpimisfãfe shinãnifo: “Chanĩma, a Jesũs ato yoita keskara, nã pexefã pãoikaikiri keparanãkĩ, ‘Ēfi tres nia otõxii,’ ixõ yoita. Iskaratĩã mã nõ tãpia aafi anofi yoimeita,” ixõ aõxõ tãpimisfãfe shinãnifo Jesũs otoano. Nãskakẽ Niospa meka kenenifo keskara chanĩmara fanifo. Nãskata nã Jesũs ato yoini keskara shinãkakĩ: “Chanĩmakõĩ Jesũs noko yoini,” fanifo.

Jesús keyokōi yorafo tāpini

²³ Askata tsōa atiroma keskara afama mīshti Jesús fani Jerusalén anoxō fista Pascuatia. Nāskara ōikaxō yorafā rasichi, “Na Cristo,” ixō chanīmara fanifo.

²⁴ Askafiaifono a yorafāfe āto shinā mēraxō shināifo keskara Jesús ato tāpini. (“Iskaratīa ea chanīmara fakani. Askafikaxō chipo, āa chanīra, ea fakani,” ixō Jesús ato tāpini.)

²⁵ Yorafāfe āto shinā mēraxō shināifo keskara tsōa Jesús tāpimatiroma. Areskōi Jesús onātiro a āto shinā mēraxō shināifo Jesús tāpikōia. Chanīmara fayoaifāfe Jesús ato onāni nāskax koshi shināmaki fetsenifo.

3*Jesús Nicodemo tāpimani*

¹ Nā feronāfake fariseo ini, āfe ane Nicodemo. Nāri judeofāfe āto xanīfo ini.

² Nāato fakishi oxō Jesús yōkani: “Maestro, nō tāpia mī noko tāpimanō mia Niospa nīchini. Mā nō tāpia Nios fe rafexoma tsōa afara fetsa atiroma nā mī akai keskara fakī tsōa atiroma,” faito,

³ Jesús kemani: “Ēfi chanīmakōi mia yoikai. Tsoari oa fake yome rama kāia keskaraxma Nios xanīfo ano nokotiroma,” fani.

⁴ Askafaito afianā Nicodemo Jesús kemani: “¿Afeskax afianā feronāfake yometatiromē? ¿Mā anifofax afeskai afianā āfa xaki mēra nanetiromē, fake yomeax anā kāixikī?” ixō Nicodemo Jesús yōkani.

⁵ Askafaito afianā Jesús kemani: “Fake yome rama kāi fakaya kāitiro. (Nāskax yōra fake itiro. Nāskariakī āfe Yōshi Sharaōxō Niospa mato ōiti fetsafaano mā āfe fake itiro.) Akka Niospa Yōshi Sharapa mato ōiti fetsafayamano mā Nios xanīfo ano nokotiroma.

⁶ A yōra fake fia nā keskara itiro. Nāskarifiakī Niospa Yōshi Sharapa mato fake fiano māri a keskara itiro.

⁷ Ē mia yoiaino mī ea nikax, ‘Mīri oa fake yome rama kāia keskara mī itiro,’ ē mia yoiano, ‘Aira, ¿afeskax nō afianā yometatiromē?’ iyamafe.

⁸ Nefeaito tsōa tāpitiroma fakirinoax oimākai. A nefe kai ariri tsōa tāpiama fakiri nefe kaimākai. Nāskari fakī Niospa yorafo āfe Yōshi Sharapa āto shinā fetsafaano tsōa tāpitiroma,” Jesús faito,

⁹ anā Nicodemo kemani: “¿Afeskax nō askatiromē?” ixō fani.

¹⁰ Askafaito afianā Jesús kemani: “Mī israelifo tāpimamis, ¿afeskakī na ē mia yoiai mī tāpimamē?”

¹¹ Ē mia chanīmakōi yoi. Nā nō nikafo nā nō ōiafo nāfo nō mato yoi. Nāskafekē nō mato yoiaino mā noko chanīmara faima.

¹² Nono mai anoafō afarafo afeskaraito ē mia yoiaito mī ea chanīmara faima. Askatari nai mēranoafori afeskaraito ē mia yoiaito mī ea chanīmara faima.

¹³ “Tsoakai nai mēra kaax anā fototiroma. Akka ē fisti ē nai mēranoax fotoa yora fakekōi ikiyoi. Ē afianā chipo kaxii.

¹⁴⁻¹⁵ (Nōko kaifo israelifo tsōa istomanoax chaka iyopaonifo. Nāskakē Niospa rono atokī nīchini ato chachinō. Nāskaxō Niospa Moisés yoini iskafakī: ‘Na rofetaxō rono faxō nīchinifofāfe ifiki ratāfe yorafāfe ōikanax sharanōfo, a ato chachia tii.’) Nāskari fakī ifi cruz ikakī ea mastakaxō ea nīchinifofāxikani. Nāskakē nā ea chanīmara faafo tii eōnoax Nios fe nīpanakako,” ixō Jesús ato yoini.

Epa Niospa keyokōi yorafo noi

¹⁶ Anā Jesús ato yoini iskafakī: “Epa Niospa keyokōi yorafo noikī āfe Fake fisti ato nīchixonī nai mēraxō nono mai anoax atoōnoax naiyonō. Nāskakē nā chanīmara faafo tii omiskōipakenakafoma afe nīpanakako.

¹⁷ Niospa āfe Fakekōi mai ano nīchini ato omiskōimatama āto chaka soaxoniyonō aōnoax isharapakexanōfo,” ixō Jesús ato yoini.

¹⁸ Askata anā Jesús ato yoini iskafakī: “Nā Niospa Fake chanīmara faifokai omiskōipakenakafoma. Akka nā nikakaspaifo ato Niospa omiskōimaxii. Niospa Fake nikakaspakanax omiskōipakenakafoma.

¹⁹ Pena fe fakish osinātiroma. Nāskarifiāi afara chaka fe Niospa fake rafetiroma. Nāskakē Niospa āfe fake nāmā nīchini nā yorafo pena keskara shara inōfo āto chaka xatekanax. Akka yorafāfe āto chaka potakaspakani. Niospa āfe fakeki fekaspakani. Nāskax isharakaspakani, chaka fisti shinākani. Niospa fake ōikaspakani āto chaka xateax isharaxikakima. Nāskakē Niospa ato omiskōimani.

²⁰ Afara chaka fichipaiyaito Niospa Fake ōikaspai. Nā chakafaifo fisti fichipaikani.

²¹ Nā shara nīpaiyāifo Niospa Fakeki fekani. Ato ōimasharaxikakī Niospa ato imasharanō,” ixō Jesús ato yoini.

Jesús Judea mai ari kani

²² Nāskata Jesús fe aōxō tāpimisfo Judea mai ari fonifo. Nāno ato fe iyoni. Nānoxō āto chaka potapaiyaifāfe ato maotisafapani.

²³⁻²⁴ Juan karaxa mēra ikimayofafomano nāatori yorafo maotisafapani. Nā Enón nā Salim chaimashta nika ini. Nāno faka noa ini. Nāskata nānoxō ato maotisafapani. Nāno yorafo akiki feaifāfe ato maotisafapani.

Juan Maotista Jesúsnoa anā ato yoini

²⁵ Nāskata Juan aōxō tāpimisfo āto kaifo judeo fetsafo fe feratenānifo. Afeskaxō mā chaka soatiromē ikanax feratenānifo.

²⁶ Nāskaxō Juan ano fōkaxō Juan yoinifo: “Maestro, nō mia yoipai. Faka Jordán okixori mī Jesús fichita. Fichixō mī noko yoita: ‘Nā Cristo Niospa noko nīchixona nā nō manamis,’ mī noko fāta. Nāatori iskaratīa yorafo maotisafapai. Oa yorafo keyokōi akiki fokani,” fanifo.

²⁷ Askafaifono nikakī Juan ato kemani iskafakī: “Nios fistichi yonomatiro a yonoxonō. Akka Niospa axoyamaino afaa afeska fatiroma.

²⁸ Akka ēkai Cristoma. Epa Niospa ea yola ē Cristoōnoa yorafo tāpimanō āto chaka xatenōfo, Cristo nokoaito chanīmara fanōfo. Nānori ē mato yoiaito mā nikamis.

²⁹ Afianā ē mato yoinō ea nikapo. Mā mā tāpia feronāfake āfe yama yoikī iskafatiro: ‘Aicho. Na kēro mī ea yoixona iskaratīa ēfe āfi iki,’ ixō yoiaino āfe yamari aōnoax inimatiro. Nāskarifiā ē Cristoyamafīax fetsafāfe nā Cristo Jesús chanīmara faifono ēri fāsi akiki inimakōi.

³⁰ Akka nā Cristo finakōia. Ēkai Cristoma. Ē afaa tāpiama, Cristo finakōia. Akka ē afianā afaa yoitiroa ea tanatamaroko, Cristo fisti nikakōinōfo,” ixō Juan ato yoini.

Jesús nai mēranoax fotoni

³¹ Anā Jesús ato yoini iskafakī: “A nai mēranoax nāmā fotoato nāato nāmānoafo ato finōa. Akka nā nāmānoax fakeafāfe nāmānoa fisti yoitirofo. Akka nā nai mēranoax fotoato nāatofi keyokōi finōa.

³² Nāato noko yoitiro a oiafo, a nikafori. Nāskakē fisti rasichi chanīmara fakani.

³³ Niospa meka chanīmara fakī nōko oiti mēraxō nō tāpisharakōitiro Niospa noko pāramisma, āfe meka chanīmakōi.

³⁴ “A Niospa nīchiato Niospa meka yoi Niospa āfe Yōshi Shara a mēra naneano. Nāskaxō tāpikōia.

³⁵ Epa Niospa āfe Fake noikī nīchini nai mēra ikafāfe āto Ifo inō, nāmānoafēferi āto Ifo inō.

³⁶ Nāskakē Niospa Fake chanīmara faax nō afe nipaxatiro. Akka tsōa chanīmara fayamakē Niospa ato omiskōimapakenaka. Akka Jesús nikayamakanax nakanax afe nīpanakafoma fakishifā mēranoax omiskōipakenakafo.”

4*Jesús kēro samāritanōki nokoni*

¹⁻³ Fariseofāfe nikanifo Juan yorafo maotisafapaito. Akka yora ichapa Jesús maotisafapaito fariseofāfe nikanifo. Akka Jesúskaī ato maotisafapanima, nā aōxō tāpimisfāfe ato maotisafapanifo. Aōnoa yoinifo keskai mā Jesús tāpiax aōxō tāpimisfo fe Judea anoax Galilea ano kani.

⁴ Judea mai anoax Galilea ano kakī Jesús Samāria finōfaini.

⁵ Askata Samāria ano Jesús nokoni. Nāno nā pexe rasi āfe ane Sicar ano nokoni. Nāno chaimashta Jacobo āfe tare ipaoni. Nā tare āfe fake Josē ināni māmāi anifoxō.

⁶ Nānori Jacobo kini fani nā kini mēranoa faka fixikī. Nā faka fiti ano xini keya Jesús nokoni. Chai inoaxmāi oax xokenāi Jesús nāno tsaoni.

⁷⁻⁸ Jesús teneyoaino, a aōxō tāpimisfāfe a piaifo pexe rasi anoa fiifokani fonifo. Mā foafono nāno kēro samāritanō akiki nokoni faka fiyoi. Faka fiti ketokonō Jesús tsaono akiki nokoni. Nāskaxō Jesús a kēro yoini: “Ea faka fexōfe ē ayanō,” fani.

⁹ Judeofo fe samāritanōfo oikaspa faatanāmisfo. Ato fetakai pimisfoma. Nāskakē nā kēromā Jesús yoini: “Mīfi judeoki. Ēfi samāritanōki. ¿Afeskakī mī, ‘Ea faka fexōfe,’ mī ea faimē?” faito,

¹⁰ Jesús kemani: “Niospa mia ināpaiyai mī tāpiama mī eari tāpiama. Akka mī ea yōkaito ē mia faka shara inākerana. Nā faka sharapa yorafo nimasharatiro,” Jesús fani.

¹¹ Nāskafaito kēromā Jesús kemani: “Mī keshoyata mī risfi yama. Kini chaikōi, ¿afeskafaxō mī faka kini mēranoa fīmē a noko nimasharatiro a mī ea yoiai keskara?” kēromā fani.

¹² Nāskata anā kēromā yoini: “Nōko xini Jacobo kini faxō faka fixō ayapaoni. Āfe fakefēferi ayapaonifo. Āto inafori ayamapaonifo. Nōri nā faka ayai. ¿Mī nōko xini Jacobo finōamē?” kēromā fani.

¹³ Askafaito Jesús kemani iskafakī: “Na faka kini mēranoa ayax chipo afianā mā nōmā iki.

¹⁴ Nāskafixō na faka ē ato ayamani anā nōamākiyamanōfo. Chanīmakoī, nā faka ayakanax isharapakexanōfo,” fani.

¹⁵ Askafaito kēromā kemani: “Mī feronāfake shara. Na faka shara ea ināfe ē ayax anā ē nōamākiyamanō ē afianā nonoa faka fiyamanō,” fani. (Jesús fakakiri keparanākī yoiaito nā kēromā tāpinima.)

¹⁶ Nāskaxō Jesús yoini: “Mī fene ifitāfe afianā nētekaini kaxō mī fene ifitāfe afe oxikī,” faito,

¹⁷ “Ēkai feneyama,” faito, “Mī chanīmakoī yoi. Mīkai feneyama,” Jesús fani.

¹⁸ “Mī fene cincoya mia fimisfo mī fenefo. Akka iskaratīa mī fetsa fe ika a mī fenema fe. Ea mā yoikōi mī feneyama,” ixō Jesús yoiaino,

¹⁹ “Ē iskaratīa ē mia tāpia mī Niospa meka ato yoimis.

²⁰ Nōko xinīfāfe na machi anoxō Nios kifipaonifo. Akka mī kaifo judeofāfe yoimisfo iskakakī: ‘Jerusalén anoxō nō Nios kifitiro,’ ixō yoimisfo,” faito,

²¹ “Ē mia yoinō, ea chanīmara fafe. Na machi fisti anoxos nō Nios kifitiro. Jerusalén fisti anoxori nō Nios kifitiro. Akka fanīma mīshtixō nō Nios kifitiro.

²² Māfi samāritanōfoki. Nios kifīkī nōko Epa Nios mā tāpisharama. Akka nōfi judeofoki. Nō nōko Epa Nios tāpikōia. Niospa noko tāpimani afeskaō yorafāfe āto chaka soatirofomāki Epa Nios fe ipaxakakī.

²³ Chipō afetūara nō Nios kifīkōikē, āfe Yōshi Shara fistichi noko tāpimatiro nō kifisharanō. Āfe Yōshi Sharaōxō nō Epa Nios kifīkōiaito nāskara Niospa fichipai.

²⁴ Nios yorama. Niosfi fero mēsho keskara sharakī. Nāskakē āfe Yōshi Sharaōxō nō Nios kifitiro,” Jesús fani.

²⁵ Askafaito kēromā kemani: “Mē tāpia a Niospa nīchia chipo nokoki nokoxii. Nā āfe ano Cristo. Nāato afama mīshti noko tāpimaxii,” faito,

²⁶ “Ēfi Cristokī, ē mefe mekai,” ixō Jesús yoini.

²⁷ Askata Jesús kēro fe mekaino aōxō tāpimisfo fenifo. Fēkaxō ōiafo Jesús a kēro samāritanō fe mekaito ōikani ratenifo. Nāskax yoinānifo: “ ‘¿Afeskai mī na kēro fe mekaimē?’ nō Jesús faima,” fanifo. Nāskata shinānifo: “Nā kēro samāritanō mī yoia keskarari nokori yoife, nōkai faima,” inifo.

²⁸⁻²⁹ Askata nā kēromā āfe kesho potafaini āfe pexe rasi ano kakī. Āfe pexe ano kaxō āfe yorafo yoini: “Oa feronāfake ekeki nokoxō ea yoia. Nā ē afama mīshti ē chakafamis mā ea kāimaxōa. Nāraka Cristo, ōifokāfe,” ixō ato yoini.

³⁰ Nikakata nā pexe rasi anoax Jesúski fenifo.

³¹ Mā kēro kaano aōxō tāpimisfāfe Jesús yoinifo: “Maestro, piyofe,” faifono,

³² “Ē aya a ē piāi. Nā ē piāi mā tāpiama,” ato fani.

³³ Ato askafaito nikakani yoinānifo: “Kee. ¿Tsōa a piāi ināfanamē?” ikanax yoinānifo.

³⁴ Askata Jesús ato yoini: “Ēfe Epa Niospa ea nīchini ē āfe yono shara yonoxonō. Nāato ea amapaiyai keskara ē apai. Nā ē piāi keskara,” Jesús ato fani. (“Mā nō piāx nō anā fonāikima, nō shara iki. Nāskarīfai Niospa noko amapaiyai keskara nō iki nōko ōiti sharakōi iki. Nāskara noko amapaiyai nō aki, a nō piāi keskara,” ato fani.)

³⁵ Anā Jesús ato yoini: “Māfi iskamiski: ‘Mā nōko tarepanoax mā nōko xiki choshiaki. Mā cuatro oxe akaki nō finō,’ mā imis. ¿Nāskarīfai mā shināimē: ‘Nō Jesúsnoa yorafo Niospa meka yoiano chipo chanīmara faxikani,’ ixō mā shināimē? Akka ē mato yoi: ‘Ōikapo, mā iskaratīa itipinīsharakōiafo Nios Ifofaxikakī,’ ato fani.

³⁶ Akka fētsa āfe yama āfe tare kexexotiro, āfe xiki topixoxiki. Chipō kopifaxinō, tare ifāfe. Nāskarīfai fētsa taefakī yorafo Niospa meka yoitiro. Ato yoifaino chanīmara fayokanima. Askatari chipo fetsa oxō ato yoiaito chanīmara fakani. Nā rafe Niospa ato shara imapakenaka nā rafetamāi Niospa meka ato yoimisfono.

³⁷ Nāskakē chanīkima mā yoimis iskakī: ‘Fētsa xiki fanano chipo fētsa nā xiki fimi fitiro.’ Nāskarīfai fētsa Niospa meka yoikī taefaano fētsari chipo rama oxō nāatori ato chanīmara famatiro.

³⁸ Akka mā taefakī ato yoimisma iskaratīa ē mato nīchia mā ato chanīmara famanō. Taefakī fetsafāfe Niospa meka ato tāpimani, mā ato tāpimayoamano. Mā ato tāpimayoxoma koshikōi mā ato chanīmara famatiro māmāi taefakī ato yoiyomisfono,” ixō Jesús ato yoini.

³⁹ Nāskata Jesús aōxō tāpimisfo yoiaino nā kēro samāritanō āfe kaifo yoikai kani pexe rasi ano. Kaxō ato yoini: “Oa feronāfake mā ea tāpixō ea yoia nā ē afara amis keskara. Ea ōiyamafikatsaxakī mā ea tāpia,” ato fani. Ato askafaino Jesús fisti rasichī chanīmara fanifo.

⁴⁰ Askata nā kēro nikakanax Jesúski fonifo āfe meka nikakani. Akikī nokoxō yoinifo: “Nofe nono iyofe,” fanifo. Askafaifono nikata Jesús ato fe oxa rafeyoni.

⁴¹ Āfe meka nikakaxō yora ichapato chanīmara fanifo.

⁴² Askata chanĩmara fakaxõ yorafãfe nã kẽro yoinifo: “Mĩ Jesũsnoa noko yoia fisti nõ chanĩmara faima. Nõakõĩ mã nõ ãfe meka nikakõia. Nãskakẽ iskaratĩa nõ chanĩmara fai. Nãato na yorafa ikafo tii ato ifitiro afe ìpaxanõfo.”

Jesũs sharafani xanĩfo yonoxomisto fake

⁴³ Askata mã oxa rafeta Jesũs nã samãritanõfo anoax Galilea ano kani.

⁴⁴ Jesũs Galilea anoax yosini, nãnoxori yonopaoni. Afe yorafa nõno inifo. Askata Jesũs ato yoini iskafakĩ: “A afe pexonifãfe a ato Nios yoiomis yoikakĩ iskafatirofo: ‘Akai tsoama, afe nofe pexoniki,’ fatirofo,” ixõ ato Jesũs yoini.

⁴⁵ Askata Jesũs Galilea ano nokoni. Jerusalén anoax Galilea ano Jesũs nokoamano yorafa Galilea anoax Jerusalén ano fonifo fista aki fokani. Nãnoxõ tsõa atiroma keskara Jesũs Niosxõ ani. Nã afama mĩshti Jesũs anoxõ akaito õinifo. Nãskakẽ Galilea ano Jesũs atoki nokoano akiki inimanifo: “Aicho, mã mĩ oakĩ,” Galilea anoxõ fanifo.

Jesũs xanĩfãfe fake sharafani

⁴⁶ Askata nã pexe rasi ãfe ane Caná ano Jesũs nokoni nã Galilea mai ano. A ãfe mekapa faka fetsafani ano fimi ene keskara fakĩ nõno Jesũs nokoni. Nãnoa xanĩfo fẽtsa Jesũs õiyoi oni. Nã pexe rasi ãfe ane Capernaúm anoax oni. Nãnoax xanĩfãfe fake isinĩ ini.

⁴⁷ Askata xanĩfãfe nikani Jesũs Judea anoax oano Caná ano nã Galilea mai ano. Nikata akiki oxõ yoini: “Xanĩfo, ãfe fake isinĩ iki nai kiki. Ëfe fakeshta ea õixonĩ ope ãfe fake ea sharafaxoxikĩ,” ixõ iyopaini.

⁴⁸ “¡Ooa! Tsõa atiroma keskara ã fayamakẽ mã ea chanĩmara fakeranama,” ixõ Jesũs ato yoini.

⁴⁹ Afianã nã xanĩfãfe Jesũs yoini: “Xanĩfo, efe kayoikape ãfe fake nayamanõ,” ixõ iyopaini.

⁵⁰ Askafaito Jesũs kemani: “Mĩ fake namaki. Katãfe. Iskaratĩa mĩ fake niaki,” Jesũs fani.

Jesũs askafaito nikafaini kani.

⁵¹ Mã nokoi kaino ãfe inafõ akiki nokokaxõ yoinifo: “Mĩ fake mã shara, anã isinĩ ikima,” fanifo.

⁵² Askafaiãfe ato yõkani: “¿Fanĩ xini rakano ãfe fake sharamẽ?” ixõ ato yõkaito, “Xini keya mĩ fake ãfe yona matsita,” fanifo.

⁵³ Yoiaifãfe nikata ãpa shinãni: “Chanĩma, Jesũs ea yoita xini keya, ‘Mã mĩ fake sharaki katãfe,’ ea Jesũs fãita,” ixõ xanĩfãfe shinãni. Nãskata na xanĩfonõ ãfinõ afe yorafoyaxõ Jesũs chanĩmara fanifo.

⁵⁴ Nãskata Jesũs Judea anoax Galilea ano nokoxõ afianã tsõa atiroma keskara fakĩ ato õimani. Ato õimakĩ rafe fani.

5

Jesũs feronãfake isinĩ imis Betesda anoxõ sharafani

¹ Askata Jesũs Galilea anoax Jerusalén ano kani ãfe kaifo judeofõ feta fista akikai.

² Nãno Jerusalén ano ovejafãfe ãto kãiti ano ãa ini. Judeofãfe yoisifo a ãamã ãfe ane Betesda. Nã ãa kesemẽ pexe kafãshara mĩshti tsaofafãina ini, cinco pexe.

³⁻⁴ Nãno yora isinĩ imisfo ichapa rasi inifo nõno rakafafãinafo. Fẽxõfo, chãtofo, sifitianifo nãfo isinĩ imisfo nã pexe kafãshara mĩshti mẽra rakafafãinafo ini. Akka Niospa ãfe ãjiri nã ãa ano nokomis nã ãa fecha fecha axiki. Nã ãa fecha fecha akaino nã isinĩ ikaifo nã nashi taea nashiax koshi sharamisfo. Nãskakẽ nã isinĩ ikaifãfe Niospa ãfe ãjiri manamisfo ato ãa fecha fecha axoyonõ nã nashi nã taea koshi sharaxikakĩ.

⁵ Jesũs nõno nokoxõ feronãfake fichini treinta y ocho xiniya amis finipaikĩ ranãmis.

⁶ Feronãfake finimisma fichixõ Jesũs tãpini nã feronãfake treinta y ocho xiniya amis isinĩ itiani. Nãskaxõ yõkani: “¿Mĩ sharapaimẽ?” ixõ yõkani.

⁷ Askafaito kemani: “Niospa ãjirinĩ ãa fecha fecha akaino tsõakai ea ãa ano iyomisma. Akka ã nashipaiãino ea xitimisfo. Ëkai fena nashitiroma. Nono tsõama ea ãa ano iyoikaxiki,” fãito,

⁸ Jesũs yoini: “Fininãkafã, mĩ rakati fifaini kasharatãfe,” Jesũs fani.

⁹ Askafaito nikai fininãkafãta ãfe rakati fifaini kani.

Nã pena safaronõ finimisma Jesũs sharafani.

¹⁰ Nãskano nã judeofãfe ãto xanĩfofãfe õinifo nã feronãfake finimismato ãfe rakati fifaini kaito yõkanifo: “¿Afeskakĩ mĩ rakati safaronõ mĩ foikaimẽ? ¿Mĩ tãpianamẽ nõko xinifãfe yopaonifo safaroaino nõ afaa metiroma? Akka mĩ rakati na safaronõ mĩ fotiroma,” fanifo.

¹¹ Askafaiõno ato kemani: “Oa feronãfãke ea sharafaxõ ea yoia iskafakĩ: ‘Mĩ rakati fotãfe,’ ea faa,” ato fãito,

¹² “¿Tsõamẽ a feronãfake anori mia yoia?” fanifo.

¹³ Finimismatokai tãpinima tsõa sharafaamãki Jesũsmã a finimisma sharafãini koshikõĩ a makinõax yorafã rasi mẽra kaano. Nãskakẽ finimismato anã õinima.

¹⁴ Askano chipo Jesús a feronáfake shara faa Nios kífiti pexefā mērañoa fichixō yoini: “Anā mī isini ikima. Mā mī shara. Anā a mī chakafapaoni keskafakī afianā chakafayamafe. Mī chaka xatefe. Mī chaka mī xateyamakē afaranā mia anā omiskōimatiroki,” ixō Jesús yoini.

¹⁵ Nāskax nā feronáfake Jesús makinoax kani judeofo yoikai, “Oa Jesús ea shara faa,” ato fani.

¹⁶ Nā Jesús safaronō yora shara faa nikakanax judeofo āto xanīfofo Jesúski ōitifishkinifo. Ōitifishkikakī Jesús mekafakī chakafanifo.

¹⁷ Askafaifono Jesús ato yoini: “Ēfe Epa pena tii yonofāfāini. Iskaratīari yonoi. Ēri ēfe Epa yonoai keskafakī ēri yonoi,” ixō ato yoini.

¹⁸ Nāskakē fakirira shinānifo. Nāskara shinākakī Jesús mekafanifo: “Nōko xinifāfe yoini keskara nō safaronō afaa metiroma, akka Jesús yonoi yorafo shara fakī. Nāskaxō noko yoiā: ‘Nios ēfe Epakōi,’ noko faa. Nāskax Nios keskarakōi ipai,” fanifo. Nāskax a ranā yoinānifo: “¿Afeskaxō nō Jesús ato retematromē?” ikanax yoinānifo judeofo āto xanīfofo.

Jesús Niospa Fakexō nā Niospa akai keskara fai

¹⁹ Nāskara shināifāfe Jesús ato tāpini. Nāskaxō Jesús ato yoini iskafakī: “Chanīma ē mato yoinō. Ea nikakapo. Ē Niospa Fakekōikī ēa ē afara afeskarafaima. Ēfe Epa Niospa akai keskara ōixō ēri aki. Nā fisti ē aki.

²⁰ Ēfe Epa Niospa ea noikōi. Nāskakī nā akai keskara ea tāpimani ēri anō. Akka afara fetsa finakōia ea ispaxii. Askaino mā ea iskafakī yoixii: ‘Aira ōikapo. ¿Afeskakī iskara shara akimē?’ mā ea faxii.

²¹ Epa Niospa yora naano anā otofatiro. Nāskaxō anā nimasharatiro. Ēri āfe Fakexō nāskari fakī ē ato nimapaikī ē ato nimatiro shara īpaxanōfo.

²² Epa Niospa ato yoiā fatora yora shara nīpanaka, akka fatorari omiskōipakenaka. Ēfi Niospa Fakeki. Ea nīchini ē yorafo yoinō fatofomāki a afe nīpanakafo, akka fatoforimāki a omiskōipakenakafo.

²³ Nāskaxō yorafāfe Epa Nios yoixikani: ‘Mī fāsi shara. Tsōa mia finōtiroma,’ ixō yoixikani. Nāskarifiakī eari yoixikani ēmāi āfe Fakekē. Ea nīchini. Akka iskaratīa ea tsōa yoisharaima. Ēfe Epa Niosri askari fakani yoisharakima.

²⁴ “Ē mato chanīmakōi yoinō. Fatoto ēfe meka nikasharaimākai, akka nā ea nīchiniri, fatotori chanīmara faimākai nāfi ēfe Epa Nios fe nīpanakakī. Akka iskaratīa yorafo oa naa keskara ikafo Nios Ifo faamax. Akka Epa Nios chanīmara fakanax afe ipanakafo. Nafix afianā otōxikani.

²⁵ “Ē afara fetsa chanīmakōi mato yoinō. Yorafāfe āto ōiti mēra shināsharakōiafoma oa naa keskarakōi ikafo. Akka ē Niospa Fakeki. Iskaratīa ē ato yoiāito ea nikakanax anā naa keskara ikanima, efe isharpakenakafo.

²⁶ Akka tsōa Epa Nios onifanima. Akōi ika. Nāskarifiakī Epa Niospa yoiā keskara āfe Fakeri tsōa onifanima. Ēakōi ē ikaki.

²⁷ Ēfi Niospa Fakeki. Nāskakē ea yoiā iskafakī: ‘Mī yorafo yoitiro fatofomāki efe nīpanakafo, akka fatoforimāki omiskōipakenakafo,’ ixō ea nīchini.

²⁸⁻²⁹ Nāskara ē mato yoiāino rateyamakāfe. Akka nā namisfāfe ēfe meka nikakani otōxikani. Afara shara famisfo nikasharakōimisfo nāfo Nios ano nīpanakafo. Akka nā afara chakafamisfo afo otokanax omiskōipakenakafo,” ixō Jesús ato yoini.

Niospa Jesús nīchini a apaiyai keskara famaxikī

³⁰ Anā Jesús ato yoini iskafakī: “Akka ēakōi ē yorafo omiskōimanima. Epa Niospa ea yoiāino ē aki. Epa Niospa keyokōi tāpia. Akka ea mēstekōi yoiā keskara ē yorafo yoitiro fatofomāki omiskōipakenakafomāki. Ē ato kaxpa omiskōimanima. Eres fistikai ē apaiyai keskara ē shināima. Ēfe Epa Niospa ea nīchini a apaiyai keskara ea famaxiki.

³¹ Ēakōi ē yoimesharaito tsōa ea tāpitiroma ē afe keskaratiromakī.

³² Akka nāno yora fētsa eōnoa yoisharamis. Nāato ea chanīmara fakē māri a nikasharakōitiro.

³³ Akka mā yorafo Juan Maotistaki nīchimis eōnoa nikanōfo. Juan eōnoa meka shara yoisim nā yorafāfe mato tāpimakani. ‘Jesúsfi Cristoki,’ Juan ato famis. Nā nikaxō mato tāpimamisfo.

³⁴ “Ēfi tsōa atiroma keskara fakē mā mā ōimiski. Akka tsōa eōnoa mato yoiāmaito nāfo ōixō mā tāpitiro ē mato chanīkima yoisim. Nāskafekē Juan eōnoa mato yoisim keskara ē afianā mato shināmani mātō chaka mā xatenō omiskōitamaroko Epa Nios fe mā isharpapakexanō.

³⁵ Juan feronáfake fāsi sharakōi. Oa rāpari fafeai keskara shara. Fakishikakī nō rāpari ōtano fai chaxasharano nō fāi katiro. Oa rāpari fafeai keskara shara mato Juan tāpimanano

mā mato chaka xateax mā Nios fe mā isharapakexatiro. Mato yoimis keskara mā shināmis iskafakī: 'Aicho, Juan noko mēstekōi Niospa meka yoimis. Nō nikashara,' ixō mā shināmis.

³⁶ Juan eōnoa yoikōimis; akka ēfe Epa Niospa Juan finōkōia. Ēfe Epa ea nīchini a apaiyai keskara ē anō. Iskaratīa a ea yonomanai keskara ē aki. Akka a ē akai keskara ōixō mā tāpitiro Epa Niospa ea nīchini a ea yonomanai ē mitonō.

³⁷ Epa Niospa ea matoki nīchini. Nāatori eōnoa yoimis. Mā kai Epa Niospa āfe meka nikamisma, askatari mā ōimisma.

³⁸ Niospa ea nīchifinino mā ea chanīmara faima. Nāskax āfe meka shara mato shinā mēra naneama.

³⁹⁻⁴⁰ "Moisés feta a Niospa meka yoimis fetsafāferi kenenifo keskara mā mā ōisharai māmāi shināki iskafakī: 'Ē Niospa meka anekī ē tāpitiro afeskax ē Nios fe isharapakenakamāki,' ixō mā shināi. Nāskaxō a Niospa meka yoikī kenenifo mā anefafāimis. Akka Moisés feta a Niospa meka yoimisfāfe eōnoa kenefinifono mā ekeki opaima ē mato imasharapanā.

⁴¹ "Epa Niospa ea yoikī iskafaino: 'Ēfe fake shara,' ea faino ē inimatiro. Akka yorafāfe, 'Jesús sharaki,' ea faifono ē askafamapaima.

⁴² Ē mato tāpikōia. Mā kai Epa Nios noima.

⁴³ Epa Niospa ea nīchini ē matoki onō. Ē matoki ofiakē mā ea ifipaima. Akka yora fetsa āakōi matoki oaito mā ifitiro.

⁴⁴ Akka mā yora fetsafo, 'Na yorafo sharafora, noko fanōfora,' ixō mā ato yoimapai. Akka Niospa mato yoisharaino mā fichipaima. Nāskakī mā Niospa meka mā nikakaspai.

⁴⁵ "Mā ea chanīmara fayamakē ēfe Epa Nios ē yoima. Nāskakē, 'Nā Jesús noko chakafai,' ixō shināyamakāfe. Mā shināmis iskakī: 'Moisés meka nikai nō Epa Nios fe nīpanaka,' ixō mā shināmis. Anori mā shināfiaino Moisés Epa Nios yoixii mākaikōi āfe meka nikakōimiskē.

⁴⁶ Moisés eōnoa yoikī kenenī. Nāskaxō Moisés āfe meka chanīmara faxō eari mā chanīmara fakerana.

⁴⁷ Nāskafixō a Moisés kirika kenenī mā chanīmara faima. Nāskaxō eari mā chanīmara faima," ixō Jesús judeofāfe āto xanīfofo yoini.

6

Jesús cinco mil feronāfakefo ato pimani

(Mt. 14.13-21; Mr. 6.30-44; Lc. 9.10-17)

¹ Askata Jesús anā iamāfā āfe ane Galilea pokefaini. Āfe ane fetsa Tiberias.

² Nāskaxō Jesús isinī imisfo āfe mekapa ato sharafaito ōikani yorafā rasichi chīfafainifo.

³⁻⁴ Nāskafifono judeofāfe āto fista Pascua mā chaima pakeaino Jesús māchi keya ano nokoax aōxō tāpimiso fe tsaoni.

⁵⁻⁶ Nāno tsaofono yorafā rasi Jesúski fenifo. Akiki feaifāfe atokiri fesoxō Jesús ōini. (Ato ōikī Jesús shināni oa yorafo fonāikani rakikā. Nāskaxō Jesús āa tāpini afeskaxō ato pimaimākai.) Nāskaxō Jesús Felipe tāpimapaikōini a āfe mekapa afama mīshti atiro. Nāskaxō Jesús Felipe yōkani: "¿Faniā afaa ato pimaxikī nō fimē?" ixō Jesús Felipe yōkaito,

⁷ nikaxō Felipe kemani: "Kee, Ifo, nō dos cientos nia oxata yonoxō nō kori fitiro akka a tiikai nokotiroma na yorafā rasi nō ato pimapanā," Felipe fani.

⁸ Nāskafekē Jesúsxō tāpimis fetsa Andrés nā Pedro ēxto yoini:

⁹ "Ōipo. Na fāke cinco pāa fea. Foe rafeya fea. Akka yora ichapato pitirofoma. Fisti rasichi pitirofo. Nono yora ichapa rasi. Na pāa pishta tsoa nokotiroma," fani.

¹⁰ Askafaito Jesús yoini iskafakī: "Ato yoikāfe tsaonōfo," ato fani. Nāno fasi ichapa ini. Nā Jesús ato yoiai keskai fasi mēra tsaoni fetsenifo. Cinco mil feronāfakefo tsaoni fetsenifo. Kērofori, fakefori tsaonifo.

¹¹ Nāskax tsaofafono Jesús nā cinco pāa fita Apa Nios yoini: "Aicho, Epa," ixō Apa Nios yoita pāa yafi nā foe rafe kaxkepaketa aōxō tāpimiso ato ināni, afāferi ato inānōfo. Fikaxō pikani māyakōinifo.

¹² Nāskax keyokōi yorafo māyakōiafono Jesús ato yoini: "Nā pāa yafi foe texefafo fikāfe fēta mēra nanekāfe afaa pishta fenoyamanō," ato fani.

¹³ Ato askafaito nikakaxō nā pāa yafi foe texefafo finifo. Doce fēta fospifanifo.

¹⁴ Nāskata Jesús āfe mekapa foe rafe yafi cinco pāa ato pimaito ōikanax yoinānifo: "Chanīmakōi Jesús Niospa meka yoimis. Nā Epa Niospa aōnoa yoipaoni. Nokoki nīchini," ikanax yoinānifo.

¹⁵ Askafafono Jesús tāpixō āfe ōiti mēra shināni: "Na yorafāfe ea kerexkai āto xanīfokōi ea imapaikani," ixō tāpini. Askata ato makinoax machi fetsa ari kani.

Jesús iamāfā femākā kani

(Mt. 14.22-27; Mr. 6.45-52)

¹⁶⁻¹⁷ Askata mā xini kaino aōxō tāpimisfo kanōanāfā mēra nanefainifo ĩamāfā pokefainifo nā pexe rasi Capernaúm ano fokani. Nokoafomano mā fakishaino Jesús atoki nokonima.

¹⁸ Nēfefaino ĩamāfā pooitifikōini.

¹⁹ ĩamāfā chai naisti nēxpakīaxō nēfefānē ato akaino ĩamāfā pooitifikōini. Jesús ĩamāfā kamaki kaitokai tsōa tāpinima mā fichifikaxō. Tāpíamax ratekōinifo.

²⁰ “Ēkīa. Rateyamakāfe,” Jesús ato fani.

²¹ Nāskaxō yoinifo: “Aicho. Kanōa mēra naneyofe,” fanifo. Mā Jesús naneano nāskax ĩamāfā kesemē nokorisanifo.

Yorafā rasichi Jesús fenanifo

²² Nāskaino mā penano yorafā rasi okiri ĩamāfā kesemē nētenifo. “A aōxō tāpimisfo fe Jesús kaito nō ōiama. Nonokai kanōa fetsama. Akka Jesús nonoki,” ikanax yoinānifo.

²³ Nāskatari Tiberias chimaxō kanōa rasi fenifo. A Jesús yorafā rasi ato pimaita ano fenifo.

²⁴ Askatari Jesúsxō tāpimisfo ano inifoma. Jesúsri ano inima. Nāskaxō yora rasichi Jesús fenaifokani fonifo kanōanāfānē Capernaúm anoa.

Jesúsfi a nō piāi keskaraki. Akka nō piāxma nō nitiroma. Nāskarifiakī nō Jesús chanīmara faaxma nō afe nīpaxatiroma

²⁵ Mā fichikaxō Jesús yoinifo: “Maestro, ¿afetīa mī nono oamē?” ixō yōkanifo.

²⁶ Askafaifono ato kemani: “Chanīmakōi ē mato yoi. A yōra atiroma keskara ē mato ispafekē mā ea fenaima. Akka ē mato pimaino keyokōi mā māyakōita. Nāskakē mā ea fenai.

²⁷ Shinākapo. a piāi fisti mā shināfafāini. Akka a mā piāi pisiāx payokometiro. Nāskaxō mā yonofafāini a mā piāi fixiki. Akka a mā piāi fisti shināyamakāfe. A ē mato inātiro shinākāfe. A mā piāi ē mato inātiro a keyonakama. Nā piāx mā efe isharpakenaka. Ēfi yōra fakekōiki. Ēfe Epa Nios ekeki inimai ea katōxō matoki ea nīchini ē mato imasharapakexanō,” ato faino,

²⁸ nikakakī yoinifo: “¿Nō afeskatiromē Nios nokoki inimanō?” ixō yoinifo.

²⁹ Askafaifāfe Jesús ato kemani: “Epa Niospa ea matoki nīchini. Akka mā Epa Nios inīmamapaikī ea chanīmara fakāfe,” Jesús ato faino,

³⁰ kemanifo: “A tsōa atiroma keskara fakī noko afama mīshti ispafe nō mia chanīmara fanō.

³¹ Akka Niospa meka kenenifo iskafakī: ‘Tsōa atiroma keskara Moisés a piaifo ato ināpaoni. Nā pena tii nai mēranoax pakepaoni a piaifo,’ ixō kirika kenenifo. A nōko xinifāfe pīpaonifo tsōa istoma anoxō afe ane mánā. Nāskakē mūri a Moisés aka keskara fafe, nō mia chanīmara fanō,” ixō yoinifo.

³² Askafaifono Jesús ato yoini: “Ē mato pāraima na Moiséskai a nōko xinifāfe piāi ato inānima, nai mēraxō Epa Niospa ato ināni. Akka Epa Niospa mā iskaratīa mato mēra nīchia a mā piāi keskara nai mēraxō mato ōiti mēra nanenō.

³³ Nā fistichi yorafo nīmapakekōixatiro. Epa Niospa nāmā nīchini yorafo ato imasharapakexanō,” ato faito,

³⁴ “Īfo, a nō piāi noko ināfafāife a mī noko yoiai,” fanifo.

³⁵ Jesús ato kemani: “Ēfi nā mā piāi keskarakī. Ē yorafo nīmasharapakexatiro. Mā nō piāx māyatiro. Nāskax nō anā fonāitiroma. Nāskarifiakī ea shināifāfe ē ato shināmafāini. Ē ato potanakama. Nāskakē āto ōiti mēra inīmakōitirofo. Askatari mā nō faka ayax nō anā nōamāitiroma. Nāskarifiakī ea shinākanax efe isharpakenakafo.

³⁶ Nāskafekē ē mato yoiaito mō ea nikakī mā ea chanīmara faima.

³⁷ Akka nā ea Ifofaafono Epa Niospa ea atoya imasharapakena nāfāfemāi ea Ifofakōiafono. Akka fatorafāferi ea Ifofaifāfe nāfo ē ato kexesharapakena. Ē ato potapakenakama.

³⁸⁻³⁹ Epa Niospa ea nīchikī ea yoini iskafakī: ‘Nā mefe ipaikani mefe ipanakafō tsoa pishta fenonakama. Nāfo mā nafiamisfono mī anā fotoxō mī ato ōtofaxii nofe nīpaxanōfo. Nāskara ē fichipai,’ ixō ea nīchini. Nāskakē nā ēa ē apaiyai keskara faxikī ē mai ano onima. Akka nā ea nīchiato ea amapaiyai keskara faxikī ē mai ano fotoni.

⁴⁰ “Ēfi Niospa Fakeki. Ea chanīmara fakanax nāfo ēfe Epa Nios ari efe isharpakenakafo. Nafiafāfe ē afianā mai ano fotoxō ē ato ōtofaxii isharpapakexanōfo. Nāskara ēfe Epa Niospa fichipai,” ixō Jesús ato yoini.

⁴¹ “Ēfi nai mēranoax onikī a mā piāi keskaraxō yorafo imasharaxikī,” Jesús ato faito nikafikaxō chanīmara fatama judeofāfe Jesús mekafakakī yōachepenifo;

⁴² “Kee, nikakapo. Na Jesús, āfe apa José yafi āfe afa María nō ōimis. Nakai afaama. Akka, ¿afeskakī noko yoimē: ‘Ēfi nai mēranoax Nios lka ariax onikī?’ Nāskakē na meka nō chanīmara faima. Iskara meka nō nikapaima,” ikanax yoinānifo.

⁴³ A āto ōiti mēraxō shināifo keskara Jesús ato onāxō ato yoini: “Ekeki yōachepeyamakāfe.

⁴⁴Ē chanīma. Epa Niospa ea nīchini. Nāskafekē Epa Niospa āto ōiti mēra ato shināmayamaino ea tsōa chanīmara fatiroma. Akka nā ea chanīmara faax nakē ē anā nai mēranoax fotoxō ē ato otofaxii efe īpaxanōfo.

⁴⁵Niosnoa yomimisfāfe kirika kenenifo iskafakāki: ‘Epa Niospa keyokōi ato tāpimaxii,’ ixō kirika kenenifo. Fatora yorafāfe ēfe Epa Nios nikaifono ato tāpimaxii. Nāskaxō afāferi ea chanīmara faxikani.

⁴⁶“Tsōakai Epa Nios ōimisma. Eres fisti ē Epa Nios ōimis, ēmāi a makinoax onixakī.

⁴⁷Ēfi mato chanīmakōi yoikai. A ea chanīmara fai ēfe Epa Nios fe ipanaka.

⁴⁸“Ēfi nā mā piāi keskaraki. Nā ea chanīmara faafo tii Epa Nios fe isharapakenakafo.

⁴⁹Nōko xinifo Moisés fe tsōa istoma ano ipaonifo. Nā pipaonifo, āfe ane mǎnā. Akka mǎnā pipaonifoxakī mā nai mitokomenifo.

⁵⁰⁻⁵¹Ē nai mēranoax ēfe Epa Nios ika anoax oni. Ēfi na mā piāi keskaraki. Nā ea chanīmara fai nāfi efe nīpanakakī. Nā nōko xinifāfe pipaonifo nai mēranoax pakeaito aatokai ato nimasharamisma. Iskaratīa afianā Epa Niospa nai mēraxō mato ināi a mā piāi. Nā piāx yorāfo isharapakenakafo anā nanakafoma. Ēfi nā mā piāi keskaraki. Nāskakē ē keyokōi yorāfo ē ato nāxoxii nisharapakexanōfo,” ixō Jesús ato yoini.

⁵²Nikakani judeofo fochishpanā faatanānifo. “¿Afskaxō na feronāfāke āfe nami noko inātiromē nō pinō?” ikanax yoinānifo.

⁵³Jesús āfe namikiri keparanākī ato yoini: “Ē mato pǎraima. Ēfi yōra fakekōiki. Mǎ ēfe nami piyamata ēfe imi ayayamata ikax mā nipaxatiroma.

⁵⁴Fatorafāfe ēfe nami pikani ēfe imiri ayakani isharapakexikakī. Nāskakē ē afianā nai mēranoax fotoaitīa a namisfo ē ato otofaxii Epa Nios ari nisharapakexanōfo.

⁵⁵Ēfe nami na mā piāi keskara. Ēfe imiri a mā ayatiro keskara.

⁵⁶Fatorafāfe ēfe nami pikani, ēfe imiri ayakani, nāfo efe rafesharapakenakafo.

⁵⁷Akka ēfe Epa Nios nīpanakato nāato ea nīchini. Nāskai ēri aōnoax nīpanaka. Nāskakē efe rafesharakanax eōnoax nīpanakafo.

⁵⁸“Afianā ē mato yoi. Nōko xinifāfe a pipaonifo āfe ane mǎnā. Nā pifiakanax mā nai keyonifo. Akka ēfi Epa Nios ariax ē matoki oni. Ēfi a mā piāi keskarakī. Ea pikanax eōnoax nisharapakenakafo,” ixō Jesús ato yoini.

⁵⁹Judeofāfe āto ichanāti pexe mēraxō Capernaúm anoxō āfe meka Jesús ato yoini.

Jesúsnoax yorāfo nīpaxatirofo

⁶⁰Jesúsxō tāpimisfo a ranā yoinānifo: “A Jesús noko yoia keskara fekaxkōi. Tsōakai tāpitiroma. Nōkai na keskara meka nikamisma,” ikanax yoinānifo.

⁶¹Jesús ato onāni a ranā yoināifāfe. Akka atirifāfe Jesús nikapainifoma. Nāskaxō ato yoini: “¿A ē mato rama yoia keskara mā nikapaimamē? ¿Anā mā ea chanīmara faimamē?”

⁶²Ē yōra fakekōi fiāx a ē ipaoni ano nai mēra ē anā kaito mā ea ōiki, ¿mā ea chanīmara faimamē?

⁶³Akka Niospa Yōshi Sharapa nā fistichi yorāfo nimasharapaketiro. Yorāfokai yōra nimapaketiroma. Akka ēfe Epa Niospa Yōshi Sharaōxō ē mato yomimis. Nāskakē ēfe meka chanīmara faax mā nisharapakexatiro.

⁶⁴Nāskafekē fetsafāfekai ea chanīmara fakanima,” ixō Jesús ato yoini. Jesús taefakī ato ifini. “Fatotokai ea chanīmara fatama ea ato achimaximē,” ixō Jesús tāpiyoni.

⁶⁵Askaxō anā ato yoini: “Ē mato yoia iskafakī, Epa Niospa āto ōiti mēra ato shināmayamaino ea chanīmara fatirofoma,” ixō ē mato yoia.

⁶⁶Nāskaxō Jesús ato yoiai keskara nikaxaxō a chīfamisfāfe Jesús potakaxō anā tananifoma.

⁶⁷Akka Jesús a aōxō tāpimis doce ato ifini. Afetiāma ato ifiyoni aōxō tāpimisfo inōfo. Nāskaxō ato yoini iskafakī: “¿Māri emakinoax kapaimē?” ato faino,

⁶⁸Pedro kemani: “Ifo, nō fato fetsakai Ifofatiroma. Mī fistichi mī noko yoitiro afskax nō isharapakexatiromākī.

⁶⁹Mīfi mī Nios ariax nokoki oniki. Mīfi sharakōi Cristokī. Nios nā nīpanakato nāato āfe Fakekōi mī. Nā nō chanīmara fai,” askafaito,

⁷⁰“Ē mato doce feronāfake ifini mā eōxō tāpimis inō. Akka ē mato ififinino a mato fe rafea fetsa mā a mēra Satanás chaka nanea,” ixō Jesús ato yoini.

⁷¹Nā Simón Iscariote āfe fake Judas ini. Nā Judasnoa Jesús ato yoini. Jesús nā Judasri ififinino nāato Jesús ato achimani fetsafāfe retenōfo.

7

Jesús āfe extofāfe chanīmara fanifoma

¹Askata Jesús Galilea ano kafāsani ato tāpimafofāsafai. Judea ano kayopainima judeofāfe āto xanīfofāfemāi retepaiyafono.

²⁻⁵ Judeofāfe āto xinifāfe tapas fapaonifo shinākakī fista anifo. Askata judeofo ichapa rasi Judea mai ari Jerusalén ano oxō fista aki fokani fonifo. Mā fista chaima ikaino Jesús Judea mai ari kayotama, Galilea ano nēteni. Āfe extofori nā Galilea ano afe inifo. Āfe extokōfiofiakaxō Jesúskai nafi Cristoki Niospa nīchini ixō tsōa chanīmara fanifoma. Nāskaxō yoinifo iskafakakī: “Nonoax Judea mai ano katāfe nā mia Ifofamisfāfe nā mī ato axomis keskara ōinōfo. Nā mī amis keskara mī ato ōimanamano fetsafāfekai mia tāpitirofoma. Nā mī afama nīshti akaifo ato ispafofāfe,” faifāfe

⁶ ato kemani: “Ē iskaratīa ari katiroma. Ēfe Epa ea nīchiyoima. Akka afetūara kapai mā katiro,” ato fani.

⁷ “Na yorafāfekai Epa Nios yafi ea chanīmara faafoma. Nāfāfe ea noikaspakani. ‘Māfi afarafo chakafamis,’ ē ato famis. Nāskakē ea noikaspakani. Akka mato noikaspakanima.

⁸ Akka māri fista axiki Jerusalén ano fotakāfe. Ē kayoikaima. Ēfe Epa Niospa ea nīchiyoima,” ixō Jesús āfe extofo yoini.

⁹ Mā ato yoita Galilea ano Jesús nēteni.

Jesús kani fista akikai

¹⁰ Nāskata mā āfe extofo fista akikai, Jerusalén ano foafono Jesúsri chipo kani. Tsōa tāpiamano onekōi Jerusalén ano kani.

¹¹ Nānoxō nā judeofāfe āto xanīfofōfāfe Jesús fenakani yoinānifo: “¿Fanīmē nā feronāfake?” fanifo.

¹² Nāno yora ichapa rasi inifo. Atirifāfe iskafanifo: “Jesús feronāfake sharakōi,” ikaxō yoinifo. Askafaiāifāfe atirifāfe yoikī iskafanifo: “Maa. A feronāfakekai sharama. Yorafo pāramis,” ikaxō yoinifo.

¹³ Nāskax a ranā yoinānifo judeofāfe ato nikayamanōfo judeo xanīfofoki mesekakī.

¹⁴ Fista mitokomeamano Jesús Nios kīfiti pexefā mēra ikikaini a mēraxō ato yoixikī.

¹⁵ Judeofāfe āto xanīfofōfāfe nikaxaxō yoinifo: “Aira. Nikakapo. ¿Afeskakī na feronāfake kenekī tāpikī finayamafixō tāpifinakōiamē?” ikanax yoinānifo.

¹⁶ Nā yoiaifo keskara onāxō Jesús ato yoini: “Ēfe shināmā shinākōixō ē mato yoima. Epa Niospa ea nīchini nā ea shināmanai keskara ē mato yoi.

¹⁷ Fatotora a Niospa yoiai keskara apaikī tāpitiro akka ēa ē shināxō ē mato yoima, Epa Niospa ea shināmanaino ē mato yoi.

¹⁸ Fatora yora fētsa āfe shināmā shināxō āakōi ato yoi. Nāato yorafo shināmapai iskafakī: ‘Nā feronāfake mekakī tāpikōia, ea fanōfora,’ ixō anori ato shināmapai. Akka yōra fētsa āa āfe shināmā shināx mekaima. A nīchinito shināmanaino mekai, a nīchini fisti yoisharanōfo. Nāskakē nā yōra ato chanīkima yoi, ato pāraima.

¹⁹ Nōko xini Moisés Niospa meka mato kenexoni. Akka mā nikasharamisma. Nāskakē pena tenetiā ē feronāfake sharafaano mā ea retpai,” ato faino,

²⁰ “Kee. Tsoakai mia retpaima. Mī mēra niafaka yōshi chaka nanea,” faifāfe

²¹ ato kemani: “Ē feronāfake pena tenetiā sharafaino akka mā ea yoikī iskafamis: ‘¿Afeskakī Jesús pena tenetiā feronāfake sharafaimē?’ ixō mā eōnoa yoisimis.

²² Ē pena tenetiā afara shara faa keskafakī māri pena tenetiā afara memis. Moisés kirika kenekī yoini keskafakī māri mato fake feronāfakefo rama kākē mā ocho nia oxano mato fake feronāfakefo mā foshki repa xatemis. (Akka Moiséskai askara noko yoinima, nōko xinifāfe askara yoinifo.) Akka iskaratīa pena teneti ikaino mā mato fake feronāfakefo mā foshki repa xatemis.

²³ “Moisés yoini keskara nikakī pena tenetiāri mā mato fake feronāfakefo mā foshki repa xatemis. Akka, ¿afeskakī mā ekeki ōitifishkikimē na pena tenetiā ē na feronāfake sharafaano?”

²⁴ Nāskakē a yōra afara shara fakē ōixō yoikī iskafayamakāfe: “Nāto afara chakafai kiki,” fayamakāfe. Mēstekōi yoisharakāfe,” ixō Jesús ato yoini.

“Ē ēfe Epa Nios ariax ē oni,” Jesús ato fani

²⁵ Askata yora rasi Jerusalén ano ikanax yoinānifo: “¿A na feronāfakemē xanīfofōfāfe retpaiyāifo?” ikanax yoinānifo:

²⁶ “Ōikapo, yorafā rasichi ōifiaifono mā ato yoi. Akka tsōakai afaa faima. Mā xanīfofōfāfe mā tāpiafo rakikīa nā Cristo, a Niospa nokoki nīchini.

²⁷ Ētsa, aama rakikīa Cristo. Cristo oaito nō tāpitiroma fakiranoax oi. Akka na feronāfake mā nō tāpia fakiax oamāki,” ixō yoinifo.

²⁸ Askafaiāifāfe nikaxō Nios kīfiti pexefā mēra ikixō Jesús ato yoini iskafakī: “Chanīma, mā mā ea tāpia ē fakiax oamē,” ato fani. “Akka ēa ēfe shināmā shināx ē oama. Akka ēfe Ēpa ea nīchini. Nāfi chanīmismaki. Akka māfi ēfe Epa mā tāpiama.

²⁹ Ē ēfe Epa ariax oni. Nāato ea nīchini. Nāskakē ē a tāpikōia,” ixō Jesús ato yoini.

³⁰ Ato askafaito nikakani akiki òitifishki ikakī achipainifo karaxa mēra ikimapaikakī. Akka a reteaifo āfe pena nokoamano achipainifo. Tsōakai Jesús afeska fanima.

³¹ Nā yorafā rasichi Jerusalén anoafāfe yoinifo: “Tsoa fētsa atiroma keskara fakī Jesús Niosxō afama mīshti noko ispa. Nā Jesús afama mīshti fai tsōa atiroma keskara fakī. Akka yora fetsa oax āa iskai yoi: ‘Ēkīa Cristo,’ iki yoi. Akka atokai afama mīshti fakī Jesús finōtiroma,” ikanax yoinānifo. Nāskakī Jesús chanīmara fanifo.

Fariseofāfe āto inafō nīchinifo Jesús achitanōfo

³² Nā yorafā rasichi Jesúsnoa meka shara yoiāifāfe fariseofāfe nikanifo. Nāskaxō judeofāfe āto xanīfofo feta fariseofāfe a Nios kīfiti pexefā kexemisfo nīchinifo Jesús achitanōfo karaxa mēra ikimaxikakī.

³³ Askata Jesús ato yoini: “Ē anā nono mato fe samarakaima. Ē samamashta kai a ea nīchini shināfāini.

³⁴ Ē mato anoax kaino mā ea fenakī mā ea fichitiroma. A ē kai arikai mā katiroma,” ixō Jesús ato yoini.

³⁵ Ato askafaito nikakanax judeofāfe āto xanīfofo yoinānifo: “¿Faki na feronāfake kaimē nō fichitiroma? Nā nōko kaifo griegofo nā pexe rasi anoax paxkafainifo nāno kai rakikīa. Nānoxō griegofo tāpimaxikī kai rakikīa,” fanifo.

³⁶ “¿Afaa noko yoipaimē iskafakī? ‘Mā ea fenafikikai mā ea fichitiroma. Ē ika arikai mā katiroma,’ ixō noko yoiāi. ¿Afaa noko yoipai iskaimē?” ikanax yoinānifo.

Niospa Yōshi Sharapa yorafo nimapaketiro

³⁷ Askata mā fista mitokomeaino Jesús nā yorafā rasi mēraxō niinākfā fāsi mekainākfā ato yoini iskafakī: “Nikakapo. Nā mā nōamā iki faka ayapaiyai keskai ekeki fekāfe.

³⁸ A ea chanīmara faafāfe Niospa meka kenenifo keskara yora āfe xaki mēra faka poyo poyo iki netsotiroma keskara shara itiro ea Ifofaax,” ixō āfe Yōshi Sharaki keparanāki Jesús ato yoini.

³⁹ Akka faka ato yoinima, Niospa Yōshi Sharaōnoa ato yoini iskafakī: “A ea chanīmara fai ēfe Epa Niospa āfe Yōshi Shara fe rafepakenaka,” ixō Jesús ato tāpimani Apa Nios ari kayoxoma yorafāfe āto xanīfokōi ixikī. Nāskakē Jesús kayoamano Niospa āfe Yōshi Shara ato fe rafeama.

Jesúsnoa yoinifo. Askafikaxō anoris shinānifoma

⁴⁰ Jesús nikakaxō atirifāfe yoinifo: “Chanīmakōi nā feronāfake Niospa meka yoimis a nō manai,” ikanax yoinānifo.

⁴¹ Atirifāferi yoinifo: “Nāfi Cristoki,” ixō yoinifo. Akka fetsafāfe yoini: “Maa, nakai Cristoma. Cristokai Galilea anoax kāitiroma.

⁴² Niospa meka kenenifo keskara, ‘David āfe fena inō Cristo. Nā David ipaoni Belén ano. Nānoaxri Cristo kāixira,’ ixō kirika kenenifo. Akka Cristokai Galilea anoax kāitiroma,” ixō yoinifo.

⁴³ Nāskakē nā yorafāfe Jesúsnoa nikakaxō anoris shinānifoma. Fetsafāfe Jesús chanīra fanifo, fetsafāferi chanīmara fanifo.

⁴⁴ Atirifāfe Jesús achipainifo karaxa mēra ikimapaikakī. Achipaifakakī tsōa Jesús afeska fanima.

Judeofo āto xanīfofofāfe Jesús chanīmara fanifoma

⁴⁵ Askata fariseofāfe āto Nios kīfiti pexefā kexemisfo fenifo. Āto xanīfokoki feaifono ato yōkainifo: “¿Afeskakī mā Jesús achiamamē noko efexoxikī?” ixō ato yoinifo.

⁴⁶ Ato askafafono ato kemanifo: “Na feronāfāke āfe meka sharakōi, tsōa anori yoimisma,” ato fanifo.

⁴⁷ Ato nikakaxō fariseofāfe ato yoinifo: “Kee, Jesús mā matori pāra.

⁴⁸ Akka nōfi mātō xanīfofo feta a Moisés kirika keneni nō tāpikōiakī. Akka nō fatotokai nō Jesús chanīmara faima.

⁴⁹ Akka nā yorafāfe mā rama Jesús nikafo nāfāfe a Moisés kirika keneni tsōa tāpiafoma. Niospa ato omiskōimaxiki,” ikaxō ato yoinifo.

⁵⁰ Askafafafono Nicodemo taeyoi nāato pena fetsa Jesúski kani fakishi afara yōkaikai. Nārimāi fariseoax nāskaxō afe rafeafo yoini:

⁵¹ “Efe yora mīshtichi, ē mato yoinō. Nōko xinifāfe āto xanīfofāfe yoinifo keskara nō fatora feronāfake nikasharayamaxō, ‘Afara chakafaira,’ nō fatiroma iskafakī: ‘Nāto afarafo chakafai kiki nō omiskōimanō,’ ixokai nō askafatiroma,” ato askafaino kemanifo:

⁵² “Mī noko yoi Galilea anoxō yoiāifo keskara. Galilea anoxō Niospa meka tāpiafoma. Shināpo. Fato feronāfakekai a Galilea anoxō Niospa meka yoimis oama. Akka nono fistixō Niospa meka noko yoitirofo,” ikaxō Nicodemo kemanifo.

⁵³ Nāskax yoinākanax āto pexe rasi ano fonifo.

8

Këro äfe fenema fe ikaito xanïfofofäfe retepainifo

¹ Nāskata Jesús machi äfe ane Olivos ano kani.
² Penaino Jerusalén ano nokoax anā a Nios kïfiti pexefä mëra Jesús oni. Nāno yorafā rasi afianā akiki fenifo nikai fekani. Askata tsaoxō ato yoini.

³ Ato yoiaino a Moisés yoiikï kirika keneni keskara ato täpimamisfo fe fariseofo fenifo. Këro äfe fenema fe ikaito fichikaxō Jesúsiki efenifo. Yorafā rasi nēxpakïa këro nïchinifo keyokōichi öinöfo.

⁴ Askafakaxō Jesús yoinifo: “Maestro, na këromā afarafo chakafaa. Äfe fenema fe ikaito nō fichia.

⁵ Moisés iskafakï noko yoini: ‘Këro äfe fenema fe ikaito öikï nō tokirinï tsakakï retetiro,’ ixō Moisés noko yoini. Akka, ¿mï noko afaa faimê?” fanifo.

⁶ Nāskaxō Jesús kemamapainifo, “Fakiri noko yoimākai,” ikaxō äto xanïfofo yoipaikakï. Askafaifono Jesús äfe mëkemā mai keneni.

⁷ Yökarifaifono Jesús atoki fininākafā ato yoini iskafakï: “Fatotokai mā afaa chakafamis-mamē na këro mā tokirinï tsakakï taefai,” Jesús ato fani.

⁸ Mā ato yoixō afianā äfe mëkemā mai keneni.

⁹ Nāskano mā ato yoiaino nikakaxō a Jesús mai keneai öikanax nā këro mekafakï chakafamisfo fisti rasi tsekefaifäinifo. Nā anifo tii foi taenifo. Chipa naetapafo fonifo. Mā foafono Jesús fisti nāno këro fe nēteni.

¹⁰ Nāskax Jesús fininākafā nā këro yökani: “¿Nā feronāfakefo mia yōafo mā foafomê? ¿Tsoa fisti nēteamamē anā mia yōaxikakïma?” ixō Jesús yökaito,

¹¹ “Ífo, tsoa pishta nēteama,” faito, “Érikai mia mekafakï chakafaima. Iskaratïa mï katiro. Afianā mï chaka ipaoni keskara anā askayamafe,” ixō Jesús nā këro yoini.

Jesús pena xafashara keskara

¹² Askata mā këro kaano Jesús yorafā rasi yoini. Ato yoini iskafakï: “Éfi pena keskarakï. É nā yorafo tii imasharatio shara ïpaxanöfo, anā fakish keskara inöfoma. A ea Ifofai fenotiroma,” ixō Jesús ato yoini.

¹³ Nikakakï fariseofäfe yoinifo: “Na mï noko yoiaino anorikai tsōa mïönoa noko yoima. Mïa mï yoime. Akka a mï noko yoiaino tsōa mia nikatiroma,” faifäfe

¹⁴ Jesús ato kemani: “É fakiax oamē fakiri é kaimē më täpia. Akka éa é yoimeai éfe meka chanïmaköi. Askafiax fakiax é oamē é fakiri é kaimē mākai täpiana.

¹⁵ Mā ea täpixoma, mā éfe meka chanïmara faima. Ea täpixoma mā ea shinäi oa chanïai keskara é mekaito. Mā askara shinäi Niospa mato askara anori shināmanainoma. Ékai tsoa mekafakï chakafaima.

¹⁶ Akka, ‘Na yorafäfe afara chakafamisfo,’ éa é mato faima. Éfe Epa shinäi keskara nānoriköiri é mato yoi. Askaxō chanïmaköi é yoimis. Éfe Epa nāato ea nïchini, nā ea täpimanai é yoimis.

¹⁷ Moisés mato yoini iskafakï: ‘Feronāfake rafeta nānoris mato yoiaino mā nikatiroma,’ ixō mato Moisés yoini.

¹⁸ Akka éaköi é yoime. Akka nā ea nïchinio éfe Épari eönoa nānoriköi yoimis,” ato faito,

¹⁹ nikakakï yökänifo: “¿Fanimē mï Epa?” faifäfe, “Mākai éfe Epa yafi mā ea täpiana. Ea täpixō éfe Epari mā täpikerana,” ixō ato Jesús yoini.

²⁰ Nios kïfiti pexefä mëraxō ato yoini. Nāno nā kene mëra judeofäfe äto kori naneti ini. Niospa meka yoimisfo ato ināmisfo. Jesús ato yoiaino judeo xanïfofofäfe achipainifo. Askafixō tsōa achinima äfe penakairoko nokokē achipanāfäfe.

Jesús yorafo yoini: “É kai arikai mā katiroma,” ato fani

²¹ Askata Jesús afianā judeofo äto xanïfofo yoini: “É chai më kai. É kaano mā ea fenafikï mā ea fichitiroma. Mäto chaka soaxoma nāskax mā nai. É kai arikai mā nokotiroma,” ixō Jesús ato yoini.

²² Jesús ato askafaito nikakaxō yoinifo: “¿Aköi retemeimê? Nā noko yoiaino: ‘A é kai ari mā nokotiroma,’ noko fai,” ikanax judeofo xanïfofo yoinänifo.

²³ Jesús ato täpixō ato yoini: “Mäfi na mai anoakï. Akka éfi nai mëranoakï.

²⁴ Nā éa é yoimea keskara mäto chaka potaxma mā nai eakairoko mā ea chanïmara faax. Nāskakë afara chakafaxō mäto chaka soaxma mā naax Epa Nios ari mā nokotiroma. Mā mā naano mäto chaka mato fe ipanaka.”

²⁵ Ato askafaito kemänifo: “¿Mï tsoamê?” ixō yökäifäfe, “Nā é mato yoitaifamis ékïa.

²⁶ Matoönoa afama müshti é yoitiro. A mā afara chakafamis é yoitiro. A ea nïchinio ea yoiaino é nikai. Nāskakë nā é mato yoifaifäini. A ea nïchinio yoiaino chanïmaköi,” Jesús ato fani.

²⁷ Apa Niosnoa ato yoifaitokai tsōa tãpinifoma.

²⁸ Nãskafãfe Jesús ato yoini: “Èfi yōra fakekōiki. Mā ea ifi cruz ikakī mastaxō mā ea fininifōfãxō mā ea òixii ē tsoamāki mā ea tãpitiro. Nãskatari eōnoa mā tãpitiro ēa ē mato yoimisma. Epa Niospa ea yoia keskara ē mato yoimis.

²⁹ Nā ea nīchini efe ika. Eres ē ikama. A ea amapaiyai keskara ē amiski. Nãskax ekeki inimasharamiski,” ixō ato Jesús yoini.

³⁰ Yoiaito nikakaxō yora ichapato chanīmara fanifo.

Niospa fakefãfe Nios āto Ifo, akka afara chakafamisfãfe afara chaka āto ifo

³¹ Nãskaxō Jesús a chanīmara faafo yoini: “È mato yoiaito mā ea nikasharakōiax mā eōxō tãpimiskōifo mā itiroki.

³² Èfe meka nikakōixō mā Nios tãpitiro, Nios chanīmisma. Askax mā isharatiro. Afara chanī mātō ifo itiroma.”

³³ Ato askafaito kemanifo: “Nōfi Abraham āfe fenaki. Fato fetsa nōko ifo imisma. Nōkai tsōa yonomatifoma. ¿Afeskakī ‘Afara chanī mātō ifo itiroma’ noko Jesús faimē?” fanifo.

³⁴ Askafafãfe anā Jesús ato yoini: “Chanīmakōi ē mato yoi. Nā afara chakafamisfãfe nā chaka āto ifo ixii.

³⁵ Mā mā tãpia pexe ifãfe āfe yonomati āfe pexe mēra ipaxatiroma. Akka āfe fake fisti āfe pexe mēra ipaxatiro.

³⁶ Nãskarari Niospa Fãke mato chaka soaxonano afara chaka mātō ifo itiroma. Niospa mato fakekōifai, mā afe isharakōipakenaka.

³⁷ Mē mato tãpia mātō xini Abraham. Āfe fenafōfiãxō ēfe meka mā nikakaspai. Nãskaxō mā ea retepai.

³⁸ Èfe Epa amis keskara mē òimis. Nãōnoa ē yoimis. Māri a mātō epa mato yoimis keskara māri yoimis,” ato faito,

³⁹ kemanifo: “Akka nōko xini Abraham,” faifãfe, “Akka mā Abraham āfe fenafokī ¿afeskai mā Abraham apaoni keskara mā amismamē?

⁴⁰ Epa Niospa ea yoimis keskara chanīma ē mato yoifaino mā ea retepai. Abrahamkai mato keskara ipaonima.

⁴¹ Mātō epa akai keskara māri mā amiski,” ato faito, “Nōkai Epa ichapayama. Nōko Epakōi fisti Nios. Nōfi āfe fakekōifoki,” faifãfe

⁴² Jesús ato yoini: “Èfi Nios fe imiski. È Nios ariax oni. Èa shinãx na mai ano ē onima, ēfe Èpa ea nīchini. Akka mātō Epa Nioskē mā ea noikerana.

⁴³ ¿Afeskakī ēfe meka mā nikaimamē? A ē mato yoiaito mā nikakaspai.

⁴⁴ Akka mātō epa Satanás. Mā āfe fakekōifo. Nãskaxō mātō epa apaiyai keskara māri mā apai. Nāfi taeyoi retemitsamis iyopaoni. Afi iskaratīa nãskara. Atokai afara shara yoimisma, chanīkōi. Āfe shinā mēraxō chanī fisti shināmis. Nãskaxō chanī fisti yoimis. Nā chanīai shināifãfe nā chanīmis nāfi āto apaki.

⁴⁵ Nā keskara chanī ē mato yoiyamafaito mā ea chanīmara famisma.

⁴⁶ È afaa chakafaito mā ea òimisma. Èkai afaa chakafamisma. Ramashara ē chanīmisma. È askafaito mā ea chanīmara famisma.

⁴⁷ Nā Nios fe rafeafãfe Niospa meka nikatirofo. Mākai Nios fe rafeama. Nãskaxō mā āfe meka mā nikaima,” ixō Jesús ato yoini.

Abraham fakeamano Cristo Apa fe iyopaoni

⁴⁸ Judeofãfe Jesús kemanifo: “Chanīma nō yoimis. Mīfi samāritanō chakaki. Askatari mī mēra niafaka chaka nanea,” faifãfe,

⁴⁹ “Niafaka chaka ē mēra naneama. È ēfe Epa Niosnoa meka shara ē yoimis. Akka māfi eōnoa meka chaka yoimis.

⁵⁰ Askafixō, ‘Ea yoisharakãfe,’ ē yorafo famisma. Èfe Epa Niospa meka shara eōnoa ato tãpimapai. Nāato ato yoitiro fatofomāki yora sharafo, fatoforimāki yora chakafo.

⁵¹ Chanīmakōi ē mato yoinō. Nā ēfe meka nikaifo nakanamax nīpanakafo,” ato faito kemanifo,

⁵² “Iskaratīa mā nō mia tãpikōi mīfi niafaka chakaya. Akka mā Abraham nani, Niospa meka yoimisfori mā nanifo. Nãskafikē mī noko yoia: ‘Nā ēfe meka nikakōiaifo nātamaroko nīpanakafo,’ ixō mī noko yoi.

⁵³ Mā nōko xini Abram nani. Niospa meka yoimisfori mā nanifo. ¿Akka mī Abram finōkōiamē? ¿Mī shināimē ‘È ato finōara’ iki?” faifãfe,

⁵⁴ Jesús ato kemani: “A ēa ē yoimesharai ēfe meka sharama. Akka ēfe Èpa eōnoa yoisharai. Mā a yoimis: ‘Nōko Epa Nios,’ fakī.

⁵⁵ Mākai ěfe Epa Nios tāpimisma. Akka ěfi ěfe Epa tāpikōia. Akka ě mato keskaraxō, ‘Ěfe Epamara,’ ě fakerana mato keskara chanĭmis ě ikerana. Askatamaroko ěfe Epa Nios ě tāpikōia. Ea yoiiai keskara ě amis.

⁵⁶ Māto xini Abram yoini: ‘Cristo oaito ě ōixii,’ ixō yoi inimani. Mā ě oaito ea ōini askax fāsi inimani,” ato faito,

⁵⁷ “Mĭkai cincuenta xiniya akama. Mĭkai nōko xini Abram ōimisma. Afetiakai nanima. Akka, ĵafeskakĭ, ‘Ě Abram ōimis,’ ixō mĭ noko yoimē?” faifāfe,

⁵⁸ “Chanĭmakōi ě mato yoinō. Abram fakeamano ěfi iyopaoniki,” ixō Jesús ato yoini.

⁵⁹ Askaito nikakani nā judeofāfe āto xanĭfofo ōitifishkikaxō tokiri fikaxō Jesús tsakapainifo. Askafapafiaifono Jesús ato makinoax yamarisatani, Nios kĭfiti pexefā mĕranoax. Kaitokai tsōa ōinima.

9

Feronāfake fĕxo kāini Jesús sharafani

¹ Jesús kakĭ feronāfake fĕxo nāskarapa kāini fichini.

² Ōikakĭ aōxō tāpimisfāfe yōkanifo: “ĵMaestro, afeskai na feronāfake fĕxo kāinimē? Afara chakafakatsaxakĭ ikaraka, apa feta āfa afara chakafamisfono ikaraka,” ixō Jesús yōkanifo.

³ “Afara chakafayamafikatsaxakĭ nāskarapa fĕxo kāini. Apa feta āfari afara chakafamismano nā feronāfake fĕxo kāini. Nāskarapa kāini. Akka Niospamāi afama mĭshti fatirokē nāskax fĕxo kāini ato ōimasharaxikĭ.

⁴ Niospa ea nĭchini ě yonoxonō. Nā ě akaitĭa ě yonoxotiro. Akka fakishikai nō yonoxotiro. Nāskarifiakĭ mā nō naxō nō anā Nios yonoxotiro.

⁵ Ě nono mai ano iyoax ě pena keskara. Ě ato ōimayoi afeskax isharakanimākai,” ixō Jesús yoini.

⁶ Nāskara yoita maiki kemo mechota a mai kemō mechanafaxō a feronāfake fĕxo aō fetekere ani.

⁷ Askafata, “Ĭamā fechokometāfe,” fani. Nā Ĭamā āfe ane Siloé, āto mekapa anemisfo na Siloé āfe ane “Nĭchia” famisfo.

Nāskata fĕxo Ĭamā kaax fechokomeni. Fechokomexō ōiakefaini. Nāskax oni.

⁸ Nāskata nā chaima nikafāfe a ōimisfāferi yoinifo: “Nā fĕxo tsaoax afara yōkakameaito nō ōimis. ĵNāmē?” faifāfe

⁹ atirifāfe, “Nākĭa,” fanifo. Atirifāfe yoinifo: “Akerokōi,” fanifo. Nāskafikaxō yoinifo: “Nā keskarakōi,” faifāfe, ato yoini: “Ěkĭa. Ěfi fĕxo iyopaoniki. Nāskafixō iskaratĭa mĕ ōisharai,” ato faito,

¹⁰ “ĵAfskaxō mĭ iskaratĭa ōisharaimē?” faifāfe,

¹¹ “Nā feronāfake ‘Jesúsra’ faifāfepi āfe kemō mai mechanafaxō ea fetekere axō: ‘Nā Siloé Ĭamā fechokometāfe,’ ea faano, Siloé Ĭamā fechokomexō ě ōishara,” ato fani.

¹² Ato askafaito nikakaxō, “ĵFanimē a feronāfake Jesús?” faifāfe, “Ětsa ě tāpiama. Mā fakira kaa,” ato fani.

Nā fĕxo kāinito ōisharaino fariseofāfe ayōkanifo.

¹³ Askaito yorafāfe nā feronāfake fĕxo iyopaoni fariseofo ano yonifo.

¹⁴ Jesús nā feronāfake pena tenetiĭa sharafani.

¹⁵ Fariseofāfe nā feronāfake anā yōkanifo: “ĵAfskax mĭ fero sharamē?” faifāfe, “Ea Jesús sharafaa āfe kemō mai mechanafaxō ea aō fetekere akano. Ě Ĭamā fechokomexō ě ōisharakōia,” ato fani.

¹⁶ Nikakakĭ fariseo fetsafāfe yoinifo: “Akai Nios fe rafeama. Moisés kirika kenexō noko yoini iskafakĭ: ‘Pena tenetiĭa nō yonotiroma,’ ixō yoini. Nāskakē nō yora sharafatiroma pena tenetiĭa,” faifono, fetsafāfe ato kermanifo: “Akka yora chakapa fĕxo sharafatiroma. Yora chakapakai nāato akai keskara fatiroma,” ikanax fariseofo fochishpanā faatanānifo. Atirifāfe fariseofāfe yoinifo: “Jesúskai sharama,” faifono, atirifāferi, “Jesús sharaki,” fanifo.

¹⁷ Nāskata afianā fariseofāfe a yora fĕxo ipaoni yōkanifo: “Mĭ noko yoiia, ‘Nāto ea fero sharafaxōa,’ fakĭ. ĵAkka faaa mĭ shināimē tsoamākĭ?” faifāfe, “Nā Nios ato yoixomisto ea sharafaa,” ato fani.

¹⁸ Ato askafaito nikakakĭ judeo fetsafāfe, “A chanĭra,” fanifo. “Na fĕxo ipaonima,” ixō. Nāskaxō fariseofāfe apa yafi afa kenaxō yōkanifo.

¹⁹ “ĵNamē mĭ fake fĕxo ipaoni? Akka, ĵafeskakĭ iskaratĭa ōimē?” faifāfe,

²⁰ “Nākĭa nōko fake, nā fĕxo kāini. Mā nō tāpia nōko fake.

²¹ Tiiri afskara axora mā ōi nōkai tāpiama. Akka fakefomaki, xiniki mato yoitiroki afskax sharamākĭ. Yōkakāfe,” afa feta āpa ato fani.

²² Judeofoki mesekakĭ nānori yoinifo. Akka judeo xanĭfāfe yoiyoni iskafakĭ: “Tsōa yoitiro: ‘Epa Niospa Jesús nĭchini nōko Ifo Cristo inō,’ ixō yoitiro. Akka askara yoixō

anā nōko ichanāti pexe ano ikitiroma,” judeo xanīfāfe anori ato yoiaino nā fēxo ipaonito āfe afa fe āfe apa mesenifo.

²³ Nāskaxō ato yoinifo: “Xiniki fakefomaki. Yōkakāfe,” ato fanifo.

²⁴ Nāskata fariseofāfe nā feronāfāfe fēxo ipaoni yōkanifo: “Noko yoikī iskafafe: ‘Niospa ea sharafaa,’ ife,” fanifo. “Jesūsikai sharama. ‘Niosfi sharaki,’ ife. ‘Jesūs sharara,’ fayamafe. Nō tāpia Jesūs chakaki,” fanifo.

²⁵ “Ētsa. Ē tāpīama chaka iyamai shara rakikīa. Ē tāpia ē fēxo iyopaoni ē iskaratīa ōisharai. Nā fisti ē tāpia,” ato faito,

²⁶ “Ķafeskafaxō mia sharafaamē?” ixō yōkaifāfe,

²⁷ “Ē mato yoiaito, Ķmā ea nikamamē? Ķafeskakī mā afianā ea yōkaimē? ĶMāri aōxō tāpimis mā ipaimē?” ato faito,

²⁸ nikakakī Ķchaketsanifo. Nāskaxō yoinifo: “Mīfi a Ifofaikai. Akka nōfi Moisés meka nikamiski.

²⁹ Nō tāpia Moisés Nios fe mekapaoni. Nōkai na Jesūs tāpīama. Fakira anoax oa afe keskarara a feronāfake nō tāpīama,” faifāfe anā ato kemani:

³⁰ “ĶMā tāpīamamē fakira anoax oxō ea sharafaa ē fēxokē?”

³¹ Nō tāpia yōra chakafamisfokai Niospa ato nikapaitiroma. Fatorato Nios Ifofasharapai isharatiro. Nāskara Niospa nikapai.

³² Nā Niospa mai onifani chāikai nō afaa nikayomisma yora fēxo kāini tsōa sharafai. Akka iskaratīa mā ea Jesūs sharafaa.

³³ Na feronāfake Niospa nīchīyamanokai afaa afeskafakeranama,” ato faito,

³⁴ nikakani akiki ōitīfishkinifo. “Mīfi chakakōi kāini. Ķafeskakī mī noko tāpīmapaimē mī chakafixō? Anā nōko ichanāti pexe mēra mī ikitiroma. Nonoax kariskatāfe. Nōkai anā mia ōipaima. Anā nōko ichanāti pexe mēra ikīyamafe,” fanifo.

Fatorafāfe Jesūs chanīmara fayamakanax nā yora fēxo keskarakōifo

³⁵ Nāskano nā fēxo imis āto ichanāti pexe mēraxō potaifāfe nikafaini Jesūs kani. Nāskaxō fenakī a fēxo imis fichini. Fichixō yōkani: “ĶMī Niospa Fake chanīmara faimē?” ixō yōkaito,

³⁶ “ĶFatomē ē chanīmara fanō?” faito,

³⁷ “Nā mī ea ōi. Ēkīa,” Jesūs fani.

³⁸ Askafaito ratokonō mai chachipakefōfā yoini: “Ifo, ēfi mia chanīmara faikai. Mī fāsi sharakōi. Ē mia Ifofai. Mī Niospa Fakeki,” ixō yoini.

³⁹ Askata chipo afianā yorafo akiki feafāfe Jesūs ato yoini iskafakī: “Ēfe Epa Nios ika anoax ē nono mai ano oni. Fato yorafomāki a ea nikayamaifo, fatoforimāki a ea nikaifo ē ato ōiyoi oni. Fatotora shināi iskaito: ‘Mē afara chakafamiski. Ea chaka soaxope,’ ixō anori shināito ē āfe chaka soaxotiro afianā afara chakafayamanō. Ē na fēxo fero sharafaxōa keskafakī ē yorafo āto chaka soaxotiro shara inōfo. Akka fetsafāfe shināi iskakani: ‘Ē afaa chakafamisma, ē yora sharakōi. Ē tāpikōia,’ ixō shinākani. Askarafofi yora fēxo keskarafokī, a ato sharafamis ano fopaikanima ato sharafapanā. Nāskarafāfekai yoipaikanima āto chaka soapaikanima. Nāskarafo fenopakenakafo,” ixō Jesūs ato yoini.

⁴⁰ Fariseofāfe a Jesūs yoiai nikaxō yōkanifo: “Kee. ĶMī noko yoimē nōmē fēxo?” faifāfe

⁴¹ Jesūs anā ato yoini: “Mā ea yoikerana: ‘Nō fēxo keskarafō. Mā nō afara chakafamis,’ ixō mā ea yoiaito ē mato chaka soaxokerana. Akka mā kai ea askafamisma. Mā yoimis: ‘Nō ōisharatiro. Nōkai fenoama. Nō sharakī. Nōkai chakama,’ ixō anori mā yoimis. Akka māto chaka soaxma, mā fenokōiax Epa Nios ika ano mā nokopakenakama,” ixō Jesūs ato yoini.

10

Oveja keneaki keparanākī Jesūs ato yoini

¹ (Askata Jesūs ato tāpīmani nāatomāi āto kexekatsaxakī. Oveja kexemisto āfe ovejafo kexemis keskari fakī nāskarifiakī Jesūs ato kexemis.) Nānori Jesūs ato yoini iskafakī: “Chanīmakōi ē mato yoinō. Yōra ovejafo kenexotiro āfe kene mēra inōfo, fakī fofāsanōma. Nāskata yora yometsopai ovejafo āfe kāiti ano ikitiroma, fomākīari ikitiro.

² Akka nā ovejafo kexemis nā oveja kāitīnī ikīkaitiro.

³ Kāiti ano nokoano feronāfake nā kāiti kexemisto fepoti fēpexonano oveja kexemis ikitiro. Nā oveja kexemis ikiano āfe ovejafāfe āfe oi tāpikatirofo. Nāskaxō āfe ovejafo āfe anē ato kenaito āfe ovejafāfe chīfāfāitirofo.

⁴ Nā ovejafo kexemis rekē kaino āfe ovejafo āfe kene mēranoax kāiferatirofo. Māmāi āfe oi tāpikanax nāskaxō chīfāfāitirofo.

⁵ Akka a kexeamatokai iyotiroma, āfe oi tāpikatiro, a ato kexemisto āfe oikairoko askarakē. Nāskakē a makinoax ichotirofo,” ixō Jesūs ato yoini.

⁶ Jesūs nā ovejafoki keparanākī ato yoini. Ato yoiaito tsōa tāpinifoma.

Jesús noko kexesharamis

⁷ Nāskano Jesús aſianā ato yoini: “Ē chanīmakōi mato yoinō. Nā ovejafo kene mēra ikikani nā kini fisti mēra ikitirofo. Ēfi na oveja kini keskaraki. Nā Epa Nios ano ikipaikani eōnoax fisti ikitirofo.

⁸ Ē matoki nokoamano fetsafāferi mato yoikī iskafakani: ‘Ēfi Cristoki. Ē mato tāpimatiro afeska mā Epa Nios ari nokotiomāki afe ipaxakī, ixō anori yoikani āa chanīmisfo. Yometso keskarakōifo. A Nios chanīmara faifo ato pārapaikani: ‘Noko fisti nikanōfora,’ ikaxō. Nāskakē Niospa fakefāfe ato nikakanima, ‘Noko fisti nikanōfora,’ ixō ato pārapaiyaifono.

⁹ Akka ēfi na kini kāiti keskaraki. Nā ēfe Epa Nios ika ano ikipaikani eōnoax ikitirofo afe ipaxakakī. Nāskatari eōnoax isharatirofo anā fekaxtetirofoma.

¹⁰ Akka fetsafāfe efe yorafo ato pārapaikani: ‘Ea ifofakāfe. Ē mato tāpimasharanō,’ ixō ato yoifīkakī anorima ato pārakani. Nāskakaxō emakinoa ato ifipaikani. Yometso keskarakōifo. A ea chanīmara faafo ato kexesharapaikanima. Ato chakafata ato retepaikani. Akka ē askarama. A ea Ifofamisfo ē ato kexesharai efe isharapakexanōfo, nono nāmānoaxri isharapakexanōfo. Nāskax ē nono nāmā oni ato kexesharaxikī.

¹¹⁻¹³ “A ea chanīmara faifo ovejafo keskarako. Ēfi nā oveja kexesharamis keskaraki. Nāskakē ē efe yorafo ē ato nāxoxii. Oveja ifāfe feronāfake fetsa kori inātiro āfe oveja kexexonō. Nāskaxō mā kori ināno nā feronāfake oveja kexesharatamaroko, kori fisti shinātiro. Nāskakē poomā oaito fichiāx ovejafo kexetama ichotiro. Nāskaxō shināi iskakī: ‘Na poomā mesekōi. Na ovejafo ēfenākōima, aa poomānā pinō ēfenākōimākī. Nāskakē ē ichoikai ea poomānā afeska fanōma,’ ixō shinātiro. Akka ovejafāfe ifokōi askarama. Āfe oveja kexesharai. Poomā oaito fichixō ato kexesharatiro, poomānā ato afeska fanōma. Nāskaxō shinātiro iskakī: ‘Ēfe ovejafoōnoax ē natiro afokai afeskatiroma,’ ixō shinātiro.

¹⁴⁻¹⁵ “Ēfi nā ovejafāfe ifo keskara sharakī. Ovejafo āfe ifāfe ato tāpia atomāi kexesharakat-saxakī. Ēri nā ea chanīmara faafo ē ato kexesharamis. Ēfe Epa Niospa ea tāpikōia. Ēri ēfe Epa ē tāpia. Nāskarifiakī a ea chanīmara faafo ē ato tāpia. Afāferi ea tāpiafo. Nāskax ē atoōnoax naxii.

¹⁶ Yora fetsafāferi ea chanīmara faxikani. Afokai nono ikafoma. Mai fetsa ano ikafō. Nāfāfe ea nikasharaxikani. Nāfo ēfe Epa ika ano ē ato iyotiro. Akka nā yora fetsafāfe a nono ikafāferi ea chanīmara fakanax yora fisti keskara ixikani. Nāskax Epa Niospa yorakōifo ixikani. Eres fisti ē ato kexesharai.

¹⁷ Ē ato kexeax ē atoōnoax naxii. Nāskaito ēfe Epa Niospa ea noi. Naax ē anā otoxii.

¹⁸ A ea chanīmara faafoōnoax ēakōi ē nai, ea tsōa retekeranama. Ēfe Ēpa ea yoini keskara ē atoōnoax naikai. Ēfe Epa Niospa ea yoini keskara ē atoōnoax nafīax ē anā otoxii,” ixō Jesús ato yoini.

¹⁹ Nikakaxō judeofāfe chanīmara fanifo. Akka atirifāfe chanīmara fanifoma.

²⁰ Atirifāfe yoini iskafakakī: “Nīafaka yōshi chaka a mēra nanea. Afaa tāpiama. Noko yoiai nō tāpitiroma. ¿Afeskakī na feronāfake nō nikatiromē?” ixō yoinifo.

²¹ Akka atirifāfe yoinifo: “Nīafakakai a mēra naneanama. Nīafaka a mēra naneanokai iskara meka shara yoikeranama. Nīafakakai feronāfake fēxo oimatiroma,” ixō yoinifo.

Judeofāfe āto xanīfofofāfe Jesús chanīmara fanifoma

²²⁻²³ Askafafono Jesús kani judeofāfe āto Nios kīfīti pexefā mēra Jerusalén ano mā mechakaino. Nāno tapas keskara ini pexe kachiori. Ano Jesús kani. Nā tapas āfe ane Salomón. Nāskatari judeofāfe āto fista anifo. Nā fistatīa shinānifo a Niospa pexe onifani.

²⁴ Judeofāfe āto xanīfofo Jesúski fenifo yōkai fevani: “¿Mīmē Cristoki? Noko yoife. ¿Afeskakī mī noko yoisharaimamē? ¿Afetīakairoko mī noko xafakīa yoimē?” faifāfe,

²⁵ “Ē mato yoifimiskē mā ea chanīmara faima. Ēfe Epaōxō a yorafāfe atiroma keskara fakī mē mato ispa ēmāi Niospa Fakexō.

²⁶ Akka mākaī ea chanīmara faima mākairoko Ēpa Niospa yorafoxō.

²⁷ A ea chanīmara faifāfe ea nikasharatirofo. Mē ato tāpia a ea Ifofakōinafo.

²⁸⁻³⁰ A ea Ifofaafoma omiskōipakenakafo mēra fokani. Akka a ea Ifofamisfokai ari fokanima. Askatamaroko ē ato imasharapakenaka. Epa Niospa atoya ea rafemani. Epa Niospa keyokōi ato finōkōia. Ē ēfe Epa Nios fe nā yora fisti keskara. Nāskakē a ea Ifofamisfo emakinoa tsōa ato ifitiroma, ēfe Epa makinoari tsōa ato ifitiroma,” ixō Jesús ato yoini.

³¹ Nikakaxō judeofāfe āto xanīfofofāfe anā tokiri fikaxō aō Jesús tsakapainifo retepaiyanā.

³² Nāskafaiifāfe Jesús ato yoini: “Epa Niosxō afama mīshti ē mato ispa tsōa atiroma keskafakī. Akka, ¿afaōxokai mā ea tokirinī tsakaimē?” ato faito,

³³ “Akka na afama mīshti mī noko ispaōxokai nō mia tokirinī tsakaima. Akka nā mī meka chakaōxō nō mia tokirinī tsakapai, ē Nios keskarara mī ikaito. Anā ano Nios fetsama. Mīri

noko keskara yora. Akka mī noko yoia: ‘Ēri Nios keskara,’ iki. Akka mī Nios chakafai. Nāskakē nō mia tokirinī tsakai,” faifāfe,

³⁴ Jesús ato kemani iskafakī: “Mā isakai: ‘Anā ano Nios fetsama,’ mā imis. Akka nā Niospa meka yoimisto kirika keneni iskafakī: ‘Ē mato yoi māfi Nios keskarakōifokī. Niospa mato nichia,’ ixō kirika keneni, Niospa meka yoikī. Akka nā meka tsōa chanīra fatiroma.

³⁵⁻³⁶ Akka Niospa anori yoifiano ꞵafeskakī mā ea yoimē ē Nios chakafai? Akka Niospa ea nai mēraxō nāmā nichini. Nāskakē ē mato yoitiro ēfi Niospa Fakeki.

³⁷⁻³⁸ Mākai ea nikapaima. Ēfe Epa Niospa aka keskara ē ayamakē, āa chanīra mā ea fakerana. Akka ēfe Epa akai keskara ēri akaito mā yoikerana: ‘Chanīma Epa Niospa atiro keskara Jesús aki,’ ixō mā yoikerana. Nāskakē a ē afama mīshti akaōxō ea chanīmara fakāfe. Ēfe Ēpa akai keskara ēri akaito mā ea tāpitiro ēfe Epa fe ika,” ixō Jesús ato yoini.

³⁹ Nikakaxō anā Jesús achipaifiaifono, ato makinoax kaitokai tsōa tāpinima. Nāskakē tsōa achinima.

⁴⁰ Ato makinoax kai, faka Jordán ari kani nā Juan yorafo maotisafapaoni ano. Nāno chaimashta Jesús nēteni faka kesemē.

⁴¹ Nāskakē yorafo akiki fēkaxō yoinifo iskafakakī: “Jesús Niosxō afama mīshti fakī noko ispa. Juankai askafapaonima. Askafixō Juan Jesúsnoa noko yoini chanīmākōi,” ikanax yoinānifo.

⁴² Nāskakaxō yora ichapato Jesús Niospa fakera fakaxō Jesús chanīmara fanifo.

11

Lázaro mā nani

(Mt. 12.46-50; Lc. 8.19-21)

¹ Askata feronāfāke Lázaro isinī ini. Nā Lázaro Betania ano ikax isinī ini. Poi rafe fe ikax María ikaino, Marta ikaino, nā rafe ato fe ikax.

² Nā María pirofomā sharakapa Jesús āfe tae pemākīa nachiyoni. Nāskaxō āfe fōo otekere ani.

³ María feta Marta iskafakī Jesús yoitanōfo ato nichini: “Ifo, mī yamakōi Lázaro isinī iki kiki,” ikaxō yoitanōfo.

⁴ Kenamanaifāfe nikaxō Jesús aōxō tāpimisfo ato yoini iskafakakī: “Nā Lázaro isinī ikai naima. Akka yorafāfe ōikani ē afara afeskarafaito. Nāskakē ea tāpikani ēmāi Niospa Fakekē. Nāskaxō yorafāfe yoikani: ‘Epa Nios fāsi sharakōi,’ ikaxō yoinōfo,” ixō Jesús ato yoini.

⁵ Jesús poi rafeya Lázaro noikōini.

⁶ Lázaro isinī ikaito nikafi Jesús oxa rafeyoni.

⁷ Nāskata a aōxō tāpimisfo Jesús yoini: “Nō Judea mai ano nō anā kanō,” ixō Jesús ato yoini.

⁸ Ato askafaito kemanifo: “Maestro, nōko xanifofāfe Judea anoxō mā mia retekeraifaito. ꞵafeskai mī afianā ari kapaimē?” ixō yoiaifono,

⁹ Jesús anā ato kemani: “Penata nō ōisharatiro. Xinī chaxaino nō ōisharatiro. Nāskax nō otisikax nō paketiro. Nāskarifiakī pena tii Niospa ea amapaiyai keskara ea tāpimani. Nāskaxō ea kexeano ē mesetiroma.

¹⁰ Akka fakishi yora kai xafasharayamano otisikax paketiro. Nāskarifiakī Nios fe rafeam-ato tāpisharatiroma afeskax isharatiromāki. Askax fenotiro,” ixō Jesús ato yoini.

¹¹ Nānori ato yoita anā Jesús ato yoini iskafakī: “Nofe yora Lázaro mā oxakē ē mōikai,” ato faito,

¹² a aōxō tāpimisfāfe nikakaxō yoinifo: “Ifo, akka oxakōiax naima. Chipō sharatiro,” fanifo.

¹³ “Nofe yora Lázaro mā oxaki,” Jesús ato fani. Mā Lázaro nafiakē ato tāpimapainima. Nāskakē shinānifo: “Lázaro oxara,” ikaxō tsōakairoko tāpixō.

¹⁴⁻¹⁵ Nāskaxō Jesús ato xafakīa yoini mā Lázaro nakōinano: “Mā Lázaro naki. Nāskax ē inimaikai ē ano ikamano Lázaro naki. Akka mā ea chipō ōitiro ē afara afeskarafaito. Nāskaxō mā ea chanīmara fai. Nāskakē iskaratīa nō Lázaro ano kanō,” ixō Jesús ato yoini.

¹⁶ Ato askafaito nikakata Tomás nā Rafe Naneni nāato Jesúsxō tāpimis fetsafori ato yoini: “Nō kanō nōri afe naxikī,” ixō ato yoini.

Jesús fistichi naafo ato otofatiro

¹⁷ Askata Betania ano nokoxō Jesús nika: “Mā Lázaro naa,” nikani. Mā cuatro nia oxa nikani a maifaitafo mafa kini mēra, Betania ano.

¹⁸ Betania fe Jerusalén chaima ini.

¹⁹ judeofo ichapa María fe Marta ika ano fenifo ato ferarofai fekani, mā āto poi naano.

²⁰ Nāskata Marta Jesús oaito nikai akiki nokoikai kani María pexe mēra nichifaini.

²¹ Marta Jesúsiki nokoxō yoini: “Ifo, mī nono ikanokai ēfe exto nakeraitama.

²² Ē tāpia mī iskaratīa afara fetsa mī Nios yōkaito mia axorisafatirokī,” faito,
²³ “Extofi anā oto kiki,” faito,
²⁴ “Ē tāpia nā namisfo mā mai keyoaino afianā otoxikani. Ēfe extori otoxii,” ixō Marta yoiaino,
²⁵ Jesús kemani: “Eōnoax nā nafo tii otokani. Akka eōnoax niafori. Nā ea chanīmara faax nafiāx anā otoxii kiki.
²⁶ Nāskakē ea chanīmara faax anā nanakama. ¿Nāskakē mī ea chanīmara faimē?” faito,
²⁷ “Ēje, Ifo, ē mia chanīmara fai mīmāi Cristokē, Niospa fake. Nō mia manamis. Akka nōko xinifāferi Cristo manapaonifo. ‘¿Afetīa na mai ano Cristo oimē?’ ikaxō nōko xinifāfe mia manapaonifo,” Marta fani.

Lázaro mafa kini mēra maia ōi Jesús oiani

²⁸ Nāskata mā yoikī xateta, Marta āfe chiko María yoikai kani. Kaxō ōia a María fe rafeafo oiyakani inifo. Nāskata Marta āfe chiko María one mēshanāxō yoini: “Mā nōko Ifo oaki. Mia kenamana, ōikofe,” fani.

²⁹ María nikata finināfāta kani Jesúski nokoikai.
³⁰ Jesúskaī pexe rasi ano nokoama ini. Nā Marta akiki nokoano Jesús nēteni.
³¹ Mā María ato fe oiafai kaino a afe oiafaiyāifāfe ōinifo. “María poi maia mānāonoax oiai kai kiki,” ikaxō chīfāfainifo.
³² María Jesúski nokota ratokonō mai chachipakefofā yoini: “Ifo, mī nono ikanokai ēfe exto nakeraītama,” María fani.
³³ María oiaito Jesús ōini. Judeofori a María fe feafori oiaifāfe Jesús ato ōini. Nāskaxō ato shinākōini.
³⁴ Nāskaxō ato yōkani: “¿Fanī mā maifaitamē?” ato faino, yoinifo: “Ifo, ono nō akitakīa ōiyopo,” fanifo.
³⁵ Askafaifono Jesús oiani.
³⁶ Oiaito ōikakī judeofāfe: “Ōikapo. Lázaro manoi oiai,” fanifo.
³⁷ Nāskaxō fetsafāfe yoinifo: “Nā fēxo sharafaita keskafaxō, ¿afeskafakī nonoxō Lázaro sharafaitamamē?” fanifo.

Jesús Lázaro otofani

³⁸ Nāskata Jesús anā shināmītsani Lázaro maia ano nokoax. Nā Lázaro maia ano nā kini tokiri efapato fepoafō ini.
³⁹ Nāno nokoxō Jesús ato yoini: “Na tokiri aō fepoa fepekāfe,” ato faito, nikakī Marta yoini: “Iskaratīa mā pisiaki,” faito,
⁴⁰ nikakī anā Jesús yoini: “¿Ē mia yoiāito mī ea nikaimamē? Ea mā nikaino Niospa afara shara faito mī ōitiro,” fani.
⁴¹ Askafaito nikakakī fēpexonifo. Fēpexonaifono nai foisnīfōfāta Apa yoini: “Epa, ē mia kifiaito mī ea nikai. Ē mia aicho fai.
⁴² Ē tāpiaki ea mā nikafafāimiskī. Nāskakī ē mia kifī na yorafāfe mia chanīmara fanōfo. Nāskakaxō ea tāpinōfo ea mā nīchiniki.”
⁴³ Apa kifikī askafata fāsikōi Lázaro kenani: “Lázaro, kini mēranoax kāikerafe,” faino,
⁴⁴ Lázaro kāikerani nā aō rakoitafoya. Nāskaxō ato yoini: “Na mā aō rakoita pekakāfe kāisharanō,” ato fani.

*“¿Afeskaxō nō Jesús retetiromē?” ixō shinānifo
 (Mt. 26.1-5; Mr. 14.1-2; Lc. 22.1-2)*

⁴⁵ Nāskata judeofo a María fe feafāfe Jesús Lázaro otofaito ōikakī Jesús chanīmara fanifo.
⁴⁶ Nāskafaito ōikani atiri fariseofoki chanifokani fonifo.
⁴⁷ Ato yoiāifāfe nikakanax fariseofo fe a Nios ato kifixomisfāfe āto xanīfofo ichanānifo. Ichanākanax yoinānifo: “¿Nō Jesús afeska faimē? Tsōa atiroma keskara fai kiki.
⁴⁸ Nō afeskafayamaino keyokōichi chanīmara fakani kiki. Romano xanīfokōifo fēkaxō noko yoitirofo iskafakakī: ‘Mā kai anā xanīfoma,’ noko fatirofo. Nāskaxō nōko kifiti pexefā noko pōtatirofo,” ikanax yoinānifo.
⁴⁹ Nāskafāfe Nios ato yoixomis xanīfokōichi Caifás ato yoini: “Māfi tatimakōiki,” ato fani.
⁵⁰ “¿Mā tāpiamamē? na feronāfake fisti a yorafoōnoax naxiai. Nāfi sharaki. Ares fisti natiro nō nanōma, nōko kaifo fetsafori nanōfoma,” ixō ato yoini. Chanīmakōi Caifás yoini a ixiāi keskara yoikī.
⁵¹ A Caifás yoiāi āa shinākī yoinima. Niospa āfe shināmā shināmanaino yoini. Nios kifixomisfāfe āto xanīfokē Niospa āfe shināmā shināmanaino, “Jesús judeofonoax naxira,” ixō yoini.
⁵² Jesúskaī judeofo fistiōnoax naima. Mai fetsa ano ikafāferi chanīmara faafono ato nāxoxii. Nāskata Niospa fake ixikakī noinākōikanax, nā yora fisti keskara ixikakī.

⁵³ Nāskata nā penata judeo xanīfofofāfe shinānifo: “¿Afeskaō nō Jesús retetiromē?” ikaxō pena tii shināpaonifo.

⁵⁴ Mā retepaiyaifono tāpiax judeofo ano anā Jesús kanima. Yorafā rasi ano katamaroko pexe fisti rasi ano kani, nā pexe āfe ane Efraín ano, tsōa istoma ano. Nā aōxō tāpimisfo fe nāno iyoni.

⁵⁵ Judeofāfe āto fista Pascua mā chaima ikaino, yora rasi Jerusalén ano fonifo, Pascua fista akifokani. Moisés āto xinifo yoipaoni keskai akairi āto chaka soapaikani Nios kīfiti pexefā mēra ikifokani, fista ikamano fonifo.

⁵⁶ Nāskaifono judeofāfe Jesús fenanifo. Nāskakanax Nios kīfiti pexefā mēra ikinifo. Nānoax yoinānifo: “¿Fanīmē Jesús?” ikanax yoinānifo. “ ‘Nonoxō Jerusalén anoxō Jesús fista akiyoirā,’ ¿mā ikimē?” ikanax aa ranā yoinānifo.

⁵⁷ Askakaxō judeofo āto xanīfofo feta fariseofāfe ato yoinifo iskafakāki: “Jesús fichixō noko tāpimakāfe nō achinō,” ato fanifo.

12

Kēromā Jesús shinākī pirofomā āfe tae pemākīa nachini

(Mt. 26.6-13; Mr. 14.3-9)

¹ Nāskano seis nia Pascua fista mā chaima ikaino Jesús aōxō tāpimisfo fe Betania ano kayoni. Nāno Lázaro ika ini. Nā Lázaro nakē Jesús otofani.

² Nānoxō Jesús pimaxikakī pīchanifo, a Jesús fe foafāferi pinifo. Lázarori ato feta pini. Nā Marta ato pimani.

³ Mā piafono María Jesúski oni āfe pirofomā sharaya. Oxō nā pirofomā āfe tae pemākīa nachini. Nāskaxō āfe fōo otekere ani. Nāskafaano yorafāfe nā pexe mēra ikafāfe nā pirofomā sharakōi xetenifo.

⁴ Nā Jesúsxō tāpimis fētsa nā Judas Iscariote, Simón fake, nā ato achimaxiaito yoini,

⁵ “Kee. ¿Afeskakī na kēromā pirofomā shara potaimē? Ato minixō kori ichapa fixō noko inākerana a afaamaisfo nō ato ināpanā. Nāskax shara ikerana,” Judaspa fani.

⁶ Anori Judaspa yoifīkī ato kori inākeranama. Nā Judasfi yometsokōi iniki. Nā Judaspa āto kori kexexopaoni. Yometsofixō nāskakē tsōa tāpīpaonima. Nā kori fixō a afaamaisfo ato inākeranama, nā a kori onekerana.

⁷ Nāskafaito nikakī Jesús Judas yoini: “María fekaxtefayamafe. Ē samamashta naito mā tāpīxō ekeki pirofomā nachia,” fani.

⁸ “Nā yora afaamaisfo mato fe ipanakafo. Nāskakē mā ato mēxotaima afarafo inātiro. Akka ēkai mato fe nono mai ano ipanakama, ē mato yoi. Akka na María iskaratīa ea shara faa,” ato Jesús fani.

Judeofāfe āto xanīfofofāfe Lázaro retepainifo

⁹ Nāskata judeofo ichapa rasi Jesúski fenifo, Betania ano ikano mā tāpikanax Jesús fistikai ōifekani fenifoma. Lázarori ōifekani fenifo. Nā Lázaro Jesús otofaita nikakaxō ōipainifo.

¹⁰⁻¹¹ Nā Lázaro Jesús otofaita nikakaxō judeofāfe ranārīto anā āto xanīfofo tananifoma Jesús fisti chanīmara fakakī. Nāskaifono nā xanīfofo ōitīfishkikanax yoinānifo: “Jesús yafi Lázaro nō retenō. Jesús fistima. Lázarori nō retenō,” ikanax yoinānifo.

Jesús nokoni Jerusalén ano

(Mt. 21.1-11; Mr. 11.1-11; Lc. 19.28-40)

¹² Nāskano pena fetsa judeofāfe āto fistaīa yorafā rasi Jerusalén ano fenifo. Jesús nokoaito nikakani nāskax akiki fenifo.

¹³ Epe pei tsoamakanax akiki fekani. Nāskakanax fāsīkōi tai tai ifenifo iskakani: “¿Shara-finakōi nokoki oi kiki Niospa nīchiano! Israelifo mī nōko xanīfo oi nokoki. ¿Sharafinakōial!” ikaxō fāsīkōi yoinifo.

¹⁴⁻¹⁵ Askafailono Jesús burro fakeshta kamaki tsoax oni. Niospa meka fētsa keneni iskafakī Niospa shināmanaino:

Jerusalén ikafāfe, rateyamakāfe. Māto xanīfo matoki oxii burro fakeshta kamaki tsoax, ikaxō kirika keneni.

¹⁶ Nāskafikē Jesúsnoa yoikī kirika keneni keskara aōxō tāpimisfāfe tāpīyonifoma. Akka mā reteafono otoax Apa ari kaano nāskakē aōnoa tāpinifo. Iskakakī shinānifo: “Nā Jesús nono mai anoxō a afama mīshti axiai aōnoa yoikakī kirika keneyoni. Nōko xinifāfe Jesús fakeyoamano a inōpokoi aōnoa yoikakī kirika keneni,” ikaxō Jesúsxō tāpimisfāfe āto ōiti mēraxō shinānifo.

¹⁷ Jesús Jerusalén ano nokoaino nikakakī yorafā rasichi a mananifo ōipakakī. Atirifāfe mā Lázaro nakē Jesús otofaitano ōinifo. Nāskakē mā Lázaro Jesús otofaita ōikanax fetsafoki chaninifo akairi tāpinōfo.

¹⁸ Jesús Lázaro mā nakē otofaita nikakaxō nāfāferi ōipainifo. Nāskaxō fai nēxpakāxō mananifo.

¹⁹ Nāskakē fariseofo yoinānifo: “Kee. Shinākapo. Nōkai na yorafo afeska fatiroma anā Jesús tanayamanōfo. Tsōakai noko anā tanapaima keyokōichi yorafāfe Jesús nikakōipaikani,” ikanax yoinānifo.

Griegofāfe Jesús fenanifo

²⁰ Nāskata Jerusalén ano nā yorafā rasi mēra griegofori ato fe inifo judeofāfe āto fista akaifono.

²¹ Nānoax Felipe ano fonifo, Felipe yōkai fokani. Nā Felipe Galilea mai anoax fakeni, nā pexe rasi āfe ane Betsaida anoax. Felipe ano fokaxō griegofāfe Felipe yōkanifo: “Nō Jesús ōipai noko efexōfe nō afe yoinānō,” Felipe fanifo.

²² Askafāifāfe nikaxō Felipe Andrés yoini: “Na griegofō Jesús fe mekapaiKANIKIKI. Nō Jesús ato yoixonō,” fani.

²³ Yoiaifāfe nikakī Jesús ato kemani: “Ēfi samamashta ēfe Epa ari ē kaikai afe xanīfo ikikai. Akka ēfe Epa ari kayotama ē yorafonoax nayoxii.

²⁴ Akka ē mato tāpimani mā tāpinō. Xiki fero fisti nō fanayamano kāitiroma. Akka nō fanasharano foaixax āfe fimi ichapa itiro. Nā nō fana āfe exe fisti payokometiro, akka āfe kaya yositiro. Nāskarīfai ē matoōnoax nayamakē mā efe ipaxatiroma. Eres fisti ē ipaxatiro.

²⁵ Akka āa fētsa shināi iskai: ‘Niospa ea amapaiyai keskara ē shināima, ēa ē apaiyai keskara ē shināi,’ ixō anori shināi fenotiro. Akka nā iskakī shināi: ‘Ē nono mai ano niyoxō ē apaiyai keskara ē shināpaima, Niospa ea amapaiyai keskara fisti ē shināpai,’ ixō shināi afi Epa Nios fe nīpanakaki.

²⁶ Akka a ea yonoxopaikī ēfe meka nikakōixō a ē yoiai keskara atiro. Ea Ifofax a ē ika ano nāri efe ipaxatiroki. Ea yonoxomis a ē yoiai keskara ea axōaito ēfe Epa Niospa yoixii iskafakī: ‘Aicho. Mī ēfe Fake Jesús nikasharamiski. Mī fāsi sharakōiki,’ Epa Niospa yoikī iskafaxii a ea Ifofamis.

²⁷ “Iskaratīa ēfe ōiti mēra ē shināmītsai. ¿Ē afeskaimē? Akka, ‘Epa, ea ifife ea omiskōimayamanōfo,’ ē faima. Akka ēfe Ēpa ea nīchini ē ato omiskōixonō,” ato Jesús fani.

²⁸ Nāskaxō Jesús Apa yoini: “Epa, eōxō ato ispafe mī fāsi sharakī,” ixō Jesús Apa yoini. Askafaito nikakī nai mēraxō fāsikōi Niospa kemani: “Ē mīōxō mē ato ispa ēmāi afama mīshti shara fakī afianā afama mīshti ē ato ispai,” ixō yoini.

²⁹ Nā yorafā rasichi anoxō nikakani yoinānifo. Atirifāfe yoinifo: “Mā nai tiri ika,” fanifo. Atirifāfe yoinifo: “Epa Niospa ājirinī Jesús yoia,” ikanax yoinānifo.

³⁰ Nāskaifono Jesús ato yoini: “Na meka nai mēranoa mā nikai ea tāpimatama, mato tāpimaxikī yoia,” ato fani.

³¹ “Iskaratīa nā ea Ifofaifoma Niospa ato omiskōimani. Āto ifori nā yōshi chaka Satanās nāri ēfe Epa Niospa potaxii anā xanīfo inōma.

³² Akka ēfi yōra fakekōi. Ea retetakxō ifi cruz ikakī ea mastakaxō ea fininīfōfāxikani. Ea askafāifono ē yorafo ē ato ifi efe rafenōfo,” ixō Jesús ato yoini.

³³ Nānori ato yoini nā ifi cruz ikakī mā mastaxiaifono ato tāpimani.

³⁴ Nikakaxō yorafāfe nāno nixō yoinifo iskafakakī: “Niospa meka sharaōnoa kirikaki kenekī yoikī iskafanifo: ‘Cristo, nā Niospa nīchia nīpanaka nanakama,’ fanifo. Akka, ¿afeskakī mī noko yoimē iskafakī?: ‘Na yōra fakekōi retetakxō ifi cruz ikakī mastakaxō fininīfōfāxikani, mī noko fai. ¿Akka tsoaōnoa mī noko yoimē?’” fanifo.

³⁵ Askafāifono Jesús ato yoini: “Ē nono ika pena keskara shara. Nāskakē ē anā mato fe nono ifāinakama. Ē mato yoiaito nikasharakāfe fenoxikakima. Pena yamaino fakish itiro. Nāskakē yora fenotiro. Tsōa fakish mēra ōitiroma, fāi kai fenotiro. Nāskarīfai a chaka shināmis fenotiro. Fenokī tāpitiroma afeskax Nios fe rafetiromāki.

³⁶ Ē mato fe iyoano ea Ifo shara fakāfe fenoxikakima. Mā ea nikasharaino ē mato pena keskara shara fatiro, xafakīa mā inō. Ēfi pena keskarakī. Ea Ifo shara fakaxō māri fetsafo pena keskara shara fatiro mātoxō eari Ifo sharafanōfo,” ato Jesús fani. Mā ato yoikī senēfax, nāskax ato makinoax kaitokai anā tsōa ōinima.

Judeofāfe Jesús nikanifoma

³⁷ Yorafāfe ferotaifi tsōa atiroma keskara Jesús fafiaino tsōa chanīmara fanima nā Niospa Fakekōi fiano.

³⁸ Nā Isaias Niospa meka ato yoipaoni. Nāato kirika keneyoni a inōpokoai yoikī. Iskafakī yoini:

Ifo, nō mī meka nō ato yoifiainokai tsōa noko chanīmara faima. Yōra atiroma keskafakī mī ato ispafiaino tsōa tāpiama, ixō Isaias a inōpokoai yoikī kirika keneyoni.

³⁹ Nāskakē tsōa Jesús nikanima. Askatari afianā Isaías kirika keneni a inōpokoai yoikī iskafakī:

⁴⁰ A nikaiyamaifo Epa Niospa fēxo keskara ato imapakenaka Niospa meka chanīmakōi mā tāpifikaxō tsōa nikayamaito. Niospa ato shinātimafai anā shināsharanōfoma. Nāskakē Niospa meka ōifikakī tsōa shināima āto ōiti kerexkōi fakani mā nikafikaxō. Āto chaka xateaxma ekeki fekanima ē ato fetsa keskara shara fapanā, ixō Niospa ato yoini. Nānori a Jesús inōpokoai yoikī Isaías kirika keneyoni.

⁴¹ Isaías Niospa shināmanaino Jesús tāpini xanīfo sharakōi ikiyoai. Nāskaxō Isaías Jesúsnoa yoini.

⁴² Judeofāfe xanīfofo atirifāfe Jesús chanīmara fanifoma. Akka atirifāfe chanīmara fanifo. Akka afaa tsōa yoinifoma fariseofoki mesekakī noko potayamanōra ikanax āto ichanāti pexe mēraxō.

⁴³ Yora fetsafāfe ato yoiaito nafo sharakōifora nā yorafāfe atoōnoa meka shara yoiaifono nikapaimisfo. Akka Niospa atoōnoa nafo sharakōira ixō yoiaino fichisharapainifoma.

Jesús mekaōxō nō tāpia nō chakakōifo

⁴⁴ Nāskata Jesús fāsikōi mekainīkafā ato yoini iskafakī: “Nā ea chanīmara faito ea fisti chanīmara fatama nā ea nīchiniri chanīmara fai.

⁴⁵ Nāskafakīri mā mā ea ōia nā ea nīchiniri mā mā ōia.

⁴⁶ Nono mai ano fakish keskara. Nāskakē ēfe Epa Nios ariax ē nono mai ano ē oni pena keskara ikiyoi. Fakishi tsōa ōitiroma. Akka nā ea chanīmara faito Epa Nios Ifo sharakōifatio pena keskara shara ixiki.

⁴⁷ “Mā ēfe meka nikafikaxō ea nikayamaifono ēkai ato omiskōimanima. Akka ē mai ano oni yorafo omiskōimatama ato ifiyoi ē oni efe ipaxanōfo.

⁴⁸ Akka nā iskakī shināi: ‘Ēkai Jesús Ifofapaima, askatari āfe mekari ē nikapaima,’ ixō shināi nā ē mato yoisima keskara nikayamax Nios ari katama omiskōipakenaka mēra kaxii. Nāskakē ē mato yoiaito mā ea nikayamax mā mai keyoaino mā omiskōipakenaka.

⁴⁹ Ēfe Epa Niospa ea yoia keskara nānorikōi ē mato yoisim. Ēa ē mato yoima. Ēfe Epa Nios nā ea nīchinioxō ē mato yoisim.

⁵⁰ Mē tāpia Epa Niospa yoia keskara chanīmara faax mā nīpaxatiro. Nāskakē, ‘A ē ato yoisim keskara nānori ato yoife,’ Ēfe Epa Niospa ea famis,” ixō Jesús ato yoini.

13

Jesús aōxō tāpimisfo āto tae chokapakeni

¹ Mā judeofāfe āto Pascua fista chaima ikaino Jesús tāpini a mai anoax Apa ari kaxiai. A Ifofafo nā nono mai anofo ato noini. Mā atoōnoax nakī ato noikōini.

² Jesús aōxō tāpimisfo feta mā xini kaino ato feta pipaini. Nāskaino nā Judas Iscariote mēra Satanás yōshi chaka nanetani. Nā Simón fetsa āfe fake Judas Iscariote. Nā Judas mēra niafaka nanexō shināmani iskafakī: “Ato tāpimafe afeskaxō na Jesús achitirofomākai,” ixō Satanás shināmani.

³ Akka Epa Niospa āfe Fake yoini: “Nā nai mēranoafoya nā mai anoafori mī ato yonomatiro. Mī āto xanīfo,” ixō Epa Niospa anori yoiaito Jesús tāpini. Epa Nios ariax onixakī mā anā akiki kakī Jesús tāpini.

⁴ Nāskata pikī keyotama Jesús fininākafā āfe rapati pekata āfe rakotinī pinixemeni.

⁵ Nāskata faka tasoki manexō a aōxō tāpimisfo ato fāka ochopakeni. Mā ato ochopakexō ato otekere apani āfe rakotinī.

⁶ Ato askafapakī Pedrori āfe tae chokapaiyaito yoini: “Ifo, ¿afeskakī mī ēfe Ifo fixō mī ea fāka ochopaimē?” faito,

⁷ Jesús kemani: “Na ē mato fāka ochofai mī tāpiana. Akka mī chipo tāpixii,” faito,

⁸ anā Pedro kemani: “Maa, Ifo, mīakai ea fāka ōchopakakenakama,” Pedro faito, anā Jesús kemani: “Ē mia ōchoyamainokai mī efe rafetiroma,” fani.

⁹ Askafaito nikakī Pedro yoini: “Ifo, taekis ea chokakima ēfe mifkiri ea afe, ēfe mapokiri ea māchofe,” faito,

¹⁰ “Nā rama yora nashiax āfe yora choshtanatiroma, āfe tae fisti choshtanatiro. Nāskakē nō tae fistici nō chokatiro. Akka keyokōi mā choshtama, ranāri mā shara,” ato Jesús fani.

¹¹ Nānori ato yoini māmāi tāpixō fatoto ato achimaximākai.

¹² Mā ato ōchopaketa āfe rapati safeni. Mā āfe rapati safeta afianā tsaopakekafāni. Nāskaxō ato yoini: “¿Mā mā tāpamē na ē mato fāka ōchofaito?” ato fani.

¹³ Nāskaxō anā ato yoini: “Māfi, ‘Maestro,’ mā ea fayana, ‘Ifo,’ mā ea famis. Chanīmakōi ēmāi mato Ifo ita ē mato maestrori.”

¹⁴ Askata anā ato yoini: “Ē māto Ifokī, askatari ē māto maestrokī ē mato fāka ōchopakea oa māto ina keskarakōixō. Akka nā ē mato fāka ochopakea keskarai mā ranā fāka ōchokome faatanākāfe oa māto inafō keskarax.

¹⁵ Ē mato ōimana keskarai māri askakāfe,” ato fani.

¹⁶ “Ē mato chanīma yoi. A yonoxomistokai āfe xanīfo finōtiroma. Akka ē mato nīchia mā fetsafo ēfe meka yoinō. Nāskafixokai fetsafo ēfe meka ato yoifīkīkai mā ea finōama. Ē mato fāka ōchomis oa ē mato yonoxomis keskaraxō. Nāskaxō, ‘Nō fetsafo finōa, nō āto inama,’ iyamakāfe,” ato Jesús fani.

¹⁷ “Na ē mato yoiaito mā nikakōiax, nāskax mā fāsi inimakōitiro.

¹⁸ “Nāskakē ē mato yoi, akka keyokōiōnoa ē mato yoima. Ē tāpia fatomākī ē katoa a nofe kai, askatari a nofe kaima. Nāskakē ē mato yoi, eōnoa Niospa meka yoikī kirika keneyonifo nō nikakī nō chanīmara fatiro. Iskafakī kirika keneyonifo, Niospa meka: ‘A feta piāi fētsa ea ōikaspakī ea chakafaxii,’ ixō kirika keneyonifo. Chanīmakōi mā ōifainaka,” ato Jesús fani.

¹⁹ “Ea askafayoamano ē mato yoiyomis. Akka nā ē mato yoiai keskara ea askafafono mā ea ōikī, nāskakē mā ea chanīmara fatiro.

²⁰ Ē chanīkima mato yoi ē mato nīchi mā ēfe meka ato yoitanō. Mā ato yoiaito nikakaxō eari nikakani. Nāskatari ea chanīmara fakaxō nā ea nīchiari chanīmara fakani,” ixō Jesús ato yoini.

*“Mā fētsa ea ato achimaxii,” ixō Jesús ato yoini
(Mt. 26.20-25; Mr. 14.17-21; Lc. 22.21-23)*

²¹ Mā yoikī keyota Jesús fāsi shināmitsakōini. Nāskaxō xafakīakōi ato yoini: “Ē chanīma mato yoi. Fatora mā fētsa ea mā ato achimaxii,” ato faito,

²² nikakani fesenākefainifo tāpikanaxma.

²³ Afe ketaxamei tsoa Jesús fichisharapaikōini.

²⁴ “Fatora mā fētsa ea mā ato achimaxii,” ato faito nikakī a Jesús fe ketaxamei tsoa Pedro fenāmāshta yōkani: “Tsoaōnoa yoimākai, yōkafe,” fani.

²⁵ Nāskafaito nikakī a Jesús fe ketaxamei tsoato chaimashta fani yōkaxikī: “Ifo, ¿tsoaōnoa mī yoimē?” faito,

²⁶ Jesús kemani: “Na pāa tore pishta nami ene mēra mechanafaxō ē ināito nāatofi ea ato achimaxii kiki,” Jesús fani. Nāskafaxō nami ene mēra pāa mechanafaxō Judas Iscariote Jesús ināni, Simón fetsa āfe fake.

²⁷ Jesús pāa mechanafaxō Judas ināino Judas mēra Satanás chaka nanerisatani. Nāskaxō Jesús Judas yoini: “Nā mī apaiyai keskara farisafafe,” fani.

²⁸ Nā tsoakaxō piaifāfekai tāpinifoma afeska fakī askafaimākai.

²⁹ Atirifāfe shinānifo: “Jesús Judas nīchiaito Judaspa afara fitanō Jesús nīchi fista ayanā pixikī,” ixō shinānifo. Akka atirifāferi shinānifo iskafakī: “Jesús Judas nīchia a afaamaisfo kori inātanō,” ixō shinānifo. Nā Judaspa āto kori kexexomis ini.

³⁰ Nāskax Judas koshi kani mā fakishaino.

Jesús Ifofamisfo noinā faatanātirofo

³¹⁻³² Nāskata mā Judas ato makinoax kaano Jesús ato yoini: “Iskaratīa ē naino Epa Niospa mato ōimani ēmāi āfe Fake sharakōikē. Nāskafīax ēfi yōra fakekōi. Ē afama mīshti akaito ōikaxō, ‘Epa Nios fāsi sharara,’ faxikani. Nāskakē mā tāpitiro ēmāi Niospa Fakekōikē a keskara sharakōi.

³³ “Ēfe fakefāfe, ēkai anā nono mato fe ifīnakama. Mā ea fenaxii. Ē judeofo yoita keskafakīri ē matori yoi. Ē kai arikai mā katiroma.

³⁴ Ēfe meka fenashara ē mato yoikai, noināi finakāfe. Nā ē mato noiai keskarai māri noinā faatanāsharakāfe.

³⁵ Mā noināiyaito yorāfāfe ōinōfo mā eōxō tāpimiski,” Jesús ato fani.

*“Ē Jesús ōimisma,’ Pedro ixiaiino,” Jesús ato yoini
(Mt. 26.31-35; Mr. 14.27-31; Lc. 22.31-34)*

³⁶ Nāskata Pedro Jesús yōkani: “Ifo, ¿fakī mī kaimē?” faito, nikakī Jesús kemani: “Ē kai arikai iskaratīa mī efe kayotiro. Chipō mī kaxii,” faito,

³⁷ anā Pedro kemani: “¿Afeska iskaratīa ē mefe katiromamē? Mē iskaratīa itipinīshara mīōnoax naxikī,” faito,

³⁸ anā Jesús kemani: “¿Mī chanīmamē? ¿Mā mī itipinīsharamē naxikī?” Jesús fani. Nāskaxō anā yoini: “Na fakishi takara keoyoamano mī ea iskafai: ‘Ēkai Jesús ōimisma,’ ixō mī ato yoi tres fakī,” Jesús fani.

14

Jesús fai keskara. Aōnoax nō Nioski nokotiro

¹ Anā Jesús ato yoini: “Ēfe fakefāfe, māto ōiti fekaxtefayamakāfe. Nios chanīmara fata, eari chanīmara fakāfe.

² Ēfe Epa ika ano pexe ichapa sharakōifo. Ē mato itipinīsharafaxōi kaikai. Askarayamakē ē mato yoikerana.

³ Ē kaxō ē mato itipinīshara faxōikai. Afianā oxō ē mato ifiyoxii, a ē ika ari mato iyoxiki ari mā efe Īpaxanō.

⁴ Mā mā fai tāpiaki a ē kai ari,” ato faito,

⁵ Tomás kemani: “Ifo, nōkai a mī kai ari tāpiama, afeskaxō nō fai tāpitiroma,” faito,

⁶ Jesús kemani: “Ēfi nā fai keskaraki. Ēfi chanīmismaki. Eōnoax yorafo nīpaxatirofoki. Tsoakai ēfe Epa ika ano nokotiroma. Eōnoax fisti ēfe Epa ari nokotirofo.

⁷ “Ea tāpikōixō ēfe Epari mā tāpikōitiro. Akka iskaratūa mā ēfe Epa tāpikōikai. Nā mā ea ōiai keskarari mā ēfe Epa mā ōi,” ato Jesús faito,

⁸ Felipe kemani: “Ifo, noko Epa Nios ōimafe. Mī noko Epa Nios ōimanaino nō inimakōitiro,” faito,

⁹ Jesús kemani: “Felipe, afetūakai ē mato fe imisma. ¿Afeskakī mīa ea tāpiyomismamē? Ea ōikī ēfe Epari mā mī ōi. ¿Afeskakī: ‘Ea Epa ōimafe,’ mī ea faimē?

¹⁰ Ēfi ēfe Epa fe fisti keskarakōiki. ¿Nā mī chanīmara faimamē? A ē mato yoiai ēa ē mato yoima ēfe Epaōnoa ē mato yoi. Epa Niospa nā apaiyai keskara ea famai efe imis.

¹¹ Ē mato yoi ēfe Epa efe rafea ēri ēfe Epa fe rafemiski. Nāskakē ea chanīmara fakāfe. Nā tsoa atiroma keskarafori ē famis nā ōixō ea chanīmara fakāfe.

¹² “Chanīmakōi ē mato yoi. Nā ea chanīmara faxō nā ē akai keskarari faxii. Ēfe Epa ari kaxō a ē aka keskaramaroko finōmainīfofā axikani.

¹³ Afara ēfe aneōxō ēfe Epa mā yōkaito ē mato axoxii, eōxō Epa Nios sharara fanōfo.

¹⁴ Afara fetsa ēfe aneōxō mā Epa Nios yōkaito ē mato axotiro,” ixō Jesús ato yoini.

“Epa Nios āfe Yōshi Shara ē matoki nīchixii,” Jesús ato fani.

¹⁵ Anā Jesús ato yoini iskafakī: “Ea noikōiki nā ē mato yoiai keskai ikāfe.

¹⁶ Ē Epa Nios mato kīfixoni mato fetsa nīchixonō, nāto māto ōiti fepeaxoyonō. Nā Niospa Yōshi Shara, nāfi chanīmismaki. Mato fe ipanaka.

¹⁷ A nikayamaifāfe ōitirofoma. Askatari tāpitirofoma. Akka māfi mā mā tāpimiski mato femāi ikē. Nāskatari mato shinā mēra mato fe ika.

¹⁸ “Akka ēkai mato fe ikima. Askafixō ē mato potaima. Ē matoki anā oxii.

¹⁹ Ē anā nono ikima. A ea Ifofaiāfema anā ea ōikanima. Akka mā ea ōixii, ē niano. Nāskakē māri efe nīpanaka.

²⁰ Naax ē otoaito mā ea tāpitiro ēmāi Epa Nios fe nīpanakakē. Nāskarīfiai mā efe ixii. Ēri ē mato fe ixii.

²¹ Nāskakē ē mato yoiaito mā ea nikakōixō mā ea fāsi noi. Ea noixori ēfe Epari mā noi. Askatari ēri ē mato noi. Nā ē shināi keskara ē mato tāpimani,” ixō Jesús ato yoini.

²² Nāskaito Judas fetsa, Judas Iscariotema yōkani: “Ifo, ¿afeskakī a mia Ifofaifoma mī ato tāpimatama noko fisti mī tāpimanimē?” ixō yōkaito,

²³ Jesús kemani: “Ea noikakī nā ē mato yoiai keskara ea nikakōitirofo. Ēfe Epa ato noiaino ēri ato noi. Nāskax nō ato fe rafetiro.

²⁴ Ea noiyamakaxokai ē yoia keskara ea nikakanima. Na meka mā nikai ēfe mekama, ēfe Ēpa meka ē mato yoi. Nā ea nīchinito āfe meka.

²⁵ “Mato fe iyoxō ē mato yoiyofafāina.

²⁶ Nāskaxō Epa Niospa āfe Yōshi Shara matoki nīchi eōxō mato fe ixō mato ōiti mato inīmamasharaxonō. Keyokōi mato tāpimani. Nā ē mato yoia keskara mato shināmani.

²⁷ “Ē mato makinoax kakī ē mato ōiti fepeaxosharafāinikai. Akka nā ea nikaiāfema mato ōiti fepeaxotirofoma, ē fistichi ē mato axotiro. Nāskakē shināchakayamakāfe. Rateyamakāfe.

²⁸ Ē mato yoiaito mā mā nikai ē mato makinoax kaikai. Askafīax ē anā matoki oxii. Ea noikōiax mā ekeki inimatiro ēmāi ēfe Epa ari kaino, ēfe Epamāi ea finōkōikē.

²⁹ Nā ē mato rama yoiai keskaito mā ea chanīmara fatiro. Mē mato yoi a ixiai mā ōixō mā ea chanīmara fanō.

³⁰ “Ē mato mēxotaima yoipaifīaino nā yōshi chakafāfe āto xanīfo Satanás chaka ekeki oi. Askafixō ea afeska fatiroma.

³¹ Akka ē Epa Nios fāsi noikōi. Nāskakē nā ea yoiai keskai ē akōini. Nāskaxō keyokōichi ea tāpikani ē fāsi aō noiaito. Fininīfofākāfe. Nonoax nō kanō,” ato fani.

15

Jesúsfi fana áfe kaya keskaraki. Akka nã fana pöya keskarafõ a Ifofamisfo

¹ Anã Jesús ato yoini iskafakí: “Èfi uva áfe kaya keskarakõiki. Akka èfe Epa nã uva áfe ifo keskara.

² Akka mã na uva áfe pöya keskarafõ. Nã uva pöya fetsa fimiymaito áfe ifáfe mextetiro potaxikí. Akka nã uva áfe pöya fimiyafo nã áfe teshpa mĩshti ifáfe xatetiro. Nãskax uva pöya sharayakõí itiro fimi sharaya ixikí.

³ Nãskarifiakí mã èfe meka nikaxõ mã mãto chaka mã potax mã isharaxii.

⁴ Emakinoax paxkayamakáfe. Efe rafekáfe, nã è mato fe ika keskariai. Akka uva pöya fisti fimitiroma áfe kayamaisax. Nãskarifiakí mã èfe rafexoma nã è mato amapaiyai keskara mã atiroma.

⁵ “Èfi nã uva áfe kaya keskarakí. Akka mã na uva áfe pöyafo keskara. Akka nã èfe rafekõiai èri afe rafekõiaino ea keskarakõiri itiro. È mato fe ikamano mã afaa afeskatiroma.

⁶ Uva áfe pöya chaka fimimais nõ mextexõ potatiro. Nãskaxõ mã xiní tsasifaano nõ ichafaxõ nõ kofatiro. Nãskarifiái nã èfe rafekaspaifo nãfo chiifã mēra fokani.

⁷ “Akka mã èfe rafekõixõ èfe meka mã nikakí mãto õiti mēraxõ mã shinãkí mã afarashta fapaikí èfe Epa Nios mã kífiaito mato axõ.

⁸ A è mato amapaiyai keskara mã akí nãskax eõxõ tãpimis mã iki. Mã askafaito õikakí Epa Nios tãpitirofo Epa Niosmãí fãsi finakõikē.

⁹⁻¹⁰ A Epa Niospa noikõiai keskakakí èri mato noikõi. Epa Niospa ea yoiai keskara è afafãini. Akka è áfe imiskē ea noifafãini. Nãskafakíri nã è mato yoiaito mã atiro mãmãí èfe ixõ. Nãskakē è mato noifafãini.

¹¹ “Anori è mato yoi è inimai. Nãskarifiái mãri mã inimanõ. È mato yoiaito mã anori akí mã tãpitiro è mato noiaino.

¹² Iskafakí è mato yoi: È mato noiai keskai mãri noinãkáfe.

¹³ Nõ fetsafo fe rafekõiax nõ aõ noikõiax nõ aõnoax natiro. A mã nakí noiai keskarakõí tsõa finõtiroma.

¹⁴ È mato yoiai keskara aki mã èfe rafemis mã itiro.

¹⁵ Akka a mato fe rafea mã tãpimatiro a mã shinãí keskara. Nã èfe Epa ea yoimis keskara è matori tãpimani mãmãí èfe rafeano. Nãskakē ea yonoxomisfõra è anã mato faima. Efe rafeafõra è mato faxii.

¹⁶ Mã ea ifiyamafiaino è mato ifini ea keskara mã inõ mãtoxõ fetsafãferi ea chanĩmara fanõfo. Nãfãfe ea Ifofapanakafo èfe ipaxakakí. Nãskaifõno mã afarashta èfe Epa Nios èfe aneõxõ mã yõkaito mato axosharaxii.

¹⁷ Nã è mato yoiai keskai noinãkáfe,” ixõ Jesús ato yoini.

Jesús Ifofamisfo ato noikaspakani

¹⁸ Anã Jesús ato yoini iskafakí: “Anã è mato yoi mato noikaspayokanima. Akka ea noikaspayokani. Mato iskaratĩa noikaspaifafõno mã tãpitiro taefakí ea noikaspakani.

¹⁹ A ea Ifofaafõma fe mã ato fe rafeaito mato noikeranafo. Aa ranã noinãifo keskari fakí matori noikeranafo. Akka mãkai ato keskarama. È mato ifini a ea Ifofaifõma keskara mã inõma. Akka nã ea Ifofaafãfema mato noikaspakani.

²⁰ Nã è mato yoiai keskara shinãkáfe. È mato yoi iskafakí a yonoxomistokai áfe ifo finõtiroma. Akka ea omiskõimakani matori omiskõimaxikani. Akka a è ato tãpimana nikaxaxõ matori nikaxikani mã ato yoiaito.

²¹ Akka mã ea Ifofaito, nã ea amisfo keskakakí matori askafaxikani. Akka a ea nĩchini tsõa tãpima. Nãskaxõ mato chakafaxikani.

²² “È atoki oyamaxõ Niospa meka è ato yoiyamaito tsõa tãpikeranafõma. Akka Niospa meka pishta tsõa nikayomisma afara chakafamisfo. Nãskax ãto chaka atoõ neama. Nãskafiaifõno Niospa meka è ato yoixiki è oni. Nãskakē tsõa iskaratĩa iskatiroma: ‘Tsõa ea Niospa meka yoiaima.’ Askatari: ‘È afaa chakafamisma,’ itirofoma. Mã nikafikatsaxakakí ãto chaka xateafõma. Nãskax ãto chaka atoõ nea.

²³ Ea noikaspayanã èfe Epari noikaspakani.

²⁴ Niosxõ tsõa atiroma keskara è ato ispamis. Askafikaxokai tsõa ãto chaka xateafõma. Tsõa atiroma keskara è faito õifikakí ea nikakanima. Nãskax shara ikanima. Akka è afarafõ shara fayamaito ea tãpikeranafõma. Nãskax ato chaka atoõ nekeranima. Akka è afarafõ shara faito mã õifikaxõ ea noikaspayanã èfe Epari noikaspakani.

²⁵ A Niospa meka yoikí kirika kenenifo nē askakõi. Niospa meka yoikí eõnoa kirika kenenifo iskafakakí: ‘È afara chakafayamafiakē ea noikaspakani,’ ixõ eõnoa yoikí kirika kenenifo.

²⁶ “Matori noikaspaifono ěfe Epa Nios arixō ěfe Yōshi Shara ě matoki nĉichixii. Nāato mato ōiti fepeaxosharanō. Nāfi chanĭmakōikĭ eōnoa mato yoixii.

²⁷ Ĕ yorafo Niospa meka ato yoikĭ taefani. Nāskax mā efe imiski. Nāskarifiakĭ māri eōnoa tāpixō mā ato yoitiro.

16

¹ “A mā omiskōixiai ě mato yoiyoni mā iskakĭ shinānōma: ‘Ĵafeskai Jesūs ěfe Ifo fiano ě omiskōimĕ?’ ixō mā anori shinākĭ mā ea potapaixii, anākai mā ea chanĭmara faxima.

² Tāpikāfe. Māto kaifāfe nā ea Ifofaafāfema mato potaxikani mā anā āto ichanāti pexe mĕra ĩkinōma. Ĕ mato yoikōi anā shināsharakanima. Fakirira shinākani iskakakĭ: ‘Nā Niospa apaiyai keskara nō faxōi. Nā Jesūs Ifofaafō nō retei,’ ixō anori shinākani.

³ Ĕfe Epa tāpiafoma eari tāpiafoma. Nāskakaxō mato chakafaxikani.

⁴ Akka nā mā ea Ifofakĭ taefanitĭa mā omiskōixii ě mato famisma, ě mato fe ifiaxokai ě mato afaa yoimisma. Akka iskaratĭa ě mato yoi. Nāskakĕ mā mato omiskōimanaifono mā shināxii nā ě mato yoimis keskara,” Jesūs ato fani.

Niospa Yōshi Sharapa noko shināmatio

⁵ Anā Jesūs ato yoini iskafakĭ: “Ĕfe Epa ea nĉichini. Iskaratĭa ě anā akiki kai. Akka mā, ‘ĴFaki mĭ kaimĕ?’ mā ea faima.

⁶ Ĕ mato yoiaino mā shināmitsai.

⁷ Ĕ mato yoikōi, ě mato makinoax kaano mā shara ixii. Akka ě mato makinoax kayamaino Niospa Yōshi Shara matoki oima. Nāskakĕ mato ōiti mato fepeaxoyoima. Nāskafiano ě mato makinoax kaxō ěfe Yōshi Shara ě matoki nĉichixii.

⁸ Nā ěfe Yōshi Sharapa nai mĕranoax oxō a ea Ifofaafoma ato yoixii iskafakĭ: ‘Mā mā afarafo chakafamiski,’ ato faxii. Nāskatari a Niospa fichipaiyai ato tāpimaxii. Nāskaxō a Nios Ifofaafoma ato yoixii iskafakĭ: ‘Mā mā afarafo chakafamiski, nāskakĕ mā omiskōi,’ ato faxii.

⁹ Nā ea Ifofaitoma afara chaka shināi. Nāskakĕ ěfe Yōshi Sharapa a afara chakafamis ispayoxii.

¹⁰ Ĕfi nā ěfe Epa ea amapaiyai keskara ě amiski. Nāskax ěfe Epa ari ě kai anā ea ōinōfoma. Nāri Niospa Yōshi Sharapa ato tāpimaniyoxii.

¹¹ Nāskatari Niospa Satanās omiskōimaniyoxiai Niospa ěfe Yōshi Sharapa ato tāpimaniyoxii, nā Satanās āto xanĭfo.

¹² “Ĕ mato meka ichapa yoipaiĭaitokai mā tāpitiroma.

¹³ Nāskafikĕ Niospa Yōshi Shara matoki oxō a Niospa ěfe meka chanĭmakōi mato tāpimaxii. Nāfi chanĭmisma. Akka ěfe meka mato yoitama nā ěfe Epa shināmanai anori mato tāpimaniyoi. Nā afarafo afeskara ixiai mato tāpimaniyoi.

¹⁴ Nāato eōnoa yoisharakōixii. Nāskakĕ nā ě mato yoimis keskara Niospa Yōshi Sharapa mato tāpimaxii.

¹⁵ Nā ěfe Epanāfori ěfenāfori. Nāskakĕ nā ě yoiyai keskara ěfe Epa ěfe Yōshi Sharapa mato tāpimaxii,” ixō Jesūs ato yoini.

Jesūs aōxō tāpimisfo shināmitsafikanax chipo inimaxikani

¹⁶ Anā Jesūs ato yoini iskafakĭ: “Akka ĕkai anā mato fe nono samarakaima. Mĕ ěfe Epa ari kai. Nāskakĕ mā ea ōiyoima. Nāskafix anā ě samamashta oaito mā ea ōixii,” aōxō tāpimisfo Jesūs ato fani.

¹⁷⁻¹⁸ Ato askafaito nikakani yoinānifo: “Ĵafeskakĭ, ‘Ĕfe Epa ari kaito mā anā ea ōiyoima,’ noko faimĕ? ‘Afianā ě oaito mā ea ōixii,’ noko fai. Na noko yoiyai keskarakai nō tāpiama,” ikanax yoinānifo.

¹⁹ Nāskakaxō yōkapaiaifāfe Jesūs ato tāpini. “ĴNa ě mato yoiyai keskara mā tāpiamax mā yoinōnāimĕ?” ato fani.

²⁰ “Ĕ mato xafakĭa yoinō. Mĕ omiskōiaino a ea Ifofaafoma fāsi inimakani. Akka māfi ea shināi mā oiiai. Mā ea shināi oiafiax chipo mā ekeki inimaxii.

²¹ Akka mā kĕro fake kākĭ pae metiro. Nāskax mā fake kākĭ anā pae metiroma māmāi ěfe fake kākĭax. Nāskax inimasharakōitiro māmāi ěfe fake kākĭsharax.

²² Nāskarifiāi ě mato makinoax kaino mā oiiai omiskōixii. Nāskax ě anā chipo matoki oaino mā inimakōixii. Tsōakai mato xatematiro mā ekeki inimaito.

²³ “Ĕ naax ě otoax ě anā mato fe iyamaino mā anā afara mā ea yōkatiroma. Akka ěfe aneōxō mā Epa Nios yōkatiro. Afarashta ěfe aneōxō mā Epa Nios yōkaito mato axoxii.

²⁴ Ĕfe aneōxokai ěfe Epa mā yōkayomisma. Akka ě naax otokĕ nāskakĕ ěfe aneōxō ěfe Epa mā yōkatiro. Mā yōkaito ěfe Epa mato ināxii. Mato ināino mā fāsi inimakōixii,” ixō Jesūs ato yoini.

Jesús keyokōi finōa

²⁵ Anā Jesús ato yoini iskarafāki: “Ē mato meka fetsafaxō yoiaito mā tāpiyomisma. Ēkairoko xafakia mato yoiaito mā tāpīpanā. Akka iskaratīa xafakia ē mato yoi Epa Niosnoa mā tāpīnō.

²⁶⁻²⁷ Nāskaxō mā ea noi. Ēmāi Nios ariax matoki onikē mā mā ea chanimara faa. Nāskakē Epa Niospa matori noikōi. Akka, ‘Ē mato makinoax kakī anā ē mato Epa Nios kīfixoni,’ ē mato faima. Mā mā yōkaxii ēfe aneōxō.

²⁸ Ē Epa ariax nono mai ano oni. Nāskakē iskaratīa nono mai anoax ēfe Epa ari ē kai,” ixō ato Jesús yoini.

²⁹ Ato askafaino aōxō tāpimisfāfe kemanifo: “Aicho, iskaratīa xafakīakōi mī noko yoikai. A mī noko taefakī yoiaito nō tāpiyoitama. Anā meka fetsafaxō mī noko yoima.

³⁰ Iskaratīa mā nō tāpia keyokōi mī tāpikōia. Nō mia yōkapaipayito mī noko tāpitiro. Nāskakē mī Nios ariax onikē nō mia chanimara fai,” ixō yoiaifāfe

³¹ Jesús anā ato kemani: “¿Chanīmamē mā mā ea chanimara faimē?” ato fani.

³² Nāskaxō anā ato yoini: “Chipo mā emakinoax mā paxkakāinikai. Mā fakirira kai. Chanīma, iskaratīa mā emakinoax mā fakirira kai. Tsoakai efe nēteima. Mā askafaiinokai eres ē nēteima. Ēfe Epa fe ē nētei.

³³ Nā ē mato yoi mātō ōiti shara inō. Akka nā ea chanimara faafoma fe mā nono nāmā nētei. Nāskakē mato omiskōimafiaifono shināchakayamakāfe. Ē Satanás yafi nā ea chanimara faafomafo ē ato finōkōia. Nāskakē ē mato kexesharatiro,” Jesús ato fani.

17*Aōxō tāpimisfo Jesús Epa Nios ato kīfixoni*

¹ Nāskata Jesús nai foisnīfōfā Apa yoini: “Epa, iskaratīa ē naano ato tāpimafe ē mī Fakekōiki. Mī ato tāpimanaino ēri ato tāpimatiro mī fāsi sharakōi.

² Mī ea nīchini ē āto xanīfo inō. Nāskaxō mī ea ato ināni ē ato imasharapakexanō.

³ Meres fisti mī Nioskōi. Akka ēfi Jesucristo nā mīa nīchini. Nā noko tāpiafo nāfo nīpanakafo.

⁴ “Ē nono mai anoxō afarafa ē ato ispa, mīmāi sharafinakōikē. Nā mīa yoiai keskara mē aka.

⁵ Nō mai onifamatai ē mia keskara xanīfo shara iyopaoni. Nāskakē iskaratīa ē mefe xanīfo inō ea xanīfo imafe a ē ipaoni keskara.

⁶ “Nono mai anoa yorafa mī ea ato minini ē ato tāpimanō mī afe keskaramāki. Nā mīnāfofiano mī ea ato minini. Mī meka nikakōinifo.

⁷ A mī ea yoia keskara ē ato yoimis. Nāfo mā tāpikōiafo.

⁸ A mīa yoiai keskara ē ato yoiaito ea chanimara fakōikani. A ē mia ariax oniri mā tāpiafo. Chanimara fakani a ea mīa nīchini.

⁹ “Ē mia ato kīfixōfafāini. Akka a ea chanimara faafoma ē mia ato kīfixonima. Nā ea mī ato mininiōxō ē mia kīfifafāini. Ē mia ato kīfixōfafāini nāfomāi mīnāfokē.

¹⁰ Akka nā ēfenāfori mīnāki. Nā mīnāfori ēfenā. Nāskaxō nā ea chanimara faafoōxō fetsafāferi tāpitirofo ē sharakē.

¹¹ “Ēkai anā na mai ano ikima. Ē mikiki kai. Akka nā mia Ifofaafofi nono na mai ano nētekani. Epa, mī fāsi sharaki. Ato kexesharafe. Mī aneōxō ato kexesharafe. Nā mī ea ināni tii ato kexesharafe. Akka nōfi fisti keskarakai. Nāfori nofe fisti keskara inōfo.

¹² Ē ato fe iyoxō ē ato kexeshara. Mīoxō ē ato kexeshara, ē fato fenoama. Akka nā Satanás āfe fake fisti ē fenoa. Nā mī meka yoikī kirika keneyonifo keskarakai nā fisti mā fenoa.

¹³ “Iskaratīa ē mia ari kai. Ē kayoxoma ē ato yoiyoi nā ē ikai keskariai akairi inimakōinōfo.

¹⁴ Nā mī yoiai keskara mē ato tāpimani. A mia chanimara faafāfema ato noikaspakani, mīamāi Ifofaafono. Nāskakē ato noikaspakani. Nāskakēri ērikai ato keskarama. Akka eari noikaspakani.

¹⁵ “Akka ē mia yoima na mai anoa mī ato ifinō. Akka ē mia yoi na mai anoa mī ato kexesharanō Satanás chakata ato afeska fanōma.

¹⁶ Nā mia Ifofaafa a mia chanimara faafomafo fe, ato fe rafetiroma. Ērikai ē ato fe rafetiroma.

¹⁷ Mī meka chanīmakōi. Mī mekapa ato sharafafe mia keskara shara inōfo.

¹⁸ Ea mī mai ano nīchini ē mī meka ato yoinō. Nāskarīfakī ē yorafa nīchi mī meka shara ato yoitanōfo.

¹⁹ Mīa ea yoia keskara ē akaino nāfāferi askari fanōfo.

²⁰⁻²¹ “Ēkai ato fistiōxō kīfifafāinima. Nā ea Ifofaafāfe ato yoiaifono nikakaxō ea Ifofaxikani. Nāskakē ē mia ato kīfixōfafāini nā nō shināi keskara fisti shinānōfo. Mī efe imis keskai nāfori

nofe inōfo. Nō ato fe tanaima niaito òikakī a ea chanīmara faafāfema akairi chanīmara fanōfo mī ea nīchini.

²² Mī efe imis keskai ēri ato fe imiski. Nā nō shināi keskarafa akairi shinānōfo.

²³ Mī efe ika keskarari ēri ato fe ikaki. Akka nā mī shināi keskarafa nōri shinātiro. Mī òiti keskara nō itiro. Akka mī ea atoki nīchini. Nā mī ea noiai keskari fakī nāfori mī ato noikōi. Mī askafaino nā ea chanīmara faafāfema tāpitirofo.

²⁴ “Epa, nā yorafo mī ea ināfo efe inōfo mī ika anoa mia keskara shara ea òinōfo. Mī mai onifayoxoma mī ea noiyoapaoni.

²⁵ Epa, mī fāsi sharakōi. Nā ea chanīmara faafāfemakai mia tāpiafoma. Akka ē mia tāpikōia. Mī ea nīchini nā efe ikafāfe mā tāpiafo.

²⁶ Mī afe keskaramāki mē mia ato tāpimamis nā mī ea noiai keskari fakī, nāfāferi fetsafo noikōinōfo ē ato fe ikano. Askatari ē ato òimafāini,” ixō Jesūs Apa kīfīni.

18

Jesūs achinifo

(Mt. 26.47-56; Mr. 14.43-50; Lc. 22.47-53)

¹ Nāskata mā Apa kīfīkī nishpata aōxō tāpimisfo fe fakishi Jesūs kani, xexa Cedrón pishta pokefaini. Nāno ifi fanafāfe āfe anefo olivos ini. Olivos mēra ikitoshinifo.

² Judaspa ato Jesūs achimani kakī tāpini fakī Jesūs kaamāki, Olivos anomāi aōxō tāpimisfo Jesūs ato iyomiskē.

³ Nānori Judaspa sorarofō iyoni Jesūs achinōfo. Nā ato Nios kīfixomis xanīfofōfāfe askatari fariseofāferi Nios kīfīti pexefā kexemisfo nīchinifo Judas fe fōtanōfo. Chiifoya kenofoya koshatifo ya ashifoya fonifo.

⁴ Mā achifōfāifono Jesūs ato tāpini. Mā nokoafono ato yōkani: “¿Mā tsoa fenaimē?” ato faito,

⁵ “Nō Jesūs Nazarete anoa nō fenai,” faifāfe, ato kemani: “Ēkīa, nono ē ika,” ato fani. Ato askafaino nā Jesūs ato achimanai Judasri nāno ato fe ini.

⁶ “Ē nono ikaki,” Jesūs ato faino, chetekiri ifiakekafāpakei fetsenifo.

⁷ Nāskaxō Jesūs anā ato yōkani: “¿Tsoa mā fenaimē?” Jesūs ato faino, “Nō Jesūs Nazarete anoa nō fenai,” faifāfe

⁸ anā ato yoini: “Ēkīa nā mā ea fenai ē mato faa,” ato fani. Nāskaxō ato yoini: “Mā ea fenamāki na eōxō tāpimisfo ato nīchikāfe fotanōfo,” ato fani.

⁹ Nā Jesūsnoa yoikī kirika keneyonifo iskafakī: “A mīa ea minia fato fisti fenoima,” ixō kirika kenenifo. Nāskaxō nā kirika kenenifo keskarakōi Jesūs Apa Nios kīfīni.

¹⁰ Nāskaino Pedro āfe keno tsekani, āfe keno tsiostamexō. Mā āfe keno fixō nā ato Nios kīfixomisto āfe xanīfāfe yonomati paxteni. Nā xanīfāfe āfe yonomati āfe ane Malco ini. Nā Pedro paxteni.

¹¹ Pedro askafaito òikī, “Mī keno fafe,” Jesūs Pedro fani. “¿Mī shināimamē? Ēfe Epa ea afara kechoki inā ē ayai,” ayatiki keparanākī Jesūs Pedro yoini. “Nā ēfe Epa Niospa apaiyai keskara ē akikai,” ixō Jesūs yoipaini.

Jesūs Anás ano iyonifo

(Mt. 26.57-58; Mr. 14.53-54; Lc. 22.54)

¹² Sorarofāfe āfe xanīfo feta a Nios kīfīti pexefā kexemisfo feta osināxō Jesūs achixaxō metexkere anifo.

¹³ Metexkere akaxō Anás pexe ano iyonifo. Nā Anás Caifás āfe rayos ini. Nā Caifás Nios ato kīfixomis xanīfokōi ini.

¹⁴ Nā Caifás āfe kaifo israelifo yoini: “Feronāfake fisti yorafoōnoax naa, sharaki,” ato fani.

“Ē Jesūs òimisma,” Pedro ini

(Mt. 26.69-70; Mr. 14.66-68; Lc. 22.55-57)

¹⁵ Askata Jesūs iyoaifono Pedro fe a Jesūsxō tāpimis fetsa ato acho fonifo. Mā pexe ano nokoano nā Jesūsxō tāpimis fetsa xanīfāfe mā òimis ini. Nā Jesūs fe ikikaini.

¹⁶ Akka Pedro kāiti ano nēteni, ikinima. Akka nā Jesūsxō tāpimis fetsa ikikaini. Nāato xomaya a kāiti kexea yoini Pedrori ikimanō.

¹⁷ Mā Pedro ikiano nā kāiti kexemis xomayato yōkani: “¿Mīri mī Jesūs āfe inamē?” faito, “Maa, ēkai Jesūs āfe inama,” Pedro fani.

¹⁸ Mā fakishano matsinākōikanax chii ketefaax keyokōi chii yoonifo matsi meyamaxikakī. Nā xanīfofo ato yonoxomisfo fe a Nios kīfīti pexefā kexemisfāfe chii ketefaax yoonifo. Pedrori ato fe yooni.

Judeofāfe xanīfāfe Jesūs yōkani

(Mt. 26.59-66; Mr. 14.55-64; Lc. 22.66-71)

¹⁹ Nāskata ato Nios kīfixomisfāfe āto xanīfāfe Jesús yōkani iskafakī: “¿Fatofomē a mīōxō tāpimisfo? ¿Afaa mī ato yoimismē?” faito,

²⁰ “Ēkai one ato yoiamā. Keyokōichi ea nikanōfo ē ato yoimis. Ē mātō ichanāti pexe mēranoa yafi a mātō Nios kīfīti pexefā mēranoa ē ato yoimis. Ēkai ēfe meka ē onemisma.

²¹ ¿Afeskakī mī ea yōkaimē? Ea yōkakima a ea nikamisfo yōkafe. A ē ato yoimis tāpiafoki,” Jesús faito,

²² a Nios kīfīti pexefā kexemisto afe ketaxamei niato fepasyanā yoini: “¿Afeskakī nōko xanīfo mī anori yoimē?” faito,

²³ Jesús anā kemani: “Afaa chaka ē yoimē ea yoife. Akka ē afaa chaka yoiamā ¿afeskakī mī ea fepasimē?” Jesús fani.

²⁴ Askafaito nikakī Anās āfe rayos Caifās ano Jesús nīchini metexkere axō. Nā Caifās ato Nios kīfixomis āto xanīfokōi ini.

Pedro anā ato yoini: “Ēkai Jesús ōmisma,” ato fani
(Mt. 26.71-75; Mr. 14.69-72; Lc. 22.58-62)

²⁵ Nānoax Pedro ato fe chīi yooni. ato fe yooaito afianā Pedro yōkanifo: “Mīfi nā Jesús āfe ina fetsakī,” faifāfe, “Maa, ēkai nā Jesús āfe inama,” ato fani.

²⁶ Ato askafaino nā paxteato afe yōra yōkani: “¿Ē mia ōiamamē? Akka ē mia ōia. Nā fanafo mapoa mēranoa Jesús yafi ē mia ōia,” nā paxteato afe yōra Pedro fani.

²⁷ “Maa. Ēkaima,” Pedro faino takara keoinākafani.

Pilato ano Jesús iyonifo
(Mt. 27.1-2, 11-14; Mr. 15.1-5; Lc. 23.1-5)

²⁸ Nāskano fakishpari judeofāfe Caifās āfe pexe anoxō Pilato xanīfo ano Jesús iyonifo. Nā judeofo Pilato āfe pexe mēra ikitiroma inifo. Pilatokairoko judeokē a mēra ikipanāfāfe. “Nō Pilato āfe pexe mēra ikiax nō chakanatiro,” ikanax, ikikaspanifo. Nā judeofo a judeofoma fe rafexō Pascua fistatīa pitirofoma ipaonifo. Nāskara feyafamisfo ipaonifo. Nāskakē Pilato āfe pexe mēra ikikaspanifo.

²⁹ Nāskaifono pexe kachiori kāinākafā Pilato ato yōkani: “¿Afaa chakafakē na feronāfake mā ea ano efeamē?” ato faito,

³⁰ “Afaa chakafayamakekai nō mikiki efekeranama,” faifāfe,

³¹ ato Pilato yoini: “Iyotakāfe. Mātō xinifāfe yoini keskafakī omiskōimaxikakī. Nā keskara mā feyafamiski. Afaa chakafamāki mā akāfe,” ato Pilato faito, judeofāfe kemani: “Akka mātō xanīfofāfe yoinifo nō tsoa retēki mastatiroma,” fanifo.

³² Jesús aōxō tāpimisfo taeyoi yoini keskafakī nāskakōi fanifo ifi cruz ikaki mastakakī.

³³ Nāskano Pilato āfe pexe mēra Jesús ikimani yōkaxiki. Mā ikimaxō yōkani: “¿Mīmē judeofāfe āto xanīfo?” Pilato faito,

³⁴ Jesús kemani: “¿Mī ea shināmē ē judeofāfe xanīfo mia yoiaforaka?” Jesús faito,

³⁵ anā Pilato kemani: “¿Mī shināmē ē judeo? Ē judeoma. Akka mī kaifo feta mī xanīfofāfe mia ekeki efeafō ē mia omiskōimanō. ¿Mī afaa chakafakē mia ekeki efeafomē? Ea yoife,” Pilato faito,

³⁶ Jesús kemani: “Ēkai na mai anoax xanīfoma. Ē nonoax xanīfokē a ea Ifofaafāfe yorafo setekeranāfo ea achiyamanōfo. Akka ēkai na yorafāfe āto mai anoax ē āto xanīfoma,” Jesús faito,

³⁷ Pilato kemani: “¿Akka mī xanīfo rakikīa?” faito, “Nā ea mīa yoiai keskarakīa ē xanīfo. Nāskakē ē yōra fakekōi kāini meka chanīmakōi ato yoixikī. A meka chanīmakōi fīsti nikapayiaifāfe nāfāfe ea nikamisfo,” Jesús faito,

³⁸ “¿Afaamē a meka chanīmakōi?” Pilato fani.

Pilato ato yoini Jesús retenōfo
(Mt. 27.15-31; Mr. 15.6-20; Lc. 23.13-25)

Askafata Pilato pexe kachiori kāinākafani. Kāinākafaxō judeofo yoini: “Ē na feronāfake yōkakī ēkai aōnoa afaa chaka nikama,” ato fani.

³⁹ “Iskaratīa na Pascua fistatīa ē yora fīsti karaxa mēranoa ē mato kāimaxomis, nāskaramāi mātō feyafamiskē. ¿Akka ē mātō xanīfo ē mato kāimaxotiomē katanō?” ato faino,

⁴⁰ fāsikōi mekanīfōfanifo: “¡Jesús tsekakima! ¡Barrabás noko kāimaxōfe!” fanifo. Nā Barrabás yometso ini.

19

¹ Nāskaxō Pilato ato yoiano Jesús iyonifo sorarofāfe koshatinī koshakakī.

² Askano sorarofāfe moxa chainīpāfo maiti fakaxō maimanifo. Akiki kaxepaiyanā nāskatari tari ōshi nana safemanifo.

³ Nāskax akiki kaxepai kakī iskafanifo: “Aicho. Mifi judeofāfe āto xanīfoki. Mī mēxotaima nipanakaki,” iyanā fepasketsanifo.

⁴⁻⁵ Askafaifono Pilato Jesús pexe xaki mēranoa kāimani ōinōfo. Jesús tari ōshi nana safeax kāikaini, moxari maiti fakaxō maimanafono. Nāskaxō Pilato ato yoini: “Ōikapo na feronāfakakai afaa chakafaa ē nikama ē chakafapanā,” ato fani.

⁶ Ato askafaito judeofāfe āto xanīfoyaxō a Nios kīfiti pexefā kexemisfāferi fāsikōi mekafanifo: “¡Mastafe! ¡Mastafe!” faifono, “Mā iyokaxō mastatakāfe. Ēkai aōnoa afaa chaka ē nikama ē chakafapanā,” Pilato ato fani.

⁷ Ato askafaino judeofāfe kemanifo: “Akka na feronāfāke noko yoimis: ‘Ēfi Niospa fakeki,’ noko famis. Akka nōko xinifāfe yoini: ‘Ē Niospa fakera ikai natiro,’ fanifo. Nāskakē na feronāfāke nayamaima,” fanifo.

⁸ Askafaifāfe nikai Pilato ratekōini.

⁹ Nāskaxō āfe pexe mēra Jesús anā iyoni. Iyoxō yōkani: “¿Fanīamē mī?” faino, Jesús kemanima.

¹⁰ Pilato anā Jesús yoini: “¿Ea mīa kemaimamē? ¿Ea mīa tāpiamamē ē xanīfo? Ē mia kāimatiro, askayamai ē mia ato mastamatiro,” Pilato askafaino.

¹¹ Jesús kemani: “Niospa mia xanīfo imayamainokai mī ea afeska fakeranama. Akka mī ea ato mastamanax mī chaka iki. Akka nā ea mikiki efea nā chakafinakōi iki mī ea reteano,” Jesús fani.

¹² Askafaito nikakī Pilato Jesús kāimapaini. Kāimapaiyaino nikakani fāsikōi judeofo mekainīfofākata yoinifo: “Fatora fetsa xanīfo ipaikī nāto César xanīfo chakafai. Akka na Jesús xanīfo ipai. Akka mī Jesús kāimaxō mī anā nōko xanīfo César tanaima,” fanifo.

¹³ Askafaifāfe nikakī afianā Pilato Jesús pexe mēranoa kāimani. Nāskax Pilato a xanīfāfe tsaoti ano tsaoni. Nā xanīfāfe tsaoti pexe emāiti ini tokiri sapa kamaki āfe tsaotiki tsāoni. Nā tokiri hebreefāfe āto mekapa anemisfo Gabata fakakī.

¹⁴ Mā Pascua fista ikaino xini keya Pilato tsaioxō ato yoini mā Jesús kāimaxō, “Nakīa ōikapo māto xanīfo,” ato fani.

¹⁵ Ato askafaino fāsikōi mekainīfofākata yoinifo: “¡Iyoxō mastatāfe ifi cruz ikikakīnoax nanō!” faifono, “¿Mā ōipaimē ē māto xanīfo mastanō?” ato Pilato faino, “César fisti nōko xanīfofōi. Anā ano nōko xanīfo fetsama,” judeofāfe āto xanīfofōfāfe Pilato fanifo.

¹⁶ Askafaifono Pilato ato Jesús nīchixonī iyoxō mastatanōfo.

*Jesús ifi cruz ikaki mastanifo
(Mt. 27.32-44; Mr. 15.21-32; Lc. 23.26-43)*

¹⁷ Nāskano sorarofāfe Jesús iyonifo. Iyoaifono āakōi ifi cruz ika Jesús iyaxō foni. A mastaifo ano nokoni. A mastaifo nāno āfe ane ini: “Mapo Xao,” fanifo anekakī. Judeofāfe mekapa Gógotara fapaonifo.

¹⁸ Nāskata Jesús yafi yometso raferi mastanifo. Takai rafe yometso rafe mastanifo. Akka Jesús nēxpakīa anifo.

¹⁹ Mā Jesús mastakaxō āfe mapo mānāori kenenōfo Pilato ato yoini. “Jesús Nazarete ano judeofāfe āto xanīfofōi,” fanifo kene kakī.

²⁰ Jerusalén ano yora fetsafo osiafo ichapakōifo inifo. Nānoxō Jesús Jerusalén chaimash-taxō mastafa ini. Nānoxō Pilato meka fetsa fetsatapafo ato kenemani Jesús judeofāfe āto xanīfofōi tāpinōfo. Judeofāfe āto meka keneta, griegofāfe āto meka keneta, romanofāfe āto mekari kenenifo.

²¹ Nāskax judeofāfe āto xanīfofo Pilato ano fonifo yoi fokani: “Jesús nōko xanīfoma. Nāskakē ato kenemayamafe iskafakī: ‘Jesús judeofāfe āto xanīfofōi,’ askara ato kenemayamafe. Akka, ‘Jesús yoimis, ‘Ē judeofāfe xanīfōra’ imis.’ Nānori mī ato kenematiro,” faifāfe,

²² Pilato ato yoini: “Nā ē ato kenemana keskara ē ato kenemani. Ēkai anā afaa fetsa ē ato kenematiroma,” Pilato ato fani.

²³ Sorarofāfe Jesús mastafono āfe rapati fīanifo. Nāskax paxkanāi fetsenifo Jesús āfe rapati soraro cuatropa Jesús rapati finifo. Nāskata nā āfe tari chainipari fīanifo.

²⁴ Nāskax yoinānifo: “Nā tari nō faxteimākai fetsakanāyamaxikī. Nāskara memashara nō finō,” inifo. Nāskax āfe tariya kaxenifo āto kaxetiya. “Na finōmanato Jesús āfe tari fii kiki,” inifo. Nānori Niospa meka yoikakī keneyonifo. A Jesús inōpokoai yoikakī keneyonifo. Iskafakī kenenifo: “Ēfe rapati paxkanāxikani. Askata ēfe tari chainipayari āto kaxetiya kaxexikani. Nā finōmanato ēfe tari fīxii,” ixō kirika keneyonifo. Nāskakē sorarofa Jesús āfe tariya kaxenifo.

²⁵ Nāskano nā Jesús mastafa ano chaimashta Jesús āfe afa nini. Āfe afa fetsari nāno nini. Nā Cleofaspa āfe āfinō María Magdalenanō nāno chaimashta ninifo.

²⁶ Nā aōxō tāpimis fisti āfe yamakōi a Jesús noikōipaoni afa fe ketaxamei nikē Jesús ōini. Nāskaxō Jesús afa yoini: “Na feronāfakefi mī fakeki,” fani.

²⁷ Nāskata nā feronāfakeri Jesús yoini: “Nafi mī efaki,” fani. Askafaino nikakī María āfe pexe ano iyoni kexesharaxikī.

Jesús nani

(Mt. 27.45-56; Mr. 15.33-41; Lc. 23.44-49)

²⁸ Jesúsnoa yoikī Niospa meka keneyonifo keskakōini. Mā Jesús tāpixō yoini: “Ē nōamāiki,” ato fani.

²⁹ Ato askafaino fimi ene kacha ocha mefetiki tsoano nā mīxa fikaxō fimi ene kachaki momokaxō Jesús ayamapainifo tafa xatekī rōtati fakaxō.

³⁰ Mā fimi kacha ayaxō Jesús yoini: “Keyokōi ēfe Ēpa ea yoia keskara mē aka,” ato fani. Ato yoita nāskax nai tepopakekafāni.

Soraronō Jesús āfe pishi nāmā chachini

³¹ Mā Pascua fista ikaino Jesús yafi yometso rafe ifi cruz ikakīnoa judeofāfe ōikaspanifo. Nā fistaſtāia ato pena tenetiſtāia ini. Nāskax mā fista ikaino Pilato ano fonifo yoi fokani iskafakakī: “Mā penama nōko fista iki kiki. Nā Jesús yafi nā yometso rafe āto fitax xao tēkerisa fanōfo koshi nanōfo ato yoife. Mā penama nōko fista iki kiki nā ato mastafa ano anā inōfoma nōko fistaſtāia,” judeofāfe āto xanīfofōfāfe Pilato fanifo.

³² Nāskafafono Pilato sorarofō yoini iskafakī: “Āto fitax xao ato tēkerisa fakāfe koshi nanōfo.” Ato askafaino fokaxō ōiafo yometso rafe naafoma inifo. Naafomano āto fitax xao ato tākenifo nanōfo.

³³ Akka Jesúsiki fokaxō ōiafo mā Jesús naa ōinifo. Nāskakē tsōa āfe fitax xao tēkenima.

³⁴ Akka soraro fistichi āfe āshi āfe pishi nāmā chachiaino āfe imi fakaya siini.

³⁵ Ēkīa Juan na kirika ē keneai nā ē ōimis keskara ē mato yoi na kirika kenekī mā chanīmara fanō. Ēfi chanīmakōi mato yoi.

³⁶ Niospa meka yoimisto a Jesús inōpokoai yoikī kirika keneni iskafakī: “Āfe xaokai tsōa tēkexikanima,” ixō kirika keneyonifo.

³⁷ Askatari, “A āfe pishi chachiaifono ōixinōfo,” a Niospa meka yoimisto nānorikōi kirika keneyoni.

Jesús makex kini mēra maifanifo

(Mt. 27.57-61; Mr. 15.42-47; Lc. 23.50-56)

³⁸ Nāskano José Arimatea ano ikax Pilato ano kani. Kaxō Jesús āfe yora yōkani: “Ifi cruz ikakīnoa ē Jesús fotomapai maifaxikī,” José faito, “Atāfe,” Pilato fani. Nā José Jesús Ifofamis ini. Jesús Ifofafaxō ato yoinima. Judeofāfe āto xanīfofoki mesekī ato yoinima.

³⁹ Nicodemo feta José Jesús ifi cruz ikakīnoa fotomanifo maifaxikakī. Nā Nicodemo Jesúsiki fakishi kaxō yōkayoni. Nāato āfe pirofomā shara treinta kilo feni Jesús āfe yora raish axikī fena pisiyamanō. Fetsa āfe ane mīrra ini. Fētsa aneri āloes ini. Nā rafe osia ini.

⁴⁰ Askano José feta Nicodemo sama oxo shara pirofomā raish axō aō rakonifo. Judeofāfe āto kaifo maifakī askara feyafamisini.

⁴¹ Nā ifi shara mīshti mapoa anoxō chaimashtaxō Jesús mastanifo. Nānori mafa kini fena, tsoa a mēra maityomisma ini.

⁴² Mā judeofāfe āto pena teneti chaimashta ikaino mā xini kaino Jesús maifanifo. Nāskakē nā mafa kini chaimashta nā mēra Jesús maifanifo.

20

Jesús otōni

(Mt. 28.1-10; Mr. 16.1-8; Lc. 24.1-12)

¹ Nāskano nomīkonō fakishparikōi María Magdalena kani nā Jesús mafa kini mēra maia ano. Kaxō ōia mā mafa kini fepekemea ini. Nā tokirinīfā aō fepoitafo mā fepekemea ini.

² María ōifaini ichoni Pedro yafi nā Jesúsxō tāpimis fetsa nā Jesús āfe yamakōi chanifaikai kani. Ato yoini: “Nōko Ifāfe āfe yora kini mēranao mā fakira oneafo nōkai tāpiama,” ato fani.

³ Ato askafaino Pedro fe a Jesúsxō tāpimis fetsa ōifokani ichonifo. Mafa kini ano ōifokani.

⁴ Nā fētsa Pedro xonōfaini rekē nokoikakī. Akka Pedro chipo nokotoshini.

⁵ Rekē nokotoshixō a Jesús maia ano mafa kini mēra tēkepekekafā naisni. Ari naiskī ōia a aō rakoitafo sama mania ini.

⁶ Nāskata Pedrori chipo nokotoshini. Nokoax mafa kini mēra ikikaini. Ikikaixō ōia aō rakoitafo mania ini.

⁷ A aō mapoki marakoitafo nā fosoita ariri āfe sama mania ini chaimashta.

⁸ Askaino a Pedro fe kaari kini mēra ikikaini. Ikikaikī ōia ano Jesúsma ini. Nāskaxō chanīmara fani.

⁹ A Jesús otoxiai Niospa meka yoikī kirika kenenifo tsōa tāpiyonima.

¹⁰ Nāskata mā ōita āto pexe ano fenifo.

Jesús María Magdalenaki nokoni
(Mr. 16.9-11)

¹¹ Mā foaifono María kanima. Mafa kini kachiori niax María oiani. Oiayanā nāatori kini tēpepakekafā naiski ōini.

¹² Niospa āfe ājiri rafe rapati oxokōi safekanax tsoafo ini Jesús rakaita ano. Nā fosoita ariri fetsa tsoa, fetsari āfe tae ikita ariri tsoa ini.

¹³ Nāskaxō Niospa āfe ājiri rafeta yoini: “¿Afesakai mī oiaimē?” faifono, “Ēfe Ifāfe āfe yora mā fakira oneafo ē tāpiama,” ato fani.

¹⁴ Nāskata María texkeakekafā ōia Jesús a kachiori niano tāpinima.

¹⁵ Jesús María yōkani: “Kēromā, ¿afeskai mī oiaimē? ¿Mī tsoa fenaimē?” faito, María shināni: “Nā fanafo kexemisra,” fani. Nāskaxō María yōkani: “Mī ēfe Ifāfe āfe yora fanī mī faamē ea yoife, ē afianā nono maifanō,” faito,

¹⁶ Jesús: “María,” faito, foisnīfōfā María ōia nā Jesús āfe fesokōi ini. Nāskaxō María judeo mekapa: “Rabonī” fani. Rabonī fakī, “Noko tāpimamisto,” fani.

¹⁷ Askafaino, “Ea ramāyamafe. Ēfe Epa ari ē kaamaki. Akka ea ramākima efe yorafo ea ato yoixotāfe, mā ēfe Epa Nios ari ē kaikai. Nā ēfe Epari māto Epaki. Nā ēfe Niosri māto Nioski, ato fatāfe,” fani.

¹⁸ Askafaino María kaxō aōxō tāpimisfoki nokoxō ato yoini: “Mē nōko Ifo ē ōiaki,” ato fani. Nā āfe Ifāfe yoia keskara ato yoini.

Jesús aōxō tāpimisfoki nokoni
(Mt. 28.16-20; Mr. 16.14-18; Lc. 24.36-49)

¹⁹ Nāskata nomīkonō mā xini kaino a aōxō tāpimisfāfe judeofoki mesekakī āto pexe fepoti feponifo ichanākakī. Mā ichanāifono āto nēxpakīa Jesús nirisatani. Ato yoini: “Māto ōiti fepeakax inimasharakāfe,” ato fani.

²⁰ Ato askafata a mifiki rāfomā mastaitafo āfe tsefe ato ispani. A āfe pishiki āshi chachitafori ato ispani. Ato ispaifo ōikani āto Ifoki fāsi inimakōinifo.

²¹ Afianā Jesús ato yoini: “Māto ōiti fepeakax inimasharakāfe. Nā ēfe Ēpa ea nīchini keskafakīri iskaratīa ē matori nīchikai,” ato fani.

²² Nāskaxō ato yoini: “Na ēfe Epa āfe Yōshi Shara fikāfe,” ixō atoki axfainākafa ato xoō ani.

²³ “Fatora fetsa mā āto chaka soaxonaino Niospari āto chaka soaxoxii. Mā ato chaka soaxoyamaino atoō chaka nepakenaka,” ixō Jesús ato yoiax nāskax ato makinoax kani.

²⁴ Ato Jesús yoianokai Tomás ato fe ano inima. Nā Tomásri Jesúsxō tāpimis ini. Āfe ane fetsa “Rafe Kāini” fapaonifo.

²⁵ Tomás atoki oaino yoinifo: “Mā nōko Ifo nokoki oaito nō ōia,” faifāfe Tomás ato yoini: “Ē āfe mifi natakinoa a rāfo tsefeto ē meikerana a āfe pishi tseferi ē meikerana nāskaxō ē chanīmara fakerana. Akka ē āfe tsefeto ramākayamaxō a mā Jesús ōia ē chanīmara faima,” ato Tomás fani.

Jesús aōxō tāpimisfoki anā nokorisatani

²⁶ Nāskata ocho nia oxata Jesús aōxō tāpimisfo anā kene mēranoax ichanāfono Tomásri nāno ato fe ini. Pexe fepoti fepokōiafono Jesús atoki nokorisatani. Anā ato yoini: “Māto ōiti fepeakax inimasharakāfe,” ato fani.

²⁷ Nāskaxō Jesús Tomás yoini: “Ea mī mīfi ramāfe ēfe mifi nataki. Ēfe pishi nāmāri ea ramāfe. Anā ea chanīmara fakima, ea chanīmara fafe,” Jesús faito,

²⁸ Tomás kemakī: “Mīfi ēfe Ifoki. Mīfi ēfe Nioski,” faito,

²⁹ “Ea mīa ōikī mī ea chanīmara fai,” fani. “Akka ea ōiyamafikakī ea chanīmara faifofi Epa Niospa ato shara faxii. Inimakōixikani,” Jesús fani.

Juan kirika kenenī tāpinōfo

³⁰ Akka afama mīshti tsōa atiroma keskafakī Jesús aōxō tāpimisfo ato ōimamis. Afara fetsafori Jesús aka ē afo mato kenexonama.

³¹ Epa Niospa Jesús nīchini nōko Ifo inō. Nāfi Niospa Fakeki. Ē mato Jesúsnoa kenexoni mā chanīmara fanō. Chanīmara faax mā aōnoax Nios fe nīpaxanō.

21

Īamāfā kesemē Jesús aōxō tāpimisfoki nokoni

¹ Nāskano Jesús anā aōxō tāpimisfoki atoki nokoni. Īamāfā Tiberias kesemē nāno atoki nokoni. Ē mato yoinō afeskax Jesús onimāki.

² Pedro fe Tomás (nā Tomás “Rafe Naneni” fapaonifo), Natanael Caná anoa ini Galilea mai anoa, Zebedeo fake raferi ini, Jesús fe rafemis raferi ato fe ichanānifo.

³ Nāskaxō Pedro ato yoini: “Ē rinipa fii kaikai,” Pedro ato faino, “Nōri mefe kai,” fanifo. Nāskax fonifo kanōanāfānē nanefainifo. Fōkata rini potenifo nā rini fakishchāi potefikaxokai tsōa foe finifoma.

⁴ Mā penaino Jesús ĩamāfā kesemē atoki nokorisatani. ĩamāfā kesemēxō aōxō tāpimisfāfe tsōa Jesús tāpinifoma.

⁵ “ĴĒfe fakefāfe, mā foe fiamamē?” ato faino, “Nō fiama,” fanifo.

⁶ Askafaifono ato yoini: “Māto pōya kayakai aōri māto rini potekāfe. Askafaxō mā fitiroki,” ato faino nikakakī nā ato yoiai keskafanifo āto rini potekakī āto pōya kayakai aōri. Nāskaxō meafō mā foe kayakōi fia menifo. Ato kanōanāfā mēra nanepaikakī ranānifo.

⁷ Nā Jesúsxō tāpimis fētsa nā Jesús āfe yamakōi ipaonito Pedro yoini iskafakī: “ĴNāfi nōko Ifoki!” fani. Askafaito nikai Pedro koshikōi āfe rapati safeni nāskax kanōanāfā makinoax ĩamāfānaki pakekaini āfe Ifoki nokorisapai.

⁸ Nāskaito ōikani atiri kanōanāfānē acho fonifo. Āto rini foe fospikōiano ninifonifo ĩamāfā kesemē chaimashta nokoxikakī.

⁹ Mā ĩamāfā kesemē nokokaxō ōiafo chii mǎnǎ mǎnǎ ikaito ōinifo. Foe yafi pǎa xoimea chii ketokonō raka ōinifo.

¹⁰ Askata Jesús ato yoini: “A mā rama foe fia niri fekāfe,” ato fani.

¹¹ Akka Pedro kanōanāfāxō rini ninifoni ĩamāfā kesemē rataxiki. Mā rini fixō ōia foe rini mēra fospikōia ōini. Ciento cincuenta y tres ini. Akka fōe rini faxtenima.

¹² Askaifono Jesús ato yoini: “Piyoi fekāfe,” ato fani. Akka tsōa yōkanima: “ĴMī tsoamē?” tsōa fanima mǎmǎi tāpikaxō āto Ifomāiyakē.

¹³ Nāskaxō Jesús ato pimakī ato pǎa yafi foe ato ināni.

¹⁴ Mā reteafono otoitaxakī aōxō tāpimisfoki nokoni. Tres ves ini atoki oi.

Jesús Pedro yoini

¹⁵ Mā pixō Jesús Simón Pedro yoini: “Simón mīfi Juan fakeki. ĴNa fetsa finōmainīfōfǎ mī ea noimē?” faito, “Ēje Ifo. Mā mī tāpiaki ē mia noiaito,” Pedro faito, Jesús yoini: “A ea noisharaxō a ea rama Ifoifori ato kexesharafe ea Ifosharafanōfo. A oveja kexemisto āfe oveja fake kexemis keskafafe ato kexekī,” fani.

¹⁶ Anā Jesús Pedro yōkani: “Simón, mīfi Juan fakeki. ĴChanĩmamē mī ea noimē?” faito, “Ēje, Ifo. Mā mī tāpia ē mia noiaito” Pedro faito, anā Jesús yoini: “A ea noisharaxō ea Ifofamisfo ato kexesharafe ea Ifosharafanōfo. A oveja kexemisto āfe oveja kexemis keskafafe ato kexekī,” fani.

¹⁷ Nāskaxō anā Jesús yōkani: “Simón, mīfi Juan fakeki. ĴEa mīa noikōimē?” ixō Jesús yōkari faino Pedro anā tooxinima. Nāskaxō anā Pedro kemani: “ĴIfo, mīfi afama mīshti tāpiaki. Mā mī tāpia ē mia noiaito,” fani. Askafaino anā Jesús yoini: “A ea Ifofamisfo ato kexesharafe ea Ifofasharanōfo.

¹⁸ Ē mia yoikōinō. Mī naetapakī nā mī apaiyai keskara mī fapaoni. Askatari nā mī kapaiyai ari mī kapaoni. Akka mā mī anifoax mī takairafe mēshax kaxii mia iyoaifono a mī kapaiyamai ari mia iyoxikani,” Jesús fani.

¹⁹ Askafakī Jesús Pedro tāpimani afeskax naximākai. Pedro Jesúsnoax naxiaino yorafāfe mā tāpikaxō, “Nios finakōia,” faxikani. Nāskano Jesús Pedro yoini: “Ea Ifosharafafe,” fani.

²⁰ Askafaino Pedro texkeakekafǎ Juan fichini acho oaino. (Nā Juanri Jesúsxō tāpimis ini, Juan Jesús noikōia ini. Jesús reteyoafomano aōxō tāpimisfo feta fakishi piyoni. Akka Juan afe ketaxamei tsoaxō Jesús yōkani iskafakī: “ĴIfo, tsōakai mia ato achimaximē?” fani Jesús reteyoafomano afeta pikī.)

²¹ Nāskaxō Pedro nā Juan fichixō Jesús yōkani: “ĴIfo, afeskax na Juan naximē?” fani.

²² Askafaino Jesús kemani: “A ē nimapaikī ē nimaino niyoxii nā ē anā oaitīa. Akka mīkai aōnoa shināchakatiroma. Askatamaroko ea Ifofatitai fafe. Eōnoa fisti shināfāife,” fani.

²³ Nāskax Jesúsxō tāpimisfo āa ranā yoinānifo: “Juan kai nanakama,” fanifo. Askafafiaifono Jesús kai Pedro anori yoinima. Akka iskafakī yoini: “A ē nimapaikī ē nimaino niyoxii nā ē anā oaitīa. Akka mīkai Juanōnoa mī shināchakatiroma,” fani. Nānori fisti Jesús Pedro yoini.

²⁴ Ēkīa Juan ē kirika kenexō ē mato yoi. Ēri Jesúsxō tāpimis. Ea Jesús noikōia. Jesús afarafo faito ē ōimis. Nāfo ē mato kenexoni. Jesús afarafo akaito mē ōimis. Nāskakē mā ēfe meka chanīmara fatiro. Ē mato yoiaito mā Jesús chanīmara fatiro.

²⁵ Jesús afama mīshti fani afo yoikī nō kirika kenekī mitotiroma. Ēkīa Juan ē mato kirika kenexoni. Nā tii.

Jesúsxō Tāpimisfāfe Aponifo Keskara

“Niospa āfe Yōshi Shara matoki nīchixii kiki,” ixō Jesús yoini aōxō tāpimisfo

¹ Teófilo, ē mia anā kirika kenexoni mia yoikī. Ēfi Lucaski, mia kirika fomai. A Jesús nai mēra kayoxoma afama mīshitfo fayaná ato tāpimapaoni keskara yoikī ē mia kirika kenexō fomayoni, mī tāpinō.

²⁻³ Mā Jesús retetiafono oxa rafeta anā otoni. Mā otōxō aōxō tāpimisfo ato ifixō ato tāpimani Niospa Yōshi Sharapa shināmanaino akairi fetsafo tāpimanōfo. A metasitafo ato ispaketsani a aōxō tāpimisfo. “Nafo ea metasitafofikī ōikapo,” ato fani ōikakī tāpisharanōfo. Mā anā nia afia ipaoni keskara ixō tāpinōfo ato yoisharani nai mēra kayoxoma. Cuarenta nia oxata ato tāpimasharani chipo katāxiki ato yoipakeyoni a Nios xanīfoōnoa ato yoisharapakeni. Nāskax Apa Nios ari kani nai mēra.

⁴ Nai mēra kayoxoma anā pena fetsa aōxō tāpimisfo yoisharani iskafakī: “Nonoax fakifoyoyamakāfe. Ē mato yoisharayonō, mā nikasharanō. Ēfe Epa āfe Yōshi Shara matoki nīchixii kiki a ē mato yoimis keskafakī. Mā mā nikaafainakī ē mato yoiaito. Nāskakē na Jerusalén anoxō manayokāfe, ēfe Epa āfe Yōshi Shara mato mēra naneyonō.

⁵ Juan mato maotisafakī faka mēra ikimapakeni Niospa mātō chaka mato soaxonano mā ato ōimanō. Nāskafakīri samama fatora penata Niospa āfe Yōshi Shara mato mēra naneaino mā shinā sharaya ixii.”

Jesús nai mēra kani

⁶ Anā ano fisti Jesús fe ichanākaxō yorafāfe yōkanifo iskafakakī: “¿Ifo, iskaratīa nōko kaifo israelifāfe āto xanīfo mī ikimē? ¿Anā nafa nōko xanīfo ixiiimamē?” fanifo yōkakakī.

⁷ Askafaiifāfe Jesús anā ato yoini iskafakī: “Tsōa tāpiama. Epa Nios fistichī tāpia. Afetiāra inōpokoi mā tāpitroma.

⁸ Mā tāpiyamafitirono Niospa āfe Yōshi Shara mato mēra naneano aōxō mā afama mīshiti tāpitiro. Nāskakē mā eōnoa ato yoitiro mēstekōi. Taefakī nā Jerusalén anoafō yoita, nā Judea anoafō yoita, nā Samāria anoafō yoita, keyokōi nā maitio anoafō eōnoa mā ato yoitiro,” ixō Jesús aōxō tāpimisfo yoini.

⁹ Nāskata mā ato yoita Apa Niospa ifiaino nai mēra kani. Aōxō tāpimisfāfe ōiaifono fininākfā kani. Mēstekōi māpeinīfōfani nai kōi mēra ikikainaito aōxō tāpimisfāfe anā ōinifoma mā kaano.

¹⁰ Nai mēra foisaifono feronāfake rafe ato ketaxamei nītanifo rapati oxo shara safekanax ato yoinifo iskafakī:

¹¹ “¿Na Galilea anoafāfe, afeskakī mā nai mēra foisimē? Mā Jesús nai mēra kaa. Afetiāra anā matoki oxii. Fatora penata afia mā kaito ōia keskara oxii kiki,” ixō feronāfake rafeta ato yoini.

Jerusalén anoax aōxō tāpimisfo ichanānifo

¹² A māchifanē āfe ane Olivos anoax Jesús ronoinākfā nai mēra kaito ōikata anā anoris fenifo Jerusalén ano chaima. Un kilometro Olivos fe Jerusalén nā tiixō rafe ini.

¹³⁻¹⁴ Jerusalén ano nokokata pexe mēra ikifaikata fomākīa māpeinīfōfakata a ikafo ano ikifainifo. Ano ikifaikanax ano fistiax ichanānifo. Pedro ikaino, Jacobo ikaino (nā Jacobo āfe ane fetsa Santiago ipaoni), Juan ikaino, Andrés ikaino, Felipe ikaino, Tomás ikaino, Bartolomé ikaino, Mateo ikaino, Jacobo Alfeo fake ikaino, Simón Celote ikaino, Judas Santiago fake ikaino, Jesús onefetsafo ikaifono, Jesús āfe afa Maria ikaino, a kēro fetsafori ikaifono ano fisti ichanānifo Nios Kifikani. Nānoxō pena tii Nios Kififafānifo.

¹⁵ Askata pena fetsa yora rasi ciento veinte ichanānifo. Askafono Pedro niinākfā ato yoini

¹⁶ iskafakī: “Efe yorafāfe, ea nikakōisharakāfe ē mato yoinō. Na Judaspafi yorafo iyoita Jesús achifonōfo. ‘Fato Jesús mākī noko yoife,’ faifāfe, ‘Nakīa,’ ato faito ōikakī achitafo. Afia Niospa shināmanaino nōko xini David yoikī kirika kenepaoni keskafakī Judaspa ato yoita.

¹⁷ Na Judas nofe rafemis noko akai keskari fakī Jesús ifini. Nāskakē nofeta yonoxōfikatsaxakī mā chakafakī yorafo ato achimanita,” ixō Pedro ato yoini.

¹⁸ (Ato askafaito kori ināitafo āa anofi chakamenō. Kori ināiafono anā anoris xanīfofo ināita. Nā kōri xanīfofōfāfe mai fiitafo. Askata Judas āa tenexemeta ifiki nexeax ronoinākfāita. Ronoax ariax xetaori pakei mā nafaraxikax āfe poko napakemeita.

¹⁹ Askaito nikaitafo Jerusalén anoxō. Anoax āfe imi fokē nā mai aneitafo “Acédama” ixō aneitafo. Nōko mekapa nō yoitiro iskafakī: “Imi Mai” fakī.)

²⁰ Askata anā Pedro ato yoini iskaſakāſi: “Nōko xini David a inōpokoai yoikī kirika Salmos ano keneni a Judasnoa yoikī iskaſakāſi:

A yōra āfe mai ano tsoa inōma,
yoikī keneni. Nāskata anā yoini iskaſakāſi:

Feronāfake fetsa a yonomis ano ikiakēkafanō,
ixō anori yoikī noko kenexoni.

²¹ “Nāskakē iskaratīa a feronāfake fetsa nō ifinō, a nofe Judas ipaoni keskara inō. Fatora fetsa nō ifinō, a Jesūs fe taefenai kafāſapaoni keskara nofe inō.

²² Nā nofe ixō ōini Juan Jesūs maotisaſakāſi faka mēra ikimanaino, nāskakē mēxotaima nofe imis, akka mā Jesūs nai mēra kaito nofeta ōitakī, nāskakē nō ifinō nofeta ato yomimis inō. Nofe rafexō Jesūsnoa iskaſakāſi yoinō: ‘Mā Jesūs nayofiax mā anā otofāa,’ ixō ato yoinō,” Pedro ato fani.

²³ Ato askafaino José Barsabās fe Matías nāno inifo. Nā rafe ato ifipaikī, “¿Fato nō ifimē?” ixō shinānifo. Nā José Barsabās āfe ane fetsa Justo.

²⁴ Askata a rafe ifipaifikaſi fiſti ifinifo. Nāskakē Nios kīfinifo iskaſakāſi: “Epa Niospa, ¿fato nō ifimē? Epa, mī nōko Ifoki. Keyokōi nōko ōiti mēra mī tāpikōiaki. Nāskakē noko tāpimaſe fato mī ifiamāki nofeta mīōnoa yomimis inō.

²⁵ Judaspa Jesūs ato achimaita. Nāskakē Judas naax omiskōipakenaka. Nāskakē Judaspa anā mīōxō yonotiroama nofeta. Noko tāpimaſe fato a Judas ipaoni keskara itiromākī mīōxō ato yomimis inō,” ixō Nios kīfinifo.

²⁶ Nāskakata āto ane rafe tokiriki kenexō kesho mēra nanexō napakefofānaifono fiſti pakeaito ōikakī nā ifinifo. Matías āfe ane ini. Nāskakē Matías ifiafono nā feronāfake oncefo feta Jesūsnoa yomimis ini.

2

Niospa Yōshi Shara ato ōiti mēra naneni

¹ Askata judeofāfe āto fiſta Pentecostēs ikaino a Jesūs Ifofaafō pexe fiſti mēra ichanānifo.

² Anoxō nikafo nai mēranoax oa nēfefā oi itikikerani pexe mēraxō nikafo.

³ Nāskata ōiafo oa chii keskara fotopakekafāni. Oa nōko ana keskaraſiax oa chii rekēfo keskara maratamefāfāinafo ini.

⁴ Askafono Niospa Yōshi Shara ato mēra nanetani. Askaino anā a meka fiſtichi tsoa mekanima. Meka fetsafāfe fiſti rasi mekanifo Niospa Yōshi Sharapa ato meka fetsafamano.

⁵ Nāskaifono judeofāferi Nios Ifofapaikani Jerusalén ano ipaonifo, chai inoax fekanax. Nā Jerusalén ano inifo mai fetsa fetsatapafo anoax fekanax.

⁶ Anoxō nikafo oa nēfefā oai keskara nikanifo. Askaito nikaferakani a Jesūs Ifofaafō ichanāfo ano ikitoshinifo. Tāpipaikani afaa afeskaimākai ikanax. Nāskata nikafo a chai inoax feafāfe āto mekapa mekaifāfe nikanifo, fiſti rasi āto mekapa mekaifono. “¿Afeskaſō nōko meka tāpiafomē? Nikakapo,” ato fakī fetsanifo. Askakanax ratei fetsenifo.

⁷⁻⁸ Rateyanā yoinānifo. Iſkanifo: “Na Galilea anoafāfe nōko meka nikayamafikatsaxakakī nōko meka tāpiafo nō nikai. ¿Afeskaſō tāpiafomē mai fetsanoax nō ofiafiano?”

⁹ Akka nō Partia anoax oni. Fetsafori Media anoax fenifo. Fetsafori Elam anoax fenifo. Fetsafori Mesopotamia anoax fenifo. Fetsafori Judea anoax fenifo. Fetsafori Capadocia anoax fenifo. Fetsafori Ponto anoax fenifo. Fetsafori Asia anoax fenifo.

¹⁰ Askatari fetsafori Frigia anoax fenifo. Fetsafori Panfilia anoax fenifo. Fetsafori Egipto anoax fenifo. Fetsafori nā Africa fe, Cirene chaima nikakanāfo anoax fenifo. Akka fetsafori judeofo Roma anoax fenifo;

¹¹ nāfo judeokōifo ini. Akka a Roma anoax feafori judeokōifoma inifo. Nāskafikaſō mā Nios Ifofakani judeofo keskara inifo. Askatari fetsafori Creta anoaxri fenifo. Askatari fetsafori Arabia anoaxri fenifo. Nōfi mai fetsa fetsatapafo anoax nō onikī,” ikanax yoinānifo. “Nāskax nō ichanāiyoi oa chai inoax, akka nōko mekapa mekaifāfe nō nikai. Nāskaito nikai nō ratei,” ikanax yoinānifo. “Na Galilea anoafāfo nōko mekaſōchi xafakāſōi yoikani iskaſakani: ‘Niospa afama mīshti tāpikōia,’ ixō noko yoikani nōko mekapa.

¹² Afeskaſō na yorafāfe nōko meka nikayamafikatsaxakakī noko yoiaifāfe nō ato nikasharakōi,” ikanax rateyanā yoinānifo: “¿Afeskaſi iskaſomē?” ikanax.

¹³ Askaiſāfe ōikakī a yora fetsafāfe ato iskaſanifo: “¿Afeskaſi na yorāfo pāekanax nōko mekapa mekakanimē?” ixō yorafāfe ato kaxemetsama fanifo ato ōsakakī.

Pedro Niospa meka ato yoini

¹⁴ Askafono Pedro niinākafā Jesūsō tāpimisfo oncefo feta fāsikōi mekainākafā ato yoini: “Ēfe kaifo judeofāfe na Jerusalén ano ikafo feta, ea nikasharakāfe.

¹⁵ ¿Afeskaſi pāekanax nōko mekapa mekakanira, mā noko faimē? Nafo pāekanima. Penamakai tsoa pāeima mā rama xini keyaino.

¹⁶ Nā mā nikai anori Niospa meka yoimisto Joel kirika keneni Niospa Yōshi Sharapa shināmanaino. Nā iskanōpokoai yoikī kirika keneni iskafakī:

¹⁷ A ea Ifofaifo nā maniafo tii anoa ēfe Yōshi Shara āto ōiti mēra ē nanexii. Nāfo askayoi mā chaima nōko mai keyoaino. Afia penatari mātō fenafāfe ēfe meka yoixikani. Naetapafāfe ōiafo oa namakē ōia keskara ōixikani. Anifo tiitori eōnoa namaxikani.

¹⁸ Askata a ea yonoxomisfōri feronāfakefoya kērofoya ēfe Yōshi Shara ē ato mēra nanei fatora penata ēfe Yōshi Sharaōxō eōnoa ato yoinōfo.

¹⁹ Afama mīshti tsōa ōimisma afo ē ato ispaxii nai arixō, nāmāxori ē ato afama mīshti ispaxii. Imi yafi chii āfe kōimāfāri ōixikani ē ato ōimanaino.

²⁰ Askatari xinī anā chaxaxima, fakishkōi ixii. Oxeri oa imi keskarakōi ōshikōi ixii. Askata nāfo askai fetseyoi mā chaima mātō Ifo oaino. Askata mā mātō Ifo nokokōiaino keyokōichi xafakīa ōixikani.

²¹ Mā askai fetseaino akka nōko Ifo yoikī fatorafāfe iskafaifāfe: 'Ifo Cristo, ea shināfe, ē mefe ipaxanō,' faifāfe ato ifixii, ixō Joel kirika keneni Niospa anori yoiaino," ixō Pedro ato yoini.

²² Askatari Pedro anā ato yoini iskafakī: "Israelifāfe,* ea nikakāfe. Mā mā tāpia Jesús Nazarete anoa Niospa nai mēraxō nāmā nīchini, nāmāxō mato afama mīshti ōimanō afara sharafo fakī. Mato askafaino mā tāpinō Niospa Jesús nīchinikē.

²³ Nāskakē māfi Jesús achixō yora chakafo ināyameaki achixō cruzki mastanōfo. Akka retyeoafomano Niospa mā tāpixō Jesús nāmā nīchini: 'Ēfe Fāke mato nāxoxii,' ixō Niospa yoini mā tāpixō. Nāskakōikī mātōxō yora chakafāfe retyeameafo Niospa yoini keskafakī.

²⁴ Mā retefitafono Niospa anā Jesús otofani. Anākai omiskōinakama. Anākai nanakama. Anākai natiroma.

²⁵ Askatari a xanīfo David afianori yoikī kirika mēra keneni Cristoōnoa āfe meka iskafakī: Mē tāpia ēfe Ifo Nios efe itiani. Efe ixō efeta aki kiki. Nāskaxō ea kexei tsōa ea fekaxtefanōma.

²⁶ Nāskakē ēfe ōiti mēra ē fāsi inimakōi Niospa ea kexesharaino. Nāskakē ē yoikī: 'Nios fāsi sharakōi,' ē fafafaifāini. Ē Nios chanīmara fakōini afe ipaxakī ēfe yora ea fena faxōano.

²⁷ Ea potayamaino ēfe fero mēsho omiskōipakenakama. Ēfe yora mai mēra nēteima. Epa Niosi, mī ea noi. Ēfi mī fakekōikī, ēfe yora mī pisi famaima.

²⁸ Ē nafiakē mī ea nimapakenaka. Ē mia ari kai, mefe ikax ē inimakōixii, ixō David yoini Cristoōnoa yoikī.

²⁹ "Efe yora mīshtichi, ea nikakāfe. Nōko xini David āa yoikī kenenima. Jesúsnoa yoikī keneni. Afetīama mā David nani. Mā nō tāpia a maia ano.

³⁰ A nā askanōpokoai yoikī keneni. Niospa David yoini iskafakī: 'Ē mia yoi na chipo kāiyai mī fena ēfe Fakekōi ixii. Mia keskara xanīfokōiri ixii. Ēfi Nioskī. Ē mato pāraima,' ixō Niospa yoini. Niospa yoiaito nikakī David chanīmara fani, tāpini Niospa pārayamaino.

³¹ Nāskakē David tāpixō a inōpokoai Cristoōnoa yoini iskafakī:

Nafiax otōxii. Nāskax āfe fero mēsho omiskōipakenakama, āfe yorari pisinakama, ixō David keneni.

³² Nā David yoini keskakōifakī Epa Niospa mā Jesús otoakē nō ōita keyokōichi.

³³ Mā otoax mā nai mēra kaa Apa Nios ano. Iskaratīa xanīfo finakōia Apa fe. Nāskaxō Epa Niospa yoikī tafani iskafakī: 'Ēfe Yōshi Shara ē atokī nīchixikai nāmā,' ixō Niospa yoini. Nāskakē Niospa āfe Yōshi Shara nai mēraxō nāmā nīchia. Oa nēfefā keskara Niospa āfe Yōshi Shara nokokī nīchia. Nāskakē nō mātō meka nikayamafikatsaxakī nō meka fetsafāfe nō mekai fetsea. Mā chai inoax oxō mā noko nika, nō mātō mekapa mekai fetseaito.

³⁴⁻³⁵ Nāskakē māri tāpikāfe, nānori David kirika kenenikī Jesúsnoa yoikī. Āa yoinima. David otoax nai mēra kanima. Nāskaxō kirika kenepakekī yoini iskafakī nōko Ifo Cristoōnoa:

Nono efe ife, efe xanīfokōi ixiki. A mia noikaspaifo ē ato mī nāmā nīchinō, ixō yoini Niospa. Nānori tāpixō David yoikī kirika keneni," ixō Pedro yoini.

³⁶ Askata Pedro anā ato yoini: "Ēri mato anori yoikai, israelifāfe, ē mato pāraima. Mā Jesús retelē mā mastayamea. Akka Niospa yoini Jesucristo nōko Ifokōi inō," ixō Pedro ato yoini.

³⁷ Ato askafaito nikakakī shinānifo: "¿Afeskakī Jesús askafayameafomē?" ixō shinākī ato ōitini shināketsanifo, Jesús shinākakī. Askata Pedro yafi a Jesúsnoa yois fetsafōri yōkanifo: "No fe yorafāfe, nō mato nikai. ¿Nō anā afeskatiromē?" ixō ato yōkanifo.

³⁸ Askafaifāfe nikakī Pedro ato yoini: "Iskaratīa mātō chaka soakāfe anā anori shinākakīma. Jesús aneōxō mato maotisafanōfo, faka mēra ikimapakekī. Mato maotisafai- fono yorafāfe mato ōinōfo mā Jesucristo Ifofaito. Nāskaxō āfe Yōshi Shara mato mēra nīchi kiki mato fe rafekōinō.

* 2:22 Israelifo āto ane fetsa judeofo ipaoni.

³⁹ Jesús yoini iskafakī: ‘Fatora fetsa nōko Ifo Niospa ifixii āfe Yōshi Shara ato mēra nanexii. Māto fakefori, māto fenafori a chai ikafo tiiri nā fake refonoafori Niospa āfe Yōshi Shara ato mēra nanexii Niospa ato ifiano,’ ixō noko Jesús yoini.”

⁴⁰ Ato askafakī yoita anā Pedro ato yoini ato iskafakī yoiyanā: “Māto chaka soakāfe. Na yora nono nāmā ikafo ichapa chakakōifo chaka shināmisfo. Askakakīma māa kexeme-sharakōikāfe anā askayamaxikakī. Mā askaito Jesús mato chaka soaxonō mato ifixiki mā afe īpaxanō,” ixō Pedro ato yoini.

⁴¹ Ato askafaito nikakakī yora rasichi chanīmara faifāfe, ato maotisafapanifo, ato faka mēra ikimapakekakī. A ato maotisafaifo tres mil yorafo ini. Nāskax ato fe rafenifo a Jesús Ifofakakī taefanifo fe.

⁴² Nāskakē keyokōichi ato nikakōinifo a Jesúsnoa yoimisfāfe ato yoiiafono. Nāskax Jesús Ifofafo fe rafesharakōipaonifo, a rama Jesús chanīmara faifo. Askaxō pāa torekaxō ato pikīpaonifo Jesús shinā kakī, a ato nāxoyamea. Nāskakē Nios kīfitaī fapaonifo pena tii ichanākaxō.

Jesús Ifofamisfo isharakōipaonifo

⁴³ Nāskaxō anoxō a Jesúsnoa yoimisfāfe, nā docefāfe, afama mīstififo aponifo, yonai- fono ato sharafata, afara fetsafori aponifo, nāskaxō afama mīsthi faifāfe ato tāpinōfo. Nāskafaiāfe ōikani keyokōi anoax yorafo ratenifo.

⁴⁴ Jesús chanīmara fakani pena tii ichanānifo. Anoax āto afama mīsthi paxkanāi fet- sexikakī.

⁴⁵ Ato afarafo ato minikaxō kori fixō, a afaamaisfo kori inānifo tsoa afayakēma.

⁴⁶ Nāskata pena tii Nios kīfitaī pexefā mēranoax ichanākaxō Nios kīfinifo. Nāskaxō āto pexe mēraxō a Jesús ato nāxoyamea shinākakī pāa torepakexō pinifo inimakōiyanā.

⁴⁷ “Aicho, Nios fāsi sharakī,” ikanax inimai finakōinifo. Askaifāfe ōikani a Jerusalén ano ikafāfe ato yoinifo iskafakakī: “Na Jesús Ifofafo isharakōiafo,” ixō ato yoinifo. Nāskakē pena tii a yora fetsafāferi Jesús Ifofaifono Niospa ato chaka soaxonī. Nāskax nā Jesús rama Ifofaifo fe ano fistiāx ichanānifo, ato fe rafekanax.

3

Pedro feta Juan yora finimisma sharafanifo

¹ Askata a Nios kīfitaī pexefā mēra Pedro fe Juan yātapake fonifo. Yātapakes anoxō yorafāfe Nios kīfifokani fopaonifo.

² Nā Nios kīfitaī pexefā kāiti ano feronāfake finimisma nāskarapa kāini tsoa ini. Nā mēxotaima iyopaonifo pexe fepoti ano, nā pexe fepotini afe ane “Sharashta” fanifo. Anoxō ikiaifāfe ato kori yōkanō iyopaonifo.

³ Pedro fe Juan ikifaināifāfe ōikī a finimismato ato kori yōkani iskafakī: “Ea kori inākāfe,” ato faito,

⁴ Pedro feta Juan feesnifo. Pedro yoini iskafakī: “Noko feisfe,” fani.

⁵ Askafaito, “Ea kori inākanira,” ixō ato feisni.

⁶ Ato feisaito Pedro yoini: “Ē mia kori ināima. Ē koriyama. Ē mia kori inākima ē mia sharafatiro. Nikafe, ē mia yoinō. Jesucristo nā Nazarete ano ipaoni āfe sharaōnoax fininākafāfe,” fani.

⁷ Askata Pedro mētsoinīfofāni aō pōya mēste aōxori. Nāskax a finimisma fininākafani. Pedro mētsoinīfofānaino niinākafāni. Askaxō mea mā nisharakōia meeni a finimismato. Āfe taefoya āfe opoxko mā shara meeni.

⁸ Nāskax inimakōini. Askata mono mono ini. Mono mono ita Pedro fe Juan ikifaināifono, akairi ato fe ikikaini ichotiri ichotiri ikani inimayanā. Nios kīfitaī pexefā mēra ato fe ikikaini. Askata mekani: “Aicho, Niospa mā ea sharafaki,” ixō Nios sharafani.

⁹ Askaito yorafāfe a ichanāfo anoxō ōiketsanifo kafāsaito Nios yoisharayanā.

¹⁰ Askata, “Kee, ōikapo. Mā finia, na pexe kāiti āfe ane ‘Sharashta’ ano tsaotiani, a ato kori yōkamis. Āfeskax finiamē?” ikanax yoinānifo, rateyanā.

Nios kīfitaī pexefā kene fetsa āfe ane Salomón anoxō Pedro ato yoini

¹¹ Pedro fe Juan kaino ato fe kani nā finimisma mā sharax. Nā Nios kīfitaī pexefā kene fetsa mēra ikifainifo. A pexe kene āfe ane “Salomón” ini. Askaito nikakani yorafāfe ōifokani ichonifo ano ikiafono. Nāno nokotoshikata ōiafo a finimisma Pedro fe Juan niano ato fe nia ini ato mētsoax.

¹² Askaifāfe ōikī Pedro ato yoini iskafakī: “Israelifāfe, ea nikakāfe. Āfeskax nā finimisma sharamē ixō mā shināimē? Āfeskakī mā noko ōimē? Nōkai sharafama. Akka Jesúsxō nō sharafaa,” Pedro ato fani.

¹³ Askata anā Pedro ato yoini: “Nōko xinifo Abraham, Jacobo, Isaaca atiito Nios Ifofapaonifo. Afa fistichi a yonoxomis Jesús finakōia imani. Nāskakē afama mīshti famis. Nāskafikēkai mā Jesús Ifofapaiyameama. Nāskakē xanīfo Pilato Jesús shinākī, ‘Nō reteimakai’ fafaiato, ‘Maa, nō sharafaima, ato retemafe,’ ixō Pilato mā yoiyamea, Jesús retenōfo.

¹⁴ Jesús ōiti sharayaxō afaa pishta chakafamisma, akka mā noikaspayamea. Nāskakē mā Pilato yoikī: ‘A chaka kāmamayafe,’ mā fayamea. Pilato Jesús kāmapaiaino a yora chakakōi Barrabās kāmakaspakī. Askafaito mā iskafayamea: ‘Barrabās kāmafe, Jesúsroko ato retemafe,’ mā fayamea.

¹⁵ Akka nā Jesús taefakī yora onifani, iskaratīari noko ikinā, aōnoax nō nia. Nāskafekē mā reteyamea. Mā mā retefiano Apa Niospa afianā otofayamea. Nāskaito Juan feta nō ōiyamea. Mā anā otoyamea. Iskaratīa nia.

¹⁶ Nāskakē nā finimisma Jesús chanīmara faax mā fininākfāna. Jesúsnoax mā shara. Nāskakē keyokōichi mā ōi.

¹⁷ “Nāskakē ē mato yoi, efe yora mīshtichi. Akka ēfi mē mato tāpimiskī. Akka mā tāpixoma mā Jesús reteyamea, ‘Niospa Fakemara,’ ixō. Askata mātō xanīfofōfāferi tāpiyameafo. Jesús nōko Ifokōi fiano tāpixoma reteyameafo.

¹⁸ Nāskakē afetiāma Niospa yoini a inōpokoai mā tāpixō: ‘Ēfe Fake Cristo retexikani,’ ixō Niospa yoini. Nānori yorafāfe kirika kenenifo, Niospa ato shināmanaino. Nāskakē mā reteyameafo a Niosnoa ato yoisifāfe nānorikōiri yoinifo. Mā askakōia. Akka Niospa mā tāpiano, mā askakōifayamea.

¹⁹ Nāskakē mātō chaka xatekāfe. Mā afara chakafamiskī anā anori shināyamakāfe. Nāskakē Epa Nios fisti shinākāfe, mātō chaka mato soaxonō.

²⁰ Nāskaxō nōko Ifāfe mātō ōiti mato inimamasharakōinō. Nāskakē mato ano Cristo Jesús Niospa anā nīchixii, mātō Ifokōi mato nīchixoxii. Āfe Fake Cristo Jesús katonī mato ifimis inō.

²¹ Iskaratīa Apa fe nai mēra iyoa, oyoxoma na nāmā anoafo keyokōi Niospa fena shara fayoi. Askata chipō nāmā Jesús anā fotoxii. Nānori a Niosnoa yoisifāfe yoiyopaonifo a inōpokoai yoi kakī, Niospa ato shināmanaino.

²² Moisésri nānori yoikī kirika kenenī iskafakī afa Nios fistichi shināmanaino: ‘Nōko Ifo Niospa mato mēra fisti nīchixii mato Nios yoixomis inō, ea ani keskafakī. Nāato mato yoiāi anori nikasharakōikāfe.

²³ Akka a nikakaspaifo Niospa afe yorafo mēra ato ifixiima. Ato makinoa ato potaxii anā ato fe inōfoma.’

²⁴ Na iskaratīa nō ōiai yoikī Samuel taefakī yoini a inōpokoai yoikī. Nānori fisti a Niosnoa yoisimis fetsafāferi keyokōichi yoinifo Niospa ato shināmanaino.

²⁵ Nāskax mā mātō xinifāfe āto fenakōifokī mā. Nāskakē Niospa mātō xinifo iskafakī yoini: ‘Mātō fenafoōxō ē ato sharafai keyokōi nā maniafo tii,’ ixō Niospa Abraham yoini.

²⁶ Nāskakē Niospa āfe Fake Jesús nokoki nīchini nai mēraxō yonoxomis inō. Taefakī nokoki nīchini nōko chaka nō xatenō anā chaka shināyamaxiki a Ifo sharafaxō. Nāskax nō isharakōinō,” ixō Pedro ato yoini.

4

Pedro yafi Juan xanīfofo ano iyonifo

¹⁻² Pedro feta Juan Jesúsnoa yorafā rasi yoiāifono ōikani atoki fenifo, a ato Nios kīfixomisfo ita, a Nios kīfiti pexefā kexemisfo xanīfofo ita, saduceofo ita nāfo atoki fekanax ōitifishkinifo, Pedro feta Juan mā Jesús nafias anā oitoita ato faifono.

³ Nāskakata yātapakē ato achixō karaxa mēra ato ikimanifo. Fakishchāi ishinifo a mēra.

⁴ Ato ikimayofafomano a yora rasi ato yoiāifono nikakakī ato chanīmara fakōinifo. Afa penata cinco mil yora rasichi Jesús Ifofanifo.

⁵ Pedro fe Juan karaxa mēra ikafono, Jerusalén anoax judeofāfe xanīfofo fe a xanīfo fetsafari, askatari a Moisés yoikī kirika kenenī keskara ato tāpimamisfori pena fetsa fakishpari ichanānifo.

⁶ Nānori a ato Nios kīfixomis xanīfo finakōia ini āfe ane Anás. Askatari a xanīfo fetsari āfe ane Caifās ini, Juanri ini, Alejandrōri ini, a ato Nios yoixomisfāfe āto kaifori ato fe inifo, ano fisti ichanākani.

⁷ Nāskaxō Pedro yafi Juan kenanifo ato yōkaxikakī. Tsōaōxō a finimisma sharafafomāki tāpipai kakī Pedro yafi Juan kenanifo karaxa mēraano. Mā feafono ato nakirafe nīchikaxō ato yōkanifo iskafakakī: “¿Tsōaōxō na finimisma mā sharafaitamē?” ato fanifo.

⁸ Ato askafaifono Pedro ato yoini iskafakī Niospa Yōshi Sharapa shināmanaino: “Efe xanīfofōfāfe, efe anifofōfāfe, ea nikakapo ē mato yoinō.

⁹ ¿Tsōāōxō nō yora sharafatiromē mā tāpipaimē? Na mā tāpipaiyai finimisma tsōāōnoax sharamākī mā noko yōkaito ē mato yoinō. Ea nikakāfe.

¹⁰ Tāpixikakī israelifāferi tāpinōfo mēstekōi ē mato yoisharanō. Ea nikakāfe. Na feronāfake keyokōichi ōiaifo Jesús Nazarete anoato mā sharafaita. Nā mā ifi cruz ikaki mastaitato mā Apa otoaitano nāto mā sharafaa,” Pedro ato fani.

¹¹ “Aōnoa yoiyokī yōra kirika kenei iskafakī Niospa shināmanaino:

Tokiri pexe famisfāfe, ‘Na tokiri chakara,’ ixō potanifo sharafiano. Nāskakaxō chipo tāpinifo nā tokiri sharafinakōifiano.

Nāskarifikā nā Jesucristo tokiri keskarafiano mā potamis sharafinakōifiano. Mā mā potafiano Epa Niospa ifini aōnoax mā afe yorafo inō.

¹² Anā fato yora fetsakai nāmā ikama noko shara fatiro. Jesús fistichi nōko ōiti noko shara faxotiro nō afe nīpaxanō,” ixō Pedro ato yoini.

¹³ Ato askafaito nikakani a xanīfofo āa ranā yoinānifo: “¿Afeskakī iskara yoimē kirika keneki tāpisharayamafixō? Ranotamakōi iskara noko yoi. ‘Na rafe Jesús fe ipaonifo,’” ikanax yoinānifo.

¹⁴ Nāskaxō ōiaifono nā finimisma mā finiax ato fefotai kafāsaito ōinifo mā sharax. Nāskakē na rafeta afaa chakafafano ixō atoōnoa afaa yoitiroma inifo nā finimisma mā shara ōikakī.

¹⁵ Nāskakaxō Pedro yafi Juan nīchinifo ato makinoax fotanōfo. Pedro fe Juan mā kāifainaifono, nā xanīfofo āa ranā yoinānifo iskakani:

¹⁶ “¿Na rafe nō afeska faimē? Akka keyokōi Jerusalén anoafāfe mā tāpiafo, na feronāfake rafeta finimisma sharafaito ōitaxakakī. Fato feronāfake fētsakai iskara finimisma sharafatiroma. Iskarakai nō fomātiroma.

¹⁷ Akka iskaratīa nō ato yoinō anā Jesúsnoax mekanōfoma. Nō ato yoinō iskafakī: ‘Mā anā Jesúsnoa yoiaito nō nikakī nō mato omiskōimani,’” ikanax āa ranā yoinānifo.

¹⁸ Askaxō ato kenanifo pexe emāitino. Ato kenakaxō ato yoinifo: “Anā mā Jesúsnoa afaa yoiakī”

¹⁹ Ato askafaiifāfe nikakī Pedro feta Juan ato kemani iskafakakī: “¿Akka nō tsoa nikaimē? Mato nō nikasharairaka, askayamakī Nios nō nikairaka. Mā shinākāfe fato sharamākī.

²⁰ Nā nō Jesús ōifafaina keskafakī, nā noko Jesús yoiaito nō nikafafaina keskafakī nō yoipaketiro enetama,” ixō Pedro feta Juan ato yoini.

²¹ Ato askafaifono ato yoinifo iskafakakī: “Mā anā Jesúsnoa yoiaito nikaxō nō mato omiskōimani,” ato fanifo xanīfo tiito. Ato askafakaxō ato nīchinifo yora fetsafāfemāi ato ōiaifono. A xanīfo tiito ato koshapaifakakī ato koshanifoma yorafoki mesekakī. Akka a yorafāfe, “Epa Nios sharakōira,” ixō Pedro feta Juanmā Niosxō ato sharafaino.

²² A finimisma nāskara kāini ini mā cuarenta xinia akano Pedro feta Juan sharafanifo Niospa Yōshi Sharaōxō.

Jesús Ifofaafāfe Nios kīfinifo mitsisipakōi ixikakī

²³ Nāskata a xanīfofofāfe ato nīchiafono Pedro fe Juan fonifo mā ichanāxō a ato fe rafeafo ato yoixikakī, a ato Nios kīfixomis xanīfofo feta anīfofofāfe ato yoiāfo keskara.

²⁴ Ato askafakī yoiāifono nikakaxō a Jesús Ifofamisfāfe Nios kīfinifo iskafakakī: “Epa Niosi, mī nōko Ifo finakōiaki. Mī keyokōi onifani. Nai yafi mai mī onifani. Fākafāri mī onifani. Nai mēranoari mī onifani. Nāmānoafori mī onifani, fākafā mēranoafori mī onifani, afama mīshtifo.

²⁵⁻²⁶ Akka nā mia yonoxomis nōko xini David mī Yōshi Sharapa mī shināmani mīōxō ato yoini iskafakī:

¿Afeskai na yorafo Nioski ōitifishkikanimē? Keyokōichi yorafāfe āa shinākani Nios potapaikakī. Askafikaxō potatirofoma. Āto xanīfo tiitori ano fisti ichanākaxō nōko Ifo Nios noikaspaxikani potapaikakī. Askatari a Niospa noko noichixoxiai Cristōri noikaspaxikani. Aa askara shinākakī,

ixō David kirika kenei mīōxō yoikōiki.

²⁷ “Iskaratīa nāskakōi Herodes fe Poncio Pilato yorafetsafo fe ichanāitafo, israelifori ato fe ikitāfo mī Fake Cristo Sharafinakōia ifixō mī nīchifinifo chakafakani.

²⁸ Nā mī yoiyoni keskafakī mā nāskakōi faitāfo a inōpokoai mī yoini keskafakī.

²⁹ Epa Niosi, noko nikāfe mīoxō noko noimati fakani kiki. Nāskakē noko mesemayamāfe nō mia yonoxosharamiskī. Nāskakē atokī mesetama mī meka shara nō ato ranotamakōi yoinō mitsisipakōi noko imafe.

³⁰ Epa Niosi, mī sharaōxō a isinī ikaifo ato sharafafe, afama mīshtifo ato ōimayanā a mia yonoxomis Jesucristo anēōxō,” ixō Epa Nios kīfinifo.

³¹ Mā askafakakī kīfikī xateifono nā ichanāfo anoax mai naya naya ini. Nāskaino Niospa Yōshi Shara āto mēra naneaino ranotamakōi Niospa meka shara yoinifo.

Nā afafo keyokōi atonā ini

³² Jesús Ifoafaafāfe nānori fistis shinānifo āto ōitinī. Nāskakanax na afarafo nōkonā fistis ixō tsōa shinānima. Askakimaroko keyokōi atonā ini.

³³ A Jesúsnoa yoimisfāfe, “Nōko Ifo Jesús noko nāxofiax mā anā otoni,” ixō ato yoinifo Niospa Yōshi Sharapa ato shināmanaino. Nāskakē keyokōi nā chanīmara faafo Epa Niospa ato shināmasharaino inimakōinifo.

³⁴⁻³⁵ A Jesús Ifoafaafāfe atirito āto tarefoya āto pexefo ato minikaxō kori fikaxō nā Jesúsnoa yoimisfo ato inānifo afāferi a afaamaisfo ato inānōfo tsōa afaa yopayamanō.

³⁶ Akka José Levi āfe fena ini. Chipre anoax fakea ini. Nāskakē a Jesúsnoa yoimisfāfe āa anenifo iskafakakī: “Yora Inimamamis” fanifo. Akka āfe ane kaiyakōi Bernabē ini.

³⁷ Nā feronāfake tareya ini. Nāato āfe tare ato minixō kori fixō a Jesúsnoa ato yoimisfo ināni a afaamaisfo ato inānōfo.

5

Āfe āfi feta Ananias ato feparapaini

¹ Akka feronāfake fetsa āfe ane Ananias ini. Āfe āfinī ane Safira ini. Nāato āfe tare ato minini kori fixii.

² Nā feronāfake āfe āfi feta shinākaxō ranāri kori finifo. Ranāri a Jesúsnoa ato yoimisfo inānifo keyokōi mā noko ināfo ixō shinānōfo.

³ Nāskaito Pedro yoini iskafakī: “Ananias, ŷafeskai mī mēra Satanās naneamē mī Niospa Yōshi Shara feparapainō ranāri mā mī kori fifiaxō mī tareōxō?”

⁴ Akka, ŷtaeyoi mī tare iyoamamē? Akka mā mī ato minia, akka, ŷna kori mīnāmamē? Nāskakē nā mī apaiyai keskafatiro. Akka atiri mekepaikī mī noko yoia shara ikerana. Askatamaroko mī noko fomāpai. Mīkai noko pāraima, akka Nios mī pārapai,” ixō Pedro yoini.

⁵ Askafaifāfe nikai Ananias koshikōi nani. Askaito nikakani yorafā rasi ratei fetsenifo.

⁶ Nāskakē naetapafo fēkaxō Ananias rakonifo mā nakē. Nāskafakāta maifaifokakī iyonifo.

⁷ Mā askai samarakano āfe āfiri ikitoshini, afaa tāpiamax.

⁸ Nokotoshiaito Pedro yōkani iskafakī: “Ea yoipo mī tare minixō afe tii mā kori fiamāki,” ixō Pedro yōkani. Kemani a kēroma iskafakī: “Nā noko inā tii nō mato inā,” faito.

⁹ Pedro yoikī iskafani: “ŷafeskakī mī fene feta mā shināxō nōko Ifāfe āfe Yōshi Shara mā feparapaimē? Mā mī fene nakē maifatakani a pexe kachiori fekani. Ōipo, iskaratīari mia iyoi yokani,” ixō Pedro yoini.

¹⁰ Askafaito nikai Safira koshikōi nātani. Pedro nia nāmā pakeni. Naetapa tiito mā fene maifatakani ikiferakakī ōiafo mā āfe āfiri naa fichitoshinifo. Ari ififainifo maifaifokakī, fene ketaxamei.

¹¹ Askaito nikakani a Jesús Ifofamisfo ratenifo. Yora fetsafori askanifo nikakani akairi ratei fetsenifo.

Iskarafokai tsōa ōiyomisma inifo

¹² Tsōa atiroma keskafakī nā Jesúsnoa yoimisfoōxō afama mīshtifo fanifo yorafāfe ōinōfo. Nāskakanax keyokōi ichanānifo pexe kene āfe ane Salomōn anoax.

¹³ Atiri a Nios Ifoafaafoma a Nios Ifoafafo fe ato fe rafenifoma. Akka ato askafafiafonono yorafāfe, “Na Nios Ifoafafo isharakōiafo,” ato fanifo.

¹⁴ Ato askaifaifono yorafāfe nōko Ifo nikakōinifo, feronāfakefo feta kērofāfe. Nāskax ichapakōi inifo.

¹⁵ Nāskakata a isinī ikaifo xafakīa ato kāimanifo āto rakatiki ato rataxō fāi kesemē, “Pedro āfe yōra ato fakish faafōfānaino sharatirofora,” ikaxō.

¹⁶ Nāskakata a chaima ikafori yora kaya Jerusalén ano fonifo. A isinī ikaifo ato efeyanā a niafaka chakata ato mēra nanexō ato fekaxtefaifori ato efenifo. Nāfo a Jesúsnoa ato yoimisfāfe ato sharafapanifo.

A Jesúsnoa ato yoimisfo ato omiskōimakōinifo

¹⁷ A Nios ato kīfixomis xanīfo fe saduceofo afe ikanax ōitifishkinifo, afeskakī noko nikakanimamē ikanax.

¹⁸ Nāskakaxō a Jesúsnoa ato yoimisfo ato achikaxō karaxa mēra ato ikimanifo.

¹⁹ Akka Niospa āfe ājiri fakishi oxō karaxa āfe fepoti fepexō ato kāimani iskafakī ato yoivanā:

²⁰ “Nonoax kāifaikaxō a Nios kīfiti pexefā mēraxō ato yoitakāfe afeskaxō nōko Ifo Jesús ato ŷkitiromākī,” ato fani.

²¹ Nā ājirinī ato yoiaito nikafo keskakani penakaiama Nios kīfiti pexefā mēra ikifainifo, anoxō ato yoixikakī.

Nāskaifono a ato Nios kīfixomis xanīfāfe, a afe ikafoya israeli xanīfofo ato kenani, ano fistiax ichanāi fenōfo xanīfo finakōia anoax, anoxō a Jesúsnoa yoimisfo ato ifitanōfo ato fe ichanāi fenōfo.

²² Mā ato nīchiafono a ato kexemisfo fokaxō ðiafo a karaxa mēra tsoa inima. Nāskakē anā ato yoifekani fenifo.

²³ Iskafakī ato yoinifo: “Kaxō nō ðia karaxa fetaoxikōina nō fichitoshia, sorarofāfe kexekōiafono kāiti ano. Akka a mēra ikikaixō nō ðia ano tsoa ikama,” ato faifono,

²⁴ nikakani a Nios kīfiti pexefā kexemisfāfe a ato xanīfofo fe, a ato Nios kīfixomisfo xanīfokōifo āa ranā yoinānifo: “iAiral! ¿Afeskak tsekeafomē?” ikanax ratenifo.

²⁵ Askaifono feronāfake fetsa atoki oxō ato yoini iskafakī: “Nikakapo a mā ato karaxa mēra ikimanita feronāfake rafeta, a Nios kīfiti pexefā mēraxō mā ato yoikani,” ato faino,

²⁶ a ato kexemisfāfe āto xanīfo āfe inafō fe kani ato ifikai. Akka mā fokaxō ato efenifo. Nāskaxō ato afeska fanifoma yorafoki meseakāi tokirinī noko tsakatirofora ikaxō.

²⁷ Mā fokaxō ato iyonifo a xanīfo finakōia ano. Nānoxō a ato Nios kīfixomis xanīfāfe ato yoini iskafakī:

²⁸ “Mā nō mato yoita, ‘Anā ato Jesúsnoa yoyimakāfe,’ nō mato feita, akka, ¿afeskakī Jesúsnoa mā ato yoirifaimē? Jerusalén anoafō mā ato yoiki mā mā ato tāpimakōia. Nāskaxō mā noko pārapai nafāfe Jesús reteitafora mā noko fapai, noko chakafapaikī.”

²⁹ Ato askafaifono Pedro a afe rafeafo feta ato kemani: “Akka nōfi Nios nikaikai. Yorafokai nō nikapaima.

³⁰ Nōko xinifāfe āto Niospa Jesús otoaita, mā mā retefitano ifi cruz ikaki mastaxō.

³¹ Nāskaxō Niospa Jesús a keskara xanīfofinakōi imani yorafo ato ifixō ato ikikōipakexanō. Nāskakē israelifāfe keyokōichi Nios chanīmara fanōfo, a afara chakafamisfono āto chaka ato soaxonō.

³² Chanīma mā nō ðimis, askatari Niospa Yōshi Sharapa mā tāpia. Akka a nikaifo Niospa āfe Yōshi Shara ato mēra nanea,” Pedro ato fani.

³³ Ato askafaito nikakakī akiki ðitifishkiyanā ato retepainifo.

³⁴ Akka nā xanīfofo fe fariseo āfe ane Gamaliel ato fe ini. Nāato a Moisés yoikī kirika kenenī keskara ato tāpimamis ini. Yorafāfe aōnoa yoisharakōimisfo. Nāato niinākafā ato yoini iskafakī: “Xafakīa ato kāimayokāfe,” ato fani.

³⁵ Nāskaxō ato kāimaxō a xanīfo fetsafo yoini: “Efe yorafāfe israelifāfe, ea nikakapo ē mato yoinō. Māfi na feronāfake rafe retepaikāi, ¿afeskaito mā ato retepaimē? Shināsharakāfe. Ato retepaikakīma,” ato fani.

³⁶ Nāskata anā ato yoini: “Shinākapo, oa feronāfake Teudas xanīfo iyonī. Xanīfo finakōia ipaiyaito cuatro cientos yorafāfe chīfafainifo. Akka nā mā yora fetsafāfe retenifo. Mā reteafono āfe inafō paxkanāi fetsenifo. Nāskakanax ariax keyonifo.

³⁷ Askatari chipō āto anefo kenekakī censo akaifono, Judas fetsa. Galilea ano ini. Xanīfo ipaikī ato yoini yorafāfe chīfafainōfo. Askafafaiaino nāi retenifo. Nāskakē āfe inafori paxkanāi fetsenifo.

³⁸ Nāskakē ē mato yoi na feronāfake rafe ato enekāfe ato afeska fakakīma. Akka a Niospa shināi anori ato yoyimakakī, āa ato yoikakī kaxpa ato yoitirofo. Nāskakanax keyotirofo.

³⁹ Akka Nios ato fe ikano mā ato afeska fatiroma. Māroko kexemesharakāfe ato chakafayanā Niosri mā chakafatiroki,” ixō Gamaliel ato yoiaito nikanifo.

⁴⁰ Ato askafaito nikakakī, a Jesúsnoa yoimisfo ato kenaxō ato koshakata, “Anā Jesúsxō mā afaa yoiki,” ato fakaxō ato nīchinifo.

⁴¹ Nāskakē a Niosnoa yoimisfo xanīfofo anoax tsekekani inimakōinifo, Niosnoaxmāi omiskōikanax Jesúsnoa meka shara ato yoikani.

⁴² Nāskakē pena tii nōko Ifo Cristo Jesúsnoa meka shara ato yoinifo. A Nios kīfiti pexefā anoxō ato yoita pexefo anoxori ato yoifofāsafainifo.

6

Jesúsxō tāpimisfāfe docefāfe feronāfake fetsafo siete ato ifinifo ato feta yononōfo

¹ Nāskaifono a Jesús Ifofaifo ichapakōi inifo. Akka fetsafo a griego meka pa ikaiāfe, hebreofo ato mekakakāi taefanifo ato iskafakakī: “¿Afeskakī nōko kaifo a fenemaisfo a piaifo mā ato ināsharaimamē? Akka māto kaifo fisti mā ato ināi,” ikaxō ato mekafanifo.

² Ato askafaiāfe nikakata a Jesúsxō yoimisfāfe nā docefāfe a Jesús Ifofamisfo ato ichanāfakaxō ato yoinifo iskafakakī: “Nō mato Niospa meka yoikī nō xatetiroma a ma piai mato paxkaxoxiki. Akka pena tii nō mato Niospa meka yoifafāini,” ato fanifo.

³ “Efe yora mīstichi, feronāfakefo siete fenakāfe a mā piai mato ināsharanōfo. Mā mā tāpiakī fatofomākī Niospa Yōshi Shara fe rafeafo. Nāfo nō ato yonomanō a mā piai mato ināsharanōfo.

⁴ Akka nō pena tii Epa Nios kīfafāinikai, āfe meka sharari yoivanā,” ixō ato yoinifo.

⁵ Ato askafaifono nikakani keyokōi inimanifo. Nāskakata Esteban ifinifo, nāato Nios chanīmara fakōina ini, āfe Yōshi Shara a mēra naneano. Feliperi ifinifo, Prócorori ifinifo,

Nicanori ifinifo, Timónri ifinifo, Parmenasri ifinifo, Nicolásri ifinifo. Nā Nicolás Antioquía ano ini. Judeofāfe Nios Ifofaifo keskakāki Nicolás Nios shināmis ini.

⁶ Ato askafakāta a ato Jesúsnoa yoimisfo ano ato iyonifo. Anoxō ato Nios kīfixoyanā ato māmānifo.

⁷ A Jesúsxō yoimisfāfe Niospa meka ato yoaifono atoōxō yorafāfe chanīmara fanifo, Jerusalén anoxō. Askatari judeofāfe a ato Nios kīfixomisfāferi akairi Jesús Ifofanifo. “Jesús Niospa Fakekōira,” ixō chanīmara fanifo.

Esteban achinifo

⁸ Esteban Jesús chanīmara fakōina ini. Niospa āfe kerex shara a mēra naneano akiki inimakōini. Nāskakē aōxō afama mīshtifofakī ato ōimani.

⁹ Akka judeofo fetsafo nā ichanāti pexe mēranoax ichanāpaonifo. Nā ichanāti pexe anenifo: “Anā Ato Inafoma,” fakakī. Nāfo Cirene anoafō ikaino Alejandría anoafō ikaino Cilicia anoafō ikaino fetsafori Asia anoafōri nāfo ichanākanax Esteban fe feratenānifo.

¹⁰ Meka finōmapaifiaifono Niospa āfe Yōshi Sharapa Esteban āfe ōiti mēra shināmani. Shināsharakōita ato yoini. Ato askafaito tsōa Esteban kemanima.

¹¹ Ato askafaito nikakakī akiki ōitifishkiyanā yora fetsafo ato kori inānifo ato iskafayanā: “Nō mato kori inānō Esteban mā pāratakāfe iskafakī: ‘Na Esteban Moisés yoini keskara chakafaito nō nika, Niosri chakafayanā,’ ixō ato yoitakāfe,” ato fanifo.

¹² Mā fokaxō ato yoikī askafaifono, yorafo ōitifishkikani mekai fetsenifo, a judeofāfe āto xanīfo fe a Moisés yoikī kirika keneni keskara ato tāpimamisfori askanifo. Nāskakaxō Esteban achikaxō xanīfokōi ano iyonifo.

¹³ Mā iyokaxō āa pārānifo āa chanī fetsekakī iskafakakī: “Na feronāfāke nōko Nios kīfīti pexefā mēxotaima chakafai, askatari a Moisés yoini keskara chakafai.

¹⁴ Nāskatari, ‘Nā Jesús Nazarete anoato nā Nios kīfīti pexefā pāoaxii kiki,’ ikaito nō nikamis. Nāskatari, ‘A Moisés yoini keskara ē fetsafaxii,’ ikaito nō nikamis,” fanifo āa pārakakī.

¹⁵ Askafaifono xanīfofo feta a ano tsoafāfe ōiafo Esteban āfe femānā nā ājirinī femānā keskarakōi ōinifo.

7

Esteban ato kemasharakōini

¹ A judeofo Nios kīfixomis xanīfo finakōiato Esteban yōkani: “¿Chanīmamakī a mīōnoa yoaiaifo keskara?”

² Askafaito nikakī Esteban kemani iskafakī: “Efe yora mīshtichi, ea nikakapo. Nōko Nios fāsi sharakōixō afetiama nōko xini Abraham yoini, Mesopotamia ano iyoano, Harán mai ano kayoamano.

³ Iskafakī yoini: ‘Na mai anoax tsekekaini katāfe, mefe yorafoya ato ōifaini. Nā mī kai ano ē mia ispaikai,’ ixō Niospa Abraham yoini.

⁴ Nāskakē Abraham Caldea anoax tsekekaini kani, Harán ano ikikai. Mā anoax āfe apa naano Niospa Abraham efeni na mai ano, na iskaratīa nō ika ano.

⁵ Akka Niospa afaa pishta ināyonima. Mairi fena inānima. Akka iskafakī yoini: ‘Ē mia na mai ināxii,’ ixō yoiyoni. ‘Akka mā mī nanino mī fenafo ē ato ināxii,’ ixō Niospa Abraham yoiyoni āfe āfi feta fake akamano.

⁶ Askata Niospa anā yoini iskafakī: ‘Mī fenafo yora fetsa keskarakanax mai fetsa ano iyonōfo. Nānoax āto yonomati keskarakanax omiskōikōiyonōfo cuatrocientos xinia akani.’

⁷ Nāskata anā yoini iskafakī: ‘Ē na yorafo omiskōimani, nā ato yonomakī omiskōimanaifo. Ē ato askafaino anoax mī fenafo tsekefaixikani. Mā anoax fokaxō nā Canaán mai anoxō ea nikasharakōixikani,’ ixō Epa Niospa Abraham yoini.

⁸ Niospa afetiama Abraham yoini: ‘Mī fake feronāfake mī foshki repa xatetiro,’ ixō yoiyoni. Nāskakē Abraham āfe fake Isaaca mā ocho nia ikano foshki repa xateni. Nāskarifakī Isaaca āfe fake Jacobori askafani. Nāskarifakī Jacobo āfe fakefo ato foshki repa xatepakeni.

⁹ “Jacobō āfe fakefo nōko xinifo ipaonifo, nāfāfe āto exto José ōikaspapaonifo. Nāskakaxō Egipto anoax foaifono yora fetsafo ato inānifo aōxō kori fixikakī nāfāfe Egipto ari iyotanōfo. Askafafiaifono Epa Niospa José potanima.

¹⁰ José omiskōiaito Epa Niospa ifini. Nāskaxō shināsharamani. Nāskakē Egipto anoxō ato xanīfokōichi José noisharakōini. Nāskaxō xanīfāfe José xanīfo imani, Egipto anoxō āfe pexe anoax xanīfokōi inō.

¹¹ “Nāskakē Egipto anoafō fe Canaán anoax fonāiki finakōinifo omiskōiyanā. Nāskakē nōko xinifāfe afaa pinifoma.

¹² Akka Jacobo nikani Egipto ano a piaifo ichapakē. Nāskakē nāri āfe fakefo nīchini a piaifo fitanōfo, nā nōko xinifo. Ari fokatsaxakakīma foitaenifo.

¹³ Nāskakata afianā fonifo. Mā anā foafono José āfe ochifo tāpimani. Nāskakē nā xanīfo Faraón tāpini José āfe kaifo.

¹⁴ Nāskata chipo José apa kenamani Egipto ano onō āfe fakefo fe. Nā yorafo setenta y cinco inifo Egipto ano ikifeaifo.

¹⁵ Nāskakē Jacobo kani Egipto ano ikikai. Nānoax Jacobo nani, nānoaxri nōko xinifori nāpanifo.

¹⁶ Nāskakē Jacobo āfe xaofu Siquem ano fonifo maifaifokakī. Nā mai nōko xini Abraham afetiama finī, feronāfake āfe ane Hamor minini. Nā mai kini mēra nōko xinifo maifanifo.

¹⁷ “Akka mā anoax chaima tsekeafono nā Epa Niospa Abraham yoiyoni keskai, mā Egipto anoax kaikanax fakefo ichapakōi kainifo.

¹⁸ Nāskatari Egipto anoax nā xanīfo fetsa finakōiato José ōimisma ini.

¹⁹ Nā xanīfāfe nōko kaifofo ato pārāpaoni. Nāskaxō nōko xinifo ato omiskōimapaoni. Ato pāraxō āto fakefo ato potamapaoni nā fake rama kāiyaifo nanōfo.

²⁰ Ato askafaino nānoaxri Moisés fakeni. Akiki Epa Nios inimakōini. Nānoxō apa feta āfe afa ato pexe anoaxō kexesharapaoni. Tres oxe anifo kexekaki.

²¹ Mā tres oxe akano apa feta āfa fētamā fepoxō faka ketokonō ratanifo. Nānoa Faraón fake xomayato fichixō ifini āfe fake keskarakōi inō.

²² Nāskakē Moisés nā Egipto anoaxō tāpiafo keskarari tāpikōini. Mā yosixō yoiikī tāpisharakōia ini a xanīfāfe yoitiro keskafaki.

²³ “Mā cuarenta xinia axō Moisés āfe kaifo israelifo ōikai kani.

²⁴ Akka mā kaxō ōia Egipto anoato āfe kaifo koshaito ōini. Askafaito ōiki timamapaikī, Moisés Egipto ano feronāfake koshakī reteni.

²⁵ Askafata Moisés shināni: ‘Ēfe kaifāfe tāpikani eōxō Niospa ato ifipai,’ ixō shināni. Akka tsōa tāpinima.

²⁶ Nāskata pena fetsa Moisés āfe kaifo ari kaxō ōia āfe kaifo raferi setenāifāfe ōitoshini. Nāskaxō ato raefapaita ato yoini iskafakī: ‘Nā yora fistifiax ōafeskai mā setenāimē?’

²⁷ Ato askafaino a fetsa seteai Moiséski ōiti fishkiyanā yoini iskafakī: ‘ŹTsōa mia xanīfo imamē mī noko ikinō?’

²⁸ ŹAkka mī ea retepaime nā Egipto ano mī refefaiyamea keskafakī? ixō yoini akiki ōiti fishkiyanā.

²⁹ Askafaito nikai Moisés onekaini Madián mai ari kani. Nāri ipaoni yora fetsa keskarax. Nāriax āfiyaxō fake feronāfake rafe ani.

³⁰ “Nārixō Moisés mā cuarenta xinia akano, tsōa istoma machi Sinai chaima akiki ājiri nokoni, oa fanafo kooai keskara mēranoax.

³¹ Askaito nikai Moisés rateyanā namakē ōia fani. Nāskakē akiki chaimashta kaxō ōipaikī nika a mēranoax Nios mekaito nikani iskafakī yoiaito,

³² ‘Ēfi mī xinifāfe ato Nioski. Abraham ikaino Isaaca ikaino Jacobo ikaino ēfi āto Nioskōikī,’ ixō Niospa yoiaito nikai Moisés rateyanā choani. Nāskakē anā ari naisnima.

³³ Nāskaito Epa Niospa yoini iskafakī: ‘Mī zapato pekafe, nā mī nia ano sharakōikī.

³⁴ Efe yorafo mē ōia omiskōiaifāfe Egipto anoax. Mē ato nika tetsosikaifāfe. Nāskax ē fotoa ato ifiyoi. Nāskakē iskaratīa Egipto ano ē mia nīchi,’ Niospa Moisés fani.

³⁵ “Āfe kaifāfe noikaspakakī iskafafianifono: ‘ŹTsōa mia yoiame mī nōko xanīfo inō noko ikixikī?’ ixō yoinifonono. Akka Epa Niospa xanīfo imaxō nīchini āfe kaifo ifitanō, āfe ājiriōxō.

³⁶ Mā Moisés kaxō Egipto ano nōko xinifo ifini. Mā ato ifitani oxō Moisés afama mīshti fani tsōa atiroma keskara fakī. Nā mai anoaxō cuarenta xinia ani. Nā lamāfānē āfe ane Ōshi anoax tsōa istoma ipaonifo.

³⁷ Moisés āfe kaifo israelifo yoiikī iskafani: ‘Niospa fatora fetsa ea keskara mato ano nīchixii kiki. Nikasharakāfe,’ ato fani.

³⁸ Nā Moisés judeofo fe tsōa istoma ano ipaoni. Nānoax ājiri fe mekani machi Sinai anoax, nā ājirinī yoiā keskafakī nōko xinifo yoini. Nā Moisés a noko ikipakexatiro Niospa meka shara finī, nā meka sharapa noko ikipakexatiro ixō ato yoini.

³⁹ “Akka nōko xinifāfe nikakaspayanā chakafanifo. Nāskakanax afianā Egipto ano fepainifo.

⁴⁰ Nāskakaxō Aarón yoinifo iskafakakī: ‘Noko nios faxōfe noko ikinō. Fakira Moisés kaaki nō tāpiamaki, Egipto ano noko efefitaxakī.’

⁴¹ Nāskafaiifāfe Aarón ato fakka fake keskara oro ato onifaxoni. Mā ato onifaxōano yoinā retexō ināyanā akiki inimayanā fista axonifo. ‘Aicho, nōko nios fasi sharakōi,’ fanifo āa onifakaxō.

⁴² Nāskakē Nios ato makinoax paxkani iskafakī ato yoiyanā: ‘Na fishifo nai mēranoafo nōko niosra mā fatiro,’ ato fani. Akka nā Niosnoa yoiimisfāfe, nānorikōi kirikaki kenenifo iskafakī:

Israelifāfe tsōa istomaxō mā mā cuarenta xinia afiaxō mā kai yoinā retexō mā ea ināpaonima,

⁴³ Askatamaroko māa mā afara fetsa onifaxō, ‘Nā nōko niosra,’ ixō Moloc mā iyafofāsafamis. Askata mātō nios Refān āfe fishifori mā noimis. Na nōko niosra ixō mā afara onifanixakī, akiki mā inima kakāini. Nāskakē ē mātō na tsōa istoma anoā ē mato chai nīchi, Babilonia finōfāi, Niospa ato fani.

⁴⁴ “Nāskakē nōko xinifāfe tsōa istomaxō nā Moisés Niospa yoini keskakāki pexe fakanax ipaonifo. Nā Niospa Moisés yoini iskakakī: ‘Karpa pexe fafe nā ē mia ōimana keskara fakī,’ ixō yoini.

⁴⁵ Nāskakē mā xini ichapa finōta nōko xinifāfe nā karpa pexe finifo. Akka mā Josué xanifoxō ato iyoni yora fetsafo potaxō ato mai fiaifonōfo. Niospa ato axōfaino ato mai fianifo. Mā askapakeafono Davidri chipo xanifoni.

⁴⁶ Xanifo Davidki Nios fāsi inimakōini. Nāskakē David Nios yoini iskakakī: ‘Epa Niosi, ē pexe efapa shara mia faxopai ano Jacobo āfe fenafo inō,’ ixō yoini.

⁴⁷ Askakakī yoifixō axonima, āfe fake Salomón Epa Nios pexe faxoni.

⁴⁸ Akka yorafāfe pexe faxōfiatono nā Nios finakōia a pexe mēra itiroma. Niospa keyokōi ikinā ixō a Niosnoa yoimisto kirika keni iskakakī:

⁴⁹ Ē nai mēra ika. Nārixō na mai anoāfo ē onifani tii keyokōi ē ikinā. Akka, ōafeskakī mā ea pexe faxotiromē a fisti mēra ē inō faki kafāsaxikima?

⁵⁰ Akka, ōē afama mīshti onifanimamē?

ixō Niospa ato yoini.

⁵¹ “Akka māfi mātō xinifo keskarakī. Mā nikayospakōifo Epa Niospa meka mā nikakaspakōimis, chanīmarakai mā famisma. Niospa Yōshi Sharapa mato yoimis mā nikakōimisma.

⁵² Nāskaxō mātō xinifāfe a Niospa meka ato yoimisfo ato omiskōimapaonifo. Nāfāferi retenifo, ‘A sharafinakōia nokoki fotoxii kiki,’ ixō aōnoa yoinifo. Akka nā sharafinakōia mā nokoki oano, mā achixō ato retemayamea.

⁵³ Niospa ājirifoōxō Moisés Niospa meka shara mato yoifimisno mā nikakaspamis,” ixō Esteban ato yoini.

Esteban retenifo

⁵⁴ Esteban ato yoiki askafaito nikakani judeofāfe Esteban noikaspakani, akiki ōitifishkiki finakōinifo.

⁵⁵ Askafiaifono Esteban shināchakanima māmāi Niospa āfe Yōshi Shara āfe ōiti mēra naneano. Askata nai ari foisnifōfāki ōia Niospa āfe shara chaxasharakōiaito ōini, Jesús Apa fe ketaxamei nikē.

⁵⁶ Nāskaxō ato yoini iskakakī: “iŌikapo! Mā nai fepekemea ē ōikai Jesucristo Apa ketaxamei niakī,” ixō Esteban ato yoini.

⁵⁷ Ato askafaito nikakaspakōikakī fāsikōi fiisiyanā paopomenifo. Nāskakaxō noikaspayanā akiki fareke ferakaxō,

⁵⁸ mā achikaxō pexe rasi pasotai iyokaxō nā Esteban yōaitafāfe feronāfake naetapa āfe ane Saulo rapati inānifo ato kexexonō. Nāskakaxō chipo Esteban kokirinī tsakaketsanifo.

⁵⁹ Nāskakakī kokirinī tsakaketsaifono Esteban Epa Nios kifini iskakakī: “Ifo Jesús, ēfe fēro mēsho ifife,” ixō yoini.

⁶⁰ Nāskata ratokonō mai chachipakefōfā, fāsikōi fiisini. Iskakakī yoini: “Ifo, ea chakafakani kiki ato raefāfe,” ixō yoiax nani.

8

A Jesús Ifofafo Saulo ato omiskōimani

¹ Mā Esteban reteafono Saulo inimayanā: “Mā mā akakōiki,” ato fani. Nāskata afia penata nā Jesús Ifofamisfo ato omiskōimakī finakōinifo Jerusalén anoxō. Akka Jesúsxō tāpimisfo ichonifoma, Jerusalén ano nētenifo. Akka nā ato omiskōimanaifo ichokanax paxkanāi fetsenifo. Ranāri Judea mai ari foaifono, ranāri Samāria ari fonifo.

² Atiri yorafāfe a Nios Ifofamisfāfe Esteban maifakani oiai finakōinifo aō noikani.

³ Akka nā Saulo Jesús Ifofamisfo ato omiskōimani pexefo tii mēra ikikafākakāini ato achixō karaxa mēra ato ikimaxiki, kērofōya feronāfakefo.

Niospa meka sharaōnoa Samāria anoā ato yoinifo

⁴ Akka nā Jerusalén anoax ichoafāfe Jesucristoōnoa meka shara ato yoifofāsafanifo nā foaifo arixō.

⁵ Felipe pexe rasi Samāria ano kani, anoxō Cristoōnoa ato yoikai.

⁶ Ato yoiatio nikakani yorafo ichanākaxō Felipe nikakōinifo. Askatari Niospa Yōshi Sharaōxō tsōa atiroma keskafakī Felipe afama mīstiffo faito ōinifo.

⁷ Askata a niáfaka chakafo ato mēra nanea ato makinoa potapakeni. Nāskakē niáfaka chakafo ato makinoax tsekei fiisiki fetsenifo. Askatari a finimisfoma sharafata chātofori sharafani.

⁸ Askafaito ōikani a pexe rasi anoafō Felipeki inimakōinifo, ato sharafapaito ōikani.

⁹ Akka nā Samāria mai anoa feronāfake āfe ane Simón ini. Taeyoi yōfe iyopaoni, nāato Samāria anoafō ato pārapaoni: “Ē feronāfake sharafinakoīara,” ixō.

¹⁰ Keyokōichi fakefoyaxō anifofofāfe nikakōisharanifo iskafakī yoiyanā: “A nā yoimisfo a nato Niosxō afama mīstiffo fai kiki,” ixō yoinifo.

¹¹ Nāskakē akiki inimakakī nikakōipaonifo āfe yōfeōxomāi mā ato pārapakemiskē.

¹² Akka askafiaifono Felipe Nios xanīfoōnoa yafi Jesucristoōnoa meka shara ato yoiatio nikakakī chanīmara fakōinifo. Nāskakē chanīmara faifāfe Felipe faka mēra ato ikimapakeni maotisafakī āto chaka xatenōfo. Feronāfakefoya kērofoya ato faka mēra ikimapakeni.

¹³ Askatari a Simón yōfe ifiakatsaxakī atori Jesús chanīmara faxō Ifofani. Askafaito ōikī aari Felipe maotisafani. Nāskax nā Simón Felipe afe kapaoni. Akka Felipe tsōa atiroma keskafakī Niosxō afarafo sharafaito ōikī yoini iskafakī: “Aira. ¿Afesaxō iskafaimē?” ixō Simón yoini.

¹⁴ Nāskaifono a Jesús fe rafemisfāfe Jerusalén anoxō nikanifo Samāria anoxō yorafāfe Niosnoa meka shara chanīmara faifāfe. Nāskakē Pedro yafi Juan nīchinifo, Samāria ari fotanōfo.

¹⁵ Mā Samāria ano nokokaxō a Nios Ifofafo ato Nios kīfixonifo Niospa Yōshi Shara ato mēra nanenō.

¹⁶ Ato mēra Epa Niospa Yōshi Shara naneyoamano Jesús aneōnoax maotisanifo.

¹⁷ Nāskakē Pedro feta Juan ato māmānifo ato Nios kīfixoyanā. Ato askafiaifono Niospa Yōshi Shara ato mēra naneni.

¹⁸ Nāskakē Simón ōini Niospa Yōshi Shara ato mēra naneaito Pedro feta Juan ato Nios kīfixoyanā ato māmāifono. Ato askafiaifono ōikī Simón ato kori ināpaini.

¹⁹ Ato iskafakī yoiyanā: “Earī na kerex shara inākāfe ēri ato māmāpakenō Niospa Yōshi Shara ato mēra nanenō,” ixō Simón ato yoini.

²⁰ Ato askafaito Pedro kemani: “A na mī koriya mī nai, akka mī shinā korioxō a Niospa noko ināpaiyai keskara nō fitiro. Maa, askarakaima.

²¹ Mīkai afaa tāpiama na nō Nios yonoxonai keskarakai mī nofeta atiroma. Mia Niospa tāpikōia mī ōiti mēraxokai mī shināsharaima.

²² Nāskakē mī chaka xatefe a mī shināi anori anā shinākima. Nios yōkafe mī kīfaiito mia chaka soaxotiroki.

²³ Mē mia ōi mī ōitifishkiki finaito mīmāi chakakōiax,” ixō Pedro yoini.

²⁴ Askafaito nikakī Simón kemani iskafakī: “Ea Nios kīfixōfe, nā mīa yoiāi keskafakī, Niospa ea omiskōimayamanō,” ixō yoini.

²⁵ Askakāta Pedro feta Juan Samāria anoafō nōko Ifo Jesúsnoa meka shara ato yoitakani Jerusalén ano anā fenifo.

Mā fekakī pexe rasi anoafō Jesúsnoa meka shara ato yoiifenifo

²⁶ Nāskata Niospa āfe ājirinī Felipe yoini: “Fai fētsa kakīma, na fāi katāfe na fāi Jerusalén yafi Gaza finōfainaki tsōa istoma ari na fai kaaki,” fani.

²⁷ Askata Felipe fininākafāta kani. Fāi kai feronāfake Etiopía anoaki nokoni. Nā feronāfake xanīfori ini. Nāato kēro xanīfokōi kori kexexopaoni Etiopía anoa. Nāato Jerusalén ano kaxō Epa Nios kīfitani.

²⁸ Mā āfe kaifo mēra okī āfe karo mēra tsoaxō kirika anefeni, nā Isaías Niosnoa yoikī kenenī.

²⁹ Nāskata Niospa Yōshi Sharapa anā yoini Felipe: “Oa karo ano katāfe,” fani.

³⁰ Mā Felipe akiki kaxō nikani nā feronāfake Etiopía anoato kirika aneaito, nā Isaías kenenī. Nāskaxō yōkani: “¿Mā mī tāpiamē a mī aneai?” faito,

³¹ Etiopía anoato kemani iskafakī: “¿Afesaxō ē tāpitiromē? ¿Tsōa ea tāpimiromē?” fata nāskaxō nā feronāfake Felipe kenenī: “Ēfe karomā naneyofe efe tsoaxiki,” fani.

³² A kirika kenea anekī ōiai iska ini:

Oveja iyokaxō retetirofo keskafakī, ari iyonifo retexikakī. Ovejanā fake achikaxō āfe rani xateafono feroitiroma keskai ari tooxinima.

³³ Rāfinī fanifo afaa chakafayamafiakē noikaspa kakī. A xanīfofo aō rafanā inifoma aō rafanā itamaroko retenifo. Akka āfe fenafāfe nikanakafoma, ixō Isaías kenenī ōini.

³⁴ Nāskata nā xanīfo Etiopía anoato Felipe yōkani: “Ea yoife ē tāpinō na Niospa meka yoimisto yoini afaa ikamākī, fetsaōnoa yoikī kenenimākī askayamakī āa anoi yoimekī kenenimākī,” faito,

³⁵ Felipe yoini iskafakī: “Na mī kirika ōiai Isaiās keneni a Jesucristo noko nāxoxiai yoikī keneni,” fani. Nāskafaxō Jesúsnoa meka shara yoipakeni.

³⁶ Nāskakata fāi fokani faka ano nokonifo. Nānoxō a xanīfo Etiopía anoato Felipe yoini: “Na faka ōipo. ¿Na fāka mī ea maotisafatiromamē?” fani.

³⁷ Askafaito Felipe yoini: “Mī ōiti mēraxō mī chanīmara fakōinaito ē mia atiro,” fani. Askafaito a feronāfāke kemani: “Ēje, ē chanīmara fai Jesucristo Niospa Fake,” fani.

³⁸ Askafaito nikakī Felipe, “Mī karo nētefafe,” fani. Mā karo nētefakata nā rafe fotopakefōfānifo faka ano. Nānoxō Felipe a feronāfāke Etiopía anoa maotisafani.

³⁹ Mā faka anoax feaifono, Niospa Yōshi Sharapa Felipe iyofaino yamarisatani. Nāskakē a feronāfāke Etiopía anoato Felipe anā ōinima.

⁴⁰ Nāskata Felipe mai fetsa, Azoto ano nokoni. Nānoax kakī a pexe rasi anoafo Jesúsnoa meka shara ato yoifoikaax, Cesarea ari nokoni.

9

Saulo Jesús chanīmara fani Damasco ano kakī (Hch. 22.6-16; 26.12-18)

¹ Nāskatari nā Saulo mēxotaima ē mato reteikai ixō ato retepaipaoni a Jesús Ifofaafō. Nāskakē a ato Nios kīfixomisfo āfe xanīfo ano kani.

² Mā kaxō ato yoini iskafakī: “Ea kirika kenexokāfe ē aya katanō, ichanāti pexefo Damasco ano a Jesús chanīmara faifo ē ato achitanō, feronāfākefoya kērofoya, Jerusalén ano ato iyoxō karaxa mēra ato ikimaxiki,” ixō ato yoini.

³ Akka mā pexe rasi Damasco chaima fāi kaino, nai mēraxō a kemataima chaxatanaino,

⁴ Saulo pakeni. Pakexō nikani, iskafakī yoiaito: “Saulo, Saulo, ¿afeskakī mī ea omiskōimanimē?” faito nikakī,

⁵ Saulo kemani: “Ifo, ¿mī tsoamē?” faito kemakī iskafani: “Ēkīa Jesús, a mī ea omiskōimanai.

⁶ Fininākafā. Pexe rasi ano katāxiki. Anoxō mia yoikani kiki mī afaa afeska faimākai,” fani.

⁷ Akka a Saulo fe foaifo ratekōinifo mekaito nikakani. Akka anoa mekaito nikafikakī tsoa ōinifoma.

⁸ Nāskata Saulo fininākafani. Fininākafāta ōipaikī anā ōinima, mā fēxoa ini. Nāskakē mētsokaxō iyoniŋo Damasco ano.

⁹ Nā Damasco ano tres nia ini ōiaxma. Askatari afaa pinima, afaari ayanima.

¹⁰ Akka nā Damasco ano Jesús Ifofaafō fisti ika ini, āfe ane Ananías. Nāato namakē ōini nōko Ifāfe yoiaito iskafakī: “Ananías,” faito, “Ēkīa, Ifo,” fani.

¹¹ Askafaito nōko Ifāfe yoini: “Na fai āfe ane ‘Mēstekōi’ ari katāfe. Mā nokoxō Judaspa pexe ano yōkafē nānoa feronāfāke Tarso anoa, mī fichikai āfe ane Saulo. Nānoxō Epa Nios kīfi kiki.

¹² Anoxō mia namakē ōiafai kiki, mī mīfi mī māmāito, anā ōisharaxiki,” ixō yoiaito,

¹³ nikakī Ananías kemani: “Ifo, na feronāfākeōnoa ea yoiaifāfe mē nikamis. Nāato keyokōi Jerusalén anoafo chakafaito a mia Ifofaafō.

¹⁴ Akka mā nono oa a ato Nios kīfixomis xanīfofōfāfe nīchiafono. A mia Ifofamisfo ato karaxa mēra nīchixiki mā ato ifiyoa,” faito,

¹⁵ anā nōko Ifāfe yoini iskafakī: “Mē na feronāfāke katoa eōnoa meka shara ato yoinō mai fetsafo anoafōya āto xanīfofōya israelifōya ato yoinō.

¹⁶ Nāskakē ē Saulo ōimana eōnoax omiskōifinakōinō,” ixō yoini.

¹⁷ Askafaito nikafaini Ananías kani. Kaax pexe mēra ikitoshina nānoa Saulo fichitoshini. Nāskaxō āfe mīfi māmāni iskafakī yoianā: “Saulo, ēfi mefe yorakī. Nōko Ifo Jesús nā mī fāi oaito mikiki nokoitato, ea nīchia ē mia fero sharafaxonō, askatari Niospa Yōshi Shara mī mēra ē nanenō,” faino,

¹⁸ koshikōi Saulo fero mēranoax oa foe pese keskara pakeni. Nāskaxō ōisharakōitani. Nāskakē Ananías maotisafani faka mēra ikimākī.

¹⁹ Nāskaxō mā pixō meea āfe yora sharakōi ini, anā āfe yora pachi inima. Nāskakē nā Jesús Ifofaafō fe Damasco ano ato fe oxa ranāyonifo.

Damasco anoxō Saulo Niosnoa yoini

²⁰ Askata Saulo ichanāti pexe mēraxō ato yoikī taefani iskafakī: “Jesús Niospa Fakekōi,” ixō ato yoini.

²¹ Ato askafaito nikakani ratei fetsenifo. Nāskaxō yoinifo iskafakakī: “Akka, ¿nato Jerusalén anoxō a Jesús Ifofamisfo ato omiskōimamismamē? Akka, ¿naamamē? Mā nono oa nonoafō ato achiyoī, a Nios kīfixomisfāfe āto xanīfofo ato iyoxoni axiki.”

²² Akka taeyoi Saulo ratepishtakī yoyioni. Nāskaxō feyafani fāsikōi yoikī. Nāskaxō mēstekōi ato yoini Niospa āfe Fake Jesús nokoki nīchini. Nāskakē judeofāfe Damasco anoxō tāpīpaiketsanifo. “¿Fato nō chanīmara faimē?” ikaxō, “Jesucristofi Niospa Fakekōikī,” ixō ato yoiaito.

Saulo judeofoki mesei onekaini

²³ Nāskata mā oxai ichapano, judeofāfe ichanākaxō shinānifo: “¿Afeskaxō nō Saulo rete-tiromē?” ikaxō,

²⁴ akka Saulo tāpini yoiaifono. Pena yafi fakishchāi manaifono pexe rasi kāiti anoxō retēpaikakī.

²⁵ Askaito ōikakī a Jesús Ifofamisfāfe Saulo fēta mēra nanexō kene fomākīaxō risfichi fakishi fotomanifo a tsoa niama anori. Mā fotomanafono onekaini.

Saulo Jerusalén ari kani

²⁶ Mā Saulo Jerusalén ano nokoax a Jesús Ifofamisfo fe rafepaiyaito, akka keyokōichi omisnifo tāpīkaxoma koshikairoko Nios Ifofara ikaxō.

²⁷ Askaito ōikī Bernabé Saulo iyonī Jesús āfe inakōifo ari. Nāskaxō ato yoini iskafakī: “Na Saulo nōko Ifo ōia fāi kakī, nōko Ifāfe yoiaito. Nāskaxō na Saulo Damasco anoxō ato yoisharapakea, ‘Jesús Niospa Fakekōi,’ ixō ato yoia ranotamakōi,” Bernabé ato fani.

²⁸ Nāskakē Saulo Jerusalén ano ato fe ikax, kafāsapaoni. Nōko Ifo Jesúsnoa ato yoifofāsafapaoni mesetama.

²⁹ Anoxō ato yoiaito judeofāfe griego meka tāpīkaxō fochishpamanifo. Nāskakaxō afeskaxoma retēpainifo.

³⁰ Askafaifono a Jesús Ifofaafāfe mā tāpīkaxō Saulo iyonifo Cesarea ano. Nānoxō Tarso ano nīchinifo.

³¹ Nāskakē a Jesús Ifofaafo Judea anoax ita Galilea anoax ita Samāria anoax ita isharakōinifo anā tsōa ato omiskōimanaimano. Anoxō Nios nikasharakōinifo isharakōikaxō Niospa Yōshi Sharapa ato oxosharaino. Nāskakē a Nios Ifofaafo ichapakōi inifo.

Pedro Eneas sharafani

³² Nāskakē Pedro kafāsani a Nios Ifofaafo ato ōifofāsafai. A Lida ano ikaxō Nios Ifofaafori ato ōikai kani.

³³ Nānoa feronāfake āfe ane Eneas fichini. Rakatiani mā ocho xinia aka ini.

³⁴ Fichixō Pedro yoini iskafakī: “Eneas, Jesucristo mia sharafaaki fininākafāta mī oxati itipinīfāfe,” ixō yoiaino, Eneas koshikōi fininākafani.

³⁵ Nāskakē Lida ano ikafāfe, Sarón anoafāferi ōikakī nōko Ifo Jesús chanīmara fanifo.

Mā Dorcas naano Jesúsxō Pedro otofani

³⁶ Nāskaifono nā pexe rasi Jope ano kēro Nios Ifofaa ika ini, āfe ane Tabita. Griego mekapa Dorcas famisfo. Nā kēromā isharakōixō ato axosharakōīpaoni ato afara ināsharakōikī.

³⁷ Nāato askafai, Dorcas isinī iki nani. Mā nakē chokakaxō fomākīa māpemainīfōfā pexe kene fetsa ano ratanifo.

³⁸ Akka Jope fe Lida chaima ini. Nā Lida ano Pedro ika ini. Nāno ikē nā Nios Ifofaafāfe tāpīkaxō feronāfake rafe nīchinifo, iskafakī yoitanōfo: “Jope anoxō mia kenafo mī koshi kanō,” ixō yoitanōfo.

³⁹ Askafaifono Pedro ato fe kani. Mā nokoano fomākīa māpemainīfōfānifo a Dorcas raka ano. Anoax a kēro fenemaisfo oiakakī Dorcas nayoxoma ato samafaxomis ispanifo.

⁴⁰ Askaifāfe ōikī Pedro ato kāimani. Ato kāimata ratokonō mai chachipakefōfā Epa Nios kīfini. Nāskata a kēro naa ōiyana yoini iskafakī: “Tabita, fininākafāfe,” faino, nā kēromā Pedro feista nāskax tsaoinākafāni.

⁴¹ Nāskata Pedro mētsoxō fininīfōfāni. Nāskata a Jesús Ifofaafoya a kēro ifomafafo ato kenani ato ōimaxiki mā Dorcas anā otoano.

⁴² Askaito nikanifo a pexe rasi Jope anoafāfe. Nāskakē ichapakōichi nōko Ifo chanīmara fakōinifo.

⁴³ Mā askafata Pedro Jope pexe rasi ano oxaranāyoni, a Simón anoxō fichi shinā famis ano.

10

Pedro fe Cornelio

¹ Nā pexe rasi Cesarea ano feronāfake āfe ane Cornelio ini. Sorarofāfe āto xanīfo ipaoni. Nā sorarofa, “Italianōra,” ato famisfo.

² Nā feronāfake āfe yorafa fe isharakōixō Epa Nios kīfīpaonifo. Nāskatari judeofo ato axosharayanā kori ichapa ato ināpaoni. Nāskaxō Epa Nios mēxotaima kīfīpaoni.

³ Nāskata pena fetsa yātapake oa namakē ōia fani, Niospa āfe ājiri xafakīakōi ōini akiki oxō iskafaito: “Cornelio,” faito.

⁴ Nāskakē Cornelio ājiris ōini. Nāskaxō rateifinakōiyanā yōkani iskafakī: “¿Afaa mī ea yoipaikī kenaimē, Ifo?” faito, ājirinī yoini: “Mī kīfīaito mā Epa Niospa mia nikakōia, a yora afaamaisfo ato axosharayanā mī ato kori ināito.”

⁵ Nāskaxō yoini: “Fatora fetsa nīchife Jope pexe rasi ano kaxō Simón ifitanōfo. Āfe ane fetsa Pedro.

⁶ Simón fetsa pexe ano oxaki nā Simón iamāfā ketokonō ikaki fichi koiro fai.”

⁷ Askafakī yoiax mā ājiri kaino, Cornelio a yonoxomis rafeya āfe soraro fisti kenani nā soraronō kexekōimis ini. Akka nā soraronō Nios shināmis ini.

⁸ Nā ājirinī yoia keskara mā ato yoixō Jope ari ato nīchini.

⁹ Penama xini keya mā Jope chaima faifoafono, Pedro pexe māmākīa mēpeinīfōfāni arixō Epa Nios kīfikakī.

¹⁰ Nāskax fonāikōikī pipaini. Akka pixikakī mā pīchaifono Pedro namakē ōia fani.

¹¹ Ōia nai fepekemeaito ōini ariax sabanā keskara petapafā nexeax nai mēranoax nāmā fotopakekafanaito.

¹² Nā sabanā petapafā mēra yoinā fetsa fetsatapafo ōini ronofoya, peyafō, afama mīshti ini.

¹³ Nāskata mekaito nikani iskafakī yoiaito: “Pedro, fininākaḡāfe. Nafō retexō pixiki,” faito nikani.

¹⁴ Askafaito nikakī Pedro kemani: “Maa, Ifo, nafō ē pimisma, Moisés noko yoini nafō nō pitiroma,” faito,

¹⁵ aḡanā yoiaito nikani iskafakī: “Niospa nafō shara imaki. Akka nafō chakara fayamafe,” faito nikani.

¹⁶ Yoikī tres fata nāskax nā sabanā petapafā anā nai mēra kaito ōini.

¹⁷ Nāskakē Pedro shināchakakōiyanā tāpipaini. “¿Afaa iskara Niospa ea yoipaimē na namakē ōia keskara ē ōiai?” ixō Pedro shināni. Nāskaino a Cornelio ato nīchia fokaxō, pexe fepotī anoxō ato yōkanifo: “¿Fatomē Simón pexe?” ixō ato yōkanifo.

¹⁸ Anoxō ḡāsikōi ato yōkanifo: “¿Fanī Simón fetsa oxamē, āfe ane fetsa Pedro?” ixō ato yōkanifo.

¹⁹ Oa namakē ōia keskara ōixō Pedro shināpaiyaino, Niospa Yōshi Sharapa yoini iskafakī: “Ōipo, feronāḡāfe trespa mia fenai feafokī.

²⁰ Fininākaḡāfe. Nā mā fotoax ato fe kataxiki tanaimakōi, ē ato nīchia feafoki,” faino,

²¹ Pedro fotopakekafāxō a feronāḡāfe tii ato yoini iskafakī: “¿Afaa mā akiyoamē? Ērokōnō a mā ea fenai,” Pedro ato fani.

²² Ato askafaino kemani: “Nō oa nā sorarofāfe āto xanīfo Cornelio noko nīchiano nā feronāḡāfeki sharakōiki. Nios nikakōimis. Judeofāfe aḡnoa meka shara yoimisfo sharara famisfo, Niospa āfe ājirinī yoia mia kenanō āfe pexe ano mī kanō, nāato mia nikasharai mī yoiaito,” fanifo.

²³ Askafaifāfe nikakī Pedro ato ikimani. Nāno afe oxa fistinifo, nāskata Pedro ato fe penama kani. A afe rafeafori Nios Ifofakanax Pedro fe fonifo Jope anoax.

²⁴ Mā fokanax pena fetsa Cesarea ano nokonifo, a Cornelio ato manai ano, afe yorafo feta. Āfe yamakōifori ano afe inifo ato kenamana fekanax.

²⁵ Mā Pedro pexe ano nokoano, Cornelio āfe pexe anoax kāinākaḡā Pedro ifikai kani. Mā kaxō a nāmā ratokonō mai chachīpakefōfā: “Mī ḡāsi sharakōira,” fani.

²⁶ Askafaito ōikī Pedro fininīfōfāni iskafakī yoianā: “Fininākaḡāfe. Ēri yoraki mia keskara,” fani.

²⁷ Nāskax afe mekayanā pexe mēra ikikaikī ōia yora ichapakōifo ichanā inifo.

²⁸ Anoxō Pedro yoini: “Mā mā tāpia a nōko xinifāfe noko yoini keskara a judeofoma fe nō rafetiroma. Askatari āto pexe mēra nō ikitiroma. Akka Niospa ea tāpimana ē tsoa chakafatama ē ato noisharakōinō.

²⁹ Nāskakē ea yoiaifono ē koshi oa, ē okaspama. Akka ē tāpipai afeskakī mī ea kenamāki,” faito,

³⁰ Cornelio kemani iskafakī: “Mā cuatro nia finōa, a nono xini rakato ēfe pexe anoxō foni teneyanā ē Epa Nios kīfiaino yātapake, feronāḡāfe rapati fafekōiai safeax ekeki nokoita,

³¹ ea yoikī iskafaita: ‘Cornelio, mā Niospa nika mī kīfīaito. A mī akai keskarari mā tāpia, a afaamaisfo mī ato afara ināsharaito,’ ea faito ē ōita.

³² Nāskaxō feronāḡāfe tres pexe rasi Jope ano nīchife Simón ifitanōfo. Āfe ane fetsa Pedro. A Simón fetsa āfe pexe mēra ikaki. Nā Simón fetsa fichi koiro shinā famiski iamāfā kesemē ikaki, ixō ea yoita.

³³ Nāskakē feronāfake tres ē koshikōi nīchita mia iffonōfo. Akka mī nokoki osharakōiyānā mī noko inimamasharakōia. Nāskakē keyokōi mā nō ichanā Niospa noko ōiaino. Akka nō nikapai a nōko Ifāfe mia yoia keskara mī noko yoinō,” ixō Cornelio yoini.

Pedro ato yoini Cornelio pexe anoxō

³⁴ Askafaito nikakī Pedro yoini iskafakī: “Chanīma mē tāpikōia Niospa noko yora fetsa keskara ōima, keyokōi nā yora fisti keskara noko ōi.

³⁵ Askakimaroko nā mani fetsafāferi Nios nikakōikakī, afarafo sharakōi fakanax, Epa Niospa fake itirofo.

³⁶ Niospa israelifāfe fenafo meka sharaōnoa ato yoini, inimasharakōimōfo. Jesucristoōxō ato yoini, nā nōko Ifoōxō.

³⁷ Mā mā nikamiski a Judea mai anoax ini keskara. Taefakī Galilea anoxō ato yoikī taefani: ‘Māto chaka xatekāfe Nios chanīmara fakāfe ē mato maotisafapanō,’ ixō Juan ato yoini.

³⁸ Akka mā mā tāpia Niospa āfe kerex sharafoya āfe Yōshi Shara Jesús mēra naneni. Jesús afama mīstiffo fapaoni, ato sharafayanā a omiskōiaifo, niafaka chakata ato omiskōimanaino. Nāskakē afama mīstiffo fatiro Niosmāi afe ikano.

³⁹ Akka nō ōiyamea Jesús afama mīstiffo faito judeofāfe āto mai anoxō ata Jerusalén anoxori akaito nō ōiyamea. Nāskafafaito reteyameafo ifi cruz ikakī mastakaxō.

⁴⁰ Akka mā retefitafono Epa Niospa tres nia oxata otofayamea. Nāskakē nokoki nokoaito nō ōiyamea.

⁴¹ Akka atiri yorafoki nokoyameama, nokoki nokoaito nō ōiyamea. Afetiāmamāi Niospa noko katonixakī chanīmakōi nō mato yoi. Nō a feta piyanā nō afeta ayayamea mā Niospa otofayameano.

⁴² Nāato noko nīchiyamea pexe rasi anoafo nō ato yoinō iskafaki: ‘Niospa Jesús nīchini,’ ato yoinō fatofomākī afe nīpanakafō mā nafianixakakī, askatari a niafori ato yoixii.

⁴³ A Niosnoa yoimīsfāfe a nā Jesús iskanōpokoai yoikī aōnoa yoiyonifo. Iskafakakī yoinifo: ‘Nā chanīmara faifono aōxō Epa Niospa ato chaka soaxotiro,’ ixō yoinifo,” Pedro ato fani.

Nā judeofomafāfe Niospa Yōshi Shara finifo

⁴⁴ Pedro ato yoikī xateamano Niospa Yōshi Shara ato mēra naneni āfe meka shara nikaifono.

⁴⁵ Nāskakē a judeofāfe Jesús Ifofamīsfāfe Pedro fe foitaxakakī ato ōinifo. Ato iskafanifo: “Aira. Ōikapo. Na nōko kaifomafo Niospa Yōshi Shara ato mēra naneakekafana,” ikax yoinānifo.

⁴⁶ Anoxō ato nikanifo meka fetsapa mekaifāfe iskakani a ato kaifomafo: “Nios fāsi sharakōi,” ikanax mekaifāfe ato nikanifo judeofāfe.

⁴⁷ Askafāfe Pedro ato yoini: “Akka tsōa na yorafo ato maotisano fayamakāfe noko fatirofoma. Akka Niospa Yōshi Shara mā ato mēra nanea, nōmēra naneni keskai.”

⁴⁸ Pedro ato yoini Jesucristo aneōxō ato maotisano fanōfo. Mā ato maotisano faafono, Pedro nīchikaspānifo. “Kayamafe, nono nofe iyoxiki,” fanifo.

11

Pedro a Nios Ifofafo Jerusalén anoafo ato yoini

¹ Nā Cesarea anoafāfe Jesús Ifofanifo judeofo yamafikaxō. Afāfe Jesús Ifofaifāfe ato nikanifo a Jesúsxō tāpimiskōifāfe. A Nios Ifofamīsfō fetsafāferi nikanifo. Atiixō ato nikanifo āto mai Judea anoxō.

² Askata Pedro Cesarea anoax kani Jerusalén ano. Anoxō a Jesús Ifofamīsfō fetsafāfe Pedro mekafanifo a Moisés keni tāpiafāfe: “Judeofoma fe mī rafeira,” ikaxō.

³ Iskafanifo: “¿Afeskai a nōko kaifoma ano mī kaitamē? Anoxō ato fe rafexō mī ato feta piāto nō nikaita a Moisés yoini keskafakī nō ato feta pitiroma,” fanifo.

⁴ Askafāifāfe nikakī Pedro ato yoini a namakē ōiafāta keskara,

⁵ iskafakī: “Ē pexe rasi Jope anoxō ē Nios kīfiyanā oa namakē ōia keskara ē ōita. Ē ōita oa sabanā keskara nexeax nai mēranoax fotopakekafanaito a ē nia ano.

⁶ Askaito ē ōia a mēra yoinā fetsa fetsatapafo ikita askatari a xōchixaraifoya peyāfori ē ōita a mēra kechokomekē.

⁷ Askata mekaito ē nikaita ea yoikī iskafaito: ‘Pedro, fininākfāfe. Na fetsa retexō pixiki,’ ea faita.

⁸ Ea askafaito nikakī ē kemakī iskafaita: ‘Maa, Ifo. Moisés yoikī keni keskafakī, nāfo nō pitiroma. Nāskakē na yoināfo ē pimīsama,’ ē feita.

⁹ Ē askafaito afianā nai mēraxō iskafakī ea yoiaito ē nikaita: ‘Niospa yoia nāfo mī pitiroki. Pife, sharaki, chakafakīma,’ ea faito ē nikaita.

¹⁰ Ea yoikĩ tres fata, afianã nai mēra kaito ē ðita.

¹¹ Askaino Cesarea anoax feronãfake tres ekeki feitafo. Ato nĩchiafono ea fenai fekani. Mã fekanax pexe ano nokoitafo a ē ika ano.

¹² Nãskakē Niospa Yōshi Sharapa ea nĩchita iskafakĩ ea yoiyanã: ‘Shinãchakakĩma ato fe katãfe,’ ea feita. Nãskatari a Nios Ifofaafõ seis feronãfake efe foitafo. Nãskakē ato fe yora yamafiax Cornelio pexe mēra nõ ikitoshita.

¹³ Nãnoxõ noko Cornelio yoita a ãfe pexe anoxõ ãjiri õitaxakĩ iskafakĩ yoiaito: ‘Fatora fetsa pexe rasi Jope ano nĩchife Simõn ifitanõfo, ãfe ane fetsa Pedro.

¹⁴ Nãato mia yoi kiki afeskax Nios fe mĩ ipaxatiromãkĩ, mefe yorafo fe,’ ixõ Niospa yoitano Cornelio ea yoita,” Pedro ato fani.

¹⁵ “È ato yoiaino Niospa Yōshi Shara ato mēra naneita, taeyoi nõ mēra naneni keskai.

¹⁶ Nãskakē ē shinãfaita a nõko Ifãfe noko yoiyamea anori chanĩma. ‘Juan ato fãka maotisafani, akka Niospa ãfe Yōshi Shara mato mēra nanei,’ ixõ Jesús noko yoiyamea.

¹⁷ Epa Niospa ãfe Yōshi Shara ato mēra naneita a nõmēra naneni keskafakĩ, nõko Ifo Jesucristo nõ chanĩmara faito. Akka ē, ‘Mĩ Yōshi Shara ato mēra naneyamafe,’ ē Nios fatiroma,” ixõ Pedro ato yoini.

¹⁸ Ato askafaito nikakani a Nios Ifofamisfo Jerusalén anoax anã tsoa tooxinima, Nioskiroko inimanifo. Iskafakĩ yoinifo: “Aicho, Nios fãsi sharakõi, nã noko inãni keskafakĩ, ãfe Yōshi Shara ato mēra nanea, a nikakõisharakanax afe ìpaxanõfo,” ixõ yoinifo.

Antioquia anoafãfe Jesús Ifofanifo

¹⁹ Mã Esteban reteitafono a Jesús Ifofamisfo ato omiskõimakĩ taefanifo. Ato askafaifono ranãri Fenicia ari ichonifo, ranãri Chipre ari fonifo, ranãri Antioquia ari fonifo. Nãrixõ judeofo Jesúsnoa meka shara ato yoinifo. Yora fetsafo ato yoinifoma, judeofofo ato yoinifo.

²⁰ Ato askafaifono a Nios Ifofamisfo Chipre anoax fekãta Cirene anoaxri fenifo pexe rasi Antioquia ano. Mã fēkaxõ a judeofoma nõko Ifo Jesúsnoa meka shara ato yoinifo.

²¹ Nõko Ifãfe ãfe Yōshi Shara ato fe ikano, a ãto xinifãfe ato yoipaonifo shinãmakikãta nõko Ifo chanĩmara fakõinifo.

²² Askaifono a Jesús Ifofamisfãfe Jerusalén anoxõ ato nikanifo. Nãskakē Bernabé Antioquia ano nĩchinifo.

²³ Mã Bernabé nokoxõ õia Niospa ato imasharakõia õitoshini. Askaifãfe õikĩ Bernabé inimasharakõini. Nãskaxõ ato yoisharakõini shinãsharakõixõ. “Isharakõixõ nõko Ifo nikasharakõikãfe,” ato fani.

²⁴ Akka Bernabé feronãfake sharakõi ini. Niospa Yōshi Shara ãfe õiti mēra nanea, Jesús chanĩmara fakõina. Nãskakē yorafãfe aõxõ nõko Ifo Jesús chanĩmara fakõinifo.

²⁵ Mã askata Bernabé Tarso ano kani Saulo fenaikai. Mã fichixõ Antioquia ano iyoni.

²⁶ Nãrixõ a Nios Ifofaafõ feta xinia fisti ani, yora ichapafo ato tãpimayanã. Antioquia anoxõ taefakĩ ato anenifo a Jesús Ifofaafõ. “Cristianõra,” ato fanifo.

²⁷ Askaifono a Niospa ato shinãmanaino Niosnoa ato yoipaonifo nãfo Jerusalén anoax Antioquia ano fonifo.

²⁸ Mã fokaxõ fishtichi niinãkafãxõ ato yoini ãfe ane Agabo, Niospa Yōshi Sharapa shinãmanaino, “Nã maitio anoax fonãiki finakõixikanira,” ixõ ato yoini. Akka chanĩma, askakõini Claudio xanifo ikano.

²⁹ Nãskakē a Nios Ifofaafãfe Antioquia anoxõ shinãnifo a Nios Ifofaa fetsafo Judea anoax ato kori manamaxikakĩ, afe tii ato fomakanimãkai.

³⁰ Nãskakaxõ Bernabé yafi Saulo inãnifo ato foxotanõfo. Nãno a Jesús Ifofamisfo Judea ano xanifofo ikafo inifo. Nãfo ato kori inãnifo ato paxkaketsaxonõfo.

12

Santiago retekãta Pedro karaxa mēra ikimanifo

¹ Nãskaino Herodes xanifãfe a Jesús Ifofamisfo atiri ato achixõ karaxa mēra ato ikimani ato omiskõimayanã.

² Nãskata Herodes ato yoini Santiago retenõfo kenopa. Nã Santiago Juan fe nanea ini.

³ Mã Herodes Santiago ato retemanano õikani judeofo akiki inimanifo. Askafaifãfe õikĩ Herodes ãfe inafõ yoini Pedrori achinõfo. Nãato askafanifo fistafia pãa faraxaxoma piyanã.

⁴ Mã Pedro achiafono Herodes Pedro karaxa mēra ikimani. Nãnoxõ dieciseis sorarofãfe kexenifo. Herodes shinãni: “Mã fista senẽano chipo ē Pedro kãimanõ yorafãfe õinõfo,” ixõ shinãni.

⁵ Nãskakē Pedro karaxa mēra ini, sorarofãfe kexekõiafono. Askafafiafono a Jesús Ifofamisfãfe Epa Nios kifixonifo Niospa kexesharakõinõ.

Niospa Pedro kãimani karaxa mēranoa

⁶ Nā fakish fistichi Herodes shināni: “Ē penama Pedro kāimanikai yorafāfe ōinōfo,” ixō, akka karaxa mēranoax Pedro oxani soraro rafe fe cadenānā takai rafe metexkere ikax. Nāskaino atiri sorarofāfe karaxa fepoti anoxō kexeshinifo.

⁷ Nāskaino nōko Ifāfe āfe ājiri akiki nokorisatani. Karaxa mēra fakishfiax penasharakōi ītani. Nāskaxō ājirinī Pedro mōini ramāyanā iskafakī yoini: “Fininākfāfe kataxiki,” faino koshikōi Pedro mifi inoax cadenās mepekemetani.

⁸ Nāskafata ājirinī yoini iskafakī: “Mī rapati yafi mī sapato safefe,” faito nikakī Pedro koshi āfe rapati yafi āfe sapato safeni. Nāskaxō ājirinī anā yoini: “Mī tariri safefe efe kaxiki,” fani.

⁹ Nāskafaino Pedro ājiri acho kani. Acho kakī shināpaina: “ĶChanīmamē mā ea ājirinī kāimanamē? Akka ē namakē ōiafai keskara ē ōi,” ixō shināpaina.

¹⁰ Nāskax ājiri fe kakī a soraro kexei taea finōfaini. A fetsari kexea finōfaini. Nāskax nā fepoti firo ano nokoxō ōia, mā fepoti āakōi fepekemea ini. Nāskax ājiri fe mā tsekeano fāi kaax ājiri a makinoax yamarisatani.

¹¹ Nāskafaito ōikī Pedro tāpini. Nāskaxō shināni iskafakī: “Chanīma, mē ōi ēfe Ifāfe āfe ājiri nīchia. Herodes feta judeofāfe ea retepaiyaifono ea kāimana,” ixō shināni.

¹² Mā tāpiax Pedro María pexe ano kani, Juan āfe afa ano. Nā Juan āfe ane fetsa Marcos ipaoni. Nā María pexe anoxō yora ichapafāfe ichanākaxō Epa Nios kīfiaifono Pedro kani.

¹³ Mā kaxō pexe fepoti anoxō ato kenaino, nā xomayato María yonoxomis āfe ane Rode, nāato kaxō ōini tsoamāki.

¹⁴ Mā Pedro āfe meka tāpikāta, inimakōiyanā pexe fepoti fēpexotama ato yoikai ichoni. “Mā Pedro oa. Na pexe fepoti ano nia,” ato fani.

¹⁵ Ato askafaito tsōa chanīmara fanima. Iskafainifo: “Mī chanī, Pedrokai oama,” faifono, “Maa, mē Pedro āfe meka nikakōia,” ato fani. Ato askafaino iskafakī yoinifo: “Aamaki, āfe ājiriki,” fainifo.

¹⁶ Askafaiifono Pedro pexe fepoti anoxō mēxotaima ato kenani. Mā fēkaxō fepoti fepekaxō Pedro fichikanax ratenifo.

¹⁷ Askaifāfe ōikī Pedro āfe mēkemā mekayamakāfe ato fani. Nāskaxō ato yoini afesaxō nōko Ifāfe karaxa mēranoa kāimanamākī. Nāskata anā ato yoini iskafakī: “Santiago yafi a Nios Ifofamisfo ato yoitakāfe,” ato fani. Ato askafakī yoita pexe fetsa ari kani.

¹⁸ Akka mā penano anoa Pedro ōikanima sorarofo yoinānifo, tāpikanamax Pedro afeskamē ikanax.

¹⁹ Mā kāikaina nikaxō, Herodes ato fenamani, “Akka mā fenafikāki fichiyamaifono mā kexesharamaki,” ixō Herodes, “Nā sorarofo retekāfe,” ato fani. Ato askafata Herodes Judea anoax kani Cesarea ari ikikai.

Herodes nani

²⁰ Herodes atoki ōitifishkini Tiro pexe rasi anoafō yafi Sidón pexe rasi anoafoki. Atoki ōitifishkikaino Tiro anoa feta Sidón anoafāfe shinānifo Herodes yōkaifoxikakī anā atoki ōitifishkiyamanō. Nāskakaxō xanīfo Blasto yoinifo: “Noko Herodes yoixōfe nō afe meka-paikai. Nokoki ōitifishkiki kiki, nō afe rafepaisharaikai anā nokoki ōitifishkiyamanō. Nokoki ōitifishkiki afe yorafo yoitiroki a nō piyai noko inānōfoma,” ixō Tiro anoafō feta Sidón anoafāfe Blasto yoiāifono. Nā yoiāifo keskafakī Blasto Herodes yoini.

²¹ Askafaito nikakī, “Pena fetsa ē ato fe mekanō,” fani. Nāskata pena fetsa mā akiki feaifono, rapati sharakōi nā xanīfāfe safemis keskara safeax tsaoti sharakōi ano tsaoni, anoxō ato yoixiki.

²² Ato yoikī askafaino fāsikōi yorafo mekainīfōfānifo. Iskafakī yoinifo: “Na mekai yora mekaima, nios mekai,” fainifo.

²³ Askafaiifono nōko Ifāfe āfe ājirinī Herodes isinī imani, “Ē Niosma. Nios sharakōi,” ato fainano. Nāskax Herodes nani xenafāfe xaki mēraxō piaino.

²⁴ Askano Niospa meka shara Jesúsnoa ato yoifofāsafainifo akairi Niospa meka shara nikakaxō chanīmara fanōfo.

²⁵ Nāskafaiifono Bernabé feta Saulo mā yonokī mitokanax Jerusalén anoax fonifo, Antioquia ano. Juanri ato fe kani, āfe ane fetsa Marcos ini.

13

Bernabé feta Saulo Niospa meka ato yoikī taefanifo

¹ Antioquia ano Jesús Ifofamisfo inifo, a Niosnoa ato yoipaonifori ano ato fe inifo. A Jesús Ifofaax afeskax isharatirofomākī ixō ato tāpimamisfōri ano ato fe inifo. Bernabé ikaino, Simón āfe ane fetsa Nā Fisora fapaonifo ikaino, Lucio a Cirene anoa ikaino, Manaén xanīfo Herodes fe yosini ikaino, nā Saulori ato fe ini.

² Akka pena fetsa fonī teneyanā nōko Ifo kīfiaifono Epa Niospa Yōshi Sharapa ato yoini iskafakī: “Bernabé yafi Saulo ato paxkanāfakāfe ē ato katoaki eōxō yononōfo,” ato fani.

³ Nāskata foni teneyanā mā Epa Nios kīfikaxō Bernabé yafi Saulo ato mīfi māmākaxō Epa Nios ato kīfixoyanā, ato nīchinifo fetsafo ari fokaxō Epa Niospa meka shara ato yoitanōfo.

Bernabé fe Saulo Chipre ano fonifo

⁴ Mā Niospa Yōshi Shara pa ato nīchia fokanax Bernabé fe Saulo Seleucia ano fonifo. Nānoax kanōanāfānē nanefainifo Chipre ano fokani. Nā īamāfā fakafā nakirafe mai toomāfā ano fokani.

⁵ Mā fokanax pe xe rasi Salamina ano nokokaxō judeofāfe āto ichanāti pe xe mēraxō Niospa meka sharaōnoa ato yoikī taefanifo. Juanri ato fe kani afara fetsa ato axoxii.

⁶ Nā īamāfā nakirafe mai toomāfā ano ato yoikāta, Pafos ano fonifo. Nānoa judeo yōfe fichinifo āfe ane Barjesús. Nā chanīkōi ipaoni ē Niosxō yoirā iki.

⁷ Nā yōfe Barjesús xanīfo Sergio Paulo fe ipaoni. Nā xanīfāfe tāpisharakōia ini. Nāskaxō Bernabé yafi Saulo kenamani, Niospa meka shara nikapaikōiki.

⁸ Akka nā yōfemā āfe ane fetsa griego meka pa Elimas fapaonifo. Nāato āfe xanīfo yoini: “Ato nikayamafe mia pārakani kiki,” fani, ea nikanōra ixō.

⁹ Nāskakē Saulo āfe ane fetsa Pablo ini. Niospa Yōshi Shara a mēra nanekōia. Nāato aas ōini.

¹⁰ Nāskaxō yoini iskafakī: “Chanīchakapa nīafaka fake, nā sharafo mī noikaspamis. Mī chanīmis ato pārapiyanā nōko Ifāfe mēstekōi ato yoifimisno, akka anorima mī ato yoimis. ¿Afsakai mī xateimamē?”

¹¹ Akka iskaratīa nōko Ifāfe mia omiskōimani. Mī anā fēro ōima, xinī chaxafiaino mī anā fena ōiyonakama,” fani.

Askafaino Elimas anā fēro ōinima. Fakish mēra nia keskara ini. Askaxō ato kenani mētsoxō iyoifonōfo anā fēro ōiyamaito.

¹² Nāskaito ōikī xanīfāfe nōko Ifo chanīmara fani. “Airā, Jesús afama mīshti fatiro,” ixō yoifino.

Pablo fe Bernabé Antioquía ano inifo. Nā Antioquía Pisidia mai ano ini

¹³ Pablo afe rafeafo fe Pafos anoax kanōanāfānē nanefainifo pe xe rasi Perge ano fokani. Nā Perge Panfilia mai ano ini. Nānoax Juan anā ato fe kanima. Nāno nēteax anā oni, Jerusalén ano.

¹⁴ Nā Perge anoaxō Antioquía finōfainifo, Antioquía anoaxō shinā Pisidia chaima ini. Nāriax pena tenetitīa ichanāti pe xe mēra ikifaikanax tsaonifo.

¹⁵ A Moisés Niospa meka yoikī kirikaki keneni yafi a Niospa ato shināmanaino yoipaonifo keskara anekāta, a ichanāti pe xe kexemisfo xanīfōfāfe Pablo yafi Bernabé ato yoini iskafakakī: “Nōko kaifo rafeta mā noko afara yoipaimākai noko yoikāfe, noko inimaxikakī,” ixō ato yoifino.

¹⁶ Ato askafaifono Pablo niinākafā atokiri mēshainākafā mekayamakāfe ato fani. Nāskaxō ato yoini iskafakī: “Ea nikakāfe ēfe kaifo israelifāfe yora fetsafo feta mā nofeta Epa Nios kīfipaimākai ē mato yoisharanō.

¹⁷ Israelifāfe āto Niospa taefakī nōko xinifo katoni afe yora inōfo. Nāskakē Egipto anoax kainifo yora fetsafo mēra iyokanax Egipto mai anoax. Nāskakē chipo Epa Niospa āfe kere xsharaōxō Egipto ano ato yoini.

¹⁸ Nāskakē Niospa meka tsōa nikasharayamafiaifono, Niospa ato kexepaoni cuarenta xinia tsōa istoma anoaxō.

¹⁹ Nāskata Niospa Canaán mai anoaxō siete faxō mani fetsafo ato potani, nōko xinifo a mai ato ināxiki.

²⁰ Nāskakē cuatrocientos cincuenta xinia ayonifo. Fena Canaán mai ano fonifoma. Mā cuatrocientos cincuenta xinia finōta xanīfoya inōfo Niospa ato yoini.

“Nāskatari chipo nā Niospa meka ato yoimisri Samuel xanīfo ini.

²¹ Nāskakē, ‘Xanīfo finakōia nō fichipai noko ikinō,’ ixō yoifino. Nāskakē Niospa Saúl cuarenta xinia imani xanīfokī. Akka nā Saúl āfe apa Cis ini, Benjamín āfe kaifo.

²² Nāskata Epa Niospa Saúl tsekani anā xanīfo iyamanō. Akka Epa Niospa David xanīfo inō imani. Nāskaxō yoini iskafakī: ‘Isaī āfe fāke David mā ea inimamakōi nā ē apaiyai keskafakī nāato akōini,’ ixō yoini.

²³ Nā David āfe fena ini Jesús. Epa Niospa nai mēraxō nāmā nīchini israelifo ato ifipakexanō nā yoiyoni keskafakī.

²⁴ Askatari Jesús oyoamano israelifo Juan Jesúsnoa meka shara ato yoini iskafakī: ‘Māto chaka xatexō Nios Ifokakāfe maotisaxakakī fetsafāfe tāpinōfo mā māto chaka mā xateano,’ ixō ato yoini.

²⁵ Askata mā Juan chaima nakī, ato yoini: ‘¿Mā shināimē ē Cristokē? Maa, ēkai aama. Akka a Cristo samama oi a nō manai nōko xanīfo ikiyoi. Akai ea keskarama. Ato afama mīshti tāpia. Atokai afaa chakafamisma,’ ixō ato yoini.

²⁶ “Ēfe kaifo mīštichi, māfi Abraham fenafokī, ea nikakapo a ěfe kaifomafo feta ě matō yoinō. Māfi Epa Nios chanīmara fapaikai. Nā meka sharaōnoa nikakāfe Epa Niospa āfe Fake nīchiniki noko ifipakexanō.

²⁷ Nā Jerusalén ano ikafāfe āto xanīfofo feta tāpinifoma Jesús tsoamāki. A inōpokoai yoikī aōnoa kirika keneni fori tsōa tāpiyameama, pena tenetiŭa ichanāti pexe mēraxō anefikakī. Nāskakaxō reteyameafo nā aōnoa yoikī keneni fofo keskakōifakī.

²⁸ Afaa chakafaito ōiyamafikakī retepaikakī. ‘Ato retemafe,’ yorafāfe Pilato fanifo.

²⁹ Nāskakē nā aōnoa yoikī kirika keneni fofo keskakōifakī, mā askafayameafo retexaxō ifi cruz ikakinoa fotomapakefofākaxō mafa kini mēra maifanifo.

³⁰ Akka mā mafa kini mēra maifafafono Epa Niospa otofayamea.

³¹ Mā oxa ranāta a Galilea anoax Jerusalén ano afe foitafāfe atoki nokoaito ōiyameafo. Nāfāfe judeofo Jesúsnoa ato yoikani.

³²⁻³³ “Nāskakē na meka shara aōnoa nō matō yoi, Epa Niospa nōko xinifo yoini keskakakī. Mā noko askafaxokōia nō āto fenafokē. Nāskakē Epa Niospa mā retefitafono Jesús otoayamea. A kirika Salmo ano kenea iskai:

Mī ěfe Fake. Iskaratīa ě mia nima,

ixō keneni fofo.

³⁴ Niospa afetiama yoiyoni iskafakī:

Mī nafiano ě mia otofaxii mī yora pisiyamanō,

ixō yoinino, nānorikōi aōnoa kirika keneni fofo:

Chanīma, nā ě David yoini keskakakī ě mia sharafai,

ixō Niospa yoini.

³⁵ Nāskakē ana aōnoa yoikī yōra keneni iskafakī:

Epa Niosi, mī Fake mī kexesharai āfe yora pisinōma,

ixō keneni.

³⁶ Chanīma, David nayoxoma ato īkiyopaoni, Niospa yoiaino. Nāskax chipo nani āfe xinifo nāpa keskai, nā āfe xinifo mai anori David maifanifo. Anoax āfe yora pisini.

³⁷ Akka Jesús mā nafiakē Epa Niospa otoani. Ato āfe yora pisinima.

³⁸⁻³⁹ Efe yora mīštichi, mā nō matō yois mīari tāpisharakāfe, māto chaka mā soapaimākai Jesúsxō mā atiro. Mā chanīmara faito aōxō Epa Niospa matō chaka soaxotiro. Akka a Moisés noko yoinioxōkai nōko chaka nō soatiroma.

⁴⁰ Kexemesharakāfe a inōpokoai yoikī Niospa meka yois mīfāfe keneni fofo keskai mā askatiroki. Iskafakī yoini fofo:

⁴¹ Akka ě yoiaito mā ea nikakaspai, ekeki kaxemetsamayanā. Nāskakē ě afarafo akaito ōiax rateyanā mā nai iskarafō nō ōimisma ikax. Nāskakē mā chanīmara famisma, fetsafāfe matō yoifiaifono,

ixō keneni fofo,” ixō Pablo ato yoini.

⁴² Mā Pablo afe rafeafo fe judeofāfe āto ichanāti pexe mēranoax tsekefainaifono, nā judeofofāfema ato iskafanifo: “Mā noko yoia keskakakī pena teneti fetsatīa noko anā yoifaixakāfe,” ixō ato yoini fofo.

⁴³ Mā ichanāti pexe anoax ichanāi xateafono, judeofo feta yora fetsafāfe a Epa Nios Ifofafo keskakakī akairi Epa Nios Ifofapaikani ato fe fonifo, Pablo fe Bernabé foaifono. ato fe foaifono ato iskafanifo: “Nofe yora mīštichi, Niospa matō yoi ai anori tāpisharakāfe. Niospa matō afara sharafaxōfai keskara shinākāfe inimayanā,” ato fanifo.

⁴⁴ Nāskata afianā pena fetsa pena tenetiŭa, pexe rasi anoax yora ichapakōifo ichanānifo nōko Ifāfe āfe meka shara nikakani.

⁴⁵ Nāskaifono judeofāfe ato ōinifo yorafā rasichi Pablo yafi Bernabé ato nikaifono. Nāskakē ōitifishkikōinifo. Nāskaifono judeofo Pabloki ōitifishkiyanā mekakakī chakafayanā ichanifo.

⁴⁶ Ato askafaifono Pablo feta Bernabé mesetama ato kemanifo ato iskafakakī: “Nō matō Niospa meka sharaōnoa yoikī taefafiaino, mā nikakaspamis. Nikakaspaxkai mā Epa Nios fe īpanakama. Nāskakē nā judeofoma nō ato yoikai.

⁴⁷ Nāskakē nōko Ifāfe noko nūchini iskafakī yoianā:

Ē matō nīchi oa luzpa keyokōi chaxa keskara faxō, eōnoa mā ato yoifotanō, efe īpaxanōfo. Maifo tii ano a chai ikafo ari kaxō mā ato yoitanō,”

ixō noko nīchini.

⁴⁸ Ato askafaifono nikakani, a judeofoma inimakōinifo. Nāskaxō yoinifo iskafakakī: “Nōko Ifāfe āfe meka sharakōi,” fanifo. Nāfāfe chanīmara fakōinifo a Niospa ato katoafo afe ipanakafora ikaxō.

⁴⁹ Nāskakē nā mai anoafo, nōko Ifāfe āfe meka sharaōnoa ato yoifofāsafanifo.

⁵⁰ Ato askafaifono judeofo nā kērofo isharakōimiso fe mekanifo, a pexe rasi anoax xanīfofo feri inifo. Nāskakaxō ato yoinifo Pablo yafi Bernabé ato chakafakī ato omiskōimata a mai anoxō ato potanōfo.

⁵¹ Ato askafafono Pablo feta Bernabé āto sapatō tsekakaxō taatakanifo yorafāfe ato tāpinōfo. Nāskanax Pablo fe Bernabé Iconio ari fonifo.

⁵² Akka nā Nios Ifofaafō inimakōinifo, Epa Niospa Yōshi Shara ato fe ikano, mā Pablo fe Bernabé foaifono.

14

Pablo fe Bernabé Iconio ano inifo

¹ Mā fokanax Pablo fe Bernabé Iconio ano nokonifo. Nānoax judeofāfe ichanāti pexe mēra ikifainifo. Nānoxō Niospa meka sharaōnoa ato yoiaifono ato nikakōisharayanā ato chanīmara fanifo, judeofāfe yora fetsafo feta.

² Askaifono judeofāfe ato nikakaspakakī, a judeofoma ato yoinifo iskafakakī: “Ato nikayamakāfe āa chanīkani kiki,” ato fanifo Pablo yafi Bernabé nikanōfoma.

³ Ato askafafaiifono Pablo fe Bernabé nāno ato fe iyopaonifo. Nānoxō nōko Ifoōxō mesetamakōi ato yoipaonifo. “Nōko Ifāfe noko chaka soaxotiro Nios fe nō Īpaxanō,” ixō ato yoinifo. Nāskaxō afama mīshtifo fakakī ato ispanifo. Askafaiifono Niospa ato noikī ato ōimani aōxō ato yoinōfo.

⁴ Akka yorafāfe pexe rasi Iconio anoxō anoris shinānifoma. Ranārito judeofo chanīmara faifono, ranāritori Pablo yafi Bernabé chanīmara fanifo.

⁵ Nāskaiifono judeofo yora fetsafo fe xanīfofo fe yoinānifo, Pablo yafi Bernabé ato tokirinī tsakakī omiskōimaxikakī.

⁶⁻⁷ Ato askafapaiyaifono Pablo feta Bernabé mā tāpikanax Iconio anoax Listra ano fonifo, nānoax Derbe ano fonifo. Nā pexe rasi Listra fe Derbe Licaonia mai ano ini. Nāskakē nānoafo Niospa meka sharaōnoa ato yoifofāsafanifo.

Listra anoxō tokirinī Pablo tsakaketsanifo

⁸ Listra ano feronāfake finimisma ika ini, kafāsamisma chatomāiax. Nāskarapa kāini tsoaia ini.

⁹ Pablo yoiaito nikai. Nāskaito Pablo aas ōikī shināni na feronāfake Jesús sharafatiroraka chanīmara faito ixō shināni.

¹⁰ Nāskaxō fāsikōi yoini iskafakī: “Fininākafāfe,” faino, koshikōi fininākafānax kafāsani.

¹¹ Pablo askafaito ōikani, yorafo Licaonia mekapa mekanifo iskakani: “Aicho, na nios rafe nokoki fotoaki yora keskarakanax,” ikanax yoinānifo.

¹² Nāskakaxō Bernabé na nōko nios Zeus fakaxō, Pablōri ato yoiaito, “Na nōko nioskōi Hermes,” fanifo.

¹³ Zeus kīfiti pexeya ini pexe rasi chaima, pexe efapa ini. Nā mēraxō na nōko niosra ikaxō Nioskōima kīfipaonifo. Nā pexe mēra yonomisto Pablo yafi Bernabé shināmaxō fakkafoya charofo fexonifo. Nāfāfe yorafo feta mā niosra ixō ato fakka retexopainifo ato ināixakakī.

¹⁴ Akka ato askafaiifono Bernabé feta Pablo mā tāpikaxō, āto rapati faxtenifo, ato niosra faifono ato ōiti mēraxō shinākōikakī. Nāskakaxō ato mēra ikifaikata fāsikōi ato yoinifo

¹⁵ iskafakakī: “¿Afesfakakī mā noko na rafe niosra mā noko faimē? Nōkai niosma. Nōri mato keskara, nō mato meka shara yoioi oia na afarafo nōko niosra mā famis a chakafo mā potanō a chakafokai afama. Nāskaxō nā Nioskōi nīpanaka Ifokōi fakāfe, nai yafi mai fakafāri onifaniki. Nai mēranoafo onifata, nono mai anoafo onifata fakafāri mēranoafo onifani.

¹⁶ Nā iyopaonifāfe afara chakafakī xateafomano Epa Niospa ato xatemanima āa anōfo.

¹⁷ Nāskafaiifono Niosxō afarafo sharafakakī ato ōimanifo, tāpinōfo Nios tsoamāki. Akka nāto mato oi imaxona, māto fanafori mato fofaimasharaxona, a mā piari mato ināsharataifa, mā inimasharakōinō,” Pablo feta Bernabé ato fani.

¹⁸ Ato askafakī yoifkakī ato xatematiroma inifo, ato fakka retexopaiyaifono nōko niosra ixō ato ināpaikakī.

¹⁹ Ato askafaiifono judeofo Antioquā anoax fekāta Iconio anoax fenifo. Ato pārai fekani, “Pablo feta Bernabé mato pārakani,” ixō ato yoinifo. Ato askafaiifono Pablo tokirinī tsakaketsanifo. Mā nō reteaia ikaxō xarafokaxō pexe rasi pasotai potanifo.

²⁰ Askafaiifono a Jesús Ifofaafō a mānāo niakekaxō ōiaifono Pablo fininākafani. Askata finikaini pexe rasi mēra anā kani. Nāskata nānoax pena fetsa Bernabé fe Derbe ano kani.

²¹ Derbe anoxō Niospa meka sharaōnoa ato yoiaifono yōrafā rasichi ato nikakaxō Nios Ifofasharakōinifo. Mā ato yoikanax Listra ano fenifo, nānoax Iconio ano fenifo, nānoax Antioquā ano nokonifo.

²² Nāriafo a Nios Ifofaafō ato yoifofāsafakakī ato inimamakōinifo, “Isharakōikāfe Nios nikakōisharayanā. Epa Nios xanīfo fe ipaxakakī, nai mēra oyoamano nono mai anoax mā omiskōi finakōitiro,” ixō ato yoinifo.

²³ Nāskatari Pablo feta Bernabé a Nios Ifofaafu anoafu a ato kexeaifo xanīfofo katonifo, Nios chanīmara fakōinafono. Mā foni teneyanā Epa Nios kifīkaxō iskafakakī: “Epa Niospa, ato kexesharafe mia chanīmara fakani kiki,” ixō yoinifo.

Pablo fe Bernabé anā Antioquia ano fenifo nā Antioquia Siria mai ano ini

²⁴ Mā anoax fokakī Pisidia finōfāikanax Panfilia ano nokonifo.

²⁵ Nāskakata Perge anoxō Niospa meka sharaōnoa ato yoikata, Atalia ano fonifo.

²⁶ Nānoax kanōanāfānē fonifo Antioquia ano anā fokani. Nā Antioquia anoxō ato nīchinifo. “Niosnoax fokaxō ato yoisharatakāfe,” ixō ato nīchiyameafono ato yoitakani anā fenifo.

²⁷ Mā Antioquia ano nokoafono a Jesús Ifofamisfo ato fe ichanāfono anoxō ato yoinifo a Niospa ato feta afama mīshti aka keskara. Iskafakī ato yoinifo: “Nōko Ifāfe a judeofoma ato chanīmara famaino mā Ifofaafu,” ixō ato yoinifo.

²⁸ Nāskakanax Pablo fe Bernabé nā Nios Ifofaafu fe nāno ato fe iyopaonifo.

15

Jerusalén anoax a Jesús Ifofaafu ichanānifo

¹ Nāskaifono feronāfakēfo Judea anoax Antioquia ano fonifo. Mā nokokaxō a Jesús Ifofamisfo ato yoinifo iskafakakī: “Moisés noko yoini iskafakī: ‘Foshki repa xateyamax nō Nios ano katiroma,’ ixō noko yoini. Nāskakē nā Moisés noko yoini keskaī nō askamis,” ixō ato yoinifo.

² Ato askafaiifāfe nikakī Pablo feta Bernabé, “Maa, askarakaima. Fanīrira mā yoi,” ato fakanax ato fe feratenānifo. Ato askafaiifono Pablo yafi Bernabé a Jesús Ifofamisfo fetsafori ato katokaxō Jerusalén ari ato nīchinifo a Jesúsxō āfe meka ato yoimisfoya a Nios Ifofaafu ato kexemisfo ato yōkatanōfo chanīmamakī.

³ Nā Nios Ifofaafāfe Antioquia anoxō ato nīchiafo fokakī, Finicia yafi Samāria finōfāikakī ato yoifainifo: “A judeofōfāfema Nios Ifofakakī mā āto chaka xateafora,” ixō ato yoiainifo nīkakani a Nios Ifofaafu inimakōinifo.

⁴ Mā Pablo fe Bernabé Jerusalén ano nokoafono, a Jesús Ifofaafu feta a Jesúsxō āfe meka yoimisfo feta a ato kexemisfofāferi ato ifinifo, ato iskafayanā: “Aicho, mā nokoki osharakī,” ixō ato yoiyanā. Ato askafaiifono anoxō ato yoinifo a Niosxō afama mīshtifofamisfo.

⁵ Ato askafaiifono nikaxō fariseofāfe Jesús Ifofakaxō ato iskafainifo: “Judeo yamafīkaxō Nios Ifofakaxō āto foshki repa xatetirofo Moisés yoini keskafakī,” ixō ato yoinifo.

⁶ Nāskaifono a Jesúsxō āfe meka ato yoimisfo fe ato kexemisfo fe ichanānifo tāpīxikakī a yoiainifo keskara.

⁷ Mā ichapa yoināfono Pedro finināfakā ato yoini iskafakī: “Efe yora mīshtichi, mā mā ea tāpia afetīama Niospa ea katonī, mato mēranoa āfe meka shara a judeofoma ē ato yoinō, akairi chanīmara fakanax afe īpaxanōfo.

⁸ Niospa a shināifo keskara tāpīkōia. Nāato ato tāpimani afe yora inōfo. Nāskaxō āfe Yōshi Shara ato mēra nanei, a nōmēra naneni keskafakī. Nāskakē keyokōichi tāpītirofo Niospa ato ifiaito.

⁹ Niospa atoya yora fetsa keskara noko ōima, nā yora fisti keskara noko ōi. Nā noko ani keskafakī āto chakari mā ato soaxona chanīmara faifono.

¹⁰ Akka māto xinīfāfe a Moisés yoini keskara nikakōīpaonīfoma. Nāskarīfiakī māri mā nikakōīmīma. Akka a Moisés yoini keskara nikakōīyamafīkatsaxakī, ŷafeskakī a judeofoma Jesús Ifofafīafono a Moisés yoini keskara nikakōīkāfe mā ato famīmē? Nāskakē afāferi nikakōītirofoma. Akka Jesús fistichi noko nīmafītirono, ŷafeskakī mā chanīmara faimamē?

¹¹ Akka Moisés yoini keskarato noko nīmatirora ixō mā shināmis. Akka nōko Ifo Jesús nō chanīmara faito, noko noikōixō noko ifītiro afe nō īpaxanō. Nāskarīfiakī a judeofoma ato ifītiro chanīmara faifono,” ixō Pedro ato yoini.

¹² Nāskakē anā tsoa tooxinīma, ato nīkakani. Akka Pablo feta Bernabé ato yoinifo a Niospa atoōxō afama mīshtifo faa, judeofoma mēraxō.

¹³ Mā yoikī xateafono, Santiagori ato yoini iskafakī: “Efe yora mīshtichi, eari nīkakapo ē mato yoinō.

¹⁴ Simón Pedro noko yoiyamea Epa Niospa a judeofoma ato noikī mā ato katoa āfe yorafo inōfo ixō noko yoiyamea.

¹⁵ Nānorikōi a inōpokoai yoikakī a Niosnoa yoimisfāfe kenenifo. Iskafakī yoinifo na kirika keneano:

¹⁶ Nāskata ē anā oxii a David āfe kaifāfe ea anā shinātama chaka shināifono, ato chaka soaxoxiki. Ato ōiti fepeaxosharayanā isharakōinōfo ea anā Ifofakanax.

¹⁷ Ea ōikakī fetsafāferi ea fenanōfo nā maitio ikafo feta nā ē ato katoafāfe ixō Epa Niospa yoini.

¹⁸ Nōko Ifāfe afetīama afama mīshti tāpīyoni,

ixō aōnoa yoikī kenenifo.

¹⁹ “Nāskakē ē shinākī iskafai, nōko kaifāfema Nios Ifofapaiyaifono nō ato afara fetsa kereckai amatiroma.

²⁰ Askatamaroko nō ato kirika kenexō fomanō iskafaki yoikī:

Na nōko niosra ikaxō afara onifakaxō nami ināfo piyamakāfe. Askatari māto āfima chotayamakāfe. Kēromāri āto fenemafo chotamayamanōfo. Askatari yoinā yafi afara inafakaxō tetoxakāfo āfe imi foyamaito piyamakāfe, āfe imiri ayayamakāfe, ixō nō ato kirika kenexō fomanō judeofoma.

²¹ Nā taeyoi ato yoipaonifo keskafakī, iskaratīari pexefo anoxō a Moisés ato yoipaoni keskafakī ato yoikani. Mēxotaima ichanāti pexe mēraxō pena tenetiā nā kirika anemisfo.”

A judeofoma ato kirika kenexō fomanifo

²² Nāskakata a Jesúsxō ato yoimisfāfe a ato kexemisfāferi a Nios Ifofaafāferi shinānifo a Nios Ifofaa fetsafo katōxikakī, Antioquía ano ato nīchixikakī Pablo fe Bernabé foaifono. Judas yafi Silas ifinifo, nā Judaspa āfe ane fetsa Barsabás ipaoni. Na feronāfake rafe isharakōiafo a Nios Ifofaafāfe ato fapaonifo.

²³ Nāskakaxō mā foaifono ato kirika keneni inānifo ato foxotanōfo, iskafakī ato yoikaxō:

Nōfi Jesúsxō āfe meka yoikatsaxakī, ato kexemisfo feta a Jesús Ifofafo nō mato kirika kenexō fomai, mā tāpinō. Efe yora mīstichi, mā nōko kaifoyamafekē nō mato meka shara fomai, Antioquía ano fomata Siria ano fomata Cilicia ano fomata nō mato fai.

²⁴ Mā nō tāpia yora fetsafo nonoax foitafo nō ato nīchiyamafiano, mā foitaxakakī mato yoikakī āto mekapa mato fekaxtefakani, fanīrira mato yoikakī nō ato anori yoiyamafekē fanīrira mato yoiifono mā ato tāpipai.

²⁵ Nāskakē ichanāxō nō shinā feronāfake fetsafo katōxiki noko anoax fokaxō mato ōitanōfo. A nō ato noiai Bernabé yafi Pablo nō katoa.

²⁶ Nā Bernabé feta Pablo nōko Ifo Jesucristoōnoa ato yoipaiifaifono ato retepaimisfo ato nikakaspakakī.

²⁷ Nāskakē Judas yafi Silas nō nīchia mā fokaxō mato yoisharakōinōfo nā nō mato kenexona keskafakī.

²⁸ Nā Niospa Yōshi Sharapa shināi keskafakī nānorikōi nō shināi. Afaa fetsa nō mato yoipaima. Akka nā sharafinakōia nō mato yoipai mā nikanō:

²⁹ Na nōko niosra ikaxō afara onifakaxō yoinā retexō ināfo piyamakāfe. Askatari āfe imi ayayamakāfe. Yoinā ina fakaxō tetoxakāfo āfe imi foyamaito piyamakāfe. Askatari māto āfima chotayamakāfe, kērofāferi āto fenema chotamayamanōfo. Akka nā nō mato yoiiai anori mā nikasharakōiax, mā isharakōikai. Nā tii nō mato yoi nā kirikaki kenexō, ixō ato yoinifo.

³⁰ Nāskakaxō Jerusalén anoxō ato nīchiafono Antioquía ano fonifo. Mā fokaxō a Nios Ifofafo ato ichanāfakaxō kirika kenea ato inānifo.

³¹ A Nios Ifofaafāfe kirika anexō ōikani, inimaifinakōinifo, “Aicho, noko kirika kenexō manamakakī noko inimamasharakōikani,” ikanax.

³² Judas yafi Silas Niospa ato shināmanaino Niospa meka tāpikaxō Niosnoa meka shara ato yoikakī ato inimakōiyanā ato nikamasharakōinifo āto mekapa a Nios Ifofafo.

³³ Nā Antioquía ano ato fe iyopaonifo. Nāno ato fe ikafono nā Nios Ifofaafāfe ato nīchinifo iskafakī ato yoiyanā: “Tanaima fosharatakāfe,” ato faifono, tanaimakōi fosharakōinifo a anoxō ato nīchiameafo ano.

³⁴ Akka Silas anā Jerusalén ano kanima nāno ato fe nēteni. Judas fisti kani.

³⁵ Akka Pablo fe Bernabéri fonifoma, Antioquía ano nētenifo anoxō fetsafo feta nōko Ifoōnoa meka shara yoixikakī.

Pablo afitānā kani Jesúsnoa meka shara pexefo tii ari ato yoikai

³⁶ Mā askakāta Pablo Bernabé yoini iskafakī: “A Nios Ifofafo nō anā ato ōikanō fokāfe pexe rasi anoafo a nōko Ifoōnoa meka shara nō ato yoikī taefaniano afeskax ikafomāki.”

³⁷ Bernabé Juan iyopaini ato fe kanō, nā Juan āfe ane fetsa Marcos ipaoni.

³⁸ Akka Pablo iyokaspani. Nā Marcsmāi Panfilia anoax ato makinoax nēteyameano, ato feta yonokaspakī.

³⁹ Askai feratenākanax anoax paxkanāfainifo. Bernabé Marcos Chipre ano iyoikai kanōanāfānē nanekaini.

⁴⁰ Akka Pablo Silas ifini afe kaxiki, afeta Niospa meka shara ato yoi axiki. Askaito ōikakī a Jesús Ifofamisfāfe ato Nios kīfixonifo fosharakōitanōfo Niospa ato kexesharanō.

⁴¹ Mā fokakī Siria yafi Cilicia anoafō Jesúsnoa meka shara ato yoifofāsafanifo, a Nios Ifofaafāfe Jesúsnoa tāpisharakōinōfo inimasharaxikakī.

16

Timoteo ato fe kani Pablo feta Silaspa Niospa meka sharaḏnoa ato yoikai foaifono

¹ Pablo fe Silas pexe rasi Derbe ano nokonifo, nānoax Lистра ano fonifo. Nānoa Nios Ifofaa fetsa āfe ane Timoteo fichinifo. Āfe afa Judea kēro ini, Nios Ifofa, akka āfe apa griego ini.

² Nā Nios Ifofaafāfe Lистра anoxō Iconio anoafāferi, “Na Timoteo feronāfake sharakōira,” fanifo.

³ Pablo Timoteo iyopaini afe kanō. Akka iyoyoxoma āfe foshki repa xatemani, judeofāfe mekafayamanōfo, māmāi tāpikaxō Timoteo āfe apamāi griegokē.

⁴ Askata mā fokakī a pexe rasi anoafō a Jesús Ifofamisfo ato yoifainifo, nā Jesúsxō āfe meka yoimisfo feta, a Jesús Ifofamisfo ato kexemisfāfe Jerusalén anoxō ato yoitafo anori.

⁵ Ato yoiaifāfe nikakani a Jesús Ifofamisfāfe Jesús chanīmara fakī finasharakōinifo. Askatari a Jesús Ifofaifo ichapakōi kainifo pena tii.

Pablo namakē ōia keskara fani feronāfake Macedonia anoa

⁶ Akka Niospa Yōshi Sharapa, Asia mai ari ato nīchikaspani, arixō Jesúsnoa meka shara ato yoipaifiaifono. Nāskakē Frigia yafi Galacia finōfainifo.

⁷ Fokanax Misia mai xatea ano nokonifo. Nānoxō Bitinia ano fopaikakī shinānifo, ari fopaiyaifono Jesús āfe Yōshi Sharapa ato nīchikaspani.

⁸ Nāskakē Misia finōfaini fokanax Troas ano nokonifo.

⁹ Nānoxō Pablo fakishi namakē ōia fani, feronāfake Macedonia anoato nīxō yoikī iskafaito: “Nono Macedonia ano ofe noko tāpimaxiki,” ixō yoiaito ōini.

¹⁰ Nāskara ōixō Pablo ato yoini iskafakī: “Itipinīkāfe nō Macedonia ano kanō, Niospa ari noko nīchipai kiki arixō Jesúsnoa meka shara nō ato yoinō,” noko fani.

Pablo fe Silas Filipos ano inifo

¹¹ Nā Troas anoax nō kanōanāfānē nanekaini īamāfā nakirafe mai toomāfā ano kai āfe ane Samotracia ano. Nānoax kaax pena fetsa Neápolis ano nō nokoni.

¹² Nānoax nō anā kani Filipos ano. Nā Filipos ano romanō xanīfokōifo ipaonifo nānoa āto pexe rasi sharafinakōia ini, nā Macedonia mai ano. Nāno nō oxa ranāyoni.

¹³ Nānoax pena tenetiāfi pexe rasi anoax nō tsekekainikax faka ketokonō nō kani, nō shinā anoxō judeofāfe Nios kīfikanira ixō. Nāno tsoaxō Niosnoa meka shara kērofo nō yoini ano ichanāfono.

¹⁴ Nānoa fetsa āfe ane Lidia ini pexe rasi Tiatira ano. Nā kēromā sama fexta nana sharakōi sharaito ōikī nōko Ifāfe āfe ōiti fepeaxosharakōini.

¹⁵ Nāskaito ōikī afe yorafoya maotisafanifo faka mēra ikimakī. Nāskaxō noko yoini iskafakī: “Mā ea iskafaikai, mī nōko Ifo ifofaki mā ea faikai, ēfe pexe ano oxai fekāfe,” noko fani. Noko askafaino nō nēteyoni.

¹⁶ Nāskata pena fetsa a Nios kīfimisfo ano nō kaino nāno nokoki xomaya nokoni niafaka chaka a mēra naneano. Nāato ato onāxomis ini. Āto inakōima ini, āa ato onāxomis. Aōxō kori ichapa fimisfo ini.

¹⁷ Nā xomayato noko chīfafaini Pablo fe nō kaino fāsikōi mekayanā noko yoifoni iskafakī: “Na feronāfakefofi Nios nā keyokōi finōato āfe inakōifoki. Afeskax nō Nios fe ipaxatiromāki noko yoi feafo,” ixō yoini.

¹⁸ Pena tii noko askafafōfāsa fani. Noko askafaito Pablo mā fekaxtexō anā teneyamakī, ifiakekafā nā niafaka yōshi chaka xomaya mēra nanekē iskafani: “Jesucristoōxō ē mia yoikai na xomaya makinoax tsekekaitāfe,” fani. Askafaino a makinoax niafaka chaka tsekekaini.

¹⁹ Pablo askafaito ōikakī, akka a xomayato āfe ifofāfe shināchakakōinifo anā afaakema, anākairoko aōxō kori fikani. Nāskakaxō akiki ōitifishkikakī Pablo yafi Silas achikaxō xanīfo finakōia ano iyonifo.

²⁰ Nāskakaxō xanīfofo ano ato iyokaxō iskafakī ato yoinifo: “Na judeo rafeta nōko pexe rasi anoa ato chakafakī mekafakani.

²¹ Nō mato yoisharaira ikaxō nā imisfo keskapaikī anori ato yoipaikani. Akka nōa nō chanīpaima, askara yoikī nō feyafaima nōmāi romanōfoxō,” ixō ato xanīfofo yoinifo.

²² Ato askafaiāfe nikakani yorafā rasi atoki ōitifishkinifo Pablo yafi Silaski. Nāskakaxō āto xanīfofōfāfe ato yoinifo ato rapati fiakaxō ato chati koshanōfo.

²³ Ato koshakī finakaxō karaxa mēra ato ikimanifo. Nāskakaxō a karaxa kexea yoinifo ato kexesharakōinō tsekeyamanōfo.

²⁴ Yoikī askafaiāfe nikakī, a karaxa kexemisto oke mēra chaikōi ato ikimaxō tafara rafe oyatamaxō ato tsāoni.

²⁵ Ato askafafono Pablo fe Silas yamenakekafanaino Epa Nios kīfiyanā fanāinifo. Askafono a ato fe karaxa mēra ikafāfe ato nikanifo.

²⁶ Nāskafono fāsikōi mai naya naya ikī, nā karaxa pexe simīto posa posa akōini. Nāskafaino āfe fepotifo fepekemei fetseni. Nāskaino a karaxa mēra ikafo cadenās mepekemei fetsenifo.

²⁷ Askaino a karaxa kexea moinākaḡ ōia mā karaxa āfe fepoti fepekemei fetsea ōini. Askaito āfe espada tsekata āa retemepaini, mā tsekeafora ixō shināi.

²⁸ Askaito Pablo fāsikōi yoini iskafakī: “Mīa retemeyamafe. Nō faki kaamaki,” faito nikakī.

²⁹ A karaxa kexeato āfe soraro fētsa, “Ea kirosī otaxō fexōfe,” fani. Mā fexoano koshikōi ichoni choayanā ratei, nāskax Pablo fe Silas niafono ato nāmā ratokonō mai chachipakefōfāni.

³⁰ Nāskata fininākāfe mā ato kaimaxō ato yōkani iskafakī: “ǀAfesaxō ēfe chaka ē soatiromē Nios fe ipaxakī?” ixō ato yōkani.

³¹ Ato askafaito nikakakī kemanifo iskafakakī: “Nōko Ifo Jesucristo chanīmara fafe Ifokōi faax mefe yorafo fe mī afe nīpanakakī,” fanifo.

³² Nāskakaxō nōko Ifoōnoa meka shara yoinifo, a afe ikafori āfe pexe mēranoa ato yoinifo.

³³ Ato askafafono nā fakish fistichi nā karaxa kexemisto a ato koshafo ano ato fāka chokani. Ato askafaino āfe āfiyafi āfe fakefoya ato maotisafanifo, ato faka mēra ikimapkekakī Jesús chanīmara faifono.

³⁴ Nāskaxō āfe pexe ari ato iyoxō ato pimani. Nāskax āfe āfi fe āfe fakefo fe inimakōini Nios chanīmara fakōikanax.

³⁵ Nāskata penama xanīfōfāfe āto sorarofō nīchinifo a karaxa kexeafō ato yoitanōfo Pablo yafi Silas ato kāimanōfo.

³⁶ Nā karaxa kexeato Pablo yoini iskafakī: “Xanīfōfāfe ea yoiāfo ē mato kāimanō. Mā mā tanaima kasharatiro,” faino,

³⁷ Pablo a ato kexeafō yoini iskafakī: “Nōri romanōfōfiano noko koshaketsafo yorafāfe ferotaifi, noko yōkasharakaxoma. Nāskakaxō noko karaxa mēra ikimanafo. Akka, ǀafesakakī one mā noko kāimapaimē? Āakōi noko kāimani fenōfo ato yoitakāfe,” Pablo ato fani.

³⁸ Ato askafaito nikakakī mā fokaxō sorarōfāfe ato xanīfōfo yoinifo. Ato yoiāifono nikakani ratenifo: “Nōri romānōfōra,” ato faifāfe nikakanax.

³⁹ Ato askafafono xanīfōfo mā fokaxō ato iskafanifo, Pablo yafi Silas: “Nō mato tāpiama māri romanōfo fekē nō mato koshaketsaxō karaxa mēra nō mato ikimani. Na karaxa mēranoax kāikāfe, nōko pexe rasi anoax fōtaxikakī,” ato fanifo.

⁴⁰ Mā karaxa mēranoax kāikanax Pablo fe Silas Lidia pexe ano fonifo. Nānoxō a Nios Ifofafo Jesúsnoa meka shara ato yoikakī ato inimamakōinifo. Nāato yoikī askafakanax ato makinoax fonifo.

17

Tesalónica anoax mekai fetsenifo

¹ Pablo fe Silas mā fokakī, Anfīpolis yafi Apolonia finōfāikanax, Tesalónica ano nokonifo. Nā Tesalónica ano judeofāfe ichanāti pexe ini.

² Pablo nā imis keskai pena tenetiḡa ichanāti pexe mēra kapaoni. Tres simānā anoxō ani, anoax ato fe feratenāyanā a kirika ano Niospa meka kenenifōōnoa ato yoiyāna.

³ Anoxō ato yoini: “A Cristo omiskōiax nani. Mā nafiakē anā Epa Niospa otoani. Nā Jesúsnoa ē mato yoikai nāfi Cristokī,” ixō Pablo ato yoini.

⁴ Ato askafaiḡāfe nikakakī atiri judeofāfe Jesús chanīmara fanifo. Mā Jesús chanīmara fakanax ato fe rafenifo. Askatari griegofāferi Nios chanīmara fakaxō Nios fāsi sharakōi fanifo, nā kērofo xanīfōfo feta.

⁵ Askaiḡāfe ōikani judeofo noko anā nikakanimaraka ikanax, Pablo yafi Silas mepaikani ōitifishkinifo. Nāskakaxō a yora xani chakafo ato fenaifokani fonifo, Pablo yafi Silas chakafakakī mekafanifo, fetsafāfe pexefo tii anoxō ato nikanōfo. Nāskakanax Jasón pexe ano fonifo Pablo yafi Silas fenaifokani, ato kāimaxikakī yorafāfe ato omiskōimanōfo.

⁶ Akka Pablo yafi Silas anoa ato fichikaxoma, Jasón yafi a Nios Ifofamis fetsafo ato achikaxō āto xanīfōfo ano ato iyonifo. Mā ato iyokaxō fāsikōi ato iskafanifo: “Na feronāfakēfāfe fanīma mīshtixō ato chakafafōfāsafamisfo. Akka mā noko ano feafo.

⁷ Na Jasón āfe pexe mēra ato ikimana. Nafāfe a romanō xanīḡāfe yoisim anori anā nikakanima. Akka nāno nōko xanīfo fetsa āfe ane Jesús ikani,” ixō ato yoinifo.

⁸ Ato askafaiḡāfe nikakani xanīfōfo ōitifishkikī metsamanifo, noko anā nikakanimaraka ikanax.

⁹ Akka Jasón feta fetsafāfe a xanīfōfo ato kori ināfono ato kāimanifo.

Pablo fe Silas Berea ano fonifo

¹⁰ Nāskakata fakishi Pablo fe Silas Berea ano fotanōfo koshikōi ato nīchinifo. Mā Berea ano nokokanax judeofāfe ichanāti pexe mēra ikifainifo.

¹¹ Nā judeofāfe Pablo feta Silaspa ato yoiainifo ato nikakōipainifo, Tesalónica anoafu keskara inifoma. Ato nikasharapaikōikakī Niospa meka shara nikakōinifo. Nāskakata pena tii kirika fepekaxō òinifo a ato yoiāfo keskara chanīmamākī.

¹² Nāskakē judeofāfe Jesúsnoa chanīmara fakōinifo. Askatari griegofāferi chanīmara fakōinifo. Kērofāferi nikakōinifo a feronāfakefāfe nikaifo keskafakī.

¹³ Akka judeofāfe Tesalónica anoxō nikanifo Pablo Niosnoa meka shara Berea anoafu ato yoiāto. Nāskakanax Berea ari fonifo, mā ari fokaxō ato yoinifo Pablo mekafakī chakafanōfo.

¹⁴ Ato askafaifono, akka a Jesús Ifofamisfāfe Pablo koshikōi katanō nīchinifo fakafā kesemē ano. Akka Timoteo fe Silas fonifoma. Berea ano nētenifo.

¹⁵ Akka a Pablo fe fofaifo, afe fonifo pexe rasi Atenas ano. Nānoax anā feaifono Pablo ato yoini iskafakī: “Timoteo yafi Silas ea ato yoixotakāfe koshi ekeki fenōfo,” ixō ato yoini.

Pablo Atenas ano ini

¹⁶ Pablo Timoteo yafi Silas Atenas anoxō ato manayanā òia Atenas anoxō afarafu ichapakōifo onifakaxō, “Na nōko niosra,” faifāfe òi. Āfe òiti mēraxō shināchakakōini.

¹⁷ Nāskakē Pablo nā judeofāfe ichanāti pexe mēranoax judeofo fe a judeofoma fe a Nios sharara faifo fe yoināni. Nāskatari a pexe emāiti niāx yoināifo mēxotaima Pablo Jesúsnoa ato yoini.

¹⁸ Ato yoiaino yora fetsafo akiki fenifo afe feratenāixikaki. Nāfāfe shinānifo iskakakī: “Nā nō apaiyai keskafakī nō tiro noko inimamanō,” ixō shinānifo. Nāfāfe āto anefo epicureofo. Ranāri iskanifo: “Afarā afeskara afaino nō tenetiro,” ixō shinānifo. Nāfāfe āto anefo estōicofo. Nāfo epicureofo fe estōicofo Pablo fe feratenānifo. Iskafakī yoinifo: “Na mekakī finamisto ¿afaa noko yoipaimē?” ixō yoiainifo, fetsafāferi iskafanifo: “Nios fetsafoōnoa noko yoipai rakikīa,” ixō yoinifo. Nāskafakī fetsanifo. Pablo Jesúsnoa meka shara ato yoiāito, mā Jesús nafiax anā otoyamea ixō ato yoifiaito nikaspakakī.

¹⁹ Nāskakaxō Areópago ano Pablo iyonifo a anoax mēxotaima ichanāxaxō afarafu yoisimfo ano. Nānoxō yōkanifo iskafakakī: “Nō tāpinō na mī yoiāi anori meka fenakōiki noko yoife.

²⁰ Na mī noko yoiāi anori nō nikamismaki. Afaa ikamākī noko yoife nō tāpinō,” fanifo.

²¹ Nā Atenas anoafu feta yora fetsafāfe anoxō òikakī nikapaikōinifo a nikaifo keskara ato yoixikakī.

²² Nāskaxō nā ichanāmisfo āfe ane Areópago anoxō Pablo ato nēxpakīa niinākāfe ato yoini: “Atenas anoafāfe, ea nikakapo, mē mato òi mā Niosnoa nikapaikōiāto tāpipaikōiyānā.

²³ Nā mā nios kifimis ano kafasakī mē òia. Nānoa ē fichia na nōko niosra ixō mā afara onifanixakī mā akiki kenekī iskafakē: ‘Nō na nios òimisma,’ ixō mā aōnoa yoikī kenenī. Nā nios òikaxakīma mā kifimis, nāñoa ē mato yoi.

²⁴ “Nā Niospa keyokōi onifani, afama mishtifo nai mēranoafoya mai anoafu onifani ato Ifo ixikī. Nā Nios yorafāfe pexe faafu mēra ikama.

²⁵ Askatari ea afaa axokāfe ikima. Akka nāato keyokōi noko nima. Nō xakainō noko nefaxoni, afara fetsafori ani.

²⁶ “Askata feronāfake fisti onifakī taefani, nānoax nā maniafo tii kainōfo, nā mai tio ano ipaxakakī. Nāskaxō ato yoini, afe tii xinia akanimākai fanīra ikaxō.

²⁷ Nāskakē Niospa yorafo onifani keyokōichi fenanōfo tāpipaikakī. Akka fenakī fichitirofo. Chanīma, Nios chai ikama, noko chai faama.

²⁸ Akka Niosnoax nō nia. Akka Niosyamakēkai nō nikeranama. Akka nā mato tāpimamisfāfe kenenifo iskafakakī: ‘Nō Niospa fenakōifo,’ ixō yoinifo.

²⁹ Akka nō Niospa fenafofiāxō, nō shinātiroma Nios na yorafāfe afarafu onifaafu keskara inō, āa shināxō yorafāfe onifaafu keskara.

³⁰ Askafaiifonokai Niospa ato afeska fanima. Akka iskaratīa keyokōi ato yoi āto chaka xatekaxō chanīmara fanōfo.

³¹ Nāskakē Niospa tāpiyoni afetiā ato ichanāfaimākai, a ato omiskōimanaitīa, fatofu sharafomākī askayamai fatofori chakafomākī. Nā feronāfake katonioxō ato askafaxii. Akka mā nafiakē Āpa otofaito keyokōichi òinifo,” ato faito,

³² a Jesús naax otaito nikakani, akiki kaxemetsamanifo. Ranārito yoikī iskafanifo: “Mā nō nikakī a mī noko yoiāito, anā pena fetsa noko yoifaixāfe,” fanifo.

³³ Askafaifono a ichanāfo anoax Pablo kani.

³⁴ Akka Pablo mā kaino atiri afe fonifo Jesús chanīmara fakanax. Dionisiori nāno ato fe ini, nā Dionisio Areópago anoxō ato fe ichanāxō ato yoisim ini. Kērori nāno ato fe ini, āfe ane Dámaris, kēro fetsafori ano ato fe inifo.

18

Pablo Corinto ano ini

¹ Nāskata Pablo Atenas anoax kaax Corinto ano nokoni.

² Nānoa feronāfake āfe ane Aquilaki nokoni. Nā feronāfake Ponto pexe rasi anoa ini. Rama Italia anoax āfe āfi Priscila fe nokoita ini, nā Italia anoa āto xanīfāfe āfe ane Claudio ato potaitano. Ato iskafayanā na judeofo Roma anoax fōtanōfo ixō. Nāskakē Pablo ato ōikai kani.

³ Nā Pablo nā akaifo keskafakī akairi pexe fakāki tāpia ini, karapa pexe fakī. Nāskakē nāno ato fe nēteni, ato feta yonoxiki.

⁴ Nāskakē nānoax mēxotaima pena tenetitūa ichanāti pexe mēra kapaoni. Anoxō judeofoya a judeofoma ato Jesúsnoa meka shara nikamapai chanimara fanōfo.

⁵ Akka Silas fe Timoteo mā Macedonia anoax akiki nokoafono Pablo Jesúsnoa meka shara judeofo ato yoifofāsafani: “Jesúsfi Cristoki Niospa katoni āfe Fakekōi inō,” ixō ato yoini.

⁶ Ato askafaito nikakakī judeofāfe Pablo iskafanifo: “Jesúskaī Cristoma. Mīa mī chanī,” fakaxō Pablo ichaketsanifo. Askafaiāfe nikakī Pablo āfe rapatiōnoa atoki mapo taa taani mā anoax kakī ori fetsa ari ato iskafafāini: “Ē Niospa meka mato yoipaiāfaiato mā ea nikakaspai. Māto shināmā mā iki. Nāskax naax mā Nios fe nīpanakama. Ē mato yoisharapaiāfaiato mā ea nikakaspai. Nāskakē nānoax feta yonoxiki.”

⁷ Nāato askafata āto ichanāti pexe anoax kāikaini feronāfake āfe ane Ticio Justo pexe ano kani. Nāato Epa Nios shinākōikī Kīfipaoni. Nā ato ichanāti pexe chaima ika ini.

⁸ Feronāfake Crispa ichanāti pexe anoa āto xanīfo ini. Nāato āfe āfi feta āfe fakefoyaō nōko Ifo nikakōiyānā chanimara fani. Askatari nā Corinto anoafāferi chanimara fakōinifo, Pablo Jesúsnoa meka shara ato yoiaito. Nāskakē chanimara faifono ato maotisafakī faka mēra ato ikimapakenifo.

⁹ Nāskano fakish fetsa Pablo namakē ōia fani, nōko Ifāfe yoiaito iskafakī: “Ratekima mēxotaima ēfe meka sharaōnoa ato yoi xateyamafe.

¹⁰ Ē mefe ikaki mia tsōa afeska faima kiki. Na pexe rasi ano efe yorafo ichapa ikafokī,” ixō yoini.

¹¹ Nāskakē Pablo Corinto ano nēteni. Anoxō xinia fisti finōmata oxe seis ani. Nānoxō mēxotaima Niospa meka ato yoipaoni.

¹² Akka Acaya mai anoax Galiōn xanīfo finakōia ini. Nānoax judeofo ichanānifo Pablo achixikāki. Mā achikaxō āto xanīfo finakōia ano iyonifo.

¹³ Iskafakī āto xanīfo yoinifo: “Na feronāfake ato pārafōfāsafai, yoipai mā Nios kīfiki iskafatiro ixō. A Moisés yoini anori ato yoima, fakirira ato yoi,” ixō yoinifo.

¹⁴ Pablo mā ato kemapaiyaito nā xanīfo judeofo yoini iskafakī: “Na feronāfake afara chakafakē, askayamakī ato retekē mā ea yoiaito ē mato nikakerana.

¹⁵ Akka nā mato xinīfāfe yoipaonifo keskaraōnoa mā yoita, a mato kaifāfe āfe aneōnoa yoita, a Moisés yoini keskaraōnoa mā yoi. Akka nā mā apaiyai keskafakāfe, ē aōnoa afaa tāpipaimakai.

¹⁶ Nāskakē nonoax fotakāfe,” Galiōn xanīfāfe ato fani.

¹⁷ Ato askafa fokaxō Sóstenes achinifo nā ichanāti pexe anoa xanīfo. Mā achikaxō nāri seteketsanifo xanīfāfe ferotaifi. Akka nā xanīfo Galiōn aō rafañā inima.

Pablo anā Antioquia ano kani Niosnoa meka shara ato yoikai. Taeyoi kai rafenixakī anā kai fistini

¹⁸ Pablo Corinto ano oxaranāyoni. Nānoax a Nios Ifofafo makinoax kani Priscila fe Aquila afe fonifo. Nāskakata kanōnāfānē nanefainifo Siria mai ano fokani. Mā fokanax akka Cencrea anoax kanōnāfā mēra nanexoma Pablo ato testemayoni. Akka Pablo Nios yoiyoni: “Ē mīōxō afara axii, mī ea ōiaino,” ixō yoini. Akka mā axō ato testemani tāpinōfo. Ē Nios afara afeskarafaxōara ikax.

¹⁹ Nāskata mā fokanax Efeso ano nokonifo. Nāno Pablo ato nīchifaini Aquila yafi Priscila, ichanāti pexe mēra kakī nānoax judeofo ichanāfono ato fe yoināxiki.

²⁰ Nānoxō nētefapainifo. “Kayamafe nono nofe iyofe,” fanifo. Askafafono akka Pablo nētekaspani.

²¹ “Maa, ē nētetiroma, mē kai,” ato fani iskafakī ato yoiyānā: “Epa Niospa ea nīchiaino anā oxō ē mato ōiyoxii.”

Nāato askafata Pablo kanōnāfānē naneinākfani Efeso anoax mā kai.

²² Mā Cesarea ano nokoax, Jerusalén ano kani a Nios Ifofafo ato yoisharaikai. Mā ato yoita anā kani Antioquia ano.

²³ Nāno ato fe ikatsaxakī, nānoax anā kani Niospa meka sharaōnoa ato yoifofāsafaikai. Galacia anoxō ato yoikī taefata, Frigia anoxori ato yoini. A Nios Ifofafo ato inimamakōini, Niosnoa meka shara ato yoikī.

Apolos Efeso anoafo Niosōnoa meka shara ato yoini

²⁴ Nāskaifono Efeso ano judeo fisti nokoni āfe ane Apolos pexe rasi Alejandría anoa ini. Nāato Niospa meka yoikī kirika kenenifo tāpikōia ini, xafakīakōi ato yويمis.

²⁵ Nāato nōko Ifo Jesúsnoa tāpikōiō ato yoini, inimakōikai nā tāpia anori xafakīakōi Jesúsnoa ato yoini. Askafixō Jesúsnoa tāpisharaxō nā Juan ato maotisafakī faka mēra ato ikimani nā fisti tāpia ini.

²⁶ Nāskata Apolos ichanāti pexe mēraxō ranotamakōi ato yoiaito nikakī. Aquila feta Priscila kenakaxō ori iyokaxō Niospa meka tāpimasharakōinifo nikasharakōinō.

²⁷ Nāskakē Apolos Acaya mai ano kapaiyaito nikakī a Nios Ifofaafāfe iskafanifo: “Nō a Jesús Ifofamisfo kirika kenexō fomanō mia ifisharakōinōfo,” ixō yoinifo. Apolos mā Acaya mai ano kaxō, ato yoisharakōini. Ato askafaito nikakani Niosnoax inimasharakōinifo.

²⁸ Nānoxō ōiaifo judeofo Apolos yoini: “Jesús Niospa Fakemara,” faifono. Akka nā kirika keneaōxō Apolos ato yoini iskafakī: “Nā nō manai Cristofi Niospa Fakeki,” ixō xafakīakōi ato yoiaito tsōa kemanima.

19

Pablo Efeso ano oni

¹ Apolos Corinto ano iyoano, māchi keya ari fai tāpiato kaax Efeso ano Pablo nokoni. Nānoa Nios Ifofamisfo fichtoshini.

² “ĶMā Nios Ifofaxō Niospa Yōshi Shara mato mēra mā nanenimē?” ixō Pablo ato yōkaito, kemanifo iskafakakī: “Maa, nōkai aōnoa afaa nikayomisma, Niospa Yōshi Sharakai nō nikamisma,” fanifo.

³ Askafaifāfe nikakī anā Pablo ato yōkani: “ĶAfeskai mā maotisanimē?” ato faito, kemanifo iskafakakī: “Juan noko yoinino nō ini,” ixō yoinifo.

⁴ Askafaifono anā Pablo ato yoini iskafakī: “Juan ato maotisafani afara chakafakatsaxakakī āto chaka xatepaiyafono Nios Ifofapaikakī. Iskafakī ato yoianā a chipo oxiai nikakōisharaxikāfe ixō ato yoini, Jesúsnoa yoikī,” ato Pablo fani.

⁵ Pablo ato yoikī askafaino, nikakani nōko Ifo Jesús āfe aneōnoax maotisanifo fetsafāfe tāpinōfo.

⁶ Askafono ōikī Pablo ato māmāpakeaino Niospa Yōshi Shara ato mēra naneni. Nāskakanax meka fetsapa mekai fetsenifo. Niosnoa meka shara nikakaxō ato yoinifo.

⁷ A ato mēra Niospa Yōshi Shara nanea, doce feronāfane.

⁸ Nāskaifono Pablo nāno ato fe ikax mēxotaima ichanāti pexe mēra kapaoni. Anoxō tres oxe ani. Niospa meka sharaōnoa ato yoianā ranotama, anoxō Nios xanīfoōnoa ato tāpimapaikōikī.

⁹ Ato askafafiaino atirifāfe nikakaspakakī yorafāfe ferotaifi mekafakī chakafanifo iskafakakī: “Nōkai Jesús chanīmara faima. Aōnoaxkai Epa Nios ari nō katūroma,” ixō yoiaifono, Pablo ato makinoax kakī a Nios Ifofafo ato iyoni, feronāfake āfe ane Tirano a anoxō ato tāpimamis ano. Nānoxō a chanīmisfo anoxō pena tii Pablo Jesúsnoa meka shara ato yoipaoni.

¹⁰ Anoxō Pablo Niospa meka sharaōnoa ato yoikī xinia rafe ani. Nā Asia mai ano ikafāfe nikasharakōinifo Niospa meka sharaōnoa. Judeofo feta a judeofofāfema nōko Ifo Jesúsnoa meka shara nikapaonifo.

¹¹ Nāskakē yorafāfe afama mīshtifo fakī ato ispani.

¹² Nāskakē yorafāfe āto payōiro iyamata āto sama faxte pishta Pablo āfe yora ramākanifo. Nāskafata mā fokaxō a isinī ikaifoya a niafaka chaka naneafō ato ramānifo. Ato askafaifono a isinī ikaifo fe a niafaka chaka naneafō sharai fetsenifo.

¹³ Nāskaifono atiri judeofāfe fofāsakakī niafaka chakafo yorafo makinoax pōtanifo pexefo tii fofāsakakī. Jesús āfe aneōxō niafaka chakafo yorafo makinoax ato pōtapainifo. Iskafanifo: “Niafaka chakafāfe, Jesús aneōxō Pablo noko yoimiski, akka nō mato yoikai ato makinoax tsekefaitakāfe,” ato fanifo.

¹⁴ Nāskafapaonifo nā judeo āfe fake sietipa, nā judeo āfe ane Esceva ini. Nā ato Nios kīfixomisfāfe āto xanīfo ini.

¹⁵ Ato askafaifono a niafaka yōshi chaka yora mēra naneato ato kemani iskafakī: “Ē Jesús ōimis, askatari Pablori ē tāpia. Akka, Ķmā tsoamē?” ato fata,

¹⁶ nā niafaka yōshi chakayato ato rapati faxteyanā, fāsikōi ato achixō ato seteketsayanā ato imi tofeni. Nāato askafakī fetsaino pexe mēranoax yorioma ichonifo.

¹⁷ Nāato askafaano Efeso anoxō judeofāfe yora fetsafo feta nikakani ratenifo. Nāskakaxō, “Nōko Ifo Jesús fāsi sharakōi,” fanifo.

¹⁸ Nāskakaxō a Jesús chanīmara famisfāfe fēkaxō a afara chakafapaoni xakakī yorafāfe ferotaifi yoinifo.

¹⁹ Askatari a yōfe tāpiafāfe āto kirika fēkaxō yorafāfe ferotaifi koanifo, mā Jesús Ifofakaxō. Nā kirika kene ōiafo kopikōi ini, como cincuenta mil ini.

²⁰ Nāskakē nōko Ifāfe āfe mekashara nikaketsanifo Jesús Ifofamisfāfe ato yoiāifāfe, āfe kexex sharaōxō afama mīshtifo fakakī.

²¹ Nāskafata Pablo shināni Macedonia yafi Acaya ano kaxiki. “Nānoax Jerusalén ano ē kaikai, Jerusalén anoax Roma ano ē kaikai,” ixō shināni.

²² Nāskaxō a afeta yonomisfo rafe Macedonia ano ato nīchini Timoteo yafi Erasto. Akka Pablo Asia ano nēteyoni.

Efeso anoax yorafo mekai fetsenifo

²³ Nāskaifono nā Efeso anoāfo mekai fetsenifo: “Jesúsfi Niospa Fakekī aōnoax nō Nios ari katiro,” Pablo ato faino,

²⁴ nāno feronāfake āfe ane Demetrio ini. Nāato yonokī afarafo kori exe keskara oxokōi onifapaoni. Nā feronāfake afara onifakī tāpikōia ini. Nāskaxō kēro ōitsa onifani, na nōko niosra ixō āfe ane Artemisa. Ranāfaxō kēro ōitsa fakī kafāshara mīshtifo onifani. Nāskakē a afeta yonofaifāfe aōxō kori ichapa fipaonifo.

²⁵ Nāskaxō Demetrio ato ichanāfani, a afeta yonomisfo ato iskafayanā: “Efe yora mīshtichi, mā mā tāpiakī nōko nios Artemisa yora keskara onifaxō, aōxō nō kori ichapa fimiski.

²⁶ Akka mā mā ōimis nikayanā, na Pablo ato yoifofāsafamis iskafakī: ‘Na yorafāfe niosra ixō onifaafo, akai niosma,’ ixō ato yoi. Mā yora ichapafāfe chanīmara fakōinafo ato yoiāito nikakakī. Na Efeso anoāfos ato yoiama, Asia mai anoāfori ato yoisimis.

²⁷ Na Pablo yoiāi keskara mesekōi, ē shināchakakōi. Anā noko tsōa kori ināyamaino nō fenotiro, na nōko nios Artemisa anā tsōa kīfitiroma, nā maitio ikafāfe Asia mai anoxō kīfimisfo. Askatari a nōko nios kīfiti pexefā mēranoax anā ichanātirofoma,” ixō Demetrio ato yoini.

²⁸ Demetrio ato askafaito nikakani Pabloki ōitifishkiyanā fāsikōi yoinifo iskafakakī: “¡Na Artemisa Efesio anoāfo nā sharafinakōiafo, tsoa keskarama!” ikanax fāsikōi mekai fetsenifo.

²⁹ Nāskakanax pexe rasi anoax fekaxtei fetsenifo. Nāskakaxō Gayo yafi Aristarco achinifo. Nā rafe Macedonia anoa inifo, Pablo fe feitafo. Nāskakaxō a yora kaya ichanāfo ano ato iyonifo.

³⁰ Ato askafaifono Pablo ato mēra ikipaini arixō yorafo yoixiki. Akka a Jesús Ifofaafāfe Pablo nīchikaspānifo, “Mia retetirofoki,” ikaxō.

³¹ Askatari a Pablo fe rafemisfāfe, xanīfofōfāfe Asia mai anoxō ato yoinifo, Pablo yoitanōfo ato mēra ikiyamanō.

³² Nāskakē āa ranā ichanākanax fāsikōi mekanifo. Atirifāfe fetsa anori yoinifo. Nāskaifono ranārito tāpinifoma afeskaī ichanāfomakī.

³³ Nāskaifono judeofāfe shinānifo, na yorafo chakai mekai taeafora noko fakanira ikaxō. Nāskakaxō Alejandro pītsikinifo ōiaifono ori nīxō ato yoitakāfe ikaxō. Nāskafaifono Alejandro niināfāfā mēshaxō ato yoini iskafakī: “Mekayamakāfe, ē mato yoisharanō,” ixō Alejandro ato yoini.

³⁴ Akka mā tāpikaxō Alejandro judeokē, fāsikōi āa ranā mekai fetsenifo, iskakani: “Na Efeso anoafāfe āto Artemisa sharafinakōia,” ikaxō.

³⁵ Askafāfe ōikī a xanīfo kenexomisto, “Mekayamakāfe,” ato fani. Ato askafaito anā tsoa mekanima. Nāskaxō ato yoini iskafakī: “Efesofa anoafāfe ea nikasharakāfe. Keyokōichi tāpiafo nōfi Efeso anoafokī, nā āto nios Artemisa āfe kīfiti pexefā nō kexemis. Nā onifafō nai mēranoax pakeāfori nō kexemis.

³⁶ Nāskakē āa chanīkanira tsoa itiroma. Nāskakē anā mekayamakāfe, afaa afeskafapaiyamakāfe shināsharaxoma.

³⁷ Akka na feronāfakefo mā ato efea afaa chakafayamafafono, askatari na pexefā mēranoax tsōa afaa oneyamafiano, askatari na nōko nios Artemisa tsōa chakafakī mekafayamafiano mā ato efea.

³⁸ Akka na Demetrio afeta yonomisfo feta, a ato chakafapai xanīfofo ano ato iyotiro, anoxō ato yōkanō afaa chakafafomakī.

³⁹ Nāskaxō afara fetsa mā yoipaikī nā ichanāfo anoxō mā yoitiro.

⁴⁰ Mā iskaratīa ato chakafai keskafakī xanīfofōfāfe nikaxō nokori askafatirofo. Na yorafāfe afaa chakafayamafiamisfono, afeskakī mā yōachepeimē xanīfofōfāfe noko faifono nō ato kematiroma,” ixō a xanīfo kenexomisto ato yoini.

⁴¹ Ato yoikī askafata ato nīchiaino fonifo.

¹ Mā mekakani nishpafono Pablo a Nios Ifofaafu kenani ato yoisharaxiki. Mā ato yoisharata, ato makinoax kani Macedonia ari kai.

² Mā kaxō nāriafo Jesúsnoa meka shara ato yoifofāsafakī a Nios Ifofaafu ato inimamakōini. Nāskata Grecia ano nokoni.

³ Nānoxō tres oxo ani anoax kanōanāfānē Siria ano kapaikī, nikani judeofāfe kexeafono retapai kakī. Nāskakē fāi kakī, Macedonia anā finōfaini.

⁴ Mā kaino feronāfake ranāri afe fonifo. A feronāfake fetsa āfe ane Sópater Berea anoa ini. Āfe apa ane Pirro ini, Aristarcori ini, Segundori ini, nā Segundo Tesalónica anoa ini. Fetsari Gayo, Derbe anoa ini. Fetsari Timoteo ini. Askatari Tiquico fe Trófimo Asia mai anoa inifo. Nā tii Pablo fe fonifo.

⁵ Nā tii rekē fokaxō Troas anoxō noko mananifo.

⁶ Akka mā fista senēano chipo nō kani. Nā fistaŋia pāa faraxaxoma pimisfo ini. Nāskata Filipos anoax kanōanāfānē nō kai cinco nia mā nō oxax Troas ano nō atoki nokoni. Nāno nō siete nia oxayoni ato fe.

Troas ano ōikai Pablo kani

⁷ Nāskata mā pena nomikoaino nō ichanāni pāa kaxke mīshtixō pixiki a Jesús noko nāxoyamea shinākī. Anoxō Pablo a Nios Ifofaafu yoini, mā penama kaxiki yamenake kafanaino ato yoikī xateni.

⁸ Nānoax pexe kene keya fomākīa anoax nō ichanāni, a rāpari ichapa ōtai fetsea anoax.

⁹ Nāskaino naetapa āfe ane Eutico pexe kene fomākīa āfe naisti anori tsaoni. Pablo ato chaikōi yoiaino nā naetapa oxakatsaini. Nāskax mā oxachāi kaax pexe kene fomākīakōinoax pakeax nakē chishtoinīfofānifo.

¹⁰ Nāskakē Pablo fotopakekafā chishtoinīfofā nā naetapa ikōni, ato iskafakī yoivanā: “Rateyamakāfe, naamakī,” ato fani.

¹¹ Nāskafata anā pexe fomākīa Pablo māpeinīfofāxō ato pāa kaxkeketsaxoni ato feta pixiki. Nāskaxō ato yoikī pena fani. Mā penano Pablo kani.

¹² Ato askafaino nā naetapa naŋiax mā otokē afe yorafāfe xanēnē iyonifo. Askafakī Pablo ato inimamakōini.

Troas anoax Pablo Mileto ano kani

¹³ Akka nō kanōanāfānē rekē kani, Aso anoxō Pablo ifixiki. Akka noko iskafakī yoini: “Ē fāi kaikai rekē fokāfe,” ixō noko yoini.

¹⁴ Nā Aso anoa noko fichiax nofe feronāfāke kani. Nāskax Mitilene ano nō nokoni.

¹⁵ Nāskata nānoax nō tsekekainax pena fetsa Quío mai nō finōfaini kaax pena fetsa Samos fai fototai nō nokoni. Anā anoax kaax pena fetsa pexe rasi Mileto ano nō nokoni.

¹⁶ Akka Pablo Asia ano samarakapainima. Efeso anori kakaspani, Jerusalén ano koshi nokopai ato feta fista Pentecostés apai.

A Nios Ifofaafu ato kexemisfo Efeso anoafu meka shara Pablo ato yoini

¹⁷ Mileto anoxō Pablo ato kenamani, Efeso anoxō Nios Ifofaafu ato kexemisfo.

¹⁸ Mā feafono ato iskafani: “Mā mā ea ōimis ē isharakōiaito nā ē oitachāi. Na Asia mai anoxō ē afaa afeska fama ē isharakōia Jesúsnoa meka shara mato yoi.

¹⁹ Mēxotaima ē mato mēra itiani, nōko Ifo yonoxoni. Ē mato yoi ē oiatiani Nios mato Ifo sharafamapai. Askatari ea omiskōimanaifono ē omiskōimis judeofāfe ea askafaifono.

²⁰ Akka ea askafafiaifono Jesúsnoa meka shara ē mato yoikī xateima. A meka sharapafo ē mato yoimis. Ranotamakōi ē mato yoimis, ichanāti pexe anoxō yoita a mātō pexekōifo anoxori ē mato yoimis.

²¹ Judeofo yoita a judeofomari mē yoimis āto chaka xatekaxō Nios Ifofanōfo nōko Ifo Jesucristori chanīmara fakōinōfo.

²² “Akka iskaratīa Jerusalén ano ē kai, Niospa Yōshi Sharapa ea nīchiaino. Ē tāpiaa arixō ea manafo ea afeskarafakani.

²³ Akka mē tāpia Niospa Yōshi Sharapa ea yoiaito, pexe rasi anoxō ea karaxa mēra ikimakaxō ea omiskōimakani.

²⁴ Akka ea askafafiaifono ē shināchakaima. Nā Epa Niospa ea amapaiyai keskara fisti ē shināi. Epa Niospa keyokōi yorafo noikōi na meka shara ato yoitāfe ea fani. Nā ea yoini keskara ē apai.

²⁵ “Ē mato mēraxō Nios xanīfoñoa ē mato yoimis. Akka mē tāpikōia anā mā ea ōinakama.

²⁶ Nāskakē ē mato yoipai. Na fetsafāfe ea nikakaspamisfo ē ato yoipaiŋiaito tsōa ea nikamisma. Nāskax omiskōixikani. Nāskakē ē ato afeskafatiroma, mē ato yoimis.

²⁷ Mē mato yoimis a Niospa fichipaiyai keskafakī ē mato yoikaspamisma.

²⁸ Nāskakē kexemesharakāfe, a Nios Ifofaafari ato kexesharakāfe. Niospa Yōshi Sharapa mato ikināki, a Nios Ifofaafu mā ato kexesharanō. Jesús nokoōnoax nai āfe imi foniki.

²⁹ Mē mato makinoax kaano, chipo a fanīrira yoimisfo chakafo fekani mato fanīrira yoipaikani. Oa poomānā chaxo fichixō pitiro keskafakī mato pārapaikani mā anā Jesús shinānōma.

³⁰ Afianofi mā fetsa mā ranā mā pārānōnāxii nō Niospa meka tāpiara ixō mā ato pāraxii, a Nios Ifofaafāfe mato nikanōfo.

³¹ Kexemesharakōikāfe, akka shinākapo. Tres xinia ē ani Niospa meka sharaōnoa mato yoikī. Penata yoita, fakishi yoikī ē mato famis, Niospa meka sharaōnoa ē mato yoi ē oiamis.

³² “Akka efe yora mīshtichi, iskaratīa ē Epa Nios kīfi mato kexesharanō, a mato noiai keskafakī āfe meka shara mato mēra nanenō. Nāato āfe kerex sharaōxō āfe meka shara mato inātiro mato mēra nanesharanō askatari a yoiyoni keskafakī afe yorakōifo ato afara ināsharakōitiro afe Ipaxanōfo.

³³ Ēakōi ē afaa fipaimisma, askatari ē mato kori yōkamisma, rapatiri ē tsoa yōkamisma.

³⁴ Askatamaroko ēfe mifkōichi ē yonofaito mā mā ōimis, a ē fichipaiyai fixiki, a efe ikafori ato ināxiki.

³⁵ Mē mato ōimamiski afeskaxō mā yonotiromākī, a omiskōiaifo ato axosharayanā. Nōko Ifo Jesús āfe meka sharaōnoa shināyanā fetsafāfe noko afara ināino nō inimatiro keskai, ‘Nōri fetsafo afara ināshari nō inimaifinakōitiro,’ ixō nōko Ifāfe noko yoini,” Pablo ato fani Efeso anoafō.

³⁶ Mā ato yoikī askafata ratokonō mai chachipakefōfā Pablo ato Epa Nios kīfixoni.

³⁷ Anoax keyokōi oiayanā Pablo ikōketsayanā kokoketsanifo.

³⁸ Shināmitsakōinifo: “Ē anā mato ōinakamara,” ato faino, askakāta afe fakafā kesemē fonifo Pablo kaito ōifokani. Nāskax Pablo kanōanāfānē nanekaini mā kai.

21

Pablo Jerusalén ano kani

¹ Anoa a Nios Ifofaafō nō ato ōifaini, kanōanāfānē nō nanekaini kaax Cos ano nō nokoni. Anoax kaax pena fetsa Rodas ano nō nokoni, anā anoax kaax Pátara ano nō nokoni.

² Nā Pátara anoxō kanōanāfā nō fichini Fenicia ano kaino, nāo nō nanekaini.

³ Kaki fakafā nakirafe Chipre mai toomāfā nō ōifaini. Nā Chipre mai nōko pōya mishkiori ini. Nā finōfaini kaax Siria ano nō nokoni. Nānoxō pexe rasi Tiro fai fototai nokoxō kanōanāfā mēranao afama mīshtifo māpemanifo.

⁴ Nānoa a Nios Ifofaafō nō ato fichini, nāno nō ato fe siete nia oxani. Nāfāfe Pablo yoinifo Niospa Yōshi Sharapa ato shināmanaino iskafakakī: “Jerusalén ano kayamafe. Anoxō mia retapaikani kiki,” ixō yoinifo.

⁵ Askafaifono mā siete nia finōta nō anoax kaino, keyokōi āto āfife fe āto fakefo fe nefe fonifo pexe rasi pasotai. Nānoxō nā māshifā anoxō ratokonō mai chachipakefōfā nō Epa Nios kīfini.

⁶ Nāskata mā nō kakī nō ato yoisharaketsata, kanōanāfā mēra nō naneinākafani, akka atii anā fenifo āto pexe ano.

⁷ Nāskata kanōanāfānē nō kai Tiro ano nō nokoni, nānoax kaax Tolemaida ano nō nokoni. Nānoax a Nios Ifofaafō fe nō ato fe yoināsharakōini, askatari nāno nō ato fe oxa fishtiyoni.

⁸ Nāskata nānoax kaax pena fetsa Cesarea ano nō nokoni. Nānoax Felipe pexe ano nō kani. Nā Felipe Niospa meka shara yoimis ini. A Jesús Ifofaafāfe afetiama Felipe ifnifo Jerusalén anoxō a piaifo ato paxxanonō. Seis feronāfake fetsafoya Felipe ifnifo ato feta yononō. Nāato pexe ano nō nēteni.

⁹ Felipe fake xotofake cuatro inifo fenemais. Nāfāfe Niospa Yōshi Sharapa ato shināmanaino ato yoipaonifo.

¹⁰ Nāno nō oxa ranāni, nāno Judea anoax feronāfake āfe ane Agabo nokoki nokoni. Nāato Niosnoa yoimis ini, a inōpokoai yoikī.

¹¹ Mā noko ano nokoxō, Pablo āfe nanexemeti fiata, aō metexkere ita aō otxekere ini. Nāskaxō ato yoini iskafakī: “Niospa Yōshi Sharapa ea yoi Jerusalén anoxō judeofāfe na nanexemeti ifo iskafaxikani. Nāskaxō yora fetsafo ināxikani,” ixō Agabo ato yoini.

¹² Noko askafaito nikakī Cesarea anoafō feta, “Jerusalén ano kayamafe,” nō Pablo fani.

¹³ Askafaifono Pablo noko kemani iskafakī: “¿Afeskakī mā oiayanā mā ea shināmitsamanimē? Mē itipinīshara ea nexayamakakī ea retekani Jerusalén anoxō, nōko Ifo Jesúsxō ea askafakani,” Pablo noko faito,

¹⁴ nō anā afaa fanima noko nikayamaito. Nāskaxō nō yoini iskafakī: “Nōko Ifāfe nā mia apaiyai keskafanō,” ixō nō yoini.

¹⁵ Mā askata nō itipinī fani, nāskax nō Jerusalén ano kani.

¹⁶ Nō kaino a Nios Ifofaafō ranāri nofe fonifo Cesarea anoax. Nāfāfe noko iyonifo feronāfake āfe ane Mnasón pexe ano, nā Mnasón Chipre anoax ini. Nāto afetiama Nios Ifofakī taefani. Nāskaxō āfe pexe anoaxō noko ifini ano nō oxanō.

Pablo Santiago ōikai kani

¹⁷ Mā nō Jerusalén ano nokoano a nofeta Jesús Ifofamisfāfe noko ifinifo nokoki ini-makōiyanā.

¹⁸ Askata pena fetsa Pablo nofe kani Santiago ōikai. A Nios Ifofaafō ato kexemisfori nāno inifo.

¹⁹ Mā atoki nokoxō Pablo ato yoisharakōini. Nāskaxō ato yoipakeni a Niospa aōxō a judeofoma ato chanīmara famakōikē.

²⁰ Ato yoiaito nikakakī, “Nios fāsi sharakōi,” fanifo. Nāskaxō Pablo yoinifo iskafakakī: “Nofe yorashta, nō mia yoisharapai, mā mī ōimiski na judeofāfe ichapakōichi mā nōko Ifo Jesūs chanīmara fafiakaxō, nāfāfe a Moisés yoini keskara nikapākōimisfo.

²¹ Nāfāfe yoiāfo judeofo a yora fetsafo mēra ikafo mī ato yoikē iskafaki: ‘A Moisés yoini keskara nikayamakāfe,’ ixō mī ato yoikē, ‘Askatari māto fakefo foshki repa xateyamakāfe, askatari a mā imis keskai anā askayamakāfe,’ ixō mī ato yoimiskē.

²² Akka, ʒnō afeskaimē, yorafāfe nikakani mā mī nono oano?

²³ Akka nā nō mia yoiāi keskafe. Na cuatro feronāfakefāfe Nios yoiāfoki iskafakakī: ‘Epa Niosi, mī noko yoiāi keskai nō askakōikai,’ ixō yoiāfoki.

²⁴ Akka na cuatro feronāfake fe Nios yoiti pexefā mēra katāfe, nō imis keskai ato fe ife māto chaka soaxikakī. Mī ato kopifaxōfe mato testeifono. Mī ato askafaito ōikakī keyokōichi tāpitirofo a mīōnoa yoiāifo āa chanīkani. Askatamaroko mīri a Moisés yoini keskara mī nikakōimis.

²⁵ Akka a judeofofāfema a Jesús Ifofaafāfe mā chanīmara fakōinafo. Akka mā nō ato kirika kenexona iskafakī: “Nō nami pitiroma na nōko niosra ixō afara onifakaxō fetsafāfe ināfono. Askatari yoināfo āfe imiri nō ayatiroma. Askatari yoinā ina fakaxō tetoxakafo āfe imi foyamaitori āfe nami nō pitiroma, askatari nōko āfima nō chotatiroma, kēromāri āfe fenema chotamatiroma,’ ixō nō ato yoiā,” Pablo fanifo.

Nios kīfiti pexefā mēraxō Pablo achinifo

²⁶ Nāskafafono nā cuatro feronāfake Pablo ato iyonī. Nāskata pena fetsa ato fe Nios kīfiti pexefā mēra ikini, āto chaka soaxikakī. Nāskata a Nios kīfiti pexefā mēra ikikaini xanīfo yoixiki a Epa Niospa yoini keskara afetia keyoimākai, nā tiitori yoinā retexō Epa Nios ināpaikakī.

²⁷ Mā siete nia ikano judeofo Asia mai anoax fokaxō Nios kīfiti pexefā anoax Pablo ōikakī yorāfo yoinifo Pablo chakafakī mekafanōfo. Ato askafafono Pablo achinifo.

²⁸ Mā Pablo achikaxō fāsikōi ato yoinifo iskafakakī: “Israelifāfe, nofeta nākifēkape, a na feronāfake kafāsakī yorāfo ato pārāfōfāsa famiski. Nōko maifo tii anoax ato chakafakī yoimiski. Askatari a Moisés noko yoini anori nikayamakāfe ato fai. Askatari nōko Nios kīfiti pexefā chakafakī mekafai. Askatari nōko Nios kīfiti pexefā sharafinakōifiano chakafāa, a mēra nōko kaifoma griego yorāfo ikimana,” fanifo.

²⁹ Akka taeyoi Pablo ōinifo pexe rasi ano nā Tróximo fe kafāsaito. Nā Tróximo Efeso anoax ini. Na Pablo nōko Nios kīfiti pexefā mēra Tróximo ikikinaki ixō shinānifo aa yamafiano.

³⁰ Nāskakē pexe rasi anoax mekai fetsenifo, nāskafono yorāfo nikaferakani ichonifo. Nāskakaxō Pablo achikaxō Nios kīfiti pexefā mēranao kāimanifo. Nāskata Nios kīfiti pexefā koshikōi feponifo.

³¹ Nāskaxō mā chaima reteifono, romanō anoax sorarofāfe āto xanīfāfe nikani pexe rasi Jerusalén anoafāfe yōachēpeifāfe.

³² Nāskafāfe nikakī a soraro xanīfāfe a afe rafeafōya āfe sorarōfo ichanāfani. Nāskax ato fe koshikōi ichoni yorāfo mēra, a soraro xanīfo āfe sorarōfo fe kaito ōikakī anā tsōa Pablo seteketsanima enerisafanifo.

³³ Nāskata a soraro xanīfāfe mā Pabloki kaxō mā achixō, cadenās rafeta ato metexkere amani. Nāskaxō chipo yōkani tsoamāki, askatari afaa afeska faamāki.

³⁴ Akka askafano yorāfo fanīrira mekai fetsenifo anoris yoinifoma. Nāskai mekai fetseifono soraro xanīfāfe tāpitiroma ini. Nāskaxō sorarōfo mēra ato iyomani.

³⁵ Mā chaima sorarōfo mēra nokoikaino, anoax yorafāfe retēpaiyaifono, sorarofāfe Pablo chishtokaxō iyonifo yorafāfe afeska fanōfoma.

³⁶ Nāskakē keyokōi aho fokani fāsikōi mekafonifo. “Aa chaka reterisafakāfe,” ato faafonifo.

Askafafono yorafāfe ferotāfi Pablo ato yoini

³⁷ A sorarofa ika mēra mā ikimanaifono, a sorarofāfe āto xanīfo Pablo yōkani: “¿Ē mefe pishta mekatiromē?” faito soraro xanīfāfe kemani iskafakī: “¿Griego mekapa mī mekatiromē?”

³⁸ Akka, ¿mīmamē a Ejipto anoa afetiama xanīfo potapaiyanā cuatro mil yorafo tsōa istoma iyonī?” ixō xanīfāfe yōkani.

³⁹ Askafaito nikakī Pablo kemani iskafakī: “Maa, ēma. Ēfi judeoki. Ēfi Tarso anoax fakeakī nā pexe rasi Cilicia mēranoax. Akka na yorafo ē ato yoinō ea yoife,” faito,

⁴⁰ nā soraro xanīfāfe, “Mī ato yoitiro,” fani. Nāskafaino Pablo kipiti ano niinākaḡ mēshainākaḡ, “Mekayamakāfe,” oinoma ato fani. Mā ato nishpafaxō hebreo mekapa iskafakī ato yoini:

22

¹ “Efe yora mīshtichi, ea nikakāfe ē mato yoinō ea chakafafo keskara, ea anā chakafayamanōfo,” ixō ato yoini.

² Hebreo mekapa ato yoiaito nikakani, tsoa pishta tooxinima. Askaifono Pablo anā ato yoini,

³ “Ēri judeo. Tarso anoax ē fakea, Cilicia mai anoax. Akka ē nono Jerusalén anoax yosia, ēfe maestro Gamalielxō ē tāpia. Na Moisés nōko xinifo yoipaoni anori ē yoimis. Mēxotaima ē shinākōimis ēfe ōitifoaxō ē Nios Ifofapaikī. Nā mā Nios Ifofapaiyai keskafakī ēri askafapaoni.

⁴ Taefakī a Jesús Ifofaifo ē ato omiskōimakī ē ato retepaipaoni. Nāskaxō ē ato achixō karaxa mēra ē ato ikimapaoni, feronāfakefoya kērofo.

⁵ A ato Nios kīfixomisāfe āto xanīfofo feta a xanīfo fetsafāfe mato yoitirofo nā ē mato yoiai keskara. Nāfāfe ea kirika kenexō inānifo, nofe yorafo judeofo Damasco anofo ē ato foxotanō. Nāskax ē ari kani a Nios Ifofaifo ato fenaikai, ato achixō Jerusalén ano ato efexiki anoxō ato omiskōimaxiki,” ixō Pablo ato yoini.

Pablo afeskaxō Jesús Ifofamāki ato yoini

(Hch. 9.1-19; 26.12-18)

⁶ Anā Pablo ato yoini iskafakī: “Akka fāi kaikī mē chaima Damasco faikaino, nānoxō xini keya oa luz keskarato nai mēraxō ea chaxakōitani.

⁷ Ea askafaino ē nāmā pakeni. Nāskaxō mekaito ē nikani, ea iskafaito: ‘Saulo, Saulo, ¿afeskakī mī ea omiskōimanimē?’ ea faito.

⁸ Ea askafaito ē yōkani iskafakī: ‘¿Mī tsoamē, Ifo?’ ē faito ea kemani iskafakī: ‘Ēkia Jesús Nazarete anoa, nā mī ea omiskōimanai,’ ea fani.

⁹ A efe foaifāfe luz keskarato ea chaxatanaito ōikani ratenifo. Akka a ea yoi mekaito tsōa nikanima.

¹⁰ Ea askafaito ē yōkani iskafakī: ‘¿Ifo, ē afeskatiromē?’ ē faito, nōko Ifāfe ea iskafani: ‘Fininākaḡata Damasco ano katāfe. Anoxō ē mia yoi kaikai mī afaa afeskafaimākai,’ ea fani.

¹¹ Akka anā ē fēro ōitiroma ini, nā luzpa ea fechaxki mā ea fēxoano. Nāskakē a efe foaifāfe ea mētsoxō Damasco ano iyonifo.

¹² “Nāno feronāfake āfe ane Ananías ika ini. Nāato Nios nikakōixō a Moisés yoini keskara nikakōipaoni. Nānoxō judeofāfe Damasco ano ikaxō aōnoa yoisharapaonifo.

¹³ Ē Damasco ano nokoano ekeki Ananías oni ea ōiyoi. Mā ekeki oxō ea iskafani: ‘Efe yorashta Saulo, anā ōife,’ ea faino koshikōi ē anā fēro ōini. Nāskaxō ē ōisharakōini.

¹⁴ Anoxō ea yoini iskafakī: ‘Nōko xinifāfe āto Niospa mia katoa, a mia amapaiyai keskara mī tāpinō. Askatari āfe Fake sharafinakōia mī ōinō, āfe meka sharafinakōia nikayanā.

¹⁵ Nāskaxō mī ato yoixii Niosnoa, nā maniafo tii anoa, nā mī ōiaifoya, nā mī nikaifo.

¹⁶ Nāskakē samarakakima koshikōi fininākaḡata maotisafe faka mēra ikipakekaḡāfe nōko Ifāfe āfe anēoxō mia chaka soaxonō,’ ea fani” ixō Pablo ato yoini.

Pablo ato yoini a judeofoma mēra Epa Niospa nīchini

¹⁷ Anā Pablo ato yoini iskafakī: “Mē Jerusalén ano anā oax, Nios kīfīti pexefā mēra ē kani anoxō Nios kīfikai. Nānoxō ē ōia oa namakē ōia ē fani.

¹⁸ Ē nōko Ifo ōini ea iskafaito: ‘Nā Jerusalén anoax koshi tsekekaitāfe, mī eōnoa yoiaito mia tsōa nikaima kiki,’ ea fani.

¹⁹ Ea askafaito ē kemakī iskafani: ‘Ifo, mā ea tāpiafo nā ichanāti pexe mēranofo kaxō ē ato achixō karaxa mēra ē ato ikimapaoni a mia Ifofaifo. Askatari ē ato koshaketsapaoni.

²⁰ Askatari a mī inakōi Esteban reteaifono, ēri nāno ato fe ini reteaifono. Nāskaxō ē ato rapati kexexoni.’

²¹ Ē askafaino nōko Ifāfe ea yoini: ‘Fininākaḡata fāi katāfe, mai fetsafo ari chaikōi ē mia nīchikai a judeofoma ari,’ ea fani,” ixō Pablo ato yoini.

Soraro xanīfāfe Pablo kexeni

²² Ato askafaito nikakani, akka fāsikōi yorafo mekainīfofānifo: “Na feronāfake chaka retefe anā niyamanō,” fayana chakafakī mekafanifo.

²³ Nāskakakī ōitifishkikī finayanā fāsikōi mekakakī āto rapati taa taa ayanā fomākīa mapo saakī fetsanifo.

²⁴ Askafāifāfe nikakī a soraro xanīfāfe ato yoini Pablo karaxa mēra ikimanōfo, koshaket-sakaxō, nāskafaifono ato yoinō afeskai a yorafo akiki chakai mekakanimākai.

²⁵ Akka mā metexkereakaxō koshapaiyaifono, a soraro xanīfo fētsa Pablo yoini iskafakī: “¿Tsōa mia yoiamē mā romanō koshanō xanīfo yōkaxoma?”

²⁶ Askafaito nikai a soraro xanīfo āfe xanīfokōi yoikai kani iskafakī: “¿Mī afeska faimē, na feronāfakeri nofe romanō?”

²⁷ Askafaito nikakī soraro xanīfokōi Pablo ano kani yōkai. “¿Mī chanīmamē mī romanōmē?” ixō yōkaito, “Eje, ēri romanōki,” Pablo fani.

²⁸ Askafaito nikakī a xanīfāfe yoini iskafakī: “Ē romanō ixiki kori ichapa ē ato ināni, akka taeyoi ē romanō iyopaonima,” faito nikaki, Pablo kemani iskafakī: “Akka ēfi romanōkōiki,” fani.

²⁹ Ato askafaito nikakani a koiro fichi koshapaiyaifo a makinoax fonifo. Nā soraro xanīfāfe mā tāpiax Pablo romanōkōikē nikai ratekōini cadenānā ato metexkerekamax.

Judeofāfe āto xanīfāfe ferotaifi Pablo yoini

³⁰ Nāskata pena fetsa soraro xanīfokōichi tāpipaikōikī judeofāfe aōnoa afaa yoiāfomākī, a cadenānā menexafo mēpeni. Nāskaxō ato ichanāfani a Niosnoa ato yoisifo ato kexemisfoya, a xanīfokōifo. Nāskaxō Pablo kāimaxō āto ferotaifi nīchini.

23

¹ A xanīfofo ōikī Pablo ato yoini iskafakī: “Efe yora mīshtichi, nā Epa Niospa ea yoikī taefani keskai, nē askakōimis. Ēfe ōiti mēraxō ē Nios shinākōiyana ē sharakōimis,” ixō ato yoini.

² Akka Ananias ato Nios kīfixomis āfe xanīfo ini. Nāato a Pablo ketaxamei nia yoini Pablo apasnō.

³ Askafaito ōikī Pablo kemani iskafakī: “Epa Niospa mia koshai mīkai afaa tāpiama. Mī ano tsaoxō mī ea pārai a Moisés yoini keskara nikaimara ixō. Akka mīroko a Moisés yoini keskara nikakaspakī, mī ea ato apasmana,” ixō Pablo yoiaino.

⁴ a anoxō ōiaifāfe Pablo iskafanifo: “¿Afeskakī a ato Nios kīfixomis xanīfo mī chakafakī mekafaimē?” faifono,

⁵ Pablo ato yoini: “Efe yora mīshtichi, ē tāpiama nato ato Nios kīfixomis xanīfofiano. Akka kirika ano kenekī iskafanifo: ‘Māto xanīfo chakafakī mekafayamakāfe,’ ixō yoinifo,” ixō Pablo ato yoini.

⁶ Nāskaxō mā tāpixō ano fisti ichanāfono saduceofoya fariseofo fāsikōi Pablo ato yoini: “Efe yora mīshtichi, ēri fariseo, ēfe kaiforori fariseofo. Akka ea chakafakī mekafakani, yora naax anā ototirora ixō ē chanīmara faino.”

⁷ Pablo ato yoikī askafaito nikakani, fariseofo fe saduceofo āa ranā feratenānifo. Nāskakanax ichanākanax paxkanānifo.

⁸ Akka saduceofāfe yoisifo: “Naax nō anā ototiroma,” famisfo. Askatari anokai ājirima anorikai nōko yōshima famisfo. Akka fariseofāfe keyokōi chanīmara famisfo.

⁹ Nāskakanax fāsikōi mekainīfofānifo, akka nāno ranāri inifo a Moisés yoikī kirika keneni keskara ato tāpimamisfo. Nāfo fariseofo inifo, nāfāfe niinīfofākaxō yoinifo iskafakakī: “Na feronāfakekai afaa chakafama. Ōitsai, yōshi sharapa yoyiamāki Niospa ājirinī yoiā rakikīa,” ixō yoinifo.

¹⁰ Ato askafaino fāsikōi mekai xatenifoma. Nāskakaxō Pablo achikaxō nini nini akanafono nā soraro xanīfo ratekōini. Nāskakē āfe sorarofa kenamani, ato anoā ifixō anā āfe pexe ano iyoikaxiki.

¹¹ Nā fakishi Pabloki nōko Ifo nokoxō iskafakī yoini: “Pablo, inimafe. Na Jerusalén anoāfo eōnoa mī ato yoisimis keskafakī na Roma anoāfori ato yoife,” fani.

Pablo retexikakī itipinīsharanifo

¹² Nāskata pena fetsa ranāri judeofo yoinānifo Pablo retexikakī. “Nō Pablo retexoma nō foni tenekī taefanō, afaa piāmata afaari nō ayaimakai, noko Niospa retetiroki. Akka mā Pablo retexō chipo nō pixikai,” ikanax yoinānifo.

¹³ Cuarenta feronāfakefo anori yoinānifo.

¹⁴ Nāskakata nā feronāfakefo fonifo a ato Nios kīfixomisfāfe āto xanīfofo fe a judeofāfe āto xanīfofo ikafo ano. Iskafakī ato yoifokani: “Nō yoiā iskafakī: ‘Pablo reteyoxoma, nō foni

teneyoi nō afaa piyamata afaari nō ayaima. Nō askayamaino Epa Niospa noko retetiro,' ixō nō yoia," fanifo.

¹⁵ "Akka iskaratīa mā na xanīfo fetsafo feta, na soraro xanīfo yoikāfe mato ano penama Pablo efenō. Feparaxō yoikī iskafakāfe: 'Nō Pablo yōkasharapaikai noko nīchixōfe nō yōkanō afaa aōnoa yoiafomāki,' ixō yoikāfe. Oaito ōikī nō achixō reterisafanō," fanifo.

¹⁶ Nāskaifono Pablo āfe piaka nikani nō Pablo retenō ikaifono. Nāskax sorarofō mēra kani anoa āfe koka Pablo yoikai.

¹⁷ Mā Pablo nikaxō, soraro xanīfo fetsa kenaxō yoini iskafakī: "Na naetapa xanīfokōi ano iyotāfe, afara yoipai kiki," fani.

¹⁸ Nā soraro xanīfāfe āfe xanīfokōi kenaxō yoini iskafakī: "Na karaxa mēra ikato Pablo ea kenaxō ea yoia na naetapa ē mikiki efenō afara mia yoipai kiki," faito,

¹⁹ nā xanīfokōichi nā naetapa mētsofaixō a fisti iyoxō orixō yōkani: "¿Afaa mī ea yoipaimē? Ea yoife," faito,

²⁰ nā naetāpa yoini iskafakī: "Mā judeofo yoināfo, mia yoixikakī mī penama a xanīfofo ichanāfo ano mī ato Pablo iyoxonō. Mia feparapaikani nō Pablo yōkasharapai aōnoa nō nikasharapai mia fai fekani.

²¹ Akka mia askafaifono ato nikayamafe. Cuarenta feronāfakefo fai nēxpakīa kexekaxō ēfe koka manafoki achikaxō retexikakī. Nō Pablo retexii nō foni tenekī taefanō afaa piyamata afaari nō ayaimakai. Nō askayamaito Epa Niospa noko retetiroki. Akka mā Pablo retexō chipo nō pikai ikax yoināfo, mā itipinīkōikaxō mia manafo mī ato afafaimākai," ixō nā naetāpa yoini.

²² Askafaito nikakī a soraro xanīfāfe nā naetapa nīchini, "Na ea mīa yoiai anori tsoa yoiyamafe," fayanā.

Pablo xanīfo Félix ano nīchinifo

²³ Nāskaxō a soraro xanīfokōichi afe xanīfo rafe kenaxō ato yoini dos cientos sorarofō yoixō nīchinōfo, askatari setenta kamayonō fotanōfo, askatari dos cientos sorarofō ashifofo fotanōfo Cesarea ari fōkani fakishi.

²⁴ Nāskata kamayori ato itipinīfamani a kamaki Pablo tsaoax kanō. Nāskaxō ato yoini kexesharata iyotanōfo xanīfo Félix ano.

²⁵ Nāskaxō kirika kenexō ato ināni a xanīfo Félix foxotanōfo iskafakī kenexō:

²⁶ Efe xanīfo Félix, ēkīa Claudio Lisias, ē mia kirika kenexō fomai mia yoisharayanā.

²⁷ Na feronāfake judeofāfe achixō retepaiyaifono, akka ē nikaita ēri romanōki ikaito, nāskaito nikakī ēfe sorarofō fe kaxō ē ifita.

²⁸ Afaa chakafaamakī ē tāpīpaikī, judeo xanīfofo ichanāfo ano ē iyoita.

²⁹ Anoxō ea yoiaifāfe ē nikaita, na Pablo a Moisés yoini keskara shināima ea faifāfe. Akka afaakai chakafama retapanāfāfe, askatari karaxa mēra ikimapanāfāfe.

³⁰ Akka mē tāpia judeofāfe ea feparapaiyaifāfe Pablo retapai kakī. Nāskakē ē mikiki nīchi. A Pablo chakafaifori nāfori ē mia ari nīchi, afaa Pablo chakafamākī mia yoinōfo. Nā tii ē mia yoi efe xanīfāfe, ixō kenenī.

³¹ Āto xanīfāfe ato yoia keskafakī kexesharakōixō, fakishi Pablo iyonifo Antípatris ano.

³² Askata pena fetsa sorarofō atiri nēteferakani āto pexe ano fenifo a tāe foaifo. Akka a kamayonō foaifo Pablo fe fonifo.

³³ Mā Cesarea ano nokokaxō xanīfo ano Pablo iyonifo, a āto xanīfāfe kirika kenexō manamana, nā xanīfo Félix inānifo.

³⁴ Mā a kirika kene anexō, nā xanīfāfe Pablo yōkani: "¿Mī fanīamē?" faito, "Ē Cilicia anoa," Pablo faito nikakī,

³⁵ anā yoini iskafakī: "A mia mekafakī chakafaifo mā fēkaxō mīōnoa yoiaifāfe ē nikanō mia afaa fakanimākai ē ato manayonō," ixō yoini. Nāskaxō sorarofō yoini Herodes xanīfo ika ano iyoxō Pablo kexesharakōimōfo.

24

Pablo xanīfo Félix yoini

¹ Mā cinco nia oxata nā ato Nios kīfixomis xanīfokōi, āfe ane Ananías, Cesarea ano oni. Judeofāfe āto xanīfo fetsafo fe feronāfake fetsari ato fe kani, āfe ane Tértulo, nāato ato yoixomis ini. Nāfo xanīfo ano fonifo, Pablo chakafakī mekafaxikakī.

² Mā nokoafono xanīfāfe Pablo ifitanōfo ato yoini. Mā efeafono nā Tértulo Pablo yōani. Iskafakī nā xanīfo Félix yoini: "Aicho xanīfo, mī noko ikinā nō isharakōiaki. Aicho mī tāpisharakōiaki nōko maitio anofo mī ato yoisharakōimis noko chakafanōfoma.

³ Fanīmā mīstixō mī askafaito nō nikamis. Nāskakē mī noko sharafamiskē nō mikiki inimasharakōimis.

⁴ Akka ē mia yoikī, ē mia chai samaratapaimakai. Nō mia yoiaito noko pishta nikayofe.
⁵ Na feronāfāke mā nō ōimis ato fekaxtefamīs, fakima mīstifo kafāsakī ato pārafōfāsafakī judeofāfe anoris shinānōfoma. Askatari āto xanīfo nazarenōfo ato mekamamīs.
⁶ Askatari nōko Nios kīfīti pexefā chakafakī mekafaito nikakī nō achita.
⁷ Akka nā sorarofāfe āto xanīfo Lisias nomakinoa kerexkai ifita.
⁸ Anoxō noko yoikī iskafaita: 'Māri Cesarea ano fotakāfe afaa Pablo chakafamākī, a xanīfo yoixikakī.' Nāskakē nō mia ano oa. Yōkaxō mī tāpitiro nā afara chakafakē aōnoa nō yoiai keskara," ixō yoiaifono,
⁹ judeofāferi ano fīsti ichanākaxō, nānoriri yoinifo: "Chanīma," fanifo.
¹⁰ Askafaiāfe nikakī xanīfāfe Pablo āfe mēkemā, "Mekafe," faino, Pablo niinākafā yoini iskafakī: "Inimakōikai ē mia yoi ē afaa chakafamisma. Mē tāpia na mai anoafāfe mī āto xanīfokōi, mā mī xini ichapa aka xanīfokī.
¹¹ Akka mī ato yōkaxō mī tāpitiro ē oxa ichapama doce nia ē ika na Jerusalén ano ē oita anoxō Epa Nios kīfīxikī.

¹² Ē tsofe feratenāito ea ōimīsfoma, Nios kīfīti pexefā mēraxori ē tsoa mekafamisma, ichanāti pexe mēraxori ē tsoa mekafamisma, askatari a pexe rasi mēranoax ē tsofe feratenāito ea tsōa ōimīsmā.

¹³ Na yorafokai āa kaxpa chanītirofoma, ē afaa chakafaitokai ea ōiafoma.
¹⁴ Akka ē mia yoitiro nōko xinīfāfe āto Nios ē shinākī ē kīfīmīs. Nōko Ifo noko yoipaoni keskafakī akka na yorafāfe āa chanīra ea famīso. Akka a Moisés yoikī kirika kenenī nāri ē chanīmara fakōimīs. A Niospa ato shināmanaino yoipaonifori, nāfori ē chanīmara fakōimīs.
¹⁵ Akka na ea yōaiāfe a yora sharafoya yora chakafo nafono Niospa ato otofaxii chanīmara famīso keskafakī ēri nā akaifo keskafakī chanīmara famīs.
¹⁶ Nāskakē mēxotaima ē isharapaikōimīs, shināsharakōita. Niospa mā ea ōimīs, yorafāferi mā ea ōimīso.

¹⁷ "Mai fetsa ari kafāsakī mē xini ichapa akatsaxakī, ēfe mai ano ē oita a afaamaisfo ato kori ināyoi, askatari a Nios kīfīti pexefā mēraxō Nios afara ināxiki.

¹⁸ Epa Niospa noko yoini keskarakōi ē faa. A nō imīs keskai nē askakōikī Epa Niospa ferotaifi afaa chakafatama ē isharakōia. Akka yora ichapa ano efe ikafoma. Askatari anoax tsoa fāsi mekaitama. Akka atiri judeofo Asia mai anoax fenixakakī ea ōiafo.

¹⁹ Nāfāfe ē afara chakafaito ea ōifikaxō ōafeskai afo feafomamē, nonoxō ea yōaxikiki a ē afara chakafaito ōiafo keskara?

²⁰ Akka afo feyamaifono, nā nonofo mī ato yōkatiro ē afaa chakafaito ea ōiafomākī judeofāfe āto xanīfōfāfe ferotaifi.

²¹ Akka ē anoxō fāsikōi mekanākafā ē ato yoita iskafakī: 'Yora naax anā ototiro,' ixō ē chanīmara faito, mā ea chakafakī mekafai ixō ē ato yoita," Pablo xanīfo fani.

²² Akka na Félixpa Jesúsnoa tāpia ini. Nāskaxō shināni iskafakī yoianā: "Mā soraro xanīfo Lisias oxō ea yoisharayonō ē tāpisharanō mī afaa chakafaamākī," ixō yoini.

²³ Nāskaxō xanīfo Félixpa soraro xanīfo fetsa yoini anā Pablo karaxa mēra ikimayonō a āfe yorafāfe pimapaikakī ōipaiyaiāferi ato ikimanō.

²⁴ Mā oxa ranāta xanīfo Félix anā oni āfe āfi Drusila fe. Nā āfe āfi judeo kēro ini. Nāskaxō Félixpa anā Pablo kenamani. Mā oxō Pablo ato yoiaito nikanifo Jesús meka shara afeskaxō nō Jesucristo Ifofatiromākī.

²⁵ Akka Pablo yoini afeskax nō isharatiromākī, askatari afeskax nōa nō kexemesharatiromākī. Jesús Ifofaxma naax omiskōipakenakafō ixō yoiaito nikai Félix ratekōini. Nāskaxō yoini iskafakī: "Iskaratīa katāfe ē mia anā kenaxikakī afaa afeska fayamakī," ixō yoini.

²⁶ Pablo askafaito nikakī Félixpa shināni ea Pablo kori ināno ē kāimatiro ixō. Nāskakī mēxotaima kenapaoni afe mekaxiki.

²⁷ Nāskakī anoxō xinia rafe anifo. Nāskatari Félix tsekeni anā xanīfo inima, fetsa ini xanīfoi, āfe ane Porcio Festo. Akka Félixpa karaxa mēranoa Pablo kāimanima, judeofāfe aōnoa yoisharakōinōfo.

25

Festopa ferotaifi Pablo yoini

¹ Festo nokoni xanīfo ixiki. Mā tres nia ikax Cesarea anoax Jerusalén ari kani.
² Nārixō a ato Nios yoixomīsfāfe āto xanīfōfōfāfe a judeo xanīfofo feta Pablo chakafakī mekafanifo.

³ Nāskaxō Festo yōkanifo Festopa ato yoinō Jerusalén ano Pablo iyotanōfo. Akka atiiito shinānifo fai nēxpakīaxō nō Pablo retenōra ikaxō.

⁴ Askafaiāfāfe nikakī akka Festopa ato kemani iskafakī: "Pablo Cesarea ano karaxa mēra ika. Akka ari mē samama kai," ato fani.

⁵ Nāskaxō ato yoini iskafakī: “Nāskakē māto xanīfofo Cesarea ano efe fotirofo, na Pablo afaa chakafaamakī arixō yoixikakī.”

⁶ Festo Jerusalén ano oxa ranāyoni. Nāskata Cesarea ano anā oni. Nānoxō pena fetsa a xanīfofo tsaomisfo anoxō tsoxō ato yoini Pablo ifitanōfo.

⁷ Mā Pablo oano ōikakī, judeofāfe Jerusalén anoax fēkaxō, akiki fokaxō mekafakī chakakōi fanifo. Askafaifono, “Afaa Pablo chakafamākī ea yoikapo,” xanīfāfe ato faito, tsoa afaa inima Pablokairoko afaa chakafaito ōikanax āamāi noikaspakakī.

⁸ Askafaifāfe nikakī Pablo ato kemani iskafakī: “Ēkai afaa chakafama, a Moisés judeofo yoini keskarari ē chakafamisma, a anoxō Nios kūfiti pexefāri ē chakafamisma, askatari romanō xanīfori ē chakafakī mekafamisma.”

⁹ Askafaito nikakī judeofāfe nōko xanīfo Festo sharakōira fanōfo Pablo yōkani iskafakī: “¿Mī Jerusalén ano kapaimē? Anoxō ē ōikanō mī afaa afeska famākī.”

¹⁰ Askafaito nikakī Pablo kemani: “Ē ari katiroma mīrimāi romanōfāfe xanīfokē nonoxō ea yōkatirofo. Mā mī tāpia, ē judeofo chakafamisma.

¹¹ Akka ē afara chakakōifaito ea ōikaxō ea retetirofo. Ea retekanira ikax ē meseima. Akka ē afaa chakafayamaito āa ea pārakaxō ea ari nīchitirofoma ea retenōfo. Akka ē xanīfo finakōia César ano ē kapai anoxō ea yōkanō.”

¹² Askafaito nikakī Festopa a afe rafeafo feta yoini: “Mā mī yoiaki xanīfo finakōi ari katāfe arixō mia xanīfāfe yōkanō,” fani.

Xanīfo Agripa ano Pablo iyonifo

¹³ Mā ano ikatsaxakī pena fetsa xanīfo Agripa āfe chiko Berenice fe Cesarea ano fonifo Festo fe mekasharai fokani.

¹⁴ Nāri oxa ranāifono, Festopa Pabloōnoa xanīfokōi iskafakī yoini: “Na karaxa mēra feronāfaka fisti ika Félixpa ikimayameano.

¹⁵ Ē Jerusalén ano ikano a Nios ato kīfixomisfāfe āto xanīfofo fe judeofāfe āto xanīfofo ekeki fēkaxō Pablo chakafakī mekafaitafo iskafakī ea yoiyanā na feronāfaka omiskōimafe ea faitafo.

¹⁶ “Ea askafaifono ē ato yoikī iskafaita: ‘Nō romanōfāfe askara feyafamisma nikasharaxano nō tsōa retetiroma. A chakafakī mekafaifo fe ato fe yoināmano, afeskakī aōnoa yoikī chakafakī mekafakanimākai.’

¹⁷ Nāskakē mā nono Cesarea ano feafono, pena fetsa mē xanīfoxō a xanīfofo tsaomisfo ano tsoxō, ē ato manamayamea Pablo ifitanōfo.

¹⁸ Akka afaa chakafaamakī ea yoikapo ē ato fafiaino, tsōa aōnoa afaa chaka ea yoiaama. Afara chakafakī finakē ea yoikanira ixō ē shināfiaino.

¹⁹ Akka aōnoa yoikī askafaifāfe ē nikaita: ‘Na Pablo Niosnoa yoimisfo anori yoima, a feronāfaka Jesús mā nafianino, mā anā otoyamea,’ ixō yoimisfaifāfe ē nikaita.

²⁰ Ē afeskaimē na yoiaifoōnoakai ē tāpiama ixō ē shināita. Nāskaxō ē Pablo yōkaita, Jerusalén ano kapaimākai xanīfāfe anoxō yōkanō a aōnoa yoiaifo keskara.

²¹ “Ē askafaito ea Pablo yoikī iskafaita: ‘Ē anā Jerusalén ano kapaima. Nonoxō ēfe xanīfokōichi ea yōkatiro,’ ixō ea yoita. Ea askafaito ē ato yoita anā Pablo karaxa mēra ikimanōfo, nā ē nīchiaitā,’ ixō Festopa yoiaito,

²² Agripa yoikī iskafani: “Ēri na feronāfaka nikasharapaikōi,” ixō Agripa yoiaito, Festopa kemani iskafakī: “Mī penama nikatiro,” fani.

²³ Nāskata pena fetsa Agripa āfe chiko Berenice fe rapati sharakōi safekanax xanīfāfe pexe mēra ikinifo. Soraro xanīfofo fe a pexe rasi anoa xanīfofori ato fe ikinifo. Nāskafono Festopa Pablo ifitanōfo ato yoini.

²⁴ Mā Pablo efeafono Festopa xanīfo Agripa iskafakī yoini: “Efe xanīfo Agripa, a xanīfo fetsafori nofe ichanāfāfe na feronāfakēia ōikapo. Judeofāfe ekeki efeafō aōnoa afara chaka yoianā. Jerusalén anoxō chakafamisfo, nono Cesarea anoxori chakafamisfo. Mēxotaima fāsikōi mekayanā retefe ea famisfo.

²⁵ Akka afaa chakafakai ē ōima ē retepanā. Akka iskaito ē nika: ‘Ē xanīfo yoipai ē afaa chakafamākī ea yoinō,’ ixō Pablo yoiaito ē nika.

²⁶ Akka afaa chakafaitokai ē ōiama, aōnoa yoikī ēfe xanīfo ē kirika kenexō ē fomapanā. Nāskakē mato ano ē Pablo efea mīmāi xanīfo finakōikē. Efe xanīfo Agripa, mī Pablo yōkaxō mī ea yoitiro nānori yoikī ē xanīfo kirika kenexō fomanō.

²⁷ Akka ē shinā askara sharama na feronāfaka xanīfo ari nō nīchitiroma tāpixonā afaa aōnoa yoiafomākī.”

¹ Nāskakē xanīfo Agripa Pablo yoini iskafakī: “Mī yoitiro afeskakī mia chakafakī mekafafomākī” faito Pablo mēshainākaḡā ato yoini iskafakī:

² “Xanīfo Agripa, ē inimakōi mī ferotaifi yoi na judeofāfe eōnoa afara chaka yoiāfo keskara yoi, na eōnoa yoiāfo keskara mī chanīmara fanōma.

³ Akka mī xanīfokōi mā mī ōimis, nā judeofo imis keskai nō yoināito. Nāskakē ē mia yoi, fekaxtekima mī ea nikayonō,” ixō Pablo yoini.

Pablo Jesús Ifofamax isharyopaonima

⁴⁻⁵ Anā Pablo ato yoini iskafakī: “Keyokōi judeofāfe tāpikōiafo a ē ato mēranoax imis keskara, ēfe mai anoxō tāpikāta, Jerusalén anoxori tāpiafo. Askatari mā tāpiafo, akka mia yoipaikakī mia yoitirofo, ēri fariseo. Nā nōko xinifāfe noko yoipaonifo keskara ē nikakōimis.

⁶ Epa Niospa nōko xinifo yoini keskafakī, a yora naax anā ototirora ixō ē chanīmara faito, ea chakafakakī mato ano ea efafo.

⁷ Ēfe kaifo judeofāfe nā doce xoko fetsafāfe, nā Epa Niospa yoiyoni keskara ōipaikakī manamisfo. Nāskakē Epa Nios kīfimisfo, penata kīfita fakishi kīfiki famisfo. Nāskarifiakī ēri ōipaikī ē manaino, na judeofāfe āa ea pārakakī ea chakafakī mekafamisfo.

⁸ Ķafeskakī mā chanīmara faimamē, Niospa yora nakē otofatiatirono?” ixō Pablo ato yoini.

Pablo ato yoini a Jesús Ifofafo ato omiskōimapaonixakī

⁹ Anā Pablo ato yoini iskafakī: “Ēa shināxō a Jesús Ifofafo ē ato omiskōimapaoni. Nā Jesús Nazarete ano ikano, āfe ane nikakaspakī ē chakafapaoni.

¹⁰ Jerusalén anoxō ē ato askafapaoni. A Nios ato kīfixomisfāfe āto xanīfofōfāfe ea yoiāfono a Nios Ifofafo ichapakōifo ē ato karaxa mēra ikimapaoni. Ato reteafionori nō ato retenō ē ato fapaoni.

¹¹ Mēxotaima ē ato omiskōimapaoni, anā Jesús sharara fayamakāfe ixō. Nā ichanāti pexefo mēraxō ē ato askafapaoni. Ē atoki ōitifishkikī finakōikī pexe rasi fetsafo mēra kaxori ē ato omiskōimapaoni,” ixō Pablo ato yoini.

Pablo yoini afeskaxō Jesús Ifofamākī

(Hch. 9.1-19; 22.6-16)

¹² Anā Pablo ato yoini iskafakī: “Nāskakē achixō ē ato omiskōimapai pexe rasi Damasco ano ē kani, a Nios ato kīfixomisfāfe āto xanīfofōfāfe ea yoikaxō ea nīchiafono.

¹³ Xanīfo Damasco ari fāi kakī ē ōini xini keya nai mēraxō chaxatanaito oa xinī chaxa keskara inima, chaxakī finakōini. Ea kemataima chaxakōia ini, a efe fofaifori ato askafani.

¹⁴ Noko askafaino nō nāmā pakeni. Askata āfe meka ē nikani hebreo mekapa ea yoiāito iskafakī: ‘Saulo, Saulo, Ķafeskakī mī ea omiskōimanimē? Ea mīa iskafai, mīakōi mī chakamei oa fakka ifiki chachixō pae meetiro keskai.’

¹⁵ “Ēa askafaito nikakī ē kemakī iskafaita: ‘Ķifo, mī tsoamē?’ ē faito, nōko Ifāfe ea kemakī iskafaita: ‘Ēkīa Jesús, ea mīa omiskōimamis.

¹⁶ Fininākaḡāfe ē mikiki nokoaki mī ea Ifofanō. Askatari na mī ōiai keskara mī ato yoinō, a ē mia chipo ōimanai keskarari.

¹⁷ Ē mia kexesharaxii judeofāfe mia retepaiyaifono, yora fetsafāferi mia askafaifono ē mia kexesharaxii. Nāskakē ato mēra ē mia nīchi.

¹⁸ Nāskakē ato mēra ē mia nīchi, eōnoa mī ato yoinō anā fakish mēra nia keskara inōfoma, askatamaroko penata nia keskara shara inōfo, Satanás chakata ato yoiāito anā nikayamanōfo, askatamaroko Nios Ifofanōfo. Nāskakaxō ea chanīmara fakaxō afara chakafakat-saxakakī āto chaka xatekanax Niospa yoini keskai efe ipaxanōfo,’ ixō Jesús ea yoini,” ixō Pablo ato fani.

Jesucristo yoiāito namakē ōia keskarafaxō Pablo nikakōini

¹⁹ Anā Pablo ato yoini iskafakī: “Ēfe xanīfo Agripa, ē nikakaspanima a ē namakē ōia keskarafaxō nī mēraxō ea yoiāito.

²⁰ Damasco anoxō ē ato yoikī taefani Jesúsnoa meka shara ato yoikī. Nāskata Jerusalén anoafori ē ato yoini, Judea mai anoafori ē ato yoini. Askatari a judeofoma ē ato yoini iskafakī: ‘Māto chaka xatekāfe Nios Ifosharakōifaxikakī, askaxori afarafo shara fakī ato ōimakāfe mato chanīmara fanōfo mā Nios Ifofasharakē,’ ixō ē ato yoiāito,

²¹ judeofāfe ea achinifo Nios kīfiti pexefā mēraxō ea retepainifo.

²² Akka ea retepaiyaifono Epa Niospa ea kexesharani, iskaratūari ē isharakōia Niosnoa ato yoiyanā. A xanīfokōifoya a afamafori ē ato yois. Afaa fetsa ē yoisisma. A ato Niospa shināmanaino Moisés feta yoipaonifo anori fisti ē yois.

²³ Iskafakī ato yoipaonifo, na Niospa nīchia Cristo omiskōiax naxii. Mā nafiāx anā ototixii, mā ototō ato yoisharax afeskax Epa Nios fe ipaxatirofomākī, judeofoya a judeofoma,” ixō Pablo ato yoini.

Pablo Agripa shināmapaini akairi Jesús Ifofanō

²⁴ Pablo yoikī askafafiaino, Festopa mekatimafani iskafakī yoini: “Pablo, mā mī fekax-tekōia mēxotaima kirika fisti anekī tāpikōiax,” fani.

²⁵ Askafaito nikakī Pablo kemani iskafakī: “Ēfe xanīfo Festo, ē fekaxtemisma. Askataro- maroko na ē yoiari anori sharakōi, chanīmakoī ē mato yoi.

²⁶ Na ē mato yoiari anori nōko xanīfo Agripa mā tāpikōia a ē Jesúsnoa yoimis anori. Nāskakē xafakiakōi āfe ferotaifi ē yoi, akka mē tāpia na ē yoiari anori nāatori mā tāpia. Nā ē yoiari anori ē nikamisma mā itiroma onekai ē yoimisma.

²⁷ Ēfe xanīfo Agripa, a Niospa ato shināmanaino yoipaonifo keskara, ėmī chanīmara faimē? Akka ē tāpia mī chanīmara fai,” ixō Pablo Agripa yoini.

²⁸ Askafaito nikakī Agripa kemani iskafakī: “Mā mī ea chanīmara famakerana Jesús Ifofafe,” ixō yoini.

²⁹ Askafaito anā Pablo yoini: “Iskaratīa iyamai afetiāra ea keskara mī inō ē fichipai, askatari nā mā ea nikaifo keyokōi ea keskara mā inō. Nōko Ifo Jesús Ifofai nāskafiax karaxa mēra mā ikiyamanō ē imis keskai. Nānori ē mato Epa Nios kīfixomis,” ixō Pablo ato yoini.

³⁰ Ato askafaito nikai xanīfokōi fininākafani, xanīfo fetsa fe, Bereniceri ato fe askani, a ano tsaoafori ato fe fininīfōfānifo.

³¹ Nāskakanax ori fokanax āa ranā yoinākani iskanifo: “Na feronāfākekai afaa chakafama afeskakīkai retetirofoma, askatari afeskai karaxa mēra itiroma.”

³² Nāskaxō Agripa Festo yoini iskafakī: “Na feronāfāke nō kāimakerana, ē xanīfo César ari kaimakai noko faino,” ixō Agripa Festo yoini.

27

Pablo Roma ari nīchinifo

¹ Nāskakē shināxaxō Italia ano noko nīchinifo. Pablo yafi a afe karaxa mēra imisfo soraro xanīfāfe āfe ane Julio ato kexenō. Nā sorarofo, “Xanīfo finakōia kexemisfo,” ato famisfo.

² Nānoax kanōanāfānē nō nanekaini. Nā kanōanāfā Adramitio fai fotoa anoax oaino mā itipinīkōiax Asia fai fotoa ano kaino. Aristarcori nofe ini, nā Aristarco Tesalōnica anoax ini, Macedonia mai anoax.

³ Nānoax kaax pena fetsa Sidón fai fotoa ano nō nokoni. Nānoxō soraro xanīfāfe āfe ane Julio nāato Pablo noikōikī iskafani: “Mefe yorafo kaxō òitāfe afāfe nā mī fichipaiyai keskara mia inānōfo,” ixō yoini.

⁴ Nāskata Sidón anoax nō anā kanōanāfānē kaino, nēfefanē noko akaino nā fakafā nakirafe mai toomāfā āfe ane Chipre aōri nō kani, takai fetsaxomāi noko nēfefanē katimafaino.

⁵ Askata mā nō kakī Cilicia yafi Panfilia fakafā kesemēkōi nō finōfaini. Askata pexe rasi Mira ano nō nokoni. Nā pexe rasi Mira Licia mai anoax ini.

⁶ Nānoxō a soraro xanīfāfe kanōanāfā fetsa fichini Alejandria anoax okē. Nā kanōanāfā Italia anoax kaino, nāo noko naneni aō nō kanō.

⁷ Fenāmāshta kai nō oxa ranākōini, nō kanōanāfā tōfei nō xokenākōini. Nāskax pexe rasi Gnido okiri nō nokoni. Anoxō nēfefanē noko anā akaino, pexe rasi Salmona okiri nō finōfaini. Nā Creta anoax fakafā nakirafe mai toomāfā okiri nō kayakeni.

⁸ Nāskata nēfefanē noko katimafaino nō samarakakōi nō fekaxtekōini. Nāskata nō nokoni pexe rasi āfe ane Buenos Puertos ano. Pexe rasi Lasea chaima ini.

⁹ Nāskai mā nō ano samarakōiano, mā mechakaino fakafā pooiki meseniaito òikī anā katiroma meeki Pablo ato yoini

¹⁰ iskafakī: “Xanīfōfōfāfe, nō katiromaki mesekōi iki kiki mē tāpia. Na kanōanāfā yafi nōko afama mīstiffo nō fenotiro, askatari nōri nō āsai fetsetiroki,”

¹¹ ato faino akka tsōa Pablo nikanima. Akka na kanōanāfānē ifāfe yoini: “Maa. Nō meseima, nō āsaima. Nō kanō fokāfe,” ato fani. Ato askafaino nā sorarofāfe āto xanīfāfe nā kanōanāfānē ifo nikani. Nā rafeta Pablo nikanifoma.

¹² Akka nā fai fototai shara inima anoxō mechaka finōpaifiaifono nāskakē anoxō shinānifo: “Nō nonoax kanō Fenice ano,” ixō shinānifo. Nā pexe rasi Fenice Creta mai anoax ini.

Nēfefanē fakafā anoxō ato ani

¹³ Nāskaxō shinānifo: “Anā nēfefaima kiki, fenāmāshta nefei kiki na nēfe nō kanō,” ikax yoinānifo. Nāskata nānoax mā nō kakī Creta ketokonōkōi nō finōfaini.

¹⁴ Akka mā nō kaino chipo nokoki nēfefākerakī, fakafā pooiki kanōanāfā rafe rafe ani.

¹⁵ Noko askafaino fakafā ketokonō nō kapaiaino, noko katimafani. Nāskakē nā nēfefanē nā iyopaiyai ari noko iyoni.

¹⁶ Noko askafaino nā fakafā nakirafe mai tōo efapama āfe ane Cauda nō finōfaini. Nāno nō finōfainaino anā noko nēfe fāsi anima. Nāskakē a kanōa kafāshara chirotamea fāsi kerexkai kanōanāfā xaki mēra nanenifo.

¹⁷ Mā askafakaxō risfi efapato kanōanāfā nexasharakōinifo ato nēfe toōxayamanō. Nexakaxō āto sama poteti pekakaxō kanōanāfā mēra rātanifo, nēfe noko iyoyamanō nā mashi āfe ane Sirte ano ikaxō, “Nēfe noko fakirira iyoikanōra,” ikaxō. Nāskakaxō kanōanāfāki nexakaxō āto afeskarafakafānaki nōtanifo, nato nā noko iyopaiyai ari noko iyoikanōra ikaxō.

¹⁸ Akka pena fetsa anā nokoki nēfefani, nāskakē nā kanōanāfā mēranoa āto afama mīshtifo fakafā naki potaketsanifo.

¹⁹ Askakāta mā tres nia ikano nēfefā nishpayamaito ōi kakī āto risiffoya āto firofo, āto fitifo, āto samafo, fakafā naki potakī mitonifo.

²⁰ Nāskai nēfefā nishpayamaino xini yafi fishifo nō ōitiroma ini, nēfefanē noko ōitimafaino. Nāskatari anā afaa nō shinānima mā nō āsai fetseira ikax.

²¹ Nāskakī mā nō foni tenekī ranā faano, Pablo niinākapā noko yoini iskafakī: “Efe yora mīshtichi, nō afeskakeranama na Creta anoax fena foyamakāfe ē mato fafiaino mā ea nikaitama. Nōko afama mīshtifokai nō fenokeranama, mārikai omiskōikeranama.

²² Nāskakē rateyamakāfe. Mā āsaimakai. Kanōanāfā fisti fakafā mēra iki kiki.

²³ Na fakishi Niospa āfe ājiri ekeki nokoakī Niospa nīchiano, nā Niosfi ēfe Ifokōikī, nā ē yonoxomis.

²⁴ Ea iskafakī yoiakī: ‘Pablo, rateyamafe. Mī xanīfo César ano kaikai ato mia yōkanō mī afaa chakafamākī. Mīoxō Epa Niospa na kanōanāfā mēra mefe foaifo ato kexesharai kiki afeskakanima kiki,’ ixō ea yoiaki.

²⁵ Nāskakē ē mato yoiakai efe yora mīshtichi, ratekakima inimakāfe. Epa Niospa ea yoiaki keskara ē chanīmara fakōimiski. Mē tāpiaki tsoa āsaima kiki mā ea ājirinī yoiaki.

²⁶ Akka fakafā nēxpakā mai toomāfā anoax nōko kanōanāfā tooxai kiki,” ixō Pablo ato yoini.

²⁷ Mā nō catorce nia finōta fakafā āfe ane Adriático ano nō nokoni. Nāskakē nānoxō nēfefanē nā noko iyopaiyai ari noko iyoikaino, nā fakishi fistichi yamenake kafanaino a kanōanāfā mēra yonomisfo yoinānifo: “Mā nō mai ano nokoikaira,” ikanax.

²⁸ Nāskakaxō āto tanātini faka noamākī ixō meenifo. Mā meekaxō ōiafo treinta y seis metros ini, askata afianā ori fokaxō meeafō veintisiete metros ini.

²⁹ Nāskakaxō mesekakī nō tokirinīfakī nokoi katirora ikaxō, cuatro faxō āto firopafāfo nexakaxō kanōanāfāki chenexi fakaxō fakafā naki potanifo, noko nēfefanē iyoyamanōra ikaxō. Nāskakaxō Epa Nios kīfinifo koshi penanōra ikaxō.

³⁰ Nāskaifono akka a kanōanāfā mēra yonomisfo onefaipainifo kanōanāfā mēranoax. Nāskakē a kanōanāfā mēranoa a kanōa kafāshara fotomapainifo. Nō firopafāfo nexaxō kanōanāfā renexete faxō nō fakanaki potaira ikaxō ato feparapainifo.

³¹ Nāskaifono Pablo soraro xanīfo yoini, āfe sorarofoya iskafakī: “Nafo kanōanāfā mēra nēteyamaifono tsōa mato anā iyoyamaino, mā āsai mitokomei,” ato faino,

³² sorarofāfe a aō kanōa fotomapaiyai fo risfi xatenifo a kanōa fakanaki pakeano fāka fōtanō.

³³ Nāskata mā penaino Pablo shināxō ato yoini afara pishta pinōfo. Iskafakī ato yoini: “Mā nō nomīko rafe akaki nēfefā nishpaira ixō, manayanā a mā pimis keskafakī mā afaa piamakī.

³⁴ Ē mato yoiakai pikāfe. Nō piax shara nō itiroki anā mātō yora kerex inō. Nō afeskaimakai,” ixō ato yoini.

³⁵ Ato yoiakī askafata pāa tso mainīfōfā āto ferotaifi, Epa Nios kīfikī iskafani: “Aicho Epa Niosi, mī noko kexesharaki,” fata ato pāa pikīni.

³⁶ Ato askafaino inimakōiyānā anā ratekakīma akairi pinifo.

³⁷ Akka nā kanōanāfā mēra docientos setenta y seis yorafo nō ini.

³⁸ Mā pii māyākōikāta ato trigofō fakafā naki potanifo, kanōanāfā xaka inō.

Kanōanāfā ikini

³⁹ Mā penaino a kanōanāfā mēra yonomisfāfe, mā mai fichifikaxō tsōa tāpinima. Akka a fakafā chitotanā anoa mashi fichikaxō, “Ono nōko kanōanāfā nō rītiaki kanō,” inifo.

⁴⁰ Nāskakata a aō kanōanāfā nexea āfe risfi xatekaxō nānoa ōifainifo. Nāskatari āto fitifo pekaketsanifo kanōanāfā mēstekōi iyoikanō. Nāskata afianā kanōanāfā rechokoki āto samapafā poteinīfōfānifo ato nēfe iyoikanō. Nāskax mā fōkakī mashi chaima fanifo.

⁴¹ Akka mā fofaifono kanōanāfānē mashi tsakax nāno rakani. Refokirixori mashi tsakakōia ini, pishta ferōitiroma. Nāskakē aō chipokirinoax toxai fetseni fāsikōi fāfakā poo ikaino.

⁴² Nāskaino sorarofāfe a karaxa mēra imisfo ato retepainifo, tsoa pishta ichoyamanō. “Keyokōi nō ato retenō,” ikax yoinānifo.

⁴³ Akka a sorarofāfe āto xanīfāfe Pablo retepaikīma, “Ato reteyamakāfe,” āfe sorarofa fani. Nāskaxō ato yoini iskafakī: “Fatoto mā faka feakī tāpamāki faka feafaitakāfe mashi ano nokoxikakī.

⁴⁴ Akka a faka feakī tāpiafoma tii na kanōanāfā kaxkē aō nonoax fonōfo,” ixō soraro xanīfāfe ato yoini.

Nāskakē keyokōi āsaxma mashi ano nokonifo.

28

Pablo mai toomāfā āfe ane Malta ano ini

¹ Mā nō keyokōi fāfakā kesemē nokoxō, nō tāpini nā fāfakā nēxpakīa mai toomāfā āfe ane Maltakē.

² Nānoxō keyokōi noko ifisharakōinifo. Nānoax nokoki oi ikaino, matsikōi ini. Nāskakē anoxō chii ketefakaxō. “Yoofēkāfe,” noko fanifo.

³ Pablo nānoxō karoya shano ikōferani chii ketefakī. Mā chii ketefaino chii xanamei shano kāikerani oxō mifiki chachini. Mā mifiki chachiax aō neetani.

⁴ Pablo āfe mifi shano ronokē ōikani āa ranā isakai fetsenifo: “A na feronāfāke ato retemis rakikīa. Fakafā anoax nokosharafaino, mā Niospa shano chachimana nai rakikīa,” ikanax yoinānifo.

⁵ Akka Pablo metashkiri itakī shano chii nēxpakīa potani. Shanopa chachifiano Pablo paemenima.

⁶ Nāskakē keyokōichi ōiketsanifo faraxinākafanax naira ikaxō. Akka faraxiyamaito ōikakī, iskafanifo: “Nakai retemīsamisma, nafi nioski,” ikanax yoinānifo.

⁷ Anoxō shinā nā xanīfo Publio chaima ika ini. Nānori yorafa afe ikafo ini. Nā xanīfāfe āfe pexe anoxō noko ifisharakōixō noko pīchasharakōixoni, tres nia ano nō oxaino.

⁸ Nānoax Publio āfe apa isinī iki rakani, yonayanā chixoi. Nāskaino Pablo ōikai kaxō Epa Nios kīfixota āfe mifi māmāsharani.

⁹ Pablo sharafaito nikakanax a isinī ikaifori nā ika anoax feafono Pablo ato sharafapani.

¹⁰ Ato askafaito ōi kakī anoxō afama mīshtifo noko ināketsanifo. Nāskata mā nō ato makinoax kai kanōanāfā mēra nō naneikainaino, anā afama mīshtifo noko inānifo a nō kakī pifoikai.

Pablo Roma ano nokoni

¹¹ Nāskata anoxō mā nō tres oxe akax, kanōanāfā mēra nō naneinākafāni. Nā kanōanāfānē nā mai anoxō mechaka finōmani. Nā kanōanāfā Alejandrīa anoa ini. Nā kanōanāfā recho koki afarafa tsaoxō fonifo na nōko niosra ikaxō, fetsa āfe ane Castor ini, fetsari Pólux ini.

¹² Nāskax nō nokoni Siracusa fai fotoa ano, nāno nō tres nia oxayoni.

¹³ Nānoax kanōanāfānē nō anā kai fakafā ketokonō pishtakōi nō kaax Regio ano nō nokoni. Nānoxō pena fetsa nēfēfānē noko ani a xini oaikirinoaxma oxō. Nāskakē nānoax kaax pena fetsa nō nokoni Puteoli ano.

¹⁴ Nānoa a Jesús Ifofaafō nō ato fichini nāfāfe noko yoikī iskafanifo: “Nono nofe oxa ranāyokāfe,” noko fanifo. Nāskata nānoax ato makinoax kaax chipo Roma ano nō nokoni.

¹⁵ Mā nō kaino nō Roma ano nokoyoamano a Jesús Ifofamisfāfe Roma anoxō nikaketsanifo. Nāskakē nokoki nokoifekani fenifo. Atiri pexe rasi Foro de Apio anoax fenifo, atiri pexe rasi Tres Tabernas anoax nokoki nokonifo. Askāifāfe ōikī Pablo Epa Nios kīfikī iskafani: “Aicho Epa Niosi, mī yorafa ekeki nīchiaki,” fani inimakōiyānā.

¹⁶ Mā nō Roma ano nokoano, xanīfāfe ato yoini pexe fetsa mēra ares Pablo inō, anoxō soraro fistichi kexenō.

Roma ano Pablo ini

¹⁷ Mā nokoitaxakakī ano tres nia ixō, Pablo judeofo xanīfofo Roma anoa ato kenamani fenōfo. Mā fekanax ichanāfono Pablo ato yoini iskafakī: “Efe yora mīshtichi, ea nikakapo ē mato yoinō. Ēkai judeofo chakafakī mekafamisma. A nōko xinifo ipaonifo keskarari ē chakafakī mekafayamafiakē, ea achikaxō Jerusalén anoxō romanōfo ano ea nīchinifo.

¹⁸ Nānoxō mā ea yōkakaxō, ea nīchipainifo, ēkairoko afaa chakafakē ea retexikakī.

¹⁹ Ea askafafono, akka judeofāfe ea iskafayameafo: ‘A chaka kāimayamafe,’ ea faifono, ē xanīfofo yoini iskafakī: ‘Ē xanīfokōi César ano kapai ato ea yoinō, ē afaa chakafayamafiakē efe yorafāfe eōnoa yoiāfo keskara,’ ixō ē ato yoini.

²⁰ Ē mato kenamana mato fe yoināxiki. Akka mā mā nikai ēfe kaifo israelifāfe, nā noko nimamis Niospa Fake nō manamis. Nāskakē mā mā ea ōi nonoxō ea metexkere akafono,” ixō Pablo ato yoiāto,

²¹ nikakakī iskafanifo:

“Judea anoxō mīōnoa tsōa noko kirika kenexō femama. Nofe yorafo judeofori ariax fēkaxō mīōnoa afaa chaka noko yoiafoma.

²² A mī yoiai keskara nō tāpipai, akka mā nō nikamiski, a maniafo tii anoxō a Jesús Ifofamisfo chakafakī ato mekafamisfokī,” ixō ea yoinifo.

²³ Nāskakata, “Pena fetsa nō mefe ichanāfainakaki,” fanifo. Nāskakē yora ichapakōi a Pablo ika ano fenifo nikai fekani. Mā feafono Pablo ato yoikī yātafani, Nios xanīfoōnoa ato yoikī. Afeska faxoma Jesúsnoa ato nikamapaikōini, a Moisés keneniōnoa ato yoita, a Niospa ato shināmanaino kenenifoōnoari ato yoini.

²⁴ Pablo ato yoiaito ranārito nikanifo, akka ranāritori nikakaspanifo.

²⁵ Nāskakē āa ranā fochishpanā faatanānifo ares shinākanima. Nāskakata mā fopaiyaifono Pablo ato yoini iskafakī: “Isaiás chanīmakoī ato yoipaoni Niospa shināmanaino. Nāōxō Niospa Yōshi Sharapa mātō xinifo yoini, iskafakī:

²⁶ Kaxō mī kaifo yoitāfe iskafakī: ‘Mā mā nikakōifikī mā nikasharaima; mā mā afara sharafo ōifikī mā ōisharaima.’

²⁷ Mā na yorafāfe nikafikakī shināsharakanima, āto ōiti fēstokōi. Mā ōifikakī tāpipaikanima, na ē yoiai keskara chanīmakoī ōifikakī. Askatari nikakōiafoma ē ato chaka soaxopanā efe nīpaxanōfo,

ixō Niospa Yōshi Sharapa Isaiás yoini.

²⁸ Na ē mato yoiai keskara tāpikāfe, Epa Niospa noko nimapaiyai keskara mā nikayamaino a judeofoma ē ato yoi afāfe ea nikakōixikani,” ixō Pablo ato yoini.

²⁹ Pablo ato yoikī askafaino, judeofo mā fokani āa ranā feratenāfonifo.

³⁰ Anoxō Pablo xiniya rafe ani. A pexe ifo Pablo kori ināni a mēra ixiki. Nānoxō ato ifisharapaoni ōikai fofaifono ato yoisharayanā.

³¹ Nānoxō ranotamakōi ato yoini afeskaxō Epa Nios xanīfāfe noko ĩkitiromāki. Nōko Ifo Jesucristoōnoari ato yoiaito tsōa xatematiroma ĩni. Nā tii.

Pablo Roma Anoafu Kirika Kenexō Fomani

Pablo Jesús Ifofaafu Roma anoafu kirika kenexō fomani

¹ Roma anoafāfe, ē mato kirika kenexō fomai. Ēkīa Pablo, ē Jesucristo yonoxomis. Niospa ea nīchini ē aōnoa yomis inō, āfe meka shara Jesúsnoa yoinō.

² Niospa āfe Fake nokoōnoax naiyonōpokoai tāpixō a Niospa meka yoimisfāfe meka kenenifo. Jesúsnoa meka shara yoinifo.

³ Niospa Fakeōnoa meka shara kenenifo a inōpokoai keskafakī. Jesús Niospa Fakeōifiax David āfe xini ini. Nā David nōko xinifāfe āto xanīfokōi ipaoni.

⁴ Niospa afama mīshti fatiroxakī nōko Ifo Jesucristo otofani. Otofaxō ato ōimani nāmāi Niospa Fakekē. Niospa āfe shināmā āfe Yōshi Sharaōxō āfe Fake otofani. Ato ōimani Jesúsmai āfe Fakekē.

⁵ Jesucristoxō noko noi. Noko noikī āfe shinā noko ināni. Nāskaxō noko nīchini Jesúsnoa yomis nō inō. A judeofomari a xoko fetsafori afāferi Jesús chanīmara fanōfo nō yoiaino. Jesús chanīmara fakaxō nikasharakōinōfo.

⁶ Māri mā mā Jesucristo chanīmara faito mato nīchini mā afe yorafo inō.

⁷ Roma anoafāfe, ē mato kirika kenexō fomai. Niospa mato noixō mato ifini mato chaka soaxoxiki afe yorafo mā inō. Mato noikī mātō shinā mēraxō mato shināsharamanō. Epa Nios feta nōko Ifo Jesucristo mato askafanō.

Pablo a Jesús chanīmara faafu Roma anoafu ato ōipaini

⁸ Ē mato yoinō. Nikakapo. Keyokōichi a maitio anoafāfe mato yoimisfo, mā Jesús chanīmara faito ōikakī. Nāskakē, “Aichora,” ē Nios famis. Jesucristoxō, “Aichora,” ē famis.

⁹ Ēfi Nios yonoxokōikai. Chanīmakōi ē yonoxonikai. Ē feparanima. Āfe Fakeōnoa ē meka shara yomis. Pena tiifi ē mato Nios kīfixōfafāini. Niospa tāpia.

¹⁰ Ē mato ōisharapai. Nāskaxō ē Nios kīfixōfafāini ē mato ano kapaikī. Akka ē kai, ē kayamai ē kaima. A Niospa ea nīchpaiyaino ē katiro.

¹¹ Ē mato ōisharapai. Ōikaxō ē mato Niospa meka yoipai. Niospa āfe Yōshi Sharaōxō ē mato yoipai mā chanīmara fakī finakōinō Jesús Ifo sharakōi faxiki.

¹² Nāskax Jesúsnoax nō inima faatanānō. Mā Jesús chanīmara faino ē inimatiro. Nāskarifiakī ē chanīmara faino mā inimatiro.

¹³ Efe yorafāfe, ē mato tāpimapai mā tāpinō afeskaxma ē matoki kapai ē katiroma mei, ē kamisma. Mē kāta katamis ifiakeranax afara fetsa aki ē kamisma, mato ari kapaifi. Mai fetsa aria ichanāmisfo judeofoma nāfo ē Jesús ato chanīmara fama. Nāskari fakī ē matori askari famapai.

¹⁴ Jesús ea yoia ē āfe meka keyokōi ato yoinō. Nā kirika kenekī tāpiafo ita a kirika kenekī tāpimafori ē ato yoikai. Nafafoya a nafamafori ē ato yoitiro. Ē ato yoiaito nikakakī Jesús chanīmara fanōfo.

¹⁵ Nāskari fakī ē Jesúsnoa mato Roma anoari yoikapaimis.

¹⁶ Jesúsnoa meka shara yoipaikai ē ranotiroma. Āfe meka xafakīa shara. Noko Niosnoa tāpimatio a tsōa atiroma keskara Niospa atiro. Nō chanīmara faito Jesucristoxō Niospa noko chaka soaxotiro nō afe ipaxanō, nō fenoyamaino. Taefakī judeofāfe nikakōinifo. Akka iskaratīari judeofomafāferi nikakani afe ipaxakakī.

¹⁷ Nā Jesúsnoa meka sharaōxō Niospa noko ōimatiro. Nō Jesús chanīmara faito Niospa nōko chaka noko soaxotiro. Nānori kenenifo iskafakakī: “A Jesús chanīmara fakōinaifo Niospa āto chaka ato soaxō afaa chakafamisma keskara ato ōi. Nāskax shara ipanakafo Nios fe.”

Keyokōi yorafo chakamisfo

¹⁸ Niospa meka nikakaspaiāfe a chakafamisfo Niospa ato ōimani ato omiskōimakī. Niospa meka chanīmakōifiano nikakaspakata yora fetsafori ato Niospa meka chanīmara ato famakaspakani.

¹⁹ Nōko Nios afe keskaramākī tāpipaikī nō tāpitiro. Akka Niospa noko ōimamis.

²⁰ Nō Nios ōiyamafixō nō tāpitiro Niospa keyokōi onifani, nāmāi Nioskōi ixō. Nā Niospa onifani ōikī nō tāpitiro tsoa fētsa keyokōi atiroma. Nios fistichi atiro, afama mīshti. Nāskakē Nios nikakaspaiāfe Nios chanīmara fapaikanima, a onifani ōifikakī. Nāskakē Niospa ato omiskōimani nāfāfe Nios tāpipaikanima. Akka tāpipaikī tāpikeranafo.

²¹ A Niospa onifani ōifikakī iskafakī yoipaikanima: “Nios fistichi keyokōi onifani. Aicho, Nios finakōia,” ikaxō shināpaikanima. Nāskakaxō āto shinā mēraxō afara shināsharakanima. Afara chaka fisti shinākani āto ōiti fakish keskara ikaxō.

²² “Nōfi tāpikōiaki,” ifiakaxō tsōa shināsharaima.

²³ Niosfi sharakōikī shara enenakama. Nāfi isharapakenakakī. Isharakōifiaito Ifofapaikanima. Askata yorafo isharayamaino yora fetsafāfe afara yora keskara onifakaxō, “Na nōko Niosra,” ikaxō kifimisfo Nioskōi kifikaspakakī. Yoinā keskara onifakaxō, peya keskara onifakaxō, rono keskarari onifakaxō, nāskarafa onifakaxō, “Na nōko Niosra,” ikaxō kifimisfo.

²⁴ Askafaifāfe ōikī Niospa anā ato Ifofamaima. Nā chakafapaiyaifo fisti akaifāfe ōikī Niospa ato xatemanimā. Nāskax āa ranā fekaxte faatanākani.

²⁵ Nios fistifi chanīmismaki. Nā chanīyamafimiskē tsōa Ifofapaima nā fisti nōko Nios sharakōifiano. Niospa keyokōi onifafianino tsōakai Ifofapaima. Akka nā Niospa onifanifo, “Nā nōko niosra,” ikaxō kifitaifamisfo. Tsōakai Nioskōi Ifofapaima, mēxotaima sharafinakōia ifamiskē. Nāskakē, “Epa Niosi, mī sharafinakōia,” ikaxō yoikani. Askapakexapainōfora.

²⁶ Askafaifāfe ōikī Niospa ato chaka xatexonama, afara chakafapaiyaifo fisti akaifāfe. Niospa noko onifani feronāfake yafi kēro, kēro feronāfake fe inō. Askafafianino kēro rafe fichināpaikani chaka ikani.

²⁷ Askatari feronāfake rafe fichināpaikanax chotanākani, kēro tanatama. Askax chaka ikanax omiskōikani.

²⁸ Nāskakakī chaka fisti shināpaikani. Anā Nios shināpaikanima. Askaifāfe ōikī Niospa ato potai nā apaiyai keskara fakī chaka fisti shinānōfo.

²⁹⁻³¹ Chaka fisti feyafakanax chaka shinākani. Chaka faatanāi xatekanima. Feronāfakēfāfe āto āfima fichipaikī chotamisfo. Kērofāferi āto fenema fichipaikī chotamamisfo. Nāskaxō afara shara āa atonā fisti fipaikani. Fetsafo chakafakī xatekanima. Fetsafo xītipaimisfo. Yora retemitsamis ita, setemitsamis ita, feratenā faatanāmisfo. Ōitifishkikī feyafamisfo. Ato pārafōfāsafamisfo. Ato noikaspamisfāfe fetsafonā fiapaikakī. Ato noikaspamisfo. Chanīmisfo fetsafo pāramisfo. Nios noikaspayanā tsoa noimisfoma. Ichamitsamisfo. Kakapaimisfo, āa kakamepaimisfo. Afara fetsa chaka shināi iskakani: “Afaa chaka fetsa ē afeska faimēti,” ixō shinākani. Āto apa yafi āto afa nikakaspakani. Afara shara shinākanima. A yoiāi keskara amisfoma. Āa chanīmisfo. Tsoa noikanima. Ōitifishkikax fetsaki raemisfoma.

³² “Askakanax nakanax omiskōipakenakafo,” ixō Niospa anori yoini. Niospa yoiā keskara āto shinā mēraxō tāpifikaxō afara chaka xatemisfoma. Askata fetsafāfe afara chakafaifāfe ōikani atoki inimamisfo.

2

Niospa mēstekōi noko ōixō yoitiro: “Nāto afaa chakafamisma. Akka natori chakafamis,” noko fatiro

¹ Ēfe kaifo judeofāfe, ē mato yoinō. Mā fatorafāfe yoi iskakī: “Na keskara yorafāfe afara chakafaifo omiskōipakenakafo,” ixō mā shināmis. Anori shināfikī māri ato keskarari afara chakafamis. Nāskata, “Nō afaa chakafamisma,” mā itiroma.

² Mā nō tāpia, Niospa ato tāpikōia a yorafāfe chaka shināifo. Nāskakē ato omiskōimaxii. Niospa tāpikōixō chanīmakōi yoi.

³ Mā, “Nato afara chakafara,” ixō māri mā aki. ŹNāskakī mā shināimē: “Niospa noko omiskōimanima,” ixō? Akka nāskakē ē mato yoi. Niospa matori omiskōimani mā afara chakafaifo.

⁴ Niospa mato noi. Mā chakafafiaito mato omiskōimarisafaima. Mato noikikai mato omiskōimapaima. Nāskakē, “ŹNā ē ipaiyai keskara ē iki,” ixō mā shināimē? Askara shināyamakāfe. Niospa mato noikī mato shinā fetsafaxopai māto chaka mā xatexō āfe meka mā nikasharakōinō.

⁵ Niospa mato shinā fetsafaxopafiaito mā nikayospakōi. Māto ōiti mā kerexfaxō mā Nios nikakaspai. Mākai māto shinā mā fetsafapaima māto chaka mā xatexikī. Mā askafaino iskaratīa Niospa mato omiskōimayoima. Akka mā mai keyoaino mato omiskōimaxii mākairoko māto chaka xateano. Nā keyokōi yora chakafo ato omiskōimānaitīari nānori matori omiskōimaxii. Niospa mēstekōi noko ōi. Nāskakē nā yora chakafo ato omiskōimani. Nāskaxori nā yora chakafo ato omiskōimaxō noko ōimaxii.

⁶ Nā nō imis keskara Niospa tāpikōia. Nāskax nō naano keyokōi noko kopifaxii mā nōko mai keyoaino.

⁷ Yora fetsafāfe shara shināmisfo a Niospa ato amapaiyai keskara apaikī. Niospa ato inimamatiro. Askatari Nios fe ipaikani. Askara yorafo Nios fe ipanakafo.

⁸ Akka yora fetsafāfe nā apaiyai keskara shinākani. Niospa meka nikakaspakani. Chaka fisti shinākani. Askarafoki Nios atoki ōitifishkixō ato omiskōimani.

⁹ Nā chakafamisfo nāfo keyokōi omiskōixikani, judeofo, judeofomari omiskōixikani afara chakafakanax.

¹⁰ Nā Nios chanimara faafo tii Niospa ato imasharaxii a keskara inōfo. Nāskaxō ato yoixii iskafakī: “Māfi sharaki. Mā ea nikasharakōia. Nāskax mā efe isharapakenaka,” Niospa ato faxii. Nānori judeofo yoixii. A judeofomari ato yoixii askafakī.

¹¹ Niospa ōia nāskarafos ōi yorafo, a judeofo ōita a judeofomari nāskarafos ōi.

¹² Akka a Moisés kirika keneni tāpamato afara chakafaax omiskōipakenaka. Nios fe ipanakama. Askatari a Moisés kirika keneni tāpiato afara chakafaax nāri omiskōipakenaka. Nānori Moisés kenekī yoini: “A afara chakafamisfo omiskōipakenakafo,” ixō Moisés kirika keneni.

¹³ A Moisés kirika keneni keskara nikafikakī nikakaspaifo. Afokai Niospa shara ato ōima. Akka nā Moisés kirika keneni keskara nikakōiaifo, “Sharafora,” Niospa ato faxii.

¹⁴ Moisés Niospa meka a judeofoma ato kirika kenexonima. Askafekē a Moisés keneni keskara judeofomafāfe tāpamafikaxō āa tāpikōikaxō shara shinākani. Nāskakaxō a Moisés keneni tāpiafo keskara ikafo tāpamafikanax.

¹⁵ Moisés keneni tāpamafikaxō shināsharaifono fetsafāfe ato ōitirofo Moisés keneni keskara Niospa ato shinā mēra ato shināmama. Akka sharafakaxō shinākakī iskafatirofo: “Ē afaa chakafama,” ixō shinātirofo. Akka afara chakafaxō shinākani iskatirofo: “Oashta, ē afara chakafaa,” ixō shinātirofo. Nāskaxō anā afaa chakafapaikanima.

¹⁶ Niospa nōko ōiti mēraxō nō shināito noko tāpikōia. Jesucristori noko tāpia. Akka yorafāfe nōko ōiti mēraxō nō shināito noko tāpiafoma. Nāskakē mā nōko mai keyoaino Niospa noko yoikī iskafaxii māmāi noko tāpioxō: “Nafo sharafo. Akka nafari chakafo,” noko faxii. Nāskara ē yorafo yoimis.

Moisés judeofo Niospa meka kenexoni

¹⁷ Ea nikakapo, efe yorafāfe. ŷMā shinākī iskafatiromē? “Nōrifi nō judeofoki. Moisés keneni keskara mā nō tāpia. Nōfi Niospa afe yorafoki,” mā imis.

¹⁸ Moisés kenexioxō Niospa mato amapaiyai keskara mā tāpitiro. Askatari mā asharakōikī mā tāpitiro.

¹⁹ Akka mā shināmis iskafakī: “A Moisés keneni tāpiafoma yora fēxo keskarafo. Nāskakē nō ato tāpimasharatiro āto ōiti xafa shara inōfo, anā fakish keskara inōfoma,” ixō mā shināi.

²⁰ “Nā afara shara tāpiamafori nō ato tāpimatiro,” mā iki. Nāskatari, “Nā rama tāpiafiori nō ato yoitirora,” ixō mā shināi. Mā shināi iskafakī: “Mā nō Moisés keneni tāpikōia. Nāskaxō nō ato yoitiro noko chanimara fanōfo,” ixō mā shināi.

²¹ A Moisés keneni keskara mā ato yoifikī, ŷafeskakīri māri mā nikakōimamē? “Atoki yometsoyamakāfe,” mā ato fafiāi māri mā yometsoi.

²² “Māto āfima fe iyamakāfe,” mā ato fafiāx māri māto āfima fe mā chotanāmis. Askatari yora fetsafāfe afara onifakaxō, “Na nōko niosra,” famisfo. Askafafiaifono mā ato yoimis: “Anā ano Nios fetsama. Nios fisti. Afara yora faxō, ‘Na nōko niosra,’ fayamakāfe,” mā askafamis. Mā ato askafafiai āto nios kifiti pexefā mēranoax mā yometsoimis.

²³⁻²⁴ Māfi yoikī iskafamis: “A Moisés Niospa meka kirika keneni nō tāpikōia,” nā kaka-paimisfo keskara mā imis. Askafafiāxōkai a Moisés keneni keskara mā akama. Mā askayamaito ōikakī judeofomafāfe yoikī iskafamisfo: “Niospa afe yorafo judeofo isharafoma. Nāskakē Niosrikai sharama,” ixō yoimisfo. Askafakī matoōxō Nios chakafaifo. Nānori Niospa meka yōra kirika keneni.

²⁵ Moisés judeofo kirika kenexoni iskafakī: “Māto fake feronāfakefo foshki repa xatekāfe mato tāpinōfo mā judeofokē,” ixō Moisés kirika keneni. Māto fake foshki repa mā xatefixō nā Niospa mato yoini keskara mā nikayamaito Niospa mato ōi judeofoma keskara. Niospa yorafo mā itiroma mā judeofofiax. Nāskarari nā Epa Niospa noko yoini keskara mā ikaito Niospa mato ōi judeokōifo keskara.

²⁶ Judeofoyamafixō Niospa meka nikaifono Niospa judeofo keskara ato ōi afe yorafo keskara.

²⁷ Nā judeofoma foshki repa xateyamafikaxō a Moisés Niospa meka yoikī kirika keneni tāpiyamafikaxō nā Niospa yoini keskara chanimara fakanax nāskarafōfi sharafoki mato keskarama. Akka māfi judeofofixō a Moisés kirika keneni tāpifixō mā nikakōima. Moisés mato Niospa meka yoikī kirika kenexofianino mā nikasharakōima.

²⁸ Māfi judeofo kāinikī. Nāskaxō mā foshki repa xatemis. Akka mā judeofofixō a Niospa yoini keskara mā nikaima. Nāskax mā judeokōifo keskarama. Mā māto feyafatifixō māto chaka mā xatemisma. Nāskaxkai mā Niospa afe yora ikima.

²⁹ Moisés kirika kenekī yoini keskafakī judeofāfe āto fakefo foshki repa xatemisfo ato tāpinōfo judeokōifokē. Akka judeofo atirifāfe Nios shinākanima. Nāfofi judeomakōifo keskara. Nāfokai Niospa afe yorafoma. Akka judeofo atirifāfe Nios shinākani. Nāfofi judeokōifokī. Nāfofi Niospa afe yorafokī. Niospa Yōshi Sharapa noko ōiti fetsafaxōano Nios keskara shara ikafo. A Moisés kirika kenenito noko ōiti fetsafaxotiroma. Niospa Yōshi

Sharapa noko òiti fetsafaxotiro. Akka yorafāfe, “Mīfi sharakī,” noko fayamafiaifono Niospa, “Mī sharakī,” noko fai.

3

¹⁻² Nō judeofoxō nōko fakefo nō foshki repa xatemiskē sharamē? Èje, shara itiro. Akka nōfi judeofo fake kāiniki. Moisés Niospa meka yoikī noko kirika kenexoni. Nāskakē nō inimai nō judeofo. Efe yora mishtichi, shinākapo. Epa Niospa nā yorafo tii yoipaiyai keskara nōko kaifo taeyoi ato yoyoni. Noko tāpimanai keskarari nō yora fetsafori nō ato tāpimanō āfe meka.

³ Akka nōko kaifāfe atirifāfe Niospa meka ifo shara fayamaifono akka Niospa a yoiyai keskara amis.

⁴ Yorafo chanīmisfo. Akka Nios ramashara chanīmisma. Yorafāfe keyokōichi noko pārafiaifono akka Niospa noko pārāmisma. Nā David Niospa meka yoikī kirika keneni iskafakī:

Niospa āfe meka mēstesharakōi yorafāfe òinōfo. A shara shināifo Niospa ato sharafaxōi.

Akka a chaka shināifo Niospa ato tāpimakī omiskōimaxii, ixō David yoikī kirika keneni.

⁵ Nios fistifi sharakōiki. Nōkai a keskarama. Nāskakē nō chakafaito yorafāfe òikakī shinātirofo iskafakakī: “Nios iskarama, Niosfi sharakōikī. Na yorafāfe afara chakafakani. Akka Niospa afaa chakafāmisma,” ixō shinātirofo. Nāskaxō Nios sharara fakani. Akka nāskaxō āa yora fētsa shinātirofo iskakī: “È afara chakafaito òikakī yorafāfe yoitirofo: ‘Akka Nios iskarama, Nios shara.’ Nāskakē è chaka shināi yorafāfe Nios sharakōi òinōfo ea keskarama. Nāskakē Niospa ea omiskōimatiroma è chakafafaito,” ixō yora fētsa shara shināima. Nāskara shināki yōra shināi keskara shināi, Niospa shināi keskara shināima.

⁶ Nios chakama. Nios mēstekōi ika. Akka mēstekōi iyamaxō yoirafo yoikeranama iskafakī: “Nafō sharakōifoki. È ato sharafaxōi. Akka nafori chakafo. È ato omiskōimani,” ixō Niospa yoikeranama mēstekōi iyamaxō.

⁷ Yora fētsa āa shināi iskatiro: “Yorafāfe ea yoitirofo è chanīaito òikakī. Iskafakakī ea yoitirofo: ‘Mī Nios keskarama. Nios chanīmisma. Nios mēstekōi ika,’ ixō ea yoitirofo. Akka è chanīaito òikakī fetsafāfe, ‘Nios sharakōi, mia keskarama,’ ea faxikani. Nāskakē è shinātirofo iskafakī, Niospa ea yoitirofo iskafakī: ‘Mī afara chakafafaito è mia omiskōimaxima,’ ea Niospa fatiro,” ixō āa yōra anori shināi. Anori Niospa yoiyamafiano āa shināi askatiro.

⁸ Iskafakakī yoipaikani: “Nō afara chakafanōkāfe. Nō afara chakafaito òikakī yorafāfe, ‘Nios sharara,’ fanōfo,” ixō yoipaikani. “Nā Pablori anori yoimiski nō afara chakafanō,” ixō yoikani. Āa chanīmisfo. Èkai anori yoimisma. Epa Nios chanīmisma. Nā keskara yorafo ato omiskōimaxii.

Nō keyokōichi chakafamis

⁹ “Nō judeofo sharakōifo. Akka nā judeofoma sharafoma,” è faima. Askatamaroko è iskafakī yoimis: “Nōfi nā judeofoma òitsa, nāskarafos nō. Nō keyokōichi afara chakafamis. Nāskakē Niospa ato yafi noko omiskōimaxii noko tāpimakī,” nānori è yoimis.

¹⁰ Niospa meka yoikakī kirika kenenifo iskafakakī:

Tsoa pishtakai nā Niospa yoiyai keskara famisma.

¹¹ Tsoa pishtakai Nios shināpaikanima. Tsōakai Nios tāpipaisharakanima.

¹² Tsoa pishtakai anā Nios Ifofapaikanima. Afara chaka fisti faipaikani. Afara sharakai tāpiafoma. Tsōa pishtakai sharafamisma. Fato fistichikai shara Ifofaiani.

¹³ Yora naax maiax fepekemeax pisi kaitiro. Nāskarifiakī nōko axfapa meka chaka fisti nō yoimis. Mā nō ato pārakī feyafamis. Nā rono paekapato noko chachiano nō paemetiro keskarari nōko meka chakañoax omiskōixikani.

¹⁴ Nō ato fekaxtefapaikī meka mitsisipato fisti nō mekamis. Nō ato İchari famis.

¹⁵ Tsoa afayamafekē nō ato retepaimis.

¹⁶ Nōa kafāsakī nō ato omiskōimafofāsafamis. Nōa nō ato fekaxtefaafofāsafaki.

¹⁷ Yora fetsafokai nō ato raefapaimisma ato fe isharaxikima.

¹⁸ Nōko shinā mēranoaxkai Nioski nō rateima. Āfe meka nō nikapaima. Nōko chaka nō xatepaima, ixō nāskara yoikī kirika kenenifo.

¹⁹ Mā nō tāpia a Niospa yoiyai keskara Moisés noko kirika kenexoni. Akka tsōakai Niospa meka nikakōimisfoma. Nāskaxō tsōa yoitirofo iskakī: “Èfi afaa chakafamismaki. È shara imis,” tsoa itirofo. Akka Niospa noko yoitirofo iskafakī: “Māri afara chakafamiski,” keyokōi noko fatiro.

²⁰ Nāskakē Niospa meka a Moisés noko kenexoni nō nikapaifaito, Niospa noko yoikī iskafatiroma: “Mā shara imiski,” noko fatiroma. Akka tsōa āfe meka nikasharakōima. Āfe mekaoxō nō tāpitiro keyokōichi nō chakafamisfo.

Jesucristo chanīmara faax nō Nios fe ipaxatiro

²¹⁻²² Iskaratīa Niospa noko afara fetsa tāpimana. Noko xafakīa ōimana afeska faxō noko imasharatiromākī a keskara shara nō inō. Moisés kenenioxō noko shara imaima. Akka nō Jesucristo chanīmara fakē Niospa noko shara imatiro Jesúsmāi noko nāxonikē nōko chaka noko soaxoxiki. Nānori Niospa meka Moisés yoikī kirika keneni. Niospa meka yoimisfāferi nānoriri kenenifo. Nā keyokōichi Jesucristo chanīmara faifo Niospa ato shara imai. Judeofo, judeofomāfori Niospa shara imatiro Jesús chanīmara faifāfe.

²³ Keyokōichi mā nō chakafamis. Tsoa Nios keskarama. Nios sharakōi. Afaakai chakafamisma. A keskarakai tsoama.

²⁴ Nāskakē Niospa noko noikī nōko chaka noko soaxotiro nō Jesucristo chanīmara faino. Akka Jesucristo nōko chakaōnoax noko nāxonni. Nāskaxō nōko chaka noko soaxoni. Nō afaa kopifatiroma Niospa noko shara imanō.

²⁵ Āfe Fake Jesucristo nīchini āfe imi foax nōōnoax nanō nōko chaka noko soaxoxiki. Nāskaxō Niospa noko omiskōimanimā. Nō Jesús chanīmara faino Niospa nōko chaka noko soaxoni nō shara inō. Nāskaxō nō ōitiro Nios sharakōi. Jesús nayoamano chakafafiaifono Niospa teneyoni. Ato omiskōimayonima Niospamāi tāpixō āfe Fākemāi chipo ato nāxoxiaino Niosmāi mēstekōi ixō.

²⁶ Jesús nōko mai ano oax noko nāxonni. Nāskakē nō chanīmara faito Niospa nōko chaka noko soaxoni noko imasharai. Nāskaxō Niospa noko ōimasharai amāi mēstekōi ixō.

²⁷ Nāskaxō tsōa yoitiroma iskafakī: “Ēfi sharaki, fetsafo keskarama. Nāskax ē Nios fe ipanaka,” ixō tsōakai yoitiroma. Moisés kirika kenekī yoini keskara nikafixō tsōa anori yoitiroma. Jesucristo noko nāxonni nōko chaka noko soaxoxiki nō shināsharanō. Nāskakē nō Jesús chanīmara faino, “Jesús nōko chaka noko soaxoni nō afe Īpaxanō,” ixō nō yoitiro.

²⁸ Nāskakē anā nō mato yol. Jesucristo nō chanīmara fakēma a Moisés kirika keneni keskara nō ifofafaito nōko chaka noko soaxonima. Akka nō Moisés meka nikaito Niospa, “Mī afara sharafamiski,” noko fatiroma. Akka nō Jesús chanīmara faito, “Mī Jesúsnoax isharakōimis,” noko fatiro.

²⁹ Nāskakēri, ¿Niospa judeofo fisti ato ifitiromē afe yora inōfo? Maa, judeofomāfori ato ifitiro Jesús chanīmara faifono afe yora inōfo.

³⁰ Niosfi fistikī. Judeofo, judeofomāfāferi Jesús chanīmara fakanax Nios fe nipanakafo ato chaka soaxonano.

³¹ ¿Nō Jesús chanīmara faxō a Moisés kirika keneni nō potatiromē? Maa, nō potatiroma. Jesús chanīmara faxō a Moisés Niospa meka yoikī kirika keneni nikakī nō chanīmara fatiro.

4

Abraham Nios chanīmara fakōini keskara yorafāferi keyokōichi Nios chanīmara fatirofo

¹ Akka nōko xini Abraham ipaoni keskara ē mato yoinō.

² Abraham afara sharafaōxokai Niospa āfe chaka soaxonima. Akka Nios chanīmara faito Niospa āfe chaka soaxoni. “Mī afara sharafaito nāskakē ē mia ifitiro mī efe yora inō,” ixō Niospa anori yoinima. Akka Niospa anori yoiano Abraham yoikerani: “Ē afara sharafaito ea Niospa chaka soaxona,” ixō yoikerani āa kakapaikī. Akka anori Niospa yoinima, nā Niospamāi mā āfe chaka soaxonano chanīmara faito.

³ Niospa meka yoikī Moisés kirika keneni iskafakī: “Abraham Nios chanīmara faito Niospa āfe chaka soaxoni. Nāskakē Niospa yoini iskafakī: ‘Mī afaa chakafamisma keskara ē mia ōi; Niospa fani.’ Nāskakē Moisés kirika keneni.

⁴ Akka feronāfāke yora fetsa yonomaxō kori inātiro, kaxpa inātiroma.

⁵ Akka nō afara sharafaōxokai Niospa nōko chaka noko soaxonima, nō afaa chakafamisma keskara noko ōixiki. Askatamaroko nō Jesús chanīmara faito Niospa nōko chaka noko soaxotiro.

⁶ Nāskarari David yoini iskafakī: “Mā Nios chanīmara faito oa afaa chakafamisma keskara Niospa mato ōitiro a Moisés keneni keskara mā nikakōiyamafaito. Nāskax mā inimatiro.” David anā yoini iskafakī:

⁷⁻⁸ Fatora yora Niospa āfe chaka soaxonano inimatiro Niospamāi ōiaino afaa chakafamisma keskara. Mā Niospa yora āfe chaka soaxō Niospa anā shināchakaima a yōra afara chakafapaoniōnoa. Nāskax yora inimakōitiro Niospamāi mā āfe chaka soaxonano, ixō David yoini kirika kenekī.

⁹ ¿Nā judeofo fisti Niospa āto chaka ato soaxotiro mē? Maa, anorima. Judeomafāferi Nios chanīmara faifāfe ato chaka soaxotiro afori inimanōfo. Nāskakē Niospa meka yويمisto kirika keneni iskafakī: “Abraham Nios chanīmara faito Niospa sharakōi ōini,” ixō a Niospa meka yويمisto kirika keneni.

¹⁰ Akka taeyoi Abraham foshki repa xateyoamano Niospa yoini iskafakī: “Mī ea chanīmara fai nā mī afaa chakafamisma keskara ē mia ōi,” Niospa fani.

¹¹ Nios chanīmara faito Niospa Abraham āfe chaka soaxoni afaa chakafamisma keskara ōixiki. Nāskaxō chipo Abraham foshki repa xatenifo fetsafāfe tāpinōfo Nios chanīmara faino. Akka taeyoi Abraham Nios chanīmara fani askayoxoma. Nāskaxō chipo foshki repa xateni. Taefakī Abraham Nios chanīmara fani Niospa fake ixiki. Nāskano a chipo Nios chanīmara faifo Abraham āfe fenafo. “Abraham nōko xini ipaoni,” fatirofo. Abraham keskara nō foshki repa xateyamafixō nō Nios chanīmara faito Niospa noko chaka soaxotiro afaa chakafamisma keskara noko ōixiki.

¹² Abraham askayoxoma Nios chanīmara fani. Nāskaxō foshki repa xateni. Nā Abraham judeofāfe āto xini ipaoni. Judeofo a Nios chanīmara faafāfe nāfāfe āto xinikōi Abraham nafāferimāi Nios chanīmara fakanax.

Niospa noko yoi ai keskara noko axōi

¹³ Niospa Abraham yoini: “Ē mia yafi mī fenafo keyokōi ē mato mai ināikai,” fani. A Moisés kirika keneni Abraham nikaito Niospa mai inānima. Akka Nios chanīmara faito Niospa mai ināni. Nāskaxō Abraham Nios chanīmara faito Niospa āfe chaka soaxoni, afaa chakafamisma keskara shara ōikī.

¹⁴ Fetsafāfe anorima shinātirofo iskafakakī: “Nō Moisés kirika keneni nikaito Niospa a yoi ai keskara noko axotiro. Akka Jesús fisti nō chanīmara faito Niospa noko axotiro. Kaxpa nō Jesús shināi,” ixō anorima shinātirofo. Akka nōroko Jesús chanīmara faito Niospa yoi ai keskara noko axosharatiro Jesúsmāi nōko Ifoxō.

¹⁵ Akka Niospa meka a Moisés yoini keskara nō nikayamaito Niospa noko omiskōimatiro. Akka Niospa noko afaa yoyamanino nō nikayospa ikeranama. Akka iskaratīa nō nikayospakōifo mā nōmāi Moisés kirika keneni tāpiax.

¹⁶ Taeyoi Niospa Abraham yoyoni Nios chanīmara faino. Nāskakē Niospa afama mīshti axoni a yoyoni keskafakī. Niospa Abraham afaa yōkanima afama mīshti axosharaxō. Akka Abraham āfe fenafori Niospa ato noikī nāskaxō afama mīshtiri ato axosharai a yoyoni keskafakī. A Moisés yoini keskara nikakōiaito Niospa afama mīshti axosharanima. Akka Nios chanīmara faito Niospa axosharani. Nāskarari a Abraham keskarafo Nios chanīmara faifori Niospa ato shara faxōi. Akka Abraham nōko xinikī nōmāi Nios chanīmara fai Abraham ipaoni keskara.

¹⁷ Niospa Abraham yoini keskafakī, yora fētsa kirika kenekī iskafani: “Nā yora ichapakōifo āto apa keskarakōi mī inō,” ixō kirika keneni. Abraham Nios chanīmara fani. Askaxō Abraham nōko epa keskara Niospa ōi. Niospa nā namisfori anā ototatiro. Nāskaxō Niospa afama mīshti onifatiro tsōa ōimismafo. Nāskakē Abraham Nios chanīmara fani.

¹⁸ Nāskax Abraham anifokōi ini anā fake atiromaxakī. Nios chanīmara faito Niospa yoini: “Mī chipo fake fixii. Mī fenafori ichapa rasi kaixikani,” ixō Epa Niospa yoini keskara Abraham chanīmara fani. Nāskax, “Yorafāfe āto xini mī iki,” Niospa fani.

¹⁹ Nāskax Abraham anifokōi ini. Cien xiniya aka. Sara āfe āfiri yōxafokōi ini. Anā yōxafoxō fake fitiroma ini. Nāskafixō Abraham Nios chanīmara fani. “Ē anifokōi, ē anā fake fitiroma,” ixō Abraham shinānima. “Akka Niospa tsōa atiroma keskara fatiro,” ixō Abraham shināki Nios chanīmara fani.

²⁰ “Mī āfi Sara fake nanexii,” ixō Niospa yoini. Niospa nāskara yoiāito nikakī Abraham Nios chanīmara fani. Niospa askafafaino, “Ēfe āfi yōxafokōia. Anā fake nanetiroma,” ixō Abraham shinānima. “Niospa ea yoi ai keskara ea axotiro. Aicho, Nios fāsi sharakōi,” fani.

²¹ Niospa axōai keskara fakī Nios chanīmara faxō Abraham afaa fetsakai shinānima.

²² Nāskakē Niospa yoini: “Mī ea chanīmara fai afaa chakafamisma keskara ē mia ōi,” Niospa fani.

²³ Niospa Abraham askafaniōnoa yōra kirika keneni iskafakī: “Nios chanīmara faifāfe afaa chakafamisfoma keskara Niospa ato ōi,” ixō Abrahamnoa fisti kirika kenenima. A Nios chanīmara faifo Niospa ato ōi afaa chakafamisfoma keskara māmāi āto chaka soafono.

²⁴ Nokori askara kenexoni nō Nios chanīmara faito. “Nōko Ifo Jesús naafiakē Niospa otofani,” nōri chanīmara fakē, afaa chakafamisma keskara Niospa noko ōi.

²⁵ Nōko chakaōnoax Jesús nani nōko chaka noko soaxoxiki. Askata mā otofaano aōnoax afaa chakafamisma keskarafo nō ixii.

5

Nō Nios chanimara faito afaa chakafamisma keskara Niospa noko ōi

¹ Nōko Ifo Jesucristo nō chanimara fakē nōko chaka noko soaxonano aōnoax nō Nios fe isharapakexatiro.

² Nō Jesús chanimara faito noko noikī Niosya noko rafemani. Nāskakē, “Ē Nios ikano kaax ē a keskara shara itiro,” ixō nō shināi nō akiki inimakōitiro.

³ Askatari Jesúsnoax omiskōi nōko shinā mēra nō inimakōitiro. Askax nō a keskara nō itiro. Omiskōifaito Jesús āfe shināmā nōko shinā mēra noko mitsisfamaxotiro nō tenenō.

⁴ Akka Jesúsnoax omiskōikī nō tenei nō yora finakōia ipainākatiro anā chaka shināyamaxiki. Nāskakē Nios nokoki inimai. Nokoki inimaino nō tāpia nō afe Ipaxanō.

⁵ Nō askara shināi nō rāfitiroma Niospamāi a yōia keskara noko axōaino. Akka noko Niospa noikōikī āfe Yōshi Shara nōko shinā mēra noko nanexotiro.

⁶ Akka nōa nōko chaka nō soametiroma. Nāskakē Niospa āfe Fake nīchipayaitīa nai mēraxō nāmā nīchini yora chakafoōnoax naaxinō.

⁷ Tsōakai yora fetsa nāxopaitiroma sharafiano. Ētsa, itiro rakikīa yora nai yora sharafoōnoax.

⁸ Akka nō chakafokē Niospa āfe Fake nīchini noko nāxonō. Nāskakē nō tāpitiro Niospa noko noikōiai.

⁹ Askax nōōnoax naano āfe imi foni. Nō chanimara fakē afaa chakafamisma keskara noko ōi noko chaka soaxō. Akka nō chakakē Jesús nōōnoax nani. Nāskakē iskaratīa mā nō chanimara fakī finakōia. Anā nokoki Nios ōitifishkikī noko omiskōimaxima.

¹⁰ Askata nō Nios noikaspaino āfe Fāke noko nāxonī Nios fe nō rafenō. Nāskax nō iskaratīa Jesús afe yorafo nō afe rafekōia. Askaxō noko sharafakī finakōi. Jesús nakē Niospa anā otofani, nōri afe nipaxanō.

¹¹ Akka nō Nios noikaspayoni. Iskaratīa mā nōko Ifo Jesucristoōxō noko raefaa nō afe isharakōia. Nāskakē Jesús Nioski noko inimamasharakōia.

Adāōxō yorafāfe keyokōichi chakafamisfo. Akka Cristo nōko chaka noko soaxotiro

¹² Niospa nā feronāfake Adán taefakī onifani. Nā Adán taefakī afara chakafani. Nāskakē aōxō afara chakafapafo. Nā Adán afara chakafaniōnoax keyokōi nō natiro nōmāi keyokōichi afara chakafaax.

¹³⁻¹⁴ Mā Adán afetiama naniano Moisés Niospa meka yoini kirika keneni afe keskara nō niimākai. Akka Niospa Moisés yoiyoamano keyokōichi chakafayopaonifo. Nāskax mā nai keyonifo. Fetsafāfe chakafafiakaxō Moisés kirika keneni tāpipaonifoma. Askafafiaifāfe oa afaa chakafamisfoma keskara Niospa ato ōini tsōakairoko āfe meka tāpikē. Adán keskarafoma. Adán Niospa meka tāpifiāx nikayospani. Nāskaxō Adán chakafakī taefani. Nāskarifiakī yorafāfe keyokōichi chakafamisfo. Akka nāskax mā nai keyokani, Adánmāi taeyoi nanikē. Nāskarifiāi Cristo oni yora chakafoōnoax naiyoi. Nāskakē yorafo aōnoax nīpaxatirofo.

¹⁵ Akka Jesucristo Adán keskarama. Adán Nios nikakaspax nani. Nāskakē nōri aōnoax natiro. Akka Jesúsxō Niospa yorafo noikōikī ato imasharapakenaka afaa chakafamisma keskaramāi ato ōikī. Akka nā Adán nai taeni afara chakafaax. Nāskax yorafo Adánnoax nāpanakafo. Akka Jesús Ifofakanax Jesús fistiōnoax keyokōi isharapakenakafo. Jesúsxō Niospa ato raefatiro a chanimara faafo tii.

¹⁶ Adán afara chakafaniōnoax yorafo nai keyotirofo. Nāskatari āto chakaōnoaxri nai keyotirofo. Akka nō keyokōichi chakafakē Niospa noko omiskōimatiro. Nā Adán anī keskarakai Cristo afaa chakafamisma. Mā nō keyokōichi afara chakafamiskē Jesucristoōxō Niospa noko noikī nōko chaka noko soaxotiro afaa chakafamisma keskara noko ōikī. Omiskōitamaroko nō afe isharapakexanō.

¹⁷ Adán āfe chakafoōnoax keyokōi nakani. Akka Cristo fisti nokoōnoax nani nō aōnoax Nios fe nīpaxanō Niospamāi noko shara ōiaito. Jesucristoōxō Niospa noko noixō noko nimapakenaka. Nāskakē noko askafaxōkī Jesús Adán finōkōia.

¹⁸ Nāskakē ē mato yōiai keskara nā feronāfake Adán āfe chakaōxō keyokōi Niospa noko omiskōimani. Akka Jesúskaī afaa chakafamisma. Nāskakē nā chanimara faafo tii Nios fe nīpanakafo. Nāskakē nā afaa chakafamisma keskara Niospa ato imai.

¹⁹ Akka nā feronāfake Adán Nios nikakaspakī taefani. Nāskax Adán nikayospakōi taeyoi ini. Keyokōichi aōxō nō chakafapamis. Akka nā Cristo fisticī ares Nios nikakōimis. Afaakai chakafamisma. Nāskakē nā chanimara faafo tii aōnoax afaa chakafamisma keskarafō ipanakafo.

²⁰ Moisés Niospa meka yoikī ato kirika kenexoni afara chakaōnoa tāpinōfo. Akka nā Moisés ato kenexoni mā ōifikakī a Niospa ato yōia keskara tsōa nikakōikanima. Keyokōichi

afara chakafamisfo. Mā chakafakī finafiafono Niospa ato noisharakōixō āfe Fake atoki nīchini ato chaka soaxonō.

²¹ Afara chaka fisti shinākani namisfo. Akka Niospa noko noikōia. Nāskakē āfe Fake Jesús noko nāxoni nōko chaka noko soaxoxiki. Nāskakē nō Jesús chanīmara faito Niospa afaa chakafamisma keskara noko ōi. Noko chaka soaxonano nō afe ipanaka.

6

Cristo nia keskara nōri afe nīpatiro

¹ Akka yorafāfe atirito shinākakī iskakani: “Nō afara mēxotaima chakafafiaino Epa Niospa noko noikī nōko chaka noko soaxotiro. ¿Nāskakē nō afara chakafa fafafāitiro,” ixō anori shinākani sharamē? Maa, sharama.

² Nāskakē afara chaka shināyamakāfe. Nō Jesús chanīmara faxō mā nōko chaka nō pota. A nō ipaoni keskara nō anā shināpaima.

³⁻⁴ Mā mā tāpia noko maotisafani nō fetsafo ōimanō. Nāskax nō a Jesús fe naa keskara nō chaka ipaoni keskara anā shināima. Nāskakē nōko chaka soapaikī nō Jesús chanīmara faino noko maotisafani. Jesús nokoōnoax naano maifanifo. Nāskax nō afe naa keskarax nōri maia keskara. Akka Jesús naax otoiñākafata Apa ari kanī. Nōri nono mai anoax Jesúsnoax ari nō katiro. Askaxō Apa Niospa mā Jesús otifaxō noko ōimani nāatomāi afama mīshti fatiroxakī. Nōko ōiti noko fetsafaano a nō ipaoni keskara nō anā itiroma, a keskara sharakōi nō ipai.

⁵ Cristo nōkoōnoax nani. Nā nō chanīmara faax nō afe rafetiro. Nāskakē Jesucristo nakē Apa Niospa otofani keskafakīri anā otofatiro, a keskara shara nō inō.

⁶ Jesús mastanifo nōko chaka noko soaxonō. Nōri Jesús fe masta keskarakōi anā chakafapaima. Nāskarīfai nō Jesús Ifofaax nō afe naa keskara. Nāskaxō nō anā chaka shināima. Afara chakafo nōko ifoma.

⁷ Akka yōra nāxokai anā chaka shinātiroma. Nāskarīfai nōri chaka shinātiroma afara chakakairoko nōko ifokē.

⁸ Nō Cristo fe naa keskaraxō nō Jesús chanīmara faax nō afe isharapakenaka nāmāi nō chanīmara faax.

⁹ Mā nō tāpia Cristo mā nafiano Niospa otofani. Nāskax anā natiroma. Anāikai afeskax Cristo natiroma.

¹⁰ Akka nai fistinixakī nōko chaka noko soaxoni anā afara chaka nōko ifo inōma. Nāskakē iskaratīa Cristo mā nia. Nāskaxō nā Niospa apaiyai keskafai.

¹¹ Māri Cristo fe naa keskara. Nāskakē iskaratīa mā shinātiroma iskakī: “Ē chaka ipaoni keskara anā shināpaima. Nāskax ē iskaratīa Jesucristoōnoax Epa Nios fe rafe kakaini ea amapaiyai keskara axiki,” ixō anori shinākāfe.

¹² Nāskaxō afara chaka anā ifofayamakāfe afara chaka mato famapai kiki a keskara mā anōma.

¹³ Nāskax Niosnoax isharakāfe. Afara chaka mato famapaifaito nikayamakāfe. Afara chakafamis iyamakāfe. Nios Ifofakāfe mato sharafanō. Iskafakāfe: “Nios ēfe Ifokōixō ea amapaia keskara ē aki sharafakī.”

¹⁴ Akka anā afara chakapa mato afeska fatiroma. Afara chaka anā mato Ifo itiroma mā mā Cristo chanīmara faano. Epa Niospa mato noikī ares fisti mato ifitiro mā afe ipaxanō. Akka nā Moisés kirika kenenīōnoaxkai mā Nios fe ipaxatiroma.

Epa Niospa mato amapaiyai keskara mā nikakōiyanā mā yonoxokōitiro

¹⁵ Moisés yoini keskara nō nikaito Epa Niospa noko nimasharaima. Akka Cristo nō chanīmara faito noko noikī noko nimasharatiro. Nā fisti nōko Ifo itiro noko chaka soaxonano. Nāskatari, ¿nō afara chakafa fafafāitiro mē Niospa noko noikī nōko chaka soaxonō? Maa, nō afaa chakafatiroma.

¹⁶ Mā tāpia āfe yonomatixō mato ifo nikakōiyanā mā yonoxotiro. Nāskarīfiakī mā katotiro fatomākī mato Ifo. Epa Nios mā nikakōitiro āfe yonomati ixi, askayamai chaka mā katoax mā āfe yonomati mā itiro. Chaka katoax mā naax mā omiskōixii, mā Nios fe nīpanakama. Askatamaroko Epa Nios nikakōiax mā afe isharapakenaka.

¹⁷ Mā afara chaka ifofaax āfe yonomati mā ipaoni. Akka iskaratīa mā mā Epa Nios Ifofaa. Mato yomis keskara mato shinā mēraxō mā nikakōimis. ¡Aicho! Mā mā Epa Nios Ifofaano mato nimasharamis.

¹⁸ Nāskakēkai afara chaka anā mato ifo itiroma anā mato yonomatiroma. Akka iskaratīa afara shara fisti mato ifo itiro. Māfi āfe inakōifoki.

¹⁹ Ē mato meka fekax yoima, mato ifoōnoa ē mato yoinō mā tāpisharakōinō. Chaka fetsa fetsatapafō mato ifo ipaoni. Nāskaxō mā afara chakafakī finakōipaoni. Akka iskaratīa Epa Niospa āfe inafō, mā. Anā afara chakafayamakāfe afara shara fisti mato ifo inō.

²⁰ Taeyoi afara chaka mātō ifo ipaoni. Nāskakē afara shara mā shināpaonima mātō ifo ipanā.

²¹ ¿Mā ipaoni keskara sharamē? ¿Mato imasharapaonimē? Maa, a nō ipaoni keskarakai anā afokai nō shināpaima. Afo nō shināi nō rāfitiro. Nā chakafo xateyamax nā nō naitīa nā omiskōipakenakafo mēra nō katiro.

²² Nāskakē iskaratīa afara chaka anā mātō ifoma. Epa Nios mātō Ifō. Māfi āfe yonomati-foki. Mā āfe yonomatifokē mato sharafa fafāfāini a keskara shara mā inō mā afe ipaxanō.

²³ Nā afara chaka nōko ifono, ¿afanā noko kopifaimē? Akka aōnoax nō naax nō omiskōipakenaka. Akka Jesucristo nō Ifofaino Epa Niospa noko afaa kopi yōkaima nō afe nipaxanō.

7

Nō anā chaka ifofaxoma nō Cristo Ifofatiro

¹ Efe yorafāfe, mā mā tāpia nōko xanīfokōichi noko yoia keskara nō nikatiro. Nō niyoxō nō nikatiro. Akka mā nō naxō nō anā nikatiroma.

² Nāskarīfaii kēromā āfe fene niyoano enetiroma. Akka mā fene naano fetsa fe fianātiro ixō anori Moisés yoini Niospa meka.

³ Akka fene niyoanokai kēromā fene eneta fetsa fe fianātiro. Askarafī chakakī. Chota feroma itiro. Akka fene naano kēro feronāfake fetsa fe fianā askara shara, ixō Moisés kenenī.

⁴ Akka mā fenē naxō anā āfe āfi yonomatiroma. Nāskarīfaii mā Cristo fe naa keskarax a Moisés kirika kenenī anā mā nikatiroma. Akka mā Cristo fe naa keskarax mā yora fena sharakōi itiro Cristo mātō Ifono. Mā Cristo naax otōinākafanax Nios fe ipanaka. Nāskaxō afara shara mato amatiro mā Nios yonoxonō.

⁵ Nō Cristo Ifofamatai afara chaka fetsa fetsatapafo nō ayopaoni. Moisés kenenī keskara atama nō chaka fisti shināpaipaoni. Nā chakaōnoax nō naxii.

⁶ Cristo noko nāxonī nōko chaka noko soaxoxiki nō fena shara keskara inō. Nāskakē nō Cristo Ifofaax mā nō afe naa keskarakōi. Nō afe naa keskarax nō yora fena shara iki. Afara chaka anā nōko ifoma. Askatamaroko āfe Yōshi Sharaōxō Niospa noko amapaiyai keskara noko amatiro. A fisti nō Ifofai, a Moisés kenenī keskara ifofayopaonixaki anā nō ifofatiroma.

Moisés kenenioxō nō tāpia nō chakafamis

⁷ Iskafakī shināyamakāfe. A Moisés noko kenexoni, chakara fayamakāfe. Akka Moisés Niospa yoini keskara keneyamanikēkai nō chakafamis nō tāpikeranama. Moisés kenenī iskafakī: “Yora fetsanā afara fiapayamakāfe. Nō yora fetsanā fiapaii nō chakafai,” Moisés anori keneyamanikē nō tāpikeranama.

⁸ Moisés anori kenenī tāpifixō nōko ōiti chakakōikē nō shināsharaima. Nōkonāyamafekē nō fichipaimis. Afara chakafori nō fichipai. Akka Moisés Niospa meka keneyamanikēkai nō nikayospa ikeranama.

⁹ Niospa meka tāpixonā afara chakafaii nō shināma. Askata chipo nō āfe meka tāpifixō nō akama a noko yoia keskara. Nāskafaxō āfe mekaōxō a nō afara chakafamis nō tāpitiro.

¹⁰ Niospa yoia keskara akax nō nipaxatiro. Niospa yoiyai keskara nō akima mā tāpifiax, askax nō omiskōi. “Moisés kenenī keskara ayamax nō natiro,” ixō nō shināmis.

¹¹ “Epa Niospa noko yoia keskara nō aki. Nāskai nō Nios fe nīpanaka,” ixō nō shināfikī nō afara chakafakī nō xateama. Akka chakapa noko pārai. Nāskakē nō tāpia nōko chakaōnoax nō omiskōi nō Nios fe nīpanakama.

¹² Moisés kenenī keskara sharakōi nāmāi Niospa meka. Niospa meka mēstekōi, chanīmakōi.

¹³ A Moisés kenenī sharafianokai a kenenī keskara nō nikasharamisma. Moisés kenenioxō nō tāpitiro nō chakafamis. Moisés kenenī ōifikī, ¿afeskafaxō nōko chaka nō potatiromē? Nāskax nō naax nō omiskōipakenaka. ¿Moisés kenenīōnoax nō omiskōipakenakamē? Maa, askarama. Akka nō Nios nikakaspax nō omiskōipakenaka. A Moisés kenenī sharakōi, Niospa meka. Moisés kenenīōxō nō tāpia nō nikayospakōi. Nō Niospa meka nikakōimisma. Nāskax nō chakakōi.

Nōakōi nōko chaka xatepaifiki nōko shinā mēraxō nō xatetiroma. Nōko shinā mēra chakakōi

¹⁴ A Moisés Niospa Yōshi Sharapa shināmanaino noko kenexoni. Niospa meka nō shināyamai nō sharama. Afara chakafi nōko ifokī nō āfe yonomati.

¹⁵ ¿Afeskai nō iskamismē? Nōkai tāpiama. Nō sharafapaiyai keskara nō akima. Akka nō akaspafaii nō aki.

¹⁶ Moisés kenenī keskara nō nikapai, “Nā meka shara,” shinākī. Askara shināfikī nō akima. Nā afara chakafapaiyamafiki nō aki.

¹⁷ Nōakai nō afara chakafapaima. Akka nōko shināmā nō shinākī nō afara chakafamis. Afara sharafapaifikī nō shināsharaima, nōko shinā mēramāi chakakōikē.

¹⁸ Mā nō tāpia nōko shinā mēra sharama. Isharapaifi nō itiroma.

¹⁹ Akka a nō akai keskara sharama. Nā sharafapaifikī nō amisma. Nā afara chakafapayamafikī nāskara nō amis.

²⁰ Nāskakī a nō akaspai nō aki. Nōakōi nō afara chakafapaima. Nō chaka potapaifikī nō potatiroma nōko shinā mēramāi chakakōikē.

²¹ Akka nō askamiski. Nō sharafapaifaito nōko shinā mēraxō afara chakapa noko fakirira shināmapai nō shara shinānōma. Nō keyokōi askamis.

²²⁻²³ Nōa nō iskafai: “Aicho. Niospa noko yoiāi keskara shara,” ixō nō shināfi nō nikayospamis afara chakapamāi noko fekaxtefaito. Niospa meka nō tāpifiax nō nikayospamis. Nōa nō sharafapaiyai keskara nō atiroma. Nō chaka xatetiroma.

²⁴ Nāskakēkai ē inimaima. Ē shināchakai. Ēfi feronāfake chakakī. Ē inimaima. Ēfe shinā mēraxō ē afara chakafaax ē omiskōixii. Ooa. ʔTsōa nō Ifofatiromē nōko Ifokōi inō, afara chaka anā nōko ifo inōma?

²⁵ Aicho Epa Nios. Ēfe Ifokōi Jesucristoōxō ēfe chaka ē xatetiropki. Iskaratīa ē tāpia Niospa meka nō ifofapaifikī afeska faxō nōa nō atiroma nōko shinā mēramāi chakakē. Akka Jesucristoōxō nō atiro.

8

Niospa Yōshi Sharaōnoax nō ika

¹ Akka Jesucristo nōko Ifono nō afe yora. Nāskakē Epa Niospa noko yoima iskafakī: “Mā chaka. Ē mato omiskōimanō. Emakinoax fotakāfe omiskōipakenakafo mēra nānoax mā omiskōipakenaka,” ixō noko yoipakenakama māmāi nōko chaka noko soaxō.

² Jesucristoōxō Niospa āfe Yōshi Sharapa noko nimasharai anā chaka nōko ifo inōma, nō omiskōipakexanōma.

³ Moisés yoini keskara nō tāpifiano aato noko imasharatiroma nōko chaka noko soaxotiroma. Akka Epa Niospa shināyoni āfe Fake nai mēraxō mai ano nīchixiki ari noko keskara yora inō. Noko keskarafiaxokai nō amis keskara afaa chakafamisma. Akka noko nāxonī anā afara chaka nōko ifo inōma.

⁴ Nāskata iskaratīa nō Niospa Yōshi Shara Ifofaax aōxō Moisés yoini keskara nō nikatiro. Nō Niospa meka ifofasharakōitiro.

⁵ Akka nō chaka xateyamano afara chakapa noko amapaiyai keskara fisti nō atiro. Akka Niospa Yōshi Sharapa noko ikināno nā noko amapaiyai keskara fisti nō atiro.

⁶ Nā apaiyai keskara fisti shinākanax afo nakanax anā otokanax omiskōipakenakafo. Nios fe ipanakafo. Akka Niospa Yōshi Shara ato mēra naneano nā apaiyai keskara Niospa Yōshi Sharaōxō atirofo. Nāskax isharapakenakafo shināsharakata.

⁷ Fetsafāfe Nios noikaspakani Niospa ato yoiā keskara nikapaikanima. Āto shinā mēraxō afara chaka fisti shinākani. Nāskaxō Niospa ato yoiā keskara nikatirofoma.

⁸ Nā āto shināmā shināifo keskara fisti shinākakī Niospa ato amapaiyai keskara atirofoma. Afara chaka ifofaifono Nios atoki inimaima.

⁹ Akka mā kai askarama. Māto shinā mēraxō afara chakapa mato shināmanima. Akka Niospa Yōshi Shara māto shinā mēra nanexō mato shināmasharamis. Akka Niospa Yōshi Shara māto shinā mēra naneyamaino mā Cristo fe rafetiroma.

¹⁰ Cristo mato fe rafefiaino afara chakaōnoax māto yora nai. Māto yora nafiano māto fēro mēsho naima Nios fe nīpanaka Niospamāi afaa chakafamisma keskara mato ōiaino.

¹¹ Mā Jesús naano Niospa otofani. Nāato āfe Yōshi Shara māto shinā mēra nanea. Nāskarifiakī māto yora naano āfe Yōshi Sharaōxō Niospa anā mato otofatiro māto yora fenasharakōi inō.

¹² Efe yora mīshtichi, Niospa Yōshi Shara nofe rafeaino Epa Niosnoa nō shinātiro noko amapaiyai keskara akī. A nō afara chakafamiskai anā nō shināpaitiroma noko Niospa amapaiyai keskara akī.

¹³ Akka a nō apaiyai keskara fisti shināx nō omiskōipakenaka nai. Akka nāskaxifō Niospa Yōshi Sharaōxō afara chakafakī nō xatexō anā chaka nō shinātiroma. Nō Epa Nios fe nīsharapakenaka.

¹⁴ Niospa Yōshi Sharapa noko shināmanaino nō Niospa fakefo iki.

¹⁵ Āfe Yōshi Sharapa noko shināmasharapai nō anā mesenōma. Mā nōfi Niospa Yōshi Shara fiaki. Nā āfe Yōshi Sharaōxō āfe fakefo noko ima. Aōxō nō yoitiro iskafakī: “Epa Nios, mī ēfe Epa,” ixō nō yoitiro.

¹⁶ Nōko shinā mēraxō Niospa Yōshi Sharapa noko yoi iskafakī: “Mī Epa Niospa Fakekōi,” ixō noko yoi.

¹⁷ Nō Niospa fakekē nā noko yoa keskara noko inātiro. Nōfi nō Niospa fakekē nā āfe Fake Cristo ani keskara nokori inātiro. Nōōnoax omiskōifinixakī iskaratīa nai mēranoax Apa Nios fe xanīfokōi. Nāskarīfīai nōri aōnoax omiskōiax nō nai mēra Epa Nios ano nokoano noko sharafinakōia imaxii nō afe isharaapakexanō, a keskara shara nō inō. Akka afe yorafo Niospa ato sharafaxōi nāfomāi āfe fakefokē.

Niospa fakefo Jesús fe isharaipakenakafo

¹⁸ Nō iskaratīa omiskōiyofīax nō chipo Jesús fe isharaipakenaka. A keskara sharafinakōi noko imai. Tsōa ōimisma keskara sharafo noko ōimaxii. A nō omiskōipaoni anā nō shināima.

¹⁹ Epa Niospa āfe fakefo otofaxii a keskara sharakōi ato imaxii. Akka nā Niospa onifanifāfe manakani ōisharapaikōikakī afe keskarāfo ato imaimākai.

²⁰⁻²¹ Niospa āfe fakefo sharakōi ato ōimaxii. Nāskatari a onifanifori sharakōi ixii. Anā afaa chaka ixiima. Afarafo anā payokomepakēnakama. Akka iskaratīa nā Niospa onifanifō payokomepakēnakafo askayamapaifaifonō. Nāskaxō Niospa yoini: “Adān afara chakafaōnoax keyokōi payokomepakēnaka.” Akka Niospa āfe fakekōifo akiki nokoāifono ato yora fetsafaxoxii anā payokomenōfoma, afara chakafāfe ato fekaxtefanōma. Nāskarīfīai Niospa onifanifori nā Niospa fakekōifo keskara shara ixii, anā payokomepakēnakama.

²² Kēromā fake kākī pae meytiro. Mā kāixō anā pae metiroma. Nāskarīfīai a Niospa onifanifō omiskōiyokani. Akka mā Niospa ato fetsafaano anā omiskōiixikanima.

²³ Akka nō Niospa fakefo āfe Yōshi Shara nofe rafeaino nō tāpitiro nō Nios ikano kaax nō isharaikōixii. Akka iskaratīa nō isinī iki fekaxtei. Nāskakē nō manasharai Epa Nios ika ano noko ifnō nō āfe fakefokē a keskara shara noko imanō. Nāskatari nōko yora fena sharakōi noko imai anā nō isinī inakama. Anākai nō nanakama.

²⁴⁻²⁵ Nāskara nō shināi nō akiki nokoaito noko fetsafaxii a keskara shara nō inō. Nāskax nō afe ipanaka. Chanīmara faxō inimayanā nō manasharatiro fena fenakima nā nō akiki nokoaitā. Akiki nokoxō nō anā manatiroma māmāi nō ōikī.

²⁶ Nāskarīfīakī Epa Niospa āfe Yōshi Sharapa noko axosharafāfāini. Afesaxō nō Epa Nios kīfisharatīromē nōkai tāpīama. Akka āfe Yōshi Shara nō mēra nanexō noko shināmanaino nō kīfisharatiro. Noko noikī noko kīfixoni. Noko kīfixonai keskarakai tsōarikai kīfitiroma.

²⁷ Āfe Yōshi Sharapa shināi keskara Epa Niospa tāpikōia. Keyokōi nōko shinā mērari nō shināi keskara tāpikōia. Epa Niospa noko amapaiyai keskara nānori āfe Yōshi Sharapa a chanīmara faafo tii ato kīfixomis.

Jesúsxō nō keyokōi finōkōitiro

²⁸ Akka nō tāpia Epa Niospa noko katoni a apaiyai keskara nō anō. Nō Epa Nios noiaino afarafāfe noko afeskarafāfāino afoxō Epa Niospa noko axosharai.

²⁹ Nō Jesús Ifofayoamano Epa Niospa tāpiyoni fatofomākī a chanīmara faifo. Akka chanīmara fayofamano shināni iskafakī: “Nafo ēfe Fake keskara ē ato imaxii,” ixō shināyoni. Niospa āfe Fake iyoa Jesús. Nāskaxri nōri āfe fake chipoko ixii.

³⁰ Tāpiyoni nō āfe fakefo ixinō. Askano nōko shinā mēraxō noko yoini: “Ēfe Fake chanīmara fakāfe,” noko fani. Fatora anori yoixō ato chaka soaxoni isharañōfo, afaa chakafamisma keskara ato ōixii, ato chaka soaxonano āfe Fake sharakōi keskara inōfo.

³¹ Noko askasharafāino nō fakiri yoitīromē? Epa Niospa noko sharafakōinaino afara chakafāfe noko chakafamatiroma.

³² Epa Niospa noko noikī āfe Fake Jesús timamanima noko naxonō. Nāskanixakī noko axosharatiro nā apaiyai keskara nō anō.

³³ Epa Niospa noko katoni nō afe yora inō. Nāskaxō nōko chaka noko soaxonano afara chakafamisma keskara noko ōixiki. Askano fetsafāfe mī chakara noko faifono nō ato ifofaima.

³⁴ Jesucristo noko nāxokē Āpa otofani. Iskaratīa Apa Nios ika ano ika Apa feta ato keyokōi ikinā. Epa Nios noko kīfixōfāfāini. Nā chanīmakōikē tsōa, “Mī afara chakafamiskī. Nāskax mī omiskōipakenaka,” noko tsōa fatiroma.

³⁵ Tsōakai Jesucristo nomakinoa potatiroma noko noiyamanō. Nō omiskōikāi, nōko shinā mēra fekaxtekāi, nō Jesúsnoa yoiaito noko omiskōimafāi, noko fonāimafāi, nō rapati yopafāi, noko mesemafāi noko retepafāi, keyokōi afāfekāi Cristo nomakinoa potatīrofoma noko noiyamanō.

³⁶ Niospa meka yoikī David kirika keneni iskafakī:

Epa Nios, pena tii mīōxō noko retepaikani. Nō oveja keskara. Ifāfe nā oveja itipinīfasharai retexiki. Nāskarīfīakī a mīōxō noko chakafaifāfe noko retepaitirofo, ixō kirika keneni.

³⁷ Noko askafafaifonō keyokōi nā chakafo nō finōkōitiro Jesús noko noiaino.

³⁸⁻³⁹ Jesucristo nōko Ifonokai afanā Epa Nios nomakinoa potatiroma anā noko noinōma. Nā ē chanīmara fakōini. Epa Niospa noko noiaino afanā noko afeska fatiroma anā noko

noinōma. Nō nafiakēkai nomakinoa afanā Nios potatiroma. Nō niyoanori nomakino a tsōa paxkatirofoma. Afe ājirifāferikai nomakinoa paxkatirofoma. Yōshi chakafāferikai nomakinoa paxkatirofoma. Afarafo iskaratīa ikaifāferikai nomakinoa paxkatirofoma. Inōpokoaiifāferikai nomakinoa paxkatirofoma. Afara chakafāfe āto xānifofofāferikai nomakino a paxkatirofoma. Nā nai ari ikafāfe, mai ano ikafāferikai nomakinoa paxkatirofoma. Epa Niospa nōko Ifo Jesucristoxō noko noi. Nāskakē keyokōi onifanifāferikai nomakinoa paxkatirofoma anā noko noinōma.

9

Niospa judeofo katonī afe yora inōfo

¹ Ē Cristo fe rafexō ē mato mēstekōi yoi. Ē mato pāraima. Niospa Yōshi Shara ē mēra naneano ēfe shināmā shināki chanīma ē mato yoi.

² Ē mato yoi iskafakī, ēfe kaifo atirito Cristo Ifofaafoma. Nāskakē ēfe shinā mēra ē atoōnoax omiskōi kakaini. Ē ato shinākōikī finamis afomāi efe yorafokē.

³ Nāskakē ē shināmis iskafakī: “Epa Niospa, ēfe kaifo nā israelifo ē ato axopai fenoyamanōfo, mefe nipaxanōfo omiskōipakenakafo mēra fonōfoma. Nāskaxō Cristo makinoa ea potāfe ato potakima ē ato omiskōixonō afo omiskōipakexanōfoma. Nā ē fichipai ēfe kaifo judeofo Cristo fe ipaxanōfo,” ixō ē shināmis.

⁴ Nō judeofo, Jacobo afe fenafo. Epa Niospa noko ifini afe fakefo nō inō. Nāa Nios sharafinakōixō nōko kaifo israelifo ato ōimapaoni. “Ē mato afara sharafaxōikai. Cristo nā oxiai judeokōi ixii. Aōxō ē mato sharafaxōikai,” ixō Niospa yoini. Nāskara Moisés Niospa meka yoikī israelifo ato kirika kenexoni nikanōfo. Nāskaxō ato tāpimani afeskaxō Nios kīfitirofomāki ichanāxō. Nāskata afara sharakōi ato axoxiai keskara ato yoyoini.

⁵ Judeofāfe xinifāfe Epa Nios Ifofasharapaonifo. Cristori judeo fake kāini, Niospa Fakekōifāx. Nāskax arifi nōko xinifāfe āto fena. Nāfi yorafāfe āto Ifokī, nāatomāi keyokōi ato ikikē. Nāskakē, “Nios fāsi finasharakōia,” nō fapaxanō. Askapainō.

⁶ Epa Niospa noko yoisharayoni keskara judeofo atirito chanīmara fayamafiaifono afe meka chanīmakōi. Afe yorafo yoyoini keskara axii. “Nā judeofo Israelifāfe āto fenafo ē katoa efe yora inōfo,” ixō Niospa yoini. Askafafiano atirito Nios chanīmara famisfoma. Nāskakē afe yorakōi keskara Niospa ato ōima.

⁷ Nāskarifiakakī Abraham apaoni keska fakī afe fena atirifāfe Nios chanīmara famisfoma. Afokai Niospa yorakōifoma. Akka Niospa Abraham yoini iskafakī: “Mī fakekōichi Isaaca ēfe fakefo mī fenakōifo ixii, mī fake fetsafāfe āto fakefori mī fenakōifo ixiima,” ixō yoini.

⁸ Nāskano nō tāpitiro Abraham afe fenafo atiri afe fakekōifo Niospa ato ōima. Akka Niospa Abraham yoyoini afe āfinī Sara fake fixiai. “Nā fakefi mī fakekōi ixii. Mī fake ēfe fakefori mī fenakōifo ixii,” fani. Nā yoini keskara Abraham Nios chanīmara fani. Nā Abraham Nios chanīmara fai keskafakīri Nios chanīmara faifono nāfofi Niospa fakekōifoki.

⁹ Abraham afe āfinī Sara fake naneamatai Epa Niospa yoyoini iskafakī: “Xinia fētsa ē anā mikiki nokoxii. Nāskano mī āfi Sara fake kāixii feronāfake,” ixō Niospa Abraham yoini.

¹⁰ Nāskata Sara afe fake kāini. Nāskaxō aneni, Isaaca fakī. Nāskakē nā Isaaca nōko xini. Isaaca naetapaxō Rebeca fani afe āfi inō. Rebeca fake rafe naneni. Nā fake rafeta āto apakōi Isaaca ipaoni.

¹¹⁻¹² Rebeca fake kāini fake rafe naneax. Esau kāi taeni. Chipō Jacobo ini. Akka kāiyoafomano tsōa tāpiyonima fatoto shara shināimākai, fatotori chaka shināimākai. Nāskano Niospa fisti katonī afe yora inō. Kāiyoafomano Niospa āto afa yoyoini iskafakī: “Mī fake chipokoto afe ochi yonomaxii,” fani. Akka Niospa nā apaiyai keskara fatiro, yorafāfe apaiyai keskara Niospa faima. Askano nō tāpitiro Niospa a inōpokoai keskara shināyoini nāskarakōi aki.

¹³ Nāskara Niospa meka yōra kirikaki keneni iskafakī: “Ē Jacobo ifipai efe yora inō. Esau ē fichipaima,” fani.

¹⁴ Nāskakē žiskara nō yoitirofomē, “Niospa mā fake fisti katoa kāiyoafomano, afaa chakafayoafomano fisti mī katoa akka fetsa katoama ōixoma. Nāskakē Niospa shināsharaima,” ixō nō shinātiromē? Maa, anori nō shinātiroma. Akka Niospa tāpisharakōia. Nā apaiyai keskara fatiro. Nā fichipaiyai katotiro.

¹⁵ Niospa Moisés yoini iskafakī: “Nā ē axopaiyai ē axosharaiakai. Nāskarifiakī nā ē noipaiyai ē noisharaiakai,” ixō Niospa yoini.

¹⁶ Askatarī nō Nios nikasharatama nōakōi nō afe yora isharapaiyaito askara noko axōima. Askatamaroko Niospa noko noikī noko ifitiro afe yora nō inō, nāatomāi noko ōiti tāpikaxō. Nāskaxō noko noikī nā apaiyai keskara shara axōi.

¹⁷ Moisés kirika keneni iskafakī: “Epa Niospa Egipto ano āto xanīfo yoini iskafakī: ‘Ē mia xanīfo imapaiķi ē mia xanīfo imani mioxō nā maitio ikafāfe tāpinōfo ē afama mīshti faito.

Akka mī afara chakafaito ē mia potai mī anā xanīfo inōma. Ē mia askafaito ōikakī eōnoa ato yoitirofo nā maitio ikafāfe: “Nios tsoa keskarama āfe shināōxō mā Faraón pota,” ixō eōnoa yoitirofo,’ ixō Niospa Faraón yoini.”

¹⁸ Akka shinākapo. Nā Niospa ato noipaiyai ato noikī axosharatiro. Nāskarifiakī fētsa afara chakafakī xateamano Niospa āfe ōiti nikayospakōi imatiro afaa shināpaiyai keskara imatiro.

¹⁹ Nāskakē fētsa shinātiro iskafakī: “¿Afeskakī Niospa noko yoitromē afara chakafamisfora fakī? Akka nāato noko amai nā apaiyai keskarafakī. Nāskakē noko omiskōimatiroma nō nikayospaito,” ixō fētsa yoitiro.

²⁰ Askafayamafe. ¿Afeskakī mī Epa Nios kemapaimē? Mīfi yoraki. Aafi Nioski nā apaiyai keskara atiro. Akka a Niospa onifatokai yoikī iskafatiroma: “¿Afeskafakī mī ea iskara onifaamē?” ixō yoitiro.

²¹ Kēromā kesho rafe faxō nā apaiyai keskara fatiro. Kesho fetsa mēra afara shara nanetiro, fetsa mērari afara chaka nanetiro. Akka na kēsho iskafatiroma: “¿Afeskakī mī ea iskara faamē?” ixō yoitiro.

²² Nāskarifiakī Epa Niospa keyokōi yorafo onifafixō atiri ato potatiro āfe meka nikakaspaiāfe. Fenāmāshta ato yoiofiāito nikayospamisfo. Nāskakē anā teneima, mā atoki ōitifishkikī ato omiskōimaxii. Nāskaxō yorafo ato ōimapai ato potakī omiskōinōfo chaka fisti shināifāfe.

²³ Akka nōfi ato keskarama. Noko Niospa noikī noko tāpimamis. Nāskatari noko itip-inīsharafamai inimakōikai nō nai mēra shara afe īpaxanō. Noko askafamakī yorafo ōimani nā noiaifo Niospa ato noikōia.

²⁴ Noko judeofo fisti Niospa katonima nō afe īpaxanō. Akka judeofomafori ato katonī.

²⁵ Nānori Oseas Niospa meka yoikī kirikaki keneni iskafakī:

Fetsafo judeofomari ē katōxii efe yorafori inōfo. “Ē mato noi,” ē ato yoiyamafikatsaxakī, ē ato yoixii iskafakī: “Ē mato noikōi,”

ixō Epa Niospa yoini keskara Oseas kirikaki keneni.

²⁶ Askata anā keneni iskafakī:

Niospa judeofoma ato iskafani: “Mā kai efe yorafoma,” ato fayoni. Nāskata chipo anā Epa Niospa ato ifixii afe yora inōfo. Nāskakē yorafāfe ato yoixikani iskafakakī: “Nafō Niospa fakefo. Epa Nios finakōia afama mīshti fatiro,” ixō yoixikani.

²⁷ Isaías israelifoōnoa yoini iskafakī: “Na Israel āfe fenafo ichapakōifo ixii oa makex mīshtifo nō tanātiroma tiikōi. Nāskarifiāi judeofo ichapakōi kaixikani. Askafikaxō fisti rasichi Nios Ifofaxikani Nios fe ipaxakakī.

²⁸ Nāskaxō nā yoiyoni keskara nā maitio ikafāfe nā chanīmara faafoma. Nōko Ifāfe ato omiskōimaxii anā ato manayoima āto chaka potayonōfo,” ixō Isaías yoini.

²⁹ Isaías yoiyoni keskara nāskakōi. Nāskata anā yoini iskafakī:

Nōko Ifo finasharakōia nōko fenafo fetsafo ifini afe īpaxanōfo. Askafayamafiano anā judeofo ikeranama. Akka nō nai keyokerana Sodoma anoa fe Gomorra anoafo ini keskai, ixō Isaías kirika keneni.

Nā judeofoma na meka shara Jesúsnoa Pablo ato yoini

³⁰ Nāskakē ē mato yoi. Nā judeofomafāfe shināyonifoma iskafakakī: “Nōko chaka nō soapai,” ixō shināyonifoma. Akka iskaratīa Cristo chanīmara faifāfe Epa Niospa mā ato chaka soaxona afaa chakafamisma keskara ato ōixiki.

³¹ Akka ēfe kaifo israelifāfe Epa Niospa Moisés yoini keskara ifo sharafapainifo. Nāskaxō shinānifo iskafakakī: “A Moisés keneni nō ifofasharaito Niospa noko shara ōitiro,” ixō shināfiaifono Moisés kenenioxō Niospa ato chaka soaxotiroma ato shara ōixiki.

³² ¿Afeskakī Niospa ato shara ōimamē? Ē mato yoinō. Afāfekairoko Jesucristo chanīmara faifono ato chaka soaxopanā. Askatararoko Moisés ato yoini keskaraōnoax ishara-paikī āto chaka soapaikani Niospa ato shara ōinō. Akka Moisés yoinioxō Niospa ato chaka soaxotiroma. Ē mato afara fetsa anā yoinō. Tokiri fai nēxpakīa rakano finōpai akiki nō otisikaināi nō paketiro. Nāskarifiakī Jesús finōpaiyifāfe chanīmara fakanima afe nīpāxakakīma. Akka nā yorafo oa nō tokiriki otisikai paketiro keskarafo. Nāskakī Jesús finōpaikakī shināchakatirofo. Akka tsōa Jesús finōtiroma.

³³ Nānori Isaías Niospa meka yoikī kirika kenenoni iskafakī:

Nikakapo, judeofāfe āto pexe rasi ano Niospa tokiri keskara nīchixii yorafo akiki otisikī shināchakaxinōfo. Nā tokiri efapaki yorafo otisikani paketirofo. Akka nāskarari nā Jesucristo chanīmara faafo tiikai paketirofoma. Anā shināchakakanima, ixō Jesúsnoa Isaías kirika keneni. Akka Jesús nā tokiri efapa keskarakōi.

10

¹ Efe yora mīshtichi, ēfe kaifo ē shinākī finakōi. Ē ato Nios kīfioxōfafāini Jesūs chanīmara fanōfo, Nios fe ĩpaxanōfo.

² Mē tāpia nāfāfe Epa Nios tāpisharapaikani. Nāskafikakī a Niospa ato tāpimapaiyai keskara shinākanima. Āa āto shināmā fisti shināxō akani.

³ Jesūsxō Epa Niospa āto chaka ato soaxotiro afaa chakafamisfoma keskara ato ōixiki. Akka nā Jesūs ato chaka soaxotiro nikakaspakani. Āakōi shinākanax shara ipaikani.

⁴ Iskakakī shinākanani: “Moisés keneni keskara nō nikakōiaito Niospa noko chaka soaxotiro afaa chakafamisma keskara noko ōixiki. Nāskax nō afe ĩpaxanō,” ixō āakōi shinākanani. Akka Moisés kenenioxō nōko chaka nōa nō soametiroma afaa chakafamisma keskara ixii Niospa noko ōinō. Askatamaroko Moisésxō nō Cristoōnoa tāpitiro. Nāskakī nō Jesucristo chanīmara faax aōnoax nā afaa chakafamisma keskarakōi nō itiro nō Nios fe ipaxakī. Nāskakī nō Cristo fisti Ifofatiro. Nō anā Moisés keneni nikatiroma.

Jesūs yorafoōnoax ato nāxoni

⁵ Moisés kirika kenekī iskafani: “Epa Niospa noko yoini keskara ē kirika keneni. Fatora fētsa nā meka ifo sharakōi fai isharakōixii, afaa chakafaamax. Akka māfi Nios fe ikōisharapakenakaki. Akka nā Niospa yoini keskara nō ifo sharakōi fatiroma. Askakimaroko nō Cristo chanīmara fai Niospa noko shara ōinō, nō afe ĩpaxanō.”

⁶⁻⁸ Askata anā kirika kenekī iskafani: “Niospa noko yoini afeskax nō shara itiomākī. Nō Cristo chanīmara faito nōko chaka noko soaxotiro afaa chakafamisma keskara noko ōixiki. Nā Cristo meka shara nōko shinā mēra ikakī. Nō aōnoa tāpixō nō ato yois. Akka iskara shināyamakāfe: ‘¿Tsoa nai mēra katiromē Cristo fotomaxiki nō chanīmara fanō?’ Akka tsoakai nai mēra katiroma Cristo fotomaxiki. Askatari iskafakī shināyamakāfe: ‘¿Afesaxō mā Cristo naafianikē mai mēranoa nō ifitiromē?’ ixō shināyamakāfe. Akka iskaratīa Niospa meka nō mēra ikakī,” ixō kirikakī Moisés keneni. Nānori nō mato yois.

⁹ Akka, “Jesūs ēfe Ifoki,” nō ato fakī nō shinātiro iskafakī: “Chanīma, Jesūs nafianikē Apa Niospa otofani,” ixō nō shināito nōko chaka noko soaxotiro nō afe ĩpaxanō.

¹⁰ Akka nōko shinā mēraxō nō chanīmara fakē Epa Niospa nōko chaka noko soaxotiro afaa chakafamisma keskara noko ōixiki. Askatari, “Jesucristo ēfe Ifoki,” ixō nō ato yoiāx nō afe ipanaka.

¹¹ Nānori Niospa meka yoiikī yōra kirika keneni iskafakī: “A Jesucristo Ifofakanax anā āto ifo fetsa fenakanima. Cristo fistichi ato nimasharatiro afe ĩpaxanōfo,” ixō kirikakī keneni.

¹² Judeofo feta judeofomafāferi Cristo chanīmara faifono āto Ifo itiro. Niospa ato ōia nā yora fisti keskarafo, nāskarafos ato ōi. Nāskaxō fatotora yōkaito Niospa axosharakōifafāini aō noikōikī.

¹³ Nānorikōi Joel yoiikī kirika keneni iskafakī: “Fatotora nōko Ifo chanīmara faxō yoiikī iskafaito: ‘Mī ēfe Ifoki, ea ifife ēfe chaka ea soaxoxiki,’ faito āfe chaka soaxotiro afe ĩpaxanō,” ixō Joel kirika keneni.

¹⁴ Akka tsōa Jesūs Ifofaxoma, “Ea ifife ēfe chaka ea soaxoxiki,” ixō tsōa yōkatiroma chanīmara faxoma. Akka Jesūsnoa nikakatsaxakīma afeska faxō chanīmara fatirofoma. Tsōakairoko Jesūsnoa ato yoisiskē nikapanāfāfe.

¹⁵ Akka Niospa ato nīchiyamaino tsoa katiroma Niospa meka shara ato yoisikakī. Ākai fotirofoma. Nānori Isaiās kirika keneni iskafakī: “A meka shara yoi feai sharakōi,” ixō yoini.

¹⁶ Ē mato yoinō Niospa mā yorafo nīchini Cristoōnoa meka shara ato yoitanōfo. Niospa meka yoissharafaifono judeofo atirifāfe ato nikapaikanima. Nānori Isaiās kirika keneni iskafakī: “Ēfe Ifāfe, nō ato yoiāito tsōa chanīmara faima,” ixō yoini.

¹⁷ Nāskano Cristoōnoa meka shara yoiāito nikakakī fetsafāfe chanīmara fatirofo.

¹⁸ “Akka, ¿judeofāfe nā meka shara Jesūsnoa nikamisfomamē?” ixō fētsa ea yōkaito, ē kematiro iskafakī: “Ēje, mā nikamisfo.” Nānori David yoini kirika kenekī iskafakī:

Nā maifo tū anoafāferi nā meka shara mā keyokōichi nikamisfo, ixō David kirika keneni.

¹⁹ Mā shināiraka iskafakī: “Akka judeofāfe na meka shara Jesūsnoa mā nikafikakī nikasharamisfomara,” ixō mā shināi rakikā. Akka ē mato yoi iskafakī, mā nikamisfo nā meka shara Jesūsnoa. Mēxotaima mā nikafikakī chanīmara faafoma. Akka israelifomafāfe Nios nikakatsaxakakīma mā rama aōnoa nikafo. Moisés Niospa meka yoiikī kirika keneni iskafakī:

Nā judeofoma efe yora iyopaonifoma. Akka iskaratīa ē ato noikōikī ē ato ifi efe yora inōfo. Ē ato askafaito ōikakī judeofāfe ato noikaspaxikani ato xītipaikakī. Askatari, “Na judeofomafāfe afaa tāpiafoma, judeofāfe ato fafiaifono ē ato ifi efe yora inōfo. Nāskakanax judeofo atoki ōitifishkixikani,” ixō Niospa yoini,

ixō Moisés kirika keneni.

²⁰ Chipo Isaíasri Niospa meka yoikī kirikaki keneni iskafakī:

A judeofomafāfe akōi ea fenayamafikatsaxakakī chipo ea fichixō ea chanīmara fakanax efe ipanakafo. Askatari, “Niosnoa noko tāpimafe,” ixō ato yoiyamafikatsaxakakī. Akka chipo ē ato tāpimaxii,

ixō Niospa yoini keskara Isaías keneni.

²¹ Askafiaifono ēfe kaifoōnoa Niospa yoini iskafakī: “Nā pena tiixō āto shinā mēraxō ē ato yomis iskafakī: ‘Ekeki fekāfe,’ ixō ē ato shināmafaiino ekeki fepaikani. Nikayospamisfo,” ixō Niospa yoini keskara Isaías kirika keneni.

11

Niospa israelifo noikōi

¹ Mā iskafakī shināiraka: “Epa Niospa afe yorafo israelifo mā pota,” ixō mā shināiraka. Mā askaito ē mato kematiro iskafakī: “Maa, ato keyokōi potama. Nāskaxō eari potama ēri israeli. Akka Abraham fe Benjamīn ēfe xini. Nāskax ē israelikē ea Niospa potama,” ixō ē mato kematiro.

² Epa Niospa afe yora inōpokoai fo israelifo ato katoyonixakī kai ato potamisma. Shinākapo. Nōko xini Elías israelifoōnoa yoikī kirika keneni iskafakī:

³ “Ēfe Ifāfe, a mī meka shara yoimisfo mā ato retemisfo. Askatari a mīsa kamakixō mia kīfimisfo mā potafo. Iskaratīa ē fistichi mia Ifofai. Anā ano tsoama. Eari retepaikani,” ixō Elías Nios yoini.

⁴ Nāskafaito nikakī Epa Niospa ŷafaa fanimē, Elías? Iskafakī kemani: “Maa. Meres fistikai mī ea chanīmara faima. Akka nāno mī kaifo siete mil yorafāfe ea chanīmara fakaxō afaa fetsakai ifofaafoma. Akka yorafāfe onifanifo āfe ane Baal, ‘Akai nōko niosra,’ famisfoma,” ixō Niospa Elías yoini.

⁵ Nāskarifiakī iskaratīari ēfe kaifo fisti rasichi mā Nios Ifofafo, Niospamāi afetīama ato noikī ato katoyonino afe yora inōfo.

⁶ Niospa noko noikōisharakī noko ifi nō afe yora inō. Akka nō afara sharafāxokai noko ifima. Niospa noko afaa kopi yōkaima noko ifixiki. Akka āakōi noko ifi noko noisharakī. Nāskakē nō afara sharafatiroma noko ifinō. Akka a nō kopifa keskara noko ōikī āakōi noko ifikeranama. Nāskakē noko afaa kopi yōkaima āakōimāi noko ifixō.

⁷ Akka ēfe kaifo israelifo fisti rasichi Nios fenapaonifo afe rafexikakī, nāfomāi Niospa katoyonino afe yora inōfo. Akka israeli fetsafāfe Nios nikakaspaonifo Nios fe rafekaspakakī. Akka a Nios nikakaspaifāfe āto ōiti kerexkōifakaxō nikakaspakani.

⁸ Nānori Niospa meka kirika kenekakī iskafanifo: “Epa Nios nikakaspakani nā oxafo keskarafo afaa shinākanima. Askatari oa yora fēxo keskara ipaikani. Nāskaxō Nios nikakōipaikani. Askafaifāfe Epa Niospa āfe meka shara ato tāpimanima. Iskaratīari nāskakani,” ixō yōra kirikaki keneni.

⁹ Askatari David kirika keneni iskafakī:

A Nios nikakaspaifāfe shinākanima iskafakakī: “A nō piai ichapa ita nōko afama mīshtifori ichapa. Nāskakē Niospa noko shara ōi,” ixō shinākanima, Nios nikayamafikakī. Akka nōko afama mīshtioxō Niospa noko shara ōima nō afe ipaxanō. A Nios nikakaspaifo āto afama mīshtio noax fenoxikani afama mīshtifo shināifāfe. Niospa ato omiskōimaxii.

¹⁰ Oa yora fēxo keskara inōfo. Askarafāfe Nios nikayamaifono oa yora afara efekōi pefea keskara Niospa ato imanō, ixō David kirika keneni a Nios nikakaspaifoōnoa yoikī.

Judeofomafāferi Jesús chanīmara fakanax afe ipanakafo

¹¹ Akka, ŷNiospa afe yorafo israelifo ato potapakenakamē? Maa, ato keyokōi potaima. Akka nā israelifāfe Cristo chanīmara famisfomano a israelimafāferi mā Jesucristo chanīmara fakani. Ifofaifono Niospa ato ifi afe yora inōfo. Akka nā israelifomafāfe mā Cristo chanīmara faifono israelifāfe ato ōikakī akairi Jesucristo chanīmara fapaikani afe ipaxakakī.

¹² Ēfe kaifāfe, afara chakafamisfo Jesucristo Ifofapaimisfoma. Akka Epa Niospa nā maitio anofo Jesucristoōnoa ato tāpimanano chanīmara fakanax afe ipanakafo. Nāskaxō Niospa ato shara faxōi, inimakōinōfo. Askatari ēfe kaifo judeofāferi chipo Jesucristo chanīmara fakanax inimai finakōixikani Niospa ato sharafaxōano.

¹³ Akka mā ēfe kaifoyamafiano Epa Niospa ea mato mēra nīchini Jesúsnoa ē mato yoinō. Ē inimakōi Epa Niospa ea katoni ē mato ano onō.

¹⁴ Ē mato yoiaino mā Cristo chanīmara fayana mā inimakōiaito mato ōikakī ēfe kaifāferi Jesucristo chanīmara fapaikani, mato keskara ipaikakī. Nāskarakōi ipainōfora.

¹⁵ Shinākapo. Ēfe kaifo judeofāfe Jesucristo chanīmara fayamaifono Niospa ato potani anā afe yorakōi inōfoma. Akka nā maifo tii anoafāfe Cristo chanīmara fakanax Nios fe rafekani. Nāskakē ēfe kaifāferi Cristo chanīmara faifono Niospa anā ato ifi afe yora inōfo. Nāskakanax sharakōi ixikani. Nā yora naax otoa keskara itirofo, inimakōikani.

¹⁶ Nāskaxō ē anā mato yoinō pākiri keparanākī iskafakī: Pāa kaxke pishta Niosnā ikano keyokōi āfenā itiro. Nāskatari ifi āfe tapo āfenā ikano āfe teshpafori keyokōi Niosnā itiro. Nāskarifiakī ēfe kaifāfe Jesucristo chanīmara fakakī taefanifo fisti rasichi. Nāskakē āto fenafāfe Nios Ifofakanax chipo afe yora ixikani chanīmara fakanax.

¹⁷ Ē mato afara fetsa anā yoinō mā tāpinō. Ēfe kaifo judeofo ifi olivo āfe pōya keskarrafo. Nā ifi pōya fimioma ifāfe mextexō potatiro. Nāskaxō ifi olivo fetsa nā nii mēra nia āfe pōya fetsa fiaxō tichixotiro nā olivo kayakōiki. Nāskarifiakī judeofāfe Jesucristo chanīmara fayamaito Niospa mā ato pota. Akka mā judeofoma. Māfi nā ifi olivo nii mēra nia keskarafokī. Nā ifi ifoyama keskarrafo, mā. Nāskax mā Epa Niospa yora ipaonima. Akka Jesucristo mā Ifofaito Niospa mato ifi afe yora mā inō. Nāskata nā ifi olivo mā āfe pōya tichiax āfe tapo mēranoax yosiaiino foaisharatio. Nāskarifiakī nā judeofāfe āto xinifāfe mekaōxō mā Niosnoa tāpisharakōiafo nā ifi olivo yosiai keskaraxō.

¹⁸ Iskara shināyamakāfe: “Nō sharakē noko Niospa ifia. Akka judeofo chakafokē Niospa mā ato pota,” iyamakāfe. Shinākapo. Māfi ifi āfe pōya keskarrafo. Ifi pōyakai āfe tapomais nitiroma, xanatiro. Ifi pōyafō āto tapoōnoax nia. Nāskarifiakī judeofo āto xinifāfe Nios tāpinifo taefakakī. Atoōxō māri Nios tāpitiro.

¹⁹ Mā shināiraka iskakī: “Ifi pōya chakakē, ifāfe mextexō pōtatiro. Nāskarifiakī judeofāfe Jesucristo chanīmara fayamaifono Niospa ato potani. Akka nō judeofo keskarama nō Jesucristo chanīmara faax nō afe ipanaka,” ixō mā shināiraka.

²⁰ Nā mā yoi ai keskara chanīmakōikī kexemesharakāfe. Akka judeofāfe chanīmara fayamaifāfe Epa Niospa ato potani. Nā judeofo potani keskakakī Epa Niospa matori potatiroki. Kexemesharakāfe, mā anā Jesús chanīmara fayamaito matori potatiroki. Nāskakē kakapayamakāfe. Mā Jesús chanīmara fayamax mā fenotiroki.

²¹ Judeofāfe Nios chanīmara fakī taefafianifono chipo āto fenafāfe chanīmara fayamaifāfe Niospa ato potani. Māri mā chanīmara fayamaito matori potatiroki.

²² Akka shinākapo. Niospa noko noifaiino nō nikayamaino noko tāpimatiro omiskōimakī. Nāskakē judeofāfe chanīmara fayamaifāfe ato omiskōimakī ato potai. Akka Niospa mato noiki afe yora mato imai. Nāskakē mato noiai keskara shināfafāikāfe. Chanīmara fafafāikāfe. Mā askafayamaino matori potatiro.

²³ Ēfe kaifo judeofāfe anā chaka shinākakima, Jesús chanīmara faifono anā afe yora Epa Niospa ato imatiro. Ifi mextexō anā āfe pōya tichixotiro anā foainō. Nāskarifiakī Epa Niospa anā ato ifitiro afe yora inōfo.

²⁴ Mākai judeofoma. Judeofo ifi olivokōi keskarrafo. Akka mā judeoma. Mā nā olivo nii mēra nia keskara. Olivokōi āfe ifāfe nā nii mēra olivo āfe pōya xatexō olivokōiki tichitiro foaisharanō. Nāskarifiakī mā Niospa yora ipaonima. Akka iskaratīa Epa Niospa mato ifia mā afe yorafō inō. Nāskakēri ēfe kaifo anā Niospa ato ifipaisharakī ifituro afe yora inōfo. Jesús chanīmara faifāfe afe yorafō ato imatiro.

Epa Niospa judeofo anā ato ifixii afe yora inōfo

²⁵ Efe yora mīshtichi, māfi israelifoma. Meka fetsaōnoa mā nikamisma ē mato tāpimanō mato shinā mēraxō mā shinānō, nā ē mato yoi ai keskara mā tāpiax kakapaimis mā inōma, mā iskanōma: “Nō israelifo keskarama, nō sharafinakōia,” mā inōma. Chanīma, iskaratīa ēfe kaifo israelifāfe āto ōiti kerexkōixō Niospa meka shara Jesúsnoa nikakaspakani. Akka israelifāfema Jesús chanīmara faafono Niospa ato ifini afe yora ato imaxii. Nāskatari ēfe kaifāferi anā Nios chanīmara faifāfe Niospa anā ato ifixii afe yora inōfo.

²⁶ Akka keyokōichi israelifāfe Jesús chanīmara faifāfe Epa Niospa ato ifixii afe yora inōfo. Nānori Isaías kirika keni iskafakī:

Nōko Ifo Siōn anoax oxii nōko chaka noko soaxoxiki nō afe ipaxanō. Nā nōko Ifo israeli yora ixii. Nāto israelifo ifiyoi anā afara chaka āto ifo inōma, ixō Isaías kirika keni.

²⁷ Askata Isaías Niospa meka anā yoini iskafakī:

Ē ato yoiyoni keskara ē āto chaka ato soaxoxii, ixō Niospa yoini Isaías kirikaki keni.

²⁸ Jesúsnoa meka shara judeofāfe nikakaspakani, noikaspakakī. Akka mā judeoma. Nāskakē Epa Niospa mato sharafaxōa āfe meka shara Jesúsnoa mā chanīmara fanō. Akka judeofāfe āto xinifo Niospa yoini iskafakī: “Ē mato ifi mā efe yora inō,” ixō ato yoini. Nāskakē āto xinifoōxō Niospa ato noi, āfe fenafōri noikōi.

²⁹ Epa Niospa ěfe kaifo ěfe afama mĩshti ināxixakĩ yoyioni keskara anā fetsafaima afetiāmamāi ato ifiyonixakĩ. Nāskakĩ ato potapakenakama.

³⁰ Akka mā judeoyamafixō mā Epa Nios nikayopaonima. Akka iskaratīa mā anā nikayospa ipaima. Nāskakē Niospa mato sharafaxopai mā chanīmara faito. Akka ěfe kaifo judeofo ato sharafaxopaifaiato nikakaspaonifo. Nāskakē mā chanīmara faito Epa Niospa mato noikĩ mato sharafaxōi.

³¹ Nā mā Nios nikakaspayopaoni keskakani ěfe kaifofo. Nāskafiafono nā mato noiai keskari fakĩ atori Niospa noikōi. Nāskakē chipo Epa Nios anā shināxikani.

³² Epa Niospa yoini tāpixō iskafakĩ: “Yora keyokōichi chakafamisfo, nikayospafo,” ixō yoini. Askafiafono ato noikĩ ato chaka soaxoxii afe ĩpanāñōfo.

Nios sharafinakōia

³³ ¡Aicho! ¡Nōko Nios sharakōi! Afama mĩshti tāpikōia. Shināsharakōia. Āfe shinā mēraxō yorafoñnoa shināi keskara tsōa tāpitiroma. Aato akai keskara tsōa tāpitiroma.

³⁴ Tsōa nōko Ifāfe shināi keskara tāpitiroma. Tsōarikai nōko Ifo tāpimatiroma.

³⁵ Tsōarikai nōko Ifo afaa ināma noko niminō.

³⁶ Ares ěfe shināmā shināxō afama mĩshti onifani. Keyokōi āfenā. Añnoax nipanaka. Nāskakē, “Nios sharakōira,” fapanakafo. Askapainō.

12

Afeskax Niospa ěfe yonomati nō itiomākĩ

¹ Efe yora mĩstichi, ě mato yoisharapaiyai keskara akāfe. Epa Niospa mato noikĩ mato sharafamiski. Nāskakē māri ināmekāfe mātō Ifo inō, ěfe yonomati ipaxakakĩ. Mā askaino anā afara chaka mātō ifo itiroma, Nios mātō Ifo iki. Shinākapo. Mā mēste shināsharakōikĩ Nios noiyānā sharafakāfe. Mā askafaino Nios matoki inimakōitiro.

² Nios Ifofaafāfema shināi keskara shināyamakāfe. Mā shināpaoni keskara anā shināyamakāfe. Iskaratīa Niospa mātō shinā mēra fetsafapaiyai keskara shinākāfe. Afaa fetsakai mā shinātiroma. Mā askakĩ mā tāpitiro Niospa mato imapaiyai keskara sharafinakōi. Mato imapaiyai keskara mā ikaino matoki inimatiro.

³ Epa Niospa ea noikĩ ea yoia ě mato tāpimanō. Nāskakē ě keyokōi mato yoisharapai. Kakapaimis iyamakāfe. Niospa mato imapaiyai keskara fisti shinākāfe. Afaa fetsa shināyamakāfe. Niospa mato shināmana keskara fisti matoñnoa shinākāfe. Mēstekōi matoñnoa shinākāfe. Mā Nios chanīmara fakĩ shinākāfe iskakĩ: “Ea Niospa imapaiyai keskara ě ipai,” ixō shinākāfe.

⁴ ě mato afara fetsa ěa yoipai. Nōko yora fistifiano nō pōyayai fetsea. Askata nō feroyata, pachoyata, nā nō fisti askai fetsea. Nāskaxō nāfāfe nō afara fetsafo atiro.

⁵ Nāskarīfiai nōko Ifo Cristo fistikōi. Akka nōfi ěfe pōya keskarata, ěfe fero keskarata, ěfe tae keskarata nō iki fetsea yora fisti fiax.

⁶ Epa Niospa noko amapaiyai keskara nō aōxō fetsafo axosharatiro. Mā nō Nios Ifofaano a noko imapaiyai keskara noko imaketsai fētsa ěfe meka ato yoinōfo, fētsari ato tāpimanō, fētsari afaamaisfori ato ināñō. Nāskarafo noko imaketsai. Mā nō Nios Ifofaano noko noikĩ noko katoa noko amai keskara nō anō. Noko fetsafo katoa ěfe shināñōxō fetsafori ěfe meka nō ato yoinō. Nāskakē mā mato katoano mā chanīmara faxō mato yoiai keskara fetsafori ato yoisharakāfe.

⁷ Mā mato fetsafo katokē ěfe shināñōxō fetsafori axosharafafāikāfe. Mato fetsafo katokē ěfe shināñōxō ěfe meka ato tāpimasharakāfe.

⁸ Mato fetsafo katokē aōxō fetsafo òiti ato fepeaxōfāikāfe. Mato fetsafo katokē afara yopaifo inimayanā ato ināsharakāfe. Mato fetsafo katokē āto xanīfo mā inō. Nāskakē Niospa shināmana keskara ato yonomasharakāfe. Xanīfo mēsteshara ikāfe. Nā mato katokē ěfe shināñōxō omiskōiaifo ato noikĩ inimayanā ato axosharakāfe.

Afeskax Nios Ifofafo itiofomē

⁹ “ě mato noira,” ifiata ato pārayamakāfe. Yorafo noikōikāfe. Afara chakafo noikaspakāfe. Afara shara noisharakāfe. Afo potayamakāfe.

¹⁰ Nā mā Nios chanīmara faafo tii noinākāfe. Mato fe yorakōifo fe mā noināmis keskariai noinōñākāfe. A mā mā nōimeai keskariai fetsafori ato noisharakāfe. “Fetsafo finakōiaki, ě finakōiyamaki,” ixō ato sharafakāfe.

¹¹ Nōko Ifo yonoxoni xaniyamakāfe. Niospa Yōshi Sharañōxō inimakāi yonosharaxokāfe.

¹² Epa Niospa mato sharafaxoxiai keskara shinākāfe. Nāfo shināi inimakāfe. Akka omiskōifi fena fenayamakāfe. Epa Nios kīfikĩ xateyamakāfe.

¹³ Nios Ifofaafāfe afara yopaifono ato inākāfe. Fetsafo pimasharakāfe. PeXe yopaifāfe mātō peXe mēra ato ikimakāfe. Ato kexesharakāfe.

¹⁴ Mato omiskōimanaifāfe ato kopiyaamakāfe. Nios kīfikāfe iskafakī: “Epa Niospa ato chakafayamafe ato sharafafe,” ixō Epa Nios kīfikāfe. Nāskaxori ato Ichayamakāfe. Askatamaroko ato sharafaxokāfe.

¹⁵ Inimaifono māri inimakāfe. Ato sharafaifono aōnoax inimakāfe. Oiaifono māri shināmitsayanā ato shinākāfe. Omiskōiaifono māri atoōnoax omiskōikāfe.

¹⁶ Afe feratenākāima Epa Niospa mato shināmapaiyai keskara fisti anori shinākāfe. “Ē ato keskarama,” iyamakāfe. Xanīfofo fisti fe rafepaimis iyamakāfe. Afaayamafo ferī rafekāfe. “Ē tāpia keskarakai fetsafāfe tāpiafoma,” ixō anori shināyamakāfe. Kakapaiyamakāfe.

¹⁷ Mato chakafafiaifāfe ato kopiyaamakāfe. Āto ferotaifi isharakāfe, “Nios chakara,” fayamanō.

¹⁸ Keyokōi yorafo fe rafepaisharakāfe. Mā aska sharafapafiaino fetsafo mato fe rafesharapaikanima.

¹⁹ Efe yora mīstichi, fētsa mato chakafafiaito ato kopiyaamakāfe. Epa Niospa meka yoikakī kenenifo iskafakakī: “Mato chakafaifo ē ato omiskōimanikai,” ixō kirika kenenifo. Epa Niospa yora chakafaifo ato omiskōimaxii. Mākai ato omiskōimatirofo.

²⁰ Ato kopitamaroko nā mato noikaspaifo fonāikaifāfe ato pimakāfe. Nōamā ikaifāfe ato ayamakāfe. Ma askafaito ōikani, “Noko kopikanimara,” ikanax rāfipainōfo.

²¹ Askata fetsafāfe mato chakafapafiaifāfe māri kopikiri ato chakafayamakāfe. Chaka ifofayamakāfe. Askatamaroko afara sharafatitaifakāfe. Askafakī mā chaka potatiro.

13

Nō xanīfofo nikakōitiro

¹ Epa Niospa yoini keskara nā maitio ikafāfe xanīfofo katotirofo. Akka xanīfo finakōia nikata afe rafeefori nikakōikāfe Niospa ato xanīfo imaino. Akka Niospa xanīfo ato imayamaino itirofoma.

² Niospa noko yoini iskafakī: “Māto xanīfofo nikakōikāfe.” Akka māto xanīfo mā nikakaspakī Niosri mā nikakaspai. Mā nikakaspaito mato omiskōimaxii.

³ Akka nō isharaxkai nō xanīfoki mesetiroma. Akka nō isharayamax nō xanīfoki mesetiro. Xanīfoki mesexikima isharakāfe. Mā askaito mato chakafatama matoōnoa yoisharanōfo.

⁴ Xanīfofo Epa Nios yonoxomis keskarafo mato axosharakani. Akka mā afara chakafaax xanīfoki mā mesetiro. A xanīfofo afokai kaxpa xanīfoafoma, mato omiskōimatirofo. Nāfofi Niospa ōimati keskarafofoki afara chakafaifāfe ato omiskōimatirofo.

⁵ Akka māto xanīfofo nikakōikāfe mato omiskōimayamanōfo. Māto shinā mēraxō shināsharaxikakī. Ato nikayamakī mā shinātiro iskafakī: “Ooa, ē nikayospakōi. Nāskax ē shināmitsaito ē mei,” ixō mā shinātiro xanīfofo nikayamax.

⁶ Māto xanīfofo Nios yonoxomiso keskarafo pena tii mato yonoxokani mā isharanō. Nāskakē mato kori yōkaifāfe ato inākāfe aōxō mato axosharanōfo.

⁷ Mā ato nimixō ato kori inākāfe. Askatari ato noisharata ato noisharakāfe.

Nō nōinōnātiro

⁸ Tsoa nimiyamakāfe. Askatamaroko noinākāfe. Noināi eneyamakāfe. Nā nō yorafo noiaiōxō Epa Niospa yoini keskarakōi nō amis.

⁹ Noko yoikī iskafani: “Māto āfima fe iyamakāfe. Kērofori māto fenema ferī iyamakāfe. Retemitsapaiyamakāfe. Yometsoyamakāfe. Fetsa pārayamakāfe. Fetsa fiapaiyamakāfe,” ixō noko yoini. Afara fetsafori noko yoini. Nō yorafo noikī na Epa Niospa yoini keskara nō ato chakafaima. Nāskakē a mīa mī noimeī keskari akī fetsafo ato noife.

¹⁰ Nō fetsafo noikōixō nō ato chakafatiroma. Akka nō ato noikōikī Niospa yoini keskara nō aki. Nō āto āfi fe nō ipaima. Askatari nō ato noikōixō nō atoki yometsoima. Askatari nō ato pāraima. Akka nō ato noiaiōxō Niospa noko yoia keskara nō atiro.

¹¹ Nā Jesús fena oyoaima chāi ē taefakī Jesús Ifofani. Akka iskaratīa nōko Ifo Jesús mā chaima oi. Nāskakē ē mato yoiai keskara akāfe. Oxakatsa ikai keskara iyamakāfe. Oxakatsa ikikai nō yonosharatiroma. Nāskakē xanikakīma Jesús yonosharaxokāfe itipinīsharaxikakī.

¹² Mā penaino samamakōi penatiro. Nāskarifiakakī mā nōko Ifo chaima oaino fakish mēra ika keskara iyamakāfe. Māto chaka xatekōikāfe. Jesús ika keskara māri xafakīa ikāfe afara chakafaxikakima.

¹³ Isharakōikāfe penano nō ōisharatiro pakexikima. Nāskarifiakī Jesús Ifofaax nō isharakōitiro afaa chakafatama. Akka fetsafāfe monokakī afara chakafaifo mēra foymakāfe. Chaka fetsa fetsatapafo ayamakāfe. Pāeyamakāfe. Askatari māto āfima chotayamakāfe. Kēromāri māto fenema chotamayamakāfe. Afara chaka fetsafo shināyamakāfe. Feratenā faatanāyamakāfe. Fetsa xītipaimis iyamakāfe.

¹⁴ Askatamaroko nōko Ifo Jesucristo fe rafekāfe. Jesús ika keskara māri ikāfe afara chakafakīma. Afara chaka mā shināpaiyai keskara ayamakāfe.

14

Mato fe yorafo a Nios Ifofafo mekafakī chakafayamakāfe

¹ Meka fetsa ē mato yoinō. Fetsafāfe Jesús Ifofafiakaxō āfe meka tāpisharakanamax mato fe ichanāifono, “Aicho, nofe ichanāi fekāfe,” ato fakāfe. Mā shināi keskara anori shināyamaifono ato fe feratenāyamakāfe. Ato mekafakī chakafayamakāfe.

² Mato mēra ixō fētsa yoitiro iskafakī: “Ē Jesús chanīmara faxō keyokōi ē pitiro,” ixō yoitiro. Akka fētsa yoikī iskafatiro: “Ēfi Jesús chanīmara fakī ēkai nami pitiro. Ē fanafo fisti pitiro,” ixō yoitiro Jesús meka tāpisharaxoma.

³ Fētsafāfe nami pikī a nami pimisfoma ato mekafakī chakafatiroma. Ato yoikī iskafatiroma: “Mā afaa tāpiama. Nō nami pia shara, noko chakafatiroma. Nami shara,” ato fatirofoma. Nāskarifiakī nā nami pimismato a nami pimisfo ato mekafakī chakafatiroma. Ato yoikī iskafatiroma: “Nafāfe nami pikakī chakafakani,” ixokai atoōnoa yoitirofoma. Akka Epa Niospa keyokōi nāskarafa noko ifi nō āfe fakefo inō. Nāskakē fetsafo mekafakī chakafayamakāfe.

⁴ Jesús Ifofaafokai māto inafoma. Akka afāfe Epa Nios yonoxomisfo. Nāskakē ato mekafakī chakafayamakāfe. Epa Niospa ato yoitiro. A chakafaifo ato iskafatiro: “Mā chakafai,” ixō ato yoitiro. Askatari a sharafaifo, “Mā sharafai,” ato fatiro. Akka a chaka shināifo Niospa ato tāpimatiro isharanōfo anā chaka shinānōfoma.

⁵ Akka a Nios Ifofafo fetsafāfe shinākani iskafakakī: “A judeofāfe tenetiūa nō ichanātiro Jesús shināi,” ixō anori shinākani. Akka fetsafāferi shinākani iskakakī: “Nā pena keyokōi shara nō ichanātiro Jesús shināi,” ixō shinākani. Nāskaxō nā āto shināmā shināifo keskara shara. Nā shināifo penata ichanātirofo Jesús shinākani. Akka mā shināi keskara shināyamaifono ato mekafakī chakafayamakāfe.

⁶ “Na judeofāfe tenetiūa nō ichanātiro Jesús shināi,” ixō shināifāfe, nāfāfe nōko Ifo Jesús Ifofasharapaikani. Akka a nā fatora penata nō ichanātiro Jesús shināi ikaifāferi, nāfāfe nōko Ifo Jesús Ifofasharapaikani. Askatari fetsafāfe shinākani: “Nō nami pitiro. Aicho, Epa Niospa mī noko nami inā nō pinō,” ixō shinākani. Nāfāferi nōko Ifo Jesús Ifofasharapaikani. Akka fetsafāferi nā nami piyamaifāfe nāfāferi nōko Ifo Jesús, “Aicho,” fatirofo. Nāskaxō nāfāfe Nios shināsharapaikani.

⁷⁻⁸ Nō niyoxōkai nōa nō apaiyai keskara fisti nō shinātiro. Epa Niospa noko amapaiyai keskara nō shinātiro. Nōfi āfenāfoki. Nāfi nōko Ifokī. A nō naitiari nōko Ifo Jesús niyoxō nō Ifofasharapai nokoki inimanō. A nō naitiari nōko Ifo nō shinātiro nōmāi āfenākōixō.

⁹ Cristo noko nāxonī. Mā maifafono otokainixakī. Iskaratūa mā nia. Nāskakē nō nayoamax nōko Ifo iki. Mā nō naaxri nōko Ifo ixii.

¹⁰ Āfeskafakī mato feta chanīmara faafo mā mekafakī chakafaimē? Āfeskafakī mā fetsaōnoa mā shināchakaimē? “Aakai afaamara,” ixō mā shināi. Shinākapo, keyokōi nō chipo Nios ikano nō akiki nokoi kaikai. Askatari noko yoixii nō afara sharafayamakē nō chakafamiskē.

¹¹ Isaías Niospa meka yoikī kirika keni.

Niospa yoini iskafakī: “Chanīmakōi ē nia. Chanīmakōiri keyokōi maifo tii anoafō ekeki nokoxikani. Ekeki ratokonō mai chachikaxō yoixikani: ‘Epa Niospa, mī chanīmakōi, mī Nioskōi,’ ixō ea keyokōichi yoixikani.”

¹² Akka keyokōichi Epa Niospa ferotaifi nō amis keskara nō yoixii. Nō shināmis keskarari nō yoixii.

Fetsafo afara chakafamayamakāfe

¹³ Nāskakē a mato feta Jesús chanīmara faafo mekafakī chakafayamakāfe. Iskafakī shinākāfe: “Nō afara chakafaito ōikaxō akairi chakafatirofo. Nāskakē nō afaa chakafapaima akairi afaa chakafayamanōfo.”

¹⁴ Jesús ēfe Ifokē ē mato yoisharapai. Keyokōi a nō piaifo shara nō pitiro. Nā ē chanīmara fakōini. Nāskafiano fetsafāfe shinākani iskafakakī: “Na piaifo nō pixō nō chaka shinātiro,” ixō shinākani. “Nō nami pitiro,” ixō shināfikakī mā nami pikani. Nāskaxō chaka shinākani.

¹⁵ Mato feta fētsa Jesús chanīmara faifo āfe ferotaifi a nami pitirofoma piyamakāfe āfe shinā mēraxō shināchakanōma. A noikōixō mā āfe ferotaifi pitirofoma. Nōko Ifo Cristo aōnoaxri nani. Nāskakē a pitirofoma pikī mā fetsa shināchakamatiro. Nāskakē āfe ferotaifi piyamakāfe Jesús kachikiri faax fenoyamanō.

¹⁶ “A ē akai keskara chakama,” ixō mā shināfaino fetsafāfe askara shinākanima. Iskafakī shinākani: “Na mā akai keskara chaka,” mato faifono mā xaterisafatiro matoxō shināchakayamanōfo.

¹⁷ A nō piatio Niospa yora noko imatiroma. Askatari a nō ayaito Niospa yora noko imatiroma. Akka Nios nōko xanīfokōino āfe Yōshi Sharaōnoax nō sharakōi. Nōko ōiti fekaxteima nō inimakōitiro.

¹⁸ Nōko Ifo Cristo nō nikasharaino Epa Nios nokoki inimasharatiro. Yorafāferi nokoōnoa shināsharatirofo.

¹⁹ Nāskakē Jesús chanīmara fai fetsafo fe isharakōikāfe. Jesúsnoa yoinōnākāfe a keskara shara ixikakī.

²⁰ Niospa yoini keyokōi a nō piāi shara. Nāskafekē fetsafāfe, a Nios tāpisharafāfema shinākani iskafakakī: “Afara fetsa nō pixō nō chakafai,” ixō shināifono āto ferotaifi afara piyamakāfe. Akka mā āto ferotaifi piaino mato ōikakī āto shinā mēra shināchakatirofo. Nāskaxō anā Jesús Ifofasharatirofoma.

²¹ Mā nami piatio fetsafāfe mato ōikī shināchakatirofo. Nāskaxō anā Jesús Ifofatirofoma. Nāskakē āto ferotaifi afaa piyamakāfe. Askatari mā māmā ayaito ōikakī fetsafāfe shināchakatirofo. Nāskaxō anā Jesús Ifofatirofoma. Nāskakē anā ayayamakāfe. Afara fetsafori akī mā ato shināchakamatiro, nāskakē xatekāfe Jesús Ifofanōfo.

²² Nāskaxō mā shināi keskara mares shinākāfe. Epa Nios fisti mā yoitiro. Mā Nios chanīmara faxō mato shinā mēra shināsharakī mā iskafatiro: “Chanīma, ē akai keskara chakama,” ixō shinākī mato shinā mēra mā inimatiro.

²³ Nāskaxō fetsa Niospa meka tāpisharaxoma shinātiro iskafakī: “Nafō pikī ē chakafairakaiti,” ixō shināfikī akairi pikī chakafatiro. Afara fetsafori shinākī iskafakī: “Nafō akī ē chakafairakaiti,” ixō shinākī akairi akī chakafatiro.

15

Nā mā apaiyai keskara fatama fētsa apaia keskara axokāfe

¹⁻² Jesús chanīmara fakōixō a Niospa meka tāpisharafoma nō ato fenāmāshta yoitiro ato fe feratenātama. Nōa nō apaiyai keskara fisti nō atiroma. Nā Jesús chanīmara faa fetsafori noikī nō ato axotiro āto shinā mēra inimamakī shara inōfo Jesús Ifo sharafakōinōfo.

³ Shinākapo. Nōko Ifo Cristo aafi apaiyai keskara fisti shināpaonima. Aōnoa Nios yoimisto kirika keneni iskafakī: “Epa, ē mia nikakōia. Akka mia chakafakakī eari chakafakani,” ixō kirika keneni Cristoōnoa yoikī.

⁴ Niospa meka kenepakenifo noko tāpimaxikakī. Āfe meka nō chanīmara faxō afara chaka finōkōixō nō tenekōinō. Āfe mekaōxō nōko ōiti nō fepeaxō nō tāpitiro nōko Ifo fe nai mēra chipo nō afe ipanaka anā afara chakapa noko omiskōimanōma.

⁵ Noko afara chakapa afeskarafafaito Epa Niospa noko mitsisfamatiro nō tenenō nōko ōiti fepeaxokī. Nāskakē mā Jesús Ifofasharaino mato nānori fisti shināmatiro.

⁶ Nāskakē nōko Ifo Jesucristo āfe Apa nō yoisharai. Nāskax nā meka fisti nō mekai keskarakōi Epa Nios yoisharakī nā yora fisti keskara.

Niospa meka shara judeofoma yoinifo

⁷ Cristo nokoki inimakī noko ifini afe yorafo nō inō. Nāskakē māri fetsafo fe yōra faatanākāfe. Mā askaino Niosnoa shināsharatirofo.

⁸ Ē mato yoinō Jesucristo mai ano oni judeofo ato yonoxomis keskara ikiyoi. Niospa nōko xinifo yoiyoni keskara Cristo oni. Nāskakē Niospa nōko xinifo yoini keskara chanīmakōikē nō tāpitiro.

⁹ Akka judeofomaōnoaxri Jesús oni. Nāfāferi chanīmara faxō yoixikani iskafakakī: “Aicho, Epa Niospa noko noikī āfe Fake nokoki nīchini. Epa Nios shara,” ixō yoixikani. Nānori David kirika keneni iskafakī:

Epa Niosi, ē mīōnoa ato yoisharaxii, a judeofoma. Ē mia fanāki, “Aicho, Nios shara,” ē mia faxii, ixō kirika keneni.

¹⁰ Anā Niospa meka yoikī kirika keneni iskafakī:

Judeofoma nā judeofo fe inima faatanākāfe. Māri ato fe Niospa yora ixii, ixō kirika keneni.

¹¹ Anā kirika keneni iskafakī:

Maitio anoafāfe, nōko Ifoōnoa yoisharakāfe. Keyokōi nā maifo tii ikafāfe nōko Ifo fanākāfe, ixō kirika keneni.

¹² Isaías aatori iskafakī kirika keneni:

Nōko xini Isaī āfe fena na maitio ikafāfe āto xanīfo ixii. Shināxikani iskafakakī: “Nā fistichi Nios ika ano noko ifitiro nō afe ĩpaxanō, nō anā nanakama,” ixō shināxikani, ixō Isaías kirika keneni Cristoōnoa yoikī.

¹³ Epa Nios chanīmara faxō nōko Ifo oxaiino nō manai. Epa Niospa noko shināmani iskafakī: “Chanīma, nōko Ifo oxii noko ifixiki nō afe ĩpaxanō,” ixō noko shināmani. Nāskakē ē mato kīfixomis Niospa mato inimamanō. Askatari mato shinā mēra mato shināmasharai mā

afeskatama mā isharanō mato axosharai. Mā Nios chanīmara faano āfe Yōshi Sharapa mato axosharai mā isharanō.

Pablo Jesucristoōnoa judeofoma ato yoini

¹⁴ Efe yora mīshtichi, mē tāpia mā noinā faatanāito Jesúsnoa mā tāpisharai mā yoinōnāsharatiro.

¹⁵⁻¹⁶ Niospa ea noikī ea katoni Jesucristo āfe yonomati ē inō, āfe meka shara ē mato tāpimanō. Nāskakē ē ranotama anā aōnoa ē mato shināmasharai kirika kenekī. Akka Niospa ea nīchini judeofoma ē ato Jesús Ifofamanō. Mā Jesús Ifo sharafaxō, mato chaka mā soax a keskara shara mā inō. Nāskax Epa Nios matoki inimakōi.

¹⁷ Nāskakē ē inimakōi nōko Ifo Jesucristomāi ea katonikē Epa Nios ē yonoxonō judeofoma Niospa meka ē ato yoinō.

¹⁸ Ea ē ato yoima. Cristo ea shināmanaino ē ato yoimis. Nāskakē a ē ato yoimis keskara Epa Niosnoa nikakōimifis.

¹⁹ Āfe Yōshi Sharapa ea shināmanaino a tsōa atiroma keskara ē ato ōimana. Nā maitio Jerusalén anoafō yoita Ilirico anoafori ē ato yoini. Keyokōi nā meka shara Cristoōnoa ē ato yoifofāsafamis.

²⁰ Ēkai a yora fetsafāfe Cristoōnoa yoimisfo ari ē kapaimisma. A Cristoōnoa nikamisfoma ano ē kapaimis ato tāpimaxiki.

²¹ Nānori Isaías Niospa meka keneni iskafakī:

Tsōa aōnoa nikayomisma chipo nikakaxō tāpinōfo, ixō keneni.

Pablo Roma ano kapaiķī shināni

²² Akka ē mato ari kapaimis. Ē mato ōikapaiķi ē kamisma. Afara fētsa ea katimafamis.

²³ Nāskafixō iskaratīa Jesúsnoa mē ato yoikī mē mitoa. Nāskax mē itipiniā mato ari kaxiki. Mē xini ichapa amis mato ōikapaiķi. Mēxotaima ē mato ari kapaimis.

²⁴ Ē España ari kai ē mato ano nēteyoxii mato fe mekaxiki nō yoinōnāsharaxiki. Mato anoax ē kaito a ē yopai ea ināxikāfe ē España ari nokosharanō.

²⁵ Akka iskaratīa ē Jerusalén ano kayoikai. Jesús chanīmara faafāfe ea nīchikani a Jerusalén anoxō Jesús chanīmara faafo ē ato kori inānō.

²⁶ Macedonia anoxō a Jesús chanīmara faafāfe Jerusalén anoafō a Jesús chanīmara faafo ato kori ināpainifo. Acaya anoxori Jesús chanīmara fakaxō ato kori ināpainifo a afaamaisfo. Nāskakē ea kori inānifo ē ato inātanō.

²⁷ Inimayanā ato ināpaikāi ato yoinifo iskafakakī: “Jerusalén anoax Jesúsnoa yoimisfo nokoki fenifo Jesúsnoa meka shara noko yoi fekani. Akka nokoki feyamanifono na meka shara nō nikakeranama. Nāskaxō nō afarayaxō nō ato ināpai ato sharafakī,” ixō yoinifo.

²⁸ Nāskata ē ato kori ināfainikai Jerusalén anoax España ari kakī. Nāskaxori ē Roma anoā ē mato ōifainikai.

²⁹ Mē tāpia ē mato ano nokoxō nōko Ifoxō ē mato yoisharaxii mato shinā mēra mā inimanō.

³⁰ Efe yora mīshtichi, meka fetsari ē mato yoipai. Mā nōko Ifo Jesucristo noixō āfe Yōshi Sharaōxō ea noikāfe. Ea Nios kīfixokāfe ē yonosharaxonō afanā ea afeska fanōma.

³¹ Ea kīfixokāfe Epa Niospa ea kexenō Judea anoafāfe a Jesús chanīmara faafāfema ea afeska fanōfoma. Ea kīfixokāfe a Jesús chanīmara faifo Jerusalén anoafō ē ato kori ināino inimakōikai finōfo.

³² Mē ato ināki mitoano Epa Niospa ea nīchiano ē inimayanā matoki nokoxinō. Nāskata nō yoinōnāsharaxinō nōko ōiti mēra inimayanā.

³³ Epa Nios mato fe inō. Akka Niospa noko imasharatiro nō isharanō.

16

Pablo ato meka fomani

¹⁻² Nofe yora Febe, Cencrea anoax matoki nokokē sharafakāfe. Nā kēromā nōko Ifo Ifofasharakōimis. Cencrea anoxō a Nios Ifofaafō ato sharafaxomis. Yora fetsafori ato afara yopaito axokāfe.

³ Aquila āfe āfi Prisca nā rafe efeta Jesucristo yonosharaxomisfo. Ea ato yoisharaxokāfe.

⁴ Yorafāfe ea retepaiyaiāfāfe nā rafeta ea kexesharamisfo ea reteyamanōfo. Ēfe kaifomari nā Jesús chanīmara faafāfe ichanākaxō yoimisfo iskafakī: “Aquila yafi Prisca nō atoki inimasharakōi,” ixō yoimisfo.

⁵ Āto pexe anoaxri ichanākaxō ea ato yoisharaxokāfe. Efe yorakōiri Epeneto ea yoisharaxokāfe. Nāatofi Asia anoxō Cristo chanīmara fakī taefaniki.

⁶ Mariari mato yonosharaxomiski aari ea yoisharaxokāfe.

⁷ Efe yora raferi Andrónico yafi Junias ea ato yoisharaxokāfe. Nā rafe efe karaxa mēra ikiniño. A Jesúsnoa yoimisiñāfe a rafeñoa yoisharamisfo. Ē Jesucristo chanīmara famatai nā rafeta chanīmara faki taefaniño.

⁸ Ampliatori ē noishara nāatomāi nōko Ifo Ifofasharakōiaito. Aari ea yoisharaxokāfe.

⁹ Urbano efeta Jesucristo yonoxomis. Nārifi ea yoisharaxokāfe. Efe yorashtari Estaquis nāri ea yoisharaxokāfe.

¹⁰ Apeles feronāfake sharakōi. Epa Nios akiki inimamis. Nāatori Jesucristo yonosharaxomis. Nāri ea yoisharaxokāfe. Aristóbulo yafi afe yoraforti ea ato yoisharaxokāfe.

¹¹ Efe yorashtari Herodión ea yoisharaxokāfe. Narciso yafi afe yorafāferi nōko Ifo chanīmara faafo, afori ea ato yoisharaxokāfe.

¹² Trifena yafi Trifosari ea ato yoisharaxokāfe. Nā kēro rafeta nōko Ifo yonosharaxomisfo. Nofe yora Pérsidari ea yoisharaxokāfe. Nā kēromāri nōko Ifo yonosharaxomiski.

¹³ Nōko Ifāfe Rufori katonni afe yora inō. Nā Rufo āfe afa ēfe efakōi keskara. Ea kexesharamis. Nā raferi ea ato yoisharaxokāfe.

¹⁴ Asíncrito ikaino Flegonte ikaino Hermas ikaino Patrobas ikaino Hermes ikaino nāfāfe nōko Ifo chanīmara faafo. A fetsafāferi nōko Ifo chanīmara fakanax ato fe ikafori ea ato yoisharaxokāfe.

¹⁵ Filólogo ikaino Julia ikaino Nereo ikaino āfe poi Olimpas ikaino keyokōi a nōko Ifo chanīmara fakanax ato fe ikafori ea ato yoisharaxokāfe.

¹⁶ Keyokōi ichanākanax yoinōnā faatanāsharakāfe noinōnāsharaxikakī. Nā maitio ikafāfe a Cristo Ifofaafāfe mato yoisharapaikani.

¹⁷ Efe yora mīstichi, ē mato yoinō nikakapo. Mato fe ichanāmis fetsafāfe mato afara chakafamapaikani anā mā Jesúsnoa shinānōma. Akka nō mato mēstekōi tāpimanai keskara nāfāfe mato anori yoikanima. Akka fakirira mato yoipaikani anā mā Jesús shinānōma. Nāskax ato fe rafeyamakāfe, mato pāratirofokī.

¹⁸ Afāfekai nōko Ifo Cristoōxō yoimisfoma. Nāfāfe afara fipaiyaifo fistic shināmisfo. Niospa meka tāpisharafoma āto meka fisticōxō ato pārapaikani ato anorima shināmaxikakī.

¹⁹ Keyokōichi mā nikafo nōko Ifo mā Ifofasharakōikē. Nāskakē ē matoki inimakōini. Afara sharafoñoa tāpikōikāfe. Mā afara chakañoa tāpiyamakāfe. Afoñoa shināyamakāfe.

²⁰ Epa Niospa mato imasharatiro mā isharanō. Nāato Satanás mato nāmā potai anā mato afeskafanōma. Nōko Ifo Jesucristo mato sharafaxopainō.

²¹ Nā Timoteo efeta Jesús yonoxomisto mato mekashara fomai. Askatari Lucio ikaino Jasón ikaino Sosípater ikaino nāfāferi mato mekashara fomakani. Nāfo efe yorakōifo.

²² Nā Terciori mato mekashara fomai. Nāato ea kirika kenexona.

²³ Gayopa pexe mēra ē ikē ea kexemis. Jesús chanīmara faa fetsaforti Gayopa pexe mēranoax ichanāmisfo. Nāfāferi mato mekashara fomakani. Na Erasto pexe rasi anoa ato kori kexexomisto mato mekashara fomai. Askatari nofe yora fetsari Cuarto nāatori mato mekashara fomai.

²⁴ Nōko Ifo Jesucristo mato noikī mato sharafanō. Askapainō.

Mā ato yoikī enekī Niosnoa ato yoisharani

²⁵⁻²⁶ Epa Niospa mato kexesharanō. Ē Jesucristoñoa mato yoimis keskara āfe shināmā mato shināmatiro mā Ifofasharanō. A iyopaonifāfekai tsōa Jesucristoñoa tāpiyopaonifoma. Akka iskaratā keyokōichi mā tāpiafo. Epa Niospa nā nipanakato noko nīchini Jesucristoñoa nō ato yoinō. A ixiainoa Epa Niospa ato yoini nānorikōi kirika kenenifo. Nā maitio ikafāfe Jesús chanīmara fayana nikasharatirofo.

²⁷ Nōko Ifo Jesucristoxō keyokōichi Niosnoa yoisharapakenakafa. Nōko Nios fistic keyokōi tāpikōia. Askapainō.

Nā tii ē mato yoi.

Pablo Corinto Anoafo Kirika Kenexõ Fomani

Pablo Jesús chanimara faafo Corinto anoafo kirika kenexõ ato fomani

¹ Ëkã Pablu, ã mato kirika kenexõ fomai. Nofe yora feta nã Jesús Ifofamis feta, ãfe ane Sõstenes, efeta mato kirika kenexoni. Epa Niospa ea katopaiikĩ ea katonĩ ãfe meka shara Jesucristoõnoa ã yoifofãsafanõ.

² Akka Jesucristo ea nõchĩni ã ãfe meka shara keyokõĩ maifo tii ãfe ato yoifofãsafanõ. Corinto anoaãfe mãfi Niospa fakefoki. Nãskakẽ ã mato kirika kenexõ fomai. Mã mẽxotaima ichanãmis Niospa meka shara tãpisharakõixikĩ. Niospa mato katonĩ Jesucristoõnoax mã ãfe yora shara inõ. Mato fisti katonĩma, a shinãifori keyokõĩ ato katonĩ mato fe Niospa yora inõfo. Nã mai fetsa anoaãfe nõko Ifo ãto Ifori.

³ Mato noikĩ mãto shinã mẽraxõ mato shinãmasharanõ. Epa Nios feta nõko Ifo Jesucristo mato askafanõ.

Jesucristo afara sharafo noko axotiro

⁴ Mẽ tãpia Jesucristo mato noikĩ afarafo mato tãpimani ãfe õiti keskara mã inõ. Nãskara tãpixõ ã Epa Nios kĩfikĩ iskafa fafãfãini: “Aicho Epa Niosi, mã Corinto anoafo afara sharafo Jesucristoõxõ mã ato tãpimanaki,” ixõ ã kĩfifãfãini.

⁵ Chanĩma, Jesucristo mato fe rafesharaino aõxõ mã Niosnoa tãpisharakõitiro. Akka ãfe shinãõxõ xafakã mã yorafo mã yoisharatiro. Jesucristoõnoa mã ato yoisharatiro.

⁶ Nõ mato Jesúsnoa yoini keskara nikakĩ mãto õiti fetsafaxõ a keskara shara mã ixii. Nãskakẽ mã Jesús chanimara faxõ mã mã ato õimana.

⁷ Nãskakẽ Epa Niospa ãfe Yõshi Sharaõxõ mato imapaiyai keskara mã iki. Nios chanimara faa fetsafo nãskarifiakani Niospa mato shinãmasharaino. Nãskakẽ mã nõko Ifo Jesucristo fe ipaikõikĩ mã manasharai nã nokoaitã õixikĩ.

⁸ Oyoxoma mato kexesharayoi. ãfe kerex shara mato inãyoi mã Ifofasharano. Nãskakẽ nokoõxõ yoixii iskafakĩ: “Mãfi efe ipanakaki, ã mato chaka soaxonano. Nãskakẽ tsõa mato iskafatiroma: ‘Mã chakakõifoki,’ mato tsõa fatirofoma,” ixõ mato Jesús yoixii.

⁹ Epa Niospa mato katonĩ ãfe Fake nõko Ifo Jesucristo fe mã rafenõ. Epa Nios chanĩma, noko yoiai keskara aki.

Corinto anoxõ Jesús chanimara faafãfe anoris shinãnifoma

¹⁰ Efe yora mĩshtichi, ã mato yoisharapai. Nõko Ifo Jesucristo ea yoiaino ã mato yoi nãnorifos mã shinãnõ, mã fetsa shinãnõma. Jesucristo mato shinãmapaiyai keskara fisti shinãkãfe.

¹¹ Efe yora mĩshtichi, mẽ nika a Jesucristo mato shinãmapaiyai keskara fisti mã shinãima. Cloépa ãfe yorafo nono fẽkaxõ ea yoiãfo mã feratenã faatanãito.

¹² Akka mã atiri iskai fetsei: “Nõfi Pablu ifofamiski. Noko tãpimanai keskara kayakaikõĩ nõ nikamis. Fetsafãfekai kayakai shinãkanima,” ixõ mã yoimis. Askatari fetsafori iskakani: “Nõfi Apolos ifofamiski,” ixõ mã yoimis. Askatari fetsafori mã iskamis: “Nõfi Pedro ifofamiski,” ixõ mã yoimis. Askatari fetsafori mã iskamis: “Nõfi Cristo Ifofai,” ixõ mã yoiketsamis.

¹³ Efe yora mĩshtichi, çafeskai mã feratenãimẽ? Askarakai sharama. Cristokai anori noko shinãmanima feratenãyanã anorima nõ shinãketsanõ. Cristokai ãfe shinã ranãyama. Mẽstekõĩ fisti noko yoimis. Akka, çafeskakĩ “Nõ Pablu ifofaira” mã ato faimẽ? Ëkai mato ifi cruz ikakĩnoax nãxonima. Cristo fistichi mato ifi cruz ikakĩnoax nãxonĩ mã Ifofanõ. Askatari ãkai tsoa faka mãra ikimakĩ maotisafama ea ifofanõfo.

¹⁴ Nãskakẽ ã inimai. Ëkai tsoa maotisafama. Akka Crispo yafi Gayo nã rafes ã maotisafa Cristo Ifofaifãfe õikĩ.

¹⁵ Nãskakẽ tsõa yoitroma iskafakĩ: “Pablu ãfe aneõnoax ã maotisameni. Nãskakẽ ã Pablu ifofai,” ixõ tsõa shinãtiroma.

¹⁶ Chõõ, iskaratãri ã rama shinãi. Estéfanas yafi ãfe yorafori ã ato maotisafani. Ë shinãyoama ã tsoa fetsa maotisafamara ã ika.

¹⁷ Cristokai ea yoiama ã yorafo maotisafapanõ. Akka ea yoiã ã aõnoa meka shara ã mato yoinõ. Ëa shinãxõ ã mato yoima. Ëa shinãxokai ã mato Jesucristo chanimara famatiroma. Jesucristo mato ifi cruz ikakĩnoax nãxonĩ mato chaka soaxoxikĩ. Cristo mekaõxõ Niospa mato chanimara famatiro.

Epa Niospa keyokõĩ tãpikõia afara fetsa apaiikĩ atiro. Cristoõxõ noko õimayopaoni

¹⁸ Nãskakẽ Jesús ato nãxonĩ nikakanax a chanimara faafãfema yoikĩ iskafakani: “Jesús ifi cruz ikakĩnoax noko nãxonĩ nõko chaka noko soaxoxikĩ, ixõ noko yoipaiyaifãfe

nōkai chanīmara fatiroma. Āa chanīkani,” ixō shināmiso. Nāskakanax nāfo fenokōikani. Omiskōipakenakafo mēra fokani. Akka nō Jesús chanīmara faito noko nimapakenaka nō afe ipaxanō. Niospa āfe shināōxō Jesús noko nāxoni nōko chaka noko soaxoxiki. Afara fētsakai noko nimatiroma nō afe nīpaxanō.

¹⁹ Akka Niospa meka kirikaki kenekī iskafanifo:

Fētsa yoikī iskafatiro: “Nō tāpikōia. Nōko māpo shināsharafāi nō afara fetsafo fatiro nōfi tāpisharakōiakī,” ixō shināfikakī afaa tāpiafoma. Askarafofi ē ato ōimanikai afāfe shināifo keskarakai ē ato shināmanima. Nāfāfekai afaa tāpimisfoma. Āa shināmiso, ixō Niospa yoini.

²⁰ Akka, ōfanīmē a nō kirika kenekī tāpiakōiara imisfo? Akka tāpifikaxō a Niospa shināi keskara shinākanima. Nāfofi Niospa ato ōimaxii afaa tāpiafoma keskara fakī. “Nōfi afama mīshti tāpikōiakī,” ifiaifāfe Niospa afaa tāpiafoma keskarafo ato imai.

²¹ Tsōa pishtakai āto shināmā Nios tāpitirofoma. Nios fistichi keyokōi tāpisharakōia. Nāskakē nō ato yoimis iskafakī: “Niospa tāpikōixō āfe Fake Jesucristo nīchini noko nāxonō nōko chaka noko soaxoxikī,” ixō nō ato yoimis. A Nios chanīmara faafāfema yoikī iskafamisfo: “Jesús chanīmara faifāfe aōnoa anorima yoimisfo,” ato famisfo. Akka nā Jesús chanīmara faifo Niospa ato chaka soaxoni afe nīpaxanōfo. Nā nō mato yoimis.

²² Akka ēfe kaifo judeofō iskamisfo: “Niospa nai mēraxō afama mīshti noko ōimanoito chipo nō Jesús chanīmara fatiro,” ixō shināmiso. Akka nā judeofomafāferi afama mīshti tāpipaikani. Afeskaxō Niospa yorafo imasharaimākai tāpipaikani. Askatari afeskaxō Jesús yorafo āto chaka soaxonomākī nāri tāpipaikani. Afama mīshti āa shinākakī tāpipaikani. Akka tāpitirofoma. Nāskakē iskamisfo: “Noko Jesucristoōnoa yoiaifono nō tāpitiroma, fekaxkōi. Nāskakē nō Jesús chanīmara faima. Nā afara nōa nō shināi nā nō chanīmara fai,” ixō yoimisfo.

²³ Nānori shināfiaifono nō yoikī iskafamis: “Jesucristo ifi cruz ikakinoax noko nāxonī noko chaka soaxoxikī,” ixō nō yoimis. Akka ēfe kaifāfe judeofāfe yoikī iskafamisfo: “Ifi cruz ikakī mastafo askarakai nōko Ifo itiro. Akka Cristokai afeskax natiroma,” ixō judeofāfe shināmiso. Nāskatari yora fetsafo Cristoōnoa nikakani akiki kaxepaikani iskamisfo: “Tsōakai askara chanīmara faima. Akka tsoa fētsakai noko nāxotiroma,” ixō yoimisfo.

²⁴ Askafiaifono nā chanīmara faifo tii Niospa ato katoni afe ipaxanōfo. Judeofo yafi judeofomari Cristoōxō Epa Niospa ato katoni chanīmara faifāfe. Nāskakē āfe shinā sharaōxō ato nima. Atofi keyokōi tāpikōiakī Cristoōxō noko nima nō afe nīpaxanō.

²⁵ Jesús chanīmara faafāfema yoikī iskafamisfo: “Jesucristo noko nāxonī,” ixō yoifikakī anorima shināmiso, āa chanīkakī. “Akka yora mapo sharayato Cristo chanīmara fatiro,” ixō yoimisfo a Jesús chanīmara faafāfema. Akka anorima yoiaifono Niospa āfe Fake Jesús noko nīchixonī noko nāxoyonō. Nāskax Niospa āfe shinā a chanīmara faafāfema āto shinā keskarama. Aatoifi mēstekōi shināmis. Akka nā chanīmara faafāfema yoimisfo iskafakakī: “Nō tāpikōia,” ixō yoifikakī yoisharamisfoma. Anorima shināmiso. “Nō afama mīshti fatiro,” ifiakakī fetsafo nimasharatirofoma. Askafikata aforikai āa chaka soametirofoma. Akka Epa Nios fistichi afama mīshti fatiroxakī noko chaka soaxotiro.

²⁶ Efe yora mīshtichi, Niospa rama mato katoano afe keskara mā iyopaonimākī. Shinākapo. Mā fisti rasichi mā kirika kene tāpia mā ipaoni. Askatari mā xanīfo ipaonima. Nāskax mā finakōia mā ipaonima. Akka nā Jesús chanīmara faafāfema yoikī iskafamisfo: “Afāfekai afaa tāpiafoma,” ixō mato yoimisfo.

²⁷ Mato askafiaifono Epa Niospa mato katoni afe yora mā inō. Matoōnoa yoimisfo iskafakakī a Jesús Ifoiaifāfema: “Afāfekai afaa tāpiafoma. Shināsharakanima,” ixō yoimisfo. Askatari shināmiso iskakakī: “Nōfi afama mīshti fatiroki. Akka a Jesús chanīmara faifo pachikōifo, kerexkai shinātirofoma. Nō atiro keskara atirofoma,” ixō shināmiso. Mato askafiaiakakī chipo mato tāpitirofo. Niospa mato afara shara tāpimanaino ōikani rāfipaitirofo.

²⁸ Nāskakē shinākani iskakakī: “Jesús chanīmara faifo afāfekai afaa tāpiafoma. Nāskakē nō ato ōipaima,” ixō matoōnoa mato yoiaifono Niospa mato katoni afe yora mā inō. “Mākai afaama,” mato fafiaifono Niospa mato katoni mā ato ōimanō akka afāfekairoko afaa tāpiafoma.

²⁹ Akka tsōa pishtakai Niospa ferotaifi yoitiroma iskafakī: “Ē tsoa keskarama. Ē shara shināi fetsafo keskarama,” ixō yoitiroma.

³⁰ Niosnoax Jesucristo afe yorafo mā inō. Jesucristoōxō noko mēstekōi tāpimani āfe ōiti keskara noko imaxii. Noko nāxonī noko chaka soaxoxiki nō afe nīpaxanō.

³¹ Nāskakē nō Jesús chanīmara faaxkai nō kakapaimis itiro. Niospa meka yoikī yōra kirika kenenī iskafakī: “Akka tsoakai āa yoimesharatiroma iskai: ‘Ē afama mīshti tāpikōia,’ ikax āa kakapaitiro. Askatamaroko nō yoisharatiro nā afara sharafo nōko Ifāfe aka,” ixō kirika ano yōra kenenī.

2

Jesucristo ifi cruz ikakī mastaniño Pablo ato yoini Corinto anoafo

¹ Efe yora müshtichi, ē matokī nokofenaxō yōra shināōxō ē mato Niospa meka yoiyameama. Niospa āfe shinā fistiōxō ē mato yoiyamea. Ēa shināxō ē mato yoiyameama. Niospa ea shināmanaino ē mato yoiyamea.

² Ē matoki oyoxoma ē shinākī iskafani: “Jesucristo ifi cruz ikakinoax noko nāxoni, nā fisti ē ato yoixikai. Afaa fetsa ē ato yoiromaki,” ixō ē shināyamea.

³ Askata mē nokoax ē matoki ratekōiyamea. Nāskakī rateyanā ē shināyamea iskafakī: “Ē mitsisipama ea ōikakī ea nikakaspatirofo,” ixō ē shināyamea.

⁴ Nāskakē ē mato Jesucristoōnoa yomis ēfe shināmā shināxō ē mato yoitamaroko Niospa Yōshi Sharapa ea shināmanaino ē mato yoiyamea. Ē mato yoiaino aōxō mā Jesús chanīmara fayamea.

⁵ Akka yōra shināōxō mā Jesús chanīmara fayameama. Niospa shināōxō mā chanīmara fayamea.

Niospa Yōshi Sharapa noko shināmasharatio

⁶ Nāskakē a Niospa meka nikasharaifāfe mā tāpiafo nō Niospa Yōshi Sharaōxō xafakāōi nō ato yoiaino. Nāskaifono fetsafāferi kirika kene tāpisharakōifikaxō Niospa shināi keskara tsōa anori shināima. Āto shināōxōkai Niospa meka nō mato yoiima. Āto xanīfofāfe shināifo keskarakai nō mato yoiima. Akka āto xanīfofo mā chaimashta tsekekani. Anā afo xanīfo ikanima. Nā xanīfofāfe shināifo keskara mā keyoi. A shara shināifo keskara shinākanaxma.

⁷ A nō mato iskaratīa Niosxō yoiā tsōa tāpiyopaonima. Niospa mai onifayoxoma shinākī iskafani: “Ēfe Fāke ato chipo nāxoxii nā chanīmara faafo tii ato nimapakexixakī,” ixō shināni.

⁸ Ē na meka mato yoiāi keskarakai xanīfofāfe tāpiyopaonifoma. Nāskaxō Jesús retenifō. Akka tāpikaxokai tsōa nōko Ifo Cristo ifi cruz ikaki mastakeranifoma. Nā nōko Ifo Cristo sharafinakōia.

⁹ Akka yōra kirika kenekī iskafani:

Afama müshti shara Niospa ato axoxii. Tsōa ōiyomisma sharafo ato axoxii. A tsōa nikayomisma ato axōfāi a tsoa pishta āto shinā mēraxō shināyomisfoma nāfo ato axosharaxii. A ato noiaifo ato itipinīshara faxoxii, nāskara yoikī Niospa meka yōra kirikaki keneni.

¹⁰ Nā kirika kenekī yoinifo keskarakōi Epa Niospa āfe Yōshi Sharapa noko ōimani. Āfe Yōshi Sharapa keyokōi tāpikōia. Epa Niospa shināi keskarakai āfe Yōshi Sharapari tāpikōia.

¹¹ Yōra āfe shinā mēraxō āa shināitokai tsōa tāpitiroma. Akka ares fisti tāpitiroma. Nāskarīfiai Epa Niospa shināi keskara āfe Yōshi Shara fisticī tāpikōia.

¹² Epa Niospa āfe Yōshi Shara nokoki nīchini noko tāpimapaiyai keskara noko tāpimanō. Akka nā chanīmara faafāfema Niospa meka nikakanima. Nāfāfe shināi keskarakai Niospa noko shināmanima.

¹³ Nāskakē yorafāfe noko tāpimanifo keskara nō mato yoitamaroko Niospa Yōshi Sharapa nōko shinā mēraxō noko shināmana keskara nō mato yomis. Āfe meka chanīmakōi fisti. Nāskakē nōri aōxō nō mato chanīmakōi Niospa mekakōi tāpimani. Nā meka shara mā nikamis māmāi Niospa Yōshi Shara mato fe rafeano.

¹⁴ Akka fetsafo Niospa Yōshi Shara fe rafeyamano nāfāfe Niospa Yōshi Sharapa yoiāi keskara nikakaspakani. Nāskaxō iskafatirofo: “Tsōakai nā meka chanīmara faima. Akka nā shara shināifāfe chanīmara fakanima,” ixō shinānani. Akka Niospa Yōshi Sharapa shināi keskara tsōa tāpiama. Nāskakē Niospa Yōshi Shara ato fe rafeyamano a yoiāi keskara tāpiafoma. Akka Niospa Yōshi Shara fisticī ato tāpimatiroma chanīmara faifono.

¹⁵ Akka fatora fetsa Niospa Yōshi Shara afe ikano Niospa tāpimapaiyai keskara tāpitiroma. Fatoformākī chaka shināifo, askatari fatoformākī shara shināifo Niospa Yōshi Sharapa ato tāpimatiroma. Nāskakē a Niospa Yōshi Shara fe rafeyamato a Jesús chanīmara faifo ato tāpitirofoma.

¹⁶ Akka Isaías kirika keneni iskafakī:

Tsōakai nōko Ifāfe āfe shinā mēraxō shināi keskara tāpitiroma. Tsōakai nōko Ifo tāpimatiroma, ixō kirika keneni. Askafīafono nā nō Cristo chanīmara faifāfe a shināi keskara nō tāpitiroma nō afe rafexō.

3

Corinto anoafo Niospa Yōshi Shara fe rafeafoma

¹ A fake rama kāiatokai afaa tāpitiroma. Mā yosixō tāpitiroma afara fetsa. Nāskarīfiai a rama Jesús Ifofaifāfe Niospa meka tāpisharafoma a fake yome rama kāia keskarafo. Nāskarafo mā

Jesús mato Ifo fiano ranārīto āfe meka mā tāpisharama. Mā rama Jesús Ifofayamañiai oa rama Jesús Ifofaifo keskarāfo, mā. Niospa meka mā mā nikafikatsaxakī a yoiāi keskara mā nikasharama. Ooa efe yora mīshtichi, māfi Niospa meka nikamisma keskarafoki, rama Jesús Ifofaifo keskara. Māfi nā Niospa Yōshi Shara fe rafeama keskarāfo. Nāskakē ē mato Niospa meka tāpimasharatiroma mākaīroko itipinīsharakē nikasharaxikima.

² Fake yome rama kāiāto chocho fisti atiro, afaakai pitiroma. Nāskarifiakī Niospa meka mā nikapaifikī āfe meka mā nikasharatiroma. Nāskakē āfe meka ichapa ē mato yoiyotiroma. Āfe meka fetsafori ē mato yoipaiñiaino mā nikasharaima. Nāskax mākaī itipinīsharapaima Niospa meka nikasharaxikima.

³ Māfi nā Niospa Yōshi Shara fe rafeama keskarafokī. Nāskaxō fetsafo mā ato xītipai mā ato keskara ipaikī. Nāskax mā fochishpanā faatanāi mā ika. Nāskaxō yōra shināi keskara mā shināi. Akka Niospa Yōshi Sharapa mato shināmapaiyai keskara mā shināima.

⁴ Mā fatora fetsafāfe yoiūkī iskafai: “Nōfi Pablo ifofakī. Pablo fistichi noko tāpimasharatiro,” ixō mā yoisim. Akka fetsafāferi mā yoiūkī iskafai: “Nōfi Apolos ifofakī. Apolos noko shara yoiūro,” ixō mā yoisim. Nāskax mā fochishpanā faatanāpai. Nāskaxō yōra shināi keskara mā shināi. Askarafokai Niospa Yōshi Sharapa mato shināmanima.

⁵ Akka askayamakāfe. Nō afaama. Akka Apolos fetakai nō afaa tāpiama. Nōkai Nios keskarama. Akka nōfi āfe inakī. Nāskaxō nō mato Jesús chanīmara famani. Nōko Ifo Niospa noko katonī noko yonomapaiyai keskara nō yonoxonō.

⁶ Ē mato iskafakī yoipai. Yora fētsa taefakī xiki fanatiro. Fetsafāfe a nāmā orometirofo foaisharanō. Nāskafixokai nā rafeta xiki foaimatirofoma. Nios fistichi xiki foaimasharatiro. Nāskarifiakī ē mato taefakī Jesucristo chanīmara famani. Chipa Apolos Cristoōnoa mato yoini āfe meka mā nikasharakōinō. Nō mato yoiaino Nios fistichi mato shinā mēraxō mato shināmarsharatiro āfe meka mā tāpisharakōinō.

⁷ Nā ē mato yoiāito mā nikai keskara Apolos feta nō afaa tāpiama. Akka Nios fistichi yorafo shināmarsharatiro āfe meka tāpisharakōinōfo.

⁸ Akka taefakī fetsafo Jesús chanīmara famano, a chipa ato yoiāitori nānorikōiri ato yoi. Nā rafetamāi nānorikōi shinākakī Niospamāi ato shināmanaino. Nāskakē ato Jesúsnoa yoiixikani a Ifofasharanōfo. Nāskatari Niospa a yonoxonafo ato afara ināxii. Fetsa ichapa ināta fetsafori ichapama ināxii yonoxosharafomano.

⁹ Ēfe yora mīshtichi, ē meka fetsa mato yoipai. Tarepa ifo fistifiano fetsafāferi yonoxotirofo. Askatari pexe ifo fistifiano fetsafāferi yonoxotirofo. Nāskarifiāi māfi Niospa āfe tare keskarafokī. Askatari mā āfe pexe keskara. Nios fisti mato Ifo. Akka nōri Apolos feta yonoxomiskī. Noko yoiāi keskara nō mato tāpimasharani āfe meka mā nikasharakōinō.

¹⁰ Ē mato yoinō afesa faxō pexe fatirofomāki. Taefakī āfe kishi kerexkōi fixaxō nīchitirofo. Mā kishi nīchikaxō aōxō yonotirofo. Nāskarifiāi māfi pexe keskaraki. Akka nō mato Niospa meka tāpimani nā pexe faifo keskara. Cristofi pexe kishi keskaraki. Nā āfe kishiōnoax pexe nitiro. Nāskarifiakī Cristo mato nimai. Ea Niospa tāpimashara keskarari taefakī ē mato yoiāito mā Cristo Ifofani. Askatari fetsafāferi nānorikōi mato yoiāni mā Cristo Ifofasharanō. Nāskata nā fetsafo ē ato yoisim iskafakī: “Shināsharata ato mēstekōi yoisharakāfe,” ixō ē ato yoisim.

¹¹ Ē mato taefakī Cristoōnoa yoini mā Ifofanō. Akka tsōakai mato yoiūkī iskafatiroma: “Ē mato meka fetsa tāpimanō mā chanīmara faax Nios fe īpaxanō,” ixō tsōa mato anori yoiūtiroma. Jesucristo fistichi noko nimasharatiro nō Nios fe īpaxanō.

¹² Afara fetsa anā ē mato yoinō, ea nikakapo. Fētsa pexe fakī kishi kerexkōi nīchitiro. Akka fētsari akikī rofetaxō kerexkōi kenetirofo. Fētsari akiki oro kenetiro. Fētsari akiki tokiri sharakōi kenetirofo. Askatari fētsari akiki ifi kerexma kenetirofo. Fētsari xepa pei akiki kenetirofo. Fētsari tafa akiki kenetiro. Nāskakē nā pexe koaino pexe ano ikāfo ichotirofo kooyamaxikakī. Akka pexe kishi kerexkōi akiki keneafō oro akiki keneta, roe taxo akiki keneta, tokiri sharari akiki keneafono kootirofoma. Akka nā ifi kerexma kootiro. Xepa peifori kootiro. Tafari kootiro.

¹³ Nāskarifiāi Nios nā pēxe ifo keskara. Niospa meka yoisimiso nā pexe ifo pexe faxōaifo keskarāfo. Fetsafāfe shara faxomis, fetsafāferi shara faxomisma. Nāskaxō anā oaitīa Cristo noko ōimaxii nā nō axomis keskara fatofō keyonakamakī. Akka fatofori nipanakafomāki. Noko ōimaxii afesaxō nō Nios yonoxonamāki. Fētsa Jesús Ifofasharaxoma āa shināxō Niospa meka ato yoisharaima, tāpisharaxoma ato yoisharatiroma. A yoiāi keskara sharama, ifi kerexma keskara, samama keyotiro. Akka fētsa Niospa mekakōi ato yoi. Niospa shināmanaino ato tāpimani. Nā tokiri kerexkōi keskara keyotiroma.

¹⁴ Nāskatari fatotora Nios yonosharaxonano Niospa afara shara ināsharaxii nā Jesús oaitīa.

¹⁵ Akka fatotorari Nios yonosharaxonamano Niospa afara shara ināima. Nāskafīax Nios fe ipanaka. Āa kaxpa yonokatsaxakī akka āfe yono keyoxii.

¹⁶ Akka, ¿mā tāpīamamē mā Niospa pexe keskarakōi? Āfe Yōshi Shara mato mēra ika.

¹⁷ A Nios ika anokai afaa chakama. Nāskakē āfe Yōshi Shara mato mēra ikano ōisharakāfe chaka shināi iyamakāfe. Mā afe nīpaxanō Niospa mato katonī afe yora mā inō. Nā Ifoafafo tii ato shara imai. Akka fatotora ato anorima yoikī ato afara chakafamaino Niospa kopikiri omiskōimaxii.

Cristo noko tāpīmasharatiro

¹⁸ Efe yora mīstichi, iskafakī shināyamakāfe: “Nā Jesús chanīmara famafāfe kirika raiskakī afaa mīstī tāpīsharakōiafo. Nōri ato keskaraxō anorī shinākī tāpikōia,” ixō anorī shināi mā pārameyamakāfe. Jesús chanīmara famafāfe shinākakī iskafakani: “Nā Jesús chanīmara faafāfe shināsharakanima,” ixō nokoōnoa yoimisfo. Matoōnoa anorī yoifiaifono Niospa mato mēstekōi shināmasharapai mā shinātiro.

¹⁹ Nā Jesús chanīmara famafāfe shinākani iskafakakī: “Nōfi mēstekōi shināsharakī,” ifiaifāfe Niospa ato ōia mēstekōi shināsharakanima. Tatima keskarafō ato ōi. Nānori yōra Niospa meka yoikī kirika keneni iskafakī: “Nā Jesús chanīmara famafāfe āa shinākani iskakakī: ‘Nōfi tāpikī finakōiaki,’ ixō shinākakī Nios pāratirofoma. Āakōi anorī pāramekani. Nāskakanax fenoafo,” ixō Niospa meka yōra kirikaki keneni.

²⁰ Anā David kirika keneni iskafakī: “‘Nōfi tāpīsharakōiaki,’ ifiaifāfe nōko Ifo Niospa ato tāpikōixō yoikī iskafatiro: ‘Nafāfekai mēstekōi shināsharafoma, tatima keskarafō,’” ixō David kirika keneni.

²¹ Nāskakē anā yoi iskayamakāfe: “Na feronāfāke a noko tāpīmamisto āfe meka fisti mēstekōi, sharakōi,” ixō anorī anā shināyamakāfe. Niospa ato shināyamayainokai tsōa mēstekōi shinākeranama. Nios fistioxō nō mato mēstekōi yoitiro mā tāpīsharakōinō. Keyokōi Niosnā, nā Niosnāri mātonā. Nāskakē aōxō mato shara faxōi.

²² Ē ikaino, Apolos ikaino, Pedro ikaino nō Nios yonoxomis. Āfe meka nō mato yoimis mā nikasharanō. Askatari naax mā afe īpaxanō. Keyokōi Niosnā, askatari nā Niosnāri mātonā. Iskarāfia afara sharafō iakai aōxō Niospa mato shara faxōi. Nā chipo ixiāfori aōxori Niospa mato shara faxoxii. Keyokōi a Niospa onifanifo mātonāri. Nāskakē māri āto ifo ixii.

²³ Akka Cristofi mato Ifokī. Cristori āfe Ifori Nios.

4

Cristo yonoxomisfāfe afesaxō yonoxotirofomāki

¹ Akka mā nokoōnoa shinākī iskafatiro: “Nafāfēfi Cristo yonoxomisfokī,” ixō nokoōnoa yoikāfe. Cristoōnoa meka shara tsōa nikayomisma Epa Niospa nōko shinā mēraxō noko shināmanaino nō atori tāpīmani.

² Akka āfe inafāfe āfe ifo nikakōitirofo. Āto ifāfe ato yoia keskara axosharatirofo. Akka nōfi Cristo āfe inafokī. Niospa noko yoini iskafakī: “Ē mato yoia keskara ato yoikāfe ato fomākakīma. Ato yoikāfe xanikakīma,” ixō noko yoimis.

³ Nios fistichi tāpikōiaki nā ea yoia keskara ē aki. Akka yorafāfe ea mekafakī chakafakani. Akka fetsafāferi ea yoisharakani. Nāskanōki āa ea mekafanōfo. Ē āto yonomatimaki. Akka ē Niospa yonomatiki. Akka Nios fistichi tāpia ē yonoxosharakōiaito. Yorafāfekai tāpiafoma. Ērikai tāpīama.

⁴ Ēfe shinā mēraxō ē shināi iskafakī: “Ea Niospa yoia keskara ē aki,” ixō ē anorī shināfiaino nōko Ifo fistichi ea tāpikōia a ea yoia keskara ē ayamakī ē akima.

⁵ Cristo anā oyoamano iskafakī yoiyamakāfe: “Nāfāfekai Nios yonosharakokanima,” ixō anorī yoiyamakāfe. Akka yora fētsa shināi keskara tsōa tāpīama. Shinākapo. Nōko Ifo anā ōaitia keyokōichi noko ōiaifono nōko shinā mēraxō nō shināmis keskara nōko Ifāfe ato ōimaxii. Anākai nō afaa pishta nō fomāxiima, Niospamāi keyokōi tāpikōikē. Nā nō afara shara nō one axomis tsōa ōiyamaino, askatari nā nō afara chakafamis nāfo keyokōi Niospa noko kāimaxoxii. Askatari nō afara shara faino Niospa noko yoikī iskafaxii: “Aicho. Ē mato yoia keskara mā amis. Mā sharakōi,” ixō noko yoixii.

⁶ Efe yora mīstichi, nānori ē mato yoi mā isharanō. Yōra kirika keneni keskara a Niospa yoia nā fisti ē aki. Nā Apolosri Epa Niospa yoia keskara fisti akī. Nō askafaito mā noko ōixō nō akai keskara māri akāfe. Nāskakē iskayamakāfe: “Nā noko yoimisto āfe meka sharafinakōia, fetsafo keskarama. Akka nō fetsafo nikapaima,” ixō anorī shināyamakāfe.

⁷ Akka Niospa keyokōi noko onifani. Nō Nios fistioxō afara fetsa nō ato sharafaxonō. Nāskaxō, “Nā ē akai keskarakai tsōa atiroma,” ixō shināyamakāfe. Nāskax kakapaimis iyamakāfe.

⁸ Mā shinākī iskafamis: “Nō Niospa meka tāpikōia. Nō fetsafo finōkōia. Nāskaxō nō anā tsoa fichipaima noko tāpīmanō. Nōfi Cristo fe xanifo keskaraki. Nō yorafāfe āto ifo

keskarakī," ixō mā shināi. Nāskapainōra mā xanīfokōifo iki. Mā xanīfokōifo ikaino nōri mato fe xanīfo ikerana. Akka nō xanīfoma. Noko tsōa ifofaima.

⁹ Ē afara fetsa mato yoipai, nikakapo. Karaxa mēra ikiafo ato retematirofo. Yora ichapafāfe ōiaifono ato retematirofo. Nāskarifiakī nōri ato keskara. Noko Jesús nūchini nō aōnoa meka shara nō ato yoinō. Nō Jesúsnoa yoiax nō Jesúsnoax omiskōiaino keyokōi yorafāfe noko ōikani. Niospa āfe ājirifāferi noko ōikani. Nō yora mitsisipama noko ōikani, nōkairoko xanīfofo keskarakē. Nō āto nāmā rakakōia noko ōikani.

¹⁰ Nāskakē ē Jesucristo Ifofamis. Akka mā ea yoimis: "Pablo afaa tāpiamara," mā ea famis. Askatari, "Nō Jesús Ifofakī nō tāpisharakōia," mā imis. Askafixō mā tāpisharakōiama. Nāskaxori mā ea yoimis, "Na Pablo afaa afeska fatiroma. Akka nō afarafo nō atiro," mā imis. Askafixō mā askafatiroma. Mā shinākī sharakōi mā meei. Akka ea mā ōia ē afaamakōi mā ea ōimis.

¹¹ Akka iskaratiari nōfi fonāiyanā nōamaikīyanā rapati shara safeyamata nō imis. Askatari noko koshamisfo. Akka pexemais ixō Niospa meka fisti nō ato yoifofāsafamis. Nāskax nō omiskōi.

¹² Nāskaxō nō kerexkai yonotiro a nō piāi fixiki. Nāskatari yorafāfe noko mekafakī chakafaiifono ato kopitamaroko nō tenemis. "Jesús mato shara faxopainō," ixō nō yoimis. Noko omiskōimafaiifono nō tenemis.

¹³ Askatari noko ičhāifāfe ato kopitamaroko Niospa meka shara nō ato yoimis. Nāskakē iskaratiā noko chakafakani, "Māfi nā afamafo keskarakī, nā afara chaka potafo keskara," ixō nokoōnoa yoimisfo.

¹⁴ Nāskakē ē mato nānori yoikī kirika kenexō ē mato rāfimapaia. Askatamaroko ē mato shināmasharapai. Akka māfi ēfe fakekōifo keskarafoki. Ē mato noikōi. Nāskakē ē mato yoisharapai anā mā anorima shināyamanō.

¹⁵ Yora ichapato mato Cristoōnoa tāpimakani. Akka ē taefakī mato Cristoōnoa tāpimayoni. Nāskakē mā Cristo chanīmara fani. Eōnoax mā Niospa fakekōifo. Nāskatari ē mato epa keskarakōi. Fetsafāfe Cristoōnoa mato tāpimafaiifono afokai mato epa keskarama. Akka ē fisti mato epa keskarakōi.

¹⁶ Nāskakē nā ē ikai keskakāfe. Ē Nios Ifofasharai keskakafakī māri askafakāfe.

¹⁷ Nāskakē ē Timoteo matoki nūchikai. Ē Timoteo Cristo chanīmara famakī taefani. Nāskax ēfe fake keskarakī. Ē aō noikōi. Noko Ifo Jesús yoiai keskarakōi nikakōi. Ē Jesucristo Ifofai keskara Timoteo mato shināmāxii mā shināmakinōma. Nā chanīmara faafo pexe rasi tii anoāfo ē ato tāpimani keskara Timoteori mato tāpimāxii.

¹⁸ Mē tāpia mā ranārito shinākī iskfai: "Pablo Timoteo nokoki nūchi nokoki mesekī. Āakai nokoki opaima. Akka nō keyokōi tāpikōia. Nō Pablo yopaima," ixō mā shināi. Askai mā kakapaimis.

¹⁹ Anori mā shināfiaino ē samamakōi ē mato ari kaikai. Niospa ea yoiaino ē samamakōi mato ari kai. Mē mato ano nokoōxō ē tāpixii nā kakapaimisfāfe Niospa Yōshi Sharaōxō yoikanimākai, āakōi yoimisfomākī.

²⁰ Nios nōko Ifono nō meka fisti yoitamaroko āfe shinā sharaōnoax nō isharatiro.

²¹ Nāskakē nā ē matoki nokoaitia āfe shinā sharaōnoax ē matoki nokoxii. Mē nokoxō ē tāpixii afeskax mā ikamākī. Mā chaka xateyamakē Niosxō ē mato tāpimāxii omiskōimākī. Akka mato chaka mā xatekē ē mato noikōikī fenāmāshta ē mato yoisharaxii. Nāskakē ē matoki nokoxō ē mato omiskōimayamano fenāmāshta oi tsii faxō ē mato yoixii ea yoikāfe fato mā fichipaimākai.

5

Jesús chanīmara faftakaxō afara chakafakani (Hch. 9.1-19; 22.6-16)

¹ Mē nika mato mēraxō feronāfake fistichi afara chakafaito. Akka, ¿afeskakī mā yoimamē anā afaa chakafayamanō? Nā feronāfake āpa āfi fe oxakī chakafai. Askara chakakōi. Nā Nios chanīmara faafoma tsoa askamisma.

² Ooa. Nā feronāfāke mato mēraxō afara chakafai aōnoa rāfipaikanima, "Nō sharakōifora," ixō mā yoimis kakapaiyanā. Akka, ¿afeskakī nā feronāfakeōnoa mā shināchakaimamē? Akka nāskaxō āfe chaka xateyamax anā mato fe ichanāito potakāfe anā mato fe ichanāyamanō.

³⁻⁵ Ē mato fe iyamafixō ē mato shinākōi. Ē ano mato fe iyamafixō nā feronāfake afeskaimākai mē tāpikōia. Ē mato anoxō yoikī iskafakerana: "Mā Jesucristo shināyanā ichanāino Niospa āfe Yōshi Sharaōxō nā feronāfake āpa āfi fe imiskē mato makinoa potakāfe Satanās ifofaāfo mēra inō. Nāskakē Satanās nā feronāfake omiskōimanō. Nāskaxō Satanās nā apaiyai keskara faxii nā feronāfake. Nāskafaino omiskōixii. Satanās omiskōimanaino āfe chaka xatepaixii Jesús anā Ifofapailkī anā omiskōiyamaxiki. Mā āfe chaka xateano nōko

Ifo Jesucristo anā oaitīa nā feronāfake ifixii afe ipaxanō anā omiskōinōma,” ixō ē mato yoikerana ē mato fe ixō.

⁶ Ooa, mā iskamis: “Nō sharakōi,” ixō mā shināfikī mākai nā feronāfake mato mērañoa mā potapaima afara chakafafaiato. ʔMā tāpiamamē, yora fistichi mato mēra ixō afara chakafaito mā xatemayamax aōnoax keyokōi mā chaka itiro?

⁷ Ē mato afara fetsa yoipai. Nikakapo. Kēromā pāa fakī levadura aya osiano keyokōi faraxitiro. Pishta aya osiano keyokōi faraxitiro. Nāskarifiakī fētsa mato mēraxō afara chakafaito mā xatemayamax aōnoax keyokōi mā chaka itiro. Nāskakē nā yora fistichi afara chakafaito potakāfe mato mēraxō anā afara chakafayamanō, mā fena keskara ixikakī. Akka Niospa Fake, Jesucristo, noko nāxonī nōko chaka noko soaxoxiki. Nāskakē mā afaa chakafamisma keskara.

⁸ Nāskaxō a nō chakafapaoni anā nō shināpaima. Fetsafo fekaxtefayamata ato pārayamata meka chanīmakōi fisti nō ato yoitiro.

⁹ Ē mato kirika kenexoyoni iskafakī: “Feronāfakefo āto āfima fe imisfo. Askatari kērofori āto fenema fe imisfo. Askarafo yorafo fe rafeyamakāfe.”

¹⁰ Akka a Jesús Ifofaafōnoama ē mato kenexoyonima. Nā Jesús Ifofaifōnoa ē mato kenexoni. Akka faki pishtakai iyamafoma a Jesús Ifofaifoma. Nāskakē nō ato fe imis. Fakira kaxō nō ōimis nāriri ikafo a Jesús Ifofaafoma. Nō ato fe ifiaxō afāfe akaifo keskarakai nō amisma. Afāfe āto ifo Satanā. Nāskaxō āto chaka xateafoma. Chaka fetsa fetsatapafo amisfo. Nāskaxō āto āfimafo chotamisfo. Kērofori nāskarifiamisfo āto fenema fe chotanākani. Afama mīshti fipaikata āfenāfoma fipaimisfo. Nāskatari yometsokōifo imisfo. Nāskakata nioskōiyamafekē, “Na nōko niosra,” ikaxō afara kifimisfo. Nāskafaiyono nō ato feta afaa chakafamisma. Nāskafikē nō ato fe imis. Nō ato makinoax faki pakxatiroma.

¹¹ Akka mā efeta Nios Ifofaino ē mato kirika kenexoyoni. Nāskakē fatotora yoikī iskafatiro: “Ēri mato feta Jesucristo Ifofai,” ixō yoifixō āfe āfima chotamis. Kērofori askari amisfo āfe fenema fe chotanāmisfo. Askatari afama mīshti fichipaimisfo. Atonāma fipaimisfo. Nioskōiyamafekē afara kifimisfo. Yora fetsafo chakafamisfo. Pāemisfo. Yometsomisfo. Askarafo fe rafeyamakāfe. “Nō Jesús Ifofaira,” ifiakaxō afara chakafamisfokī. Askarafo fe rafeyamakāfe.

¹²⁻¹³ Nā Jesús Ifofaifāfema afara chakafafāfe nō ato yoitiro ma omiskōinōfo. Akka Nios fistichi ato yoitiro iskafakī: “Mā afara chakafamis. Nāskaxō māto chaka mā xateyamaito ē mato omiskōimaxii,” ixō Niospa ato yoitiro. Akka nō ato yoitiro ma. Nāskakē Niospa noko yoia nā Nios Ifofaa fetsafāfe afara chakafafayono nō ato yoitiro āto chaka xatenōfo omiskōixikakima. Akka Niospa meka yōra kirikaki kenenī iskafakī: “Nā feronāfāke mato mēraxō afara chakafamis yoikāfe anā mato fe ichanāyamanō āfe chaka xateyamax,” ixō kirika kenenī.

6

A Nios Ifofamisfo rafeta fētsa chakafaino fētsa chakafayamafaiato, askara achixō a xanīfo Nios Ifofaama ano yoitiro ma ato yoinō

¹ A mato feta Nios Ifofaafō ato yōayamakāfe xanīfofo yoikī a xanīfofofāfe Nios Ifofaafomaki. Askatamaroko nā Nios Ifofaafō ano ato iyokāfe ato yōkanōfo mato chakafafomakī.

² Akka, ʔmā tāpiamamē mā Nios Ifofaxō mā nōko Ifo nokoaino mā xanīfo keskara mā ixii? Nāskaxō mā ato yoixii fatofomākī shara imisfo. Askatari mā yoixii fatofomākī chaka imisfo Niospa ato omiskōimanō. Nāskakē iskaratīari fētsa pishta chakafaano mā ranā yoinōnāsharakāfe xanīfofoki chanīkakīma.

³ Askatari mā Nios feta yoixii āfe ājirifo fatofāfe sharafafomākī, askatari fatofāferi chakafafomākī Niospa ato omiskōimanō, a chakafamisfo. Nāskakē iskaratīa mā mā ato ōi fatofomākī chakafo fatoforimākī sharafo. Nāskakē mā ranā mā yoinōnāsharakāfe xanīfofoki chanīkakīma a xanīfofāfe Nios Ifofaafomaki.

⁴ A mato feta shara shināifo mā ato ifitiro mato yoisharanōfo, mā fochishpanā faatanāino. Akka a Jesús Ifofaafoma mā ato ifitiro ma.

⁵ Afaa tāpiafoma mā ato ifiax mā rāfitiro. Akka, ʔa shara shināifo mato fe ikafomamamē? Ēje, nāno ikafo a shara shināifo. Nāskakē ato ifikāfe mato yoisharanōfo mā fochishpanā faatanāino.

⁶ Akka mā fochishpanā faatanāx, mā raenā faatanāsharamisma. Askakimaroko mā ato yōaxō nā Nios Ifofaafoma ano mā ato iyomis xanīfofofāfe ato yōkanōfo.

⁷ Mā ranā mā fochishpanā faatanāx nā Nios Ifofaafomaki mā atoki chanimis. Akka askarakai sharama. Nāskakē Jesús Ifofaa fētsa mato chakafaito kopitamaroko a Jesús Ifofaafomaki mā chanitiro ma. Nāskax mā shara itiro. Askatari a Jesús Ifofaa fētsa matoki

yometsoano nã Jesús Ifofaafomaki mã chaniroma ãa matoki yometsonõfo. Nãskax mã shara itiro.

⁸ Akka mã ranã mã yometso faatanãmis chaka faatanãyanã. Askatari mato fe yorafori mã ato chakafamis.

⁹ ¿Mã tâpiamamê a yora afara chakafamis Nios xanĩfo ano katiroma? Nãskakê mãri mã pãrameyamakãfe. Mã afara chakafaax Nios xanĩfo ano mã katiromaki. Akka mã ãto ãfima chotamisfo Nios xanĩfo ano fotirofoma. Askatari kêrofori ãto fenema chotamamisfo Nios xanĩfo ano fotirofoma. Nãskatari nioskõiyamafekê afara fetsa fichipaikĩ, “Na nõko niosra,” ixõ fichipaimisfo. Afokai Nios xanĩfo ano fotirofoma. Askatari feronãfakefo aa ranã chotanãpaimisfo. Kêrofori nãskari amisfo aa ranã chotanãpaikani. Afokai Nios xanĩfo ano fotirofoma.

¹⁰ Askatari yometsomisfo, atonãma fipaimisfo, pãemisfo, ìchamitsamisfo, nikayospamisfo, afara fetsa fiatiãxõ ato pãraxõ afara fetsa fiãmisfo. Nãskarafokai Nios xanĩfo ano fotirofoma.

¹¹ Mã askapaonixakĩ iskaratĩa mã mã Niospa afe yorafa. Niospa ãfe Yõshi Sharaõxõ mãto chaka mato soaxona nõko Ifo Jesucristo mã Ifofaito. Mãto chaka mato soaxoyanã ãfe õiti keskara shara mato imai. Askafaxõ afaa chakafamisfoma keskara mato õi.

Nõ Cristo fe rafexõ nõ chakafatiroma

¹² Akka mã yoiraka iskafakĩ: “Cristo ãfe Ifo. Nãskakê a Niospa yoyimano mã ã apaiyai keskara ã atiro, afaa chakama,” ixõ mã yoiraka. Ëje, nãnorikõi. Askatamaroko afara shara fetsa fekê ã aki ã ifofatirora ixõ ã apaima.

¹³ Askatari mã yoiraka iskafakĩ: “Niospa nõko xãki noko onifaxoni a nõ piã nõ pinõ. Nãskaxori a nõ piã noko onifaxoni,” ixõ mã yoyimis. Akka chipo Niospa a nõ piã yafi nõko xãki yamafaxoxii nãatomãi a nõ piã noko onifaxonixakĩ. Chanĩmakõi Niospa noko onifani nõ afe rafepakexanõ. Niospakai nõko ãfima fe nõ inõ noko onifanima. Kêrofori ãto fenema fe inõ ato onifanima. Askatamaroko Niospa nõko yora noko onifaxoni nõ nõko Ifo fe nõ rafepakexanõ, Jesús ãfe ina nõ inõ, nãskata Jesús nõko Ifo inõ.

¹⁴ Nõko Ifo Jesús mã nafianikê Epa Niospa ãfe shinã sharayaxõ ofofani. Nãskarifiãkĩ ãfe shinã sharayaxõ nokori ofofaxii.

¹⁵ ¿Mã tâpiamamê nõ Cristo Ifofaax nõ ãfe yorakõi? Nãskaxõ nõ nõko ãfima chotatiroma nõmãi Jesús afe yorakõixõ.

¹⁶ Niospa meka yoyikĩ yõra kirika kenekĩ iskafani: “Feronãfake kêro fe ikaino mã rafe yora fisti keskarakõi itirofo,” ixõ keneni. ¿Mã tâpiamamê, mã mãto ãfima fe mã ikĩ yora fisti keskara mã itiro? Nãskakê mãto ãfima fe iyamakãfe mã chakanatiroki. Askatari kêrori fene fetsa fe itiroma.

¹⁷ Nãskax nõ nõko Ifo Jesús fe rafeax mã yora fisti keskara nõ ixii. Niospa ãfe Yõshi Shara nokoya rafemaxii. Nãskax nõko fero mẽsho mã fisti keskara ixii Niospa Yõshi Shara fe rafeax.

¹⁸ Nãskakê mãto ãfima fe ipaiyamakãfe. Askatari kêrofori mãto fenema fe ipaiyamakãfe. Askara shinãyamakãfe. Askapaikakĩma ato makinoax ichotakãfe mãto ãfima fe ixikakĩma. Mã chakanatiroki. Askatari kêrofori ichotakãfe mãto fenema fe ipai kakĩma mã chakanatiroki. Akka mãto ãfima mã chotakĩ mãto yora mã chakanafatiro. Askatari afara chaka fetsa akĩ mãto yora mã chakanafatiroma, afara chaka afafikĩ mã chakanatiroma.

¹⁹ ¿Mã tâpiamamê Niospa Yõshi Shara nofe ika? Nõko yora ãfe pexe keskarakõi. Nãskakê Niospa Yõshi Shara nõmẽra ika nãmãi nõko Ifofaax. Nãskax mãkõi mã ifofametiroma. Akka Nios mãto Ifo.

²⁰ Jesucristo mato nãxoni mãto Ifo ixikĩ. Nãskax mã ãfe inakõifo. Nãskatari Nios mãto Ifokõi. Nãskax mãto yora Niosnã. Nãskakê Niosnã ixosharakãfe Niospa mato imapaiyi keskara. Mã askafaito õikakĩ fetsafãfe, “Nios sharara,” fatirofo.

7

Afeskaax feronãfake ãfi fe ishariatirofomê

¹⁻² Mã ea kirika kenexõ femakĩ mã ea yõkaita. Nãskakê mã mã ea yõkai keskara ã mato yoisharapai mã tâpinõ. Feronãfake kêromaisax shara itiro. Askafiax ãfiyapai ãfiyatiro chakafaxikĩma. Nãskax feronãfakefo ãfiyatirofo. Xotofakefori feneyatirofo. Nãskara shara.

³⁻⁴ Feronãfake mã ãfiyax ãfe yora anã ãfenã fistima. ãfe ãfinãri itiro. Nãskarifiãi kêro mã feneyax anã ãfe yora ãfenã fistima. ãfe fenenãri itiro. Nãskakê ãfini ãfe fene afe ipaiyaito fene ranĩtiroma. Nãskatari fenẽri ãfe ãfi afe ipaiyaito ranĩtiroma.

⁵ Nãskakê ranĩnõnãyamakãfe. Akka nãskaxõ mã shinãtiro iskafakĩ: “Nõ Epa Nios kũfiyonõ, nõ paxkanõnãx oxa ranãyoxikĩ. Chipõ anã nõ kemãnãxikĩ,” ixõ mã yoitiro. Nãskafiax chãi samarakayamakãfe. Mã samarakaino Satanãs mato chakafamatiro mã kêro fetsa fe ipaitirokĩ. Nãskarifiãi kêrori feronãfake fetsa fe ipaitiro. Afe ipaikĩ chakafatiro.

⁶ Ë mato, “Fianãkãfe,” ixõ ã mato yoima. Akka mã fianãpai mã fianãtiro.

⁷ Askata ē shinākī iskafai: “Feronāfakefo ea keskara kēromais ikanax shara itirofo. Niosnoax ē āfiyamax ē ishara. Ē shināchakaima. Ē inimakōi. Akka Niospa ea kēromais ima keskarakai ato askafaima. Fetsafo Niosnoax āfiyafo. Fetsafori kēromaiskanax nā ē ikai keskariai inimatirofo.”

⁸ Akka iskaratīa nā kēromaisfo yafi fenemaisfo ē ato yoinō. Feronāfakefo ea keskara kēromais itirofo. Askatari kērofori fenemais itirofo. Askara shara. Askatari āto fene ato makinoax namis, afo anā feneyatirofoma. Ea keskara shara itirofo.

⁹ Akka feronāfake ares ixō teneyamai kēro fe ipaikī fatora kēro fe oxatiro. Askara sharama. Askatamaroko āfiyatiro tanaima shara ixikī, anā kēro fetsafo fe ipaixikīma.

Feronāfāke āfe āfi potatiroma, nāskarari kēromāri āfe fene potatiroma

¹⁰⁻¹¹ Askata iskaratīa feronāfake āfiya ē yoipai, xotofāke feneyari ē yoisharapai. Ēa ē mato yoima. Nōko Ifoōxō ē mato yoi iskafakī, kēromā fene enetiroma. Mā fene eneax fetsa fe fianātiroma. Ares itiro. Akka askayamai anā feneki kematiro. Askara shara itiro. Askatari feronāfāke āfi enetiroma.

¹² Nāskakē iskaratīa keyokōi ē mato yoisharapai. Na meka ē mato yoi Niospa ea yoyiamafekē ēa mēstekōi shinākī ē mato yoi. Feronāfāke Jesūs Ifofaino āfe āfinī Jesūs Ifofaxoma fene noiki fene enepaiyamaino fenē āfe āfi potatiroma.

¹³ Askatari āfe āfinī Jesūs Ifofaino fenē Jesūs Ifofaxoma āfe āfi enepaiyamaino āfinī fene enetiroma.

¹⁴ Feronāfāke Nios chanīmara faimano āfe āfinī Nios chanīmara faino āfe āfiōxō Niospa nā feronāfake shara faxotiro. Nāskaxō āfe āfinī Jesūs Ifofaito ōiki āfiōxō fenē Jesūs Ifofatiro. Nāskatari kēromā Jesūs Ifofayamaino fenē Jesūs Ifofaino feneoxō Niospa nā kēro shara faxotiro. Akka feronāfake fe āfi enenāifono āto fakefo shara itirofoma. Akka enenāyamaifono Niospa āto fakefo shara ōitiro.

¹⁵ Akka feronāfāke Jesūs Ifofayamakē āfinī Jesūs Ifofaito fenē enepaikōikī enetiroma. Nāskax kapaiyaito nētefayamafe. Katanō. Mā nētefaino fekaxtetiroki. Askatari kēromā Jesūs Ifofayamakē fenē Ifofaito kēromā enepaikōikī enetiroma. Kapaiyaitori nētefayamafe. Katanō. Mā nētefaino fekaxtetiroki. Niospa noko katonī nōko shinā mēraxō afanā noko fekaxtefanōma nōko ōiti tanaimakōi shara inō.

¹⁶ Kēromā Jesūs Ifofaxō āfe feneri Jesūsnoa tāpimatiro āfinī fene yoiaino fenē Ifofai rakikīa nō tāpitiroma. Feronāfākeri Jesūs Ifofaxō āfe āfiri Jesūsnoa tāpimaino Ifofai rakikīa, nō tāpitiroma.

¹⁷ Nā nōko Ifo Jesūs mato ima keskara nāskara ikāfe. Akka Niospa mato ifini nā Jesūs mato ima keskara mā inō. Askatari nā Nios Ifofafo tii Nios kīfiti pexefā anoafoya nā maitio anoafori nānorikōi ē ato yoisim.

¹⁸ Iskafakī ē ato yoisim. Judeofo Niospa ato yoini keskarakōi āto fake feronāfakefo foshki repa xatepaonifo. Akka mato foshki repa xatenifono Jesūs Ifofaxō shinākī mā iskafatiroma: “Iskaratīa ē Jesūs Ifofai. Nā fistichi ēfe chaka ea soaxonano ē afe Ipaxanō. Ooa, çafeskakī ea foshki repa xatenifomē, ē askayamapaifiaino? Aatokai ēfe chaka ea soaxotiro. Nāskakē ē foshki repa xateama keskaraxō ē ato fomāi,” ixō shināyamakāfe. Akka māto foshki repa mā mato xatenifono shināchakayamakāfe. Askatari mā Jesūs Ifofaxō iskakī shināyamakāfe: “Judeofo āto xinifāfe ato yoini keskara ē ipai. Ē foshki repa xatepai nā Moisés yoini keskara ē ixikī,” ixō anori shināyamakāfe. Nō foshki repa xatetiroma Niospa noko ifinō.

¹⁹ Akka nō foshki repa xatemisma askatari nō foshki repa xatemis nāskara shara. Akka nō askanokai, “Mā chakafaa,” noko Niospa faima. Askatari nō askamanori, “Mā chakafaa,” noko Niospa faima. Nā judeofo imis keskarakai nō itiro noko Niospa ifinō. Askatamaroko Niospa noko yoini keskara nā fisti nō atiro.

²⁰ Akka nā Niospa mato ifini keskarakōi ikāfe.

²¹ Mā fētsa yonomati ikatsaxakī shināchakayamakāfe. Nāskarokōi ikāfe. Akka māto ifāfe mato nīchpaiyaino, “Fotakāfe anā yonoxoxikakīma,” mato faino mā katiro.

²² Akka nōko Ifo Jesūs mato ifini. Mato ifiyoamano ranāri mā āto yonomati iyopaoni. Iskaratīari mā āto yonomati mā ato yonoxomis. Mā askafixō mā Jesūs Ifofaano, Jesūs mato chaka mato soaxonano, āfe yonomatikōifo mā iki. Nāskaxō tsōa mato iskafatiroma: “Mā kai Jesūs afe yorafoma,” tsōa mato fatiroma. Akka ranāritokai mā tsōa yonoxomisma. Askafiax māri Jesūs Ifofaax māri āfe yonomatikōifo.

²³ Epa Niospa āfe Fake Jesucristo noko nīchixonī noko nāxoyonō nāskax nōko Ifo inō. Nāskax mā afe yorakōifo. Nā fisti māto Ifokōi. Nā fistichi mēstekōi mato shināmasharatiro. Askaxō fetsafo ifofayamakāfe mato shināmasharatirofomaki.

²⁴ Efe yora mīstichi, Niospa mato ifiano nā mā ipaoni keskara ikāfe Epa Nios mato fe ikaino.

Feronāfake āfimaisfoya kērofo fenemaisfoōnoa Pablo yoini

²⁵ Akka iskaratīa afara fetsa anā ē mato yoipai mā ea yōkaita. Feronāfakefo āfimaisfoya kērofo fenemaisfoōnoa ē mato yoi. Ē mato yoiai keskara nōko Ifāfe ea yoiyamafixō ea noiki ea nīchini ē āfe ina inō. Nāskakē ē mato yoiai keskara mā chanīmara fatiro.

²⁶ Iskaratīa afara mesekōiki noko omiskōimani. Nāskakē mā āfimais ika shara. Nios Ifoafaafema noko omiskōimapaikani nō Jesūs Ifofakē.

²⁷ Akka āfiyakaxō mātō āfi eneyamakāfe. Askatari āfimaisxō kēro feneyamakāfe.

²⁸ Akka mā kēroyaxō mā chakafatiroma. Kērofori feneyakatsaxakīma mā feneyaxō mā chakafatiroma. Askata mā feneyax askatari feronāfake mā āfiyax mato omiskōimanaifono mā omiskōitiro. Nāskaxō mato omiskōimatirofo mā Jesūs chanīmara faino. Nāskakē ē mato yoisharapai mā omiskōiyamanō.

²⁹ Askatari ē mato iskakafī yoipai, efe yora mīshtichi. Nōko Ifo Jesūs mā chaima oi kiki. Nōko Ifo nō yonoxokī nō chai faima. Nāskakē nō nōko Ifo yonoxosharakōipai. A āfimaisfāfe nōko Ifo yonoxosharakōitirofo kēro shinākīma. Askatari nā āfiyatori nōko Ifo yonoxosharatiro nā āfimaisfāfe yonoxonaifo keskafakī.

³⁰ Askatari nā shināchakaifāfe nōko Ifo yonosharaxotirofo nā shināchakaifāfema yonoxonaifo keskafakī. Nāskatari nā inimaifāfema nōko Ifo yonoxosharatirofo nā inimaifāfe yonoxonaifo keskafakī. Askatari nā afara fiaifāfe shinātirofo iskakafī: “Na nōkonāma, akka na nōko Ifonā,” ixō shinātirofo. Akka nōko Ifo shinākōiki nō yonotiro.

³¹ Nōko Ifo Jesūs mā chaima oi kiki. Nāskakē nōko mai anoxō nō yonosharafāfainō nā nō yopai fixiki. Nāskafixō afama mīshtifos shinākīma nōko Ifokōiroko nō shinākōinō. Keyokōi mai anoafō keyoxikani. Nāskakē Jesūs nō shinākī finakōiki afama mīshti fipai kī nō shinātiroma.

³²⁻³⁵ Ē mato anori yoi mātō shinā mēraxō afaranā mato fekaxtefanōma. Ē mato, “Āfiyayamakāfe,” faima. Askatari xotofakefori, “Feneyayamakāfe,” ē ato faima. Ē mato mēstekōi imapai nōko Ifo fisti mā shinākī finakōinō, mā afara fetsa shinānōma. Askaxō ē mato yoia keskara feronāfake āfimaisto āfe Ifo inimamapai. Akka feronāfake āfiyaxō āfiri inimamapai. Āfini afara yopaito fenē shināchakakī āfi fixotiro. Nāskakī āfe Ifo fistikai shinātiroma. Nāskaxō āfe Ifo inimamapai kī āfiri inimamapai. Askatari xotofake fenemaisto āfe Ifo Jesūs fisti yonoxosharapai. Afara fetsakai shināima āfe Ifo fisti shināi. Niospa amapaiyai keskara fisti aki. Akka xotofake feneyaxō āfe feneri inimamapai kī afara fetsafori shinātiro āfe Ifo Jesūs fisti shinākīma.

³⁶ Nāskakē meka fetsari ē mato yoi. Feronāfake taefakī xotofake yoiyoxō fichisharapai kī chipo fitiro āfe āfi inō. Shinākī iskakafitiro: “Mē afetiama afe mekaitakī, mia fipa,” shināchakayamaxiki ixō fitiro, chaka shināyamaxiki. Nāskafakī afaa chakafaima.

³⁷ Askatari feronāfake fētsa shinākī iskakafitiro: “Ēfe Ifo ē yonoxosharapaiyai keskara ē āfiyaxō ē axotiroma. Nāskakē ē āfiyai mā yoiyoxō,” ixō anori shinākī afaa chakafaima. Tsōa kerexkai, “Āfiyafe, mā mīyoiaki,” fayamaino nā feronāfake xotofake fe fianātiroma Nios yonoxosharaxii.

³⁸ Akka feronāfake nā xotofake fe fianāsharatiro. Akka nā xotofake fe fianāima nōko Ifo yonoxosharatiro. Nāskarari shara itiro.

³⁹ Askata meka fetsari ē mato yoi. Āfe fene naamanokai kēromā fene enetiroma fetsa fe fianāxiki. Akka mā fene naano fetsa fe fichināpai afe fianātiro nā Nios Ifofaa fe. Askara shara.

⁴⁰ Nāskatari ēa ē shinākī iskakafai. Mā fene naano fetsa fe fianāmax nāskarari sharakōi itiro. Ē shināi Niospa Yōshi Sharapari nonorikōi mato yoipai.

8

Nioskōima onifakaxō yorafāfe kīfipaonifo. Nāskaxō nami ināpaonifo atoōnoa Pablo yoini

¹ Mā ea yōkaito ē mato yoisharatiro. Yora fetsafāfe afara onifakaxō, “Na nōko niosra,” ikaxō nami ināmisfo. Askata anā nā nami fikaxō ato ināmisfo yorafāfe pinōfo. Akka yorafāfe āto niosnā nō nami pia, shara. Nō piamarī, shara. Nāskaxō nō afaa chakafaima. Akka mā yoiki iskakafamis: “Mā nō tāpia nō āto niosnā nami pia, shara. Akka nō piamarī, shara,” māmāi shinākī Nioskōimara ixō. Akka mā fatora fetsafāfe shinākī iskakafamis: “Ēfi tāpikōiaki. Nā ē shināi keskara ē mēstekōi shināi. Ē fetsafo keskarama. Ē apaiyai keskara ē atiro,” ixō mā yoisimis. Askara yoi kakapaimis mā itiro. Askara shinākikai nō fetsafo inimamatiroma. Askakimaroko nō yorafo noixō nō āto ōiti fepeaxosharakōitiro Jesūs Ifofasharanōfo. Nāskakē nō ato inimamatiro.

² Askatari fatora fētsa shinākī iskakafamis: “Ēfi afama mīshti tāpiakī,” ixō anori yoifiki atiri afaa tāpīama.

³ Akka fatora fētsa Nios noiaino nāskarifikāi Niospa aōnoa yoitiro iskafakāi: “Nā ea noiai mē tāpikōia. Nāfi efe yoraki,” ixō yoitiro.

⁴ Nāskaxō yorafāfe afara fetsa onifakaxō, “Na nōko niosra,” ikaxō nami ināifo. Nā nami nō pitiro. Nā shara. Nō chakafaima. Akka nō piamari, shara. Akka mā nō tāpia a afara fetsa yorafāfe onifafotakai afaa tāpiama. Akai ōitiyama. Āfe māporikai afaa shinātiroma. Akai Niosma. Akka Nioskōi fisti.

⁵ Jesús Ifofaafāfema yoiki iskafamisfo: “Nios ichapa. Nai mēranoafoya mai anoafoya nios ichapakōi,” ixō yoimisfo. Akka nā āto nios ichapafix Nioskōifoma.

⁶ Mā nō tāpia Epa Niosfi fistiki. Fetsakai anoma. Nāato keyokōi onifani. Nokori onifani nō āfe fakefo inō. Nāskatari nōko Ifo Jesucristori fisti. Anā ano fetsama. Nāskaxō Niospa āfe Fake feta keyokōi onifani. Aōnoax nō nitiro.

⁷ Nā ē mato yoiai keskara fisti rasichi Jesús chanīmara faifāfe tāpiafoma. Shināmisfo iskafakakī: “A fetsafāfe afara onifafō, nā āto nioskōi nia,” ixō yoimisfo niyamafiakē. Akka āto xinifāfe nānori ato yoipaonifo. Nāskakē shinākani iskakakī: “Nā āto niosnā nō nami pixō nō Nioskōi chakafatiro,” ixō shinātirofo. Akka mā pikaxō āto shinā mēraxō shināchakatirofo: “Mā nō chakafara,” ikaxō.

⁸ Anori shināfiafonokai a nō afara piatokai Nios yafi noko rafemasharatiroma. Nios makinoa noko potatiroma. Afara onifakaxō, “Na nōko niosra,” ikaxō nami ināfo nā nami nō piamanokai noko shara imatiroma. Askatari noko chakafatiroma. Nāskatari mā nō pianori noko chakafatiroma. Nāskatari noko shara imatiroma.

⁹⁻¹² Nāskakē mato feta Nios Ifofaafō afaa chakafamamayamakāfe. Mā shināi iskafakī: “Nō keyokōi pitiro. Afara onifakaxō, ‘Na nōko niosra,’ ikaxō nami ināfo. Nā nami nō pitiro nā onifafokairoko Nioskōikē. Akka mā nō na nami pixokai nō āto nios chanīmara faima. Akka mā nō tāpia Nioskōima. Akka pixō Nioskōi nō chakafaima. Jesúsri nō kachikirifaima,” ixō mā shināi. Mā anori shināfiafō Jesús Ifofaa fetsafāfe anori tāpiafoma. Tāpiamaifono nā nioskōimato kīfiti pexefā anoxō mā piat fisti mā pipai mākaī āto nios ifofapaima, nāskakī mato ōikakī akairi apaikani. Akka mā mā tāpia yorafāfe āto niosnā nō nami pia shara, chakama. Akka fetsafāferi Nios Ifofafiakaxō yoimisfo iskafakakī: “Āto niosnā nō nami pia sharama, nō chakafatiro,” ixō yoimisfo. Nāskaxō mā nami piatio fetsafāfe mato ōikakī akairi afāfe nami pitirofo. Nāskaxō mā nami pikaxō chipo shinātirofo iskafakakī: “Ooa, mē nami pixō ēfe Ifo Jesús ē chakafaa ēmāi āto niosnā nami pixō. Nā nami pikī ē āto nios sharafai. Ē āto nios ifofai ōitsai. Ooa, ē chakafaa,” ixō shinātiro. Askaxō āfe shinā mēraxō shināchakakōitiro mā nami piatio ōikakī akairi pikaxō. Nāskakē mā chakafamatiro. Askafakī Cristori mā chakafai. Mā mā tāpia afara onifakaxō, “Na nōko niosra,” ikaxō nami ināifo nā pixokai mā chakafaima nā onifafokairoko Nioskōikē. Akka fetsafāfekai tāpiafoma. Afāfe shinākani: “Nā nami pixō nō chakafatiroki,” ixō shināmisfo. Akka mā piatio ōikakī akairi pikaxō shināchakatirofo. Mā akai keskafakīri shinākani. Akka mā nā nami piyamaonokai akairi pikeranafoma. Shināchakakeranafoma. Nāskakē mato fe yorafō noikōixō mā nā nami pitirofo ato chakafamaxikima. Akka atoōnoaxri Cristo naniki.

¹³ Nāskakē nō nami pixō Jesús Ifofaa fetsafō nō ato chakafamatiro. Nāskakē āto niosnā nō nami pitirofo fetsafō chakafamayamaxikī. Nāskakē nō fetsafō chakafamapaima. Nofeta Jesús Ifofaa fetsafō noikī nō afaa chakafamapaima.

9

Niospa Pablo nīchini āfe meka ato yoinō

¹ Nios fistiŋi ēfe Ifokī. Nā ea yonomapaiyai keskara ē atiro. Tsōakai ea yonomatiroma. Jesús ea nīchini ē aōnoa yorafō yoinō. Akka nōko Ifo Jesús mē ōisharakōini. Aōnoa ē mato yoiaito mā chanīmara fani. Nāskakē nōko Ifo Jesús ē yonoxonaōxō Jesús mā Ifofai.

² Fetsafāfe shinākakī iskafamisfo: “Niospakai Pablo nīchiamā Jesúsnoa noko tāpimanō,” ixō anori yoimisfo. Fetsafō mekaino anori shināyamakāfe. Ē mato yoiaito mā nōko Ifo Jesús chanīmara fai. Nāskakē mā tāpitiro chanīma Niospa ea nīchini ē mato Jesúsnoa yoinō.

³ A ea īchakakī mekafaiŋno iskafakī ē ato kematiro:

⁴ Fetsafāfe Jesúsnoa yoiaito nikakakī afaa kopi yōkaxoma kaxpa ato pimamisfo. Akka ē mato Jesúsnoa yoiaito nikakakī, ŷeari afaa kopi yōkaxoma kaxpa eari pimatirofomamē?

⁵ Ē akai keskafakī Pedrori Jesúsnoa yoifofāsafamis. A Jesús nīchiafāfe fetsafāferi Jesúsnoa ato yoifofāsafamisfo. Jesús āfe extofāferi ato yoifofāsafamisfo. Nāfo kēro Jesús Ifofaafō fe fianākaxō Jesúsnoa ato yoifofāsafafono āto āfifori ato fe fofāsamisfo. ŷNāfāfe āto āfifāfe Jesús Ifofaafō fe fianāfo keskari ēri nā kēro Jesús chanīmara faa fe ē fianātiromamē eferi kafāsanō?

⁶ ŷAfeskakī ē Bernabē feta nō mato Jesúsnoa yoifikī nō yonoimē, a nō yopai yafi a nō piat fixikī? Akka fetsafāfe Jesúsnoa mato yoifikakī yonokanima nō akai keskafakī. Akka afara yopafono mā ato ināmis. Akka a nō yopai kaxpa nō fimisma, yonoxō nō fimis.

⁷ Anā meka fetsari ē mato yoinō. Sorarofāfe kaxpa yonokanima. Āto xanifāfe a piaifo ato inākani. Askatari ato kori inākani. Nāskarifakī yora tare fanamisto āfe tare foaisharano āfe yono pitiro. Askatari fakka kexemistori āfe fakka chocho fīaxō ayatiro. Nāskarari a Jesúsnoa yomisfāfe a piaifo fitirofo pixikakī tsōa kopifaxoma.

⁸ Nā ē mato yoiai keskara yōra mekama. Akka Moisés nānori kirika keneyoni Niospa meka yoikī.

⁹⁻¹⁰ Moisés Niospa meka kenekī iskafani: “Nā fakka keskara nexakaxō xiki peama peama amamisfo āfe xaka potaxikakī. Nāskakē ifāfe renextiroma xiki xaka pinō ifomāi yonoxokī,” ixō Moisés Niospa meka yoikī kirika kenenī. Akka fakkaōnoa Niospa yoinima. Yorafoōnoari yoini. Nā Jesús yonoxomisfoōnoa yoini. Nāskaxō afaa kopifaxoma fitirofo yopaifo Niosnoa ato yoikakī. Askatari fetsafāfe tare kexexō shinātirofo iskakakī: “Ē na tare kexeakī nāskakē ē tarepanoa afama mīshti fipa,” ixō shinātirofo. Nāskarifakī a Niospa meka ato yomisfāfe a paii fitirofo.

¹¹ Nāskarifakī nokori kopikiri a nō yopai mā noko kaxpa inātiro afaa kopi yōkaxoma.

¹² Fetsafāfe Jesúsnoa mato yoiaifono nikakī nā yopaifo mā ato ināmis.

Akka nō mato taefakī yoyoini. Nāskakē mā noko afama mīshti inātiro fetsafo finōmainifōfā. Mā noko afama mīshti ināfitirokē nō mato afaa yōkamisma. Nāskaxō nō tenemis. “Nō ato kori yōkaito anā noko nikapaitirofoma,” ixō nō shināmis. Nāskakē nō mato afaa yōkapaimisma.

¹³ ¿Mā tāpīamamē? Nōko kaifo judeofo na Nios kīfīti pexefā mēra femisfo a piaifo. Nā piaifo Nios ināxikakī. Nāskakē a Nios kīfīti pexefā mēra yonomisfāfe a paii kaxpa pimisfo tsōa kopifaxoma.

¹⁴ Nāskarifakī nōko Ifāfe yoini iskafakī: “Fētsa ēfe meka shara fetsafo yoiaito nikakakī nā nikaifāfe a yopaifo ato inātirofo,” ixō nōko Ifāfe yoini.

¹⁵ Nānori nōko Ifāfe yoifinikē ē mato afaa pishta yōkamisma. Mato Niospa meka yoifikī ē mato kirika kene fomaime: “Ea kori inānōfora,” ixō. Nāskakē tsōa ea yoikī iskafatiroma: “Pablo ato kori fīapaikī ato Jesucristoōnoa yomis,” ixokai tsōa eōnoa anori yoitiroma. “Akka Pablo ato kori fīamiski ato Jesucristoōnoa yoikī,” ea mā faito ē rāfipaitiro. Nāskaxō ē mato afaa pishta yōkamisma: “Pablo kori fia,” mā ea fanōma.

¹⁶ “Ē mato afaa yōkatama Jesúsnoa ē mato yomis. Nāskakē ē sharafinakōiakī,” ixokai ē yoitiroma kakapaiyanā. Akka Niospa ea katōxō ea nīchini ē Jesúsōnoa ē yoifafāinō. Akka ē Jesúsōnoa yoiyamaito Niospa ea omiskōimatiro.

¹⁷ Ē yoikī iskafamis: “Epa Niosi, mī Fakeōnoa ē yoipai,” ixō ē yoikē Epa Niospa ea afara inātiro. Akka ēa ē yoima. Niospa ea nīchini Jesúsnoa ē ato yoinō. Nāskakē nā ea yoini keskara ē ato yomis.

¹⁸ Akka ē Niospa meka shara yomisikē, ¿afaa ea Niospa ināimē? Ato Niospa meka yoixokai ē afaa ato yōkamisma. Askaxorikai ē ato yomisma iskafakī: “Niospa mato yoikē Jesúsnoa ē mato yoifafainaito a ē yopai ea inānōfora,” ixokai ē ato yomisma. Akka ē Niospa meka ato yoipai afaa yōkaxoma. Nāskax ē inimasharakōi Epa Niospa ea inimamaino.

¹⁹ Ēkai tsōa yonomatima. Nāskafixā ēakōi ē māto yonomati keskarakōi. Nāskakē keyokōi yorafo ē axosharapai ato Jesús chanīmara famaxikī. Nāskax ē yorafāfe ato yonomati keskarakī. Akka nā Nios Ifofaafoma ē ato fe rafemis āto feyafati shara keskara ixō ē ato yoiaito, Jesús Ifofanōfō ē Niospa meka yoiaito.

²⁰ Ēfe kaifo judeofo fe ē ikax nā ikaifo keskarī ēri ato keskara ipai. Ē ato keskara ikaito ea oikakī Jesús chanīmara fatirofo. Nōko xini Moisés nōko kaifo yoipaoni keskarakai iskaratīa anā ē nikaima. Akka ē nikayamafikī a Moisés yoipaoni keskara nikamisfo fe ēri ato fe ixō Moisés yoini keskara ēri askai ato Jesús chanīmara famaxikī.

²¹ Nāskakēri nā Moisés yoini keskara nikaifoma fe ē ato fe ixō nā Moisés yoini keskara ē akima ato Jesús chanīmara famaxikī. Ē nāskafiamiskē Cristo ea yoini keskara ē amis. Ē nikasharaxō nā fisti ē kachikiri fatiroma.

²² Jesús chanīmara faafāfe ranārīto Niospa meka tāpisharayokanima. Ē nā keskarafō fe ikax ēri ē ato keskara ipai eari Jesús tāpimasharanō. Nā ea tāpimana keskara ēri ato tāpimasharanō. Nāskatari fatora fetsafo fe ē ikax ē ato keskarari ē ipai. Eōxō Jesús chanīmara fakanax afe isharapakexanōfo.

²³ Nāskakē ē askafakī ē ato Jesucristoōnoa tāpimasharai nā chanīmara faifono ēri ato fe inimai finakōitiro.

²⁴⁻²⁵ Akka mā mā tāpia nā naetapafo xonōnōnāxikakī ichotirofo yora ichapafāfe ato oiaifono. Akka nā koshī fistichi ato xonōtiro. Nāskakē akiki xanīfo inimakī afara shara fetsa inātiro. Nāskakē kerekxai ichotirofo fetsafo xonōpaikani. Akka ichoyokanaxma tae fenai ichoyofōfāfōfāitirofo feyafaxikakī xokenāxikakima. Nāskarifakī nōko Ifo Jesús kerekxai yonosharaxokāfe afara chakafo fayamaxikakī. Akka Niospa mato yoiaito nikakī akāfe

Jesús feyafaxō Ifofaxikakī mā akiki nokoaitūa mato afara shara inānō. Akka nā ichokī ato xonōa xanifāfe afara shara inā keyotiro. Akka Niospa noko afara inā keyonakama.

²⁶ Nāskakē ē Jesús fisti yonoxoni afaa fetsa shinātama. Akka ēa ē kaxpa mato yoimisma. Niospa ea shināmanaino ē mato yoimis. Naetapafo xonōnōnāpaikani mēstekōi ichotirofo. Nāskarari ē mēstekōi ika. Ēfe Ifāfe ea yoiai keskarakōi ē iki akiki nokosharaxiki.

²⁷ Ēa ē apaiyai keskara ē akima. Ēfe Ifāfe ea amapaiyai keskara ē aki. Ē tenepaifikī ē tenetiroma Jesús Ifofasharaxikī. Ē xokenāfiakī ē tenetiroma Jesúsnoa yoiki. Jesús fistichi ea yonomatiro. Nāskakē ē fetsafori yoifafāini Jesús Ifofaxō yonosharaxonōfo. Nāskakē Niospa ea yoia keskara ē ayamax ē fenotiro, afianā ē Nios yonoxotiroma. Niospa anā ea yonomatiroma. Ē fenopaima. Nāskakē nā ēa ē apaiyai keskara ē akima. Ēfe Ifāfe ea amapaiyai keskara, nā fisti ē aki.

10

Judeofāfe Nios chakafapaoni keskara iyamakāfe

¹ Efe yora mīshtichi, tāpikāfe. Nōko xinifo Egipto anoax fonifo. Akka Niospa nai kōi nāmā pishta ato fotomaxoni a ōiax nōko kaifo judeofo acho fonifo. Niospa nā nai kōiōxō ato iyopaiyai ari ato iyoni. Ato iyoikaino nā iamāfā āfe ane Ōshi ano nokonifo. Nānoxō nōko kaifo judeofo Niospa ato iamāfā nēxpakīa rafe ato paxkaxotani anori pokefainōfo.

² Moisés ato rekē tanaxoni. Akka nōko kaifo judeofo Moisés acho fonifo. Nā Moisés chanīmara fakanax afe rafepaonifo. Nāskakē nai kōi nāmā pishta kaino Moisés nāmā ato iyoni. Iamāfā pokefokani mā iamāfā nakirafekōi shinātananō. Nāskakē pokefainifo iamāfā nēxpakīa. Mā āfe kaifo ato ififani Moisés kani.

³ Askatari Niospa nai mēraxō a piaifo ato potaxoni fikaxō pinōfo.

⁴ Nāskatari ano fakamano Moisés tokirinifā āfe mēstetinī ramāino faka sharakōi tsekeni keyokōichi ayanōfo. Cristoōnoax faka sharakōi tsekeni judeofāfe ayanōfo. Akka fakirira fofāfofāpaonifo Cristo ato fe kaino, tsōa Cristo ōinima. ato fe kakī ato axopaoni ato kexexō.

⁵ Askafafiaifono Epa Nioskai atoki inimanima āfe meka nikayamaifono. Nāskakanax tsōa istoma anoax fofāfofāikani nikayospakanax nai keyonifo. Nā tsōa istoma ano ato maifakī fetsanifo Niospa ato namakī keyoano.

⁶ Akka afāfe afara chakafapaonifo. Nāskakē atoōnoa noko tāpimani afara chakafo fapaonifo keskara nōri ayamanō inifo keskai omiskōixikima.

⁷ Afāfe afara chakafapaonifo keskara iyamakāfe. Akka nāfāfe afara fetsa onifakaxō, “Na nōko niosra,” fapaonifo. Nāskakaxō kifipaonifo. Kīfikaxō āfe ferotaiifi piyanā ayata ikaxō afara fetsafo chakafapaonifo. Pāeyanā monopaonifo. “Nōko nios nokoki inimaira,” ikanax askapaonifo. Nāskakē māri ato keskara iyamakāfe.

⁸ Nāskakanax āto āfima fe ipaonifo. Askatari kērofori āto fenemafo fe ipaonifo. Askaifāfe ōikī Niospa veintitrés mil yorafo ato namarisafatani nā pena fisti.

⁹ Māri ato keskara chaka iyamakāfe. Akka, “Nioskai nokoki fena ōitifishkiyotiroma. Nāskakē ē afara chakafafiaito ea Niospa omiskōimanimā,” ixō shināyamakāfe. Akka nōko xinifāfe chakafiaifāfe ōikī anā teneyamakaikī Niospa ato omiskōimani. Nāskakē ato mēra rono paekōifo nīchimi ato chachinōfo. Ato chachiano ranāri nanifo. Nāskakē noko tāpimai nōri Nios chakafaito nokori omiskōimatiro.

¹⁰ Askatari mēxotaima mekaifāfe ōikī Niospa āfe ājirinī ranāri ato namani. Akka māri ato keskara iyamakāfe mato omiskōimayamanō.

¹¹ Nā nōko xinifāfe afara chakafapaonifoōnoa noko kenexonifo noko yoisharanō nōri ato keskara iyamanō omiskōixikima. Akka nōko Ifo Jesús oyoamano chaima nō itipinīsharayoi mā nōko Ifo nokoaino anā nō keskara chaka nō ixikima.

¹² Akka fētsa shināki iskfai: “Ēkai ato keskarama. Ē afaa chakafatiroma. Akka afara sharafo fisti ē amis,” ixō anori shinātiro. Nāskakē kexemesharakāfe ato keskara iyamaxikakī afara chakafai. Akka māri Jesús Ifofasharamax mā ato keskarari mā itiro afara chakafai.

¹³ Satanás mato afara chakafamapaikī mato fisti chakafamapaimisma. Keyokōi nā Nios Ifofaafari ato chakafamapaimis. Mato chakafamapaifiaino Niospa mato yoia keskara mato kexesharatiro mā afaa chakafanōma. Akka mato yoimis keskara mato axōi mā chanīmara faito. Nāskakē Niospa Satanás mato ichapama fekaxtefatimafai mā chakafanōma. Mato Niospa amatiro mā tenenō mato fekaxtefafiaino. Māto ōiti mato kerexfaxotiro mā Satanás nikanōma. Askatari afara afe keskararafāfe mato fekaxtefaino Niospa mato amatiro mā tenenō mā Nios kachikirifaxikima.

¹⁴ Efe yora mīshtichi, fetsafāfe afara onifakaxō, “Na nōko niosra,” ikaxō chanīmara faifono ato makinoax paxkafaitakāfe.

¹⁵ Nāskakē shināsharakōikāfē nā ē mato yoiai keskara ōitsai ē mato pārairaka. Akka ea yoikāfē ē mato pāraimākai.

¹⁶ Mā mā tāpia Niospa meka nikai nō ano fisti ichanāmis. Nāskaxō nō fimi ene ayamis Jesús noko nāxoni shināyanā. Nā nō ayamis, “Fimi ene Jesús āfē imira,” ixō nō shināmis. Nāskaxō nō shinātiro Jesús noko naxōi āfē imi foni nō afe nīpaxanō. Nāskakē nō yoitiro iskafakī: “Aicho Epa Niosi, mī Fāke noko nāxoni nō afe Īpaxanō,” ixō nō yoitiro. Nāskatarī pāa torepakexō Jesús noko nāxoni shinākī nō pimis. “Nā pāa Jesús āfē namira,” ixō nō shināmis. Nāskaxō nō shinātiro Jesucristo noko omiskōixoni mastaifono ifi cruz ikakinoax. Nāskakē nō afe rafepakenaka Ifofaax.

¹⁷ Akka pāa fisti torepakexō keyokōichi nō pimis. Nāskarīfakī Jesucristo fisti keyokōichi nō chanīmara faax fisti keskara nō ixii.

¹⁸ Nāskatarī nōko kaifo israelifo shinākāfē. Nāfāfē āto inafō retekaxō Nios ināmisfo āto chaka soapaikakī. Nāskatarī nā israelīfāfē Nios kīfīti pexefā mēraxō Nios yonoxomisfāfē nā nami pimisfo. Nāskakanax nā fisti keskara imisfo ano fisti ichanānākaxō pikani Nios shināyanā.

¹⁹ Nāskakē ē mato yoi nā afara fetsa onifafo akai afama. Askatarī afara fetsa onifakaxō nami ināfo nā namikai afama a onifafokairoko Nioskōikē.

²⁰ Akka nā Jesús Ifofaafāfema Nioskōi nami inātaroko afara fetsa onifakaxō, “Nā nōko niosra,” ikaxō nīafaka chaka nami ināmisfo. Nāskakē māri nami ināyamakāfē. Nīafaka chaka fe mā rafeaito ē mato ōipaima.

²¹ Mā nōko Ifo Jesús fe rafepai a nīafaka chakafo fe rafeyamakāfē. Askaxō nā rafe mā ifofatiromaki. Nā Jesús Ifofaafō fe mā ato fe ichanākaxō pāa torexō mā ato feta pimis Jesús noko nāxoni shināyanā. Nāskakē nā Jesús Ifofaafoma fe ato fe mā ichanātiroma nīafaka chakafo nikaxikīma.

²² Nōko Ifo Jesús fe rafepaikī nō nīafaka chaka fe rafepaikī nō nōko Ifo Jesús nō ōitīfishkimatiro. Nō askafaito noko omiskōimatiro. Akka, ¿nō Jesús kerexkai finōtiromē noko omiskōimayamanō? Maa, nō Jesús finōtiroma. Jesús noko omiskōimanaito tsōa noko timamatiroma.

Nā Jesús Ifofaafō nō ato noikōixō nō ato shināchakamatiroma

²³ Akka mā shināiraka iskafakī: “Cristo ēfē Ifo. Nāskakē nā ē apaiyai keskara ē atiro, afaa chakama,” ixō mā shināiraka. Ēje, nānorikōi mā shināmis. Nāskakē afara shara shinākī: “Nā chakama nō atiro,” ixō mā shināfiaino akka fetsafāfē anori shinākanima: “Chakara,” famisfo. Nāskakē fētsa ferotaifi nō afara pitiroma ato shināchakayamaxikī. Chanīma, nō Jesús Ifofaxō Niospa noko yoini keskara keyokōi nō pitiro. Keyokōi nami shara nō pitiro. Chanīmakōifiano, Jesús Ifofaa fetsafāfē shināmisfo iskafakakī: “Ē nami pitiroma. Ē nami pixō ē Jesús chakafatiro,” ixō shinātirofo. Nāskakē nō ato ferotaifi nō nami pitiroma shināchakanōfoma. Akka nō ato shināchakamatama Jesús fisti nō ato shināmapai.

²⁴ Nāskakē nā mā apaiyai keskara fisti shināyamakāfē. Fetsafoōnoari shinākāfē. Ato axosharakāfē.

²⁵ Fatora fētsa mato nami ināpai mato kori fīaxikī akka pipaikī mā fītiro pixikī. “¿Fanīa mī na nami feamē?” ixō yōkayamakāfē mā pixō shināchakaxikakīma: “Nā nami nā mī niosnāraka,” ixō yōkayamakāfē. Akka noko Niospa yoini iskafakī: “Keyokōi mā nami pitiro,” ixō noko yoini.

²⁶ Nōko Ifāfē keyokōi onifani. Keyokōiri āfenā. Nā onifani tii noko ināpai nōkonā keyokōi inō.

²⁷ Akka nā Jesús chanīmara famato mato pimapaiyaito mā a feta pipaiyai afeta pikāfē. Nāskaxō iskafakī yōkayamakāfē: “¿Fanīa na nami mī feamē? Nā mī niosnāraka,” ixō yōkayamakāfē. Yōkaxoma mā pitiro shināchakaxikīma.

²⁸⁻²⁹ Askatarī fētsa mato yoikī iskafatiro: “Ē mato nami pimai nā ēfē niosnā,” ixō mato yoiaito nā nami piyamakāfē. Akka mā pīaito ōikī āfē shinā mēraxō shinātiro iskafakī: “Ajaa, na feronāfāke Jesús Ifofafīaxō nā ēfē niosnā mā nami pii. Na feronāfākekai Jesús Ifofasharama,” ixō āfē shinā mēraxō shinātiro. Nāskakē māri mā nami pixō māto shinā mēraxō mā shināchakatiro: “Mā nō chakafara,” ixō. Akka mā mā tāpia keyokōi nō nami pitiro. Nāskakē fetsafāfē tāpiamano ato ferotaifi nā nami piyamakāfē shināchakayamanōfo.

³⁰ Mā yoiraka iskafakī: “Ē keyokōi nami pikī ē Nios, ‘Aichora,’ fafafaifāini. ¿Akka afeskakī fētsa eōnoa shināchakatiromē?” ixō mā shināiraka.

³¹ Ē mato yoinō afara mā akai shara shinākī akāfē. Niospa mato shara ōinō akāfē. Niosnoa shināsharanōfo akāfē.

³² Nā mā akai keskafakī fetsafo shināchakamayamakāfē. Nōko kaifo judeofo iyamai mani fetsafo Nios Ifofaafōya ato shināchakamayamakāfē matoōxō nōko Ifoōnoa shināchakanōfoma.

³³Nāskari fakī ēri keyokōi yorafa ē ato shara faxopai inimanōfo. Akka nā ē apaiyai keskara fisti ē akima. Fetsafāfe afara apaiyaifo keskafakī ē ato axopai Jesucristo Ifofakaxō ato chaka xatekanax afe Īpaxanōfo.

11

¹ Akka na Cristo akai keskara ēri aki. Akka māri nā ē akai keskara akāfe.

Ichanāxō nō Nios shināino feronāfake fe kēro afeskax itirofomāki Pablo ato yoini

² Mā ea shināmiskē ē mato aicho fai matoki inimakī. Nā ē mato yoimis keskara mā nō feyafamiski. Nā mā nikafafāini.

³ Efe yora mīshtichi, ē afara ē mato yoipai mā tāpinō. Cristofi keyokōichi nōko Ifokī. Nāskarari kērofāfe āto ifo āto fenefo. Akka Cristo āfe Ifokī Epa Nios.

⁴ Nāskakaxō feronāfake Nios yoiti pexe anoxō yoianā kīfikani marakometirofoma Cristo shinākani. Nō marakomexō nōko Ifo nō noima. Nāskakē nōko Ifo nō rāfimatiro.

⁵ Askatari kērofāfe Nios kīfipaiyanā Niospa meka yoipaikani marakometirofo fetsafāfe tāpinōfo āto fenefo āto ifokē. Nāskara mā nō feyafamis. Āto marakometimaisax maxko ika keskara itirofo. Nāskaxō āto fenefo rāfimatirofo.

⁶ Akka kērofāfe Nios kīfipaikani marakomekaspakani feronāfakefo keskara maxko itiro. Nāskakanax kērofo maxko ikanax rāfipaitirofo. Nāskakē ato iskatatirofo: “Nā kērofo chakafora,” ikaxō yoitirofo. Nāskakē kērofāfe Nios kīfipaiyanā āfe mekari yoipaikani marakometirofo.

⁷ Akka feronāfakefāfe Nios kīfipaikani askayamai āfe meka yoipai marakometirofoma Nios keskara sharamāi ikanax. Askatari Nios nikakōikanax āfe ōiti keskara shara ikafo. Nāskafakīri kērofāfe āto fene nikakōikanax shara itirofo. Nāskakē āto fenefo atoki inimatirofo.

⁸⁻⁹ Niospa feronāfake onifakī taefani. Chipo xotofake onifani. Feronāfakeōnoa Niospa xotofake onifani. Kēronoakai Niospa feronāfake onifanima. Akka feronāfakeōnoa xotofake Niospa onifani fene afara axosharanō.

¹⁰ Nāskakē feronāfake kēro ĩkitiro. Kērofāferi āto fene nikakōitirofo. Nāskax Nios Ifofafo ichanāifono kērofāfe āto marakometi maitirofo āto fenefo nikakōikaxō fetsafāfe ato ōinōfo āto fenefo nikakōiaifono. Askaifono Niospa āfe ājirifāfe ato ōikakī yoitirofo iskatifakakī: “Niospa yoini keskara na kērofāfe āto fenefo nikakōisharakani,” ixō yoitirofo.

¹¹ Nāskax nōko Ifo fe nō rafeax feronāfakefo fe xotofakefo nō axō faatanāsharatirofo. Akka xotofakefo iskatirofoma: “Nō feronāfakefo nō yopaima,” itirofoma. Askatari feronāfakefo iskatirofoma: “Nō xotofakefo nō yopaima,” itirofoma.

¹² Niospa taefakī feronāfake onifani, āfe ane Adán. Nāskaxō xotofakeri onifani, āfe ane Eva. Adán āfe pishi tsēkaxō Niospa onifani. Nāskatari xotofake fake feronāfake kāipakemis. Akka xotofakefoya feronāfakefo Niospa onifani.

¹³ Efe yora mīshtichi, shinākāpo. Xotofakefāfe mato fe ichanākaxō Nios kīfipaikakī marakomexoma Nios kīfikī, ¿askara sharamamē? Mā ea yoitiro.

¹⁴ Mā mā tāpia feronāfake foo chainipaya nō shara ōitiroma. Akka nōkai askara feyafamisma. Nāskakē feronāfake foo chainipa fatiroma. Foo chainipayax rāfītiro.

¹⁵ Akka xotofakefāfe ato foo chai fafo nā marakometi shara ōitsa itirofo.

¹⁶ Akka na ē mato yoiai keskara ea nikakaspai fetsa efe feratenāto ē afaa yoipaima. Akka nā fisti ē mato yoimis. Xotofakefo marakometiro ē mato yoimis. Nā ē mato yoimis keskari Nios Ifofaa fetsafāfe nānorikōiri yoimisfo nā ichanāifotā.

Nios yoiti pexe anoax ichanākaxō Corinto anoafāfe afarafa chakafaifono Pablo ato yoini anā askanōfoma

¹⁷ Akka afara fetsari ē mato yoipai. Mē nika Nios yoiti pexe anoax ichanākō mā afara chakafaito. Nāskaxō afara shara fatama mā afara chakafakōini. Nāskakē, sharafora ē mato faima.

¹⁸ Akka mē nika mato anoax fēkaxō ea yoiaifono nā mā ichanāitīa fetsafo fe mā osināxma ato fe ichanākaspaito. Nāskax mā ato ketaxamei tsaopaitiroma. Mā ichanākō nā nōko Ifo Jesús mato nāxoni shināpaifi mā ranā mā noikaspa faatanāi. Nā ē matoōnoa nikai keskara ē chanīmara fai rakikīa.

¹⁹ A mā shināi fisti anori mā shināima. Nāskarafo yorafa a shināi fisti anori shinākanima. Nāskakē mā ranā feratenākakima yoinānāsharakāfe tāpisharaxikakī. Fetsafāfe anori mā shināino, nāskakē fetsafāferi anorima shināi. Nāskakē yoināsharakāfe fato sharamāki.

²⁰ Ē anā mato yoisharapai. Mā Nios yoiti pexe anoax ichanākōkai mā pāa piyanā ayayanā a noko Jesús nāxoni mā shināima. Askatamaroko mā piyai yafi a mā ayai fisti mā shināimis.

²¹ Mē nika a mā piyai mā feaito mares pixikī ichanākō ato manayoxoma. A fonāikaifokai mā ato ināima. Nāskakē fonāikani. Askatari mā pāemis. Askarakai sharama.

²² Akka pipaikī ichanāti pexe ano kayoxoma ikisi mātō pexe anoxō piyokāfe. Akka mātō pexe anoxō piyoxomaroko nā Nios yoiiti pexe ano mā femis anoxō mares pixikī a fonāikaifo ato akixikima. Nāskakē a fonāikaifo rāfitirofo. Mā askafakī a mato fe ichanāfo mā chakafai. Mā ato noima. ¿Ē matoōnoa yoisharamē? Maa. Ēkai matoōnoa yoisharaima māmāi ato chakafaito.

Jesús noko nāxoni shināyanā nō piyanā nō ayatiro
(Mt. 26.26-29; Mr. 14.22-25; Lc. 22.14-20)

²³⁻²⁴ Nāskakē nōko Ifo Jesús ea yoini keskara ē anā mato yoini. Ea tāpimani keskara ěri mato tāpimapai. Nōko Ifo Jesús Judaspa ato achimayoamano nā fakish fisti aōxō tāpimisfo fe ichanāyoni. Nāskaxō ato feta pikī pāa tsofaxō Apa Nios yoini iskafakī: “Epa Niospa, mī sharafinakōia. Mīfi keyokōi tāpiaki. Aicho,” fata pāa torepakexō ato tii ināni. Nāskaxō ato anā yoini iskafakī: “Na pāafi ěfe yoraki. Ēfi matoōnoax chipo naikai mato noikōiax. Mē naano nā mā ichanāitīa nā mā pāa piaitīa ea shināfafāikāfe,” ixō ato yoini.

²⁵ Nāskaxō mā piaifono anā kecho tsofaxō ato yoini iskafakī ato ayamayanā: “Afara fena shara ě mato yoinō. Nā mā ayai ěfe imi. Nāskakē mā ea shinātiro. Ēfe imi foyanā ē matoōnoax nai mā ěfe Epa Nios ari ipaxanō. Nā nō akai keskara chipo akāfe mē naano nā mā ichanāitīa ea shināki,” ixō ato Jesús yoini.

²⁶ Nāskakē nā mā ichanāitīa pāa piyanā ayayanā Jesús shināfafāikāfe: “Nōko Ifāfe noko nāxoni,” shināyanā. “Nā pāa Jesús āfe yora,” ixō shināfafāikāfe pāa piyanā. Jesús anā oaitīa nā chanīmara faifo askapakexanōfo. Ē anā oaitīa nāskaras akāfe.

Ichanāifo anoxō pāa pikī nō Jesús shinātiro

²⁷ Nāskakē nā mā ichanāi anoxō mā pāa piyanā ayayanā mā Jesús shinātiro. Askafafiakīkai mātō chaka xatekaspaxō māri mā chakafai pāa pixō. Akka nōko Ifāfe noko nāxoni āfe yora omiskōiyanā āfe imi foyanā noko nāxoni. Nāskakē nō ichanāi anoxō pāa piyanā ayayanā nōko Ifoōnoa shinākima nō nōko Ifo nō chakafai.

²⁸⁻³² Nāskakē nō ichanāyanā nō pāa piyanā nō ayatiro nōko Ifo shināyanā. Akka taefakī nō shinātiro iskafakī: “Ē afara chakafamis,” ixō nō shinātiro. Akka nō afara chakafafaxō Epa Nios nō yōkayotiro nōko chaka noko soaxonō. Nāskaxō Jesús noko nāxoni nō shinākoitiro pāa piyanā. Akka nō askafayamaito Epa Niospa noko omiskōimani. Akka nā ē mato yoiati keskara atiri mā askaima. Nāskakē mā iramanai. Ranāri mā isinī iki. Nāskatari ranāri mā mā nai. Nāskakē nā mā ichanāitīa pāa piyoxoma afara chakafaxō ikisi Epa Nios yoiyokāfe mato chaka soaxonō matori omiskōimayamanō. Akka noko omiskōimafiaki a Jesús Ifofaafoma Niospa ato omiskōimanai keskafakī noko omiskōimasharaima. Akka afokai āfe fakefoma. Nāskaxō omiskōipakenakafō mēra ato potaxii. Akka nōfi āfe fakekōifoki. Nōko Ifāfe noko omiskōimafiakī a omiskōipakenakafō mēra noko potatamaroko noko omiskōimakī noko tāpimani nō anā chakafanōma.

³³ Akka mā ichanāxō pāa pixikī ranārito mā taefakī piimis. Nāskakē fetsafāfe akairi pipaikani afaa pitirofoma. Akka piyoxoma ato manayokāfe fetsafo feta pixikakī. Nāskakē mā ato manayotiro keyokōichi pitirofo.

³⁴ Akka fatora fetsa mā fonāiki ichanāyoxoma mātō pexe anoxō mā piyotiro. Nāskaxō mā ichanāxō mā ichapa piyamaino fetsafāferi pitirofo. Nāskaxō mā ichanāxō Jesús shināki ato feta mā pisharaino Niospa mato omiskōimani. Afara ichapakōi ē mato yoiyai. Nāskaxō ē matoki nokoxō atoōnoa ē mato yoisharapai.

12

Jesús Ifofaafāfe Niospa Yōshi Sharaōxō afarafō atirofo fetsafo fe axō faatanāsharaxikaki

¹ Ēfe yora mīstichi, afara fetsa anā ē mato yoisharapai. Niospa Yōshi Sharaōxō afarafō nō atiroōnoa ē mato tāpimapai aōnoa mā tāpisharakōinō.

² Shinākapo. Mā Jesús Ifofaamanō afara fetsa onifakaxō, “Na nōko niosra,” ikaxō mato chanīmara famapaonifo. Mā chanīmara fafiaino a onifafotokai afaa shinātirofoma. Askaxorikai afaa pishta mato yoitiro. Nāskakē mā anorima shināyopaoni.

³ Askata yora fetsafāfe matoki nokoxō yoitirofo iskafakakī: “Ē mato Niospa meka yoinō. Niospa Yōshi Sharaōxō ē mato yoi,” ixō mato yoiatio, ¿afeskaxō mā tāpitromē Niospa Yōshi Sharaōxō mato yoiakī? Ē mato tāpimanō afeskaxō mā tāpitromākī. Fatora yora fetsa Jesús mekafakī chakafai, akai Niospa Yōshi Sharaōnoax mekaima. Akka, “Jesúsfi nōko Ifokī,” ixō yoi Niospa āfe Yōshi Sharaōxō yoitiro.

⁴ Nā nō Epa Nios Ifofa tii āfe Yōshi Sharapa noko amapaiyai keskara noko amai. Ares fisti noko shināmatiro aōxō nā Nios Ifofafo fetsafo nō ato asharaxonō.

⁵ Aōxō fetsa fetsafakī afo akī nōko Ifo nō axotiro. Nā keyokōi Nios chanīmara faifo tii nōko Ifo fisti.

⁶ Nāskakē Niospa nā nō Ifofa tii noko shināmami aōxō nō fetsafo afara axosharanō. Askatari Niospa keyokōi noko tāpimani a noko axopaiyai keskara noko axōi. Nā nōko Nios fisti anā ano fetsama.

⁷ Askatari nō Nios Ifofaito noko tāpimani āfe Yōshi Shara nofe iki. Nofe ixō noko amatiro nā Nios Ifofaifo nō ato axosharanō.

⁸ Fetsafāfe Niospa Yōshi Sharaōxō mēstesharakōi noko yoitiro. Askatari fetsafāfe Niospa Yōshi Sharaōxō tāpisharakōikī noko tāpimasharatiro.

⁹ Askatari fetsafori Niospa Yōshi Shara fistiōxō Nios chanīmara fakanax finakōia ikafo. Askatari fetsafāferi Niospa Yōshi Sharaōxō yorafo sharafakani.

¹⁰ Askatari fetsafāferi Niospa Yōshi Shara fistiōxō tsōa atiroma keskara faino, fetsafāferi Niospa Yōshi Sharaōxō nā Niospa yoiai keskara noko yoiaifono, fetsafāferi Niospa Yōshi Sharaōxō tāpitiro fētsa niafaka chakaōxō yoimākai askayamai Niospa Yōshi Sharaōxō yoimākai. Askatari fetsafāferi Niospa Yōshi Sharaōxō meka fetsa nikayomisma yoitiro. Askatari fetsafāfe meka fetsafāfe noko yoiaito nikafikī nō tāpiyamaito fetsafāferi Niospa Yōshi Sharaōxō noko yoisharatiro tāpinōfo.

¹¹ Nā nō Nios Ifofatifi Niospa Yōshi Shara fistichi noko amapaiyai keskara nō atiro. Nā noko amapaiyai keskara noko amatiro.

Nōfi yora fisti keskaraki

¹² Nōko yora fistifiano nō pōyayai fetsea. Askata nō feroyata, pachoyata nā nō fisti askai fetsea. Nāskarifiāi nō keyokōichi Cristo Ifofaano nā fisti keskarakōi.

¹³ Cristo fistifiano nōfi āfe pōya keskarakī. Atiri nō judeofo ikaino mani fetsafori judeofoma ikaino yorafāfe āto yonomatifo ikaino askatari yorafāfe āto yonomatifoma ikaino nō askai fetsea. Nā nō Cristo chanīmara faafo tii nō afe yora ika. Niospa Yōshi Sharapa noko ōiti fetsafaax nō mēra iki.

¹⁴ Nōko yora fistifiano nō pōyayai fetsea.

¹⁵ Nāskakē nōko tāekai yoikī iskafatiroma: “Ēkai mēkema. Nāskakē ēkai āfe afaama,” ixō yoifi nā nōko tāeri nōko yoraō nea.

¹⁶ Nāskatari nōko pachori yoikī iskafatiroma: “Ēkai feroma. Nāskakē ēkai āfe afaama,” ixō yoifi nā nōko pachori nōko yoraō nea.

¹⁷ Akka nōko yora nōko fero fistikē afeskaxō nō nikakeranama. Nāskatari nōko yora nōko pacho fistikē afeskaxori nō zetekeranama.

¹⁸ Akka Niospakai askara noko onifanima. Nā apaiyai keskara fakī noko onifani. Mapoya fāta feroya fāta pōyaya fāta pachoya fata kishiya fāta noko fani.

¹⁹ Akka nōko yora afara fistiya ikanokai shara ikeranama.

²⁰ Akka nōko yora fistifiano nō pōyayai fetsea.

²¹ Nāskakē nōko fērokai mēke yoikī iskafatiroma: “Ē mia yopaima,” ixō yoitiro. Māporikai tae yoikī iskafatiroma: “Ēkai mia yopaima,” ixokai yoitiro. Nāskafakīri a Nios Ifofaa fetsafo iskafakī yoiyamakāfe: “Ē mia yopaima,” ixō yoiyamakāfe. Niospa nā Ifofaafō tii noko noikōia. Nāskakēri nōa ranā noinākāfe.

²² Nōko yora āfe afara fetsafo mitsisipayamafekē nāfori nō yopakōi.

²³ Nōko yora āfe afara fetsafo, sharamara, nō fafiakī nāfori nō kexesharai. Nōko afara fetsafori nō onesharatiro nō rāfixikīma.

²⁴ Akka nōko yora āfe afara fetsa sharano nō onetiroma. Niospa noko yora onifaxoni nō kexesharanō. Nāskaxō nō yoitiro iskafakī: “Ēfe afara ē yopakōi,” ixō nō yoitiro. Nāskafakiri fētsa a Nios Ifofaa fetsa yoikī iskafatiroma: “Nakai afaama,” ixō yoifiaino Nios aō noikōi. Nāskakē noko onifani nā Ifofaafō tii keyokōi nō yopakōi.

²⁵ Niospa noko onifani nā Ifofaafō tii keyokōi nō kexenōnāsharatiro isharaxikī nāfori fisti shināxikī.

²⁶ Akka nō fanīra moxaki chachixō nō pae meetiro keyokōi nōko yora pāei fetsetiro. Nāskarifikī Jesūs Ifofaa fetsa omiskōiaito keyokōi nōri shināmitsatiro. Nāskafakī yorafāfe Jesūs Ifofaa fetsa sharafakē keyokōi nō afe inimakōitiro.

²⁷ Akka nō Cristo yora keskarakōi. Nāskax nō āfe pōya keskarafō. Nō ichapafāx nō yora fisti keskarakōi.

²⁸ Nāskaxō keyokōi nā nō Jesūs Ifofaa tii Epa Niospa noko katoni aōxō afara fetsa nō anō. Akka fetsafori taefakī ato katoni Jesucristoōnoa ato yoiofōfāsafanōfo. Askatari fetsafori katoni āfe meka yoimis inōfo Niospa ato shināmanaino. Askatari ato katoni ato tāpimamisfo inōfo. Askatari aōxō tsōa atiroma keskara amisfo ato katoni. Askatari Niospa Yōshi Sharaōxō a isinī ikaifo ato sharafamisfo ato katoni. Askatari fetsafo ato axomisfo ato katoni. Askatari fetsafo shara yonomamisfo ato katoni. Askatari fetsafāfe āfe Yōshi

Sharaōxō meka fetsapa yoiyomisma ato katoni ato yoinō āfe mekapa. Noko keyokōi katoni aōxō yorafo nō axosharanō.

²⁹ Niospa keyokōi noko katoni a apaiyai keskara nō anō. Akka noko askafafianino keyokōichi Jesucristoōnoa nō ato yoifofāsafamisma. Askaxori keyokōi noko katonima āfe meka yoimisfo nō inō. Askaxori keyokōi noko katonima aōxō ato tāpimamisfo nō inō. Askaxori keyokōi noko katonima tsōa atiroma keskara aōxō afama mīshti nō fanō.

³⁰ Keyokōi noko katonima Jesūsōxō isinī ikaifo ato sharafamisfo nō inō. Keyokōi noko katonima nā meka fetsapato āfe Yōshi Sharaōxō nō ato yoinō. Keyokōi noko katonima nā meka fetsa nikaxō nā yoia keskara nō ato tāpimanō.

³¹ Nāskakē Niospa mato imapaiyai keskara ixō nā Jesús Ifofaafa mā ato shara faxotaifai. Niospa Yōshi Sharapa mato amapaiyai keskara nāfo fichipaikāfe. Akka nāfo sharafiano ē mato afara fetsa sharafinakōia iskaratīa ē mato yoinō. Ea nikasharakapo. Shara finakōia Niospa noko imapaiyai keskara ē mato tāpimanō, a noko Niospa noiai keskari fakī nōri fetsafo noisharakōinō.

13

Nō fetsafo nōisharakōitiro

¹ Ēfe mekapa ē yoifitiroxakī, yora fetsafāfe mekapari ē yoifitiroxakī, Niospa āfe ājirifāfe mekapari ē yoifitiroxakī ē Niosxō yorafo noiyamax ēkai afaa itiro. Nāskax ē mekai achakōi itiro, fetsafo fekaxtefai keskara ē itiro. Nāskafakī ēa ē fetsafo axomis keskara ē itiro.

² Niospa meka ē ato yoifikī ē ato noiyamax ēkai afaa itiro. Askatari fetsafāfe Niospa meka tāpiyamaino akka ē tāpikōifixō ē ato noiyamax ēkai afaa itiro. Askatari ē Nios chanīmara fakī finakōixō ē Niosxō ē nā machi xekafitiroxaki ē yorafo noiyamax ēkai afaa itiro. Ē ato noiyamaino Niospa ea shara ōima.

³ Nāskatari ē afama mīshti nā afaamaisfo keyokōi ē ato ināfixō ē ato noiyamax ēkai afaa itiro. Askatari Niospa meka shara ē ato yoiaito ea nikakaspakakī ea koaifono ē atoōnoax nafiakī ē ato noiyamax ēkai afaa itiro. Ē ato noiyamaino Niospa ea shara ōima.

⁴ Nō yorafo noikōiaino noko fekaxtefaifono nō atoki ōitifishkitiro, nō tenetiro. Nāskaxori nō ato noikōikī nō ato axosharatiro. Askaxori nō ato noikī nō xītipaitiro. Askatari kakapaimis nō itiro. Nō yorafo noikōikī nō iskatiro: “Ē tāpikōiaki. Ē fetsafo keskarama,” ixō nō yoitiro.

⁵ Nāskaxori nō ato noikōikī nō ato rāfinīfaima. Askaxori nōa apaiyai keskara fistis nō shinātiro. Akka nō fetsafori nō ato axosharatiro. Askaxori nō ato fena feratemisma nō itiro. Nāskaxori noko fetsa chakafakī mekafaino nō shinātaifatiroma. Afo shinātaamaroko nō aō noisharatiro.

⁶ Askaxori nō ato noixō fetsafāfe afara chakafaito ōi nō inimatiroma. Akka afara chanīmakōi shara nikai nō inimakōitiro.

⁷ Askaxori afara afe keskararafiaino nō Nios noikī nō shināchakatiroma. Nō tenetiro. Askatari ato noikōikī atoōnoa afara chaka yoiaifono nikakī nō chanīmara fatiro. Akka fetsafoōnoa chaka nikafixō nō tāpixoma, “Afaa chakafayamapainōfora,” ixō nō shinātiro ato noikī. Askatari a mēxotaima chakafaifoōnoa atoōnoa nō yoitiro. Askafakī: “Nāfāfe mēxotaima afara chakafaifono Niospa ato chaka soaxotiro,” ixō nō yoitiro. Askataramaroko nō iskatiro: “Nios Ifofakakī āto chaka xatetirofo,” ixō nō shinātiro ato noikī. Nāskaxori afara afe keskararafiaino nō Nios noikī nō kachikiri fatiro.

⁸ Nā Jesús Ifofaafāfe Epa Nios yafi yorafo ato noipakenakafa. Askafiaino nōko mai keyoaino Niospa meka yoimisfāfe anā ato yoixikanima. Askaxori a yōra mekapama meka fetsapa yoimisfāfe anā meka fetsapa yoixikanima. Askaxori nā tāpimamisfāferi anā noko tāpimaxikanima. Mā nōko Ifo nokoaino nō anā ato yopaxiima noko axonōfo.

⁹ Nāskakē iskaratīa Niospa noko tāpimanai keskara nō tāpisharayoma. A Niospa meka noko yoimisfāfe keyokōi tāpisharafoma.

¹⁰ Mā Jesucristo nokoaino nō a keskara shara ixii. Aatofi keyokōi tāpiakī. A tāpia keskara nokori tāpimaxii.

¹¹ Akka ē yomeax ēfe meka fāke meka keskara ē iyopaoni. Fakefāfe metiro keskarari ē meyopaoni. Fakefāfe shinātiro keskarari ē shināyopaoni. Iskaratīa mē yosixō fakefāfe shināi keskara ē anā shināima. Fakefāfe ichapa tāpiama. Akka ē iskaratīa mē yosiax fakefo keskara anā ē ikima. Iskaratīa ē feronāfakēkōi ē anā fakefo keskarama.

¹² Feisitū fetakōikē nōko femānā nō ōisharatiro. Nāskarari Jesús nō ōitiro afe keskara ikamākī. Akka nā oaitū nō ōixii afe keskaramākī. Akka iskaratīa nō tāpisharayoma. Akka Jesús oaino nō tāpisharakōixii. Jesús noko tāpikōia keskarari nōri tāpikōixii.

¹³ Iskaratīa nō Nios chanīmara fai. Nō Nios chanīmara faxō nō manai nā oaitīa afe ipaxakī. Nō Nios chanīmara fai nā shara. Askatari afe ipaxakī nō manaino nāri shara. Askatari nō fetsafo noikōia nāfi sharafinakōiaki.

14

Niospa Yōshi Sharapa noko amapaiyai keskara anā Pablo yoini

¹ Nā Niospa noko noiai keskafakī fetsafori noitaifakāfe. Nāskara sharakōi. Nāskara fichipaikāfe askaxikakī. Askatari Niospa Yōshi Sharapa afara fetsa mato amapaiyai keskara nō fetsafo fe axoshara faantanānō, afori fichipaikāfe. Niospa Yōshi Sharaōxō nā Niospa meka mā ato yoinō fichipaikōikāfe.

² Askatari fētsa Niospa Yōshi Sharaōxō meka fetsapato yoikī yorafo yoitama Niosroko yoitiro. Niospa Yōshi Sharaōxō yoifiaitokai tsōa tāpitiroma.

³ Askatari fētsari Niospa meka shara noko yoikī noko tāpimasharatiro nō Jesús Ifofasharanō. Askata nōko ōiti noko fepeaxosharatiro nōko ōiti mēra nō inimanō afara afeskarafiaino.

⁴ Askatari fētsa Niospa Yōshi Sharaōxō meka fetsapato yoikī āa metiro āfe ōiti fepeaka keskara. Askatari fētsa nōko mekapa Niospa meka shara noko yoisharaito nō keyokōichi nikatiro. Nāskakē Niospa noko yoiai keskara nikasharax nōko ōiti fepeaka keskara shara nō itiro.

⁵ Mā keyokōichi nā meka fetsapato Niospa Yōshi Sharaōxō mā yoipainō. Nāskara sharafiano akka fētsa mato mekapa mato tāpimasharai nāfi sharafinakōiaki. Akka fētsari meka fetsapato mato yoiaito mā nikatiroma tsōa mato yoiyamaino. Akka nā mato yoiai keskara fētsari mato tāpimatiro mā tāpinō. Nikai mato ōiti fepeaka keskara shara itiro.

⁶ Efe yora mīshtichi, meka fetsapato ē mato yoiaito mā nikayamax nā mekakai mātonā afama. Nāskakē nā ē mato yoiai keskara Niosxō mato mekakōichi ē mato tāpimatiro Niospa mato yoipaiyai keskara mā tāpinō.

⁷ Shinākāpo, meka fetsa ē mato yoinō. Xāiti anorima maneaito nō nikasharatiroma fatomākī xafakīa maneaifo.

⁸ Askatari soraro fētsa nā kexemisto āfe pōōiti pōōatiro āfe sorarofō itipinīsharanōfo ato reteifoxikakī. Askafafiakī pōōasharamano tsōa tāpitiroma. Nāskakē tsoa itipinīsharatiroma ato reteifoxikakī.

⁹ Askatari meka fetsapa mā fetsafo yoiaino afeska faxōkai mā yoiai keskara tsōa tāpitirofoma. Mā askara mekapa mekai māakōi mā mekai tsōa mato nikayamafiaino.

¹⁰ Akka nā maitio ikafo meka fetsapa mekakanī. Akka nō ato nikatiroma. Āto kaifāfe meka fisti nikatirofo. Nāskax keyokōi meka shara.

¹¹ Akka ēfe mekapa ē ato yoiaito yora fetsafāfe tāpitirofoma. Ēkairoko āto kaifāfe mekapa yoiaito ea nikafo. Akka ē āto meka tāpimamx ē āto kaifo keskara itiro.

¹² Nāskakē Niospa Yōshi Sharapa mato afara fetsa amapaiyai keskara nāfo mā fichipaikōitiro. Mato askafaino aōxō nā Jesús Ifofafo mā ato ōiti fepeaxosharakōitiro Jesús Ifofasharanōfo. Nāskara fichipaikāfe Nios yonosharaxoxikakī.

¹³ Nāskakē Niospa Yōshi Sharaōxō meka fetsapato yoikī Epa Nios kīfikāfe nā mā yoiai keskara mato tāpimanō. Mā tāpisharaxō atori mā ato tāpimatiro akairi nikakōisharanōfo.

¹⁴ Nāskakē Niospa Yōshi Sharaōxō meka fetsapato nō Nios kīfikī nōko shināmā shināxō nō kīfima.

¹⁵ Akka Niospa Yōshi Sharaōxō meka fetsapato ē Nios kīfitiro. Askatari yorafāfe mekakōichiri ē Nios kīfitiro keyokōichi nikanōfo. Askatari meka fetsapa fanāitiro. Askatari yorafāfe mekapari ē fanāitiro keyokōichi nikanōfo.

¹⁶ Mā Niospa Yōshi Sharaōxō meka fetsapa Epa Niosnoa mā yoifiaito afeskakokai a mato fe ichanāfāfe yoitirofoma iskafakakī: “Chanīmakōi mā yoi,” mato fatirofoma tsōakairoko māto meka tāpixō.

¹⁷ Mā meka fetsapato Nios aicho fafiakī fetsafo mā ato ōiti fepeaxosharatiroma mato nikafiaifono māmāi meka fetsapato yoikī.

¹⁸ Efe yora mīshtichi, Niospa Yōshi Sharaōxō yōra mekapama meka fetsapa mato finōinifofāta ē yoimiskī. Nāskakē ē Epa Nios aicho fai.

¹⁹ Askafia a Jesús Ifofafoya fetsafori ē āto yoipai ea nikanōfo. Ichanāti pexe anoxō ato ichanāfaxō āto mekakōichi ē ato yoipai meka ichapama ē yoifiaito. Nāskarafi sharakī. Akka yōra mekapama meka fetsapa ē ato yoiaito ea nikatirofoma meka ichapa ē ato yoifiaito. Nāskakē mekakōichi ē ato yoipai ea nikanōfo.

²⁰ Efe yora mīshtichi, ē mato tāpimapaiyai keskara tāpisharakāfe. Fake yomē tāpisharayoxoma, shināsharatiroma. Nāskarifikī fake yomē shināi keskara shināyamakāfe. Mēstekōi shinākāfe.

Akka yora xinifāfe chaka shinātirofo. Akka fake yomefāfekai chaka shinātiroma. Nāskakē fake yome keskara ikāfe. Afara chaka tāpipaiyamakāfe.

²¹ Isaías Niospa meka yoikī keneni iskafakī:

Nā israelifo ē ato yoifiaito ea nikakaspamisfo. Nāskakē ē ato kaxpakōi yoimis. Nāskaifāfe ōikī āto kaifoma ē atoki nīchikē, āto mekapa ato yoiaifāfe ato nikakanima meka fētsapamāi yoiafono. Ato yoifiaifonokai ato nikakanima, ixō Isaías kirika keneni Niospa meka yoikī.

²² Nāskakē yōra mekapama nō meka fetsapa ato yoiaito a Nios Ifofaafāfema noko nikatirofoma. Nāskakē Niospa ato ōimani afāfekai Niospa meka tāpitirofoma Nios chanīmara fayamamaxō. Akka Nios Ifofaafāfe Niospa meka tāpitirofo. Askata ichanāxō āto mekakōichi nō ato Niospa meka yoiaino Niospa Yōshi Sharaōxō nikasharatirofo. Akka nā chanīmara faafāfema nikasharakanima āto mekakōichi nō ato yoifiaino.

²³ Nāskakē ichanāx yōra mekapama meka fetsapa mā mekaino a Nios chanīmara faafoma fe a mato fe yoramafori mato fe ichanāxō mato nikakakī shinātirofo iskafakakī: “Ōikapo, nā yorafo nā afara shināifoma keskarafo,” ikanax yoinātirofo.

²⁴⁻²⁵ Nāskaka mā ichanāxō Niospa meka mā yoisharaito a Nios chanīmara faafoma fe a nofe yoramafori mato nikakaxō āto ōiti mēraxō shinātirofo iskakakī: “Ooa, nōri Niospa yoiai keskara nō amisa. Niospa keyokōi tāpikōia. Nōko shinā mēraxō nō afara pishta fomāpimisfo Niospa tāpikōia. Chipō noko kāimaxoxii,” ixō shinātirofo. Nāskaxō shinātirofo Niospa meka mēstesharakōikī. Anori shinākakī ratokonō mai chachixō Epa Nios kīfitirofo iskafakakī: “Epa Niospa, mī sharafinakōia. Na mia chanīmara faafo fe mī ika keskai nōri mefe ipai,” ixō kīfitirofo.

Pablo ato yoini nō ichanāx nō afeskatiromāki

²⁶ Efe yora mīstichi, ē mato yoipai iskafakī ē mato tāpimapai. Mā ichanāino fētsa mato fanāixotiro. Fētsari mato Niospa meka yoitiro. Fētsari Niospa Yōshi Sharaōxō meka fetsapa mato yoitiro. Fētsari Niospa Yōshi Sharaōxō a meka fetsapato mato yoiaifo mato tāpimatirofo. Nāskakē nā ē yoiai keskara asharakāfe. Nāskax mā ranā mā ōiti fepeasharaitiro.

²⁷ Mā ichanāino yora ichapama a yōra mekapama meka fetsapa mekapai mekatirofo. Nāskakē fetsa mekai taetiro. Askatari fetsari chipō mekatiro. Akka meka fetsapato mato yoiaito fētsari mato mekapa xafakia mato tāpimatiro a mato yoiai keskara mā nikasharanō.

²⁸ Akka yōra mekapama meka fetsapato mā yoipaiyoito tsōa nikatiroma. Akka a ato tāpimatirofo ano ikafomano meka fetsapa mā ato yoitiro. Akka mato pexe anoax mares fisti mā mekatiro yōra mekapama Epa Nios fe.

²⁹ Mā ichanāino nā Niospa meka yoimis rafeta Niospa meka mato yoitirofo. A yoiai keskara nikakaxō nā Jesūs Ifofaifāfe shinātiro iskafakakī: “Niospa Yōshi Sharaōxō noko yoi,” askayamai, “Āa shināxō noko yoira,” ixō shinātirofo.

³⁰ Askaxō fētsa Niospa meka mato yoioaino fetsari tsaono Niospa Yōshi Sharapa shināmanaino mato yoipakī yoitiro. Akka a taefakī yoiato tsaoxō nikatiro.

³¹ Nāskakē Niospa Yōshi Sharapa mato shināmanai keskara fētsa yoikī taefatiro fētsari chipō yoitiro. Askatari fētsari yoitiro. Nāskaifono nā ichanāfāfe keyokōichi ato nikatirofo. Nāskaxō ato ōiti fepeaxosharakani.

³² Nā Niospa meka ato yoiaito āfe shinā mēraxō shinātiro iskafakī: “Fētsari ato yoipai kiki ikax xatetiro.”

³³ Askaxō ichanāxō rafekaita ato yoiaifono tsōa ato nikasharatiroma. Nāskakē āto ōiti fekaxetatirofo. Askarakai Niospa fichipaima. Akka Niospa fichipai nā ichanāfo anoxō rafekaita ato yoiamaino fistichi ato yoinō nikasharakōinōfo.

³⁴ Askatari afara fetsari ē mato yoisharapai. Nios Ifofafo ichanāifo anoax xotofakefo mekatirofoma. Niospa meka yoimisto yoiaino xotofakefāfe nikakōitirofo. Mekatamaroko nā Niospa meka yoiai keskara nikasharaxikakī. Nānori taeyoi Niospa meka yoikakī kirikakī kenenifo.

³⁵ Nā ichanāxō nikafo keskara xotofakefāfe tāpisharaxoma āto fene yōkapaikakī manayotirofo. Akka āto pexe ano nokokaxō āto fenefo yōkatirofo āto fenefāfe ato tāpimanō. Nāskakē mā ichanāino xotofakefo mekaifokai sharama.

³⁶ Akka Epa Niospa yoipaiyai keskara mato fisti taefakī tāpimanima. Niospa meka yoimisfo matoki fisti fenifoma Niospa meka yoifekani. Fetsafori yoifekani fenifo.

³⁷ Akka fatora fētsa mā yoikī iskafatiro: “Nō Niospa meka ato yoimis. Askatari nō Niospa Yōshi Sharaōxō nā Nios Ifofafo nō afara fetsa ato axosharatiro,” ixō mā yoikī mā tāpitiro nā ē mato kenexonai keskara nōko Ifāfe mato yoia mā anō.

³⁸ Fētsa anorima mato yoiaito nikayamakāfe.

³⁹ Nāskakē efe yora mīshitchi, nā mā ichanāi anoxō Niospa meka ato yoipaikāfe. Nā sharakōikī. Akka fētsa yōra mekapama meka fetsapa Niospa Yōshi Sharaōxō mato yoipaiyaito xatemayamakāfe.

⁴⁰ Akka mā ichanāino fētsa taefakī yoitiro. Askatari fētsari chipo yoitiro nā yoiaifo keskara mā nikasharakōinō. Mā askaino māto ōiti fekaxteima.

15

Cristo nafiāx anā otoni

¹⁻² Efe yora mīshitchi, iskaratīa meka shara Jesúsnoa ē mato yoimis keskara ē anā mato shināmapai. Ē mato Jesúsnoa yoiaino mā chanīmara fani. Mā chanīmara faito Jesús mato chaka soaxoni mā afe ipaxanō. Akka ē mato yoimi keskara māakai kachikiri famisma. Akka mā kachikiri faino ēa kaxpa mato yoikerani.

³⁻⁷ Yorafāfe ea meka sharafinakōia yoiyonifo. Nāskakē ēri mato yoimi iskakā: Cristo noko nāxoni nōko chaka noko soaxoxiki. Akka Cristo tres nia maiyoni. Askata anā otoni. Mā otoax Pedroki nokoi taeni. Nāskatari chipo a aōxō tāpimisfokiri nokoni. Askatari nā chanīmara faafoki yorafā rasifokiri nokoni. Akka fisti rasi nāpaifono, akka ranāri nanifoma. Nāskatari chipo Santiagoki nōko lfo nokoni. Askatari a aōnoa āfe meka yoimisfoki nokoni.

⁸ Akka chipokōi ekeki Jesús nokoni. Ēkai aōnoa afaa tāpiyopaonima. Akka fetsafāfe mēxotaima nikayopaonifo. Nāskakē chanīmara fakī taefanifo. Akka ē afe niyopaonima taeyoi a fetsafo ikai keskai. Ē askafiaino ea Jesús katoni chipo. Ekeki nokoxō ea yoiaito ē koshi Ifofani.

⁹ Akka ē chakafayopaoni keskara Jesús Ifofaa fetsafāfe chakafamisfoma. Akka ē afara chakafakī finayopaoni. A Jesús Ifofafo ē ato omiskōimayopaoni. A afe yorafo ē chakafayopaonifikē Jesús ea noikī ea nīchini aōnoa ē ato yoinō.

¹⁰ Niospa ea noixō ea katoni a apaiyai keskara ē anō. Nāskakē nā ea amapaiyai keskara mē amis. Akka ea kaxpakōi katonima. Nā aōxō yonoxomisfo keskafakī ē yonoxokī finakōimis. Akka ēakōi ē yonoxomisma. Ea noikī Niospa ea katoni ē Jesús yonoxomisino.

¹¹ Akka ē Jesúsnoa yoimis iyamai fetsafāfe mato Jesúsnoa yoimis itirofo nānori fisti nō mato yoimis. Nāskakē nā Jesúsnoa fisti nō mato yoimis keskara nikakī mā mā Jesús chanīmara faa.

Namisfo otoxikani

¹² Nō mato yoimis iskakā: “Cristo noko naxōfinixakī mā anā otoni,” ixō nō mato yoimis. Akka, ¿afeskakī atirito mā yoikī iskafamismē? “Yora naax anā ototiroma,” ixō mā anorima yoimis.

¹³ Akka yora naax ototirokēma Cristori otokeranima. Akka nō tāpia yora naax ototirokē nāskakē Cristo otoni.

¹⁴ Akka Cristo otoyamanikē kaxpa aōnoa nō mato yoikerana. Nāskakē kaxpakōi mā chanīmara fakerana. Akka chanīma Cristo naax otoni.

¹⁵ Akka Cristo otoyamanikē nō mato pārakerana. Akka nō mato yoimis iskakā: “Epa Niospa Fake Jesús ofofani,” ixō nō mato yoimis. Yora naax ototirokēma Epa Niospa Cristo ofakeranima.

¹⁶ A naafo otoyamaino Cristori otokeranima.

¹⁷ Cristo otoyamanikē kaxpakōi mā chanīmara fakerana. Māto chaka mato soaxokeranama.

¹⁸ Akka Cristo otoyamanikēkai nōri naax nō otokeranama. Askax nō afe nīpakeranama.

¹⁹ Nono mai anoxō niyoxō nō shinākī iskafakerana: “Ē naax Cristo otoni keskai ēri otoxii ea Niospa ofafaano,” ixō nō shināfiāx Cristo otoyamanikē nāskakē kaxpa nō chanīmara fakerana. Akka Cristo otoyamanikē chanīmayamakē, “Afaa tāpiafoma,” noko fakeranafo nokoōnoa shināchakakōikeranafo.

²⁰ Akka chanīmakōi, Cristo otoi taeni. Anā naxiima. Nāskakē Cristo otonino nā chanīmara faafo nakanax otoxikani afe ipaxakakī.

²¹⁻²² Akka Adán Niospa onifakī taefani. Adán taefakī afara chakafani. Nāskakē afara chakafaax nani. Akka nā feronāfakeōnoax keyokōi nāpamisfo. Nāskarifiāi nā feronāfake Cristoōnoax nā chanīmara faafo ototirofo afe nīpaxikakī.

²³ Cristo otoi taeni nīpaxakī. Nā anā oaitīa keyokōi afe yorafo ofofaxii afe nīpaxanōfo.

²⁴ Nāskatari nono mai anoafo keyoxikani. Nāskatari Cristo keyokōi xanīfofo potaxii anā xanīfo inōfoma. Askatari niafakafāfe āto xanīfofori potaxii. A niafakafāfe āto xanīfo finakōiari potaxii. Cristo ato potano anā ato yonomapakenakafoma. Nāskaxō Cristo Apa Nios yoikī iskafaxii: “Mā yorafo keyokōi āto xanīfo mī itiro. Ē anā āto xanīfo ikima,” ixō Apa yoixii.

²⁵ Akka iskaratīa Cristo nōko xanīfo iyoa. Nā xanīfo fetsafo a Cristo nikakaspaifo Niospa anā ato afaa imaxiima. Cristo nāmāri ato nīchixii. Nāskatari Epa Nios xanīfokōi ipanaka.

²⁶ Akka Niospa Satanás omiskõipakenakafo mēra potaxii. Akka nā Satanás Adán afara chakafamanino keyokõichi nõ afara chakafaax nõ napanaka. Nāskakē Niospa Satanás omiskõipakenakafo mēra potano anā tsoa nanakama.

²⁷ Nāskaxõ Niospa āfe Fake Cristo nāmāri keyokõi ato nima. Akka mā nõ tāpia Apa Nios fisti āfe Fake nāmā ikama nāatomāi nāmā keyokõi ato nimax.

²⁸ Keyokõi Niospa Fake nāmā ikafano Apaõxõ ato yonomatiro. Nāskaxõ āfe Fāke Apa yoixii iskafakī: “Epa mīri eke yonomatiro,” ixõ yoixii. Nā Apa yoiai keskara nikasharakõi. Nāskakē Apa Nios fisticchi keyokõi yonomaxii āto xanīfo finakõimāiaxõ.

²⁹ Akka yora maotisamisma naano fētsa maotisaxotiro. Nāskara mā feyafamisfo. Akka yora naax otoyamanikēkai tsõa ato maotisanoxokeranama. Tsoa otoyamanikē nõri ototiroma. Akka, ¿afeskai nõ maotisaxonimē nõ otoyamafi? Akka nõ tāpia mā nõ naax nõ anā ototaxi.

³⁰ Akka tsoa otoyamanikēkai ēri otokeranama. Nāskakē, ¿afeskai mēxotaima Cristoõnoax mesekõi mēra ē kafāsaimē ē otoyamafi? Akka ē tāpia a ē ototaxi. Nāskakē mēxotaima ē Cristoõnoax mesekõi mēra kafāsai Cristoõnoa ato yoifofāsafai.

³¹ Nāskakēri ē fetsafo matoõnoa yoisharamis māmāi eõxõ nõko Ifo Jesucristo mā Ifosharafaino. Efe yora mīsticchi, chanīma ē mato yoi mēxotaima Cristoõxõ ea retepaikani.

³² Poomānā noko pipaiyai keskara nā Efeso anoafāfe ea retepainifo, a Cristo nikakaspaifāfe. Akka Cristoõnoax ē naax ē otoyamax kaxpa ē aõnoax nakerana. Askatari ē ato Cristo Ifofamano nakanax tsoa otoyamaino kaxpa ē ato Cristo Ifofamakerana. Nõ naax anā otoyamafixiakī nā nõ apaiyai keskara nõ anõkāfe. Nāskakē fetsafāfe yoikakī iskafakani: “Nõ nayoxoma nõ piyanā nõ ayayoi inimayanā. Nõ Nios shinātama nā nõ apaiyai keskara nõ ayoi,” ixõ shinākani anorima. Akka nõ naax nõ anā ototaxii. Nāskakī nõ nayoxoma Niospa noko amapaiyai keskara nõ anõkāfe.

³³ Niosnoa yora chakafāfe mato pāramisfo. ato fe rafeyamakāfe. Yora chakafo fe mā rafeaito matori afara chakafamatirofoki.

³⁴ A mā anorima shināmis anā shināyamakāfe. Chakafakī xatekāfe. Atiritokai mā Nios tāpisharama. Nāskax mā rāfiipaitiro.

Nõ naax anā nõ ototaxii nõko yora fetsa keskara ixii

³⁵ Akka yoikī iskafakani: “¿Afeskaxõ Niospa naafo ototaxiimē? ¿Anā nõ ototaxi afe keskara yoraya noko imaimē?” ixõ yoikani. Anori yoikakī afaa shinākanima. Akka shara shināsharakakī tāpitirofo.

³⁶ Nõ ifi exe fanano āfe xaka payokometiro. Akka āfe exe oke mēranoa pishta payokometiroma chipo foaitiro. Maiax āfe exe xaka naamax āfe exe pishta foaitiroma.

³⁷ Akka nõ afara fanakī nõ āfe kayafoya fanatiroma. Āfe exe fisti nõ fanatiro. Mā āfe xaka payokomeaino āfe exe foaitiro. Nāskax mā foaikax anā āfe exe keskara itiroma. Fetsa keskara itiro.

³⁸ Nā ifi exe nõ fanano Niospa foaimasharatiro. Nā apaiyai keskafakī fanafõ fetsa fetsatapafõ fai.

³⁹ Akka nõko yorari yoināto yora keskarama. Nõko yora fetsa keskara. Yoinānā fetsa keskarafo peyafonāri fetsa keskarafo. Foenāri fetsa keskarafo. Akka nā yora fisti keskara Niospa noko onifanima, fetsa fetsatapafõ Niospa noko onifani.

⁴⁰ Akka nõko mai anoafāfe āto yorafo fetsa keskarafo. Askatari Epa Nios ari anoafõri nai mēranoafāfe āto yorafo fetsa keskarafo. Keyokõi sharafiax askarafoma.

⁴¹ Akka xini ikaino oxe ikaino fishifo ikaino nā yora fisti keskarama fetsa keskarafo. Nāfo sharafiax askarafoma.

⁴² Nāskarifiyai yora naino āfe yora payokometiro. Anā nõ ototaxi nõko yora payokomeinakama. Nāskara shara nõ ipanaka anākai nõ nanakama.

⁴³ Nõko yora maia anoax chakakõi ixii. Akka nõ ototaxi sharakõi nõ ipanaka. Nõ nono mai ano niyoax nõ iramanapakeax nõ natiro. Nõ anā ototaxi nõ anā nanakama, mitsisipa shara nõ ipanaka.

⁴⁴ Nõ naano noko maifafono nõko yora payokomei. Akka nõ ototaxi Niospa noko nimaxii afe ipaxanõfo. Akka nõ mai ano niyoax nõ natiro. Akka mā nõ naax anā nõ ototaxi nõko yora fetsa keskara ixii. Nõ anā nanakama.

⁴⁵ Niospa meka yõra kenekī iskafani: “Feronāfake Adán Niospa onifakī taefani. Onifaxõ xāka ikai fani,” ixõ yõra kirikaki keneni. Akka Cristori Adán keskara feronāfake. Feronāfakeõixõ noko nimapakenaka. Nõ naax anā ototaxi nõ anā natiroma.

⁴⁶ Niospa feronāfake Adán onifakī taefani. Chipõ Cristori kāini noko nimapakexakī.

⁴⁷ Niospa nā feronāfake Adán onifakī taefani. Mai yorafaxõ onifani. Akka Cristo nai mēranoax nokoki fotonī. Tsõakai Cristo onifanima.

⁴⁸ Akka nono mai anoax nõ kãiax nõko yora Adán yora keskara. Nõ Jesús Ifofaax nõ keskara nõ ixii.

⁴⁹ Nõ nono mai anoax fake kãini. Nãskax nõ Adán keskarakõi. Askatari nõ Niospa yora ikax nõ Jesucristo keskarakõi ixii.

⁵⁰ Efe yora mĩstichi, ẽ mato yoinõ nõ afeskax iximãkai. Nõ iskaratĩa namiya. Askatari nõ imiya. Nãskara yorayax Nios fe nõ ipanakama. Akka nõko yora natiro nõ anã otoxixakĩ. Nõ anã otoax nõko yora fetsa keskara ixii. Nãskakẽ nõ anã nanakama.

⁵¹ Tsõakai nikayomisma na meka shara ẽ mato yoi. Tãpipaĩkĩ ea nikasharakãfe. Akka nõkai atiri naima. Askafiax nõ keyokõi fetsa keskara iki fetsexii.

⁵² Jesús anã oaino ẽfe ẽjirinĩ ẽfe maneti maneaino Jesús chanĩmara faafo, a nayoamafo, fetsa keskara itaxikani. Fetsoitanaĩ keskاراتaxikani fetsa keskara itãxikani. Askatari Jesús chanĩmara faax namisfori otorisataxikani. Nãskakẽ keyokõi Jesús chanĩmara faafo tii fetsa keskara ixikani. Askax anã nanakafoma.

⁵³ Nõ iskaratĩa naino nõko yora payokometiro. Askafiano Niospa nõko yora noko fetsafaxoxii nõ anã nanõma, nõ afe nõpaxanõ.

⁵⁴ Nãnori Niospa meka yoĩkakĩ kirika kenenifo. Nã yoinifo keskara chanĩmakõi ixii. Iskafakakĩ kirika kenenifo yoĩkakĩ: “Aicho. Anãkai Niospa yorafo nanakama. Cristoõnoax nõ afe isharpakenakaki,” ixõ kirika kenenifo.

⁵⁵ Askatari kenenifo iskafakĩ: “Anãkai afanã noko namatiroma. Anãkai nõ nai omiskõinakama,” ixõ kirika kenenifo.

⁵⁶ Nõ afara chakafamisnoax nõ nai nõ omiskõitiro. Nãskakẽ nõ Moisés noko yoinioxõ nõ tãpitiro afara chakafaax nõ natiro. Naax nõ omiskõixii.

⁵⁷ Akka Jesucristo noko nãxoni noko chaka soaxoxiki. Nãskakẽ nõ Jesucristo Ifofaax nõ nafiax nõ anã otoax nõ anã nanakama. Nõ afe nõpanaka. Nãskakẽ nõ Epa Nios aicho fai.

⁵⁸ Akka efe yora mĩstichi, afara fetsa shinãyamakãfe. Niospa noko imapaiyai keskara nõ fisti shinãsharakãfe. Jesús Ifofasharakãfe. Nõko Ifo Jesús yonoxosharafafãikãfe. Mã mã tãpia nõko Ifoõxõ nõ yonoai kaxpa nõ yonomisma, nõko Ifomãĩ noko amakẽ. Nãskakẽ nõ aõxõ ato axosharatiro nõ kaxpa ato axõima.

16

Nã Nios Ifofaafãfe kori ichafaxõ Nios Ifofaafõ fetsafo fomani

¹ Iskaratĩa mã ea yõkaita, afara fetsa kirikaki kenexõ ẽ mato yoi. Nios Ifofaafõ Jerusalén anoafõ afaamais. Ato noĩkĩ mã ato afara fomatiro. Akka nã Nios Ifofaafõ Galacia anoafõ ẽ ato yoia keskara ẽ matori yoipai nã afaamaisfo afarafo mã ato inãsharanõ.

² Nomĩkotĩa ichanãĩ mã kori ichafaxõ chipo Jerusalén anoã mã ato fomatiro. Yonoxõ kori fita atiri mã ato inãtiro. Akka mã kori ichapama fixõ ichapamari mã ato inãtiro. Akka mã ichapa fixõ ichapari ato inãkãfe. Nomĩkotĩa ichanãĩ mã kori ichafatiro, ea manakima kori ichafayokãfe. Nã ẽ matoki nokoaitĩa mã anã kori meketiroma. Nã kori mã ichafaa nã Jerusalén anoafõ afaamaisfo mã ato fomatiro mẽ Corinto ano matoki oano.

³ Nãskano feronãfake sharakõifo katokãfe afãfe nã afaamaisfo ato kori foxotanõfo Jerusalén anoafõ. Nãskatari ẽ Corinto ano nokoxõ Jerusalén anoafõ ẽ kirika kenexõ ẽ ato fomanõ. Nã feronãfake sharakõifãfe ato foxotanõfo. Akka nã feronãfakefãfe nofeta Jesús Ifofaafõ. Nãskakẽ ato ifisharakãfe ixõ ẽ kirika kenei nã feronãfakefo sharakõifãfe foxonõfo Jerusalén anoxõ Jesús Ifofaafãfe ato tãpinõfo.

⁴ Niospa ea nõchipaiyaino nã feronãfakefo mã katoa efe fotirofo.

Pablo Corinto ano kapaĩkĩ ato yoini

⁵ Ẽ Macedonia finõfainikai ẽ matoki Corinto ano nokoikai.

⁶ Ẽtsa, ẽ ano mato fe samaraka pishtayotiro rakikĩa. Askayamai ẽ mato feta mechaka fisti finõyotiro rakikĩa. Nãskakẽ ẽ matoki nokoaino mã ea axosharayotiro. Askatari mẽ kaino mã ea nõchitiro ẽ kasharatanõ.

⁷ Ẽkai mato finõfaipaima. Niospa ea nõtefayopaiyaino ẽ mato ano nõteyotiro.

⁸ Askafiax ẽ nono Efeso ano iyoi nã nõko fista ẽfe ane Pentecostés ikaitĩa.

⁹ Nonoxõ yorafãfe nõko Ifoõnoa nikapaikani. Nãskakẽ ẽ nonoxõ nõko Ifoõnoa ẽ ato yoisharayoi chanĩmara fanõfo. Ẽ nõko Ifoõnoa ato yoiflaito atirifãfe ea xatemapaikani ẽ Jesúsnoa yoiyamanõ.

¹⁰ Akka ẽ nõko Ifo yonoxomis keskafakĩ Timoteori nõko Ifo yonoxomis. Nãskakẽ matoki Timoteo nokoaino kexesharakãfe akiki inimayanã.

¹¹ Nãskakẽ, “Mĩ afaamara,” fayamakãfe. Nãskax mato anoax ekeki oaino nõchisharakãfe inimayanã ekeki nokonõ. Nios Ifofaa fetsafo fe ekeki nokoyonõ ẽ anã ato fe rafesharanõ.

¹² Askatari iskaratīa nofe yora Apolosōnoa ē mato yoi. Ē Apolos yoia iskafakī: “Corinto anoafo ōiyotāfe,” ē faito ea yoia iskafakī: “Ē iskaratīa kayotiroma. Niospa ea nīchipaiyaitīa ē katiro,” ixō ea yoia.

Pablo mā mekai xatekī Corinto anoafo ato meka fomani

¹³ Jesús shināfafāikāfe chakafakakīma. Jesús Ifofasharakāfe. Jesús chanīmara faax afara afeskarafiato rateyamakāfe. Kachikirifayamakāfe.

¹⁴ Afarafo mā akai keskara Nios yafi yorafo noikī axosharakāfe.

¹⁵⁻¹⁶ Estéfanas afe yorafo fe Acaya ano ixō nānoxō Jesús chanīmara fakī taefanifo. Mā mā ato ōimiskī. Mā mā tāpia nāfāfe Nios Ifofafo sharafamisfo. Nā keskarafō nikasharakāfe. Nā ato feta yonoaifori nikasharakāfe.

¹⁷ Ē inimasharakōi Estéfanas, Fortunato, Acaicori afo ekeki nokoafono. Akka mā ea axopaiyai keskara nāfāfe mā ea axōafo. Mā ea axotiroma mā chaikōi ika.

¹⁸ Nā tiito ea inimamamisfo. Mato inimamamisfo keskafakī eari inimamamisfo. Nāskakē atoōnoa yoisharakāfe.

¹⁹ Nā nōko Ifo chanīmara famisfāfe Asia anoafāfe mato yoisharapaikani. Aquila feta āfe āfi Priscila mato yoisharapaikani. Mato shinākōikani. Āto pexe mēranoax ato fe ichanāmisfāferi mato yoisharapaikani.

²⁰ Keyokōi nōko Ifo chanīmara faafāfe nono efe ikaxō mato yoisharapaikani. Nāskakēri mā ranā yoinōnāsharakāfe.

²¹ Ēfi Pablocki mē mekai xatekī meka rafes ē mato kenexonō. Akka taefakī nofe yora Sóstenes ea kirika kenexona. Akka iskaratīa ēkōi kirika mato kenexoni mā tāpinō.

²² Fatotora nōko Ifo noi Yamaino Niospa omiskōimapainō omiskōipakenakafo mēra potakī.

Nōko Ifo Jesús chaima nokopainō.

²³ Nōko Ifo Jesucristo mato noikī mato inimamasharakōinō.

²⁴ Ē nōko Ifo Jesucristoōxō keyokōi ē mato noi. Nā tii.

Pablo Corinto Anoafu Afianã Kirika Kenexõ Fomani

Pablo Corinto anoafu yoisharani

¹ Ëfe yora mĩshtichi, êkĩa Pablo. Ë kirika kenexõ mato fomai mã tâpinõ. Nofeta Jesús Ifofamis Timoteo feta Ë mato kirika kenexõ fomai. Epa Niospa ea katopaiyaito Cristo Jesús ea katoni ãfe meka Ë mato yoifofãfõfãinõ.

Nios chanĩmara faafõ Corinto anoafõ, Acaya mai anoafõri Ë mato keyokõi yoisharai.

² Ë nõko Nios mato kĩfixomis iskafakĩ: “Epa Niospa, nõko Ifo Jesús feta ato noikõikĩ ãto õiti inimamasharaxõfe. Askatari ato shara fafe,” ixõ Ë matoõnoa yoisimis.

Pablo omiskõini

³⁻⁴ Nõ Epa Nios yoisharanõ iskafakĩ: “Epa Niospa, mĩ noko sharafa fafãfãini. Mĩ sharafinãkõia. ¡Aicho!” ixõ nõ Epa Nios yoinõ. Nãfi nõko Ifo Jesucristo ãfe Apakĩ. Nãatori noko noisharakõi. Askatari nõ omiskõiaito noko inimamatiro. Akka nã nõ meemis keskara mei, fetsa omiskõiaito nõ inimamatiro, nã Epa Niospa nõ omiskõiaito noko inimamamis keskafakĩ.

⁵ Cristo omiskõimakĩfinakõinifo. Nãskakẽri nõri Cristoõnoax omiskõikõi. Akka Cristo omiskõiaito Niospa axosharakõini. Nãskakẽ Cristoõxori nokori Niospa axosharakõi.

⁶ Akka nõ Niospa meka mato yoi nõ omiskõiaito mã noko nikakõixõ mã nõko Ifo Jesús chanĩmara faax mã afe isharakõitiro. Nãskax mã inimakõitiro. Akka nõ mato yoi nõ omiskõiaito nõko õiti Epa Niospa noko inimamaxomis. Akka mã mã noko õimis nõ omiskõiaito Epa Niospa noko axosharaito. Nãskarifiã mãri omiskõiaito Epa Niospa matori axosharakõixii mã tenesharakõinõ.

⁷ Mã nõ tâpia nõ omiskõiaia keskai mãri nofe omiskõiaito Epa Niospa nõko õiti inimama keskafakĩ matori inimamasharai.

⁸⁻⁹ Efe yora mĩshtichi, Asia mai anoax nõ omiskõita Ë mato yoi mã tâpinõ. Nõ omiskõifinãkõita tenetiroma mei nai keskarakõi nõ meita. Nãskakẽ nõ tâpitiro nãskara Epa Niospa noko tâpimana nõnã nõ ifimetiroma nõ omiskõiyamanõ. Epa Niospa fistichi noko ifitiro. Akka nõ omiskõiaino nõ naano, nãatõfi yorafo otõfatirokĩ, ixõ nõko shinã mẽraxõ nõ shinãita.

¹⁰⁻¹¹ Akka nõ fãsi omiskõi nakerafãino Epa Niospa noko ifita. Anã afetiãra noko ifixii. Askatari nõ chanĩmara fakõini nokomãi ifitaifamiskẽ, mãmãi noko Epa Niospa kĩfixomiskẽ. Mã noko askafãino nã Nios chanĩmara faa fetsafãfe shinãkĩ iskafaxikani: “Aicho Epa Niospa, mĩ Pablo yafi afe rafemisfo mĩ ato ifisharakõia. Mĩ fãsi sharakõi,” ixõ yora ichapafãfe yoixikani.

Afeskaia Pablo kanimamẽ Corinto ano

¹² Nã nõ fakira kafãsaia ariax nõ isharakõimis, nõ afaa chakafamisma. Niospa fichipaiyai keskara nõ amis. Askatari mato mẽranoax nõ isharafinãkõimis. Nãskakẽ nõ shinãchakaima nõ inimasharakõi. Akka nõkai nõ mato pãramisma, chanĩma fisti nõ mato yoisimis. Niospa noko noikĩ nõko shinãmanaino nõ isharanõ mato mẽranoax. Askatari nã nõ fakira kafãsaia ariax nõ isharakõimis.

¹³⁻¹⁴ Ë mato kirika kenexõ manamani tâpitiropinĩ shara faxõ fekaxma mã tâpitiro xafakĩa sharakõi. Nãskafekẽ atirifãfe tâpisharãfoma Ë afe keskaramãki. Nãskafixõ mã tâpisharai, nãskara shara Ë fichipai. Nãskakẽ nõko Ifo Jesús anã oaino mã nokoki inimasharaxii, nõri matoki inimasharanõ.

¹⁵⁻¹⁶ Nãskakẽ Ë shinã Ë Macedonia ano kaitĩa Ë mato ano mãpẽfãixi anã Ë mato yoisharaxikĩ mãto õiti mẽra mã inimanõ. Askata nã Macedonia anoax Ë oaitĩa anã Ë mato ano mãpẽtiro mato fe iyoxiki. Chipo Judea ano ea nichitirofo, ixõ Ë shinãni.

¹⁷ Nãnorĩ Ë shinãfiãx Ë mato ari Ë kayoikaima. Akka mã iskafakĩ shinãiraka: “Pablo Ë kaira ifiãx kaima, çafeskakĩ nõko pãramẽ?” ixõ mã shinãiraka. Akka êkai õiti ranãyama fetsa yoikĩ, fetsa yoikĩ Ë fapanã. Nã yõra Jesús Ifofamato shinãi keskara Ë shinãima.

¹⁸ Nã Niospa noko pãramisma keskafakĩ nõrikai mato pãramisma. Nãskakẽ tâpisharakõia nõ mato pãramisma.

¹⁹ Akka Timoteo ikaino Silvano ikaino Ë ikaino Jesucristo Niospa Fakeõnoa nõ mato yoisimis. Jesucristo mekakai rafema, ãfe meka mẽstekõi. Chanĩma fisti.

²⁰ Epa Niospa noko yoiyoa keskara keyokõi Cristo mã noko axomis. Nãskakẽ nõ keyokõichi yoisimis iskafakĩ: “Epa Niosi, mĩ fãsi sharakõi. Jesúsxõ keyokõi mĩ afama mĩshti famis nã mã yoiyoa keskafakĩ. Nãskakẽ Jesús aneõxõ nõ mia aicho fai,” ixõ nõ yoisimis.

²¹ Askatari Epa Niospa mato yafi nõko Jesús Ifosharakõifama. Nãskatari nõko katõxõ nõko nichini ãfe meka yoisimis nõ inõ.

²² Akka fĕtsa ăfe afarafo marakka fatiro fetsafăfe tăpinŏfo ăfenăkĕ. Năskafakĭri Epa Niospa ăfe Yŏshi Shara nŏ mĕra nanea aŏxŏ nŏ tăpinŏ nŏ ăfe yoraxŏ. Năskakĕ nŏ tăpitiro afara fetsa nă noko yoiyoa keskara chanĭmakŏi noko inăxii.

²³ Ĕ mato ari kaira ixŏ ĕ shinăfitaxakĭ ĕ kaama. Epa Niospa ea tăpikŏia ĕ chanĭkĕma. Ĕ mato ari kakerana. Năskafax ĕ kaama ĕ mato shinăkĭ. Ĕ ato ari kaxŏ ĕ ato fasi yoikĭ ĕ ato shinămitsamatirora ikax năskax ĕ mato ari kaama.

²⁴ Ĕ mato askafatama ĕroko mato inimamapaisharai. Ĕkai măto ifo ipaima. Akka Jesŭs fisti nŏko Ifo. Akka mă mă Jesŭs chanĭmara faxŏ mă mă Jesŭs Ifo sharakŏifai. Năskakĕ ĕ mato feta Jesŭs yonoxopai mă inimai finakŏinŏ, askatari mă Jesŭs Ifo sharakŏifanŏ.

2

¹⁻² Năskakĕ ĕfe shină mĕraxŏ shinăkĭ ĕ iskafayamea: “Ĕ Corinto ari kapaifi ĕ kaima. Akka ĕ kaxŏ ĕ ato yoikĭ iskafapaima: ‘A mă afara chakafamis keskara xatekăfe,’ ixŏ ĕ ato yoikĭ ĕ ato inimamatiroma. Askakimaroko ĕ ato shinămitsamatiro. Ĕ ato shinămitsamanaino, ėtsŏa ea inimamatiromĕ? Akka ares fisti ea inimamatirofo,” ixŏ ĕ shinăyamea.

³ Năskakĕ ĕ mato kirika kenexona, mato ari kakĭma. Akka ĕ shină, “Ĕ ato ari kaxŏ ĕ ato iskafaino: ‘Mă isharakŏiyama măto chaka xatekăfe,’ ĕ ato faino shinămitsakŏitirofo,” ixŏ ĕ shinăyamea. Akka mă ea nikayamaino ĕri shinămitsakŏitiro. Akka mă ană Nios nikakĭ ană isharakŏiaino, mă ea inimamasharakŏitiro. Akka mĕ tăpikŏia ĕ inimakŏiaino mări inimakŏitiro.

⁴ Ĕ mato kenexokĭ ĕ meyamea ĕfe ŏiti shinămitsakŏiatio oiayană. Ĕkai mato shinămitsamapainima. Askatamaroko ĕ mato kenexoni a ĕ mato noikŏiai keskara mă tăpinŏ.

Fĕtsa noko chakafaito nŏ rae fatiro

⁵ Akka nă feronăfate fĕtsa ea chakafakĭ mekafakĭ ea fisti shinăchakamanama, nă mă Nios Ifofaafori keyokŏi mato shinăchakamana. Năskakĕ noko keyokŏi chakafakĭ mekafaa. Noko askafafaino ĕkai na feronăfake omiskŏimaki finapaima.

⁶ Akka mă ranărito omiskŏimanakĭ năskanŏkăfe.

⁷ Akka a mă aka keskafakĭ ană askafakĭma rae fakăfe. Năskaxŏ yoisharakăfe inima-masharakikakĭ ană omiskŏinŏma. Akka mă askafayamaino ăfe shină mĕra shinămitsakŏitiro ană shinăsharatiroma ană Nios Ifofapaima.

⁸ Năskakĕ ĕ mato yoiai keskafakĭ ea nikasharakăfe. “Nŏ mia noikŏi. Mĭ ană nofe isharakŏitiro,” ixŏ yoikăfe tăpinŏ.

⁹ Ĕ mato kirika kenexŏ manamayamea tăpipaikĭ mă mĕxotaima ea nikakŏimăkai.

¹⁰ Mă fetsa raefakĕ ĕri nă raefatiro. Fĕtsa ea chakafaito ĕ mato shinăkĭ Cristo ea ŏiaino ĕri nă raefatiro.

¹¹ Nŏ fetsa raefasharakŏiaino Satanăs noko feparatiroma. Nŏ tăpisharakŏia Satanăs noko kexepaikŏi. Akka a Nios Ifofaafŏ isharyamaino, raefayamaino, a Nios Ifofaafoma tiito chakafakĭ mekafatirofo Satanăs fichipaiyai keskara. Akka nŏ fetsa raefaino Satanăs noko afeskafatiroma.

Pablo pexe rasi Troas ano nokoax inimanima

¹² Akka ĕ mato eŏnoa tăpimapai. Ĕ pexe rasi Troas ano kani meka shara Cristoŏnoa ato yoikai. Cristoŏnoa nikapaikŏimifo. Năskano nŏko Ifăfe ea atoki nĕchini ĕ ăfe meka ato yoinŏ.

¹³ Akka ĕ shinăni nofe yora Tito Troas ano a fichikaira ixŏ. Akka fichiyamax ĕ inimanima. Năskaxŏ ĕ făsi shinăkŏimi. Năskata, “Mĕ kai,” ixŏ Troas anoafŏ nă nŏko Ifo chanĭmara faafŏ ĕ ato yoita ĕ oni nono Macedonia ano.

Cristoŏxŏ nŏ keyokŏi finŏtiro

¹⁴ Aicho Epa Niosi, mĭ Cristo Jesŭs afara chaka potamana ană afeskafanŏma. Năskakĕ nŏri ăfe inimai nŏmăi aŏxŏ ăfe meka yoikatsaxakĭ yorafăfe tăpinŏfo. Akka pirofomă nakas shara nachikomea nŏ keyokŏichi xetetiro keskafakĭ, năskafakĭri Niospa noko nĕchiano nokoŏxŏ keyokŏichi tăpitirofo ăfe meka shara.

¹⁵ Akka nŏ meka shara Cristoŏnoa yoimis keyokŏichi nikanŏfo. Akka atirifăfe chanĭmara fakŏikani, Nios fe ipaxakakĭ. Akka atirifăfe nikasharakanamax Jesŭs Ifofakanamax nakanax omiskŏipakenakafo.

¹⁶ Akka na meka shara nikaifoma mă nakanax omiskŏipakenakafo mĕra fokanax omiskŏixikani, năăfemăi na meka shara nă nŏ afara pisikŏi xetemis keskara xetekatsaxakakĭ. Akka nă meka shara nikaifăfe nă nŏ pirofomă nakas shara xetemis keskara xetemisfo. Năskakanax Nios fe nĭpanakafo. Akka, ėtsŏa Niospa meka Jesŭsnoa yoisharatiromĕ? Akka tsŏa atiroma.

¹⁷ Akka fetsafāfe Niospa meka ato yoikakī kori fipaikani āa ato pāarakaxō. Nō mato Niospa meka yoikai noko kopifakāfe ikaxō āa ato pāarakaxō ato kori fiaifo keskfakakī nōkai mato askafamisma. Mā nō tāpia nō āfe meka yoiaito Epa Niospa noko ōisharakōi, nāatomāi noko nīchinixakī. Āfe meka yoikai nō kaxetiroma, Niospamāi noko ōiaino nōmāi Cristo āfe inaxō.

3

Jesús ato meka fena yoimis Pablo ato yoini

¹ Askara nō yoiaino, mā shināiraka nā nōa nō yoimesharai keskara. Maa. Nōa nō yoimesharaima. Mā chaka shināi. Akka fētsa yonopaiyaito fētsari fetsa kirika kene fomaxotiro fetsafāfe ōinōfo yonosharamiskē. Akka, ōmā shināimē fetsafāfe nokoōnoa kirika kenenōfo noko yoisharakakī nō yonosharamiskē Niospa meka yoikī? Akka nō askara fichipaima. Akka, ōmā shināimē nō mato kirika kene yōkaito kirika kenexō mā noko inānō nōri fetsafo inānō noko tāpinōfo nō mato mēraxō yoisharamiskē? Maa. Askara nō fichipaima.

² Akka nā kirika kenea keskara nō fichipaima māmāi nā kirika kenea keskarakē, fetsafāfe mato ōitirofo māmāi Nios Ifofasharakē. Mato ōikakī nokori tāpitirofo nō Niosxō yonosharamiskē.

³ Akka mā mā isharakōia anā mā imis keskarama a Niospa fichipaiyai keskaraino. Nā noko ōimana Cristo māto ōiti fetsafāfa fena keskara mā inō. Nāskakē mā kirika kenea keskara. Mato ōixō fetsafāfe tāpitirofo nō Niospa meka mato tāpimasharamiskē. Akka na kirika kene lapisi kenemeama, askatari tokiri sapaki kenemeama; Epa Nios nīpanakato āfe Yōshi Sharapa mato imashara mā isharakōinō.

⁴ Iskafakī nō yoia, mā nōmāi tāpixō Niospamāi noko nīchinikē nō āfe meka mato yoinō Cristo āfe sharaōxō nō mato yoisharamis.

⁵ Akka nōa nō afara shara nō mato yoitiroma mā isharanō. Askatamaroko Epa Niospa āfe Yōshi Sharaōxō nō fetsafo tāpimatiro isharanōfo.

⁶ Niospa Yōshi Sharaōxō na meka fena nō ato yoimis Jesúsnoa nō Nios fe nīpaxatiro. Akka a Moisés kenenīōnoa nō ato tāpimamisma, sharafiano keyokairoko nikanōfo nō ato yoipanā. Akka a Moisés yoini keskara keyokōi nikakanamax Nios ika ano katiroma. Askatamaroko Niospa Yōshi Sharapa noko imasharapakenaka Nios ika ano nōmāi Cristo Ifofakē.

⁷⁻⁸ Epa Niospa noko xinifo israeliofa nā ato yoipaiyai keskara ato yoini nikanōfo. Tokiri pāraki kenexō ato yoini. Epa Niospa Moisés tokiri kene ināino luz keskara fafekōini. Nāskatari Moisés femānā fafekōini. Nāskakē mā Moisés māchi keya ariax fotokē nōko xini israelifāfe ōitiroma inifo. Nāskax fafekōifiax fenāmāshta matapakeni. Akka Epa Niospa Moisés yoini keskara sharakōifixō noko imapakexatiroma. Sharakōifixō, akka iskaratīa Niospa Yōshi Sharapa noko yoia keskara nāroko sharafinakōia.

⁹ Akka nā Moisés yoini keskara sharafiano nikakanamax nakanax Nios ika ano katiroma. Akka iskaratīa Niospa āfe Fake Jesúsxō noko chaka soaxotiro nō afe isharapakexanō. Nā sharafinakōia afaa fetsakai askarama.

¹⁰ Epa Niospa Moisés yoini keskara sharafiax, akka Epa Niospa Jesúsxō noko axoni keskara nāroko sharafinakōia.

¹¹ Niospa meka shara Moisés fiaino fafesharakōini. Mā fiax āfe femānā fafesharakōini, Moisés. Āfe femānā fafesharakōifiax fenāmāshta matapakeni. Epa Niospa Moisés yoini keskara sharafiax, akka Epa Niospa Jesúsxō noko axoni keskara keyonakama nāroko sharafinakōia.

¹² Nāskakē mā nō tāpikōia Epa Niospa Jesúsnoa yoini keskara keyonakama. Nāskakē ranotama nō Jesúsnoa yorafo yoitiro.

¹³ Nōkai Moisés keskarama. Moisés āfe femānā fafeaino samapa feopomeni israelifāfe ōinōfoma nāskax fenāmāshta matapakeni.

¹⁴ Akka nōko xinifāfe nikasharapaonifoma, āto ōitimāi fēstokōi keskarakē. Iskaratīari nōko kaifo nāskaratori. A Moisés ato yoini keskara ato kirika anexonaifono ato nikakaspakanax. Nāskakaxō Epa Niospa meka tāpisharatirofoma. Akka Cristo fistichi ato shināmatiro nā ōiti fēstoā keskara inōfoma.

¹⁵ Iskaratīari nā Moisés yoini keskara ato anexonaifono āto ōitimāi fēstokōiano shināsharapanāfāfe.

¹⁶ Askafikaxō iskaratīa a Moisés keneni keskara anā shinākakaxoma nōko Ifo chanimara fakaxō aōnoa fisti shinātirofo. Nāskakē anā feopomea keskara ixikakima.

¹⁷ Niospa Yōshi Shara nō Ifofaax nofe ikaino afaa fetsa nōko ifo itiroma, noko ikixikī.

¹⁸ Akka nōko ōitikai fēstoā keskarama. Nōko Ifāfe āfe meka nō nikasharakōitiro. Āfe Yōshi Sharapa noko ikixō noko fetsafatiro a keskara shara nō inō. Akka mā noko fetsafaano

nō sharakōi ixii. Nāskakē fetsafāfe noko òikakī tāpitirofo nō shara isharakē. Nā feisiti xini chaxaino fafeai keskara noko òikakī nōko Ifo Jesús tāpitirofo afe keskaramāki.

4

¹ Akka Epa Niospa noko shināki noko yoini āfe meka shara Jesucristoōnoa nō yoifofāfōfāinō. Nāskakē nō shināchakaima, nō Niospa meka yoiki xateima.

² Nāskakē nō afaa one chakafamisma rāfixikima, a afara one chakafamisfo keskafakī. Askatari nō tsoa pāramisma. Askatari nōa nō Niospa meka fetsafaxō yoimisma. Akka Niospa tāpia meka chanīma fisti nō yoimiskē. Nāskakē mā nokoki inimasharapainō, nā nō afarafo shara faito òi.

³ Na meka shara Jesúsnoa nō yoimis nikakaspafono nā onea keskara. Nāskakē tāpikanamax oa fēstoa keskarafo. Nāskakanax omiskōipakenakafo.

⁴ Nāfofi nā niafaka chaka āto ifoxō ato yoimis. Nāskaxō nā òiti fēstoa keskara ato faano na meka shara Jesúsnoa tāpitirofoma. Nā yora fēxō luz ota sharafiano òitiroma keskarafo. Nāskaraxori Jesús finakōia tāpitirofoma. Nāskatari tsōa tāpitiroma Jesús Apa keskara sharafinakōifiano.

⁵ Akka nōkai nōa nō nokoōnoa nō mato yoimisma mā noko ifofanō. Askatamaroko nō mato yoimis Jesucristo mātō Ifo inō. Nōko Ifokē aō noioxō nō yonoxosharapai. Akka nō mato axosharapai Cristoōnoa mā tāpinō.

⁶ Niospa pena onifayoxoma fakishkē yoini pena inō. Nāskarari nō Jesús Ifofayamax nōko òiti nā fakish keskara chakakōi ipaoni. Akka Niospa Jesucristoōxō nōko òiti mēra noko chaxamashara aōxō nō tāpinō afe keskara sharakōimāki.

Pablo yoini nō Jesús chanīmara faax nō isharatiro

⁷ Akka nō afaayamafekē Niospa āfe sharakōi noko mēra nanea nō āfe meka shara Jesúsnoa ato yoinō. Akka nā kesho noko keskari akai afaama. Samama moshitiro. Moshifitirokē a mēra afara sharakōi nō nanetiro. Nāskarifiāi nō afaayamafiano Jesús nofe rafea. Nāskakē yorafāfe tāpitirofo Niospa Yōshi Shara nōmēra nanea.

⁸ Nā nō imis keskara iskaratia ē mato yoinō mā tāpinō. Noko chakafafiakakī noko xatemakanima. Nāskafixō nō afeskaimēti ixō, nō shināchakafikī mā nō tāpia Epa Niospamāi noko axosharafafainaito.

⁹ Noko noikaspakakī noko chakafapaimisfo. Nāskakaxō noko chīfafafāsafamisfo. Noko askafafiaifono Epa Niospa noko potaima. Nāskakatari noko retepaikakī noko tsefeya fafiafōno Epa Niospa noko kexesharamis nō nayamanō.

¹⁰ Jesús niyoano retepaipaonifo keskafakī nokori nāskari fakani retepaikakī. Noko retepaifiaifono nōko Ifo Jesús noko kexesharai noko retenōfoma. Nāskakē yorafāfe tāpitirofo mā Jesús nafianixakī anā otoax nikē.

¹¹ Nō Jesús yonoxonaito mēxotaima noko retepaikani. Akka noko retepaifiaifono nōko Ifo Jesús noko kexesharai noko reteyamanōfo. Akka nōa nō ifimetiroma nayamaxiki. Nāskakē tāpitirofo mā Jesús nafianixakī anā otoax nofe ikē.

¹² Nāskakē Jesúsnoa nō mato yoimis fetsafāfe noko retepaifiaifono mā chanīmara faax mā afe īpaxanō.

¹³ Akka Epa Niospa meka kirika ano yōra keneni iskafakī: “Ē Epa Nios chanīmara fakōini. Nāskakē Niosnoa ē ato yoi,” ixō kirikakī Niospa meka keneni yōra. Nāskarifiakī nōri Niospa meka chanīmara fakōixō nō mato yoi.

¹⁴ Akka mā nō tāpia nōko Ifo Jesús mā nafiakē Ēpa Niospa anā òtofani afe īpaxanō. Nāskakē Apa Jesús òtofani keskafakī mato yafi nokori òtofaxii nō afe īpaxanō.

¹⁵ Akka nō omiskōikōi mato Epa Niospa meka yoi mā āfe meka chanīmara fakōinō. Nāskakē yora ichapafāferi Epa Nios nikakōikaxō, “Aicho, Epa Niosi, mī fāsi sharakōi,” faxinōfo.

¹⁶ Nāskakē nō omiskōifikī nō shināchakaima. Nōko Ifokai nō kachikiri faima. Akka nōko yorari anā kerexma nō omiskōiaino. Askafixō nōko shinā mēra mēxotaima noko kerex fafafāini.

¹⁷ Akka a nō niyoax nō omiskōiyoai akai afaama, samamashta keyoi. Akka nō Jesúsnoax omiskōiāito a noko sharakōi imai a keskarakai tsōa òiyomisma. Nāfori keyonakama.

¹⁸ Akka nā nō omiskōiāi shinātamaroko nā nō òiyomisma nō shināi. Nios ika anoxō noko inimamapakenaka. Nā nō shināi. Akka nā afaranā noko omiskōimanai samama keyoxii. Akka a Niospa noko chipo imai keskara keyonakama.

5

¹ Akka ē mato yoinō nikakapo. Pexe xiniāx pāo ikax keyotiro. Nāskarifiāi nō naino nōko yora keyotiro anā nōko fero mēsho nō mēra inōma. Akka tsōakai noko yora fenafaxotiroma.

Epa Nios fistichi noko yora fena onifaxotiro. Akka mā nō nai mēra kaax nōko yora fena shara ixii. Epa Niospa noko yora fena shara faxōano a anā keyonakama.

² Akka nō feaxtemis nōko yora feaxxōime. Nōko yora fenashara fapai nai mēraxō.

³ Akka nō naax, ǀnōko fero mēsho yoraya itirromamamē? Maa. Epa Nios fisti nō Ifofamiskē noko yora fena shara faxotiro nō afe īpaxanō. Nāskakē nōko fero mēsho yoramais nai mēranoax itiroma Epa Niospamāi noko yora fena faxōano.

⁴ Iskaratīa nono mai ano niyoax nōko yora omiskōiyoi. Askafīax nō nayopaima. Nō nayoamano Cristo onō noko yora fetsafaxoxiki nō isharapakexanō.

⁵ Nā Epa Nios fistichi noko onifani nō afe īpaxanō. Nāskakē āfe Yōshi Shara nō mēra nanea nō tāpinō noko yora fetsa faxoxiāno.

⁶ Nāskakē nō shināsharafafāini nono mai ano niyoxō, nayoxoma, nōko Ifo Jesús ari kayoxoma mā nō tāpia.

⁷ Nāskakē nā Jesús ika ano ōiyamafikī nono mai anoxō nō chanīmara fafafafāini. Nāskaxō chipo nō ōixii Epa Niospa noko fetsafaano.

⁸ Akka mā nō tāpisharakōia Epa Niospamāi noko yora fetsa ināino. Akka mā nō nakī nōko yora nō ratafainikai nō sharafīnakōia ikikakī. Nāskakē nō inimasharakōi mā nō nai nōko Ifo Jesús femāi nō ikikai.

⁹ Akka nono mai ano nō niyoxō nōko Ifo nō yonoxosharayopai nokoki inimanō. Nāskatari nai mēraxori na fishisharapaiyai keskafakī nōko Ifo nō inimamapaisharakōi.

¹⁰ Akka nā chanīmara faafo tii Cristokī nokoxikani. Nāskatari noko yoipakexii nono mai ano niyoxō nō shara famismākī, askayamakī nō chakafamismākī. Akka nō afara shara famiskē afara sharakōi noko ināxii. Akka nō afara chakafamiskē afara shara noko ināpaifikī noko ināxima. Nāskakē nō fixiima. Nāskakē Jesúsxō nō yonopai sharakōi.

Pablo yoini Cristoōnoax nō Nios fe rafetiro

¹¹ Akka Niospa noko yoia keskara nō ayamax nō rāfitiro. Nāskatari fetsafori nō ato yoipai nā Niospa ato yoiai keskara anōfo. Niospa noko tāpikōia nōmāi mēstekōi yoiaito. Nōkai ato feparapaima. Māri mā mā noko tāpikōia nō mato pāramisma. Nōko meka mēstekōi fisti nō mato yoimis. Nānori fisti mato shinā mēraxō mā shināpainō.

¹² Akka kakapai nōa nō yoimesharapaima. Akka mēstekōi fisti nō mato yoimis, mā mā tāpia. Akka fetsafāfekai mato yoikōikanima mato feparapaikani. A yoiaifo anorikai yoimisfoma āa āto shinā mēraxō shināxaxō yoimisfo kakapayana. Akka nōfi mato pāramisma, chanīma fisti nō mato yoimis. Nāskakē mā nokoki inimakōimis. Nāskaxō mā nokoōxō ato yoikī nokoōnoa mā ato yoisharatiro.

¹³ Chanīma, nō Nios noikī kerexkai nō yonoxofāfāimis aōnoa fetsafāfe nikasharanōfo. Akka yorafāfe nokoōnoa yoimisfo iskafakakī: “Na Pablo feta yonomisfāfe shināsharamisfoma mēxotaima ato Niospa meka yoifōfasafamisfo omiskōifīnafīkakī,” ixō noko yoimisfo. Āa noko askafanōfokī mā nō tāpiakī Niosxō nō yonofīkai mā āfe meka tāpinō. Akka nō mēstekōi shināsharakī nō mato yonoxosharamis.

¹⁴ Cristo noko noikī noko yoini nō āfe meka shara mato yoinō. Cristo keyokōi yorafoōnoax naani. Nāskakē mā nō naa keskara a nō iyopaoni keskara ixikima.

¹⁵ Akka mā Jesús nayoni yorafoōnoax keyokōi a keskara shara ixiki. Nāskakē a nō chaka ipaoni keskara ixii. Nāskakē nā nō apaiyai keskara fisti anā nō shinātiroma. Cristoōnoax nō yonosharaxotiro. Cristo āa nokoōnoax nayoni. Nafiano Epa Niospa āfe sharaōxō anā otofani.

¹⁶ Akka nā Jesús chanīmara faafāfema fetsafoōnoa shināifo keskarakai nō anā atoōnoa anori shināpakenakama. Nōri anori shināyopaoni nō anā askapaima. Cristoōnoari nō chakakōi shināyopaoni. Nōkai anā aōnoa anori shināima.

¹⁷ Nāskakē Cristo nā Ifofaafō ato shinā fetsafaxōa anā shināyopaoni keskara inōfoma, fena keskara shara inōfo. A Niospa fichipaiyai keskara fena keskara nō ixii. Keyokōi fena keskara ixii.

¹⁸ Epa Niospa Cristoōxō noko fetsafaa anā nō noikspanōma, nō afe rafenō. Askatari noko yoini aōxō āfe meka nō ato tāpimanō Epa Nios fe rafenōfo.

¹⁹ Epa Niospa Cristoōxō keyokōi yorafo afe rafemapai anā noikspanōfoma. Cristomāi noko nāxonikē Epa Niospa a nō afara chakafamisnoa anā shināima. Nā Epa Niospa noko yoia keskafakī nānorikōi nō mato yoimis.

²⁰ Akka Cristo noko nīchini nō āfe meka mato yoinō. Nō āfe meka mato yoi nā Epa Niospa mato yoiai keskara. Epa Niospa nokoōxō mato yoi nā Cristo mato yoipaiyai keskafakī. Nāskakē nikakōikāfe Cristo mato nāxonikī mato chaka soaxoxiki. Nāskakē Cristo Ifofaxō mātō chaka xatekāfe Epa Nios fe rafexikakī.

²¹ Akka Cristo afaa chakafapaonima. Nāskafikē Apa Niospa nōko chakafo akikī nīchini. Cristo afaa chakafayamafiakatsaxakī noko nāxonī Epa Niospa noko omiskōimayamanō. Nā

yora chaka keskarax nõko chakafoõnoax Jesús nani. Nāskakē nõ Jesús Ifofaino Niospa noko õitiro sharakõi nã nõ afaa chakafamisma keskara, nokoki inimakõikī.

6

¹ Akka nõ Nios feta yonomis āfe meka mato yoikī. Nāskakē nõ mato yoisharapai Epa Niospa mato noisharakõiaino, mā shināmakiyamanõ, āfe meka mā kachikiri fayamanõ. Fetsafāfe anorima mato yoiaito nikayamakāfe. Askatamaroko Jesús meka shināmakiyamakāfe.

² Taeyokī Niospa meka yoimisto kirika keneni iskafakī Niospa yoiaino:

Ē mato shināito, mā ea yoiaino ē mato nikai mā omiskõiaino. Ē mato ifinõ, ē mato axosharaxiki,

ixõ yoini Epa Niospa. Nāskakē nikasharakāfe iskaratīari Epa Niospa noko axosharapai noko ifixii.

³ Nõkai mato afaa chaka yoipaima tsõa noko chakafayamanõfo. Akka nõ chaka niaito õikaki a Nios chanimara faamafāfe noko mekafatirofo. Nāskakē nõ afaa chakafapaima.

⁴ Akka nã nõ keyokõi Niosxõ aka keskara nõ mato õimamis nõmāi yonoxokatsaxakī. Noko omiskõimafiaifono nõ tenekõimis. Askatari fekaxteifinakõita nõ tenekõimis. Noko chakakõi famisfo, noko askafafiaifono nõ tenekõimis.

⁵ Nāskakaxõ noko koshamisfo, askatari karaxa mēra noko ikimamisfo. Nāskatari yora chakafāfe noko noikaspakakī fāsi noko mekafamisfo. Noko askafafiaino fekaxtekõiyānã nõ yonomis. Askatari nõ oxa tenekõimis. Nāskaxri nõ fonāikõimis.

⁶⁻⁷ Noko askafafiaifono afaa chakafatama nõko õiti mēraxõ nõ afaa chaka shināima. Nõ Cristo fe rafeaito nã noko yoimis keskara mā nõ tāpia. Noko chakafafiaifono nõ atoki õitifishkitama. Fena fenakima nõ tenekõimis. Nāskax fetsafo fe rafepaikī nõ ato sharafa fafafāimis Niospa Yõshi Sharaõxõ nõ ato askafamis ato pārakīma nõ ato noikõimis. Nõ askakī keyokõi nõ mato õimatiro nõmāi Niospa yonomatixõ. Satanás noko afara chakafamapafifaito Niospa Yõshi Sharapa nã Nios keskara shara noko imaino āfe Yõshi Sharaõxõ nõ afara chaka potatiro.

⁸ Akka fetsafāfe nokoõnoa meka shara yoifiaifono fetsafāferi nokoõnoa meka chaka yoimisfo. Akka fetsafāferi na yorafo sharakõira noko fafiaifono fetsafāferi noko ichamisfo. Nõ chanimakõi yoifimiskē noko feparamisfo ixõ nokoõnoa fetsafāfe yoimisfo.

⁹ “Pablo fe rafeakai tsoama. Nõkai ato õimisma,” noko fafiaifono akka fetsafāfe Nios Ifofakõikaxõ noko noikani. Nāskatari nõ napaiflax nõ nia. Noko omiskõimafiaiakakī noko tsõa reteama.

¹⁰ Akka nõ shināmitsafiaito nõko Ifo Niospa noko inimamamis. Akka afaamaisfixõ nõ Niosxõ nõ fetsafo imasharakõimis, Nios Ifo shara faifono. Nõ afaamais keskaraflix nõ aya a Niospa noko ināi. Akka nã keyokõi Niosnã nõkonāri.

¹¹ Efe yora mīshtichi Corinto anoafāfe, nã nõko õiti mēraxõ nõ shināi keskara nõ mato yoimis. Nõ mato fomāmisma. Keyokõi nõko shinã mēraxõ nõ shināi keskara nõ mato yoimis mā tāpinõ.

¹² Akka nõ mato noikaspamisma. Akka māroko noko noisharamisma.

¹³ Akka iskaratīa ē mato yoi āpa fake noisharakī yoitiro keskafakī, nokori noisharakāfe nã nõ mato noiai keskafakī.

Nã Nios chanimara faafāfema akaifo keskara ayamakāfe

¹⁴ Nã Jesús chanimara faafoma fe rafeyamakāfe. Akka na yora Nios Ifofaafāfe shināifo keskarakai nã yora chakafāfe shinākanima. Nāskarifiai pena fe fakish osinātiroma.

¹⁵ Nāskarifiakī Cristo feta Satanás anoris shinātirofoma. Akka nã Cristo Ifofaafāfe fichipaiyairo keskara nõ Cristo Ifofaafāfema askara fichipaikanima.

¹⁶ Nã Cristo chanimara faafāfe ichanāmisfo Epa Nios kifinõfo. Akka nã Ifofaafoma ato fe ichanātirofoma afara nimofa fakaxõ kifitirofo na nõko niosra ikaxõ. Nāskakē nã rafe osinātiroma. Akka afāfekai Epa Nioskõi kifipaikanima. Akka Epa Nios nõ mēra ika. Nāskakē nõ Niospa pexe keskara. Nõko Nios nia. Epa Niospa yoini iskafakī:

Ēfi ato fe ikikai, ato fe rafexikī. Ē ãto Nios ikaino afo efe yora ikani, ixõ yoini.

¹⁷ Askatari Epa Niospa yoini iskafakī:

Akka nã Cristo chanimara faamafāfe akaifo keskara ayamakāfe. Ato fe rafeyamakāfe afaa chakafaxikākima. Mā askaino ē mato ifikai, ixõ yoini.

¹⁸ Askatari nã afama mīshti atiroto ato yoini iskafakī:

Akka ē mato Epa ixii. Akka mā ēfe fakefo ixii, ixõ nõko Ifo Niospa yoini.

7

¹ Ēfe yora mīshtichi, Epa Niospa nā noko yoiyoni keskara shara. Nāskakē nō isharanō keyokōichi nōko chaka nō xatenō. Afarafāfe nōko yora iyamai nōko ōiti mēraxō noko chakafamatiro nāfo nō xatekōinō sharakōi ixiki. Nō Epa Nios noikōiax a keskara shara nō ipai.

Corinto anoxō chaka shināyopaonifo. Akka iskaratīa mā shara shinākani

² Akka nā yora fisti keskara nō inō noko noisharakāfe. Nōkai mato chakafamismaki. Askatari nō mato afaa chakafamisma, askatari nō mato pāramisma.

³ Ēkai nā ē mato yoiāi keskafakī mekakī chakafakī ē mato yoimisma. Akka ē nayoxoma ē mato mēxotaima noikōifafāini. Nāskatari mē nafiaxō mēxotaima ē mato noikōixi. Nāskakē tsōa noko paxkanā fatiroma nā yora fisti keskaramāi nō ikē.

⁴ Mā nō tāpikōia mā noko noikōiyānā, mā Jesús Ifo sharakōi fakē. Nāskakē nō yorāfo yoimis mā isharakōimiskē. Nāskatari nō omiskōifi nō inimakōimis.

⁵ Akka nā nō Macedonia ano nokoitatīa nō teneama, mēxotaima fanīma mīshtinoax fekax-teaifāfe ōi. Akka nō shināchakakōimis. Askatari a Nios Ifofaa fetsafori nō ato shinākōimis, mā nōko Ifo Jesús kachikiri faafora ixō.

⁶ Akka nā shināmitsaifo Niospa ato inimamamis. Nāskakēri nokoki Tito nūchiano nō inimakōimis.

⁷ Akka mā nokoki Tito nokoxō noko inimama noko yoiā iskakakī: “Corinto anoafāfe ea inimamakōiafo,” ixō Titopa noko yoiā. Askara nō nikai nō inimakōia. Askatari noko yoiā mā eōnoa yoikī iskakakī: “Nō Pablo shinākōi nokoki samamashta nokopainō,” ixō mā yoikē: “Nāskaxori nōko ōitini nō shinā chanīma nō afara chakafamis. Akka nōkai anā askapaima. Nō Pablo shināi,” ixō mā yoiaino Titopa ea yoiā. Nā keskara nikai ē inimai finasharakōi.

⁸ Akka ē mato kirika kenexō manamakī ē mato shināmitsamana. Nāskax ēri shināmitsakōiyoa. Akka anā ē shināmitsaima.

⁹ Akka iskaratīa ē inimakōi. Akka ē mato shināmitsamanax ē inima. Akka mā shināmitsayanā mā Epa Nios Kifiti iskakakī: “Epa Niosi, nō afara chakafakī noko raefafe nō afara chakafamiskī,” ixō mā yoikē. Nāskakē ē inimasharakōimis. Mā askafaino Epa Niosri matoki inimasharakōi. Akka ē mato kirika kenexō manamakī ē mato yoikī chakafaama. Askatamaroko ē mato yoisharakōia mato axosharayanā.

¹⁰ Akka nō shinākī iskafatiro: “Ooa, ē afara chakafakī, Niosri ē chakafaa,” ixō shinākī nōko chaka nō xatepaitiro Epa Nios Ifofapaikī. Nō askaito ōikī Epa Niospa noko ifitiro nō afe ipaxanō. Nāskaxō nō shinātiroma iskakakī: “Ooa, ēfe chaka ē xateama shara ē ikerana. Niosri ē Ifofaama ē shara ikerana,” ixō anori nō shinātiroma. Akka nā chanīmara faamafāfe nō shināi keskara shinākanima. Iskakakī shināmisofo: “Ooa, nō afara chakafaa,” ixō shinākani āto ōiti mēra shināmitsakanima Nioskai shināpaikanima. Nāskax nakanax Epa Nios fe ipanakafoma.

¹¹ Akka mākai askarama. Shinākapo. Mā māto ōiti mēraxō mā mā shinā anā mā Nios Ifofai māto chaka xatepaikī nā Niospa fichipaiyai keskafakī. Nāskax mā ratekōia Niospa keyokōi noko omiskōimaxira ikax. Nāskakē mā mā itipinikōia ika a afara chakafaifo ato omiskōimaxiki. Nāskaxō mā fāsikōi ato yoiā āto chaka xatenōfo. Nāskakē mā mā noko is-pamākai ato keskarama. Nāskakē mā ea fichisharapaikōi ē mato ōikanō mā isharakōiyamākī.

¹² Akka ēfe kirika kene fixō mā ea noiyānā mā ea nikakōisharamis. Akka ē kirika keneama, nā feronāfāke afara chakafaaōnoa omiskōimakāfe ixō. Askatari nā feronāfāke omiskōimanafoōnoari ē kirika keneama. Akka ē mato kirika kenexona mā tāpinō mā ea noimākai. Akka mā ea nikakōimis. Nāskaxō mā tāpitiro māmāi ea noikī Niospa ferotafī.

¹³ Nāskakē nō inimasharakōi, māmāi noko noisharakōiaino nikakōisharayanā. Akka Titori matōōnoax inimasharayamea. Nā Tito inimaifo ōi nōri inimaifinasharakōiyamea.

¹⁴ Akka Tito kayoamano ē yoiti iskakakī: “Na Corinto anoafō sharakōiifo,” ixō ē yoiti. Nāskakē Tito mato mēra kaano mā ifisharakōiyamea. Nāskakē ē matōōnoax rāfiyameama. Akka chanīma fisti nō mato yoimis. Nā ē matōōnoa Tito yoiā keskara chanīmakōi Titopa mato ōia.

¹⁵ Tito matoki nokoxō ōia mā rateaito mato ōita noko Titopa ferateneira ikax. Nāskakē pishta rateyanā mā Tito nikakōita. Nāskakē Titopa mato shinākī, mato noikī finakōi.

¹⁶ Ēri matoki inimakōi. Akka iskaratīa mē tāpia nā ē mato yoiāi keskara mā amiskē.

8

“Afarayaxō fetsafo ināsharakāfe,” ixō Pablo Corinto anoafō yoini

¹ Akka meka fetsari ē mato yoinō mā tāpinō. Mā Epa Nios Macedonia anoxō chanīmara faafono Epa Niospa ato noikī āto shinā mēraxō ato shināmashara fetsafori kori ināsharakōinōfo.

² Akka Macedonia anoax omiskōifikakī Niosnoax inimakōikakī, afaayamafiakaxō nā yora afaamaisfo ato afara fetsa ināsharakōiafo.

³ Akka nā ē ōia keskara ē mato yoinō. Fetsafāfe afaayamafiakaxō fetsafori ato afara ato ināsharakōiafo. Ato afaa fishkofafoma. Nāskakē atonā afaa ichapa nēteama.

⁴ Iskafakī ea yoiāfo ato ināsharapai: “Nā Jesús chanīmara faa fetsafāfe kori yopakani. Nāskakē nōri ato afara fomasharapai,” ea faafo.

⁵ Nō shināyamea kori fistis noko inākanira ixō, Jerusalén anoāfo a Nios Ifofaāfo ato foxopai. Akka noko kori ināyokaxoma taefakī Nios ināyameāfo, iskafakī yoiyanā: “Ifo, nōfi mefe yorakī nā mī noko afara amapayai keskara mī noko yoitiro,” ixō yoiyameāfo. Nānori yoiakāta nokori yoiyameāfo iskafakī Niospa fichipayai keskafakī: “Nōri nō mato nikakōinō,” ixō noko yoiyameāfo.

⁶ Titopa taefakī mato yoiyoni iskafakī: “Māto korifo ichafakāfe a afaamaisfo Jerusalén anoāfo ato ināxiakakī,” ixō mato yoiyoni. Nāskakē nō Tito yoiyamea iskafakī: “Nā mī yoisim keskafakī anā ato yoiife nā afaamaisfo Jerusalén anoāfo ato kori inānōfo. ‘Mā ato noikī mā ato kori inātiro,’ Corinto anoāfo ato yoiife,” ixō nō Tito yoiyamea.

⁷ Akka mā Jesús chanīmara fakī finakōiyanā mā Niospa meka mēstekōi yoisim, āfe meka tāpisharakōiyanā. Chanīmākōi mā Jesús yonoxosharakōiyanā mā noko noisharakōi. Nāskakē nā mā arafāfo shara faa keskafakī nā afaamaisfori mā ato ināsharaito. Niosxō mā ato noikōikī inimasharakōikai mā ato inātiro, fetsafo finōkōinīfōfā nā mā imis keskayanā.

⁸ Akka ēakōi ē mato yoima nā afaamaisfo mā ato kori inānō. Akka ē tāpipai fetsafāfe ato kori ināpaiyai keskafakī māri ato ināpaimākai. Askayamakī māto meka fistichi mā yoiaraka nō ato ināira ixō. Akka askakīma mā ato noikōiyanā mā ato ināsharaito.

⁹ Mā mā tāpia nōko Ifo Jesucristo nai mēranoax nāmā fotoyoamax afama mīstifoya iyopaoni. Afaakai yopapaonima. Nāskafixō noko noikōikī āfe afama mīstiffo keyokōi potāferani. Nāskax nokoōnoax afaamais iyopaoni nō aōnoax isharapakexanō.

¹⁰ Akka nā ē shinānoa ē mato yoinō ē mato yoinō. Akka mā xinia fisti finōa mā kai inimakōiyanā kori ichafaxō mā ato ināma. Akka taefakī nā afaamaisfo mā ato noikī mā ato kori ināpai mā fiyamea mā meka ato chipo ināxi.

¹¹ Nāskakē inimakōikī mā kori ichafakī taefati keskafakī iskaratīari inimayanā ato ināsharakāfe anā afaa yopanōfoma. Nā mā ato ināpaiyaito ato inākāfe.

¹² Akka mā ato ināpai mā ato inātiro. Askatari mā afarayaxō mā ato ināsharaito Epa Niospa tāpia. Askatari mā afara ichapayaxōma mā ato ināitori nāri Epa Niospa tāpia. Nāskakē inimakōi.

¹³⁻¹⁴ Akka ē mato iskafakī yoima: “Ichapakōi ato inākāfe,” ixō ē mato yoima. “Askatari keyokōi mā ato ināx mā afayaima,” ixō ē mato yoima. Akka iskaratīa mā afara ichapaya. Nāskakē nā afara yopai mā ato inātiro. Akka māri afara yopaito nāfāfe afara ichapayakaxori matori inātirofo. Mā askai mā ranā mā kexenōnāsharax mā isharakōitiro afaa yopaxikima.

¹⁵ Akka kirika ano Niospa meka kenea iskai: “Akka nōko xinifo tsōa istomaxō a piaifo Niospa ato ināpaoni. Akka nā ichapa fiato texefapaonima. Akka nā ichapama fiatori afaa yopapaonima,” ixō kirika ano Niospa meka yōra kenenī. Nāskakē yora fetsafo nō afara ināito, Niospari noko afara fetsafo noko inātiro nō afaa yopayamanō.

Tito fe rafeāfo

¹⁶ Ē matoōnoa shinākōiai keskafakī Titopari āfe ōiti mēraxō mato shinākōi, Epa Niospa shināmanaino. Nāskakē nō Epa Nioski inimakī nō aicho fai.

¹⁷ Akka iskafakī nō yoiyamea: “Corinto anoāfo anā ato ōitāfe ato yoisharaxikī,” ixō nō Tito yoiyamea. Nānori nō yoiaino inimayamea. “Aicho, ē ato ari kaikai ē ato yoisharai kaikai,” ixō noko yoiyamea. Akka ē shināi nō yoiāi fistiōnoax kaima. Āari matoki kasharapai kai.

¹⁸ Akka nā nofeta Nios Ifofamis fetsa nō Titoya nīchi. Nā nofe yora, nāatori Jesúsnoa ato yoisharamis. Nāskakē aōnoa keyokōichi meka shara yoisimfo.

¹⁹ Akka nā Nios chanīmara faafo tiito ichanākaxō na feronāfaka katonifo, nofeta nā kori yopaifo foxōikanō. Nios shinākī na kori nō ato ināyanā nōko Ifo shara fanōfo. Askatari nō mato feta nō ato ināpai tāpinōfo nō ato axosharapai.

²⁰⁻²¹ Nā afaamaisfo nō ato kori foxosharapai. Nāskakē yorafāfe ferotaifi nō ato ōimasharapai noko chakafakī mekafayamanōfo. Na kori ichapa nō ato foxosharapai noko iskafanōfoma: “Nōko kori ranāri oneāfo,” noko fanōfoma. Nāskakē nōko Ifāfe ferotaifi nā yorafāfe ferotaifi nō ato ōimapai nō isharakōixō.

²² Akka nā nofe yora nā Jesús Ifofamis fetsa Tito yafi nō mato nīchi. Nā feronāfaka mā nō ōimis nāato Jesús chanīmara fakōimis. Nofeta Jesús yonoxosharakōimis. Akka nāato mato nikamis mā Jesús Ifofasharakōixō nā afaamaisfo mā ato ināsharakōiaito. Nāskakē mato ari kapaimis mato feta ato shara faxikī.

²³ Akka mā mā Tito òimiski. Nāato efeta mato yonoxosharamiski. Nā efe rafemis Jesús yonosharaxoxiki. Nā Jesús chanimara faafo raferi afe mato ari fokani. Akka nā Jesús chanimara faafāfe ichanākaxō ato katonifo mato ari fonōfo. Nā rafeta Nios Ifofasharakòimisfo. Nāskakē ato katonifo mato ari fonōfo.

²⁴ Akka mato ari nokofaifāfe ato ifisharakòikāfe nā Nios Ifofaafa ato katonifo ato tāpinōfo mā ato ifisharaito. Mā ato askafaino nā ē matoōnoa yoisharamis keskara tāpitirofo chanimākōikē.

9

Nā Nios Ifofaafāfe Corinto anoafo feta Macedonia anoxō nā Nios Ifofaa fetsafori ato kori manamanifo

¹⁻² Akka nono Macedonia anoxō ē kirika kenexō ē mato fomakī ē mato yoikī iskafapaima: “Ato kori fomakāfe,” ixō ē mato yoipaima. Akka mē tāpia mā xinia fisti aka nā Jesús chanimara faa fetsafāfe afara yopaifāfe mā ato ināpaiyaito. Akka ē Macedonia anoafo ē yoikī iskafaa: “Acaya anoxori ato kori fomapaikani Judea anoafo,” ixō ē yoia. Ē ato askafaito nikakaxō akairi ato kori fomasharapaikani.

³ Nāskakē ē Tito yafi nā afe rafeafo ē matoki nīchi nā ē matoōnoa yoisharai keskara chanimākōikē tāpinōfo. Ē Macedonia anoafo ato yoimis iskafakī: “Nā Corinto anoafāfe mā itipinīshara faafo ato kori fomaxikakī,” ixō ē ato yoia. Akka ē Tito yafi a afe rafeafo ē nīchi mato ano nokokaxō òinōfo nā ē matoōnoa ato yoia keskara chanimamākī.

⁴ Akka Macedonia anoafori efe foaifono ē ato fe mato ano nokoxō òia mā kori ichafayamano ē mato rāfiaino māri mā rāfipaitiro.

⁵ Nāskakē ē shinā Tito yafi afe rafeafo rekē mato ari nīchixiki mato feta kori itipinīfanōfo ato fomaxikakī nā afaamaisfo. Akka afetiama mā mā shināxō yoiyoni: “Nā afaamaisfo nō ato kori fomanō,” ixō. Akka ē mato yoia: “Ato kori inākāfe,” ixō. Māakōi mā ato ināi. Akka nāskara shara mā ato ināpaiki mā ato inātiro.

⁶ Nāskakē shināsharakāfe. Akka nō fimi exe fisti fanaxō ichapa fitiroma. Akka nō fimi exe ichapa fanano nō fimi exe ichapa fitiro. Nāskarifiakī nō fetsafo afara ichapama inākē nokori Niospa ichapama ināxii. Akka nō inimayanā fetsafo ichapa ināito nokori Niospa ichapa inātiro.

⁷ Āto shinā mēraxō shināifo keskafakī fetsafo inātirofo. Nāskakē iskafakī shinātirofoma: “Ooa, ē ichapama ināpaiyaito ea yōkarifaito ē inā.” Askatari iskafakī shinātirofoma: “Akka ē ināyamaino ekeki òitifishkitiro. Akka ē ināi ekeki òitifishkiyamanō,” ixō anori shināyamakāfe. Askatamaroko inimayanā inākāfe. Nā fetsafo ato afara ināi inimamis nā Niospa noikōi.

⁸ Akka nā mā fichipaiyai tii keyokōi Niospa mato inātiro afara sharafo fetsa fetsatapafo mā afaa yopanōma. Askatari nā afara yopaifo mā ato ināno, Niospa keyokōi tāpia mato sharafo fafafaītiro māri fetsafo shara fanō.

⁹ Niospa meka aōnoax kirikaki kenea iskai:

Feronāfake sharapa nā afaamaisfo afara ichapa ato ināsharamis. Nāskakē Epa Niospa nā feronāfake axosharaino mēxotaima ato afara ināsharatiro, ixō keni.

¹⁰ Niospa fimi exefo onifani. Nāskakē nō fimi exe fanatiro. Chipa Niospa āfe fanafo foaimasharaxotiro pisharanō. Nāskarifiakī mā afara yopaito Niospa mato ināsharatiro. Afara ichapakōi mato ināno mā inimayanā nā Nios Ifofaafa Jerusalén anoafo mā ināsharafafāitiro.

¹¹ Chanīma, Niospa mato afaa fīshkoima afara ichapa mato ināi māri ato afara ichapa inānō. Akka nā afara yopaifo mā ato ināi nāfo nō ato foxoxii. Nāskakē inimayanā yoixikani iskafakī: “Aicho Epa Niosi, mī fāsi sharakōi,” ixō yoixikani.

¹² Akka mā ato afara ināsharaino nā afaamaisfāfe fixikani. Nāskakē mā fikaxō inimayanā Epa Nios yoixikani iskafakakī: “Aicho Epa Niosi, mī noko shara famis,” ixō yoixikani.

¹³ Mā ato afara ināsharano nā afaamaisfo inimākōixikani mā ato ināsharano. Nāskakē yoikī iskafaxikani: “Aicho Epa Niosi, nā noko afara ināifāfe mī meka nikasharakòimisfo. Jesús nōko Ifo mia famisfo. Mī ato yoia keskafakī noko ināsharafo. Fetsafori nāfāfe afara ato ināsharafo. Nāskakē mā nō ato tāpikōia chanimākōi mī Fake Jesús āto Ifokōi,” ixō nā afaamaisfāfe yoixikani.

¹⁴ Nāskakē mato Epa Nios kīfixoxikani. Mā Niosxō ato afara ināsharakē, yoikī iskafaxikani: “Epa Niosi, mīōxō na yorāfāfe noko afara ināsharafo. Aicho Epa, nō ato fāsi noikōi. Atori shara fafe,” ixō mato Epa Nios kīfixoxikani.

¹⁵ Aicho Epa Niosi, mī Fake Jesucristo mī noko ināsharakōini nofe rafesharapakexanō. Nāfi sharafinākōiakī aōnoa nō yoisharapaikōi nōkai tāpiama afeskaxomāi nō yoisharakōinō.

10

“Niospa ea nīchini Jesúsnoa ē mato yoinō” ixō Pablo ato yoini

¹ Iskaratīari meka fetsari ē mato yoisharapai. Efe yora mīstichi, ea nikasharakāfe. Jesucristokai meka mitsisipato noko yoimisma. Noko yoikī fenāmāshta noko yoisharamis nō āfe meka nikasharakōinō. Nāskarifiakī ēri Cristoōxō mato fenāmāshta yoisharapai mā tāpinō. Akka eōnoa yoikī iskafamisfo: “Pablo nofe ixō fenāmāshta noko yoiaito nō ōimis. Nāskafixō noko kirika kenexoni mitsisipakai noko kirika kenexonaito nō ōimis,” ixō ea yoimisfo.

² Ē matoki nokoxō fāsi mekakai ē ato yoipaima ea nikanōfo. Askafixō ea nikayamafai-fono fāsi kerexkai ē ato yoitiro. Akka nā ea chakafakakī mekaifafo ato nikayamakāfe. Akka eōnoa yoi iskafamisfo āa chanīkani iskakani: “Pablo noko yoi nā Nios Ifofaamafāfe yoiaifo keskara. Niospa shināōxōkai noko yoima,” ixō yoimisfo. Akka ē matoki nokoxō ē mato yoitiro nā Nios Ifofaamafāfe shināifo keskara ē mato yoimisma. Niospa shināi keskara fisti ē mato yoimis. Akka mē nokoxō fāsi mekakai ē ato yoixii tāpinōfo.

³ Chanīma, nono mai ano nō ika nā Nios Ifofaafoma fe. Akka nā Nios chanīmara faamafāfe fetsafo finōpaiyāifo keskai nōkai askamisma nā noko noikaspaifo ato finōxiki.

⁴ Akka a Nios Ifofaafoma a Satanās nikakī mato chanīkī tāpimapaikani mā anā Jesūs Ifofayamanō. Mato pārapaikani. “Nō Nios Ifofara,” ikani. Askatamaroko nō Nios nikakī nō mēxotaima yoimis chanīmakōi. Nāskaxō Nios āfe sharaōxō nō ato xatematiro afara chaka anā yoiyamanōfo.

⁵ Epa Niospa noko yoiaino nō fetsafo tāpimatiro āa chanīaifo, “Nō Niospa meka tāpisharakōiakī,” ikanaifo, kakapāiyāifo. Akka nō Niospa sharaōxō fetsafo nō ato tāpimatiro nā chanīmisfo Niospa meka tāpisharāfoma. Shara shināfoma. Epa Nios Ifofaima. Niosxō nō ato yoimis Nios Ifofanōfo.

⁶ Akka ea Jesūs nīchini āfe meka ē mato yoinō. Nāskakē mā Jesūs yafi ea nikakōixō mā anā afaa chakafayamaino ē mato afeskafatiroma. Akka mā noko nikakaspaito ē mato omiskōimatiro.

⁷ Akka mā ōikī shināi oa shara keskaraxō fetsafāfe yoiaifono iskafakī: “Cristo ea nīchini āfe meka ē mato yoinō. Akka Pablokai ea keskarama,” ixō mato yoimisfo. Akka nāfāfe shināsharakaxō tāpitirofo eari Cristo nīchinikē āfe meka shara ē mato yoinō.

⁸ Nōko Ifo Jesūs ea yoimis keskara ē mato yoitiro. Mato afaa chakafamatama nōko Ifo ē mato Ifofamasharapai mato ōiti fēpaxosharaxiki. Ē anori mato yoi ēa kakapaitama, ēroko mato yoisharapai. Ē anori mato yoikai ē rāfima.

⁹ Akka ē mato kirika kenexō ē mato ratepaima mā mesenōma.

¹⁰ Akka fetsafāferi eōnoa yoikī iskafamisfo: “Pablo noko kirika kenexokī noko fer-atekōiaito nō ōimis. Akka askafix nofe ikē nō ōia afaamakōi nō ōimis. Āfe mekakai mitsisipama,” ixō eōnoa yoimisfo.

¹¹ Nānori eōnoa yoifimifono ē mato ari samama kaxō ē ato tāpimaxii. Nā ē mato kenexona keskafakī nānorikōi ē mato yoixii.

¹² Fetsafāfe mato yoimisfo iskafakī: “Nōfi afara tāpikōiakī nō mato tāpimasharakōitiro,” ixō mato yoimisfo. Nāskarafo ichanākanax āa ranā yoinākani iskakani: “Noko keskarakai tsoama. Nores fisti nō tāpisharakōia,” ikanax kakapaimisfo. Nāfo tatimakōifo afaakai tāpifafo. Nāskakaxō nāfāfe anorima afara chaka yoimisfo. Akka ēkai ato keskarax ē sharakōi ē itiroma ēroko ato keskarax.

¹³ Akka nōkai anori yoipaitiroma. Nā Niospa noko yoiai keskara fisti nō mato yoitiro. Noko yoini āfe meka shara fisti nō mato yoinō. Nā fisti nō mato yoimis. Akka mā ika nā Niospa ea nīchini ano. Akka ē kani Corinto anoxō mato Niospa meka tāpimaxiki.

¹⁴ Nāskakē ori fetsa ari ē kanima, nā ea nīchini ano ē kani. Akka nā nō mato yoiai keskara chanīmakōi. Nōkai kakapaimisma. Nā Niospa noko yoiai keskara fisti nō mato yoitiro. Akka nō mato Niospa meka yoikī taefatani Jesucristoōnoa meka shara mā nikamiskēma.

¹⁵ Akka nā ē kamisma anoxō fetsafāfe ato yoiafono nō ato yoia ixō nō ato yoimisma. Akka nō mato yoi nā nō mato afara axosharamis fistiōnoa. Akka nā fetsafāfe mato axomisfoōnoa nō yoimisma. Akka mā mā Jesūs nikashari. Nāskapainō. Mēxotaima mā nikasharakōifafāinō. Akka mā ea ifisharakōiano mēxotaima ē mato yoisharatiro nā Niospa fichipaiyai keskafakī.

¹⁶ Nāskakē mai fetsa ari chaikōi mato finōfāi ē kapai Jesūsnoa ato yoixiki nā Niospa meka nikamifoma ari. Akka nārixō mā fetsafāfe ato yoiafono nō ato yoia, nō ipaima fetsafo imis keskai. Nōkai fetsafo ato yono xītikapaima.

¹⁷ Akka kirika ano Niospa meka kenea iskai: “Akka tsōakai āa yoimesharatiroma iskai ē afama mīsthi tāpikōiakī ikax āa kakapaitiroma. Askatamaroko nō yoisharatiro nā afara sharafo nōko Ifāfe aka,” ixō kirika ano yōra kenenī.

¹⁸ Akka fetsa āa yoimesharai akai afaama. Akikikai Nios inimatiroma. Akka Niospa fetsa na feronāfake sharakōi faax akiki inimakōitiro.

11

Pablo ato yōani āa chanīkani noko Niospa nīchiaki nō Niospa meka mato yoinō imisfoōnoa

¹ Iskaratīa ē mato yoinō, nā yora shināsharayamaito yoiāi keskara nānorikōi ē mato yoifīkikai askarakōi ē mato yoima. Nā mā ea nikamis keskafakī iskaratīa ea nikasharakāfe.

² Feronāfake kēroyapaikī āfe apa yōkatiro, nā kēro fixiki āfe āfi inō. Nāskakē apa āfe fake xotofake kexesharatiro feronāfake fetsa fe oxayamanō. Nāskax mā fianākanax fene fes fianātirofo feronāfake fetsafekairoko oxakatsaxakī. Nāskarifiakī ē mato Nios Ifofamakī ē mato kexesharani. Nāskaramāi Epa Niospa fichipaiyaino. Nāskakē mēxotaima ē mato kexeshari mā fetsafo nā chanīmisfo mā ato nikayamanō. Nāskakē mā nai mēra Nios ano kaax Cristo afe yorakōi mā ixii.

³ Nāskakē ē shināchakakōi Satanās Eva ani keskafakī fetsafāfe matori pārāyamanōfo, mato pārāifono mā anā Cristo noinōma.

⁴ Ooa. Fetsafāfe mato pārāpaikani. Nō Jesúsnoa mato yoisim keskara anori mato yoikōiyamafiaifono mākai ato xatematama mā ato chanīmara fai. Nō Niospa Yōshi Sharaōxō meka shara Jesúsnoa nō mato yoisim keskara anorikai afāfe yoikanima. Jesúsnoa anorima mato yoifīaifono mā ato xatemanama. Mā ato nikayanā mā yoisim iskafakī: “Aicho, mā nefe isharapainō,” ixō mā ato yoisim.

⁵ Akka mā shināi nāfāfe Niospa meka yoisharakōimisfora ixō. Akka askafīkaxō ea finōfafoma.

⁶ Akka, ŷmā shināimē ē yoisharatiroma? Akka ē Niospa meka tāpisharakōia. Nā ē mato yoiāi anori mēstekōi. Mā mā ea tāpikōia ē mato Niospa meka xafakīakōi yoisim. Nā keskara ē mato ōimafāīni.

⁷ Nā ē mato Niospa meka yoisim chāikai ē mato afaa yōkamisma. Ēkai mato afaa fīamisma, koriri ē mato yōkamisma. Ōitsai, ē mato chakafairaka ē mato kori fīakīma. Akka ē Niospa meka shara Jesúsnoa ē mato yoisim Niospa fakefo mā inō. Ē mato askafai afaamais keskara ē imis mā Niospa meka tāpisharakōinō.

⁸ Akka ē mato fe ikano nā Nios chanīmara faa fetsafāfe ea kori inānifo aō nā ē fichipaiyai keskara ē finō. Ōitsai, ē atoki yometsoa keskararaka nā kori fii mato Niospa meka yoi, ē mato yonoxomis keskaraxō.

⁹ Ē mato fe imis chāikai ē afara yopafikī ē mato fekaxtefamisma. Akka Macedonia anoafāfe Nios chanīmara faafo fēkaxō ea afarafo inānifo. Akka ē mato fe imis chāikai ē tsoa afaa yōkamisma. Askatari ē tsoa afaa yōkapakenakama.

¹⁰ Cristo āfe meka chanīmakōi. Nāskarari nā ē mato yoiāiri chanīmakōi. Nāskakē Acaya mai anoxō nā ē mato yoiāi keskara ea tsōa xatematiroma.

¹¹ Ē mato anori yoikī, ŷē mato noimamē? Maa. Anorikaima Niospa tāpikōia ē mato noikōi.

¹² Nā ē mato yonoxomis chāi ē mato afaa fīapaimisma. Iskaratīari ē mato afaa yōkaima. Nāskaxos ē mato yonoxoni nā chanīmisfo mā anā ato chanīmara fanōma. Nā ē yonoaito ōikaxō fetsafāfe yoisimfo iskakakī: “Nōri Pablo yonoai keskafakī nō yonoi,” ifiakaxō afāfekai ē yonoai keskafakī tsōa yonomisma.

¹³ Akka nāfo chanīmisfo. Ē ikai keskara ipaifīkani tsoa askakōimisma. “Cristo noko nīchia aōnoa āfe meka nō mato yoinō,” ixō mato yoifīkani afokai Cristo fe rafemisfoma.

¹⁴ Chanīma, Satanās nokoki nokotiro nā Niospa āfe ājiri fafēai ōitsa. Nāskarato noko yoitiro iskafakī: “Ēfi mato xafakīa yoiakai,” ixō noko feparapaitiro.

¹⁵ Akka nā Satanās yonoxomisfori nā keskara itirofo. “Nōri nō Nios yonosharaxomis,” ixō noko pārāpaikani. Nāskaiāfē ōikī Niospa ato omiskōimaki finakōixii. Nāskakē nāfāfe afara chakafakanax omiskōipakenakafo.

Pablo omiskōini Niospa meka yoikatsaxakī

¹⁶ Ē mato yoiāi keskara anā ē mato yoinō: “Pablo afaa tāpiama,” ixō eōnoa shināyamakāfe. Akka ea nikapaikī ea nikayokāfe. Nā yora fetsa afaa tāpiama mā nikamis keskafakī eari nikasharayokāfe. Ēari ē pishta yoimeyonō.

¹⁷ Nā ē mato yoiāi keskara a ēa ē yoimesharai ēfe Ifāfe ea anori yoiama. Akka nā afaa tāpiamafāfe anori yoisimfo.

¹⁸ Akka nā nōko Ifo chanīmara faafoma āa yoimesharaifo keskara nānori fetsafāfe mato yoisimfo. Akka iskaratīari ē mato yoi a ēari ē yoimesharai keskara.

¹⁹ Akka mā shināi mā tāpikōia. Nāskaxō nā afaa tāpiamafo mā ato nikamis. Akka afeskakī mato anorima yoifīaifono mā ato xatemamisma.

²⁰ Mato yoimisfo āto yonomati keskarakōi mato fakaxō, askatari mato kaxpa yonomamisfo. Nāskatari mato pāramisfo, askatari mato chakafamisfo, askatari mato īchamisfo. Mato askafaifono mā tenekōimis.

²¹ Mato askafakakī shinākaniraka nō mitsisipakōira ikaxō. Ooa. Nōkai mitsisipama oa ato akaifo keskafakī nōri mato askafapanā. Akka nōkai mato askafamisma nōkairoko ato keskaraxō.

Akka nāfo āa yoimesharakakī mato afara yoimisfo keskafakī ēari ē yoimesharatiro. Ooa. Nā afaa tāpīamafo keskaraxō anā ē mato yoi.

²² Akka nāfo, “Nō hebreos yorafo,” ikani. Akka ēri hebreo yora. Askatari, “Nō israeli yorafo,” ikani. Akka ēri israeli yora. Askatari, “Nō Abraham āfe fena,” ikani. Akka ēri Abraham āfe fena.

²³ Akka, ūnāfo fistimē Jesucristo yonoxomisfo? Maa. Akka ēroko yonoxokī finakōimis. Ooa. Ē iskafakī ē mato yoi oa shināsharayamaito yoiāi keskaraxō ē mekai askayamapaifi. Akka nā chanīmisfāfe mato yoikī iskafakani: “Nō Jesús yonoxokōimis. Askatari Jesúsxō noko karaxa mēra ikimanafo,” imisfo. Akka ēroko yonokī finakōimis. Nāskakē earoko karaxa mēra ikimakī finakōimisfo. Askatari ea koshakī finakōimisfo. Ea askafakī fetsaifono mē nakerakōimis.

²⁴ Efe yora judeofāfe ea koshakakī cinco veces fakī ea koshamisfo. Nā ea koshaifo tii treinta y nueve ea famisfo.

²⁵ Romano xanīfofofāferi āto chāti ea koshanifo tres veces fakī. Askatari ēfe kaifāferi tokirifāfe ea tsakakī fisti fanifo. Askatari kanōanāfānē ē pokefanaino kanōanāfā fakafā fospia ikiaino mē āsakerani. Mā kanōanāfā fakafā mēra ikiano nā kanōanāfā āfe kaxke ē fakafā mēnāno ē nononi āsaxikima. Fakish fisti ita pena fistiri ē ini.

²⁶ Mē kafāsamis, faka faiyaito mesekōi ē ōimis; askatari yometsoafāfe ea achikaxō ea mesenifaifono mē ōimis; askatari ēfe kaifokōifāfe ea mesenifaifono mē ōimis; yora fetsafāferi ea mesenifaifono mē ōimis; pexefā rasi anoxori ea mesenifaifono mē ōimis; tsōa istomaxori ea mesenifaifono mē ōimis; fakafā anoari mesekōi mē ōimis; “Nōri Nios Ifo sharakōifamis,” ikax a chanīmisfāfe ea mesenifaifonori mē ōimis.

²⁷ Ē omiskōiyanā ē yonomis xokenākōiyanā; askatari ē oxa tenekōimis; askatari ē fonāiyanā nomi tenekōimis; askatari ē pimisma; askatari matsi mei ē omiskōikōimis rapatimais ikax.

²⁸ Nāskarafo ē mei ē omiskōikōimis. Askatari afara fetsafoōnoaxri ē omiskōimis. Askatari mēxotaima ē mato shinākōimis nā mā ichanāxō keyokōichi mā nōko Ifo Jesús Ifofamis tii mā kachikiri fayamanō.

²⁹ Akka ē nika fētsa Jesús Ifofasharapaifi rateaino ē aōxō shināchakakōitiro. Akka fētsa a Nios Ifofaa afara chakafamakē ē akiki ōitifishkikī rāfikōitiro.

³⁰ Akka nā ē mato rama yoiāi keskara kakapaikī ē mato yoima. Ē mato yoi mā tāpinō ēa ē afaa atiroma.

³¹ Nā Nios fisti nōko Ifo Jesucristo āfe Apa, nāato tāpikōia ēkai chanīmisma. Iskafakī nō yoinō: “Epa Niospa, mī sharafinākōia,” ixō nō yoipakexanō.

³² Akka Aritas xanīfokōi iyopaoni. Nā Aritas fetsa nīchimi Damasco anoax xanīfo inō. Damasco ano ē ikano, nāato āfe sorarofo yoini nā pexe rasi anoxō āfe kāiti anoxō ea kexenōfo ea achixikakī.

³³ Akka anoxō ea achipaiyaifono, nā nōko Ifo Jesús Ifoafaafāfe fēta efapa mēra ea onekaxō pexe rasi kene fomākīaxō ea fotomanifo ē katanō.

12

Pablo āfe namapa ōiai keskara ōini Niospa tāpimanaino

¹ Akka ēa ē yoimesharai. A ēa ē yoimesharai keskarakai akai afaama. Nāskafekē nōko Ifo Jesús ea ōimana keskara ē mato yoinō. Nā ēfe namapa ē ōiai keskara ea ōimana. Nā tsōa nikamisma ea tāpimani. Nānori ē mato yoi.

² Mā catorce xinia finōa a Niospa ea ifrisafayoni, ē Cristo fe rafeaito ōikī. Ēkai tāpīama ēfe fero mēsho fisti nai mēra kani rakikīa, askayamai ēfe yora kani rakikīa. Nios fisticchi tāpia a ē ini keskara.

³⁻⁴ Niospa nā ika ano ea ifrisafayoni. Nā ē mato yoiyoa keskara anā ē mato yoi. Ēfe yora iyamai ēfe fero mēsho fisti kani rakikīa ēkai tāpīama. Nios fisticchi tāpia nā ē ini keskara. Nā ika anoxō ea afara nikamani keskara ē tsoa yoitiro. Akka ea yoikī iskafani: “A mī nika keskara tsoa yoiyamafe,” ixō ea Niospa yoini.

⁵ Ē nā ōia keskara ē fetsafo yoipaima iskafakī: “Niospa ea fisti nā ika ari ea ōimani,” ixō ē yoitiro. Ē anori yoipaima. Anori ē yoi kakapaimis ē itiro. Ēkai ēa ē yoimesharapaima. Ereskai ē afaa fatiro. Nāskakē nā fisti ē yoimis inimakī.

⁶ Akka ãa ãe yoimesharai ãe yoimetro. Ë anori yoi nã yora afaa tãpiamafãfe yoimisfo keskara ãe yoima. Chanĩmakõie eõnoa ãe yoimesharatiro. Akka ãakai eõnoa ãe yoimesharapaima eõnoa shinãkĩ finakõinõfoma. Mã ea õimis ãe afe keskaramãkĩ, askatari mã ea nikamis ãe afe keskara yoimismãkĩ.

⁷ Akka Epa Niospa a ika ari ea õimani keskara tsõa õimisma. Akka Niospa ea õimaniõnoax ãa ãe yoimesharapaitiro ãe tãpikõiara ikax. Nãskakẽ Niospa nẽtefayamano Satanã ea isinĩ imani nã nõ mohaxkĩ chachiano noko mõxa fekaxtefai keskafakĩ ãa ãe yoimesharayanãõ.

⁸ Nãskakẽ ãe kĩfikĩ iskafani: “Ifo, ea sharafafe,” ixõ tres ves fakĩ ãe yõkani.

⁹ Ë askafaito nõko Ifãfe ea kemakĩ iskafani: “Ë mia noi. Askafixõ ãe mia sharafaima. Cristo mia axotiro na pae mĩ tenenõ ãe mefe rafekakaini. Mĩ mĩtsisipayamafikẽ ãe mĩõxõ ãe ato õimatiro ãe afama mĩshti fatiro,” ixõ ea kemani. Nãskakẽ ãe isinĩ ifiai ãe inimasharakakaini.

¹⁰ Nãskakẽ ãe mĩtsisipayamafix Jesucristoõnoax ãe inimakõini. Nãskaxõ ea icheifono ãe tenemis, afaayayamaxri ãe inimakõimis ea omiskõimanaifonori ãe tenemis. Nãskatari afarafo fekaxkõifekẽ ãe tenemis. Ë askafakĩ ãe mĩtsisipayamafixõ Jesucristoõxõ ãe afama mĩshti fatiro.

Pablo nã Nios chanĩmara faafo Corinto anoafo ato shinãkõini

¹¹ Akka nã yora afaa tãpiamafo ãa yoimetrofo keskaraõ ãa ãe yoimea. Akka mã eõnoa afaa yoisharama. Akka mã ea õisharakĩ, “Nã Pablo sharakõ,” ixõ mã eõnoa yoiano nã sharakõie ikerana. Nãskakẽ ãa ãe yoimesharakõie fetsafãfe ea tãpinõfo ãe afe keskaramãkĩ. Akka ãakai ãe afaa asharatiroma. Ëkai afaama. Nãskafekẽ nã eõnoa afara chaka mato yoimisfãfe ea finõkanima.

¹² Jesucristo ea nĩchini aõxõ ãfe meka ãe mato yoinõ. Nãskakẽ tanaimakõie ãe yonomis fena fenakima. Nãskara ãe yonofaino Niospa afama mĩshti amis eõxõ mã tãpinõ Jesucristo ea nĩchinikẽ.

¹³ Akka, ¿afeskakĩ mã iskafakĩ shinãimẽ? “Pablo nã Nios chanĩmara faa fetsafo ato shara fai keskafakĩ nokori shara faima,” ixõ mã eõnoa yoitiro. Akka nã Nios chanĩmara faa fetsafori ãe ato shara fai keskafakĩ, nãskarifikĩ ãe mato sharafa fafãfãini. Ëkai mato afaa fiapaimisma. Askatari ãe mato fekaxtefamisma. Ea pimakape ea rapati safemayanã ãe mato famisma. Oĩtsai, ãe mato afaa fiapaikima ãe mato chakafaamakĩ ea raefakãfe.

¹⁴ Mẽ mato ari kai rafea. Akka iskaratĩa mẽ itipinĩsharax anã ãe mato ari kai. Ë mato amis keskafakĩ anã ãe mato yõkakĩ fekaxtefaima. Ë mato afaa fiapaitama ãero mato shinãfãfãini. Shinãkapo. Fakefãfekai apa yafi afa pimatiro. Akka afa fetaroko apa fakefo pimatiro. Akka mãfi ãfe fakekõifo keskarakõie. Akka ãe mato Niospa meka tãpimasharakõia eõnoax mã isharanõ.

¹⁵ Akka ãe afarafo fikĩ mẽ kori potakĩ keyokõia, askafafixõ ãe shinãchakaima, askatari ãakõie ãe inãmei mã Niosnoax isharakõinõ. Akka ãe mato noikĩ finasharakõiefianokai oĩtsai mã ea noikĩ finasharakõimisma rakikĩa.

¹⁶ Akka ãe mato afaa yõkamisma. Akka fetsafãfe mã Corinto anoafãfe eõnoa yoimisfo iskafakakĩ: “Akka mã nõ tãpia Pablo mato afaa yõkamisma. Askafixõ mato pãraxõ mato kori fiãmis, Judea anoafo ãe ato foxotanõra,” ixõ.

¹⁷ ¿Nã feronãfakẽfo ãe matoki nĩchinioxõ ãe mato pãramẽ ãe mato kori fiãxiki? Maa.

¹⁸ Ë Tito yoini iskafakĩ: “Corinto ano katãfe,” ixõ ãe yoini. Nã nõko Ifo chanĩmara faa fetsafori ãe matoki nĩchini. Akka, ¿Titopa mato pãramẽ mato afara fiãxiki? Maa. Mẽ tãpia Titopakai mato afaa fiapaimisma. Nã ãe mato fe imis keskai ari mato fe imis. Noko rafeta nõ mato yoimis. Nãskara fisti nõ mato afara shara faxopai noko rafe nõ mato fe imis.

¹⁹ Mã shinãiraka ãe mato yoiai keskara mã eõnoa shinãsharanõ. Maa. Anorikaima. Epa Niospa nã ãe yoiai keskara ea nikamis Cristo ea shinãmaino. Efe yora mĩstichi, nã ãe mato yoiai keskafakĩ ãe mato shara fapai Jesús shinãie keskafakĩ mãri mã shinãsharanõ.

²⁰ Akka ãe tãpiama, oĩtsai, ãe ari nokoxõ õia a ãe yoiai keskai mã isharayamakẽ ãe mato fichikai. Askatari ãe matoki nokoaino oĩtsai, mã ekeki inimaima rakikĩa nã mã shinãie keskai. Akka ãe matoki nokoxõ õipai mã mã chaka xatexõ mã Jesús Ifofasharino. Akka ãe matoki nokoxõ õia mã chaka xateyamano ãe shinãmitsatiro. Mã fochishpanã faatanãta, fẽtsa fiãiti mãrifĩ mã fiãpaita, fetsa mekafata, õitifishkita, mares fisti mã fiãpaita, mã chanĩta, fetsafo mekafata, nõ tsoa keskarama ita, isharayamata, mã askaito ãe mato õipaima.

²¹ Nãskatari ãe shinãchakakõie, shinãyanã oĩtsai Niospa atoõxõ ea rãfimaniraka ixõ ãe shinãie mã isharayamaino. Mã askaino ãe matoki nokoax ãe rãfikõixii mã afara chakafaino. Akka ranãri mã isharapaonima. Mãto ãfima fe mã oxapaoni. Askatari kãrofori ãto fenema fe oxapaonifo. Nãskatari afara chakafo fetsa fetsatapafo mã apaoni. Akka mã xateyamaino ãe nokoax ãe mato õie ãe shinãmitsakõixii, rãfikõiyãnã.

13

Pablo iskafakī ato yoini: “Anā afaa chakafayamakāfe,” ixō ato yoini

¹ Mē mato ōikī rafe faa. Iskaratīari anā ē mato ōikaikai. Ē anā mato ōikaikai mā mato chaka mā xateamāki. Akka kirika ano Epa Niospa meka kenenifo iskafakī: “Ētsa afara chakafaito ōixō yōfaito, ‘Nato afara chakafaa,’ ixō rafeta yoiiaifono, askayamakī trespa yoiaino askayamakī ranāfai yoiiaifono chanīmara nō fatiro,” ixō kirika ano Niospa meka kenenifo. Nāskafakīri ē mato ano nokoxō ē nikai mā afara chakafaito mā afara chaka xateyamaito. Akka ē mato ōitiro mā chaka ikamāki, askayamai shara mā ikamāki.

² Akka anā ē mato ano kayoxō mē mato yoiyoni mā afara chakafanōma. “Mā afara chakafakī xateyamaino ē mato omiskōimaxii,” ixō ē mato yoiyoni. Anā iskaratīari chai ixō ē mato yoi kirika kenexō iskafakī: “Ē anā kaxō ē mato ōikai mā mā chaka xateamāki. Akka mā chaka xateyamaito ē mato omiskōimaxii. Akka tsoa pishtakai ē finōmaxima.”

³ Akka mā tāpipai Cristo eōxō mato yoiaino. Chanīma, mā samama tāpinō xafakīakōi ē mato ōimani. Akka ēakai ē mato yoima, Cristoōxō ē mato yoi. Jesucristo mitsisipakōikai mato tāpimani mato chaka mā xatenō.

⁴ Chanīma, Jesucristo nokoōxō ifi cruz ikakī mastaifono nā feronāfaka pachikōi keskara ini. Nokoōnoax nai āakai ifimenima. Nāskafinixakī iskaratīa Niospa sharaōnoax nia. Nāskarifiāi nōri mitsisipama. Nāskafixō Jesús feta nā Niospa apaiyai keskara nō atiro Epa Niospa sharaōxō.

⁵ Akka mato shinā mēraxō shināsharakāfe chanīmamākī mā mā Jesús Ifofasharamākī. Māa tāpimesharakāfe. Akka, ėmā mā tāpīamē Jesucristo mato fe ikano? Askayamai mā mā chanīmis rakikīa nō Jesús Ifofaira iflaxō mā Ifofaama.

⁶ Akka mā mā ea ōikī tāpia ē Jesucristoōxō yonosharakōimiskē mato mēraxō. Nā mā chanīmara fakōipainō.

⁷ Ē mato Epa Nios kifixomis mā afaa chakafanōma. Nokoōnoa shinānōfo ixokai ē Epa Nios kifimisma. Iskafakī fetsafāfe nokoōnoa shinākani rakikīa: “Pablo fe rafeafāfe ato yonoxosharafoma,” ixō nokoōnoa yoikani rakikīa. Akka noko askafafiaifono mā Jesús Ifosharakōifai nāskara nō fichipai.

⁸ Akka Niospa meka shara fistiōnoa nō yoitiro. Aōnoakai meka chaka nō yoitiroma āfe mekamāi sharakōikē.

⁹ Akka fetsafāfe nō afama noko askafakī shināfiaifono nō shināchakaima. Akka mā Jesúsnoax isharakōikē nō fāsi inimakōitiro. Akka nō mato Epa Nios kifixona mā a keskara sharakōi inō.

¹⁰ Akka ē mato kirika kenexona mato ari kayoxoma mā ea nikanō. Mē mato ari nokoxō ōia mā Cristo Ifo sharakōifaino ē mato ōitoshinō. Nāskakē mā isharakōiaino Niosxō fāsi mekakai ē mato yoima mā isharakōinō. Epa Niospa ea yoiā ē mato yoisharanō mā Nios Ifo sharakōifanō isharakōixō.

Mā Pablo āfe meka xatekī ato yoisharani

¹¹ Mē mekai xatekī ē mato yoisharai. Jesús keskara isharakāfe. Ea nikasharakāfe. Nānori fisti shinākāfe. Isharakāfe. Mā askaino Niospa mato noikōikī mato inimamasharai āfe Yōshi Sharaōxō mato fe ixō.

¹² Keyokōi nā mā Nios Ifofaa tii yoinōnāsharakāfe.

¹³ Keyokōi nōko Ifo Jesús chanīmara faafāfe nā efe ikafāfe mato yoisharapaikani.

¹⁴ Nōko Ifo Jesucristo mato axosharapai. Epa Niospari mato noikōi. Niospa Yōshi Shara mato fe rafepakexanō. Nā tii.

Ēkīa Pablo

Pablo Galacia Anoafo Kirika Kenexõ Fomani

Galacia anoxõ Nios Ifofaafõ Pabla ato kirika kenexõ fomani

¹ Ëkĩa Pabla, ã mato kirika kenexõ fomai. Niospa ea nĩchini aõnoa meka shara ã ato yoinõ. Yorafãfe ea nĩchinifoma, Jesucristo feta Epa Niospa ea nĩchini. Nã Niospa Jesucristo ofofani mã nakẽ.

² Mã Galacia anoxõ Nios Ifofakẽ, na nono efe ikafãfe, akairi Nios Ifofakaxõ efeta mato kirika kenexõ fomakani.

³ Epa Niospa nõko Ifo Jesucristo feta mato noikĩ mato sharakõĩ fanõ. Askatari mãto õiti mẽranoax mã anã fekaxtenõma.

⁴ Nõ afara chakafamisno nokoõnoax Jesús nani nõko chaka noko soaxoxikĩ, askatari nã yorafo chakafo mẽranoa noko ifixikĩ Epa Niospa fichipaiyai keskafakĩ.

⁵ Nãskakẽ Nios sharakõĩ mẽxotaima fapanakafo. Nãskapakexapainõ.

Anã ano meka fetsama a nikax Epa Nios fe nõ ipaxanõ. Akka Epa Nios fistichi noko nimapakenaka

⁶ Ooa. Epa Nios potakanimara ixõ ã shinãmis, koshikõĩ kachikiri fayana mã potafiaino, Cristo mato noiaino Epa Niospa mato katofinino. Epa Nios fe ipaikakĩ ãfe meka shara nikafiyana, meka fetsa fetsatapafa nikakakĩ kachikiri famisfo.

⁷ Akka anã anokai meka fetsama, a nikax Nios fe nõ ipaxatiro. Akka nã Nios Ifofaafãfema mato fekaxtefakani. Meka fetsafaxõ anorima mato yoipaikani, Cristoõnoa meka shara mã nikapaifaio a nikax afe ipaxakĩ.

⁸ Akka fetsafãfe Nios fe mã ipaxanõ Niospa mekaõnoa mato yoifikakĩ, meka fetsafaxõ anorima mato yoikani, mã nõ mato yoifimisno. Nã keskara yorafo nã omiskõipakenakafo mẽranoax omiskõipakenakafo, ã iyamai Niospa ajiri itiro nai mẽranoax oax.

⁹ Nã ã taefakĩ mato yoiyoni keskafakĩ, iskaratĩa anã ã mato yoi. Fetsafãfe Nios fe mã ipaxanõ Niospa mekaõnoa mato yoifikakĩ anorima mato yoikani, mã nõ mato yoifimisno. Nãnorĩ mato yoikanax nã omiskõipakenakafo mẽranoax omiskõipakenakafo.

¹⁰ Ë yoiĩ iskafaino, yorafãfe eõnoa yoisharanõfora ixõ ã shinãima, askatamaroko Niospa eõnoa yoisharanõ. Ëkai yorafo eõnoa shinãmasharapaima. Akka yorafo eõnoa shinãmasharapai, ãkai Cristo yonoxomis itiro.

Jesucristo ea nĩchini ãfe meka sharaõnoa ã ato yoinõ

¹¹ Efe yora mĩshitchi, xafakĩakõĩ ã mato yoipai. Na meka shara Jesucristoõnoa ã mato yoimis nõ afe ipaxanõ. Na keskarakai yorafãfe ato shinãmã shinãmisfoma.

¹² Na meka shara ã mato yoimis keskara yorafãfe ã tãpimanifoma. Tsõarikai ã tãpimanama. Askatamaroko nõko Ifo Jesucristo ã tãpimana keskara ã mato yoimis.

¹³ A ã ipaoni keskara mã mã nikapaoni. Ëmãĩ judeoxõ a nõko xinifãfe yoipaoni keskara ã nikayopaoni. Mã mã tãpia mitsisipakõikai a Nios Ifofaafõ ã ato omiskõimapaoni, anã Nios Ifofayamanõfora ixõ.

¹⁴ Nõko xinifo judeofãfe yoipaonifo keskara ã nikakõini, ãfe kaifofo ã ato finõkõini, efe yosifinifono. Ë nikakõikĩ a ãfe xinifãfe yoipaonifo keskara ã nikakĩ finakõini.

¹⁵ Akka taefakĩ Epa Niospa ã katoni ã fakeyoamano. Ea noikõikĩ ã katoni. Nãskakẽ ã tãpimapaikĩ ã askafani.

¹⁶ Nãskaxõ ãfe Fake ã tãpimani ãfe meka shara a judeofoma ã ato yoinõ afe ipaxanõfo. Nãskakẽ ã rama Jesús Ifofakĩ ã tsoa yõkaikai kanima ã tãpimanõ.

¹⁷ Nãskakẽ Jerusalén ano ã kayonima a taefakĩ Jesúsnoa meka sharaõnoa yoimisfo ato õikai. Askatamaroko Arabia mai ano ã kani. Nãskata Damasco ano anã ã oni.

¹⁸ Nãskata Jerusalén ari fena ã kayonima, mã xinia tres akax ã kani. Nãnoxõ ã Pedro tãpini, nãno ã afe oxa ranãyonĩ quince nia ã ini ano oxal.

¹⁹ Akka nã Jesús fe rafemisfo fetsafori ã õinima. Nõko Ifãfe ãfe exto Santiago fisti ã õini.

²⁰ Niospa ferotaifi ã mato yoikõĩ, na ã mato kirika kenexokĩ chanĩmakõĩ ã mato yoi.

²¹ Nãskata chipo Siria yafi Cilicia mai ano ã kani.

²² Akka Judea mai anoxõ Cristo Ifofafiakaxõ ã tãpiayonifoma.

²³ Ea õiyamafikatsaxakakĩ eõnoa iskafakĩ yoiaifãfe nikapaonifo: “A na feronãfãke taefakĩ noko omiskõimapaofinixakĩ, iskaratĩa Jesúsnoa meka shara ato yoifõfãsafai. Askatari noko keyokõĩ omiskõimakĩ noko xatemapaipaoni nõ anã Jesús nikanõma,” ixõ eõnoa yoinifo.

²⁴ Nãskaxõ eõxõ Epa Nios aicho fakani, mã Pabla Nios Ifofara ikaxõ.

2

“Na Pablori noko ani keskafakī Jesús katoa aōnoa āfe meka shara ato yoinō,” fanifo

¹ Mā catorce xinia finōta Jerusalén ano anā ē kani Bernabé fe. Titori ē iyoni.

² Ē ari kani Niospamāi ea yoiano. Nā Jerusalén anoxō xanīfofo fes ichanāxō ē ato yoini a judeofoma Niospa meka sharaōnoa afe ipaxanōfo ē ato yoyimis keskara. Nāskakē ē ato yoini: “A ē ato yoyimis keskara sharamamākī, mī shara yoyimiski ea fakanimākai,” ixō ē ato yoini.

³ Nāskakē tsōakai Tito afaa fanima efe oiano. Tito judeoyamafiano foshki repa xatefe tsōa fanima.

⁴ Nānoa fetsafo nō Nios Ifofara ikanax one ikikanax nofe ichanānifo, Nios Ifofayamafi-akanax. Nāfāfe yoinifo iskafaki: “Titopari foshki repa xatetiro,” ixō yoinifo. Nāfāfe noko ōipaikani ikiafo ini, chanīmamākī tāpipaikakī afeskax Cristo Jesús Ifofaax nō ikamāki. Noko anā yonomapaikani nō Jesucristo Ifofanōma a Moisés yoini keskara fisti nikanōfora ixō noko anā yonomapaikani.

⁵ Akka nāfāfe noko yoipaiyaifono nō ato nikamisma. Akka nō fichipaimis nā meka shara chanīmakōi Jesucristoōnoa mā nikakōinō afe ipaxaki.

⁶ Akka a xanīfofofāfe ē ato fe ichanāino, “Nā mī ato yoiari anori sharamaki, meka fetsa shara ato yoife,” ea tsōa fanima. Akka afo xanīfofofiano ē atoōnoa shināchakaima. Nāskarifiakī Niospa nōko femānāōxō noko onāima, akka Niospa noko tāpikōia.

⁷ Meka fetsa shara ea yoitamaroko, afāfe tāpinifo a Niospa āfe meka ea yoini keskara a judeofoma āfe meka sharaōnoa ē ato yoinō afe ipaxanōfo. A Pedro yoini keskafakī judeofo na meka sharaōnoa ē ato yoinō.

⁸ Nā Nios fistichi Pedro nīchini judeofo mēra āfe meka sharaōnoa ato yoinō. Nāatori ea nīchini a judeofoma mēra ēri a judeofoma āfe meka sharaōnoa ē ato yoinō.

⁹ Nāskakē Santiago ikaino Pedro ikaino Juan ikaino, afāfe a Nios Ifofaafō ato ikikaxō ea tāpinifo Niospa ea nīchinino nā meka sharaōnoa a judeofoma ē ato yoinō. Nāskakaxō ea yafi Bernabé noko metakaxanifo. Noko askafakāta nokoki inimakaki noko yoikī iskafanifo: “Aicho, judeofoma mēra kaxō Niosnoa meka shara mā ato yoitiro,” noko fanifo, judeofoma mēra kaxō Niospa meka sharaōnoa nō ato yoikanō, akka afāfemāi nā judeofo Niospa meka sharaōnoa ato yoikakī.

¹⁰ Akka noko yoikī iskafanifo: “A afaamaisfo ato shināmakiyamakāfe. Afarayaxō ato inākāfe,” ixō noko yoinifo. Askara yoikī ea inimamanifo ērimāi a afaamaisfo ē ato ināsharamiskē.

“Na mī akai keskara sharama,” Pablo Pedro fani Antioquia anoxō

¹¹ Akka Pedro Antioquia pexe rasi ano kaxō afara chakafaino āfe ferotaifi ē yoikī iskafani: “Na mī akai keskara sharama, mī chakafai,” ixō ē yoini.

¹² Akka taeyoi a judeofoma feta pipaonifo. Nāskaifono chipo a Santiago fe rafeafo fenifo. Mā feafono judeofoma makinoax Pedro paxkani anā ato feta pinima a rama feafoki atoki mesekī mī chakafai na judeofoma feta mī pii ea fatirofora ixō. Nāskakē anā a judeofoma feta pinima. Akka a judeofo rama feafāfe ato yoikī iskafanifo: “Mā Nios ari kapaikī mātō foshki repa mā xatetiro,” ixō mēxotaima ato yoinifo.

¹³ Nāskakē a judeofori Nios Ifofakanax nā Pedro ikai keskanifo. Nā Bernabéri ato fe askani.

¹⁴ Akka nōko xinifāfe Niospa meka sharaōnoa noko yoinifo nō afe ipaxanō anori Pedro nikayamaito ōikī yorafāfe ferotaifi ē Pedro yoikī iskafani: “Mī judeo. Akka a judeofoma fe mī imis, nāskax judeoma keskara mī imis. Akka, ¿afeskakī a nōko xinifāfe yoipaonifo keskara a judeofoma mī ato yoipaimē, judeofo keskara ixō?” ē Pedro fani.

Judeofo a judeofoma feta Nios Ifofakanax Nios fe ipaxatirofo

¹⁵ Akka nō judeokōifo nō sharakōifo nō afaa chakafakī finakōimisma na yora fetsafāfe amisfo keskafakī.

¹⁶ Askatamaroko mā nō tāpia a Moisés noko yoini keskaraōxō nōko chaka nō soatiroma Niospa noko omiskōimanōma. Akka nō Jesucristo Ifofaito nōko chaka noko soaxotiro, nō askainokai noko omiskōimaxima. A Moisés yoini keskara nō shināito nōko chaka noko soaxotiroma. Akka Jesucristo fisti nō Ifofaito noko omiskōimaxima.

¹⁷ Nōfi Cristoōxō nōko chaka nō soatiroki noko omiskōimanōma. Nāskara mā nō tāpifixō nō afara chakafamis. Akka nō afara chakafaito, ¿Cristo noko afara chakafamapaimē? Maa, askarama. Noko afaa chakafamatiroma.

¹⁸ A Moisés noko yoini keskara mā nō tāpia, aōnoaxkai Nios fe nō nipaxatiroma. Jesús fistichi nōko chaka noko soaxotiro nō afe nipaxanō. Nā nō chanīmara fai. Akka a Moisés keni keskara afianā nō nikapai nō fenotiro Nios fe nō ipaxatiroma.

¹⁹ Akka a Moisés yoini keskara ayamakī mē tāpia ēkai aōnoax isharatiroma. Ē askaino Epa Nios ekeki inimatiro. Nāskakē nāfoōxō mē tāpia Cristo fisti ē chanīmara faino Epa Nios ekeki inimatiro. Nāskax ē afe yora itiro. Akka iskaratīa a Moisés yoini keskaraōnoa anā ē shināpakenakama, atokai ea ikipakexatiroma. Askara shināntamaroko Nios fisti fe ē rafei afe isharaxiki.

²⁰ Nōko Ifo Cristo ifi cruz ikaki mastafono nani keskai ēri ē afe naa keskarakōi ini. Nāskakē iskaratīa a ē ipaoni keskara anā ē ikima. A ē Jesús Ifofayamax ē ipaoni keskara anā ē shināima. Niospa Fake Cristo ea noikōi nā ipaiyai keskakī ea nāxoni. Nāskakē ē chanīmara faino iskaratīa Cristo efe ika a keskara shara ea imaxiki.

²¹ Akka Epa Niospa āfe Fakeōxō ēfe chaka ea soaxoni ē afe nipaxanō. Ēkai afaa fetsa shināmisma nisharapakexakī, Nios fisti ē shinākōimis Nios fe nipaikī. A Moisés kenenioxō nōko chaka nō xateax Nios fe nō nipaxafiatirono Cristo noko nāxokeranima. Āakōi Cristo noko nāxokerani.

3

A Moisés yoini keskara nō nikayamakī nō Jesús chanīmara fakōinaito nōko chaka noko soaxotiro

¹ Efe yora mīshtichi Galacia anoafāfe, māfi oa yōra shināsharaima keskarafoki. Akka, ¿tsōa mato paraimē oa mato parakani afianā mā shināsharanōma? Akka nō xafakīakōi mato yoisim Jesús Cristo ifi cruz ikaki mastafono matoōnoax nani. Nō mato yoisharafimisno meka fetsa nikakī mā anorima shināmis.

² Akka ē mato yōkapai mā ea yoinō a Moisés noko yoini keskara tāpixō mā Niospa Yōshi Shara fiamāki, askayamakī Jesucristoōnoa meka shara nikaxō mā fiamāki.

³ Niospa Yōshi Sharaōxō Jesús mato amapaiyai keskara mā ayopaoni. Akka iskaratīa mā shinākī iskafai: “A Moisés noko yoini keskara nikax nō isharatiro,” ixō mā shināmis. Ooa. ¿Afeskakī oa yorafāfe shināsharaifoma keskara mā shināimē?

⁴ Mā Jesús Ifofaino mato omiskōimapaonifo, askafikī Niospa Yōshi Sharaōxō mā Jesús Ifofasharamis. Akka afianā mā Jesús Ifofayamai mākōi kaxpa mā Jesúsnoax omiskōipaoni. Mā askayamapainō.

⁵ A mā nikamis keskara mā mā chanīmara fakōina. Nāskakē āfe Yōshi Shara mato mēra naneyanā, tsōa atiroma keskafakī afama mīshti mato faxōfa. Moisés kenenioxokai mato askafaxōama.

⁶ Shinākapo. Abraham Nios chanīmara faito Niospa yoiyoni iskafakī: “Mī ea chanīmara faito mī chaka ē mia soaxoni mī efe ipaxanō,” ixō yoini.

⁷ Nāskakē tāpisharakāfe nā Abraham āfe fenafāfe nā Nios chanīmara faifāfe, nāfāfe chanīmara fakōinafoki.

⁸ Epa Niospa a inōpokoai keskaraōnoa tāpiyoni a nōko kaifofofāfemari Ifofaifono āto chaka ato soaxota ato imasharaxixakī. Askafono atoki inimakōimi, akka Niospa Abraham yoiyoni iskafakī: “Ē mīōxō keyokōi nā maifo tii anoafō ē ato sharafaxii,” ixō Niospa yoinino kenenifo.

⁹ Nāskakē Abraham chanīmara fani keskafakī, akairi chanīmara faifono Epa Niospa ato sharafaxōi, Abraham sharafaxoni keskafakī.

¹⁰ Akka fētsa shinākī iskafai: “Moisés yoini keskara ē nikai ē isharakōi,” ixō shināi afe āfe chaka aō nepakenaka. Akka kirika kenekī yoikī iskafanifo: “Moisés yoikī kirika kenekī iskafakī yoinino: ‘A Moisés yoini keskara nikayamakani āto chaka āto nepakenaka,’” ixō yoinifo.

¹¹ Akka fētsa Epa Nios chanīmara faino āfe chaka soaxota imasharakōitiro. Akka fētsa a Moisés yoinioxō āfe chaka soapaikī iskafakī shinātiro: “Moisés noko yoini keskara nō nikaito Epa Niospa noko imasharatiro,” ixō shināiafonokai Epa Niospa a Moisés yoini keskaraōxō ato imasharatiroma.

¹² Akka mā nō tāpia Jesús fisti nō chanīmara faax Epa Nios fe nō ipaxatiro. Akka a Moisés noko yoini keskaraōnoax nō askatiroma. Akka Moisés noko yoini iskafakī: “Nā Niospa noko yoini keskafakī mēxotaima nō nikayamax Nios fe nō ipaxatiroma,” ixō noko yoini.

¹³ Akka a Moisés noko yoini keskara: “Nō nikayamaito Epa Niospa noko omiskōimaxira,” ixō kenefinifono, noko omiskōimatama, āfe Fake omiskōimani. Niospa meka kenenifo iskafakī: “Fatora fetsa ifi cruz ikaki mastafono, atori Epa Niospa omiskōimaxii akairi omiskōimōfo,” ixō kenenifo. Akka nō afara chakafamisno Cristo nokoōnoax ifi cruz ikakinnoax nani. Noko nāxoyamanikē nō omiskōipakexakerana.

¹⁴ Akka Epa Niospa Abraham sharafani keskafakī, judeofori Jesucristoōxō ato sharafaxii. Nāskakē a chanīmara faifo tii ato yoiyoni keskafakī āfe Yōshi Shara atoya rafematiro.

Akka Cristo nokoõnoax nani Apa Nios fe nõ ipaxanõ. Nãskatari Niospa Abraham yoiyoni keskafakĩ chanĩmara faifono a judeofomari ato imasharaxii.

Niospa Abraham yoiyonino Moisésri ato yoini nikanõfo

¹⁵ Efe yora mĩshitchi, iskaratĩa nã nõ amis keskaraõnoa ã mato yoi mã tãpinõ. Feronãfake mã afe feronãfake yoiyoxõ anã shinãkĩ fetsafatiroma mãmãĩ ãfe ane kenexõ.

¹⁶ Nãskarifiakĩ Epa Niospa Abraham yoiyoni ãfe fena fistiõnoa yoiikĩ. ãfe fena Cristo fistiõnoa yoini.

¹⁷ Ë mato xafakĩa yoinõ Epa Niospa Abraham yoiyoni keskara cuatro cientos treinta xinia finõta Epa Niospa Moisés yoiniki. Niospa Moisés yoinino akka Abraham yoini keskara anã fetsafatiroma. Nã yoiyoni keskakõimis. Nãskaxõ Epa Niospa anã shinãkĩ fetsafanima, nã yoiyoni keskara amiski.

¹⁸ Epa Niospa Abraham yoiyoni keskara Abraham chanĩmara faito, chipo Epa Niospa Abraham noikĩ ãakõĩ axosharakõini.

¹⁹ Akka, ¿afeskai a Moisés yoini keskara sharamẽ? Ë mato yoinõ, ea nikakapo. Niospa yoiaino Moisés keneni yorafãfe tãpinõfo afeskax isharatirofomãki, Niospa fichipaiyai keskai. Askatamaroko tsoa askamisma, nikayospakõimisfo. Nãskakẽ Epa Niospa ãfe ãjirifo yoini afãferi Moisés yoinõfo Moisésri yorafa yoinõ yorafãfe nikakõinõfo Abraham ãfe fena Cristo oyoamano.

²⁰ Akka Epa Niospa Abraham anori yoinima. ãfe ãjiriõxõ yoiyamata, yorafaõxori yoinima. Epa Niospa ãakõĩ yoiyaiyai keskafakĩ Abraham yoini.

¿Afeskakĩ Epa Niospa Moisésxõ ato yoinimẽ?

²¹ Akka, ¿Epa Niospa a inõpokoaifo yoiyoni keskara yafi a Moisés yoini keskarakõiri mã shinãimamẽ? Maa. Epa Niospa mekakai rafema. A Moisés yoini keskaraõxõ noko nimapaxexatirokẽ Epa Niospa nãfoxõ nõko chaka noko soaxokerana nõ a keskara shara inõ.

²² Akka Niospa meka yoiikĩ kirikaki kenekĩ iskafanifo: “Keyokõichi nõ afara chakafakat-saxakĩ nã nõ karaxa mẽra ika keskarakõĩ,” ixõ kenenifo. “Akka Jesucristo nõ chanĩmara faito ares fisti noko kãimatiro afara chaka nõko ifo inõma.” Nãskarakõĩ yoiikĩ kenenifo.

²³ Nãskakẽ nõ chanĩmara fayopaonima. Akka Cristo oyoamano a Moisés noko yoini keskaraõnoax oa karaxa mẽra ika keskarafo nõ iyopaoni. Akka mã Cristo oano nõ chanĩmara faino nõ kaimanano anãkai oa karaxa mẽra ika keskara nõ itiroma.

²⁴ Nãskakẽ nõ tãpitiro Epa Niospa apaiyai keskafakĩ Moisés noko yoini. Nãskakẽ nõko ifo keskara iyopaoni. Akka Cristo oaino nõ chanĩmara faino nõko chaka noko soaxota noko imasharaxilki.

²⁵ Nõ askafipaonixakĩ mã Cristokõĩ nokoano a Moisés yoini keskara afianã nõko ifo itiroma anãkai aato noko ikitiroma.

²⁶ Akka mã chanĩmara faax Niospa fakekõifo mã iki mãmãĩ Cristo Jesús Ifokõĩ faxõ.

²⁷ Keyokõĩ mãfi mã mã Cristo fe rafekõiakĩ mã maotismeax keskarax Niospa Yõshi Shara mato mẽra naneano. Nãskax oa rapati fena shara safea keskarakõĩ mã.

²⁸ Epa Niospa Cristoõxõ keyokõĩ nã maifo tii anoafõ keyokõĩ nãskarafos noko õi. Judeofoya a judeofoma, a ato yonomatifoaya a yonomatifoma, feronãfakefoya kẽrofo, nãskarafos noko õi. Jesucristo nõko Ifo ikano aõnoax yora fisti keskara nõ itiro. Akka keyokõichi nõ Ifofaax nõ afe yorafa.

²⁹ Akka mã Cristo afe yorax Abraham ãfe fenafõri mã iki. Nãskakẽ nã keyokõĩ Epa Niospa Abraham yoiyoni keskara mãtonãri iki.

4

¹⁻² Akka ã mato iskara yoiyai. Apa naano ãfe fãke ãfe apanãfo fitiro. Nãskakẽ nã fake yomekẽ, fetsafãfe ãfe afama mĩshifõ kexesharaxoyokaxõ, nã fake yome yonomayotirofo. Nãskakẽ ãpa yoini keskafakĩ ãa yoyionõ, yora fetsafãfe ãfe afama mĩshiti kexexoyotirofo.

³ Nãskarifiakĩ nõ Cristo Ifofayoamano nõ oa fake yome keskarakẽ nõko xinifãfe noko yoiyaiyai keskafakĩ noko yoiopaonifo. Nãskakẽ ato yonoxomis keskara nõ iyopaoni. Nã Cristo chanĩmara faafãfema amisfo keskara noko amapaonifo nõ ato yonoxomis keskara inõ.

⁴ Akka Epa Niospa nã yoinitĩa, ãfe Fake nĩchini, kẽromã xakĩ mẽranoax kãini judeokõĩ nã Moisés noko yoini keskara nikakõipaoni.

⁵ Akka nono mai ano oni, noko imasharaxii a Moisés yoini keskara nikapaimisfono, nãskax Niospa fakekõĩ keskara nõ inõ.

⁶ Chanĩma, mãfi iskaratĩa Niospa fakefokĩ. Nãskakẽ Epa Niospa ãfe Yõshi Shara nõ mẽra naneano aõxõ nõ yoitiro iskafakĩ: “Epa Niosi, mãfi ãfe Epakõĩ,” ixõ nõ yoitiro.

⁷ Nāskakē iskaratīa mā Niospa fakefo, a Moisés yoini keskara nō anā nikaima nōko ifo inō. Nāskakē afe fakefo afara ināshari keskafakī matori afara ināsharaxii Jesucristoōxō.

Pablo a Jesús Ifofafo ato shinākōini

⁸ Akka taeyoi mā Nios tāpiyoamax nā nioskōimafo mā ato nikaito mato yonomayopaonifo.

⁹ Mā mā askapaonixakī, akka iskaratīa mā mā Nios tāpikōia. Epa Niospari mato tāpikōia. Mā mā Nios tāpikōifiax, ŷafeskakī a mā apaoni keskafakī afianā mā ato yonoxopaimē? Afāfekai Epa Nios xaniño ika ari mato iyotirotoma.

¹⁰ Nā māto xinifāfe yoinifo keskai mā askakōimis. Nāskakē pena safaronō mā tenemis, askatari rama oxe kāiyaino mā fista amis, askatari rama xiniano mā fista amis, askatari seis xinia finōmata māto tare mā fanamisma. Mā shinākī iskafamis: “Nā fistatīa nō ato fe inimaino Epa Nios nokoki inimatiro, nāskaxō nōko chaka noko soaxotiro,” ixō mā anorima shināmis.

¹¹ Ē mato shinākōimis ē mato yonoxopaoni. Ē mato Jesúsnoa yoikī kaxpa ē mato yoipaoni rakikīa mā shināyamafiaino.

¹² Efe yora mīsttichi, ē mato yoisharapai ē akai keskafakī anā mā Jesús Ifofanō. Mā Jesús Ifofai keskafakī ēri Ifofaaki. Ē mato fe ikano mā ea chakafapaonima, askatamaroko mā ea sharafapaoni.

¹³ Akka mā mā tāpia Epa Niospa ea nētefani taefakī Niospa meka sharaōnoa ē mato yoinō nō afe ipaxanō. Akka ē isinī iki ē anā katiroma ini. Nāskakē ē mato ano nēteni.

¹⁴ Ē isinī iki ē omiskōifiaino mā ea iskafanima: “Pablo isinī iki mesekōi nō afe ichanātīroma,” mā ea fanima. Askatamaroko mā ea ifisharakōini oa Niospa āfe ājiri keskara ōikī, askatari oa Jesucristo keskara ea ōikī mā ea ifisharakōini, askatari mā ea kexesharakōipaoni.

¹⁵ Ē mato yoiaino mā inimapaoni. Akka, ŷafeskai iskaratīa a mā ipaoni keskai anā mā inimaimamē? ĶMā shināimamē a mā ea noikōipaoni keskara? Ē afara yopaito mā ea ināpaoni ea noikōiyānā. Akka māto ferori tsekatiro pinikē mā ea inākerapaoni.

¹⁶ Akka, ŷmā shināimē na meka chanīmakōi yoikī ē mato noikaspai keskara?

¹⁷ A Moisés yoikī kenenī keskara yora fetsafāfe mato tāpimapaikani. Nāfāfe a shināifo keskara mato tāpimapaikani mā ato keskara inō. Akka a akaifo keskara mā ato feta aka a keskarakai sharama. Nāskaxō nāfāfe noko paxkanā fapaikani afianā mā ea nikatama afāfe mato yoiāifo keskara mā ato nikanō.

¹⁸ Akka fetsafāfe mato sharafaifono shara itiro. Ē mato fe iyamafiano mato sharafaifono, nāskarari sharakōi itiro. Jesucristoōxō mato sharafaifonori sharakōi itiro.

¹⁹ Ēfe fakefāfe, afianā ē matoōnoax omiskōikī ē pae meekōi. Nā kēromā fake kāikī pae meetiro keskarakōi ē mei. Akka mā fake kāixō anā pae meetiroma. Nāskarifiakī mā Jesús Ifofayaino ē matoōxō pae meekōitiro. Akka Cristo āfe Yōshi Shara māto ōiti mēra naneano afianā ē matoōxō pae meetiroma.

²⁰ Ooa. Iskaratīa ē ano mato fe ipainō afianā ē mato yoisharaxiki. Akka ē tāpiama a mā shināi keskara mā anorima shināi. Akka ē ano mato fe ixō ē mato yoisharakōikerana.

Agar fe Sara ipaonifo keskaraōnoa noko yoi

²¹ Niospa shināmanaino a Moisés kirika kenenī keskaraōnoa mā anā nikapaimākai Nios Ifofakaspakī ea yoikapo ē mato yoinō. Akka, ŷa Moisés yoini keskara mā nikamismamē?

²² Iskafakī yoikī kenenifo: “Abraham fake rafeya ini. Fetsa āfe āfinī yonomati feta fake ani, fetsa āfe āfikōi feta ani. Nā āfe āfikōi tsōa yonomati inima,” ixō kenenī.

²³ Nā Abraham āfe āfinī yonomatinī fake finī, nā kērofāfe fake fimisfo keskarari fake finī. Akka Abraham āfe āfikōi yōxafokōi ini fake fitiroma. Nāskafekē Epa Niospa Abraham yoiyoni iskafakī: “Mī āfinī fake feronāfakē fixilī,” ixō yoinino, nāskakē Abraham āfinī fake feronāfakē finī.

²⁴⁻²⁵ Nā xotofake rafeoxō Niospa afara fetsa noko shināmani. Niospa yoiyoni afeska faxō yorāfo ifitiromākī. Nā kēro Agar nō shināno machi Sinai noko shināmani, Arabia anoa. Nā machi āfe ane fetsa Agar. Nā machi arixō Niospa Moisés yoini Moisésri nā israelifo ato yoinō nikakōinōfo. Askatari nā kēro Agar nō shināno noko Jerusalén shināmatiro. Nā Jerusalén ano ikafo nō shināno nā Agar āfe fakefo noko shināmatiro. Nāfāfe Moisés yoini keskara nikakanax nāfo āto yonomati keskarafo.

²⁶ Akka nāno kēro fetsa Abraham āfe āfikōi. Āfe ane Sara, nā nōko efakōi keskara. Nō Sara shināno Jerusalén fetsa nai mēranoa noko shināmatiro Epa Nios ika aria. Nāskakē chipo nō ari ixii. Nōri Sara keskara nō āto yonomatīma, āfe fakefori āto yonomatifoma. A Moisés yoini keskarakai nōko ifo itiro.

²⁷ Akka kirika kenekī iskafanifo:

Këromā, mī fake fimismakī inimafe, askatari mī fakeyamakī inimayanā tai tai ife mī fake pae meemismaki. Akka nā këro fenē eneyoa nāfi chipo āfe fena ichapayakōi ixii kiki, a këro feneya finōmainifofā, ixō yoikī kirika ano kenenifo.

²⁸ Efe yora mīsttichi, nōfi Isaaca keskaraki. Epa Niospa Abraham yoiyoni keskai āfe fake Isaaca chipo kāini. Nāskarifiakī Epa Niospa yoiyoni keskai nōri āfe fakefo.

²⁹ Nā āto yonomati Agar yōxafxoxoma āfe fake fikī taefani āfe ane Ismael. Akka nā fake fimismato Sara chipo yōxafxō fake fini Niospa Yōshi Sharaōxō. Nāskano Agar āfe fake Ismael iyoaxō āfe exto omiskōimapaoni. Nāskarifiakī Niospa Yōshi Sharaōnoax nō Niospa fake ikaino, fetsafāfe Nios Ifofakaxoma noko omiskōimatirofo.

³⁰ Akka kirika kenekī, çafaa fanifomē? Kenekī iskafanifo: “Mī fake Isaaca ē ināxiai keskara, akka nā mātō yonomati Agar āfe fāke afaa fixiima. Nāskakē mato anoxō āfe fakeyafi ato nīchikāfe afianā mato fe inōfoma,” ixō Epa Niospa Abraham yoini.

³¹ Nāskakē ē mato yoi efe yora mīsttichi, nōkai a āto yonomatinī fake keskarafoma. Askatamaroko nōfi Abraham āfe āfikōichi fake keskarafō. Nāskaxō nō Nios Ifofaax nō tsōa yonomati itiroma, nō Niospa fakekōifo itiro.

5

Cristoōnoax isharakāfe a mā ipaoni keskara chaka anā shinākakima

¹ Akka Cristo nokoōnoax nani a Moisés yoini keskara nō anā nikanōma, nāskax anā āto yonomati nō inōma. Cristo fistiōnoax nō isharatiro, nāskakē Cristo kachikiri fayamakāfe. Mā ipaoni keskara anā iyamakāfe, nōko xinifāfe yoinifo keskara afianā nikayamakāfe āto yonomatifo ixikākima.

² Ē mato yoinō, ea nikasharakapo. Iskafakī shināyamakāfe: “Ē foshki repa xatekema Epa Niospa ēfe chaka ea soaxotiroma,” ixō shināyamakāfe. Anori mā shināito Jesús mātō chaka mato soaxotiroma Epa Nios fe mā ipaxanō.

³ Afianā xafakākōi ē mato yoipai. Fatora fētsa mā foshki repa xatepai Nios fe ipaikī, anori shināfikī nā Moisés yoini keskara nikakōiamax, anorima shināx Nios fe mā nipaxatiroma.

⁴ Moisés yoini keskara fisti mā nikaito mātō chaka mato soaxotiroma. Nāskax mā Cristo fe rafeima, akka Epa Niospa mato noifiaino mā Cristo fe rafeima, akka Epa Niospa mato noifiaino mā Cristo kachikirifai. Nāskafekē mato afeska fatiroma mātō chaka mato soaxona mā afe ipaxanō.

⁵ Akka Niospa Yōshi Sharaōxō mā nā tāpia, Cristoōxō nōko chaka noko soaxotiro Niospamāi noko noikōikī. Nāskakē nō manasharai.

⁶ Nō foshki repa xateano, askayamākī nō xateamano, afāfekai nōko chaka noko soaxotiroma. Akka nō Jesucristo Ifofakōinaino fetsafo noko ato noimasharakōitiro nō ato noisharakōinō. Nā fisti nō fichipai, chanīmara fasharakōixii.

⁷ Mā Jesús Ifofasharayopaoni. Akka, çtsōa mato yoiamē, na meka sharakōi kachikiri-fayanā mā anā nikanōma?

⁸ Akka Niospakai anori mato yoiama. Āfe Fake fisti mā chanīmara fanō mato yoi.

⁹ Akka mato mēraxō yora fistichi chaka shinākī, nā fistichi keyokōi mato afara chaka shināmatiro, aōxō chakakōi mā shināno.

¹⁰ Ē Nios kifiyānā nōko Ifo ē chanīmara fakōini, ē akai keskafakī māri chanīmara fanō. Akka nā mato fanīrira chaka shināmanaifo Niospa ato omiskōimaxii.

¹¹ Efe yora mīsttichi, akka eōnoa yoikī mā iskafamis: “Na Pablo yoisim nō foshki repa xateamax nō Nios ari katiroma ixō yoisim,” mā ea famis. Maa, ēkai anori yoisimma, ē anori yoiāito ea omiskōimakeranafo. Akka ē yoisim: “Jesucristo ifi cruz ikaki mastaifono noko nāxonī, nōko chaka noko soaxoxii Epa Nios fe nō ipaxanō,” ixō ē yoisim. Nānori ē yoiāito nikakī nā Jesúsnoa nikakaspamisfāfe ea omiskōimamisfo.

¹² Akka fetsafāfe mato yoisimisfo iskafakakī: “Mā foshki repa xatexoma mā Nios chanīmara faima,” ixō fanīrira mato shināmamisfo. Nānori yoikakī mato fekaxtefamisfo, nāfo anā mato fe iyapainōfo.

¹³ Efe yora mīsttichi, Jesucristoōxō iskaratīa āfe meka fisti nikakōikāfe. Afaa fetsa mato yonomayamafiaino chakafayamakāfe. Jesucristo mato imasharakī iskaratīa nā nō apaiyai keskara nō atiro iyamakāfe. Akka fetsafo fe axō faatanākāfe noinākōiyānā.

¹⁴ Akka Niospa Moisés yoini iskafakī: “Nā mā noimeai keskariakī fetsafori noisharakāfe,” ixō yoini. Mā askafakī nā Niospa Moisés yoini keskara, keyokōi mā aki. Mā askafakī keyokōi a Niospa Moisés yoini keskara mā aki.

¹⁵ Akka mā chakafaatanax mā keyotiro, oa paxta rafe keyonākanax retenātirofo keskai. Nāskakē kexemesharakāfe askaxikākima, a mato feta Nios nikamisfo anā mato fe ichanātirofomaki. Askatari Nios kachikiri fatirofoki.

Nōko shinā mēraxō nō afara chakafapaimis keskara yafi a Niospa Yōshi Sharaōnoax nō isharatiro Pablo ato yoini

¹⁶ Akka ē mato yoi Niospa Yōshi Shara nikasharakāfe aōnoax isharaxikaki. Nāato mato yoitiro mā afeskaimākai. Nā nikakōixō afianā a mā apaoni keskara mātō shinā mēraxō afara anā mā atiroma.

¹⁷ A nōko shinā mēraxō nō afara chakafapaiyai keskarakai Niospa Yōshi Sharapa shināima. Nāskaxō āfe Yōshi Sharapa noko amapaiyai keskara nōko shinā mēraxō nō shināfikī nōkai askafapaimisma. Nōko shinā mēraxō nō shināpaoni keskarakai Niospa Yōshi Sharapa anori shināmisma. Akka nā nō apaiyai keskafakī nō atiroma. A nō afara chakafapaoni keskara nō anā ayamakī Niospa Yōshi Sharapa nōko shinā mēraxō noko yoiai keskara nō nikakōitiro.

¹⁸ Nāskakē Niospa Yōshi Shara nofe rafeaino a Moisés yoini keskara anā nōko ifo itiroma noko yonomaxiki.

¹⁹ Fetsafāfe Nios nikaspapakakī afarafo chakafakani. Mā mā tāpia afe keskarāfo ikafomāki. Nāskakē feronāfakēfāfe āto āfimafo chotamisfo. Nāskakata afara fetsa fetsatapāfo chakafamisfo.

²⁰ Nāskakaxō afara yora faxaxō na nōko niosra ixō kīfimisfo. Askatari koshōiti tāpiafo, askatari ato noikaspa misfo, askatari isharakātama ōitifishkimisfo. Nāskakaxō atonā fisti afara apaimisfo, askatari noikaspa faatanāmisfo nores fisti nō tāpikōia a nō tāpia keskara tsōa tāpiama ikanax.

²¹ Nāskaxō fetsafo afara fīapaimisfo, askatari pāemisfo, askatari pikīfīnapaikōimisfo. Nāskakaxō afara fetsa fetsatapāfo chakafamisfo. Ē mato yoimis a keskara chakafo Epa Niospa keyokōi ato ikinā ano tsoa katiroma afe ipaxakakī.

²² Akka Niospa Yōshi Sharapa noko ikināno fetsafo nō noikōitiro inimakōiyanā, askatari nō isharakōita nō fekaxetitiroma, askatari fena fenakima nō manasharakōiyotiro, askatari nō fetsafo chakafamisma itiro, askatari nā nō yoimis keskara nō atiro isharakōita.

²³ Askatari isharakōita, fetsafo fe feratenātama oi tsifaxō ato yoimis ita, askatari a Niospa fichikaspai atama nōa nō kexemetiro afaa chakafaxikima. Nāskaxō Niospa āfe Yōshi Sharaōxō noko yoia keskara nō atiro isharaxiki. Nāskakē anā meka fetsa nō yoipaima Niospa Yōshi Sharaōnoax isharaxiki. Nāskakē anā noko tsōa yonomatiroma.

²⁴ Nā Cristo chanīmara faifo tii afe yorakōifo. Jesús cruznoax noko nāxoni nōko chaka noko soaxoxiki. Akka nō naa keskaraxō anā afaa nō chakafatiroma a nō apaoni keskara. Nāskakē nā noko Niospa amapaiyai keskara fisti nō atiro.

²⁵ Nāskakē Niospa Yōshi Shara fe nō rafekī nā noko yoiai keskara nō nikakōitiro. Nāskaxō nā noko amapaiyai keskara nō atiro.

²⁶ Nāskakē Niospa Yōshi Shara fe nō rafeax kakapaimis nō itiroma, fetsafāfe nokoōnoa yoisharanōfora ixō ē mato finōkōiara iyamakāfe. Mā askakī fetsafo mā shināchakamatiroki. Mā askara chakafo shināki mā shināsharatiroma, askara chakakōiki.

6

Mā ranā axosharanōnā faatanānkāfe

¹ Efe yora mīshtichi, fetsa afara chakafaito ōikī, Niospa Yōshi Sharayaxō aō noikī oi tsii faxō yoisharakāfe, afara chakafakī xatenō. Meka mitsisipato yoiyamakāfe. Nāskakē māri kexemesharakāfe afara chakafayamaxiki.

² Nāskakē fetsafo fe afara axonōnā faatanāsharakāfe. Mā ranā Nios kīfinōnā faatanānkāfe. Fetsa omiskōiāto aō noikī inimamakāfe, nāskakē kexenōnā faatanāsharakāfe. Fetsa omiskōiāto Nios kīfioxōkāfe Jesúsnoa shināmasharayanā Ifo sharafanō. Mā askakī nā Cristo yoini keskara keyokōi mā akikai.

³ Akka fetsa shināki iskaifai: “Ē sharakōi. Ēkai tsoa yopaima ea Nios kīfioxō,” ixō shināi. Nā keskara yorakai afama, āakōi pāramei.

⁴ Akka nō nōko shinā mēraxō nō shinātiro nō Jesús yonoxōsharaimākai. Akka nō yonoxōsharai mā nō tāpiax nō inimasharatiro. Nāskakī nō shināki iskaifatiroma: “Na fetsafāfe afara chakafaifo keskafakī ē afaa chakafamisma,” ixō nō shinātiro.

⁵ Akka keyokōichi nō afara chakafamis. Nāskaxori keyokōichi nōko shinā mēraxō nō shinātiro a nō afara chakafamis keskara. Tsōakai a Niospa noko amapaiyai keskara noko amatiroma, nōakōi nō atiro.

⁶ A Niospa meka mato yoimisto afara yopaito ināsharakāfe.

⁷ Mārifī anofi pārameyamakāfe, tsoari Nioski kaxemetsamapaitiroma. Akka akiki kaxemetsamapaiyaifono Niospa ato omiskōimatiro. Akka afara nō fanaxō mā fimiano āfe fimi nō fitiro. Nāskarifiakī Niospa meka nikayamata nō afara chakafaax nō omiskōitiro. Akka nā Niospa noko yoia keskara nō akax nō isharakōitiro.

⁸ Akka fētsa āfe shinā mēraxō afara shinākī afara chakafaax omiskōifinakōitiro. Akka Niospa Yōshi Sharapa amapaiyai keskara fētsa afafāini, nāfi Niospa Yōshi Sharaōnoax nisharapakenakaki.

⁹ Nāskakē afara sharafakī eneyamakāfe. Nāskaxō iskafakī shināyamakāfe: “Mē fetsafo sharafayomiski iskaratīa ē anā askaimakai, ē anā fetsafo sharafatiromaki. Nāskanō,” ixō anori shināyamakāfe. Akka nō askatama nō inimakōikē nā noko ināpaiyai keskara shara Niospa noko ināsharaxii.

¹⁰ Nāskakē afeskarafāfe ōikī keyokōi ato axosharafafāikāfe. Nāskatari a Nios Ifofafo ato noisharayanā ato axosharafafāikāfe.

Pablo mā mekai xatekī ato yoisharani

¹¹ Akka iskaratīa ēkōi mato kirika kenexoni. Ēfe kene efpakōikī ōikapo.

¹² Akka fetsafāfe mato yoipaikani iskafakakī: “Māto foshki repa xatekāfe nōri askarakī,” ixō mato yoimisfo. Akka mato yoipaikanima a Jesucristo ifi cruz ikakinoax noko nāxoni nōko chaka noko soaxoxiki. Askara mato yoimisfoma, askara nō ato yoiaito noko omiskōimatirofora ikaxō.

¹³ Nāfāfe mā foshki repa xatefikaxokai a Moisés keneni keskara tsōa nikakōimisma. Nāskakaxō matori yoipaikani māto foshki repari mā xatenō. Māri nā imisfo keskai mā ato fe askaito, nāfāfe fetsafo yoitirofo iskafakakī: “Nafāfe noko nikakōimisfo,” ixō ato yoitirofo.

¹⁴ Akka ēkai anori shināpaima, nā meka shara fistiōnoa ē yoipaifafāini. Nā meka shara fistiōnoa ē yoipaikī ē iskafai: “Aicho, Jesucristo ifi cruz ikakinoax ea nāxoni, aōxō a ē chaka shināpaoni keskara anā ē shinātiroma. Jesús nā ea nāxofaitīa nā ē afarafo chakafapaonifo mā Jesús fe naa keskarakōi. Nāskakē anākai ea afeska fatiroma,” ixō ē shinātiro.

¹⁵ Nō Jesucristo Ifofaxō nō foshki repa xatea askarakai sharama atokai nōko chaka noko soaxotiro. Akka nō Ifofaito Niospa nōko chaka noko soaxotiro fena keskara shara nā inō.

¹⁶ Niospa Yōshi Sharapa Jesúsnoa noko yoia keskara mā akē Epa Niospa mato inima-makōiyanā mato noikōi. Nāskax Niospa fakekōifo mā iki.

¹⁷ Akka mē mekai xatekī ē mato yoinō. Ēfe Ifo Jesúsnoax ē omiskōimis, ēfe yora toafo ōikī mā tāpitiro ē Jesús yonosharaxonaito ea iskafamisfo. Nāskakē anā ea fekaxtefayamakāfe.

¹⁸ Ēfe yora mīshtichi, nōko Ifo Jesucristo keyokōi mato noikī mato sharafa fafāini. Nāskapainō. Nā tii.

Pablo

Pablo Efeso Anoafo Kirika Kenexō Fomani

Pablo ato yoisharani, Efeso anoafo

¹ Ēkīa Pablo ē mato kirika kenexō fomai. Ea Jesucristo nīchia ē aōxō āfe meka yoimis inō, Niospa fichipaiyai keskafakī. Ē na kirika mato fomai a Nios Ifofaafa, Jesucristo chanīmara faafa, Efeso anoafo.

² Nōko Epa Nios feta nōko Ifo Jesucristo mato shināsharanō mato noikī mātō shinā mēra mato shināmasharanō, mātō ōiti fekaxtenōma.

Nō Cristo chanīmara faito afara sharafo noko amatiro

³ Nōko Ifo Jesucristo āfe Apa Niospa noko afara sharafo noko shara famai, nai mēraxō nō ōiamafaito nōko ōiti mēra noko inimamasharai nōmāi āfe fakefokē. Nāskakē nō yoisharai nō inimasharakōi Epa Nioski.

⁴ Epa Niospa mai yafi nai onifayoxoma noko katoni nō afe īpaxanō āfe Fake Cristo keskara afaa chakafamisma keskara sharakōi nō inō. Niospa noko noikī,

⁵ āfe fakefo noko fani. Anori shināni Niospa a Jesucristo noko nāxoyoxiai.

⁶ Nāskakē Niospa āfe Fake noikōikī nokori nāskarifai noikī. Nāskaxō noko nīmasharapakenaka. Nāskakē Nios sharafinakōikē nō aicho fai akiki inimakī nokomāi afama mīshti sharafo famaito Jesúsxō.

⁷ Niospa noko noikī finakōikī āfe Fake Jesús noko nāmā nīchixonī nokoōnoax āfe imi foax ifi cruz ikakinoax noko nāxonō nō sharakōi afe inō, askatari nōko chaka nokoōnoa noko soxonō.

⁸ Nāskaxō Niospa noko ōimana noko noisharakōikī noko tāpimasharakōikī, askatari noko shināmakī finakōi.

⁹⁻¹⁰ Nāskakē Epa Niospa yoini afama mīshti onifayoxoma āfe Fake xanīfo imaxikī, keyokōi, nai mēranoafoya, nāmānoafoyari āto xanīfo finakōi inō. Tsoa pishta anori meka nikayomisma Niospa onāxō yoini a shināi keskafakī, anori noko tāpimani nō tāpisharanō aōxō. Nāskakē Niospa āa shinākī iskafani: “Nā ēfe Fake ē nīchīpaiyaitīa ē nāmā nīchixii keyokōi nai mēranoafoya, nāmānoafori āto xanīfokōi inō,” ixō Niospa shināni. Nāskaxō nānori iskaratīa noko tāpimana.

¹¹ Nōfi Cristo fakekōifokī. Nō afe yorakōifo ikaito, Epa Niospa noko katoni noko onifayoxoma āa shinākī taefani. Epa Niospa nonori iskafakī shināni: “Na ēfe Fake Jesús ē ināi keskari fakī nā ēfe Fake Jesús Ifofaifori ē ato ināira,” ixō Epa Niospa shināni. A Niospa shinākī yoini keskara, nāskarīfakī iskaratīa mā askafaa.

¹² Akka nō Cristo Ifofakī taefaxō nō yoikī iskafanō: “Epa Niosi, mī fāsi sharakōi. Mī noko sharafamis keskara sharakōi. Tsoa fetsakai mia keskara sharama,” ixō nō yoinō.

¹³⁻¹⁴ Nāskakē ē mato yoi mākai judeofoma. Nāskafixō Niospa meka shara Jesúsxō mā nikakī māri chanīmara fai. Mā askaito Niospa mato chaka soaxona mā afe nīpaxanō. Nāskakē māri iskaratīa Cristo afe yorafokī. Anori Niospa yoikī taefani keskafakī, āfe Yōshi Shara nō mēra nanea noko īkinō. Noko askafaito nō tāpitiro āfe shara noko ināxii. Nāskaxfi nō Niosnoafoki. Nāskakē nō tāpīama afetiara nai mēra noko ifi. Taekōifakī anori noko yoini. Nāskakē nā chanīmara fakī nō yoipakenaka: “Nōko Nios fāsi sharakōi,” ixō nō yoipakenaka.

Pablo Epa Nios yōkani iskafakī: “Epa Niosi, mī Fake chanīmara faafo ato tāpimasharafe,” fani

¹⁵⁻¹⁶ Nāskakē nīrixō ē mato nikai mā Jesús Ifo sharafata, a fetsafo feri a mato feta Nios Ifofamisfo fe mā rafesharakōiaito ē nikakī inimayanā ē nīrixō ē mato Epa Nios kīfixōfāfāini. Nāskakē ē iskafa fafāfāini: “Epa Niosi, na Efeso anoxō mia noisharakata fetsafo feri rafesharakōiafo,” ē fai yoikī.

¹⁷ Niospa āfe Fakekōikī Jesucristo. Nāskax sharafinakōia. Nāskakē ē mato kīfixokī iskafamis: “Epa Niosi, mī Yōshi Sharapa na Efeso ano ikafo ato tāpimasharakōife mia xafakīakōi tāpisharakōinōfo.

¹⁸ Oa xini peisharaino nō fomākīa foiski nō nai xafakīakōishara nō ōitiro keskara, mī Yōshi Sharapa ato ōimafe Epa Niosi, mia tāpisharakōinōfo āto ōiti mēraxō. Askatari ato tāpīmafe a nō oniyamatai mī noko shināni nono nāmāxō mī Fake Jesús nō Ifofaax nō mefe īpaxanō nai mēra. Askatari a nō ōimismafo mī noko ināxiai ato ōimafe.

¹⁹⁻²⁰ Epa Niosi, mī Yōshi Sharaōxō mī afama mīshti famis. Nāskaxō mī Fake Cristo mī anā nimani mī Yōshi Sharaōxō mefe pataxamei nīax mefe xanīfokōi inō. Nāskax mī pōya kayakai aōri mefe tsoa. Afia mī Yōshi Shara nō mēra nanexō a nofeta mia chanīmara faafo tii afara fetsafo mī noko īspasharakī mī noko amasharakī.”

²¹ Āfe Yōshi Sharaōxō Cristo ato mānāo nīxō, nā nāmānoafo āto xanīfo tii finōkōia. Askatari nai mēranoafori āto xanīfofo Cristo ato finōkōia keyokōi. Nāskax āto xanīfo finakōia. Tsoa pishta finōtiroma.

²²⁻²³ Akka Epa Niospa āfe Fake yoini keskafakī keyokōi mai anoafoya nai mēranoafo ato īkinā. Nāskaxō āfe Fake katoni nā chanīmara faafo tii āto Ifo inō. Nā chanīmara faafofi āfe yorakōi keskarafoki. Cristo āto mapo keskara. Akka nōko māpo nō shinātiro. Nā fistichi nā chanīmara faifo yoitiroki, noko īkināno afeskaxō nō atiomāki. Akka nō mapomaisax nō nitiroma. Nāskarīfai nōko Ifo Jesúsmaisax tsoa nitiroma. Keyokōi nā chanīmara faafo nofe ikafo. Nāskax nofe rafe kakāini nā noko amapaiyai keskara nō anō.

2

Niospa noko noikī noko ifa nō afe īpaxanō

¹ Taeyoi mā iyopaoni oa naa keskara mātō chaka soaxma.

² Nāskakē mā afara chakafamis, a yora chakafāfe akai keskafakī. Askata a nai mēra ikafāfe a niafaka chakafāfe āto xanīfāfe Satanás mato amapaiyai keskafakī mā amis, Satanás ifofakī.

³⁻⁴ Nōri askafapaoni, nā nō afara chakafapaiyaiifo keskara nō apaoni. Afara chaka shināmiskōifo nō ipaoni. Epa Niospa nā nikayospamisfo ato omiskōimanaitia ato omiskōimakōixii. Nōri ato keskaraxō nō afara chakafaito nā ato akai keskafakī nokori omiskōimakerana. Akka nō afara chakafafiatō noko omiskōimatama. Niospa noko fāsi noisharakōimis, noko shinākōikī noko omiskōimapaima. Noko chakafapaimisma.

⁵⁻⁶ Nō Nios Ifofayoxoma nō shināyopaonima, chaka fistis nō shināyopaoni, nō chakafayopaoni. Niospa noko noikōifiatō, nō oniyamatai ares noko Niospa ōikī yoini: “Na ēfe Fake Jesús Ifofaifo ē ato nāmā nīchixonī mā reteafono, ē otofaxō, ato yafi ifixii niri nai mēra afe īpaxanōfo,” ixō Niospa yoini ares ōikī afe ikaifono ato omiskōimayamaxii. Nāskakē nō nāmānoax oa nō afe nai mēra ika keskara nō nono ika nāmā.

⁷ Epa Nios xanīfokōixō Jesús yafi noko otoani noko noikōikī nō afe nai mēra īpaxanō, nā chipo fakeaifāferi tāpinōfo Epa Niospa noko noikōiaito.

⁸⁻⁹ Nios sharafinakōia. Nō Jesús chanīmara fakē noko ifi nō afe īpaxanō. Akka nōa nō ifimetriroma, Nios fistichi noko ifitiro noko noisharakōikī. Akka nō afarafo shara fatokai noko ifitiro nō afe īpaxanō. Akka fetsafo āa chanīkani iskatirofoma: “Ē afama mīшти famis. Nāskakē ē tanaima sharakōi Nios ano kai,” ixō yoifiax askara yorakai Nios ano katiroma āamāi chanī Jesús Ifofaamax.

¹⁰ Nāskakē Epa Niospa taeyoi shināyoni Jesucristoōxō yorafetsafo nō axosharakōinō. Nāskakē aa fistichi noko onifani afara fetsafo nō sharafanō aōxō. Akka nores fisti nō afaa sharafatiroma. Cristo Jesús Ifofaxō nō afama mīшти sharafatiro. Nāskakē taeyokī Epa Niospa ares ōikī yoini.

Jesucristoōnoax nō ōiti sharakōiya ipanaka anā nōko ōiti chaka neenōma

¹¹ Nāskakē shināmakiyamakāfe. Mā chanīmara fayopaonima. Nā judeofāfe yora fetsafo ato yoikī iskafanifo: “Nā yora fetsafo nōko kaifoma. Akka nōfi Niospa yorafokī. Akka na yora fetsafokai Niospa yorafoma. A Niospa noko yoimis keskafakī keyokōi nōko foshki repa nō xatepakemis na nō judeofāfe. Nāskakē nō ōimani afe yorakōifoxō. Akka a yora fetsafāfe āto foshki repa xatemisfoma. Nō ato tāpitiro afokai Niospa āfe yorafoma,” ixō judeofāfe mato yoimis mā judeofokēma.

¹² Akka shinākapo. Taeyoi mā kai Cristo fe iyopaonima. Epa Niospa israelifo ato katoni keskafakī matorikai katoyonima mā ato fe afe yorafo ipanā. Afe yorafo yoiyoni keskafakī matorikai yoiyonima. Mā shinākī iskafani: “Ooa. ζNō afeskatiromē nōko chaka noko soaxonō nō Nios fe ipaxanō?” ixō mā shināpaoni. Nāskatari nā Nios chanīmara faafoma mēra mā iyopaoni. Mā Nios fe rafexoma mā tāpiyopaonima.

¹³ Nāskaxō mā Niosnoa shināyopaonima. Nāskafiano Cristo Jesús matoōnoax naino, āfe imi foni mā afe ipaxanō.

¹⁴ Nāskakē Jesucristoōnoax nō noinātiro, ēfe kaifo israelifo fe yora fetsafo. Nāskakē nāskarafos noko shināmasharatiro nō aōnoax noinā faatanāx afianā nō noikaspa faatanānōma. Nāskakē afanā noko anā afeska fatiroma. Iskaratīa nō Cristoōnoax yora fisti keskarafō.

¹⁵ Nāskakē Jesús nokoōnoax nani. A Moisés Niosxō kenenī keskara anā noko tsōa yoitiro. Jesucristo keyokōi noko nāxoni nō afe yorafo inō. Nāskakē māri judeofoyamafekē, mato yafi noko ifini. Nāskax a yora fisti keskarafō nō inō. Mā nō fetsa keskarax ōitisharayakōifo nō inō noināsharakōi.

¹⁶ Nāskakē Jesús ifi cruz ikakinoax noko nāxoni. Na ēfe kaifo judeofo yafi a judeofomari Jesúsxō Niospa noko a yora fisti keskara noko fanī. Noko noisharakōikī nō nikayospafo

iyopaofinikē, Jesús nokoōnoax nani. Nāskakē Niospa noko yora fetsafoya rafema sharakōia afe yorafo nō inō.

¹⁷ Nāskakē Jesús nāmā fotoxō noko yoini āfe meka shara Niospa noko ifinō. Noko judeofo akai keskafakiri, matori ifia mā judeofoyamafekē mā Nios shināyamafipaonino. Akka nō judeofāfe nō Nios shināyopaoni. Nāskakē iskaratīa nō anā noikaspa faatanātama nō nōināsharakōi.

¹⁸ Jesús noko nāxonni nōko chaka noko soaxoxiki nō Nios fe rafesharakōinō afe ipaxakī. Nāskakē Niospa āfe Yōshi Shara nokoya rafemana na nōko kaifomafo fe nō rafesharakōinō. Nāskax Epa Nios fe nō ipaxanō.

¹⁹ Nāskakē iskaratīa mā anā Nios chaifaama mā afe yorakōifo. Nāskakē iskaratīa a Jesús Ifofamisfo fe a rama Jesús Ifofaifo Niospa yorakōifo.

²⁰⁻²² Nāskax mā oa pexe sharakōi keskarāfo. Oa tokiri nō pexe shara faa, afeskax pake-tiroma keskara. Taefakī nō mai pōkita a mēra tokiri nanexō, nō pexe fatiro pakeyamanō. Tokiri korex sharakōiki nō atiro pexe fakī. Nāskarifiakī taefakī a Niospa mekaōnoa ato yoipaonifāfe ato yoipaonifo Niospa ato shināmanaino. Akka chipo mā Jesús nāmā fotoxō, aōxō tāpimisfo ato ifini aōxori a fetsafo tāpimanōfo, oa pexe fisti mēra nō imis keskaraxō, akairi ato tāpimanōfo Niospa meka sharaōnoa ato yoikakī, atoōxori yorafāfe chanimara fanōfo. Askaxori a rama fakeaifāferi Jesús Ifofakanax, oa nō pexe mitsisipakōi faano, anā paketiroma keskarakōi inōfo Jesucristo Ifofakanax. Nāskakē nōri Ifokōi faax, nōri anā paketiroma nō keyokōichi Ifofaax. Oa pexe sharakōi mēra nō ika keskara, nō ixii, Niospa āfe Yōshi Shara nō mēra naneano.

3

Niospa Pablo yoini a judeofoma Jesúsnoa yoinō

¹ Nāskakē ē mato Epa Nios yoixonī. Ēfi judeokī mā ēfe kaifoyamafekē ē mato noi. Mato noixō, ē mato Jesucristoōnoa yoi. Nāskakē ea achixō karaxa mēra nīchitifo.

²⁻³ Niospa ea nīchini ē aōnoa ē mato yoinō. Niospa keyokōi yorafo ato noi, judeofo fisti ato noima. Akka a iyopaonifāfekai tsōa tāpiyopaonima Niospa ares ato noifaito. Nāskakē ē aōnoa ē mato kenexona, pishta fakī.

⁴ Na ē mato kenexona oixō, mā tāpitiro nā ē tāpia keskafakī Cristoōnoa. Akka a nōko xinifo iyopaonifāfekai tsōa tāpipaonima.

⁵ Niospa taefakī tsoa tāpimayonima. Mā iskaratīa Niospa āfe Yōshi Sharaōxō a aōnoa yoimisfo mā ato tāpimana. Askatari a āfe mekaōnoa yoimisfōri mā ato tāpimana.

⁶ Akka na meka sharakai tsōa Jesúsnoa tāpiyopaonima. Akka yora fetsafori Epa Niospa afe yorafo itirofo. Nāskakē iskaratīa matori Niospa tāpimani, judeofofa yora fetsafo Jesúsnoax Niospa fakefo mā inō. Nāskakē Epa Niospa āfe kaifo judeofo yoiyoni keskafakī Jesucristoōxō akairi fitirofo.

⁷ Nāskakē a Jesús Ifofafo ē ato chakafafaito, ea noisharakī Epa Niospa ea nīchini ē āfe meka shara ato yoinō āfe Yōshi Sharaōxō.

⁸ Ē fāsikōi Jesús chakafakī finakōipaoni, na fetsafāfe chakafakī finayamafiaifono. Ē askafafaito, ares fisti Niospa ea noikī ea nīchini aōxō na yora fetsafo judeofoma ē āfe meka shara ato yoikī tāpimanō Niospa ato noisharakōiaito. Ato noikī ato shināmākōipai. Nios fisti tsoa keskaramakōi. Āfe Fake Jesúsnoa keyokōi nō tāpitiroma.

⁹ Niospa keyokōi onifaxō, ea nīchini ē ato mēstesharakōi tāpimanō. Tsoa pishta tāpimano ares fisti tāpini Jesús noko nāxoyoamatai ato tāpimanimā.

¹⁰ Nāskakē Niospa ea nīchini āfe meka sharaōnoa ē ato yoinō akairi Nios tāpinōfo. Tāpikanax oa ato fe yorakōifo keskara ixikakī Jesúsnoax. Mā askaito nai mēraxō a xanīfo tiito askara oikī tāpisharatirofo. "Chanīma, Niospa tāpikīfinakōia," fatirofo.

¹¹ Afaa pishta onifaataima nānori shināni: "Na ēfe Fake Cristo Jesús Ifofaifo efe yorakōifo ixikani," ixō yoini keskara mā iskaratīa askakōia.

¹² Jesúsmai noko nāxonikē, nō Ifofaax, nō Nios fe rafesharatiro mesetama noko potayamanō.

¹³ Ē mato yoinō, ea nikakāfe. Ē mato yoiaito ea nikakakī ea karaxa mēra ikimatifo. Ē omiskōifaino eōnoa shināchakayamakāfe. Ea karaxa mēra ikimanafokī ē Cristoōnoa mato yoiaino. Nāskafekē inimasharakāfe, mā Niospa yorafokī.

Cristo noko noi

¹⁴ Nāskakē nāfo shināki ē ratokonō mai chachipakefōfā ē Epa Nios kīfimis.

¹⁵ Nāmāi nai mēranoafo feta nono mai anoxō nā Ifofaafāfe āto Epakē, nāato ēfe fakefora noko famis.

¹⁶ Nānori ē mato Epa Nios kīfixokī iskaſamis: “Epa Niosi, mī fāsi sharakōi. Maitiofo yafi nai mēranoafo mīnākōifo. Mī afama mīшти fatiro. Mī Yōshi Sharaōxō mia chanīmara faafo Efeso anoafo mī kerex shara ato ināfe.

¹⁷⁻¹⁹ Nā Jesús Ifofaafo mī Yōshi Shara atoya rafemafe. Mia tāpikī finakōinōfo. Askaxō tāpitiroma mī fāsi ato noiaito. Mī Fake Cristori fāsi ato noi. Cristo noko noiai keskara tsōa tāpitiroma. Askafikē ato tāpimafe, Epa. Akka tāpikanax, mī ato fe rafekōiaito mia keskara inōfo,” ixō ē matoōxō Epa Nios kīfifafāini.

²⁰ Akka Epa Niospa afama mīшти fatiro a nō yōkai tii noko axotama finōmata noko axotiro. Nāato āfe sharaōxō noko axotiro afama mīштиfo. Noko axopaiyai keskafaito nō tāpitiroma. Finōmainfōfāta noko shara fatiro.

²¹ Nāskakē nō Epa Nios yoikī iskaſatiro: “Epa Niosi, mī sharafinakōia. Mī Fake Jesucristoōxō mī noko sharafamis,” ixō mēxotaima nō yoifafāini. Keyokōichi nā chanīmara faafo feta a inōpokoiaifāferi yoisharapakenakafo. Nāskapakexapainō.

4

Niospa Yōshi Sharaōnoax oa yora fistikōi keskara nō itiro

¹ Ē mato yoisharakōi. A Jesucristoōnoa ē mato yoimis. Ē ato yoiaito a Jesucristo nikakaspaiſāfe ea karaxa mēra nīchiafo. Ē mato yoisharanō, ea nikasharakōikāfe. Niospa mato katonī Jesucristo mā Ifosharakōi fanō. A ē mato yoiai keskai isharakōikāfe.

² Nāskax, “Ē finakōia,” iyamakāfe, anori shinātama. Yora fetsafo noisharakāfe ato shinākī. A fētsa tāpisharamato mato afeskarafaito, shināchakatama ato noisharakāfe, ōitifiſhitama, isharakōita.

³ Niospa Yōshi Sharaōnoax nō isharakōinō a yora fistikōiax itikini. Tanaimakōi ikāfe, ōitifiſhikiki faatanākāima.

⁴ Niospa noko yoimis keskai: “Isharakōikāfe, nōko Ifo ifofasharax, mā chaima anā fotoiyoi kiki,” shināi isharakāfe. A Nios Ifofaaſori oa nofe naneafo keskarakōifoki. Nāskax isharakāfe. Niospa āfe Yōshi Shara askarakī.

⁵ Nōko Ifokōi Jesucristo. Nā fisti nō chanīmara fai Epa Nios fe Īpaxakī. Nāskakē āfe Yōshi Shara nō mēra nanei.

⁶ Anā fato fetsa nōko Niosma. Nā fistikōi āfe Fake fe a chanīmara faafo tiito āto xanīfokōi. Nāskaxō keyokōi onifani. Nāskakē a Ifofaafo āfenākōifo. Nāskaxō afara sharafo noko amai nōko shinā mēraxō afe keskararafa noko amatiro. Āfe Yōshi Sharaōxō keyokōi a fichipaiyai keskara nō anō āfe shinā noko ināi.

⁷ Nō Jesús Ifo sharafaito ōikī āfe shara noko minia fisti rasi chanīmara faifo nō ato axonō Jesús Ifofasharakōinōfo. Keyokōi āfe sharaōxō afara fetsa nā Jesús apaiyai keskara anōfo ato ināi. Nō fisti keskarafiakē nā noko imapaiyai keskara noko ima nō afara axonō.

⁸ Nāskakē Niospa meka Cristoōnoa yoikī David kirika kenekī iskaſani:

Nono mai anoax Apa Nios ari kaiſūa nā Ifofaafo tii āto chaka ato soaxoni afianā Satanās āto ifo inōma, askatamaroko Ifo sharakōi fanōfo. Nāskatari keyokōi nā afe yorafo ato imapaiyai keska fakī ato imani aōnoax ishara faatanānōfo, ixō kenenī.

⁹ Nāskaxō kenekī iskaſani: “Nono mai anoax Cristo afianā Apa Nios ari kani,” ixō kenenī. Nānori keneninō nō tāpitiro Apa Nios ari kayoamano na mai ano fotoyonino nai mēranoax noko keskara ixiki.

¹⁰ Niospa yoiaino, ftoni. Mā reteafono āfe Apa Niospa otoani. Nāskaxō ifini afe nai mēra ixii. Nāskakē keyokōi nai mēranoafōfāfe nono nāmānoafāferi āto xanīfo ixii.

¹¹ Nāato noko katonī noko imapaiyai keskai aōnoax nō shara faatanānō. Nāskaxō fetsafo afe rafemisfo ato imata, nokori nīchi aōnoa fetsafo nō ato yoisharanō. Fetsaſori katonī nā meka shara aōnoa ato yoinōfo Jesús Ifofanōfo. Fetsaſori katonī āfe meka shara chanīmara faifono ato tāpimayanā ato kexesharanōfo āfe meka nikasharakōinōfo.

¹² Afeskaſī ato Niospa katonimē? Aōxō yoinōfo Niospa ato katonī a yora fetsafo ato yoisharanōfo, a Jesús chanīmara faafo aa yora fisti keskara inōfo Jesús tāpikōikanax.

¹³ Afāfe Niospa Fakeōnoa noko tāpimasharakōiaifono, aōxori fetsaſori nō ato yoikī tāpimasharanō. Askax keyokōi oa yora fistikōiax itikini nō inō. Askaxori Jesús afe keskarāmāki nō tāpisharakōinō. Askax oa Jesús ōiti keskara sharakōi ixiki.

¹⁴ Nāskax anā oa fakefo keskara nō itiroma mā nōmēra Niospa meka yosiano. Oa nefe onori kai, anā onori kai imis keskai, fakefo askatirofo afaa shināsharaima. Askaxō a Niospa meka tāpisharafāfema ato yoiaifāfe nikafofāsa fatirofo. Askaxō tāpisharaxikāima Niospa mekakōi. Askatari a yora āa chanīki fanīrira ato yoimis nō nikatiroma.

¹⁵ Fanīrira ato yoitama nō nōināsharakōixō Niospa meka mēstesharakōi nō ato tāpimasharakōitiro. Nō askai nōko Ifo Jesucristo āfe ōiti keskara sharakōi nō itiro.

¹⁶ Jesús nōko mapo keskaraxō noko shināmākī noko yonomanaino, oa afe yora keskara nō itiro. Akka nōko yora meemafix nō mifimais ita, nō kishimais ita, nō pachomais ita, nō feromais ita, ixō nō afaa yonotiroma, afaakairoko shinākī. Akka nō mifi rafeyata, nō tae rafeyata, nō fero rafeyata, askai fetsexō nō meemasharakōixō nō yonosharakōitiro shināfāi, nōko yoramāi meemasharakōikē. Nāskafakīri keyokōichi nō Jesús Ifokōi faax nofe yorafo fe nō isharakōitiro noināsharakōikai, Jesúsnoax mā noko āfe Yōshi Shara ināno oa āfe yora keskara sharax.

Cristo nōko ōiti noko fetsafaxōano a keskarakōi nō itiro, anā nō ipaoni keskara ixikima

¹⁷ Jesucristo ea ikīnā aōxō ē mato yoinō. Ea nikasharakōikāfe a Jesús Ifofamisfāfema fanīrira chaka fisti yoimisfo fanīrira shinā kākī. Nāskakē tsōa shināsharaima. Nāskakē ato keskara iyamakāfe.

¹⁸ Tsōa shināima oa fakishifā mēra niafo keskarafo. Askatari oa feromais keskara ikafo chai ōima. Nāskakē tsōa tāpifāi shināmisma. A Niospa shināi anori shināmismisfoma. Nāskakē tsōa Nios Ifofapaimisma.

¹⁹ Āto ōiti kerexkōi. Askakaxō afarafo chakafakani tsoa rāfitiroma. Nikayospakōimisfo, nō finakōiara ikani nikayospakani.

²⁰ A Jesús noiaifāfema shināifo anori mato Jesús tāpimamisma fanīrira chaka.

²¹ Jesús mato tāpimamis chanīkī mato yoimisma.

²² A Nios tāpimax mā iyopaoni anori anā shināyamakāfe. Fanīrira mato Satanás shināmayopaoni mā chaka inō.

²³ Anā anori shinātama, iskaratīa Niospa Yōshi Sharapa mato shināmapaiyai anori shinākāfe a mā iyopaoni shināmakikāta, isharakāfe.

²⁴ Ōiti fenashara fichipaiakāfe. Oa nō rapati chapokōi potaxō nō rapati fenasharakōi nō safemis keskakakī, ōiti fena sharaya ikāfe Niospa fichipaiyai keskai.

²⁵ Nāskax nō Cristo yorafo. Nāskakē anā fanīrira chanī yoyamakāfe. Afara ōixō yoikōikāfe chanīmakōi.

²⁶ Mā ōitifishkikī anā afarafo chakafayamakāfe. Askata aa chai ōitifishkiyamakāfe. Ōitifishkipai samama raekāfe xini ikiyamano.

²⁷ Mā ōitifishkiriaito koshikōi Satanás mato chakafamarisafai. Askayamakāfe Satanás nō mēra ikiyamanō.

²⁸ Mā yometsoyopaoni anā askayamakāfe. Iskaratīa yonokāfe a mā fichipaiyai fixikakī, a yora afaamaisfo ato ināxikakī afara sharafo.

²⁹ Askata anā fanīrira chaka yoyamakāfe. Shināsharata yoisharakāfe. Mā askaito mato nikakanax āto ōiti mēra inimanōfo. Askatari Jesús Ifofasharanōfo.

³⁰ Askata Niospa āfe Yōshi Shara nōko ōiti mēranoa omiskōimayamakāfe afara chakafakī. Askatamaroko nōko Ifāfe āfe Yōshi Shara nokoōnoa inimamasharakōikāfe. Āfe Yōshi Shara nō mēra naneakī, oa koxa marakka faa keskarafakī Niospa noko askafaa nā Jesús anā fotoaitā.

³¹ Māto yora mēraxō mato ōiti fishkimamis a chaka shināmakikāfe. Ato noikaspai ōitifishkikī finakōimis iyamakāfe. Afaa shināima oa ōitimais keskara āakōi mekai keskara iyamakāfe. Fāsikōi yōachepemis ato ferateni iyamakāfe. Ato noikaspakī ato ichayamakāfe. Mā chakara ato fayamakāfe. Mākōi chakafakī ato noikaspayamakāfe.

³² Askatamaroko ato fe raenā faatanāsharakōikāfe, a mato Niospa aka keskakakīri Jesúsxō ato raefakāfe.

5

Afeskax Niospa fakefo itirofomē

¹ Mā Niospa fakefokē mato noisharakōi. Nāskakē a keskara ikāfe, Ifofasharakōi.

² Cristo noko shinākī finakōi noko fenoōnoax nani. Nōko chaka noko soaxoni. Nāskakē noko nāxoni, aakōi nanima. Nāskaito xafakīa Epa Niospa ōini nōko chakaōnoax nani, anā nōko chaka nokoō neenōma. Nāskakē mā ranāri nōināi finasharakōikāfe.

³ Mā Niospa fakefokī ōisharata ikāfe. Isharakāi afarafo chaka shinātama. Māto āfimafo chotayamakāfe. Kēromāri māto fenemafo chotamayamakāfe. Askatari mares fisti afama mīshti a mā fichipaiyai fo fiyamakāfe.

⁴ Askatari fanīrira meka chaka yoyamakāfe. Anori shinātama a Niospa fakefo isharakōikaxō, mēstekōi yoisharatirofo iskakakī: “Aicho Epa Niosi, mī noko ikisharakōiaki,” ixō mā yoimis.

⁵ Mā mā tāpimis yora fetsafāfe fanīrira shināmismo āto āfimafo chotamismo ato fe oxakaxō, kēromāri āto fenemafo chotamamismo, askara yorafo Nios ano fokanima. A afarafo noikakī fichipaimismo, askara yorafāfe afama mīshtifo noikani Nios shinātama, askara yorafo a Nios xanīfo ano fokanima.

⁶ Ōisharakakī yora fetsafāfe anorima mato yoipaikani fanīrira āa mato pāarakakī. Askara yorafāfe Nios nikakaspakakī chakafakani. Askaito ōikī Niospa ato kopikiri chakafaxii atoki ōitifishkikī.

⁷ Nāskakē nā ikaifo keskara mā iyamakāfe. Afarafo ato feta chakafakī, anori shināyamakāfe.

⁸ Mā fanīrira shināyopaoni mato ōiti oa fakish keskara ikax, akka iskaratīa mā Cristo fe rafeax a mā iyopaoni keskara anā mā shināima. Māto ōiti xafasharakōia mā ika. Nāskara shara. Mēxotaima isharakāfe.

⁹ Nāskax mā isharakōimis. Cristo mato īkināno mato ōiti xafasharakōi mā imis. Mā isharakōiax shara mā itiro. Māto ōiti mēraxō mēstesharakōi mā shinākōitiro. Mā anori shināxō anā fanīrira mā yoima.

¹⁰ A Niospa fichipaiyai keskafakī tāpisharakōikāfe. Nāskakōi fakāfe.

¹¹ Nā Nios Ifofakaspamisfāfe, afaa tāpiamafāfe afarafo chakafaiifāfe ōiki māri ato feta chakafayamakāfe. Ato ōitamaroko ato yoisharakōikāfe: “Anā afaa chakafayamakāfe,” ixō ato yoikāfe.

¹² Askatari a yora fetsafāfe one afama mīshti chakafafiakī onepaimisfo. Askarayakai nō mekaima nō yoi nō rāfitiro.

¹³ Akka mā fakishano nō rāpari otaxō, keyokōi nō ōisharakōitiro. Nāskarīfai a yorafāfe afarafo chakafakaxō onepaifaiifāfe, Niospa meka ōikī tāpitirofo a chakafamisfo.

¹⁴ Nāskakē Niospa yoimis iskafakī:

Afarafo mā chakafamiski moīnīfōfākāfe oa mā naa keskara ikax finīnīfōfākāfe Cristo mato ōiti mēra oa fafeai keskara mato fasharanō, ixō yoimiski.

¹⁵ Nāskax isharakōikāfe. Oa Niospa meka tāpiama keskara iyamakāfe. A Niospa mekaōnoa yoikī kenenifo anori isharakōikāfe.

¹⁶ Nāskakē a Nios Ifofaafomafō iskaratīa chakafinakōiafo. Nāskakē māri isharakōikāfe ato keskara ikakīma. A Niospa apaiyai keskara akāfe mēxotaima.

¹⁷ Nāskakē fanīrira chaka shināpaiyamakāfe a Niospa mato amapaiyai anori tāpisharakōikāfe.

¹⁸ Askatari anā pāeyamakāfe. Mēxotaima pāeriai mā chakakōifo itiroki. Askaxō mā afaa shināsharaima. Askatamaroko Niospa Yōshi Shara mato mēra naneano afe rafesharakāfe mato yonomasharanō.

¹⁹ Nāskakē mā ranā Niosnoa yoinōnākāfe isharakōikai. Nōko xini David mēxotaima fanāipaoni keskariai māri Nios Ifofaax aōnoax fanāikāfe mā ranā mato ōiti mēraxō nōko Ifo shināi inimayanā.

²⁰ Pena tii aichora fakāfe Epa Niospa noko afama mīshti faxōfaino, nōko Ifo Cristo shināyanā nō Ifo sharafanō.

Afe keskara nō itiro mē Cristo yorafo

²¹ Cristo nikasharapai, mā ranā nikanōnāsharakōikāfe.

²² Kēromāri a mato Ifo Jesús mā nikasharai keskafakī, mato fenefo ato nikasharakōikāfe mato yoisharaiifāfe, mato Ifo Jesús mā nikai keskafakī.

²³ Cristo nōko xanīfōfinakōia nō nikasharai keskafakī, kērofāferi āto fenefo nikasharakani āto xanīfōmāiyakē. Askatari Cristo noko ifimis nō nikasharakōitiro oa nō afe yorakōifo keskaraxō.

²⁴ Nāskakē kēromā āfe fene nikasharatiro āfe xanīfōmāiyakē a nōko Ifo Jesús chanīmara faafo tiito nikasharaifo keskafakī.

²⁵ Nō Cristo Ifofaano noko noikōiax aakōi nokoōnoax nani. Nāskarīfakī feronāfakefāfe, mato āfīfo noisharakōikāfe.

²⁶ Mā āfe meka chanīmara faito, oa noko fāka choka keskara faxō noko katonī, oa nō afaa chakafamisma keskara noko imaxii.

²⁷ Mā noko ifiax, nāskax nokoōnoax nani nōko chaka noko soaxoxiki nō isharanō. Nā anā nōko Ifo Jesús oaitīa a chanīmara faafo tii noko ifixō sharakōi noko ōixii, oa nō afaa chakafamisma keskara noko ōixii.

²⁸ A feronāfakefo āa noimesharaifo keskafakī, mato āfīfo noisharakāfe.

²⁹⁻³⁰ Akka shinākapo. Tsōa pishtakai ato yora chakafamisma. Nōko yora nō mesefakī fonāikī nō pimis shara nixiki. Nāskafakīri Cristo a afe yorafo ato kexesharamis māmāi nō afe yorakōifokē.

³¹ A Niospa meka yoimisto keneri iskafakī: “Nāskakē feronāfāke kēro fiax anā apa fe afa ikano anā ano itiro ma. Paxkatiro, āfi fe ixiki. Askax oa fisti keskara ixiki anā rafema,” ixō yoikī keneri.

³² A Niospa meka yoimisto keneni anori taefakī tsōa tāpinima. Mā iskaratīa noko Niospa tāpimasharai a nōko Ifo Cristo Ifofaafō tii afe yorafokanax, oa fisti keskara afe yorafo ixō keneni.

³³ Ē mato yoi fisti rasichi mātō āffo noisharakōikāfe. Mēxotaima aa mā mā noimeai keskafakī mātō āffo noisharakāfe. Askatari kērofāferi āto fenefo noisharakōikaxō nikasharakōinōfo.

6

¹ Fakefāfe, mātō epa nikasharakōikāfe mātō efa yafi, nōko Ifo Jesús noikī. Nāskara sharakōi.

²⁻³ Epa Niospa Moisés shināmanaino kirika keneni iskafakī askara nō nikanō: “Mātō epa yafi mātō efa noisharakōiyanā ato nikasharakōikāfe. Mā askafakī nono mai anoxō xinia ranā mā aki inimayanā,” ixō Niospa shināmaino Moisés kirika keneni.

⁴ Iskaratīa āto apafori ē yoisharai. Mātō fakefo ferateyamakāfe matoki ōitifishkiyamanōfo. Ato askafatamaroko a nōko Ifāfe noko noiai keskafakī, mātō fakefo tāpimasharakōikāfe. Fenāmāshita ato yoisharakōikāfe akairi Jesús tāpisharakōinōfo.

⁵ Askatari ato yonoxomisfāferi mātō xanīfo tii ato nikasharakōikāfe, nono mai anoxō mato yonomanāifāfe mātō xanīfo tiito. Nāskakē mato yoiāifāfe ato nikasharakōikāfe, nā nōko Ifo Jesús fichipaiyai keskafakī mā samama ato axorisa fai. Askatari mātō xanīfāfe mato yonomanaito mā axosharatiro. Nāskakē, “Ē Cristoōxō yonosharai,” ixō nō yonosharatiro. Nāskarīfakī ēfe xanīfori ē yonosharaxotiro.

⁶ Mātō xanīfāfe mato ōiainos yonoxosharakakima, mato ōiyamafiainori yonosharaxokāfe inimakōiyanā. Mā askaito ōi inimanō. Mā mātō xanīfo yonosharaxokī, nā nōko Ifo Cristo yonoxona keskara mā faikai. Akka nono mai anoxō mātō xanīfo mā inimama keskafakī, nōko Ifo Niospa mato amapaiyai keskara mā axikai. Nāskax nōko Ifo Jesús āfe yonomati ixikakī.

⁷ Inimasharakī yonosharaxokāfe. A mā nōko Ifo yonosharaxonai keskafakī mātō xanīfori yonosharaxokāfe inimayanā.

⁸ Mā mā tāpia yorafāfe yonosharaifāfe ōikī, Cristo afara sharakōifo ato ināxii, a xanīfomais ināta a xanīfoyari ināxii.

⁹ Nāskakē mā xanīfofōfāferi, a mato yonoxomisfo ato shara fakāfe. Nō mato chakafaira ixō ato ferateki koshapaiyamakāfe. Shinākāfe, māri Ifoyakī a nai mēra ika. Nōko Ifo Cristo keyokōi nāskarafos noko ōi kiki.

Afeska nā nō chanūmara faafō tii nō mitsisipasharakōi itiomē fetsafāfe noko afara chakafamapaiyaifono nō afaa afeska fanōma

¹⁰ Ē mato yoisharanō, ea nikasharakōikāfe, efe yora mšitichi. Nōko Ifo Niosnoax nō mitsisipakōi itiro āfe Yōshi Shara no mēra naneano.

¹¹ Ē afara fetsaōnoa mato yoinō mā tāpinō. Sorarofō āto xanīfāfe ato yoitiro itipinīsharanōfo fetsafāfe ato afeska fanōfoma. Nāskaxō a aō xorakomeaifo kerexkōi ato inātiro, maiti kerexkōiri ato inātiro, sitora kerexkōiri ato inātiro fetsafāfe ato retenōfoma. Nāskarīfakī Epa Niospa āfe Yōshi Shara mato ināpaiyaito fikāfe, Satanās chakata mato afara chakafamapaiyai keskara axikakīma.

¹² Akka nōkai yorakōifo fe mēnēnāima. Askatamaroko nā niafaka yōshi chakafo fe nō iki, kerexkai noko afara chakafamapaiyaifono. Nāfāfe nō ōiamafiaino noko afara chakafamapaiyani. Nā niafaka yōshi chakafo ichapakōifo.

¹³ Nāskakē Epa Niospa āfe kerex shara mato ināpaiyaito fikāfe aōnoax mitsisipakōi ixikakī, niafaka yōshi chakafo matoki nokoxō, mato afeska fanōfoma. Nāskaxō nā niafaka yōshi chakafāfe mato afara chakafamapaiyaito Niospa kerex sharaōxō mā finōfiro mato afaa chakafamanōfoma. Akka Niospa nā mato amapaiyai keskara mā akōinax mā isharakōitiro, niafaka chakafo mato makinoa potax. Nāskax Jesús fe rafexō mā afaa chakafaima.

¹⁴ Ē mato yoiāi keskai sorarofō itipinīsharatirofo keskai. Māri itipinīsharakāfe niafaka yōshi chakafo matoki nokoxō mato afara chakafamapaiyaito keskara axikakīma. Epa Niospa mato amapaiyai keskara fisti akāfe isharaxikakī. Sorarofāfe ikisi āto sitora kerexkōi itipinī fatirofo ayaxō āto rapati safexikakī. Nāskarīfai mā isharakōiaino niafaka yōshi chakata mato afeska fatiroma. Askatari sorarofō āto safeti kerexkōichinī xorakometirofo, nā ato noikaspaifāfe āto ōitiki ato pīanōfoma. Māri Niosnoax isharakōikāfe, nikafaka yōshi chakafāfe mātō ōiti mēraxō mato afaa chakafamanōfoma.

¹⁵ Oa sorarofāfe āto sapato shara safekanax ichotirofo keskariai, māri nāskari akāfe. Nāskarīfai mā ato Niospa meka yoisharaikai mā katiro a Niospa meka nikamisfoma mēra. Itipinīsharakāfe fetsafoki nokoxō Niospa meka sharaōnoa mā ato yoiāito nikai inimakōinōfo.

¹⁶ Akka sorarofāfe āto xītimati nā kerexkōi tso matirofo a ato noikaspaifāfe ato pīanōfoma. Nāskarifiakī a mato xītixonai mā fenai. Mā nōko Ifo Jesús chanīmara faino nā niafaka chakafāfe mato afara chakafamapaiyaito mā atiroma. Nāskakē nō Jesús chanīmara fakōinaino nā nōko xītimati keskara itiro.

¹⁷ Sorarofāfe āto maiti kerexkōi safekaxō āto mapo kexesharatirofo, a ato noikaspaifāfe ato mapoki afeskafanōfoma. Nāskarifiakī mā Jesús chanīmara fakōinax mā Epa Nios fe nipaxatiro. Mā askaito niafaka chakata mato afeska fatiroma. Sorarofāfe āto keno fitirofo a ato noikaspaifo fe aō ato fe retenāxikaki. Nāskarifiakī Niospa Yōshi Shara oa keno keskaraki fikāfe. Nā keno keskaraki Niospa meka shara nā mā fichipaikōi niafaka yōshi chaka matoki nokopaiyaito otimafaxikakī.

¹⁸ Shināmakiyamakāfe. Mēxotaima kīfikāfe Niospa āfe Yōshi Sharaōxō mato tāpimasharai. Shināmakixoma mato shinākōi. Nāskakē shināchakayamakāfe. Mēxotaima ato Nios kīfixokāfe a Ifofaafō ato axosharanō.

¹⁹ Nāskaxō eari kīfixokāfe Niospa Yōshi Sharaōxō āfe meka shara mesetama ē ato yoinō. Nā āfe kaifomafoōnoaxri Jesús ato nāxoni ē yoinō tsōa tāpiyonifoma.

²⁰ Ea Niospa nīchini anori ē ato yoinō āfe meka shara. Nāskakē ea karaxa mēra ikimanifo. Nāskakē ea kīfixokāfe ē Niosxō ato yoinō mesetama.

Pablo mā mekai xatekī Efeso anoafō meka shara fomani

²¹ Nofe yora Tíquico ē aō noisharakōi. Efeta nōko Ifo Jesús yonoxomiskē. Ē Tíquico mato ari nīchixii, ē afe keskara ikamākī mato tāpimanō.

²² Nāskakē ē a mato ano nīchikai nō afe keskaramāki a Tíquico mato tāpimanō. Nāskakē mato ōitinī shināsharai mā inimanō mā mā tāpiax.

²³ Nōko Epa Nios feta nōko Ifo Jesucristo mato ōiti mēra mato shināsharamanō mā fekaxteyamanō. Jesús chanīmara faax, keyokōi mā nōināi fetsenō.

²⁴ Nā nōko Ifo Jesucristo noipakenakafo Nios sharakōi mato noikōipakenaka. Askapakexapainō. Nā ti.

Ēkīa Pablo ē mato kenexoni.

Pablo Filipos Anoafu Kirika Kenexō Fomani

Pablo karaxa mēraxō a Nios Ifofaafu Filipos anoafu ato kirika kenexō fomani

¹ Ēkīa Pablo, Timoteo feta nō Jesucristo yonoxomis. Nāskakē nā Epa Nios Ifofaafu nā māto xanīfofoya a mato kexemisfo nō kirika kenexō fomai mā tāpinō. Nā pexe rasi Filipos anoafu nō fomai, nāfofi Jesucristo afe yorafoki.

² Nōko Epa Nios feta nōko Ifo Jesucristo mato noikī mato sharafai kiki mato inimamakī mā anā fekaxteyamanō mā isharakōinō.

A Nios Ifofaafu Pablo ato kīfixopaoni

³ Nā ē mato shināitīa, ē Epa Nios aichofa fafafāini.

⁴ Ē Epa Nios kīfikī mēxotaima inimakōikai keyokōi ē mato kīfixōfafāini.

⁵ Mā efeta Jesucristo chanīmara fakī taefanītīa, iskaratīari mā efeta Niospa meka shara Jesucristoōnoa mā ato yoimis.

⁶ Chanīmakōi ē yoi, nā Epa Niospa māto ōiti mato shara faxoni keskafakī nē askakōifa fafafāini nā Jesucristo oaitīa.

⁷ Nāskakē nānori shinākī ēfe ōiti mēraxō ē matoōnoa shināfafāini, ēmāi mato noikōikī nā Epa Niospa ea sharafai keskafakī mārīmāi efeta meemiskē. Akka ea karaxa mēra ikimanifo. Nāskakaxō xanīfofofāfe ferotaifi ea iyomisfo anoxō ē ato yoisharanō Niospa meka sharaōnoa afe īpaxanōfo. Iskafakī ē ato yoimis: “Jesús noko nāxonī nōko chaka noko soaxoxiki nō afe īpaxanō,” ixō ē ato yoimis.

⁸ Epa Niospa tāpia keyokōi ē mato noikōiatio a nōko Ifo Jesucristo noko noikōiai keskafakī.

⁹ Ē mato Nios kīfixokī iskafaxōfafāini, mā nōināi finakōinō, askatari mā tāpisharakōixō nikakōisharayanā mā tāpikōinō.

¹⁰ Nāskaxō afara sharakōifo tāpixō katonōfo. Nāskakanax isharakōitirofo, afaa chakakai matoō netiroma, matoōnoari afara chaka yoitirofoma mā Cristo oaino.

¹¹ Nāskaxō nā Jesucristo mato sharafai keskafakī, māri askafatiro. Mā askaito mato ōikī fetsafāfe mato yoikī iskafatirofo: “Aicho, nāfo isharakōiafo Epa Niosnoax. Nios fāsi sharakōi,” ixō yoixikani. Nānori matoōxō ē Epa Nios kīfifafāini.

Ē shināi ē Cristo fe rafepakenaka

¹² Efe yora mīstichi, mā tāpinō ē mato yoinō. Ea karaxa mēra ikimafafono, akka ē mēxotaima Niospa meka sharaōnoa ē ato yoifafāini afe nīpaxanōfo.

¹³ Nāskakē sorarofāfe xanīfāfe pexe anoxō fetsafo feta mā tāpiafo ē karaxa mēra ikē Cristo Ifofai.

¹⁴ Ē karaxa mēra ikano nā nōko Ifo Jesús Ifofaafāfe atirifāfe Niospa meka sharaōnoa ato yoikakī mesetamakōi inimakōikai nōko Ifoxō ato yoikani.

¹⁵⁻¹⁷ Chanīma, fetsafāfe Cristoōnoa meka shara yoifkākī ea finōpaikani, ea shināchakamapaikakī. Akka fetsafāfe ea noikakī eōnoa shināmisfo iskafakakī: “Pablo karaxa mēra ikimafafono Epa Niospa meka yoiaito tsōa xatematiroma Jesúsnoa ato yoiaito nikakōinōfo,” ixō Jesúsnoa yoisharatirofo. Akka fetsafāfe Cristoōnoa yoikakī: “Noko nikakōinōfora,” ixō ato yoipaikani ea finōpaikakī ē karaxa mēra ikano. Akka fetsafāfe ato noikakī ato yoisharamisfo, māmāi tāpikaxō nonoxō ē Cristoōnoa meka shara yoimiskē afe nīpaxanōfo.

¹⁸ Akka nāskanō, nā yoipaiyai keskafaxō Cristoōnoa ato yoinōfo. Nāskafakī ato yoiaifono nikai ē inimakōini.

¹⁹ Akka mē tāpia ē inimakōi, mā ea Epa Nios kīfixonaito nikai Jesucristo āfe Yōshi Sharapari ea axōfaino.

²⁰ Epa Niospa ea amapaiyai keskara akikī ē rāfitiroma. Ranotamakōi ē yoitiro. Ē askafakī yoiaito ōikakī fetsafāfe Cristoōnoa shinākōinōfo. Nāskakē ē nayoamax ē niyoa sharakī.

²¹ Akka Cristo fistiōnoax ē īpanaka, akka ē nairi sharafinakōia, ē inimakōi ēmāi Cristo fe nīpaxakī.

²² Akka ē niyoxō fetsafo Cristo ē ato chanīmara famatiro afe nīpaxanōfo. Akka ē fato katotiroma, nia rakikīa shara, askayamai naa rakikīa shara. Ēkai tāpiama.

²³ Akka fekaxkōi. Nā rafe sharafaxo fato ē katotiroma. Akka ē napai Cristo ari kaax afe īpaxakī, nā sharafinakōia ē mei.

²⁴ Akka fetsari nā sharafinakōia ē shināi, mā ea yopai Niospa meka shara ē mato yoinō.

²⁵ Mē tāpia māmāi ea yopakōiatio, askatari mē tāpia ē nayoamax ē mato fe iyoikai. Niospa meka shara ē mato yoiaino mā inimayanā chanīmara fakī mā finakōinō.

²⁶ Nāskakē ē anā mato fe ikaino mā inimaifinakōixii Cristo Jesúsnoax.

²⁷ Akka shināsharata isharakāfe. Nāskaxō na meka shara Jesucristoōnoa chanīmakōi yoixikakī. Mā askaito ē mato ōikanō, askayamai chai ixō ē matoōnoa nikakī ē tāpitiro mā Jesús Ifofasharaino nāskara fisti shinākaxō. Nāskaxō keyokōi Niospa Yōshi Sharaōxō fetsafo mā ato Jesús chanīmara famaxikāki.

²⁸ Mā askafakī yoiaito a mato noikaspaifāfe mato mekakī xatemapaiyaifono rateyama-kāfe. Nāskakē mā atoki rateyamaito ōikakī tāpitirofo akka nāfo fenokōikani, akka mā fenotama Nios fe mā nīpanaka.

²⁹ Epa Niospa mato sharafaxōa mā Cristo chanīmara fata aōnoa māri mā omiskōinō.

³⁰ Ē ikai keskai mā efe omiskōimis. Mā mā ea ōipaoni ē omiskōiaito, iskaratīari mā mā ea nika Cristoōnoa ē omiskōiaito nāskafixō ē eneima Niospa meka ato yoikī.

2

Cristo nono mai anoax afama iyopaofinixakī iskaratīa xanīfo finakōia

¹ Nāskakē Cristo mato inimama mato noikī mato inimamashara āfe Yōshi Shara mato fe ika. Chanīma, Cristo mato noikī mato inimamashara mā mā meemis.

² Nāskakē ea inimamakōikāfe. Isharakōita keyokōichi nānorifos shinākāfe. Mā ranā nōināsharakōikāfe. Nāskakē Jesús mato amapaiyai keskara fisti axikakī.

³ Akka fetsafo afara axotama a mā mā afara apaiyai keskara fisti shināyamakāfe, askatari fetsafāfe eōnoa yoisharakōinōfora ikax kakapaimis iyamakāfe. Askatamaroko isharakōita fetsafoōnoa yoikī iskafakāfe: “Nafāfe ea finōtirofoki. Akka ēkai afama. Jesús fistiche ea imasharatiro,” ixō fetsafo finōpaiyamakāfe.

⁴ Askatari a mā mā fichipaiyai keskara fisti shināyamakāfe, askatamaroko a fetsafāfe fichipaiyaifo keskarafori shinākāfe.

⁵ Nāskaxō nōko Ifo Jesucristo shināi keskafakī māri nānori shinākāfe.

⁶ Nāfi Nioskōikī Apa Nios keskara ari onifafianino yoikī iskafapaonima: “Ēri ē Nioskōi nā efe Epanāfori ēfenā. Nāskakē efe Epa nai mēra ika keskariai ē nono mai ano itiro. Ē askaito afanā ea afeska fatiroma,” ixokai anori Jesús shināpaonima.

⁷ Askatamaroko Jesús āfe sharafoya āfe afama mīstifito potayoni, nono mai ano oax ato yonoxomis keskara ixiki. Nāri fake feronāfake kaitiro keskai, feronāfakekōi kāini.

⁸ Feronāfakekōi ixō isharakōixō Apa Niospa yoiai keskara nikakōiax nani. Afara chakafamis keskarax ifi cruz ikakinoax omiskōikai nani.

⁹ Nāskakē Epa Niospa xanīfo finakōia imani, nāatofi keyokōi finōinīfofanakī.

¹⁰ Nāskakē Jesús keyokōi ato finōano āfe ane nikakakī keyokōichi akiki ratokonō mai chachikaxō yoikī iskafaxikani: “Jesús, mīfi xanīfo finakōiakī,” ixō yoixikani keyokōi nā nai mēranoafoyaxō nono mai anoafāfe. Askatari nā Ifofax namisfāferi askafaxikani, nifakafāferi askafaxikani.

¹¹ Nāskafaifono keyokōichi tāpixikani, “Jesucristo nōko Ifora,” faifono. Askafakāki Apa Niosri inimamakōixikani.

Jesús Ifofaafāfe ato ōimasharatiro afeskax isharatirofomāki, a Jesús Ifofaafoma

¹² Nāskakē efe yora mīstichti, ē mato fe ixō ē mato yoiaito mēxotaima mā ea nikapaoni keskafakī, ea nikakī finakōikāfe iskaratīa ē chai ikakī nono karaxa mēra. Jesús māto chaka mato soaxonō isharakōita shināsharakōikāfe afe ipaxakakī kachikiri fakakīma. Nāskakē meseyanā nikakī finakōifafāikāfe Niospa māto chaka mato soaxonō.

¹³ Niospa māto shinā mēraxō mato shināmafafāini a mato amapaiyai keskara mā anō. Nā apaiyai keskafakī, nānori mato shināmapai.

¹⁴ Nāskatari nā mato amapaiyai keskara akāfe, yōachēpekakima, askatari feratenāyamakāfe,

¹⁵ mā isharakōiano tsōa matoōnoa afaa chaka yoiyamanō. Askatamaroko yora chakafo mēra ikax mā isharakōiaito mato ōitirofo māmāi Niospa fakekōiax afaa chakafamisma. Akka mā ato mēra ixō ato ōimasharakāfe, oa fakishi fishifāfe chai chaxatiro keskafakī.

¹⁶ Nāskaxō Niospa meka sharaōnoa ato yoifofāfōfāikāfe afe ipaxanōfo. Nāskakē mā Cristo oaino ē matoōnoax inimaifinakōitiro, ēakairoko kaxpa Niospa meka ē mato tāpimanax, askatari ēa ē kaxpa yonomisma.

¹⁷⁻¹⁸ Ē mato yoisharaimis mā Jesús chanīmara fakōinō. Akka Epa Nios ē yoitiro iskafakī: “Epa Niospa, ea māia yoini keskafakī Filiposo anoafō mī Fake Jesúsnoa ē yoisim. Nā chanīmara fakōinōfo, a mī ato yoiai keskara akōixikani. Ē mia ato chanīmara famaōxō ea retexikani rakikīa,” ixō ē Epa Nios yoitiro. Akka ea retefiatono eōxō mā Jesús Ifofaano ē inimatiro. Nāskakē māri efe inimakāfe Niospa ea sharafaino matoōnoax ē natiro.

Timoteo fe Ipafrodito

¹⁹ Nōko Ifo Jesucristo nīchipaiyaino ē matoki samamashta Timoteo nīchipai mato ōikanō. Mā anā oxō matoōnoa ea yoiaito nikai ē inimakōixii.

²⁰ Akka tsōakai efeta iskafakī shināima, Timoteo fistichi shināi ē shināi keskara. Chanīma, na Timoteo mato noikōikī matoōnoa tāpipai mā Jesús Ifo sharafaamāki. Akka tsoakai na Timoteo keskarama. Nāskaxō ē mato noiai keskafakī nāatori mato noikōi.

²¹ Akka fetsafāfe āakōi apaiyai fo keskara fisti shināmisfo. Cristo Jesús ato amapaiyai keskara amisfoma.

²² Akka mā mā tāpia na Timoteo isharakōixō mato ōimamis efeta Niospa meka sharaōnoa ato yoimis. Nā fāke āfe apa feta yonotiro keskafakī na Timoteo efeta yonosharamis.

²³ Nāskakē Timoteo, ē mato ano nīchipai mato ōikanō. Mē tāpixō ē afeskaimāki, akka mē tāpixō mato ari ē Timoteo nīchi eōnoa mato tāpimanō.

²⁴ Akka ē nōko Ifo chanīmara fai, ea mato ari nīchiaino samamashta kaxō ē mato ōikai.

²⁵ Akka ē shinā nofe yora Ipfrodito mato ari nīchipaikī. Fekaxfiano nāato efeta yonokōimis na Ipfrodito mā ekeki nīchini, ē afara yopaito ea axonō.

²⁶ Na Ipfrodito mato ōisharapaikōi, mato shinākōi māmāi nikamiskē isinī ikaito.

²⁷ Chanīma, na Ipfrodito isinī ikōini, mā nakerati. Nāskaino akka Nios aō noikōikī mā sharafaita, eari noikōiyana. Akka mā naano ē shināmitsaifinakōikeraita.

²⁸ Nāskakē ē mato ari nīchipaikōi mā inimakōinō matoki anā nokoaino, ēri shināmitsakōiyamaxiki.

²⁹ Nāskakē matoki nokoaito inimayanā ifisharakōikāfe nōko Ifoōxō. Nāskakē nā mā Ipfrodito noiai keskafakī nā keskarafori fetsafo noikōikāfe.

³⁰ Akka na Ipfrodito Cristo yonoxoni mā nakeraita. Akka mā chai ikax ekeki oyamaino matoōnoa omiskōinixakī nā Ipfrodito ekeki oyamea ea axosharaxiki.

3

Jesús chanīmara faafo a chanīmara faafoma mēra ikaxō ato ōimatiro afeskax isharatiro-fomākī

¹ Efe yora mīstichi, iskaratīa nōko Ifoōnoax inimakāfe. Mē mato kirika kenexokatsaxakī, anā ē mato yoi. Akka mā nikakōisharanō ē mato yoi.

² Kexemesharakāfe, a yora chakafo fishtayamakāfe, nā paxta pōfe keskarafoki. Nāfāfe afara chakafamisfoki. Iskafakī mato yoipaikani kiki: “Mā foshki repa xateyamax mā Nios ari kaima,” ixō mato yoipaikani kiki.

³ Akka nō foshki repa xatexokai nōko chaka nō soatiroma. Cristo Jesús noko nāxoni nōko chaka noko soaxoxiki. Niospa āfe Fakeōxō āfe fakefo noko imatiro. Āfe Yōshi Sharaōxō nō Nios yoitiro iskafakī: “Nō mia noi. Mī sharakōi,” ixō nō yoitiro. Nāskakē nō akiki inimakōi ares fisti noko nimatiro. Mā nō tāpia nō foshki repa xateāoxokai noko afeska fatiroma.

⁴ Fetsafāfe yoikī iskafakani: “Ē shara famis. Nāskax ē Nios fe İpanaka,” ixō shināifono, ēri anori shināipaiki ē shinākī finapaoni.

⁵ Mē kāiax ocho nia ē oxano ea foshki repa xatenifo. Ēfi israelikōikī, ēkai osiama. Benjamīn ēfe xini ipaoni, ēfi āfe fenaki. Ēfe epa feta ēfe ēfa hebreoxomāi ea fake fiafono, nāskakē ēri hebreo. Askatari fariseo ē iyopaoni, nāskaxō Niospa Moisés yoipaoni keskara ē nikakōipaoni ēmāi fariseoxō.

⁶ Askatari Niospa meka nikasharapaikōikī a Nios Ifofaafo ē ato chakafapaoni. Askatari ē isharapaikōikī Moisés yoini keskara ē nikasharakōipaoni. Nāskakē eōnoa yoikī tsōa iskafatiroma: “Na Pablokai Moisés yoini keskara nikakōipaonima,” ixō tsōa yoitiro.

⁷ Akka nāfo taeyoi ē ōia ēfenā sharafinakōia iyopaoni. Akka iskaratīa ē ōia afokai anā afama. Cristo Ifofakī afo ē anā shināima mē shināmakikōia. Cristo fisti Ifofakī afe İpaxakī.

⁸ Akka a ē ipaoni keskara anā ē shināima. Nāfo mē shināmakikōia, afo shināi ē finakōia ipaoni. Akka ē shināi afokai afama, nā afara chaka potamea keskarafo. Akka ēfe Ifo Jesucristo fisti ē tāpipaikōi, nāfi sharafinakōiaki. Ares fisti ea imasharatiro, a Moisés yoini keskarakai ē anā nikatiroma ea imasharanō.

⁹ Askatamaroko ē Cristo chanīmara faino Epa Niospa āfe Fakeoxō ea imasharatiro a keskara shara ē inō. Akka ē Nioski nokoaino ekeki inimatiro, ē Cristo fisti chanīmara fakē ea imasharanō.

¹⁰ Ē Cristo tāpipaikōi afe rafesharaxiki. Niospa āfe kerex sharayaxō Cristo anā otofani keskai, ēri āfe kerex shara mepai a keskara shara ea imanō. Jesucristo omiskōini keskai ēri aōnoax omiskōipai. Jesús naani keskai ēri askapai a keskara ixiki, afaa chakafaxikima, askatari afaa chaka shināixikima.

¹¹ Nāskakē a chakafo kachikiri fata, nā Jesús keskara sharakōi ē ipai, oa yora naax anā otoa keskara shara.

Ē Jesús Ifokōi fai nā ē akiki nokoaitīa

¹² Ë isharakõira ã ifiax êkai isharakõia. Askatari Jesús keskara ã ipaifi ã askakõima. Jesucristo ea Ifofamani ã a Ifofanõ. Nãskakê ã Jesús Ifofakõini a keskara sharakõi ixiki.

¹³ Efe yora mĩshtichi, ã Jesús keskara iyamañiai a ã ipaoni keskara ã anã shinãima. Akka ã Jesús fisti Ifofai. Nã feronãfakẽfo ichokani xonõnõnãkĩ texkeakekafã õitirofoma. Nã ifi nĩchiti nia ari fisti õiax ichotirofo keskariakĩ afara chaka shinãkima Jesús fisti ã shinãmis a keskara sharakõi ixiki.

¹⁴ Nãskaxõ afaa fetsa ã shinãima. Nã Cristo Jesús ã shinãmis Ifofapaikõikĩ. Akka Niospa ea katonĩ ã efe ãpaxanõ, Cristo Jesúsõnoax Epa Nios ari ã nokotiro, ariax a keskara sharakõi ixiki.

¹⁵ Mã Jesús Ifofakĩ nã ã mato yoimis keskafakĩ nãnorikõĩ shinãkãfe. Akka fetsafãfe a ã shinãĩ keskara shinãyamaifono, Niospa ato tãpimakĩ mẽstekõĩ shara ato yoixii.

¹⁶ Akka nãfo nõ tãpiax, shinãsharakõita nõ isharakõitiro, mã nõmãĩ Jesucristoõnoa tãpiax.

¹⁷ Efe yora mĩshtichi, ã Jesús Ifofaa keskafakĩ mãri Ifofakãfe. Mã nõ mato õimamiskĩ, nõ ikai keskai mãri askakãfe.

¹⁸ Mẽ mato mẽxotaima yoitaifamis, nãskafekẽ afianã ã mato yoi oiayanã. Akka fetsafãfe nã ã mato yoiãĩ keskara nikakaspakanĩ. ãto chaka xatekaspakakĩ Jesucristo ifi cruz ikakinoax noko nãxonĩ nikakaspakanĩ. Nãskakanax Jesús noikaspayanã ikafo.

¹⁹ Jesús ato amapaiyai keskara shinãtama ãa apaiyaiifo keskara fisti shinãmisfo. Nã paiã fisti shinãkata, a ayai fisti shinãmisfo. Feronãfakẽfãferi kẽrofo shinãmisfo, ãto ãñifoma. Kẽrofãferi feronãfake fetsafo shinãmisfo ãto fenefoma. Nãskara chakafos shinãkĩ, nã keskara fisti tãpiafo. Akka nõ chakama, nõ isharakõimis imisfo. Nãskakanax rãfitirofoma, nã keskarafo mã keyokani. Askatari nã omiskõipakenakafo mẽra fokani.

²⁰ Akka nõfi askaramakĩ, nõ Niospa fakefokĩ nõ afe nai mẽra ãpanaka. Akka nõ manai a noko Ifimis nai mẽranoax oxõ noko ifiyonõ, nõko Ifo Jesucristo.

²¹ Nãato nõko yora chakakẽ noko fetsafaxoxii afe yora keskara sharafinakõia nõ inõ. Nãskaxõ ãfe kereax sharaõxõ nõko yora noko fenasharafaxoxii afara chakafo nõ finõinõifofanõ.

4

Nõko Ifo Jesúsnoax mẽxotaima inimafafãikãfe

¹ Nãskakê efe yora mĩshtichi, ã mato noikõikĩ ã mato õisharapai. Nã ã mato shinãitã ã mea ã inimakõikakãini. Nãskakê ãfe fakefãfe, Jesús kachikiri fayamakãfe. Ifo sharakõĩ fakãfe.

² Akka a xotofake rafe Evodia yafi Sinti qui ã ato yoisharapai mẽnãpaikakĩma isharakõinõfo nã yora fisti keskarakanax nõko Ifoõnoax.

³ Yamã, mã efeta Nios yonoxomiskĩ, ã mia yoinõ nã kẽro rafe ato yoisharafe isharanõfo. Nã rafeta efeta Niosnoa meka shara yoimisfoki afe ãpaxanõfo. Clementeri nofeta yoimis. Fetsafãferi efeta Niosnoa yoipaonifo. Nãskakê ãto anefo Niospa mã kirikaki kenea afe ãpaxanõfo.

⁴ Nãskakê Jesús mãto Ifokĩ mẽxotaima inimakãfe. Afianã ã mato yoi, inimaifinãkõikãfe.

⁵ Nãskakê isharakõikãfe keyokõichi mato õinõfo, isharakõiafora mato fanõfo. Mã chaima nõko Ifo oi kiki.

⁶ Nãskakê afara afeskara afiaino shinãchakayamakãfe, askatamaroko mẽxotaima Epa Nios kãfikĩ. A mã fichipaiyai keskara yõkakãfe iskafakĩ kãfikĩ: “Aicho Epa Nios, mã ea nikasharakõimis. A ã yopai keskara tãpixõ mã ea axosharamis,” ixõ kãfikãfe.

⁷ Nãskakê mã ratepaiyãito Niospa mato inimamasharakõixii. Afara afeskara ifiaino Niospa nõko õiti noko inimaxotiro. Nãskakê nõ tãpitiroma afeskaxora nõko õiti noko inimaxotiro. Askafiano Cristo Jesús nõ chanãmara faino noko shinãmasharatiro. Afara sharafoõnoa shinãkãfe.

⁸ Efe yora mĩshtichi, ã kirika kenekĩ keyokerana. Afara nã chanãmakõĩ fisti shinãkãfe, askatari afara sharafos shinãkãfe, askatari nã noko mẽstekõĩ shinãmatiro shinãkãfe, yorãfãfe a afara sharafaifo keskarari shinãkãfe, a Niospa noko axõai keskarãfori shinãkãfe. Askaxõ nõko Ifo aicho fakãfe.

⁹ Afara ã ã mato yoiãĩ keskara yafi a ã mato tãpimana keskara akãfe. Nãskaxõ afara fetsa ã akaito mã õia keskafakĩ, mãri askafakãfe. Mã askaito õikĩ Niospa mãto õiti mẽra mato inimamasharakõitiro. Nãskax mato fe isharapakenaka.

Filipos anoafãfe kori ichanãfakaxõ Pablo fomanifo

¹⁰ Ë nõko Ifoõnoax inimakõĩ, taeyoi mã ea kori manamayopaofinixakĩ anã mã ea manamamisma. Akka iskaratãia ea shinãkĩ mã mã ea manamana ã aõ pinõ. Akka ea shinãmakiãfora ã mato faima, ea manamatiroma meekĩ mã ea manamamisma.

¹¹ Ë afaayayamãfãxõ ea afaa inãfoma ã mato famisma. Ë shinãchakaima, Niospa anori ea tãpimana. Ë afaamais fiax ã inimatiro, askatari afara ichapayax ã inimatiro.

¹² Akka mē tāpia afaamaisax afeskax ē itiomāki. Askatari mē tāpia a afara ichapayax ē itiro. Askatari mē tāpia afara afeskara ifiaino ē inimatiro. Nāskakē ē shināchakaima. Askatari māyaxri ē inimatiro, fonāifaiiri ē inimatiro. Afara mekefaxri ē inimatiro, afaa meke fayamafaxri ē inimatiro.

¹³ Afara fetsafo ē atiro Cristo āfe kerex shara ea ināno.

¹⁴ Nāskafekē mā ea shināki mā ea sharafa ē omiskōiaito.

¹⁵ Akka Filipos anoxō mā mā tāpia, nā ē Jesúsnoa meka shara yoikī taefanitūa noko ifipakexanō. Akka ē Macedonia anoax kaino, mā Nios Ifokōifaxō, mā ea kori manamani, ēmāi Niosnoa mato tāpimanano. Akka fetsafāfe ea afaa manamanifoma.

¹⁶ Ē Tesalónica ano iyoano, ē kori yopaito mā ea femayopaoni.

¹⁷ Akka ē shināima a ē afara fiai fisti. Askatamaroko ē shināi mā ea sharafaino Niospa mato sharafa fafafāinō, mato noikī.

¹⁸ Nāskakē iskaratūa ē anā afaa yopaima, mēmāi ayaxō. Ipafrodito ea fexoyamea a mā ea manamayamea tii. Nā ē fichipaiyai tiimaroko finōmainifofā mā ea femayamea. Nā mā Nios noiai keskafakī eari noikī mā ea femayamea. Mā ea askafaito ōi matoki Nios inimakōixii.

¹⁹ Ēfe Niospa nā mā fichipaiyai tii mato ināxii. Epa Niosnā āfe afara sharakōifo nā ichapakōifo keyonakama, āfe Fake Cristo Jesúsxō mato ināsharaxii.

²⁰ Akka nōko Epa Niosfi nōko Epakōikī nā fāsi sharakōi, tsoa keskarama. Ares fisti sharakōi. Tsōakai a finōtiroma. Nā nōko Ifokōira nō fapanaka. Askara ipainōra.

Pablo mā mekai xatekī Filiposo anoafo meka shara ato fomani

²¹ Eōxō keyokōi a Cristo Jesús Ifofaafō ea ato yoisharaxokāfe. Askatari na nono efe ikafāferi nā Jesús Ifofaafāfe mato yoisharakani kiki.

²² Na nono ikafāfe Nios Ifofakanax, xanīfo César āfe pexe ano yonomisfāfe afāferi mato yoisharakani.

²³ Nōko Ifo Jesucristo mato noikī mato sharafanō. Nā tii ē mato yoi.

Pablo

Pablo Colosas Anoafo Kirika Kenexõ Fomani

Pablo Jesús Ifofaafõ kirika kenexõ fomani, Colosas anoafo

¹⁻² Ëkĩa Pablo, Niospa ea nĩchini, aato apaiyai keskafakĩ ã yorafo yoinõ Jesucristoõnoa. Nofe yora Timoteo feta nõ mato kirika kenexõ fomai. Mã Cristo Ifofakõikẽ, pexe rasi Colosas anoxõ Nios nikakõiyana. Nõko Epa Niospa mato noikĩ mato shinãfafãinõ afanã mato fekaxtefanõma mã isharakõinõ.

Pablo a Jesús Ifofaafõ ato kĩfixõfafãini

³⁻⁴ Nã nõko Ifo Jesucristo ãfe Apa Nios nõ mato kĩfixõfafãini. Nõ mato kĩfikĩ iskafoxokĩ aicho fakĩ mãmãĩ nõ nikax mã Cristo Jesús Ifofakõikẽ. Nãskaxõ nã Jesús Ifofaa fetsafori mã ato noikõimiskẽ mã nõ nikamis.

⁵ Na meka shara chanĩmakõĩ Jesucristoõnoa mã mã nikamis. Jesucristo chanĩmara faax Nios ika ari mã afe ipaxatiro ixõ yoinifo mã mã nikamis. Na meka chanĩmara fakõixõ fetsafo mã ato noikõimis.

⁶ Na meka shara Jesucristoõnoa mã nikakĩ taefakĩ mã chanĩmara fakĩ finakõini. Nãskaxõ nikakĩ mã tãpini chanĩmakõĩ, Niospa mato noikĩ Jesucristoõxõ mãto chaka mato soaxoni mã chanĩmara faino. Nãskakẽ na meka shara, nikakani maifo tii anoafori nãskarifamismo.

⁷ Nonori nofe yora Ipafras mato yoini. Akka nã Ipafras nofeta Cristo yonosharaxomis, nãskakẽ nãato Jesucristoõnoa mato yoipaoni.

⁸ Nã Ipafras matoõnoa iskafoxokĩ noko yoiaito nõ nikamis: “Na Colosas anoafo Niospa Yõshi Sharaõnoax isharakõikaxõ fetsafo noikõikani,” ixõ noko yoiaito nõ nikamis.

⁹ Nãskakẽ nã ã matoõnoa nikakĩ taefaniũta, ã mato Epa Nios kĩfixokĩ xatemisma. Kĩfikĩ ã iskafoxõfafãini: “Epa Niospa, Colosas anoafo mĩ Yõshi Sharaõxõ mĩ ato amapaiyai keskafakĩ ato tãpimafe, mĩ ato tãpimanai keskafakĩ ãto õiti mẽraxõ mia tãpikaxõ mia Ifokõĩ fanõfo,” ixõ ã mato kĩfixõfafãini.

¹⁰ Nãskaxõ nã mato amapaiyai keskara mã akaino õi Nios matoki inimakõixii. Nãskax ãfe Fake keskarakõĩ mã itiro. Nãskaxõ mã fetsafo sharafa fafafaikĩ mã Nios tãpiki finakõitiro.

¹¹ Akka Epa Niospa afama mĩsh̄tifo shara fatiroki, ãfe kerex shara mĩsisipakõĩ mato inãtiro afara afeskarafiaino aõxõ mã tenekõinõ. Nãskafikĩ mã tenetiro fena fenakĩma inimasharakõikai.

¹² Nãskakẽ mã inimakõĩ. “Aicho Epa Niospa,” mã fatiro nãatomãĩ noko imasharata afe yorafo inãpaiyai keskafakĩ nokorimãĩ inãito. Nõri afe yorafokẽ noko inimamaxii, a ika anokai fakishma penasharakõĩ.

¹³ Nãskakẽ noko imasharakõia anã fakish mẽra nõ inõma. Akka nã Satanás ika ano fakishifakõĩ. Nãnoa Epa Niospa noko ifa, ãfe Fake fe nõ ipaxanõ. Nãato ãfe Fake noikõĩ.

¹⁴ ãfe Fãke noko nãxonikẽ aõxõ Epa Niospa noko ifia, nõko chaka noko soaxoyanã.

Jesús noko nãxonioõnoax Nios fe nõ isharapakenaka

¹⁵ Akka nõ Epa Nios õiyamafitirono ãfe Fake Jesús mai ano oni. Nãskaxõ ãfe Fãke noko tãpimani afe keskaramãkĩ Apa Nios. Nã ãfe Fake Jesús Apa Nios keskarakõĩ, ãfe õiti keskarakõiri. Afaa oniataima Apa Nios fe nai mẽra iyoipaoni.

¹⁶ ãfe Fake Jesucristoõxõ Niospa keyokõĩ onifani, nai mẽranoafoya nono mai anoafo. Nã nõ õitiromafoya, a nõ õitirofo onifani. Askatari ãfe ãjirifo nã afe ikafo onifata, niáfakafãferi ãto xanĩfori onifani. Epa Niospa ãfe Fake Jesucristoõxõ keyokõĩ onifani.

¹⁷ Afaa oniataima Cristo iyoipaoni. ãfe kerex sharaõxõ keyokõĩ kexesharakõimis. Nãskaxõ fishifo kexeta, xini kexeta, oxe kexeta, nõko mai kexeta famis. Akka nãfo kexeyamaino, chakanai fetsekerana. Nai fe mairi chakanakerana.

¹⁸ Tsõakai Jesús finõtirono, afaa oniataima keyokõĩ finõyopaonixakĩ, iskaratiari keyokõĩ finõa. Nãfi nã chanĩmara faafãfe ãto Ifokõiki.

¹⁹ Nãskaxõ Epa Niospa yoiĩ iskafoxõ: “È imis keskai ãfe Fakeri nãskakõimis, nãskax nãri efe Nioskõĩ, nõ nãskara rafekõĩ,” ixõ inimakai Epa Niospa yoini.

²⁰ Jesús ifi cruz ikaki mastaifono ãfe imi foax noko nãxonĩ nõko chaka noko soaxoxiki. Nãskakẽ aõnoax Epa Nios fe nõ anã isharatiro. Aõnoax keyokõĩ mai anoafoya nai mẽranoafo afe isharatirofo.

²¹ Mãto õiti mẽraxõ mã Nios noikaspayanã, mã chakakõĩ fapaoni. Nãskata mã Nios fe rafeyamata, afe yorarikai mã ipaonima.

²² Nãskafikẽ ãfe Fake Jesucristo nai mẽraxõ mai ano nĩchini feronãfakẽkõĩ ikiyonõ. Nãskax ifi cruz ikakinoax noko nãxonĩ, aõnoax Epa Nios mato fe rafexõ mãto chaka mato soaxotiro a

keskara shara mā inō. Nāskax mā akiki nokoaito matoōnoa afaa chaka yoitiroma. Nāskaxori mā yoitiroma iskafakī: “Mī afara chakafamis,” ixō aōnoa mā afaa yoitiroma.

²³ Nāskano na meka shara Jesucristoōnoa mā chanīmara faxō afara fetsa mā shināyamaino Epa Niospa matoōnoa yoipakenakama iskafakī: “Mī afara chakafamis,” ixō matoōnoa afaa yoipakenakama. Askatamaroko mā chanīmara faax mā inimakōiaito mato ifixii mā afe ipaxanō. Mā Jesucristo āfe meka shara nikakī taefani keskafakī nānorikōi keyokōi ē ato tāpimani. Ēkīa Pablo, ē Epa Niospa āfe meka yoifafāini Jesucristoōnoa ato yoiki.

Niospa Pablo yoini a Jesús chanīmara faafo ato yonoxonō

²⁴ Nāskakē ē inimai ē matoōnoax omiskōifi, māri afara afeskaraino mā Cristo Ifosharakōi faano. Cristo nokoōnoax omiskōini keskai, ēri nā afe rafemisfoōnoax nā Niospa fakefo atoōnoax ē omiskōimis. Ē matoōnoax omiskōita iskaratīari ē Cristoōnoax omiskōimis.

²⁵ Akka Epa Niospa ea katonī, a mato yonoxomis keskara ē inō, āfe meka shara ē mato yoinō. Nāskaxō ē yoikī iskafani: “Na maniafo tii anoā ēfe meka shara Jesucristoōnoa ato yoifofāsafafe,” ixō ea yoini. Nāskaxō āfe kaifoma mēra ea nīchini.

²⁶ Na meka shara Jesucristoōnoa nōko xinifāfe tāpiyopaonifoma. Niospa ato tāpimayopaonima. Akka iskaratīa Niospa noko tāpimani nō afe yorafokē.

²⁷ Epa Niospa Cristoōnoa mato yoiyomis keskafakī keyokōi mato tāpimaxii, mato fisti tāpimatama, nā yora fetsafori ato tāpimaxii. Iskafakī ato yoixii: “Ēfe Fake Cristo mato fe rafekakāini, nāskakē mā chanīmara fatiro a ē ika ano efe ipaxakī. Nā Cristo isharakōiai keskafakī ēri mato askafatiro māri isharakōinō,” ixō mato yoini.

²⁸ Nō Cristoōnoa yoimis, keyokōi nō ato yoifofāsafamis keyokōi nō ato yoimis nikakōinōfo. Mā isharakōiano nō keyokōi Niospa ferotaifi nō ōimasharapai a keskara shara ixii.

²⁹ Nāskakē ē mato yonoxokī finakōifafāini, Cristo āfe kerex shara ea ināno.

2

¹ Akka ē mato yoipai mā tāpinō, ē mato Epa Nios kīfixōfafāini. Laodicea anoāfo yafi fetsafori a ea ōimisfoma nāfori ē ato Epa Nios kīfixōfafāini.

² Nāskaxō ē mato kīfixōfafāini mātō ōiti mēranoax mā inimakōijyanā, mā ranā mā nōinākōinō. Nāska faatanāxō Epa Niosnoa xafakīakōi mā tāpitiro, akka a iyopaonifāfe Cristoōnoa tsōa tāpiyopaonima. Nāskakē iskaratīa xafakīakōi mato tāpimapai aōnoa mā tāpisharakōinō.

³ Nāto keyokōi tāpikōia, Apa Niospa tāpia keskafakī āfe shinā mēraxori tāpikōia. Akka Epa Nios afarafo sharafoyakē, Cristoōxō mā tāpitiro.

⁴ Nānori ē mato yoi, tsōa mato pārayamanō, meka fetsafaxō fanīrira mato yoipaikani kiki.

⁵ Ē mato fe iyamafaxō pena tii ē mato shināi. Akka matoōnoa nikai ē inimakōi, mā chanīmara fakōixō mā Cristo nikakōiaito.

Jesucristo nōko ōiti fetsafaxōfaano a keskara shara nō inō

⁶ Nāskakē mā nōko Ifo Jesucristo chanīmara fakōixō, mā Ifofakōina. Nāskakē pena tii afe rafefafāikāfe.

⁷ Oa afara fanafono āfe tapo mai mēra chaikōi kaax feroitiroma keskara, Jesúsri nāskarākōikī, afe rafefafāikāfe afaa chakafatama a keskara shara ixikakī. Ipafras mato yoini keskafakī pena tii nikakōikī Jesús chanīmara fafafaikāfe. Nāskaxō pena tii Epa Nios aichofa fafafaikāfe.

⁸ Nāskakē kexemesharakāfe, fetsafāfe mato pārayamanōfo. Mā Jesús nikakōiai keskafakī anori mato yoipaikanima. Akka nā mato yoiāifo keskara mā ato nikakī kaxpakōi mā ato chanīmara fatiro. Nāfāfe Cristoōnoa yoikōikanima, nāskaxō nā imisfo keskakakī mato yoipaikani. Nā chanīmara faafāfema shināifo anori fisti mato shināmapaikani.

⁹ Akka Cristo fe Apa Nios nāskara rafe, Cristo noko keskara feronāfakēkōifiax Apa Nios imis keskara nā nāskakōini.

¹⁰ Nāfi keyokōichi āto xanīfokōiki, xanīfo fetsafāfo, a niafaka chakafāfe āto xanīfofo finōkōinīfōfāna. Nāskakē mā Jesús fe rafexō mā afaa fetsa yopaima.

¹¹ Askatari mā Cristo Ifofai akka feronāfakēfāfe āto foshki repa xatepaonifo, nāskaramāi feyafakatsaxakakī. Akka mā foshki repa xatefiafono mātō chaka mato soaxotiroma. Cristo fistichi mātō ōiti mato fetsafaxotiro, mātō chaka mato soaxotiro afianā a mā chaka apaoni keskara mā anā atama a keskara shara mā inō.

¹² Akka mā maotisai faka mēra mā ikiniā, nā mā chakafapaonifo oa maia keskara, askatari nā Jesús maifanifotīa a mā afara chakafapaonifo oa maia keskarāfo. Mā faka mēra iki maotisameax mā fininākafāni oa Jesús fe fininākafani shinātsatiro mā a keskara sharakōi ixiki. Niospa āfe kerex sharaōxō afianā Jesús otofani nā nō chanīmara fai. Askatari mai mēranoax Jesús otoniā, māri afe otoni keskara itiro, a keskara sharakōi ixiki.

¹³ Mā Jesús Ifofaamax nā yora naa keskara mā iyopaoni. Nāskaxō mā afara chakafapaoni māto chaka xatexoma. Nāskafikē Epa Niospa Cristo ofofani afe nipaxanō. Nāskarifiakī matori aōxō nimapaxexatiro, nāskaxō nōko chakafo mā noko soaxona.

¹⁴ Shinākapo. Keyokōi nō chakafamis keskara nōko chakafo Epa Niospa noko soaxoni, anā afoōnoa shināyamaxii. Nāskano Niospa yoini keskara nō nikatama afara fetsa nō chakafapaoni. Nāfo keyokōi nō chakafamisfo keskara kenepakea. Askafixō ifi cruz ikakinoa Jesús mastanifoxō nāo nōko chaka noko soaxoni.

¹⁵ Akka Cristo ifi cruz ikakinoax noko nāxonixakī, Satanás yafi keyokōi niáfaka chakafo finōkōia. Nāskakē noko anā afeskafatiroma, anā nōko ifo ixō noko ikitirofoma. Nāskakē Jesús ifi cruz ikakinoax naino Niospa keyokōi maifo tii anoafato ispani na niáfaka chakafo anā kerexfoma.

Jesús ika ari nai mēra sharakōi nā fisti fichipaiakāfe

¹⁶ Akka māto xinifāfe āto feyafati ipaoni xinia fena ikaino fista apaonifo. Askatari oxe rama kāiyaino fista apaonifo. Akka mato yoitirofo iskakafakā: “Afaa mā pitiroma askatari afaari mā ayatiroma. Askatari nōko pena tenetiitia māri tenetiro,” ixō mato yoitirofo. Akka mā askayamaino fetsafāfe mato mekakafakī ičhatirofo. Mato askafafono ato nikayamakāfe.

¹⁷ Akka nā māto xinifāfe āto feyafati noko ōmatirofo afe keskara iximākai a Cristo oaino. Akka mā Cristo oano nā fisti nō Ifofatiro. Nā nō feyafamis keskara nō anā atiroma. Cristo fisti nō nikatiro a nō ayopaoni keskara nō anā axikima.

¹⁸ Ōisharakāfe fetsafāfe mato pārapaikani kiki iskakafakā: “Nō afaa tāpiama. Ājirifo nō kīfitiro,” ixō mato pārapaikani. Afāfe afaa ōiyamafikatsaxakakī afama mīshtifo yoipaimisfo. Āto shināmā shinākata kakapaikōimisfo, Niospa shināi keskarakai shināmisfoma.

¹⁹ Afokai Cristo fe rafepaikani. Akka Cristo nōko mapo keskara askatari nō āfe yora keskara. Nāskaxō nōko yora nō kexesharax nō mitsisipakōi itiro. Nāskatari nōko pono efapayafo, nōko pono mīshti, nōko nami mēranoax ichanātirofo. Afeskatama nō isharakōinō. Akka nō Cristo fe rafekōiaito Epa Niospa āfe Fākeoxō āfe kerex shara noko inātiro a keskara shara nō inō. Nāskarakōi noko axopai.

²⁰ Mā oa Cristo fe naa keskara mā ini. Nāskakē iskaratīa a mā chakafapaoni keskara mā anā akima. Askatamaroko mā isharakōimis. Mā askaito nā chanīmara faafāfema mato afaa yoitirofoma. Nāskafekē, çafeskakī mā ato nikaimē, mā ato nikaxō nā mato yoiāifo keskara ma apai? Nāskakē ato nikayamakāfe.

²¹ Nāskakē mato yoiki iskakafaiikani: “Na afarafo meyamakāfe, afori piyamakāfe, mato ināifonori māto mēkemā achiyamakāfe,” ixō mato yoipaiikani.

²² Akka na mato yoipaiyaifo keskara Niospa anori ato yoiama. Ā shinākaxō mato yoipaiikani. Akka nā mato yoipaiyaifo keskara nāfo mā keyoxii, anākai afo inakama. Nāskakē ato nikayamakāfe.

²³ Chanīma, yora fetsafāfe shinākī iskakafani. Na ato yoiāifo keskara shara, nafāfe tāpikōiafo, a Niospa noko yoini keskarari tāpikōiafo. Nāskakē Niospa āfe ājirifo kīfifafāikani. Nāskakatari ato fanīrira mekamafimisfoma, askatari āto yorari mese famimisfoma āa koshamemisfo. “Nafō sharakōifo,” ixō atoōnoa yoipaiikani. Akka afokai isharakōimisfoma. A afarafo chakafaifo keskarakai xateafoma, chanīma nāfo kakapaikōimisfoki.

3

¹ Akka Cristo naax anā otoiñakafani keskaī māri nāskariai afe otoiñakafani keskara mā itiro mā isharakōiax afe ipaxakī. Cristo iskaratīa Apa Nios fe ika afeta keyokōi ikinā. Nāskakē aōnoa shināta nā mato amapaiyai keskara aōnoa shināfafāikāfe.

² Nāskakē nā Niospa fichipaiyai keskara fisti shinākāfe, nāskakōixikakī. Akka nono mai anoxō yorafāfe afara chakafapaiyaifo keskafakī māri askafayamakāfe.

³ Anā ē mato yoi Cristo noko nāxoni. Akka mā oa Cristo fe naa keskara iyoni, nāskakē iskaratīa mā afe rafekakaini, Epa Nios feri mā askakakāini. Nāskariai Epa Niosri mato fe rafekakaini. Mā askaito tsōa mato tāpitiroma, a mā Cristo fe rafefai keskaī ari askaxiki.

⁴ Cristo anā mai ano fotofaino māri afe ixii. Nāato noko ikipakenaka. Nāskakē a keskara sharakōi nōri afe ixii, keyokōichi yorafāfe noko ōixikani.

Nō chaka iyopaonixakī iskaratīa nō ōiti fena sharayakōi

⁵ Nāskakē a mā afarafo chakafapaoni keskafakī anā askafayamakāfe. Askarafo anā shināyamakāfe. Askatari māto āfimafori chotayamakāfe, kērofāferi māto fenemafori chotamayamakāfe. Nāskaxō ato chaka shināmayamakāfe. Afarafori noiyamakāfe feronāfakēfāfe māto āfima fichipaiyamakāfe, kērofāferi māto fenemafo fichipaiyamakāfe. Afara chakafori fichipaiyamakāfe, nā mā fichipaiyai fisti fichipaiyamakāfe. Mā askakī Nios mā noima, nā afarafo fisti noikī.

⁶ Askara chakafo Niospa ōipaima, nāskakē ato omiskōimakī finakōixii nikayamaifono.

⁷ Nāskakē taeyoi chakakōi mā iyopaoni Nios nikamax.

⁸ Mā mā askapaoniki. Akka iskaratīa a chakafo shināmakiakāfe. Anā ōitishkiyamakāfe, anā chaka shināyamakāfe, ato chakafayamakāfe, ato Ichayamakāfe, askatari māto axfapa meka chaka yoiyamakāfe.

⁹ Nāskakē mā ranā pāranōnāyamakāfe, mā taeyoi ipaoni keskara a chakafo mā mā potakōiakī.

¹⁰ A mā aponi keskara anā atama iskaratīa, mā mā Jesucristo fe rafekōia a keskara shara ixiki. Akka Epa Niospa māto ōiti mēra fena sharakōi māto ōi. Nāskakē a keskara sharakōi māto imafafāini, aōnoa mā tāpisharakōinō.

¹¹ Nō Cristo Ifofakē Niospa keyokōi nāskarafos noko ōi. Judeofo yafi a judeofoma, a kene tāpiafoya a kene tāpiafomari, yorafoya nafafo āto yonomatifoya a āto yonomatifomari Niospa nāskarafos noko ōi. Keyokōi nō afe yoraxō nō Jesucristo fisti yopakōi.

¹² Niospa māto noikī māto katoni afe yorafo mā inō. Aa keskara shara māto imaxiki. Nāskakē fetsafo noikī ato sharafo fafafāikāfe. Nāskakē fetsafo shināki nā mā apaiyai keskara fisti shinātama, fetsafāfe apaiyaifo keskarari shinākāfe, oi tsii faxō ato yoifafāikāfe.

¹³ Nāskakē fetsafo fe mēnāpaitama ato yoisharakāfe raenāsharaxikāki. Nōko Ifāfe māto raefa keskafakī fetsafo fe raenā faatanāsharakāfe.

¹⁴ Nāskakē nā ē māto yoiakī keskai, keyokōi noinākāfe, nō noināsharafinakōiakī. Nāskai nō noināx nō isharakōitiro, nā nōko Ifāfe noko yoini keskai nō noināsharakōiax nō nāskasharakōitiro.

¹⁵ Nāskakē Cristo nikasharakōikāfe māto ōiti sharanokai mā fochishpanā faatanātiro. Askatamaroko aōnoax isharakōiax nā yora fisti keskara shara mā itiro. Nāskakē Epa Niospa māto katoni aōnoax mā isharakōita fetsafo mā afeska fanōma. Nāskakē mā Epa Nios yoitiro iskafakī: “Aicho Epa Niosi, ēfe ōiti māa sharafaxōa,” ixō mā yoitiro.

¹⁶ Cristo noko tāpimani keskafakī māto ōiti mēra nanekōikāfe. Nāato māto īkināki āfe meka tāpisharakōiox fetsafo yoisharakāfe isharaxikakī. Māto ōiti mēraxō Nios aicho fata David fanāini keskai māri fanāixota āfe mekaōnoari fanāixokāfe.

¹⁷ Nāskaxō nā mā apaiyai keskafakī yoikāfe iskafakī: “Aicho, Epa Niosi. Nōko Ifo Jesucristoōx nā nō apaiyai keskafakī keyokōi mī noko axōfafāimis,” ixō yoifafāikāfe.

Nō Jesús Ifofakōinax aōnoa nō afeskatiromāki

¹⁸ Kērofāfe, māto fenefāfe māto yoiāifāfe ato nikasharakōikāfe. Nāskax mā isharakōikai nōko Ifāfe māto yoiakī keskai.

¹⁹ Feronāfakēfāfe, māto āfifō noikōikāfe ato fe feratenāyamakāfe.

²⁰ Fakefāfe, māto epa yafi māto efa nīkakōikāfe. Mā askaino nōko Ifo matoki inimakōi kiki.

²¹ Epafo feta efafāfe, māto fakefo ferateyamakāfe, māto fakefāfe shināki iskafayamanōfo: “Ooa, ēfe epa feta ēfe efa ea feratenāfo,” ixō shināyamanōfo.

²² Āto yonomatifāfe, māto ifofo ato nikakōikāfe nono mai anoxō. Akka māto ōiaifonos ato yonoxokakīma, māto ōiamaifonori ato yonoxokāfe. Nā māto Ifo Jesucristo mā noiaino, matoki inimanō ato yonoxosharakāfe.

²³ Afara yonokī inimayanā axosharakōikāfe. Nōko Ifo shināki ato yonoxosharakāfe.

²⁴ Nāskakē shināmakiyamakāfe mā mā tāpiaki nōko Ifo chipo afara sharafo māto ināxii kiki. Mā nōko Ifo Jesucristo yonoxosharamiski, nāfi māto Ifokōiki.

²⁵ Akka nā afara chakafamisfo, nāfo omiskōi finakōixikani afara chakafakatsaxakakī. Nāskakē Niospa fetsa keskarafos noko ōima, nāskarafos noko ōi.

4

¹ Ato yonomamisfāfe, māto yonomatifo ato paraxō yonokakīma ato noisharayanā afara sharafo ato ināsharakāfe ato parakakīma. Mā mā tāpiaki māri Ifoyakī, māto Ifāfe nai mēraxō māto ōifafaini kiki.

² Nāskakē Epa Nios kīfiki xateyamakāfe, kīfiki afara fetsa shinākakīma, Epa Nios fisti kīfiki iskafakāfe: “Aicho Epa Niosi, mī ea sharafo fafafāini,” ixō kīfikāfe.

³ Nāskakē nokori kīfixokāfe, Epa Niospa fetsafo mēra noko nīchiano Cristoōnoa nō ato yoisharanō. Afāfe Cristoōnoa nīkamisfomaki. Akka ē Cristoōnoa meka shara yoiāito yorāfāfe ea karaxa mēra ikimanifo.

⁴ Ea Epa Nios kīfixōfafāikāfe xafakīakōi Jesucristoōnoa anā ē ato yoinō.

⁵ Akka nā Jesús Ifofafoma mēra mā ikaki ato ōimakāfe mā isharakōioxō. Nāskaxō nā mā atoki nokoaiīa Jesucristoōnoa ato yoisharakāfe.

⁶ ato fe mekakī meka shara fisti ato yoifafāikāfe, ato kaxemetsama fakakīma ato yoisharakōikāfe, āto ōiti mēraxō shināchakanōfoma. Mā askakī nā yorafo mā ato kexesharatiro.

Pablo mā mekai xatekī Colosas anoāfo ato meka shara fomani

⁷ Nofe yora Tíquico, ẽ aõ noikõ. Nãato efeta nõko Ifo Jesús yonoxomis. Nãskakẽ aato eõnoa mato yoi kiki ẽ afeskax nono ikamãkĩ.

⁸ Nãskakẽ ẽ mato ari nĩchia, aato mato yoinõ afeskax nono nõ ikamãkĩ, askatari mato inimamasharakõixiki.

⁹ Nã nofe yora Onĩsimõri afe kai, nãri ẽ noikõ. Nã mato fe iyopaoni, nofeta nõko Ifo Jesúsnoa yoi inimakõimis. Nã rafeta matoki noko kaxõ mato yoikani nono afe keskaramãki.

¹⁰ Akka na efe karaxa mẽra imisto Aristarcori mato meka shara fomai. Marcosri mato meka shara fomai, nã Marcos Bernabé ẽfe chai. Nãskakẽ nã Marcos matoki nokoaito ẽ mato yoia keskafakĩ ifisharakãfe kexesharayanã.

¹¹ Na feronãfake ẽfe ane Jesús nãatori mato meka shara fomai, ẽfe ane fetsa Justo. Nãfãfe judeofo mẽraxõ Nios Ifokõĩ fakaxõ efeta Nios xanĩfoõnoa yoikĩ yonomisfo. Nãskafakãki ea inimamakõimisfo. Akka ẽfe kaifãfe nonoxõ efeta Nios yonoxomisfoma, nã ẽ mato yoiaifo feta ẽ Niosnoa yoimis.

¹² Na feronãfake Ipafrasri meka shara mato fomai, nãatori Cristo yonoxomis, nã mato mẽra iyopaoni. Nãato mẽxotaima matoõxõ Epa Nios kĩfikĩ iskafa fafafãini: “Epa Niosi, mĩ ato amapaiyai keskafakĩ ato amafe afaa fetsa shinãnofoma. Nãskakanax mĩ Fake Jesús õiti keskara shara inõfo,” ixõ mato kifixõfafãini.

¹³ Akka mẽ õia na Ipafras matoõxõ shinãchakakõiaito. Askatari nã pexe rasi Laodicea anoafõ yafi Hierápolis anoafõ ato Epa Nios kifixõfafãini.

¹⁴ Na Lucas ato sharafamis, ẽ aõ noikõ. Nãato Demãs feta mato meka fomakani.

¹⁵ A Jesús Ifofaafõ Laodicea anoafõ ea ato yoisharaxõfe. Nĩnfasri ea yoisharaxõfe, a ẽfe pexe anoax Nios Ifofakanax ichanãmisfori ea ato yoisharaxõfe.

¹⁶ Akka na kirika kene ẽ mato fomai mã mã õixõ, nã Nios Ifofaafõ Laodicea anoafõri ato fomakãfe akairi õinõfo. Mãri na kirika kene õikãfe Laodicea anoxõ mato mana manafono.

¹⁷ Nãskakẽ Arquipori ea yoikĩ iskafaxokãfe: “Epa Niospa mia yoia keskafakĩ axosharakõife,” ixõ ea yoisharaxokãfe.

¹⁸ Ẽkã Pablo, ẽ mato kirika kenexoni. Mato yoisharakĩ, ẽfe mifikõichi ẽ kenei. Nãskakẽ ea shinãmakiyamakãfe ẽ karaxa mẽraxõ ikakĩ. Niospa mato noikĩ matoõnoa shinãfafãinõ. Nã tii.

Pablo Tesalónica Anoafo Kirika Kenexõ Fomani

Pablo a afe rafeafo feta a Tesalónica anoxõ Nios Ifofaafõ ato kirika kenexõ fomani

¹ Ëkĩa Pablo, nõ mato kirika kenexõ fomai, Silvano ikaino Timoteo ikaino nã tiito nõ mato fomai. Nã pexe rasi Tesalónica anoxõ Nios Ifofaafõ nõ fomai, anoxomã Epa Nios yafi nõko Ifo Jesucristo mã Ifokõĩ faafono. Epa Nios feta nõko Ifo Jesucristo mato noikĩ mato sharafanõ feaxtetama mã isharakõinõ.

Tesalónica anoafãfe Jesús Ifokõĩ fakaxõ ato õimanifo

² MËxotaima nõ matoõxõ Epa Nios aicho fakĩ nõ kifikĩ iskafa fafãfãini.

³ “Epa Niosi, na Tesalónica anoafãfe, mia noikakĩ mia yonoxosharamisfo, nãskakaxõ fena fenakãkima nõko Ifo Jesús manasharamisfo nokoki anã oi kiki,” ikaxõ. Nãnori pena tii ã mato kifixõfãfãini.

⁴ Efe yora mĩshtichi, Niospa mato fãsi noikĩ mato katonĩ afe yoraxõ mã inõ.

⁵ Nõ mato Niospa meka sharaõnoa yoimis afesax nõ afe İpaxatiromãki. Akka nõko mekapas nõ mato yoimisma, askatamaroko Niospa Yõshi Sharayaxõ ãfe kerex sharafoyxõ nõ mato Jesúsnoa nã meka chanĩmakõĩ nõ mato yoimis. Akka mã mã tãpia nõ mato fe isharaõpaoni. Nõ askaino mã Jesús Ifofakõĩni.

⁶ Akka nõ Jesús Ifofãĩ keskafakĩ mãri Ifofani. Nãskakẽ Niosnoa meka shara nõ mato yoiaito inimakõiyã mã nikakõini, Niospa Yõshi Sharapamãĩ mato inimamakõiaino fet-safãfe mato omiskõimafãifono.

⁷ Nãskakẽ mã isharakõixõ mã ato õimakõia nã Nios Ifofaafõ Macedonia anoafõ yafi Acaya anoafõ.

⁸ Matoõxõ nõko Ifãfe meka shara nikakĩ taefanifo Macedonia anoafõ feta Acaya anoxõ. Akka anoxos nikanifoma. Nã pexe fetsafo anoxori nikanifo. Nãskaxõ mã tãpiafõ mã Nios Ifokõifakẽ. Nãskakẽ nõ anã matoõnoa ato yoitiroma, mãmãĩ matoõnoa tãpikõiafõ.

⁹ Askatamaroko fetsafãfe nokoõnoa ato yoimisfo iskafakãki: “Tesalónica anoafãfe nõko Ifo Nios Ifofakõinafõ, nãskaxõ Pablo yafi a afe rafeafo ato sharaõfanã a yoiaifõ keskara ato nikakõimisfo. Nãskakaxõ afara fetsa onifakaxõ, ‘Na nõko niosra,’ ikaxõ anã kifikimisfoma, Nioskõĩ Ifofakakĩ. Nãskakaxõ nã nipanaka Nioskõĩ yonoxomisfo.

¹⁰ Akka nõ Niospa Fake Jesús mã manakõĩ nai mẽranoax anã oaitĩa. Akka Niospa ãfe Fake otofani. Nãato noko ifitiro a omiskõiaifõ mẽranoax nõ omiskõinõma.”

2

Pablo Tesalónica anoxõ Jesúsnoa ato yoini

¹ Efe yora mĩshtichi, mã mã tãpia kaxpa nõ mato õikai kanima. Jesúsnoa nõ mato yoikai kani nikakĩ mã Ifofakõinõ.

² Mã mã tãpia nõ matoki kayoamano na Filiposo anoafãfe noko İchayanã noko omiskõimapaõnifo. Nãskaxõ noko xatemapaiyãifono, Epa Niospa ãfe kerex shara noko inãno, nõ ratetama na meka sharaõnoa Jesúsnoa nõ mato yoimis keskara tsõa noko xatematiroma.

³ Akka nõ mato yoiki fanĩrira nõ mato yoimisma, nõ mato yoisharakõimis. Askatari nõ mato chakafakĩ yoimisma, askatari nõa nõ mato paramisma.

⁴ Askatamaroko Epa Niospa noko katonĩ ãfe meka shara Jesúsnoa nõ mato yoinõ. Akka nõkai yoraxõ nokoõnoa shinãmapaitiroma. Askatamaroko nokoõnoa Nios fisti nõ inimama-pai, nã fistichi nõko shinã mẽraxõ nõ shinãĩ keskara tãpikõia.

⁵ Mã mã tãpia nõkai matoõnoa meka shara yoimisma, mãri nokoõnoa yoisharanõ. Ëkai mato feparamisma, “Noko afara shara inãnõfora,” ixõ. Akka a ãfe mato yoimis keskara Epa Niospa tãpikõia, nãato ea õifafãini.

⁶ Nõkai fetsafo nokoõnoa yoisharakãfe nõ ato famisma.

⁷ Akka nõ aõnoa yoinõ noko nĩchini ãfe meka shara nõ mato yoinõ. “Akka noko afara afeskarafaxokãfe,” ixõ nõ mato yoikerapaoni. Akka ãfa ãfe fake yome kexesharamis keskafakĩ nõ mato kexesharapaoni.

⁸ Nõ mato noikõikĩ inimakãĩ nõ mato Niospa meka shara yoianã nõa nõ inãmepaikõini, mã Nios tãpisharakõinõ. Nãskaxõ nõ mato noipaoni keskafakĩ, iskaratĩa nõ mato noikĩ finasharakõimis.

⁹ Efe yora mĩshtichi, mã mã tãpia nõ mato mẽraxõ yonomiski omiskõikõianã, a nõ fichipaiyai fixiki, penata yonota fakishchãiri nõ yonomis. Akka nõ mato afaa kaxpa fiapaimisma, Niospa meka sharaõnoa mato yoianã.

¹⁰ Akka mã mã noko õimis, Niospari tãpia nõ tanaima isharakõimiskẽ mato fe a mã Nios Ifofaafõ fe. Nãskakẽ nokoõnoa tsõa afaa chaka yoitirofoma.

¹¹ Askatari mā mā tāpia nō mato inimamakōimis, mā shināmitsaitori nō mato askafamis inimamamis oa āpa āfe fake inimamatiro keskafakī.

¹² Akka nō mato yoimis mā isharakōinō a Nios Ifofafo imis keskai. Akka nāato mato katonī Jesús keskara shara mā ĩpaxanō.

¹³ Nāskakē mēxotaima nō Epa Nios aicho fatitaifaa māmāi noko nikasharaito, nō mato Niospa meka sharaōnoa yoiaito. Nāskakē mā yoikī is kafani: “Na meka shara mā noko yoiai yōra mekama, Niospa meka shara,” ĩxō mā yoīni. Chanīma, Niospa mekakōi nō mato yoimis. Nāskakē mā āfe meka nikakī mā chanīmara faino mato shināmasharai Jesús keskara shara mā inō.

¹⁴ Efe yora mīshtichi, māri omiskōini māto kaifāfe mato omiskōimanaifono. Nāskarīfaii nā mā ikai keskai a Nios Ifofafo Judea anoxō Cristo Jesús Ifofakanax omiskōikani āto kaifo judeofāfe ato omiskōimanaifono.

¹⁵ Nā judeofāfe nōko Ifo Jesús retenifo, taefakī a ato Niospa meka sharaōnoa yoimis ato retepaonifo, nāskaxori noko omiskōimayanā noko potanifo. Nāskaxori Nios aicho fayamata yorāfo chakafakī mekafamisfo.

¹⁶ Askatari a judeofoma Nios fe ĩpaxanōfo nō ato yoisharapaiyaino, noko ato yoitima famisfo. Nāskakē afaa chakafakī finayamafikatsaxakakī mā afara chakafakī finakōimisfo. Akka iskaratīa anā tenetiromameki Niospa ato omiskōimaki finakōi.

Pablo Tesalónica anoāfo anā ato ōipai kapaini

¹⁷ Efe yora mīshtichi, mā nō mato fe paxkanāifinixakī, nōa nō shināki mato ōiamafikī mēxotaima nō mato shinātaifai nōko ōiti mēraxō. Akka nō kaxō nō mato ōisharapaikōi.

¹⁸ Akka mā nō mato ari kapaitaiamis, nāskaiifi ēroko mēxotaimakōi mato ari kapaikōimis. Nō askafiaino, akka Satanās noko katimafamis.

¹⁹ Nō mato yoimis Jesús keskara shara mā inō. Nāskakē Jesucristo oaino keyokōichi tāpitirofo Jesúsmāi Ifokōi fakaxō. Nāskakē Jesús ōiaino matoōnoax nō inimakōixii, nō mato yoipaoni keskaramāi mā nikakōimiskē.

²⁰ Chanīma, nokoōxō mā Jesús Ifofakōinafono nō inimakōi. Nāskakē Epa Nios nokoki inimakōi.

3

¹⁻² Nāskakē nō anā tenetiroma meekī nō shināita nono Atenas ano nores nētexiki, nāskaxō nofe yora Timoteo nīchixiki mato ōikanō. Na Timoteori Nios yonoxomis, nāato nofeta yonomis Jesucristoōnoa meka sharaōnoa ato yoikī. Nāato mato yoikī mato inima-masharakōitiro.

³ Nāskakē ē matoki Timoteo nīchini: “Omiskōikāki anā Niospa meka nikatirofomara,” ĩxō. Akka mā mā tāpia na nō omiskōiai keskara.

⁴ Akka nō mato fe iyoxō, nō mato yoifafāiyamea, nō omiskōixiira fakī. Nō mato yoifafāiyamea keskai mā askakōia, nāskakē mā mā tāpia.

⁵ Nāskakē ē anā tenetiroma meekī, ē Timoteo nūchiyamea mato yōkatanō, a mā Jesús Ifofapaoni keskafakī ai mā Jesús Ifofamākī ē tāpipaikī. Akka ē ratekōiyamea, “Niafaka chakata ato afara chakafamaira,” ikax. Akka nōakōi kaxpa Niospa mekaōnoa nō mato yoiyamea ikerana.

⁶ Akka Timoteo mā Tesalónica anoax anā oa mato ōitani. Meka shara matoōnoa noko yoitoshia, mā Jesús Ifofasharayanā mā noināsharakōiaito. Noko yoia mā noko shināyanā mā noko noikōiaito, askatari mā noko ōisharapaikōiaito, nā nō mato ōipaiyai keskafakī mā noko ōisharapai.

⁷ Nāskakē efe yora mīshtichi, noko Jesúsxō omiskōimayanā noko fekaxtefaifono mā Jesús Ifo sharafakī mā noko inimamakōimis.

⁸ Akka mā mā Jesús Ifofashara, mā anā afaa fetsa shināima. Mā nō tāpiax nō inima-masharakōi nō isharakōitiro. Nāskakē afara afeskaraino nō tenetiro.

⁹ Nō matoōnoa shināki nō Epa Nios kīfikī, nōko ōiti mēranoax nō fāsi inimakōi. Nāskakē nō matoōxō Epa Nios kīfiki nō aichofa fafafāini.

¹⁰ Nāskakē penata yoita fakishi yoita nō Nios kīfifafāini matoōxō, noko mato ari nīchiaino nō mato ōikanō a mā tāpiamafo nō mato yoixiki mā Jesús Ifofakōinō.

¹¹ Nāskakē Epa Nios feta nōko Ifo Jesucristo mato ari noko nīchīpāinō nō mato ōikanō.

¹² Nōko Ifāfe mato shināmasharaino mā noināi finakōinō, fetsafori mā noisharanō, nō mato noiai keskafakī māri keyokōi yorāfo noisharakōinō.

¹³ Mā askaino Epa Niospa māto ōiti mēraxō mato shināmasharai, Jesús Ifo sharafayanā mā afaa chakafayamanō. Mā askaino nōko Ifo Jesús afe yorāfoya oaitūa māri a keskara shara ĩxii, Epa Niospa ōiaino.

4

Afeskaš isharaxō nō Nios inimamatiromē nokoki inimanō

¹ Efe yora mšhtichi, mē mekai xatekī ē mato yoinō. Nō mato yoipaoni afeskaš mā itiomāki Nios matoki inimanō. Akka nā nō mato yoipaoni keskaš mā mā askakōia. Nāskakē anā nō mato yoi noko nikakapo. Mā Nios Ifofaa keskašakī nōko Ifo Jesucristoōxō Ifofakī finakōikāfe.

² Akka mā mā tāpia nōko Ifo Jesús noko yoini keskara, nānorikōi nō mato yoisim.

³ Akka Niospa fichipai a keskara shara mā inō. Nāskakē tsōa āfe āfima chotatiroma. Kērofāferi āto fenemafo chotamatirofoma,

⁴ Askatamaroko āfiyatirofo āfe āfi noiyanā āfe āfifes ixiki.

⁵ Nāskata afara chakafapaimiskōi iyamaxikakī, a Nios tāpiamafāfe amisfo keskara axikakima.

⁶ Akka Epa Niospa yoini iskašakī: “Fētsa āfi fe ipaiyamakāfe. Tsoa fomāyamakāfe fetsa āfi fe ixiki,” ixō Niospa yoini. Akka nō mato yoini keskaš, tsoa askayamakī afara chakafaifono Epa Niospa ato omiskōimaxii.

⁷ Epa Niospa noko katonima nō afara chakafanō. Askatamaroko noko katonni a keskara shara nō inō.

⁸ Nāskakē a ē mato yoisim keskara tsōa nikayamakī atokai yora fisti nikakaspaime. Niosri nikasapai, nāato āfe Yōshi Shara mato ināfiano a mato amapaiyai keskara mā anō.

⁹ Ēfe mekakai mā fichipaima mā ranā noināxiki. Epa Niospa mato tāpimani mā noinānō.

¹⁰ Mā nō tāpia nā Nios Ifofaafō Macedonia anoxō mā ato noikōiaito. Nāskakē nō mato yoisharapai, mā ato noiki finakōinō.

¹¹ Nāskakē isharakāfe māto ōiti mēraxō afanā mato fekaxtefanōma. Fētsa afara afeskarafaino aōnoa shināchakayamakāfe. Nā Niospa mato amapaiyai keskara fisti akāfe. Askatari mā yonotiro xanikima. Nānori nō mato yoisimiki.

¹² Nāskakakī mā yonotiro a mā fichipaiyai fixiki. Kaxpa afaa ato yōkayamakāfe. Mā askaito a Nios Ifofaafāfema matoōnoa shinākōitirofo.

Nōko Ifo Jesús anā oaino, ĩafe keskara iximē?

¹³ Efe yora mšhtichi, ē mato yoiaki keskara nikasharakāfe. Jesús Ifofaafō nakanax afeskananimākai ē mato yoinō, akka a Ifofaafoma ato fe yorafo naafono, manomitsakani omiskōikani. Akka mā askaima māmāi Nios Ifofaax, māmāi anā ōinōnāxixakī. Akka a Nios Ifofaafoma anā ōinōnākanima.

¹⁴ Mā nō tāpia Jesús nafiāx afianā otoni. Nāskarifiakī mā nō tāpia Niospa atori otofaxii. Jesús anā oaino, a Ifofakanax namisfo.

¹⁵ Nāskakē nō mato yoisim nōko Ifo Jesús noko tāpimamis keskara. Akka nō nayoamax nōko Ifo Jesús oaino nō rekē nai mēra kaima, nā naitaenifo rekē fokani.

¹⁶ Akka nōko Ifo nai mēranoax fotopakekafāni fāsikōi mekakeraxii xanīfo finakōimāiax. Askatari nā ājiri xanīfo finakōiafāfe āto mekari nō nikaxii. Askatari Niospa āfe maneti chāi chāisaito nō nikaxii. Nāskakē a Cristo Ifofakanax namisfo otoi taexikani.

¹⁷ Nāskata a nō namisfoma Niospa atoya noko iyoxii, nāskakē nai kōi mēranoax nō fichināxii. Nōko Ifori nofe ixii nai kōi mēra. Nāskakē nōko Ifo fe mēxotaima nō ipanaka.

¹⁸ Nāskakē mā ranā inima faatanāsharakāfe, na meka sharaōnoax.

5

¹ Efe yora mšhtichi, nōko Ifo Jesucristo anā oaino anā nō mato yoitiroma.

² Akka mā mā tāpikōia nā oaitia tsōa manasharayamaino nōko Ifo nokotiro. Nā afaa shināima tanaima oxafono, fakishi ox yometso atoki yometsotiro keskaš.

³ Yorafo iskaifono: “Nōkai afaa chakafamisma nō isharakōia,” ikaifono Epa Niospa ato omiskōimanaino pae meexikani. Oa kēromā fake nanexō nō fake kākī pae meetiro keskara meexikani. Nāskakē nā omiskōiai nokoaino tsoa faki onetiroma.

⁴ Akka efe yora mšhtichi, mākaš oa fakish mēra nia keskarama, askatamaroko mā oa penata nia keskara. Nāskakē mā manasharaito nōko Ifāfe mato fichitoshitiro. Akka nā Ifofaafoma oa fakish mēra nia keskarafono, atoki yora yometso oax atoki yometsoaino tsōa tāpitiroma keskarafa. Nāskarifiakī nōko Ifo oaino afaa shinātirofoma, Ifokairoko fakaxō.

⁵ Akka māfi nā penata nia keskara sharakōifokī. Mākai oa fakish mēra nia keskarafoma.

⁶ Nāskakē nā Satanás ifofamisfo keskara nō imisma, afāfe afarafo chakafaifo fisti shināmisfo. A Jesús fotoainoa tsōa shināmisma. Akka nō anā Jesús oaitia nō shināi, oa yora oxa keskara nō imisma. Oa yora moia keskara nō imis Jesús oaitia manai xafakīakōi isharaxō.

⁷ Nā afaa shināifoma a Satanás ifofaafō nā fakishi oxafō keskarafa. Nāskarifiāi a Satanás ifofaafō a afaa shināifoma fakishi pāemisfo keskarafa.

⁸ Akka nōkai ato keskarama, nōfi oa penata nia keskara sharafoki. Nāskakē Jesús Ifokōi fata nō yorafo noikōita nā Jesús oaino nō manakōitiro, nō askaito Satanás noko afaa chakafamatiroma. Māraki sorarofāfe āto rapati kerexkōi safeafono tsōa ato retetiro, āto maiti kerexkōi safeafonori tsōa ato retetiro. Nāskarifiakī nō Jesús Ifofaano, āfe Yōshi Shara nō mēra naneano Satanás noko afeska fatiroma.

⁹ Akka Niospa shinānima a omiskōipakenakafo mēranoax nō omiskōipakexanō. Askatamaroko noko ifini Jesucristoōxō nōko chaka noko soaxoxiki nō afe īpaxanō.

¹⁰ Akka Jesucristo nokoōnoax nani nō afe īpaxanō. Nayamafīax mā naaxri nō afe nīpanaka.

¹¹ Nāskakē inimayanā fetsafo ato inimamasharakāfe. Mē tāpiaki mā ato askafaino. Nāskakē ato fe mēxotaima aska faatanākāfe.

Pablo A Nios Ifofafo ato yoisharani

¹² Efe yora mīshtichi, ē mato yoisharapaikai, ea nikasharakāfe. Epa Niospa nā Ifofafo katonī āfe meka shara mato yoinōfo. Nāfāfe nōko Ifoōnoa mato yoisharamisfo nōko Ifo mā Ifo sharafanō. Nāskakē ato noiyanā ato nikasharakāfe.

¹³ Nōko Ifoōxō mato yoisharamisfo, nāskakē ato nikasharakāfe, ato noisharayanā. Mato fe yorafo fe isharakāfe, mēenāpaitama isharakōikāfe.

¹⁴ Askatari efe yora mīshtichi, nō mato yoisharamis iskafakī: A xanimisfori ato yoisharakāfe yonosharanōfo, askatari a shināmitsaifo ato inimamakāfe. Nāskaxō a Nios Ifofasharafoma ato yoisharakāfe chanīmara fakōinōfo. Nāskaxō ato noiyanā fenāmāshta mā ato yoisharatiro.

¹⁵ Nāskakē kexemesharakāfe, fetsafāfe mato noikaspafono ato kopiyamakāfe. Askatamaroko noinā faatanāsharakāfe, keyokōi yorafo sharafakāfe.

¹⁶ Mēxotaima inimafafāikāfe.

¹⁷ Pena tii Epa Nios kīfifafāikāfe.

¹⁸ Afara afeskara afiaino, Epa Nios aicho fakāfe. Nāskara Niospa matoōnoa fichipai kiki mā Cristo Jesús Ifo shara fakē.

¹⁹ Niospa Yōshi Sharapa mato amapaiyai keskara xateyamakāfe.

²⁰ Fetsafāfe Nioxō mato yoiaino a yoiaino keskara, “Na afamara,” ixō ato nikakas-pakakīma, ato nikasharakōikāfe.

²¹ Akka fētsa mato yoipaiyaito Niospa Yōshi Sharaōxō yōkakāfe nā mato yoiaino keskara chanīmamakī askayamai chanī itiroki. Akka nā meka chanīmakōi nikafafāikāfe, a meka chanī nikakakīma.

²² Afara chaka fishtayamakāfe.

²³ Niospa māto yorafoya, māto fero mēshofoya māto yōshi sharafoya Niospa mato sharakōi fatiro mā fekaxtenōma. Nāato shara mato imatiro āfe ōiti keskara shara mā inō. Mato kexesharata māto ōiti mēraxori mato shināmasharatiro. Askax mā sharakōi inō. Epa Niospa mato askafaino nōko Ifo Jesucristo afianā oaitīa mato shināmasharaxii.

²⁴ Niospa mato katonī mā Ifofanō. A noko yoiaino keskara Niospa noko pāratiroma, noko axotiro.

Mā mekai xatekī Pablo ato yoisharani

²⁵ Efe yora mīshtichi, noko Epa Nios kīfixokāfe.

²⁶ Keyokōi a nōko Ifo Jesús Ifofafo fe yoinōnāsharakāfe.

²⁷ Nāskaxō Epa Niospa mato yoiaino keskara nikasharakāfe. Nā mā Ifofa tii ē mato kirika kenexō fomaikai ato nikamasharakāfe.

²⁸ Nōko Ifo Jesucristo mato noikī mato sharakōifanō. Nā tii ē mato yoi.

Pablo

Pablo Tesalónica Anoafu Afianã Kirika Kenexõ Fomani

Pablo afe rafeafu feta Tesalónica anoxõ Nios Ifofaafono ato kirika kenexõ fomani

¹ Ëkĩa Pablo. Silvano ikaino Timoteo ikaino nõ mato kirika kenexõ fomai. Efe yora mĩshitchi, mã Epa Nios Ifofaano pexe rasi Tesalónica anoxõ, mãfi nõko Epa Nios fe rafekõiakĩ nõko Ifo Jesucristo ferĩ mã askakõia.

² Nãskakẽ Epa Nios feta nõko Ifo Jesucristo mato noikĩ mato sharakõifanõ, askatari mato imasharakõinõ mãto õiti mẽranoax mã anã fekaxtenõma.

Epa Niospa a yora chaka omiskõimaxii mã Cristo anã oaino

³ Efe yora mĩshitchi, mã taefakĩ mã Nios chanĩmara fani. Nãskakẽ iskaratĩa mã chanĩmara fakĩ finakõia. Askatari mã rama Nios Ifofaax mã nõinãsharakõini. Nãskakẽ iskaratĩa mã nõinãifinakõi. Nãskakẽ nõ matoõxõ Nios kifikĩ iskafa fafafãini: “Aicho Epa Niosi, mefe yorafãfe Tesalónica anoafãfe mia Ifokõĩ faafoki,” ixõ ã mato kifixõfãfãini.

⁴ Nãskakẽ Niospa mekaõnoa nõ ato yoifofãsafakĩ mã Nios Ifofaafu fe nõ ato fe ichanãitĩa nõ matoõnoa ato yoimis iskafakĩ: “Nã Nios Ifofafu Tesalónica anoafu ãto kaifo fetsafãfe ato omiskõimamisfo. Nãskakẽ afara chakafãfe ato afeskarafafiaino a shinãtamaroko Jesús Ifokõĩ fakaxõ tenekõimisfo,” ixõ nõ matoõnoa ato yoixomis.

⁵ Nãskakẽ mã Jesucristoõnoax omiskõifixõ mã tãpitiro Niospa isharakõixõ mato yoikĩ iskafaino: “Nafo isharakõiafo,” mato faino mã afe ipaxatiro. Nãskax mã mã omiskõifixax chipo mã afe isharapakenaka.

⁶ Niospa mẽstekõĩ fisti shinãmis, a mato omiskõimamisfo kopikiri chipo Niospa ato omiskõimaxii.

⁷ Nãskakẽ nõko Ifãfe mato tenemasharaxii mã anã omiskõinõma a noko akai keskafakĩ mã nõko Ifo fotoxõ. Akka nõko Ifo nai mẽranoax fotoi oa chii xoisai itikikeraxii ãfe ãjiri finakõiafo fe oi.

⁸ Akka nõko Ifo oxii a Nios Ifofamisfoma ato omiskõimaniyoi, askatari ãfe meka sharaõnoari nikamisfomano ato omiskõimaxii.

⁹ Nãfo omiskõipakenakafo, anãkai nĩpanakafoma. Nõko Ifokai õipakenakafoma, askatari ãfe shara yafi ãfe kerex shara õipakenakafoma.

¹⁰ Akka nõko Ifo oaino, mã penata a Ifofamisfãfe aõnoa yoisharaxikani. Nãskafafono mã Nios Ifofamisfãfe õiketsaxikani, akka mã mã nikamis nõ mato yoiaito.

¹¹ Nãskakẽ nõ matoõxõ Nios kifikĩ iskafa fafafãini: “Epa Niosi, mã ato imapaiyai keskafakĩ ato imasharafe mia Ifofakaxõ fetsafo sharafapaikani kiki mã kerex shara ato inãfe,” ixõ ã matoõxõ Epa Nios kifixomis.

¹² Nãnorĩ nõ mato Epa Nios kifixomis, fetsafãfe mato õikakĩ nõko Ifo Jesúsnoa yoisharanõfo iskafakakĩ: “Jesús afama mĩshiti fatiro, nãskaxõ afe yorafo a keskara sharakõĩ ato ima,” ixõ aõnoa yoisharanõfo. Nãskakẽ Epa Nios feta nõko Ifo Jesucristo mato noiyanã a keskara sharakõĩ mato imatiro.

2

Nã feronãfãke afara chakafamisnoa ato yoini

¹⁻² Akka nõko Ifo Jesucristo anã fotofaino mã Ifofaafu tii akiki nokoxikani afe ipaxakakĩ. Nãskafekẽ fetsafãfe mato parapaikani iskafakakĩ: “Jesús mã oxõ a inõpokoifo keskara ea tãpimana,” ixõ mato yoikani. Nãskatari fetsafãferi mato yoikĩ iskafakani: “Mã nõ nika Jesús mã oa,” ixõ mato yoiaifono, fetsafãferi yoikĩ iskafakani: “Pablo noko kirika kenexõ fema, ‘Jesús mã oa,’ ” ixõ mato yoipaikani, ãa chanĩkakĩ. Nãskakẽ rateyamakãfe. Ë mato yoinõ. Jesús oaino mã Ifofaafu afe ichanãxikani, nãskax afe ipanakafo. Akka mato yoisharapaiyaito nikasharakãfe.

³ Nã chanĩmisfo ato nikayamakãfe. Jesús oyoamano keyokõichi Epa Niospa meka kachikiri fakani anã nikaxikakima. Nãskakanax nikayospakõĩ ixikani. Nãskaifono a feronãfãke chakafinakõia oxii. Nãato a Niospa yoini keskara nikakaspakõimis. Nãato Satanás ifofakõimis. Askafax chipo a omiskõipakenakafo mẽra kaxii.

⁴ Akka a feronãfãke niyoxõ iskafakĩ yoixii: “Ë keyokõĩ finõa. ‘Na nõko Niosra’ ixõ mã kifixomis, nãri ã finõa. Akai Niosma,” ixõ ato yoita, mã Nios kifixi pexefã mẽra ikikaixõ ato yoixii iskafakĩ: “Afaa fetsa kifiyamakãfe. Askatari afaa fetsari noiynamakãfe. Ëfi Nioski,” ixõ ato pãraxii.

⁵ Akka, ã mã shinãimamẽ a ã mato fe iyoxõ a ã mato yoipaoni keskara?

⁶ Akka mã mã tãpia mã chaka finakõia Epa Niospa nẽtefayoa, fena oyoyamanõ. Nãskafax chipo oxii Epa Niospa anã nẽtefayamaino.

⁷ Nā noikaspamis Epa Niospa nētefayoano fena oyoima. Chipō oxii Epa Niospa anā nētefayamaino. Akka oyoamano nā aōxō afara chakafamisfāfe fomāpaiyoxikani.

⁸ Nāskakē nā chakafinakōia mā oano, nōko Ifo Jesús āfe axfapa xoō atakī retēkī mapokōi fataxii.

⁹ Nōko Ifāfe reteyoamano nā yora chakafinakōiato Satanāōxō afama mīshtifo faxii afarafo afeskarafakī ato parayanā.

¹⁰ Nāskaxō afarafo afeskarafakī ato pāraxii a nikaifo, nāskakē nā nikakanax afe nā omiskōipakenakafo mēra foxikani. Nāfāfe Niospa mekakōi nikayamakāta, āfe meka sharari noimisfoma Nios fe ipaxakakīma. Nāskakē nā omiskōipakenakafo mēra foxikani.

¹¹ Nāskakē Niospa anā ato yoipaima āa ato paranōfo, a ato paramisfāfe ato yoiaifo keskara nikakōiaifono.

¹² Nāskakē nāfāfe Niospa mekakōi nikayamakāta, tsoarikai aō noimisma. Askatamaroko afara chaka fisti fichipaiyafono Epa Niospa nā omiskōipakenakafo mēra ato potaxii nā ato paramisfo fe omiskōipakexanōfo.

Niospa noko katonī nōko chaka noko soaxoxiki nō afe ipaxanō

¹³ Efe yora mīshtichi, taekōifakī Epa Niospa mato noikī mato katonī afe mā ipaxanō. Nāskakē āfe Yōshi Sharaōxō mato ifinī afe yora mā inō, Jesúsnoa mā chanīmara faino. Nāskakē mēxotaima nō Nios aicho famis mato shinākī.

¹⁴ Nāskakē āfe meka shara nōko Ifo Jesucristoōnoa nō mato yoiaino nokoōxō mā mā tāpikōia. Nāskaxō mā chanīmara faino āfe Fake Jesucristo otofani keskafakī matori ōtofaxii a ika ano mā afe ipaxanō.

¹⁵ Nāskakē efe yora mīshtichi, nā nō mato yoimis anorikōi nikafafāikāfe. Akka anoriyamakē afo nikayamakāfe. Nā nō mato yoipaoni keskara nā fisti chanīmara fayanā, a nō mato kirika kenexoki nō mato yoini keskari shināfāikāfe.

¹⁶ Nōko Ifo Jesucristo feta nōko Epa Niospa noko noikī, nōko ōiti mēraxō noko inimakōinō. Nāskakē nō tāpitiro noko potanakama nō afe ipaxanō.

¹⁷ Māto ōiti inimakōikāfe mato imasharakōiaino. Nāskaxō afara afeskara afiaino ato yoisharakōita mā ato axosharafafāixikakī.

3

“Noko Epa Nios kīfixokāfe,” ixō Pablo ato yoini

¹ Akka efe yora mīshtichi, mē mekai xatekī ē mato yoi. Noko Epa Nios kīfixokāfe, nōko Ifāfe āfe meka shara mā nika keskafakī nōko Ifoōnoa keyokōichi nikanōfo.

² Askatari noko Epa Nios kīfixokāfe na yora chakafo feta a shināsharaifāfema noko afeskafanōfoma. Nāskakē Jesúsnoa nō ato yoiaito noko nikakatama noko xatemapaimisfoki.

³ Akka nōko Ifo sharakōi, nā noko yoimis keskara noko axomis. Nāato mato imasharapakenaka, afara chakatari mato fekaxtefanōma. Askatari nāato mato kexesharapakenaka.

⁴ Nāskakē nōko Ifoōxō nō chanīmara fai, nā nō mato yoimis keskara mā akaito. Nāskakē mēxotaima mā askafa fafāfāini a nō mato yoimis keskafakī.

⁵ Epa Niospa mato noiai keskafakī nōko Ifāfe mato tāpimapaīnō. Cristo omiskōifikī teneni keskafakī, aōxō māri mā tenesharakōifāfāinō.

Keyokōichi nō yonosharakōitiro

⁶ Efe yora mīshtichi, nōko Ifo Jesucristoōxō nō mato yoimis. A Epa Nios Ifofaa fetsafāfe yonokaspafono mā ato makinoax paxkanō a nō mato yoimis keskara nikakaspafono.

⁷ Akka mā mā tāpia a nō imis keskara mā askapai mā isharakōitiro. Nō mato mēra ixō nō yonokaspapaonima. Askatamaroko nō yonokōipaoni.

⁸ Askatari nō tsoa afaa kaxpa pīpaonima. Askatamaroko nō yonopaoni, penata yonota, fakishi yonota nō fapaoni a nō piai fixō pixii mares fisti māto kori ichapa mā potanōma. Nō yonokī askafapaoni.

⁹ Niospa mekaōnoa yoinifo iskafakī: “Nā mato Niospa meka yoimisfāfe afara yopaifāfe ato inākāfe,” ixō kenenifo Niospa ato shināmanaino. Nāskakē, “Noko afara inākāpe,” ixō nō mato yōkerapaoni. Askatamaroko nō yonopaoni nō mato ōimakī a nō akai keskafakī māri mā yononō.

¹⁰ Akka nō mato mēra ixō nō mato yoipaoni iskafakī: “Akka nā yonoyamaito afaa pitiroma,” ixō nō mato yoini.

¹¹ Akka matoōnoa noko yoiafo iskafakakī: “Na ranārito yonokaspata ikafo, nāskakanax afaa meekatama āa fofāsakaki ato parafofāsa famisfo,” ixō noko yoiafo.

¹² Nāskakē nō mato yoi iskafakī, nōko Ifo Jesucristoōxō mā tanaima yonosharakōinō anā xanikima a mā fichipaiyai keskara fixiki.

¹³ Efe yora mīshtichi, a mā afarafo sharafamis keskafakī xateyamakāfe.

¹⁴ Akka na kirika kenexō nō mato yoi*ai* keskara nikakaspai, aōnoa shinākāpo. Nāskakē afe rafepaiyamakāfe, mā askafaino rāfinō.

¹⁵ Nāskafiaito noikaspayamakāfe. Askatamaroko yoisharakāfe mato fe yora keskara fakī.

Mā mekai xatekī Pablo ato yoisharani

¹⁶ Nōko Ifāfe nōko ōiti noko inimamaxotiro. Pena tii afara afeskara afiaino mato inimamatiro. Nōko Ifo keyokōi mato fe isharanō.

¹⁷ Ēkīa Pablo, ēkōi ēfe mēkemā kirika kenexō ē mato fomai yoisharakōiyanā. Akka nā ēfe kirika kenefo ē iskafamis kenekī.

¹⁸ Nōko Ifo Jesucristo mato noikī keyokōi mato sharafanō. Nā tii ē mato yoi.

Pablo Timoteo Kirika Kenexõ Fomani

Pablo Timoteo yoisharani

¹ Ëkia Pablo. Iskaratia ã mia kirika kenexõ fomai Timoteo, ã mia yoikĩ. Epa Niospa ea katonĩ ã afe meka Jesucristoõnoa ã ato tãpimanõ. Epa Nios noko ifimis, Jesucristo nõko Ifo feta ea yoini ã ato tãpimanõ. Jesucristo nokoõnoax nani ares noko Epa Nios ari iyoxii kiki.

² Nãskaxõ ã mia Jesucristo chanĩmara famaxõ, ã mia fakekõĩ faa, Timoteo. Nãskaxõ ã mia yoixõ Epa Nios, Cristo Jesús nõko Ifo feta mia shinãsharanõ mio noikĩ, mĩ shinã mēra mia shinãmasharanõ, mĩ õiti fekaxtenõma.

Pablo Timoteo yoini: “Õisharakõife, ato anorima tãpimapaikõikani kiki”

³⁻⁴ Ë Macedonia ano kayamea taefakĩ, ã mia yoifaini kati. Ë mia anã yoiaito nikasharafe. A Efeso anoax fena kayamafe. Nãno ixõ mĩ efesofo ato yoisharafe. Atiixori Niospa meka anorima yoisfokĩ. Niospa meka yoitamaroko ãto xinipao ipaoni fisti ato yoifafãikani. Askakani feratenãkani. Nãskakẽ ã mia yoi mĩ ato yoisharanõ iskafakĩ: “Niospa meka mēstekõĩ yoisharakõikãfe. Mãto xinipaofãfe afeskax Epa Nios ari nõ nokotromãki noko tãpimapaonifoma. Jesucristo noko nãxonĩ nõko chaka noko soaxoxiki. Epa Nios ano noko imaxiki nõ Jesús chanĩmara fakẽ. Nã fisti chanĩmara fakãfe, a fisti ato yoikãfe. A mãto xinipao ipaoni anori mã anã shinãnoõma. Anorima chaka ato yoiyamakãfe. Niospa meka yoisharakãfe mēstekõĩ,” ixõ ato yoife.

⁵ Niospa meka ato yoisharafe noinãnofo. Mĩ ato yoiaito nikakĩ ãto õiti sharafanofo. Askatari ãto chakafo Jesús ato soaxonõ, anã afaa pishta chaka shinãifomano, askatari Jesús chanĩmara fakõinõfo. Nãskax keyokõĩ shara faatanãkõinõfo.

⁶ Mã askafiax atiri yorafãfe anã shinãshakanima. Anã ato noisharakanima. Nãskakĩ mētoaima ato mekafofãsa fakani. Nãskakĩ anã ato tãpimasharatiroma, fanĩrira yoitiro.

⁷ Nãskaxõ a Moisés yoikĩ kirika keneni keskara ato tãpimapaikakĩ nãfãfe yoisfiso iskafakĩ: “A Moisés yoini keskara nõ fãsi tãpikõia,” ixõ yoifkatsaxakakĩ a yoiaifo keskara tãpikõiafoma.

⁸ Akka mã nõ tãpia nã Moisés yoini keskara shara. Mēstekõĩ ato yoiaifono nikasharatirofo ishaxaxikakĩ.

⁹ Mã nõ tãpia a yora sharafoõnoa yoikĩ Moisés kenenima. Akka nã yora chakafoõnoa yoikĩ kenenĩ. A nikayospafoõnoa yoikĩ, askatari a yora chakafoõnoa yoikĩ, askatari a Niospa meka nikamisfomaõnoa yoikĩ, askatari ãto apa yafi ãto afa retemisfoõnoa yoikĩ, askatari a ato retemisfoõnoa yoikĩ,

¹⁰ askatari a ãto ãfimafo chotamisfoõnoa yoikĩ, kērofãferi ato fenemafo chotamamisfoõnoa yoikĩ, askatari feronãfakefori aa ranã chotanãmisfoõnoa yoikĩ, nãskakãkĩ ãto ãfio anã tanamisfomaõnoa yoikĩ, askatari yora fetsafo achikaxõ onemisfo ato yonomaxikakĩ, askatari ãa chanĩmisfo, Niospa meka fanĩrira yoisfiso, askatari afafo chakafamisfo, afãfe Niospa meka tãpiafoma, nãskara yorafoõnoa Moisés ato kenexoni tãpinõfo afeskax ishariatirofomãki a Niospa noko imapaiyai anori.

¹¹ Nãfãfe Niospa meka tãpisharafoma, nikakanima. Epa Niospa ea yoia ã afe meka mēstesharakõĩ ato tãpimanõ. Afe Fake Jesucristo fãsi shara nokoõnoax nani nõko chaka noko soaxoxiki nõ afe nipaxanõ. Aicho, Nios fãsi sharakõĩ.

“Aicho, mĩ ea õia mĩ ea shinãkõia,” Pablo Nios fani yoikĩ

¹²⁻¹⁴ Ë anorima shinãyoapaoni Niospa Fake tãpiaxma. Ë fãsi anorima shinãpaoni iskafakĩ: “Jesús Niospa Fakekēroko. Æa pãrakaninõ, yorakõifekẽ,” ixõ ã chakafapaoni, ã anorima shinãkĩ. Anori shinãki a Jesús Ifofamisfo ã fãsi ato chakafapaoni. Ë fãsi feronãfake mesekõĩ ipaoni ea omispaonifo ã tãpisharaxma. Anorima ã shinãkĩ ã noikaspapaoni, ares ea shinãfaiato Niospa ea noikĩ. Nãskaxõ ea ifisharani. Ë fãsi chakafafiamiskẽ ea noisharai. Nãatofi ea shinãmamiskĩ ã aõ noinõ. Ea askafaito ã nikasharakẽ nõko Ifo Cristo Jesús ea yora fetsafo fãsi noimasharai. Aicho, ã Jesúski inimasharakõĩ ea noisharaito. Jesucristo ea shinãmani iskafakĩ: “Mĩ ea noikĩ, ea shinãsharafe, mĩ ea tãpisharaxõ eõxõ mĩ yonoi ato tãpimakĩ,” ixõ ea yoia.

¹⁵ Timoteo, na ã mia yoiaĩ chanĩma. Keyokõichi chanĩmara fanõfo. Jesucristo nai mēraxõ Apa Niospa nãmã nĩchini nõko chakafoõnoax noko nãxoyonõ nõ afe ãpaxanõfo. Askafaiino na fetsafãfe chakafakĩ finayamafiaifono ã fãsikõĩ chakafakĩ finakõipaoni. Jesús Ifofamisfo ã chakafayopaoni.

¹⁶ Nãskafaito õikĩ Jesús ãfe chaka ea soaxona. Ë chakafafiamiskẽ Jesucristo ea fãsi noi. Ea askafaito õi kakĩ yora fetsafãfe iskatirofo: “¡Õikapõ! Na Pablo fãsi chakafafiamiskẽ mã Jesús

aō fāsi noi,” shināito ōikī, “Nokori Jesūs noikī noko ifitiro, na Pablo akai keskafakī, nō afe ipaxanō na Pablo ikai keskai Jesūs fe nipanaka, nōri afe nipaxanō,” ikaxō anori shināitirofo.

¹⁷ Anori shinākī nānori nō yoitiro iskafakī: “Aicho Epa Niospa, mī fāsi sharakōi. Meres mī xanīfokōi, tsōa mia finōtiroma. Mī nanakama, mī nīpanaka. Tsōa mia ōitiroma. Meres mī keyokōi tāpikōia. Meres mī Nioskōi, anā fato fetsama.” Nāskafakī nō Nios yoipakenaka.

¹⁸ Ēfe fake Timoteoshta, a Jesūs Ifofanifāfe mia yoiatio mī nikamiskī. Niospa ato shināmanaino anori mī kerexkai ato yoisharanō mēstekōi, ėri mia yoi kerexkai yoife mī Niospa meka nikasharakōixō Jesūs Ifofaxō ato yoisharafe.

¹⁹ A yora fetsafāfe mā Niospa meka tāpifikaxō iskaratīa anā Nios shinākanima. Niospa meka nikakaspakakī Jesūs anā chanīmara fakanima. Fanīrira shinākani mā na meka tāpifikatsaxakakī.

²⁰ Akka a feronāfake rafe Himeneo feta Alejandro iskafamisfo. Nā rafeta Nios chakafamisfo noikaspakakī. Askaito ōikī ė ato yoiā: “Mā mā Satanās nikakī, Nios chakafakī, afianā Niospa mato kexeima.” Mā askafaito Satanās mato omiskōimatiro. Mato omiskōimanaito mā tāpitiro mā anā Nios chakafanōma.

2

Afeskafoxō nō Nios kīfitiromē

¹ Timoteo, a Nios Ifofamisfo ė mia yoiāi anori ato fāsi yoife. Taefakī mī ato yoitiro iskafakī: “Keyokōi yorafo ato yoioxkāfe. Afara yopaifāfe Nios ato yoioxkāfe. Mato Niospa axōfaito aicho fakāfe akikī inimakī.

² A xanīfokōi fe afe rafeafo keyokōi xanīfofo ato Nios yoioxkāfe mato yonoxosharanōfo ishaxikākī. Nāskakē afanā mato fekaxtefayamanō, mā Nios shināsharanō, Nios Ifofashaxikī.

³ Nāskakē Nios noko ifimisto noko ōikī noko iskafatiro: “Na ėfe fakefo isharafo. Iskara sharakōi. Na yorafokī ė inimakōira,” ixō Niospa yoitiro.

⁴ Niospa keyokōi yorafo ifisharapai, keyokōi yorafo Jesūs ato nāxonī ato chaka soaxoxikī a tāpikōinōfo.

⁵⁻⁶ Nios fistikōi, anā fato Nios fetsama. Nā Nios fisti ares shara. Akka na yorafo chakakōifo. Afara chakaya shara nō ositiroma. Akka yōra ato mēraxō afara chakafamisto Nios ōikaspai, nikakaspakī. Akka nā yora chaka askara Nios ari katiro. Nāskakē Cristo Jesūs nāmā na mai ano oni yorafo nāxoxiki nōko chaka noko soaxoxiki. Askafakī, yorafo chaka soaxonano isharonōfo, ato askafaano, Nios ari nokotirofo. Nāskakē nō tāpia Jesucristo fistichi noko Nios ari yoitiro. Nāskakē keyokōi yorafo ifipai. Nāskakē noko ōimani Jesucristo keyokōi yorafo ifipai.

⁷ Nāskakē Niospa ea katonī aōnoa judeofoma ė ato tāpimanō nāfāferi tāpinōfo. Yora fetsafoōnoaxri Jesūs nani. “Eōxō yoixiki,” ixō Niospa ea yoinī. Ē chanīma, ė mia paraima. Niospa ea yoinī ė ato tāpimanō Jesūs ato nāxonī chanīmara fanōfo.

⁸ Akka feronāfakefo ichanākaxō kīfikani inimakani, keyokōi mā raenā faatanākaxō ato chaka Jesūs soaxonano, āto mēke rafe Nioskiri mēshaxotirofo Niospa ōitiro. Askafifono Jesūs ato chaka soaxonano, nā Nios kīfiaifāfe ato Niospa nikatiro. Askapainōfora ixō ė yoi.

⁹ Nāskarifiakī nō ichanāino xotofāke iskara shināitiro: “Sama shara safeta, teoti ichapa safeta, askata femānāki keneta, foaromesharata, irosharakōita, ė ikaino yorafāfe, ‘Na xotofake sharakōira’ ixō ea yoinōfo,” ixō anori shināyamakāfe.

¹⁰ Askafatamaroko, fetsafo axosharakāfe, Nios Ifofaxō Nios ōimaxikākī. “Na xotofake sharakōira,” ikaxō aōnoa yoitirofo.

¹¹ Ano fisti ichanākaxō xotofakefāfe ato nikakōisharatirofo. Akairi tāpishaxikākī atoōxō.

¹² Ē fichipaima xotofāke feronāfakefo Niospa meka ato tāpimanaino. Askatamaroko feronāfakefāfe xotofakefo Niospa meka sharaōnoa ato yoitirofo. Nāskakē xotofakefāfe feronāfakefo nikakōitirofo.

¹³ Akka Niospa Adán onifakī taefani. Nāskaxō chipo Evari onifani.

¹⁴ Nāskakē Satanās Eva pārani. Adán anima pārakī. Nāskakē xotofakefāfe nikakōisharatirofo.

¹⁵ Nāskaxō xotofāke fake fixō pexkosharatiro, Nios Ifo shara famaxiki. Nāskakē chanīmara fatirofo. Mā askafaito Niospa ato ifitiro. Āto ōiti inimasharanōfo a fetsafo noisharakanax ato fe isharonōfo. Isharakaxō, shināsharakōinōfo.

3

Afe keskara itiomē a Niospa meka ato yois

¹ Nā ė mia yoiāi chanīmakōi. A feronāfake Niospa meka yois ipai askara sharakōi itiro. Askatari a Nios Ifofamisfo ato kexemis ipai askarari shara.

² Nāskakē nā isharakōimis ifife. Isharaito ōikakī fetsafāfe yoitirofoma iska fakā: “Nato afara mēxotaima chakafamis,” ixō yoitirofoma. Askatari āfi fistiya itiro. Kēro fetsa kaxefamisma ikāi, shināsharakōita isharakōimis ikāi, fāsi yonosharamis xanimisma ikāi, fetsafo sharafamiskōi āfe pe xe anoxō yora pimamis ikāi, fetsa pe xe yopaito āfe pe xe mēra yora ikimamis ikāi, ato tāpimasharamis ikāi, nāskara feronāfake ifife.

³ Askatari pāemisma ikāi, setemitsamisma ikāi, yorafa noimiskōi ikāi, ato chakafamisma ikāi, kori noimisma ikāi, askara feronāfake shara katofe.

⁴ Āfe āfinō āfe fakefonō afe isharakōimisfo itirofokī. Āfe fakefāfe noikakī nikasharakōimisfo itirofo.

⁵ Akka askayamaito, afe yorafāfe a nikakaxoma askara yora Jesús Ifofamisfāferi a nikatirofoma.

⁶ Akka a rama Jesús Ifofaa a Niospa meka ato yoimis askara katoyamafe. Aato shināki iska fatiro: “Ē fāsi sharakōi, ē Niospa meka ato tāpimani. Tsoa fetsa ea keskarama,” ixō shināi Jesús shināyamafi āa shināi askatiro. Satanās anori mekani: “Ē Nios finōikai,” ini. Askaito Niospa nai mēraxō potani nāmā. Nāskari fakī a rama Jesús Ifofai, Satanās ani keskari fatiro. Nāskakē a ato Niospa meka yoimis askara katoyamafe a rama Jesús Ifofai.

⁷ Akka askaito ōikī a Nios Ifofamisfāfema yoitirofo isharakōiāito ōikakī. Akka isharayamaito, tsōa yoisharatiroma. Askara yōra fanīrira chaka shināi paketiro Satanās paraino.

Afe keskara itiro mē a Nios Ifofamisfo ato kexemis

⁸ Nā a Nios Ifofamisfo ato kexemis nā keskara feronāfake katoxō ifife. Nāskara yora sharakōifo itirofo, āto meka mēstekōi shara itirofo, askara yorafa pāemis itirofoma, nā kori fisti shināfafāinaifoma. Nāskara feronāfake isharamisfo ifife Nios Ifofamisfo ato kexesharanō.

⁹ Na Niospa meka nō tāpiyopaonima, iskaratīa rama nō Niospa meka tāpi. Nāskakē na feronāfake Niospa meka nikasharakōimis ifife, askatari afara chakafayamaino āfe ōiti feaxtemisma askara ifife.

¹⁰ Nā Nios Ifofaafō ato kexemis ikimākai mī ōiyotiro. Askarato afe keskara yonosharamimākai mī ōiyotiro asharamimākai. Askata asharakōiāito ōikī, askara yora mī ifitiro a Nios Ifofaafō ato kexemis inō.

¹¹ Mā askafono āto āfifori ato keskara sharafori itirofo. Nāskaxō anā ato meka fakī chakafatirofoma. Askatari pāemismafori itirofo. Askatari āa kakapaimisfo itirofoma. Askara yorafāfe shināsharamiskōifo itirofo.

¹² Nāskax a Niospa meka yoimisfo fe rafekanax āfi fistiyafo itirofo. Nāskakanax ato pe xe anoax isharakōitirofo, āto āfinō, āfe fakefori afe isharatirofo, askara nikakōisharatirofo.

¹³ Nāskaxō a Nios Ifofaafō ato kexemisto yonosharakōiāito ōikakī fetsafāfe ōikaxō yoisharakōitirofo aōnoa. Nāskaxō a feronāfake mesetama fetsafo yoisharatiro: “Cristo Jesús ea ifia,” ixō ato yoitiro.

Niospa meka chanīmākōi noko yoimis.

¹⁴ Timoteo, iskaratīa ē mia kenexō fomai, mia ari samama kapaikī.

¹⁵ Akka ē mia ari fena kayamaino ōikī na kene tāpixō mī tāpitiro afeska itirofomākai a Jesús Ifofaifo. Akka Nios nīpanaka. Nāskax a Ifofamisfo Niospa fakekōifo afe ipanakafo. Nāskaxō Niospa meka mēstekōi ato yoisharaifāfe fetsafāferi ato nikasharakōitirofo.

¹⁶ Fetsafāfe yoikī iska fatirofoma: “Niospa meka chanīra,” ixō yoitirofoma. Jesús Niospa Fake feronāfakekōi kāini. Niospa Yōshi Sharapa, “Jesús Niospa Fakekōi,” ixō yoini. Askatari Niospa ājirifāfe Jesús ōinifo Niospa Fakekōikē. Askatari yorafāferi ōinifo Jesús Niospa Fakekōikē. Nāskaxō yorafa tāpimakōinifo ato yoisharakōikakī, akairi tāpisharakōinōfo. Askai fāfe yora fetsafāfe mai fetsafo arixō nikakakī ato chanīmara fanifo akairi Jesús shinākakī. Nāskakē Jesús anā nai mēra kani Nios ano.

4

Pablo yoini anā Nios shināyamafono

¹ Niospa Yōshi Sharapa noko mēstekōi yoikī iska famis: “Jesús mā chaima oaitīa atiri yorafāfe Nios kachikiri fakani. ‘Ē Jesús Ifofaira’ ifamisxakakī nā nīafaka ato pārafaiāto anorima ato yoimisfo. Askara anori yoimisfāfe nikakaxō nīafaka fisti ifofamisfo,” ixō ato yoimis.

² Askara yorafāfe yora fetsafo anorima yoikani āa ato pāarakakī, ōiti chakayafiakaxō. Anori fisti shināki feyafamisfo. Nāskakē afara chakafakani rāfikanima.

³ Askarafāfe fetsafo tāpimākī iska fakani āa ato pāarakakī: “Niospa yoikī iska famis: ‘Feronāfakefo āfiyatirofoma. Askatari nami piyamakāfe,’ ixō yoimis,” ato fatirofo. Akka Niospa

keyokōi onifani nō pinō. A Nios Ifofamisfāfe pixikakī Nios kīfyoti-rofo. Nāskaxō nō pitiro afama mīshti.

⁴ Keyokōi a nō piaifo Niospa onifakī sharakōi fani. Nāskakē nō inimakī yoitiro aicho fakī. Nāskakē nō pikaspakī chakafatiroma a nō piaifo Nioski inimakī.

⁵ Epa Niospa noko yoia: “Keyokōi shara,” ixō noko yoia. Nāskakē nō, “Aicho Epa Niosi, mī noko yoinā shara inā,” nō fai. Nāskaxō nō pitiro.

Afe keskara itiomē Jesús yonoxosharamis

⁶ Timoteo, na ē mia yoiai anori mī chanīmara famis. Nāskakē Jesús Ifofamisfo ato tāpimasharafe, mī Cristo Jesús yonoxomis shara ixiki. Askatari Niospa meka mēxotaima ōife a mī piāi keskafakī, fāsi shināsharakōixiki, shara nixiki.

⁷ A tāpiamafāfe yoisim anori nikayamafe. Mēxotaima Niospa meka shināfafāife. Askata ōiti kerexfafāi Nios shināfafāife mī ōiti pachi fakīma.

⁸ Akka afaa meeyamai rakatsax nōko yora xokenātiro. Nō anā afaa yonopaitiroma. Akka nō mēxotaima yonoi nō mitsisipakōi itiro. Nāskara shara. Nāskafakīri nō mēxotaima Niospa meka nō ōirifakī, Nios kīfirifai nō mitsisipakōi itiro nōmēra sharafinakōia. Nāskax nō shara itiro. Nāskatari nō naax, nai mēra kaax, ariaxri nō mitsisipakōi itiro sharafinakōimāi niax Nios anoax, nōmāi Nios Ifofakatsaxakī.

⁹ Na ē mia yoiai chanīmakōi. Nāskaxō keyokōichi chanīmara fanōfo.

¹⁰ Nāskaxō mitsiskai nō Niospa meka yoifafāini. Nō askafaito fetsafāfe noko omiskōimati-rofo a Niospa meka ōikspaifāfe. Askai omiskōifiki nō tāpikōimis Jesús iskaratīamāi nikē. Nāskaxō Jesūsmāi noko nāxonikē, keyokōi yorafōnoax, nāskaxō a Ifofamisfo ato ifixii.

¹¹ Timoteo, na ē mia yoiai yonosharata ato tāpimafe.

¹² Nios Ifofafāi isharakōife. Mī isharakōiaito mia ōinōfo, ato ōimasharakōife. Askax mī isharakōixiki Nios Ifokōi faax, ato yoisharakōife mī meka pachi faxō, ato noikōisharata, nāskax isharaito ōikakī yorafāfe mia chakafakī yoinōfoma iskakakī: “Na naetapa Timoteo fanīrira noko yoi kiki nikayamakāfe,” ixō mia tsōa yoitiro.

¹³ Nā ē kayamaichāi, ato ichanāfaxō Niospa meka ato anexō, ato nikamasharakī, ato yoisharakōife.

¹⁴ A Nios Ifofaafo ato kexemisfāfe mia māmākaxō mia Epa Nios kīfixonaifono Niospa mia amapaiyai keskara mia axoni a Nios Ifofaafo mī ato tāpimasharanō ato kexesharayanā. Akka Epa Niospa mia kaxpa tāpimanimakī fetsafori sharafaxōfafāini xateyamafe.

¹⁵ Shināfāikōi isharafe nā ē mia yoiai keskafakī. Mī askafaito mia tāpisharakōinōfo mī yorafa Niospa meka yoiaito mia tāpisharakani. Askaxō, “Timoteo fāsi sharakōi,” ixō mia yolkani.

¹⁶ Nāskakē kexemesharafe. Niospa meka mēstesharakōi ato yoife, isharakōita. Mī askafai Epa Nios fe mī isharakōipakenakaki. A mia nikaifori askapakenakafoki.

5

Afeskax nō isharatiromē a nō Nios Ifofaa tii

¹ Anifo fāsi mekakata yoiyamafe. Nā mī epa mī aka keskafakī, oitsifafāi yoisharafe. Askatari nā naetapafori mī ochi yafi mī exto aka keskafakī ato shināmasharata ato yoisharafe.

² Yōxāfofori nā mī efa mī aka keskafakīri shināsharafāi ato yoisharafe. Mī chiko yafi mī chipi mī aka keskafakī nā xomayafa sharafo feesyamafāi, askara shinātama ato yoisharafe.

³ Nā kēro ifomafafa, askata fakemaisfo, askatari fafamaiffo, nāfo shināmakiyamafe nā Jesús Ifofamisfāfe kexesharanōfo.

⁴ Akka nā kēro ifomafa fakeyakē, askayamai fafafoyakē afāfe kexesharati-rofo. Askarifakī nā yome pishtakē ato kexesharapaonifo keskafakīri kopikiri kexesharanōfo āfe fakefāferi. Nāskafāifāfe fetsafāfe ōi kakī, “Nā yorafāfe Nios nikasharakani,” ikaxō yoisharanōfo. Nāskaito ōi Nios atoki inimai.

⁵ Nā kēro ifomafa fakemais ita, fafamaif ita, fenemais ita, nāskarāfāfe Nios fisti shinākī: “Niospa ea kexei,” ixō shinākī iskakakī, nā pena tii kīfita fakish tii kīfita famisfo Epa Nios mēxotaima kīfikakī.

⁶ Nāskafāx nā ifomafa fetsa fenemaisax kafāsatiro. Aa inimasharakōi nā ipaiyai keskai. Niospa meka mā shināmakixō, kachikiri faax, nā mā naa keskara. Shināsharaima, chaka shināi.

⁷ Timoteo, keyokōi ē mia yoiai na kēro ifomafa Jesús Ifofamisfo tāpimasharafe, askara tāpikaxō nikasharakōinōfo, fetsafāfe, “Mā chakara,” ikaxō yoitirofoma.

⁸ Akka fētsa afe yorafo kexesharama, āfe pexe mēra ikiaifāfe ato kexeima nāskafakī chakafai. Aa keskaratokai Niospa meka nikasharama. A Jesūs Ifofamato askarato afara chakafai, akka a Jesūs Ifofaafāfe afe yorafo kexesharakakīma fāsi chakafamisfo.

⁹ A kēro ifomafa sesenta xini aka, āfe fene fisti fe iyopaoni nā keskaraki kirika kenefe nā Jesūs Ifofamisfāfe ato kexenōfo.

¹⁰ Nāskata nā kēroōnoa yorafāfe yoisharamisfo; nāskata āfe fakefo pexkosharakōini; askatari yora fetsa āfe pexe ano kaito atoki inimamis; fetsafo pimamis; omiskōiāito ato sharafamis; ato feta amis; kēro askara fistichi āfe ane kenetiro Jesūs Ifofamisfāfe a kexenōfo.

¹¹⁻¹² Akka nā kēro ifomafa sesenta xinia akama, a keskaraki āfe ane mī kenetiroma. Nā kēromā āa shinākī iskafatiro: “Jesūs, ē mia fisti shināpai. Mia fisti ē yopai. Ē anā feneyapaima,” ifiaxō anā fetsa anori shinātiro feneyapai, anā Jesūs shinātiro. Nā Niospa yoiāi anori shināima āa chanī mekatiro. Askafai āa chanīaito ōikī, askara kēroki Nios inimatiroma. Nāskakē āfe ane kenetiroma.

¹³ Askara kēro fenemaisax xani itiro, pexe tii ōifofāsafakī, askai kafāsakī, ato pārāfōfāsfatiro āa chanīkī. Nāskakē ato fekaxtefatiro.

¹⁴ Askatamaroko kēro ifomafa yōxafo famatai feneyatiro. Mā feneyaxō fake fitiro. Fake fixō āfe pexe fisti anoxō kexesharatiro. Askafasharaito ōikī yorafāfe chakafakī mekafatirofoma.

¹⁵ Atiri kēro ifomafafāfe Nios kachikiri fakaxō Satanās ifofafo.

¹⁶ Timoteo, a Jesūs Ifofamisto afe yora ifomafakē, kexesharatiro. Askatari a ifomafāfo kaifoyakēma, fenemais ita, fakemais ita, fafamaisfo askara a Nios Ifofamisfāfe ato kexe-tirofo.

¹⁷ A Nios Ifofaafāfe xanīfōfōfāfe noko kexesharakaxō noko Ikisharamisfo Niospa meka noko tāpimanaifono nō atoki inimakī nō aicho fatiro. Askatari nō ato ināsharatiro nā afara yopai fo keskara finōfo.

¹⁸ Moisés kenekī yoikī iskafani: “A ato yonomanaito ato yonomakī kopifatiro.” Askatari kenenī yoikī fakkaki keparanākai. Moisés kenenī yoikī iskafakī: “Oa fakka keskara nō yonomanaino trigo āfe xaka chona chona a fofāsfatiro nō renextiroma piifōfāsanōfo. Askatari a noko tāpimasharamis nō kopifatiro afaa yopayamanō. Nāskafakī nō yoitiro akiki inimasharakī,” ixō yoikī kenenī.

¹⁹ A yora fistichi Nios Ifofamisto xanīfōfōnoa mia yoiāito, chanīmara fayamafe. Akka feronāfake rafe iyamai trespa a afara chakafaito ōikaxō, mia yoiāifāfe mī ato nikatiro.

²⁰ Askaito nikakī a Jesūs Ifofamisfāferi ichanākaxō yoitirofo iskafakī: “A mī chakafaa keskafakī anā askafayamafe. Nā mī chaka shināi, Jesūs yoife na afarafo mī chakafakī fetsai, mī yoiāito nikakī Jesūs mia chaka soxonō.” Mī askafaito ōikani fetsafo rāfitirofo. Askaxō afaa chakafapaitirofoma rāfikaspakakī.

²¹ Epa Nios feta Jesucristo āfe ājirifāfe mia ōikani. Nāskakē na ē mia yoiāi anori askafafe. A afara chakafamisfāfe āto ferotai fi yoife. Mī kaifofo yafi mī kaifofoma ōikī, nāskarāfāfe āto chaka xatenōfo ato yoife.

²² Ōisharata ato katofe Niospa meka ato yoimis. A kaa fisti ato katoyamafe. Ato ōisharayofe taefakī. Mī ōisharaxoma ato ifitiroma. Mī askara ifikē chipo afara chakafaira ixō, fetsafāfe mia mekafakī chakafatirofo. Nāskakē shināsharafāi ife, Timoteo. Afaa chakafayamafe.

²³ Timoteo, mī xāki pāemiski faka fisti ayakima uva ene pāepishta ayafe sharaxikī.

²⁴ Atiri yorafāfe afara chakafaito nō ōitiro xafakīakōi. Akka atirifāferi afara chakafai fāferi nō ōitiro. Mā askafimisfono chipo nō tāpixii Niospa kāimanaino.

²⁵ Nāskarifakī atirifāfe shara faifāfe nō ōitiro xafakīakōi. Askatari fetsafāferi afara shara faifāfe nō ōitiro. Mā askafamisfono chipo nō tāpixii Niospa xafakīakōi kāimakē afo.

6

¹ A ato yonoxomisfāfe Jesūs Ifofamisfāfe āto xanīfo shināfāi yonosharaxotirofo. Askakaxō tsōa chakafakī mekafatiroma āto xanīfo. Akka āto xanīfo yonosharaxokima chakafakī mekafai fāfe fetsafāfe ato iskafatirofo: “Kee, na Nios Ifofamisto yonokī finasharaima.” Nāskarifakī Niosri chakafakī yoi. Niospa mekari chakafakī yoi.

² Āfe xanīfāfe Jesūs Ifofamiskē a yonoxomistori Jesūs Ifofaxō askarato āfe xanīfo noikī shināfāi yonosharaxotiro, akiki xanikima aō noisharakōita afe nanea ōitsakōi ixō shināsharakōitiro āfe xanīfo.

Timoteo, nā ē mia yoiāi anori Jesūs Ifofamisfo tāpimasharafe.

³⁻⁴ Nōko Ifo Jesucristo āfe meka fāsissharakōi. Jesūs meka nikax oa Nios keskara nō shara itiro. Akka a yora fētsa noko anorima yoitiro, āa shināxō. “Ēfi fāsi tāpifinakōiakī, ea keskarakai tsoama,” ixō āa yoi askara yōra afaa tāpiamafax. Āa chanī askamis. Askara yora ato fe feratenātiro. Askakī meka shara yoitiro. Āa kakapaimis askara yōrari āa

shinātiro: “Ea tsōa finōyamanōra,” ixō āa shinātiro. Askara feronāfākekai Niospa meka ato yoisharatiroma. Askaito ōi kakī feratetirofo, meepaitirofo, nikakaspatirofo, ichtatirofo, noikaspatirofo, “Noko chakafaira,” ixō shinātirofo.

⁵ Akka a feratenāmisfāfe anorima fisti shināmisfo. Mā Nios shināyopaofinixakakī anā shināsharatirofoma. Anā ato yoisharatirofoma mēstekōi. Afāfe shināfo: “Nō Nios Ifofakat-saxakī nō kori ichapaya itiro,” ixō shināmisfo anori Niospa yoiamañano. Akka fētsa shināi iskatiro: “Ēri a keskara shara ipai,” ixō shinātiro.

⁶ Akka anori shinātamaroko nō afaamaisfixō nō Nios Ifofaax, nō inimasharakōitiro.

⁷ Na nō fake kāiyaitia nō afaaya pakenima. Nāskairi a nō naitia nōkai afaaya katiroma.

⁸ A nō piatī yafi a nō rapatiyax nō inmatiro, afaa anā ichapafō fichipaitama.

⁹ Akka atiri yorafo rapati ichapaya ipaimisfāfe nonori shinākani iskamisfo: “Afara ē fipaikī ē fitiro, nāskax ē inmatiro,” ixō anori fisti shinātiro. Fētsa kori fisti fichipai samama shināchakatiro, afara chakafo fetsa fetsatapafo fichipaitiro. Kori ichapa fipaikī afeska-xoma askarato chaka shināfafāini. Askara naax, a omiskōipakenakafo mēra katiro.

¹⁰ Nāskakī kori fisti noi, Niospa meka shinātama afara chakafofa fafafāini kori fixikī. Nāskakakī Nios kachikiri famisfo. Askara yorafo āto shinā mēraxō shinākani omiskōikanax anā inimasharatirofoma.

Pablo yoini afe keskaramāki Nios Ifofaax nō kerexkai ikai

¹¹ Timoteo, Niospa mia katoa. Kori yafi rapati shināyamafe. Nios Ifofasharafe a keskara ixiki, afaa chakafamisma ixiki, Jesús meka chanīmara fakōixiki. Askaxō mī yorafo noimiskōi ixiki, Niospa meka Ifofakī, akka mī yorafo yoikī oitsifafāi yoisharafe.

¹² Mia yora ichapafāfe ōiaifono mī ato yoisim: “Jesús ea nāxonī ēfe chaka ea soaxoxiki. Nā Jesús ēfe Ifo. Ē fāsi inimai,” ixō mī yoisharani. Akka anā shināmakiyamafe. Jesús mia nāxoniki nō afe nīpaxanō. Nā fistiōnoa shināfe. Satanás mia chaka shināmapaiyaito nikayamafe.

¹³ Ea nikasharafe Niospa keyokōi noko onifani noko nimaxiki. Jesucristo nā xanīfo Poncio Pilato yoini: “Ēfi Niospa Fakekōi,” ixō ratekima yoini. Iskaratīa Nios feta Jesús mia ōi.

¹⁴ Nāskakē Jesús meka nikasharafe. Afara ē mia yoiāi keskara afe, mī askaito ōikī fetsafāfe, “Timoteo chakafamisra,” ixō yoinōfoma. Nāskara afe nōko Ifo Jesucristo nokoaitia.

¹⁵ Nios fistichi Jesús nokoaitia tāpiakī āa nīchixiki. Ares afara apaikī atiroki. Afi xanīfo efapakōiki xanīfo fētsa finōtiroma. Nā nōko Ifo efapakōi fato xanīfo fētsa finōtiroma.

¹⁶ Akka tsōa onifanima, aakōi ares ika. Nāskax nanakama. A chaxasharai mēra ika tsoa akiki nokotiroma. Askatari tsōa ōimisma, tsōa ōitiroma. Nāskakē keyokōichi nō aōnoa yoisharatiro: “Nios fisti sharafinakōia. Nā fistichi afara sharafo ares atiroki,” ixō yoipakenakafo. Askapainō.

¹⁷ A kori ichapayafo ato yoife: “Ē kori ichapayaki tsoa ea keskarama,” ixō anori shināyamakāfe. Māto koriōnoax inimamis iyamakāfe. Askatari māto kori mato afeskatatiroma, keyotiro samama. Askatamaroko Nios fisti shinākāfe. A nō afara fipaiyai noko ināi noko fishkoima.

¹⁸ Nāskakē māto koriōxō fetsafo aō noisharakāfe. Fishkomītsayamakāfe. Afaamaisfo ato inākāfe. Fishkoyamakāfe. Inākōikāfe.

¹⁹ Akka mā ato ināsharaito ōi Nios matoki inimai. Mato afara fāsi shara faxōi mā Nios ari nokoaitia. Iskaratīa mā fetsafo ināsharai keskari fakī, Niospari chipo mato ināsharaxii kiki. Nāskax mā Niosnoax isharapakexatiro,” ixō ato yoife.

Pablo mā mekai xatekī, “Timoteo, mī isharaxō ato yoi sharafe,” ixō kirika kene manamani

²⁰ Nāskakē Timoteo, Niospa āfe meka shara mia tāpimani fetsafori mī ato yoinō. Nāskakē tāpisharayofe, āfe meka tāpisharaxō fetsafo mēstekōi tāpimaxii. Akka fetsafāfe Niospa meka anorima yoisimfo. Aa ranā yoinōnākakī kaxpakōi yoisimfo. Nāfāfe yoisimfo nō tāpikōiara ifiakaxō tāpiafoma. Nāskakē ato fe rafeyamafe.

²¹ Nāskakē nikayamafe. Fetsafāfe nāfo nikakanax ifofakaxō Niospa meka kachikiri fakanax, nāfo fenoafo. Afianā chanīmara faafoma.

Nōko Ifofāfe mato noiikī mato kexesharanō. Nā tii.

Ēkīa Pablo.

Pablo Timoteo Afianã Kirika Kenexõ Fomani

Pablo Timoteo yoisharani

¹ Ëkia Pablo ã mia kirika kenexõ fomai. Epa Niospa fichipaiyai keskafakĩ Cristo Jesús ea katonĩ aõnoa ãfe meka shara ã yoifofãsafanõ. Ea yoinĩ iskafakĩ: “Keyokõĩ yorafo yoife iskafakĩ: ‘Jesucristo matoõnoax nõxoni mãto chaka mato soaxoxiki nõ chanĩmara faafo tii afe nĩpaxanõfo, ixõ ato yoife nõ ãfe mia yoiyai keskafafe,” ixõ Jesús ea yoinĩ.

² Timoteoshta, ã mĩo noikĩ ã mia kirika kenexõ fomai mĩ tãpinõ. Epa Nios nõko Ifo Cristo Jesús feta mia noikĩ mia shara famanõfo. Askatari mĩ shinã mẽra mia shinãmasharakõinõfo mĩ õiti fekaxtenõma.

Ato Jesúsnoa yoisharafe

³ A ãfe xinifãfe Epa Nios yonoxosharapaonifo keskari fakĩ, ãri a yonoxosharai. Ë mẽraxõ ã afaa shinãchakayamafai ã yonoxosharai. Nãskakẽ ã mia Nios kifixõfafãini aicho fakĩ. Pena tii yafi fakish tii ã mia Nios kifixõfafãini.

⁴ Nãskakẽ mẽ oaino, mĩ ea shinãi oiatio ã mia õiferani. Nãskakẽ ã anã mia õisharapai, mia õi ã inimasharakõixiki.

⁵ Taefakĩkõĩ mĩ chichi Loida Jesús Ifofani. Askata mĩ efa Euniceri Jesús Ifofani. Afãfe Ifofasharakõimisfo keskafakĩ, mĩri Ifofasharai. Mẽ mia tãpia mĩ Ifofasharakõiaito nãskakẽ ã mia yoi.

⁶ Anã shinãmakiyamafe ã mia mãmãxõ ã mia Nios kifixoni. Nãskakẽ Niospa mia katonĩ Jesús yois mĩ inõ. Mã chii nokakẽ nõ anã xofisa fatiro anã xofisanõ. Nãskarifiakĩ mĩ anã yorafo ato yoipaima mã mĩ xokenãifinaxõ askara meekĩ mĩ Nios kĩfitiro anã mia õiti fepeaxosharanõ, mĩ anã ato yoisharanõ inimayanã a mĩ taefakĩ ato yoinĩ keskafakĩ.

⁷ Nãskakẽ Niospa Yõshi Sharapa noko yorafokĩ mesematama. Aõxõ afama mĩshti noko amatro. Askatari noko ato noimasharai. Aõxori noko shinãmasharatiro anã nõ chakafanõma.

⁸ Askafai rãfiyamafe Jesúsnoa yorafo yoitaifãfe rãfikima. Askatari eõri rãfiyamafe. Ë Jesucristo ato yoirifaito ea karaxa mẽra ikimatifoki. Mĩri Jesús ato tãpimasharafe; mĩ askaito, miari omiskõimanaifono rateyamafe. Jesúsnoax mĩ omiskõiaito, Niospa mia axoxii.

⁹ Akka Niospa ãfe Fake Cristo Jesús noko nĩchixonĩ nokoõnoax nõxoyonõ nõko chaka noko soaxoxiki. Askaxõ noko shinãni afe yora nõ inõ. Nõ yora chakafofiakẽ Niospa noko noimis. Taefakĩkõĩ Niospa mai onifaxoma, a inõpokoai tãpixõ, noko shinãni noko ifixixakĩ Jesúsxõ.

¹⁰ Jesús noko ano oamatai Niospa noko ifipaiyai anori nõ tãpipaonima. Akka rama iskaratĩ mã nõ tãpia noko ifimis Jesucristo noko nõxonĩ. Nãskax askaratĩari nõ nai, nõ rateima omiskõipakenakafo mẽra nõ kairoko. Nõ Nios ari kaax anã nõ naxima. Jesús noko chaka soaxonano nõ Nios ari nĩpanaka. Mã iskaratĩ nõ tãpia Jesús noko nõxonĩ nõ chiiã mẽra kanõma noko ifiano.

¹¹ Niospa ea katonĩ na meka shara Cristoõnoa yora fetsafo ã ato tãpimanõ.

¹² Nãskakẽ ã karaxa mẽranoax Cristoõnoax omiskõifi ã rãfima. Ë Jesús tãpikõiax chanĩmara fayana. Jesús ãfe chaka taefakĩ ea soaxonitĩa ã Epa Nios iskafakĩ yoinĩ: “Epa Niosi, ea kexesharapakexafe Jesús afianaõ oaitĩa,” ixõ ã yoinĩ keskara ea axoxii ã chanĩmara fakõini.

¹³ Na ã Cristo Jesúsnoa mia chanĩmakõĩ tãpimana shinãmakiyamafe. Ë mia mẽstekõĩ tãpimana keskafakĩ, nãskari fakĩ ato tãpimafe. Cristo Jesús chanĩmara fakĩ afe rafekĩ aõxõ yorafo noife mĩ afe rafeakĩ.

¹⁴ Nã ã mia yoiya keskara mĩ mẽraxõ shinãfe, shinãmakixikima. ãfe Yõshi Shara mĩ mẽra ikano mefeta aki. Õifãĩ, Niospa mia yoiya keskafakĩ kachikiri fayamafe.

¹⁵ Mã mĩ tãpia keyokõichi chanĩmara faafo Asia mai anoafãfe ea õifainafõ. Askatari ato feta Figelo feta Hermõgenesri ea õifainafõ ato fe fokãkĩ.

¹⁶⁻¹⁷ Akka Onesiforokai askanima, eõ rãfinima ã karaxa mẽra ikikẽ. Nãafi Roma ano nokoxõ pena tii ea fenafafãikĩ ea karaxa mẽranoa fichita, ea õiyoi nõ otitaiapaoni mẽxotaima ea õifaa õifakĩ, ea pishta inimamani. Nãskakẽ nõko Ifãfe Onesiforo ãfe ãfinõ ãfe fakefonõ Efeso anoxõ ato noikĩ ato kexesharaxonõ.

¹⁸ Onesiforo Efeso anoxori ea yonosharaxopaoni, mĩfi a õixõ tãpisharakĩ. Jesucristo anã fotoxõ noko ichanãfaxõ Onesiforokĩ inimakõikĩ noikĩ axosharaino ã askara fichipai.

2

Nõ Jesús Ifofakĩ oa soraronõ ãfe xanĩfo nikakõiai keskafakĩ nõri Nios nikasharakõitiro

¹ Timoteoshta, Jesucristo ãfe kerex sharaõnoax isharafe, afaa chakafaxima.

² Ĕ yorafo Jesúsnoa yoiaito mŕi ea nikafafāini. Nāskarifiāi mŕi ato chanŕmara fasharatiro. Nāskaxō a feronāfakēfāe a shinā sharaifo ifife mŕi ato tāpimaxikŕi afāferi fetsafo tāpimanōfo.

³⁻⁴ Akka soraro ōiti sharayato omiskōifiki tenetiŕo. Āfe pexe shināyamata āfe xanŕfo fisti ifofaxō nikasharakōi. A afara yonoai keskara āfe xanŕfāfe yonomanaino soraro sharapa yonosharatiro. Nāskarifiakŕi Niospa mia yonomapaiyai keskari fakŕi yonosharaxōfe fanŕira fetsa shinākima. Jesúsnoax omiskōifi meseyamafe.

⁵ Askatari fetsafo xonōnōnāxikakŕi ikisi itipinŕsharatirofo xonōnōnāpaikani. Askatari mŕi shināsharafai Niospa mia yoiaito nikasharakōife. Akka mŕi nikasharayamaito Niospa mia, "Aicho, mŕi fāsi sharakōi," ixokai mia yoitiroma.

⁶ Askatari feronāfāke yonosharamiskōi āfe tare efafofaxō, ikisi āfe yono fitiro pixiki. Nāskarifiakŕi mŕi Jesúsnoa yonoxosharamis Jesús mikiki inimakōinō mia afara shara ināxii.

⁷ Ĕ mia yoiai keskara shināsharafe. Nōko Ifāfe mato tāpimasharai kiki.

⁸ Nāskakē shināmakiyamafe Jesucristo naafiakē anā Niospa otofani noko ifimis inō. Nā David āfe fena. Nānori nā meka shara ē yoifafāimis.

⁹ Nā ē yoifaifo, yorafāfe Jesús Ifofaafoma ōitifishkikakŕi. Ĕ Niospa mekasharaōnoa yoiaino ekeki ōitifishkikakŕi ea karaxa mēra ikimanafo. Ĕ afaa chakafayamafiakē ē feronāfāke chaka keskarakē ea karaxa mēra ikimanafo. Ea ikimafianifono Niospa meka Jesucristoōnoa ē enetiroma.

¹⁰ Nāskakē ē atoōnoax omiskōifiki ē tenekōi a Jesús Ifofaafoma tii ē ato tāpimani chanŕmara fanōfo, Nios fe ŕpaxakakŕi.

¹¹ Na meka sharakōi nikafe:

Nō Jesúsnoax nakŕi nō chanŕmara faax nō afe ŕpanaka.

¹² Askatari nō Jesúsnoax omiskōifiki nō tenei, nō Jesús fe Epa Nios ariax xanŕfo ŕpanakakŕi. Akka nō Jesús potakŕi, "Niospa fakemara," ixō nō askafaito Jesús noko yoitiro iskafakŕi: "Mā ea Niospa Fakemara faito ēri mato kopitiro iskafakŕi: Mŕi ēfe fakema," fakŕi noko fatiro.

¹³ Askatari nō Jesús nikayamai nō isharayamafimiso, akka akai askarama, aroko isharakōimis. Aatokai afaa chanŕ yoimisma, āfe meka chanŕmakōi. Aakai ōiti ranāyama.

Afe keskara a Niospa meka yoimis shara itiomē Nios akiki inimanō

¹⁴ Na ē mia yoiai anori, mefe yorafo ichanāmisfo ato shināma fafāife. Niospa mia xafakŕia ōiaino ato yoife Niospa mekaōnoa feratenānōfoma, feratenākani aōnoax mekanōfoma. Akka fatotokai yoisharaimākai fatotori yoisharaimamākai ikaxō tsōa tāpitiroma tāpipai kakŕi. Anorima nika kakŕi tsōa tāpitiroma. Askakani fanŕira mekamisfo āa chanŕkani.

¹⁵ Timoteo, Niospa meka pena tii ōife. Askafaxō Niospa meka tāpisharaxō yorafo mēstekōi ato tāpimafafāife. Mŕi askaito Niospa mŕiōnoa yoitiro iskafakŕi: "Na ea yonoxosharamis, ē akiki inimasharakōi," ixō mŕiōnoa yoixiki. Mia askafainokai mŕi aō rāfitiroma.

¹⁶ A feratenāmisfo āto meka nikayamafe. Nō āto meka nikaxō meka mēstekōi Jesúsnoa nō nikapaitiroma. Askaxō anā nō Nios Ifofapaitiroma. Chakakōi itiro.

¹⁷ Oa yora faraxiki finaxō, koofi payokometiro keskafakŕi, a yōra anorima yoikŕi yorafo āto ōiti chakana fatiro. Himeneo feta Fileto askara chakakōi ato yoimisfo.

¹⁸ A Jesús oaitŕa a namisfo anā otoxiaifo mā nō tāpifekē, a feronāfāke rafeta Himeneo feta Fileto anorima mato yoimisfo. Akka nō tāpia mā Jesús anā fotoaino Epa Niospa nā namisfo otofaxii. Akka nā rafeta mato pāramisfo āa chanŕkakŕi. Iskara mato yoimisfo: "Mā finōa a mato yoimisfo keskara. A Niospa namisfo mā ato otofaa," ixō a refeta yoimis. Afāfe nā meka nikaxō shinākŕi iskafatirofo: "Ooa. Mā nō nakē Niospa noko anā otofaima," ixō anorima shinātirofo. Anori shinākani Jesús shināmakitirofo.

¹⁹ Akka Niospa meka chanŕmakōi. Tokirinŕfakai tsōa rafetiroma. Niospa meka nāskarari. Tsōakai āfe meka fetsafatiroma. A chanŕma, nā yoimis keskara nāskarakōi. Tokirinŕfakŕi yōra keneakai tsōa soatiroma. Nāskarifiakŕi Niospa meka kenenifo iskafakŕi: "Nōko Ifāfe afe yorafo tāpikōia." Nāskakaxō, "Afe yorafāfe a afara chakafamisfo keskara potatirofo," ixō kenenifo.

²⁰ Feronāfāke āfe pexe efafo sharakōi faxō a mēra kecho sharakōifo faa, askaxō a kecho sharafo mēra afara sharafo fatiro. Akka a kecho chakafo mēra afara chakafori fatiro.

²¹ Mā mŕi chaka mŕi xatekōiax, nā fēta xinikŕi afara chaka potatiro keskara itamaroko. Nā sapa choka keskara sharakōi mŕi itiro. Nāskax Jesús keskara shara mŕi ikaino Epa Niospa mia yonomapaiyai keskara mŕi aōxō afara sharafo faxotiro.

²² A naetapafāfe afara chakafo shinākŕi nā apaiyai keskara faifono mŕi askayamafe. Anori shinātaroko Niospa fichipaiyai keskara shināfe, Jesús chanŕmara fafāi, yorafo noikŕi, fetsafāferi shināsharakōiaifono, Jesús Ifofaifo ato fe mēstekōi isharakōife.

²³ Anā ē mia yoinō, ea nikasharafe. A feratenāifo ato nikayamafe. Ato fe feratenāpaiyamafe. Askara yorafo samama ōitifishkitirofoki.

²⁴ Niospa meka yoimisto tsoa feratetiroma. Anori askatamaroko keyokōi yorafo ato noisharafāi, ato tāpimasharatiro, tenekōisharata ato yoitiro.

²⁵ Fětsa Niospa mekakōi nikakaspakī meka anorima fisti shināito, fenāmāshta ato tāpimasharafē. Mī ato askafaino āto chaka xateti-rofo Niospa mefeta akaino. Askaxō Jesūs chanīmara fakōinōfo.

²⁶ Nāskafakī anā Niosnoa shināsharanōfo. Oa tarapa mēra ikia keskara Satanās ato fapai kiki. Nāskaxō ato amapayai keskafakī ato yonofafāini. Akka mia nikaxō Jesūs ato ifitiro. Nāskaifono Satanās afianā ato afara yonomatiroma. Afianā tarapa mēra ikia keskara ikanima.

3

Afeskakanimākai yorafa na mai keyoaino

¹ Timoteo, ōisharafē. Ē mia yoi Jesūs chaima oaino fekaxkōi ixii kiki.

² Fetsa noitama āakōi kexemei, askatari fětsa āfe kori fisti shināfāi, āakōi anofi inimamis ikāi, Niosnoa chaka yoimis ikāi, askaxō āto apa yafi āto afa nikakaspamisfo ikāi, yonox-ōfiaifāfe aichora ato famisfoma ikāi, ato noikaspamisfo, Niosnoa shinātama chakakōi fistic shināmisfo,

³ afe yorakōi noiyamafāi, fetsafo noiyamata axokaspafāi, fetsafo āa pāramis ikāi, āa apayai keskafakī enemisma ikāi, mitsisipakōi ikāi, afara mšhti sharafo noiyamafāi,

⁴ askata a afe rafeafo ato chakafafāi, samama ōitifishkimis ikāi, “Ēkai tosa keskarama,” ixō yoifāi, Nios noitama afara chaka fisti fakī ato inimamapaimiskōi ipaikani.

⁵ Askata a Nios Ifofafo ichanāifono ato fe ichanākaxō Niospa meka nikafikaxō shināsharakanima. “Nōri Nios Ifofai,” ixō āa mato pārakani. Askax āa chanīmisfo Nios Ifofayamafakanax.

Askaifāfe ōi ato fe rafeyamafe.

⁶ Askara yorafāfe a fofāsakakī ato pāratirofo a kēro tāpisharamisfoma fanīrira ato yoimisfo ato anorima yoiaifāfe. Atirifāfe noko yoikōikanira ato famisfo. Nāskakē a xotofakefāfe noko yoikōikanira ikaxō a yoiaifo anori ato nikataifafo. Nāskakē a kērofāfe āa shinākani iskakakī: “Nō fāsi chakakainaito, noko tāpimasharanōfora,” ixō shinākani anorima āto shinā mēraxō shinākaxō nāskai fekaxtetitaiafo.

⁷ Nāskaxō a ato yoimis fětsari ato yoiaito, nikatai fakaxō Niospa meka sharakōi tsōa mēstekōi tāpinakafoma. A rama ikai fětsari yoiaito, nikakākiri aōxō tāpisharapafikakī, tsōa tāpinakama Niospa mekakōi.

⁸⁻⁹ ĶMā mī shināimē anori aakōi Egipto anoa xanīfāfe Faraón israelifo ato yonomapaoni, mesemaxō? Askaito ōikī Niospa Moisés nīchini afe yorafa israelifo mai fetsa ari ato iyotanō. Ato askafaito Faraón ato nīchikaspani. Askaino a feronāfake rafe ano mokaya inifo; fětsa ane Janes ikaino fětsa aneri Jambres ini, nā rafe Faraón fe rafeafo ini. A rafe Moiséski ōitifishkinifo. Nāskaxō āto xanīfo Faraón āa pāranifo ato Moisés nikanōma. Askafaifāfe ōikī chipo āto xanīfāfe tāpini Moisés a feronāfake mokaya rafe finōkōia ini. Mokayafikaxō afaa tāpiama inifo. Nā rafeta Faraón yoinifo Moisés nikanōma. Nāskafakīri fetsafāfe Niospa meka mēstekōi ato nikamakaspakani. Nāskakaxō Niospa meka mēstekōi tsōa yoima āto shināmā anorima shinākani. Oa Janes feta Jambres āto xanīfo anorima yoiaifono āto xanīfāfe ato tāpini keskafakī. Nāskafakīri na iskaratīa na anorima yoimisfo āa chanīaifāfe nō ato tāpixii afāfe afaa tāpiafoma.

Mā Pablo mekai xatekī Timoteo yoisharani

¹⁰ Timoteo, mā mī ea ōisharakōimiskī ē ato afo tāpimanaito. Mā mī ea ōimiskī afeskax ē isharamākai, Nios fisti inimamapafāi, Jesūs noikī chanīmara fafāi, afarafo chakafo nokoaito ē tenefāi, ē yorafa noifāi,

¹¹ a yora chakafāfe ea Jesūsxō chakafaifāfe ē tenefāi, askai ē omiskōimis. Mā mī tāpia ē afo tenemis. Askatari mā mī tāpia a Antioquia anoa ita, Iconio anoa ita, a Listra anoxō ea chakafaifāfe ē teneni. Nāskakē nā chakafoōxō nōko Ifo Nios ea kexesharamis ē tenesharakōimis inō.

¹² Na ē mia yoiai anori chanīma. Nō Cristo Jesūs fe rafesharapaiyaito a Jesūs noikaspa-misfāfe noko omiskōimaxii.

¹³ A yora chakafāfe āa ato pārakani. Askatari chipo ato pārakī finakōixikani. Nāskakē afara chakafakī ato pāraifāfe ōikī Satanāsri ato pāraxii.

¹⁴ Nāskakē Timoteo, na meka Jesūsnoa mī tāpisharai. A mia tāpimanafoma mā mī tāpikōia. Nāskakē mī tāpisharakōi. Anori meka chanīmara fafe, shināmakikima.

¹⁵ ĶMā mī shināimē yomepishtaxō mī Niospa meka tāpiakī? A mekaōnoa mī shināsharamiskī Cristo Jesūs chanīmara faax nō afe ishara-pakenaka.

¹⁶ Niospa ato shināmanaino feronāfakēfāfe kirika ato kenexonifo Niospa meka ato tāpimaxikakī. Fetsafāfe afara chakafaifono, nō ato Niospa meka tāpimasharatiro anā askayamanōfo. Askatari nō isharaipaikōikī nō Niospa meka ōikī nō tāpitiro afeska faxō nō Jesús Ifofasharatiromākī.

¹⁷ Akka Nios Ifofamisfāfe āfe meka nikasharakōikaxō, Nios yonoxosharakōitirofo.

4

¹ Timoteo, ē mia kaxeta yoima, nikafe. Jesús oatīa nōko xanīfokōi ixii Apa Nios feta, keyokōi yorafo namisfo yafi niafori ato yoixii. Jesús chanīmara fakanax afe nai mēra nisharapakenakafo; akka a chanīmara famisfoma chiifā mēra Niospa ato potai omiskōipakexanōfo. Nāskakē āfe Fake Jesucristo feta Niospa noko ōiaino ē mia yoi iskafakī.

² Niospa meka fena fenakima ato yoife fenāmāshta shara. A nikapaiyairo askatari a nikakaspairofi ato yoisharafe, mī ato yoisharaino āto chaka xatenōfo Jesús Ifofasharax isharonōfo. Shināsharata, Niospa meka mēstekōi yoife.

³ A yora chakafamai nokoaino yorafāfe Niospa mekakōi nikakaspairofo. A nikataromaro meka fetsafo shinātirofo, nā apaiyai keskafakakī. Anori fisti shinākani. Nāskakanax ano fisti ichanākaxō anorima a fetsafāferi yoiaito nikakakī.

⁴ A Niospa mekakōi nikakaspakani a āto xinifāfe shināpaonifo keskari fakakī.

⁵ Nāskakē Timoteo, ōisharafe. Afara afeskaraito Niospa mekakōi Ifofasharafe; mī shināfenotama anori tāpisharafe. Mia omiskōimanaifono tenefe. Kafākakaikī yorafo Jesúsnoa tāpimafe Ifofanōfo. Nā mia Niospa yoiai keskafafe shināfāi.

⁶ Iskaratīa eōnoa ē mia yoi. Anā ē samarakaima mē chaima nai ea Jesúsxō retexikani.

⁷ Mē yonosharakōitiani ēfe Ifo Jesúsxō. Ē chanīmara fatitaifaa enekima. Keyokōi Niospa ea yoiai keskara mē aka.

⁸ Nōko Ifokōichi ea ōimis ē Ifofasharakōiaito. Nāskakē ē akiki nokoaito ea afarafo ināsharaxii. Eres fisti ē fixiima. Nā nōko Xanīfo finakōia oatīa keyokōi nā Ifofaafāferi fixikani. Aō noikī a manaifori ato ināsharaxii.

Pablonō Timoteo fisti yoini kirika kenexokī

⁹ Timoteo, ea ano orisape.

¹⁰ Demās afarafo fichipaikī ea nonoa ōifaiti, Tesalónica ano kakī. Askatari Crescenteri kati Galacia ano. Askatari Titori Dalmacia ano kati.

¹¹ Akka na Lucas fisti efe ika. Nāskakē Marcos ea efexōfe ea axosharaiyonō Niospa meka ato yoikī.

¹² Akka ē Tíquico Efeso ano nīchiyamea ēa.

¹³ Mī oatīa ea ēfe rakoti fexōfe a Troas ano ē faferati a Carpo pexe ano. Askata ēfe kirikari ea fēxota, askatari kirika fetsari ea fēxota a fakka fichisharakōi ē akiki kenemis, aari ea fexōfe. Ē afo fichipaikani.

¹⁴ Na yami famis Alejandro ea fāsi mekafamis. Aato ea chakafaito ōikī Niospa kopikiri omiskōimaxii.

¹⁵ Ōisharafe. Alejandro miari chakafatiroki na meka shara Jesúsnoa nō yoiaito noko meka xatemapai kiki.

¹⁶ Akka ea taefakī xanīfo ano iyonifo tsōakai eōnoa yoisharanima. Akka keyokōichi ea ōifainifo fōkakī. Askafiaifono ē Nios iskafakī yoini: "Epa, na ea nonoa ōifainaifo ato chakafayamafe," ixō ē Nios yoiyamea.

¹⁷ Ea askafafiaifono ēfe Ifāfe Jesús ea potayameama, ea kexexō. Ea askafiaifono ē ratetima ēfe Ifāfe ea kexeano āfe kexex ea ināno ē ato yoinō. A judeofomafāfe ea yōkaifāfe keyokōi nikanōfo ē Niospa meka Jesúsnoa ato yoiyamea. Ē askaito ea retepaikakī, oa poomānā noko pipaiyai keskara ea fatifo ea retepaikakī. Ea askafafiaifono ea Niospa kexesharayamea ea tsōa retenōma.

¹⁸ Afara chakafo ekeki nokoaito ōikī ēfe Ifāfe ea kexetaifa a ē akiki nai mēra nokoaitīa. Fāsi nōko Nios sharakōi, tosa fētsakai askafatiroma. Nāskakē tsōa nōko Nios finōtiroma. Ares fisti sharafinakōia. Nō aōnoa yoisharapakexanō. Nāskapakexapainō.

Pablo mā mekai xatekī ato meka shara fomani

¹⁹ Timoteoshta, ea Prisca yafi Aquila ea yoixōfe, keyokōi yorafo Onesíforo pexe ano ikafori ea yoixōfe.

²⁰ Erasto Corinto ano nēteyamea. Trófimo isinī ikī rakakē ē Mileto ano rataferayamea.

²¹ Nā mechaka ikamano ekeki ofe. Eubulonō, Pudentenō, Linōnō, Claudianō, keyokōichi Jesús chanīmara faafāfe mato yoisharapaikani.

²² Nōko Ifo Jesucristo mefe ipaxanō. Askatari Niospa mato noikōikī mato kexesharakōinō keyokōi. Nā tii ē mato yoi.

Pablo Tito Kirika Kenexõ Fomani

Pablo Tito yoisharani

¹ Tito, ẽ mia kirika kenexõ fomai. Ẽfi Pabloki, Niosfi ẽfe Ifokõiki. Nã ea yoiãi keskamis ẽ. Jesucristo ea nĩchia ẽ aõnoa yoimis inõ, nã Niospa katoa yorafo ẽ ato tãpimanõ afãfe Jesús chanĩmara fanõfo.

² Niospa mai onifatama shinãkĩ iskafani: “Na yorafo ẽ ato katoano efe rafeaifono ẽ ato ìkikõipakenaka efe ìpaxanõfo,” ixõ shinãni. Nãskakẽ nõ Nios Ifofapaikĩ nã yoiãi keskara nõ chanĩmara fatiro. Nios ramashara chanĩmismã.

³ Aatofi noko tãpimapaiyaitĩa ẽfe meka shara noko tãpimani. Nãskakẽ iskaratĩa ea nĩchia ẽ ato ẽfe meka shara yoinõ eõxõ tãpinõfo. Nã Nios noko ìfimis nõ afe ìpaxanõ.

⁴ Tito, ẽ mia kirika kenexõ fomai. Mĩfi ẽfe fake keskarakõikĩ, eõxomãĩ mĩ Nios chanĩmara fakẽ. Epa Nios mĩ Ifofakẽ mia imasharakõipakenaka mia noikĩ mia shinãsharamani. Nõko Ifo Jesucristori mia askafai.

Pablo Tito Creta ano nĩchiferani ato tãpimanõ

⁵ Tito, ẽ mia nĩchiferati Creta ano a nõ yonofai mitoxoma mĩ chipo mitonõ. Nãskakẽ ẽ mia yoiti iskafakĩ: “Nã pexe rasi anoafo kexemisfo katofe nã Nios Ifofaafõ ichanãfono ato kexenõ,” ixõ ẽ mia yoiferati.

⁶ A Nios Ifofaafõ kexemis katofe afaa chaka shinãmismã. Ẽfi fistiya inõ. Ẽfe fakefo Jesús tãpiafo inõfo, ato kemamisma inõfo, afaa chakafamismã inõfo ẽfe fakefo.

⁷ Nã Nios Ifofaafõ kexemis sharakõĩ itiro, afaa chaka shinãmismã nãmãĩ xanĩfoax. Nã keskara yora mĩ katotiro nã Nios Ifofaafõ kexemis inõ. Nã Niospa shinãmanãĩ keskara inõ aõnoa afaa chaka yoiyamanõfo. Askatari kakapaimis itiroma. Askatari samama õitishki imiskai itiroma. Askatari pãemis itiroma. Askatari setemitsamis itiroma. Askatari yora fetsa pãraxõ kori fĩamis itiroma.

⁸ Askatamaroko isharakõixõ yorafo ẽfe pexe nokoaito atoki inimayanã ato ifitiro. Askatari yorafo keyokõĩ ato afara shara axosharakõimismã itiro. Askatari ẽa kexemesharamis itiro mẽstekõĩ isharakõiyãnã. Niospa meka nikasharakõipai afara chakafapaifikĩ anã akima. Nãskaxõ a Niospa fichikaspai fo anã shinãima.

⁹ Niospa meka nikasharaxõ kachikiri fayamafãĩ, nã Niospa yoiãĩ anori chanĩmara faxõ fetsafori yoitiro. Xafakĩakõĩ yoitiro. Nãskaito nikai yorafo Nioskĩ inimanõfo. Askatari anorima yoimisoro ato tãpimatiro, akairi tãpinõfo.

¹⁰ Akka nã fetsafo nikayospakõimismã Niospa meka ato yoiãifono nikakaspakõimismã. Nãskaxõ meka fetsafaxõ yoimismã ẽa fanĩrira yoikakĩ nã Moisés yoini keskara fisti nõ nikanõra ikaxõ. Akka nã judeofo ranãri askamismã ẽa chanĩkani.

¹¹ Nãskakẽ ato xatemafo ato pãranõfoma. Kori fisti fipaikakĩ anorima chakakõĩ ato tãpimapaikani kiki. Nãskakẽ ranãrito atoõxõ Jesús kachikiri fayomismã.

¹² A feronãfake onãyato a inõpokoi keskaraõnoa Creta anoxõ yoini: “Nono ikafo, Cretafõfi chanĩmismã, nikayospafo, pikĩ fisti tãpiafo, yoinã keskara pitsikõifo xanikõifo,” fani.

¹³ Nã tãpiato ato yoikõini ato pãranima. Creta anoafo chakakõĩ ikafo. Nãskafiafono ato yoisharafe Titopa, anã askanõfoma, Niospa yoiãĩ keskara nikanõfo. Nãskaxõ Niospa meka chanĩmara fanõfo.

¹⁴ Akka judeofãfe ẽto xinifãfe ato yoipaonifoki anorima, ẽa chanĩkakĩ. Nãskakẽ ato yoisharafe anã ato nikanõfoma. Askatari a Niospa meka anã nikaifãfema ato yoipaiyãifono, ato yoisharafe anã ato nikanõfoma.

¹⁵ Fetsafo õiti sharayafo, mãmãĩ Epa Niospa ato chaka xatexonano. Nãskakẽ afara sharafo atonã sharakõifo. Akka a õiti chakayafãfe ẽto shinã mẽraxõ chakakõĩ shinãmismã.

¹⁶ Askafiax chanĩmismã, “Nõ Nios tãpiara,” iki, tsõa Nios shinãyamafi. Askara yõra Niospa meka nikakaspakĩ chakafai. Nãskakẽ nõ tãpitiro askara yora Nios fe rafemisma. Askara yõra shara shinãima, afaa pishta shara fatiroma, chakakõĩ shinãĩ.

2

“Niospa meka ato mẽstekõĩ tãpimasharafe,” Pablo Tito fani

¹ Mĩfi askaramakĩ, Titopa, mĩ ato yoisharafe. Niospa meka ato mẽstekõĩ tãpimasharafe, mia nikasharanõfo.

² Askata anifo tiiri ato yoisharafe isharanõfo. “Anã pãeyamakãfe,” ato fafe. Askafaxõ ato yoisharafe: “Mãri isharakãfe mã askaito õikĩ fetsafãfe mato õinõfo. Afara chakafapaikĩ anã ayamakãfe, kexemesharakãfe. Shara shinãĩ ikãfe. Mãto õitinĩ Nios shinãkĩ kachikiri

fayamakāfe. Askata māri yorafo fe rafesharakāfe. Ato noikāfe. Māto afara afeskaraito shināchakayamakāfe, a finōmataroko Nios yoikāfe.” Nāskaxō anori ato tāpimasharafe, Titopa.

³ Askatari a yōxafo tiiri ato yoisharafe iskafakī: “Isharakāfe a Niospa fichipaiyai keskai. Askatari mā ranā paranōnāyamakāfe. Parakī ato chakafayamakāfe. Yōxafofiax pāeyamakāfe. Askatamaroko afara sharakōifo fetsafo ato tāpimakāfe,” ixō ato yoife. Askafafe ato yoikī, a ranā askanōfo.

⁴ Nāskafaxō anā ato yoisharafe, Titopa, yōxafo tiito a naetafafa ato yoisharanōfo a tiitori tāpinōfo, nāskaxō āto fene noisharakōinōfo, āto fakefori noikōinōfo,

⁵ afara chakafapaifikkakī anā anōfoma, kexemesharanōfo, askatari āto pexe anoxō āto fakefo kexesharakōinōfo faki fofāsapayamanōfo, askatari ato noisharakōinōfo, askatari āto fene nikakōinōfo. Nāskaifāfe ōikī fetsafāfe Niospa meka chakara fatirofoma, nā kērofo shara niaifāfe ōikī, Nios Ifofakanax. Akka kērofāfe Nios Ifofafiakakī anorima shināifono fetsafāfe Niospa meka chakara fatirofo, nā kērofo ōikī, chaka niaifono, Nios Ifofafiakanax. Akka nā kērofo Nios Ifofaax shara ikaifono ōikī fetsafāfe Niospa meka chakara fatirofoma. Nāskara yōxafofāfe ato shara tāpimatirofo, naetafafa.

⁶ Askatari naetapafari yoisharafe iskafakī: “Māri tāpikāfe, shināsharakāfe ishaxikāki. Afara chakafapaifikī anā ayamakāfe, kexemesharakāfe,” ixō ato yoife, Titopa.

⁷ Askatari māri isharafe. Keyokōi yorafo shara fafe. Afeskax ishariatirofomākī ato ōimafe. Ato Niospa meka tāpimafe, mēstekōi ato yoisharafe, xafakīakōi. Niospa mekakī kakapayamafe.

⁸ Ato meka shara yoife. Mī shara yoiaito, mia fetsafāfe iskafanōfoma: “Titopa noko meka chaka yoirā,” inōfoma. Tsoa mefe feratenāyamanō. Mefe feratenāpaikani rāfitirofo. Mī afara chakafaino mia tsōa ōiyamanō.

⁹ Askatari a ato yonomatifo ato yoife iskafakī: “Māto xanīfāfe mato yoiaito akiki inimayanā nikakōikāfe afe feratenākakima.

¹⁰ Nāskaxō māto xanīfo āfe afara onēyamakāfe. Shara yonoxokāfe, ramashara mā ato pāramismakī. Askara ōikī mato tāpisharanōfo mā ato yonoxosharakōiaito māmāi Niospa meka shara shinākī.” Nāskakē mātoōxō, “Niospa meka sharara,” fatirofo. Nā Nios noko ifimis nō afe īpaxanō.

¹¹ Epa Niospa āfe Fake Jesús nāmā nīchini nokoōnoax naiyonō nōko chaka noko soaxoyanā nō afe īpaxanō. Nāskakē nō tāpitiro Epa Niospa keyokōi noko noikōiaito.

¹² Noko noikī noko tāpimani afara chakafakī nō xatenō. Noko afara chakafamapaiyaiāfe nō ato yoitiro iskafakī: “Maa, ē anā afaa chakafapaima. Ē shara nipai, ē anā chaka shināpaima,” nō ato fatiro. Nāskaxō nōko ōiti mēraxō a afara chaka nō fichipaiyai a Niospa fichipaiyaima, nōri anā fichipaitiroma. Askara fichipaitama a nō shināmakitiro. Nāskata nō isharakōitiro. Niospa noko shināmanai keskara fisti nō shinātiro. Nāskax nō shara nitiro. Yora fetsafāfe chaka shināifono nō askara shinātiro, Nios Ifofaxō.

¹³ Iskaratīa nō Jesucristo manai anā oaito nō ōisharapai. Nāfi nōko Ifokōikī. Nāfi Nioski. Nō tāpia nokokī anā oxii. Nokoki nokoaito sharafinakōia nō ōixii. Nāato noko nāxonī nō omiskōipakexanōma nōko chaka noko soaxoxikī, nō afe nīpaxanō.

¹⁴ Nā nokoōnoax nani. Nōko chaka keyokōi noko soaxōfaini. Nāskaxō nōko ōiti noko sharafaxōa. Nō afe yoraxō nō afara sharafapaikī nō anō.

¹⁵ Nāskakē ē mia yoiai keskafakī keyokōi yorafo ato tāpimafe, mia Niospa shināmanaino. Afara chakafaiāfe ato yoisharafe, anā askanōfoma. Niospa yoiai keskafakī māri ato yoisharafe, inimanōfo. Mī ato askafaito mia nikasharanōfo Niospa mia yoiai keskarafakī akairi nikasharanōfo.

3

Nios Ifofafo shara nitirofo

¹ Nāskaxō mefe yorafo ato yoisharafe, Titopa, iskafakī: “Māto xanīfofo feta nafa xanīfāfe yoiaito nikasharakāfe. Ato nikasharax a mato yoiaifo keskakāfe. Askatari afara afeskaraito ato axosharakāfe. Shara shinākāfe.

² Askatari ato mekafakī chakafayamakāfe. Fētsa mato yoipaiyaito ferateyamakāfe. Akiki ōitifishkiyamakāfe. Ato shināsharakāfe. Fenāmāshta ato yoikāfe,” ixō ato yoisharafe, Titopa.

³ Nāskakē nōri afaa shināyopaonima. Nōko ōiti mēra nō afaa pishta shinātiro, nō ipaoni. Nō nikayospakōi nō ipaoni. Nō chaka shināpaoni. A nā nō ipaiyai keskara nō ipaoni. “E shara shināi, nā ē ipaiyai keskara ē iki,” ikax nōa nō pāramepaoni. Nō yora fetsa āfe afara fichipaipai. Nō ato mekafakī chakafapaoni. Chakakōi nō ipaoni, afaa pishta nō mekeaima. Nāskax nō noikaspa faatanāpaonixakikai nō xatemisma.

⁴ Mā nō askapaonino, Epa Niospa noko noikī āfe Fake fisti nīchini nōko chaka noko soaxoniyonō, nō omiskōipakexanōfoma nokoōnoax naiyonō. Nāskaxō noko ōmani afeskaxō noko noimākai.

⁵ Akka nō chaka shināmiskē noko nāxoni nōko chaka noko soaxoxiki, nokomāi noikōikī. Akka nō afara shara faōxō noko ifima. Noko noikī nōko ōiti fetsafaxō noko shināmasharai. Noko askafaano nō niax fena keskara shara nō itiro. Niospa Yōshi Sharapa noko askafatiro. Nōa nō niax nō askatiroma. Nōa nō chaka soametiroma.

⁶ Nōko Ifo Jesucristo noko nāxoni, nōko chaka noko soaxoxiki noko ikipakexakī. Nāskakē Niospa āfe Yōshi Shara noko inā nō mēra nanenō, fishkomītsatiroma.

⁷ Nāskaxō noko ōiti shara faano, nō afe rafekōitiro nokomāi noikōikī. afe rafeax nō afe nisharakōipakexatiro nā nō ipaiyai keskai.

⁸ Titopa, ē mia xafakīakōi yoiaki. Nā ē mia yoiaki keskara chanīmaki. Nāskakē Nios Ifofaafō yoisharakōife, shināsharata isharakōinōfo, yora fetsafo shara fanōfo. Askara shara ikax keyokōi nō isharatiro.

⁹ Nāskata fētsa mia feratenāito kemayamafe. Mia iskafaito: “Nōko xinifo mī tāpiama, mī ea keskarama,” mia faito kemayamafe. Askata oi mitsisipato mekaito kemayamafe. Moisés yoini keskafakī mia mekafainīfōfānaito kemayamafe. Mī kemapanā sharamaki. A noko askafai yōra afaa tāpiamaki. Askara fe nō kemanātiromaki.

¹⁰ Akka fētsa a Jesús Ifofaafō ato yoisharakima āa ato pārakī ato paxkanāfaino kenaxō yoisharafe mia nikasharaimākai anā askanōma. Akka mā mī yoikī rafefafiano mia nikayamaino anā afaa yoiyamafe. Askatari anā afe rafeyamafe, ares inō.

¹¹ Mā mī tāpia askara yōra Nios Ifofaama. Niospa meka nikaima, chaka shināi, ōiti chakaya. Askarato afashta shara faima. Mā āa tāpimekōia, yora chaka.

Pablo mā mekai xatekī ato meka shara fomani

¹² Askata ē mikiki Artemas iyamakī Tíquico ē mia nīchixononi. Mikiki nokokē, ekeki ofe, Nicópolis ano. Na oi pakeaitā ē shinā ē nono Nicópolis ano itiroki, mechakaino.

¹³ Apolos yafi Zenas kexesharafe. Nā Zenasmā noko ato yoixomiski, nōko xanīfo. A rafe mato makinoax foaifāfe ato kexesharafe. Nāskaxō afara fichipaiyaifāfe ato ināfe, aya fōtanōfo.

¹⁴ Askatari a Jesús Ifofaafō ato yoife yonomisfo inōfo, yonosharakōi yononōfo, yonochakama. Askarafāferi afara yopakakī fitirofo, yonokaxō. Askarafo ato yoife xanimisfoma inōfo, ato afara ināxikākī a omiskōiaifo, afaamaisfo.

¹⁵ Na ēfe ikafāferi āto meka shara mia fomakani, Jesús Ifofaafāfe. A noko shināifori noko ato yoixōfe. Niospa āfe shinā shara māto ōiti mēra nanemanō mato noikōikī. Nā tii ē mia kenexō fomai, Titopa.

Pablo

Pablo Filemón Kirika Kenexõ Fomani

Pablo Filemón yoisharani

¹⁻² Ëkĩa Pablo. Na karaxa mēraxõ ã mia kirika kenexõ fomai. Na nõko exto Timoteo feta nõ mia kirika kenexõ fomai. Ë Jesucristoõnoa ato yoiaito, ea nikakaspakakĩ ea achikaxõ karaxa mēra ea ikimatifo. Nāskakē ã mia yoi, Filemón, mĩfi noko keskarakĩ Niosnoa ato yoimis. Nāskakē nõ mia noikõi. Nõ mia kirika kenexõ fomai, mia yafi a mefeta Jesús Ifofaafõ a mĩ pexe anoax ichanāmisfori nõ mato kirika kenexõ fomai. Akka Apia nõko poi keskara, nāskakē Arquipo yafi nõ ato kirika kenexõ fomai. Akka nã Arquipo noko keskarari nãatori ato Niospa meka yoimis.

³ Niospa mato noikĩ mātõ shinã mēra mato shināmashara mã fekaxtenõma. Epa Nios feta nõko Ifo Jesucristo mato askafanõ.

Filemón Jesús Ifofaxõ yorafo noipaoni

⁴⁻⁵ Mē mia nika mĩ nõko Ifo Jesús noikõiaito, askatari mĩ chanĩmara fakõinaito, askatari a Jesús Ifofaafari mĩ ato noisharakõia keyokõi. Mĩ askaito nikakĩ ã mia nĩrixõ kĩfixõfafaĩni iskafakĩ: “Aicho Epa Niosi, na Filemón mia Ifofasharakõia,” ixõ ã mia Epa Nios kĩfixomis.

⁶ Askatari mĩ Epa Nios Ifofasharakõiyana mĩ ato afara axosharakõimis ato tãpimasharakõiyana. Nāskakē ã Epa Nios mia kĩfixomis mĩ tãpisharakõinõ nã Cristo Jesús nõ Ifofaito noko inimamamis keskafakĩ.

⁷ Ë mikiki inimasharakõi mĩ ato noisharakõiaito nikai. Nāskakē ã mikiki inimai, efe yorashta, a Nios Ifofaa fetsafo mĩ ato noikĩ mĩ ato inimamasharakõiaino.

Pablo Filemón iskafani: “Mĩ yonomati Onĩsimõ eõxõ sharafafe,” ixõ yoini

⁸ Cristo ea ifini ã ãfe meka yoimis inõ. Nāskakē fãsi mekanĩnkafã ã mia yoifitiroxakĩ, akka ã mia askafapaima mĩmã fetsafo ato noiyana mĩ ato inimamasharakõiano.

⁹ Ë mia askafatamaroko ã mia noikõiyana ã mia yoipai. Ëkĩa Pablo mē anifokõia ã Cristo meka ato yoiaito ea nikakaspakakĩ karaxa mēra ea ikimatifo.

¹⁰ Nāskakē Onĩsimõõnoa ã mia yoisharapai. Na Onĩsimõfi ãfe fake keskarakĩ. Nono karaxa mēraxõ ã Onĩsimõ Jesús chanĩmara famatĩ. Nāskakē Onĩsimõ ãfe fake keskara.

¹¹ Akka taeyoi Onĩsimõ mia yonoxosharapaonima. Mã askayopaoñnixakĩ, iskaratĩa mĩ noikĩ mia axosharatiro, nã ea axõai keskafakĩ.

¹² Ë mia ana Onĩsimõ nĩchixonĩ ã ão noikõifikĩ.

¹³ Epa Niospa meka shara ã yoiaito ea karaxa mēra ikimanifono, oa nono efe ixõ mĩ ea kexesharamis itikixõ na Onĩsimõ ea kexenõ ã fichipaikerana.

¹⁴ Akka ã mia yõkaxoma nonoxõ ea kexenõ, ã nētefapaima. Nāskakē, “Na ea Onĩsimõ ana nĩchixõfe,” ã mia faima. Nāskakē na Onĩsimõ mĩ efeta yonomapaiĩ ã kexenõ mĩ yoitiro.

¹⁵ Õitsai, Niospa anori fichipaiyaino askayameaki nāskax ana mĩ yonomati keskara ikima Nios chanĩmara faax. Mĩ yonomatifiax mikiki onekeratikĩ afetiama. Ana iskaratĩa mia ano kaax, chaka ikima mefe rafesharakõi kiki. Ana mikikinoax faki kanakama.

¹⁶ Ana mĩ yonomati keskarama. Iskaratĩa mã Jesús Ifofaa. Nāskax oa mefe nanea keskara mã Jesús Ifofaax. Nāskai ã ão noiai keskafakĩ, mĩ ão noifinakõitiro. Iskaratĩa ana oa mĩ yonomati keskarama. Mã isharakõia oa mĩ exto keskara, ana oa yora fetsa keskarama.

¹⁷ Nāskakē mĩ oa efe nanea keskaraxõ mĩ efeta Jesús Ifofai, ã mikiki nokoaino mĩ ekeki inimayanã mĩ ea ifitiro keskafakĩ, na Onĩsimõki inimayanã ifisharakõife.

¹⁸ Akka mia chakafateratimãkĩ, askayamãkĩ mia nimiferatimãkĩ ea yoife ã mia kopifanõ.

¹⁹ Nãnori ã mia yoi mia kirika kenexõ fomayana. A Onĩsimõ mia nimia ã mia kopifanõ ea chanĩmara fafe. Efe yorashta, mĩ ea nimia shinãfe. Mĩ ea kori nimiyamafekē ã mia Jesús meka yoiyamano mĩ Jesús Ifofakeranama afe nĩpaxakĩ.

²⁰ Efe yorashta, ã mia yoi nõko Ifoõxõ ea Onĩsimõ shara faxõfe. Ëfe õiti inimamasharakõife.

²¹ Mē tãpia a ã mia yoiai anori mĩ ea nikasharakõi. Askatari a ã mia kirika kenexona õiki a finõmainifõfã mĩ ea axoshari.

²² Ë mia ana fetsari yoi. Mĩ ea Epa Nios kĩfixotitaifanõ. Mĩ askafaino ea karaxa mēranao kãimanafono ã mikiki samama nokotiro. Nāskakē ea mĩ pexe kene ano mĩ ea itipinĩ faxotiro, Niospa ea kãimanano ã ano oxaxinõ.

Mã Pablo mekai xatekĩ ato meka shara fomani

²³ Na Ipafras Cristo Jesúsnoa yoimis a yafi ea karaxa mēra ikimatifo, aatori mia yoisharani.

²⁴ A efeta Jesucristo yoimis, fetsafori Marcos ikaino, Aristaroco ikaino, Demãs ikaino, Lucas ikaino, nã tiito mia yoisharakõikani mikiki inimakãkĩ.

²⁵ Nõko Ifo Jesucristo mato noikĩ mato kexesharakõipainõra. Nã tii ã mato yoi.

Ēkĭa Pablo.

Jesúsnoa Yoikĩ Fêtsa Hebreofo Kirika Kenexõ Fomani

Jesús áfe Apaõxõ yoini. Nãskakê nõ tâpitiro afe keskaramãki

¹ Efe yora mĩshtichi, ê mato kirika kenexõ fomai mã tâpinõ Jesúsnoa. Taeyoi Epa Niospa áfe meka nõko xinifo israelifo yoipaoni mēxotaima. Áfe ájirifõnoa ato yoipaoni. Askatari áfe namapa ato yoipaoni. Askatari áfe meka yoimisfoxõ ato yoipaoni.

² Akka iskaratĩa noko yoia áfe Fakeoxõ. Nãskakê nõ tâpitiro Nios afe keskaramãki. Áfe Fakeoxõ keyokõĩ nai mēranoafoya mai anoafoyari onifani. Nãskafata áfe Fake katonĩ nai mēranoafoya mai anoafoyari nõko xanĩfo finakõia inõ.

³ Nãfi sharafinakõiaiki Apa Nios keskarakõĩ. Apa Nios afe keskaramãki noko õimani. Nãato keyokõĩ kexesharamis áfe mekasharaõxõ. Askatari nokoõnoax nani nõko chaka noko soaxoxiki a keskara shara noko õi. Nãskakê nõko chaka anã shinãima. Nãskata mã otoax nai mēra kani Apa fe xanĩfokõĩ ixiki.

Niospa áfe ájirifo Jesús ato finõkõia

⁴ Nãskakê nõ tâpitiro Niospa Fãke ájirifo ato finõkõia. Nãskax Niospa Fake xanĩfokõĩ Jesús.

⁵ Akka Niospakai áfe ájirifo yoikĩ iskafamisma:

Mãfi êfe Fakekõĩfokĩ. Ê mãto Epaki,

ato famisma. Akka áfe Fake fisti yoikĩ iskafani:

Mĩ êfe Fakekõĩ. Nãskakê mã fisti ato xanĩfo finakõia ipanakaki,

ixõ yoini.

⁶ Nãskaxõ áfe Fakekõĩ mai ano nĩchini. Nãskata áfe ájirifo yoini iskafakĩ:

Keyokõichi êfe Fake noikõikãfe. "Mĩ fãsi sharakõĩ,"

ixõ yoikãfe.

⁷ Nãskata áfe ájirifoõnoa yoikĩ iskafani:

Êfe ájirifo oa nefe koshi katiro keskara ê fai, êfe meka yoinõfo. Nãfori oa chii soisai keskarafo. Nãskakê nã ê ato yoiaĩ keskafakĩ afara arisafatirofo,

ixõ Niospa yoini.

⁸ Akka afianã áfe Fakeõnoa yoikĩ iskafani:

Mĩ ea keskari. Mĩri mã Nioskõĩ. Mĩ ato xanĩfokõĩ ipanaka. Mĩ keyokõĩ ikikõisharapakenaka.

⁹ Mĩ afara sharafo noikõimis, nã afara chakafo noikaspayanã. Nãskakê ê mia katonĩ mã ato xanĩfo inõ. Akka ájirifo ê ato inimamai. Akka ê mia inimamakõĩ,

ixõ yoini.

¹⁰ Askata anã yoini,

Mĩri ea keskarakõĩ. Mĩ ato xanĩfokõĩ. Afaa oniyamatai mai yafi nai mã onifakĩ taefani.

¹¹ Nãskakê nãfo keyokõĩ mitokomexii. Akka mã fisti keyonakama. Nã rapati mã

chapoax keyotiro keskai mai fe nai keyoxii.

¹² Rapati chapokê potatirofo fetsa fena shara fixikakĩ. Nãskarifiakĩ mai fe nai anã

sharakẽma mã anã mai yafi nai pãofakĩ keyotiro. Anã fenashara faxiki fenashara inõfo.

Akka mã fetsatiroma. Mĩ fisti ipanaka,

ixõ Epa Niospa áfe Fake yoini.

¹³ Niospakai áfe ájirifo yoikĩ iskafamisma:

Mã efe xanĩfo ikikai efe ketaxamei. Tsaokãfe,

ixokai yoimisma. Akka áfe Fake fisti yoini iskafakĩ:

Mĩ efe xanĩfokõĩ ikano nã mia noikaspaiãfe anã mia afeska fatirofoma mĩmãĩ keyokõĩ

ato ikikê. Nã mia noikaspaiãfo mã ato ikixii, ê mia askafaino mã efe xanĩfokõĩ ixii,

ixõ yoini.

¹⁴ Akka Epa Niospa áfe ájirifo yoini noko kexesharanõfo. Fatorafãferi Jesús Ifofaafomãkĩ afe ipaxakakĩ. Nãskakê Niospa áfe ájirifo yoini a Ifofaafõ kexesharanõfo.

Nãskakê nõ tâpia ájirifo Jesús finõkõia.

2

Jesús nokoõnoax nanixakĩ noko imapakenakakĩ. Nãskakê kachikiri fayamakãfe

¹ Akka Cristo ájirifo finõkõia. Nãskakê nã meka chanĩmakõĩ Niospa Fakeõnoa nõ nikasharakõitiro, na meka shara kachikiri fayamaxiki.

² Niospa áfe ájirifo nĩchini áfe meka yorafo yoitanõfo nõko xinifãfe nikasharanõfo. Akka nikasharayamaifono Niospa ato omiskõimani.

³ Akka taefakī Jesūs yoiyoni nokoōnoax chipo naxiai, nōko chaka noko soaxoxiki nō afe ipaxanō. Nānori ato yoiato nikakaxō a afe rafemisfāfe noko yoinifo. Akka nō Jesūs Ifofaino, Niospa noko ifitiro. Akka nō nikayamaino Niospa noko ifitiro.

⁴ Askatari Niospa afara fetsa fetsatapafō tsōa atiroma keskara ato ispapaoni aōxō tāpinōfo āfe meka chanīmākōikē. Askatari āfe Yōshi Shara ato mēra naneni ato katōxō nāfāfe yonokī fetsa fetsafakī yonoxonōfo. Nāskakē nō Niospa meka chanīmara fai.

Jesucristo nono mai anoax yorakōi ikiyoi oni, feronāfakekōi askaftax Nioskōi

⁵ Akka Niospa āfe ājirifo yoikī iskafanima: “Na mai fena anoax mā xanīfo ixii,” ixō yoinima. (Nāskakē nō Jesūsnoa nō shināmakitiroma nāmāi xanīfofinakōikē.)

⁶ Akka na kirika kenekī David yoikī iskafani Niospa shināmanaino:

Epa Niosi, keyokōi mī onifani. Akka nōkai afama. Nāskafekē mī noko noiyānā mī noko shināmis, noko kexesharayanā.

⁷⁻⁸ Akka mī ājirifāfe noko finōyonifo. Nāskafiano nono mai anoax mī noko xanīfo ima. Nāskakē nā mī onifanifāfe noko nikakōitirofo mīmāi noko xanīfo imasharakē, ixō keneni. Akka keyokōi nā Niospa onifanifo nō āto xanīfo itiro. Tsoa fetsakai xanīfo itiro. Askafiano keyokōichi noko nikakanima.

⁹ Akka mā nō tāpia Niospa noko noikī nono mai anoax Jesūs nīchini yorakōi inō. Nāskakē āfe ājirifāfe Jesūs finōyonifo. Akka mā nokoōnoax nai omiskōixō noko chaka soaxokē. Epa Niospa xanīfo finakōi imani, nāskaramāi Niospa fīchīpaikī keyokōi noko noikī.

¹⁰ Epa Niospa keyokōi onifani aōnoax keyokōi inōfo. Nāskakē āfe fakefo afe isharpake-nakafa. Nāskaxō āfe Fake Jesūs nīchini nokoōnoax omiskōiyonō nō afe ipaxanō. Āfe Fake fisti nokoōnoax omiskōitiro nōko chaka noko soaxoxiki. Nāato Apa Nios ika ari noko iyoano nō afe ipaxatiro.

¹¹ Akka Jesūs āfe Apa Nios nāri nōko Epa. Nāskaxō noko chaka soaxona nō a keskara shara inō. Nāskaxō rāfikima noko yoikī iskafatiro: “Nafo ēfe fakefo,” ixō noko yoitiro.

¹² Nā chanīmara faafoōnoa Jesūs Apa Nios yoikī iskafani:

Epa Niosi, mīōnoa efe yorafa ē yoisharaxii. Nāskakē ato fe mīōnoax ē fanāixii, ixō yoini.

¹³ Nāskaxō anā yoikī iskafani:

Epa Niosi, ē mia chanīmara faaki, ixō yoini. Nāskafata anā yoikī iskafani:

Epa Niosi, nā ea chanīmara faafo mā mī ea inā ēfe fakefo inōfo, ixō Jesūs Apa Nios yoini. Nāskarākōi keneni David.

¹⁴ Nā fakefo apa fistichi ato fake fafiano nā yora fistiyata nā imi fistiya ikafo tsoa osiama. Nāskarīfiai Jesūsri noko keskara yorakōi ipaoni. Yorakōi kānixakī noko nāxonī Satanās yōshi chaka nōko ifo iyamanō anā noko namapakenōma. Nokoōnoax Jesūs naitīa Satanās āfe kerox xateni anā noko afesa faxima.

¹⁵ Akka Jesūs nokoōnoax nayoamano yorafa nō naira ikax ratekōipaonifo. Askafiano mā nokoōnoax Jesūs naxō noko chaka soaxona afe ipaxanōfo. Nāskakē napai nō anā ratetiroma.

¹⁶ Akka mā nō tāpia Jesūsikai onima āfe ājirifo afara ato axoyoi. Askatamaroko Abraham āfe fenafo nā chanīmara faafo, Abraham chanīmara fapaoni keskafakī chanīmara faifono ato afara axosharayoi oni.

¹⁷ Akka Jesūs noko keskara yorakōi ini. Nāskakē nā nō meemis keskarari arifi meeapaoni. Yorafāfe noikaspafono meeapaoni paekōi. Askatari mekafaifono, askatari chakafama-paiyaifono, meeapaoni paekōi. Nāskakē nokoōnoa shināi. Noko potaxikima. Nāskakē Epa Nios noko kīfixomis noko imasharanō. Akka nā Jesūs nokoōnoax nani nōko chaka noko soaxoxiki. Nāskakē noko Apa Nios kīfixotiro iskafakī: “Epa Niosi, ē ato nāxonikī ato chaka soaxōfe nā ea chanīmara faifo,” ixō Apa yoitiro. Nāskaxō noko Epa Nios kīfixomis xanīfokōi itiro.

¹⁸ Satanās Jesūs chakafamapaini. Akka Jesūs omiskōifikī afaa chakafanima. Nāskakē nokori Satanās afara chakafamapaiyato Jesūs noko axosharatiro nō afaa chakafayamanō.

3

Jesús Moisés finōkōia

¹ Efe yora mīstichi, Epa Niospa mato katoni āfe Fakekōifo mā inō, nāskaxri mā afe xanīfo inō. Niospa Jesūs nīchini nokoōnoax nanō. Akka nāatori Apa Nios noko kīfixomis. Akka a ato Nios kīfixomisfo Jesūs ato finōkōia. Nāskakē Jesūs shināsharakōikāfe.

² Akka a Niospa Jesūs yoini keskara, nāskara asharakōini. Nāskatari Niospa Moisés katoni israelifo Egipto mai anoax ato ifinō, askatari āfe meka shara ato yoinō. Nā Niospa yoini keskarari Moisés asharakōini.

³ Akka Moisésnoa yoisharafitirofono, askatamaroko Jesúsnoa yoisharakōitirofo. Nā pexe sharaōnoa yoisharatirofono, askatamaroko nā pexe famisnoa yoisharakōitirofo. Nāskarifiakī Moisésnoa yoisharafitirofono akka Jesúsnoaroko yoikī finasharakōitirofo.

⁴ Āa pexe itiroma. Akka nā pexe famisto atiro pexesharafakī. Nāskarifiakī Epa Niospa keyokōi onifani.

⁵ Akka Moisés Epa Niospa āfe yonomati ini. Niospa yoini keskafakī, nāskarakōi ani. Āfe kaifo israelifo ato yoipaoni Niospa meka. Askatari ato kexesharapaoni. Askatari Egipto anoa ato ifixō ato iyonī. Nā Moisés apaoni keskafakī ōikī keyokōichi tāpikōitirofo Epa Niospa āfe Fake nīchiai afe yorafo ichapakōi ifinō nai mēra afe ipaxanōfo.

⁶ Akka Jesúskaī Epa Niospa āfe yonomatima. Āfe Fakekōi. Nāskakē afe yorafāfe āto Ifokōi. Akka tsoamāki afe yorafo ē mato yoinō. Nō Jesús Ifofaxō a noko yoiyoni keskafakī nō manasharai nā anā oaitīa, nō kachikiri fayamax nō afe yorakōi nō iki.

Niospa fakefo aōnoax inimakōitirofo anā āto ōiti fekaxtenōma

⁷⁻⁸ Akka Niospa Yōshi Sharapa yoikī iskafani:

Epa Niospa mato yoiai keskafakī nikasharakāfe. Māto ōiti kerexfayamakāfe Niospa meka nikakaspakī. Māto xinifo keskara iyamakāfe. Māto xinifo ē ifini Egipto anoa. Ē ato ififinino tsōa istoma anoxō ea nikasharanifoma. Askakimaroko Jesús mato yoiai keskara nikasharakōikāfe.

⁹ Nā tsōa istoma anoxō māto xinifāfe ea nikakaspapaonifo nā tsōa ōiyomisma ēfe yonoshara ē ato ispafiaino. Ano afaamano a piaifo ē ato ināpaoni. Askatari ano fakamano, ē ato ināpaoni. Ē ato xinia ranā askafafiaino ea nikakaspapaonifo.

¹⁰ Nāskakē ē atoki ōitifishkini. Nāskakē ē yoini iskafakī: “Ea nikatamaroko āto ōiti mēraxō afara chaka shināmisfo. A ē ato shināmapaiyai keskarakai tsōa nikafoma.”

¹¹ Nāskakē ē atoki ōitifishkikī ē atoōnoa yoini iskafakī: “Na israelifāfe ea nikakaspakani. Nāskakē a ē ato inimamapaiyai keskafakī ē ato axopakenakama,” ixō Epa Niospa nōko xinifoōnoa yoini.

¹² Efe yora mīshtichi, ōisharakāfe. Nōko xinifo keskara iyamakāfe. Māto shinā mēraxō mā Jesús chanīmara fayamax chakakōi mā itiro. Mā askaikai nā Nios nīpanakāfe mā ipanakama.

¹³ Askatamaroko pena tii yoinōnāsharakī inimama faatanākāfe nōko Ifoxō shināsharakōixikakī. Afara chakafāfe noko pāratirofoki nō chakafanō. Akka nō nikaxō nō anā shināsharatiroma. Nōko ōiti chakakōi itiro. Nāskakē ato nikayamakāfe.

¹⁴ Akka nō taefakī Jesús chanīmara fakōini keskafakī eneyamax nō afe ipaxatiro.

¹⁵ Akka nā kirika keneano iskakī ē mato yoinō,

Epa Niospa mato yoiai keskara fisti nikasharafafāikāfe. Māto xinifāfe Epa Nios nikakaspakakī āto ōiti kerexkōi fapaonifo. Nāskakē ato keskara iyamakāfe. Māto ōiti kerex fayamakāfe. Nāskax nikayospa iyamakāfe, ixō Niospa meka yoikī kenenifo.

¹⁶ Akka, ġtsoafo Niospa tsekanimē Egipto mai anoa āfe meka nikakaspakakī kachikiri faifono? Akka keyokōi nōko xinifo Moisés Egipto mai anoa iyonī. Nāfāfe Nios nikakaspapaonifo.

¹⁷ Akka, ġtsoafoki Epa Nios ōitifishkinimē cuarenta xinia mā akax? Nā nikakaspayanā afara chakafaiifoki ini. Nāskakē Epa Niospa tsōa istoma anoxō keyokōi ato namapakeni.

¹⁸ Akka, ġtsoafo Niospa yoinimē iskafakī? “A ē mato inimamapaiyai keskafakī ē anā askafapanakama,” ixō yoini. Akka nā nikayospafo ato yoikī askafani.

¹⁹ Akka Epa Nioskai tsōa chanīmara fanima. Nāskakanax a Niospa ato imapaiyai ano tsoa ikinima. Nāskakē tsōa anoxō tenenima inimayanā.

4

¹ Akka Epa Niospa noko yoiyoni iskafakī: “Mā ea Ifofaino ē mato anā inimamatiro. Akka mā ea Ifofayamakē ē mato inimamatiroma,” ixō noko yoiniki. Nāskakē keyokōichi nō Ifofanōkāfe.

² Epa Niospa noko yoia: “Ē mato ifipai,” noko fani. Nāskarifikī Epa Niospa nōko xinifo yoikī iskafani: “Ē mato ifipai mato inimamapaiixikī anā mā fekaxtenōma,” ixō ato yoini. Ato askafafiaino tsōakai nikasharanima. Kaxpakōi Epa Niospa ato yoini.

³ Akka Niospa Moisés shināmanaino iskafakī kirikaki kenekī yoini:

Ea nikayamaifono ē atoki ōitifishkikī. Nāskakē ē ato fāsikōi yoia iskafakī: “Mā ea nikayamaino ē mato mai shara fetsa ano imapakenakama anox mā isharanō,” ixō ato yoini. Akka Epa Niospa keyokōi onifani. Mā keyokōi askafakī fetsaxō teneni. Nāskafakīri Niospa fichipai afe yorafo isharanōfo anā fekaxteyamanōfo. Iskaratīari afe yorafo isharamapai afe isharamapaxanōfo. Akka nōa nō Nios chanīmara faino, Epa Niospa noko ifisharai nō inimapakexanōfo.

⁴ Akka kirikaki Moisés keneni pena tenetiōnoa yoikī. Iskafakī keneni:

Seis nia yonokī Epa Niospa keyokōi onifani. Nāskaxō pena fisti teneni, ixō keneni.

⁵ Askatari anā kirikaki keneni, iskafakī yoikī:

Efe isharapakenakafoma, ixō kirikaki kenekī yoini.

⁶ Askafiano ranāri afe isharapakenakafo. Akka nā Niospa meka nikakaspaifo afe ipanakafoma.

⁷ Nāskakē Niospa shināmanainori chipo David kirika kenekī yoini iskafakī:

Iskaratīa Niospa meka nikakī mato shināmā shināsharakāfe. Anorima shinākakima, ixō David yoini.

⁸ Mā Moisés naano, Josué israelifo iyoni Canaán mai ano isharanōfo. Nāskaifono Niospa iskafakī yoini: “Nā ea Ifofaafa efe nai mēra isharapakenakafo,” ixō yoini.

⁹ Nāskakē mā nō tāpia nō Ifofaax, nō afe isharapakenaka. Epa Niospa afe yorafo inimamasharapai isharapakexanōfo.

¹⁰ Epa Niospa keyokōi onifaxō inimayanā teneni. Nāskarifiiai nō Epa Nios ano kaax a nō iyopaoni keskara nō anā itiroma, Niospa noko inimamasharakōiaino.

¹¹ Akka fekaxfiano nō Nios Ifofakōitiro afe isharapakexakī. Akka nōko xinifāfe nikayamaito Epa Niospa ato mai shara ināpaifikī ato inānima. Nāskakē nōri ato keskara ipaima.

¹² Epa Nios nipanaka. Nāskarifiiai āfe meka keyonakama, mitsisipakōi. Akka keno ikikōichi nami potexō āfe xaki mēra nō ōitiro. Nāskarifiiai Epa Niospa meka fāsi finakōia. Āfe meka shara nō mēra ikano aōxō nō tāpitiro nō shara ikamāki askayamai nō chakamāki.

¹³ Epa Niospa keyokōi tāpia nō ōtatiroma. A nō afara shināxō nō amis keskara keyokōi tāpikōia. Akka nōri tāpia a nō amis keskara. Nāskakē nō Nios pāratiroma.

A Nios ato kīfixomisfo Jesús ato finōkōia

¹⁴ Akka Jesúsfi Niospa Fakekī. Askatari noko Nios kīfixomis. Nāatofi a Nios ato kīfixomisfo finōkōiaki. Nāskax nai mēra Nios ano kani. Nāskakē nō kachikiri fatiroma nikakōisharayanā.

¹⁵ Nāatori meemis a Satanás noko afara chakafamapaiyai keskara. Nāskakē nāato tāpia a nō meemis keskara fekaxkōi. Akka Satanás Jesúsri afara chakafamapaini. Nāskafekē Jesús nikanima. Nāskakē nokori axotiro.

¹⁶ Nāskakē nō Nioski ranokima nā nō yoipaiyai keskara nō yoitiro. Nō yoiaito Niospa noko noikī noko afara axosharatiro.

5

¹ Ē mato yoinō afeskax ato Nios kīfixomis xanīfo itirofomāki. Nā Niospa ato katoato nāato noko kīfixonō. Nā Niospa katoa noko keskara yorari itiro. Nāfi Nios noko kīfixomis xanīfo itiro. Nāskakē yorafāfe Epa Nios aicho fakakī a Nios ato kīfixomisto āfe xanīfo afara ināmis atori Nios inānō. Askatari yorafāfe āto chaka soapiakakī nā yoinā ina fexomisfo retexō ato koofaxonō Epa Niospa āto chaka ato soaxonō.

² Akka nāri noko keskarari nāatori afara chakafatiro. Nāskakē tsōa tāpisharayamakī, shināsharakima afara chakafaino, nā xanīfāfe tanaima isharaxō ato axosharatiro.

³ Nāskaxō yorafāfe nā yoinā inafō ināino nāato retexō koofakī Epa Nios ato kīfixomis Epa Niospa āto chaka ato soaxonō. Nāskatari āri āfe yoinā ina retexō koofamis ari Epa Niospa chaka soaxonō, a noko axomis keskafakī.

⁴ Akka ākai toa katometiroma Nios ato kīfixomis xanīfo ixii. Nios fistichi ato katotiro Aarón ani keskafakī.

⁵ Nāskarifiiai Cristo aari katomenima Nios ato kīfixomis xanīfokōi ixiki. Akka Apa Nios fistichi yoini iskafakī:

Mī ēfe Fakekōi. Nāskakē mī fisti āto xanīfo finakōia ipanakaki, ixō yoini.

⁶ Askatari anā iskafakī yoini:

Mīfi ato Nios kīfixomis xanīfo ipanakaki, nā xanīfo Melquisedec ipaoni keskara, ixō Apa yoini.

⁷ Jesús nono mai ano ikax, mā chaima naxiki omiskōikōini. Nāskaxō fāsikōi mekayanā oiayanā Apa kīfini iskafakī: “Epa, mī keyokōi tāpia. Ea mia ifpaiikī ea mia iftiro ē nanōma,” ixō yoini. Mēxotaima nā Āpa amapaiyai keskara fisti shināki Jesús āfe Apa nikakōini. Nāskakē āfe Āpa tenemakōini axosharakōiyanā omiskōiaino.

⁸ Akka Jesús Niospa Fakekōifiax omiskōini. Omiskōifikī Apa nikakōini.

⁹ Nokoōnoax omiskōifikī Apa Niospa yoiāi keskara nikakōini. Nāskaxō a nikaifo ato ifpakexakī. Nāskax noko ifimis sharakōi imis.

¹⁰ Epa Niospa āfe Fake Jesús katoxō yoikī iskafani: “Mīfi nā Melquisedec keskara ikikai. Nāskakē a ea ato kīfixomisfāfe āto xanīfokōi mī ipanakaki ato ikipakexakī. Nāskaxō a eōnoa ato kīfixomisfo xanīfofori mī ato finōkōinīfōfānakī,” ixō Āpa yoini.

Ōisharakōikāfe. Mā Jesús kachikiri faa fāsi mesekōi itiroki

¹¹ Ē mato yoia Epa Niospa Jesús katoa a noko Nios kīfixomis afe xanīfo finakōia ixii. Akka nāōnoa ē mato fetsa yoisharapai. Nāskakē ē mato anā yoisharatiroma māmāi fenāmāshta tāpiaino.

¹²⁻¹³ Akka mā Niospa meka nikakī mā mā xinia ranā aka. Nāskakē tāpikōixō mā ato yoikerana. Akka mākai tāpisharama. Akka a mā taefakī Niosnoa mā ato yoiyoni mā mā shināmakia. Nāskakē mato anā tāpimanōfo mā ato fenai. Nā fake yome chocho afiai yosiaina keskarakōifo, mā. Akka fake yomēkai afaa piyotiroma. Nāskarifiakī māri Niospa meka tāpisharaima. Nāskakē mā tāpiama fato sharamākī fatofori chakamakī.

¹⁴ Akka nō pena tui Niospa meka ōifafāikī nō tāpikōiax isharakōitiro māmāi nō tāpiax fato sharamākī, fatofori chakamakī.

6

¹ Akka nōkai fakefo keskarama. Fakefāfekai afaa tāpisharafoma. Akka nōroko tāpisharakōia. Akka fetsa ē mato yoipai a ē mato yoiyomis keskara anā ē mato yoima. Mā nō tāpia a nō afara chakafamis. Nāskakē nō rāfikōiyānā nōko chaka shināmakitiro. Nāskaxō nō Nios Ifofaino noko chaka soaxotiro nō afe ipaxanō.

² Mā nō tāpia noko fētsa maotisafaino keyokōi tāpitirofo mā nōmāi Nios Ifofaino. Askatari nō tāpia noko Nios Kīfixoyanā āto mifi noko māmātirofo Niospa Yōshi Sharapa noko imasharanō. Nāskatari mā nō tāpia nō Jesús Ifofaax nō naax nō anā otoiāi. Akka a Jesús nikakaspamisfo Niospa a omiskōipakenakafo mēra ato potaxii. Nāskakē nāfo mā nō tāpikōia.

³ Nāskakē a Niospa fichipaiyaino afara fetsafori nō tāpitiro.

⁴ Nāskakē nō Jesucristoōnoa meka shara nikaxō chanīmara faax mā naax Nios fe nō ipaxatiro. Nāskatari Niospa Yōshi Shara noko fe iki.

⁵ Nāskakē nō Niospa meka tāpisharakōiaino a Niospa afara shara noko yoiai nō atiro. Askatari Niospa afara sharafo noko famapai afara sharafo nō atiro, āfe Yōshi Sharaōxō.

⁶ Nāskakē keyokōi nō afo tāpifixō nō Niospa Fake kachikiri faxō chakafakī mekafaxō, nō anā Ifofatiroma mā nōmāi chakafaxō a noko Ifimis. Anā tsōa noko ifitiroma.

⁷ Akka ē mato yoinō nikakapo. Oi ikaino mai mehanatiro. Nāskakē tare anoax fanafo foaisharatiro. Nāskakē a tare yonomisfo inimatirofo fanafo foaisharaino Niospamāi imasharaino.

⁸ Akka nā tare fetsa chaka anori oi ikaino, fanasharafo foaitiroma. Moxa chakafo fisti foaitiro. Nāskakē koofatirofo nā fanachakafo kooi mitokomenō. Nāskarifiakī fētsa Niospa meka shara nikafafāifiki Nios chakafakī mekafaito nā keskarafo Niospa nā omiskōipakenakafo mēra potaxii. Nō tare shara keskarakē Epa Nios nokoki inimatiro. Akka nō tare chaka keskarakē Epa Nios nokoki inimatiro. Nāskakē noko omiskōimaxii.

Akka mā nō tāpia nō Jesús chanīmara faax nō isharakōitiro

⁹ Efe yora mīshtichi, mē matoōnoa tāpisharakōia. Mākai ato keskarama. Akka Jesús Ifofaax oa mā fāi kai keskara mā Nios ari kai.

¹⁰ Akka Epa Nios sharakōi. Afaa chaka shināmisma. A mā sharafamis Epa Niospa tāpia, shināmakima. Askatari mā Nios noikī a chanīmara famisfo mā ato axosharamis. Nāskakē Epa Nios shināmakima.

¹¹ Akka Epa Nios kachikiri faxoma a mā akai keskaranifakī, ato sharafakī mēxotaima Ifofasharakōikāfe, “Nioski nokoaitia nō afe isharapakexakī,” shinānkōikī.

¹² Akka Epa Niospa meka shināmakiyamakāfe. Epa Niospa fetsafo yoini iskafakī: “Mā ea Ifofakī mā ea manasharaito ē mato afara shara ināxii,” ixō ato yoini. Nāskarifiakī māri manasharakāfe, Jesús kachikiri faxoma. Māri afara shara fixikakī.

¹³⁻¹⁴ Niospa nōko xini Abraham yoiyoni iskafaki: “Ēkīa mī Nios. Ea tsōa finōtiroma. Ramashara ē chanīmisma. Ē mia yoinō mī tāpisharakōinō. Ē mia axosharakōikai mī fenafo ichapakōi inōfo. Akka mīkai ato tanātiroma mī fenafo māmāi ichapakōikē,” ixō Niospa Abraham yoiyoni.

¹⁵ Nāskakē Abraham fena fenakima manakōipaoni. Nā Niospa yoiyoni keskarakōi fakī Abraham āfinī fake fini. Āfe fake Isaaca.

¹⁶ Akka fētsa noko yoikī iskafatiro: “Ē mia pāraima ēfe xanīfāfe mā ea ōi. Nāskakē nā ē mia yoiai keskara ē mia axoxii,” ixō noko yoitiro. Nāskakē nō tāpitiro nokokairoko pāraitō.

¹⁷ Nāskarifiakī Niospa noko tāpimapai āfe meka chanīmakōi. A noko yoiyoni keskara afeskaxō anā fetsafatiroma. Nāskaxō ato yoini iskafakī: “Ē Nioskōi. Tsōakai ea finōtiroma. Nāskakē nā ē mato yoiāi keskafakī mā ea chanīmara fatiro,” ixō ato yoini chanīmara fanōfo.

¹⁸ Chanīma Niospa a noko yoiyoni keskara mā noko ōimasharakōia mā nō tāpia. Nāskakē noko pāratiroma. Noko yoini iskafakī: “Ēfe Fake ē matoki nīchixii māto chaka mato soaxonō mā efe ipaxanō,” ixō noko yoini. Nāskakē nō chanīmara fai nā noko yoiyoni keskara āfe Fakeōnoax Epa Nios ano nō afe ipaxatiro.

¹⁹ Nāskaxō anā afaa fetsa nō shinātiroma. Nios makinoakai tsōa noko potatiroma. Nāskakē Epa Nios fe nō ipanaka.

²⁰ Jesús nai mēra kani nō aōnoax chipo kanō. Nārixō xanīfokōixō noko Apa Nios kīfixōfafāini Melquisedec ipaoni keskaraxō.

7

Nā Melquisedec yorafo Nios kīfixomis ipaoni

¹ Akka Melquisedecnoa ē mato yoinō afe keskara ipaonimāki. Melquisedec xanīfo ipaoni pexe rasi āfe ane Salem anoax. Askatari ato Nios kīfixomis ipaoni. Nā cuatro xanīfofo yometso chakafo ato īchoxō Abraham āfe pia ifitani, afama mīshtifoya oaino, nā Melquisedec Abrahamki nokoni. Nāskata Melquisedec Abraham Nios kīfixoni axosharanō.

² Askafaito ōikī Abraham Melquisedec nā afama mīshti fitanai ranāri ināni. Nā Melquisedec āfe ane “Asharakōimis,” famisfo. Nā Salem pexe rasi anoax xanīfo ipaoni. Nā Salem āfe ane “Isharakōi,” fapaonifo.

³ Nā Melquisedec āfe epa yafi āfe efa nō tāpīama. Āfe xiniforikai nō tāpīama. Askatari nō tāpīama a fake kāinitia. A nanitīari nō tāpīama. Nāskakē nō Melquisedec shinākī Niospa Fakeri nō shinātiro. Nāato noko Niosnoa kīfixomis xanīfo ipanaka.

⁴ Efe yora mīshtichi, shinākapo. Melquisedec xanīfokōi ipaoni toa keskarama. Akka Abraham israelifāfe taefenai āto xini iyopaoni. Abraham sharakōi ipaoni. Askafixō Abraham Melquisedec afama mīshti ināni āfe afaayamafekē. Akka Melquisedec xanīfo finakōia ini Abraham sharafiano.

⁵ Israeli xoko fetsafo Levī āfe fenafo Epa Niospa katonī. Nāfāfe āto kaifo Epa Nios kīfixopaonifo. Nāskakē Moisés yoini keskafakī nā ato Nios kīfixomisfo kori fisti rasi ato ināpaonifo. Askatari āto afama mīshtifori ato inānifo āto kaifāfe.

⁶ Akka Melquisedec Levī āfe fenayamafiano Abraham āfe afama mīshtifo fetsa fetsatapafo ināni. Nāskakē Melquisedec Abraham yoini iskafakī: “Abraham, mia Niospa axosharai,” ixō yoini.

⁷ Chanīma, keyokōi nō tāpikōia fētsa ato finōkōixō āfe mekapa ato shara fatiro. Nāskakē nō tāpia Melquisedec Abraham finōkōia.

⁸ Nāskakē nā israeli xoko fetsafāfe nā Levī fenafo afama mīshti ato ināfinifono nāfo mā nai keyonifo. Akka Melquisedec Abrahamnā afama mīshti fini. Akka Niospa meka yoikī kenenifo Melquisedec iskaratīa nia keskara.

⁹⁻¹⁰ Levī fenafāfe āto xini Abraham ipaoni. Nāskaxō Abraham Melquisedec afarafo ināino Levīfāfe akairi ināi keskafanifo. Nō tāpīama afetiara nani. Nāskakē nia keskara nō famis. Nā Abraham Melquisedec afarafo ināitīa Abraham āfe fena Levī anokai fakeama ini. Chipō Levī fakeni. Nāskakē nō tāpitiro Melquisedec fistichi āto xini Abraham yafi ato finōkōia.

¹¹ Efe yora mīshtichi, shinākapo. Epa Niosxō Moisés noko yoini keskafakī Levī fenafāfe noko Nios kīfixomisfāfe noko ifitirofono Niospa āfe Fake nīchikeranima Apa Nios noko kīfixomis inō. Cristofai Levī āfe fena Aarón keskarama. Nā Cristo Melquisedec keskarakōi.

¹²⁻¹⁴ Akka tae fena Levī āfe fena Aarón ini. Nā Aarón yorafo ato Nios kīfixomis ini fetsafāfe āto xanīfo. Akka nōko Ifo Jesúska Levī āfe fenama, xoko fetsa ini. Nāskax Aarón keskarama. Akka nōko Ifo Jesús Judapa fena. Nā Levīpa chipoko Judā. Akka, “Judapa yorafāfe yorafo ato Nios kīfixomisfo itirofora,” ixō Moisés yoinima. Askafiano Niospa āfe Fake Jesús nīchini yorafo ato Nios kīfixomis inō. Nāskatari a Moisés yoini keskara Epa Niospa fetsafani.

¹⁵ Nāskakē anā ē mato mēstekōi yoisharapai. Iskaratīa xafakīakōi nō tāpishara Nios afara fetsa yoini keskara noko Nios kīfixomis āfe fena Jesús, Melquisedec keskara nokoki nokoni.

¹⁶ Akka Moisés yoini keskarakōi Levī āfe fenafo fisti ato Nios kīfixomisfo itirofoki. Jesúska Levī fenaxoma a Moisés yoini keskarāōnoax noko Nios kīfixomis itiroma. Askatamaroko Niospa Jesús katonī noko kīfixomis inō. Āfe sharaōxō Epa Niospa Jesús otofani. Anā nanakama. Nāskax noko Nios kīfixomis ipanaka Niospa sharaōxō.

¹⁷ Nānori Niospa yoiyoni David Jesucristoōnoa kenekī iskafani:

Mī Melquisedec keskara. Nāskaxō mī yorafo Nios kīfixomis ipanaka, ixō kenenī.

18-19 Nāskakē a Moisés yoini keskarakai nō anā ifofaima. Nokokai imasharatiroma. Askatari nōko chaka noko soaxomisma nō Nios fe Īpaxanō. Akka Jesús āfe meka askarama. Āfe meka sharafinakōia. Epa Niospa Fake nokoki nūchini aōnoax nō afe ipanaka.

20-21 Akka Epa Niospa āfe Fake yoini keskafakīkai Levī āfe fenafo anori yoinima. Niospa yora shināmanaino iskara kenenī, Niospa āfe Fake Jesús yoikī iskafani:

Na meka ē mia yoiai chanīmakōi. Nāskakē ē anā fetsapakenakama. Ē yorafāfe āto Ifokōi. Nāskakē a ē mia yoiai keskafakī yorafo mī ato ea kīfixomis ipanaka, ixō Epa Niospa āfe Fake yoini.

22 Akka Apa Niospa nānori yoinikē nō tāpitiro Jesúsnoax Nios fe nō ipaxatiro. Akka Moisés meka askarama. Aōnoax Niospa yorafo nō itiroma. Akka Epa Niospa Moisésxō Levī āfe fenafo yoini keskara sharafiano akka āfe Fake Jesús yoini keskara sharafinakōia.

23 Akka a āto kaifo ato Nios kīfixomisfo ichapafofiax afo natirofo. Tsoa nīpaxatirofoma. Mā fetsa nano fetsari katotirofo atori āfe yorafo Epa Nios kīfixomis inō.

24 Akka Jesúskaī ato keskarama. Nāfi nīpanakakī nāato noko Epa Nios mēxotaima kīfixomis ipanaka.

25 Nāskakē Apa Niosxō noko ifitiro nō afe ipaiyaito nokoōxō Apa Nios yoifafāini iskafakī: “Epa Niosī, ē ato nāxoniki, ato chaka soaxōfe. Nāskaxō a mī ika ano ato imafe,” ixō nokoōxō Apa yoimis. Nāskakē a nokoōnoa Apa yoia keskafakī noko nāskakōi faxoxii nō afe Īpaxanō. Nāskaxkai nō fenopakenakama.

26 Akka nā Jesúsfi noko Nios kīfixomis xanīfokōikī. Apa Nios keskara sharafinakōia. Fetsafo finōkōia. Tsōakai aōnoa afaa chaka yoitiroma. Aatokai afaa chaka shināmīma yora chakafo keskarama. Nāskaxō Apa Nios ika anoafori ato finōkōia. Nāskaxō a nō yopaifo noko axosharatiro.

27 Akka a ato Nios kīfixomis xanīfo fetsafo keskarafoma. Taefakī afāfe pena tii yoinā ina retepaonifo Epa Nios inākakī ato chaka soaxonō. Nāskakē Niospa mā ato chaka soaxonano yora fetsafāferi ato yoinā inafō inānifo, atori Epa Niospa chaka soaxonō. Akka Jesúskaī ato keskarama. Jesús ato finōkōia. Nāskakē Jesús nai fistini noko chaka soaxonano Epa Nios fe nō ipaxatiro.

28 Akka Epa Niosxō Moisés yoini keskafakī yorafoōnoa Epa Nios ato kīfixomisfo inōfo āto xanīfofo katonifo. Akka nāfofi noko keskarafori nāfāferi afara chakafamisfo. Nāskakē Niospa yoiyoni keskafakī āfe Fake Jesús chipo katoni nokoōxō Nios kīfixomis Īpaxanō. Aatokai afaa chakafamīma. Isharakōimīs.

8

Epa Niospa meka fenasharakōi yoini Jesús noko nāxonō nōko chaka noko soaxoxii

1-2 Akka nā sharafinakōia nō yoiai nāfi Apa Nios xanīfokōi ika ari afe ikaki. Nāskakē nō afara yoipaiyaito nokoōxō Apa yoipakenaka. Nāatofi noko Apa Nios kīfixomis xanīfokōikī. Nāskakē a ika arikai tsōa afaa fetsa onifanima. Akka Nios fistichi onifani. Nāskakē ariax Apa fe nokoōnoax mekakakāini. Nā ika ari nai mēra anoa a anoxō Nios kīfīti pexefā keskarakōifāx finakōia. Nāskakē nā ē mato kenexona keskara xafakakōi mā tāpitiro.

3 Nā ato Nios kīfixomis xanīfokōi inōfo Niospa ato katoni afarafo yorafāfe Nios inākata finōfo. Askatari yoinā inafō fixō retexaxō koofaxō ato kīfixonōfo āto chaka ato soaxonō Niospa ato katoni. Nāskakē nā Jesús, noko Nios kīfixomīsto, nāatori Nios ināni. Yoinā ina inānima. Askatamaroko āa noko nāxoni nōko chaka noko soaxoxiki. Āfe Āpa amapaiyai keskara ani.

4 Moisés yoini keskafakī Levī āfe fenafos israelifāfe ato Nios kīfixomis itirofo yoinā retexaxō ato Nios inānoxikakī Niospa ato chaka soaxonō. Akka Jesúskaī Levī āfe fenama. Nāskakē Jesús nono mai ano ixō nokoōxō Apa Nios kīfīmīs ikeranama. Akka nai mēra ixō noko kīfixomis, Niospa ato katoano.

5 Akka nono mai anoxō nā Levī fenafāfe a anoxō Nios kīfīti karapa pexe mēraxō yonopaonifo. Nānoxō āto kaifo israelifo tāpimapaikakī Nios ika ari afe keskarāmākī tāpinōfo. Askafīxō askarakōi tsōa tāpiyonima. Nāskakē Epa Niospa Moisés yoini iskafakī karapa pexe fayomanō: “Ē mia yoiai keskafakī a anoxō ea kīfīti karapa pexe fafe. ĶMā mī shināimē ē mia machi anoxō tāpimana keskara nāskakōi fafe karapa pexe fakī? Nāskakē a yonomīsfo tāpimafe nā ē mia yoiai keskarakōi fanōfo,” ixō Epa Niospa Moisés yoini.

6 Akka Niospa āfe Fake Jesús yoini keskarato a Moisés yoini keskara finōkōia. Nāskakē Jesús Apa ika arixō nokoōxō Apa Nios kīfīfāini. Akka Levī fenafāfekai askafapaonifoma. Epa Niospa āfe Fake Jesús yoiyoni keskarakōi ato yoimīma. Akka nā ato yoiyoni keskara sharafiano nā āfe Fake Jesús yoini keskararoko sharafinakōia.

7 Niospa Moisés yoini keskara nō nikasharakōixō nō afara chaka nō fakeranama. Akka nō nikasharakōima. Nāskakē Epa Niospa aōxō noko ifitiroma. Nāskakē noko fetsa yoini

iskafakī: “Ēfe Fake ē nīchixii mato nāxonō mato chaka soaxonō. Mā Jesús Ifofaino ē mato ifixii,” ixō Epa Niospa yoini.

⁸ Akka Epa Niospa Moisésxō yoini keskarakai tsōa askara nikasharakanamax nōko xinifo nikayospakōi inifo. Nāskakē nōko Ifo Niospa yoini iskafakī:

Ē chipo na efe yorafo israelifo yafi Judapa āfe fenafo meka fena shara ē ato yoixii. Nā ē ato sharakōi axōai keskara ē ato ōimaxii.

⁹ Ē ato xinifo Egipto anoa iyoni. Nāskaxō ē ato yoisharani ēfe meka nikasharaifāfe ato kexesharafafāixikī. Ē ato yoisharaifaino ēfe meka kachikiri fanifo. Nāskakē ē ato potani. Akka a āto xinifo ē ato yoini keskarakai ē āto fenafo askara ē yoixiima. Askatamaroko ēfe meka fena shara ē ato yoixii ea nikasharanōfo.

¹⁰ A ē israelifo yoixiai kene fistiōxō ē ato tāpimaxima. Askatamaroko āto shinā mēra ēfe meka shara ē nanexii āto ōiti mēraxō a kirika kenea keskara sharaōxō shināsharanōfo. Nā ē ato yoiiai keskakōixii shināsharaxikani. Nāskakē ē āto Epa Nioskōi ixii. Akka afo efe yorafo ixikani.

¹¹ Akka anā fisti rasichi ato tāpimaxikanima. Keyokōichi ea tāpixikani. Yorafo afamafāferi ea tāpiafono, xanīfofofāferi ea tāpikōixikani. Nāskakē anā eōnoa tsōa ato tāpimaxima akōi keyokōichi mā ea tāpikōiafono.

¹² Ē ato chaka soaxoxii afara chakafafiaifāfe. Nāskaxō a afara chakafamisfo ē anā shināpakenakama, ixō Niospa yoini.

¹³ Nāskakē Niospa anā ato yoini iskafakī: “Meka fena shara ē mato yoinō,” ixō ato yoini. Akka a Moisés ato yoini keskarakai anā tsōa shinātiroma. Nā Moisés ato yoini keskara meka xinikōi. A mekakai anā tsōa shināpakenakama. Nāskakē nā meka shināmakipakenakafa.

9

Karapa pexe kene fetsa mēraxō Epa Nios ato kīfixopaonifo. Akka iskaratīa Jesús noko kīfixomis Apa Nios ika arixō

¹ Ē mato yoinō afe keskara yorafo ipaonifomakī. Akka Epa Niospa Moisés yoini afeskaxō nono mai anoxō afe yorafo ato Nios kīfixotirofomākī Niospa ato chaka soaxonō. Akka karapa pexe fanifo a mēraxō Nios kīfinōfo.

² Akka a karapa pexe fanifo mēra kene rafe ini. Nā kene rekētana mēra siete rāpari oro otatia metax keskara ini. Askatari mīsari a mēra ini. Nā mīsa kamakī mēxotaima doce pāa fapaonifo. Nā kene rekētana anenifo iskafakakī: “Nios chaimashta ika,” ixō anenifo.

³ Akka karapa pexe fanifo mēra sama namikōi nakirafekōi potexō xītia ini. Nā kene chikaya anenifo iskafakakī: “Nono Nios ikōina,” ixō anenifo.

⁴ Nā kene rekētana ketaxamei mīsa kafāshara oroya taxta fanifo ini. A kamakixō nakas potoshara kooati ipaoni. Nāskatari kene chikaya fetsa mērari kafo oroya taxtafanifo ini. Nā kafo mēra pāa keskara āfe ane mánā kecho oro mēra nanea ini. Akka Aarón āfe chatiri nā kafo mēra naneyoamano Niospa nā Aarón āfe chati charofo onifayoni. Nāskata Aarón āfe chati chipo kafo mēra naneni. Nāskatari Niospa Moisés āfe meka makexki kenexō ināni nikanōfo. Nā makex para Niospa mekaya nā kafo mēra nanea ini.

⁵ Nāskakē nā kafo māmākīa Niospa āfe ājiri keskara raferi nia ini. Āto peta rafeta kafo fepoafō keskara ini. Nāskakē nā Niospa āfe ājiri keskara rafeoxō nō tāpitiro Nios fāsi sharakōikē nōko chaka noko soaxomis. Askafiano akka nafaōnoakai ē mato iskaratīa yoitiroma.

⁶ Nāskakē nā Nios kīfiti karapa pexe kene rekētana mēra a ato Nios kīfixomisfo mēxotaima ikipaonifo anoxō nakas potoshara kooafaino ato Nios kīfixoixikakī.

⁷ Akka a kene fetsa mērari tsoa ikitiroma ipaoni. Nā ato Nios kīfixomis xanīfo finakōia fisti ikipaoni. Xinia fisti ata ikipaoni. Nāskatari imimais ikipaonima. Yoinā imiya ikipaoni nā imi Epa Nios ināixikī āfe chaka soaxonō, askatari afe yorafori ato chaka soaxonō.

⁸ Nāskakē Niospa Yōshi Sharapa xafakīa noko tāpimani. Akka nā karapa pexe iyoano āfe kene fetsa mēra tsoa ikipaonima. Nā ato Nios kīfixomis xanīfokōi fisti ikipaoni Nios fe mekaxiki. Yorafo Epa Nios fe mekayoxoma, Nios ato kīfixomis xanīfo fisti yoioyopaonifo.

⁹ Nāskakē nā ipaonifoōnoa iskaratīa noko shināmatiro Moisés ato yoini keskafakī. Karapa pexe ano yoinā ina retexō ināpaonifo Niospa āto chaka ato soaxonō. Askafikanax ishara-paonifoma afara chakafakaxō shinātaifapaonifo.

¹⁰ Akka Moisés ato yoini keskafakī a ato Nios kīfixomisfāfe nāskakōi fanifo. Nāskaxō afara shara fetsafori ato tāpimani Moisés meka. Afara pita, afara ayata mā fatiro ato fani. Askatari afaari mā pitiro, afaari mā ayatiroma ato fani. Askatari ato tāpimani afeskax mechokometirofomākī Epa Niospa ato nikakōinō. Akka askafiafono afāfekai ato chaka soaxokōitirofoma. Cristo oyoamano nānori Niospa ato yoioyoni. Nā Cristo naitīa aōxō keyokōi

Niospa fetsafani. Nāskakē nō Jesús Ifofaino, Niospa nōko chaka noko soaxotiro. Nāskakē a Moisés yoini keskara anā tsōa ifofasharatiroma āfe chaka soapaikī.

¹¹ Akka Cristo mā anā nai mēra kaax, noko Nios kīfixomis xanīfokōi ini. A Niospa noko yoyoini keskara noko ināmis. A karapa pexe anoxō a ato Nios kīfixomisfāfe ato Nios kīfixopaonifo yorafāfe anifo. Akka Jesús noko kīfixomis ano sharafinakōia Nios fistichimāi nai fanino.

¹² Akka Cristokai karnīro imi fota fakka fakeshtari fonima. Askatamaroko nokoōnoax nakī āfe imi foax ikisi Apa Nios ari kani. Nāskaxkai anā Jesús nanakama. Nāskaxō nōko chaka noko soaxonano āfe Apa Nios ari nō katiro.

¹³ Akka chanīma, karnīro yafi fakka retekaxō āfe imi fikaxō nā karnīro koofakaxō āfe chii mapoya nā imi osikaxō saa saa anifo Epa Niospa ato chaka soaxonō anā choshta keskara iyamanōfo.

¹⁴ Akka Cristokai afaa chakafamisma. Nāfi sharafinakōia. Niospa Yōshi Shara a nīpanakato Jesús shināmāni. Nāskakē Apa yoini iskafakī: “Epa, ē atoōnoax naikai. Nāskakē ēfe imi foano eōxō mī āto chaka soaxotiro mefe yorafo inōfo,” ixō Apa yoini. Akka a nō Nios inimamapaikī nō shināpaoni keskara nō anā shināmāni. Akka iskaratīa nō Nios inimamapaikī nō nikasharakōitiro. Nā Nios nīpanaka sharafinakōia.

¹⁵ Akka a Moisés ato yoini keskara sharafiano tsōa nikapaonima. Afara chakafapaonifo. Nāskakē nā afara chakafapaonifo keskara Cristo fistichi ato chaka soaxotiro. Akka a Moisés yoipaoni keskara anā ato yoitiro. Nāskakē Cristo oni nokoōnoax naiyoi nōko chaka noko soaxoxiki nō Nios fe ipaxanō. Nāskakē Niospa noko yoini iskafakī: “Ekeki fekāfe ēfe Fakeōnoax efe yorafo ixikakī,” ixō noko yoini. Nāskaxō a noko yoyoini keskara noko ināxii.

¹⁶⁻¹⁷ Iskaratīa afara fetsa ē mato yoinō mā tāpinō. Nō nayoxoma nō yoitiro iskafakī ato yoikī: “Ē naano tsōa ēfe afarafo fiimākai ikisi ē mato tāpimayonō,” ixō nō yoitiro. Nāskakē nā nō yoyomis keskafakī nō nayoxoma nōko afarafo fetsafo ināpaikī nō yoitiro. Akka nō nayoamano nōko afarafo tsōa fena fitiroma.

¹⁸ Nāskakē Niosxō Moisés afe yorafo yoini āto yoinā inafō reteafono imi fonō. Akka a yoinā inafāfe imi foyamaino a ato yoyoini keskafakī Niospa ato chaka soaxotiroma.

¹⁹⁻²⁰ Taefakī Epa Niospa shināmanaino Moisés israelifo keyokōi ato yoini nikanōfo. Mā ato yoikī mitoxō, nā ifi hisopo āfe pōya pishta fini. Mā fixō fakka fake imi yafi oveja imi fakkaya osini. Nāskaxō ifi hisopo pōya pishta fixō oveja raniya texkeani. Nāskata nā ifi hisopo pōya pishta texkeata fakka fake imiki momo momo axō nā Niospa meka kirikaki kenea a Niospa yoyoini keskafakī fakka imi saa saa ani. Askatari yorafokiri fakka imi saani. Ato yoikī iskafayanā: “Na imioxō mā tāpitiro Epa Niospa noko yoyoini keskara axii. Nāskax nō afe yorafo itiro,” ixō Moisés āfe kaifo yoini.

²¹ Nāskatari nā karapa pexe a mēraxō Nios kīfiti Moisés imī saa saa ani, askatari a mēranoafori keyokōi imī saa saa ani.

²² Chanīma, nā Epa Niospa Moisés yoini keskafakī Moisés imi saakano karapa pexe anoafo keyokōi ato chaka soaxona. Akka imi foyamaino noko chaka soaxotiroma. Anā ano fato fetsama nōko chaka noko soaxotiro.

Cristo nōkoōnoax nani noko chaka soaxoxiki

²³ Nā anoxō Nios kīfiti karapa pexe mēranoa keskarakōifo Nios ika ari. Nāfoki ato Nios kīfixomisfāfe yoinā imi saanifo Niospa afo ōisharanō. Akka a karapa pexe mēranoa imifo sharafiano afāfe nōko chaka noko soaxotiroma. Askatamaroko nā Cristo nokoōnoax nai fistini nōko chaka noko soaxoxiki. Noko chaka soaxonano Nios ika ari nō katiro, a keskara shara afe ipaxakī. Askatari anokai a anoxō Nios kīfiti karapa pexe keskarama. A Nios ika ano sharafinakōia.

²⁴ Akka yorafāfe karapa pexe fanifo anoxō Nios kīfinōfo. Nāskakē a mēra a Nios nai mēra ika keskarakōi ipaoni. Akka Cristo mā otoax a karapa pexe fanifo mēra ikinima. Askatamaroko Apa ari nai mēra kani. Nāskakē iskaratīa ari afe ika noko Apa Nios kīfixōfafāixiki.

²⁵ Akka nā ato Nios kīfixomis xanīfo karapa pexe kene fetsa mēra ares fisti xinia fisti akax ikipaoni a mēraxō Nios kīfixiki. Āfe imikōiya a mēra ikitamaroko, yoinā imi ya ikipaoni. Akka Cristokai ato keskarama. Akai mēxotaima natiroma, nai fistini Apa Nios ari kaxiki.

²⁶ Akka askakatsaxakī Cristo nokoōnoax nai ranā ranākerana nā Niospa mai onifanichāi. Akka askamisma. Jesús nai fistini ikisi noko keyokōi chaka soaxoxiki.

²⁷ Akka keyokōi nō nai fetsexii. Nō naax keyokōi nō akiki nokoaito noko yoixii a nō niyoxō amis keskara. Nāskakē a nō amis keskara noko yoiaino nā Jesús Ifofaafa tii afe isharapakenakafo. Akka nā nikamisfoma omiskōipakenakafo mēra ato potaxii.

²⁸ Cristo āari ināmeax noko naxōi fistini. Yora ichapafōnoax omiskōixō noko nāxoni. Askafīax anā āfe yorafoki oxii, noko ikisharapakexakī. Nāskakē anā nokoōnoax nanakama noko chaka soaxoxiki. Askatamaroko aōnoax nō isharapakenaka.

10

¹ Niospa Moisés yoini keskarāōxō nō tāpitiro Cristo noko afarasharakōi faxoxiai. Nāskakē nā Moisés ato yoini keskarakai tsoa imasharatiroma. Afia Moisés ato yoini keskakakī nā xinia tii a ato Nios kīfixomisfāfe yoinā inafō retēpaonifo Niospa ato chaka soaxonō. Askatari a Moisés yoini keskaratokai ato imasharamisma Nios fe īpaxanōfo.

² Akka a ato Nios kīfixomisfāfe yoinā inaoxō ato chaka soaxonaifono, tsōa anā akeranama yoinā ina retēkī. Āfe chakaōxō anā shināchakakeranama. Nāskakē anā tsōa yoinā ina retēkeranama.

³⁻⁴ Akka askarama. Nā xinia tii cabra ato retexonaifōtia nō afara chakafamis keskara ato shināmapaonifo. Akka yoinā ina imioxō āfe chaka ato soaxotiroma.

⁵ Nāskakē Cristo mai ano fotoyoxoma Apa yoini iskafakī:

Epa, mīkai fichipaima yoinā ina imioxō āto chaka soanōfo. Askatamaroko yorakōi mīa ea onifani ēfe yora ē mia inānō. Nāskaxō yorafoōnoax naxō ē ato chaka soaxoxiki.

⁶ Akka yorafāfekai mia inimamakanīma yoinā ina retēkaxō kooakī mī ato chaka soaxonō, ixō yoini.

⁷ Akka anā mē mia yoia iskafakī:

Mē nono mai ano fotoa a mīa amapaiyai keskara ē axiki. Nānorikōi mī meka yoimisto eōnoa yoikī keneyoni, ixō Cristo Apa yoini.

⁸ Efe yora mīsttichi, shinākapo. Cristo Apa yoikī taefani iskafakī: “Epa, mīōxō Moisés ato yoini keskara sharafiano mī anā fichipaima. Akka nāato ato yoikī iskafani: ‘Yoinā inafō retēkāfe āfe imi foano aōxō Niospa mato chaka soaxonō,’ ixō ato yoini. Akka a yoinā retēxō koakaxō mia ināifāfekai afāfekai mia inimamaima,” ixō Apa yoini.

⁹ Nāskaxō anā yoikī iskafani: “Epa, ē nono mai ano ē fotoni a mīa amapaiyai keskara axiki,” ixō Apa yoini. Akka Cristo noko nāxoni noko chaka soaxoxiki. Nāskakē a Moisés ato yoini keskara nō anā nikatiroma nōko chaka Epa Niospa noko soaxonō. Nāfo mā Niospa fetsafaa.

¹⁰ Nāskakē a Apa amapaiyai keskai Jesucristo āari ināmeni noko nāxoxikī aōnoax nō a keskara shara inō. Nāskakē nō anā afaa fetsa fichipaima māmāi Jesús noko nai fistixonikē.

¹¹ Akka a atoōxō Nios kīfixomisfāfe pena tii yoinā ina retēpaonifo Epa Niospa keyokōi ato chaka soaxonō. Askafekēkai afāfe ato chaka soaxopaonifoma.

¹² Akka Jesucristo mā noko nai fistixoni noko chaka soaxoxiki. Nāskakē nō anā afaa fetsa yopanakama noko chaka soaxonō. Nāskakē mā nokoōnoax naax Apa Nios ari kani ariax afe xanīfokōi ikikai.

¹³ Akka mā Apa ari kanixakī iskaratīa arixō manai, a noikaspamisfo Apa Niospa ato potaitīa. Nāskakē Jesucristo Apa fe xanīfofinakōia ixii.

¹⁴ Nāskakē āarifi ināmei fistixō noko nāxoni nōko chaka noko soaxoxiki. Nāskaxō nō Ifofaax a keskara shara nō ixii. Nāskakē Niospa anā afaa chaka nōkoōnoa oīpakenakama. Nāskakē nōri a keskara sharakōi ixiii.

¹⁵⁻¹⁶ Nānori Niospa Yōshi Sharapa noko yoiyoni iskafakī:

Efe yorafāfe, ea Ifofaifono āto shinā mēra ēfe meka ē nanexii āto oīti mērari a ēfe meka kenea keskara ē faxii ea Ifofasharanōfo, ixō yoini.

¹⁷ Nāskaxō anā yoikī iskafani:

Mā ea Ifofaino ē anā shināpakenakama a mā chakafamisfo, ixō Niospa Yōshi Sharapa yoini.

¹⁸ Akka mā noko chaka soaxonano, nāskakē nō anā yoinā ina inātiroma noko chaka soaxonō.

Nios fe rafesharakōikāfe

¹⁹ Efe yora mīsttichi, nāskakē nō nai mēra ikitiro Nios ano ranotama Jesucristomāi nokoōnoax nai imi fonikē, noko chaka soaxoxiki.

²⁰ A ato Nios kīfixomisfo kīfiti pexefā kene fetsa mēra xinia tii ikifistipaonifo ato Nios kīfixoxikakī. Anā iskaratīa nō yopatiroma askara. Anā askafapanakama. Akka iskaratīa afara fetsa fenasharakōi Jesús noko axoni. Nāskakē mā Jesús naino nā Nios kīfiti pexefā kene mēraano sama nāmīfā faxtetani anā tsoa ikiyamanō. Nāskakē nākōi nā Nioskōi nō kīfitiro.

²¹ Nōko Ifo Jesús nokoōxō Apa Nios kīfixomis xanīfokōi. Nāskakē keyokōi Niospa fakefāfe āto Ifokōi.

²² Nāskakē nō Jesús chanīmara fakē nā noko nāxonioxō nōko òiti fena sharakōi noko faxotiro. Nāskaxō a nō afarafō chakafamis keskarafo anā nō shinātiroma nōko òiti inimakōitiro. Nāskaxō faka sharapa nashimana keskara noko fatiro anā afaa chaka nōko shinā mēraxō nō shinānōma. Nāskakē Nios fe rafekāfe.

²³ Akka nō yoikī iskafamis: “Jesús nōko Ifokē Epa Niospa a noko yoiyoni keskara noko axoxii,” ixō nō yoimis. Nāskakē afaa fetsa shināyamakāfe. Nā nō shināi fisti shināfafāikāfe.

²⁴ Akka Epa Niospa noko sharafamis. Nōri nō shināsharanō afeskaxō nō fetsafo shināmasharatiromākī nōinā faatanākaxō afara axoshara faatanānōfo.

²⁵ Mā mā tāpia mā Jesús chaima oi. Akka fetsafo anā ichanāmisfoma. Nāskakē ato keskara iyamakāfe. Nāskakē ichanāi xateyamakāfe. Jesúsnoa mā shināi keskafakī fetsafori yoitaifakāfe mātō òiti inimasharakōinō.

²⁶ Fatora fētsa mā tāpia Jesús nokoōnoax nani nōko chaka noko soaxoxiki. Nāskara mā tāpifioxō afara chakafakī nōko Ifo Jesús kachikiri fakī, askarakai Niospa āfe chaka soaxotiroma.

²⁷ Nāskarafo Niospa ato omiskōimaxii. Akka Niospa ato òiaino ratei finakōixikani. Nāskakē Niospa ato yoixii iskafakī: “Emakinoax omiskōipakenakafō mēra fotakāfe, chiifā mēra,” ixō ato yoixii.

²⁸ Akka fētsa nā Moisés yoini keskara nikakaspakī afara chakafaito fētsa òixō xanīfo yoimis. Fistichi yoiyamakī rafeta yoitiro, askayamakī trespa yoitiro iskafakī: “Mā nō òia nato afara chakafaito,” ixō yoitirofo. Nāskakē xanīfāfe yoitiro: “Na feronāfāke afara chakafaa mā natiro,” ixō yoitiro.

²⁹ Akka nā Moisés yoini keskara nikakaspai fo afo retepaonifo keskafakī fatorafāferi Jesús nikakaspamisfokē Niospa ato omiskōimakī finakōixii. Nāskakē nā yora chakafāfe shinākī iskafamisfo: “Mē nikamis Jesús ea nāxonī. Nā naino āfe imi foni. Nāskaxō ea katonī aōnoax ē Niospa fake inō. Akka ē shināikai afama. Nāskakē ē Jesús Ifofapaima,” ixō anori shinākī nāato Niospa Fake nikakaspakōimis. Askara meka yoikī Niospa Yōshi Shara chakafakī mekafamis, Niospa Yōshi Sharapa sharafafiamisno noikī.

³⁰ Akka mā nō tāpia Niospa yoikī iskafani: “Afara chakafaiāfe ē ato omiskōimaxii,” ixō yoini. Askatari yoikī iskafani a kirika keneano: “A ea Ifofaafāfe afara chakafafono ē ato omiskōimaxii,” ixō yoini.

³¹ Akka fatorafāfe nōko Ifo Jesús kachikiri fakaxō afara chakafariafaifono atonā fāsi mesekōi ixii. Nāskakē askarafo nā Nios nīpanakato ato achixō ato omiskōimakī finakōixii.

³² Shinākapo efe yora mishtichi. Mā tafakī Jesúsnoa tāpixō mā Ifofani keskafakī shināmakiyamakāfe. Fetsafāfe mato Jesús Ifofatimafaifono ato nikatama mā nōko Ifo Jesús Ifofasharakōipaoni.

³³ Nāskaxō mā Jesús Ifofasharaito òikakī fetsafāfe mato Ichayanā mato omiskōimamisfo. Akka a Jesús Ifofamis fetsafori omiskōiaifono māri ato fe omiskōipaimis.

³⁴ A Jesús Ifofaa fetsafo karaxa mēra ato ikimanifo. Nāskakē mā ato noiyānā ato inimapaipai karaxa mēranoa mā ato òikai kani ato shināmasharata ato inimamaxikī. Nāskatari nā Jesús Ifofaafāfema mātō afarafō mato fīakī keyokōinifo. Mato askafafiaifono a shināchakatamaroko mā tāpini Epa Niospa nā ika arixō mato afara mekexona afokai fenopakenakama. Nāskara tāpiax mā inimakōini.

³⁵ Nāskakē a mā Jesús chanīmara faa keskafakī kachikiri fayamakāfe. Mā kachikiri fayamakē Epa Niospa mato sharafaxii noko yoiyoni keskafakī. Nāskaxō afara shara mato ināxii.

³⁶⁻³⁷ Akka Niospa meka kenenī iskai:

Cristo mā chaima matokī oi, samarakaima, ixō kenenifo. Nāskakē mā Jesús Ifofasharai keskafakī omiskōifīkī tenekāfe. Epa Niospa mato ināpaiyai keskara aōxō nā mato yoiyoni keskara mā fixii.

³⁸ Nāskaxō anā Niospa meka kenenifo iskafakī yoikī:

Nā ea chanīmara fai ē imasharaito, nāato ea Ifofasharakōixii. Akka nā ea kachikiri faafokī ē inimaxima, ixō Niospa yoini kirika keneano.

³⁹ Nāskarafāfe Jesús kachikiri fakanax omiskōipakenakafō mēra fokani. Akka nōkai askarama. Askatamaroko nō Jesús chanīmara fakōimis noko nimasharapakexanō nō afe ipaxakī.

11

Nios nikakōipaonifo

¹ Akka nō Epa Nios chanīmara fakōixō a noko yoiyoni keskara noko axoyoamano nō chanīmara fai chipomāi noko axōfaito. Nāskarifiakī a noko yoiyoni keskara nō òiyamafixō āfe mekaōxō nō chanīmara fai. Nāskara nō shinākī nō Nios chanīmara fai.

² Nāskakē nōko xinifāfe Niospa ato yoini keskara chanīmara fakōipaonifo. Nāskakē Epa Nios atoki inimakōikī atoōnoa meka shara yoini.

³ Akka nō chanīmara faxō nō tāpitiro Niospa āfe mekapa mai yafi nai onifani. A nō ōiyomisfoma afarafo Niospa onifani, akka iskaratīa mā nō ōitiro. Nāskakē āfe mekapas keyokōi onifani.

⁴ Ē mato yoinō nikakapo mā tāpinō a nōko xinifo ipaonifo afe keskaramākī. Nōko xini Abel Nios chanīmara faxō oveja fake ināni nā Niospa yoini keskafakī. Nāskakē Nios akiki inimakōini. Akka āfe ochi Caīnka askara inānima. Nā Caīn Nios nikakaspayanā āfe afarafo ināpaiyaito Niospa fichikaspani. Akka āfe exto Abel Nios chanīmara fakōikē Niospa aōnoa yoikī iskafani: “Mī ea chanīmara fakōina,” ixō yoini. Abel Nios chanīmara faax mā nafianikē nō Abel shinākī nō tāpitiro Nios chanīmara faxō nō nikasharakōitiro. Nō askafaino Nios nokoki inimasharakōi.

⁵ Nōko xini Enoc aatori Nios chanīmara fakōinax afe rafekōipaoni. Nāskakē nayamafiakē a ika ari Niospa ifirisafatani. Aōnoa yoikī Niospa meka kenenifo iskafakī: “Ē Enoc yoiāi keskafakī ea nikakōimis. Nāskakē ē akiki inimakōi,” ixō Niospa yoini.

⁶ Akka nō Nios nikayamakī nō Nios inimamatiroma. Akka nō Nios fe ipaikōikī nō nikakōitiro. Iskaratīa Nios nia. Nāskakē nō chanīmara fatiro Niosmāi nikē. Askatari nō nikapaikōikī chanīmara fayanā akiki nokoaito Niospa noko afara shara faxoxii.

⁷ Nōko xini Noéri Nios chanīmara fakōipaoni. Nāskakē Niospa Noé yoikī iskafani: “Ē oi kaya imai faka faipafanō āsai fetsenōfo. Nāskakē kanōanāfā pexeya fafe. Mī fakefo fe mī āfinō ano ikanax āsaxikanima. Nā ē mia yoiāi keskafafe,” ixō Niospa Noé yoini. Akka tsōa askara ōiyomisma nāskakē Noé chanīmara fakī kanōanāfā fani āfe fakefo fe āsaxikakima. Nā Noé Nios chanīmara faax isharakōipaoni. Akka nā nikakaspaifo askapaonifoma, afāfe afara chakafapaonifo. Nāskakē Niospa ato omiskōimani āsanōfo. Nāskakē Nios fe Noé rafeaito akiki inimakōini.

⁸ Nōko xini Abrahamri Nios chanīmara fakōipaoni. Nāskakē Niospa Abraham yoikī iskafani: “Nā ē mia nīchipaiyai ari mī katiro. Ē mia mai inānō mīnā inō,” ixō Epa Niospa yoini. Akka Abraham tāpia inima fakiri kaimākai. Askafiax nā Niospa yoiā keskakōini.

⁹ Nāskakē nā Niospa yoiyoni keskara chanīmara faax, a Niospa nīchia mai ano nokoax Abraham yora fetsafo mēra kani. A keskarafo inima. Nānoax pexe keskara a karapa pexe fofāsafapaoni a mēra oxaxikaki. Nāskakēri āfe fake Isaaca fe āfe fafa Jacobo nā keskara mēra ipaonifo. Epa Niospa Abraham yoini keskafakī nā raferi ato yoikī askafani: “Ē mato mātō mai ināxii,” ixō yoini.

¹⁰ Nāskakē Abraham manapaoni. Akka Niospa yoini keskara nā mai ano ifiaxō tāpipaoni a Nios ika ari afe ipanaka. Nāno Niospa onifanifo keyokōi sharakōifo nāfori āfenā ipanaka. Nāskakē Abraham manapaoni.

¹¹ Niospa Abraham yoini iskafakī: “Mī āfi Sarapa chipo fake fixii. Āfe fake feronāfake ixii. Nāskakē mī fenafo ichapakōi ixikani,” ixō yoini. Akka Abraham anifokōi ini āfe āfiri yōxafokōi ini fake fimisma. Nāskakē Abraham āfe shinā mēraxō shinākī iskafani: “Epa Niospa ea yoiyoni keskara ea axōi. Nāato nā yoiāi keskarakōi famis,” ixō Abraham Nios chanīmara fani. Nāskakē Abraham āfinī fake fini, āfe fake feronāfake. Nāskakē Abraham fakeya ini.

¹² Akka Abraham mā anifokōia ini. Nāskano āfe fenafo ichapakōifo ini. Tsōa ato tanātiroma. Nā fishifo tiikōi askatari nā mashi exe tiikōi inifo tsōa ato tanātiroma. Abraham āfe fenafo ichapakōi inifo.

¹³ Nā ē yorafoōnoa mato rama yoiā keskara atoōnoa ē mato yoinō. Nā yorafo nai mitokomenifo a Niospa ato yoiyoni keskara fikanaxma. Akka askafikaxō chanīmara fakakī ato shinā mēraxō oa ōiai keskara fanifo. Nāskakē inimakōinifo. Nāskakanax yoinānifo iskakani: “Nonokai na mai ano nō ipanakama, mai fetsa ano nō ixii,” ikax yoinānifo.

¹⁴ Akka nānori yoiāifāfe nō tāpitiro nāskara yorafo nono mai ano ipaitama Nios ika ari fopaikani afe ipaxakakī.

¹⁵ Akka a ipaonifo ano shinākani āto mai ano anā fopaikani fokeranifo.

¹⁶ Akka āto mai ari fopai atama Nios ika ariroko shinānifo ari nokopaikakī. Nāfāfe tāpinifo Nios ika ari sharafinakōia. Nāskakē Epa Niospa a ika ari ato pexe shara faxoni afe ipaxanōfo. Nāskakē Niospa atoōnoax inimakī ato yoikī iskafani: “Ēfi mātō Nioski,” ixō atoōnoa yoini inimayanā.

¹⁷⁻¹⁸ Anā Abrahamnoa ē mato yoinō. Epa Niospa tāpipaini Abraham chanīmara fakī nā yoiā keskara akimākai. Nāskaxō yoikī iskafani: “Mī ina ea retexotamaroko mī fake fisti Isaaca ea retexōfe,” ixō yoini. Nāskatari Epa Niospa taefakī Abraham yoiyoni āfe fake fisti Isaacaōnoax āfe fenafo ichapakōi ixiaifo. Nā afara sharafo Niospa Abraham yoiyoni

keskafakī āfe fake Isaacaōxō keyokōi axoxixakī tāpimayoni. Nānori Niospa Abraham yoiaino āfe fake fisti retexō Nios inākerani. Nāskaxō Nios chanīmara fakōixō nā yoini keskakōi fani.

¹⁹ Nāskaxō Abraham āfe shinā mēraxō shinākī iskafani: “Epa Niospa ea yoia iskafakī: ‘Mī fake Isaaca ea retexōfe,’ ea fatto ē shinā Niospa afama mūшти fatiro. Akka ēfe fake nafiakē Epa Niospa samama ea otofaxotiro,” ixō shināni. Chanīma, āfe fake nakerani. Nāskakē Abraham shināni āfe fake nafiakē Niospa otofaxotiro.

²⁰ Akka Isaaca nāatori Nios chanīmara fakōipaoni. Nāskakē āfe fake feronāfake rafe yoini a inōpokoai: “Jacobō yafi Esau, chipo Epa Niospa afara shara mato faxoxii,” ato fani.

²¹ Nāskarifiakī Jacobori Nios chanīmara fakōipaoni. Nāskakē mā chaima naito Niospa āfe shinā mēra shināmanai keskafakī āfe fafa rafe, José fake rafe, Niospa ato shara faxonōpokofai ato yoini. Ato yoita āfe chatiki mēstexō Epa Nios kīfīyanā aicho fani.

²² Nā Josēri Nios chanīmara fakōipaoni. Nāskaxō mā chaima nakī āfe yorafo yoikī iskafani: “Chipo Epa Niospa nōko fenafo nā israelifo Ejipto anoata ato yoxii kiki. Fokakī ēfe xaori foxikani kiki. Nā ikaiyo ano ea maifafoxikakī,” ixō ato yoiyoni.

²³ Moisés āfe apa feta āfe afa Nios chanīmara fakōipaonifo. Nāskakē Moisés yomeax sharapishtakōikē āfe apa feta āfe afa ōini. Nāskaxori tāpinifo mā yosixō a Niospa yoiaino keskara yonosharakōixiatō. Nāskakē Ejipto anoata xanīfāfe ato yoini a israelifāfe āto fake feronāfake yome mūшти keyokōi ato rētekī mitokakōinōfo. Askafiafonō Moisés āfe apa feta āfe afa Nios chanīmara fakaxō ratekakima tres oxe anifo āto fake onekakī xanīfāfe āto fake rēteyamanō.

²⁴ Moisés āfe chata keskara ini Faraón. Askafiafonō Moisés askara fichikaspani. Nāskaxō ato yoini iskafakī: “Xanīfo Faraónkai ēfe chatama. Āfe fakerikai ēfe efama,” ixō ato yoini, chanīmara fanōfo israelifo āfe kaifo ini. Moisésri Nios chanīmara fakōipaoni.

²⁵ Akka Moisés shināni iskakī: “Ē Ejipto anoata xanīfāfe pexe ano ikax ēri ato fe inimasharakai xini ranā ayanā ē afara chakafatiro Nios shināyamakī. Ē askapaima,” ixō shināni. Askapaitamaroko iskafakī shināni: “Ēkai ejiptofo feta afara chakafapaima, askakimaroko ēfe kaifo fe nā Niospa inafō omiskōiaifo keskai ēri ato fe omiskōi.

²⁶ Ē Ejipto anoata ato afara fiapaikī ē ato fiakerani. Ē fiaxoma, ea mekafiafonō Ejipto anoafāfe, nāskanō. Akka afarafoyafīax shara. Akka Cristo, a Niospa noko nīchixii noko ifinō, nā sharafinakōia. Ē Cristoōnoax omiskōifiano Epa Niospa a ika arixō ē nokoaito afara sharakōi ea ināxii ē afe ipaxanō,” ixō shināni.

²⁷ Akka Nios chanīmara fakōinax Ejipto anoata āfe kaifo fe Moisés kani. Ejipto anoata āto xanīfo akikī ōitifishkifiaino akikī mesetama nā xanīfāfe mai anoata kani. Akka Nios tsōa ōiyamafitirono Moisés fisti Nios fe rafekōiax afe mekapaoni. Nāskakē nā Niospa yoini keskafakī enepaonima.

²⁸ Akka Ejipto anoata israelifo foyoafomano Niospa Moisés yoini iskafakī: “Mī kaifo yoife ovejanā fake retenōfo. Nāskakaxō nā oveja imi āto pexe fepotifo raish anōfo, askafafono ōiki ēfe ājirinī āto fake iyoafo rēteyamanō, nā Ejipto anoata āto fake iyoafo ato reteaitīa,” ixō Niospa yoini. Nāskakē Moisés nā Niospa yoia keskara chanīmara faxō āfe kaifo israelifo yoini. Nāskakē israelifāfe āto fake iyoafo nanima.

²⁹ Nāskakē israelifāfe Nios chanīmara fanifo. Nāskakaxō nā fakafā āfe ane Ōshi pokefainifo. Epa Niospa nēxpakīa fakafā shināfatanaino israelifāfe pokefainifono ato aho Ejipto anoata fonifo ato retepaikani. Mā fakafā nēxpakīa kāiyaifono Niospa atoki fakafā yosifani. Nāskakē āsai mitokomenifo.

³⁰ Akka Niospa israelifo yoini: “Nā Jericō pexe rasi kachiori siete nia foaketi fayakenōfo,” ixō yoini. Nā pexe rasi kachiori simūto kenē keyakōi masoa ini. Nāskakē israelifāfe a pexe rasi kachiori foaketi fayakenaifono nā Niospa yoini keskara nā pexe rasi maokomei fetseni.

³¹ Akka keyokōi Jericō anoata nai keyonifo. Akka nā kēro chotaferoma āfe ane Rahab nā fisti nanima nāatomāi mā Nios chanīmara faax. Akka Jericō pexe rasi ano foyoafomano israeli xanīfāfe feronāfake rafe nīchini ato onāti fatanōfo. Mā foafono nā rafe Rahab āfe pexe mēra ato ikimani tsōa ato fichixō reteyamanō. Nāskakē nā Rahab tsōa retenima āfe kaifo retetikakī.

³² Akka, ζanā afaa fetsa ē mato yoitromē? Nā yora ichapafāfe Epa Nios chanīmara fapaonifoōnoa ē mato yoikī keyotiroma. Nā Gedeón ikaino, Barac ikaino, Sansón ikaino, Jeftē ikaino, David ikaino, Samuel ikaino nā Niospa meka yoisimis fetsafoōnoari ē mato yoipanā ēkai yoikī keyotiroma.

³³ Nāskakē afāfe Epa Nios chanīmara fakaxō āto sorarofō yoinifo a ato noikaspaifo ato retenōfo. Nāskakē a ato noikaspaifo ato retepaifīkakī finōkōimifo. Akka atiri xanīfo ikaxō āfe yorafo kexesharapaonifo isharanōfo. Nāskakē a Niospa ato yoiyoni keskara ato axosharani. Nāskatari atiri nā Nios Ifoafaafēma poomā mēra ato potanifo. Askafiafonō Epa Niospa ato kexesharani poomānā ato pinōma.

³⁴ Akka atiri xanifo chakafāfe ato yoinifo chiifā mēra ato potanōfo. Chii mēra ato potafiafono Niospa ato kexesharani koonōfoma. Atiri kenofāfe ato retepaifikakī tsōa ato retenima. A isinī ikani ato yora pachikōifokē afori Niospa ato mitsiskōi imani. Nāskakē nā ato noikaspaifāfe āto sorarofāfe ato retepaifiaifono nāfāferoko ato Ichonifo ato afeskafanōfoma.

³⁵ Kērofāferi Nios Ifofaino, fake naano Niospa ato otifaxoni anā ninō.

Akka fetsafo Nios chanīmara fakōinafono nā Nios Ifofaifāfema ato omiskōimanifo ato retetakī. Nāskaxō ato yoikī iskafanifo: “Mā Nios Ifofayamaito nō mato afeska faima mā kasharatanō. Akka mā Ifofaito nō mato retei,” ixō ato yoinifo. Ato askafafiafono tsoa Nios shināmakinima. Nāskakē ato retenifo ato reteyoafomano shinākī iskafanifo: “Noko retefiaifono Epa Niospa samama noko otofatiro nō afe ipaxanō,” ixō shinānifo.

³⁶ Askatari a Nios chanīmara faa fetsafori ato kaxemetsamafayanā ato koshaketsayanā ato cadenānā metexkere ata ato otexkere axō ato karaxa mēra ikimanifo.

³⁷ Askatari ranāri tokirinī ato tsakaketsakaxō ato retenifo, ranāri sirochonō nakirafe ato xatenifo nanōfo, ranāri kenopa ato retenifo, ato askafiaifono. Nāskakē nā afaamaisfāfe ano rapatiyamano oveja fichi iyamai cabra fichi rapati fakaxō safenifo. Ato retepaikakī ato Ichorifaifono. Nāskakē omiskōikōinifo.

³⁸ Nāskakē tsōa istoma anoax machi keya anoax a mafa kini mēra ikikata mai kini mērari ikinifo. Akka nā Nios chanīmara faafa a Nios Ifofaafāfema ato shara fanifoma Niospa ato ōia sharaifafono, ato chakafapaonifo.

³⁹ Nāskakē nāfo omiskōi finafikakī Nios Ifokōi fapaonifo. Nāskakē Niospa atoōnoa yoikī iskafani: “Nafāfe ea nikakōikani. Nāskakē ē atoki inimakōi omiskōifikani isharakōimiso,” ixō Niospa atoōnoa yoini. Askafikaxō a Niospa ato yoiyoni keskara tsōa fiama ini.

⁴⁰ Nāskakē Epa Niospa ato manamayopaoni. Akka nōri nō Nios chanīmara faax nō ato fe a Jesús ika ari nō nokoxii. Nāskakē yora fisti keskara nō ato fe ixii a keskara shara noko imaino. Nāskaxō ato feta anā afaa fetsa nō yopapakenakama. A Niospa yoiyoni keskara keyokōi noko ināxii nai mēraxō.

12

Nō Jesúsnoa shināsharatiro

¹ Akka nōko xinifāfe Nios chanīmara fapaonifo. Nāskakē nōri ato keskara nō itiro. Nāskaxō a afara chakata noko nētefapaiyai keskara nāfo nō kachikiri fakōini. Nāskaxori afara chakafāferi samamakōi noko afara chakafamapaitiro. Nāfo chakari nō kachikiri fakōini a Niospa noko amapaiyai keskara fisti axiki, fena fenakima a noko yoiai keskara nō axosharakōi.

² Akka nō Jesús fisti shināfāfainō. Nāfi nōko Ifokōikī noko tāpimamiskōi. Akka nāato noko ōimakī taefanikī afara afeskara afiaino nō Nios chanīmara fakōinō. Nāskaxō a Apa yoya keskara akōipaoni. Nāskakē nōri a keskara inōkāfe. Nāskaxō mā mastakakī yorafāfe ferotaifi rāfinī fanifo. Askafafiaifono omiskōiyanā tenekōini māmāi tāpiax a chipo xanifo ixō Apa Nios feta noko ifixiai inimakōiyanā Apa Nios ika arixō.

³ Yora chakafāfe chakafafiaifono tenekōini. Nāskaxō a nokoōnoax omiskōini keskara shinākī motori omiskōimanaifono, shināchakatama māto ōiti fekaxtefayamakāfe. Nāskaxō a Niospa mato amapaiyai keskara mā enetiroma.

⁴ Akka yorafetsafāfe mato afara chakafamapaimisfo anā mā Jesús Ifofanōma, ato nikatama mā omiskōifi mā omiskōi sharamisma. Akka Jesúsroko omiskōi finakōini.

⁵ Mā mā shināmakia keskara ē anā mato yoinō. Mā āfe fakekē, Epa Niospa mato yoini keskara āfe meka kirikano kenea iskara fētsa kenenī:

Ēfe fāke, ēfi mī Ifokōikī. Akka nā ē mia yoiai keskara mī ayamaito ē mia omiskōimani mī ea nikanō, mī ea Ifofasharanō. Ē mia askafaino, akai afamara mī fatiroma. Askatari shināchakayamafe. Tāpisharafe.

⁶ Nā ē aō noiai tāpimasharai aō noikī. Ēfe fake keyokōi omiskōimani anā nikasharanō, ixō kenenī a Niospa shināmanaino.

⁷ Epa Niospa mato tāpimapaiyai keskara tāpikāfe. Nāskax omiskōifikī shināchakatamaroko tenesharakōikāfe. Nāskakē omiskōixō mā tāpitiro māmāi Niospa fakefoxō. Apafāfe āto fakefo tāpimatirofo keskafakī Epa Niospa mēstekōi nokori tāpimani.

⁸ Keyokōi Epa Niospa āfe fakefo ato tāpimanaito mā meemisfo. Akka Epa Niospa noko tāpimayamaino nō āfe fakekōifo itiro. Nāskax nōri āfe yorafo itiro.

⁹ Akka nō yomekē nōko epafāfe nono mai anoxō noko tāpimapaonifo. Nāskakē nō shinākī nō ato nikakōimis. Akka Epa Niospa noko tāpimanaino nō tenekōitiro. Nāskaxō nā noko tāpimapaiyai kesai nō inimayanā nō isharakōitiro.

¹⁰ Nōko epafāfe āa shinākaxō noko tāpimamisfo nō shara inō. Akka mā nō yosiano anā noko askafamisfoma. Nāskarifikā Epa Niospa mēste shināsharakōikī, nokori shara fapaikī noko tāpimamis a keskara shara nō inō.

¹¹ Chanīma, noko tāpimayanā noko omiskōimanaino nō shara meetiroma. Paekōi mei nō ichopaitiro. Askafixō mā yosixō chipo nō shinātiro Epa Niospa noko tāpimasharai, nōko ōiti inimasharatiro shara noko imaino.

Nō Niospa meka nikakaspaino mesekōi ixii

¹² Nāskakē afara afeskara afiaino shināchakayamakāfe. Epa Niospa mato tāpimapaiyai keskara fisti akāfe. Nāskaxō Nios Ifofakī kachikiri fatama nikasharafafāikāfe. Nāskatari āfe meka shara nikakī enepaiyamakāfe. Yora pachi keskara iyamakāfe.

¹³ Nāskax isharakōikāfe Jesús Ifofasharaxikakī. Mā askaito ōikani nā Jesús Ifo sharafaafoma mato fe rafepaitirofo Jesús keskara shara ipaikani.

¹⁴ Nāskakē mēenāpaitama keyokōi yorafa fe ishararafafāikāfe. Nāskatari Jesús keskara shara ipaikāfe. Akka tsoa Jesús keskara shara iyamakani afāfekai nōko Ifo ōinakafoma.

¹⁵ Epa Niospa noko noikōikī āfe Fakeoxō noko sharafa fafafāimis. Nāskakē a Niospa noko amapaiyai keskara akāfe fenoxikakima. Askatari mato shināmā āfe exto yoini iskafakī: “Epa naano āfe afama mātō shināmā mā afara shinākī fetsafori mā ato afara chakafamatiro akairi askara anōfo.

¹⁶ Nāskatari mātō āfima fe iyamakāfe. Kērofori mātō fenema fe iyamakāfe. Akka nō naino, nōko fake iyoato nōko afama mīshti fitiro. Akka Esau shināsharanima. Fonāikī āfe exto yōkani āfe exto pimanō. Nāskaxō a āfe apa ināpaiyai shinākima āfe exto yoini iskafakī: “Epa naano āfe afama mīshtifo ē fiai ē mia inānō kopifakī,” ixō yoini. Nāskakē nā Esau keskara iyamakāfe. Atokai Niosnoa shināpaonima. Akka a Niospa mato ināpaiyai keskara fikaspakīma, fikāfe.

¹⁷ Mā mā tāpia āpa afara shara ināpaiyai keskara fipaifikī finima. Nāskaxō apa yōkakī iskafani: “Epa, a mā ināpai keskara ea ināfe, ē mī fake iyoakōi,” ixō oiayanā yōkafaito āpa inānima māmāi chipokoto fiano. Nāskakē ōisharakāfe. Mā Nios nikayamai māri Esau keskara itiro. Nāskakē Niospa mato ināpaiyai keskara mā fitiroma.

¹⁸ Epa Niospa a nōko xinifo yoini keskara iskaratīa noko yoinisma a keskara. Ato yoini machi āfe ane Sión tenāmā fotanōfo anoxō afara fetsa ato yoixiki. Akka nā machi anoax chiiā erepafakōi, askatari kōi fakishifakōi, askatari nēfefakōiyanā kana piishini.

¹⁹⁻²⁰ Nai mēranoax maneti fāsikōi chāi chāisaito nikanifo. Nāskatari nai mēraxō fāsikōi ato yoiatio nikanifo ato Niospa iskafaito: “Na machi ano tōsa mēpetiroma. Māpeaifāfe tokirinī ato tsakakī retekāfe. Askatari yoināfēri māpeaito mā retetiro,” ixō ato yoiatio nikanifo. Nāskakē ratekōikakī Moisés yoinifo iskafakakī: “Moisés, nō anā Niospa meka nikapaima. Māchi ari māpei nō narisatiro. Nāskakē Nios yoife noko anā yoiyamanō,” ixō israelifāfe Moisés yoinifo.

²¹ Akka Moisésri nā ōia keskara ato yoini iskafakī: “Ēri fāsi ratekōi, tari tari iki,” ixō ato yoini.

²² Akka nōkai machi Sión ano nō kaima. Askatamaroko machi Sión fetsa ano nō kai, āfe ane fetsa nā Jerusalén Fena ano a Nios ika ari. Nāskakē nānoax āfe ājirifo ichanākaxō, “Nios sharara,” fafafafāikani. Akka nā āfe ājiri ichapakōifo tōsa ato tanātiroka.

²³ Nānori nō keyokōi a Jesús chanimara faafo afe ixii. Akka nā Nios ika ari āto anefo kenea afe ipaxanōfo. Nāskakē nōri nō Nioski nokoa. Nāskakē noko yoixii fatofāfe Ifofakanax afe ipanakafomāki. Nā Ifoafafos a keskara shara ato nai mēraxō imai afaa chakafamisfoma keskara inōfo.

²⁴ Jesús noko nāxoyomano tōakai nokoōnoax nāxoyonima. Nāskakē iskaratīa Jesús noko nāxonikē nō Nios fe isharapakexatiro. Akka nōko xini Caín onefetsa Abel reteni. Nāskakē Epa Niospa Caín yoikī iskafani: “Caín, zafeskakī mī exto mī reteam? Iskaratīa ē mia omiskōimani,” ixō yoini. Abel nafianixakī aato noko nimapaketiroka, Jesús keskarama. Akka Jesús nanixakī noko nimapakenaka.

²⁵ Nāskakē Niospa mato yoiāi keskara nikakaspayamakāfe. Nā nono mai anoxō nōko xinifo Moisés ato yoini keskara nikayamaifāfe Epa Niospa ato omiskōimani. Akka Jesús Moisés keskarama. Nios ika ariax nokoki fotoni Niospa Fakekōiax. Nāskakē a Jesús noko yoiāi keskara nō nikayamaito nokori omiskōimāki finakōixii.

²⁶ Akka Epa Niospa Moisés yafi nōko xinifo machi Sión anoxō ato yoikī āfe mekapa mai naya naya ani. Nāskaxō anā ato yoini iskafakī: “Anā mai fisti ē naya naya axima. Nairi ē naya naya axii,” ixō ato yoini.

²⁷ Nāskakē nā Epa Niospa noko yoini keskaraōxō nō tāpitiro nā afara nipatirofoma, Niospa nāfo yamafarisafataxii anā afaa inōfoma. Akka nā Niospa ato imapaiyai fisti itirofo.

²⁸ Nāskatari a Nios ika ariax mai naya naya itiroka. Nāskakē nāno nō afe isharapakexatiro. Nāskakē aōnoa nō shināsharanā nō kififafāinō. Nāskaxō a noko amapaiyai keskara nō axōaino nokoki Epa Nios inima sharakōixii.

²⁹ Akka mā nō tāpia nōko Ifo Nios nā chiifā erepafāi keskara. Akka nā āfe meka shara nikakaspakī kachikiri faifono Niospa chiifā erepafāi mēra ato potaxii anoax omiskōipakexanōfo. Nāskakē nō nikasharakōinō.

13

Afesakaxō nō Nios inimamatiromē

¹ Māfi Cristo afe yorafokī. Nāskakē mā ranā nōināi xateyamakāfe.
² Yora fetsafori mai fetsa ariax oaito mātō pexe anoxō ifisharakāfe. Nāskakēri tāpixoma fetsafāfe yorayama fiano ājirifo fiano ifimisfo.

³ Nā karaxa mēra ikafori ato shinākāfe. Nāskaxō ato ōiti inimamasharakāfe. Askatari ato axosharakāfe. Nā mā ato fe karaxa mēra ika fori ato shinākōikāfe.

⁴ Feronāfakēfo, mātō āfiffo fe nōināsharakāfe. Nāskax isharakāfe. Askatari mātō āfima fe ipaiyamakāfe, mātō āfi fisti fe ikāfe. Kērofori mātō fenema fe ipaiyamakāfe, mātō fene fisti fe ikāfe. Akka nā āto āfima fe ikaifono, kērofori āto fenema fe ikaifono, nāskarāfo Niospa ato omiskōimaxii.

⁵ Akka kori ichapa noiyamakāfe. Askatamaroko inimakāfe afe tii mā ayamakī. Epa Niospa yoinikī iskafakī: “Ēkai mato makinoax paxkanakama. Askatari ē mato potanakama. Nāskakē a mā yopai ē mato ināxii,” ixō yoini.

⁶ Nāskakē chanīmakōi nō yoitiro iskafakī:
 Afara afeskara afiaito ēfe Ifāfe ea axomis. Nāskakē ē rateima, Epa Niospamāi ea kexesharaino yorafāfe ea afeskafanōfoma,
 ixō nō yoitiro.

⁷ Niospa meka yoimisfāfe mato yoinifo keskara atoōnoa shināfāfāikāfe. Nāfāfe mato shara famisfo. Nāskakaxō nōko Ifo Jesús chanīmara famisfo. Nāskakē ato keskara ikāfe nō Jesús Ifofasharakōinō.

⁸ Akka Jesucristo nā ipaoni keskara ipanaka. Anākai iskaratīa fetsatiroma.
⁹ Akka fetsafāfe mato anorima yoipaikani, a tsōa nikamisma keskara. Nāskakē ato nikayamakāfe mato iskafakī yoipai ani kiki: “Nōko xinifāfe noko yoinifo keskara nō nami fetsa piaino nōko shinā mēra noko shināmasharatiro,” ixō mato yoipai ani kiki. Akka a nō piatitokai nōko shinā mēra noko shināmasharatiro. Askatamaroko Niospa noko noixō noko imasharatiro a keskara shara nō inō.

¹⁰ Nāskakē nō chanīmara famis Jesucristo ifi cruz ikakinoax noko nāxoni nōko chaka noko soaxoxiki. Akka Jesucristo chanīmara fatama nā Moisés ato yoini keskara fisti chanīmara famisfo. Nāskakē afāfekai ato chaka soaxotirofoma.

¹¹ Akka nā Moisés ato yoini keskai a ato Nios kīfixomis xanīfo fisti, ares fisti pexe kene fetsa mēra ikipaoni, nā mēra yoinā ina imiia ikikē ōikī Epa Niospa ato chaka soaxonō. Akka nā yoināfāfe ato kaya pexe rasi pasotaixō koofapaonifo.

¹² Nāskarīfai Jesús Jerusalén pasotainoax noko omiskōioxokī āfe imi foax noko nāxoni nōko chaka noko soaxoxiki a keskara shara nō inō.

¹³ Akka nōri Jesús ipaoni keskara inōkāfe a nō ipaoni keskara anā ixikima. Nāskaxō āfe kaifāfe potanifo keskafakī nokori nofe yorafāfe potatirofo. Nāskakaxō Jesús īchaketsanifo keskafakī nokori aōxō īchatirofo. Akka Jesúsnoa chaka shināmisfo keskafakī nokori aōxō chakafatirofo.

¹⁴ Nono mai anoax nō omiskōifiki nō shināchakaima, mā nōmāi tāpiax nono mai ano nō ipanakama. Askatari mā nō tāpia a Nios ika ari nokoax nō afe ipanaka. Nāskakē nā nō manasharamis.

¹⁵ Jesús noko nāxonioxō nō Epa Nios aicho fai. Akka nō yoikī iskafatiro: “Aicho Epa Niosi, mī Fake Jesús ēfe Ifokōi. Aōxō ē mia aicho fai,” ixō nō yoitiro.

¹⁶ Askatari ato shināmakiyamakāfe mā afarayaxō a afaamaisfo ato ināsharakāfe. Mā ato askafaito ōikī Nios matoki inimasharakōi kiki.

¹⁷ Akka nā ichanāti pexe anoxō Niospa meka mato yoimisfo ato nikasharakōifafāikāfe. Nāskax nā mato yoiaifo keskakōikāfe. Nāfāfe mato kexesharamisfo mā Jesús nikasharanō. Akka nāfāferi tāpiafo Nios ari nokoāifāfe ato yōkaxii iskafakī: “Ķmā ēfe meka mā ato tāpimasharamismē?” ixō ato yōkaxii. Nāskakē ato nikasharakāfe inimakōinōfo. Akka mā ato nikayamaino inimatirofoma, shināchakatirofo. Nāskaxō mato axosharatiro. mā.

¹⁸ Nokori Epa Nios kīfixokāfe. Epa Niospa noko amapaiyai keskara mā nō apaimiski. Nāskaxō nōko shinā mēraxō nō afaa chaka shināima. Nō isharapāikōi.

¹⁹ Eari Nios kīfixokāfe matoki ea samama nīchinō ē anā mato fe inō.

Ato Nios kīfixoyanā mā mekai xatekī ato yoini

²⁰⁻²¹ Epa Niospa noko inimamakōimis nō afaa shināchakanōma. Nōko Ifo Jesús mā nokoōnoax nafiakē Epa Niospa otofani Jesús keyokōi finōax noko kexemis inō. Jesús noko

nāxoniōnoax Epa Nios fe nō afe yora ipanaka. Nāskakē mā afara shara yopaito Epa Niospa mato inātiro a mato apaiyai keskara shara mā anō. Āfe Fake Jesucristoōxō nōko shinā mēra noko shināmasharax nokoki inimakōixii. Nāskakē keyokōichi Jesúsnoa nō yoisharapakenaka. Nāskara sharakōi ipanaka.

²² Efe yora mīshtichi, nā ē mato ichapama yoia keskara nikasharakāfe fena fenakākima. Nā ē mato kenexona keskai mato shinā mēra mato shināmasharaxii kiki.

²³ Ē mato yoipai mā nofe yorashta Timoteo iskaratīa karaxa mēranoax mā tsekea. Akka samamashta ekeki oano ē afe kai mato ari.

²⁴ Keyokōi ichanākaxō a mato Niospa meka yoixomisfo yafi a mato kexemisfori nō ato yoisharai. Akka nono Italia anoxori nā Nios Ifofaafāferi mato yoisharakani.

²⁵ Epa Niospa keyokōi mato noiki mato shara faxōfafāinō. Nā tii.

Santiago Jesús Chanīmara Fafo Kirika Kenexō Fomani

Judeofo paxkanānifono Santiago ato kene fomani

¹ Ēkīa Santiago ē mato kirika kenexō fomai. Epa Nios yafi nōko Ifo Jesucristo ē ato yonoxomis. Māfi Jesucristo mā Ifofamiskī nā maitiofo mā paxkanāi fetseni. Ē mato meka shara fomai.

Niosxō nō tāpisharatiro

² Efe yora mīstichi, afara chakafo nokoaino, inimasharakāfe, shināchakakakima.

³ Mā mā tāpiakī, ano afara chakafo nokoaino, mā Jesús nikakī finasharakōikī, afara chakafo nikakākima mā tenesharakōitiro. Nāskaxō afara chakafo mā finōinifōfātiro.

⁴ Mā askaino Jesús mato imapaiyai keskara mā itiro mēxotaima māmāi mā Jesús nikakōisharakī. Mā askakī afarafo Jesús mato amapaiyai keskara mā atiro afaa chaka shinākima.

⁵ Akka Niospa mato amapaiyai keskara mā tāpixoma, Nios yōkakāfe mato tāpimanō. Mā yōkaito mato tāpimatiro. “Ea fekaxtefayamakāfe,” ixokai Niospa mato anori yoima. Inimayanā mato tāpimani.

⁶⁻⁸ Nāskata mā Nios yōkakī iskafakī shināyamakāfe: “Ē Epa Nios yōkaito ea tāpimanimaraka,” ixō anori shināyamakāfe. Akka nā mā yōkapaiai keskara shinākāfe. Nāskaxō, “Aicho, ē Nios yōkaito mā ea tāpimasharaki. Nāskakē ea amapaiyai keskara ea tāpimaxii,” ixō shinākāfe. Askatari anā afaa shināyamakāfe. Fekaxteyamakāfe. Nāskarari nēfefakī ifi fokē fokē akaito nō tāpitiroma fakiri kaimākai. Nāskarifiakī Niospa mato tāpimafiaino mā anā afara fetsa shinākī mā shināsharatiroma. Nāskakē mā fekaxtexō mā shināsharatiroma. Nāskakē Niospa mato afaa tāpimatiroma mā fekaxteaito.

⁹ Jesús chanīmara fafiakani ranāri yorafō afaamaisfo. Nāskakē fetsafāfe ato tanakanima. “Nafokai afama,” ixō shinākani. Askatamaroko afaamaisfiafono Niospa ato iskafai: “Māfi ēfe fakekōifokī. Keyokōi ēfenāfo mātonāri,” ixō Niospa ato yoini. Nāskakē inimatirofo.

¹⁰⁻¹¹ Fetsafori Jesús chanīmara fafo afama mīstiyafo. Nāskakē feronāfake afama mīsthi ichapayato shinākī iskafatiro: “Ē afama mīsthi ichapayafekē ēfe afama mīsthiāfe ea inimatiro. Ēfe afama mīsthiōnoaxkai ē isharatiroma. Akka ēfi Niospa fakekōiax, ē afe rafepakenakakī. Nāskax ē inimakōi,” ixō shinātiro. Akka taeyoi charofo sharashta iyotiro. Askafiaino xinī tsofifaano, anā shara itiro ma māmāi xinī tsofifaano. Nāskarifiāi feronāfake afama mīsthi ichapayato shinātiro iskafakī: “Nā charo ikai keskariai fatora penata ē natiro. Mē nāxō ēfe afama mīsthi ē fotiroma. Askatari ēfe afama mīsthiāferikai ea afeska fatiroma,” ixō nā feronāfāke afama mīsthiyato shinātiro. Nāskakē mā āfe afama mīsthiōnoax isharakōiax narisatiro.

Santiago ato tāpimani afara chakafamisofoōnoa

¹² Nōko Ifāfe yoikī iskafayoni: “Nā ea noiaifi efe īpanakakī,” ixō yoiyoni. Nāskakē afara chakafo nokoki nokoaino, nāskara teneyanā nōko Ifo Nios nō kachukiri fayamaito ōikī nokoki inimatiro. Nāskax a yoiyoni keskai nō afe nīpanaka.

¹³ Chanīma, keyokōichi nō Jesús Ifofaxō afara chakafapalkī nōa nō yoitiroma iskafakī: “Ea Niospa afara chakafamapai,” ixō nō yoitiroma. Akka Nios sharafinakōia. Afara chakafatiroma. Tsōarikai Nios afaa chakafamatiroma, Niosmāi sharafinakōikē. Nāskakēri Niospa ato afaa chakafamatiroma.

¹⁴ Nāskakē nō afara chakafapaiyaino afara chaka nōo nea. Nāskatari nōko shinā mēraxō nō afara chakafapalkī nō atiro.

¹⁵ Ē mato yoinō, nikakapo. Kēro fistichi fake naneano fenāmāshta yositiro. Akka mā kāiax yositiro. Mā yosiāx anifoax, natiro. Nāskarifiakī nōko shinā mēraxō nō afara chakafo fapai, akka afara chakafo nō shināmakiyamaxō, afara chakafo nō atiro. Nāskakē mēxotaima nō afara chakafatiro. Nāskax nō naa keskara nō itiro.

¹⁶ Akka efe yora mīstichi, anorima shināyamakāfe. Niospa afaa chakafatiromaki.

¹⁷ Akka Epa Niospa nai mēraxō mēxotaima noko kexesharafafāini. Nāskaxō noko afama mīsthi onifaxonī. Xinī onifata, fishifo onifata, oxe onifata, nāfo noko onifaxonī, afāfe noko chaxasharanō. Akka oxe ikiaito nō anā ōitiro. Fishiri nāskarari ikiaito nō ōitiro. Chipō kāiyaito nō anā ōitiro noko chaxasharaito. Akka Epa Nioskai askarama. Akai fetsatiroma. Noko mēxotaima sharakōi faxomis. Nokokai chakafatiroma.

¹⁸ Niospa ares shināyoni iskakī: “Ēfe meka chanīmakōi nikaifono ē ato fetsafaxii ēfe fakekōi inōfo,” ixō Niospa shināyoni. Nāskakē noko katokī tafani. Nāskatari a rama chanīmara faifo āfe fakekōifo ixikani.

Niospa meka mēstesharakōi nikax askakōikāfe. Nāskakē mā chanīmara fakōinikai

¹⁹ Efe yora mīstichi, nikasharakāfe ē mato yoisharanō. Fētsa mato yoipaiyaito, nikakaspatama nikayokāfe. Māri chipo fenāmāshita yoisharaxikakī. Akka samamashta ōitifishkiyamakāfe. Nāskakē nō ōitifishkiki nō mekatiroma.

²⁰ Mā ōitifishkikikai Niospa mato afara sharafamapaiyai keskara mā atiroma.

²¹ Nāskakē afara chakafo mā famis xatekāfe. Mā mā chaka xatexō mā Niospa meka nikakōisharatiro. Nāskaxō mā yoikī iskafatiro: “Epa, mī meka shara emēra nanefe ē mia Ifofasharapaikai. Ē mia nikapaisharakōikai,” ixō anori yoikāfe. Āfe meka shara mato mēra naneano, a mato yoiyoni keskai mā afe nīpanaka.

²² Āfe meka fisti nikakākima nā Niospa yoini keskakōiri akāfe. Mā mā nikafi mā askayamai māa mā pāramei, “Nō Nios Ifofara,” ixō shinākī.

²³⁻²⁴ Nā keskarafofi iskamisfokī: Espejo fikaxō āto femānā choshtakē ōikanax fe-chokomepaikani shināmakitirofo. Nāskarifiakani Niospa meka nikafikakī, nāskakaxō afara chakafakakī xateafoma.

²⁵ Akka fētsa Niospa meka shara nikafafāikī nā yoiyai keskara amis, shināmakitama. Nā keskara yōra Nios chanīmara faxō Niospa yoiyai keskara amis, nāskax inimakōimis. Shinākī iskafamis: “Niospa meka sharakōi. Nā ea yoiyai keskara ē aki,” ixō shināmis. Nā keskara yora isharakōitiro inimayanā.

²⁶ Akka fētsa shinākī iskafai: “Ē Jesús Ifofasharai,” ifiakī meka chaka fisti yoisimis āa pārameyanā. Askara yōrakai Jesús Ifofasharama. Akikikai Nios inimaima. Nā keskara yōrakai tsoa ōimatiroma afeskax isharatiromāki. Atokairoko Nios Ifofaxō ato ōimaxiki.

²⁷ Askatari nō Jesús Ifofasharaxō fakefo apamaisfoya, kēro ifomafafari nō ato kexesharatiro, omiskōiaifāfe. Nāskatari nō Jesús Ifofasharaxō a afara chakafaifo keskara nō atiroma. Nō aska sharaito noko ōi nokoki Jesús inimaito. Nāskarafa nōko Ifo Jesús keskara sharakōi ikani.

2

Yora kori ichapaya fisti sharafatama a afaamaisfori ato sharafakāfe

¹ Efe yora mīstichi, nōko Ifo Jesucristo xanīfofinakōia. Nāskakē noko noipakenaka. Yora afama mīstifoya, afaamaisfoiyari keyokōi noko Jesús noi. Nāskatari māri Jesús chanīmara famis, noko Jesús noiiai keskafakī, keyokōi noikāfe. Nā yora kori ichapaya fisti noikākima, nā yora afaamaisfoiyari noikāfe.

²⁻³ Akka mā ichanāino feronāfake kori ichapaya oro anīcho efapa safefāi rapati sharakōi safeax mato fe ichanāiyoi oaito, mā shinākī iskafatiro: “Nafi afama mīstifoyaki, nāskakē nō ifisharai,” ixō mā shinātiro. Nāskaxō, “Nono tsaoyofe keyokōichi mia ōinōfo,” mā fatiro. Mā askafaino, feronāfake afaamais rapati chapokōi safeax mato fe ichanāipaiyaito mā iskafatiro: “Onī nixō ōife,” askafayamakī, “Onī nāmā tsaoxō ōife,” mā fatiro.

⁴ Mā askafakī mā chakafai. Nā kori ichapaya noikī nā feronāfake afaamaisya mā ifimisima. “Jesús shināi keskara nōri nō shināi,” ixō mā yoisimis. Anori yoifi mā askamisma. Feronāfake afaamaisya ifisharaxma Jesús shināi keskara mā shināima.

⁵ Efe yora mīstichi, ē mato noikōi. Akka ē mato yoiyai keskara ea nikasharakāfe. Yorafāfe afaamaisfikaxō, Jesús chanīmara faifāfe ato noixō Niospa ato katonī afe yorakōifo inōfo. Ato yoiyoni iskafakī: “Mā ea chanīmara fakī, mā ea noikōi. Nāskakē mē efe ipanaka ē xanīfo ika ano. Nāskatari nā ēfenāfo mātonāri ixii,” ixō Niospa ato yoiyoni.

⁶⁻⁷ Askafixō a afaamaisfoya mā ato ikisharakōima, mā ato chakafai ato ōikaspayanā. Akka shinākapo afe keskarafomākī kori ichapayafo. Nā kori ichapayafāfe mato omiskōimakani. Mā ato nimikē xanīfo ano mato iyokaxō mato karaxa mēra ikimapaikani. Askarafāfe nōko Ifo chakafakī mekamaisfo. Akka a kori ichapayafāfe mato noikanima ato kori fisti noi kakī. Akka, ¿afeskakī a kori ichapayafo mā ato ifisharapaimē mato chakafafiaifono? Akka a afaamaisfo mā ato noikaspamis.

⁸ Akka kirikaki Niospa meka kenekī iskafanifo: “Nā mā noimekōiai keskariakī fetsafori noikōikāfe,” ixō yoinifo. Nā Niospa yoini keskara mā nikakōiax mā isharakōikai.

⁹ Akka mā fetsafo noiamax mā shara ikima, chaka mā iki. A Niospa Moisés yoini keskara mā akima. Nāskakē, “Mā nikayospakōifo,” Niospa mato fatiro.

¹⁰ Niospa noko yoiyoni iskafakī: “Keyokōi noikāfe,” noko fani. Akka keyokōi Niospa noko yoini keskara nō nikafikī afara fisti nō shināmakixoma nō chakafai. Nāskakē Epa Niospa noko ōi nā nō afaa nikama keskara.

¹¹ Shinākapo. Niospa noko yoini iskafakī: “Kēro fetsa fe oxayamakāfe. Xotofakeri feronāfake fetsa fe oxayamakāfe,” noko fani. Askatari, “Yora reteyamakāfe,” Niospa noko fani. Akka kēro fetsa fe mā oxayamafikatsaxakī mā yora retelī Niospa noko yoini keskara keyokōi mā nikama.

¹² Akka Niospa noko noikī, āfe meka noko yoini nō afaa chakafanōma. Nāskakē noko yoini keskara, nō keyokōi nikasharaito noko omiskōimanima. Akka nāfo tāpikōixō, keyokōi nō nikakōixō nō ato yoisharatiro. Askatari fetsafo sharafakāfe, askara sharakōikī.

¹³ Mā askaxō Niospa noko yoini keskara, mā yorafo noiyānā ato shinākī mā ato sharafai. Mā askafaito Niospa mato omiskōimatiroma. Akka mā yora fetsafo mā noiyamaito Niospari mato noixoma mato omiskōimatiro.

Nō Jesús chanīmara fakōixō nō fetsafori afara sharafaxotiro

¹⁴ Efe yora mīshtichi, ē mato yoisharapai. Akka fētsa yoikī iskafai: “Ē Jesús chanīmara fai,” ixō yoifixō yorafo sharafamisma, askarakai sharama. Nāskaxō mā noko ōimani mākai Jesús chanīmara faama. Nāskakē mā Nios fe nīpanakama.

¹⁵⁻¹⁶ Akka a Jesús chanīmara faa fetsa omiskōi afaamaisyax matoki nokoaito, mā iskafatiro: “Mī rapati safesharata katāfe, matsi meymaxiki. Askatari pisharatāfe fonāiyamaxiki,” mā fafiakī mākai afaa ināmisma, askarakai sharama.

¹⁷ Akka mā yōra nāxokai anā fetsafo afaa sharafaxotiro. Nāskarifiakī fetsafāfe yoikī iskafatirofo: “Ē Jesús chanīmara fai,” ifiaxō fetsafo afaa sharafaxomisma atokai Jesús chanīmara fakōinama. Nā keskarafī yora naa keskarakī.

¹⁸ Akka fētsa shinākī noko iskafatiro: “Ē Jesús chanīmara fai. Nāskakē Epa Nios ēfe Ifo,” ifiaxō fetsafokai sharafamisma. Akka ē iskafai: “Ēri Jesús chanīmara fai. Askatari ē fetsafo sharafamis. Nāskakē mī ea tāpitiro Nios ēfe Ifokē.” Akka mī, “Ē Jesús chanīmara fai,” ifiaxō mī fetsafo sharafamisma. Akka, ŷafeskafaxō mī ato ōimatiromē mī Jesús chanīmara faxō? Akka ē fetsafo sharafakī ē ato ōimatiro ē Jesús chanīmara fakī.

¹⁹ Akka mī yoimis iskafakī: “Nios fisti, anā ano Nios fetsama,” ixō mī yoimis. Nāskakē mī chanīmara fai. Nā mī chanīmara fai keskara shara. Akka nā niyfaka chakafāferi chanīmara fakani Nios fistikē. Akka chanīmara fafiakanax rateifinakōikani choakani māmāi tāpikanax a omiskōipakenakafo mēra Niospa ato potaxiaino.

²⁰ Akka mī yoimis: “Ē Jesús chanīmara fai. Nāskakē ē Nios fe nīpanaka,” ixō mī shināfikī, mī afaa sharafamisma. Nāskakē mī shināsharaima. Akka ē mia yoisharapai.

²¹ Akka nōko xini Abrahamnoa shināfe. Niospa yoini iskafakī: “Mī fake Isaaca ea fishkoyamafe,” fani. Askafaino Abraham āfe fake fishkomītsanima, āfe fakekōifiano. Nāskakē Niospa Abraham ōini sharakōi māmāi nikasharakōiaino.

²² Akka shināpo. Abraham Nios chanīmara faxō nā yoiai keskara ani. Akka Abraham yoikī iskafanīma: “Epa Niospa, ē mia chanīmara fafiakō mīa yoiai keskara ē akima,” ixō yoinima. Askafaino akiki Epa Nios inimakeranima. Abraham Nios chanīmara faxō, Niospa yoini keskara ani. Nāskakē Nios akiki inimakōini.

²³ Taefakī kirika kenenifo Abraham Nios chanīmara fakōinaito. Nāskakē Abrahamki Nios inimani. Nāskaxō Niospa yoini: “Mīfi efe rafepakenakakī,” fani.

²⁴ Nāskaxō mā tāpitiro fetsa iskaito: “Ē Nios chanīmara fai,” ifiaxō Niospa yoia keskara akima, askara yorakai Nios fe nīpaxatiroma. Niospakai, “Ē mikiki inimai,” fatiroma. Akka fētsa chanīmara fakī, Niospa yoia keskara aki, nāfi Nios fe nīpanakakī.

²⁵ Nāskarifiakī nā xotofāke Rahab Nios chanīmara faxō nā israeli rafe ato oneni tsōa ato reteyamanō. Rahab taeyoi chota feromakōi iyopaoni. Mā askapaonixakī, chipo Nios Ifofaax sharakōi ipaoni. Nāskaxō nā israeli rafe Josué ato nīchini Jericō anoafo ato ōitanōfo onexō. Nā rafe Rahab ato oneni tsōa ato reteyamanō. Nāskaxō ato fai fētsa nīchini fotanōfo. Nāskakē nā xotofake Rahabki Nios inimani.

²⁶ Mā nō naano, nōko fero mēsho nomakinoax tsekeano, anā nōko yora shara itiroma. Nāskarifiakī nō Nios Ifofayamakī nō isharatiroma. Nāskaxō Niosxō nō fetsafo nō axosharatiroma. Nāskaxō nō tāpitiro nō Nios chanīmara faimākai.

3

Meka shara fisti yoikāfe

¹ Efe yora mīshtichi, ē mato afara fetsa yoinō. Mā Niospa meka tāpifixō nikasharaxoma mā ato tāpimapaiyamakāfe. Akka nō Niospa meka nikasharaxoma nō ato yoiaito noko nikakaxō akairi afara chakafatirofo. Nāskakē Niospa ato omiskōimafiakī, ato omiskōimasharanima. Akka nokoroko omiskōimakī finai. Nāskakē Niospa meka nikasharaxoma nō ato yoitiro.

² Akka fake yome rama finipai paketiro kerex sharaxma. Nāskarifiakī nōko mekapa nō afara chakafatiro, Nios Ifofasharaxoma. Akka fētsa meka chaka yoikīma meka shara fisti yoifafāini nā keskaratokai afaa fetsa chakafaima āa kexemesharatiro. Akka shara ifiakani tsoa shara imisma, afara chakafamisfo.

³ Akka shinākapo. Āfe ifāfe āfe kamayo renexti fatiro. Askatari afara pishta aostatiro. Nāskax a kamaki tsaoux ifo kafāsatiro. Akka kamayo efapafiano nā aostamea pishta āfe yora kexetiro nā kapaiyai ari kanō.

⁴ Askatari shinākapo. Kanōa efapanāfāfiano āfe fiti pishtafakeshta. Kanōa efapanāfāfiano āfe fiti āfe ifāfe chiataxō nā iyopaiyai ari iyotiro. Faka faipafāfekē, nā iyopaiyai ari iyotiro ifāfe chiataxō.

⁵ Nāskarifiāi nōko anari efapayamafiano nō yoikī chakakōi nō yoitiro. Nāskarifiakī chii pishta nō kētefaano nefekī chii xoisafatiro. Nāskakī nōko afarafo noko kōatiro.

⁶ Nāskarari nōko ana pishtafiano, nō chakai mekaino, nōko meka efapatiro. Nāskakē nō yorafo chakana fatiro Satanās noko pāraino.

⁷ Akka yoināfo fetsa fetsatapafoya, peyafoya, xōchixaraifori, faka mēra ikafoya nō ifofamatiro.

⁸ Akka nōko anakai tsōa ifofamatiroma noko nikanō. Nōko anā nō mekai chakakōi imis nō itiro. Nā rono pae keskarakōi. Rono paekapato noko chachiano nō omiskōitiro. Nāskarifiakī nōko anā yora fetsa mekafakī, chakafakī, nō omiskōimatiro.

⁹⁻¹⁰ Nā nōko ana fistichi nō afara chaka yoitiro. Nāskatari nā nōko ana fistichi nō Epa Nios yoitiro iskafakī: “Epa Niospa, mī sharakōi. Mī nōko Ifo,” ixō nō yoitiro. Epa Niospa keyokōi yorafo onifani āfe ōiti keskara inōfo. Askafixō nō fetsa mekafakī chakafatiro, askafayamakī Niosnoa meka shara nō yoitiro. Efe yora mīshtichi, meka sharafekai meka chaka osia shara itiroma.

¹¹ Mai mēranoax faka tsekeai shara itiro, askayamai faka pota tseketiro. Nāskax nōko faka fiti anoax faka pota fe faka shara tseketiroma.

¹² Shīko fanax xopaya foaitiroma. Askatari sātera fanax fāraya foaitiroma. Askatari faka fiti anoax faka pota tsekeaino, faka shara tseketiroma, nō mea shara itiroma. Nāskarifiakī yōra āfe shinā mēraxō Jesús shinākī fena afaa chaka shināyotiroma.

Nios fistichi noko shināsharamatiro

¹³ Akka fētsa mato mēraxō Niospa meka tāpisharax āfe ōiti keskara shara ikī, nā keskara yōra shara ixō mato axosharafafāitiro. Nā keskara yōra āfe shinā mēra shinākī iskafatiro: “Ē afaayamafixō ē Jesucristoōnoax isharaxō, ē yorafo sharafai,” ixō shināitiro. Askaxō mā noko ōimani Jesús Ifosharafakī.

¹⁴ Akka mā isharaxoma, mā fetsafāfe fiāi keskara mā fipaimis, askatari mā finakōia ipaimis, ato finōpaiyanā mā askaino mato ōiti fekaxtetiroma. Nāskax mā isharatiroma. Nā afara chaka fisti mā shinātaifa, askarafo shināi, inimayamakāfe. Anori shināi iskayamakāfe: “Ē Niospa meka tāpishara, ē āfe ōiti keskarakōi,” iyamakāfe. Anori shinākī mā yoisharaima.

¹⁵ Mā askara chaka shināito Niospa mato shināmanima. Mā chaka shināi keskara nā Jesús Ifofaafāfema nāskarari shinākani, Satanās ato shināmanaino.

¹⁶ Fetsafāfe fiāi keskarari mā fipaimis, askatari mā ato finōpaimis, askafakī nā Jesús chanīmara faafo fe mā feratenāmis. Askaxori mā ato fekaxtefapaimis. Askatari afara chaka fetsa fetsatapafo mā ato amamis.

¹⁷ Akka Niospa noko mēstesharakōi noko shināmasharakōitiro. Nō shara inō, askatari nō fetsafo fe nō mēnāpaiyamanō, tanaimakōi isharakōixō fetsafo nō noisharakōitiro afara axosharayanā, askatari fetsafāfe noko yoipaiyai keskara nō nikakōitiro, askatari fetsafo omiskōiaino nō noiyānā nō axosharatiro.

¹⁸ Nō afara fanaxō, āfe fimi nō fitiro mā fimiyo. Nāskarifiakī nō isharakōixō a Niospa apaiyai keskara nō shināsharaxō, nō fetsafo shināmasharatiro, tanaima isharakōinōfo.

4

Niospa fichipaiyaima fichipaiyamakāfe

¹ ¿Afskai mā raenā faatanāsharakōimamē? Akka mato shinā mēraxō afarafo mā chakafapai. Nāskax mā feratenā faatanāpai, ōitifishkiyanā.

²⁻³ Mā afarafo fipaiakī fiamax mā ōitifishkikī finakōikī mā fetsafo meepaiyanā mā retepaitiro. Akka a Niospa mato ināpaiyai mā yōkama. Nāskakē Niospa a mato ināpaiyai mato ināitiro ma yōkayamaino. Nā afama mīshtifo mā apaiyai nā fisti mā shināi, fetsafo shinākima. Askaxō mā afara yōkafaiito Niospa mato ināima, mākōimāi mā afarafo fipaiyaito fetsafo inākima.

⁴ Akka kēro feneyafix feronāfake fetsafo fe imis keskarakōi māri nāskarakōi. “Jesús ēfe Ifoki,” ifixō mā Jesús Ifofakōinama. Nā mā shināi keskara chakakōi. ¿Mā tāpiamamē mā fetsafo feta afara chakafakī, mā Nios noima? A Niospa fichipaiyaima, mā fichipaiax mā Nios fe rafetiroma māmāi noikaspakī.

⁵ Niospa āfe Yōshi Shara nō mēra naneano nō afe rafepakenaka. Akka shinākapo. Nō afara fetsa noikōikī nō Nios noisharaimano āfe Yōshi Shara shināmitsatiro. Akka Niospa

meka kirikaki kenenifo iskafakakī: “Epa Niospa āfe Yōshi Shara nō mēra naneni. Aōxō noko noikī finakōi. Akka nō Epa Nios noisharayamakī nō afara fetsa noikōiaino āfe Yōshi Shara shināmitsatiro,” ixō kirikaki kenenifo. Nāskakē kaxpa noko kenexonifoma.

⁶ Askatari Niospa meka kirikaki kenekī iskafanifo: “Fētsa Epa Nios nikakaspakī āa apaiyai keskara fisti aki āa kakapaiyanā, aa keskara fekai, Epa Nios afe rafetiroma, akiki inima. Akka fētsa Epa Nios nikapaiikī Epa Nios fenai afe isharpapakexakī. Nāskakē Epa Nios akiki inimatiro, askara fe Epa Nios rafesharatiro,” ixō kirikaki kenenifo. Nāskakē Epa Niospa āfe Yōshi Shara nō mēra naneano nā fisti nō noikōiaino Epa Niospa noko axosharai nō Ifofasharanō.

⁷ Nāskaxō yoikī iskafakāfe: “Epa Niospa, mā amapaiyai keskara ea amafe,” ixō yoikāfe. Akka Satanās mato afara amapaiyaito yoikī iskafakāfe: “Satanās, Jesucristo ēfe Ifokī ea fekaxtefakima, emakinoax katāfe,” ixō yoikāfe. Mā askafaino mato makinoax ichotanō.

⁸ Nios Ifofasharakāfe. Mā Nios Ifofasharaino mato fe rafei. Nāskakē mato chaka xatekāfe afaa chakafapaikakima. Akka fētsa Nios Ifofasharapaifikī, Satanāsri ifofapai, askatamaroko, Nios fisti Ifofasharakāfe.

⁹ Afara chakafaxō shināchakakōikāfe inimakakima. “Ē afara chakafaax ē rāfikōiaino meei,” ixō shinākāfe.

¹⁰ Nāskakī Jesús yoikāfe iskafakakī: “Jesús mī ēfe Ifofekē ē mia chakafaki. Ea anā chaka soaxōfe,” ixō yoikāfe. Mā askafaito Niospa mato inimamai. Nāskakē noko yoixii iskafakī: “Ē mia noi. Ē mia anā chaka soaxonō, mikiki inimayanā,” ixō noko yoixii.

Fetsaōnoa yoikī chakafayamakāfe

¹¹ Niospa meka noko yoikī iskafakī Moisés kirikaki kenei, Niospa shināmanaino, “Nōinā faatanākāfe,” ixō noko yoini. Nāskakē fetsafo pārayamakāfe, ato chakafakī mekafayamakāfe. Mā ato chakafakī Niospa noko yoini keskara mā akima ato noikīma. Akka, “Niospa meka chakara,” nō fatiroma nikakaspakī. Askatamaroko nō nikakōisharatiro.

¹² Nios fistichi noko yoini afeskax nō isharatiromākī, ares fistimāi xanīfokōixō. Ares fistichi tāpikōia nō afe keskara ikamākī, shara iyamai chaka nō ikamākī. Ares noko iftiro. Akka noko ifiyamakī omiskōipakenakafo mēra noko potatiro. Nāskakē fetsafo pārayamakāfe.

Mā kai tāpiama a inōpokoai afe keskara iximākai

¹³ Meka fetsari ē mato yoipai. Ea nikakapo. Mā kai afaa tāpiama fatora penata afara afeskara ifiaino mā yoimis iskafakī: “Na penata nō kayamai, penama nō kai pexe rasi ano. Anoxō nō xinia fisti akikai. Anoxō nō kori ichapa fixii nōko afarafo minixō,” ixō mā yoimis.

¹⁴ Nāskakē anorima mā shinākōimis. Mā kai afaa tāpiama fatora penata afara afeskara afiaino. Akka fakishpari nai nifi keyopaketiro. Nāskax yamarisatatiro. Nāskarifiāi nō nīpanakama. Fatora penata nō narisatani.

¹⁵ Nāskakē mā yoitiro iskafakī: “Niospa fichipaiyai keskara ē iki. Nāskakē nā apaiyai keskara ē aki,” ixō yoikāfe.

¹⁶ Askatamaroko mā kakapaikōimis. “Ē afara ichapa fii,” ixō mā yoifafāini. Niospa mato amapaiyai keskara mā shināima. Nā mā shināi keskara chakakōifo.

¹⁷ Niospa mato amapaiyai keskara mā tāpifixō mā askara atama mā afarafo chakafamis.

5

Nā afama mīshiti ichapayafō Santiago ato yoini

¹ Nikakapo kori ichapayafāfe, mato Niospa omiskōimaxii. Nāskakē oiakāfe mā mā omiskōixikai.

² Māto afama mīshitifo mā payokomea. Māto rapati sharakōifo mā nakaxfāfe pikī keyoa.

³ Māto kori mā mekemis mātonā fisti mā fapaikī. Mā mekeaino mā xinina. Nāskakē fetsafāfe tāpitirofo mato kori mā mekea mā xininaano, tosa pishta ināxoma, mātonā fisti mā fapaikī. Mā askafaito Niospa mato ōi. Akka mato yoikī iskafaxii: “Māfi afara fishkomītsamiskī. Mā kai tosa noimisma. Nāskakē ē mato omiskōimaxii,” ixō yoixii.

⁴ Shinākapo. A mato yonoxomisfo mā ato afaa ināsharamisma, mā ato feparamis finōmafāi fifiakī. Nāskakē Epa Nios yoimisfo iskafakakī: “Epa Niospa, noko axōfe nōko patoronō noko kopifamismakī,” ixō yoimisfo. Askafaifono Niospa ato nikamis. Akka a mato yonoxomisfo mā ato omiskōimanai keskara Niospa mā tāpikōia.

⁵ Askatari mā afama mīshitifoyax mā isharakōia, afaa yopatama. Afama mīshiti ichapayata, ichapa pifāi, rapati ichapayata, nā afarafo mā fipaiyaifo mā fifaxō fetsafo mā noimisma. Fetsafo keskarama mā isharakōikē, Niospa mato omiskōimakī finakōixii mā fetsafo noiya-maito.

⁶ Fetsafāfe afaa chakafayamafiakē mā ato pāramis xanīfo yoikī, xanīfāfe ato retemanō. Nāskatari āakai afeskax ifimetirofoma a yorafa.

Omiskōifiki tenekāfe, Nios kifikāfe

⁷ Efe yora mīstichi, mā omiskōifi fena fenayamakāfe. Nōko Ifo kachikiri fayamakāfe. Akka nō tarepa xiki fanano fenāmāshta foaitiro. Nāskakē nō fena fenakima. Nō oi manayotiro. Akka mā choshiano nō fisharakōitiro foaisharano.

⁸ Nāskarifikā manasharayokāfe nā nōko Ifo Jesús chaima nokoaitia. Nāskakē āfe meka kachikiri fakākima, nikasharakāfe shināchakakākima.

⁹ Efe yora mīstichi, feratenāyamakāfe Niospa mato omiskōimayamanō. Nā nōko Ifo Jesús chaima nokoaitia nā yora chakafo ato omiskōimaniyoi.

¹⁰ Efe yora mīstichi, ē mato yoisharapai, shinākapo. Niospa meka yoimisfo Niospa meka yoikani omiskōipaonifo. Omiskōifikani fena fenapaonifoma. Nōko Ifo nikaki finakōipaonifo. Āfe meka yoikī enepaonifoma.

¹¹ Nāskakē Nios atoki inimani. Askatari nōko xini Job omiskōifikī teneni. Omiskōifikī Nios potanima. Nāskakē Nios Jobki inimani. Nāskakē Niospa Job sharafarisafatani. Nāskatari Niospa Job āfe fake fetsafoya āfe ina fetsafori ichapa anā ināni. Nāskakē nōri nō Job shinākī nō tāpisharatiro Niospa noko noisharakōiaito.

¹² Efe yora mīstichi, ea nikasharakapo ē mato yoinō. Afara chanīma fisti yoifafāikāfe. Nāskakē, “Ēje, ē mia axōi,” ixō axosharakāfe. Akka mā yoikī iskafakī: “Maa. Ē mia axōima,” ixō anori yoita ayamakāfe. Mā askafamiskē keyokōichi tāpitirofo mā chanīkima yoimiskē. Nāskakē iskayamakāfe: “Ē mia pāraito, Epa Niospa ea omiskōimatiroki,” ixō yoiyamakāfe Epa Niospa mato omiskōimayamanō.

¹³ Fetsa omiskōikī Epa Nios kifitiro kexesharanō. Askatari fetsari inimai fanāitiro. “Aicho Epa Niosi, mī fāsi sharakōi,” ikax fanāitiro.

¹⁴⁻¹⁶ Askatari nā isinī ikaito Jesús chanīmara faafo āto kexemisfo kenatiro Nios kifixonōfo. Nāskakē ichanākaxō a isinī ikai Nios kifixoxikakī. Taefakī a mā afarafo chakafamis kāimakāfe. Nāskax mā ranā Epa Nios kifinōnākāfe mato chaka soaxonō, askatari a isinī ikairi sharafanō. Nāskakē a isinī ikai xiniyaxō femākāfe, Epa Nios kifixoyanā. Mā nōko Ifo chanīmara fakōixō nōko Ifo mā kifixonaino, nōko Ifāfe a isinī ikai sharafatiro. Askatari afara chakafaino Niospa āfe chaka soaxotiro. Nō Epa Nios chanīmara fakōita nōko chakafori keyokōi kachikiri faxō nō kifiaito noko nikakōitiro. Nō yōkai keskara noko afama mīsthi axotiro.

¹⁷ Nā Nios yoimis āfe ane Elías feronāfake noko keskarari ini. Nāskaxō Epa Nios fāsikōi kifiaino oi inima. Kifiki iskafani: “Epa Niosi, efe yorafāfe mia kachikiri faafokī, fena oi imayamafe, efe yorafāfe anā mia Ifofayonōfo,” ixō yoini. Askafaino xinia tres ata mā xinia fistiri keyoaino oi inima.

¹⁸ Askata anā Elías Epa Nios kifini oi inō. Nāskakē oi ranā ikaino fanafo foaisharani.

¹⁹⁻²⁰ Efe yora mīstichi, fētsa Niospa meka kachikiri fakī anā Jesús Ifofaimano, nā Jesús chanīmara faato yoikī iskafatiro: “A mī afara chakafamis xatefe, anā Jesús Ifofaxii,” ixō yoiaino anā Jesús Ifofatiro. Nāskaxō fētsa mā āfe chakafo xatemanano, Niospa āfe chaka soaxoxii. Nāskakē nā feronāfāke afara chakafapaoni Niospa āfe chaka soaxō, anā Niospa shināchakaima fētsamāi taefakī āfe chaka xatemanano. Nāskakē a omiskōipakenakafa mēra kaima. Nāskakēri mā ato yoisharatiro anā Jesús Ifofanōfo. Nā tii.

Santiago

Pedro Jesús Chanĩmara Faafu Kirika Kenexõ Fomani

Pedro Jesús Ifofaafu paxkanānifono ato kirika kenexõ fomani

¹ Ēkia Pedro. Jesucristo ea nĩchini aõnoa ē ato yomis inõ. Niospa mato katonĩ afe yorafo mã inõ. Akka mato potaifono mã Jesúsnoax paxkanānino ē mato kirika kenexõ fomai mã tāpinõ. Ponto anoafu fomata, Galacia anoafu fomata, Capadocia anoafu fomata, Asia anoafu fomata, Bitinia anoafu fomata, ē mato fomai.

² Epa Niospa taefakĩ mato katonĩ mã afe yorafo inõ, āfe Yõshi Sharaõxõ nã mato amapaiyai keskara mã anõ, mã Jesucristo nikasharakõinõ. Akka āfe Fãke Jesús mato nãxonĩ āfe imiõxõ mãto chaka mato soaxoxiki. Niospa mato noikĩ mãto õiti mato sharafaxonõ ixõ ē matoõnoa shinãĩ.

Jesucristoõnoax nõ Nios fe ipaxatiro

³ Nãskakē nõko Ifo Jesucristo āfe Apa Nios nõ aicho fatiro: “Mĩ fãsi sharakõĩ,” ixõ nokomãĩ noikõiaino āfe Fake Jesucristomãĩ nõkoõnoax naax anã otonikē. Nãskaxõ fake yome rama kãia keskara shara noko imai õiti fenasharayakõĩ. Nãskakē nõ afe isharakõipakenaka.

⁴ Nãskaxõ noko ĩkisharapakenaka nõ afe ipaxanõ. Akka nõ āfe fakekē nã nai mēraxõ noko mekexona nõkonãri ixii. Nã Niospa noko mekexona afanã afeskafatiroma, chakanari atiroma, askatari keyotiro. Charofo keskarama. Charofo sharashtafix chipo otsi fetsetiro. Nãskakē nãfo Niospa noko mekexona nõkonã inõ.

⁵ Akka mã Nios chanĩmara fake, Epa Niospa āfe sharaõxõ mato kexesharafafãini nã Jesús oaitĩa mã omiskõinõma, nã oaitĩa afe isharapakexakĩ a mato itipinĩshara faxoni ano.

⁶ Nãskakē mã inimai finakõĩkakaini, omiskõifi nono mai anoax. Mã omiskõifix chipo Jesús fe mã isharakõipakenaka.

⁷ Akka mã Jesucristo chanĩmara fakõini mã oa oro keskara. Akka kooaito mã õitiro orokõimãki, chakaya osiyamaito. Nãskarifiakĩ Niospa noko tāpitiro nõ chanĩmara faimãkai, akka oro sharafiano nõroko finõinĩfõfana. Akka nã oro sharafix keyotiro. Akka mã Epa Nios chanĩmara fasharakõiyã nã Jesús potayamaino Jesús anã nãmã matoki fotoax inimasharakõixii. Iskafakĩ mato yoixii: “Aicho, mĩ ea chanĩmara fakõimis. Mĩ efe isharakõipakenaka,” ixõ mato yoixii.

⁸ Mã Jesucristo noisharakõĩ õiyamafikatsaxakĩ. Askatari iskaratĩ mã chanĩmara fakõini õiyamafikatsaxakĩ. Nãskakēri mã inimai finasharakõiyã mã tsoa yoisharatiroma.

⁹ Nõmãĩ chanĩmara fasharakõiax, nãskax nõ afe isharakõipakenaka.

¹⁰⁻¹¹ Nã Niospa meka yomisfãfe a inõpokoai yoikakĩ Cristoõnoa meka shara yoipaonifo, Niospa Yõshi Sharapa ato shinãmanaino. Iskafakĩ yoinifo: “A noko noikĩ noko ifimis nokoki oxii, mato omiskõioxoxiki mã aõnoax isharanõ,” ixõ kenenifo. Ato askafafaino tsõa tāpisharapaonima afeskaxoma tāpisharapaipaonifo. ¿Tsoamē noko ifimis ixiaĩ afetiari oximē? ixõ shinãpaipaonifo.

¹² Akka Niospa Yõshi Sharapa ato tāpimani a inõpokoai yoiaifo keskara, akka afãfe niyokaxõ õiyonifoma. Akka afãfe õiyamafiaifono mãroko mã mã õia. Akka na meka shara Jesucristoõnoa keyokõichi mã nõ nikamis. Noko yoiaifãfe Epa Niospa āfe Yõshi Shara atoki nĩchini nai mēraxõ Jesucristoõnoa noko yoinõfo. Nã mã nikamis keskarari Niospa ājirifãferi tāpipaikõikani.

Epa Niospa noko yoini Jesucristo keskara shara nõ inõ

¹³ Nãskakē itipinĩsharakãfe shinãsharakõiyã. Nã Niospa noko noikĩ noko afara shara inãixiatĩa Jesucristo oaino. Nãskakē manasharakõikãfe.

¹⁴ Mãfi Niospa fakefoki. Nãskakē Epa Nios nikasharakõikãfe. Mato amapaiyai keskara mã tāpiyopaonima. Mã afara chakafapaoni keskara anã ayamakãfe.

¹⁵ Askatamaroko afaa fetsa shinãtama isharakõikãfe. Akka Nioskai afaa chakaya osiama. Niospa mato katonĩ a keskara shara mã inõ.

¹⁶ Akka Niospa meka kenekĩ iskafanifo Niospa ato shinãmanaino: “Ē isharakõimiski. Nãskakē isharakõikãfe,” ixõ Niospa ato shinãmanaino kenenifo.

¹⁷ Shinãkapo. Mã Epa Nios kifiki Epa mã famis. Nãskax nõ āfe fakefokē noko õi. Akka a āfe meka nikamisfo Niospa ato shara fai. Akka a nikamisfoma ato omiskõimatiro. Ares fisti Epa Niospa noko õimis mēstekõĩ. Nãskakē isharakõikãfe nono nãmãnoax. Nãskaxõ Nios shinãsharakãfe meseyã.

¹⁸ Akka mãto xinifãfe mato tāpimapaonifo keskarato mato nimapakexatiroma. Mãto xinifo Nioski mesepaonifoma. Āakõĩ ipaonifo. Nãskakē mãri ato keskara ipaoni chaka shinãĩ. Mã askaito Niospa mato ifini mã anã chaka shinãyamanõ a mã ipaoni keskara Nios shinãmax.

Akka shinākapo. Mā mā tāpia a oro sharakōi mā Nios ināx mā aōnoax nīpaxatiroma. Askatari kori exe mā ināx aōnoaxri mā nīpaxatiroma.

¹⁹ Akka Cristo fistichi noko nimatiro. Atokai afaa chakafamisma, nā oveja fake meema keskara sharakōi. Jesús noko nāxoni āfe imi foni noko imasharapakexakī nō anā chaka inōma.

²⁰ Epa Niospa mai onifatama āfe Fake Jesús katonni noko nimapakexanō. Nāskafekē fetsafāfe tāpiyopaonifoma, akka iskaratīa Epa Niospa mā mato tāpimana.

²¹ Jesucristoōxō mā Epa Nios chanīmara fai, Epa Niospa Jesucristo otoax akiki inimakōini. Nāskakē mā iskaratīa chanīmara fakōini, Nios manakōiyanā afe ipaxakī.

²² Akka mā mā Jesucristoōnoa meka shara nikakōixō anā afaa chaka shināyamakī. Mā mā isharakōixō mā fetsafo noikōi. Nāskakē māa ranā nōinā faatanāsharakōikāfe mato shinā sharafoyxō shināsharakōita.

²³ Nāskakē nā mā rama fake kāia keskara shara mā. Akka mato epa feta mato ēfa mato fake fifiakanax chipo natirofo. Akka Niospa āfe meka sharaōxō fena keskara shara noko ima, nā keyonakama.

²⁴ Akka kirika ano kenekī iskafanifo:

Keyokōi yorafo fana keskarafo, sharakōifikanax nā charofo keskarafo. Akka nā fanafo naino āfe charofo keyopaketiro. Nāskarifiāi keyokōi yorafo nīpaxatirofoma, keyokōi natirofo.

²⁵ Akka nōko Ifāfe āfe mekakai keyonakama, ixō kenenifo. Nā mekaōnoa Jesucristoōnoa fetsafāfe mato yoisiffo mā afe ipaxanō.

2

¹ Nāskakē nā mā afara chakafamisfo xatekāfe. A mā ato pāramisfo, askatari a mā ato feparamisfo: “Noko sharara fanōfora,” ixō nāfori xatekāfe. Nāskatari a fētsa fiaī tū fipai fekaitemis iyamakāfe. Askatari fetsafo ato chakafapai chanīmis iyamakāfe.

²⁻³ Askatamaroko nā fake rama kāiaato yosixiki chocho apaiyai keskafakī, māri Niospa meka shara fichipaikāfe, oa fake yomē chocho aki yositiro keska shara ixikakī. Mā mā tāpiaki nōko Ifāfe mato shara faxōaito. Nāskakē nā Epa Niospa mato amapaiyai keskara fisti akāfe.

Cristo nā tokiri mitsisipa keskaraki

⁴ Nō pexe fakī tokiri mitsisipasharakōi nō fenatiro, pexe mitsisipa sharakōi inō. Akka tokiri mitsisipakima nō pexe faano pexe shara itiro. Nōko Ifo Jesucristofi nāskarakī oa tokiri mitsisipakōi keskara shara. Nāskaxō afama mīshti fatiro. Nāskafekē tsōa chanīmara famisma, nōko Ifo fichipaimisfoma. Nāskaxō yoisiffo iskafakakī: “Afeskakīkai nō fichipaitiro,” ixō yoisiffo. Akka Epa Niospa Jesús katonni noikōikī nōko Ifo inō. Nāskakē akiki fekāfe Ifofaxikakī.

⁵ Nāskarifiakī Niospa mato tokiri pexefā keskara faxii mā afe yorafokē. Askatari mā ato Epa Nios kifixomis inō mato imaxii afaaya osiama sharakōi mā inō Jesúsnoax, Jesūsmāi noko nāxonikē. Nāskakē Nios aicho fakāfe akiki inimakōikāfe, “Epa Niosi, mī fasi sharakōi,” fayanā.

⁶ Akka kirika ano kenekī iskafanifo, Niospa ato shināmanaino:

Ōikapo, ē Cristo ōia ares fisti sharakōi. Nāskakē ē katonni efe yorafo afe yora inōfo. Nā tokiri mitsisipa keskarakōiki. Nāskakē afe yorafo afe isharakōipakenakafo. Nāskaxō Cristo chanīmara fakaxō anā afaa chaka shināpakenakafoma. Askatamaroko afe inimakōipakenakafo, ixō Niospa yoīni.

⁷ Nāskakē nō Jesús Ifofaxō nō shināki iskafatiro: “Jesūsfi nā tokiri kerex keskarakōikī, nāskax sharafinakōiaki,” ixō nō shinātiro. Akka a Jesús Ifofaifāfema askara shinākanima: “Oa tokiri shara nō potatiro,” keskafakani. Akka aōnoa yoikī kirika kenekī iskafanifo Niospa ato shināmanaino:

Oa tokiri pexe famisfāfe tokiri efapa shara potafono, pexe ifāfe ato yoitiro iskafakī: “¿Afeskakī na tokiri efapa mā potaimē? Potayamakāfe, efapa sharaki. Ē fichipaikai ē akiki pexe fanō,” ixō pexe ifāfe yoitiro, ixō yoīnifo Jesúsnoa yoikakī.

⁸ Askatari kirika kenenifo iskafakakī Niospa Yōshi Sharapa ato shināmanaino:

Tokiri efapafai nēxpakīa rakano tsōa ōiamax akiki otisikaini paketiromo keskakani. Nāskarifiakani tsōa nōko Ifo chanīmara fakanaxma, oa pakeai keskarakanax fenokanax Epa Nios ika ari fopafikani nā omiskōipakenakafo mēra fokani, ixō kenenifo. Niospa anori yoifinino Cristoōnoa nikayamakanax fenopakenakafo. Nānori kirika kenenifo, Niospa ato shināmanaino.

⁹ Akka māfi askaramakī. Niospa mato katoni afe yorafo mā inō. Nāfi nōko Xanīfokōikī mā yonoxotiro, fetsafori mā ato kīfixotiro Jesúsnoa ato tāpimaxiki. Noko aa keskara shara imaino mā afe yorakōi itiro. Nāskaxō aōnoa fetsafo mā yoisharatiro iskafakī: “Epa Nios sharafinākōia afara noko sharafaxomis,” ixō nō ato yoitiro. Epa Niospa mato katoni afe yorakōifo ikax xafakiākōi shara mā afe ipaxanō, anā fakish mēra ika keskara mā inōma.

¹⁰ Akka māakai Nios shināyopaonima, afe yorakai mā iyopaonima. Akka iskaratīa mā afe yorafo, taeyoi Niospa mato noifiaino mā tāpiyopaonima. Akka iskaratīa mato noikōiaito mā mā tāpia.

Nō Niospa yorafo ikax nō shara itiro

¹¹ Efe yora mīshtichi, ē mato yoisharapai ea nikasharakāfe. A Nios Ifofaafomafo fe nō ato fe ikax oa yora fetsa keskara nō iki. Askafīax nōkai ato fe ipanakama. Akka nōroko Epa Nios fe ipanaka. Nāskakē nā Epa Nios Ifofaafoma keskara iyamakāfe. A mato shināmapaiyaifo keskara shināyamakāfe. Mā ato keskara itiroki, Satanās mato chakafamapai kiki.

¹² Nāskakē ato mēranoax Jesús Ifofaax isharakōikāfe. Akka afāfe mato yoikī chakafamisfo fanīrira mato mekafakakī. Nāskakē ato kopiyamakāfe. Tanaimakōi ato mēra ikāfe. Mā askaito mato ōinōfo mā afaa chakafatama mā isharakōikē a Niospa keyokōi noko ichanāfaitīa mā mai keyoaino. Nāskakē mato iskafakani: “Aicho, na yorafo fāsi sharakōifo, nō ato chakafafaino noko kopikanima, Niosxō noko shara famisfo. Fāsi Nios sharakōi,” ixō yoinōfo.

¹³⁻¹⁴ Nōko Ifo Jesús fichipaiyai keskafakī, xanīfofo nikasharakōikāfe. Askatari a noko īkinā nōko xanīfo finakōia nikasharakōikāfe. A xanīfo fetsafori ato nikakāfe. Nā xanīfo finakōiato ato xanīfo imakī, afāfe nā afara chakafaifo ato omiskōimanōfo, askatari a afara shara famisfo ato yoisharanōfo.

¹⁵ Nāskakē Niospa fichipaiyai keskafakī mā fetsafo afara shara faxōfafāikāfe. Nā afaa tāpiamafāfe shara shināmīsfomakī, askatari Niospa meka tāpiafomakī ōikaxō anā mato mekafatirofoma māmāi ato shara faxōaito a Niospa fichipaiyai keskafakī.

¹⁶ Jesús fisti mātō Ifokōi, akka afaa fetsa shinātama isharakōikāfe. Niospa mato amapaiyai keskara fisti shinākāfe. Mā askax afaa fetsa mātō ifo itiroma. Afaa chakafatama Nios yonosharaxōfafāikāfe.

¹⁷ Nāskakē keyokōi yorafo shināfafāikāfe. Nā Jesús Ifofaafari ato noikōikāfe. Niosnoa shinākōikāfe iskafakī: “Ē Nios noikōi nā ea yoiāi keskara ē nikakōi. Ēkai nikayospapaima ea omiskōimanōma,” ixō Niosnoa shinākāfe. Nāskaxō mātō xanīfofo nikakaspayamakāfe, ato nikasharakāfe.

Cristo noko omiskōixoni keskai nōri nō aōnoax omiskōitiro

¹⁸ Ato yonoxomisfāfe mātō xanīfofo ato nikasharakōikāfe. Nā mato sharafaifos shinākakīma. Nā yora chakafāferi mato yonomamisfoki ato nikakāfe.

¹⁹ Mā afaa chakafayamafīakē mātō xanīfāfe mato omiskōimanaino Nios shināki tenekāfe. Mā askaito Epa Niospa matoōnoa yoisharai kiki.

²⁰ Akka mā afara chakafakē mātō xanīfāfe mato omiskōimanaino, Niospa mato iskafakī yoitiro ma mā teneaito: “Mī afara sharakōifaa,” ixō mato yoitiro ma māmāi afara chakafakē. Akka mā afara sharafaino mato omiskōimanaifono mā omiskōifinafikī mā tenekē, nōko Ifo Niospa matoōnoa yoikī: “Sharakōifo,” mato fatiro.

²¹ Cristo nokoōnoax omiskōikōini, nāskakē nōri aōnoax nō omiskōitiro. Nāskax nō aa keskara shara itiro.

²² Cristokai afaa pishta chakafamisma, askatarikai tsoa pishta pāramisma.

²³ Fetsafāfe mekafakakī īchafīaifono, atorikai kopikī tsoa īchamisma. Askatari omiskōimanaifono, “Ēri mato kopixii,” ixō ato yoinima. Askatamaroko Apaōnoa shināki iskafani: “Epa, mī eōnoa tāpiaki. Nāskarīfakī mī ato tāpikōia. Nāskakē a mī ato chipo omiskōimaxiai chanīmakōi,” ixō Apa shināni, Apamāi mēstekōi ikē.

²⁴ Cristo cruznoax noko nāxonī, nōko chaka noko soaxoxiki. Nāskakē nō anā fanīrira shinātiro oa yora naa keskara nō itiro mā noko chaka soaxonano nō afe isharpapakexanō. Māraki yora naato afaa shinātiro. Nāskax mēstekōi nō isharakōitiro. Nā noko omiskōixoniōnoax nō isharakōipapakexanō.

²⁵ Akka mā taeyoi oa oveja fenoa keskara mā iyopaoni afara chaka shināi. Akka iskaratīa mā Cristo Ifofasharakōi, mato kexesharano oa oveja kexemisto āfe oveja kexetiro keskafakī. Nāskaxō mato kexesharakōiaino mā afe yora iki.

3

Afeskax fene fe kēro isharatirofomāki Pedro ato yoini

¹ Nāskarifiakī māri kērofāfe, mātō fenefo nikasharakōikāfe. Nā Niospa meka shara chanīmara faifāfema mā isharaīto mato ōikakī Niospa meka shara chanīmara fanōfo, mā afaa yoiyamata mā isharakōiaito ōikakī.

² Mātō fenefāfe mato yoiāifono ato nikakaspakakīma ato nikasharakāfe. Mā Jesús keskara shara ikaito ōikakī nōko Ifo chanīmara fanōfo.

³ Akka mā samasharakōi safexō, foarome sharakōita, teoti sharakōi safeta, parotameti sharakōi mā safekē, mato tsōa tāpitiroma mā ōiti sharaya iyamai mā ōiti chakayakē.

⁴ Akka mā Cristo Ifofasharakōixō mā ato ōimasharakōitiro. Mātō ōiti mēraxō shināsharakōita, meka mitsisipato mā ato yoitiro, tanaīma sharakōi mā itiro. Fetsafo ōikī ato yoisharakāfe, ato fe isharakāfe. Mā askaito ōikī Niospa mato iskafatiro: “Na kērofo sharakōifo ē ōi,” ixō Niospa mato yoitiro matoki inimayanā.

⁵ Nāskakanax kērofo ranāri Nios Ifofasharanax isharakōipaonifo. Nāskaxō āto fenefo nikakōisharapaonifo.

⁶ Akka nā Sara āfe fene Abraham nikakōisharapaoni, “Ēfe ifora,” fayanā. Nāskax mā isharakōiax, askatari mā meseyamax Sara āfe fenafo keskara mā itiro.

⁷ Akka māri feronāfakēfāfe, mātō āfīfo ikisharakōikāfe. Nā kērofokai mitsisipafomakī mato keskara. Nāskakē ato kexesharakāfe, mato feta Nios Ifofaafoki Niospa ato noikī atori ifiakī afe ipaxanōfo. Nāskakē mātō āfīfo ato noisharakāfe. Mā ato noiamax ato kexesharaxoma mā kīfaiito Niospa mato nikasharatiroma.

Afara ato sharafaxōkani omiskōitirofo

⁸ Nāskakē isharakōixō keyokōichi nānori fisti shināsharakāfe. Oa mato fe yora mā noiai keskafakī ato fe nōinā faatanāsharakōikāfe. Ato shinākī ato axosharafafāikāfe. Askatari, “Nā yora afaa tāpiamafo ē finakōia,” ikaifo keskai askayamakāfe.

⁹ Fētsa mato chakafaito kopiymakāfe. Askatari mato īchaito kopikiri īchayamakāfe. Askatamaroko ato noisharakāfe, akka Niospa noko katonikī noko sharafakī.

¹⁰ Niospa meka yōra kenekī iskafani, Niospa Yōshi Sharapa shināmanaino:

Mā isharapaikī afara chakafo yoiyamakāfe, fetsafo pārayamakāfe.

¹¹ Afara chakafo fishtayamakāfe, ato makinoax fotakāfe. Askatamaroko afara sharafos akāfe. Afeskax mā isharatiromākī nāskax isharakōikāfe fetsafo fe.

¹² A Niospa meka nikasharakōipaiaifono Niospa ato kexesharakōifafāini, kīfīaifāferi ato nikakōimis. Akka a afara chakafamisfo Niospa ato nikatama ato tāpimatiro ato chakafakī, ixō yorafāfe Niospa mekaōna kenenifo.

¹³ ŹMā afara ato axosharaino, akka tsōa mato chakafatiromē?

¹⁴ Akka mā askafiaino mato omiskōimanaifono inimai finasharakōikāfe. Nāskakē atoki meseyamakāfe, askatari shināchakayamakāfe.

¹⁵ Askatamaroko nōko ōiti mēraxō nōko Ifo kīfīkī iskafakāfe: “Cristo, mīfi ēfe Ifokōiki. Mīkai afaa chakafamisma, mī sharakōi,” ixō yoiakāfe. Askatari fetsafāfe mato iskafāifāfe: “ŹAfeskaxō mī tāpiamē mī Nios fe ipanaka?” ixō mato yoiāifāfe ato yoixikakī ikisi itip-inīsharakāfe ato tāpimasharaxikakī.

¹⁶ Akka māroko isharakōita ato nikasharakōikāfe, mato ōinōfo mā shara ikaito. Mātō ōiti fekaxtefayamakāfe. Akka mato chakafakī mekaifāifāfe iskafakī mato yoikanax: “Na Jesús Ifofamisfāfe afara chakafamisfo,” ixō mato yoifikanax rāfītirofo māmāi isharakōikē.

¹⁷ Akka nō afara shara faino fetsafāfe noko omiskōimanaifono nō teneaino Epa Nios nokoki inimatiro. Akka nō afara chakafaax nō omiskōiaino nokoki inimatiro.

¹⁸ Akka Cristo nokoōnoax omiskōiax nani nōko chaka noko soaxoxiki. Anākai nanakama nai fistini. Sharakōifiano retenifo. Akka nō chakakōifokē noko nāxonī. Apa Nios ano noko imapakexakī. Akka mā nafīax āfe fero mēsho nanima, anā otoni Āpa Yōshi Sharaōnoax.

¹⁹ Akka mā naax āfe fero mēsho Niospa Yōshi Sharaōnoax a namisfo mēra kayoni a tsoa tseketiroma ano, anoaxō yoikai.

²⁰ Akka nāfo nayokanaxma taeyoi nikayospakōi iyopaonifo. Nāskaifono Noéri nāno ato fe iyopaoni. Nāskakē Epa Niospa Noé manayopaoni kanōanāfā fayofaino, Noémāi Epa Nios Ifofakē. Āfe fakefori afe inifo, āto āfīfo fe. Ocho inifo. Nāskakē ato fāka āsanima Epa Niospamāi ato kexesharakē. Akka nā nikayospafo ato fakafānē āsakī mitoni.

²¹ Faka faipafāino kanōanāfā mēra ikīax Noé āfe āfi fe āsanima. Āfe fakefori āto āfīfo fe afe ikikanax āsanifoma. Ocho inifo. Nāskarifiakī fētsa noko maotisafakī faka mēra noko ikīmaxō, noko fininīfōfanaino nō yorafo ispai nō Jesús Ifofakī nōko chaka noko soaxonō nō afe ipaxanō. Akka nā noko maotisafafōōxokai nōko choshta nō soatiroma. Askatamaroko nō Nios yōkai nōko chaka noko soaxonō noko ikīpakexanō Jesús māi mā naax anā otonikē. Nāskaxō nō anā shināchakatama Jesucristoōxō nō shināsharakōi Nios fe ipaxakī.

²² Jesús Apa ari nai mēra kani Apa Nios fe xanīfokōi ixiki. Nāskakē ājirifāfe āto xanīfofofāfe Jesús finōtiroma nā yōshifāferi. Askatari nā yōshifāferi xanīfofiakaxō Jesús finōtirofoma Jesúsmāi finakōikē.

4

Epa Niospa noko āfe shara ināi keskafakī fetsafori nō sharafaxotiro

¹ Nāskakē nā Cristo āfe yora omiskōini keskai, māri nāskai omiskōixikai itipinīsharakāfe. Akka nā omiskōiatō anā afaa chaka shinātiroma māmāi āfe chaka xatexō.

² Isharakōixō nā mā apaiyai keskara mā atiroma, nā Niospa mato amapaiyai keskara mā atiro.

³ Mā xini ichapa finōa, nā Jesús Ifoafaafēma apaonifo keskara mā ayopaoni. Nā mā afara chakafapaiyai keskara fisti mā ayopaoni. Māto āfimafo mā fichipaipaoni. Kērofori askapaonifo. Askatari mēxotaima mā pāepaoni, ato fe ichanāx afarafo chakafayanā ayakī finakōiyānā. Askatari afara fetsafo mā noikōipaoni nā Nioskōi noitama.

⁴ Akka mā anā ato fe rafeyamaxō mā anā ato feta afaa chakafayamaito ōikakī. Nāskaxō mato yoikī iskafatirofo: “Ōikapō. Na yorafāfe anā nofeta afaa akanima,” ikaxō mato chakafakī mekafatirofo.

⁵ Akka ato askafaiāfe Niospa ato yoixii iskafakī: “¿Afeskakī māto chaka mā xatekaspakī na fetsafo mā ato chakafamismē?” ixō ato yōkaxii. Ato askafata ato omiskōimaxii. A niyoafoya a namisfo Niospa ato omiskōimaxii, tsōa Ifofatama āto chaka xateyamafono.

⁶ Nāskakē Epa Niospa āfe meka yoimisfo nīchini yorafāfe nayokaxoma Jesucristoōnoa meka shara nikanōfo. Nā namisfāfe niyokaxō nikayopaonifo. Akka mā keyokōi nanifo. Nāskafikē fatora fetsafāfe Jesús chanīmara fakē Epa Niospa nā nia keskara ato imapakenaka afe ipaxanōfo.

⁷ Nāskakē meka fetsari ē mato yoinō. Nikakapo. Mā chaima mai keyoi kiki. Nāskakē shināsharakāfe, afaa chaka shinātama. Epa Niospa mato shināmapaiyai keskara fisti shinākāfe. Nāskaxō Epa Nios fisti kififafāikāfe.

⁸ Nāskax noinā faatanākōikāfe nō noinākōia sharaki. Fetsa noikōixō nō rae fatiro, a noko chakafai keskara anā shinānōma.

⁹ Fetsafo māto pexe ano nokoaito akiki inimayanā māto pexe anoxō ifikāfe, ato mekafakī chakafaxoma.

¹⁰ A Niospa āfe Yōshi Sharapa noko tāpimanai keskafakī nōri fetsafo axosharatiro fetsafāferi Nios Ifofanōfo. Nāskaxō fetsafo afara shara faxokī xateyamakāfe. A Niospa afe yorafo noikōiai keskafakī māri ato noikōikāfe.

¹¹ Mā Niospa meka yoi, nā Nioskōi mekai keskaraōxō ato yoikāfe. Māto shināmā shināxō ato yoikakīma. Askatari mā Niospa Yōshi Sharaōxō mā afarafo ato shara faxōfaito ōikakī yorafāfe iskafakī yoitirofo: “Aicho, Epa Nios sharakōi. Āfe Fake Jesucristoōxō afama mīshitifo fatiro,” ixō yoitirofo. “Epa Niospa ares fisti afarafo shara famis, atokai afaa chakafapanakama. Ares fisti āfe Yōshi Sharaōxō afama mīshti fapanaka,” ixō yoinōfo.

Nō omiskōifiki nō tenetiro nōmāi Jesucristo chanīmara faki

¹² Efe yora mīshitichi, omiskōifiki rateyanā shināchakayamakāfe. Mā askaito Epa Niospa tāpitiro mā Jesús Ifokōi fakē. Nāskakī shinākī iskafayamakāfe: “¿Afeskai ē omiskōimē?” ixō anori shināyamakāfe.

¹³ Askatamaroko inimakōikāfe Jesucristo omiskōiai keskai māri omiskōifiki. Askatari chipo mā inimasharakōixii Jesucristo anā nai mēranoax fotoaino. Nāskakē keyokōichi ōixikani āfe sharafoya nai mēranoax fotokē, nōko xanīfo finakōi ixiki.

¹⁴ Akka mā Cristo Ifo shara faino Cristoōxō mato īchaifono inimakōikāfe. Nāskakē Epa Niospa āfe sharafoya āfe Yōshi Shara matoya rafemani kiki.

¹⁵ Akka fatora mā fētsa mā afaa chakafamiskēma mato omiskōimanaifono tenekāfe inimayanā. Askatari yometsoyamata, askatari afara chakafakī finata iyamata, askatari fetsafāfe afara yoipaiyaifo keskara ato feta ayamakāfe omiskōixikākima. Ato keskara iyamakāfe.

¹⁶ Akka nō omiskōi Nios Ifofaax, nāskakē rāfiyamakāfe. Askatamaroko Epa Nios yoikāfe iskafakī: “Aicho Epa Niosī, ē mī Fāke Jesús afe yora. Nāskakē nā chanīmara faafāfema ea omiskōimanaifono ē Jesúsnoax omiskōi. Aicho,” ixō yoikāfe.

¹⁷ Akka Epa Niospa yorafo keyokōi tāpimaniyoi afe keskara ikafomākī. Taefakī noko ōikī taefaiyoi nōmāi afe yorafokē. Akka chipo nā Jesús chanīmara faafomafori ato yoixii afe keskara ikafomākī. Akka iskaratīa nō omiskōiyoi, anākai nō omiskōinakama nō isharakōipakenaka, Epa Nios fe nai mēra. Akka chipo nā Niospa meka nikakaspaomisfo omiskōi finakōixikani, afokai anā nīpanakafoma.

¹⁸ Niospa meka yoikī iskafakī kenenifo: “Nā Nios chanīmara faifo isharakōimisfo, Nios ari foyokanaxma omiskōiyotirofo. Nāskafikanax mā Nios ari nokokanax anā omiskōinakafoma. Akka nā Nios chanīmara faafāfema afara chakafamisfo nāfo omiskōi finakōipakenakafo,” ixō kenenifo.

¹⁹ Nāskakē nā Niospa mato yoiai keskai mā omiskōifiki shināchakayamakāfe. Nāato mato onifaniki. Nāskakē yoikī iskafakāfe: “Epa Niosi, mī ea amapaiyai keskara fisti ē apai. Meres fisti mī ea yoitiro,” ixō yoikāfe. Nāskax isharakōikāfe nā mato yoiai keskara amiski.

5

Afeskax isharatirofomāki a Nios Ifofafo Pedro ato yoini

¹ Akka nā Niospa meka nikakani ichanāfono ato kexemisfo, ē mato yoisharapai ea nikasharanōfo. Nāskaxō māto shinā mēra ēfe meka nanesharakāfe. Ēri nā Jesús chanīmara faafo ē ato kexemiski. Nōko Ifo Cristo omiskōiaito ē ōini. Anā oaino ēri afe isharapakenaka. Tsōa a keskara ōimisma sharakōi keyokōichi ōixikani. Ēri ōixii a keskara sharafinakōia.

² Nāskakē ē mato yoi nā Jesús chanīmara faafo ichanāfono Niospa mato yoini keskafakī ato kexesharakāfe. Ato Niospa meka yoisharakāfe isharanōfo. Nāskaxō shināki iskafayamakāfe: “Ooa, ē afara fetsafapaifikī ē Niosxō ato kexei,” ixō shināyamakāfe. Askatamaroko a Niospa fichipaiyai keskafakī ato kexesharakāfe ato noiyanā. Nāskakē, “Ea Niospa ato yoimanaino ē ato yoikaspai,” ixō yoiyamakāfe. Anori shinātamaroko inimasharayanā Niospa meka ato yoisharakāfe. “Ē ato yoiaito ea kori inākani kiki,” ixō shināyamakāfe. Anori shinātamaroko ato Niospa meka yoisharakāfe inimayanā.

³ Nāskata āto xanīfo ipaikakīma ato ōimasharakāfe afeskaxō Jesús Ifofasharax isharatirofomāki.

⁴ Mā askaito a noko kexemis, nōko Ifo Jesucristo anā nāmā fotoxō mato ōisharaxii. Nāskaxō mato afara shara ināxii a keyonakama. Nāskakē mā afe ipanaka.

⁵ Nāskarifiakī māri naetapafāfe anifofo yafi a mato Niospa meka yoisiffo nikakōisharakāfe. Naetapafāfe anifofo fe isharakōikāfe. Nāskata mā ranā axoshara faatanākāfe. “Ē xanīfoki,” iyamakāfe. Akka, “A xanīfo nīpaikani kakapaimisfoki Nios atoki inimaima. Akka a kakapaimisfomaki Nios atoki inimayanā ato afara axosharai ato noikī,” ixō kenenifo Niospa meka yoikakī.

⁶ Ēpa Nios finakōixō afama mīshti famis. Nāskakē kakapaimis iyamakāfe. Anori shinātamaroko iskafakāfe: “Epa Nios finakōia. Ē afaa tāpiama,” ixō yoikāfe kakapaimis ikakīma. Mā askaito Niospa ato mánāo mato nīchixii xanīfo keskara mā inō.

⁷ Askatari afaa shināchakayamakāfe. Afaa shinātamaroko Nios yoikāfe mato kexesharanō. Niospa mato noikī mato kexesharaino anā māto ōiti fekaxtefayamakāfe.

⁸ Shināsharata mēste shinākāfe. Satanás noko noikaspakī noko chakafapai kiki, oa poomā fonāiki kafāsakī yoinā fenai keskaraxō. Satanás chakata noko afara chakafamapaimiski Niosnoa tsōa shinānōma, Satanás ato chakafamaino afe yora inōfo.

⁹ Nā mā omiskōiai keskariai nā nōko Ifo chanīmara faa fetsafori maitio anoax omiskōikani. Nāskakē Satanás mato afara chakafamapaiyaito nikayamakāfe. Māto Ifo fistiroko chanīmara fakāfe. Afara chakafayamakāfe.

¹⁰ Niospa mato noikōikī mato katoni, Cristo ika ari mā afe isharakōipakexanō nā shara-finakōia ano. Nono mai ano mā iyoax mā aōnoax omiskōiyoi. Mā askaino Ēpa Niospa māto ōiti mato kerex faxōi. Nāskaxō afara afeskara afiaino mā tenekōixō mā Jesucristo Ifofasharakōixii.

¹¹ Nāatofi afama mīshtifo fapanakaki. Nā fistichi atiro keskafakī tsōa askafatiroma. Nā fistichi askafāpanaka.

Mā mekai xatekī Pedro ato meka shara yoini

¹² Ēfi Silvano shinākōimis. Ē tāpia nā Niospa amapaiyai keskara amiskē. Akka nā ē mato yoipaiyai anori ea kirika kenexoni. Na kirika ichapama ē mato kenexoni māto ōiti mato inimamasharakōixonō mā shināsharakōinō. Ē mato yoi chanīmakōi Niospa noko noikōi. Nāskakē nānori fisti shinākāfe fanīrira shinākakīma.

¹³ Jesús chanīmara faafo ichanāmisfo mēraxō Babilonia anoafāfe mato yoisharakani. Ēfe fake Marcosi mato yoisharapai. Nāfori Niospa katoni afe yora inōfo, noko akai keskafakī.

¹⁴ Māri mā nōinā faatanāi yoinōnāsharakāfe. Mā Cristo yorakōifoki, nāskakē inimasharakōikāfe. Nā tii.

Pedro

Pedro Jesús Chanīmara Faafō Afianā Kirika Kenexō Fomani

Pedro Jesús Ifoafafo ato kirika kenexō fomani

¹ Ēkīa Simón Pedro, Jesucristo ē yonoxomis. Aōnoa yorafo āfe meka shara ē ato yoinō ea nīchini. Nāskakē ē mato kirika kenexō fomai, mā mā nōko Ifo Jesús mā chanīmara fakī finakōiano ē akai keskafakī. Nā nōko Ifo Nios feta Jesucristo noko ifimis nā ē chanīmara famis nāmāi isharakōimiskē.

² Akka Epa Nios yafi nōko Ifo Jesús mā tāpikōikē matoōnoa shinākī mato inimamakōikī mato ōiti mato inimamaxotiro tanaima sharakōi mā inō.

A Nios Ifoafafo afeskax isharatirofomāki

³ Niospa noko katoni a keskara shara ikax nō afe Īpaxanō. Nāatofi afama mīshti fatiroki. Nō Nios tāpikōikē afara nō yopaito āfe kerex sharaōxō noko ināxii. Nāskaxō noko amapaiyai keskara nō anō.

⁴ Nāskakē noko yoiyoni keskafakī āfe kerex sharaōxō afara sharakōifo noko axoxii a keskara sharakōi nō inō. Akka a nikakaspaifāfe nā afara chakafapaiyaifo keskara fisti amisfo. Nāskaifono Niospa noko imasharai nō ato keskara inōma.

⁵ Nāskakē nā mato imapaiyai keskakāfe, chanīmara faax a keskara sharakōi ikāfe. A keskara sharakōi mā ikaino, Niosxō mato amapaiyai keskara fisti tāpikāfe.

⁶ Akka nā mā apaiyai keskara fisti shinākakīma, kexemesharax aōnoax isharakōita afara afeskaraino tenekōita Niosnoa fisti shināfafāikāfe.

⁷ Askatari keyokōi yorafo sharafata oitsifaxō ato noifafāikāfe.

⁸ Mā askafakī nōko Ifo Jesucristo mā tāpikōitiro. Nāskaxō nā mato amapaiyai keskafakī mā yonoxosharakōitiro.

⁹ Akka mā askafayamai oa fēxo keskara mā itiro, ōisharaima. Nāskakē mato chaka mā mato soaxofiano mā anā shināima, mā mā shināmakiāx.

¹⁰ Nāskakē efe yora mīshtichi, Niospa mato ifikī mato shināmani mā afe yorakōifo mā inō. Nāskakē afe yorakōi isharapaikōikāfe. Shināsharata isharakōikāfe. Askafaax mā anā afara chakafo ifofaima.

¹¹ Mā askaito ōikī mato ifisharakōixii a ika ano mā afe Īpaxanō nōko Ifo fe. Nōko Ifo Jesucristo noko ifimis.

¹² Nāskakē ē mato shināmafāāini, mā mā tāpifekē, nāskakē iskaratīa na meka shara mā mā tāpikōi nā fisti mā shinākōimis.

¹³ Akka ē nayoxoma ē mato yoisharafafāini,

¹⁴ mā mā nōko Ifo Jesucristo ea tāpimanano ē chaima naino.

¹⁵ Nāskakē mēxotaima ē mato yoirifai mē naano nā ē mato yoyimis keskara mēxotaima mā shināfafāinō.

“Cristo Niospa Fake chaxapakekafanaito ē ōini,” ixō Pedro ato yoini

¹⁶ Nō mato yoyimis nōko Ifo Jesucristo āfe kerex sharaōxō afama mīshti fatiro. “Anā nokoki oxii,” ixō nō mato yoyimis. A yorafāfe yoipaonifo anori nō mato yoyimisma. Akka nōko feroikōichi nō ōini, nōko Ifāfe chaxapakefōfānaito.

¹⁷ Askatari āfe Apa Niospa iskafakī yoini: “Nafi ēfe Fakekōikī ē aō noisharakōi, ē akiki inimakōi,” ixō yoini.

¹⁸ Nōkōi nikani nai mēranoax mekai askaito. Nā māchifā ano nōko Ifo fe nō ini, nā māchifā anoxō nō nikani anoax Nios mekaito.

¹⁹ Akka a Niospa meka yoipaonifāfe a inōpokoai keskara yoikakī Jesúsnoa kenenifo keskara nō chanīmara fakōitiro. Nāskakē māri mā na meka mā chanīmara fakōitiro. Oa rāparinī fakish mēraxō chaxatiro keskafakī, akka mā penano xafasharakōitiro. Nāskarifakī mā Niospa meka nikasharaino Epa Niospa mato ōiti mēra oa pena keskara mato fatiro.

²⁰ Akka taefakī iskara tāpikāfe. A Niospa meka yoipaonifāfe āa āto ōiti mēraxō shinākaxō kenepaonifoma.

²¹ Askatari āa āto shināmā shināxō yoipaonifoma. Askatamaroko Niospa Yōshi Sharapa ato shināmanaino nānorikōi ato yoipaonifo. Nāskakaxō a Niospa Yōshi Sharapa ato shināmanai keskara kenepaonifo.

2

*Fetsafāfe chanī fisti ato yoipaonifo
(Ju. 4-13)*

¹ Akka, “Nō Niospa meka mato yoinōra,” ixō āa nōko xinifo ato pārapaonifo. Nāskarifiakī mato mēraxō mato pāramisfo, “Nō Niospa meka mato yoinōra,” ikaxō. Afāfe mato pārakani fanīrira mato yoikani mā anā shināsharanōma. Akka nōko Ifo Jesús ato nāxoni afara chaka āto ifo inōma. Nāskakē a nōko Ifāfe noko tāpimapaoni keskara chanīmara faafoma. Nāskakē nāfo Epa Niospa ato omiskōimarisafaxii omiskōipakexanōfo.

² Nāfāfe afara chakakōifo ato tāpimanaifo keskafakī yora ichapafāfe ato nikamisfo. Nāskakaxō atoōxō Niospa mekaōnoa chakakōi fatirofo. Nāskakē a Niospa ato shināmapaiyai keskara shinākanima mā fenoafo.

³ Nāskakaxō kori fisti noikōimisfo, “Nō mato yoinōra,” ixō mato pārakani. Akka a afara chakafaifo keskara mā Niospa tāpia fatora penata ato tāpimani omiskōipakexanōfo. Afetīama Niospa shināyoni a yora chakafo ato omiskōimapakexakī.

⁴ Epa Niospa āfe ājirifo āto chaka ato soaxonima afara chakafaifāfe. Askatamaroko chiifā mēra ato potani, anoax fakishifā mēra ipaxanōfo kaninānā ato metexkere axō. Nā ato ichanāfaitia ato yoixō ato omiskōimaxii.

⁵ Nāskatari nā yorafo Noé niyoatīa Niospa meka nikakaspafono Niospa āto chaka ato soaxonima. Askatamaroko oi kaya imani faka faipafaxō a yora chakafo ato āsakī mitonō. Akka Noé fisti āsanima. Nā Noé ato yoiyopaoni iskafakī: “Nios sharakōikī mātō chaka xatekāfe a keskara shara ixikakī,” ixō ato yoipaoni. Nāskakē Noé āsanima afe yora sietefo fe Niospa ato kexesharano.

⁶ Nāskatari Niospa pexe rasi Sodoma yafī Gomorra pāoakī fetsaxō kooakī mitoni, mapokōifakī. Nāskakē nā rama chipo ixiaifāfe tāpinōfo yora chakafo keyokōi Niospa ato omiskōimaxiai.

⁷⁻⁸ Akka Lot fisti nanima Niospa nimasharakōini. Nā feronāfakemāi sharakōikē, nāto ōipaoni yorafāfe anoxō chaka shināifāfe. Nā Lot fekaxtekōini, nā yora chakafo askaifāfe ōi.

⁹ Nāskakē nōko Ifāfe afe yorafo kexesharatiro afarafo ato chakafamapaiyai keskara anōfoma. Nāskaxō nā afara chakafamisfo ato omiskōimakī nā omiskōipakenakafo mēra ato potaxii anoax omiskōipakexanōfo.

¹⁰ Nāskakē Niospa ato omiskōimaxii āa shinākaxō afara chakakōi famisfono, nōko Ifāfe āfe meka sharari nikakaspamisfono. Afāfekai afaa tāpiafoma. Mesetamakōi ato ichamisfo a nō ōimisma nai mēranoa xanīfo finakōiafo.

¹¹ Akka nā ājirifo xanīfokanax afokai askamisfoma. Afāfe tsoa ichamisfoma nōko Ifāfe ferotaifi. Askatamaroko yoikī iskafamisfo: “Āa Niospa ato tāpimanō omiskōimakī,” ixō shināmiso āfe ājirifāfe a yora chakafāfe chakafafiaifono ato afeska fapaimisfoma.

¹² Akka na yorafo yoinā keskarafo, afaa tāpiafoma. Afaa shināima ikafo. Nāskakē achixō reteti-rofo. Afāfe afara chaka yoimisfo ōiyamafikakī, nāskakē afori naxikani na yoināfo natirofo keskakani.

¹³ Fetsafo omiskōimakatsaxakakī afori omiskōixikani. Afāfe afarafo chakakōifo fakakī sharakōimeyokani. Akka nā mato pāramisfo mato fe ichanāfo Jesús nikayamafikatsaxakakī. Anoxō mato feta piyanā mato pārapaikani. Akka māfi askaramakī mā noināsharakōita ano fisti ichanāxō mā piisharamis. Mā askafiaito a ato pāramisfo mato fe ichanāpaikani mato fanīrira chakafo yoipaikani mā anā shināsharanōma. Inimakōiyanā nā mato pārapaiyai fisti yoipaikani.

¹⁴ Askatari kēro fetsa ōikakī akiki nokofenepaikakī chotapaimisfo, chaka fisti shināmiso. Akka kēromā Jesús Ifofayamaxō ato fichipai ato fe ixiki. Askatari a chanīmīsfāfe Jesús Ifofasharamisfoma ato chakafamapai ato feta afarafo chakafanōfo ato ōikakī. Askatari ato afama mīshiti ato fichipaimisfo mā askara feyafamisfo. Niospa nā keskara yorafo ato omiskōimani omiskōipakexanōfo, yora chakafomāiano.

¹⁵ Nāfo fofāsakani mā fenoafo, Niospa meka shara kachikiri fakanax nā Balaam ipaoni keskarafo. Nā Balaam Niospa meka yoimis iyopaoni, Beorpa fake. Mā Niospa meka yoipaofinixakī kori kaya fichipaini, afara chaka shinākī.

¹⁶ Niospa yoiaino Balaam āfe burro nā yora mekai keskani. Nāskaxō āfe ifo iskafakī yoini: “ĀAfeskakī mī ea koshaimē?” ixō nā burropa yoini. Askafaito nikai Balaam oa yōra shināsharaima keskarakōi ini.

¹⁷ Na feronāfakēfo faka fiti anoa faka netsoa keskarafo. Afaakai tāpiafoma, nāskaxō Niospa meka shara noko tāpimatirofoma. Askatari mā oi fei kiki ixō, nai kōi choshta nō ōifiaino, nēfe nai kōi potatiro keskarafo. Nāskaraxō noko pāratirofo: “Niosnoa nō mato yoirā,” ikaxō āa shināi imisfo Niosnoa yoikōimisfoma. Nāskakē Epa Niospa ato potaxii fakishifā mēra ipaxanōfo.

¹⁸ Nāfo chanīkani kakapaimisfo. Nāskaxō yoimisfo iskakani: “Nō tāpia keskafakī tsōa tāpiana. Nā tsōa atiroma keskafakī nō tāpikōia,” ixō āa yoikani chanīfinamisfo. Nāskakaxō a rama Nios Ifofapaikakī āto chaka xatepaiyaifo ato yoitirofo iskafakakī: “Mī fetsa āfe

āfi fe ika sharakī, nāskax mī afe inimakōitiroki, nō anō kafe,” ixō fētsa iyotiro afara chakafamaxiki.

¹⁹ Afāfe iskafakī yoimisfo: “Mā afara shara faōnoaxkai Nios fe mā Īpaxatiroma. Akka nā mā afarafo apaiyai keskafakāfe. Nā mā apaiyai keskafaino tsōa mato xatematiroma inimayanā akāfe,” ixō ato yoikakī anorima ato yoikani. Afori isharamisfoma, āa pāramemisfo. Afara chakafo āto ifo, nāfo Satanās ināfo. Nāskakē shināsharakanima. Chaka fisti shināmisfo.

²⁰ Akka nōko Ifo Jesucristo nā noko ifimis, nō nikakōixō nā nikaifāfema afara chakafaifo keskafakī, anā afaa chakafakanima. Nā afara chakafo makinoax paxkatirofo anā āto ifo inōma. Akka anā afara chakafaifono afara chakakōi ato mēra nanetiro a ipaonifo keskara chakafinakōia inōfo.

²¹ Akka afo shara ikeranafo Jesús nikayamakatsaxakakī. Akka a meka shara mā nikafikatsaxakakī chipo anā kachikiri faifono ato omiskōimaki finakōixii.

²² Akka nōko xinifāfe Niospa mekaōnoa kenekī yoikōinifo iskafakī: “Paxta nā imis keskai ori kafāsayotiro. Chipō anā a anāpakea ano otiro. Nāskariai kochiri mīfamā raish iyotiro, nāskax fakanaki kaax choki sharata, mā choki sharafīax anā chipo mīfamā raish itiro.” Nāskari akani Niospa Yōshi Sharaōxō āto chaka potakanamax Satanās āto ifo iki. Āto chaka xatepaifikanax afianā afara chaka mēra paketirofo.

3

Nōko Ifo Jesús anā fotoxii

¹ Efe yora mīstichi, anā ē mato kirika kenexō fomai. Taeyoi ē mato manamayonixakī, nā kirika kene rafeoxō ē mato shināsharapai mā shināsharakōinō.

² Shinākāfe, a Niospa meka yoimis sharafāfe afetiāma mato yoipaonifo anori. Askatari a noko ifimisto nōko Ifo Jesús ato yoiaito a aōnoa yoimisfāfe nikakatsaxakakī nānori mato yoipaonifo keskara shinākāfe.

³ Nāskakē ē mato yoinō shinākōikāfe. Mā chaima Jesús oaino nā yora chakafo matoki fekanax nāfo matoki kaxemetsamapaixikani kiki āakōi askara chakafo shinākanax.

⁴ Nāskaxō mato yōkaxikani iskafakakī: “A Niospa yoini keskai, ŷafeskai Cristo oimamē? Akka nōko xinifo nanifo chāikai afaa afeskaito nō ōimisma, keyokōi nāskara. Nā Niospa mai onifani chāi afaa afeskaito nō ōimisma,” ixō yoixii.

⁵ Akka nā yorafāfe mā tāpifikaxō shinākanima, afetiāma Niospa nai onifafianino Niospa yoiaino fakafā nēxpakīa mai onifani, taeyoi fakafā iyopaoni. Nāskakē Niospa āfe mekapa fakafā nēxpakīa mai onifarifatani.

⁶ Askatari fakafaipafakī mai maiyaino keyokōi yorāfo āsai mitokomeni.

⁷ Akka mai yafi nai iskaratīa ato mekeyoa, chipo ato koofakī mitokōixii. Niospa yoiaino askai fetsexii. Nā Niospa ato ichanāfaiitīa na chiifānē ato koofakī mitoxii nā yora chakafo ato omiskōimanaitīa.

⁸ Nāskakē efe yora mīstichi, shināmakiyamakāfe. Nō ōimiski xiniachāikōi. Akka nōko Ifāfe ōia pena fisti xini ichapa keskara, askatari xini ichapa pena fisti keskara ōi.

⁹ Nāskakē shinākī iskafamisfo: “Nōko Ifāfe yoiyoni keskara ikamano, akka mā yoini keskara mā finōkōia,” ixō shināmisfo. Askatamaroko Niospa noko noikōikī a omiskōipakenakafo mēra ato potapaima. Fena fenakima ato manasharamis keyokōichi āto chaka xateyonōfo āfe meka shara nikaxikakī omiskōipakexakakīma.

¹⁰ Akka nōko Ifo nokoki nokorisai tsōa manasharayamaino nā yometso nōko pexe ano oaito nō tāpitiroma keskai. Nāskarifiakī tsōa tāpiama afetiāra nōko Ifo nokorisai, itipinīsharafomano. Mā nōko Ifo nokoaino chāa itakōixii. Nāskaino nai mēranoafo koofi keyokōixii, nāskatari nono mai anofaori koofi keyokōixikani.

¹¹ Nā ē mato yoiāi keskai keyokōi keyoxii. Nāskakē tāpisharakōixō nōko Ifo nikasharakōikāfe. Mā mā itipinīsharakōixō a mā apaoni keskara anā mā akimakai. A mato amapaiyai keskara fisti mā akikai. Epa Nios shinākī finakōiax sharakōi ikāfe.

¹² Fatora penata Jesús nokoi kiki manashara fafāikāfe. Nāskakē fetsafo Jesúsnoa yoisharakāfe tāpisharakōinōfo, āto chaka xatekaxō mā chaima Jesús oi kiki. Mā Jesús oaino nai mēranoafo koofi mēsho mēshokōixikani.

¹³ Akka nai fenashara nō manai, mai fena yafi a Niospa yoiyoni keskafakī afo sharafai. Akka afara chakafo ano itiroma, nā sharafos ano itirofo.

¹⁴ Nāskakē efe yora mīstichi, mā Jesús manakī manasharafafāikāfe. Mā askaito Niospa mato ōi kiki āfe Fākeōnoax mā isharakōikē. Nioski mesekīma iskafakī shināfafāikāfe: “Epa Niospa āfe Fakeōxō ea noi. Ēri Epa Nios noi afe rafepakexakī,” ixō anori shināfafāikāfe.

¹⁵ Nāskakē māri fekaxtekākīma. Shināsharata isharakōikāfe. Ōikapo. Nōko Ifo samarakamis fena omisma yorafāfe ea Ifofanōfora ixō shināmis Epa Niospa. Nāskarifikī nofe yora Pablo mato kirika kenexoni Epa Niospa shināsharaino.

¹⁶ Nā kirika keneai tii nōko Ifo anā oxii kiki ixō aōnoa yoikī mato kirika kenexoni Pablo. Akka a atiri yoikī kenei afokai nō tāpisharatiroma. Akka a Niospa meka tāpimafāfe āa fanīrira yoimisfo a Pablo yoikī kenei anori tsōa yoimisma. Nāskarifiakī Niospa mekakōi yoitama, fanīrira yoimisfo. Nāskakanax omiskōipakenakafo.

¹⁷ Efe yora mīstichi, a ē mato yoiai keskara mā mā tāpiaki. Nāskakē ōisharakāfe, a chanīmisfāfe mato yoipaiyaifo anori mā ato nikaxikima. Mā Jesús nikakōiaito mato kexesharakōitiro. Akka a fanīrira yoimisfo mā ato nikaxō anā mā shināsharatiroma. Nāskaxō fanīrira mā shinātiro.

¹⁸ Akka a noko ifimis nōko Ifo Jesucristo nikasharakōifafāikāfe tāpisharakōixikakī. Mato sharafapaiyai keskara a keskara shara ixikakī. Māto ōiti mēraxō a mato tāpimapaiyai keskara tāpisharakōikāfe. Nā fisti nō yoikī iskafatiro: “Mī nōko Ifo, mīōxō afara shara nō atiro, meres fisti mī sharakōi,” ixō iskaratīa yoita a inōpokoai keskara nō yoipakenaka. Nāskakōipakexanō. Nā tii.

Pedro

Juan Jesús Chanĩmara Faafõ Kirika Kenexõ Fomani

Jesús noko nimasharaino nõ afe İpaxanõ

¹ Ēkĩa Juan, ě mato kirika kenexõ fomai mã täpinõ. Jesucristo ě õimixaki ě mato yoi mãri mã täpisharanõ. Nã Jesucristo nõko İfokõ tae fenakõ Nios fe iyopaonixakĩ. Akka Niospa afama müshti onifamatai afe iyopaonixakĩ, chipo nãmã fotoxõ noko yoiaito nõ nikamis. Oa yorakõ keskara nõ õimis. Mã õiki feyafaxõ nõ ramãti nõko mifi. Nãskakẽ noko yoiaito nikayamexakĩ ě mato yoi, noko imasharanõ nõ afe İpaxanõ.

² Apa Nios ariax nokoki Jesús ftoni. Fotokẽ nõ õiki feyafani. Nãfi afeskapishta nakama, nãfi nĩpanakakĩ. Apa Nios fe ikatsaxakĩ nokoki ftoni. Nãskakẽ nã nõ õia keskara nõ mato yoi.

³ Nõ õipaonixakĩ nõ mato yoi noko yoiaito afe meka. Nãskakẽ nofe rafexõ nã nõ shinãi keskarari mãri mã shinãtiro. Nios feta afe Fake Jesucristo shinãi keskafakĩ nõri anori nõ shinãi, nõ ato fe rafekõitiro.

⁴ Nãskakẽ ě mato kirika kenexõ fomai nã kirika kene õiax mã inimakõinõ.

Nios xafakĩakõi ika oa luz keskara

⁵ Akka noko Cristo yoi, anori ě mato yoinõ. “Oa xinĩ chai chaxaino fakishtiroma keskara, xafakĩakõi Nios ika. Afaa chaka afe rafemisma,” ixõ Cristo noko yoisim.

⁶ Akka anorima shinãi yora fetsafo iskakani: “Ē Nios fe rafea,” iflaxõ a Niospa yoi, anori shinãima ãa chanĩ anorima yoi. Āfe õiti sharama xafakĩakõi ikama, fakish keskara a Niospa yoi, anori shinãyamafi.

⁷ Nios xafakĩakõi ikakĩ, afaa pishta chakafamisma. Āfe õiti mēra oa fakish keskarama, xafakĩa sharakõi ika. Akka nõri afe rafekõixõ, nõ afe meka nõ mēra nanekõixõ, Niospa shinãi keskafakĩ nõri nõ shinãtiro. Nõ askara shinãx, nã İfafafo fe nõ ato fe rafetiro. Nãskax nõ xafakĩakõi nitiro, Niospa Fake Jesús mãi noko nãxonikẽ. Āfe imĩ nõko chaka noko soaxõfãini keyokõi.

⁸ Akka nõ yoi kiskafamis: “Ē afaa chakafamisma,” iflax nõa nõ pãramemis. Nãskax nõa nõ chanikõimis. Nõko õiti mēra Niospa meka naneama.

⁹ Akka nõ afara chakafaxõ nõko chaka nõ soapaikĩ, nõ Nios yoi, anori nõko chaka noko soaxotiro. Keyokõi noko soaxotiro noko raefakĩ, Nios mãi mēstekõi isharakõixõ.

¹⁰ Niospa yoisim: “Keyokõi yorafãfe chakafamisfo,” noko famis yoi kõikĩ. Noko askafafaino, “Ēkai afaa pishta chakafamisma, ě chaka shinãima,” ixõ yoi kĩ nõ Nios chanĩmara faima, “Āa chanĩra,” nõ Nios fai. Nãskakẽ afe meka nõko õiti mēra naneima.

2

Jesús Apa Nios noko yoisixoni

¹ Efe yora müshtichi, ě mato shinãi. Mē mato Jesús İfomaxõ ě mato fakefai. Mato fakefaxõ ě mato kirika kene fomai, mã anã afarafo chakafainõma, shinãsharata mã inõ. Askara Niospa fichipai. Akka nõ chakafaino Niospa fichipaima. Nãskakẽ nõ anã afara chakafaxõ nõ nõko İfo Jesucristo nõ yoitiro anã nõko chaka nõ soapaikĩ, nokomãi nikaito. Noko nikaxõ Apa Nios noko yoisixoni iskafakĩ: “Epa, ě ato nãxonĩ. Eõxõ ato chaka soaxõfe, ãto chaka soapaikani kiki,” Apa fatiro. Nã fistimã mēstekõi ixõ, afaa chakafamisma. Nãskaxõ Apa Nios noko yoisotiro.

² Noko nãxonĩ nõko chaka noko soaxoxiki. Noko fistima, keyokõi õinoax noko nãxonĩ. Nõko İfo Jesucristo nõko nãxonĩ. Nõko chaka noko soaxõfãini nani.

³ Nãskakẽ Cristo noko yoi, anori keskafakĩ nõ nikakõixõ nõ täpisharakõitiro nõ mãi afe rafexõ.

⁴ Yora fetsafo iskai: “Ē Cristo fe rafea,” iflaxõ afe meka nikama, ãa akikiri kētapamis, mēstekõi ikama.

⁵ Akka nõ Niospa meka nikakõikĩ nõ aõ noikõi. Nãskafaxõ nõ täpitiro nõ afe rafekõia, Nios fe.

⁶ “Mē Nios fe rafekõiaiki,” ixõ yoi, a Jesús imis keskara ikãfe.

Noko meka fena shara yoini nõ nõinãsharakõinõ

⁷ Efe yora müshtichi, ě mato yoisharakĩ ě mato kirika kenexoni. Na ě mato yoi, anori keskafakĩ taefakĩ mã mã nikamiskĩ. Jesús noko yoi, anori keskafakĩ ě mato kenexonõ.

⁸ Mã mã nikafimiskẽ, ě mato anã fenafakĩ yoinõ chanĩma. Jesucristo nõko noikõi. Nãskari fakĩ nõ fetsafo noikõi. Fetsafo noikĩ, nõko õiti mēra xafakĩakõi iki. Anã fakish keskara ikima.

⁹ Akka, “Ē Nios fe rafea ē xafakīakōi ika,” ixō nō yoifixō nofe yorafo nō noikaspamis, nōkai xafakīakōi ikama.

¹⁰ Akka nōroko nofe yorafo noi, nō xafakīakōi iki. Nō shināsharata nō ikax, nō anā fenotiroma. Nāskakē nō xafakīakōi iki, afaa pishta chaka shinātama.

¹¹ Akka a afe yorafo noikaspaifo, afokai sharama. Fakish mēra niafo keskara. Afaakai shinākanima. Āto chaka xatekaspakani. Askafikaxō afaa tāpiafoma, fenokōiafo.

¹² Efe fakefāfe, mato chakaxo Jesūsō Epa Niospa mato soaxonano, nāskakē ē mato shināki ē mato kirika kenexoni.

¹³ Afaa oniataima Epa Nios fisti iyopaoni. Efe anifo tiito, ē mato kirika kenexoni, afe keskaramāki mā mā Epa Nios tāpiakī. Mā mā tāpixō mā chanīmara famiski. Naetapafāfe, matori ē kirika kenexoni, Satanās chakata mato afara chakafamapaiyaito mā mā finōfaki. Nāskakēri naetapa tiito ē mato kenexō fomai, mā Satanās chaka finōano. Efe fakefāfe, ē mato yoiki kenexona māmāi Epa Nios tāpikē.

¹⁴ Efe anifo tiito, matori ē kirika kenexona, mā mā tāpiakī, afaa oniyataima Epa Nios fisti iyopaoni. Naetapafāfe, matori ē kirika kenexona, mato ōiti kerexkōifafai Epa Nios āfe meka shara nikakōiyānā mā mā Satanās chaka finōfaki.

¹⁵ Akka a Niospa fichipaiyama, nōri fichipaitiroma. Afo fichipaiki nō Nios shinātiroma. Afarafo na yora chakafāfe āto shinā mēraxō shināifo keskara afo fichipaiyamakāfe. Afo fichipaiki mā Nios shinātiroma.

¹⁶ Akka a Nios shināifoma nono nāmā ikafo āa shinākanis kamisfo: “Ēa ē shināxō nā ē apaiyai keskara ē atiro. Afara ōiki ē fichipaiki ē fitiro. Ē tsoa keskarama. Ē afama mīshti shināi. Ea keskara tsoama,” ixō fētsa yoitiro āa chanīkī. Aato Niospa meka shināima, āa shināx askatiro.

¹⁷ Akka na afe keskararāfo Niospa ōikaspaifo mā afo mitokomei. Nāskatari a yora chakafāfe fichipaiyāifo mā afori mitokomei. Akka nā Niospa yoiai keskara nikakōiax nō Nios fe nīpanaka.

A yora chanāifo nō nikatiroma

¹⁸ Efe fakefāfe, mā chaima Jesucristo anā nāmā fotoiyoi mā nō nika. Nāskakē Jesūs nāmā fotoyoamano, akka nā yora chakafāfe Cristo shināmifoma āto xanīfo finakōia oi taei. Nāato, “Ē Cristora,” ixō noko pārapaii. Mā mā tāpia nāto Jesūs noikaspamis. Akka iskaratūa, “Ē Cristora,” ikanaifo yora ichapakōifo. Nāskakē mā nōri tāpia nā Cristo kayakōi samama fotoi.

¹⁹ Nā Cristo noikaspaifo nofe iyoafo, mā noikaspakani nomakinoax tsekeafō. Afokai noko keskarafoma. Cristo anā shinākanima, mā kachikiri faafo. Nāskax nomakinoax tsekeafono nō tāpitiro afāfekai Cristo Ifofaafoma. Akka a Cristo āto Ifokōikē nomakinoax tsekeranafoma.

²⁰ Akka Cristo āfe Yōshi Shara mato ōiti mēra nanea. Nāskakē keyokōichi mā mā tāpia Niospa Yōshi Sharapa mato tāpimapaiyai keskara.

²¹ Nāskata Jesucristo mā tāpiki finakōiakī. Tāpixō mā mā chanīmara fakī. Nāskakē ē mato kenexoni. Nāskaxō afara mato pāraifāfe mā chanīmara faima. Mā tāpia Jesucristo ramashara anorima ato yoimisma, nāfi chanīmakōikī.

²² Yora fetsafo iskamisfo: “Cristokai Niospa nai mēraxō nūchinikeroko, akai Niospa Fakekēroko,” ixō yoimisfo. Askafakaxō Epa Nios yafi āfe Fake Jesūs chanīmara fakanima. Afāfe Cristo noikaspakōikani.

²³ Akka nā Cristo noikaspaifāfe iskafakani: “Jesūs Niospa Fakema,” fakanax Epa Nios fe rafemifoma. Afokai Niospa yorafoma. Akka a yoiki iskafaifo: “Jesūs Niospa Fakekōi,” fakanax nāfo Nios fe rafekani.

²⁴ Nāskakē Jesūsnoa mā nikakī taefani keskakakī, āfe meka shara shināmakiyamakāfe. Nā mā nikakī taefani keskakakī, mā shināmakiyamax mā nikakōisharaino Epa Nios fe āfe Fake Jesūs mato fe rafekōipakenaka.

²⁵ Nāskakē Jesūs noko iskafakī yoiyoni: “Ea yafi ēfe Epa mā Ifofaax, mā nofe nīpanaka, anā mā nanakama,” ixō noko yoini.

²⁶ Akka na yorafāfe Cristo noikaspaifo afāfe mato pārapaikani. Mato anorima yoipaikani. Nāskakē ē mato yoisharakī kirika kenexoni mā tāpikōinō tsoa mato pārayamanō anorima yoiki.

²⁷ Akka Epa Niospa āfe Yōshi Shara mato ināni mato fe rafekōinō. Nāskakē aōxō mā mā tāpikōia. Mā anā tsoa yopaima mato tāpimanō, āfe Yōshi Sharapamāi keyokōi mato tāpimakē. A mato tāpimanai keskara chanīmakōi, mato pāratioroma. Nāskakē nikakōiyānā Cristo fe rafesharakōikāfe, a Niospa Yōshi Sharapa mato yoiai keskai. A Niospa Yōshi Sharapa mato yoini keskai shināmakikakīma Cristo fe rafesharakāfe enekakīma.

²⁸ Efe fakefāfe, iskaratūa Cristo nikakōiyānā afe rafekōikāfe, mā nāmā fotofaino nō akiki meseimakai nōmāi isharakōiax. Askatari nō akiki rāfimakai.

²⁹ Mā mā tāpiaki Nios isharakōimiski afaa chakafatama. Nā isharakōimisfo nāfo Epa Niospa imasharapakenaka āfe fakefo inō. Nafofi Epa Niospa fakekōifoki.

3

Niospa fakefo

¹ Epa Niospa noko noikōi. Shināfai ikāfe. “Ēfe fakefora,” noko famis. Akka nō āfe fakekōifo. Akka nā yora fetsafāfe Jesucristo shināifoma Nios tāpiafoma. Nāskafakīri nokori tāpiafoma, nō Niospa fakefofiano.

² Efe yora mīstichi, ea nikakāfe. Nōfi iskaratīa Niospa fakekōifoki. Nāskakē afe keskarara chipo noko Niospa imai nō tāpīama. Cristo fotoaito nō ōiax nā keskarakōi nō iki, āfe ōiti keskarakōi.

³ Niospa fakekē nonori nō yoi: “Ē Jesucristo fe ipanaka. Ē Jesús fe ikaino āfe ōiti keskarakōi ē ixii,” ixō shināki nō anā chaka shināpaima. Jesucristo shināi keskarari nō shinātiro, anā chaka shināyamaki.

⁴ Akka yora fetsafāfe ato chakafakakī, āto chaka potakaspakani, a Niospa yoiai keskara shinākanima, afara chaka fisti shināmisfo.

⁵ Jesucristo nai ariax nokoki fotoni nōko chaka noko soaxoxiki. Akka nātofi afaa chakafamismakī. Nā fīstifi finakōiakī. Ē mato yoiai keskara mā mā tāpiaki.

⁶ Nāskakē a afe rafeafāfe chaka shināmisfoma. Akka a ōiti chakayafāfe Jesús tāpiafoma, Jesús shinākanima. Jesús fe rafeafoma.

⁷ Ea nikasharakāfe, ē mato yoinō. Fetsa iskatiro: “Ē Niospa meka mato yoinō,” ixō mato yoisharaima. Mato anorima tāpīmapai, akka aa nikax mā chaka nitiro. Akka a isharakōixō shināsharamis. Aa keskarafi yora sharakōikī. A Cristo ika keskarari ari isharakōia shināsharakōita.

⁸ Akka nā afara chakafamisfo Satanás fe rafeafo. Nā Satanasmāi taeyoi ōiti chakaya inino, iskaratīari nāskara. Nāskaxō Satanás keyokōi yorafo afara chakafamapai. Nāskakē Niospa āfe Fake nokoki nīchini. Noko nāxoxiki nokoki fotoni, nōko chaka noko soaxoxiki. Nomakinōa Satanás potatiro noko afara chakafamapaiyaito. Nāskakē Jesucristo Satanás finōinīfofana.

⁹ Akka Niospa āfe Yōshi Shara nōmēra naneano nō Niospa fake itiro. Nō Niospa fakexō nō anā afaa chakafapaima. Nā Niospa Yōshi Shara nōko ōiti mēra ikē nō anā afaa chakafatiroma, nōko ōiti noko fetsafaano. Nōko ōiti noko fetsafaxō, mā Niospa noko fakefa.

¹⁰ Fetsafāfe afara chakafamisfo, afokai Niospa fakefoma. Afofi aa ranā noinākanima. Askarāfo Niospa fakefoma. Afofi Satanás fakefoki. Nāskakē Satanás fakefo nō tāpitiro. Nāskafakīri Niospa fakefo nō tāpitiro.

Nōa ranā nō noinātiro

¹¹ Nāskakē taefakī mā Nios Ifofaxō mā mā nikamiskī mato yoiaito: “Nōa ranā nō noināsharanō,” ixō mato yoiaito mā mā nikamis.

¹² Akka nā Caīn onefetsa noikaspakī reteni keskara iyamakāfe. Askara Satanás chaka fe rafea. Nāskaxō onefetsa reteni noikaspakī, ē mato yoinō nikakapo. A Niospa yoia keskafakī onefētsa Nios shināni. Akka Caīn askanima. Āfe onefetsaki ōitīfishkikī reteni. A onefētsa Nios Ifofaito ōiki noikaspakī reteni, Niosri noikaspayanā.

¹³ Akka māri Jesús Ifofaito, matori noikaspatirofo. “Ē Jesús Ifofaito ea tsōa noikaspaima kiki,” ixō shināyamakāfe. A mā Jesús Ifofaito a Jesús Ifofaafāfema mato noikaspatirofo.

¹⁴ Nō yorafo noikōixō nō tāpitiro nōmāi Niospa fakefoxō. Nāskakē a omiskōipakenakāfo mēra katama, afe nō ipanaka. Akka a yora fetsafo noikaspai, afokai Niospa fakema. Nios fe rafeamax afe ipanakama.

¹⁵ Akka a yorafo noikaspai fo afofi retemitsamis keskarafoki. Afo chakakōifo. Askarāfo mā mā tāpia Niospa fakefoma. Askarāfo Nios fe rafeafoma. Nios fe nīpanakafoma, yorafo noikaspakanax.

¹⁶ Akka Jesús noko noikōikī, noko nāxonī. Āakōi nokoōnoax nani. Nāskarīfakī nō fetsafo noikōiax nō atoōnoax natiro.

¹⁷ Akka afama mīшти ichapayafixō, fetsafāfe afara yopaito nō ato afaa ināmā, askara sharama. Epa Niospa noko noiai keskafakī, nō ato noima.

¹⁸ Efe yorafāfe, ea nikakōikāfe, ē mato yoinō. Fetsafo iskakani, āa chanīkani: “Ēfi yorafo noikai,” ifiaxō ato chakafakani, atokai noikanima. Akka nōfi askaramakī. Nō yorafo noisharakōixō nō ato shara fatiro.

Nō Nios nikasharax nō akiki ranotiroma

¹⁹ Akka nō ato noisharakī nō tāpitiro nō fanīrira chaka shinākīma, Jesús nōko Ifokōimāiyakē. Anorī shināi nō akiki meseima.

²⁰ Nāskafixō nōko òiti mēraxō nō shinākī iskafatiro: “È afara chakafaa,” ixō nō shināito Niospa noko òi. Noko òikī tāpia a nō shināi keskara. Nāskakē nōko chaka nō soapaiyaito nōko chaka noko soaxotiro. Nios nōko òiti keskarama. Aato keyokōi tāpia.

²¹ Efe yora mīshtichi, ea nikasharakāfe. Nōko òitinī nō shināi iskatiro: “È Nios Ifofaito ēfe chaka mā ea soaxona, mā ea shināsharamana,” ixō shināi, nō Nios fe rafetiuro, nō akiki nō ranotiroma.

²² Nō askaino Epa Nios nokoki inimatiro. Nāskakē nā nō yōkai keskara noko inātiro, a noko yoiai keskaramāi nō nikasharaito, askatarimāi nō inimamasharaito.

²³ Iskafakī noko yoini: “Èfe Fake Jesucristo nikasharakōikāfe,” ixō noko yoini. Nāskatari a noko yoini keskaī nōa ranā nō noināsharai.

²⁴ Akka a Niospa noko yoini keskafakī nō nikasharakōiax Nios fe nō rafekōitiro. Askatari Niosri nofe rafekōitiro. Epa Niospa āfe Yōshi Shara nokoki nīchini. Aōxō nō tāpitiro Epa Nios nofe ikaito.

4

Niafaka chakata Niospa Yōshi Shara noikaspai. Askatari Cristo noikaspai

¹ Efe yora mīshtichi, fetsafāfe mato anorima yoiaifāfe ato nikayamakāfe. Iskafakī mato yoipaikani: “Nō mato Niospa meka yoi Niospa noko shināmanaino,” ifiakaxō anorima mato yoimisfo. Askaifono Niospa meka òikī mā tāpitiro a yoiaifo keskara chanīmamākī. Niospa Yōshi Sharaōxō mato yoikanimākī. Akka afokai Niospa ato afaa yoiaia.

² Nāskakē ē mato yoisharai, ea nikakāfe. Fetsafāfe a Niospa meka mato tāpimasharaito mā tāpitiro. Niospa Yōshi Shara a mēra naneano yoiaito mā tāpitiro. Iskara mato yoiaito: “Jesucristo fotonī Apa ariax nai mēranoax. Nāfi yora keskara kāiniki. Aafi yorakōiki,” mato faito mā tāpitiro Niospa shināmanaino mato askafakī yoiaito.

³ Akka yora fetsafāfe anori yoiyamaifāfe nō tāpitiro afāfe Jesucristo noikaspamisfo, Niospa Yōshi Shara āto mēra naneama. Satanās ato shināmamis. Akka a Cristo noikaspai noko ano fexikani mā mā nikamis. Akka iskaratīa mā noko ano feafo, afāfe Cristo noikaspamisfo.

⁴ Akka māroko askaramakī efe yorafāfe, Niosfi māto Ifokōikī, māfi Niospa yorakōifokī. Āfe Yōshi Shara mā māto òiti mēra nanea. Akka a anorima shināifo askarafoma, Satanās yōshi āto òiti mēra nanea. Akka Niospa Yōshi Shara mato mēra naneano mā Satanās finōkōia.

⁵ Akka fetsafāfe Nios tāpiafomano, nāskakē anorima ato yoimisfo, Satanās ato shināmanaino. Nāskakē Satanās ifoafāfe ato nikamis Satanāsmāi āto ifokē.

⁶ Akka nōfi Niospa yorafokī. Nāskakē a Nios tāpiafāfe noko nikakōitirofo nō yoiai anori. Akka a Nios Ifoafāfema a nō yoiai anori nikatirofoma. Akka nō tāpitiro ato mēra Niospa Yōshi Shara naneano noko nikasharaifono. Ato mēra nanexō fanīrira ato shināmanima. Akka a noko nikaifoma ato mēra Satanās nanea. Satanās ato mēra nanexō fanīrira ato shināmani. Satanās chanī finakōia. Nāskax òiti chakaya.

Niospa noko noikōi

⁷ Efe yora mīshtichi, nō noinākōinō, Niospa noko ato noimanō. Nios fistichi noko shināmatiro nō ato noinō, a fistichimāi noko noikī finakōixō. Nāskakē nō ato noikōikī nō Nios tāpia nō afe yora, nōko òiti mā noko fetsafaano.

⁸ Niospa yorafo noikōia. Nāskaxō ato noikī noko tāpimatiro. Akka a yorafo noiaifāfema, Nios tāpiafoma.

⁹ Niospa āfe Fake fisti nāmā nīchini, nāmānoax noko nāxoyonō. Nāskakē nō afe nīpaxatiro, nāatomāi nōko chaka noko soaxomiskē. Nāskakē Niospa noko òimani afesaxō noko noimākai.

¹⁰ Nāskakē nō Nios noi. Akka nō Nios keskarama, nō ato noikī finamisma. Nios fistichi noko noikōimis. Noko noikōikī āfe Fake Jesús nāmā nīchini noko nāxoyonō nōko chaka noko soaxoxiki.

¹¹ Akka efe yora mīshtichi, Epa Niospa noko noikōi. Nāskakē nōa ranā nōri nō noināsharakōikāfe.

¹² Akka tsoa pishta Nios òimisma. Nāskafix nō noināino, Nios nōmēra ika. Nofe ixō yorafo noko noimasharaito.

¹³ Niospa āfe Yōshi Shara nōmēra ikimakē nō tāpitiro nō Nios fe rafea, Nios nofe ikano.

¹⁴ Epa Niospa nai arixō āfe Fake noko nāmā nīchixonī. Āfe Fake nāmānoa nō òipaoni. Ōipaonixakī nō ato yoimis iskafakī: “Epa Niospa āfe Fake noko nāmā nīchixonī, keyokōi nokoōnoax nanō nōko chaka noko soaxoxiki noko ifiano nō afe ipaxanō.”

¹⁵ Fetsa iskai: “Jesúsfi Niospa Fakeki,” ixō shināi. Aafi Nios fe rafeakī Nios afe ikano.

¹⁶ Niospa noko noikōia mā nō tāpia, nō chanīmara faiyanā, Niospamāi noko noimiskē. Nō Nios chanīmara faito nofe rafexō noko yorafo noimatiro. Akka nō ato noikōiaino Nios nofe ika, afe nō rafekōia.

¹⁷ Nō Nios noi. Nō Nios noikī finakōiax nō inimatiro Jesús anā nāmā fotoano. Anā fotoxō noko iskafatiro: “Nā ea Ifofaafō tii ēfe Epa Nios ari fokani. Akka nā ea Ifofaafoma tii ēfe Epa ari fokanima, nā omiskōipakenakafo mēra fokani,” ato fatiro. Ato askafaino nōkai Nioski meseima. Nō ranoima nō afe rafekōi. Afe rafei nō Jesús keskara iki, āfe ōiti keskara nō iki. Nāskakē Jesús oaitia nō akiki meseima.

¹⁸ Nō Nios noikōiax nō akiki mesetiro. Nōko shinā mēraxō nō Nios noikī finakōixō nō rate potatiro. Akka fētsa mesekī iskafai: “Niospa ea omiskōimani,” ixō shināi aatokai noikī finakōiama. Ato noikōiamax Nioski mesetiro.

¹⁹ Nō Nios noiyamatai noko noikī taefani. Akka noko taefakī noinikē iskaratīari nōri nō aō noi.

²⁰ Akka fetsafo iskakani: “Ē Nios noi,” ifiaxō a Nios Ifofaafō noima, anorima yoimisfo. Mā afe yorafo ōifikī atokairoko noikatsaxakakī, Niosri noisharakanima askara ōiroko fakatsaxakakī.

²¹ Niospa noko yoimis: “Ea noixō nā ea Ifofaafari noikāfe,” noko famis.

5

Nō Nios Ifofakē tsōa noko afaa chakafamatiroma

¹ Jesucristo Niospa Fakekōi. Nokoki nīchini noko nimapakexanō, nōko Ifo inō. Akka nō a chanīmara fai nō Niospa fakefo itiro. Nāskaxō āfe Apa Nios nō noixō, āfe Fakeri nō noikōitiro.

² Nō Nios noikōikī noko yoiai keskara nō nikai. Nāskaxō mā nō tāpia nō Niospa fakefōri noikōi.

³ Nō Nios noikōixō āfe meka nō nikakōikī a noko yoiai keskara nō nikai nō fekaxteima.

⁴ Nāskakē nō Epa Niospa fakexō afara chakafāfe noko amapaiyai keskarakai nō atiroma. Niospa Fake Jesucristo chanīmara faxō afarafāfe noko afara chakafamapaiyai keskara nō finōtiro.

⁵ Afara chakafo noko amapaiyai fo keskara Niospa noko amatiroma nō anōma. Nāskaxō Jesucristo Niospa Fake nō chanīmara faxō aōxō na chakafo nō finōtiro anā afaa chakafaxikima. Nā chanīmara faafāfe finōtirofo.

Niospa āfe Fakekōi noko ōimani

⁶ Mā nō tāpia Niospa āfe Fake feronāfakekōi ini. Nā Jesús mā maotisata faka mēra ikipakekafāta kainākafanaino, Epa Niospa yoini iskafakī: “Nafi ēfe Fakeki,” ixō yoini. Jesús naino āfe imi foaino Apa Niospa noko tāpimani āfe Fakemāiakē. Āfe Yōshi Shara chanīmismo nōmēra nanexō noko yoimis Jesús Niospa Fakekōi.

⁷ Nā trespatō yoimisfo Jesús Niospa Fakekōi.

⁸ Jesús faka mēra maotisani shināta, askatari naino āfe imi foni shināta, askatari Niospa Yōshi Sharapa noko yoiaino, nānorifos nā trespa shināmisfo.

⁹ Akka yorafāfe noko afara yoiaito ato chanīmara fata a Niospa noko yoiairi nō chanīmara fakī finakōitiro. Akai yora keskarama, afi Nioskōikī. Akka āfe Fakeōnoa noko yoiaito nō chanīmara fakōitiro.

¹⁰ Akka Niospa Fake chanīmara faxō Apa Niospa aōnoa yoini keskara āfe ōiti mēraxō chanīmara fatirofo. Nāskafekē āfe Fakeōnoa yoimis keskara tsōa chanīmara fayamaxō, “Nios chanīra,” fakaxō yorafo fanīra shināmapaikani.

¹¹ Nāskakē Nios iskamis: “Ē mato nimasharapaketiro ēfe Fake Jesúsxō,” ixō noko iskafamis. Nāskakē nō Jesús Ifofaax nō afe nīpaxatiro.

¹² A Niospa Fake Ifofaifo afe nīpaxatirofo. Akka a Ifofaima afe nīpaxatirofoma.

Mā mekai xatekī ato yoisharani

¹³ Mā Niospa Fake chanīmara faaki. Nāskakē ē mato kirika kenexoni, mā tāpinō mā afe nīpanaka.

¹⁴ Nō afara sharafo nō fichipai kī, a Niospa noko shināmanaino, nō Nios yoitiro kīfikī, a Niospa fichipaiyai keskafakī. Nō askakī nō tāpitiro Niospamāi noko nikasharamiskē.

¹⁵ Nāskakē nō tāpitiro a nō Nios yoiaito noko nikaito noko nikaxō noko afara inātiro nō yōkaito.

¹⁶ Akka a Nios Ifofaa fētsa afara chakafaito ōikī, a Nios Ifofaa fētsa Nios kīfixotiro āfe chaka xatenō. Akka Epa Niospa ato nimatiro isharapakexanōfo. Askafikanax fetsafāfe oa Nios Ifofaafō keskara iyokanax mā potakaxō chaka shināfafāikakī Nios kachikiri fakōinafo. Askarafokai tsōa ato nimatiroma nīpaxanōfo. Naax omiskōipakenakafo mēra fokani. Atoōnoa Epa Nios Kīfixokāfe ixō ē mato yoiaima.

¹⁷ A Niospa noko yoi ai keskara nõ nikayamaxõ nõ chaka shinã i. Askafixõ anã nõ chaka xatepaiyaito õikĩ nõko õiti noko fetsafaxotiro, nõ anã chaka shinãpaiyamanõ.

¹⁸ Mã nõ Nios Ifofaano, noko fakefai. Nõ ãfe fake ixõ nõ tãpia nõ anã chaka shinãpaima, mãmã i noko Niospa õiti fetsafaano. Mã nõ askano Satanás afara anã noko chakafamapaiyaito, Niospa Fakekõichi Jesús noko ifixõ noko kexesharatiro. Noko askafakẽ Satanás noko afeska fatiroma.

¹⁹ Mã nõ tãpia nõ Niospa fake. Akka fetsafãfe Nios nikakaspaifono, afo Satanás ato shinãmani ãto ifo inõfo.

²⁰ Niospa Fake nokoki oni. Noko tãpimaniyoi ãfe Apa nõ tãpisharakõinõ. ãfe Apafi mẽstekõ i ikaki. Akka nõ Jesús fe rafeax ãfe Apa feri nõ rafeti ro. Nã Jesucristo Niospa Fake. Nãri Nioskõ i. Nãskakẽ noko nimapakexatiro.

²¹ Efe yora mĩshtichi, Nios fisti Ifofakãfe. Satanás mato afara chakafamapaiyaito afe rafeyamakãfe. Askatari afara chakafo mã ifofapaikĩ afo shinãyamakãfe. Nios fisti shinãkãfe. Nã tii ã mato kirika kenexõ fomai, efe yora mĩshtichi.

Ëkã Juan

Juan Jesús Chanĩmara Faafu Afianã Kirika Kenexõ Fomani

Juan a Nios Ifofaafu ato kirika kenexõ ato fomani

¹ Ēkĩa Juan, ē Jesús Ifofaafu ē ato kexemis ē mato kirika kenexõ fomai mā tāpinõ. Mā mā tāpia Niospa mato katonĩ afe yorafa mā inõ. Chanĩma, ē mato noikõĩ, eres fistima, a Jesús Ifofaafu feta ē mato noikõĩ.

² Nõ mato noikõĩ Jesúsmāĩ nofe rafeano. Akka nã Jesús nofe rafepakenaka.

³ Efe yorafãfe, ē mato yoisharanõ. Nõko Epa Nios feta ãfe Fake Jesús noko noikõĩ. Nãskakē noko noikõĩyanã nõko õiti mēra noko inimamasharai, nõko õiti mēra nõ inimasharakõinõ.

⁴ Mē tāpia ē inimaifinakõĩ ranãri mā isharakõiaino a Epa Niospa noko yoini keskai. Nãskakē ē matoki inimakõĩni.

⁵ Ea nikakãfe ē mato yoisharanõ, mā ranã noinãkãfe. Mā mā nikamiskĩ nã mā Jesús Ifofakĩ taefanitĩa. Akka ēa shinãxõ ē mato meka fena kenexonima, mā mā nikamis. Nãskakē mā ranã noinãsharakãfe.

⁶ Nõ Nios noikĩ a noko yoiai keskara nõ aki. Niospa taefakĩ noko yoiaito mā mā nikamiskĩ iskafakĩ yoiaito: “Mãa ranã noinãkãfe,” ixõ noko yoiaito mā mā nikamis.

Āa anorima yoikĩ ato pãramisfo

⁷ A ãa ato pãramisfo ato mēra fofãsamisfo. Afãfe, “Na Jesucristo Niospa Fake Apa Nios ariax oni feronãfakekõĩ ixikĩ,” ixõ yoimisfoma. Afãfe ato pãrapaimisfo Cristo noikaspakata imisfo.

⁸ Mãri ato keskara iyamakãfe. Shinãfai ikãfe ato keskarama. Mā askakĩ mā ato Nios yoisharaimano tāpitirofoma, fenotirofo. Akka ato Niospa meka mēstekõĩ ato yoisharakõikãfe Nios tāpisharakõinõfo. Nãskakē mãri afara shara a Niospa mato mekexona mā fitiro, mã Nios yonoxosharakĩ.

⁹ Akka fetsafãfe a Cristo noko yoiai keskara nikayamakaxõ anã shinãkanima, ãa fanĩrira shinãkani. Afokai Nios fe rafeafoma. Akka fetsafãfe a Cristo yoiai anori nikakanax Apa Nios fe rafekõikata ãfe Fake Cristo ferĩ rafekani.

¹⁰ Akka yora fetsa matoki oxõ Cristoõnoa yoisharaima fanĩrira yoi, askara fe rafeyamakãfe. “Noko Niospa meka yoife,” fayamakãfe.

¹¹ Nãskakē askara yora mã chanĩmara fakĩ afe rafexõ afeta mã anorima yoitiro chaka shinãkĩ.

Mã Juan mekai xatekĩ ato yoisharani

¹² Ē mato kirika kenexõ ichapa fomapaifikĩ askatamaroko ē matoki nokopai mato fe yoinãxiki. Ē matoki nokoano nõ inima faatanãsharanõ.

¹³ Nã efe yora mĩstichi, Nios Ifofaafu nonoax ichanãmisfo afãferi. Nã tii ē mato yoi kirika kenexõ.

Ēkĩa Juan

Juan Gayo Kirika Kenexō Fomani

Juan feronāfake yoisharani, āfe ane Gayo

¹ Efe yorashta Gayo, ēkīa Juan. Ē xini ichapa amis a Nios chanīmara faafo ē ato kexekī. Ē mia kirika kenexō fomai mī tāpinō. Ē mia noikōi.

² Yamā, ē mia noikī Nios kīfixōfafāini mī yonayamanō. Mē tāpia mī ōiti sharakōi mā mī Nios Ifofasharai. Nāskakē ē mia kīfixōfafāini mia kexesharanō mī afeskanōma shara mī inō.

³ Mē mia nikamis mī Nios potakaspakōiaito. Nāskaxō a Ifofafo mī ika anoax ekeki nokokaxō ea iskafamisfo: “Nā Gayopa Niospa meka nikasharai,” ixō ea yoimisfo. Nā nikai ē mikiki inimai finakōi.

⁴ Ēfe fakefāfe Jesús Ifokōifaifāfe nikai ē inimakōimis. Afara fētsakai ea inimamakī iskafatiroma.

⁵ Yamā, ē mia noisharai. Mē nika a Nios Ifofafo yora fetsafo mī ato kexemis mia ano nokoiaifāfe, mī ato ikisharakōia, ato ōiyamafikatsaxakī.

⁶ Nāskakē na mī ato kexeafāfe noko yoitafo mia yoikakī. Nāskakē na Nios yoiti pexe mēranoax ichanākanax fanāikani mā nō nika mī ato noikī, mī ato ikisharakōia. Nāskata ē mia yoikī iskafai: Afara ato ināfe Niospa meka ato yoinōfo pexe tii, Niospa meka ato yoifofāsafanōfo. Mī askafaino Nios mikiki inimai.

⁷ Nāfo fofāsamisfo Jesúsnoa meka shara ato yoifofāsafakani. Afara yopafikāki a Jesús chanīmara faafoma ato afaa yōkamisfoma.

⁸ Nāskakē a Nios Ifofafo nō ato kexesharatiro afara fichipaiyiaifāfe nō ato inātiro. Nō ato askafakī nōri ato feta Nios yonoxomis itiro.

Yora fetsa āfe ane Diótreres chaka ini

⁹ A Niospa meka nikapaikani ichanāmisfo ē ato kirika kenexō fomayamea ōinōfo. Akka Diótreres ea nikakaspamis, “Ē āto xanīfo finakōia inōra,” ixō. Nāskaxō ea ōikaspai, efe rafepaima.

¹⁰ Ea mekakakī chakafamis, ea yafi a Niospa meka yoimisfori noko chakafai. Askatari a Nios Ifofafo fetsafo ato ifikaspamis Niospa meka ato yoiyamanōfo. Fetsafāfe ato ifipaiiaifono a Diótreres ato ifimakaspamis. “Mā anā nofe ichanātiro nono ikiax,” ixō ato chakafamis. Nāskakē ē matoki nokoxō ē mato xafakīakōi yoi kaikai mā tāpisharakōinō, afeskakī ato chakafaimākai.

¹¹ Yamā, ōiti chakayafo keskara mīri iyamafe. Akka a ōiti sharayafo keskara mīri ife. A ato sharafamisfo Niospa fakefokī. Akka a ato chakafamisfo Nios tāpimisfoma afe keskaramāki.

Na yora fetsari āfe ane Demetrio shara ini

¹² Keyokōichi a yoisharakani Demetrioōnoa iskafakakī: “Na Demetrio feronāfake sharafinakōia,” ixō yoikani. Nōri anori yoimis. Nō anori yoiaito mīri chanīmara fatiro, mā mīmāi noko tāpixō.

Mā mekai xatekī Juan ato meka shara fomani

¹³ Ē mia ichapa yoipaifikī ē anā mia kirika ichapa kenexonima. Kaxō ē mia yoisharaxiki.

¹⁴ Akka ē mikiki koshi nokosharapai. Ē mikiki nokoax mefe yoinōnāsharaxiki.

¹⁵ Mīri isharafe, ōiti fekaxteyamaxiki. Na efe ikafāferi mia meka shara fomapaikani. Mīri a mefe ikafo noko ato yoioxsharafe. Nāskakē nā tii ē mia yoi kirika kenexō mia fomai.

Ēkīa Juan

Judaspa Jesús Chanĩmara Faafõ Kirika Kenexõ Fomani

Judaspa ato kirika kenexoni a Nios Ifofafo

¹ Ēkia Judas, Santiago áfe exto. Nõko Ifo Jesucristo ē yonoxomis. Ē mato kirika kenexoni a Epa Niospa mato noikĩ mato ifini tii áfenãkõi faxiki. Akka Epa Niospa nõko Ifo Jesucristoõxõ mato kexesharafafãini.

² Epa Niospa mato noikĩ, mato inimamasharakõinõ mãto õiti fekaxteyamanõ, askatari mato noikĩfinakõinõ.

Fetsafãfe chanĩ fisti ato yoipaonifo

(2 Pe. 2.1-17)

³ Efe yora mĩstichi, nõko Ifãfe noko nãxoni keskara ē yoi, a noko imapaiyai keskai nõ chipo áfe ixiai keskaraõnoa ē mato kenexopaifiki mẽ nika mã meka fetsa yopaito. Nãskakē iskaratĩa ē mato kirika kenexoni mã Jesucristo nikakõijanã mã shinãfafãinõ. Nãnori Epa Niospa áfe Fakeõxõ noko tãpimani. Nã áfe Fakeõnoa noko tãpimani keskafakĩ nã fisti nõ yopai Ifo sharafaxiki. Akka meka fetsa mato fanĩrira yoipaiyaiãfãfe ato nikatamaroko nã mato yoini keskara nã fisti nikakõikãfe.

⁴ Yora chakafo mato mēra fõkaxõ anorima mato pãrakani chaka tãpimapaikakĩ. Afokai Niospa yorafoma. Akka nõ afara chakafamisxakĩ nõ Epa Nios yoiaito nõko chaka noko soaxonano nõ áfe ipaxatiro. Nãskafekē nãfãfe fanĩrira chakakõi mato yoipaikani, iskafakĩ mato yoipaikakĩ: “Mã Jesús Ifofaxõ nã mã apaiyai keskara mã atiro, mãto áfima fe mã ikaino, kērofori áfe fenema fe itirofo. Nãskaxõ nã afara chaka fetsafo mã apaikĩ mã atiro. Mã askafaito Niospa mato omiskõimatiro, mã ikaxõ fanĩrira mato yoipaikani. Nõko Ifo Jesucristo fisti nikakaspamisfo. Nã keskarafoõnoa Niospa shinãmanaino keneyonifo Niospa ato omiskõimakĩ finakõixii.

⁵ Akka mã mã tãpifekē anã ē mato yoipai nõko Ifãfe Ejipto anoa israelifo ato ifini anã omiskõinõfoma. Akka ato ifininixakĩ chipo a chanĩmara faafoma ato keyokõi reteni.

⁶ Nãskatari Niospa áfe ájirifo taeyõi Nios fe isharafiakatsaxakĩ atirifãfe afara chaka shinãkakĩ anã Nios Ifofapainifoma. Askafãfe õikĩ Niospa kaninãnã metexkereaxõ fakishifã mēra ato nĩchiyoni. Nãskaxõ nã nikamisfoma ato omiskõimanaitĩa ato ichanãfaxõ nã omiskõipakenakafo mēra ato potaxii.

⁷ Nã Niospa ájirifãfe afara chakafapaonifo keskafakĩ Sodoma anoafo feta Gomorra anoafãfe a pexe rasi ano chaima ikafãferi nãskafapaonifo afara chakafakakĩ. Feronãfakēfãfe áto áfimafo chotaifono, kērofãferi áto fenemafo chotamapaonifo. Askatari feronãfakēfo áa ranã chotanãpaonifo, kērofori askapaonifo áa ranã chotanãkani. Nãskarafo õikĩ Niospa ato omiskõimani, chiiã tokiriya nai mēraxõ atoki potani. Nã askafanioxõ Niospa noko tãpimani. Nã tãpixõ nõ tãpitiro fatorafãfe áto chaka xateyamakanax nãskarifiakani, chiiã mēranoax omiskõipakenakafo.

⁸ Nãskarifiakĩ nã chanĩmisfãfe afara chaka fisti shinãfafãikani. Nãskakaxõ afia áto namapa õia keskafakakĩ, nãskakõi fakani, áto yora chakanafakakĩ. Askatari Nios nikakaspakani. Nãskakaxori Niospa ájirifori Ichamisfo.

⁹ Akka Niospa áfe ájiri Miguel xanĩfokõifixõ atokai Satanás Ichanima. Mã Moisés naano Satanás Miguel fe feratenãni. Miguel Moisés áfe yora maifapaiãino, akka Satanás Moisés áfe yora chakafapaixikĩ fipaini. Askafaito õikĩ Miguel áfe feratenãfikĩ Ichanima. Yoikĩ iskafani: “Satanás, ē mia afeskafatiroma. Akka ēfe Ifo Niospa mia yoinõ mã omiskõinõ,” ixõ yoini.

¹⁰ Akka nã feronãfakēfãfe mato mēra fõkaxõ nã afaa tãpimafikaxõ meka chaka yomisfo. Askatari nã apaiyai keskara fisti famisfo, nã yoinãto shinãsharatiroma keskarafo. Nãskakaxõ áa afarafo chakafakanax omiskõipakenakafo.

¹¹ Ooa. Nã Caĩn ini keskaro. Caĩn áfe onefetsa noikaspapaoni. Nãskakē reteni. Askatari nã Balaam kori fisti fichipaiikĩ Nios kachikiri fani. Na yorafori nãskarafori. Nãfori nã Coré keskarafo. Nã Coré áfe xanĩfo Moisés nikakaspapaoni. Nãskakē nikakaspaito Niospa reteni, nãskarifikĩ nã ato pãramisfo Niospa askari faxii omiskõimakĩ.

¹² Akka mã noinãkĩ ayayanã mã pimis nõko Ifo shinãyanã. Akka nã yora chakafori ráfitama mato fe ichanãkaxõ nõko Ifo shinãmisfoma. Fetsafo noitama áakõi noimemisfo. “Nõ mato yoi mato kexesharaxiki,” ifiakaxõ tsõa afaa yoisharamisma. Nãfo nã nai kõi oimais keskarafo. Nõ nai kõi fakish õikĩ mã oi feira nõ fatiro inimayanã. Akka oi iyamaino nēfe nai kõi potano nõ shinãchakatiro. Nã ato kexemisfo keskarafofikanax afãfe nõko Ifoõnoa tsõa tãpiama. Nãskatari nã yorafo nã ifi fimimistĩa fimiyamai keskarafo. Nã ifi mã nai

rafea keskarrafo, mā nakē āfe tapo tsekatirofo. Nāskarifiakī nā ato pāramisfāfe tsōa ato Jesús Ifofamatiroma afe nīpaxanōfo.

¹³ Nāfo oa fakafā poo ikī fākok potatiro keskarrafo. Nāskakaxō afāfe afaa shara yoitirofoma, mēxotaima afara chaka yoikani rāfimisfoma. Nāfo nā fishi keskarrafo. Mā fishi nāmā pakexō, anā chaxatiroma. Nāskarifiāi nā mato pāramisfo Nios kachikiri fakanax fakishifā mēra fokani, Niospa nā keskarrafo ato tāpimakī ato omiskōimakōixii anoax omiskōipakexanōfo.

¹⁴ Nāskatari Enoc chipo fakeni, mā Adán afetiāma Epa Niospa onifanino. Akka Enoc āfe xini ini Adán. Nā Enoc nā chanīmisfāfe ato pāranōpokoxiaifoōnoa yoini. Nāskata aato ato yoikī iskafani: “Nikakapo, ē ōia nōko Ifo oi, afe nai mēra ikafo fe ichapakōifo tsōa ato tanatiroma afe fexikani.

¹⁵ Nāskaxō ato yoipakexii nā niyoxō amisfo keskara. Keyokōi maitio anoafō nōko Ifoki fexikani, fatofomākī afe yorafo a afe ipanakafo ato ōinō, askayamai fatoforimākai a chanīmara fayamakanax omiskōipakenakafo mēra foaifo. Akka nā nikamisfoma afe yorafoma. Akka nā chakafamisfo tii ato yoita, niyokaxō Nios nikakaspapaoonifoōnoa yoita, keyokōichi mekafakī chakafamisfoōnoari ato yoixii,” ixō Enoc ato yoini.

¹⁶ Nāfāfe yōachepeyanā ato mekafamisfo. Nā chakafapaiyai keskara fisti shināfafāimisfo. Askaxori fetsafo pārakaxō afara fiapaimisfo ea ināsharakanira ixō shināfafāimisfo.

Nā Nios Ifofafo ato yoisharani isharanōfo

¹⁷ Efe yora mīstichi, nā nōko Ifo Jesucristoōnoa mato yoimisfāfe mato yoinifo keskara shināmakiyamakāfe.

¹⁸ Iskafakī mato yoinifo: “Nōko Ifo mā chaima oaino nā Jesús Ifofaafāfema mato kaxemet-sama faxikani, Niospa meka nikakaspakakī. Nāfāfe afaa shinātama nā chakafapaiyaifo fisti shināfafāikani,” ixō mato yoinifo.

¹⁹ Nā keskarafāfe mato paxkanā fatirofo, afarafo chakafo shināfafāikani. Askarrafo Niospa Yōshi Shara ato mēra naneama.

²⁰ Akka efe yora mīstichi, kexemesharata isharakōikāfe Niospa āfe meka shara nikakōiyānā. Nāskakē kīfikāfe āfe Yōshi Sharaōxō mato imapaiyai keskara mato tāpimanō.

²¹ Nāskakē Jesús Ifosharakōifakāfe, Epa Niospa mato noikōiaito mā mā meemiski. Nōko Ifo Jesucristo noko noikōikī nō nafikē noko nimapakenaka nō afe ipaxanō.

²² Fetsafāfe iskafakī shināifono: “Ētsa, chanīma rakikā,” ixō shināifono, fenāmāshta ato yoisharakāfe nikasharakōinōfo.

²³ Oa afara chiifā mēra pakeax koofaito, nō koshi firisafatiro keskafakī nāskarifiakī fetsafāfe afara chakafaifono ato noikī yoisharakāfe Jesús chanīmara fanōfo, chiifā mēra foyamanōfo. Akka yora chakafinakōiafori mā ato noikī ato yoisharakāfe xatenōfo, chiifā mēranoax omiskōiyamanōfo. Nāskatari nō kooyoxō rapati chakana faxō nō anā fichipaitiroma. Nāskatari ato chakafo noikaspaifo keskara iyamakāfe. Ato noikōita nā afara chakafaifo keskafakī ato feta ayamakāfe.

Mā mekai xatekī Niosnoa ato yoisharani

²⁴⁻²⁵ Nōko Ifo Nios fisti finakōia, nāato keyokōi tāpiakōia. Askatari nāato noko ifimis. Āfe kerex sharaōxō noko kexesharatiro nō fononōma. Nāato noko inimamasharakōi nō nai mēra kai, afaa chakafamisma keskarax. Nā sharafinakōia, efpakōi, afama mīsthi fatiro, tsōa atiroma keskafakī nōko Ifo Jesucristoōxō atiro. Nāskarakōi mēxotaima ipanaka. Nā tii.

Ēkīa Judas

Jesucristo Juan Ōimani Keskara

Afara afeskara ixiai anori Jesucristo Juan tāpimani

¹⁻² Efe yora mīsttichi, iskaratīa ē mato kirika kenexō fomai mā tāpinō. Ēkīa Juan ē mato kirika kenexō fomai. Nai mēraxō Epa Niospa Jesucristo yoini afe keskara a inōpokoai fo nāmānoafo a yonoxomisfo tāpimaximākai. Askafaito nikakī Jesús āfe ājiri ekeki nīchia. Anoxori ea ājirinī yoinō afe keskara ikimākai nāmānoafo. Ea ōimanaito mē ōia a inōpokoai fo xafakīakōi. Askaito ōikī ē kirika kenea a inōpokoai fo anori a Niospa Jesús yoia anorikōi mā tāpisharakōinō.

³ Na ē mato yoiai ikataima. A inōpokoai ē mato yoiai na kirika ano. Nā ōikani fetsafori inimanōfo. Askatari a nikaifori chanīmara fakanax, afori inimaxikani. Nā ē mato yoiai keskai mā samamashta iki. Ea nikasharakāfe.

Juan a ichanāmīso anoafo siete Nios yoiti pexe ano a kirika kenexō fomani tāpinōfo

⁴⁻⁵ Nā Asia mai anoafo a Nios Ifofafo tii siete pexefo anoafo ē mato kirika kenexō fomai. A ē mato yoiai anori ōisharakōikāfe. Afetiama Epa Nios niyopaofinixakī iskaratīa nia. Epa Nios nīpanaka. Āfe Yōshi Sharari afe itiani. Nāskakē Epa Nios feta āfe Yōshi Sharapa, āfe Fake Jesucristo mato noikī māto ōiti mēra mato shināmasharapainō afanā māto ōiti fekaxtefanōma. Nāskakē nōko Ifo Jesucristo Niospa meka noko yoimis chanīmakōi. Jesúsfi Niospa Fakekōifekē retenifo. Mā retexō maifafafono Apa Niospa anā otofani anā nanakama. Fato fetsa askayomisma. Nāskaxō Apa Nios fe rafexō a xanīfofo maitio anoafo ato ikixii xanīfokōi ixō. Aatofo noko noikōiakī, āfe imi foax noko nāxonī Satanās chaka nōko ifo inōma.

⁶ Nō aōnoax nō Epa Nios afe yorakōi ixō noko yonomapaiyai keskafakī nō anō. Nō askai afe yorakōifo ixō nōri yora fetsafo nō kīfixotiro Epa Niospa noko nikai. Nāskarafoskōi nōko Ifo Jesucristo noko imai. Nāskakē keyokōi yorafāfe aōxō iskarafakī yoipakenakafo: “Aicho, tsoa fetsakai na Jesús keskarama. Nā fisti sharafinakōia. Ares fisti nōko Ifo nīpanaka. Ares fisti keyokōi yorafo ato ikipakenaka,” ixō yoipakenakafo. Askapakexapainō.

⁷ Ōikapo. Oa nai kōi keskara sharakōi nōko Ifo Jesús oaito keyokōi yorafāfe ōixikani. Askatari a retenifāferi ōikani, akikī rāfixikani. Oaito ōikani keyokōi yorafo a Ifofamīsofomafo, “¿Afskakī nō Jesús Ifofamīsofomē?” ikanax oiaxikani, shināmīsakōixikani.

⁸ Epa Niospa yoia: “Afara onifataima ē iyopaoni. Ēfi nīpanakakī. Afetiara na nōko mai keyoai eres fisti ē ato yoitiro. Nāskaxō ē afama mīstti famis. Akka ē niyopaoni. Nāskatari ē nīpanaka,” ixō nōko Ifo Niospa yoia.

Nōko Ifo Jesucristo āakōi oa namakē ōiai keskara Juan ōimani

⁹ Ēkīa Juan, ē māto ochikōi. Nāskax māri Jesús Ifofaax mā efe yorakī. Askax mā aōnoax omiskōifikī, mā tenemis. Nāskariai ēri aōnoax omiskōifikī ē tenei. Ē Niospa meka ato yoita Jesúsnoari ē ato yoimis. Ea nikakaspakakī, āto xanīfāfe sorarofo ea achimaxō, fakafā nakirafe ea ato nīchimana āfe nāsimā, āfe ane Patmos ano.

¹⁰ Ē mato yoinō, ea nikakāfe. Anoxō iskafani. A Jesús otoni penata, nomīkonō, Niospa Yōshi Sharapa ea ikixō a ea tāpimapaiyai ea ōimana. Oa namakē nō ōimis keskara xafakīakōi ea ōimana. Askata ea kachiorixori fāsikōi oa xāaiti keskarato ea yoiaito ē nika.

¹¹ “Nā mī ōiaifo fetsafo kenexōfo. A kirika kenexō Jesús Ifofamīsofo tii ato fomafe. A siete Nios yoiti pexe anoafo Asia ano afo fomafe, afāfe ōinōfo. A Nios Ifofamīsofo a pexe tii Efeso anoafo fomata, Esmīrnā anoafo fomata, Pērgamo anoafo fomata, Tiatira anoafo fomata, Sardis anoafo fomata, Filadelfia anoafo fomata, Laodicea anoafori nā mī ōiaifo ato kirika kenexō ato fomafe,” ea faa.

¹² Ea askafaito ē fesoakekafā ē ōia tsōa ea yoimākai ixō. Ē ōia siete oa rāpari efapa ōta keskara oro ē ōia.

¹³ Nāskai rāpari nakirafe feronāfake xanīfo finakōia nia keskara ē ōia. Āfe tari āfe tae fepokōia, āfe sītorari orokōi aō nonexemea ika.

¹⁴ Askata āfe foo oxokōi. Askatari āfe fero oa chii keskara xafakīakōi. (Nāskarifiakī xafakīakōi Jesús noko ōitiro a nō shināi keskara.)

¹⁵ Askatari āfe taeri chaxasharakōia ika. Āfe mekari oa oi kaya feaito nō nikamis keskarakōi.

¹⁶ Āfe pōya kayakai aōri āfe mifi kamaki siete fishi keskara ika. Āfe ana keno chainipa keskara aostamea ika. Askatari āfe femānā fafekōi oa xini nō ōimis keskara ika.

¹⁷ Nāskara ōi ē pakea, oa nai keskara. Ē askaito ōikī ea ramā āfe mifi kayakai aōxori. Ē askaito ea yoia iskafakī: "Rateyamafe. Ē Jesúski. Afara onifataima ē iyopaoniki. Ēfi anā nanakamaki.

¹⁸ Iskaratīari ē nia. Mē nafianixakī, iskaratīa ē nia. Ē anā nanakama. Ē anā afeska pishta nakama. Eres fisti ē ato namata, chiiā mēra ē ato potatiro a ea nikakaspamiso.

¹⁹ Nāskakē a mī taefakī ōiafo kirikaki kenefe. Askatari na mī iskaratīa ōiaifori kirikaki kenefe. Askatari a chipo ixaifori kenefe.

²⁰ Ē mia yoinō afeskai siete fishimē ēfe mēke kayakai aōri; askatari afeskai siete rāpari oro keskara otamāki. Na siete fishi mī ōiai nāato noko shināmamis siete Niospa meka yoisifo Nios yoiiti pexe mēranoa ichanāmiso. Askatari nā siete rāpari keskara mī ōiai nāatori noko shināmamis siete Nios yoiiti pexe mēranoax ichanāmiso Nios Ifofakanax," ixō ea faa.

2

Jesús a Ifofaafō Efeso anoafō ato yoini taekōifakī

¹ Jesús ea yoia iskafakī: "Efeso anoxō a ea Ifofaafō a ato Niospa meka yoisisto na kirika ato anexionaito nikanōfo, iskafakī kenexōfe: 'Ēkīa māto Ifo Jesús keyokōi yorāfo ēfe Epa Niospa meka yoisifo ē ato kexetaifaa. A ē mato yoiai anori ea nikasharakōikāfe.

² A mā ikai keskara mē tāpia, mē mato ōi. Māfi eōxō fāsi yonosharakōimiskī. Afara fetsa afeskara afaito mā tenekōimis. A yorafāfe afarafo chakafamiso anorikai mā tāpipaimisma. Akiki mā inimapaimisma afara chakafaifono, nāskax mā ato fe rafekaspamis. Yora fetsafāferi mato yoiikī iskafakani: "Cristo ea nīchia ē mato yoinō," ixō mato yoiaifāfe, "Nō ato nikayonō," ixō mā ato nikataifaa. Fanīrira mato yoiaito anā chanīki yoimara mā faima mē mato ōia mā askafaito. Anorima yoi āa chanīmisfo mā mā tāpia.

³ Nāskax mā eōnoax omiskōikī mā tenemis ea potakaspakī.

⁴ Mā anori shara shināfismiskē ē anā meka fetsari yoinō. Taefakī mā ea noiyoaponixakī anā iskaratīa mā ea anā noisharaima. Mā mā ea shināmaki fetsea.

⁵ Shināsharakāfe a mā taefakī shināyopaoni anori. A ea noikī mā taefani keskafakī anā ea noikāfe. Askatari mā ranā mā nōināyopaoni keskakōikāfe. Akka mā ea tanaima, oa chii nokaito nō anā kētefatiro keskafakāfe ea shinākī. Mā ea Ifofasharayamainokai chipo tsōa anā mato tanaima. Mā ichanāi ano anā tsoakai mato fe ichanāima.

⁶ Mā askafixō afara fetsa mā shara famis. A feronāfake āfe ane Nīkoraita fanīrira yoiaito nikakakī atirifāfe mato anoxō nikakaxō, afāferi chakafamiso keskafakī ēri ato noikaspai. A ē noikaspai keskafakī māri efeta noikaspai.

⁷ Mā pachoyakī ea nikakōikāfe. Niospa Yōshi Sharapa mato yoiaito nikasharakōikāfe. Satanás mato fanīrira shināmapaimiskī. A Satanás finōinīfōfā ea kachikiri fatama ea Ifofasharakōiaito, aafi Epa Nios ano ē ikimaxii efe isharapakexanō," ixō Jesús ea yoia anori Efeso anoafō a chanīmara faafō ato ē kenexonō.

Jesús Ifofaafō Esmīrnā anoafō ato yoini

⁸ Anā Jesús ea yoia iskafakī: "A ea Ifofamiso Esmīrnā anoafō a ato Niospa meka yoisim ē yoinō ea kirika kenexōfe iskafakī: 'Ēkīa māto Ifo Jesús ē mato yoi mā tāpinō. Ea nikasharakāfe. Nā afama mīshti onifataima ē iyopaoni. Iskaratīa ē nīpanaka. Mē nayofnīxakī ē anā nanakama. Ē mato nonori yoi iskafakī:

⁹ Mā omiskōiaito mē ōi. Askatari mā afaayafoma. Mā askafiaino ē mato fe ikano, ea keskarari mā shara itiro. Mē tāpia matoōnoa yora fetsafāfe meka chakayoiaifāfe. "Nō judeofo, nō Nios Ifofamis," ikaxō yoiaifo afokai efe yorafoma. Afofi Satanás yorafoki.

¹⁰ Akka a inōpokoi ē mato yoinō. Satanás ifofaafāfe fatora fetsa fisti mato karaxa mēra ikimaxikani mā ea shināmakimāikai ōixikakī. A mato mesenifaifono rateyamakāfe. Ea shināmakitama nonori shinākāfe iskafakī: "Ea retefaifono ē meseima, ē Nios ari kai. Ēfe Ifāfe ea potanakama. Ē ēfe Ifo noikī finakōifāfāini," ixō yoikāfe. Mā askax, nakē, ē mato ikipakenaka mā efe ipaxanō.

¹¹ Mā pachoyakī nikasharakōikāfe Niospa Yōshi Sharapa mato yoiaito mā Jesús Ifofakī. Fetsa omiskōifikī ea shināmakiyamoto Satanás afeskafatiroma. Nāskax naax a omiskōipakenakafo mēra katiroma," ixō anori Jesús ea yoia a Ifofaafō Esmīrnā anoafō ē ato kenexonō.

Jesús Pérgamo anoafō a chanīmara faafō ato yoini

¹² Anā Jesús ea yoia iskafakī: "A ea Ifofamiso Pérgamo anoafō a ato Niospa meka yoisim a ē yoipaiyai anori ē yoinō ea kirika kenexōfe tāpinōfo. Iskafakī kenefe: 'Ēkīa māto Ifo Jesús ē mato yoi mā tāpinō. Ēfe meka oa keno chainipa takairafe ikikōiai keskaraxō, ēfe mekapas a ea noikaspaifo tii ē ato chakafatiro kopikī.

¹³ Mē tāpia a pexe rasi Pérgamo ano mā ika. A Pérgamo anoafāfe Satanás nikakōikani. Askaito ōi mā mesemisma, ea Ifosharafai. “Jesús nōko Ifokōi,” ixō mā ato yoimis. A ea Ifofamis fetsa āfe ane Antipas eōnoa ato yoimis ōikī mā reteafō noikaspakakī. Mā reteafāfe ōifax mā atoki meseima, mā ea chai faama. Māto ōiti mēra mā shināsharakōi. “Noko retefiaifonokai nōko Ifo Jesús nō chai faima,” ixō mā yoimis. Anori mā shināi sharakōi.

¹⁴⁻¹⁵ Akka nāno afara fetsa a sharama ē mato yoipai. Fatora mā fetsa a Balaam afara chaka yoini keskara mā shināmakikaspai. Akka taeyoi xanīfo Balac israelifo chakana famapaini. Nāskaxō Balaam yōkani: “¿Afeskaxō mī kaifo ē ato chakana famatiromē?” faito, Balaam kemani iskafakī: “Mī ato yoitiro mī fista mēra ato ikikixiki. Nā mā akai keskari akairi anōfo. Nā nōko niosra ixō afara onifaxō a mā piāi mā ināmis. Nā israelifāfe pikanax chakananōfo mātō fista mēranoax. Askatari āto āfima fe ikanax chakananōfo,” fani. Iskaratīari nāskarāfori mā fisti rasi chakanāfo nā Nicolaitafāfe ato afara chaka tāpimanaifo keskara ikafo.

¹⁶ Nāskakē anā iskaratīa askafayamakāfe. Nios Ifokāfe, anā shinākāfe. Māto chaka xatekāfe shināmitsayanā. Akka mā chaka xateyamaito, ē matoki samamashta nokoxō ēfe mekapa ē mato kopikī chakafatiro mā omiskōinō. Ēfe mekafi oa keno ikiai keskarakōikī.

¹⁷ Mā pachoyakī ea nikakāfe. Niospa Yōshi Sharapa eōnoa mato yoiaito, nikasharakāfe. Satanás xatio chakafamapai. Fētsa Satanás nikayamaxō ea kachikiri faamano, nā ē kexesharaxii nā ēfe Epa israelifo kexesharani keskafakī. Shinākapo. Epa Niospa israelifāfe āto xinifo a piaifo ato ināni fonāikaifāfe afaa piamaifāfe Epa Niospa nai mēraxō ato pōtani oa misi keskarafo āfe ane mānā nā pinōfo ato pōtapaoni pena tii ato noikī. Nāskafakīri nā ea chanīmara faafo ea Ifo sharakōi faifo ē ato ināxii ēfe Yōshi Shara isharapakexanōfo. Ea ōiyamafiaifono pena tii ē āto ōiti xafasharakōi faxotiro. Askatari mā ea Ifo sharaifaiono isharakōiyanā mā ea chanīmara faino, akka ē mato ane fetsafaxōi tsōa tāpimisma, nā fiai fistichi tāpitiro. Tokiri oxosharakōikī nā tokiriki mā mātō ane kenea mātō ane fena ē mato ināxii. Nāskakē ea tāpisharakōixikani. Mā ōitisharakōi ixii,’ ” ixō Jesús anori ea yoia a chanīmara faafo Pérgamo anoafō ē ato kenexonō.

Jesús a Tiatira anoafō a Ifofamisfo ato yoini

¹⁸ Anā Jesús ea yoikī iskafaa: “Ea Ifofafo Tiatira anoafō Niospa meka ato yoimis a ē yoipaiyai anori ē yoinō ea kirika kenexōfe iskafakī: ‘Ēkīa ē mātō Ifo Jesús ē mato yoisharapai mā tāpinō. Ēfe fero oa chii xoisai keskara. Nāskakē ē mato tāpikōia. Ēfe taeri nā keno fakka fakka ikai keskara. Nāskakē ē mato yoikī iskafai:

¹⁹ ‘Mē mato tāpia, nā mā afara shara famis. Mā nōinākōi. Askatari mā ea chanīmara faxō mā ea Ifokōi famis. Nāskakē fetsafori mā noisharakōimis ato kexesharayanā. Mā omiskōifakī ēōxō mā tenekōimis. Mā ea chanīmara fakī tafanitīa mā fetsafo sharafamis. Nāskakē iskaratīari mā ato noisharataifaa.

²⁰ Mā mā askafimiso afara fetsa ē mato yoinō a ē fichipaiyaima mā anā fichipainōma. Akka kēro fisti mato fe ichanāxō, ‘Ē Niospa meka ē mato yoinō, ea nikakāfe,’ ixō mato yoipaikī, ēfe mekakōi mato yoima. Nā kēro Jezabel fanīrira mato yoikī āa mato pāramis. Mā Jesús Ifofafiamiskē mato pāramis iskafakī: ‘Mātō āfimafo chotakāfe; kērofāferi mātō fenemafo chotamakāfe,’ mato famis. Askatari mato yoimis iskafakī: ‘Afara fetsa yora fakaxō, nā nōko niosra ixō, a mā piāi ispacō nōko nios nō ināira ixō, ano fisti ichanāxō, mā pitiro,’ ixō nā kēro Jezabel mato yoikī mato pāramis.

²¹ A kēromā fanīrira mato yoimis mē yoitaifamis anā chakafanōma. Ē yoifaitokai āfe chaka xatepaima.

²² Ē yoifiaino ea nikayamaito ōikī ē isinī imaxii rakatsax omiskōinō. Askata a fetsafori a keskara a sharashināifoma āto chaka xateyamaifāfe ē ato omiskōimani.

²³ A kēromā shināi keskari shināifo ē ato retexii. Ē askafaito, ōikani a ea Ifofamisfo mai fetsafo arixō tāpitirofo ē keyokōi yorafo ē tāpisharakōia. Mātō ōitinī a mā shināi anori mē tāpikōia. Tsōakai afaa pishta ekeki onetiroma. Ē keyokōi tāpikōia. Nāskakē mā afarafo shara famis ē mato shara faxii kopifakī. Akka a afarafo chakafamisfo ē ato omiskōimaxii kopikiri.

²⁴ Efe yora mīshtichi Tiatira anoafāfe, mā atiri nā kēromā mato fanīrira yoipaiyai anori mā nikamisma. Satanás ato tāpimamis keskara mā anori shināpaima. Askara shara. Nāskakē ē anā mato afaa fetsa yoima.

²⁵ Nāskakē ē anā fistiri mato yoi. Na eōnoa mā tāpimis anori shināmakiyamakāfe. Ē mato ifyoyoi mā eōnoa tāpimis anori shināmakipaiyamakāfe.

²⁶⁻²⁸ Fētsa Satanás finōkōixō, ea fisti Ifokōifaax mā naax nā efe nīpanaka. Ē ato xanīfo imaxii. Epa Niospa ea xanīfokōi ima keyokōi ē ato ikinō. Nāskarifakī ē ato xanīfo imatiro efeta na maitio anoafō ato ikinōfo, mitsisipakōixō. Akka a fetsafāfe ēfe meka shara nikakaspaiifāfe nō ato omiskōimaxii. Oa nō kesho kexekai nō yamī moshaino moshitiro keskara afeskaxō

nō anā shara fatiroma. Nāskarifikāī nā nikayospamisfo nō ato omiskōīmanaitīa tsoa pishta ato timamatiroma nanōfoma. Mā penaino, fishifā fisti fafeaito, keyokōichi yorafāfe ōitirofo. Aa keskara ē anā oxii ea ōisharanōfo. Ē anā nokoxō, ē ato yoixii nā ea Ifofamisfo efe isharapakexanōfo.

²⁹ Mā pachoyakī ea nikasharakāfe. Niospa Yōshi Sharapa mato yoiāi keskara nikasharakāfe, ” ” ixō Jesūs anori ea yoiā a Ifofaafō Tiatira anoafō ē ato kenexonō.

3

Jesūs Sardis anoafō a chanīmara faafō yoini

¹ Askata anā Jesūs ea yoiā iskafakī: “A ea Ifofamisfo Sardis anoafō a ato Niospa meka yoisim a ē yoipaiyai anori ē yoinō ea kirika kenexōfe iskafakī: ‘Ēkīa mātō Ifo Jesūs ē mato yoi mā tāpinō. Niospa Yōshi Shara efe ika. Ēfi Nios yoisimfāfe āto xanīfokōiki. Ē mato yoi iskafakī: Mā ika keskara mē tāpimis. Yorafāfe matoōnoa iskafakī yoisimfo: “Nafō shara ikafo. Na Sardis anoafāfe mā Jesūs Ifofakōīnafo,” ixō matoōnoa yoisimfo. Mā isharamis keskara ōikani. Māri shināmis iskafakī: “Nō shara ikara” ifiax mā shara ikama. Mā ea Ifofasharakōīama.

² Akka mā mā ea shināmakia. Askakakīma, anā a mā shināyopaoni anori shinākāfe. Mē tāpia Epa Niospa mato imapaiyai keskara mā isharakōīama. Ē mato yoiāi keskara mā akama. Mā eōxō asharayopaoni anā iskaratīa mā anā askafaima. Mā ea shināmakipai. Nāskakē afianā ea shināsharainīfōfākāfe.

³ Nā mā ēfe meka mātō ōiti mēra mā shināyopaoni keskafakī anā shinākāfe. A mā chakafamis keskara shinākakima; ea Ifo shara fakāfe. Akka mā ea shināyamaito ē matoki samama nokorisatiro mato omiskōīmaxiki. Oa yometso tsōa tāpiamano āto pexe mēra ikirimasitiro keskaī, ē matoki nokorisatixii mato omiskōīmaxiki.

⁴ Askafiax a mato fe ichanīmisfo fisti rasi a Sardis ano ikafāfe chakafamisfoma. Nōko rapati choshtakōī nō pekaxō fatiro fetsa fena shara safexiki. Nāskafakīri atirito mā chaka shināpaoni keskara mā anā shināima, mā mā pota. Nāskaxō mēstekōī mā eōnoa shināi. Nāskaxō rapati fenasharakōī keskara ē mato ōitiro. Mā askano, mā ea ano nokoaito ē mato rapati oxokōī sharakōī ināxii mā efe ipaxanō. Mā isharakōīmisxakī mā efe rafepakenaka. Nā ē keskara shara ixikāki.

⁵ Tsoa ēfe meka shināmakitama ea Ifofakaxō, eōxō Satanās finōkanax afo efe isharakōīpakenakafō. Afori ē ato rapati oxokōī sharakōī ināxii. Askaifāferi ēfe Epa Niospa a ea Ifofaafō tii āto ane tii kirikakī kenea. Nāskaxō āto ane kenea kirikakī a ea Ifofaifāfe tāpinōfo efe nīpaxakāki. Askaifāfe ē āto ane soanakama. Epa Nios feta āfe ājirifāfe ōiaifono ē ato yoixii iskafakī: “Nafōfi efe yorafokī,” ixō ē ato yoixii.

⁶ Mā pachoyakī ea nikasharakāfe. Niospa Yōshi Sharaōxō eōnoa a ea Ifofaafāfe yoiāito nikasharakōīkāfe, ” ” ixō anori ea Jesūs yoiā a Ifofaafō Sardis anoafō ē ato kenexonō.

Jesūs Filadelfia anoafō a chanīmara faafō yoini

⁷ Askata anā Jesūs ea yoiā iskafakī: “A ea Ifofaafō Filadelfia anoafō a ato Niospa meka yoisim a ē yoinō ea kirika kenexōfe iskafakī: ‘Ēkīa mātō Ifo Jesūs ē mato yoi mā tāpinō. Ē afaa pishta chakafamisma. Ē sharafinakōīa. Ēfe meka chanīmakōī. Nā fichipaiyai afama mīshiti sharafo āfe pexe ano fapaoni, xanīfo David. Akka āfe pexe fepoti chamisyano tsoa ikitiroma ipaoni, chamismaisax. Akka ato ikimanaino ikitirofo. Akka ato ikimayamaino tsoa ikitiroma. Nāskarari mā Nios ano ikipai mā ikitiroma ē mato ikimayamaino ēmāi chamis keskaraxō. Akka ē mato ikimanaino mā ikitiro Nios ano. Akka fetsafāfe ikikāfe mato faifono mā Nios ano ikitiroma. Eres fistichi ē mato ikimatiro.

⁸ A mā imis keskara mē tāpia. Mā yora ichapayamafiaxō mā shināsharakōīmis. A ē yoisim keskara mā ato tāpimatiro a mā amis keskara eōnoa. A ē yoisim anori tsōa mato xītitiro. Yora fetsafāfe mato yoiāifo mā metsanima. Mato askafafiaifono ēfe meka mā shināmakimisma. “Na Jesūs nōko Ifo,” mā ea famis.

⁹ Fetsafāfe chanīkakī mato yoisimfo iskafakī: “Nō judeofo,” ixō mato yoisimfo. Afokai Niospa afe yorafoma, Epa Nios chanīmara faxoma. Afāfe Satanās ifofamisfo. Nāskakē ēfe Epa fe nō āto kaifoma. Afōfi āa chanīmisfo. Shinākāfe. Nā yorafa ē ato yoisimfo iskafakī yoinōfo: “Nōkai shara shināima. Nō afama. Chanīma, Niospa āfe Fake mato noisharakōīmis,” ratokonō mai chachikaxō iskafakī mato yoixikani.

¹⁰ A ē mato yoisim anori mā isharakōīa omiskōīfikī mā tenekōīmis ēfe meka nikakatsaxakī. Mā eōnoax omiskōīfikī mā tenekōīmis. Nāskakē mā ea shināmakimismano ē mato kexesharaxii a omiskōīai nokoaino nā maitio. Keyokōī omiskōīxikani ea Ifofayamakanax.

¹¹ Ē anā samama oxii matoki. Ea shināmakiyamakāfe. Mā ea Ifofakī ea chaifayamakāfe. Mā ea chaifayamaino eōxō Epa Niospa mato ināpaiyai keskara mato ināi fetsafāfe finōfoma.

¹² Fetsa omiskōikī ēfe meka shināmakitama tenekōifai ea Ifo sharakōi faxō ato Satanás finōkōia. Nāskakē a ēfe Epa Nios ika ano, ē ato imasharapakenaka. Anoa anā faki fonakafoma. Nāskakē ē afo tāpimaxii afomāi Epa Niospa yorafokē. Askaxō ē ato yoixii iskafakī: “Nono Epa Nios ikano, nofe mā ipanaka,” ē ato faxii. A Niospa yorafo, judeofo, Jerusalén ano ipaonifo. Akka iskaratīa Epa Nios ika ari Jerusalén fena. Jerusalén fena nai mēra. Nai mēra ifiax, chipo nāmā fotoxii. Akka fetsafo ea shināmakikanaxma afo ano ipanakafo. Nāskakē fotoxō ēfe Epa ane ē atoki nētaxii. Askatari Jerusalén fenapa aneri ē atoki nētaxii. Askatari ēfe ane fenari tsōa nikayomisma ē atoki nētaxii keyokōichi tāpinōfo ē āto Ifokē.

¹³ Mā pachoyakī ea nikasharakōikāfe. A Niospa Yōshi Sharapa ato shināmanaino yoiaifo anori nikasharakōikāfe,” ixō Jesús ea anori yoia a Ifofafo Filadelfia anofo ē ato kenexonō.

Jesús Laodicea anofo a chanīmara fafo ato yoini

¹⁴ Askata anā Jesús ea yoia iskafakī: “A ea Ifofafo Laodicea anofo a ato Niospa meka yoisimā a ē yoipaiyai anori ē yoinō ea kirika kenexōfe iskafakī: ‘Ēkīa mātō Ifo Jesús ē mato yoi mā tāpinō. Epa Niospa ea amapaiyai keskara ē fakatsaxakī āfe meka yoinō. Epa Niospa yoipaiyai keskara ē keyokōi yoisim. Ē chanīkima yoisim. Epa Niospa onifani tii keyokōi ēfi āto xanīfokōikī. Ē mato iskafakī yoi:

¹⁵⁻¹⁶ Mā amis keskara mē tāpia. Ea kachikiri fayamakaxō akka askafixō ē mato amapaiyai keskara mā fichipaikōiama. Askara sharama. Afara matsishara nō nīskakī nō inimayanā nō ayatiro. Askatari afara xana shara mā matsikē nō inimayanā ayatiro. Askafixokai afara katsa nō inimayanā ayatiroma. Katsa meei nō anāpaketiro. Nāskarīfai ranāri yorafo afara xana keskarafo. Ea Ifo sharakōi fafo. Akka ranāri afara matsi keskarafo. Ēfe meka tāpisharafoma. Ē atoōnoax rafaanā ikōini. Askafixakai mā kai xana yafi matsi keskarama. Mā katsa keskara. Afara katsa meeki nō anāpaketiro keskara ēri mato askafai. Nāskakē ē mato potaxii oa ē anāpakeai keskafakī.

¹⁷ Akka mā yoisim iskafakī: “Ē afara ichapaya. Ē fafa yopaima. Ē Niospa mekari tāpifinakōia,” ixō, anori mā yoifiax mā tāpīama mā chaka imis. Ooa. Ea mā yopafikī mā kakapaimis. Niospa āfe Yōshi Sharapa mato imapaiyai keskara mā ikama. Mā katsa keskarakī. Mā imis keskara mē tāpia. Akka ē kai askara fichipaima. Askafixō ē matoōnoa shināi keskara mā kai tāpīama. Mā nā fēxo keskarafo. Fēxo afara ōitiroma. Nāskarīfai māri ēfe mekakōi nikasharamisma. Mā yora chitoria keskarafo. Akka mā tāpīama mā chitoria keskara. Yora chitoriatō rapati yopai chitoria ixikima. Nāskarīfakī mā ea yopaima keskara ea yopafikī.

¹⁸ Akka ē mato yoisharapai mā afara chakafamis keskara mā anā anōma. Ea yōkakāfe ē mato tāpimanō afesfax mā ea keskara itiomākī. Eres fisti ē mato imasharatiro. Akka mā chitoria keskara. Akka ē mato rapati safemasharatiro mā anā rāfinōma. Akka rapati ē mato yoitamaroko mā afara chakafamis ē mato yoi. Akka ē mātō ōiti fetsafaxotiro ea keskara shara mā inō. Akka a afara mā chakafamis ē xafakīa ōia. Mā fēxo keskarakōi imis. Nāskakē ea yōkakāfe ē mato sharafanō, ēfe meka ē mato tāpimasharanō.

¹⁹ Akka ē mato noiyamakī ē anori mato yoikeranama. Askatamaroko ē mato keyokōi noikōi. Nāskakē ē mato omiskōimatiro tāpimākī mā chaka xatenō. Nāskaxō nāfori ē ato yoisharapai ea Ifo shara fanōfo. Akka a mā chaka shināmis keskara anā shināyamakāfe. Iskaratīa ēfe meka nikakōikāfe ē mato yoiai keskara axikakī mātō chaka xatekāfe.

²⁰ Shinākapo efe yora mīstichi. Akka a yora pexe mēra ikīpaikī ikisi pexe ifo kenatoshitiro pexe ifāfe ikimanō. Nāskarīfai ē mato ano nokoxō mato yoikī iskafaxii: “Ē mefe rafepai,” ixō ē mato yoisim. Fētsa āfe shinā mēraxō ea nikaxō ea yoi: “Ifo, emēra ikife. Ē mia fichipai,” ixō anori yoiaito ē a mēra ikiax ē afe rafēi. Ari efe rafēi.

²¹ Fētsa afara chakafakī xatexō ea Ifosharafai nā ēfe Epa Nios ika ano efe ipasharatiro. Nāato Satanás finōa. Ēfi xanīfokōikī ari efe xanīfo itiro. Ē Satanás yafi niafaka chakafo finōkōia. Ēfe Epa Nios ika ano afe xanīfokōi ē ika. Nāskarīfai fētsa āfe chaka kachikiri fakī, ea Ifosharafaxii ē ika anoax ari efe xanīfo ipaxatiro.

²² Mā pachoyakī ea nikakāfe. Niospa Yōshi Sharapa ea yoiai keskara nikasharakāfe,” ixō ea anori Jesús yoia a Ifofafo Laodicea anofo ē ato kenexonō.

4

¹ Akka nā ea taefakī yoia, mē kenekī mitoano, ea anā yoiaito ē nika. Ea iskafaito ē anā ōia nai mēraxō oa pexe fepoti fepekemea keskarafoxō. Ē nika afia ē nika keskara xāaiti āfe oi efapa keskarafo ea yoia anā ea iskafakī: “Niri ekeki māpeferafe,” ea faa. Oa namakē ōia keskara ē ōia ea iskafaito: “Nafō ē mia ispanō nafō afarafo chipo ixiaifo ē mia ispanō,” ea faa.

² Ea askafaito samama Niospa Yōshi Sharapa ea òimana āfe tsaoti efapa sharakōi ea òimana a xanifāfe tsaoti ano tsaokē ē òia.

³ A ē òimismafo ē òia sharakōifo. Nāskakē ē tāpia. Nioskōiromomē ē faa. Askaito ē òia fafesharakōiaito. Iskara ē òia. Tokiri rafe āto ane jaspe fe cornālinā nā rafesharakōi fakka fakka sakōini. Nāskara āfe femānā ē òia. A āfe tsaoti ano oa nāfa fai nana keskara ē òia fafesharakōiaito.

⁴ Nā nōko Ifo tsoa ano a kematai veinticuatro tsaotifo ē òia. A tsaoti kamaki feronāfakēfo tsoafo ikafo. Nā feronāfakēfo Jesús Ifofamisfo ikafo. Afāfe nā ato chanimara faifo ato kekemisfo ipaonifo. Āto rapati oxo sharakōifo māmāi ato Niospa āfe chaka soaxonikē. Askatari xanifāfe maiti keskara oro sharakōi safeafo ika.

⁵ A āfe tsaoti anoax kana peeitaitani oa kana piishikai keskara a mēranoa ē nika. A fesoa anori siete rāpari xofisaito ē òia. A ē òiaino Epa Niospa ea shināmama iskafakā: “A Epa Nios tsoano rāpari otaito ē òia keskara, nāskarifikā Epa Niospa āfe Yōshi Shara nokoki nīchiarokomē nofe rafenō,” ixō ē shinā.

⁶ Askatari a fesoa anori oa fakafā keskara fakka fakka ikaito ē òia, oke mēra xafakīakōi ika. Askatari a nōko Ifāfe āfe tsaoti ano a onifanifo cuatro ano niafo ika. Askai fero ichapayafo. Takairafe fero neeafō.

⁷ Oa poomā femānā keskara fetsa ita, fetsari oa fakka fene femānā keskara ita, fetsari oa yōra femānā keskara ita, fetsari oa tete yoyai keskara ika.

⁸ Askakani āto pei ichapa seis ika, fisti rasi pei ichapayafo. Askai āto fero rasi ato neei fetsea ika. Penachāi fanāita, fakishchāiri fanāiki xatepakenakafoma. Fanāiyanā iskafakani:

Sharafinākōia, sharafinākōia, sharafinākōia, nōko Nios sharafinākōi. Nōko Niospa afama mīshti famis nā apaiyaifo. Epa Nios niyopaofinixakī, nāskakē iskaratīa nia. Askatari Epa Nios afeska pishta nakama, ikax fanāikafo.

⁹⁻¹⁰ Nāskakē aōnoax fanāikafo iskakani: “Epa Niosi, mī fisti nōko Ifo. Fato fetsakai na mī ikai keskarama. Mīfi nīsharapakenakaki. Mī sharakōi. Mī afaa pishta chakafamisma. Mī askaito nō mia Ifofasharakōi. Aicho Epa Niosi. Fato fetsakai mia keskarama,” ixō Nios fanākafo. Mā askafono nā Jesús Ifofamisfo veinticuatro xanifofo nōko Ifo Nios āfe tsaotiki tsoano a nāmā feopakefofānafo. Feopakefofākata, āto maiti tsekakata feofofo Nios nāmā māmāi askafakatsaxakakī. Nāskaxō yoiāfo iskafakakī: “Nōko Ifo Nios mī noko maiti inā keskari fakī nōri miari mini. Mī noko ināfikē nō mia fāsi noikī na maitifo nō mia mini. Meres fisti mī noko ikitiromo. Mī noko ifimis. Akka mī nōko Ifokōi itiro.

¹¹ Mī afaa chakafatamaroko mī sharakōifamis. Akka mīōnoa fisti nō yoitiro iskafakī:

Mī nōko Ifokōi. Mī nōko Nios. Tsoa fetsakai mia keskarama shara. Mī isharapakenaka. Mikai afaa chakafamisma. Nāskakē nō mia fāsi noi. Mī shināmās mī afama mīshti fatiro. Mī keyokōi onifani. Mī apaiyai keskara mī keyokōi onifani ato nimapakexakī,” ixō nā Jesús Ifofamisfāfe veinticuatro xanifofōfāfe yoisimfo.

5

Jesús kirika katarama tsoaxō ato yoiyoni afeskaximākai chipo

¹ Askata ē anā òia oa ēfe namapa òia keskara nā ē mato yoinō. Nā mifi kayakai aōri nōko Ifo Nios tsoano ē òia kirika katarama takai rafe kenea ē òia, siete taxtati aō neekē.

² Niospa ājiri finasharakōia ē òia. Fāsikōi mekayanā iskafakī yoiā: “Na kirika taxtatinī taxa afeskaxō tsōa òitiro. Nā xanifo afaa chakafamisma fistichi fēpetiro òixii. ¿Fato xanifāfe afaa chakafamismato fēpetiromē nō òinō?” ixō yoiā.

³ Askafixō tsōa fēpetiroma nai mēranoa ikafāferi fēpetirofoma. Askatari a nāmā ikafāferi, Niospa ājirifāferi fēpetirofoma a mēra òixiakī.

⁴ Nāskakē ē oiāi finakōiyanā iskafakī yoiā: “¡Ooa! Xanifo afaa chakafamisma tsōa fichiama na kirika noko fēpexopanā a mēra nō òipanā,” ixō ē shinā.

⁵ Askata nā veinticuatro xanifofōfāfe Jesús Ifofamis fētsa ea iskafaa: “Oiyamafe. Ōipo. Nōko Ifo oa ono nia. Cristo fisti nōko xanifo finakōi. Afama mīshti atiro. Tsoa a keskarakōima. Nōko xinifāfe āto xanifo ipaoni David āfe fena Jesús. David xanifo finakōia ipaofinikē, Jesús finōkōia. Keyokōi ato finōa. Satanās finōta, a xanifo fetsafori ato finōkōia Jesús. Iskaratīa nono Epa Nios fe ika. Nāskakē na siete taxtati Jesús noko fēpexotiro nā kirika nō òinō. Nāskakē anā oiayamafe,” ea faa.

⁶ Nāskakē nānoa ovejanā fake ē òia āfe māxo sieteya, āfe ferori nāskara ika. Reteafo keskarañax Niospa tsaoti ano nia ika. Nānoa nā Niospa onifani cuatrofo feta a veinticuatro Nios Ifofafo xanifofōfāfe foaketefayakenafo ika. Tsoa fetsakai a keskarama. Nāato afama mīshti fatiro. Nā fero sietefāfe noko shināmāni Niospa āfe Yōshi Shara nīchiano keyokōi nā maitio ano inō.

⁷ Akka Epa Niospa nā kirika āfe mifi kayakai aōri tsoamakē Jesús fīa.

⁸ Fixō tsomano nā cuatro Niospa onifanifo fe nā veinticuatro xanīfofo Jesús Ifofamisfo a nāmā feopakefōfānafo. Nāfāfe maneti yafi kechofo tsoமாfo. Nā kechofo oro fakka fakka ikai keskara mēranoax otano āfe kōi nofe nakas shara nai mēra foai keskara. Nāskarīfai nā Nios Ifofamisfāfe kīfīaifono Epa Niospa nikamis.

⁹⁻¹⁰ Akka nā fanāikaifo tsōa nikayomisma fanāikani, iskakani:

Mī afaa chakafayamafiamiskē mia retenifo. Mī noko nāxoni, mī imi foni Satanās anā nōko ifo inōma Epa Nios āfe fakefo nō inō. Nāskakē mī fisticīhi fitiro kirika kenea fēpexiki noko tāpimaxiki. Mīōnoax nā mia chanīmara faafo tii maifo tii anoafō Niospa yora itirofo meka fetsa fetsatapafāfe mekakani. Nāskakē nāfāferi fetsafo mī meka shara ato tāpimanano, mī ato amapaiyai keskara anōfo. Askatari nā maifo tii anoafō xanīfo mefe ixikani,

ikax fanāikafo.

¹¹ Askatari ē ōia Niospa ājirifo ichapakōifo tsōa ato tanatiroma ichapakōi fanāikaifāfe ē ato nika. Nios xanīfo tsaoti ano nā Niospa onifaa cuatrofo fe nā xanīfofo veinticuatrofo feta nakifayakenafo.

¹² Fāsikōi fanāikani iskafo:

Niospa Fake Jesús oveja fake keskara yorafo nāxōa āto chaka soaxoxikī. Akka keyokōi nā maitio anoafō ato īkitiro, keyokōi nai mēranoafori ato īkitiro, nōko mai anoafori āfenā, keyokōi tāpikōiakī, afama mīshti atiro, keyokōichi mī sharakōira fapanakafo. Mī fisti nōko Ifo itiro. Aicho, mī nōko Ifo mī isharakatsaxakī mī nīpanakara,

ikax fanāikafo.

¹³ Askata ē nika keyokōi nai mēranoafō tii fanāikaifono, mai anoafori fanāikaifono ē nika.

Mai mēranoafori ē nika. Fakafā anoafori fanāikaifono iskakani:

Epa Nios āfe tsaoti ano tsoa, āfe Fake Jesús oveja fake keskara, nā rafe nōko Ifo isharakōimisfo. Keyokōichi mā sharakōira ato fapanakafo. Mares fisti mā nōko Ifo itiro. Mā afama mīshti atiro. Nāskara mā īpanaka,

ikanax fanāikafo.

¹⁴ Askatari nā cuatro Niospa onifāfāfe yoiafo iskafakakī: “¡Aicho! Askapainōra,” fata, nā veinticuatro xanīfofo Nios nāmā feopakefōfānafo. Afāferi Epa Nios yafi Jesús yoisharakani.

6

Nā siete taxtati

¹ Nāskata ē namakē ōiai keskara ē anā ōia. Jesús oveja fake keskara nāato noko nāxoni nāato nā kirika āfe taxtati fisti fēpeaito ē ōia. Fēpeaino ē nika nā cuatro Nios onifaa fetsa fāsikōi mekaito nai tiri ikai keskara: “Niri ofe,” ikaito.

² Askaino kamayo oxo chaima nia ē ōia. Nā kamayo kamaki fētsa kati tsoamax tsoaono xanīfāfe maiti Niospa maimana. Nānoax kamayonō kaa fetsafo ikipai xanīfo ixiki. Tsoa pishtakai nētefatiroma.

³ Askata Jesús anā kirika taxtati fetsa fēpea. Fēpeaino nā cuatro Niospa onifani fetsa ē nika iskaito: “Niri ofe,” ikaito.

⁴ Nāskafaino kamayo fetsari ōshi nokotoshia. Nā kamayo kamaki tsoa fetsari ē ōia. Keno chainipa Niospa inā aya katanō maifo tii anoafō ato shināmatanō anā isharanōfoma noikaspa faatanākanax retenānōfo.

⁵ Askatafata Jesús anā kirika taxtati fetsa fēpea. Fēpeaino nā cuatro Nios onifaa fetsa ē nika iskafakī yoiaito: “Niri ofe,” ikaito. Anori yoiaino kamayo fetsa fisokōi nokotoshiaito ē ōia. A kamaki tsoa aō kilo tanati tsoamax.

⁶ Nā cuatro Niospa onifani anoax mekaito ē āfe meka nika iskaito: “Kori texe fayamanō, feronāfāke pena fisti yonoxō kori fixō trigo kilo fisti fikī kopifatiro. Askayamakī tres kilo xiki fitiro. Kori texefayamaxō afaa fetsa fitiroma. Nāskakē xini yafi nā uva fimi ene chakanafayamafe. Akka mā texefayamax mā fonāiki omiskōixii,” ixō yoia.

⁷ Askata Jesús anā kirika āfe taxtati fetsa fēpea. Fēpeaino ē nika na cuatro Nios onifani fetsa, “Niri ofe,” ikaito.

⁸ Anori askafaino kamayo fetsa pāshikōi nokotoshiaito ē ōia. Nā kamayo kamaki fetsa tsoa ika āfe ane Ato Namamis. Nāato yorafo namatiro. “É yorafo namapaira,” faito, “Éje. Mī ato namatiro,” Niospa faa. Askafaito nā ato namamisto yora fetsafoya ato retenāmai. Akka atiri ato fonī namai, atiri pae fetsa fetsatapafāfe ato namaxii, atiri yoinā pōfēfāfe ato yokakani. Akka yora kayakōi ato namaxiai ē ōia tsōa ato tanātiroma.

⁹⁻¹⁰ Nāskata Jesús āfe kirika taxtamea anā fēpea. Fēpeaino nā Niospa meka ato yoifōfāsafaifono fetsafāfe ato retefinifono mā otafo ē ōia. Epa Nios kīfīti mīsa ano nā Jesúsnoax nanifo āto fero mēshofo ichanākanax fāsikōi mekaito ē nika iskai mekaifono:

“Nōko Ifo Nios, mī keyokōi tāpikōia. Mī afama mīshti fatiro. Mī shara famis. Mīkai afaa chakafayomisma. Mī chanīmakōi. Nā mia chanīmara faafāfema mai anoafāfe noko retemisfo. Nāskakē, ¿afetīa mī ato kopimē omiskōimakī?” ixō yoiaifāfe ē nika.

¹¹ Nāskakē nōko Ifāfe yoia isfakī: “Manayokāfe. Fena fena kakīma. Fetsafori mato keskarafori eōxō yonomisfo ixikani. Nāfori eōxō nā yora chakafāfe ato retexikani. Akka mā ato retēkī mitoafono mā nakanax mato ano nokoxikani keyokōi. Nāskakē nā ato retemisfo ē ato kopixii ato omiskōimakī omiskōipakenakafo mēra ē ato potaxii afaramāi chakafamisfokē,” ixō nōko Ifo ato yoia. Ato yoita rapati oxosharakōi chainipa ato inā, nāfāfemāi taeyoi nikanifono nā Epa Nios Ifofasharamisfo tii ato inā.

¹² Askata Jesús anā kirika āfe taxtati fetsa fēpeaito ē ōia. Fēpeaino fāsikōi mai naya naya ika. Xini anā pee iyamaino, rapati fisokōichi fepea keskara ika, fakishkōi. Oxeri ōshikōi imi keskara ika.

¹³ Oa nefe kerexepato nokoki nefekī fana fimi yome mīshti niriatiro keskara. Nāskarifiāi fishifo nai mēranoax mai ano pakei fetsa.

¹⁴ Askatari nai kataramēake kafākē ē anā ōiama. Māchifā fe mai toomāfā mai naya naya ikaino, anā ano ikama.

¹⁵ Nāskakē keyokōi mai anoafō ratekōiafo. Yorafāfe āto xanīfofori sorarofāfe āto xanīfofori ratekōiafo; afama mīshtiyāfori, yora mīsisipāfori, āto yonomatīfori, fetsafori ifomaisīfori keyokōi nāfo ratekōiafo. A tūiri mafa kinī mēra ikiafo. A tūiri māchi keya ano ichoafō tokirinīfā nāmā oneafō.

¹⁶⁻¹⁷ Askata fīsikafo iskayanā: “¡Ooa! Epa Nios nai mēra ikato āfe Fake Jesús fe iskaratīa nokoki ōitīfishikōina. ¿Nō afeskatiromē omiskōiyamaxikī? Tsōakai Nios timamatiroma noko omiskōimayamanō. Nā māchi keya ano tokirinīfā nokoki pakepainō Niospa noko fichinōma nō omiskōinōma,” ixō nā nikakaspaamisfāfe yoiafo.

7

Niospa ciento cuarenta y cuatro mil afe yorafo kexexi

¹ Nāskata ē anā ōia oa ēfe namapa ōia keskara nā ē mato yoinō. Niospa āfe ājiri cuatro afe nai mēra imisfo ē ōia. Fetsa xini oaikiri nia, fetsa xini kaikiri nia, fetsa xini oaima anori nia, fetsa xini kaima anori nia. Askano nefe nishpapakekafana. Nefe nishpapakekafanaino keyokōi maifo tii anoā nii peifo takka takka ikama. Fakafāri anā poo ikama.

² Nā cuatro Niospa ato yoiaito mai yafi fakafā chakafatirofo. Askata Epa Nios nīpanakato āfe ājiri fetsa ē ōia xini oaikirinoax oaito, nōko Epa Nios āfe marakka fati feaito, a afe yorafo aō marakka faxii keyokōichi tāpinōfo Niospa afe yorafokē. Nā Niospa ājiri okī nā cuatro Niospa ājiri fetsafori fāsikōi ato yoia iskafakī:

³ “Manayokāfe, nā Nios Ifofamisfo īkisi āto femānāki āfe anefo keneyonō nāfāfe Nios yonoxomisfoki keyokōichi tāpinōfo. Nāskakē fena ato chakana fayamakāfe. Mai anoafō fakafā anoāfori, ififo ato chakana fayamakāfe. Chipō ato axikakī,” ixō ato yoia.

⁴ Akka ē nika mā Niospa ājirinī mā ato marakka faano ciento cuarenta y cuatro mil fideofāfe femānāki.

⁵⁻⁸ Nōko xini Israel āfe fakefo feronāfakefos doce inifo. Ato iyoakōichi āfe ane Judā. Judā āfe pefeta Rubén. Rubén āfe pefeta Gad. Gad āfe pefeta Aser. Aser āfe pefeta Neftalí. Neftalí āfe pefeta Manasés. Manasés āfe pefeta Simeón. Simeón āfe pefeta Leví. Leví āfe pefeta Isacar. Isacar āfe pefeta Zabulón. Zabulón āfe pefeta José. José āfe pefeta ato chipo fakekōi Benjamín. Nā doce feronāfake fisti rasi paxkakanax mā kaiafono nā doce feronāfake anoā Niospa ato katoni. Fetsa anoā doce mil faxō ifita, fetsa anoāri doce mil faxō ifini. Nāato askafakī fetsa doce mil faxō ato ifiketsani. Nāskakē mā afo yosikanax ciento cuarenta y cuatro mil inifo.

Yorafā rasikōichi rapati oxokōi safeafo

⁹ Askata Epa Nios fe āfe Fake Jesús nā oveja fake keskara nā tsaoafō ano yorafā rasi niafo tsōa ato tanatiroma. Nā maitio anoafō fisti rasi anoafō, xoko fetsafo, meka fetsayafo ikafo, rapati oxokōi chainipa safeafo ē ōia fisti rasichi epe pei tsomafāfe.

¹⁰ Nāfāfe fāsikōi yoiafo iskafakakī:

Nōko Epa Nios feta āfe Fake Jesús noko ifimis nōko Ifo Jesús oveja fake keskara nokoōnoax nani nōko chaka noko soaxoxikī nō afe nīpaxanō, ixō yoiafo.

¹¹⁻¹² Nāskata nōko Ifo xanīfāfe tsaoti ano tsaono āfe ājirifāfe foaketi fayakenafo ikafo. Nāskakē nā veinticuatro xanīfofo fe nā Niospa onifanifo cuatrofo nōko Ifo tsaono tsaofō ikafo. Nāskafono nā ājirifō nā nōko Ifo tsaono ratokonō mai chachipakefōfākanax feopakefōfānafo Nios yoisharakakī iskafakakī:

¡Aicho! Chanĩmakõĩ, meres fisti mĩ isharapakemis. Meres fisti nokori mĩ imasharatiro. Mĩ keyokõĩ tãpia. ¡Aicho! Nã nõ yopai keskara mĩ noko axomis. Keyokõichi sharakõĩ mia fapanakafo. Mĩ afama mĩshti fatiro. Mĩ nãskapakenaka. Nãskaroko anõkĩ, ixõ yoiafo.

¹³ Nãskata nãnoa xanĩfo fẽtsa ea yõka: “¿Na yorafo rapati oxo chainipa safeafo tsoamẽ? ¿Fakiax feafomẽ, mĩ tãpiamẽ?” ixõ ea yõka.

¹⁴ “Maa. Èkai tãpiama. Mĩ tãpia. Mĩ ea yoitiro,” ã faito ea yoia iskafakĩ: “Yorafo omiskõiaifono na yorafori fãsi omiskõinifo. Akka omiskõiaifono Niospa ãfe Fãke Jesús ato nãxoni ãto chaka ato soaxoxiki. Ato chaka soaxõ mã ato imasharakõia. Nãskakẽ ato rapati oxo shara safemana.

¹⁵ Nãskakẽ Epa Nios ano iskaratĩa afe ikafo. Epa Niospa ato yonomana keskara axopakenakafo. Nãskakẽ ato kexefafãini afara chaka atoki nokoyamanõ.

¹⁶⁻¹⁷ Niospa ãfe Fake Jesús Epa Nios fe imis. Nãato ato kexepakenaka. Nãskakẽ anã fonãitama, anã nomipakenakafoma. Xinĩri anã ato pipanakama. Jesús ato kexeaino inimapakenakafo. Epa Niospa ãto õiti ato fepeaxoxii anã oianõfoma,” ixõ ea yoia.

8

Nã taxtati mã keyoaino Jesús fẽpea

¹ Mã kirika ãfe taxtati keyoano Jesús fẽpeaito ã õia namakẽ õiai keskara. Nã seis taxtati taefakĩ fẽpeyoa. Akka iskaratĩari fetsari fẽpea mã keyoaino. Fẽpeano Nios ika ano nai mẽranoax keyokõĩ nishparakafo. Media hora nishparakayofo.

² Nishparakaifono ã õia Niospa ãfe ãjirifo siete a ketaxamei niafãfe, nãfãfe Niospa ato yomis keskara anõfo. Niospa ato tii maneti inã nõ ato yoiaitĩa ãto maneti chãĩ chãisafanõfo.

³ Askata Niospa ãjiri fẽtsa sapa oro fakka fakka ikai keskara somax Epa Nios kĩfiti ano nia ã õia. Akka fẽtsa sapa kamakĩ nakas otaxõ naneaito ã õia. Nãskaxõ Nios kĩfiti mãsa ano oro kamakĩ sapa faa.

⁴ Askano ãfe kõĩ nakas shara nõ mẽra foa ãfe mifi kamakĩ sapa tsomano. Nãskarifiã Niospa yorafãfe kĩfiaifono Epa Nios ika ari nokoaito nikatiro.

⁵ Akka ã anã õia Epa Niospa ãfe ãjiri yoiaino, mãsa kamakinoa chii fixõ ãfe sapa kamakĩ chii fospi faa. Fospi fata nai mẽraxõ mai ano pota. Askaino mai anoax nai fãsikõĩ tiiri ika pachakõĩ ika, kanari piishika mairi naya naya ika. Nãskakẽ nã chanĩmara faafoma tii ato omiskõimaxii.

Ãjirifãfe maneti chãĩ chãisafafo

⁶ Askata Niospa ãfe ãjirifãfe siete nã manetifo Niospa ato tii inã itipinĩsharafafo chãĩ chãisafaxikãki.

⁷ Askata fẽtsa ãfe maneti chãĩ chãisafaino faka matsi tokoro efapafo imia osia nai mẽranoax keyopakea. Chiiri imiya osia nai mẽranoax mai ano pakea. Mãifã kaxke fetsa koofi keyoa iffoya. Akka ranãri texea. Akka fasifo kooi keyokõia.

⁸ Askata Niospa ãjiri fẽtsa ãfe manetiri chãĩ chãisafaino machi efapa chii xoisai keskara Niospa nai mẽraxõ nãmã pota. Fakafã mẽra pakea. Askaino fakafã kaxke fetsa imi keskara ika.

⁹ Nãskakẽ fakafã mẽranoax fãfõ ranãri nafo. Askatari kanõanãfãfori ranãri koofo.

¹⁰ Askata Niospa ãjiri fẽtsa atori ãfe maneti chãĩ chãisafaino fishi efapakõĩ xofisai chii keskara nai mẽranoax pakea fakafo mẽra. Akka faka fetsafo mẽrari pakeama. Askatari faka poyo poyo ikai ano pakea.

¹¹ Nã fishifã ãfe ane Mokara famisfo. Nã fishi faka mẽra pakeano, faka moka paekõĩ ika. Nãskakẽ nã faka ayakanax yorafo ranãri nai fetsefo.

¹² Askatari Niospa ãjiri fẽtsa ãfe manetiri chãĩ chãisafaino xinĩ anã chaxasharama. Õxeri anã chaxasharama. Askatari fishifãferi anã ranãrito chaxasharama. Nãskakẽ penafekẽ tsõa anã õisharatiroma. Fakish finakõia ika. Tsõa askara fakish õiyomisma.

¹³ È nãfo õiaino tetepafã keskara keya yoyaito ã nika. Fãsikõĩ mekayanã yoia iskafakĩ: “¡Ooa! Yorafãfe Nios nikakaspakanax omiskõikani finakõixikani. Niospa ãjiri tres fetsafãfe ãto maneti chãĩ chãisafaifono mai ano ikafo omiskõifinaxikani,” ixõ tetepafã keskarato yoia.

9

¹ Askatari Niospa ãjiri fẽtsa ãfe maneti chãĩ chãisafaino nai mẽranoax oa fishi keskara nãmã pakeaito ã õia. Nãskata nã niafaka chakafo kinifã fakishifã mẽra ikafo ano kaa. Nã kinifã fepotiya. A mẽranoaxkai kãitirofoma. Akka nã nai mẽranoax nãmã pakea Niospa chavis inã aato kinifã fakishifã mẽranoa ato kãimanõ.

² Fẽpeano mafa kinifã mẽranoax kõinifã nai mẽra foa. Nãskakẽ xinĩ chaxasharama. Nai fakishkõĩ ika.

³ Askata nā kōinifā mēranoax kōketsere keskara ichapa rasi mai ano fotoa. Niospa ato pōfekōi ima nifo keskara inōfo.

⁴⁻⁵ Ē nika iskaito: “Mai anoa fasifo fanafo ififo chakana fayamakāfe. Akka nā Niospa yorafo femānāki keneafō, ato tekayamakāfe. Akka nā keneamafo mā ato tekatiro. Akka ato reteyamakāfe. Ato retetamaroko cinco oxe ato amakāfe ato omiskōimaki,” ixō ato yoia. Nāskakē kōketserefāfe ato tekafo nā chanīmara faafoma nifo keskara paekōi meafō omiskōiafo.

⁶ Nāskakē kōketserefāfe cinco oxe ato omiskōimana nā chanīmara faafomafo napaixikani, tenetirofoma mekani. Askafikanax nakanima.

⁷ Iskaratīa na kōketserefo afe keskaramākī ē mato yoinō mā tāpinō. Kamayofo itipinī faax a kamaki tsaoox katiro fetsafo reteikai. Nāskarīfai na kōketserefo nā kamayo keskarafo. Kamayo kamaki tsaoox fetsafo reteikai keskara īta, xanīfāfe āfe oro maiti maia keskara īta, āto fēso feronāfāke fēso keskara īta,

⁸ āto foo kērofāfe foo keskara īta, āto piti poomānā piti keskara īta,

⁹ āto xochi ano rapati kerexkōi keskara safemanano ato tsakapaiyafono a mēra ikitiroma īta, āto petafo pei pei ikī kamayonō karo keskara niniaino pachakōi īta, fetsafo retenāifo keskara īta,

¹⁰ keyokōi tsitsisyafō. Āto tsitsisi yora chachitiro nifo pae keskara. Āto tsitsisi yorafo omiskōimatiro. Mā oxe cinco finōano anā ato omiskōimatirofoma.

¹¹ Nā kinifā fakishifā mēra niafaka chakafo ikafo anoa āto xanīfāfe ane israelifāfe mekapa Abadón famisfo. Griego mekapari Apolión famisfo. Nōko mekapari, “Yorafo Retemis,” nō famis.

¹² Akka taeyoi a omiskōiafo mā finōfiano, akka nāno raferi a finakōia finōama.

¹³ Askata Niospa ājiri fētsa āfe maneti chāi chāisafaino, Epa Nios kīfiti oro mīsa shara ano fakka māxo cuatro nia ika. Nā mīsa nakirafenoax mekaito ē nika iskafakī āfe ājirinī yoiaino āfe maneti tsofaxō nika.

¹⁴ “Nā cuatro niafaka chakafo menexemexō nā faka efapa Eufates anoxō manaifo ato mēpetāfe fotanōfo,” ixō āfe ājirinī yoia.

¹⁵ Nā tsekeafō penata Niospa ato yoiaino ichapakōi ato retenōfo. Nāskakē nā niafaka chaka cuatro Niospa itipinīfani mai kaxke fetsa ano ikafo ato retexinōfo.

¹⁶ Ē nika dos cientos millones sorarofo kamayo kamaki tsaofāfe fetsafo retexikakī.

¹⁷ Askata Epa Niospa oa namakē ōia keskara ea ōimana nā sorarofo yafi āto kamayofo ē ōia iskara. Āto xochi ano oa chii ereai keskara kerexkōi āto xochi ano safeafō ikafo. Askatari nanakōiri ika, chaxtari ika a aō xorakomeafō. Akka a kamayofāfe āto mapo poomā mapo keskarafo. Āto āxfa mēranoax kōi fe chii ereai keskara.

¹⁸ Chii fe kōi xofisakī āto āxfa mēranoax kāifaikī ato retepakeafō yorafo ichapakōi ranāri naafō.

¹⁹ Āfe āxfa feta āfe tenēri yorafo retetiro. Āfe tene rono pae keskara. Āfe tene mapoya ika. Nāo yorafo omiskōimana nanōfo.

²⁰ Tsoa nayamafīaxō āto chaka xateafoma Epa Nios Ifofaxikakīma. A niafaka chakafo ifo-famisfo xateafoma. Nāskakē oro nimofō fakāta, a kerexkōi fakkaī fakkaīsaī nimofō fakāta, keno āfe ane bronze nimofō fakāta, ifi nimofō fakāta, tokiri nimofō fakāta; nāfo askafaxō, “Nāfo nōko nios. Nō aō noi,” ixō yoimisfo. Afāfe ōiyamafīaifono, askatari mekayamafīaifono, askatari kafāsayamafīaifono, nāskakē afo kīfimisfo. Epa Niospa nā āto kaifo yafi yora fetsafo omiskōimafīaito ōifikanax āto chaka xateafoma Epa Nios Ifofapaikanima.

²¹ Ato retetakī xatemisfoma, askatari koshoi ki xatemisfoma, askatari āto āfima chotamisfo, kērofāferi āto fenema chotamamisfo, yometsoriai xatemisfoma nāfo xateafoma. Tsōa āto chaka xateama. Nōko Ifo Jesús Ifofaxikakīma. Nāfo chakakōifīkaxō āto chaka xateafoma nōko Ifo Jesucristo Ifofasharaxikakīma.

10

Epa Niospa āfe ājirinī kirika tsoa

¹ Askata ē ōia Niospa āfe ājiri fetsa mitsisipakōi nai mēranoax fotoaito, nai kōiya. Āfe maiti nāfa fai keskara maia. Āfe femānā xinī chaxai keskara. Āfe kishi rafe chii keskara.

² Kirika fepekemea tsofax nia ika. Āfe tae kayakai aōri fakafā femākīa paia. Akka āfe tae oshkiori mai ano paia ika.

³ Askata āfe meka poomā efapato meka keskara ē nika. Askatari ē nika naitiriki fetseaito.

⁴ Mē nikaxō nā yoiafo keskara ē kenekerana. Akka nai mēranoax Nios ika anoa meka fetsa ē nika ea yoiaito iskafakī: “Nā mī nika keskara āto meka keneyamafe. Mī tsoa tāpimatiroma,” ixō ea yoia.

⁵⁻⁷ Askata nā Niospa āfe ājirinī takai fetsa fakafā aōri paita takai fetsari mai ano paixō anā yoia. Epa Nios nā nipanakato nai onifaa. Askatari nai mēra ikafo onifaa. Askatari mai onifaa. Mai ano ikafori onifaa. Askatari fakafā onifaa. Fakafā mēra ikafori onifaa. Nā Nioskōichi āfe ājiri yoia iskafakī: “Epa Niospa ea ōiaino chanīmakōi ē mato yoi. Epa Niospa anā manaima. Āfe ājiri fētsa āfe maneti manekī chāi chāisafaino Epa Niospa axiai keskara āfe meka yoimisfāfe yoiaifo keskara yorafāfe tāpinifoma. Iskaratīa a Nios yoimisfāfe yoinifo keskara mā askakōia,” ixō Niospa ājirinī ea yoia.

⁸ Askata anā nai mēranoax mekaito ē nika ea yoia iskafakī: “Oa Niospa ājiri fakafāki paita mai ano paiax nia ano katāfe. Nā kirika kataramea fēpexō tsoma fiatāfe,” ea faa.

⁹ Askata ē Niospa ājiri ano kaxō ē yoia iskafakī: “Nā kirika pishta ea ināfe,” ē faito, “Nakīa, ife. Ōixō tāpikōife. Mā tāpikōixō mī tāpitiro nā meka chanīmakōi. Niospa meka shara. Askatari mī tāpitiro na meka yoiaifo keskara yorafo omiskōikani. Mīri tāpixō mī fāsi shinātiro,” ea faa.

¹⁰ Nāskaxō ē kirika pishta fita ē ōia. Ea yoia keskara chanīmakōi mē tāpikōia. Nā Niospa meka sharafinakōia. Nāskakē nā inōpokoai yoia keskara yorafo omiskōixikani. Nā ōiax ē shināmitsakōia.

¹¹ Ē askano, anā ea yoia: “Niospa afe yorafo yoipaiyai keskara anā ato yoife. Afarafo ixiai yorafoōnoa yoife, manifetsafoōnoari yoife, xanīfofoōnoari ato yoife,” ea faa.

11

Nōko Ifo Jesús yorafo yoipaiyai anori feronāfake rafeta ato yoixikani

¹ Askata na tanati metro keskara ea ināyanā ea yoia iskafakī: “Nāo Nios kīfiti pexefā anoā āfe chainipa yafi āfe xāki tanatāfe. Anoxō Nios kīfiti mīsari tanafa. Askatari a mēranoax fanā ikanaifo ato tanasharafe afe tiito Epa Nios fanā ixokanimākai, askatari afe tiixori kīfikanimākai ato tanasharafe.

² Akka a ketokonō mapoafō a israelifoma ato tanayamafe; afāfe na Jerusalén anoafō ato chakafakani oa fākka nō afara faanano fākka peamanaino kāitiroma keskafakani ato. Cuarenta y dos oxe amaxō ato askafaxikani.

³ Nāskakē nā feronāfake rafe ē ato nīchixii. Nā rafeta nā ē ato yoipaiyai anori ato yoixikani. Un mil dos cientos sesenta pena ato yoixikani ēfe meka. A rafeta āto rapati chapokōi safexō ato ōimaxikani. A ato chakafamisfāfe, ato ōikakī a afara chakafamisfo shināxikani,” ixō ea yoia.

⁴ Nāskakē Niospa afe yorafo yoipaiyai keskara nā rafeta yoimisfo. A rafe oa ifi olivo keskara. Āfe xini fospia keskariai, a feronāfake rafe Niospa Yōshi Shara ato mēra nanekōiafo. Askatari afia rafe oa rāpari ōtai keskara. Mā fakishkē rāpari otakē nō ōisharakōitiro. Nāskarifikā nā rafeta Niospa Yōshi Sharaōxō ato tāpimaxikani Niospa meka. Mā isharakōikaxō āto Ifāfe meka ato fe yorafo yoixikani.

⁵ Na Niospa meka yoimis rafe fetsafāfe ato chakafapaiyaifono, āto axfa mēranoax chii kāitiro ato koofaxii nanōfo. Nāskakē nā rafe tsōa ato chakafatiroma.

⁶ Epa Niospa ato yoiaino, nā rafeta āto mekapa oi nesefatirofo anā fena oi iyamanō nā ato yoiaifotīa. Askatari faka yafi īa āto mekapa fetsafatirofo oa imi keskara inō. Askatari afara afeskarafapaikakī āto mekapas afara meseni fetseaifo fatirofo pae fetsa fetsatapafori fatirofo.

⁷ A feronāfake rafeta mā ato yoikī senēfaafono, a chakakōi mai kinīfā mēranoax Satanās shināmanaino, tsekeinākakā a feronāfake rafe retexii.

⁸ Mā reteafono, fāi nēxpakīa pakeax rakaxikani nā Jesús mastanifo ano, a Jerusalén ano. Nā Jerusalén anoafāfe nōko Ifo Jesús āfe meka shināmisfoma. Nāskakē nō aōnoa yoitiro iskafakī: “Na Anodoma ano ikafo feta Egīpto ano ikafāferi, afaa shināpaonifoma. Nāskakē chakakōi ipaonifo anoafō. Nāskarakōi Jerusalén anoafori.” Nāskax nā feronāfake rafe Jerusalén anoax nakanax āto yora fai nēxpakīa rakaxii.

⁹ Nāskakē yora fetsafo a mai fetsa ari ikafāfe, xoko fetsafāferi, meka fetsayafāferi, a feronāfake rafe rakafāfe ato ōixikani. Nāskafono āto xanīfofofāfe, “Ato fena maifayamakāfe,” ixō ato yoixikani ato noikaspakōikakī. Nāskakē tres nia ato ōixikani.

¹⁰ Askaito ōikani a mai ano ikafo atoki inimaxikani. Askakanax atoki inimakakī fista axikani. Aa ranā kaxpa afarafo inānōnāxikani. Yoikani iskaxikani: “Anā na rafeta noko fekaxtefakanima kiki,” ikanax inimasharakōikani. “Anā nōko chaka noko yoikanima,” ikanax yoināxikani.

¹¹ Askafiaifono mā tres nia oxata nayoafono anā chipo Niospa ato otofaxii a feronāfake rafe. Askaito ōikani a ato mǎnāo nikaxō ato ōiaifo, afo mesexikani, ratekōixikani, askaifāfe ato ōikani.

¹² Askata nã feronãfake rafe otokãta nai mēranoax mekaito nikakani ato iskafaito: “Niri ekeki mãpeferakãfe,” ato faito nikakani a rafe ãto ferotaiſi ronoinfofãkani nai kõi mēra mãpefainfokani. Askaiſãfe a ato noikaspaifãfe ato òikani.

¹³ Askata samama atoya mai naya naya iki finakõia. Pexefã rasi fisti rasi potaito ã òia. Askaino siete mil yorafo naafo. A naamafãferi ratekakĩ Nios yoiafo, “Nios mĩfi afama mĩshti fatirokĩ,” faafo.

¹⁴ Mã afo askayoa anã chipo finakõixii.

Niospa ãjiri fẽtsa ãfe maneti chãi chãisafaa

¹⁵ Akka Niospa ãjirinĩ chipokõitakĩ nã sietepa ãfe maneti chãi chãisafaino, nai mēra Epa Nios ika ariax fãsikõi mekaifãfe ã nika iskai mekaifãfe:

Iskaratĩa na nõko Ifo Cristo xanĩfokõi iki nãmãnoax nai mēra ika keskarari ixii nãatixõ xanĩfo ipanaka, ixõ yoiafo.

¹⁶⁻¹⁷ Akka nã Jesũs chanĩmara faafo ato kexemisfo nã veinticuatro feronãfakefo tsaokanax a Nios nãmã feopakefofã nafo Nioski inimayanã iskafafo:

¡Aicho, mĩ fãsi sharakõiki! Mĩ afama mĩshti famiski. Mĩ Yõshi Sharapa ato ikinã. Afama mĩshti onifaaxma mĩ iyopaonixakĩ. Iskaratĩari mĩ nia.

¹⁸ A mai fetsa anoafãfe mia noikaspamisfo mikikĩ òitifishkikõikakĩ mefe ikaspakakĩ. Afama mĩshti chakafamisfo. Askaiſãfe òikĩ, mĩri ato kopikĩ ato omiskõimaxii atokĩ òitifishkikõixõ. Akka a mia Ifofamisfo mĩ ato inãsharakõixii afara sharakõifo. Akka a mia yonoxoyanã mĩ meka mēxotaima yoimisfo afo mĩ ato inãsharakõiketsaxii, a mia chanĩmara famisfo tii; keyokõi afaamaisfo ita, a xanĩfori a afama mĩshti ichapayafori mĩ ato inãsharakõixii a mia Ifofamisfo tii. Akka nã yorafo chakafamisfo, mĩ ato omiskõimaxii, a amēranoax, omiskõimisfo mēra mĩ ato potaxii, ixõ yoiafo.

¹⁹ Askata a Nios kifiti pexefã nai mēranoax fepekemeaito ã òia. Nãnoa Niospa kafo ã òia, nã kafo mēra a Niospa israelifo yoini kirika kenea nanea ika. Askatari ã òia kana pee ikaito nairi tiri ikaito ã nika, miãmãfanēri mai naya naya akaito ã òia, nai mēranoaxri oi kaya ikaino, oi nami keyopakeaito ã òia.

12

Kēro yafi kapetafã keskara nai mēranoa Juan òini

¹ Askata ã afianã ãfe namapa òia keskara ã mato yoinõ a ea Niospa ispaite ã òiafo nã inõpokoaoifo òikĩ ã tãpinõ a tsõa òimismafo. Ë kēro òia ãfe rapati oa xini pee ikai keskara safea ika nai mēranoax. Oxe kamaki paiya keskara. Askatari ãfe maiti ano fishi doce aõ neafo.

² Askata nã kēro mã chaima fake kãikĩ, fãke pãefai.

³ Askainori fetsari ã òia a tsõa òiyomisma keskara nai mēranoax. Nã Satanãs oa ronofã keskara efapanãfakõi òshimãfa, askai mapo ichapayakõi siete mapoya, askai a ãto xanĩfokõichi maiti sharakõi keskara maiya siete faxõ, askatari ãfe mãxofori diez ika.

⁴ Askata ãfe tene fininĩfofã nai mēshanãnaino nai mēranoax fishi rasi pakea. (Naskarifakĩ Epa Niospa ãjirifo Satanãs atiri ato chakana fama ato ikipaikĩ, “Ea ifofakãfe,” ixõ ato feparapaikĩ. Nãskakē a keskara niafaka chakafo ato ikinõ Niospa nãmã potani nãmãxõ ato ikinõ.) Nãskakē mã kēro chaima fake kãiyaino, a ronofãfã kexei ãfe fake piapaikĩ kãiyaito.

⁵ Askata a kēro fake kãi feronãfake mitsisipakõi. Nãskakē yorafo manifo tii, ato kexesharakõixii ãto xanĩfo finakõia ixii. Mestekõi ato yoisharakõixii nikasharakõinõfo. Askafaito a fake yome rama afa kãiyaito ronõfãfã pipaiyaino Niospa ifirisafaa nai mēranoax afe xanĩfokõi inõ.

⁶ Askaito òifaini afa ichoachãi tsõa istoma ano a Niospa afetũama itipinĩ faxoni ano Satanãs afeskafanõma arixõ Niospa kexenõ cuarenta y dos oxe akaino Niospa kexesharanõ.

⁷ Askatari ã anã òia Satanãs ãfe inafõ fe nã ãjiri Miguel ãfe inafõ nai mēranoax retenãpaiyaifono Satanãs ato finõpaiyaino. Nãskaxõ Satanãs Niosri finõpaini.

⁸⁻⁹ Akka Satanãs ato finõpaifikĩ ato finõnima. Nãskakē fanĩ itirokēma Niospa nãmã potani ãfe inafõya. Taeyoi ãjiri iyopaoni. Nãskaxõ nãato keyokõi yorafo maifo tii anoafõ ato pãramis anorima ato yoikĩ chaka shinãnõfo, chaka nĩpaxakakĩ.

¹⁰ Askaito ã anã nika meka efapato mekai iskaito: “¡Aicho! Epa Niospa mã Satanãs nirixõ nãmã potakĩ, mēxotaima ãakõi noko fanĩrira pãrarifaito. Nãskakē Epa Niospa Satanãs finõinifofana. Nãskakē Satanãs anã nõko ifo ikima, anã fanĩrira noko shinãmanima, Epa Nios fisti nõko Ifokõi iki. Askatari ãfe Fake Jesucristori nõko Ifokõiri iki. Nã rafe nõko Ifokõi.

¹¹ Nãskakē Jesũs Ifofaxõ mēxotaima nõ yoimis niri nai mēra oyoxoma nõ yoiyopaoni nãmãxõ iskafakĩ: ‘Nõko Ifo Jesũs, Niospa Fakekõi, oa oveja fake keskaraxõ noko nãxonni nõko chaka noko soaxoxiki,’ ixõ nõ yoimis mēxotaima. Askatari nõ Niospa meka ato yoimis.

Nāskai nō meseima, 'Noko retefiaifono, nō inimasharai,' ixō anori mēxotaima nō yويمis. Askaxō nō Satanás finōinifofana.

¹² Nāskakē māri nono nai mēranoax inimakāfe Niosnoax. Nā chanīmara faafāfe Jesúsxō mā Satanás finōkōiafo. Akka Satanás Niospa nāmā potani nai mēraxō. Askafaino ōitifishkiki nāmā fotoxō yorafo chakafapaikōi. ¡oaa! Yorafo ono mai anoax fe fakafā mēranoaxri omiskōikani. Satanás mā tāpia afetiara Jesús mai ano fotoai tsōa anā afaa chakafanōma. Nāskara mā tāpiax Satanás ōitifishkikōikī keyokōi maifo anoafō ato chakafamapai omiskōinōfo Jesús fe ĩpaxanōfoma," ixō nai mēranoax mekaito ē nika.

¹³ Mā afo nikakī ē anā ōia afia ē ōiyoa keskara. Mā Niospa Satanás nāmā potano, Satanás shināki iskafai: "Na kēro ē akiki nokoxō omiskōimanikai," ixō shināki Satanás chīfafaina.

¹⁴ Nāskakē Niospa nā kēro tetepafā pei keskara inā aō katanō tsōa istoma ano. Nā afetiama Epa Niospa itipinī faxoni ano mā kaxō anoxō piinō cuarenta y dos oxe akī, nā niafaka chakata ronōfā keskarato afeskafanōma.

¹⁵ A kēro ari ikano chakafapaikai Satanás ari kai. Mā kaxō chaima nikaxō āfe axfapa faka siiakī faka faipafānē iyotanō āsapaiķi.

¹⁶ Askafaito ōikī Niospa mai kaxkexoni a mēra faka faipafā ikikaitanō a kēro afeskafanōma.

¹⁷ Nāskaito ōi Satanás a kēroki ōitifishkikōina. Nāskax nā kēromā āfe fakefoki kaa ato retepai, nāfāfemāi Niospa meka nikakōisharaifono isharakōiyanā Jesús Ifofasharakōiyanā.

¹⁸ Askata ē anā ōia Satanás fakafā kesemē nia.

13

Fakafā mēranoax yoinā keskara mesekōi kāinākafana

¹ Askata ēfe namapa ē ōia keskara afianā ē mato yoi. Ē ōiaino fakafā mēranoax yoinā keskara mesekōi kāinākafanaito ē ōia. Nā yoinā pōfe keskaraōnoa ē mato yoinō. Ea nikasharakāfe. Nā fistifax mapo ichapaya, siete mapoya. Askatari āfe māxo rasi diezya. A āfe māxo rasi xanīfāfe maiti maimakī fetsa. Nāskaxō Epa Nios mekafakī chakakōi faa. Āfe femānāfoki ane fetsafo chakakōifo nēta.

² Askai oa poomā keskara āfe yora. Askatari āfe tae oa osopa tae keskara. Askatari oa poomā axfa keskara. Nāskara Niospa ea ōimana ē tāpinō a feronāfāke Satanāōxō tāpikifinakōia, oa xanīfo finakōia keskara ĩxii nāmānoax. Satanás āfe yōshi ināno ato yويمis ĩxii, afama mīshti fakī fetsaki ato ōimaxii.

³ Āfe mapo fetsa ano mā māpeafiafono anā otoax afianā nia. Nā mai tio anoxō yora rasichi ōikani askaito: "Kee, ųafeskax otoamē mā nākōina nō ōia?" ixō yoikani. Nāskaito ōikī ifofaxikani.

⁴ Nāskakē ifofakaxō yoikani Satanás iskafakī: "Mī fāsi sharakōi. Mī afama mīshti famis," fakaxō ifofakani. "Nāskaxō nā yora pōfekōi inō mī yōshi mī inā nōko xanīfokōi inō. Nāskaxō nō mia chai faima," fakaxō yoikani. Askatari oa yoinā keskara akiki inimakakī fanāixokani iskafakakī: "Mia keskarakai tsōama. Mī fāsi sharakōi. Miakai tsōa chakafatiroma. Mī fistichi ato finōkōia," fakaxō yoikani fanāikakī.

⁵ Askatari anā Nios chakakōifakī yoia iskafakī: "Fato fetsakai ea keskarama. Ē Nios finōkōia," ikax, āa chanī Nios chakafakī finakōimis. Nāskafekē Niospa yoixii: "Cuarenta y dos oxe finōta mī anā afaa fatiroma xanīfokōixō afara fetsafo sharafakī."

⁶ Nios noikaspakī mekafakī fetsaito ē nika iskafaito: "Fato Nioskai nai mēra ikama. Anā ano Niosma. Mā kaxpakōi mā Nios Ifofai," ixō yoia. "A yora namisfāfekai fato Nios Ifofamisma," ato fakī fetsai.

⁷ Askatari Satanás ifofakaxō ato afara shināmānaino yorafāfe a Jesús Ifofamisfo ato finōpaiķi ato retepaikani āto xanīfo ipaikakī. Askatari maitio anoafō, xoko fetsafo, meka fetsafoya keyokōi āto xanīfo ikani a feronāfāke xanīfo chakakōi a Satanás yōshi a mēra nanea.

⁸ Askafaxō yoisharaxikani akiki inimakakī: "Mī fāsi finakōia, mī nōko nioskōi," ixō yoixikani akiki inimakakī. Askaiāfe tāpixō nōko Ifo Niospa atoki ķirika keneama a Ifofaafāfema ōikī. Mai onifataima mā tāpixō Niospa āto anefo āfe ķirikakī keneni fatofāfe Jesús Ifofaimākai. Akka nā Jesús ovejanā fake keskara noko nāxonī noko ĩkipakexakī.

⁹ Mā pachoyakī ea nikasharakāfe.

¹⁰ "Nā Satanás ifofaafāfe mato karaxa mēra ikimakakī mato ikimaxikani. Askatari mato kenopa retekakī mato retexikani." Nāskakē efe yora mīshtichi, shināchakayamakāfe. Nā nō Jesús chanīmara faafo tii nō omiskōifikī, nō tenekōixii nōko Ifo Jesús shināmakitama.

¹¹ Askatari ē anā ōia oa namakē ōia keskara. Mai mēranoax kāinākafanaito ē ōia yoinā pōfe fetsa keskara. Āfe māxo tiixo pishta rafe oveja fakenā keskara. Askai fāsikōi mekai oa poomā keskara āfe meka mēxakōi chai potai. Askaito ē ōia.

¹² Akka nā yoinā pōfe taeyoi fakafā mēranoax kāiyaito afama mīshti atiroxakī nāato yoiaino nā rama oatori afama mīshti atiro nā fētsa aka keska fakafāri nāskaxō yorafo tii ikitiro. Keyokōi maifo tii anoafō ato yoiā iska fakā: “A yoinā keska mā mapoki rerafo mā nayofiax afianā mā otoa nā fisti ifofakāfe. ‘Na nōko ifora,’ fakāfe,” ixō ato yoiā.

¹³ Afama mīshti tsōa atiroma keska ato ispa yorafāfe chanīmara fanōfo. Nāskata yorafāfe āto ferotaifi nai mēranoa chii fotomana.

¹⁴ Satanāōxō nāskarifakī yorafo pāra niosra fanōfo. Askafata ato yoiā: “Nā yoinā pōfe keska retefiafono mā otoa nā nimofonōfā faxō inākāfe a keska faxō,” ixō ato yoiā.

¹⁵ Nānori ato yoiaino mā nimofonōfā māpeakano xākaitiroma. Askafiano Satanāōxō xākaima mekanō, askatari a siete mapoya mekayamaifo ato retenō.

¹⁶ Askata anā ato yoiā iska fakā: “Maitio ikafāfe āto mēke kayakai aōri kenenōfo askayamakī āto femānāki kenenōfo.” Nā yoinā pōfe keska fakafā mēranoax kāiāto āfe ane keneyamakī āfe número ato kenemana. Keyokōi ato kenemana. Fakefo kenemata, xinifori kenemata, afama mīshtifoyari kenemata, afaamaisori kenemata, inafomari kenemata, inafori kenemana. Tsoa pishta finōmanama. Keyokōi nā yoinā pōfe keskarato āfe ane atoki kenemana.

¹⁷ Tsōa nā ane keneyamaxō afaa fitiroma. Askatari afaa ināmitsatiroma a piaifori tsōa fitiroma, a rapati yopaifori tsōa fitirofoma.

¹⁸ Nāskakē Niosxō shināsharatirofo nā yoinā pōfe keska āfe número tāpitirofo. Āfe número tāpixō āfe aneri tāpitirofo. Nā yoinā pōfe keskarafiax feronāfakekōi, āfe número seisientos sesenta y seis.

14

Jesús chanīmara faafo ciento cuarenta y cuatro mil akiki fanāikani

¹ Askata ēfe namapa ē ōia keska afianā ē mato yoinō. Nā Jesús ovejanā fake keska māchifā āfe ane Sión ano nia ē ōia. Askatari ciento cuarenta y cuatro mil afe yorafo afe niafo ika. Āfe ane Jesús yafi Epa Nios āto ane femānāki kenea ē ōia.

² Nāskatari nai mēranoa meka efapakōi ē nika. Faka pōoitifā keska ē nika, nai tiri ikai keskarari pachakōi ē nika. Meka efapari ē nika yora ichapa fanāikanaifono āto manetiya ichapa rasi fanāikanaifāfe ē nika. Nā manetini āfe ane arpa.

³ Fana fena tsōa nikayomisma Epa Nios ferotaifi fanāixōāfo. Nānoxori nā cuatro Niospa onifanifāfe nikakani. Askatari nā veinticuatrofāfe nikakani. Nā ciento cuarenta y cuatro mil nono mai anoa Jesús ato ifini, nāfāfe na fana fena tāpitirofo. Tsoa fētsakai tāpitirofoma.

⁴ Nā ciento cuarenta y cuatro mil yorafāfe nōko Ifo Jesús Ifokōi famisfo. Afara chaka shinātamaroko Jesúsnoa shināfafāikani. Aato ato ifimis ato nāxonixakī Epa Nios yafi āfe Fake Jesús Ifokōi fakanax āfe yora inōfo. Ato iyopaiyai ari afe fomisfo. Ato katoa afe yoraxō ato yoiā keska anōfo.

⁵ “Nāfāfe chaniki yomisra,” ixōkai tsōa atoōnoa yoitirofoma. Jesúsnoax isharamisfo. Aōxō afaa chakafamisfoma.

Niospa āfe ājiri trespa yoiāfo

⁶ Askata ē ōia Niospa ājiri fētsa nai mēra ika fāsi keyakōi yoyakī keyokōi yorafo maifo tii anoafō ato meka shara yoiā. Yorafo keyokōi yoita, xoko fetsafo tii yoita, nā meka fetsa fetsatapafāfe meka yoisifori yoita, nā mani fetsafo tiiri ato meka shara yoiā. Epa Nios nipanakaōnoa ato yoiā.

⁷ Mekakī fāsikōi ato yoiā iska fakā: “Nios shinākāfe. Nikakōikāfe. A noikōikāfe. ‘Mī sharakōi, mī afama mīshti mī atirora,’ fakāfe. Iskaratā Niospa nā keyokōi chakafamisfo ato omiskōimani. Nāato nai onifani, mairi onifani, fakafāri onifani, faka sharari onifani. Nāskakē a noikāfe: ‘Mī nōko Ifo Nios sharakōi,’ fakāfe,” ato faa.

⁸ Askata Niospa ājiri fētsa mā mekai keyoano fetsari nokotoshixō iska fakā yoiā: “Babilonia ano pexe rasi iyopaoni. Iskaratā anā ano tsoa ikama. Nānoxō yorafāfe afara chaka shināpaonifo. Fetsafori afara chaka ato famapaonifo ato keska inōfo. Askaifāfe Epa Niospa ato omiskōimani anā ano inōfoma. Nāskakē Babilonia anā anoma,” ixō Niospa ājirini nai mēra ikato yoiā.

⁹⁻¹¹ Askata afianā Niospa ājiri fetsari nai mēranoax nokotoshixō meka fāsikōi yoiā iska fakā: “Fētsa nā yoinā pōfe keska yafi āfe nimofō keska nikakōikī yoisim iska fakā: ‘Nā ēfe nioskōi,’ ixō anori yoiakī āto mēkeki kenenifo, askayamakī āto femānāki na yoinā pōfe keskarato āfe ane keneafāfe Epa Nios atoki ōitifishkikōixii. Nāfo Niospa ato fāsi kerexkai omiskōimaxii. Chii mēra ato potafianokai keyonakafoma. Jesús āfe ājirifo sharakōifo feta ōiaino a omiskōipakenakafo mēra Niospa ato potaxii chakamāi famisfono, Nios nikakas-pakakī. Pae meekakī xatenakafoma. Tsōa ato ifitiroma, nā yoinā pōfe keskarato āfe ane

āto mēkeki keneafono, askayamakī ato femānāki keneafō. Nāskakē pena tii ita, fakishchāi ita, omiskōixikani tenepakenakafoma,” ixō Epa Niospa āfe ājirinī yoia.

¹² Nāskakē efe yora mīshtichi, mātō ōiti inimamasharakāfe. Omiskōifikī tenekāfe. Niospa noko yoini keskara akāfe. Nōko Ifo Jesūs kachikiri fayamakāfe.

¹³ Askata ē meka nika nai mēraxō ea yoiāito: “Ē mia yoiāi keskara kenefe. Fatorāfo nōko Ifo Jesūsnoax nai, inimakōixikani,” ixō ea yoia. “Chanīmākōi. Mā nakanax anā omiskōitirofoma. Epa Niospa ato ama keskara akōikanax, nāskakē inimakōixikani. Nāfāfe fetsafo shara faxomisfono Nios atoki inimasharaxii. Akka Epaki nokoafono ato ināsharaxii,” ixō Niospa Yōshi Sharapa yoia.

Nā chakafamisfoki Nios ōitifishkikōikī maifo tii anoāfo ato ichanāfai ato omiskōimaxii

¹⁴ Akka ēfe namapa ōia keskara afianā ē mato yoinō. Ē afara fetsa ōia nai kōi oxokōi kamaki feronāfake tsaokē ē ōia. Ē ōikī iskafaa: Xanīfāfe maiti orokōi maiya, askatari keno extea ikikōi tsoma ika.

¹⁵ Akka āfe ājiri fetsa Nios kīfiti pexefā anoax kaxō fāsikōi yoia iskafakī: “Nā maifo tii ano mā fanafo ōshia. Nāskakē iskaratīa mā fanafo chetekanī. Akka mī keno exteato taxtexō ichafafe,” faa. Nānori yoifikī fanakōifoōnoa yoiama. Niospa yorafoōnoa yoia iskafakī: “Iskaratīa keyokōi Jesūs chanīmara faafo tii ifife Epa Nios fe ika anoax ichanākanax afe ĩpaxanōfo,” ixō yoia.

¹⁶ Askata nā nai kōi kamaki tsaoto āfe kenopa fanafo taxtea keskafakī āfe sharaōxō a chanīmara faafo tii ifia afe ĩpaxanōfo.

¹⁷ Askata ē ōia nai mēranoa ājiri fetsari Nios kīfiti pexefā anoax kaito, aatori keno extea ikiai tsomax.

¹⁸ Afianā ājiri fetsari Nios kīfiti mīsa anoax kaa. Nāato Niospa maifo tii anoā koatiro. Nāatori keno extea ikiai tsomax fāsikōi mekayanā yoia: “Nā uva fimi mā pachiaiki. Mextexō ichafafe,” ixō yoia. Nāskarifikī Epa Niospa āfe ājiriōxō a nikakaspamisfo ichanāfaxii.

¹⁹ Nāskata nā Niospa ājirinī āfe keno extea ikiai tsomaxō uva xatexō āfe tsinīti mēra nanea āfe ene fonō. Nāskarifikī Niospa ājirifāfe nā Niospa meka nikakaspamisfo ato ichanāfai. Akka Nios atoki ōitifishkikōixō ato omiskōimani.

²⁰ Nios ika anoxō ato omiskōimanama. Iskafakī ēfe namapa ē ōiai keskara ea ōimana. Fetsafāfe ato retexikani āto imi ichapa foxii. Askara tsōa ōiyomisma. Āto imifo kamayoyo tesanākōixii. Āto imi chaikōi trescientos kilometros foxii. Ato imi noakōi un metro ixii, nakirafekōi. Nāskarifikī nā Epa Nios nikakaspamisfo omiskōixikani ato omiskōimanaitīa.

15

Epa Nios āfe ājiri siete afianā ato yoia mai anoāfo ato omiskōimanō

¹ Askata anā ēfe namapa ē ōia keskara ē mato yoinō. Afara fetsa tsōa ōiyomisma nai mēranoa ē ōia. Ē ratekōia. Akka Nios nā yora nikayospafoki ōitifishkiki. Nāskakē āfe ājiri siete ato yoia keyokōi mai anoāfo ato omiskōimanōfo. Mā askafafono Epa Niospari ato omiskōimani. Akka anā tsoaki ōitifishkixō, Niospa ato omiskōimatiroma.

² Askata ē ōia fakafā feroikima raka chiya osia keskara. Nāno yorafā rasi niafo ika. Nā yorafāfekai yoinā pōfe keskara ifofaafoma; āfe nimofori ifofaafoma; āfe numerori āto yorakī keneafoma. Nāfāfe ato finōkōiafo. Nā fakafā feroikima raka chiya osia keskara a kesemē maniafo. Epa Nios ato tii maneti ināpakea. Nā maneti āfe ane arpa.

³ Taeyoi Nios yonoxomiskōi Moisés ipaoni. Nā Moisés āfe rāfīfo finōkōiax fanāini keskara nāskarifiāi āto arpa tsomakaxō Jesūs shinākakī fanāikani a Moisés fanāini keskara iskafakakī:

Ifo, mīfi Nioski. Mī afama mīshti atiro. Mī amis keskara sharakōi. Tsoa fētsakai atiroma.

Mī mai fetsa anoāfori keyokōiōnoax mī āto xanīfokōi ipanaka. Mī shināmis keskara mēstekōi ikōina.

⁴ Ifo, keyokōi mikiki mesekakī mia nikasharapainōfo. Mī afama mīshti tsōa ōiyomisma mī atiro. Keyokōi maitio anoāfāfe anori yoipakexanōfo. Mī fistichikai faaa chakafamisma. Mī shara fisti famis. Afetīara mī ato apaiyaitīa mī ato omiskōimaxii a chakafamisfo. Chanīmākōi mī ato askafaxii. Keyokōichi mā fēkaxō mia shinākani inimayanā fanāikani, ixō yoiāifāfe ē nika.

⁵ Askata afianā ē ōia nai mēranoa Nios ika anoā. Ea fēpexona Nios ika ano ē ōinō.

⁶ Nios ika mēranoax āfe ājiri siete ichanāfo. Rapati oxokōi chainipa choshtama fafaei safeafo, oro ōshi keskarato xonexemeafo. Nāfāfe mai anoāfo ato omiskōimakani omiskōinōfo.

⁷ Nāskakē nā cuatro Niospa onifaa fētsa Niospa āfe ājiri sietefo ato oro kecho ināakea. Nios nā nīpanakato nā ifofaafoma mai anoāfoki ōitifishkikōikī nā kechofo mēra afara chakafo fospi faa nāskaxō chipo atoki ājirifāfe nachuieaifono omiskōinōfo.

⁸ Nios ika mēra kōinifā nashfai keskara. Niospa āfe kerex shara a mēra fospia. Nāskatari a mēraxō chaxasharai. Akka mai anoxō nā Nios nikakaspamisfo Niospa ājirifāfe ato omiskōimakani omiskōinōfo. Nāskakē a ato omiskōimani xateamano tsoa Nios ika ano ikitirofoma.

16

Nikayospafo Niospa ato omiskōimani omiskōinōfo

¹ Askata Nios ika ariax fāsi mekaito ē nika. Niospa ājirifo siete ato yoia iskafakī: “Niospa a nikakaspamisfo mai ano ikafo atoki ōitifishkikī nā kechofo mēra afara chakafo fospī faa atoki nachitakāfe,” ixō ato yoia.

² Nikakaxō Niospa ājiri fētsa taefakī āfe kecho mēranoa nai mēraxō mai ano nachia. Nāskatari nā yoinā pōfe keskarato āfe ane āto mēkeki keneyamāki āto femānāki keneafō, āfe nimōfo keskarari ifoafafo nāfo kooyoi fetsekaxō paekōi meexikani.

³ Askata afianā Niospa ājiri fētsa āfe kecho mēranoa nai mēraxō fakafānaki nachia. Mā nachiano fakafā ōsinātana nā yora reteafono āfe imi foa keskara. Nāskakē keyokōi nā fakafā mēranoax nai fetseafō.

⁴ Askata afianā Niospa ājiri fētsa āfe kecho mēranoa nai mēraxō fakafoki nachia, askatari mai mēranoax faka tsekeafokiri nachia. Nachiaino fakafo fe mai mēranoax faka tsekeafō fe imi keskara osiafo.

⁵⁻⁶ Askatari Niospa āfe ājiri fetsa mekaito ē nika. Nā faka kexemisto iskafakī yoia: “Epa Niosi, mī tsoa onifataima mī iyopaoni. Nāskakē nā mī iyopaoni keskarari iskaratiari mī nīpanaka. Mī shara fisti amis. Aicho, iskaratiā nā mia nikakaspamisfo mī ato omiskōimani chanīmakōi. Āto chaka xatekaxō mī Fake Jesús Ifokōi fanōfo, mī meka ato yoimisoro nā Jesús Ifoafaafāfema ato reteafō. Nāskakē nā mia Ifoafaafoma mī kopikiri ato namai chanīma. Mefe yorafo omiskōimamisfo. Nāskakē ato kopikiri nā mia Ifoafaafoma mī ato omiskōimani omiskōinōfo. Chanīmakōi ato omiskōimani,” ixō Niospa ājirinī yoia.

⁷ Askatari Nios nai mēra ika anoa nā kīfiti ano fistixō Epa Nios kīfimisfo anoa ē fetsa nika yoikī iskafaito: “Nōko Ifo Nios, mī ājirinī yoia keskara chanīmakōi. A mia nikakaspamisfo mī ato omiskōimatiro. Chanīma, mī mēstekōi ixō mī ato omiskōimani,” ixō yoia.

⁸ Askata Niospa ājiri fētsa Nios ika arixō āfe kecho mēranoa afara chaka xiniki nachia. Akiki nachiano xini chii keskara ikano yorafo koofafo.

⁹ Xini xanakōiaino yorafo koofafo. Kookani omiskōiafo. Mā tāpiyomisfo Niospa ato omiskōimafaiaino āto chaka xateafoma. Nios Ifofatamaroko. Iskafakī yoimisfo: “Niospa noko chakafai. Nios chakakōi,” ixō yoiafo. “Nios shara. Afama mīshti fatiro,” ixōkai tsōa anori yoipaikanima.

¹⁰ Askatari Niospa āfe ājiri fētsa Nios ika arixō āfe kecho mēranoa nā yoinā pōfe keskara chakakōikī afe ikafokiri atoki nachia. Nachiano nā yoinā pōfe keskara ifoafafo ika ano fakishkōi ika. Nāskakē keyokōichi paekōi meafō, aripe iyanā.

¹¹ Nāskai omiskōifikakī āto chaka xateafoma. “Niospa noko iskafai. Nios chakakōi,” ikaxō āto chaka xateafoma.

¹² Askatari anā Niospa ājiri fētsari nai mēraxō āfe kecho mēranoa faka efapa āfe ane Eufrates kamaki nachia. Mā nachiano nā Eufrates netsorisatana. Nāskakē xanīfofo xini oaikirinoax fekanī, mā Eufrates netsokōiano, āto sorarofō feta pokeferakanī.

¹³ Askatari ē niafaka chakakōifo tres fexko keskara ē ōia. Fetsa ronōfā keskara nā Satanās āfe āfā mēranoax kāikaina, fetsari nā yoinā pōfe keskarato āfe āfā mēranoax kāikaina, fetsari: “Ē Niospa meka ē mato yoimisra,” iki, a chanīmisto āfe āfā mēranoax kāikaina.

¹⁴ Nā tres niafaka chakafāfe tsōa afaa ōiyomisma keskara afama mīshti yorafo ispafo. Keyokōi xanīfofo a ano fokani ato ichanāfanō nōko Ifo Jesús afe yorafo retenōfo. Nāskatari nōko Niospa afama mīshti famisto afe yorafo ispaxii.

¹⁵ Askatari nōko Ifo Jesús ato yoiaito ē nika iskafakī ato yoia: “Ea nikakāfe. Yometso tsōa yoiyamano koshikōi pexe mēra ikirisatiro afara onexikī. Nāskarifikī ē tsoa tāpimani nā ē matoki nokoaitīa. Ē matoki samamashta nokorisai. Mā itipinīsharakaxō ea manasharakanax inimasharaxikani. Akka tsoa itipinīsharayamano ē matoki nokoaitīa keyokōi yorafāfe ea ōikani afāfekai ea Ifofasharama. Nāskakē rāfikōitirofo,” ixō yoia.

¹⁶ Nānori nōko Ifo Jesús yoifiano nā tres niafaka chakafāfe keyokōi xanīfofo maifo tii anoafō ichanāfaa Niospa yorafo retepaikī. Ato ichanāfai nā mai āfe ane israelifāfe mekapa Armagedón famisfo anoxō.

¹⁷ Askata Niospa ājiri fētsa anā nai mēraxō āfe kecho mēranoa nachia. Mā nachiano Epa Nios meka fāsikōi iskai: “Mē keyokōi aka,” ixō yoiaito ē nika.

¹⁸ Askatari fāsikōi kana piishikai ita, afarafo pachakōifo ita, nai tiri iki ikai ita, mai naya naya ita, askarafokai tsōa ōiyomisma. Nā feronāfake onifakī taefanitiā tsōa mai naya naya iki finakōiaito askara tsōa ōiyomisma.

¹⁹ Akka nā Babilonia anoax mai naya naya ikaino mai tres kaxketani. Maifo tii anoari āto pexe rasi nā mai naya naya ikaino maokomea. Nā Babilonia anoafō anā Niospa shināni afara chakafamisfono. Nāskakē atoki ōititishkikōikī ato omiskōimani omiskōinōfo.

²⁰ Nāskatari nā mai toomāfā anoafō yamarisatana. Keyokōi māchifāfori yamarisatana.

²¹ Nāskatari oi nami matsi tokorofo efapakōi āfe efe cincuenta kilo nai mēranoax yorafoki pakea. Askafiaito ōikakī āto chaka xateafoma. “Nios chakakōi. Na oi nami efapakōi nokoki potai,” ixō yoiāifāfe ē nika.

17

Mai fetsa anoafō kēro feroma keskarafō

¹ Askata anā ēfe namapa ē ōia. Afara afeskara ixiai keskara anā ea ōimana. Nā Niospa ājiri sietepa kecho tsofō ikafo akka fistichi ea yoiā: “Niri ofe. Na pexe ichapa rasi fakafāfo chaimashta anoafō chakakōifo. Kēro feromakōi keskarafō Nios nikakaspakani.

² Akka keyokōi xanīfofo maifo tii anoafō ato fe chaka imisfo. Nāskakē atoōnoax afori chakakōifo ikafo. Nā kēro feromakōi keskara ikafo chakafakani. Akka nā Niospa ato omiskōimaxiai keskara ē mia ōimanō,” ixō ea yoiā.

³ Ea askafaino ē anā namakē ōia keskara ē ōia. Epa Niospa Yōshi Sharaōxō ājirinī ea iyoa tsōa istoma ano ea iyoa. Nānoa kēro ē ōia yoinā pōfe ōshikōi kamaki tsaokē. Nā yoinā pōfekōi āfe yora tiixō ane ichapato kenea ika. Keyokōi nā anefo kenekī Nios mekafakī chakafaa. Nā yoinā pōfe āfe mapo sietepa. Āfe māxo diezepa.

⁴ Nā kēromā sama chainipa yafi nana ōshi safea ika. Oro fakka fakka ikai keskara safea. Askatari makex keskara fakka fakka ikai sharashta yafi fetsa āfe ane perla oxoshara, nāri safea ika. Nā kēromā kecho oro tsofō a mēra afara chakakōi naneato, a mēra nanea keskara yorāfo afara chakakōi fetsa fetsatapafo chakafama. Āto mēra nanexō ato afara chaka shināmana. Ato pāemata, chanīmis ato imata, āto āfima chotamisfo ato imata, āto fenema chotamamisfo ato imata, nāskara chakakōifos ato imamis.

⁵ Āfe femānāki kenea keskara tsōa tāpimisma. Iskara kenea: “Babilonia anoafō tsoa keskarafoma. Nā kēro feromakōichi Nios nikakaspai keskarafō. Nāskakē fetsa fetsatapafo chakafakī finakōimifso,” ixō kenea.

⁶ Nā kēro feroma keskarato Jesús chanīmara faifo ichapakōi ato retea inimayanā. Nāskaito ōikī tāpia. “Choo, na kēromātsi ato retemiski,” ixō ē shinā.

⁷ Ē askaito Niospa ājirinī ea iskafaa: “¿Afskai mī ratemetsamaimē? Ē mia yoinō, ea nikapo. Na kēro yafi nā yoinā keskarōnoa ē mia yoinō. Na yoinā pōfe keskara sietepa mapoya askatari diez māxoya tsōakai askara tāpiyomisma. Akka iskaratīa ē mia tāpimani.

⁸ Nā yoinā pōfe mī ōiai yoinākōima. Nāfi xanīfo efapa chakakōi. Nāato Nios nikakaspamisi. Taeyoi niyopaoni. Anā iskaratīa niama. Askafīax chipo nā niāfaka chakafo kinifā mēra ika anoax kaixii. Nānoax kāifekē Epa Niospa a omiskōipakenakafo mēra potaxii anā anoax fakī kanakama. Akka nā tafekī mai onifakī taefanitiā yorafāfe āto anefo Niospa āfe kirika kenenī, nāfo afe ipanakafō. Akka a āfe kirikakī āto anefo keneama, afo Nios fe ipanakafoma. Nāfāfe yoiixikani iskafakakī: ‘¡Kee, ōikapō! Mā nāfianixakī afianā mā otoa,’ ixō yoiixikani.

⁹ “Akka fētsa Niosxō mēstekōi shinākī nāto nā ē rama kenea keskara tāpitiro. Nā yoinā pōfeōnoa ē mato yoinō, ea nikasharakāfe. Āfe mapo sietepa mapokōima. Nā sietepa mapoxō xanīfoōnoa noko tāpimai. Nā ikafo sietepa māchifā. Nānori nā kēro feroma ika.

¹⁰ Cinco xanīfofo anā anoma. Mā nanifo. Fisti iskaratīa nia. Fetsari chipo ixii xanīfoi. A chipokōi xanīfoixiai xanīfoi chaima.

¹¹ Nā yoinā pōfe keskara ōshi ē mia yoiā, ari yoinākōima, xanīfo chaka fetsa. Nā xanīfo sietepa ipaonifo keskara nāri chakakōi. A iyopaonikai iskaratīa anā xanīfoma. Nāskakē nāri fetsafo fe omiskōipakenakafo mēra kai anoax anā kāinakafoma.

¹² “Askatari nā māxo diez mī ōiai māxokōima. Nāōxō diez xanīfofo noko tāpimani. Nāfo xanīfofo iyoafoma. Chipo mani fetsafo anoax nā diez āto xanīfofo itirofo. Na yoinā pōfe keskara fe xanīfo ixikani. Askafīkanax xanīfoi chai samaraka kanima.

¹³ Nāskakē nā diez xanīfofofāfe shināmisfo: ‘Na yoinā pōfe keskara nōko xanīfo iki kiki,’ ixō shinākani. Nāskakē, ‘Mī noko yoiā keskara nō atiro,’ ixō nā diez xanīfofofāfe nā feronāfake yoinā pōfe keskara yoiikani.

¹⁴ Nāskaxō nā feronāfake yoinā pōfe keskarato nōko Ifo Jesús afe yorafōya noikaspai, xanīfofo fetsafāferi ato noikaspaxikani. Nā yoinā pōfe keskarato nā diez xanīfofo feta Jesús yafi afe yorāfo retepaikani. Retemapaifaifono Jesús ato kanāxii. Niospa ato katoa afe

yorafo kena a Ifofamisfo. Nāfāfe afara afeskarafaito nōko Ifo kachikiri famisfoma. Nōko Ifo Jesús xanifo fetsafori ato ikitiro. Nōko Ifo finakōixō keyokōi ato ikitiro. Akka tsōakai nōko Ifo Jesús finōtiriroma,” ixō nā Niospa ājirinī ea yoia.

¹⁵ Askano afanā ea yoia iskafakī: “Na mī ōiai nā kēro feromakōi keskara, fakafā femākīa tsoa nā fakafākai fakafākōima, askatari yorafo mai fetsa anoafō, meka fetsayafō.

¹⁶ Nā diez xanifofo feta nā xanīfo yoinā pōfe keskarato nā kēro feroma keskaraxō noikaspakōixikani. Keyokōichi āfe afara fīaxikani anā aya inōma. Nāskakē anā tsoa nā kēro feroma keskara fe ipaikanima. Poomānā retexō koshi pikī keyotiro. Nāskafakīri nā diez xanīfofo feta nā xanīfo yoinā pōfe keskarato nā kēro feromakōi keskara chakafaxikani omiskōimayanā. Askafaxō chīi koofaxikani anā ninōma.

¹⁷ ‘Mī noko yoiai keskara nō atiro,’ ixō nā diez xanīfofofāfe xanīfo yoinā pōfe keskara yoikani. Akka Niospa anori ato shināmana a apaiyai keskara fanōfo. Askata taeyoi Niospa yoiyoni nā inōpokoai keskara nāskarākōi ixii.

¹⁸ Na kēro feromakōi keskara mā ōiai kērokōima, akka nā pexefā rasi Babilonia keskara. Babilonia ano yorafo chakakōifo. Nāfāfe manifo tii ano ato ikināno ato chakafakani ato keskara ikaxō,” ixō Niospa ājirinī ea yoia.

18

Ājiri fētsa yoia iskafakī: “Iskaratīa Babilonia pexe rasi mā keyoa,” ixō yoia

¹ Askata anā ājiri fetsa nai mēranoax mai ano fotoaito ē ōia. Epa Niospa yoia nā xanīfo fētsari afama mīshti atiro. Nāato chaxaito maifo tii anoxō ōikani.

² Fāsikōi yoia iskafakī:

Pexefā rasi Babilonia anoafō mā keyoa, anā anoma. Iskaratīa anā ano tsoa ikama, askatamaroko niafaka yōshi chakakōifo ano ika, askatari peya yōshi chakakōifori ano ika.

³ Nā kēro chakapa yorafo ato māmā pae ayamatiro keskafakī, nāskarifiakī nā Babilonia anoafāfe yora fetsafo mai fetsa anoafō ato afara chakafamafo ato keskara inōfo. Āto xanīfofori ato askafamafo. Askatari afara sharafos fichipaimisfo. Nāskakē a afama mīshtifo ato minimisfo, afara ichapayakōifo,

ixō yoiaito ē nika. Niospa inapa askara ato yoia a Niospa keyoxiai a Babilonia anoafō.

⁴⁻⁸ Yoikī askafatanaino nai mēranoax mekaito ē meka fetsa nika is kai mekaito:

Babilonia ano ikafāfe fāsi afara chakafakī finakōiafo. Nā afara chakafamisfo Epa Niospa ato ōia chakakōifaiāfe. Nāskakē ato omiskōimaxii. Nā Babilonia anoafāfe fetsafo afara chakafamamisfono afori. Epa Niospa ato omiskōimakī finakōixii omiskōinōfo. Nā Babilonia ano ikafāfe āto shinā mēraxō mā shināfo iskafakakī: “Nō Nios yopaima. Afara fetsafori nō yopaima. Nō isharakōimis. Oa xanīfokōi isharamis keskara nōri nāskamis, xanīfo keskara. Nōkai oa kēro ifomafa keskarama. Nō omiskōitiro. Askatamaroko nō isharapakenaka,” ixō kakapaimisfāfe yoimisfo. Akka Epa Niospa ato fāsi omiskōimani omiskōiakī tenēnōfoma. Akka nā ea chanīmara faafāfe, ea nikasharakāfe. Epa Niospa mā ato samamashita omiskōimani anā isharayamanōfo. Atiri ē ato namai, atiri ē ato omiskōimani, a piaifori ato keyoi. Nāskakē fonāikani. Nāskatari atiri ē ato koofaxii kooi fetsenōfo. Tsōa atirota keskara Epa Niospa afama mīshti atiro. Nāskakē Epa Niospa mato yoi iskafakī: “Efe yora mīshtichi, Babilonia anoafō keskara iyamakāfe. Ato fe rafeyamakāfe. Ato feta chakafayamakāfe ē ato omiskōimani keskafakī, matori ē omiskōimanōma,” ixō Epa Niospa ato yoixii kiki,

ājirinī faito ē nika.

⁹ Askano Babilonia kooaino mai fetsa anoafāfe āto xanīfofofāfe ōikakī manoxikani. Nāfāferi Babilonia anoxō afara chakafakī tāpinifo. Nāskakē ato feta Epa Nios chakafakakī potakani afara chakafaxikakī. Nā Babilonia ano keskarafori afāfe afama mīshti ichapa fimisfo.

¹⁰ Babilonia kooaino nā xanīfofo ratekōixikani chai inoaxri fetsafo mesexikani.

¡Ooa! Babilonia anoafō fato yora fetsafo keskarafoma. Mā tāpikōisharafikē samamashita Epa Niospa mato omiskōimani mā kooi fetsenō. ¡Keexto! Koshikōi Babilonia mā kooi keyoa. Nōri iskayamapainō,

ixō shinākani xanīfofofāfe ratekōiyānā.

¹¹ Nāskatari maifo tii anoafō āto afama mīshtifo minimisfo oiaxikani shināmitsakani. “¡Ooa! Mā Babilonia kooi keyoa. Iskaratīa anā nōko afama mīshtifo noko tsōa fīatiroma.

¹² Nōko oro ōshishara fīayamata, a kerexkōi fakkai fakkaisai fīayamata, nōko tokirinī fakeshta fakkai fakkaisai fīayamata, nōko tokiri fetsa āfe ane perla fīayamata, nōko sama sharafinakōia fīayamata, nōko sama nana shara fīayamata, sama fetsa fetsatapafō fīayamata, nōko ifi nakas sharakōi fetsa fetsatapafō fīayamata, tokiri keskara kerexkōi oxosharakōi āfe ane mārfil nāato afarafo onifaa fīayamata, āfe keskarara ifi sharakōifo fīayamata, firo shara

āfe ane bronze fīayamata, keno fetsa āfe ane firo fīayamata, tokiri āfe ane māmōlo fīayamata, nāfo kopikōifo noko anā fīakanima.

¹³ Akka nō pīchamis afama mīshtifoya osixō, nā itsa sharafoya fetsa fetsatapafoya osixō, afo noko tsōa fīatiroma. Askatari a nakas shara āfe ane incienso, fetsari mīrra, fetsari pirofomā, fetsari vinō, fetsari xini, fetsari arinā, fetsari trigo, askatari nōko yoinā inafori ovejari, kamayori, nōko karori, yonomatifori, nāfo noko anā tsōa fīatiroma.

¹⁴ ¡Ooa! Babilonia anofāfe nā afara fetsa fetsatapafō fichipaikakī anā fītirofoma. Keyokōi afara sharafo fichipaikakī mā fimis anā anoma mā fenokōia anā mā fīpanā. Mā afaa yopakima mā fimis. Mākai anā fītiroma. Keyokōi nā mātonā mā keyoa,” ixō nā ināmitsamisfāfe yoixikani.

¹⁵ Nā mai fetsa anoa fēkaxō afama mīshti minikaxō kori ichapa fimisfāfe mā noko kaxō chaima nīxō ato ōikani, ratekōiyānā, oiakani, askatari shināmitsakōikani.

¹⁶ Yoikī iskafaxikani: “¡Ooa! Fato fetsakai Babilonia anoafō keskarama. Ato fe yorafāfe rapati sharakōifo safeafo. Rapati ōshi sharafo, askatari oro teoti safeafo, tokiri fakkai fakkaisai keskarari menexemeafo, perlari askari faafo.

¹⁷⁻¹⁹ Koshikōi na afama mīshtisharafo mā keyokōia,” ixō yoixikani.

Nāskarīfiai nā kanōanāfā āfe ifofāfe shinākani, a kanōanāfā mēra fomisfāferi shinākani, a kanōanāfā nexa yonomisfāferi shinākani, a kanōanāfā mēra fokaxō, ato afama mīshti minikaxō kori fimisfāferi shinākōikani. Babilonia kooaito chai ixō ōikani manokakī shināxikani. “¡Ooa! Fato pexe fetsakai Babilonia keskarama. Na Babilonia fistiōxō kanōanāfānē āfe ifofāfe kori ichapa fimisfo. Akka a aya imisfo koshikōi mā keyoa,” ixō a kanōanāfāfo yonomisfāfe yoixikani.

²⁰ Askaifono keyokōi Epa Nios ika anoafō inimakāfe. Babilonia anoafāfe a Jesús chanīmara faafo ato omiskōimamisfo, Epa Niospa ato kopikī omiskōimaxii. Nāskakē keyokōi a Jesús chanīmara faafo fe, Jesúsxō āfe meka yoipaonifo fe, a Niospa meka inōpokoai yoimisfōri inimakāfe.

²¹ Akka Epa Niospa āfe ājiri fetsa mitsisipakōichi tokiri efapakōi fininīfōfāta fakafā mēra potaxō yoia iskafakī: “Na tokiri kerexkai ē potai keskafakī, nāskafakīri Epa Niospa na pexe rasi anoafō Babilonia kerexkai omiskōimana kooi keyonō. Mā keyokōikanax anā ano tsoa ikima.

²² Nāskakē anā Babilonia anoax manetifo, xāitifo, maneti fetsafori, afo anā tooxikama. Askatari anā tsoa fanāikama. Tsōakai anā ato nikatirofoma. Askatari a yonomisfo anā ano ikafoma. Askatari a aō xiki reneifo nō anā nikatiroma.

²³ Anā luzri ōtapakenakama. Feronāfāke kēro fiaino inimaifāfe mā nikamis keskara anā tsoa askara mā nikapakenakama. Babilonia ano a ināmitsamisfāfe tāpikōikani. Nāfāfe ichapakōi fimisfo. Askatari koshōiti tāpixō yora fetsafo pāramisfo. Askafikanax mā keyoafo.

²⁴ “Babilonia anoafāfe a Niospa meka yoimisfo, fetsafori a Jesús chanīmara faafo, fetsafori mai fetsa anoafō ato retemisfo Jesús ōikaspakakī. Niospa meka mato yoipaifiaifono mā ato nikakaspamiskē, Niospa mato omiskōimana,” ixō Niospa ājirinī yoia.

19

Nios ika anoax fanāiki iskakani: “¡Aicho! Nōko Ifo Nios sharakōi,” ikaxō Niosnoa afara sharafo fanāikani

¹⁻² Askata nai mēra ikafo ichapakōi āto meka ē nika, fāsikōi iskaifāfe:

A fetsafāfe chakafamisfo Epa Niospa ato omiskōimani. Chanīmakōi, ato omiskōimani. ¡Aicho! Nōko Ifo Nios fāsi sharakōi. Nāato nōko chaka noko soaxona nō afe nīpaxanō. Aōnoa fisti nō yoitiro iskafakī: “Mī nōko Ifokōi. Fato fetsakai mia keskarama afara sharafamis. Mī sharaōxō mī afama mīshti fatiro,” ixō keyokōichi yoipakenakafo. Epa Niospa Babilonia anoafō atoōnoa iskafakī yoia: “Nā Babilonia anoafō nā kēro feromakōi keskarafo. Nā chakafamisfoōxō maifo tii ano ikafori ato chakafama. Nāskakē Babilonia anoafāfe ea fāsi chakakōi famisfo. Efe yorafori ato omiskōimamani nanōfo. Nāskakē ē ato kopia omiskōimakī,” ixō Epa Niospa yoi, ixō yoiaifāfe ē nika.

³ Afianā meka fetsari ē nika nai mēranoafāfe yoiaifāfe iskafakakī:

¡Aicho! Nōko Ifo fāsi sharakōi. Afaa chakafamisma. A chakafamisfo chanīmakōi ato omiskōimani. Ato chiifā mēra potano afo kooi nishpapakenakafoma, ixō yoiaifāfe ē nika.

⁴ Askanori Epa Nios tsoa ano nā veinticuatro xanīfōri nā Nios onifani cuatro a nāmā feopakekafakī iskafakī yoiafo: “Askapainō. ¡Aicho! ¡Nōko Ifo fāsi sharakōi!” ixō yoiaifāfe ē nika.

⁵ Askata Epa Nios tsoa ano afo ē meka fetsa nika iskafakī yoiaito:

Epa Nios yonoxomisfāfe xanīfofōfāfe askatari afamafofāfe mato Niospa yoia keskara mā apaikōimis. Māri Epa Nios yoikāfe iskafakī: “¡Aicho! ¡Epa Niosi, mī sharafinakōia!” ixō yoiaito ē nika.

Feronāfake āfiyakī fista atiro inimakī. Nāskarīfakī Jesús nai mēraxō noko fista axoxii nokoki inimakī

⁶ Askatari ē anā nika yōrafā rasi mekaifāfe nā fakafā poo ikai keskara, askatari fāsikōi nai tiri ikai keskarari ē nika āto meka:

¡Aleluya! Nōko Ifo Nios tsōa atiroma keskara afama mīshti fatiro. Nā nōko Xanīfo finakōia. Maifo tii anoafō noko īkitiro. ¡Aicho! ¡Nōko Ifo Nios sharafinakōia!

⁷⁻⁸ Akka feronāfake kēro fiaino nā kēro inimakōi itipinīsharatiro āfe fene fe fianāxiki. Nāskarīfaii nōko Ifo Jesús fe iskaratīa afe yorafo afe ipanakafō. Akka afe yorafo mā itipinīsharāfo afe ipaxakakī. Akka āfinī āfe fene inimamapai itipinīsharatiro. Sama fena sharakōi patsaxō safetiro afe fianāxikī. Nāskarīfakī nā Jesús Ifofamisfāfe itipinīshara fatirofo. Epa Niospa ato shara fapaikī, ato chaka soaxoni Jesús fe ipaxanōfo. Nāskakē nō inimai. Tsoa fetsakai mia keskarama afara shara famis, ixō yoiafo. Niospa yorafāfe Jesúsxō fetsafo sharafamis. Nāskakē Niospa ato rapati sharafinakōi safemana Jesús fe ipasharanōfo.

⁹ Askatari ājirinī ea yoia: “Ē mia yoiai keskara kenefe iskafakī: ‘Ēfe Fake Jesús iskaratīa keyokōi afe yorafo ichanāfai afe ipaxanōfo. “Niri fekāfe,” ato faino, nikakanax inimakōikani. Nāskakaxō ēfe Fake feta pikani afe ipaxakakī,’ ixō Epa Niospa yoia. Nāskakē Epa Nios āfe meka mā chanīmara fatiro,” ixō ea yoia.

¹⁰ Ea yoiaino ē a nāmā feopakekafana, “Mī fāsi sharakōi,” ixō yoixiki. Ē askafaino ea yoia iskafakī: “Ea askafayamafe. Ēri Nios yonoxomiski mī axomis keskafakī, a Nios Ifofaa fetsafāferi askafamisfokī. Jesús mato yoiai keskara mā kachikiri famisma. Nāskakē Nios fisti nāmā nō feopakekafā yoitiro: ‘Mī fāsi sharakōi. Mī ēfe Ifokōi,’ ixō anori fisti nō yoitiro. Nā Niospa meka yoimīsife yoimīsfo keskarīfakī ēri Jesúsnoa yoimis Epa Niospa ea shināmanaino,” ixō ājirinī ea yoia.

Jesús mai ano afianā oxiai keskara yoi

¹¹ Akka ē anā ēfe namapa ōia keskara anā ē mato yoinō mā tāpinō. Epa Nios ika anoa nai mēranoa ē ōia. Fepoti fepekemea keskara ē a mēra ōia. Nāskara Epa Nios ika ari xafakīakōi ē ōia. Nāno kamayo oxokōi ē ōia. Nā kamayo kamaki Jesucristo nōko Ifo tsaao. Āfe ane ichapa. Āfe ane rafeōna ē mato yoinō. Fētsa, “Nā Yoia Keskara Akōimis.” Akka āfe ane fetsari, “Chanīmīma.” Nāato chanīmakōi yora chakafo omiskōimani. Niospa meka nikakaspamisfono a omiskōipakenakafō mēra ato potaxii.

¹² Āfe fero rafe chii xofisai keskara. Fakishi chii xofisaino yōra ōisharatiro. Nāskarīfakī nōko Ifāfe yorafāfe āto ōiti mēraxō shināifo keskara tāpia. Xanīfāfe maiti sharakōifo ichapakōi maiafo ika. Āfe femānāki āfe ane kenea. Ares fisti nā ane tāpia.

¹³ Rapati chainīpa safea. Nā rapati imiki momoa. Nāskara ōikī ea shināmana Jesús noko nāxoni. Āfe ane fetsari, “Niospa Meka,” famisfo.

¹⁴ Afe yorafo nai ariax kamayofo oxokōi kamaki āto Ifo kachiori fokani. Āto rapatifo oxokōi chainīpa safeafo. Nā rapati oxokōi rama pātsaxona keskarafo.

¹⁵ Āfe axfa mēranoa keno chainīpa ikiaikōi ē ōia. Akka āfe kenoma, āfe meka. Āfe mekapas maifo tii anoafō nikayospamisfo omiskōimani. Maifo tii ato īkinā, fetsafo nikayospamisfo ato kerexkai omiskōimakōi. Āfe meka nikakaspamisfono Nios ōitīfishkikōini. Akka Jesúsxō ato omiskōimani, omiskōipakenakafō mēra ato potaxii.

¹⁶ Jesús āfe ane fetsa āfe rapati chainīpaki kenea mānākiri keneta maikiriri kenea iskafakī: “Xanīfo maifo tii anoa āto Xanīfo finakōia, askatari āto Ifo finakōia,” ixō kenea.

¹⁷⁻¹⁸ Askatari ē ōia ājiri fetsa xini ano nīxō fāsikōi yoia iskafakī: “Xanīfofo ikaino, sorarofō āto xanīfofo ikaino, āto xanīfofo fe rafea ikaino, feronāfakefo mitsisipafo ikaino, kamayofo ikaino, a kamayofo kamaki tsaofafo ikaino, keyokōi Niospa meka nikakaspamisfo ikaino, ato yonomatifoma ikaino, a āto yonomatifo ikaino, yora afamafori ikaino, a yora finakōiafo ikaino, keyokōi Niospa ato namaxii,” ixō yoia. Nāskakē ishpifo ato yoia: “Fekāfe āto nami pixikakī,” ixō nā ājirinī ishpifo kena.

¹⁹ Askatari afianā ē ōia a nōko Ifo Jesús noikaspai nā yoinā pōfe keskara yafi maifo tii anoa xanīfofo āfe sorarofoya ēfe namapa ōia keskara ē ōia. Mā ichanāfo Jesús āfe kamayo kamaki tsaokē afe yorafoya retepaikani.

²⁰ Akka ato retetamaroko Jesús ato achia chiifā mēra ato potaxiki. Nā ato pāramisto, “Ē Niospa meka mato yoimis,” ifīax āa chanīmis. Nāato na yoinā pōfe keskaraōxō tsōa atiroma keskara famis Satanás yōshixō. Nāskaxō keyokōi yorafokī kenea nā marakkaōxō yoinā pōfe

keskara tāpīxikani. Nāfāfe yoimisfo iskakafakā: “Mī ēfe nios. Ē mia noi,” ixō anori yoinā pōfe keskara yoimisfo. Akka nā ato pāramisto yōra atiroma keskafakī afama mīshiti faito nāfāfe ōiafo. Nāskakē ato pārakōia. Nā yoinā pōfe keskara fe nā ato pāramis naafomano iriyafi Jesūs ato chiifā mēra pota.

²¹ Nā rafeta āto inafō Jesūs āfe kamayo kamaki tsoaxō āfe mekapa ato reteaino nai fetseāfo. Mā naafono ishpīfo atoki ichanākaxō āto nami pikani māyākōiafo.

20

Jesūs Satanás achixō nexaxii mil xinia

¹ Askata Niospa ājiri Nios ika ariax fotoaito ē ōia, chamis keskara tsoma. Nā niafaka chakafo kinifā fakishifā mēra ikafoki atoki fepoti fepoa keskara ē ōia. Nā Niospa āfe ājirinī fepotinī āfe chamis yafi kaninā efapa tsoma ika.

² Tsomaxō nā ronōfā keskara achia. Nā ronōfā keskara nā niafaka chakakōi Satanás. Nā achixō nexa.

³ Nāskaxō kinifā fakishifā mēra pota. Potata akiki fepokōia mil xinia a mēra inō anā yorafo pāranōma. Mā mil xinia finōano afianā kāimayoxii samarakatama chaimashta anā mai ano kafāsayonō.

⁴ Askata xanifāfe tsaotifo Epa Nios ika anoa ē ōia. Jesūs afe yorafo yoia nā tsaoti kamaki tsoafono, “Mā yoitiro fatofomākī omiskōipakenakafo mēra foaifoma, akka fatoforimākī a omiskōipakenakafo mēra foaifo.” Askano nānoari ē ōia nā Jesūs chanīmara faafo yamī ato textenifo. Ato texteyoafomano yoiyopaonifo: “Jesūs nōko Ifo,” fayopaonifo. Niospa meka ifofamisfona, nāskakē ato textenifo. Akka nāfāfekai nā yoinā pōfe keskara yafi āfe nimofō yoimisfoma iskakafakā: “Mī nōko ifo nios. Nō mia noi,” ixōkai anori yoimisfoma. Askatari aō ato tāpinōfo āto mēke yafi āto femānā kenemisfoma. Nāskakē nā yoinā pōfe keskara atoki ōitīshkikī ato textemani. Mā nai fetsefiāfono Jesūs ato otoani. Mā otokaxō Jesūs feta maifo tii anoāfo mil xinia yorafo tii ato ikināfo.

⁵ Nāfo mā otoafono mā mil xinia keyoano fetsafori Epa Niospa ato otoaxii.

⁶ Shinākapo efe yora mīshitchi, mato yoiāi keskara. Noko Epa Niospa otōfakī taefaxii. Noko katonī afe yorafo nō inō. Epa Nios feta Cristo noko yoiāi keskara nō fetsafo Epa Nios kīfixomīs. Nō omiskōifikatsaxakī Jesūsnoax omiskōifikatsaxakī naax nō omiskōipakenafo mēra kanakama. Askatamaroko Cristo ika anoxō a feta fetsafo nō iikixii. Nāskakē Jesūs keskara shara ikax nō fāsi inimaxii.

Satanás kinifā chaikōi mēranoa kāimayoi anā yorafo pāranō. Ato askafaino koshikōi anā kinifā mēra potaxii anā kāipakexanōma

⁷⁻⁸ Askata mā mil xinia finōano Satanás kinifā fakishifā mēranoa anā kāimayoxii anā maifo tii anoāfo ato pārayonō. Askata mā kāixō nā Nios nikakaspaifo maifo tii anoāfo ato ichanāfai nā Niospa yorafo ato retemaxii. Ichanākani ichapakōifo. Nā Nios nikakaspamisfo tsōa ato tanātiroma. Gog anoax fekāta, Magog anoax fekāta, ikanax ichanāfo Nios nikakaspamisfo.

⁹ Maifo tii anoāfo ato ichanāfāxii Niospa yorafo ikafo anoa ato cheteakenōfo ato retexikakī. Ato askafaifono Epa Niospa afe yorafo noikī ato ifixii. Nā yorafo Satanás ichanāfaa ono nai mēraxō atoki chiifā potano nai fetsekani anā tsoa pishta ninakama.

¹⁰ Akka nā Satanás niafaka chakata yorafo feparamiskōikē Epa Niospa chiifā mēra pota. Nā taefakī nā yoinā pōfe yafi nā ē mato Niosnoa mato yoimisra iki a chanīmis ato mērari Satanás niafaka chaka Epa Niospa pota. Nā tii chiifā mēranoax omiskōikani xatenakafoma.

Jesūs chanīmara faafoma ato omiskōimaxii

¹¹ Askata xanifāfe tsaoti oxokōi efapakōi ē ōia. Nāno Epa Nios tsoa. Akka mai fe nai anā ano ikama.

¹² Askata ē ōia nā xanīfofo fe nā yora afamāfori nakanax Epa Nios tsoa ano niafo. Nāno niafono Epa Niospa āfe kirikafo fēpea. Kirika fetsari fēpea. Nā kirikakī nā Ifofamisfo atoki kenea. Akka a Ifofamisfoma atoki keneama. Akka nā kirikanā āfe ane Nīpamisfo. Nā nayoxoma apoonifo keskara kirikafo mēra keyokōi Epa Niospa mā kenenī. Nāskakē nā afara chakafapaonifo keskara atoki kenexō ato ispai tāpinōfo chanīmakōi ato omiskōimaxii.

¹³ Nā āsamisfo fe mai anoax namisfori askatari fetsafori nafiakanax otōyokanima keyokōi namisfo Epa Nios āfe ferotaifi feafo. Nā chakafamisfo tii Epa Niospa ato omiskōimapakea.

¹⁴ Keyokōi nā Niospa meka nikakaspamisfo Epa Niospa ato chiifā mēra pota. Mā nafianifono iskaratīa afianā ato chiifā mēra potaito ē ōia. Nānoax omiskōikani xatēpakenakafoma.

¹⁵ Akka nā kirika āfe ane “Nīpamisfo” a mēra Epa Niospa āto ane kenemisma, nāfo chiifā mēra pota. Nāskara ē ōia Epa Niospa ea ōimanaino a ixiāi keskara mai keyoaino.

21

Nai yafi mai fenakōi Epa Niospa onifaxii

¹ Akka nā ēfe namapa ōia keskara Epa Niospa anā ea ōimana. Ē ōia nai yafi mai fenakōi Niospa onifaa. Nā nai yafi mai taefakī onifani yamarisatana. Fakafāri yamarisatana.

² Askano ē ōia Niospa yorafo nāfāfe Jesús Ifo shara famisfo nai mēranoafo Epa Nios ika ariax fotokani. Nāfo ikafo Jerusalén fena ano. Nā Jerusalén fena Nios ika ariax nāmā fotoa nāno ikafo. Fotoaifono ē ōia fāsi sharakōi. Akka kēromā āfe sama sharakōi safetiro itipinīsharaxikī fene fe fianāxiki. Nāskari fakī Epa Niospa nā Jerusalén fena itipinīshara faa sharakōi inō afe yorafo nāno afe nīpaxanōfo.

³ Askano Epa Nios tsaosa ano meka achakōi ē nika. Yoia iskafakī: “¡Aicho! Iskaratīa Epa Nios yorafo fe ixikiki. Ato mēra ixii nāfo afe yorafo inō, nā yora fisti keskara.

⁴ Ato kexesharaxii anā tsoakai omiskōiitiro. Ato noikī oiaifono Epa Niospa ato shināmasharaxii āto fēo tereaxoxii anā shināchakakakima tanaima inimanōfo. Ato kexeaino tsoakai anā natiro. Nārikai manomitsai oiakanima, anārikai paemekanima. Afara chakako iyopaoni keskarakai anā askanakama,” ixō yoia.

⁵ Askata Niospa āfe tsaoti kamaki tsoaxō yoikī iskafaa: “Ē keyokōi fenafai,” ixō Niospa yoia. “Ēfe meka chanīmakōi. Nāskakē nā mī nikai keskara kenefe,” ixō ea yoia.

⁶ Askaxō anā Niospa ea yoia iskafakī: “Mē aka. Iskaratīa ē yoiyoni keskara mē keyoa. Afara onifataima ē iyopaoni. Afeṭāra maifo tii keyoi eres fisti ē yoitiro. Ē keyokōi ikinā. Ēfi nīpamiski. Fetsa nōamāikī yoitiro iskafakī: ‘Ē faka fenakōi naxikima,’ ixō yoitiro. Nāskarīfai fetsa ipaisharapaikōikī yoitiro iskafakī: ‘Ēa ē isharatiro. Ē Nios yopakōi,’ ixō anori yoiaito ē inimakī ifitiro, efe ipaxanō.

⁷ Fētsa ea kachikiri fatamaroko nā naitīa ea Ifofasharaxō nāato keyokōi nā ē mia yoia keskara fixii. Ē kaxpa ināxii. Ē āfe Nios ixii. Akka ēfe fake ixii.

⁸ Akka fetsa ratei eōnoax omiskōikaspakī ea kachikiri faa, askatari fētsa ēfe meka nikakaspamis, fētsari afara chakako fetsa fetsatapafo xatekaspai, askatari fetsari retemitsamis, fetsari āto āfima chotamis, askatari kēromāri āto fenema chotamamis, fētsari koshōiti tāpiax nā niáfaka chakako fe rafemis, askatari fētsari ea noitamaroko afara fetsa noikī, ‘Na ēfe nioski,’ famis. Nāskakē askarako fe nā chanīmisfo afokai efe nīpanakafoma. Chiifā mēra nā omiskōipakenakako mēra ipanakako. Anoaxkai faki fonakafoma,” ixō Epa Niospa ea yoia.

Jerusalén Fena

⁹ Askata Niospa ājirinī siete kecho keskara mēra afara chakakōi fospia maifo tii ano nachixii ato omiskōimanō fētsa ekeki oxō yoikī iskafaa: “¡Ofe! Ē mia afara sharakōi ōimanō. Akka feronāfāke mā āfiyaxō kexesharatiro. Nāskarīfakī Jesús chanīmara faafo afe yorafo ifia. Ofe. Ē mia ōimanō,” ea faa.

¹⁰⁻¹¹ Askano Niospa Yōshi Sharapa ea ikināino Niospa ājirinī ea machi efapa keyakōi ano ea iyoa keyokōi ē ōinō. Jesús chanīmara faafo nā Nios ika anofo ato chaka soaxona nāfo nai mēranoa Epa Nios ika ariax fotoaifāfe ea ōimana. Na māchifā keyakōi anoxō ea ōimana. Nāfo ika ano āfe ane Jerusalén Fena. A mēra ikafo Jesús Ifo shara famisfo. Epa Niosri ato fe ika. A ato fe ika ano fakkai fakkais isharai. Tokiri fakkai fakkais ikai keskara sharafinakōia. Nā tokiri āfe ane jaspe fēxta shara, tokiri fetsa āfe ane cristal. Shara fakkai fakkais ikai keskara.

¹² Nā tokiri kenea efapa Jerusalén foake tii fayakena. Nā kene keyakōi doce fepotiya. Nā doce fepoti ano Niospa ājiri niafo kexesharaxikakī. Israel iyopaonito āfe doce doce ipaoni. Nā docefāfe āto fakefo paxkanifo. Nāskakē fepoti tii āto anefo doce kenea.

¹³ Nā kene keya āfe fepoti ichapaya. Xini oaikiri tres ikaino, xini kaikiri tres ikaino, xini kaima anori tres ikaino, xini oaima anori tres ika fepoti ichapaya.

¹⁴ Nā kene keyakōi tokiri doce efapanāfā kamaki kenea. Jesúsnoa yoimisfāfe āto anefo nā tokiri doceki kenea.

¹⁵ Niospa ājirinī nā ea taefakī yoiaito, nāato tanati oro tsoma, Jerusalén Fena tanaxii, āfe kene yafi āfe fepoti tanaxiki. Nā tanati tafa chainipa keskarafīax oro ōshi keskara sharakōi.

¹⁶ Nā Jerusalén Fena āfe kene keya senēsharakōi. Āfe chainipa fe āfe xākī nātixō rafe. Āfe keyari nātixori. Niospa inapa tana dos mil dos cientos kilometro āfe chainipa fe, āfe xākī, āfe keyari.

¹⁷ Āfe kenefo keyakōi a akiki kenea sesenta y cuatro metros. Nā Niospa ājiri yorafāfe tanamis keskari fakī nāatori metropa tana.

¹⁸ Nā Jerusalén Fena sharakōi. Nā manishomo fēxta nō ōimis keskara sharafīax ōshi keskara. Nāōxō Epa Niospa Jerusalén Fena onifaa. Askatari a kenea keyakōi nā tokirinī āfe ane jaspe Niospa onifaa.

¹⁹ Tokiri sharakōifo fetsa fetsatapafo Epa Niospa onifaa, nā doce tokiri kamaki nā kene keya tsoa. Taeyoi jaspeki iyoa. Āfe pefeta zafiroki ika. Āfe pefetari agataki ika, āfe pefetari esmeraldaki ika,

²⁰ āfe pefetari onīceki ika, āfe pefetari cornālināki ika, āfe pefetari crisolitoki ika, āfe pefetari beriloki ika, āfe pefetari topacioki ika, āfe pefetari crisoprasaki ika, āfe pefetari jacintoki ika, āfe pefetari amātistaki ika; nāfo sharakōifoki nā kene Epa Niospa nimainīfōfāni.

²¹ Nā kene keyapa āfe fepotifo perla oxo efapa Niospa onifaa. Nā perla tokiri keskara oxo sharakōi. Nā perla fistiōxō fepoti fisti onifaa. Nāskakē doce fepoti onifaa nā perlaoxō. Nā Jerusalén Fena āfe fai manishomo fēxta sharakōi keskara oke rafe nō ōitiro. Manishomo fēxta keskara sharafīax oro ōshi keskara shara.

²² Akka Epa Nios Nios kīfiti pexefā anoma. Epa Niospa nā afama mīshti fatiroxakī nōko Ifo Jesús noko fe Jerusalén Fena mēra imisfo. Askatari yorafāfe Epa Nios kīfiti pexefā nā anā yopanakafo.

²³ Nāskarīfakī anā xini yafi oxe yopakanima Epa Nios fe Jesús ato fe ikano. Epa Nios nāno ato fe iXō ato chaxaxoni. Jesúsri ato askafaxōi ōsharakōinōfo. Anā afaa yopakanima.

²⁴ Mai fetsa anoaxri fofāsatirofo Epa Niospa ato chāxano. Xanīfōfori Jerusalén Fena mēra ikikaxō a aya imisfo afara sharafō ināxikani.

²⁵ Nāno fakishri anā ikima. Fakishpakenakama. Akka anā Jerusalén Fena āfe fepotifo fepopakenakama.

²⁶ Akka fetsafori maifo tii anoax Jerusalén Fena mēra ikikakī a aya imisfo ato afara sharafō ināxikani.

²⁷ Akka afara chaka nā Jerusalén Fena mēra ikitiroma. Nā chaka shināmīso fe a afara chakafamīso, a ato pāramisfori afo ikitirofoma. Akka Jesús āfe kirika mēra āto ane keneano afe ipaxatirofo. Nāfo fisti Jerusalén Fena mēra ikitirofo Jesús fe ipasharaxikakī.

22

¹⁻² Askano ēfe namapa ōiai keskara Niospa ājiri fētsa ea ōimana afe keskaramāki Nios ika ano. Nios fe Jesús tsoa anoax faka shara fakkai fakkaisai keskara kafani, fai nēxpakīa. Afara choshta a mēra ikitiroma. Nāno ikafāfe nā faka shara ayapaiyaitīa ayatirofo, nāskakē nomipakenakafoma. (Nāskarīfakī nāno Niospa noko potapakenakama noko ikipakenaka.) Nānori fai nēxpakīa ifi nia ika. Faka takai raferi nīi xokoa ika. Nāno ikafāfe nā nīi fimi pipaiyaitīa pitirofo. Nāskakē fonāipanakafo. Nāskarīfai Nios nofe ikano nō aōnoax omiskōitiro nō nisharapakenaka. Nā ifi oxe tii fimimis. Āfe pei tsasimīso xachoko fena shara ipanaka. Nāskarīfai nā chanīmara faafo tii maifo tii anoax Niosnoax meema sharakōi ipanakafo.

³ Nā Jerusalén Fena ano Epa Nios fe Jesús nofe ixii. Nō ato fe yorakōixō nō ato noikōixii. Nō āto yonoxomiskōi nō ixii. Atoki fanāisharayanā nō ato yoisharapakenaka. Akka nōko mai xini ano afara chaka fetsa fetsatapafo imis. Akka iskaratīa nā Jerusalén Fena ano afara chaka a mēra itiroma.

⁴ Nānoax nōko Ifo fe āfe femānāki ōinōnāfafāixikani. Āto femānāki āfe ane ato nētamana.

⁵ Nōko Ifo Nios ari ikafo ato penafaxōa. Nāskakē anā rāpari yafi xini yopatirofoma. Anokai anā fakishima. Nāskax afe xanīfo ipanakafo.

Jesús chaima oi

⁶ Askata Niospa ājirinī anā ea yoia: “Nōko Ifo Niospa āfe Yōshi Sharaōxō a āfe meka yoimisfo āto ōiti mēraxō ato tāpimamis a afara afeskara ixiai keskara afe yorafori ato tāpimanōfo. Nāskarīfakī iskaratīa āfe ājiri fetsa nīchia afara afeskara ixiai keskara a yonoxomisfo tii ato tāpimanō. Nā ē mia yoiai keskara chanīmākōi. Keyokōi ēfe meka mā chanīmara fatiro,” ixō ea yoia.

⁷ Akka yoikī iskafaa nōko Ifo Jesús yoia iskafakī: “Ē nai mēranoax mai ano matoki nokorisai. Nā mī ōia a inōpokoai a mī nikāfori, nāfo mī kenetiro. Akka nāfo chanīmara fakakī kachikiri fayamakanax inimākōixikani,” ixō Jesús ea yoia.

⁸ Ēkīa Juan ē nika, askatari ē ōia ea Niospa ājirinī ōimanaino. Nāskakē ē a nāmā feopakekafana ēfe Ifo keskara shināi. Nāskaxō, “Mī fāsi sharakōi,” ē fakerana.

⁹ Ē askafaito ea yoia iskafakī: “Ea askafayamafe. Ēri mia keskaraki. Mī ikaino, Jesús chanīmara faafo ikaino, āfe meka yoimisfo ikaino, keyokōi nā mī rama kenea keskara chanīmara faafo fe, ēri mato keskara nōko Ifo Nios ē yonoxomis. Akka Epa Nios fisti mī Ifofatiro. Nā fisti nāmā mī feopakekafatiro,” ea faa.

¹⁰ Askata afianā ea yoia iskafakī: “Nā mī kenea oneyamafe. Nā mī kenea keskara samama askakōi. Nāskakē a mī kenea keskara keyokōi yorafāfe tāpinōfo.

¹¹ Akka mā Jesús nokoaino nā nikakaspamisfāfe chakafakī finākōixikani. Yora chakafamisfāferi nāskari faxikani chakakōi fakakī. Akka nā Niospa yoiai keskara amisfāfe nāskarakōi

fakakī mimakōi faxikani Niospa yoiāi keskara akakī. Nā Jesús keskara shara imisfo nāfori isharakōixikani āto Ifo ifosharakōifakani,” ixō Niospa ājirinī ea yoiā.

¹² Nāskaxō Jesús anā yoiā iskafakī: “Ea nikasharakāfe. Ē matoki samama nokorisai. Nokoxō ē mato yoiyōa keskara ē mato ināsharaxii. Nā afara shara famisfo ē ato shara fata nā afara chakafamisfo ē ato omiskōimaxii.

¹³ Afarafo onifataima ē iyopaoni. Ēfi nīpamiskī. Ē niixatepakenakama. Nā mātō mai keyoi eres fisti ē yoitiro,” ixō ea yoiā.

¹⁴ Anā Jesús yoiā iskafakī: “Nō Jerusalén Fena mēra ikixō, nā ifi āfe fimi pipaiyaitīa nō pitiro. Nāskarīfiai nō Epa Nios fe ikaino ares fisti noko nimapakexatiro. Nā Jesús chanīmara faafo ato chaka soaxona nāfo fisti Epa Niospa ato ikimatiro afe īpaxanōfo.

¹⁵ Nāskakē nā yora chakakōi paxta pōfe keskarafo fe, a koshoiti tāpiafo, nā koshoiti chanīmara faifori, feronāfāke āfe āfima chotamis, kērofāferi āto fenema chotamamisfo, retemitsamisfori, Nioskōima noikī ifofamisfori, chanīmisfori, nā chanī noimisfori, askara yorafokai Jerusalén Fena mēra yoiā ikitirofoma.

¹⁶ “Ēkīa Jesús, ēfe ājiri matoki nīchia ē mia yoiā keskara nā ea Ifofafo tii ichanāfo anoxō ato tāpimanō. Ēkīa David āfe fena. Ēfi nā fishi efapa penaino ōimisfo keskarakī. Nā fishi ōikī nō tāpitiro mā penaino. Nāskarīfiai mē chaima oaino tāpikanax itipinīsharatirofo Jerusalén Fena mēra efe ipaxakakī,” ixō Jesús ea yoiā.

¹⁷ Askano Niospa Yōshi Shara feta Jesús afe yorafāferi yoikakī iskafatirofo: “Jesúski fekāfe,” ato faifono, fetsafāferi nikakaxō ato yoitirofo: “Jesúski fekāfe,” ato fatirofo. Fētsa nōamā ikī faka yopai, faka ano katiro mā ayax anā nōamā itirofoma. Nāskarīfiai fētsa āfe chaka xatepai, Jesúski otiro Epa Nios fe ipaxakī. Afaa inātama Jesús chanīmara faax, afe ipaxatiro.

Juan mā mekai xatekī Jesús yoiāi keskara keneni

¹⁸ Ēkīa Juan, afara ixiai keskara ē mato kenexona. Ē mato kenexonai keskara chanīmakōi. Nā meka ē mato yoiāi nikasharakāfe. Ē mato kenexona keskara akka fētsa afianā meka fetsa shinākī keneax, na kirika mēra kenea mā ōiai keskara omiskōipakenakafo chanīmakōi Epa Niospa keyokōi nāfo omiskōimaxii.

¹⁹ Askatari a afara afeskara ixiai keskara ē kenea fētsa na meka atiri soakē Epa Niospari āfe ane soaxii āfe kirika mēranoa. Nāskakanax nā Jerusalén Fena shara mēra ikitirofoma. Ē kenea keskara soakanax nā Epa Nios afara shara yoiyoni keskara, aya ipanakafoma.

²⁰ Jesús yoiā keskara nānori ē mato kenexona. Nāato yoikī iskafaa: “Chanīma, ē matoki samama nokorisai,” ixō yoiā. Askapainō. Nōko Ifo Jesús orisapainō.

²¹ Mā Niospa yorafo. Afara afeskara afiaino nōko Ifo Jesús mato noixō mātō ōiti mato fēpeaxosharapainō. Askapainōra. Ēri mato fāsi shināi. Nā tii.

Ēkīa Juan